

Bëngbe Bëtsa
Cabëngaftaca
Entsoyebuambna



New Testament in Camsá

**Bëngbe Bëtsa Cabëngaftaca Entsoyebuambna
New Testament in Camsá**

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2016-05-05

Contents

San Mateo	1
San Marcos	63
San Lucas	100
San Juan	162
Hechos	208
Romanos	265
1 Corintios	297
2 Corintios	327
Gálatas	347
Efesios	359
Filipenses	370
Colosenses	377
1 Tesalonicenses	385
2 Tesalonicenses	391
1 Timoteo	395
2 Timoteo	404
Tito	410
Filemón	414
Hebreos	416
Santiago	441
1 San Pedro	449
2 San Pedro	458
1 San Juan	463
2 San Juan	471
3 San Juan	472
San Judas	474
Apocalipsis	477

San Mateo

Jesusbe bêts taitanga

(Lc 3.23-38)

¹ Quemënga immamna Jesucristbe bêts taitanga: Jesucristna Rey David y Abrahám bentsána entšá inamna.

²⁻⁶ Abraham yojamna Isaache taitá;
Isaacna Jacobëbe taitá
y Jacob, Judá y chabe catšátangbe taitá.
Judá, Fares y Zarabe taitá; y chatbe mamá Tamar yojamna;
Fares Esrombe taitá
y mua Arambe taitá.
Aram Aminadabëbe taitá;
Aminadab Naasonbe taitá
y Naasón Salmonbe taitá.
Salmón Boozbe taitá y muabe mamá Rahab yojamna;
Booz Obedbe taitá y muabe mamá Rut yojamna;
y Obedna Isaíbe taitá.
Isaí Rey Davidbe taitá;
David Salomonbe taitá y muabe mamá yojamna chë Uríasbe shema inamná.

⁷⁻¹¹ Salomón Roboambe taitá;
Roboam Abíasbe taitá
y Abíasna Asabe taitá;
Asa Josafatbe taitá;
Josafat Jorambe taitá
y Joramna Uzíasbe taitá.
Uzías Jotambe taitá,
Jotam Acazbe taitá
y Acazna Ezequíasbe taitá.
Ezequías Manasesbe taitá;
Manasés Amonbe taitá
y Amón Josíasbe taitá.
Josíasna Jeconías y chabe catšátangbe taitá yojamna.

Chë Babilonioca entšanga chë israelitënga tmojánishëche y choca imojanëtámena ora, Josías chë básenga yojánabamna.

¹²⁻¹⁶ Ya Babilonioca ndutámenënga ora;
Jeconías Salatielbe taitá;
Salatiel Zorobabelbe taitá.
Zorobabel Abiudbe taitá;
Abiud Eliaquimbe taitá
y Eliaquimna Azorbe taitá.
Azor Sadoche taitá;
Sadoc Aquimbe taitá
y Aquimna Eliudbe taitá.
Eliud Eleazarbe taitá;
Eleazar Matanbe taitá
y Matán Jacobëbe taitá.
Jacob Josebe taitá yojamna y Josena Mariybe boyá.
María Jesusbe mamá, Jesús chë Bëngbe Bëtsabe Uámana Uabuayaná, chë Cristo ca uabainá.

¹⁷ Chcasna, Abrahám bentsana David bentscoñe bnétsana canta bêts pamíllanga imojéftsemna. Davíd bentsana y chë israelitënga Babilonioca imojanëtaménentscuana inye bnétsana canta bêts pamíllanga; y inye bnétsana canta bêts pamíllanga chë Israeloca entsanga imojanëtaménentsana, chë Cristo tojanonýnántscóñe.

Jesucristo tojanonýná
(Lc 2.1-7)

¹⁸ Jesucristo jónýnanamna mëntsá tojanopasá: María tbojanšbuachená Joséftaca jobouamayama, pero cabá ndoñe cánýiñe ibontsiyena ora, tojanopasá Mariyna ngomaná yojoquéda chë Uámana Espíritbe obenánaca. ¹⁹ José, Mariybe boyá, canýe nyetsca soyënguiñe tšabá jamama bošá inamna. Cha ndoñe yontseboše entsangbe delante cha mal jaquédana; chíyecna tojanjuabó nye iytëcana Maríybentsana jtsojuánañana. ²⁰ Y chca yojtsejuabnantscuana, mo otjenayoquécá canýe Bëngbe Bëtsabe ángel tbojáninýe y chana Josébioye tbojaniana: “José, Davíd bentsana entsá, ndoñe matenócochinýenana Maríaftaca jobouamayama, er chë bochantse bomna šešona chë Uámana Espíritbe obenánaca cha bochantse bomna. ²¹ María canýe šešona bochantse bomna y cha Jesús ca cochjuabaye. Chca echantsabaina er cha chabe entsanga chëngbe bacna soyënguentšana echanjâtsebacaye ca” —chë ángel tbojaniana.

²² Lempe chca tojanochnéngo, cachcá chaotsemnama ntšamo Bëngbe Bëtsá chabe juabna oyebuambnayëngbiajana tojanayancá. Chë oyebuambnayá mëntsá tojánayana:

²³ Chë cabá boyabása nduabuatmá ngomamaná echanjoquéda

y canýe šešona boyabásetema bochantse bomna,
y cha mochanjuabaye Emanuel ca.

(Emanuel endayana “Bëngbe Bëtsá bëngaftaca ca”.)

²⁴ José chë otjénayentsana tojanofšená ora, tojanma ntšamo chë Bëngbe Bëtsabe ángel tbojanmandacá y Maríaftaca tojanobouamá. ²⁵ Pero ndoñe cánýiñe ibontsaniana, sinó nye chë šešonatema tojanonýná orscana. Chë šešonatema tojanonýná orna, José chábioye Jesús ca tbojanabaye.

2

Reyes Magos Jesúsbioye tmojána

¹ Herodes judiëngbe rey yojamna ora, canýe pueblo Judeoca, Belén ca uabáinentše Jesús tojanonýná. Chentsana, báseftanga, estrellënga uatsjëndayënga, magos ca uabáinënga, canýe bêts pueblöye Jerusalén ca uabáinoye tmojánashjajna. Chënga tmojánabo shinýe bocanöye luarëngocana. ² Jerusalemocna chënga, Heródesbioye tmojána y tmojanënoticiá: “¿Ndayentše yojtsemna chë judiëngbe rey jtsemnama tojonýná cha ca? Bëngbe luarëngoca shinýe bocanöye chabe onýnana estrella fsënjinye y as muentše cha jaboadorama tifjabo ca.”

³ Rey Herodes chca tojanuena ora, corente yojtsenócochinýena, y nyetsca chë Jerusalemëntše oyenëngnaca. ⁴ Chentsana chë rey tojánachembo nyetsca chë judiëngbe bachnangbe amëndayënga y chë judiëngbe ley abuatambayënga jenöyeunayëngama. Mëntsá tojanatjá: —¿Ndayentše chë Bëngbe Bëtsabe Uámana Uabuayaná, chë Cristo ca uabainá, jónýnama ibomna ca?

⁵ Chënga tmojanjuá: —Judeoca, Belén pueblentše ca. Bayté entsemna chë Bëngbe Bëtsabe juabna oyebuambnayá Miqueas mëntsá tojanábema:

⁶ Y tšëngaftanga, Judeoca Belenentše oyenënga,

canýe mandayá tšëngaftangbentsana echanjabo.

Cha nyetsca chë Judeoca mándayëngbiama más uamaná echántsemna,
y atšbe entsanga Israeloca echántsanýena.

Chíyecna tšëngaftangbe pueblo ndoñe nye batšá uámana pueblo quenátsmëna ca.

⁷ Chora Herodes iytēcana chë maguënga tojánachembo y cuedádoca tojanatjá ntseco ora chë estrella tmojáninÿama. ⁸ Herodes chë soyënga yojtsetátšëmbo ora, Belenoye chë maguënga tojanichamó, y mëntsá tojanéyana: “Choye motsajna y tšabá chë šešona šmochjánguango. Chašmojinÿena ora, šmochjabëuenaye, as átšnaca chayobená jama chë šešona jadórama ca.”

⁹ Rey Herodes chë soyënga tojánëyanentsana, chë maguënga tmojtsatanoñe. Chora cachiñe tmojtandinÿe chë chëngbe luarëngoca tmojáninÿe estrella y yojtsanebnatsana chë šešona yojtsemnëntscoñe. Chentša juatsbuacá chë estrella yojójaiye. ¹⁰ Chë maguënga chë estrella tmojáninÿe orna, corente oyejuayënga imojtsemna. ¹¹ Chë yebnoye tmojánamashjna ora, chë šešona tmojáninÿe chabe mamá Mariáftaca. Chorna, tmojanoshamentšé y chë šešonatema tmojanadorá. Chora chëngbe cajontémënga tmojanëtsécaca y tmojanatštá castellano, incienso y canÿe botamana uanguëtše soye, mirra ca uabáiniye. ¹² Chentšana, mo canÿe otjenayoquécá Bëngbe Bëtsá chë maguënga tojanabuayená rey Herodesbiajana ndoñe chamondesshëcuanama. As chënga chentšana inÿe benachëjana cachëngbe luarëngoye tmojésanshëcuana.

Egiptó luaroye tmojtsanachá

¹³ Chë maguënga tmojtsatanoñe ora, otjénayoca José canÿe Bëngbe Bëtsabe ángelbioye tbojáninÿe y cha mëntsá tbojaniyana: “Motsbaná, chë šešonatema y chabe mamá mesëbiatše y Egiptoye motsachá. Herodes chë šešonatema bochanjánguango jtsóbama, chíyeca choca cochtsoquedañe atše chacbochjábuayenantscuana ca.”

¹⁴ As José tojantsbaná, chë šešonatema y chabe mamá tojesanëbiatše y ibeta Egiptó benache tojëftsanbocna. ¹⁵ Y choca imojtsanomñe Herodes tojanóbanëntscuana. Chca tojanopasá, cachcá chaotsemnama ntšamo Bëngbe Bëtsá chabe juabna oyebuambnayanabianayana tojanayancá. Chë oyebuambnayá mëntsá tojánayana: “Egiptocana atšbe uaquiñá sënjanchembo ca.”

Herodes tojanmandá basetémënga jtsëbáyama

¹⁶ Chë maguënga tmojtsaningñema Herodes tojántatšëmbona ora, puerte tbojánetna, y tojanmandá lempe jtsëbáyama base boyabásetemënga uta uata bomnënga y cabá uta uata ndbomnënga, Belén y chë juachañe pueblënguentsënga. Uta uatama cha tojanjuabó, er uta uata yojtsemna chë maguënga chë estrella tmojáninÿama. ¹⁷ Ntšamo chë Bëngbe Bëtsabe juabna oyebuambnayá Jeremías tojanoyebuambacá, cachcá tojanochnëngo:

¹⁸ Ramá ca uabaina pueblentše canÿe oyebuambnayana tmojanuena, ngmënaca ošachiyana y becá tsetšanánaca oyebuambnayana.

Raquel yojamna chabe básengbiama ošachiyiñe,
pero ndoñe yontseboše chamuatebiajuama,
chabe básenga ya obanënga causa ca —cha tojanábema.

¹⁹ José cabá Egiptoca yojtsomñe ora, Herodes tojanóbana. Chentšana, otjénayoca José canÿe Bëngbe Bëtsabe ángelbioye tbojáninÿe y cha mëntsá tbojaniyana: ²⁰ “Motsbaná, chë šešonatema y chabe mamá mesëbiatše y Israeloye cochtá. Chë šešonatema jóbama bošënga ya obanënga montsemna ca.”

²¹ As José tojantsbaná y chë šešonatema y chabe mamá Israel luaroye tojtésanëbiatše. ²² Arquelao Judeoca yojanmánda chabe taitá Heródesbe cuentiñe, y José chca tojántatšëmbona orna, yojtsauatja choye jama. Pero otjénayoca Bëngbe Bëtsá Josébioye tbojanbuayená; chíyeca Josena Galilea ca uabaina luaroye tojána. ²³ Choye tojánashjango ora, José tojána canÿe pueblo Nazaret ca uabáinoye chentše joyéanama. Chca tojanochnëngo cachcá chaotsemnama ntšamo chë Bëngbe Bëtsabe juabna oyebuambnayënga tmojanayancá. Chënga tmojánayana: “Nazaretocá ca Jesús mochantsábobaina ca.”

3

Juan chë Ubayaná entsanga yojanabuayiná (Mc 1.1-8; Lc 3.1-9, 15-17; Jn 1.19-28)

¹ Chë tempo, Juan chë Ubayaná, entsanga ndoyena luaroye Judeoca tojánbocna, Bëngbe Bëtsabe soyëngama jábuayenama. ² Mëntsá cha yojanëtsësnaye: “Bëngbe Bëtsabe amëndayana ya echanjóshjango. Ngménaca šmochtenójuaboye tšëngaftangbe bacna soyëngama y chca amana šmochtsajbaná y Bëngbe Bëtsabe benache šmochtishache ca.”

³ Juan yojamna canya ndabiama chë Bëngbe Bëtsabe juabna oyebuambnayá Isaías mëntsá tojánayana:

Entsanga ndoyena luaroca canya enduáye buache:

“Bëngbe Utabná echanjabo ca;

mo nda canye benache tojtseprontacá canye uámana entsá jashjanguama,

tšëngaftángnaca cachcá, Bëngbe Utabná jabama ainaniñe tšabe juabnëngaca šmochtseprontana ca” —cha tojánayana.

⁴ Juanbe entsáyá inauapormana camellbe stjénasheca y bobache yojanasnana. Cha inasaye chapulinatémënga y tjoca tjouangbe méloye. ⁵ Jerusalenoca entsanga, nyetsca Judea luarentša entsanga y chë Jordán ca uabaina béjaye béconana oyenënga imojánbocana Juan joyeunayama. ⁶ Bëngbe Bëtsábioye chëngbe bacna soyëngama jaimpáda chentšana, Juan chë Jordán béjayiñe chënga yojanëbáyana.

⁷ Pero Juan tojáninye ba fariseunga y saduceunga cha chaubáyama tmojánama. Chënga imojamna chë judiëngbeñe uánatsanënga Bëngbe Bëtsá ndoñe corente ntseyeunanama; as chora tojanéyana: “¡Mëtscuaye entsanga! ¿Nda tcmënjáuyana chë echanjóshjango uabouana castigüentsana šmochjotsbocá ca? ⁸ Bëngbe Bëtsábeñe ndegombre ošbuáchiyënga šmochtsemna, as chca chaotsinýna chë bacna soyënga amana tšëngaftanga ndegombre šmojtsajbanama. ⁹ Y ndoñe šmattsejuabnaye cach tšëngaftangbiamajayanama: ‘Abrahám bentšana entsanga fsëndmëna ca’. Er atše scuayana, Bëngbe Bëtsá quem ndëtšbéngacnaca Abrahám bentšana entsanga nanjábiamana. ¹⁰ Chë tatsnía ya entsaprontana chë betiyeshënga tbëtëjëngocana jtseshatëtsetsama. Ndaye betiye ndoñe tontseshajo, jtseshatëtšana y iñoye jtsatmetšana. Tšëngaftangaftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye.

¹¹ “Ndegombre, atšna béjayeca cbondubáyana Bëngbe Bëtsabe benache chašmuatishachama. Pero chë atšbe ústonoye echanjabá, atšbiamana más obenana bomná comna, y atše merecido taitatobuajoñe ni mo chabe shecochëtjonëshe jtsámabañama. Chë chabe benache aiñe chamojtishachëngbiamana Bëngbe Bëtsá echanjama chë echanjabábeyeca, chë Uámana Espiritu chëngbe ainaniñe cháumashënguama. Pero chë benache ndoñe chamontishachëngbiamana, Bëngbe Bëtsá echanjama chë echanjabábeyeca, corente castigánënga chamotsemnama, mo iñeshequécá. ¹² Canye entsá chabe mëtštá cucuatšinë jiyëbana, chabe trigo jtsóbobemana y chë ndoservena shácuanënga jtsejashtsëtsana. Chabe trigo chë grano uaquëcjnaye tsañe jtsabuájua, y chë ndoservena shácuanëngna iñoye jtsatmetšana. Cachcá, chë atšbe ústonoye echanjabana, chë tšabe entsanga echanjúbuaja, y chë bacna entsangna canye iñeshiñe echantsacastigaye, y chë iñe ndocna te queochátsfsana ca” —cha tojanéyana.

Juan, Jesúsbioye tbojanabaye (Mc 1.9-11; Lc 3.21-22)

¹³ As Jesús, Galileocana tojána Jordán béjayoye, Juan yojtsemnoye, cha chabuábayama.

¹⁴ Pero Juan ndoñe yontseboše Jesús juabáyama, y mëntsá tbojanianyana: —Atše šontsemna aca chašcuabaye, y ¿más atše aca cbochjuabaye ca?

¹⁵ Chora Jesús tbojanjá: —Morna chca chaotsemna. Entsemna lempe ntšamo Bëngbe Bëtsá tojamandacá jobedésana ca.

As Juan yojouena Jesús juabáyama. ¹⁶ Jesús ya uabainá yojtsemna ora, chë buyeshoicana tojtanshëbëbocna. Chorna Jesús tsbanánoye yojontjeshiye y tojáninye chë celoca atëfjniñe y chë Uámána Espíritu mo canye palomatemcá chábioye yojtsastjajuana. ¹⁷ Chora celocana Bëngbe Bëtsá mëntśá tojánayana: “Mua atšbe bonshana uaquiñá endmëna. Chabiana corente sëntsoyejuá ca.”

4

Jesús tojanobená Satanás jayëñjanama

(Mc 1.12-13; Lc 4.1-13)

¹ Chentšana chë Uámána Espíritu entšanga ndoyena luaroye Jesús tbojanánatse, as Satanás chauábama cha jisháchichiyama.

² Chentše canta bnëtsana te y canta bnëtsana ibeta ntjascá tbojanjëtana; chíyeca chora tbojaneshëntsena. ³ As Satanás tbojanobobeconá y tbojaniyana: —Aca ndegombre Bëngbe Bëtsabe Uaquiñá tcomnëse, momandá quem ndëtsbenga tandëse chaobiama ca.

⁴ Pero Jesús tbojanjuá: —Bëngbe Bëtsabe uabemana palabrënguiñe mëntśá endayana: “Entśá nye tandëseca ndoñe vida ntsebomnana, sinó entśá endobena jtsiyenana lempe ntšamo Bëngbe Bëtsá tojayancá tbojtseyeunanëse ca.”

⁵ Chentšana Satanás, Jerusalén, chë uámána bëts pueblo ca uabáinoye Jesús tbojanánatse, y chë Bëngbe Bëtsabe bëts yebnentše chë más tsbanánoca tbojanatsá. ⁶ Chentše Satanás mëntśá tbojaniyana: —Aca ndegombre Bëngbe Bëtsabe Uaquiñá tcomnëse, muentšana fshantsoye montsënja, er Bëngbe Bëtsabe uabemana palabrënguiñe endayana:

Bëngbe Bëtsá chabe angelënga echanjichamuá, chacmotsinÿenama.

Chënga buacuatšëngaca cmochanjishache, shecuatše ndëtsbeñe ndocá chacondomama ca —cha tbojaniyana.

⁷ Chora Jesús tbojanjuá: —Cach Bëngbe Bëtsabe uabemana palabrënguiñe mëntśá endayana: “Ndoñe matsbošana acbe Bëtsá chë Utabná bacna soyëngama jacocheñguama ca.”

⁸ Cabana, Satanás tbojanánatse canye bëts tjoye y betscó nyetsca quem luarentša amëndayëngbenache y chentša nyetsca uámána soyënga Jesúsbiöye tbojaninÿinÿé. ⁹ As Satanás tbojaniyana: —Aca chacojoshëntsamentśé y chašcojadorase, lempe chë soyënga cbochjatštaye ca.

¹⁰ Y Jesús tbojanjuá: —¡Satanás, átšbentšana mojuaná! Bëngbe Bëtsabe uabemana palabrënguiñe mëntśá endayana: “Bëngbe Bëtsá cochtsadorana y nye cha cochtseservena ca.”

¹¹ As Satanás cachcá tbojanonÿá. Cachora Bëngbe Bëtsábiocana angelotëmënga tmojánabo Jesús jtseservënama.

Jesús tojanontśé Galileoca chabe trabajo jamana

(Mc 1.14-15; Lc 4.14-15)

¹² Juan chë Ubayaná cárceloye tmojanëtámíama Jesús tojanuena ora, Galilea luaroye cha tojtaná. ¹³ Pero ndoñe tonjanoquedá Nazaret pueblentše, sinó Capernaumoca, uafjajónaye tsachañe; choye tojána joyënanama, chë uámána bëts taitata Zabulón y Neftalibe luariñe. ¹⁴ Chca tojanochnëngo, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Isaías tojánayana:

¹⁵ Zabulón y Neftalibe luare, Jordán béjaye chenguánoica, uafjajónaye tsachañe; Galilea luariñe, ndoñe judío entšanga oyenentše.

¹⁶ Chë mo ibetiñe cuaftsiyencá imojoyena entšanga, Bëngbe Bëtsabe soyënga nduabuatma causa, tmojinÿe canÿa entšangbe juabnënga binÿnayá.

Chë chëngbe juabnënga binÿnayá entsebuashinÿinÿana chë Bëngbe Bëtsábiöye nduabu-atmëngbiana,

y chë causa chabiamana imomna mo obanëngcá, ndoñe binÿniñe jtsiyenëse ca —cha tojanábema.

¹⁷ Cach orscana Jesús tojanontsé entsanga jábuayenama: “Bëngbe Bëtsabe amëndayana ya echanjóshjango. Ngménaca šmochtenójuaboje tšëngaftangbe bacna soyëngama y chca amana šmochtsajbaná ca.”

Jesús tojánachembo canta boyabásenga beonga ashebuánayënga cha chamuastama
(Mc 1.16-20; Lc 5.1-11)

¹⁸ Canÿe te, Jesús chë Galilea uafjajónaye tsachajana yojtsaye y ndeolpe uta boyabásata tojanÿe: canÿa yojamna Simón, chë Pedro cánaca uabainá, y chabe uabentsá Andrés. Chatna atarraiešhangá ibnetsashbuétsetšañe, er beonga ashebuánayata ibnamna. ¹⁹ Jesús tojanëyana: “Atšeftaca mabata; atše cbochanjábiamana Bëngbe Bëtsabiamana entsanga anguayata, y morscana nÿe beonga ashebuánayata ya ndoñe quešochátsmëna ca.” ²⁰ Cachora chatbe atarraiešhangá cachcá tbojésanaboshjuana y Jesús tmojanasto.

²¹ Y más chcoye, Jesús inÿe uta catšátata tojánanÿe: Santiago y Juan, chë Zebedeobe uaquiñata. Chata ibojtsomñe canÿe barquëshañe, chatbe taitáftaca, chëngbe atarraiešhangá atapórmayñe. Jesús tojánachembo, ²² y cachora chë barquëshata tbojésanaboshjona, chë taitá cachentše imojéseboshjona y Jesús tmojanasto.

Jesús ba entsanga yojanabuatambá y yojánashnaye
(Lc 6.17-19)

²³ Jesús nÿets Galilea luarëjana yojánana, chentše judiëngbe enefjuana yebnënguenache abuátambaye. Chë tšabe noticiënga Bëngbe Bëtsabe amëndayama entsanga yojanabuayiná y nÿetsca šocanëngama y tsetšanëngama yojánashnaye. ²⁴ Nÿets Siria luarëjana entsanga cha imojtsebáyana. As entsanga nÿetsca šocana bomnënga Jesúsbioye imojtsënachaye: šoquënga y tsetšanana bomnënga, bacna bayëjbe juabna uambayënga, ataque osháchichanënga y jama ndobenënga. Jesús nÿetscanga yojánashnaye.

²⁵ Mallajta entsanga Galileocana, Decápolis luarocana, Jerusalenocana, Judeocana y chë Jordán béjaye chenguanoicana Jesús imojústona.

5

Ndayá Jesús tjoca tojanabuatambá

¹ Jesús chë mallajta entsanga tojánanÿe ora, batsjoye tojánantsjua y tojanótbema. Chabe ústonënga tmojanobobeconá y ² Jesús tojanontsé mëntšá jabuátambana:

Ndëmuanÿënga imomna chë ndegombre oyejuayana bomnënga
(Lc 6.20-23)

³ “Puerte oyejuayënga mochántsemna chë Bëngbe Bëtsabe soyënga tša imuajaboto ca juabnayënga. Chca entsanga mochántsemna chë Bëngbe Bëtsabe amëndayoca mocht-siyenënga.

⁴ “Puerte oyejuayënga mochántsemna chë mondbétsošachiyënga; chënga Bëngbe Bëtsá entsëjabuáchana ngménaca ndoñe chamondëtsemnama.

⁵ “Puerte oyejuayënga mochántsemna chë uámanënga ndoñe mondbétsenobiamnayënga, er chënga mo chëngbe otocana soycá quem luare mochanjóyëngacñe.

⁶ “Puerte oyejuayënga mochántsemna chë nÿetsca soyënguiñe tšabá jamama bošënga. Chëngbe bošana entsemna mo chë oshëntsiyá y uajuendayabe bošancá. Chë nÿetsca soyënguiñe tšabá jamama bošënga mochanjobenaye jëftsinyana lempe ntšamo tmojtse-bošcá.

⁷ “Puerte oyejuayënga mochántsemna chë inÿëngbiamana ongmiayënga, er Bëngbe Bëtsá chëngbiamana bochanjóngmia.

⁸ “Puerte oyejuayënga mochántsemna chë nÿe tšabe juabnënga ainaniñe bomnënga; chënga Bëngbe Bëtsá mochanjinÿe.

9 “Puerte oyejuayënga mochántsemna chë nyetscanga natjëmbana chamotsiyenama amënga, er chënga Bëngbe Bëtsabe básenga ca mochantsabaina.

10 “Puerte oyejuayënga mochántsemna chë ínÿenga tmojama chamotsesufrínënga, ntšamo Bëngbe Bëtsá yobošcá bétsamama; chca entšanga mochántsemna chë Bëngbe Bëtsabe amëndayoca mochtsiyenënga.

11 “Puerte oyejuayënga tšëngaftanga šmochtsemna, entšanga chacmojoyánguango y chacmojtsëcamena ora y nyetscna soyëngaca chacmojtsëbuayatsenaye ora, atšbe ústonënga bétsemnama. 12 Móyejuanga, puerte móyejuanga, tšëngaftanga celoca beca šmochanjóyëngacñe. Er ntšamo entšanga tšëngaftanga cmëcamena, cachcá chë Bëngbe Bëtsabe juabna oyebuambnayëngbioye, chë tšëngaftangbe natsana monjaniyenëngbioye entšanga monjanëcamena ca” —Jesús tojánayana.

*Ošbuáchiyënga jtsemnana mo tamocá y binÿayënga quem luarentša entsangbiana
(Mc 9.50; Lc 14.34-35)*

13 “Tšëngaftanga, quem luarentša entšanga jtsëjabuáchanëse šmojtsiyena, Bëngbe Bëtsabe soyënga chamotsetatšëmbuama, as chëngbiana šmochántsemna mo chë mëntšena ndoñe chaondóndbemama tcojatboto tamocá. Pero chë tamó fténana tojtsóbemëse, ndoñe ntšopodénana tempcá sanana cachiñe jtëtsmënana. Chca, ya tondayama ntšoservénana; chíyeca chë tamó tsáshenoye jtsëtšenana y entšanga jtsebotájayana.

14 “Tšëngaftanga, ntšamo tšabá yomncá šmojtsiyenëse, as quem luarentša entsangbiana šmochántsemna mo chë ibetiñe tojtsebínÿna soycá. Canÿe bëtš pueblo batsjo juatsbuañe tomnëse, ndoñe ntšopodénana iytëmencá jtsemnana. 15 Canÿe uajuinÿanësha tcojuajuinÿena ora, ndoñe cajonëshe tajsoye jtsabuájuama, sinó tsbanánoca juajájuama, chca, nyetsca entšanga chë yebnentše tmojtsemnëngbiana chaotsebínÿnama. 16 Cachcá tšëngaftanga, entsangbe delante mo binÿayëngcá šmochtsemna, as chënga tšëngaftanga tšabe soyënga šmuamama chamuinÿama, y chca, chënga chamuinÿanÿe chë Taitá, Bëngbe Bëtsá celoca endmëná, corente uamaná y obená bétsemnana ca” —Jesús tojánayana.

Chë Moisesbe leyama Jesús tojanabuatambá

17 “Ndoñe šmattsejuabnaye, ntšamo Moisesbe leyinë iuayancá y chë Bëngbe Bëtsabe juabna oyebuambnayënga tmojanayancá jabétsepochochama atše tijabo ca. Atše ndoñe chiyátabo chë soyënga jabétsepochochama, sinó jabábuayenama ndayá chë soyënga ndegombre bétsayanama. 18 Ndegombre šcuayana: Celoca y quem luare chaojëftsemnëntscuana, ndocná queochatobenaye ni canÿe punto, ni canÿe letra chë leyënguentšana jtsejuánana, lempe ntšamo jochnënguama yomncá chaojtsemnëntscuana. 19 Chíyeca, nda nÿe mo canÿe mando chë leyënguiñe ndoñe tonjoyeuná cha, masque nÿe base soye chë mando tojtsemna, y chë ínÿenga cachcá tojtsabuatambá, cha Bëngbe Bëtsabe amëndayoca chë más nduamaná echántsemna. Pero ndëmuanÿenga tmojtsama ntšamo Bëngbe Bëtsá tojamëndacá y chë ínÿenga cachcá chamotsamama tmojtsabuátambase, chënga Bëngbe Bëtsabe amëndayoca uámanënga mochántsemna. 20 Chë soyëngamna mëntšá šcuayana: Tšëngaftanga chë ley abuátambayënga y fariseúngbioye ndoñe šmontsayëñjanase, jt-samama ntšamo Bëngbe Bëtsá tmojamëndacá, ndocna te Bëngbe Bëtsabe amëndayoye quešmochátamashjna.

Ndayá chë ínÿengaftaca tbojetnama Jesús tojanabuatambá

21 “Tšëngaftanga šmojouena ntšamo Bëngbe Bëtsá tšëngaftangbe bëtš taitanga tojanamëndacá: ‘Ndoñe catjóba ca. Chca ochjajnayá bontsemna jobuambayana chë entsangbiana tšabá o ndoñe tšabá tmonjamama endbayanabe delante, ndáyeca chca ca.’ 22 Pero atše šcuayana, nda cachabe catšátaftaca tbojetna, chánaca bontsemna jobuambayana chë entsangbiana tšabá o ndoñe tšabá tmonjamama endbayanabe delante, ndáyeca chca ca. Nda cachabe catšátbioye puerte tbojtsáboyënja, cha bontsemna

chë Sanedrín ca uabaina mándayëngbe delante jobuambayana ndáyeca chca ca; y nda cachabe catšatbiamá opjema ca tojayana, ntšamo cha bétsamama, cha bontsemna chë infiernoca íñeshoye jama.

²³ “Chíyeca, nderado ndayá Bëngbe Bëtsabe bëts yebnoye tcojuamba Bëngbe Bëtsá jëtschuayama y chora tcojenojuabó acbe catšata ácaftaca etonaná yojtsemna ca, ²⁴ as chë tcojiyëbo soye chë altarentša natsanoica cochjëseboshjona, cochtá y acbe catšátaftaca cochtenoyántsia. Chentšana cocayé altaroye cochjá y chë tcojuamba sóyeca Bëngbe Bëtsá cochjëtschuaye.

²⁵ “Nderado nda tcmojademanda y cabildoye jotsánama cmojtsemna, cabá choye ndáshjango ora, betesco cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandado josticiëngbe cucuatšíñe cmochanjáboshjona y chënga cárceloye cmochanjutame. ²⁶ Ndegombre cbëyana: Chentšana ndoñe quecochtëtsbocna lempe candesopagantscuana ca” —Jesús tojánayana.

Chë boyá o shémbioye ínÿaftaca íngñayama Jesús tojanabuatambá

²⁷ “Tšëngaftanga šmojouena ntšamo Bëngbe Bëtsá tojanmandacá: ‘Acbe boyá o acbe shémbioye ínÿaftaca ndoñe catjaíngña.’ ²⁸ Pero atše cbëyana: Nderado canÿe boyabása ndëmuanÿe shembásabioye tbojinÿe y tojajuabó ‘malaye cha ca’, chë boyabása chca tojajuabose, ainanoca ya chë ínÿe shembásaftaca cachabe shémbioye tbojtseíngñé.

²⁹ “Chíyeca, nderado acbe catšbioica bomínÿeca bacna soye tcojinÿe y cachca soye tcojamëse, más tšabá nántsemna chë bomínÿe cochtsenobuchjatsëca y cochtsëtšena. Nÿets cuerpo jtsebomnana y lémpca infiernoye jama chacmotsëtšenamna, acbiamá más tšabá nántsemna nÿe canÿe soye acbe cuerpentšana chacoperdé. ³⁰ Nderado acbe catšbioica cucuatšëca bacna soye tcojamëse, más tšabá nántsemna chë cucuatšë cochtsenástjango y cochtsëtšena. Nÿets cuerpo jtsebomnana y lémpca infiernoye chacmotsëtšenamna, acbiamá más tšabá nántsemna nÿe canÿe soye acbe cuerpentšana chacoperdé ca” —Jesús tojánayana.

Chë bouamnata enëtšanama Jesús tojanabuatambá

(Mt 19.9; Mc 10.11-12; Lc 16.18)

³¹ “Mëntšánaca leyiñe enduábemana: ‘Ndëmuanÿe boyá chabe shémaftaca tbojt-senëtšena, chë boyá bontsemna chabe shema canÿe tsbuanácha juiiyana, ndayëchañe chaotsayana cha ya ndoñe chabe shema yontsemna ca.’ ³² Pero atše cbëyana: Nda chabe shémaftaca tbojt-senëtšena y chca tojopasá ndoñe chë shema ínÿaftaca tbont-seíngñé causa, as chë boyá jtsamana cha chabotseíngñema, chë shema ínÿaftaca tojtóbouamase. Y nda chë útšena shémaftaca tojtobouamá, chana canÿe uabuatmá jtsebomnana, y chca, chë tsëm boyánaca canÿe bacna soye jamana ca” —Jesús tojánayana.

Chë entšanga júrayama Jesús tojanabuatambá

³³ “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado tcojayana: De Dios chë soye chanjama ca; ojal chë soye ndoñe catjama ca.’ ³⁴ Pero atše cbëyana: Todayama šmattsejúraye; ni celocama, er choca Bëngbe Bëtsabe tbemaniñe endmëna. ³⁵ Ni quem luarama, er Bëngbe Bëtsabiamá mo tšenëtemcá endmëna, chiñe chabe shecuatšënga jacjayama; ni Jerusalenama, er chë pueblo endmëna Bëngbe Bëtsá chë Bëts Reybe bëts pueblo. ³⁶ Ni tšëngaftangbe bestšašama cach ndoñe, er tšëngaftanga ndoñe quešmatobena ni mo canÿe stjénashe ftsenguëshe o fjantsëshe jabemana. ³⁷ Tšëngaftanga aíñe ca jayanama šmojtsebošëse, nÿe aíñe ca šmochjayana, y ndoñe casna nÿe ndoñe. Ndayá chentšana más šmojatichamo soye, Satanásbiocana jtsóbocanana ca” —Jesús tojánayana.

*Chë entsanga mondbátenachnënguama Jesús tojanabatambá
(Lc 6.29-30)*

³⁸ “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado nda tcmojtsebuchjatsëca, ácnaca derecho contsebmna canyëbé cha jëtsbuchjatsëcama ca; y nderado nda canyë juatsaše tcmojtsásiye, ácnaca derecho contsebmna cányëšë cha jtašiyama ca.’ ³⁹ Pero atšë cbëyana: Ndoñe matsbošana chë ndayánaca tcmojaborlábioye jtachnënguama; chamna, ndánaca catšbioica tcmojajuebjantsetase, cochjomiye chë ínyoica cachcá chacmomama. ⁴⁰ Nderado nda tcmojademandá y tojtseboše acbe shabuanguanëjua jtsabocñama, cha molesenciá acbe quëfsaíyanaca chauetsácñama. ⁴¹ Nderado nda tcmojuasmá y tcmojamandá bnëtsana cuadroca juyambama, inyë bnëtsana cuadro cochjuyamba. ⁴² Nda ndaye soye tcmojotjañëse, cochjatštaye; y nda ndaye soye tcmojuátjase, cha ndoñe stëtsoye catjaquéda ca” —Jesús tojánayana.

*Chë uayayëngbiana bonshánana jtsebmna
(Lc 6.27-28, 32-36)*

⁴³ “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Acbe amigo cochtsebobonshana y acbe uayayá cochtsaboyënja ca.’ ⁴⁴ Pero atšë cbëyana: Tšëngaftangbe uayayënga šmochtsababuányëshana, y chë cmëcamenëngbiana Bëngbe Bëtsá šmochtseimpadana. ⁴⁵ Chca tšëngaftanga, chë Taitá, Bëngbe Bëtsá, chë celoca endmënabe básenga šmochántsemna; Bëngbe Bëtsá endbëtsama tšabe y bacna entsángbeñe chabe shinýe chaotsebinýnayama, y endbëtsama chë nyëtsca soyënguiñe tšabá jamama bošënga y ndoñe chca entsángbeñe chauaftema. ⁴⁶ Tšëngaftanga nyë chë tšëngaftanga tcmojtsababuányëshanënga šmojtsababuányëshanëse, ¿Bëngbe Bëtsábiocana ndayá šmochjuacaná? Romocama crocénana entsángbioye atjanayëngnaca chca monduamana. ⁴⁷ Y nyë chë amiguëngbioye šmojtsacheuanase, ¿ndaye bëts soye šmojtsama? Chë ndoñe judiëngnaca chca mondbëtsama. ⁴⁸ Tšëngaftangbe Taitá, Bëngbe Bëtsá celoca endmëná, nyëtsca tšabe soyënga bomná y amá endmëna. Tšëngaftángnaca cachcá šmochtsemna ca” —Jesús tojánayana.

6

Jesús tojanabatambá ntšamo tšabe soyënga inyëngbiana jamana

¹ “Cuedado šmochtsebmna ndoñe ntšamama entsángbeñe tšëngaftangbe tšabe soyënga, nyë chënga chca chamuinýama. Chca šmojamëse, tšëngaftangbe Taitá, Bëngbe Bëtsá, celoca endmëná ndocna uacanana soye quecmochtëtatšataye.

² “Chcasna, nderado nda caridá tcojábemëse, chca ndoñe šmatjama chë ntšamo šmojtsamama nyëtscanga chamotsetatsëmbuama, mo canyë trompetëfjua cuaftsajatëtancá, chë caridá šmojábemama chaotsótatsëmbuama; chca monduamana chë bacna entsanga chë ntšamo ndegombre tmojuabnacá ndinýinýayënga, chë judiëngbe enefjuana yebnënguenache y tsáshenañe. Ndegombre cbëyana, chë chca amënga ya chëngbe uacanana soye tmojóyëngacñe, ntšamo chënga tmojamama entsanga tšabá chëngbiana tmojtsoyebuambná ora. ³ Chcasna, nda caridá tcojábema ora, ndocná más chaondëtsetatsëmbo, mo chë uañicuayoica cucuatšë ndoñe queondbatstatsëmbcá ndayá chë catšbioica cucuatšë tojtsamama, ⁴ chca, acbe caridá iytëcana chaotsemnama. As, tšëngaftangbe Taitá, nda bominyë endbëtsëquëcjnaye chë iytëmencá tcojtsama soye, acbe uacanana soye cmochántatštaye ca” —Jesús tojánayana.

*Jesús tojanabatambá ntšamo Bëngbe Bëtsáftaca jencuéntana
(Lc 11.2-4)*

⁵ “Bëngbe Bëtsáftaca šmojtsencuénta ora, ndoñe šmattsama chë bacna entsanga ntšamo ndegombre tmojuabnacá ndinýinýayëngcá. Chënga corente jtsogusetánana

chë judiëngbe enefjuana yebnënguenache tsanana y tsashená tsëntsaca Bëngbe Bëtsáftaca jtsencuéntayana, chca, nÿe entšanga chë soye chamuinÿama. Ndegombre šcuayana: chënga nÿe morscama ya montsábouacanana, chënga tšabá imojtsama ca entšanga tmojayana ora. ⁶ Pero aca Bëngbe Bëtsáftaca jencuéntama orna, acbe tsoye cochtamáshëngo, bësásá cochtatame y cháftaca cochjencuénta. Chánaca chë iytëmentse ácaftaca echántsemna. Bëngbe Taitá lempe bominÿe endetsequëcñá, masque cánÿenga šmojtsemna ora šmojtsama soyëngnaca. As Bëngbe Bëtsá, chca cháftaca chacojtsencuénta ora, cachá acbe uacanana soye cmochántatštaye.

⁷ “Bëngbe Bëtsáftaca šmojtsencuénta ora, ndoñe nÿe cachcá ndoservena palabrënga ba soye šmattsichamo. Chca mondbëtsama chë Bëngbe Bëtsábioye nduabuátmënga. Chënga jtsejuabnayana becá chca tmojtsichámësna, Bëngbe Bëtsá chënga más yochjóyaunaye ca. ⁸ Ndoñe chëngcá šmattsemna. Cabá nduyana ora, Bëngbe Bëtsá ya jtsetatšëmbuana ntšamo tšëngaftanga cmojtsëjabotcá. ⁹ Chamna tšëngaftanga mëntšá cmontsétocana Bëngbe Bëtsáftaca jencuéntana:

Bëngbe Taitá, celoca icotsomñe.

Acbe uabaina chë más uámana uabainana chauesomñe.

¹⁰ Acbe amëndayana chaóshjango.

Celoca yojtsemna ntšamo icobošcá;

quem luaríñnaca cachcá chaotsemna.

¹¹ Mënté šmiyatšatá cada te šnetsëjaboto tandëse.

¹² Bacna soyënga bënga fsënjama: šmotsaperdónaye;

cachcá ntšamo chë bëngbiamana bacna soyënga amënga fsëndbetsaperdonaycá.

¹³ Bacna soyënga jamama šojocohëngo ora, šcochjujabuache chca ndenobuíyama.

Nÿetsca bacna soyënguentshana šmatsebacaye.

¹⁴ “Chë tšëngaftangbiamana bacna soyënga amënga šmojtsaperdónasna, Bëngbe Taitá chë celoca endëtsomñá, tšëngaftanga cmochanjáperdonaye. ¹⁵ Pero chë tšëngaftangbiamana bacna soyënga amënga ndoñe šmontsaperdónasna, Bëngbe Taitá cachcá, tšëngaftanga ndoñe quecmochátaperdonaye ca” —Jesús tojánayana.

Chë Bëngbe Bëtsáftaca jencuéntama tondaye ntjascá

¹⁶ “Y nderado tšëngaftanga inÿe ora tondaye ntjascá šmojtsemna Bëngbe Bëtsáftaca jencuéntama, juebëngménënga ndoñe šmattsemna, ntšamo chë bacna entšanga chë ndegombre tmojuabnacá ndinÿinÿnayënga mondbetsamcá, as chca, chënga imojt-sayúnama entšanga chamuinÿama. Ndegombre šcuayana, chëngbe uacanana soye ya tmojóyëngacñe, chënga tmojayunáyeca entšanga tšabá chëngbiamana tmojtsoyebuambná ora. ¹⁷ Aca nderado tcojtsayúna ora, cochtsojuebjabebiye y aceitíyeca botamana cochtenochquëca, ¹⁸ as chca, entšanga ndoñe chamondëtsetatšëmbo aca tondaye ntjascá cojtsemnama. Nÿe acbe Taitá, lempe chë mo iytëmencá yomna soyëngama tatšëmbuá, chama echántsetatšëmbo. Y cha, chë iytëmencá tcojama soye bominÿe endbetsequëcñayá, acbe uacanana soye cmochántatštaye ca” —Jesús tojánayana.

Chë celoca bomnana

(Lc 12.33-34)

¹⁹ “Bomnana quem luarentse ndoñe šmattsëjuabaye. Muentšna chë mejojón y inÿe pochócaye soyënga lempe jtsendbiamana, chë atbëbanënga jtsamashjnana y chë juabana soyënga jesatbëbana. ²⁰ Más tšabá tšëngaftangbiamana entsemna, mora quem luarentse tšabe soyënga šmojtsamamna, uacanana soyënga celoca chaotsójuabaye. Chentse ni chë mejojón, ni chë inÿe pochócaye soyënga acbe soyënga quemochatspochóca, ni atbëbanënga quemochátamashjna jatbëbama. ²¹ Er chë ndayentse acbe bomnana tojtsem-nentša soyëngama acbe ainánaca cochántsejuabnaye ca” —Jesús tojánayana.

*Chë cuerpama uajuinjanëshsha**(Lc 11.34-36)*

22-23 “Acbe bominye tšabá totsomñese, mo canye uajuinjanëshacá acbe cuerpama jtsemnana, chíyeca aca jtsoebenana ntšamo tcojtsamcá chë bominyeca jtsonyayana. Chë bominye ndoñe tšabá tontsemnësna, chë bominye tondaye ntsoebenana jamana, ntšamo tcojtsamcá chacobená jinýama. Cachcá, acbe ainaniñe tšabe juabnënga tcojtse-bomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnësna, lempe ntšamo chacojtsamcá ndoñe tšabá queochátsmëna. Y chca, aca cochantsiyena soyënga jtsamëse mo puerte ibetiñcá ca” —Jesús tojánayana.

*Chë Bëngbe Bëtsabiama bonshánana o chë nyë quem luarentša soyënga jtsebošana**(Lc 16.13)*

24 “Ndocná ntsoebenana uta mandayata jtsaservénana: cánýabioye bochantšáboyënja y chë ínýabioyna bochantšebobonshana, o cánýabiama tšabá echántsetrabajaye y chë ínýabiamna ndoñe tšabá. Ndoñe quecátobena Bëngbe Bëtsá jtsebobonshánana, nyë quem luarentša soyënga jtsebomnana yapa tcojtsebošëse ca” —Jesús tojánayana.

*Bëngbe Bëtsá chabe básenga jtsanýenana**(Lc 12.22-31)*

25 “Chcasna atše šcuayana: Ndoñe šmattsenócochinýena ndayá šmochjase o šmochjofsiye vida jtsebomnana, ni ndaye entšayá šmochjuíchëtjuama cach ndoñe. Ndegombre, vida chë sanama más enduámana y cuerpo chë entšayama más. 26 Smochjanýe chë shloftšënga jtsongüefjnayana. Chënga tondaye ntjájena, ni jaja saná ntjátbanana, ni chë grano uaquëcjnaye yebnënguiñe quemnatsquëcjná; pero Bëngbe Bëtsá, celoca endmëná, chënga saná jtsatšatnayana. ¡Y tšëngaftanga chë shloftšetémëngbiama puerte más šmonduámana! 27 Masque chca endmëna, canýa masque tša tojtsenócochinýena, ¿ntšamo nanjobenaye jamana chë ntsachetšá vida yochtsebomnentsana, canýe hora vida más jabotiyana?

28 “Y ndayá šmochjuíchëtjuama, ¿ndáyeca šmojtsenócochinýena? Smochjinýe chë jajañe lirio uantšefjushangá jtsajuajnana: ndoñe ntsetrabájayana, ni ntsetshabiamnayana. 29 Pero atše cbéyana, ndegombre ni mo Rey Salomón nyëtsca chabe bomnánaca nyëtsá botamana mo chë lirio uantšefjushangacá quenjatspormana. 30 Bëngbe Bëtsá tša botamana shácua tojuama, y chë shácua mënté jajoca jtsamnana, yëfsana iñoca. Chca chë shácuanaca cha tojamëse, ndegombre tšëngaftangbiámna Bëngbe Bëtsá echanjama entšayá chašmotsábomnana, jentšanga nyë batsá Bëngbe Bëtsábeñe ošbuáchiyënga! 31 Ndoñe šmattsenócochinýena, mëntšá jtsichámëse: ‘¿Ndayá mochjase?’ o ‘¿Ndayá mochjofsiye?’ o ‘¿Ndayá mochtichëtjo ca?’ 32 Chë soyëngama, chë Bëngbe Bëtsábioye nduabuátmënga mondbëtsenocochinýena, pero tšëngaftanga ndoñe. Tšëngaftangbe Taitá, Bëngbe Bëtsá, ndayá cmojtsëjabortama endétatšëmbo. 33 Chíyeca, tšëngaftangna natsana šmochjshëtseboše Bëngbe Bëtsá tšëngaftangbe ainaniñe chaotsemándama y lempe ntšamo cha tojamandacá šmochtsama. Chca šmojamëse, Bëngbe Bëtsá lempe ntšamo cmojtsëjabortcá cmochanjátšataye. 34 Ndoñe matenócochinýenana ndayá yëfse yochjochnënguama. Yëfse luare cochántsebomna chë soyënga jinýama y jamama. Cada tescama endbëtsemna yapa totcá soyënga jájandmanama ca” —Jesús tojánayana.

7*Ndoñe ntsichámuana chë ínýënga tšabá o ndoñe tšabá tmonjamama**(Lc 6.37-38, 41-42)*

1 “Ndocá ínýëngbiama šmattsichamo chë ndoñe tšabá tmontsamama. Chca, Bëngbe Bëtsá ndoñe queochátichamo tšëngaftanga ndoñe tšabá šmonjama ca. 2 Chë ntšamo

tšëngaftanga ínÿengbiana šmojtsichamcá tšabá o ndoñe tšabá tmontsamama, cachcá Bëngbe Bëtsá tšëngaftangbiana chë ntšamo šmojamama echántsichamo. Y ntšamo ínÿengbioye chašmojábiama, uabouana o ndoñe jabuache soyënga, cachcá Bëngbe Bëtsá tšëngaftangbioye cmochanjábiana.

³⁻⁵ “Nderado canÿa chabe bominiñe canÿe niñëfja tojtsebomnëse, cha ndoñe ntobenana chabe catsata jauyanama: ‘Acbe bominiñentsana canÿe polvështema jtsebujátsëcama šmolesenciá ca’. Natsana cha bontsemna cachabe bominiñentsana chë niñëfja jtse nobuchjátsëcana tšabá jinÿama jobenayama, chabe catsatbe bominiñentsana polvështema jtsebujátsëcama. Cachcá entsemna acbiana, ¡bacna entšá chë ntšamo ndegombre tcojuabnacá ndinÿinÿayá!, chë tša bacna soye cojtsama ca acbe catsata tcojauyana ora, cach aca tša bëts bacna soyënga cojtsamama ntjenojuaboycá; y chca, aca jamana canÿe bacna soye. Natsana cmontsemna chë cach aca ndoñe tšabe soyënga cojtsamama ngmënaca jshatenójuaboyana y chca amana jtsajbanana, y chentšana cocayé cochantsobena acbe catsata juajabuáchana ntšamo tšabá yomncá chaotsamama.

⁶ “Chë Bëngbe Bëtsabe soyëngama josértama ndëboše entšanga ndoñe šmattsabuayiynaye. Añese nántsemna mo chë Bëngbe Bëtsabe bëts yebnoca uátšëmbona mëntšena quešënga cuaftsëbuajocá; chorna chënga jobuértanana, jobotjajuana y jtsáshantsana. O mo chë uámana ndëtsëtémënga cotsëngbioye cuaftsëtšancá, chënga nÿe jtsebotájayana ca” —Jesús tojánayana.

Smochjotjañe, smochjáanguango y smochjachembo
(Lc 11.9-13; 6.31)

⁷ “Smochjotjañe y Bëngbe Bëtsá cmochanjátsataye; smochjáanguango y smochanjínÿena; smochjachembo y bëšáša cmochanjébëtafjo. ⁸ Er ndánaca tojtsotjanañá, jójëngacñana; y nda tojtsenguá cha, jónÿenana; y nda tojtsechembuanábioye jebiatëfjuana.

⁹ “¿Ndëmuanÿe boyabása tšëngaftanguentšá, canÿe tandëse chabe uaqiñá tbojtsotjanañe ora, canÿe ndëtsbé chábioye buanjatštaye? ¹⁰ ¿O canÿe mëtscuaye buanjatštaye, beona tbojtsotjanañe ora? ¹¹ Y chca, tšëngaftanga, bacna soye amënga, tšëngaftangbe basetémënga tšabe soyënga jatšatayama šmojtsamanëse, ¡más tšëngaftangbe Taitá, Bëngbe Bëtsá celoca endmëná, chë tmojtsotjanañënga tšabe soyënga echanjátsataye!

¹² “Inÿengaftaca smochtsama ntšamo chë ínÿenga tšëngaftangaftaca chamotsamama smojtsebošcá. Chca endmëna ntšamo Moisesbe leyiñe y chë Bëngbe Bëtsabe juabna oyebuambnayëngbe buatëmbana soyënguñe endayancá ca” —Jesús tojánayana.

Chë base utëntšá bëšáša
(Lc 13.24)

¹³ “Chë base utëntšá bëšášajana smochjámashjna. Chë utëntšá bëšášajana y chë paselo jóyename benache, infiernoye cmochanjuánatse y banga chëjana mondámashjuana. ¹⁴ Chë tšabe vida binÿnoye jamna base utëntšá bëšášajana endmëna y ndoñe paselo jóyename benache, y chiñe báseftanga mondbínÿena.

Chë Bëngbe Bëtsabe ndoñe ndegombre juabna oyebuambnayënga
(Lc 6.43-44)

¹⁵ “Cuedado smochtsebomna chë Bëngbe Bëtsabe ndoñe ndegombre juabna oyebuambnayëngbiana. Chëngna mo oveshëngcá tšëngaftangbioye mochanjabo, pero ndegombre chënga mondmëna mo tšátjaye tjañe quešëngcá. ¹⁶ Tšëngaftanga betiyënga jtsabu-atmana ntšamo cada ona tojtseshajcá; cachcá tšëngaftanga chcanga smochantsëbuatma, ndayá chënga mochtsamama. Uchmašëshe betiyentsana ndoñe uvas ntjuátabebiana, ni higuëbé cardo betiyentsana. ¹⁷ Chca, nÿetsca tšabe betiyiñe tšabe soye jashájonana; y chë ndoñe tšabeshiñna podesca soye. ¹⁸ Canÿe tšabe betiyiñe quenátopodena podesca soyënga jashájonana, ni canÿe ndoñe tšabe betiyiñe tšabe soyënga jashájonana. ¹⁹ Ndaye betiye

podesca shajuanēshe jtseshatētšana y iñoye jtsatmetšana. ²⁰ As chca tšëngaftanga chënga šmochantsëbuatma, ndayá chënga mochtsamama ca” —Jesús tojánayana.

Bëngbe Bëtsabe amëndayoye ndoñe nyetscanga jamashjnana
(Lc 13.25-27)

²¹ “Ndoñe nyetscanga chë ‘¡Utabná! ¡Utabná ca!’ atše šmojtsatsëtsnanga, Bëngbe Bëtsabe amëndayoye quemochátamashjna. Nýe ntšamo atšbe Taitá, celoca endmëná, tojtsebošcá amëngna aíñe. ²² Quem luare jopochócama te banga atše šmochanjauyana: ‘¡Bëngbe Utabná! ¡Bëngbe Utabná! Aca jótšëmbonëse, áceñe betsošbuáchema, bënga fsëndoyebuambná, y ácbeyeca bacna bayëjëngbe juabna entšángbentsana fsëndëtabocana, y ácbeyeca bëts soyënga fsëndama ca.’ ²³ Chora atše chanjójuaye: ‘Ndocna te checbaisëbuátmana. Atšbentsana mojuánanga, bacna soye ama entšanga ca’ ” —Jesús tojánayana.

Chë uta ucuatjoniñe
(Mc 1.22; Lc 6.47-49)

²⁴ “Chcasna, nda atše šojoyeuná y chë ntšamo sentsichamcá tojtsama, endmëna mo canýe tšabá juabnaye boyabasacá. Chë boyabásana ndëtšbeñe chabe yebna yojajebo. ²⁵ Uaftena yojuáshjango, chë béjayënga yojóftjajna, chë yebnoye puerte yojtsebinýiaye, pero chë yebna ndoñe ntjuáshajayana, chë yebna ndëtšbeñe inajéboyeca. ²⁶ Pero nda atšbe palabra tojouena y ntšamo sentsichamcá ndoñe tontsama, endmëna mo canýe ndëjuabnaye boyabasacá. Chë boyabásana chabe yebna cascajuiñe yojajebo. ²⁷ Uaftena yojuáshjango, chë béjayënga yojóftjajna, chë yebnoye puerte yojtsebinýiaye y chë yebna uabouancá yojtsáshajaye ca” —Jesús tojánayana.

²⁸ Jesús chë soyënga jóyebuambayama tojanpochocá ora, chë entšanga ojnanánënga imojtsemna ntšamo cha tojánabuatambama. ²⁹ Jesús tojanabuatambá nyets obenánaca, mo canýa mando bomnacá y ndoñe nýe mo chë ley abuatambayëngcá.

8

Jesús, canýa bacna nguayanánaca šocábioye tbojanshná
(Mc 1.40-45; Lc 5.12-16)

¹ Jesús tjoicana tojtantsmá ora, ba entšanga tmojanasto. ² Chora canýe boyabása bacna nguayanánaca šocá Jesúsbioye tojanobeconá, chabe delante yojoshamentšiyey y tbojaniyana: —Utabná, aca tcojtsebošëse, catjobenaye atšbe šocana jtsebojuánana ca.

³ As Jesús tojanacuenýanëjaná, chë boyabásabioye tbojánbojajo y tbojaniyana: —Aíñe, sëntseboše. Socana cbotsebojuaná ca.

Y cachora chabe šocana tbojtsanóbojuanañe. ⁴ Jesús chë shnanábioye tbojaniyana: —Mouena, ndocnábeñe cattsecuëntaye; nýe chë Jerusalenoca báchnëbioye motsa, y cha cochjinýinýiye mora aca ya tšabá cojtsatsmënema. Bayá cochtsambaye, Bëngbe Bëtsá chama jëtschuayama, ntšamo Moisés tojëftsanmandacá, as chca nyetscanga chamotatšëmbona mora aca ya ndoñe šocá contsemnana ca —Jesús tbojaniyana.

Jesús canýe Romano soldadëngbe amëndayabe bochichnayábioye tbojanshná
(Lc 7.1-10)

⁵ Jesús Capernaumoye tojánamashëngo ora, canýe Romano soldadëngbe amëndayá Jesúsbioye tojanobeconá canýe pavorama jaimpádama. ⁶ Jesúsbioye tbojaniyana: —Utabná, atšbe bochichnayá yebnoca šocá entsemna, jama ndoñe quenátobena y jabuache tsetšanánaca entsobësná ca.

⁷ Chora Jesús tbojanjuá: —Cha jáshnama chanjá ca.

⁸ As chë soldadëngbe amëndayá tbojaniyana: —Señor, atše mercedo taitatobua-joñe atšbe yebnentšë chacuamashënguama; nýe mayana y atšbe bochichnayá tšabá echántsmëna. ⁹ Atšbioye mándayënga atše sëndábamna y átšnaca soldadëngbe amëndayá

sëndmëna. Atše canÿe soldado stjauyana “motsa ca”, cha cachora jana; y inÿa stjauyana “mabo ca”, cha cachora jabana; y nderado atšbe bochichnayá ndayánaca chaomama stjamánda, chánaca cachora chë soye jamana ca —cha tojánayana.

¹⁰ Jesús chca tojanuena ora, tojanenjaná y chë ústonënga tojanëyana: —Ndegombre cbëyana, ni mo nÿets Israelentše ni canÿa quem boyabasacá Bëngbe Bëtsábeñe nÿetsá ošbuachiyá chiyátinÿena. ¹¹ Y šcuayana, shinÿe bocanoicana y shinÿe uenatjëmbambanoicana bëtscá entsanga mochanjabo, y Abraham, Isaac y Jacob, chë judiëngbe tempsca uámana bëts taitángaftaca mochanjotbiamá Bëngbe Bëtsabe amëndayoca, cánÿiñe juasama. ¹² Ba Israeloca entsanga, chë ndëmuanÿengbiama Bëngbe Bëtsabe amëndayana natsana yochtsanmëna, chocana mochantëbuacana chë ndëbinÿna luaroye, infiernoye. Chentše puerte mochanjenóbošachna y chë tsetšanama juatsašënga mochantseoftëšjojnaye ca —Jesús tojánayana.

¹³ Chora Jesús chë soldadëngbe amëndayábioye tbojanianyana: —Acbe yebnoye motsatá y chë ntšamo cojtsošbuachecá cachcá chaotsemna ca.

Cachora chë bochichnayá tšabá yojsatsmëna.

Jesús, Pédrëbe uambén mamábioye tbojanshná

(Mc 1.29-31; Lc 4.38-39)

¹⁴ Chentšana Jesús, Pédrëbe yebnoye tojána. Chentše Pédrëbe uambén mamá šocá calentóraca yojtsejutsnajona. ¹⁵ Chora Jesús chë uambén mamabe cucuatše tojánbojajo y cachora chë calentora tbojtsanóbojuanañe. Chorna chë uambén mamá tojtantsbaná y tojanontšé chënga jobuácuedana.

Jesús ba šoquënga tojanashná

(Mc 1.32-34; Lc 4.40-41)

¹⁶ Chë te jaibétatama ora, Jesús yojtsemnoye banga bacna bayëjëngbe juabna uambaye entsanga tmojanënatse. Chora, nÿe canÿe Jesús jóyebuambayëse chë bacna bayëjënga imojtsaisebocana y nÿetsca šoquënga tojanashná. ¹⁷ Chca Jesús tojanma, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana: “Cha bëngbe šocanënga tonjaftsanca y bëngbe nÿetsca tsetšanana chábeñe tonjanoquedá ca.”

Chë Jesús juastama bošënga

(Lc 9.57-62)

¹⁸ Jesús tojánanÿe mallajta entsanga chabe shëconana; as tojanmandá uafjajónaye chenguana jama. ¹⁹ Chorna, canÿe ley abuatambayá Jesúsbioye tbojanobobeconá y tbojanianyana: —Buatëmbayá, atše sëntseboše aca juastama, ndëmoye chacojtsá choye ca.

²⁰ As Jesús tbojanianyana: —Chë zorrënga mondbomna cuevëšënga ndayentše jtsiyenama y chë shloftšëngna uajajonëshangá, pero chë Bëngbe Bëtsá Entšá tbojanbemá ndoñe quenátsbomna ndayentše jóchnama ca.

²¹ Chora inÿa, cach uatsjendayënguentsá, Jesúsbioye tbojanianyana: —Bëngbe Utabná, šmoleenciá atšbe taitá chjshesabotbontsañe ca.

²² Chora Jesús tbojanjuá: —Nÿe šmasto. Chë Bëngbe Bëtsabiama mo obanëngcá, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsëtebuantsañe ca.

Jesús chë binÿia y chë béjaye bonguana yojëtsbema

(Mc 4.35-41; Lc 8.22-25)

²³ Chentšana Jesús canÿe barquëshoye tojánamashëngo y chabe uatsjëndayënga imojtsetjëmbambnaye. ²⁴ Ndeolpe tša jabuache binÿia chë uafjajónaye béjayiñe yojóshjango; nÿetsá jabuachana yojtsemna, chë olëšënga barquësha imojtsëtsbotsana. Y Jesús chora inétsomañe. ²⁵ As chabe uatsjëndayënga tmojána Jesús jetsefšenama y tmojanianyana: —jBëngbe Utabná, šmatsebacá. Montsenatjëmbambana ca!

²⁶ Chora Jesús tojanéyana: —¿Ndáyeca tša šmojtsauatja? ¿Tša batšatema šmojtsošbuaché, Bëngbe Bëtsá tšëngaftanga jujuabuáchama yobenama ca?

Chca tojanéyana y tojantsbaná. Chora tojanmandá chë binÿia y chë búyeshe bonguana chaotsatsmënema, y lempe natjëmbana yojtsatsmëna. ²⁷ Chabe uatsjëndayënga ojanánënga imojtsemna y mëntšá imojtsichamo: “¿Nda quem boyabása yomna? Cha tonjayana y chë binÿia y chë búyeshe tmonjoyeuná ca.”

*Chë Gadara luaroca entsata, bacna bayëjbe juabna uambayata
(Mc 5.1-20; Lc 8.26-39)*

²⁸ Jesús uafjónaye chenguana tojánashjango, canÿe luare Gadara ca uabáinentše. Chorna chë utabuantsánëngbentsana útata, bayëjbe juabna uambayata, tbojánbocna y Jesúsbioye tbojanobobéconata. Puerte tšatjayata ibnamna, chíyeca entsanga ndoñe ntsobenana chëjana jtsachnëjuanana; ²⁹ y chora tbojanontsé chë bacna bayëjëngbeyeca mëntšá uayebuáchana: —¿Ndayá bëngaftaca cojtseboše, Jesús, Bëngbe Bëtsabe Uaquiñá? ¿Moye tcojabo bënga chafsufrema, chama cabá ndoñe chë tempo yontsemna ora ca?

³⁰ Chentša béconana ba cotšënga imnajena y chënga innétsosañe. ³¹ Y chë bayëjënga Jesús tmojanimpadá: —Muentšana jésebocanama aca tcojamëse, cochjama bënga chë cotšëngbeñe fchayamashjnama ca.

³² Y Jesús tojanéyana: —Motsajna ca.

Chora chë bayëjënga chë boyabásatbentsana tmojésanbocana y chë cotšëngbeñe tmojánamashjna; cachora chë cotšënga batsjocana penëšëjana uafjónayoye imojtsosh-buetše y yojtsatajo.

³³ Chora chë cotšënga anÿenënga tmojtsanacheta, y chë pueblöye tmojánashjajna ora, tmojanontsé lempe ntšamo yojochnëngcá jacuéntana y ntšamo chë bayëjbe juabna uambayátaftaca tojanopasámnaca. ³⁴ Chora nÿetsca entsanga chë pueblentšana tmojánbocana y Jesús yojtsemnoye tmojána. Chë entsanga Jesús tmojáninÿe ora, tmojanimpadá chë luarentšana chauesebocnama.

9

*Jesús, canÿe jama ndobenábioye tbojanshná
(Mc 2.1-12; Lc 5.17-26)*

¹ Chca tojanopasá chentšana, Jesús canÿe barquëshoye tojánamashëngo, uafjónaye chenguana tojána y cachabe pueblöye Capernaumoye tojtashjango. ² Chora, canÿe jama ndobená, tjuashiñe jjoná, Jesús yojtsemnoye básefta boyabásënga tmojanamba. Jesús tojáninÿe chënga tša imojtsošbuáchema chë šocábioye jáshnama cha bétsobenama; as chë šocábioye tbojanijana: “Sobreno, añemo matsca; acbe bacna soyënga tcbontsebop-erdoná ca.”

³ Chca causa, báseftanga ley abuátambayënga chentše imojtsemnënga imojtsejuabnaye: “Chca jayanëse, ndoñe tšabá quenátichamo Bëngbe Bëtsabiamá; mo chábioye cuafoyen-guangcá entsemna ca.” ⁴ Pero Jesús yojtsetátšëmbo ntšamo chënga imojtsejuabnaycá; chíyeca tojanéyana: “¿Ndáyeca nÿetšá bacna juabnënga ainaniñe šmojtsebomna ca? ⁵ ¿Tšëngaftangbiamá ndayá más paselo nántsemna tšëngaftangbe delante jayanama: ‘Acbe bacna soyënga tcbontsebop-erdoná’ o ‘Matëtsbaná y motsa ca’?” ⁶ Atše cbochanjinÿanÿiye ntšamo chë Bëngbe Bëtsá Entšá tbojanbemá quem luarentše mando yobomnama, entsanga bacna soyëngama jáperdonama ca” —Jesús tojanéyana.

As chë jama ndobenábioye tbojanijana: “Matëtsbaná, acbe tjuashe mesocñe y acbe yebnoye motsatoñe ca.”

⁷ Chorna chë jama ndobená tojtantsbaná y cachabe yebnoye yojtsatoñe. ⁸ Chca tmojáninÿama chë entsanga auatjanánënga imojtsemna y Bëngbe Bëtsá imojtsatschuanaye, cha chca obenana entsanga tojánatsatama.

Jesús, Matéobioye tbojanchembo chabuastama
(Mc 2.13-17; Lc 5.27-32)

⁹ Jesús chentsana tojtsanoñe y canye entsábioye tbojáninye, Mateo ca uabainá, chë Romocama impuesto entsángbioye atjanayentse inétsotbemañe. Chora Jesús tbojaniana: “Smasto ca.” As Mateo chentsana tojëftsantsbaná y tbojanasto.

¹⁰ Jesús cach Mateobe yebnentse yojtsesaye ora, banga Romocama impuesto entsángbioye atjanayenga y ínýenga bacna soye amënga tmojánashjajna y mesëshentse Jesús y chabe uatsjéndayëngaftaca imojotbiama. ¹¹ Chë fariseunga chca tmojáninye ora, Jesusbe uatsjéndayëngbioye tmojanatjá: —¿Ntsamo chca yojtsemna, tsëngaftangbe buatëmbayá chë impuesto atjanayenga y bacna soye amëngaftaca entsesá ca?

¹² Jesús chca tojanuena y chë fariseunga tojanëyana: —Chë salud bomnënga ashnayá ndoñe ntsëjabótana, pero chë shoquënga aiñe. ¹³ Smochjá y ntsamo ndegombre iuayancá smochjuatsjinye quem Bëngbe Bëtsabe uabemana palabrënguifne: Atse sëntseboşe tsëngaftanga lastemadënga chašmotsemna, y ndoñe nye bayënga chašmotsëbánaye Bëngbe Bëtsá jëtschuayama ca. Atse ndoñe chiyátabo chë Bëngbe Bëtsabe bominyiñe tsabá amënga jabáchembuama, sinó chë bacna soye amënga imomna ca juabnayënga jabáchembuama ca —Jesús tojánayana.

Jesús tmojantjá chë Bëngbe Bëtsáftaca jencuëntama tondaye saytescama
(Mc 2.18-22; Lc 5.33-39)

¹⁴ Chentsana, Juan chë Ubayanabe ústonënga tmojanobeconá y Jesús tmojantjá: —Bënga y chë fariseunga fsënduamana ba soye tondaye ntjascá jtsemnana, Bëngbe Bëtsáftaca jencuëntama. ¿Ndáyeca acbe uatsjéndayënga ndoñe chca ca?

¹⁵ As Jesús tojanëjua: —Chë casamentoye ófjanënga chë boyabása bouamná chëngaftaca tojtsemnëntscuana, chëngbioye saná ndoñe ntsabuáshebenana y ngménaca ndoñe ntsemnëngana. Pero ora echanjobuache y chë boyabása bouamná chentsana mochantsánatseñe; chora cocayé chë ófjanënga tondaye más jasama quemochátsbomna. Ntsamo chë tojobouamá cha y chë ofjanëngaftaca endmëncá, cachcá endmëna atse y atšbe uatsjéndayëngaftacnaca.

¹⁶ “Ndocná canye uatanguá entsáyá base tsëm entsëjuaca jtarmëndana. Er chë tsëm entsëjua jtsabëconana y chë uatanguá entsáyá más jtsatanëcanana, y chca chë uátanëcniñe más bëtsiñe jtsabemana. ¹⁷ Y cach ndoñe chë tojtseshayana vínoye tanguá jasabenguifne ntjataftsuaamayana. Tcojuafsuamasna, chë jasabenga jtseshëbëfjuana y chë vínoye jtsabuáshanana, y chë vínoye y chë jasabenga tondayama ntjatoservëna. Chíyeca comna, chë tojtseshayana vínoyna tsëm jasabenguifne juaftsuaamana; y chca, chë jasabenga y chë vínoye jtsoservëna ca” —Jesús tojánayana.

Jesús canye shembásabioye tbojanshná y tojanma Jairëbe bembetema cháuatayenama
(Mc 5.21-43; Lc 8.40-56)

¹⁸ Jesús entsanga yojtsëtsësnantscuana, chë judiëngbe enefjuana yebnentša canye mandayá tojánashjango y Jesusbe shecuatšentse yojoshamentšiyë. Chë mandayá tbojaniana: “Atšbe bembe tontsóbana. Diosmanda atšbe yebnoye mabo; cochjabojajo y cha echántayena ca.”

¹⁹ Chentsana Jesús y chabe uatsjéndayënga chë mandayá tmojanasto. ²⁰⁻²¹ Imojtsaye ora, canye shembása stëtsoicana Jesúsbioye yojobeconá. Bnétsana uta uatama oboft-jajuanánaca cha inapadecena. Chë šocá Jesúsbioye yojobeconá ora, yojtsejuabnaye: “Masque nye mo chabe entsáyá sibiájua chajjuábojajo, salud chantinýena ca.” Chentsana chë šocá Jesusbe entsáyá tojanábojajo.

²² Tojanábojajo ora, Jesús tojanobuértana, chë shembásabioye tbojáninye y tbojaniana: “Añemo matsca, shembása. Bëngbe Bëtsábeñe icošbuachëyeca, mora tsabá contsatmëna ca.” Y cach orscana cha tsabá yojtsatmëna.

²³ Chënga tmojtëtanontsé ayana y chora chë mandayábioca chënga tmojánashjajna. Chentše Jesús tojánanyë, ínÿengna chë veloriana imojtsanflautaye y ínÿengna tša imojtsošachiye. ²⁴ Chora Jesús tojanéyana: “Muentšana mobocnënga. Chë shembásetema cabá ndoñe obaná quenátsmëna; nÿe endëtsomañe ca.”

Pero chë entšanga Jesúsbioye nÿe imojtsáfchaye. ²⁵ Pero Jesús pronto chënga chë yebnentsana tojanëbuacna. Chora Jesús tojánamashëngo chë shembásetema yojtsemnoye; cucuatše tbojanábuacueshache y cachora chë shembásetema tojtantsbaná. ²⁶ Y nÿets chë luarëjana ndayá Jesús yojamama nÿetsca entšanga imojátatšëmbona.

Jesús uta jtanata tojanashná

²⁷ Jesús chentšana tojëftsanbocna ora, uta jtanata tbojanasto y mëntsá ibojtsaiuáyebuache: —¿Davídbentšana Entšá, bëndata šmotsalastemá ca!

²⁸ Jesús chë yebnoye tojánamashëngo ora, chë jtanata tbojanóbobeconata. As Jesús tojanatjá: —¿Tsëndata šojtsošbuaché atše chca jamama chjobenaye ca?

Y tmojanjuá: —Arseñor. Aíñe ca.

²⁹ Chora Jesús tojánabuchbojajo y tojanéyana: —Ntšamo tsëndatbe ošbuáchiyana yomncá, cachcá chaotsemna ca.

³⁰ Y cachora jinÿama ibojtsobena. Jesús bëtská chata mëntsá tojanamëndá: —Ndocná más quem soye chaondëtsetatšëmbo ca.

³¹ Pero chata chentšana tbojëftsanbocna y cachora tbojanontsé ndayá Jesús chátaftaca tojanmama nÿets chë luarëjana jacúntana.

Jesús, canÿe ndëbiábioye tbojanshná

³² Chë jtanata ibojtsebocanëntscuana, básefta entšanga canÿe ndëbiá, bacna bayëjbe juabna uambayá, Jesúsbioye tmojanamba. ³³ Jesús chë bacna bayëja chábsentšana tbojtanábocna y cachora chë ndëbiá tojtanontsé oyebuambnayana. Entšanga ojanánënga imojtsichamo: “¿Ndocna te Israelentše chca bëts soye chemuáisinÿe ca!”

³⁴ Pero chë fariseunga imojtsichamo: “Cach bacna bayëjengbe amëndayá, Satanás, muábioye obenana tbojatštá chë bayëjënga entšángbentšana jtëbuacanama ca.”

Jesús entšangbiama tbojanongmé

³⁵ Jesús nÿetsca pueblënguëjana y luarënguëjana yojtsachnëjuana y chë judiëngbe enëfjuana yebnënguenache entšanga yojtsabuátambaye. Yojanabuayiyná chë tšabe noticiënga Bëngbe Bëtsabe amëndayama, y nÿetsca šocanëngama y tsetšanama yojánashnaye.

³⁶ Y chë entšanga tojánanyë ora, puerte tbojanongmé. Er chënga imojtsemna mo abujajënyá ndbomna oveshëngcá, puerte uamëntsnayënga ba soyëngama padecena causa, y chaujúabuachama ndocná ntsebomncá. ³⁷ Chora chabe uatsjëndayënga tojanéyana: “Canÿe bëts jajañe bëtská játbánama entsemna, pero peonga nÿe báseftanga. Cachcá quem luarentše, bëtská entšanga Bëngbe Bëtsábioye nduabuátmënga montsemna, y chëngbioye chabiamá abuyayinayënga nÿe báseftanga. ³⁸ Peonga tmojtsashbenëse chë nduíñbioye jaimpádana ba peonga chauichamoma chë jaja saná játbánama. Cachcá, Bëngbe Bëtsábioye moimpadanga ba abuyayinayënga chauichamoma, quem entšanga chábioye chamúbuajama ca” —Jesús tojanéyana.

10

Jesús chë bnëtsana uta uatsjëndayënga tojanabacacá (Mc 3.13-19; Lc 6.12-16)

¹ Chentšana Jesús tojánachembo chabe bnëtsana uta uatsjëndayënga, y obenana tojanatšatá bacna bayëjengbe juabna entšángbentšana jtabocnama y nÿetsca šocanëngama y tsetšanama jashnayama.

² Chë bnëtsana uta uatsjédayënga mëntšá imojanabaina: chë natsaná Simón, Pedro cánaca uabainá y chabe uabentsá Andrés; Santiago y chabe uabentsá Juan, Zebedeobe uaquiñata; ³ Felipe y Bartolomé; Tomás y Mateo, chë Romocama impuesto entšángbioye atjanayá; Santiago, Alfeobe uaquiñá y Tadeo; ⁴ Simón, chë celote ca uabobainá y Judas Iscariote, chë uayayëngbe cucuatšíñe Jesúsbioye boshjuaná.

Jesús, chabe bnëtsana uta uatsjédayënga tojanichamó, Bëngbe Bëtsabe amëndayama jábuayenama

(Mc 6.7-13; Lc 9.1-6)

⁵ Jesús chë bnëtsana uta boyabásenga tojanichamó chë tšabe noticiënga entšanga jabuátambama, y mëntšá tojanabuayená: “Chë ndoñe judiëngbeñe ndoñe šmattsana y ndaye pueblentše Samaria luaroca ndoñe šmatjéftsamashjna. ⁶ Nye Israeloca pueblëngoye šmochjá. Choca entšanga mo ótsena oveshëngcá montsemna, Bëngbe Bëtsábioye corente nduabuatma causa. ⁷ Smochjá y entšanga šmochjábuayenaye Bëngbe Bëtsabe amëndayana echanjóshjanguama. ⁸ Chë šoquënga šmochjáshnaye, šmochjama chë obanënga chámuatayenama, bacna nguayanánaca šoquënga šmochjáshnaye y bacna bayëjëngbe juabna entšángbentsana šmochtábocna. Chë obenana šmonjójyëngacñe tondaye ntjëtsajuacá; cachcá, chë soyënga šmojtsamama tondaye entšanga šmattsayëngacaye.

⁹ “Ndoñe šmattsambaye crocénana uasnanëchiñe. ¹⁰ Ni shecnaja sanaca benachiñama, ni inye entšayá jtsenomódama, ni shecochëtjonëshënga, ni jatjonëfja, er chë tšabe trabajayá jtsomerecénana ntšamo tbojtsajabotcá jójyëngacñama.

¹¹ “Nderado canye bëts pueblentše o base pueblentše chašmojášhjajna ora, šmochjáanguango canye tšabe entšá, ín'yëngbioye ndaingñayá, y chabe yebnentše šmochtsoquedañe, inye puebloye játantscuana. ¹² Canye yebnoye chašmojámashjna ora, nyetsca chentša oyenënga mëntšá šmochjácheuaye: ‘Chë bëngbe ainaniñe tšabe ebionana tšëngaftangbe ainaniñe chaotsemna ca.’ ¹³ Chë yebnentša entšanga ainaniñe tšabe ebionana jtsebomnama merecido tmojtsebuajonëse, chë tšëngaftangbe ainaniñe tšabe ebionana chëngaftaca chaotsemna. Ndoñesna, nye cach tšëngaftangftaca chaotsomñe. ¹⁴ Y nderado canye pueblentše o bëts pueblentše chë entšanga ndoñe tcmónjúbujaja y ndoñe tcmónjójyaunase, chentšana šmochjésebocana y chë shecuatšentša polvëshe šmochjésenstoto. Chca, chë entšanga mochántsetatšëmbo chënga tšëngaftangftaca ndoñe tšabá tmonjamama. ¹⁵ Ndegombre šcuayana, quem luare jopochócama te, chë ndoñe chacmonjúbujaja y ndoñe chacmonjójyauná entšanga Bëngbe Bëtsá puerte jabuache echantsacastígaye, y chë bacna entšanga Sodoma y Gomorra luaroquëngna ndoñe nya nyëtsá jabuache queochatacastígaye ca” —Jesús tojánayana.

Ntšamo chë uatsjédayënga mochjansúfria

¹⁶ “Smochjouena. Atše cbontsachamná mo oveshënga cuenta tjañe quešëngbeñe. Chíyeca studio bomnënga mo mëtscuayëngcá šmochtsemna y uamanënga mo palomatemëngcá. ¹⁷ Entšangbiamá cuedado šmochtsebomna, chëngbe pueblentša amëndayëngbe cucuatšíñe tšëngaftanga cmochanjábashejuana y chëngbe enefjuana yebnënguenache cmochanjátsetšenaye. ¹⁸ Atšbe ústonënga bëtsemnama, mandadëngbioye y reyëngbioye cmochanjunatse. Y chca, tšëngaftanga šmochanjobenaye chëngbeñe y chë ndoñe judiëngbeñe ntšamo atšbiamá šmotatšëmbcá jójyëbuambayama. ¹⁹ Pero chë mandadëngbe cucuatšíñe chacmojábashejuana ora, ntšamo o ndayá šmochjayanama ndoñe šmattsenócochinýena. Chca orna, Bëngbe Bëtsá tšëngaftanga cmochanjabuayená ntšamo o ndayá jójyëbuambayama. ²⁰ Tšëngaftanga ndoñe chë oyëbuambayënga quešmochátsmëna, sinó chë tšëngaftangbe Taitá, Bëngbe Bëtsabe Espiritu, tšëngaftangbiajana echantsójyëbuambayene.

21 “Y canye entsá cachabe catsátbioye uayayëngbe cucuatsiñe bochanjáboshjona chamotsóbama; y canye taitá cachabe uaquiñábioynaca. Y chë básenga chëngbe bëtsetsangbe contra mochántsemna y uayayëngbe cucuatsiñe mochanjábashjuana chamotsébáyama. 22 Tšëngaftanga atšbe ústonënga bëtsemnama, nyetsca entsanga cmochantsëbuayënja; pero nda nyets tempo átšbeñe ošbuachiyá chaotsomñá, atsboaná echántsemna. 23 Canye pueblentse chacmojtšécamena ora, inye puebloye šmochtsacheta. Ndegombre cbéyana, Israelentša nyetsca pueblëngoye cabá nda ora, chë Bëngbe Bëtsá Entšá tbojanbemá ya quem luaroye echanjabáshjango.

24 “Ni canye uatsjendayá chabe buatëmbayabiama más uamaná ntsemnana, ni chë oservená chabe nduiñbiama más uamaná. 25 Chë uatsjendayá ya cachabe buatëmbayacá jtsemnana tojashjáchëse, ndayá más nanjatsboše. Cachcá endmëna chë oservenáftaca, cachabe nduiñcá tojtsemnëse. Atše sëndmëna mo canye yebnentša taitacá y tšëngaftangna mo cach yebnentša basengcá. Entšanga jtsichámuana atšna Beelzebú o chë bacna bayëjëngbe amëndayá tsmëna ca. ¿Ntsámo chënga tšëngaftanga cmochtsëbobuatma ca?” — Jesús tojanëyana.

Nda ndegombre cuantsebiauatja

(Lc 12.2-7)

26 “Chíyeca entsangbiama ndoñe matauatjëngana. Chë yoiytëmena soyentsana ton-daye ntjinycá queochaisoquéda, y chë ndótatsëmbo soye, ntsotatsëmbcá queochaisoquéda. 27 Chë mora cbontsëtsëtsná soyënga, chë entsangbiama mo ibetiñe cuaftsemncá soyënga, tšëngaftanga šmochjama entsanga botamana chama chamotsetatsëmbuama. Y chë iytëcana cbontsëtsëtsná soyënga nyetsca entsanga šmochtsabuayiynaye, mo nda canye yebnentša tsbanánocana noticiënga tojtsayebuachcá. 28 Ndoñe matauatjëngana nye chë tšëngaftangbe cuerpo japochócama imobenëngbiama y ainana jtsepochócama ndoñe ntsoybenana. Más šmochtsebiauatja chë nda endobena tšëngaftangbe cuerpo y tšëngaftangbe ainana jtsepochócama, nyetsca tescama infiernoca.

29 “Uta jaja shloftsetémata nye canye denario crocenánama mondbétsena. Masque chca, ni cányetema obanatemala fshantsoye jotsatsana, tšëngaftangbe Taitá, Bëngbe Bëtsá ndoñe tontsebošëse. 30 Y tšëngaftangbiama, Bëngbe Bëtsá botamana jtsantješnana, y chca, cha lempe tšëngaftangbiama jtsetatsëmbuana, bueta stjënashënga tšëngaftangbe bestšašíñe yomnámna. 31 Chíyeca ndoñe matauatjëngana, tšëngaftanga ba jaja shloftsetémëngbiama corente más šmonduámana ca” — Jesús tojanëyana.

Ndabiama Jesucristo yochjayana chabe entsá yomna ca

(Lc 12.8-9)

32 “Nda atšbe entsá yomna ca entsangbe delante tojayanabiama, átšnaca, atšbe Taitá, chë celoca endmënabe delante chanjayana cha atšbe entsá yomna ca. 33 Pero nda entsangbe delante atšbe entsá ndoñe yondmëna ca tojayanabiama, átšnaca, atšbe Taitá, chë celoca endmënabe delante chanjayana cha atšbe entsá ndoñe yondmëna ca” — Jesús tojanëyana.

Jesube causa, entsángbeñe más jtsentsjanayana

(Lc 12.51-53; 14.26-27)

34 “Ndoñe šmattsejuabnaye atše quem luaroye tijabo nyetsca entsanga natjëmbana chamotsiyenama. Atše chama ndoñe chiyátabo; atše sënjabo causa, entsanga más mochántsentsjanaye. 35 Atše sënjabo chë uaquiñá cachabe taitabe contra chaotsemnana, chë bembe cachabe mamabe contra y chë bebinuá chabe uambén mamabe contra chaotsemnana. 36 Y chca, ba entsangbe uayayënga cachëngbe pamíllanga mochántsemna.

37 “Nda cachabe taitá o mamábioye atšbiama más tbojtsebobonshánëse, cha ndoñe ntsomerecénana atšbe entsá jtsemnana. Nda cachabe uaquiñá o bémbëbioye atšbiama más tbojtsebobonshánëse, cha cach ndoñe. 38 Y nda nyetsca chabe quem luare soyënga

ndoñe tonjëseboshjona atše juastama, y atšbiana jasúfriama ndoñe tontseprontana y cruciñe jobanámnaca, cha ndoñe ntsomerecénana atšbe entsá jtsemnama. ³⁹ Nda tojtsentsena quem luarentše bëtscá soyënga jtsebomnama y atšbiana jasúfriama ndoñe tontseprontana, chë nyetsca tescama yomna tšabe vida echanjobuetše. Pero nda quem luarentša soyënga cachcá tojesonyá atše juastama, masque chaóbana, chë nyetsca tescama yomna tšabe vida echántsebomna ca” —Jesús tojánayana.

*Chë uacanana soyënga
(Mc 9.41)*

⁴⁰ “Nda tšëngaftanga chacmojúbuaja, átšnaca cha šochanjofja; y nda atše chašojofja, chë nda šojichmóbioynaca cha bochanjofja. ⁴¹ Nda canye Bëngbe Bëtsabe juabna oyebuambnáyabioye tbojoyeuná, cha chca bëtsemnama, chábioye Bëngbe Bëtsá canye uacanana soye bochantatšetaye, mo cach Bëngbe Bëtsabe juabna oyebuambnáyabe uacanana soycá. Y nda canye nyetsca soyënguiñe tšabá amábioye tbojofja, cha chca uamanama, chábioye Bëngbe Bëtsá canye uacanana soye bochantatšetaye, mo cach nyetsca soyënguiñe tšabá amabe uacanana soycá. ⁴² Y ndánaca, tšëngaftanguentsá canye nduamanábioye masque nye mo base búyeshtema tbojuabuatsétá, atšbe ustoná bëtsemnayeca, ndegombre Bëngbe Bëtsá canye uacanana soye chábioye bochantatšetaye ca” —Jesús tojánayana.

11

*Juan chë Ubayanabe ichmónënga
(Lc 7.18-35)*

¹ Jesús tojanpochocá chabe bnëtsana uta uatsjëndayënga jábuayenama, y chentšana tojtsanoñe chë luariñe pueblënguenache oyena entsanga Bëngbe Bëtsabe palabra jabuátambama y jábuayenama.

² Chë tempo Juan chë Ubyaná cárceloye tmojanëtame. Choca cha yojouena ndayá Jesús yojtsamama. Y as, Jesús yojtsemnoye, básefta chabe ústonënga tojanichamó, ³ mëntsá jatjayama: —¿Aca ndegombre cojtsemna chë jabama ibojanmëná, chë Uámana Uabuayaná, o šojtsamna ínñabiama jatobátmama ca?

⁴ Chca tmojantjá orna, Jesús tojanëjua: —Smochjá y Juan šmochjauyana ntšamo smojouena y šmojinýcá. ⁵ Cha šmochjacuénta: Chë jtanënga tšabá entsatëbinýna, chë coshetënga tšabá montsatana, chë bacna nguayanánaca šoquënga shnánënga montsatsmëna y chë tësmënga montsuenana, chë obanënga tmontayena y chë ndbomnëjmëngbioye chë tšabe noticiënga montsabuyayiná ca. ⁶ ¡Puerte oyejuayá chaotsemna chë nda atše bacna soye ndoñe stsama ca jtsejuabnayëse, átšbeñe ošbuáchiyana ndoñe tontsajbaná cha ca! —Jesús tojanëyana.

⁷ Chënga tmojtsatanoñe ora, Jesús tojanontsé Juanbiana chë entsanga jáuyanana, mëntsá: “Juan jinýama šmojánbocana ora, ¿ndayá jinýama chë entsanga ndoyena luaroye šmojánbocana? ¿Canye entsá ainaniñe tondaye añemo ndbomná, mo canye šëše bínýiaca shatiyeynëscá? ⁸ Y ndóñese, ¿ndayá jinýama choye šmojánbocana? ¿Canye boyabása uámana entsayaca bopormaná? Ndoñe. Tšëngaftanga šmondëtatšëmbo chë boyabásënga uámana entsayaca bopormánëngna chë mándayëngbe yebnënguiñe mondbétsiyenama. ⁹ Y asna, ¿ndayama choye šmojánbocana? ¿Canye Bëngbe Bëtsabe juabna oyebuambnáyá jinýama? Ndegombre, añe; y cbëyana, ndegombre cha canye Bëngbe Bëtsabe juabna oyebuambnáyabiama más bëtscá endmëna. ¹⁰ Cha, Juan, endmëna ndabiama Bëngbe Bëtsá chabe uabemana palabrenguiñe tojánayana mo chabe ichmonacá, mëntsá tojánayana ora: Cristo, atšbe entsá natsana sënjichmó acbiana chaóyebuambama, entsanga jábuayenama aca jabama ainaniñe tšabe juabnëngaca chamotseprontánama ca.

11 Ndegombre cbëyana: Nÿets tempo entšángbeñe, ndocná quenátsmëna Juan chë Ubayanabiana más bëtšá; masque chca, Bëngbe Bëtšabe amëndayoca chë más batšá uamaná, más bëtšá echántsemna ntšamo mora Juan yomnama.

12 “Juan chë Ubyaná tojánabo orscana mëntscoñama, bëtscá entšanga tša mondboše Bëngbe Bëtšabe amëndayoye jamashënguama, y chë Bëngbe Bëtšabe amëndayama contra imomnëngna, chëngbe nÿets añémoca montseboše chë mándayana jtsepochócama. 13 Juan candabëntscuana, nÿetsca Bëngbe Bëtšabe juabna oyebuambnayënga y Moisesbe Ley nÿe Bëngbe Bëtšabe amëndayama tmonjanobuambá. 14 Y tšëngaftanga chë soyënga jójëngacñama šmojtsebošëse, Juan entsemna chë Bëngbe Bëtšabe juabna oyebuambnayá Eliascá, chë jabama ibojamná. 15 Chë jouenama tmojtsoebenënga, chamouena ca” —Jesús tojánayana.

16 Mëntšánaca Jesús tojánayana: “¿Ndayacá morsca entšanga imomna? Chënga mondmëna mo chë plazëngoca mondbetsetbiámama basetemëngcá; chënga chëngbe enutëngbioye jtsayebuáchana 17 y mëntšá jtsichámuana: ‘Tšëngaftangbiana fsënjaflautá y ndoñe chešmatslantsá; ngmënaca fsënjaversiá y ndoñe chešmatošachna ca.’ 18 Juan tonjánabo, y bëtscá entšángbeñe ndoñe quenjatamana ni jasana, ni jofšiyana, y entšanga montsanichamo chana bacna bayëjbe juabna uambayá yojamna ca. 19 Morna, chë Bëngbe Bëtšá Entšá tbojanbemá tonjabo, y chana aíñe entsamana bëtscá entšángbeñe jtseyayana y jtsofšëšnayana, y entšanga montsichamo chana yapa uasayá y vínoye tmoyá entsemna ca y Romocama impuesto entšángbioye atjanayënga y bacna soye amëngbe amigo ca. Pero Bëngbe Bëtšá endbëtsinÿanÿnaye cha nÿets osertánana bomná yomnama, chë ndayá cha tojama ora ndayá chentšana tojóbozna soyëngaca ca” —Jesús tojánayana.

*Chë nduauenana entšanga
(Lc 10.13-15)*

20 Chentšana Jesús tojanontsé jucácanana chë entšanga, ndëmuanÿënga imojoyena chë pueblënguiñe ndayenache ba chabe bëtš soyënga tojanma, chënga bacna soyënga amana ndoñe tmontsanajbanama y Bëngbe Bëtšabe benache ndoñe tmontanishachama. Mëntšá yojtsichamo: 21 “¡Tša lastema, Corazín puebloca entšangbiana! ¡Tša lastema, Betsaida puebloca entšangbiámna! Chë chentše sënjama bëtš soyënga, Tiro y Sidón bëtš pueblënguentše matënjochnënguse, chentša bacna entšanga ya tempo ngmënaca matmëntenojuabó chëngbe bacna soyëngama y Bëngbe Bëtšabe benache matmëntishache; y chca tmojamama chaotsótatsëmbuama uajojësha entšayangaca matmëntopormanga y chëngbe bestšašinë jatinyá matmënjenotbótoto. 22 Pero ndegombre cbëyana, ntšamo entšanga tmojamama, tšabá o ndoñe tšabá bëtsemnama jayanama chaojobuache ora, tšëngaftanga más bëtš castigo šmochántsebozna, chë Tiro y Sidonoca bacna entšangbe castiguama. 23 Y tšëngaftanga, Capernaumoca entšanga, ¿šmojtsejuabná celóntscoca atsebánanënga šmochtsemna ca? ¡Chë uabouana infiernoye cmochantsésetjango! Chë muentše sënjama bëtš soyënga Sodomoca matënjochnënguse, choca entšanga ya tempo ngmënaca chëngbe bacna soyëngama matmëntenojuabó y Bëngbe Bëtšabe benache matmëntishache, y chë bëtš pueblo cabá cachcá mëntscuana mantsomñe. 24 Pero ndegombre cbëyana, quem luare jopochócama te, Bëngbe Bëtšá puerte jabuache cmochantsacastígaye, y chë Sodoma luaroca entšángbioye ndoñe nÿetšá jabuache quemochatacastígaye ca” —Jesús tojánayana.

*“Atšbioye mabënga y šmochjóchna”
(Lc 10.21-22)*

²⁵ Chë tempo, Jesús tojánayana: “Atše cbatschuá, Taita, celoca y quem luarentša Utabná. Aca, chë nÿe batsá tatsëmbënga tcojanÿanÿé, chë tša tatsëmbënga y osertánëngbiama tcojaiytëme soyënga. ²⁶ Aíñe, chama cbontsadorana, Taita, chca chaotsemnama tcojábosenayeca.

²⁷ “Atšbe Taitá lempe chca šonjatštá. Chë Uaquiñábioye ndocná corente quebnatábuatma; nÿe chë Taitá aíñe. Y chë Taitábioye ndocná corente quebnatábuatma; nÿe chë Uaquiñá aíñe, y ndábioye chë Uaquiñá tojtseboše nda chë Taitá yomnama jinÿanÿiyama, chánaca chë Taitábioye bochantšabuatma.

²⁸ “Atšbioye mabënga nÿetsca tšëngaftanga uamëntšnayënga y bëtscá trabajo uangménënga, y atše chanjama tšëngaftanga chašmochnama. ²⁹ Ntšamo canÿe entšá, uacná yuguëšiñe juabatsëcana juanatsama, cachcá, tšëngaftanga atše šmochjalesencia jobnatsayama y jabuátambama. Atšbentšana šmochjuatsjinÿe: atše uantado mëná sëndmëna y ndoñe quetsatamana yapa uamaná jatenobiamnayana. Y chca, tšabá jóchnama šmochantsobena y ainaniñe más añemo šmochántsemna. ³⁰ Mo canÿe uacnacá, ndoñe tishuta yuguëšeca o ndoñe uauta uasmanëshaca, paselo jama jobenayana, cachcá tšëngaftanga šmochántsemna atše cbojtsabnatsana y cbojtsabuátambase; y chca, tšëngaftanga más oyejuayënga šmochántsemna y más paselo nÿetsca soyënga jamama echántsemna ca” —Jesús tojánayana.

12

Jesube uatsjëndayënga ochnayté trigo tmojanátabebe
(Mc 2.23-28; Lc 6.1-5)

¹ Chë tempo, Jesús canÿe ochnayté canÿe jajajana yojtsachnëjuana. Chabe uatsjëndayëngna shëntseca imojtsemna, chíyeca tmojanontšé trigo juatabebiana y chë meshënga jasana. ² Chë fariseunga chca tmojáninÿe ora, Jesús tmojanianayana: —Minÿe, acbe uatsjëndayënga canÿe soye montsama y chë soye ochnayté jamama ndoñe quenátslesenciana ca.

³ As Jesús tojanëyana: —¿Ndoñe šmëndualía y šmondëtatsëmbo ndayá David y chabe enutënga tmojanmama, shëntseca imojtsemna ora? ⁴ Chca orna, David, Bëngbe Bëtsabe bëtš yebnoye yojámashëngo y chë Bëngbe Bëtsá chentše yojamnama inÿinÿnaye tandëšënga yojase. Chë tandëše nÿe ndánaca jasama ndoñe yonjalesenciana, ni David-biama, ni chabe enutëngbiama. Nÿe bachnangbiama belesenciana chë tandëše jasama. Masque David chca tojanma, Bëngbe Bëtsá chora ndoñe tonjánayana David canÿe bacna soye tojanma ca. ⁵ ¿O ndoñe šmëndualía y šmondëtatsëmbo, Moisesbe leyiñe, chë bachnanga ochnayté Bëngbe Bëtsabe bëtš yebnentše jtsetrabájayana, pero ndoñe bacna soye ntsemnana chë bachnanga ochnayté ndoñe mondbóchnama? ⁶ Y atše šcuayana: Muentše canÿa entsemna, cha chë Bëngbe Bëtsabe bëtš yebnentša bachnangbiama más uamaná endmëna y chabe amëndayoca soyënga más entsámama chë bachnangbe mándayentša soyëngama. ⁷ Bëngbe Bëtsabe uabemana palabrënguiñe mëntšá endayana:

Atše sëntseboše tšëngaftanga lastemadënga chašmotsemna,

y ndoñe nÿe bayënga chašmotsëbánaye Bëngbe Bëtsá jëtšcuayama ca.

Ntšamo chiñe entsayancá ndegombre cmojtsësertánëse, tšëngaftanga ndoñe chëngbe contra šmattsichamo, chë ochnayté chca tmojtsamëngbiama. ⁸ Chë Bëngbe Bëtsá Entšá tbojanbemá, chë entšá ochnayté tojtsama sóynaca jtsemándayana ca —Jesús tojánayana.

Chë buashana cucuatše bomna entšá
(Mc 3.1-6; Lc 6.6-11)

⁹ Chentšana Jesús tojtsanoñe y chentša judiëngbe enefjuana yebnoye tojánamashëngo. ¹⁰ Chentše yojtsemna canÿe boyabása buashana buacuatše bomná. Chë fariseunga imojtsenguaye ndayánaca, as chca chënga jtsemomnama ndaye sóyeca Jesús mal jaquédama.

Chcasna, chora chënga Jesús tmojantjá: —¿Queojtselesenciana canÿe ochnayté šocá jáshnama ca?

¹¹ Y Jesús tojanějua: —¿Nda tšëngaftanguentsá, canÿe oveshá tbojtsebomna y nÿa chë ochnayté canÿe fshantsentše atëfjnoye chë oveshá tojtsótsatše, chora chë boyabása nanjá o ndoñe chë oveshá jatábocnama? ¹² ¿Entsá oveshabiamana puerte más uamaná endmëna! Chcasna, entselesenciana chë ochnayté tšabe soye jamama ca —Jesús tojanějua.

¹³ Chora Jesús chë buashana buacuatše bomnábioye tbojanianana: “Macuenÿanëjaná ca.” Y chë boyabásana tojanacuenÿanëjaná y chora chëtša tšabá yojtsatamna mo cach inÿetšacá. ¹⁴ Pero chë fariseunga tmojésanbocana ora, tmojanontšé juabnayana ntšamo jamëse Jesús jóbama.

Ndayá chë Bëngbe Bëtsabe juabna oyebuambnayá Jesusbiamana tojánayana

¹⁵ Jesús chë soye tojántatšëmbona ora, chentšana tojtsanoñe y ba entšanga tmojanasto. Nÿetsca šoquënga tojanashná, ¹⁶ y tojanamëndá chabiamana entšangbeñe ndoñe chamondëtsóyebuambnama. ¹⁷ Chca tojanamëndá, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana:

¹⁸ Muentše atšbe oservená entsemna. Atše cha sënjabocacá, atšbe bonshaná, y atše corente chabiamana sëntsoyejuá. Atše chanjama atšbe Espíritu chabe ainaniñe chaotsemnama y entšanga echanjabuayená, Bëngbe Bëtsá nÿetsca luarënguentsana entšangbiamana yoch-jayanama chënga tšabá o ndoñe tšabá tmonjamama.

¹⁹ Cha ndoñe queochátayajuatsana, ni queochátšchembumbuana. Chabe oyebuambnayana tsáshenañe ndocná queochatuena.

²⁰ Mo nda chë atcana šëse ndoñe más jatsndbemana, chë ndobenënga cha ndoñe queochátapochocaye. Mo nda chë quinÿenëfjua nÿe uabojátšena uajuinÿnëfjua ndoñe ntsafsanana, chë Bëngbe Bëtsábeñe jtsošbuáchiyama imojtsebojátšangbe obatmanana chábeñe, cha ndoñe queochátabuajuanaye.

Cha nÿets añémoca echanjëftsetrabája, entšanga chëngbe ainaniñe Bëngbe Bëtsabe ndegombre soyënga chamóyëngacñëntscuana.

²¹ Y nÿetsca luarënguentsana entšanga chábeñe mochantsobátmana ca —cha tojánayana.

Fariseunga tmojánayana Jesús Satanásbentšana obenana tojanóyëngacñe ca (Mc 3.20-30; Lc 11.14-23; 12.10)

²² Chora, Jesús yojtsemnoye canÿe boyabása jtaná y ndëbiá tmojanánatse. Chana bacna bayëjbe juabna uambayá inamna; y Jesús chábioye tbojanshná, chabuatabinÿnama y chabuatauënanama. ²³ Y nÿetsca entšanga ojnánanënga imojtsichamo: “¿Mua yojtsemna chë Davídbentšana Uámana Entsá, chë Cristo ca?”

²⁴ Pero chë fariseunga chca tmojanuena ora, imojtsichamo: “Beelzebú, cach Satanás, chë bacna bayëjëngbe amëndayá, quem boyabásabioye obenana tbojatštá chë bayëjënga chauatëbuacnama ca.”

²⁵ Y Jesús yojtsetatšëmbo ntšamo chënga imojtsejuabnayama; as tojanějua: “Canÿe amëndayentše entšanga tmojtsenojatá y tmojtsenáyase, cachënga jenpochócana. Cachcá, canÿe bëts pueblentša entšanga o canÿe yebnentša pamíllanga tmojtsenojatá y ndoñe tmontsenëyeunanëse, chënga ndoñe tšabá nÿets tempo quemochátsmëna. ²⁶ Cachcá, Satanás cachabe bayëjënga jtëbuacnama tojtsebošëse, chana tojtsenojatá y cachabe contra yojtsemna. Y chca, ¿ntšamo nantsobena chabe mándayana quem luar-entše jëftsebomnana? ²⁷ Tšëngaftanga šmontsichamo atše Beelzebube obenánaca chë bayëjënga stsatëbuacana ca; pero chca ndegombre tojtsemnëse, ¿ndábeyeca tšëngaftangbe usetonënga obenana imojtsebomna chë bacna bayëjënga jtëbuacnama? Chíyecna, chënga montsinÿinÿná ntšamo ndegombre yomnana y tšëngaftanga ndoñe ndegombre

soye šmontsichámuama. ²⁸ Y atšna, chë Bëngbe Bëtsabe Espíritbeyeca chë bayëjënga entsángbentsana sëndëtëbuacana; y chë soye entsinýinýná Bëngbe Bëtsabe amëndayana tsëngaftangbioye tojóshjanguama.

²⁹ “¿Ntsámo nda nanjobenaye canýe corente añemo bomna entsabe yebnoye jamashënguana y chabe soyënga jtsebocana, ndoñe natsana chábioye tconjshétsebatsëquëse? Nýe tcojshétsebatsëquësna aíñe cuanjobenaye cha jefcana. Atše ya chca Satanásoftaca sënjama.

³⁰ “Nda ndoñe átšeftaca tontsemná, atšbe uayayá jtsemnana. Y nda átšeftaca ndoñe tontsetrabája, chana atšbe contra jtsetrabájayana.

³¹ “Chíyeca cbëyana, Bëngbe Bëtsá entsanga echanjáperdonaye nyetsca chëngbe bacna soyënga y chë Bëngbe Bëtsabiana puerte bacá oyebuambnayana, mo chábioye cuafjoyenguangcá; pero ndoñe queochátaperdonaye chë Uámana Espíritbiana puerte bacá ichámënga. ³² Bëngbe Bëtsá bochanjaperdóna chë Cha Entzá tbojanbemabiana ndoñe tsábá ichamuábioye; pero chë Uámana Espíritbiana ndoñe tsábá ichamuábioyna, ni quem luarentše, ni ndocna te quebochatsperdóna ca” —Jesús tojánayana.

Tšabe betiye o ndoñe tsabe betiye tondmënana, jtsotatsëmbuana ntšamo tojashajoncá (Lc 6.43-45)

³³ “Canýe betiye tsábá mobocuedanga y botamana echanjashájona; ndoñe tsábá matscuedánana y tsabe shajuana ndoñe queochátsbomna. Chë betiye tsabe betiye o ndoñe tsabe betiye tondmënana, jtsotatsëmbuana ntšamo chëshe tojashajoncá.

³⁴ ¡Mëtscuaye entsanga! ¿Ntsámo šmattsobena tsabe soyëngama jtsóyebuambnayana, cach tsëngaftanga bacna entsanga šmojtsemnëse? Er ndayá ainanoca becá tomnama entsá jtsóyebuambnayana. ³⁵ Chë tsabe entsá, chë ainanoca tsabe juabnënga bomnentsana jtsóyebuambnayana, y chë bacna entsana chë ainanoca bacna juabnënga tobomnentsana jtsóyebuambnayana. ³⁶ Y ndegombre cbëyana, chë entsangbiana tsábá o ndoñe tsábá tmonjamama jayanama tempo chaojobuache ora, ndaye ndoservena palabra šmojóyebuambama, Bëngbe Bëtsabe delante šmochanjayana ndáyeca chca ca.

³⁷ Er ntšamo tcojtsóyebuambnama Bëngbe Bëtsá echanjayana tsábá o ndoñe tsábá tconjamama, y cmochanjauyana aíñe o ndoñe cmontsemna castiganá jtsemnana ca” —Jesús tojánayana.

Chë bacna entsanga Jesús tmojanimpadá canýe bëts soye chaoma, chabe obenana jinýama

(Lc 11.29-32)

³⁸ Chentšana, básefta fariseunga y Moisesbe ley abuátambayënga Jesús tmojanjá: —Buatëmbayá, bënga fsëntseboše aca canýe bëts soye chacoma, acbe obenana chašcuinýanýema ca.

³⁹ As Jesús tojanéjua: —Quem puerte bacna entsanga y ndošbuáchiyënga montseboše atše canýe bëts soye chaima, atšbe obenana jinýanýiyama; pero chca soye ndoñe quemochátinýe, sinó nýe chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soycá. ⁴⁰ Ntsámo Jonás unga te y unga ibeta chë bëts beonbe uafsbioye yojëftsemncá, cachcá chë Bëngbe Bëtsá Entzá tbojanbemá unga te y unga ibeta fshantse jashenoye echanjëftsemna. ⁴¹ Morsca entsanga tsábá o ndoñe tsábá tmonjamama Bëngbe Bëtsá yochjayana te, Nínive bëts puebloca entsanga mochanjotsaye y morsca entsangbiana mochanjayana ndoñe tsábá tmonjama ca; er chënga, Jonás yojtsabuayiynaye ora, tmojanoyeuná y chë tsabe benache tmojtanishache, y chë mora muentše entsemnana, Jonasbiana más uamaná endmëna. ⁴² Morsca entsanga tsábá o ndoñe tsábá tmonjamama Bëngbe Bëtsá yochjayana te, chë Sur luaroca reinánaca echanjotsaye y morsca entsangbiana echanjayana ndoñe tsábá tmonjama ca; er chana chë quem luare iuajbana luarëngocana tojánabo Salomonbe osertánaca palabrénga

jouenama, y chë mora muentše entsemnana, Salomonbiamá más uamaná endmëna ca —Jesús tojánayana.

Ndayá inopása chë bacna entsángaftaca

(Lc 11.24-26)

⁴³ Jesús mëntsánaca tojánayana: “Canÿe bacna bayëja canÿe entsábentsana tojésebcna ora, chë bayëjna bojojo luarënguenache jtsanana ndayentše jóchnama onguayiñe, y canÿe luare ndoñe tonjínÿena ora cha jenójuaboyana: ⁴⁴ ‘Atsbe oyenoye, chë ndayentšana sënjëftsebcnoye chanjesshëcona ca’. Y choye tojtashjango orna, jinÿenana lempe tšabá cha jtesamashënguama, mo chentše ndocná tontsiyencá, tsjajniñe y lempe botamaniñe cuaftsemncá. ⁴⁵ Chorna chë bayëjna jana y inÿe canÿsëfta bayëjenga chabiamá más opëjenga jobiatsana y nÿetscanga choye jamashjnana chë boyabásabeñe joyéanamá. Y chca, chë boyabása tempscama más bacna entsá jtsemnana, chora chë natsanamá más bayëjenga abamna causa. Morsca puerte bacna entsángaftaca cachcá echanjochnëngo ca” —Jesús tojánayana.

Chë Jesusbe ndegombre pamillanguentsënga

(Mc 3.31-35; Lc 8.19-21)

⁴⁶ Jesús cabá entsanga yojsëtsëtsnaye ora, chabe mamá y catsátanga tmojánashjajna y imojtseboše Jesúseftaca jóyebuambayama. Nÿe shjoca imojtsemna; ⁴⁷ asna, canÿe boyabása Jesúsbioye tbojanbuayená: —Acbe mamá y acbe catsátanga shjoca montsemna y montseboše ácaftaca jóyebuambayama ca.

⁴⁸ Pero Jesús chë jauenayama tojánabioye tbojanianyana: —¿Nda atsbe mamá yomna, y ndëmuanÿenga atsbe catsátanga ca?

⁴⁹ Y cachora chabe cucuatše tojanatsbaná, chabe uatsjëndayënga tojanëñÿanÿé y tojánayana: —Quemënga montsemna mo atsbe mamacá y mo atsbe catsatangcá. ⁵⁰ Er ndánaca, ntšamo atsbe Taitá, celoca endmëná yobošcá tojtsama, jtsemnana atsbe catsata, atsbe uabena y atsbe mamá, atsbe ndegombre pamillanguentsá ca —Jesús tojánayana.

13

Chë jenabe cuento

(Mc 4.1-9; Lc 8.4-8)

¹ Cach te, Jesús yebnentsana tojëftsanbocna y uafjajónaye tsachoca tojanótbema.

² Mallajta entsanga choye tmojanobeconá; as Jesús, chë uafjajónayentše yojanamna canÿe barquëshoye tojánasëngo, tojanótbema; y chë entsangna tsachoca imojtsemna.

³ Chorna ba soyëngama cuentëngaca chënga tojanabuatambá.

Mëntsá tojanëyana: “Canÿe jená chë jënaye jaujquëshama yojëftsebcna.

⁴ Yojsëjquëshaye orna, básefta jënaye benache juachañe yojuatquécjana, pero chë jaja shloftšënga imojástjajna y lempe imojtsósañe. ⁵ Inÿe meshëngna ndëtšbenguiñe yojuatquécjana, ndoñe yapa fshantse binÿnentše. Chiñna betscó yojuábocna, fshantse ndoñe jashenocana yonjanmëna causa, ⁶ pero shinÿe yojábocna ora, puerte yojojëñÿána y yojsancta; y yojsábojo, bëtscá tbëtëjenga tondaye causa. ⁷ Inÿe meshëngna ucmëshangañe yojuatquécjana, y chë ucmëshangá yojuájua orna, lempe yojsatscué.

⁸ Y inÿe meshëngna, uanguanëshiñe yojuatquécjana y puerte botamana chiñe yojuashajo: ínÿenache nÿe canÿe jënyentšana mo patse meshënga yojuashájona, ínÿeñna mo chñënguana bnëtsana meshe y ínÿeñna mo unga bnëtsana meshe.”

⁹ Jesús chca jacuéntama tojanpochocá ora, mëntsá tojánayana: “Chë jouenama tmojt-sobenënga, šmochjouena ca.”

Ndayeca Jesús cuentëngaca yojánabuatambaye

(Mc 4.10-12; Lc 8.9-10)

¹⁰ Chora chë uatsjéndayënga tmojanobeconá y Jesús tmojantjá: —¿Ndáyeca entšanga cuentëngaca cojtsabuatambá ca?

¹¹ As Jesús tojanéjua: —Bëngbe Bëtsá tšëngaftanga cmontsinÿanÿná nyetsca chë mo iytëmencá yomna soyënga chabe amëndayama, pero chë ínÿengbioyna ndoñe. ¹² Nda tojtsebomnábioye más jatštayana y chca cha corente bëtscá jtsebomnana; pero chë tondaye tondbomnábioyna, chë batsatema tobomna sóynaca mochántseboca. ¹³ Chíyeca atše cuentëngaca chënga sentsëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinÿama; y masque beca chë soyënga chamouena, ndoñe tšabá quemochátuenana, ni queochátësertana. ¹⁴ Chcáyecna, chëngbeñe entsemna cachcá ntšamo chë Bëngbe Bëtsabe juabna oyebuambnayá Isaías tojanayancá: Masque beca chamouena, ndoñe queochátësertana.

Masque puerte chamotsantješna, ndoñe quemochátinÿe

¹⁵ Quem entšanga ndoñe quemátsboše botamana jajuaboyana; chënga uamatsáchtönënga montsemna y chëngbe bomínÿnaca cachcá.

Chca ndóñesna, chënga muantsobena jinÿama, jouenama y ainaniñe josértama; y chca, chënga bacna soyënga amana muantsajbaná y atšbe benache muantishache, as atše chënga chayatsebacama ca —cha tojéftsanbema.

¹⁶ “Tšëngaftangna oyejuayënga šmochanjoyena, er šmondobomna bominÿe y matscuašënga Bëngbe Bëtsabe soyënga jinÿama y jouenama. ¹⁷ Ndegombre cbéyana, banga Bëngbe Bëtsabe juabna oyebuambnayënga y nyetsca soyënguiñe tšabá amënga tmonjánbošena chë tšëngaftanga šmontsonÿá soyënga jinÿama, y ndoñe chemátaninÿe; tmonjánbošena chë tšëngaftanga šmotsuenana soyënga jouenama, y ndoñe chemátanuena ca” —Jesús tojanéyana.

Jesús chë jenabe cuentama tojanabuayená
(Mc 4.13-20; Lc 8.11-15)

¹⁸ “Chcasna, oído šmochajajo; chë jenabe cuento mëntšá endayana: ¹⁹ Chë Bëngbe Bëtsabe amëndayama tmojouena y ndoñe tontsësertana entšanga mondmëna mo chë benache juachañe yojuatquécjana jenaycá; Satanás jabana Bëngbe Bëtsabe palabra chëngbe ainanentšana jabëtsabuajuanama, chënga chiñe ndoñe chamondëtsošbuáchema. ²⁰ Y chë ndëtšbenguiñe yojuatquécjana jénaye entsemna mo chë aiñe Bëngbe Bëtsabe palabra tmojouena y Bëngbe Bëtsabeñe jtsošbuáchiyama oyejuayënga tmojtsemna entšangcá; ²¹ pero ndoñe nyets tempo chana jocháchuana, y chca, ndoñe bayté Bëngbe Bëtsáftaca ntjéftsemnëngana, ndoñe yapa tmontsašbuaché causa. Inÿenga chëngbioye mochantsëbuayënja y Bëngbe Bëtsabeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonÿaye. ²² Chë uchmëshangañe yojuatquécjana jénaye entsemna mo chë Bëngbe Bëtsabe palabra tmojouena entšangcá, pero quem luarentša soyëngaca oyejuayënga jtsemnana yapa mochántsenojuabnaye y mallajta crocénana y ba soyënga jtsebomnana mochántseboše. Chíyeca chënga Bëngbe Bëtsabe palabra jtsebnëtjombana y ntšamo cha tojayancá ndoñe ntsamana. ²³ Pero chë uanganëshiñe yojuatquécjana jénaye entsemna mo chë Bëngbe Bëtsabe palabra tmojouena y botamana jósertana entšangcá. Mo canÿe betiye puerte tšabá tojtseshajuancá, chënga bëtscá tšabe soyënga Bëngbe Bëtsabiama mochántsama. Inÿengna ínÿengbiama más bëtscá soyënga mochántsama, y chca, ínÿenga jtsemnana mo chë patse meshënga tojanshajo jenaycá, ínÿenga mo chë chnënguana bnëtsancá y ínÿengna mo chë unga bnëtsana meshënga tojanshajo jenaycá ca” —Jesús tojanabuayená.

Chë tríguañe bacna shacuanama cuento

²⁴ Jesús mëntšánaca tojanacuntá: “Bëngbe Bëtsabe amëndayana endmëna mo chë tšabe jenaycá, canÿe boyabása chabe jajañe yojáje. ²⁵ Pero nyetscanga imojtsomañe orna,

chabe uayayá yojáshjango y chë trigo jeniñe bacna shácuana yojesejé y yojtsatoñe. ²⁶ Y chë trigo yojuájua y ya yojtseshajuana orna, chë bacna shácuana enaca yojuábocna. ²⁷ As chë peonga imojá chë nduiño jauyanama: ‘Bacó, chë jajañe tšabe jénaye tconjanjé y as, ¿ndáyeca chë bacna shácuana chiñe tojuábocna ca?’ ²⁸ Y chë nduiño yojáuyana: ‘Atšbe uayayá chca tojama ca.’ Chora chë peonga imojatjaye: ‘¿Quectseboše bēnga fchayá chë bacna shácuana jetsejashtsētsama ca?’ ²⁹ Pero chë nduiño yojáuyana: ‘Ndoñe. Chë bacna shácuana šmojtsejashtsētsana ora, chë trígnaca šmattsejashtse ca. ³⁰ Más tšabana, cachcá mochjonýaye cánýiñe chaójuama, chë jaja saná játbanama tempo chaojobuáchēntscuana. Chora chë trabájayēnga chanjichamuá y chanjámēndaye natsana chë bacna shácuana chamotsejashtsētse y chamotsentsacuacjuá jtsejuinýiyama, y chentšana chë shajuana chamuatbaná y atšbe grano uaquēcnjaye yebniñe chamotsatsuamá ca’ ” —Jesús tojánayana.

Chë mostaztiye jenayama cuento
(Mc 4.30-32; Lc 13.18-19)

³¹ Jesús mēntšánaca tojanacuntá: “Bēngbe Bētsabe amēndayana endmēna mo canýe mostaza betiye jenaycá, canýe boyabása chabe jajañe yojáje. ³² Ndegombre, nyetsca jenayēngama chë mostaza jénaye chë más bāsetema endmēna, pero tojójua orna, chë jajañentše chë más bēts betiye jóbemana. Tša bēts betiye jtsemnana, chíyeca ba buacuashangá jtsabomnana y chë jaja shloftšēnga jana y chiñe uajajonētemēngá jauábopormana ca” —Jesús tojánayana.

Chë levadurama cuento
(Lc 13.20-21)

³³ Quem inýe cuétnaca tojanéyana: “Bēngbe Bētsabe amēndayana endmēna mo levadurcá; canýe shembása chana jenájuabana unga medida arninýañe, nyetsana chauabochama ca.”

Ndáyeca Jesús entšanga cuentēngaca yojanabuayiyá
(Mc 4.33-34)

³⁴ Jesús nyetsca chë soyēngama lempe cuentēngaca entšanga jtsētsētsnayana, y cuentēngaca ndóñesna ndoñe yonjanoyebuambná. ³⁵ Chca yojamna ndayá cachcá chaochnēnguama ntšamo chë Bēngbe Bētsabe juabna oyebuambnayá tojanayancá, mēntšá:

Jabuátambamna cuentēngaca chanjóyebuambaye;
chanjayana chë iytēmena soyēngama y chë entšanga ndoñe mondētatsēmbo soyēngámnaca;
Bēngbe Bētsá quem luare tojanma orscana chë soyēnga yomna ca —cha tojánayana.

Chë tríguañe bacna shácuana cuentama Jesús tojanabuayená

³⁶ Chentšana Jesús chë entšanga tojtanichamó y yebnoye tojtanamáshēngo. Chentšna chabe uatsjēndayēnga tmojanimpadá ndayá chë bacna shacuanama cuento betsayancá chauabuayenama. ³⁷ As Jesús tojanéyana: “Chë tšabe jénaye jená endmēna chë Bēngbe Bētsá Entšá tbojanbemá, ³⁸ y chë jajañna, quem luare. Chë tšabe jénaye entsemna chë Bēngbe Bētsabe amēndayoye mochjámashjna entšanga, y chë bacna shácuana entsemna chë bacna bayējēngbe amēndayabe entšanga, ³⁹ y chë uayayá, chë bacna shácuana yojáje chana, Satanás. Chë jaja saná atbanayana entsemna chë quem luare jopochócama chaojobuache ora, y chë trabájayēngna chë angelotēmēnga. ⁴⁰ Ntšamo chë bacna shácuana jtsejashtsētsana y iñoye jtsatmetšana jtsejuinýiyama, cachcá echántsemna quem luare jopochócama te. ⁴¹ Chorna, chë Bēngbe Bētsá Entšá tbojanbemá chabe angelotēmēnga echanjichamuá chë inýenga bacna soye chamomama amēnga y chë bacna soyēnga amēnga chabe amēndayentšana chamotsajuanayama. ⁴² Y chora chēngbioye chë uabouana iñeshoye mochantsēsetjango y chentše puerte mochanchenóbošachna y chë

tsetšanama juatsašënga mochantsenoftëšjojnaye. ⁴³ Chora, chë ntšamo Bëngbe Bëtsá yomandacá amëngna corente mo shinýcá mochantsebuashinýinýana chëngbe Taitá, Bëngbe Bëtsabe amëndayoca. Chë jouenama tmojtsobenënga, šmochjouena ca” —chora Jesús tojánayana.

Chë fshantsiñe uaiytëmena bomnanama cuento

⁴⁴ “Bëngbe Bëtsabe amëndayana endmëna mo chë fshantsiñe uaiytëmena bomnancá. Canýe boyabása chë bomnana yojuínýena y chentšana iytëcana cachentše yojesatbontsá. Corente oyejuayá yojtá, nýetsca chabe bomna soyënga yojetsatobuiye y chentšana chë fshantse yojtobuámiñe ca” —Jesús tojánayana.

Chë corente uámana fjantse ndëtsëtémama cuento

⁴⁵ “Mo canýe entsá uámana fjantse ndëtsëtémënga obuamnañacánaca endmëna chë Bëngbe Bëtsabe amëndayana. ⁴⁶ Chana, canýe corente uámana ndëtsëtëma yojínýena ora, yojtá y lempe chë inabomna soyënga yojetsatobuiye y chë ndëtsëtëma yojtobuámiñe ca” —Jesús tojánayana.

Chë atarraiëshama cuento

⁴⁷ “Bëngbe Bëtsabe amëndayana endmëna mo canýe atarraiëshacá, buyeshoye jutšenana y nýetsca beonga jashebuáyana. ⁴⁸ Chë atarraiëshá jútjena tojtsamna orna, chë beonga ashebuánayënga jtsashëbjátsëcana, tsachoye juyambana y chentše juatbemana chë beonga jabocacayama; chë tsábënga sbarëquënguiñe juatsuámana y chë ndoñe tsábëngna jtsëtšanana. ⁴⁹ Cachcá echanjochnëngo quem luare jopochócama tempo chaojobuache ora. Chë angelotëmënga mochanjábocana chë tsabe entsángbentšana bacna entsanga jaluárana, ⁵⁰ y chë bacna entsangna chë uabouana íñeshoye mochántsatquëcjaye, y chentše puerte mochanjenóbošachna y chë tsetšanama juatsašënga mochantsenoftëšjojnaye ca” —Jesús tojanacuntá.

Anteo y tsëm uámana bomnana

⁵¹ Chora chabe uatsjëndayënga Jesús tojanatjá: —¿Lempe chama quecmojtsësertana ca? Y chënga tmojanjuá: —Arseñor, aíñe ca.

⁵² As Jesús tojanéyana: —Canýe ley abuatambayá jtsetatšëmbuana ndayá Bëngbe Bëtsá tempo Moisesbiajana yojanoyebuambná soyëngama. Ntšamo Bëngbe Bëtsabe amëndayana bëtsemnama cha tojtsatsjendá orna, mo canýe yebnentša nduiñcá cha jtsemnana. Chë nduiñna chabe grano uaquëcjnaye yebnocana anteo y tsëm uámana bomnana juabocnana. Cachcá chë ley abuatambayá, Bëngbe Bëtsabe soyëngama jtsabuátambayana chë tempo Bëngbe Bëtsá tojanoyebuambá soyëngama y chë tsëm soyëngnaca Bëngbe Bëtsabe amëndayama ca —tojanéyana.

Jesús Nazaretoca

(Mc 6.1-6; Lc 4.16-30)

⁵³ Jesús chë soyënga jacuëntama tojanpochocá ora, chentšana tojtsanoñe. ⁵⁴ Y cachabe luaroye tojtanashjango y chentša judiëngbe enefjuana yebnentše tojanontsé jabuátambama. Entšanga ojnanánënga imojtsichamo: —¿Chë lempe yojtsetatšëmbcá ndëmoca mua tojuatsjinýe ca? ¿Ntšamo nantsobena chca bëts soyënga jamama ca? ⁵⁵ ¿Mua ndoñe yondmëna chë calpinterbe uaquiñá y chabe mamá ndoñe María? ¿Mua ndoñe yondmëna Santiago, José, Simón y Júdasbe catšata, ⁵⁶ y chabe uabëñanga ndoñe muentše bëngaftaca mondoyena? ¿Ndayentšana lempe chca mua yojtsebomna ca? —chënga imojtsichamo.

⁵⁷ Y chë causa chë entsanga tmojanotjyaná y ndoñe imontseboše cha joyeunayana. Pero Jesús tojanéyana: —Nýetsquénache canýe Bëngbe Bëtsabe juabna oyebuambnayá bëtsá jabemëngana, pero cachabe luarentše, cachabe yebnentše ndoñe ca.

⁵⁸ Chíyeca chentše Jesús ndoñe tonjëftsanma ba bêts soyënga Bëngbe Bëtsabe obenánaca, chë entsanga chábeñe ndoñe montsanošbuaché causa.

14

Ntšamo Juan chë Ubayaná tojanóbana
(Mc 6.14-29; Lc 9.7-9)

¹ Chë tempo, Rey Herodes, chë Galileoca mandayá tojanuena ntšamo nyetsca entsanga Jesucristbiamia imojtsichamcá. ² As cha chabe oservénënga tojanëyana: “Mua Juan chë Ubayaná ctsemna, obanënguentsana tojtayena, chíyeca chca obenana bêts soyënga jamama yojtsebomna ca.”

³ Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámiamia. Herodes chca tojanma Herodíasbe causa, chabe catšata Felipe shema. ⁴ Juan Heródesbioye mëntsá ibnauácacana: “Ndoñe quenátslesenciana aca acbe catšatbe shémaftaca jobouamayama, acbe catšata cabá ainá yotsomñe ora ca.”

⁵ Y chama Herodes yojtseboše Juan jóbana, pero entsangbiamia yojtsauatja, er chënga innajuabnaye Juan ndegombre Bëngbe Bëtsabe obenánaca yojanoyebuambná ca. ⁶ Pero Heródesbe cumpleaños oboyejuaye ora, Herodíasbe bembe entsangbe delante tojanlantsá y Herodes puerte chama yojtsóyejuaye. ⁷ Chíyeca Herodes, jajúrase, tbojanšbuachená ndayánaca jatšetayana, ntšamo tbojotjañcá. ⁸ Y Herodíasna lempe bémbëbioye ibojabuayená ntšamo Herodes jojuama. As chë bembe tbojanianyana: “Canye šcneniñe Juan chë Ubayanabe bestšaše šmatšetá ca.”

⁹ Herodes chë soyama tbojanongmé, pero chë ófjanëngbe delante jajúrase tbojanšbuachená causa, yojamánda chca chaotsemnama. ¹⁰ Y as tojanmandá chë Juan yojanëtámenoca chabe bestšaše chamuetsëstjanguama. ¹¹ Chentšana, canye šcneniñe chë bestšaše tmojanamba y chë tobiashe tmojanëntšabuaché y chana, chabe mamábioye.

¹² Chentšana, Juanbe ústonënga tmojánashjajna, chabe cuerpo tmojésanocñe y tmojána jauátbontsama. Y chora, Jesús yojtsemnoye chënga tmojána y chë soyëngama tmojan-cuentá.

Jesús shachna uaranga boyabásenga saná tojanacaredadó
(Mc 6.30-44; Lc 9.10-17; Jn 6.1-14)

¹³ Jesús chca tojanuena ora, canye barquëshañe tojtsanoñe canye bën luaroye, entsanga ndoyena luaroye. Pero entsanga chama imojátatsëmbona y chë pueblënguentsana tmojánbocana shecuátšeca cha juastama. ¹⁴ Chentšana, chë barquëshoicana tojtastjango ora, Jesús ba entsanga tojánanye, chë cha tmojánguanguënga. Chëngbiamia tbojanongmé y chë entsanguentsana ba šoquënga tojanashná. ¹⁵ Ya jetiñe yojtsemna, chíyeca chë uatsjëndayënga Jesúsbioye tmojanobeconá y tmojanianyana: —Ya jetiñe entsemna y quem luariñe ndocná quenatiyena. Entsanga cuantichamuá, pueblotémëngoye chamotsoñama, saná chamobuámiñama ca.

¹⁶ As Jesús tojanëjua: —Ndoñe quenátsiyta chënga chamotsatoñama. Tšëngaftanga saná šmochjacaredádaye ca.

¹⁷ Y chënga tmojanjuá: —Muentše tondaye queftsátsbomna; nye shachna tandëse y uta beónata ca.

¹⁸ As Jesús tojanëyana: —Chë soyënga moye miyëbo ca.

¹⁹ Chentšana Jesús tojanmandá entsanga chamoshëntsjatbiamama. Chorna, chë shachna tandëse y chë uta beónata tojanca, celoye tojanontjesé y Bëngbe Bëtsábioye chama tbojtanchuá. Chora chë saná tojanjatá, chabe uatsjëndayënga tojanëjátaye, y chëngna nyetsca entsanga tmojanacaredadó. ²⁰ Nyetsca entsanga tmojanse jtoshachaye

nÿetsá y cabá chë ojamnëtmëngaca bnëtsana uta sbarëcua tmojanajutjë. ²¹ Chë tmojansënga imojamna mo shachna uaranga boyabásenga, shembásenga y básenga ntjacuntacá.

Jesús béjaye juatsbuacá yojtsaye
(Mc 6.45-52; Jn 6.16-21)

²² Chentšana, Jesús chabe uatsjëndayënga tojanamëndá chë barquëshoye jtamashjnama y chë uafjajónaye chenguánoica chabe natsana jashjajnana. Chëntscuana Jesús entšanga yojtichamuá. ²³ Nÿetscanga tojtanichamó orna, Jesús canÿe tjoye tojántsjua canÿa jtsemnama, Bëngbe Bëtsáftaca jencuéntama. Yojaibétata ora, cha canÿa chentše yojtsemna, ²⁴ y chë barquëshana tsachocana bënoca yojtsamna. Y chë olëshënga chë barquëshana yojtsájantšetaye, chë binÿia chëngbe contra yojtsemna causa. ²⁵ Ya bínÿanoyna, Jesús chëngbioye yojobeconá; béjaye juatsbuacá yojtsaye. ²⁶ Chabe uatsjëndayënga chca cha tmojáninÿe orna, tša imojocochauatjaná y puerte auatjanánënga tmojanoyó: — ¡Canÿe añemëse entsemna ca!

²⁷ Pero chora Jesús tojanëyana: — ¡Añemo šmochtsebomna, atše Jesús sëndmëna; ndoñe matauatjëngana ca!

²⁸ Chora Pedro, Jesúsbioye tbojanianyana: — Bëngbe Utabná, ndegombre aca tcojtsemnëse, momandá atše béjaye juatsbuacá ácbioye chayá ca.

²⁹ Y Jesús tbojanianyana: — Mabo ca.

Chora Pedro chë barquëshoicana tojánastjango y tojanontšé béjaye juatsbuacá Jesúsbioye jama. ³⁰ Pero chë binÿia tša jabuache yojtsemnama tojáninÿe ora, Pedro puerte yojtsauatja y tbojanontšé jtsenatjëmbambana. Chíyeca cha jabuache tojanchembo: — ¡Bëngbe Utabná, šmatsbocá ca!

³¹ Y cachora Jesús tbojtanobuácuëtëntsiye y tbojanianyana: — ¡Tša batšatema ošbuachiyá! ¿Ndáyeca ndoñe bëtscá átšbeñe contsošbuaché ca?

³² Chentšana chë barquëshoye chata tbojtanamáshëngo y cachora chë binÿia bonguana yojtsatsmëna. ³³ Y chora, chë barquëshoye imojtsemnënga Jesusbe shecuatšentše tmojanoshamentšé y tmojanianyana: — ¡Aca ndegombre Bëngbe Bëtsabe Uaquiñá comna ca!

Genesaret ca uabáinoca, Jesús ba šoquënga tojanashná
(Mc 6.53-56)

³⁴ Chë uafjajónaye tmojánenashbuachengo y canÿe luare Genesaret ca uabáinoye tmojánashjajna. ³⁵ Chentša entšanga Jesús tmojantëmbá ora, chë luarentša nÿetsca entšanga chama tmojántatšëmbona. As chë entšanga chëngbe šoquënga Jesúsbioye tmojanënatse. ³⁶ Y imojtseimpadana nÿe mo chabe entšayá sibiájuanaca juabojajuama chë šoquënga chaualesenciama. Y nÿetscanga chabe entšayá sibiájua tmojanábojajënga, shnánënga imojtsatoquëdaye.

15

Ndáyeca canÿe entšá Bëngbe Bëtsabe delante ndoñe tšabia nántsemna
(Mc 7.1-23)

¹ Chora básefta fariseunga y judiëngbe ley abuatambayënga, Jerusalenocana tmojánabënga, Jesúsbioye tmojanobeconá y tmojanianyana: ² — ¡Ndáyeca acbe uatsjëndayënga ndoñe montsama chë ntšamo bëngbe bëtš taitanga monjanamancá ca? ¿Ndáyeca ndoñe ntsacuentšabiana ndayá jasama ora, ntšamo bënga chë judiënga fsënduamancá, Bëngbe Bëtsabe delante tšábënga jtsatsmënama ca?

³ As Jesús tojanëjua: — ¡Y ndáyeca tšëngaftanga ndoñe šmontsama ntšamo Bëngbe Bëtsá tojanmandacá, nÿe cach tšëngaftangbe bëtšëtsanga imnëtsama soyënga jtsamama ca? ⁴ Bëngbe Bëtsá mëntšá tojanmandá: “Acbe bëtšëtsata stëtšoye ndoñe catjáquedaye”,

y “nda cachabe bëtsëtsatbiamana podescan tojóyebuambase, chana jóbanama jtsemnana ca.”
⁵ Pero tsëngaftanga šmondbétsichamo canye entšá canobena chabe taitá o chabe mamá jauyanana: “Lempe ntšamo sëndbomncá Bëngbe Bëtsá jaserviama entsemna, chíyeca tondaye quetsátsbomna aca juajabuáchama ca”; ⁶ y šmondbétsichamo nýe ndánaca chca tojayanése, ya ndoñe ntsemnana chabe taitá o chabe mamá stëtšoye ndoñe ntjaquédana, ni ntjuajabuáchana ca. Y chca, tsëngaftangbiamana tondaye ntsámanana ntšamo Bëngbe Bëtsá tojanmandacá, y aínne šmontsama ntšamo tsëngaftangbe bëtsëtsanga imojanamancá.
⁷ ¡Bacna entšanga, ntšamo ndegombre šmojuabnacá ndinýinýnayënga! Nýe tsábá chë Bëngbe Bëtsabe juabna oyebuambnayá Isaías tsëngaftangbiamana tojanoyebuambá, mëntšá tojánayana ora:

⁸ Bëngbe Bëtsá tonjayana: “Quem entšanga mondbétsichamo Bëngbe Bëtsá tša tsabia yomna ca; chca nýe uayásaca, pero chëngbe ainanentše atšbiamana ndocna tsabe juabnëngaca.

⁹ Chënga nýe bonamente mondbétsichamo: Bëngbe Bëtsá tša tsabia yomna ca; chënga nýe entšangbe mandënga jtsabuátambayana y Bëngbe Bëtsabe mandënga ndoñe ca” —cha tojánayana.

¹⁰ Chentsana Jesús entšanga tojánachembo y tojanéyana: —Smochjouena y chacmësertá. ¹¹ Ndayá entšá tojtsesacá, ndoñe quebochátsbema Bëngbe Bëtsabe delante ndoñe tsabia. Inýetsá comna: ndayá entšá tojtsejuabná y tojtsoyebuambnacá endobena cha jabemana Bëngbe Bëtsabe delante ndoñe tsabia ca.

¹² Chora chë uatsjëndayënga Jesúsbioye tmojanobeconá y tmojanianana: —¿Quéctsetatšëmbo, ntšamo tconjayanama chë fariseunga ndoñe tsábá chenatëuénana ca?

¹³ As Jesús tojanéjua: —Ndaye betiye atšbe Taitá celocá ndoñe tonjájese, tbëtëjocana mochántsejashtse. Cachcá echanjama chë nýe entšangbe buatëmbana soyëngaca.

¹⁴ Cachcá mónýaye; chënga montsemna mo jtanënga inýe jtanënga unachayëngcá. Y canye jtaná inýe jtaná tbojtsánachase, nýets útata canye tbuabentše bochanjetsótsatše ca —Jesús tojánayana.

¹⁵ Chora Pedro, Jesúsbioye tbojanianana: —Ntšamo chë cuento bëtsayanama šmabuayená ca.

¹⁶ As Jesús tojanéjua: —¿Tsëngaftángnaca cabá ndoñe cmontsësertana ca? ¹⁷ ¿Cabá ndoñe cmontsësertana lempe ntšamo šmojascá uafsbioye jomashënguana y chentsana cuerpentšana jtabocnana? ¹⁸ Pero ntšamo šmojtsoyebuambnacana lempe ainanocana jtsóbocanana y chë soye endobena tsëngaftangbioye Bëngbe Bëtsabe delante ndoñe tsábenga jábiamana. ¹⁹ Ainanocana jtsóbocanana bacna juabnënga: jenóbama, shema o boyábioye ínýaftaca jáingñama, shembása o boyabásaftaca bacna soye jamama, jatbëbama, jobostérama y ínýabiamana jtsayátsenayama. ²⁰ Chë soyënga cocayé jtsobenana entšábioye Bëngbe Bëtsabe delante ndoñe tsabia jabemama; pero chë ndoñe ntsacuentšabiana ndayá jasama ora, ndoñe ntsobenana Bëngbe Bëtsabe delante ndoñe tsabia jabemama ca —Jesús tojánayana.

Canye shembása inýe luarocana ashjangoná Jesúsbeñe yojtsošbuaché
(Mc 7.24-30)

²¹ Jesús chentsana, Tiro y Sidón luarëngoye tojtsanoñe. ²² Canye shembása Caná luarocá chentše inoyena; cha Jesúsbioye yojobeconá y mëntšá yojtsáyebuache: —¡Utabná, Rey Davídbentšana Entšá, šmotselastemá! ¡Atšbe bembe puerta entsesufrina, bacna bayëjbe juabna entsebomna causa ca!

²³ Jesús ndocá tbonjanjuá. As chabe uatsjëndayënga tmojanobobeconá y tmojanimpadá: —Chë shembása mëyana chaotsatoñe; bëngbe ústonoye yapa entsáyebuache ca.

²⁴ As Jesús tojánayana: —Bëngbe Bëtsá atše šonjichmó jtsanýenama nýe chë entšanga, chë mo ótsena oveshëngcá imomnënga Israeloquënga, y chë ndoñe judiëngna ndoñe ca.

²⁵ Pero chë shembása tojána, Jesusbe shecuatšentše tojanoshamentšé y tbojanianyana: —¡Utabná! Diosmanda pavor šmotsebema. ¡Šmotsajabuache ca!

²⁶ Y Jesús tbojanjuá: —Chë judiënga mondmëna mo Bëngbe Bëtsabe basengcá y atše ácbioye tbojuajabuache y chëngbioye ndóñesna, nántsemna mo chë básengbe saná chënga cuaftsëbaquécá y quešënga ftsëbuajocá. Chca jamana ndoñe tšabá quenátsmëna ca.

²⁷ As cha tbojanjuá: —Arseñor. Pero chë quešëngnaca chëngbe nduiñëngbe mesëshentšana tmojatquécjanatemënga mondbase, chë nduiñënga tmojtšesá ora. Chcasna, Diosmanda šmotsajabuache ca.

²⁸ Chora Jesús tbojanianyana:

—¡Shembása, Bëngbe Bëtsábeñe tša ošbuachiyá comna! Ntšamo cojtsebošcá chca chaotsemna ca.

Y cach orscana chabe bembe tšabá yojtšatsmëna.

Jesús ba šoquënga tojanashná

²⁹ Jesús chentšana tojëftsanbocna y chë Galilea uafjajónaye tsachoye tojána. Chentšana, canye batsjoye tojántšjua y choca tojanótbema. ³⁰ Mallajta entšanga Jesús yojtsemnentše tmojánashajna, y coshetënga, jtanënga, tšabá jobónjuama ndobenënga, ndëbianga y ba šocana bomnënga imojtsënachaye. Jesusbe shecuatšentše tmojanéshejango y cha nýetscanga tojanashná. ³¹ Y chca orna, chë entšanga tmojáninýe: chë ndëbianga imojtsatoyebuambná, chë tšabá jobónjuama ndobenënga tšabá imojtsatsmëna, chë coshetënga tšabá imojtsatana y chë jtanëngna yojtšëbinýna; y chama chënga corente ojnánánënga imojtsemna. Chora chënga tmojanontšé jëtschuayana chë Israelentša entšanga imojánadorana Bëngbe Bëtsá.

Jesús canta uaranga boyabásenga saná tojanacaredadó (Mc 8.1-10)

³² Chentšana Jesús, chabe uatsjéndayënga tojánachembo y tojanéyana: —Quem entšangbiama šontsengmena, er ya unga te chënga átšeftaca muentše montsemna y jasama tondaye quemátsbomna. Atše ndoñe quetsátsboše ntjascá cachëngbe yebnoye chënga jtichamuana, er benachiñe shëntsama nantsabuatëcja ca.

³³ As chabe uatsjéndayënga tmojantjá: —¿Ntšamo muatjobenaye quem luarentše, ndocna entšá ndoyenentše, chëfta entšangbiama saná jinýenama ca?

³⁴ Y Jesús tojanatjá: —¿Bueta tandëse šmojtsebomna ca?

Y chënga tmojanjuá: —Canýsëfta tandëse y básiëfta beonatémënga ca.

³⁵ Chora Jesús tojanamëndá nýetsca entšanga fshantsiñe chamotbiamama. ³⁶ As chë canýsëfta tandëse y chë beonatémënga tojanca; Bëngbe Bëtsábioye chama tbojtanchuá, chë saná tojanjatá y chabe uatsjéndayënga tojanëjatá. Chentšana nýetsca entšángbioye tmojanacaredadó. ³⁷ Nýetsca entšanga tmojanse jtoshachaye nýetšá. Y chentšana cabá canýsëfta bëts sbarëcua tmojanajutjé chë tojanójamëtemëngaca. ³⁸ Chë tmojansënga imojamna canta uaranga boyabásenga, shembásenga y básenga ntjacuntacá. ³⁹ Chentšana Jesús, chë entšanga tojtanichamó, barquëshoye tojánamashëngo y Magadán luaroye tojtšanoñe.

16

Chë fariseunga y saduceunga tmojánbošëna Jesús chaoma canye bëts soye (Mc 8.11-13; Lc 12.54-56)

¹ Fariseunga y saduceunga tmojána Jesús jinýama, y jisháchichiyama imojtseimpadana canye bëts soye chaoma, as jtsetatšëmbuama Jesusbe obenana ndegombre Bëngbe Bëtsábicocana tainóbocanama.

² Pero Jesús tojanëjua: “Tšëngaftanga jetiñoye šmondbétsichamo: ‘Yëfse tšabe te echántsemna, er celoca buánganiñe entsemna ca.’ ³ Y cachëse šmondbétsichamo: ‘Mënté

echanjuafté, er celoca buánganiñe y ibetiñe entsemna ca.’ Tšëngaftanga celoye jont-ješiyëse, ntšamo chë tempo yochtsemnama tša tšabá jayanama šmojtsoobenëse, ¿ndáyeca ndoñe šmotsobena jtsetatšëmbuana ndaye bëts soye Bëngbe Bëtsá quem tempo cmojtsinÿanÿnama? ⁴ Quem puerte bacna entsanga y ndošbuáchiyënga montseboše atše canÿe bëts soye chaima, obenana jinÿanÿiyama; pero ndoñe chca quemochátinÿe, sinó nÿe chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soycá ca” —Jesús tojánayana.

Chora Jesús tojésanabashejuana y chentšana tojtsanoñe.

Jesús tojanabuayená chë fariseungbe buatëmbana soyëngama
(Mc 8.14-21)

⁵ Chë uafjajónaye chenguanocana chënga tmojtanabo ora, chë uatsjëndayënga yojésebnëtjomba tandëse jesocñana. ⁶ Chora Jesús tojanëyana: —Smochtsantješna; cuedado šmochtsebomna chë fariseunga y saduceungbe levadurama ca.

⁷ Pero chë uatsjëndayëngna imojtsenatsëtsnaye: —Chca entsichamo, bënga tandëse ndoñe tmonjesocñama ca.

⁸ Jesús chë soye yojtsetátšëmbo; chíyeca mëntsá tojanëyana: —¿Ndáyeca tandëšama šmojtseatsëtsná ca? ¡Tša batšatema ošbuáchiyana šmobomna! ⁹ ¿Cabá ndoñe cmontsësertana y ndoñe šmotsabouínÿna chë shachna tandëšentšana shachna uaranga entsanga sënjanëjuatšema y bnëtsana uta sbarécua šmonjánajutjema? ¹⁰ ¿Y ndoñe šmotsabouínÿna chë canÿsëfta tandëšentšana canta uaranga entsanga sënjanëjuatšema y canÿsëfta sbarécua šmonjánajutjema? ¹¹ ¿Ndáyeca ndoñe cmontsësertana atše tandëšama ndoñe sentsóyebuambnama? Cuedado šmochtsebomna fariseunga y saduceungbe levadurama ca —Jesús tojanëyana.

¹² As chora chë uatsjëndayënga tojanësertá, Jesús ndoñe tonjánayana chë tandëšentša levadurama cuedado jtsebomnana ca, sinó ndayá chë fariseunga y saduceungbe bu-atëmbana soyëngama.

Pedro tojánayana, Jesús chë Cristo bëtsemnama
(Mc 8.27-30; Lc 9.18-21)

¹³ Jesús, Cesarea de Filipo luaroye tojánashjango ora, chabe uatsjëndayënga tojanatjá: —¿Nda ca entsanga imojtsichamo chë Bëngbe Bëtsá Entšá tbojanbemá yojtsemna ca?

¹⁴ Chënga tmojanjuá: —Báseftanga montsichamo Juan chë Ubayaná ca, ínÿengna Elías ca, ínÿengna Jeremías y ínÿengna tempsca inÿe Bëngbe Bëtsabe juabna oyebuambnayá ca.

¹⁵ As Jesús tojanatjá: —Y tšëngaftangna, ¿nda atše bëtsemnama ntšamo šmochjayana ca?

¹⁶ Chora Simón Pedro tbojanjuá: —Acna chë Bëngbe Bëtsabe Uámana Uabuayaná condmëna, chë Bëngbe Bëtsá Ainabe Uaquiñá ca.

¹⁷ Y Jesús tbojanayana: —Simón, Jonasbe uaquiñá, oyejuayá cochanjoyena. Ndocna quem luarentša entšá chë soye checmatinÿinÿé, sinó atšbe Taitá, celoca endmëná. ¹⁸ Y mëntsánaca cbëyana: Mora acna Pedro o chë ndëtšbecá contsemna, y chë ndëtšbeñe atšbe bëts yebna chanjajebo, y ni Satanás, chabe obenánaca entšá jóbanama, queochatobenaye jtsepochoçama. ¹⁹ Atše cbochanjätsetaye obenana, mo llavëfjca, entsanga Bëngbe Bëtsabe amëndayoye jamashënguama chamobenama. Bëngbe Bëtsáftaca chacojtsencuénta ora, canÿe soye ndoñe chaondëtsemna ca chacojayanëse, Bëngbe Bëtsá cachcá echanjayana. Y cháftaca chacojtsencuénta ora, canÿe soye aiñe chaotsemna ca chacojayanëse, Bëngbe Bëtsá echanjayana aiñe chca chaotsemna ca —Jesús tbojanayana.

²⁰ Chentšana chabe uatsjëndayënga tojanamëndá ndocnábeñe ntsecuéntayana cha, Jesús, chë Bëngbe Bëtsabe Uámana Uabuayaná, chë Cristo bëtsemnama.

Jesús tojánayana cha ibojamna jóbanana y jtayenana ca
(Mc 8.31-9.1; Lc 9.22-27)

²¹ Chorscana Jesús tojanontsé chabe uatsjéndayënga jábuayenana cha ibojtsemna Jerusalenoye jama, y chocna chë bëtsëjemëngcá mándayënga, chë judiëngbe bachnangbe amëndayënga y chë ley abuátambayënga mochjanma cha puerte chaopadecema ca. Tojanëyana cha mochjanóba, pero unga tianoye yochtanayena ca. ²² Chora Pedro, Jesúsëftaca tojanoluaré y tojanontsé mëntšá uatsëtsnayana: —¡Atšbe Utabná, Bëngbe Bëtsá ndoñe chaondëlesenciá chca chaopasama! ¡Ndocna te quenaisopodena chca ácaftaca jopásana ca!

²³ As Jesús tojanobuértana y Pédrëbioye tbojaniyana: —¡Satanás, átšbentšana mojuaná! ¡Aca contseboše atše canýe bacna soye chašócochënguama! Pedro, acbe juabnënga Bëngbe Bëtsábiocana ndoñe quenatóbocana, sinó nýe entšángbentšana ca.

²⁴ Chentšana Jesús chabe uatsjéndayënga tojanëyana: —Nda atšbe uatsjendayá jtsemnama tojtseboše, cháuyana nýe Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonýá atše juastama, y atšbiama jasúfriama chaotseprontana y cruciñe jobanámnaca. ²⁵ Nda tojtsama quem luarentše bëtscá soyënga jtsebomnama y atšbiama jasúfriama ndoñe tontseprontana, chë nýetsca tescama yomna tšabe vida echanjopérdia. Pero nda quem luarentša soyënga cachcá tojëftsonýá atše juastama, masque chaóbana, chë nýetsca tescama yomna tšabe vida echántsebomna. ²⁶ ¿Ndayama entšá buanjósérvia nýetsca quem luarentša soyënga jtsebomnana, chë nýetsca tescama yomna tšabe vida tojtsoperdese? Ndegombre, canýe entšá chë nýetsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë nýetsca tescama yomna tšabe vida jtsebomnama. ²⁷ Chë Bëngbe Bëtsá Entšá tbojanbemá, chabe Taitabe obenánaca y puerte buashinýinýaniñe echanjabo chabe angelotémëngaftaca, y chora cada cánýabioye bochántatšetaye cachcá ntšamo cada ona tojëftsemcá. ²⁸ Ndegombre šcuayana: Báseftanga muentše montsemnënga ndoñe quemochatóbana, Bëngbe Bëtsá Entšá tbojanbemá amëndayacá jabana ntjëftsinýcá ca — Jesús tojánayana.

17

Jesús inýetsá tojanobinýná (Mc 9.2-13; Lc 9.28-36)

¹ Chentšana chnënguana tianoye, Jesús tojëftsanëbiatše Pedro, Santiago y chabe catšata Juan, y ínýoye tojanënatse nýe chënga, canýe bëts tjoye. ² Chentše, chëngbe delante inýetsá cha tojanobinýná. Chabe jubiá shinýcá yojtsebuashinýinýana, y chabe uichëtjonëjuangana mo binýniñcá uafjantsëjuangá yojtsamna. ³ Chca orna, chabe uatsjéndayënga tmojáninýe Moisés y Elías tbojanobinýná, Jesúsëftaca encuéntaye.

⁴ Chora Pedro, Jesúsbioye tbojaniyana: “Bëngbe Utabná, itša tšabá bëngbiama cuanmëna muentše jtsemnana ca! Tcojtsebošëse, unga tambotémënga atše chjapórma: cánýetema acbiama, ínýetema Moisesbiama y ínýetema Elíasbiama ca.”

⁵ Pedro chca yojtsóyebuambnantscuana, canýe buashinýinýana jantšetëshe nýetscanga yojáutsbotse. Y chë jantšetëshoicana canýe oyebuambnayana tmojanuena mëntšá: “Mua atšbe bonshana Uaquiñá endmëna, atše chabiama sëntsoyejuá. Cha šmochtseyeunana ca.”

⁶ Y chë uatsjéndayënga chca tmojanuena ora, tmojanoshamentšé y jubiaca fshantsóntscóñe tmojanotsejbéna, puerte auatjanánënga. ⁷ Chora Jesús chabe uatsjéndayëngbioye tojanobeconá, tojánabojajo y tojanëyana: “Matëtsbananga; ndoñe matauatjëngana ca.”

⁸ Y tsbanánoye tmojanontjeshé ora, Jesús nýe canýa tmojáninýe, ndocná inýa más.

⁹ Chë tjocana imojtsatstsmaye ora, Jesús tojanamëndá: —Bëngbe Bëtsá Entšá tbojanbemá obanënguentšana candëtayenëntscuana, ndocnábeñe chë šmonjinýe soyama šmattsecuéntaye ca.

¹⁰ As chë uatsjédayënga Jesús tmojantjá: —¿Ndáyeca chë ley abuatambayënga mondbétsichamo, canmëna Elías jabana chë Bëngbe Bëtsabe Uámana Uabuayanabe natsana ca?

¹¹ Chora Jesús tojanéjua: —Ndegombre canya Eliascá natsana echanjabo y ntšamo jtsemnama yomncá, lempe echánjabatsma ca. ¹² Pero atše cbéyana, canya mo Eliascá ya tonjabo, entšanga ndoñe chematanotëmbá y cháftaca entšanga tmonjanma lempe ntšamo tmojanbošencá. Y cachcá, chë Bëngbe Bëtsá Entšá tbojanbemá entšangbe cucuatšíne echanjasúfria ca —Jesús tojánayana.

¹³ Chora chë uatsjédayënga tojanësertá, Juan chë Ubayanabiama Jesús chca yo-jtsëtsëtsnama.

Jesús, canye bacna bayëja tbojanbojuaná
(Mc 9.14-29; Lc 9.37-43)

¹⁴ Entšanga imojtsemnoye chënga tmojtashajna ora, canye boyabása tojanobeconá, Jesusbe natsanoica yojoshamentšiyé y tbojanianya: ¹⁵ —Utabná, atšbe uaquiñá mot-selastemá. Cha ataque bontsësháchichana y puerta entsesufrina, er cha inye ora iñoye jtseshajayana y inye orna, buyeshoye jtsoshbuetšana. ¹⁶ Acbe uatsjédayëngbióye cha sënjuánatse y ndoñe chematobená jtseboshnama ca —cha tbojanianya.

¹⁷ As Jesús tojánayana: —¡Nyetšá ndošbuáchiyënga y bacna entšanga ca! ¿Buetayté šojtsemna tšëngaftangaftaca jëftsemnana? ¿Buetayté uantado tšëngaftangaftaca chjëftsemna? Moye chë básetema mánatse ca.

¹⁸ Chora Jesús, chë basetëmbeñe bacna bayëjbióye tbojanácacana y chábentšana cha tojésanbocna. Cach orscana chë básetema tšabá yojtsatsmëna.

¹⁹ Chentšana, chë uatsjédayënga luaroca Jesúsëftaca tmojanoyebuambá y tmojanianya: —¿Ndáyeca bënga ndoñe fsënjobená chë bacna bayëja jtabocnama ca?

²⁰ Y Jesús tojanéyana: —Tšëngaftanga tša batšatema ošbuáchiyana bomna causa. Ndegombre šcuayana: tšëngaftanga batšatema ošbuáchiyana šmojtsebomñëse, masque nye mo canye mostaza betiye jenaycá, quem tjoye šmatjayana: “Muentšana mojuaná y choye motsa ca”, quem tjañe chca nanjama, y tšëngaftanga lempe jamama šmattsobena.

²¹ Pero chca bayëjënga jtëbuacnamna jobenayana nye Bëngbe Bëtsáftaca jencuëntase y chama tondaye ntjascá jtsemnëse ca —Jesús tojanéyana.

Jesús cachiñe tojánayana cha ibojamna jóbanana y jtayenana ca
(Mc 9.30-32; Lc 9.43-45)

²² Jesús y chabe uatsjédayënga cányiñe Galilea luaroye imojétsaye ora, cha tojanéyana: “Chë Bëngbe Bëtsá Entšá tbojanbemá entšangbe cucuatšíne mochanjáboshjona, ²³ mochanjóba, pero unga tianoye echántayena ca.” Chë causa chë uatsjédayënga puerta ngmënaca imojtsemna.

Chë Bëngbe Bëtsabe bëts yebnama impuesto jtsatsquëcjnyama

²⁴ Jesús y chabe uatsjédayënga Capernaumoye tmojánashajna ora, chë Bëngbe Bëtsabe bëts yebnama entšangbióye impuesto atjanayënga Pédrëbióye tmojána y tmojantjá: —¿Acbe buatëmbayá Bëngbe Bëtsabe bëts yebnama impuesto queonýbetsatsquëcjnyaye ca?

²⁵ Y Pedro tojanéjua: —Aíñe, cha endbetsatsquëcjnyaye ca.

Chentšana, Pedro chë yebnoye tojánamashëngo ora, Jesús natsana mëntšá chábióye tbojanianya: —Simón, ¿ntšamo catjájuaboye? ¿Quem luarentša reyënga ndëmuanýengbióye impuesto imnétsayëngacaye y crocénana imnétsatjanaye: cach luarentše oyenëngbióye o chë inye luarocana ashjajnëngbióye ca?

²⁶ As Pedro tbojanjá: —Chë inye luarocana ashjajnëngbióye ca.

Y Jesús tbojanianya: —Chcasna, ndoñe quešnátsmëna chë atšbe Taitabe bëts yebnama impuesto jtsatsquëcjnyayana ca. ²⁷ Pero ndocná mal chabonduínýnanamna uafjajónayoye motsa, anzueléfjua cochjútsena y chë natsana chaojuásjana beona cochjuábocna.

Cochjuayetëfjoná y choye crocénana cochanjínÿena y chánaca echanjoshjache atšbiama y acbiama jëtsjájuama. Cochjëftsejatsëca y cochjatsboshjona ca —Jesús tbojaniana.

18

¿Nda chë más uamaná yomna?

(Mc 9.33-37; Lc 9.46-48)

¹ Chentsana chë uatsjëndayënga Jesúsbioye tmojanobeconá y tmojantjá: —¿Chë Bëngbe Bëtsábeyeca mandánëngbeñe nda chë más uamaná yomna ca?

² Chora Jesús canÿe basetëmbioye tbojanchembo y chëngbe tsëntsaca tbojanatsá. ³ Y tojánayana: —Ndegombre cbëyana, nda mo basetemcá ndoñe tontóbema y ndoñe chacá Bëngbe Bëtsabe soyënga tonjóyëngacñe, cha ndocna te queochatobenaye Bëngbe Bëtsabe amëndayoye jamashënguama. ⁴ Chca, nda tojtsejuabná canÿe nduamaná yomna y quem basetemcá yomna ca, cha chë Bëngbe Bëtsabe amëndayoca chë más uamaná echántsemna. ⁵ Y nda átšbeñe ošbuachiyá bëtsemnayeca, tbojofja canÿa mo quem basetëmbioycá, chana atše jofjana ca —Jesús tojánayana.

Resjo yomna, nderado bacna soyënga cuanjama

(Mc 9.42-48; Lc 17.1-2)

⁶ “Nda canÿe bāsetema átšbeñe ošbuachiyábioye tbojaingñé bacna soye jamama, chabiama más tšabá nántsemna canÿe bëtš nantsnëbé chamotsetamošëntšbua y chë mar béjaye shbuatsëntsoye chamotsashbuetše chabotsenatjëmbama. ⁷ ;Tša lastema quem luarentša entsangbiama, chë ínÿenga bacna soye jamama chaócochënguama tmojtsamëngbiama! Nÿets tempo chca amënga mochanjëftsemna. Pero, ipayajema chë inÿa bacna soye chaomama tojtsamá ca!

⁸ “Chíyeca, acbe cucuátšeca o acbe shecuátšeca bacna soye tcojamëse, cochtsenástjango y bënoye cochtsëtšena. Acbiama más tšabá nántsemna celoye jamashënguana chë nÿetsca tescama yomna tšabe vida jtsebojnana, cucuatše ndbomná o cosheto, y ndoñe nÿets uta cucuátšeca o shecuátšeca chë nÿets tempo echanjesomñe íñeshoye chacmotsëstjango.

⁹ Nderado acbe bomínÿeca bacna soye tcojinÿe y cachca soye tcojama, chë bominÿe cochtsenobuchjatsëca y bënoye cochtsëtšena. Acbiama más tšabá nántsemna, celoye jamashënguana nÿe canÿe bomínÿeca, y ndoñe nÿets uta bomínÿeca infierno ye chacmotsëstjango, chë bëtš íñeshoye ca” —Jesús tojánayana.

Chë ótsëna oveshabiana cuento

(Lc 15.3-7)

¹⁰ Mëntsánaca Jesús tojánayana: “Ni mo cánÿabioye quem tsëm ošbuáchiyënguentšana, chë mo basetëmëngcá mondmënënga, mo nduamanacá šmattsonÿaye. Ndegombre cbëyana, chëngbe angelotëmënga celoca, sempre atšbe Taitá celocáftaca mondetsemna ca. ¹¹ Er chë Bëngbe Bëtsá Entšá tbojanbemá tonjabo chë pochocánënga jtsemnana imojtsajnënga jabátsebacama.

¹² “¿Ntšamo tšëngaftanga šmatjājuaboye? Canÿe boyabása patse oveshënga tojtsabamna y ndeolpe canÿe chentša oveshá tojtsotše. ¿Chë boyabása ndoñe chë inÿe esconëfta bnëtsana y esconëfta oveshënga tjoca cachcá nanjesëñÿaye, jama chë ótsëna oveshá jetsenguanguama? ¹³ Y chë oveshá jetsinÿenama tojobenase, ndegombre chë boyabása más oyejuayá jtsemnana chë ótsëna oveshabiana, y ndoñe nÿa chca chë inÿe esconëfta bnëtsana y esconëfta oveshëngbiama chë ndoñe tmonjanotšëngbiama. ¹⁴ Cachcá, tšëngaftangbe Taitá, Bëngbe Bëtsá, chë celoca endmëná, ndoñe quenátšboše ni canÿa quem basenguentšana mo otšenacá chaotsemna, bacna soyënga jtsamëse oyena causa ca” —Jesús tojánayana.

Ntšamo cuanjama inÿa japerdónama

(Lc 17.3)

15 “Nderado acbe catsata, bacna soye tcmojaborlase, cochjá, cánÿata šochjencuénta y cochjama cha chauenójuaboma, ndegombre bacna soye tcmojaborlama. Cha chacmojóyeunasna, acbe catsata cachiñe tšabá ácaftaca echántsatsmëna. 16 Pero ndoñe tcmojóyeunasna, inÿe útata cochjáchembo chacmotjëmbambama, chca, chata chabouena ntšamo cochjauyanama y chamuayana ndegombre chca yomnama. 17 Y chata ndoñe tonjóyaunase, chentša Bëngbe Bëtsábeñe ošbuáchiyënga macuntá. Y chënga ndoñe tonjóyaunasna, cochjayana cha yomna mo canÿa Bëngbe Bëtsábioye nduabuatmacá, mo canÿe ndoñe judiyá ca o canÿe bacna entšá mo canÿa Romocama impuesto entšángbioye atjanayacá yomna ca.

18 “Ndegombre cbëyana: Tšëngaftanga Bëngbe Bëtsáftaca chašmojtsencuénta ora, chašmojayana canÿe soye ndoñe chaondëtsemna ca, Bëngbe Bëtsá cachcá echanjayana. Y cháftaca chašmojtsencuénta ora, chašmojayana canÿe soye aíñe chaotsemna ca, Bëngbe Bëtsá echanjayana aíñe chca chaotsemna ca.

19 “Mëntšánaca cbëyana: Nderado útata tšëngaftanguentšana quem luarentše tbojenoyeuná Bëngbe Bëtsáftaca jencuéntama ndayánaca jótjañama, Bëngbe Bëtsá chë celoca endmëná pronto chë soye cmochanjátšataye. 20 Ndayentše útata o únganga tmojénefjna, átšbeñe ošbuáchiyënga bëtsemnama, chentše atše chëngbe tsëntsaca chántsemna ca” —Jesús tojánayana.

21 As Pedro tojána y Jesúsbioye tbojantjá: —Bëngbe Utabná, ¿atšbe catsata bacna soye šojaborlase, bueta soye šojtsemna cha japerdónana? ¿Canÿsëfta soye ca?

22 Y Jesús tbojanjuá: —Ndoñe nÿe canÿsëfta soyama quechatatsëtsná, sinó canÿsëfta bnëtsana soye canÿsëfta ca.

Ndayá inopása chë japerdónama ndëbošëngaftaca

23 Mëntšánaca Jesús tojanëyana: “Cbochanjáuyana ntšamo Bëngbe Bëtsabe amëndayana yomnana. Endmëna ntšamo canÿe réyefraca tojanopasacá. Cha yojábošena chabe oservénënga crocénana jtsëtjañana. 24 Jtsëtjañama yojóntša orna, canÿe boyabása imojúanatse, chë réybioye mallajta crocénana ibnandebena. 25 Chë oservená tondaye yonjábomna chë ndebénama jëtsjájuama; asna chë rey yojamánda cha chamotsiye nÿets tempo nÿe ínÿabiama chaotsoservénama, chabe shema y chabe básengnaca, y lempe ntšamo yojanbomncánaca, y chca chë ndebénama jtopágama. 26 Chora chë oservená chë reybe shecuatšentše yojoshamentšiyey y ibojtseimpáda: ‘Taita, Diosmanda šmotsëuantajema. Atše lempe cbochanjëtsëntšabuachiye ca.’ 27 Chë reyna chë boyabásabiama ibojóngmia; as chë ndebénana ibojtseperdóna y ibojëtsboshjona.

28 “Chë oservenana chentšana yojésebocna y benachiñe inÿe oservenáftaca ibojenbetše, cach mandadbiama trabajayá. Chë inÿe oservenana nÿe batšatema crocénana chábioye ibnandebena. Chora chë oservená chë enutábioye tamošajentšana ibojishache y ibojóntša jtsëtajuashbebiana y mëntšá ibojauyana: ‘¡Ndebénana šmatsëntšabuaché ca!’ 29 Chora cha chë oservenabe shecuatšentše yojoshamentšiyey y ibojtseimpáda: ‘Diosmanda šmotsëuantajema. Atše lempe cbochanjëtsëntšabuachiye ca.’ 30 Pero chë oservená ndoñe yonjábošena, sinó yojama chë inÿe oservenábioye cárceloye chamotsëtámiamia, chë ndebénana candëtsjájëntscuana. 31 Chë inÿe oservénënga chca imojinÿe ora, puerte yojóngmia y imojá lempe ntšamo yojopasacá chëngbe rey jacuéntama. 32 As chë rey yojamánda chë boyabása jobetšana, y ibojauyana: ‘¡Puerte bacna oservená! Sconjaimpadáyeca, nÿets ndebénana tcbontseperdoná. 33 Acnaca cachcá cmondmëna chë cach aquëcá muentša trabájayabiama jóngmiana, ntšamo atše acbiama šonjongmecá ca.’ 34 Y tša chë rey ibojtsetna; as yojamánda jabuache chamotsetsetšená nÿets ndebénana candëtsjajúantscuana ca” —Jesús tojanacuntá.

³⁵ Chora Jesús tojánayana: “Atšbe Taitá, celoca endmēná, cachcá tšëngaftangafata echanjama, tšëngaftangbe catšata ndoñe ndegombre nyets ainánaca šmonjaperdonase ca.”

19

Ndayá Jesús tojanabuatambá chë bouamnënga tmojtsenëtšenama (Mc 10.1-12; Lc 16.18)

¹ Chë soyënga tojánayanentšana, Jesús Galilea luarentšana tojtsanoñe y Judeoye tojánashjango, Jordán chenguánoica. ² Ba entšanga tmojanasto y chentše šoquënga tojanashná.

³ Básefta fariseunga Jesúsbioye tmojanobeconá y jisháchichiyama mēntšá tmojantjá: —¿Queojtselesenciana canye boyá nye ndayámnaca chabe shémbioye cachcá jesonýayama ca?

⁴ As Jesús tojanējua: —¿Tšëngaftanga ndoñe chë Bëngbe Bëtsabe uabemana palabrenguiñe šmëndualía, Bëngbe Bëtsá, chë entšanga tojanabiamá, quem luare jobojátšama ora “boyá y shema tojánabiamama”? ⁵ Y Bëngbe Bëtsá tojánayana: “Chíyeca boyabása chabe taitá y chabe mamá echanjésabashejuana, chabe shémaftaca jenútanama, y chë útata mo canýacá bochántsemna ca.” ⁶ Y chca, ya ndoñe útata quebochátsmēna, sinó mo nye canýacá. Chcasna, entšá ndoñe chaondēndbema ndayá Bëngbe Bëtsá mo canýiñcá tojéftsema soye ca —Jesús tojánayana.

⁷ Chora chë fariseunga tmojanianana: —¿As, ndáyeca Moisés tojanmandá, chë shémbioye canye uabemana tsbuanácha juiyiyana jtsenëtšenama y cachcá jesonýayana ca?

⁸ Y Jesús tojanéyana: —Tšëngaftanga Bëngbe Bëtsabe mandënga jýëngacñama ndoñe quešmátsboše causa, Moisés tmojanalesenciá shémbioye jesëtšenana. Pero quem luare jobojátšama orna, ndoñe chca quenjatsmēna. ⁹ Atše cbéyana, nda chabe shémaftaca tbojtsenëtšena y chca tojopasá ndoñe chë shema chabe boyábíoye ínýaftaca tbontseingñé causa, y chë boyá ínýaftaca tojtóbouamasna, cha chë natsana shémbioye ínýaftaca jtseingñayana ca —Jesús tojánayana.

¹⁰ Chora chabe uatsjéndayënga tmojanianana: —Chca chë boyá y shémaftaca tojsemnësna, ndoñe tšabá yontsemna jobouamayana ca.

¹¹ Y Jesús tojanéyana: —Nyetscanga ndoñe quemátobena chë palabrenga jýëngacñana, nye chë Bëngbe Bëtsá tojama jýëngacñama chamobenama, chëngna aíñe. ¹² Ba soyënga comna ndaye causa chë boyabásenga ndoñe ntobenana jobouamayana. Inyënga jónynana jobouamayama ndobenënga, ínýengbioye cach entšanga jábiamana jobouamayama ndobenënga y ínýengna, nyets tempo nye Bëngbe Bëtsabe amëndayama oservena causa ca —tojanéyana.

Jesús, basetémëngbiana Bëngbe Bëtsábíoye tbojanimpadá (Mc 10.13-16; Lc 18.15-17)

¹³ Entšanga basetémënga Jesúsbioye tmojanēnatse, cha chauabojajuama y Bëngbe Bëtsábíoye chëngbiana chaboimpadama. Pero chë uatsjéndayëngna tmojanontšé chë basetémënga unachayënga jtsécácanana. ¹⁴ Chora Jesús tojanéyana: “Cachcá mónýaye chë basetémënga átšbioye chamuabo y ndoñe matéuyanana; er Bëngbe Bëtsabe amëndayana endmēna mo quem basetémëngcá imomnëngbiana ca.” ¹⁵ As chë basetémënga tojánabojajo, Bëngbe Bëtsá jaimpádase; y chentšana cha tojtsanoñe.

Canye bomna bobontse Jesúsbioye tojána (Mc 10.17-31; Lc 18.18-30)

¹⁶ Chentšana, canye boyabása tojána Jesús jinýama y mēntšá tbojantjá: —Buatëmbayá, ¿ndaye tšabe soye chjama chë nyetsca tescama yomna tšabe vida jtsebomnama ca?

¹⁷ Y Jesús tbojanjuá: —¿Ndayeca chë tšabe soye ndayá bétsemnama šcojtsetjaná ca? Tšabia nýe canýa endmëna: Bëngbe Bëtsá. Aca chë nýetsca tescama yomna tšabe vida jtsebomnama tcojtsebošëse, mandënga cochtsobedecena ca.

¹⁸ Chora chë bobontse tbojantjá: —¿Ndaye mandënga ca?

Y Jesús tbojanjuá: —“Ndoñe catjóba, acbe shema ínÿaftaca ndoñe cattseíngñaye, ndoñe catjatbëba, ndoñe catjuaboínýena. ¹⁹ Acbe bëtsëtsata stëtsoye ndoñe catjáquedaye y ndëmua entsánaca cochtsebobonshana ntšamo cach aca cuenobobonshancá ca” —Jesús tbojanijana.

²⁰ Chora chë bobontse tbojanjuá: —Atše lempe chca nýets tempo sëndocumplina. ¿Ndayá más šojtsebuáshbena ca?

²¹ As Jesús tbojanijana: —Aca lempe tšabá jamama tcojtsebošëse, motsa, acbe bomna soyënga cochjetsatobuiye y chë crocénana, ndbomnjémënga cochtsatšataye; chca, bëts uacanana soye celoca cochántsebomna. Chentsana cochjabo y šcochjuasto ca.

²² Chë bobontse chca tojanuena ora, ngmënaca yojsatoñe, cha corente bomná bemna causa.

²³ Chora Jesús chabe uatsjédayënga tojanëyana: —Ndegombre cbëyana, puerte totcá entsemna canýe bomnabiamá Bëngbe Bëtsabe amëndayoye jamashënguama ca. ²⁴ Chë bomnabiamá cachiñe šcuatayana: Más paselo entsemna canýe camello chë coshuf-jentsa atëfñëjana chauachnëngo, y ndoñe canýe bomná Bëngbe Bëtsabe amëndayoye jamashënguana ca.

²⁵ Chabe uatsjédayënga chca tmojanuena ora, puerte ojanánënga imojtsemna y imojtsichamo: —As, ¿nda yochjobenaye atsbočaná jtsemnama ca?

²⁶ Jesús chënga tojanëñyanýe y tojanëyana: —Entšanga ndoñe quemátobena jamama canýa atsbočaná chaotsemnama, pero Bëngbe Bëtsá aíñe, er cha nýetsca soyënga jamama endobena ca.

²⁷ Chora Pedro tbojanijana: —Aca contsonýá, bënga lempe chë fsëndbomna soyënga fsënjéseboshjona y ácaftaca fsëntsajna. As, ¿ndayá bënga fchjóyëngacñe ca?

²⁸ As Jesús tojanëyana: —Ndegombre cbëyana, nýetsca quem luarentša soyëngama mo tsmëcá jtsemnama tempo chaojobuache ora, chë Bëngbe Bëtsá Entšá tbojanbemá chabe buashinýinýana bëts tšenëšiñe reycá echanjótbema jtsemándayama; y tšëngaftanga, chë atše šmëstonënga, chora bnëtsana uta uámana tbemaniñe šmochanjotbiama mo reyëngcá, chë Israeloca bnëtsana uta bëts pamillentša entsangbiama jayanama tšabá o ndoñe tšabá tmonjamama. ²⁹ Y ndëmuanýënga, atše jaserviama tmojëftseboshjona cachëngbe yebna, catšátanga o uabëంగా, befta o bebmá, básënga o fshantsënga, chë soyëngama patse soye más mochanjóyëngacñe y chë nýetsca tescama yomna tšabe vídnaca.

³⁰ Pero banga mora uámanënga imomnënga, nduámanënga mochántsemna; y banga mora nduámanënga imomnënga, uámanënga mochántsemna ca —Jesús tojánayana.

20

Chë trabájayëngbiama cuento

¹ Mëntsánaca Jesús tojánayana: “Bëngbe Bëtsabe amëndayana endmëna mo canýe bëts jajañe nduiñcá. Chë nduiñna canýe te cabá cachëse yojábocna peonga janguanguama, chabe uvas betiyënga jajañe chamotrabajama. ² Chë nduiño peonga yojánýena orna, imojenóyeunaye canýe tescama canýe denario crocénana jtëbuënyama. As chora yojichamuá chë uvas betiyënga jajoye jatrabájama. ³ Mo base mošenana ora, chë nduiño cachiñe yojábocna y plazoca atsanënga ínýënga yojanýe, tondaye ntsamcá. ⁴ As yojáuyana: ‘Tšëngaftángnaca atšbe uvas betiyënga jajoye motsajna jatrabájama y ntšamo chašmojamcá cchochtëbuënyaye ca.’ Y chë entsanga imojá. ⁵ Nýetsto ora y bëts mošenana ora, chë nduiño cachiñe yojábocna y cachiñe cachcá yojopása. ⁶ Mo la cinco ora, chë nduiño cachiñe yojábocna y chenache ínýënga yojánýena, tondaye ntsamcá. As

yojájtaje: ‘¿Ndáyeca tsëngaftanga nyets día ntjatrabajacá muentse šmotsomñe ca?’ ⁷ Y chënga imojojuá: ‘Ndocná bënga chešnataimpadá causa ca.’ As chë nduiño yojáuyana: ‘Tsëngaftángnaca atšbe uvas betiyënga jajoye motsajna jatrabajama y cbochtëbuénaye ca.’

⁸ “Y ya bien jetiñe yojtsemna orna, chë nduiño chabe caporálbioye ibojauyana: ‘Peonga metsachembo y cochtëbuénaye. Chë ústonoye tmojáshjajnënguentsana cochjabojátša y chë natsana tmojáshjajnënga ústonoye ca.’ ⁹ Y chë mo la cinco ora imojáshjajnënga imojobeconá, y cada ona canye denario crocénana yojtáyentsbuachiye. ¹⁰ Chentšana, chë natsana jatrabajama imojáshjajnënga yojtsamna jobéconama y chënga imojétsejuabnaye más crocénana mochjanóyëngacñe ca. Pero chëngnaca cach canye denario crocénana yojtëbuénaye. ¹¹ Chca imojóyëngacñe orna, chënga imojóntša chë nduiñbiama bacá ichámuana, ¹² mëntša: ‘Quemënga chë ústonoye tmonjáshjajnënga nye canye horatema tmonjatrabajá; ntšamo bënga šcontëbuenacá, cachcá chënga contëbuená y bëngna nyets día jabuache fsënjatrabajá y corente jënýá fsënjauantá ca.’

¹³ “Pero chë nduiño canya chca yojtsichamuábioye ibojojuá: ‘Sobreno, acbiama ndocna ndoñe tsabe soye chiyatsma. ¿Ndoñe canye denario crocénana canye tescama tbonjenoyeuná ca? ¹⁴ Chcasna, acbe uacanana crocénana mesocñe y motsatoñe. Atše sëntseboše chë ústonoye jatrabajama tojashjanguá jtabuénayana, cachcá ntšamo aca tchojtabuenacá. ¹⁵ Chca entsemna, er atše sëndobena atšbe crocénanaca nye ndayánaca jamana. ¿O aca envidia cojtsebomna, atše tsabia tsmënama ca?’ ” —cha yojayana.

¹⁶ Chora Jesús tojánayana: “Y chca, chë mora nduámanënga imomnënga, uámanënga mochántsemna; y chë mora uámanënga imomnënga, nduámanënga mochántsemna ca.”

Jesús cachiñe tojánayana cha jóbana y jtayenama
(Mc 10.32-34; Lc 18.31-34)

¹⁷ Chënga Jerusalenoye imojtsaye ora, Jesús barie tojánachembo chabe bnëtsana uta uatsjëndayënga y tojanëyana: ¹⁸ “Tsëngaftanga šmontsonýá mora bënga Jerusalenoye montsajnama. Chocna chë Bëngbe Bëtsá Entšá tbojanbemá, chë bachnangbe amëndayënga y ley abuátambayëngbe cucuatšñe mochanjáboshjona, y chënga mochanjayana jóbana cha ibojtsemna ca, ¹⁹ y chë ndoñe judiëngbe cucuatšñe mochanjáboshjona chënga chamotsáboyejuanama, chamotjanjama y chamocrucificama. Pero unga tianoye cha echántayena ca” —Jesús tojánayana.

Chë Santiago y Juanbe mamabe impadana soye
(Mc 10.35-45)

²⁰ Chentšana, Zebedeobe uaquiñatbe mamá chabe uaquiñátaftaca Jesúsbioye tojanobeconá, chabe shecuatšentse yojoshamentsiye canye pavorama jaimpádama. ²¹ As Jesús tbojantjá: —¿Ndayá cojtseboše ca?

Y chë shembása tbojaniana: —Aca reycá chacojtsemánda ora, cochjamánda atšbe uaquiñata chabótbema canya acbe catšbioica y chë inya acbe uañicuayoica, ácaftaca chabotsemándama ca.

²² Y Jesús tojanëjua: —Ntšamo šmontsotjanañama, tsëndata ndoñe quešnátstatšëmbo ca. Ntšamo atše chjasufriacá, ¿tsëndátnaca cachcá jasúfriama tašatjobenaye ca?

Y chata tbojanjuá: —Aíñe, fchanjobenaye ca.

²³ Chora Jesús tojanëjua: —Ndegombre, tsëndátnaca atšcá sochanjasúfria, pero atše ndoñe quetsátobena jamándana atšbe catšbioica o atšbe uañicuayoica chašótbemama. Chë útentse entsemna ndëmuanýëngbiama atšbe Taitá tojaprontacá ca.

²⁴ Chë inye bnëtsana uatsjëndayënga chca tmojanuena ora, chë uta catšátaftaca tmojanotjayaná. ²⁵ Chora Jesús chë uatsjëndayënga tojánachembo y tojanëyana: —Tsëngaftanga šmondëtatšëmbo, chë ndoñe judiëngbeñe chë reyënga lempe jtsemándayana nya mo nduiñënga cuaftsemncá; y chë bëtsëtsa entsangna chëngbe obenánaca jtsemándayana, ndayánaca jtsamëse, chë inye entsanga sempre chamotsayaunanama.

26 Pero tšëngaftangbeñna ndoñe chca chaondëtsemna. Inyetsá; masna, nda tšëngaftanguentšë chë más uamaná jtsemnana tojtsebošá bontsemna chë ínÿenga jtsaservénana. 27 Y ndánaca tšëngaftanguentšá chë más uamaná jtsemnana tojtsebošá bontsemna jtsemnana mo nÿe ínÿabiana nÿets tempo oservenacá. 28 Cachcá, chë Bëngbe Bëtsá Entšá tbojanbemá ndoñe chenátabo cha chamotseservénama, ndayá ínÿenga jabáserviana. Y mo nda ínÿenga játsebacama cuafjëtsajocá, cha echanjóbana, ba entšanga atsebácanënga chamotsemnana ca —Jesús tojánayana.

Jesús uta jtanata tojanashná

(Mc 10.46-52; Lc 18.35-43)

29 Chënga, Jericó bëts pueblentšana tmojánbocana ora, ba entšanga Jesús imojtsëstona. 30 Uta jtanata benache juachañe ibnatbemana. Jesús chëjana yojsachnëjuanama chata tbojanuena ora, tbojanontšë uayebuáchana: —¡Utabná, Davídbentšana Entšá, šmotsalastemá ca!

31 Entšanga chë jtanátbioye tmojtsanëcácana iytëca chabotsemnana, pero chatna más ibojtsáyebuache: —¡Utabná, Davídbentšana Entšá, šmotsalastemá ca!

32 As Jesús yojsaysa, chë jtanata tojánachembo y tojanatjá: —¿Ndayá šojtseboše atšë tsëndatbiana chjamama ca?

33 Y chata tbojanjuá: —Utabná, bëndata chabuatëbínÿnama ca.

34 Jesús chatbiana tbojanongmé y tojánabuchbojajo. Cachora chë jtanata tšabá yojtëbinÿna y Jesús tmojanasto.

21

Jesús Jerusalenoye tojánashjango

(Mc 11.1-11; Lc 19.28-40; Jn 12.12-19)

1 Ya Jerusalenoca béconana imojtsemna y canÿe pueblo Betfagé ca uabáinoca tmojánashjango, canÿe tjashe Olivos ca uabáinentšë. Chora Jesús uta chabe uatsjëndayata tojanichamó, 2 y mëntšá tojanëyana: “Tsëndatbe natsana entsemna base pueblotëmoye motsata. Cachora canÿe burrá utsbuaná šochanjínÿena y cháftaca canÿe burrotema echántsemna. Sochjuajafjoná y šochjuánatse. 3 Nderado nda ndayánaca chacmojáuyanëse, šochjauyana: ‘Bëngbe Utabná bontsájaboto y chentšana camuentšë echanjabáisabashejuana ca.’ ”

4 Chca tojanopasá, cachcá chaotsemnana ntšamo chë Bëngbe Bëtsabe juabna oye-buambnayá tojanayancá. Cha mëntšá tojanábema:

5 Jerusalén bëts pueblentšë oyenënga mëyana:

“Minÿënga, tšëngaftangbe Rey chentšë tšëngaftangbioye entsabó, ndoñe mo canÿa cachá bëtsá enobiamnayacá; canÿe búrrbeñe enjaquená; canÿe burrotémiñe, canÿe uatrabájaye bayabe šešónbeñe ca.”

6 Chora chë uatsjëndayata tbojána y tbojanma ntšamo Jesús tojanamëndacá. 7 Chë uatsjëndayatna chë burrá y chë burrotema tmojanënatse, entšayëjuangá chátbeñe tbojanátatse y chora Jesús chábeñe tojanenoyayé. 8 Bëtscá entšanga chëngbe entšayá chë benachëjana imojtsëtëtsatsana, y ínÿengna betiyeshënguiñe buacuafjënga imojtsetcoye y chiñe imojtsequëcñá. 9 Y chë natsana imojtsajnënga y chë ústonoyënga mëntšá imojtsaiuáyebuache: “¡Rey Davídbentšana Entšá matschuanga ca! ¡Corente bendición bomná, chë Bëngbe Utabnabe obenánaca tojabá! ¡Bëngbe Bëtsá celocá matschuanga ca!”

10 Jesús Jerusalenoye tojánamashëngo ora, nÿetsca entšanga imojtsenbouenana y banga imojtsenotíciaye: —¿Nda mua yojtsemna ca?

11 Y chë entšanga imojtsëjuana: —Chë Bëngbe Bëtsabe juabna oye-buambnayá Jesús, chë Galileoca pueblo Nazaretocá ca.

*Jesús, Bëngbe Bëtsabe bëts yebnentšana enënga y obuámnayënga tojtanëbuacna
(Mc 11.15-19; Lc 19.45-48; Jn 2.13-22)*

¹² Chentšana Jesús, Bëngbe Bëtsabe bëts yebnoye tojánamashëngo y chë entsanga chentše imojtsena y imojtsobuámnañënga chentšana tojtanëbuacna. Chéntšnaca imojtsemna entsanga canye crocénana enënga, y chë crocénana nÿe Bëngbe Bëtsabe bëts yebnentšama inoservenana. Chëngbe mesëshangá tojtsanenásatajchquëca y chë palomatema enëngbe tšenëšëgnaca. ¹³ Y tojanëyana: “Bëngbe Bëtsabe uabemana palabrënguiñe cha mëntšá tojánayana: ‘Atšbe bëts yebna echantsabaina átšeftaca encuéntaye yebna ca’; pero tšëngaftangna, atbëbanëngbe oyeniñe chë yebna šmojtsebema ca” —Jesús tojanëyana.

¹⁴ Chentšana, Jesús yojtsemnoye Bëngbe Bëtsabe bëts yebnentše, jtanënga y coshetënga tmojanobeconá, y cha tojanashná. ¹⁵ Chë bachnangbe más uámana amëndayënga y ley abuátambayënga, Jesús bëts soyënga yojtsamama tmojáninÿe ora, y chë basetémënga Bëngbe Bëtsabe bëts yebnentše imojtsayebuáchama tmojanuena ora, tša tmojanotjáyanga. Chë basetémënga mëntšá imojtsáyebuache: “¡Chë Rey Davídbentšana Entšá matschuanga ca!” ¹⁶ As Jesús tmojanianyana: —¿Ntšamo chë basetémënga montsichamcá quectsuenana ca?

Y Jesús tojanëjua: —Aíñe, sentsuenana. Pero, ¿tšëngaftanga Bëngbe Bëtsabe uabemana palabrënguiñe chë soyama ndoñe šmëndualía? Chiñe mëntšá endayana: Chë basetémënga y ochóchaye šešonatémëngbe cantëngaca aca tcojama entsanga chacmotsatschuanama ca.

¹⁷ Chora Jesús chënga tojésanabashejuana y Jerusalenentšana Betania puebloye tojtanoñe; y chentše chë ibeta tbojánbobinÿna.

*Jesús tojánayana canÿe higo betiye ndoñe más chaondëshájona ca
(Mc 11.12-14, 20-26)*

¹⁸ Chë te cachëse, Jesús cach bëts puebloye yojtësa ora, tbojánishëntsena. ¹⁹ Chora canÿe higo betiye benache juachaca yojinÿe; as choye yojobeconá, pero nÿe ena tsbuanáchënga chiñe yojinÿena. As Jesús chë higo betiyoye tojánayana: “¡Ndocna te más chaondëshájona ca!” Y betesco chë higo betiye tojtsanbuashá.

²⁰ Chë uatsjëndayënga chca tmojáninÿe ora, imojenjnaná y Jesús tmojantjá: —¿Ntšamo chca chë higo betiye canÿe ora tojtsebuashá ca?

²¹ Y Jesús tojanëjua: —Ndegombre cbëyana, tšëngaftanga Bëngbe Bëtsabeñe ošbuáchiyana šmojtsebomna y chabiamana ainaniñe ndoñe inÿetšá šmonjátsjuabnase, šmochantsobena jamama ndoñe nÿe ntšamo atše quem higo betiyeca sënjamcá, sinó quem tjoye, “muentšana mojuaná y uafjájónayoye moshbuetše ca” šmojayanëse, chca jochnënguana. ²² Y Bëngbe Bëtsáftaca chašmojtsencuénta ora, chábeñe jtsošbuáchiyëse, lempe ntšamo chašmojtjañcá šmochanjóyëngacñe ca —Jesús tojánayana.

*Jesusbe obenana
(Mc 11.27-33; Lc 20.1-8)*

²³ Chca tojanopasá chentšana, Jesús Bëngbe Bëtsabe bëts yebnoye tojánamashëngo. Chentše yojtsabuátambantscuana, bachnangbe amëndayënga y judiëngbeñe bëtsëjemëngcá amëndayënga tmojanobobeconá y tmojantjá: —¿Ndaye deréchoca chë contsama soyënga aca cojtsama ca? ¿Chca jtsamama nda mando tcmënjatštá ca?

²⁴ As Jesús mëntšá tojanëjua: —Atšnaca canÿe soye sëntsebomna tšëngaftanga jatjayama, y quešmojojuase, átšnaca cbochjáuyana ndaye deréchoca atše chca stsama. ²⁵ ¿Nda Juan chë Ubayaná tbojanichmó entsanga jubáyama, Bëngbe Bëtsá o entsanga ca? —Jesús tojanëyana.

Chama chënga tmojanontsé mëntšá enatsëtsnayana: “ ‘Bëngbe Bëtsá ca’ chamojojuase, cha šochanjáuyana: ‘As, ¿ndáyeca chë tcmojanabuayená soyënguiñe ndoñe šmonjanošbuaché ca?’ ²⁶ Pero ndoñe quemuátobena jayanana ‘entsanga ca’; muentša

entsangbiamama bēnga montsauatja, er n̄yetscanga mondējuabná Juan ndegombre Bēngbe Bētsabe juabna oyebuambnayá yomna ca.”²⁷ Chcasna chēnga Jesús tmojanjuá: —Bēnga ndoñe queftsátstatšēmo ca.

Y as Jesús tojanēyana: —Atše cach ndoñe quebochatēyana ndaye deréchoca chca stsama ca.

Chē uta uaquiñátbiamama cuento

²⁸ Chora Jesús entsanga tojanatjá: —¿Ntšamo tšēngaftanga quem soyama šmatjayana? Canye boyabása uta uaquiñata yojánabamna, y cányabioye ibojauyana: “Uaquiñá, mēnté motsa atšbe uvas betiyēnga jajoye jatrabájama ca.”²⁹ Chē uaquiñá ibojojuá: “¡Jama ndoñe quetsátsboše ca!” Pero botamana yojenójuaboye y pronto choye yojá.³⁰ Chentšana chē taitá chē in̄ye uaquiñábioye cachcá ibojauyana. As cha ibojojuá: “Arseñor, aín̄e chanjá ca.” Pero ndoñe yonjá.³¹ ¿Chē útatentšana ndēmuan̄yá tojanma ntšamo chē taitá yojabošcá ca? —Jesús tojanatjá.

Y chēnga tmojanjuá: —Chē natsaná ca.

Chora Jesús tojanēyana: —Ndegombre cbēyana, chē Romocama entsángbioye impuesto atjanayēnga y chē bacna vida bomna shembásenga, tšēngaftangbiamama más montseprontana Bēngbe Bētsabe amēndayoye jamashēnguama.³² Juan chē Ubayaná tonjánabo tšēngaftanga jábuayenama ntšamo jtsiyenana cmamnama, ntšamo Bēngbe Bētsá yobošcá, y tšēngaftanga chē tmojanabuayená soyēnguiñe ndoñe chešmatanošbuaché; y chē cuenta, chē Romocama entsángbioye impuesto atjanayēnga y bacna vida bomna shembásengna aín̄e chábeñe montsanošbuaché. Y tšēngaftanga, masque ntšamo chēnga Bēngbe Bētsábeñe imojtsošbuáchema lempe šmojin̄yēse, chē juabnayana ndoñe šmonjatrocá, chábeñe jtsošbuáchiyama ca —cha tojanēyana.

Chē puerte bacna trabájayēngbiamama cuento (Mc 12.1-12; Lc 20.9-19)

³³ Mēntšánaca Jesús tojánayana: “In̄ye cuento šmochjatuenta chašmuatsjín̄yama: Canye jajañe nduiño uvas betiyēnga yojáje y chē shēconana yojajétja. Chē uvasēsangá juantsētetjiamna canye base luare yojajutjo y canye tsbanana jebna soye yojapórma chentše jtsaishan̄yama. Chentšana, in̄ye trabájayēnga chē jajañe yojárrendaye y chana in̄ye luaroye yojtsoñe.³⁴ Chē uvasēsangá juashacama tempo yojobuache orna, chē jajañe nduiño básefta oservēngā yojichamuá chē arrēndayēnga jáuyanama ntsachetšá chē nduiño ibojtsotocánama.³⁵ Pero chē arrēndayēngna chē oservēngā imojishēche: ín̄yēngbioyna imojtsajantsetaye, ín̄yēngbioye imojtsēbaye y chē ín̄yēngbioyna ndētšbēngaca imojtsatēchēnganja.³⁶ As chē jajañe nduiño chē natsanama más ba oservēngā yojichamuá. Pero chē arrēndayēngna, ntšamo chē natsanēngaftaca imojamcá, cachcá chora imojama.

³⁷ “Cabana, chē jajañe nduiño cachabe uaquiñá ibojíchmua; as mēntšá yojtsejuabnaye: ‘Atšbe uaquiñá cocayé mochanjóyeunaye ca.’³⁸ Pero chē arrēndayēnga chē uaquiñá imojin̄ye orna, imojeniyana: ‘Mua chē fshantse nduiñbe uaquiñá entsemna. Lempe chabe soyēnga mua echanjóyēngacñe. Cuajna, motsóbanga y lempe chabe otocana soyēnga bēngbiamama echanjoquéda ca.’³⁹ As chē uaquiñá imojishache, chē uvas betiyēnga jajañentšana imojtsábocna y imojtsóba.”

⁴⁰ Chca jacuéntama tojanpochocá orna, Jesús tojánayana: —Y morna, chē jajañe nduiño chaojabo ora, ¿ntšamo šmojtsejuabná chē arrēndayēngaftaca cha yochjama ca?

⁴¹ Y chēnga tmojanjuá: —Chē puerte bacna arrēndayēnga ni mo batšatema ntjalastemaycá echantsēbaye. Chē jajañe ín̄yēnga echanjárrendaye y chē uvasēsangá juashacama tempo chaojobuache ora, ntšamo chē nduiño chaojtsotocancá chēnga mochantíyie ca.

⁴² Chora Jesús tojánayana: —¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntsá endayana:

Chë yebna jebuanënga tmojtsanaboté ndëtsbé,
mora chë más bëts uashacuanësentše entsejájona.
Chë soye Bëngbe Utabná, Bëngbe Bëtsá chca tojama,
y bënga chama ojnanánënga fsëntsemna ca.

⁴³ Ntšamo chë nduiño chë arrëndayënga chë fshantse echántsabaca y ínÿenga echantsatšataye y chënga chabiamá bëtsá shajuana mochanjatbanacá, cachcá, Bëngbe Bëtsabe amëndayana tšëngaftangbentšana mochantsejuána y ínÿengbioye mochantšatšataye. Chënga Bëngbe Bëtsabe soyëngama mochanjouena y chë soyëngama ínÿengbioye mochanjabuayená, Bëngbe Bëtsabe amëndayoye jamashënguama. ⁴⁴ Ndánaca chë ndëtsbéne chaojotsatšá, chëbé bochántsatcacaye; y chë ndëtsbé ndábeñnaca chaojotsatše, polvëshe bochántsebema ca —Jesús tojánayana.

⁴⁵ Chë bachnangbe amëndayënga y fariseunga, Jesús chë jabuátambama cuentënga yojsëtsësnama, tmojanenótatsëmbona chëngbiamá chca yojsóyebuambnama. ⁴⁶ Chora chënga tmojánbošena Jesús jishachana, pero entšangbiamá imojtsauatja; chënga imojanjuabná Jesús Bëngbe Bëtsabe juabna oyebuambnayá yojamna ca.

22

Chë casamento fiestama cuento (Lc 14.15-24)

¹ Chentšana Jesús tojanontšé cachiñe cuentëngaca chënga jabuátambana. Mëntsá tojánayana: ² “Cbochanjáuyana ntšamo Bëngbe Bëtsabe amëndayana yomnana. Endmëna mo ntšamo canÿe réyefraca tojanopasacá. Chë rey yojamánda canÿe bëts fiesta jamama, chabe uaquiñabe casamentama. ³ Chora chë rey chabe oservëngä yojichamuá chë ófjanënga jobiatšama, pero chë ófjanëngna ndoñe imonjouena jama. ⁴ As chë rey inÿe oservëngä yojichamuá y mëntsá yojámëndaye: ‘Chë ófjanënga šmochjáuyana, ya saná stseboprontana ca. Sënjamandá, atšbe uacnënga y uamna bayënga minÿicánënga jobáyama y lempe entseprontana; y chamuabo chë casamento fiestama ca.’

⁵ “Pero chë ófjanënga ndoñe imonjouena. Canÿa, cachabe fshantse inabomnoye yojtsoñe; ínÿana chabe obuámnayíne trabajuama yojtsoñe; ⁶ y ínÿengna, chë reybe oservëngä imojishëche, jabuache imojtsatsetšenaye y imojtsëbaye. ⁷ Y chë rey chë soyama yojouena ora, corente ibojtsetna. As chabe soldadënga yojichamuá chë oservëngä obánayënga chamuetsëbáyama y chëngbe bëts pueblo jetsángbotjuama. ⁸ Chora chabe oservëngä yojáyana: ‘Lempe entseprontana chë casamento fiestama, pero chë ófjanënga ndoñe quenjatëmerecena moye jabama. ⁹ Motsajna tsashenangoye y ndëmuanÿëngnaca chašmojánÿenënga, chë casamento fiestama šmochjúbuaja ca.’ ¹⁰ As chë oservëngä tsashenangoye imojábocana y nÿetscanga imojánÿenënga imojáchembo, cánÿiñe tšabe y bacna entšanga, y chca, chë tsbocnanoica jútjena yojtsemna entšángaca.

¹¹ “Chë ófjanënga jánÿama chë rey yojámashëngo ora, chentše cánÿabioye ibojinÿe y chana ndoñe yontsemna ntšamo canÿe casamento fiestama endbetsemncá uichëtjoná. ¹² As chë rey ibojauyana: ‘Sobreno, ntšamo canÿe casamento fiestama endbetsemncá ndoñe quecatichëtjona. ¿Ntšamo chca moye tcojamáshëngo ca?’ Pero chë boyabásana nÿe iytëca yojtsemna. ¹³ As chë rey chë fiestentše ujuatšnayënga yojámëndaye: ‘Shecuatše y cucuatše motsebatšeca y chë ndëbinÿna luaroye, infernoye motsábocna. Chentše puerte echanjenóbošachna y chë tsetšanama juatsašënga echantsenofhtëšjojnaye ca’ — cha yojayana.”

¹⁴ Jesús chca jacuéntama tojanpochocá ora, mëntsá tojánayana: “Chë fiestama ófjanënga banga montsemna, pero chë bocacánënga choca jtsemnama nÿe báseftanga. Er Bëngbe

Bëtsá banga jáchembuana chabe amëndayoye jamashënguama, pero nÿe báseftanga chocha mochántsemna ca.”

*Chë Romoca bëts mandadbiama impuesto jtsatsquëcjnayama
(Mc 12.13-17; Lc 20.20-26)*

¹⁵ Chentsana chë fariseunga tmojtsatanoñe y tmojanenoyeuná ntšamo Jesús tojanyiñe cha jisháchichiyana, as chca, mandadëngbeñe cha mal jaquédama. ¹⁶ Chama chënga tmojanichamó básefta cachëngbe usetonënga y ínÿengna Heródesbe ústonënga, Jesús jauanama: —Buatëmbayá, bënga fsëndétatsëmbo aca ndegombre soyënga cnetsabuátambama y contsabuatambá ndegombre tsabe vida jtsebomnama, ntšamo Bëngbe Bëtsá yomandacá, y ndoñe jatuenanana nÿe ntšamo entsãnga tmojatichamcá, er acbiama tondaye quenatámama nda más uamaná o nduamaná tomnana. ¹⁷ Chcasna, ¿ntšamo catjájuaboye? ¿Tsábá tayojtsemna, César, chë Romoca bëts mandadbiama, bënga impuesto jtsatsquëcjnayana o ndoñe ca?

¹⁸ Jesús yojtsetátsëmbo chëngbe bacna juabnëngama; chíyeca tojanëyana: —Bacna entsãnga, ntšamo ndegombre šmojuabnacá ndinÿinÿayënga. ¿Ndáyeca tsëngaftanga šmojtseboše chë sóyeca atše jisháchichiyama? ¹⁹ Chë šmatsquëcjná crocénana šminÿinÿe ca.

As canÿe crocénana tmojanoyé. ²⁰ Jesús tojanatjá: —¿Ndabe jubiá quem crocenániñe yojtsemna, y ntšamo muentše entsabemancá nda chca iuabaina ca?

²¹ Y chënga tmojanjuá: —Césarbe jubiá; cha chca enduabaina ca.

As Jesús tojanëyana: —Césarbioye šmochtoyiye cha ibotocana soye; y Bëngbe Bëtsana cha ibotocana soye ca.

²² Chënga chca tmojanuena ora, ojnanánënga imojtsemna. As chënga cachcá Jesús tmojanonÿá y tmojtsatanoñe.

*Obanënga jtayenama Jesús tmojantjá
(Mc 12.18-27; Lc 20.27-40)*

²³ Báseftanga judiëngbe amëndayënga, saduceos ca uabáinënga, imojanjuabná chë obanënga ndocna te ntayenana ca. Cach te, chë impuestama Jesús tojanoyebuambá te, básefta saduceunga tmojána y mëntsá tmojantjá: ²⁴ —Buatëmbayá, Moisés tojánayana nderado canÿe boyá tojóbana básenga ntjëtšabashejuancá, ana chabe uabentsá jtsemnana chë shémaftaca jtobouamayana, chca, chabe uabochená obanabiama básenga jtsabamnama ca. ²⁵ Chcase, canÿe bëngbentše canÿsëfta catšátanga monjamna. Chë natsaná tonjanobouamá y tontsanóbana. Básenga ndoñe quenjátabamna, chíyeca chë shemna chë uabentsáftaca tontanobouamá. ²⁶ Y cháftaca cachcá tonjanopasá, chë inÿe uabentsáftaca cachcá, y cachcá chë ínÿengaftaca y chë ústonoca uabentsáftacnaca. ²⁷ Y chentsana chë shembásanaca tontsanóbana. ²⁸ Y morna, chë obanënga chamojtayena ora, ¿ndabe chë canÿsëfta catšatanguentšabe shema chë shembása yochtsemna, nÿetscanga cháftaca tmojanobouamase ca? —chënga tmojantjá.

²⁹ As Jesús tojanëjua: —Ntšamo tsëngaftanga šmonjayancá ndmëncá šmontsoyebuambná, Bëngbe Bëtsabe uabemana palabra, ni chabe obenanama ndoñe quecmátësertana causa. ³⁰ Chë obanënga chamojtayena ora, ni boyabásenga, ni shembásenga quemochatóbouamnaye, y chca, chënga mochántsemna mo celoca angelotemëngcá. ³¹ Y chë obanënga jtayenamna, ¿ndoñe šmëndualía ntšamo cach Bëngbe Bëtsá chabe uabemana palabrënguiñe tojánayanama? Cha tonjánayana: ³² “Atše sëndmëna Abraham, Isaac y Jacobëbe Bëtsá ca.” Bëngbe Bëtsá chca jayanëse entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

³³ Chë entsãnga chca tmojanuena ora, ojnanánënga imojtsemna ntšamo Jesús yojtsabuátambama.

*Chë más bëts uámana mando
(Mc 12.28-34)*

³⁴ Jesús chë saduceúngbioye iytëca tojánabiamama fariseunga tmojántatsëmbona ora, chënga tmojánenefjna, ³⁵ y canya chënguentsá, ley abuatambayá, Jesúsbioye jisháchichiyama tbojantjá: ³⁶ —Buatëmbayá, ¿Moisesbe leyiñe ndayá chë más bëts uámana mando yomna ca?

³⁷ As Jesús tbojanjuá: —“Utabná Bëngbe Bëtsá cochtsebobonshana nyets acbe ainánaca, nyets espíritoca y nyets juábnaca.” ³⁸ Chë soye endmëna chë más bëts uámana mando y nyetsca mandëngama chë natsanoca entsemna. ³⁹ Y quem inye soye, chë natsana mandcá endenoparecena. Endayana: “Ndëmua entsánaca cochtsebobonshana, ntšamo cach aca cuenobobonshancá ca.” ⁴⁰ Chë uta mandentsana endóbocana lempe ntšamo Moisesbe leyiñe endayancá y ntšamo chë Bëngbe Bëtsabe juabna oyebuambnayënga mondbetsabuatambacá ca —Jesús tbojaniana.

*¿Cristo, ndabe entsábentsana yomna?
(Mc 12.35-37; Lc 20.41-44)*

⁴¹ Chë fariseunga cabá cachentše imojtsemnëntscuana, ⁴² Jesús tojanatjá: —¿Ntšamo šmojtsejuabná chë Bëngbe Bëtsabe Uámana Uabuayanabiamama, chë Cristo? ¿Ndábentsana cha iuabó ca?

Y chënga tmojanjuá: —Davidbentsana ca.

⁴³ As Jesús tojanëyana: —¿Ntšamo chca nántsemna, cach David, chë Uámana Espíritbe mándoca, Crístbioye Utabná ca tbojtsabobuátmëse? David mëntsá tojánayana:

⁴⁴ Bëngbe Bëtsá, atšbe Utabná Crístbioye tbojaniana:

atšbe catšbioica mótbema,

atšbe obenánaca acbe uayayënga acbe cucuatšifne chamoquedama chjamëntscuana ca.

⁴⁵ ¿Ntšámose Cristo, Davidbentsana Entšá nántsemna, cach David “Utabná ca” chábioye tbojtsabobuátmëse ca? —Jesús tojanatjá.

⁴⁶ Chora ndocná tonjanobená ni mo canye palabra jojuana. Y chë tescana ndocná yonjenñëmua Jesús más jatstjanayama.

23

Jesús chë fariseungbiamama y ley abuatambayëngbiamama tojánayana, chënga ndoñe tsabá montsama ca

(Mc 12.38-40; Lc 11.37-54; 20.45-47)

¹ Chora Jesús, entsanga y chabe uatsjëndayënga mëntsá tojanëyana: ² “Chë fariseunga y chë ley abuatambayënga cmondbëtsabuatambaye ntšamo Moisesbe leyënguiñe iuayancá. ³ Chcasna, tsëngaftanga cmontsamna chënga joyaunayana y ntšamo tcmojauyancá, cachcá jtsamana. Pero ndoñe smattsama ntšamo chënga mondbetsamcá, er chënga ndoñe ntsamana ntšamo mondbetsabuatambacá. ⁴ Mo canye entšá, couáybioye uauta uasmanësha juasmayana y cachá tondaye tontsasmancá, chënga entsanga jtsamëndayana bëtská mandënga chamotsocumplínama, pero cachënga ni mo batsatema ntsamana chë mandënga jtsocumplínama. ⁵ Chënga lempe jtsamana nye entsanga chamotsënyama. Chënga chë inyëngbiamama más Bëngbe Bëtsá imobobonshana ca chamotsejuabnama, chënga monduamana tëntša sëndachëjënguiñe juabemana ntšamo Bëngbe Bëtsabe uabemana palabrënguiñe endayancá, y juentsaca y buacuatšifne chëjënga jenábatsëcana y sibiajana nya tëntša uasebtotonanëjuangá jtsichëtjonana. ⁶ Chënga jtsebošana chë fiestënguiñe nya quëfseroca jtsetbiámanama, y chë judiëngbe enefjuana yebnënguenache chë más uámana luarënguiñe. ⁷ Chënga jtsebošana tsáshenañe entsanga nya respëtoca chamotsacheuanama, y ‘abuatambayënga ca’ chamotsachembuanámna chënga jtsebošana.

8 “Pero tsëngaftangna ndoñe smattseboše entsanga ‘abuátambayënga ca’ chacmotsachembuanama, er nyetsca tsëngaftanga mo catsatangcá smondmëna, Bëngbe Bëtsábeñe betsošbuachéyeca, y nye canya endmëna tsëngaftangbe Buatëmbayá. 9 Tsëngaftanga ‘taitá ca’ chë ley abuátambayënga smondbëtsachembuana, pero tsëngaftanga ndocna quem luarentsá ‘taitá ca’ smattsechembuana; tsëngaftanga nye canye Taitá smondbomna, chë celoca endmëná. 10 Ndoñe smattseboše entsanga ‘mádayënga ca’ chacmotsachembuanama; er nye canye Mandayá endmëna y cha Cristo endmëna. 11 Nda tsëngaftangbeñe chë más uamaná tojtsemná bontsemna chë ínÿenga jtsaservénana. 12 Nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamnana, más bëtsá mochanjábema.

13 “¡Tsa lastema tsëngaftangbiama, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tsëngaftanga smontsama entsangbiama puerte totcá chaotsemna Bëngbe Bëtsabe amëndayoye jamashënguama, mo bësáša cuaftsebiatamiancá. Pero ni cach tsëngaftanga choye quešmátamashjuana, ni ínÿenga choye jamashënguama bošëngbioye chama quešmátalesenciana. 14 ¡Tsa lastema tsëngaftangbiama, ntšamo ndegombre šmojuabnacá ndinÿinÿnayënga fariseunga y ley abuátambayënga! Tsëngaftanga chë viudángbioye chë tmobomna soyënga jtsabacayana, y entsangbe delante tsabá chacmotsënÿama y chënga šmojtsaíngñayama ndoñe chamondëtsetatsëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá tsëngaftanga más jabuache ínÿengbiama cmochanjácastigaye.

15 “¡Tsa lastema tsëngaftangbiama, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tsëngaftanga ba luarënguenache jtsajnana canya tsëngaftangbe ustoná onguayiñe, y šmojínÿena ora, tsëngaftanga jamana cha chaotsemna tsëngaftangbiama uta soye más merecido buajoná infiernoye chaotsama.

16 “¡Tsa lastema tsëngaftangbiama; tsëngaftanga smondmëna mo jtanënga entsanga unachayëngcá! Tsëngaftanga smondbëtsichamo: ‘Nda ínÿabioye tbojašbuachená ndayánaca jamama y tojayana chë Bëngbe Bëtsabe bëts yebnama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabe bëts yebnentša castellanama cha tojajurasna, aiñe jtsemnana chë tbojašbuachená soye jamama ca.’ 17 ¡Obëjëmënga y nduabínÿnënga! ¿Ndayá más uámana soye yomna, chë castellano o Bëngbe Bëtsabe bëts yebna? Chë castellano Bëngbe Bëtsabiama josérviamna jtsemnana, nye Bëngbe Bëtsabe bëts yebnocá chë castellano tojtsemnayeca. 18 Tsëngaftanga mëntsánaca smondbëtsichamo: ‘Nda ínÿabioye tbojašbuachená ndayánaca jamama y tojayana chë altarama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabiama altaroca tojtsejájona soyëngama tojajurasna, aiñe jtsemnana chë tbojašbuachená soye jamama ca.’ 19 ¡Nduabínÿnënga! ¿Ndayá más uámana soye yomna, chë Bëngbe Bëtsabiama tmojacjá soyënga o chë altar? Chë tmojacjá soyënga Bëngbe Bëtsabiama josérviamna jtsemnana, nye chë altaroca chë soyënga tmojacjáyeca. 20 Nda chë altarama tojajurá, ndoñe nye chë altarama ntsejúraryana. Lempe chë altar juatsboca tojtsemnámna cha jtsejúraryana. 21 Nda Bëngbe Bëtsabe bëts yebnama tojajurá, ndoñe nye Bëngbe Bëtsabe bëts yebnama ntsejúraryana. Bëngbe Bëtsabiama cha jtsejúraryana, cha chë chentše oyená. 22 Y nda celocama tojajurá, chentše reycá Bëngbe Bëtsabe tbemaniñama cha jtsejúraryana y cachora Bëngbe Bëtsabiámna, chentše yotbemanabiama.

23 “¡Tsa lastema tsëngaftangbiama, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tsëngaftanga Bëngbe Bëtsabiama jtsequëcnayana chë jajañentša sananga bnëtsanentsana canye soye; chë binche matatëmënga menta, anis y chë cominentša sanágnaca. Pero tsëngaftanga nye batsá jtsamana chë leyentša más uámana soyënga, mo chë nyetsca entsanga cachca derechënga chamotsebomna, ínÿenga jtsalastemánana y chë tsabe soyënguñe jtsiyenana, chca,

entsanga tsëngaftangbeñe chamotsošbuáchema. Chë soyënga cocayé cmontsamna jtsamama, chë inye tsabe soyënga amana ntjajbanacá. ²⁴ ¡Jtanënga entsanga unachayënga! Tsëngaftanga chë base soyënga jamama puerte jtsenócochinÿenana, pero jtsenbñëtjombana uámana soyënga jamama, Bëngbe Bëtsá tojanmandá soyënga. Y chca, tsëngaftanga smontsemna mo canÿe entsá ndayá tojtsabuchetjca bayëfja jtsejuánama, ndoñe ntjasama, jasama ndoñe yondëlesenciana ca chë leyiñe iuayana causa. Pero smondmëna mo entsangcá ndëmuanÿenga camellbe mëntsena jasana, y chë leyiñe endayana chcana jasama ndoñe yondëlesenciana ca.

²⁵ “¡Tša lastema tsëngaftangbiama, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tsëngaftanga smondmëna mo entsangcá ndëmuanÿenga platillëjënga y tazësënga shjoicajana jtsóbojabiana, pero tsoyna nÿe cachcá jonÿayana. Tsëngaftanga tša jtsentsénana entsangbiama mo tsabengcá jtsinÿnama, pero tsëngaftangbe ainanentše jútjena entsemna nÿe jtsatbëbanama y nÿe bëtscá soyënga jësebomnama juabnëngaca. ²⁶ ¡Nduabinÿna fariseo! Cochshetsajbaná ainaniñe bacna soyënga bomnana. Chamna nÿe tsabe juabnënga chentše cochtsebomna, y lempe ntšamo chacojtsamcá y entsanga chamojtsónÿacá tsabá echántsemna.

²⁷ “¡Tša lastema tsëngaftangbiama, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tsëngaftanga smondmëna mo obanëngbe cuevëshënga botamana uafjantsenëshëngcá; shjoicajana puerte botamanëshënga, pero tsoyna jútjena obanëngbe betashëngaca y janjuana soyëngaca. ²⁸ Tsëngaftanga chca smondmëna: entsangbe delante tsëngaftanga jtsinÿnana mo nÿetsca soyënguiñe tsabá amëngcá, pero ndoñe chca quešmátsmëna. Tsëngaftangbe ainanentšna chë bacna entsanga ntšamo ndegombre tmojuabnacá ndinÿinÿnayëngcá y chë bacna soye amëngcá smontsejuabná.

²⁹ “¡Tša lastema tsëngaftangbiama, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tsëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entsanga chamotsemnama, chëngbe cuevëshënga jtsatspórmayëse. Tsëngaftanga cachcá jtsamana chë nÿetsca soyënguiñe tsabá amëngaftaca, chë chëngbiama jtenójuaboyama pormániñe jtsatsbótamnayëse; ³⁰ y chentsana smondbëtsichamo: ‘Bënga chë bëngbe bëtsëjëmëngbe tempo maftsjanienëse, chëngbioye ndoñe matmëñjanëjabuache chë Bëngbe Bëtsabe juabna oyebuambnayënga jobáyama ca.’ Pero mo chëngcá canÿe buayenana sóyeca tmojabëngbioyna ndoñe ntsayaunanana. ³¹ Pero ntšamo šmojtsamcá jtsamëse, tsëngaftanga smontsinÿanÿná ndegombre chë Bëngbe Bëtsabe juabna oyebuambnayëngbioye tmojanëbayëngbe entsanguentšana smomnama. Y mora cach tsëngaftangbe bëts taitangcá tsëngaftanga smontsama. ³² ¡Mopochocanga jamama chë bacna soyënga, chë tsëngaftangbe bëts taitanga tmojanbojatsé jamama soyënga!

³³ “¡Mëtscuayënga, mëtscuaye entsanga! ¿Ndayá smochjama chë infernoca uabouana castigüentšana jótsbocama? ³⁴ Chíyeca atše tsëngaftangbioye chanjichamuá Bëngbe Bëtsabe juabna oyebuambnayënga, tsabe soye tatsëmbënga y abuátambayënga. Pero tsëngaftangna, ínÿengbioye smochantsëbaye y smochanjácrucificaye; ínÿengbioyna chë enefjuana yebnënguenache smochanjátsetšenaye y nÿetsca bëts pueblënguenache chënga smochandúcamena. ³⁵ Chíyeca, tsëngaftangbiama nÿets castigo echántsemna chë nÿetsca soyënguiñe tsabá amënga tmojëftsóbanama; Abel, chë jóbanama chabotsemnama tondaye tonjanmá, tmojanóba orscana y Zacarías tmojanóbantscoñe. Zacarías, Berequíasbe uaquiñana, Bëngbe Bëtsabe bëts yebnentše tmojanóba, altar y chë entsanga Bëngbe Bëtsábioye imojánadorana luariñe. ³⁶ Ndegombre cbëyana, lempe chë soyëngama castigo morsca entsangbiama echántsemna ca” —Jesús tojánayana.

*Jesús tojanošachna Jerusalenoca entsangbiama
(Lc 13.34-35)*

³⁷ Měntsánaca Jesús tojánayana: “¡Jerusalenentša entsanga, Jerusalenentša entsanga! Tšëngaftanga chë Bëngbe Bëtsabe juabna oyebuambnayënga jtsëbáyana y chë Bëngbe Bëtsabe ichmónënga ndëtsbéngaca jtsatëchënganjana jtsëbáyama. Bueta soye atšë sënjábošena tšëngaftanga átšbioye júbuajana, mo canye tuamba chabe bolletotémënga chabe juatëngmiásha tajsoye cuaftajayecá, pero tšëngaftanga ndoñe chešmátsbošena. ³⁸ Y šmochjinýe, atšë mora cachcá cbochanjesénýaye, y chca, atšna enánanga cbochanjésabashejuana, mo canye yebna cachcá tcojesonýá y énañe tcojeseboshjoncá. ³⁹ Y atšë cbéyana, ndegombre tšëngaftanga morscana atšë ndoñe más quešmochátinýe; y atšë šmochántinýe mēntsá chašmojtsichamo ora: ‘¡Corente bendición bomná, Bëngbe Utabnabe obenánaca tojabá ca!’ ”

24

*Jesús tojánayana chë Bëngbe Bëtsabe bëts yebna lempe mochjánpochocama
(Mc 13.1-2; Lc 21.5-6)*

¹ Jesús Bëngbe Bëtsabe bëts yebnentšana tojëftsanbocna y ya yojtsaye. Chorna chë uat-sjéndayënga chábioye tmojanobeconá y tmojanontšé nýetsca chentša bëts yebnënga cha jinýinýiyana. ² Chora Jesús tojanéyana: “Tšëngaftanga lempe šmontsonýá. Ndegombre šcuayana, quem Bëngbe Bëtsabe bëts yebnentšë ndoñe queochaisoquéda ni mo canye ndëtsbé inýe ndëtsbé juatsboye. Lempe mochantsepochoá ca.”

*Ntšamo yochtsemna quem luare jopochócama tempo chaojtsobeco ora
(Mc 13.3-23; Lc 21.7-24; 17.22-24)*

³ Chentšana chënga Olivos tjashoye tmojána. Jesús choca yojtsetbemana; as, chë uat-sjéndayënga tmojanobobeconá nýe chëngbiama jatjayama, mēntsá: —Sméyana. ¿Mocna ora chë soyënga Bëngbe Bëtsabe bëts yebnocca yochjochnëngo ca? ¿Ndayá yochjochnëngo bënga jinýanýiyama aca jésabama ora ya yojtsemnama y quem luare jopochócama tempo yojtsobecuama ca?

⁴ As Jesús tojanjúá: —Cuedado šmochtsebomna ndocná chacmondáingñema. ⁵ Banga mochanyabo y mochantsabíchamo chënga atšë imomna ca. Mochántsicamo: “Atšë chë Cristo sëndmëna ca” y chca, ba entsángbioye mochanjáingñaye. ⁶ Tšëngaftanga šmochanjouena canye luarentša entsanga inýe luaroca entsángaftaca imojtsentsjanama y nderado mochjentsjámnaca. Ndoñe matauatjëngana, er chca jochnënguama endmëna; pero masque chcase, quem luare jopochócama cabá ndoñe queochátmëna. ⁷ Canye luarentša entsanga inýe luaroca entsángaftaca mochántsentjanaye, y canye amëndayábentša entsanga inýe amëndayábioca entsángaftácnaca; y ba luarënguine shëntsana echanjóshjango y chentša fshantsënga echanjuangmëmana. ⁸ Masque chca jasúfriase, más chcoye cabá más mochanjatssúfria.

⁹ “Chora, entsanga inýengbe cucuatšinë cmochanjábashejuana chacmatsetšenama y cmochantsëbaye; y atšbe ústonënga bétsemnayeca nýetsca luarënguentša entsanga cmochantsëbuayënja. ¹⁰ Chë tempo, banga mora átšbeñe ošbuáchiyënga, ošbuáchiyana mochantsajbaná y mochantsenáboyënja y jóbanama inýengbe cucuatšinë mochántsenboshjuana. ¹¹ Banga Bëngbe Bëtsabe ndoñe ndegombre juabna oyebuambnayënga mochanjábocana y ba entsanga mochanjáingñaye. ¹² Nýetsá bacna juabnënga entsangbe ainaniñe echanjésemna, y chë causa banga ndoñe quemochátenbobonshana. ¹³ Pero nda nýets tempo átšbeñe ošbuachiyá totsomñe, atsbocaná echántsemna. ¹⁴ Y quem tšabe noticiënga Bëngbe Bëtsabe amëndayama nýets quem luariñe entsángbioye mochántsabuyiynaye, chca, chë ndegombre soyënga Bëngbe

Bëtsabiana chënga chamotsetatsëmbuama. Chentšana cocayé quem luare jopochócama tempo echántsemna.

¹⁵ “Chë Bëngbe Bëtsabe juabna oyebuambnayá Daniel chë puerte uabouana soye tojëftsanabema chë pochócaye soyama. Tšëngaftanga chë puerte uabouana soye chë uámana ca uabaina luarentše chašmojinýe ora (nda tojtsalía, chabosertá), šmochántsetatsëmbo chë puerte ngménana tempo tojóshjanguama; ¹⁶ entšanga Judeoca chamojtsemnënga, batsjabengoye chamotsacheta. ¹⁷ Y nda cachabe yebnentša tsbanánoca chaojtsemna, chaotsachá chocana ntjtastjangcá ndayá tsoicana jëftsábocnama. ¹⁸ Y nda jajoca chaojtsemna, yebnoye ndoñe chaondëta ni mo chabe quëfsaíya jesácñama. ¹⁹ ¡Tša lastema chë tempo ngomámanënga chamojtsemnëngbiana o ochóchaye šešonga chamojtsabamnëngbiana! ²⁰ Bëngbe Bëtsá šmochtseimpadana chë tšëngaftanga jachetama, uaftena tempo ora o canýe ochnayté ndoñe chaondëtsemnama. ²¹ Chca, chora puerte ngménana echántsemna. Tša jabuache ngmenancá, quem luare jabojátšama orscana y mëntscoñama y más chcoye, cachcá ngménana ndoñe ntjamnana. ²² Chë puerte ngménana tempo yapa bën ndoñe chaondëtsemnama Bëngbe Bëtsá ndoñe tonjalesenciase, ndocná quentatsbocá; pero chabe ubuáyanënga cha corente endábabuanýeshanayeca, echanjama yapa bën tempo ndoñe chaondëtsemnama.

²³ “Chora nderado nda cmochanjáuyana: ‘Minýënga, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana. ²⁴ Chora mochanjábocana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chënga mochanjama bëts soyënga chëngbe obenana jinýanýiyama, entšanga jáingñama, y tmojobenase, chë Bëngbe Bëtsabe bocacánëngnaca. ²⁵ Atše ya chama tcbonjabuayená chë tempo cabá ndóshjango ora. ²⁶ Chíyeca, nderado chënga chacmojáuyana: ‘Minýënga, chentše chë Cristo entsemna, entšanga ndoyenoca ca’, choye ndoñe šmatjá; o chacmojáuyana: ‘Cha canýe tsoca entsemna ca’, chama ndoñe šmattsayaunana. ²⁷ Er ntšamo chë tojatcuinýe ora, shinýe bocanoicana y shinýe uenatjëmbambanëntscoñe jabuashinýinýenancá y ba luarënguenache entšanga jobenayana jinýama, cachcá, Bëngbe Bëtsá Entšá tbojanbemá quem luaroye chaojésabo te, entšanga nýets luarentše mochanjobenaye cha jinýama. ²⁸ Canýe obanabe cuerpo tojtsemnama chë gallinacënga tmojátatsëmbona y cachora chë béconana jojotana. Cachcá, chë castigo echántsemna nýa chama chë tempo chaojtsemna ora ca” —Jesús tojánayana.

*Bëngbe Bëtsá Entšá tbojanbemá quem luaroye echanjésabo
(Mc 13.24-37; Lc 21.25-33; 17.26-30, 34-36)*

²⁹ Mëntsánaca Jesús tojánayana: “Chë puerte ngménana tempo chaojchnëngüentšana, shinýe ndoñe queochátsbuashinýinýana, juashcona ndoñe queochátsbinýnaye, celocana estrellënga echanjatquécjana y quem luarentša tsbanánoca espíritënga obenana bomnënga echanjángmëmana. ³⁰ Chora canýe soye celoca echanjónýna entšanga jinýanýiyama Bëngbe Bëtsá Entšá tbojanbemá ya iuaisaboma, y nýets luarenache entšanga mochanjenóbošachna, y Bëngbe Bëtsá Entšá tbojanbemábioye mochanjinýe celoca jantšetëshiñe echántsaboye, puerte obenánaca y corente buashinýinýaniñe. ³¹ Y canýe trompetëfjua jabuache chaojuénana ora, cha chabe angelotëmënga echanjichamuá Bëngbe Bëtsabe ubuáyanënga júbuajama, nýets luarëngocana, celoca cánýoica juachoicana y chë ínýoica juachóntscoñe.

³² “Ntšamo higo betíyeca endbétsopasanama šmochjuatsjinýe: Tojtsaisabuacuana y tojtsaisëjotsana ora, chë tšabe tempo ya tojtsaisobecuama jtsotatsëmbuana. ³³ Cachcá, lempe chë ndayama tšëngaftanga tcbonjauyancá chašmojinýe ora, šmochántsetatsëmbo Bëngbe Bëtsá Entšá tbojanbemá ya jésabama yojtsemnama. ³⁴ Ndegombre cbëyana,

lempe chca echanjochnëngo, morsca entsanga cabá ndóbana ora. ³⁵ Celoca y quem luare echanjopochóca, pero atšbe palabra ndocna te queochaisopochóca.

³⁶ “Pero ndayté y ntseco ora Bëngbe Bëtsá Entśá tbojanbemá yochjésabama, ndocná quenátstatšëmbo, ni chë celoca angelotëmënga, ni Bëngbe Bëtsabe Uaquiñá. Nÿe chë Taitá chama yotátšëmbo.

³⁷ “Ntšamo Noé yojëftsiyena ora tojanopasacá, cachcá echanjopása chë Bëngbe Bëtsá Entśá tbojanbemá chaojésabo ora. ³⁸ Noebe tempo, chë uabouana uaftena cabá nduáshjango ora, entsanga imnasaye, imnofšëšnaye y imnóbouamnaye; natjëmbana imojtsiyeñe, y chca imojtsomñe Noé chë barquëshoye tojánamashënguëntscuana. ³⁹ Chënga tondaye imonjántatšëmbo, nÿe chë uabouana uaftena tojánashjango y nÿetscanga tojt-sanëyamba ora cocayé. Cachcá echántsemna Bëngbe Bëtsá Entśá tbojanbemá chaojésabo ora; ya chaojochnëngo ora, entsanga chama mochanjátatšëmbona. ⁴⁰ Chora uta boyabásata jajoca bochantsemna; canÿa mochanjesbetše y chë ínÿana ndoñe. ⁴¹ Uta shembásata bochantsejanÿcoye; canÿa mochanjesbetše y chë ínÿana ndoñe.

⁴² “Chíyeca cuedado šmochtsebomna y yejuana šmochtsantješna, er ndoñe quešmátstatšëmbo ndayté tšëngaftangbe Utabná yochjésabama. ⁴³ Pero quem soye tšabá chacmësertá: Chë yebnentša nduiño, ntseco ora ibeta atbëbaná yochjabama tojtsetatšëmbëse, cha nantsefšna y ndocnábioye buanjaleséncia jushañe chaotsendbemama tsoye jtsamashënguama y jtsatbëbama. ⁴⁴ Chíyeca, tšëngaftángnaca šmochtseprontana, er Bëngbe Bëtsá Entśá tbojanbemá echanjésabo, entsanga chama tondaye chamontsejuabná ora ca” —Jesús tojánayana.

Chë tšabe oservená y chë ndoñe tšabe oservená
(Lc 12.41-48)

⁴⁵ “¿Nda yomna chë oservená ntšamo chë nduiño tojtsebošcá amá y nÿets juábnaca amá? Cha jtsemnana nda chë nduiño bochjëftsebošhona chë yebnentšënga chaot-sanÿenama y jasama tojtsemna ora chaújuatšema. ⁴⁶ Chë nduiño tojtashjango ora, chë oservenábioye tbojinÿena ntšamo ibomncá jtsamëse, chë oservená puerte oyejuayá echántsemna. ⁴⁷ Ndegombre cbëyana, chë nduiño chábioye bochanjaimpáda lempe chabe soyënga chabotsinÿeñama. ⁴⁸ Pero chë oservená bacna entśá tomnësna, jajuaboyana chë nduiño ndoñe betesco yochantabo ca, ⁴⁹ y as, cha jóntšana chë inÿe oservénënga jtsajantšetayana, becá jtsesana y jtssetmuana inÿe tëmiëngaftaca. ⁵⁰ Y chabe nduiño jtashjanguama ndoñe tontsejuabná te y ndoñe tontsetátšëmbo ora, cha echántashjango. ⁵¹ Chora chë nduiño jabuache bochantsecastíga, y ntšamo chë bacna entsanga ndayá ndegombre tmojuabnacá ndinÿinÿayënga jasúfriama entsamncá, cha echanjasúfria. Chora cha puerte echanjenóbošachna y chë tsetšanama juatsašënga echantsenoftšësjonaye ca” —Jesús tojánayana.

25

Chë bnëtsana tobiasëngbiama cuento

¹ Mëntsánaca Jesús tojánayana: “Chë te chaojóshjango ora, Bëngbe Bëtsabe amëndayana echántsemna mo ntšamo canÿe casamento fiestentše tojanopasacá. Mëntsá yojopása: Bnëtsana tobiasënga chëngbe querosine uajuinÿanëshangá imojëftsájaca y imojábocana chë casamentero boyabása jajëbenguama. ² Chë bnëtsana tobiasënguëntšana, shachnënga sempre enójuabnayënga imnamna, y chë inÿe shachnëngna, ndenójuabnayënga. ³ Chë ndenójuabnayënga chëngbe uajuinÿanëshangá imojëftsájaca, pero querosine ndoñe imonjuabuyamba chë uajuinÿanëshangañe cachiñe jtaftsuámama. ⁴ Pero chë sempre enójuabnayënga chëngbe uajuinÿanëshangá imojëftsájaca y querosínënaca botellëšënguiñe imojuabuyamba. ⁵ Chë casamentero boyabásana ndoñe betesco yonjabo, chíyeca nÿetsca tobiasënga ocnayana yojubuache y imojtsomaná. ⁶ Mo tsëntseto orna, chënga imojouena

měntšá uayebuáchana: ‘¡Chë casamento boyabása ya endabó! ¡Jajébenguama mobocana ca!’ ⁷ Asna, nyetsca tobiasënga imojotsbaná y imojóntša chë uajuinÿanëshangá juabopróntana. ⁸ Chorna, chë shachna ndenójuabnaye tobiasënga chë inÿe shachnënga sempre enójuabnayëngbioye imojáuyana: ‘Diosmanda tšëngaftangbe querosinentšana baseytema šmëbuatšatá, bëngbe uajuinÿanëshangá tojontšé jtsafsanana ca.’ ⁹ Pero chë sempre enójuabnayëngna imojayana: ‘Ndoñe. Tchojubuatšatase, tšëngaftangbiama y bëngbiámna querosine echántšashbe. Más tšabá entsemna, chë querosine mondbétsenoye chašma y tšëngaftangbiama chašmauábuamiñe ca.’

¹⁰ “Chorna, chë shachna ndenójuabnaye tobiasënga imojá chë querosine jauabuámiyama; pero chëntscuana chë casamento boyabása yojáshjango y chë sempre enójuabnayënga cháftaca chë casamento fiestoye imojámashjna, y chentša bëshása imojtatame. ¹¹ Chentšana chë inÿe tobiasënga imojáshjajna y mēntšá imojtsichamo: ‘¡Taita, Taita, šmëbëtafjo ca!’ ¹² Pero chë casamento boyabása yojójua: ‘Ndegombre cbëyana, tšëngaftanga ndoñe quechatëbuatma ca.’

¹³ “Cachcá echántsemna Bëngbe Bëtsá Entšá tbojanbemá chaojésabo ora; chíyeca šmochtseprontana, tšëngaftanga ndoñe quešmátstatšëmbo ndayté, ni mocna ora chca yochjopásama ca” —Jesús tojánayana.

Chë crocenánama cuento (Lc 19.11-27)

¹⁴ “Bëngbe Bëtsabe amëndayana endmëna mo ntšamo canÿe boyabásaftaca tojanopasacá. Cha ibojtsemna inÿe luaroye jtsoñama; as chabe oservénënga yojáchembo y yojaimpádaye chabe crocénana chamotsinÿenama. ¹⁵ Cánÿabioye ibojántšabuachiye shachna uaranga crocénana, ínÿabioyna uta uaranga y ínÿabioyna canÿe uaranga. Chca yojamna ntšamo cada ona ibojobiashjachcá. Y as chë boyabása yojtsoñe. ¹⁶ Cachora chë shachna uaranga yojoyëngacñá yojá trato jabemama, y chca, inÿe shachna uaranga crocénana yojábotiye. ¹⁷ Chë uta uaranga yojoyëngacñá cachcá yojama y inÿe uta uaranga yojábotiye. ¹⁸ Pero chë canÿe uaranga yojoyëngacñana, yojá, fshantsiñe yojajutjo y chabe mandayabe crocénana chentše yojtseitëme.

¹⁹ “Chentšana baytese chë oservénëngbe amëndayá yojtashjango y yojóntša chë crocénana chënga jatjayana. ²⁰ Natsana yojáshjango chë shachna uaranga yojoyëngacñá y chabe mandayábioye inÿe shachna uaranga crocénana ibojántšabuachiye y mēntšá ibojauyana: ‘Taita, aca shachna uaranga šconjanoyé y muentše entsemna inÿe shachna uaranga sënjaboté ca.’ ²¹ As chë mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tchojaman-dacá tcojámayeca, atše cbochanjaimpáda más bëtscá chašcotsinÿeñama. Mamáshëngo y átšeftaca cochjóyejuaye ca.’ ²² Chentšana chë uta uaranga yojoyëngacñá yojáshjango y chë mandayábioye ibojauyana: ‘Taita, aca uta uaranga šconjanoyé y muentše entsemna inÿe uta uaranga sënjaboté ca.’ ²³ As chë mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tchojaman-dacá tcojámayeca, atše cbochanjaimpáda más bëtscá chašcotsinÿeñama. Mamáshëngo y átšeftaca cochjóyejuaye ca.’

²⁴ “Pero chë canÿe uaranga yojoyëngacñe oservená yojáshjango orna, chabe mandayábioye ibojauyana: ‘Taita, atše sëndétatšëmbo aca canÿe tšátjaye entšá comnama; acna chë ndoñe tconjajé chentše saná jocñana y chë ndoñe tconjujquëshe luarentše jobuátbanana. ²⁵ Chama atše uatjana šjuábuache, chíyeca atše sënjá y fshantsiñe chë crocénana sënjetseitëme. Pero muentše acbe crocénana entsatsmëna ca.’ ²⁶ As chë mandayá ibojajuá: ‘¡Bacna oservená y oyënjayá! Chë ndayentše ndoñe tijajé chentše saná jocñana y chë ndoñe tijujquëshe luarentše jobuátbanana atše tsuamanama

icojátatsëmbëse, ²⁷ aca cmonjamna atšbe crocénana bancoca jetsobuájua y atše mati-jtabo ora, atšbe crocénana matijtóyëngacñe y chë chentšana tojoboté crocénanënaca ca.’ ²⁸ Y as yojamënda: ‘Chë uaranga motseboca y chë bnëtsana uaranga entsebomnábioye chana motsatšetá ca. ²⁹ Er nda tojtsebomnábioye, más jatšetayana, y chca cha corente bëtscá jtsebomnana; pero tondaye tondbomnábioyna, chë batšatema tobomna sóynaca jtsebocana ca.’

³⁰ “Y chora cha yojayana: ‘Quem ndoservena trabajayá shjoca ibetoye matábocna; choca puerte echanjenóbošachna y chë tsetšanama juatsašënga echantsenoftëšjojnaye ca’ ” —Jesús tojanéyana.

Ntsamo chë quem luare jopochócama ora, nyetsca entsangbiamama mochjayana

³¹ Mëntsánaca Jesús tojánayana: “Chë Bëngbe Bëtsá Entšá tbojanbemá chabe obenánaca, buashinÿinÿaniñe y nyetsca chabe angelotëmëngaftaca chaojésabo ora, chë reybiama puerte buashinÿinÿana tbemaniñe echanjót'bema. ³² Chora nyets luarëngoca entsanga chabe natsanoica mochanjénefjna, y cha, entsanguentsana ínÿenga echanjábacacaye, mo chë oveshënga abujajëñya oveshënga chivëngbentšana endbetsabacacnaycá. ³³ Chë abujajëñyana, oveshënga chabe catšbioica echanjáchembo y chivëngna chabe uañicuayoica. Bëngbe Bëtsá Entšá tbojanbemá cachcá echanjama: chë ubuáyanënga chabe catšbioica echanjúbuaja y chë bacna entsangna chabe uañicuayoica echanjásaye.

³⁴ “Chorna chë Rey, Bëngbe Utabná, chabe catšbioica chamojtsemna entsanga echanjáuyana: ‘Tšëngaftanga, Atšbe Taitá tšábeñe cmëtabna, mabënga ca; atšbe amëndaye luare mo tšëngaftangbiamama otocana soycá mosháchiñënga; tšëngaftangbiamama endëprontana, Bëngbe Bëtsá quem luare tonjanma orscana. ³⁵ Er atše šonjanishëntsana y tšëngaftanga saná šmonjancaredadó; šonjanajuendá y tšëngaftanga šmonjanafšé; inÿe luarocana ashjanganacá sënjánana y posada šmonjanántšame. ³⁶ Enašá sënjánana y entsayá šmonjanëtšetá jtichëtjuama; šocá sënjanjájona y šmonjanatsëtsaye; cárceloca sënjanëtámena y jabëuatsëtsayama šmonjánabo ca.’

³⁷ “As chë Bëngbe Bëtsá chabe bominiñe tšábenga tojábiamënga mochanjatjaye: ‘Bëngbe Utabná, ¿ntseco shëntseca tcbënjáninÿe y tcbënjanajuatšé? ¿Ntseco uajuendayá tcbënjáninÿe y tcbënjanaafšé? ³⁸ ¿O ntseco inÿe luarocana ashjanganacá tcbënjáninÿe y posada tcbënjanaántšame, o enašá y entsayá jtichëtjuama tcbënjanaëtšetá? ³⁹ ¿O ntseco šocá o cárceloca utamená tcbënjáninÿe y jauatsëtsayama tifjána ca?’

⁴⁰ “As chë Utabná echanjóju: ‘Ndegombre cbëyana, lempe ntsamo chë atšbe catšátanguentsana chë más batšá uámanëngaftaca šmojamcá, cach átšeftaca šmonjanma ca.’

⁴¹ “Chentšana chë Utabná chabe uañicuayoica chamojtsemna entsanga echanjáuyana: ‘Atšbentšana mojuánanga atšbe Bëtsabe uabotënënga. Infiernoye motsajna, chë ndocna te queochátsfsana íñeshoye; choca endëprontana Satanás y chabe ustonëngbiamama. ⁴² Er atše shëntseca sënjánana y tšëngaftanga saná ndoñe chešmatancaredadó; šonjanajuendá y ndoñe chešmatanaafšé; ⁴³ inÿe luarocana ashjanganacá sënjánana y ndoñe posada chešmatanaántšame. Enašá sënjánana y ndoñe entsayá chešmatanaëtšetá; šocá sënjanjájona y cárceloca sënjanëtámena y ndoñe chešmatanaatsëtsá ca.’

⁴⁴ “As chënga mochanjatjaye: ‘Bëngbe Utabná, ¿ntseco tcbënjáninÿe shëntseca o uajuendayá, o inÿe luarocana ashjanganacá, o enašá, o šocá o cárceloca utamená y ndoñe tcbënjanajabuache ca?’

⁴⁵ “Y chë Utabná echanjóju: ‘Ndegombre cbëyana, tšëngaftanga ntsamo chë atšbe catšátanguentsana chë más batšá uámanëngaftaca, ndoñe šmonjanmcá, átšeftaca cach ndoñe chešmátanma ca.’

⁴⁶ “Chëngna infiernoye nyetsca tescama mochantsësetjango, y chë Bëngbe Bëtsá chabe bominiñe tšábenga tojábiamëngna chë nyetsca tescama yomna tšabe vida mochántsebomna ca” —Jesús tojánayana.

26

Entsanga tmojanjuabó ntšamo jamëse Jesús jishachama (Mc 14.1-2; Lc 22.1-2; Jn 11.45-53)

¹ Lempe chca tojánayanentšana, Jesús chabe uatsjéndayënga tojanëyana: ² “Tšëngaftanga šmondétatšëmbo, uta te y chë Bashco fiesta echántsemna y Bëngbe Bëtsá Entšá tbojanbemá ínÿengbe cucuatšiñe mochanjáboshjona chamocrucificama ca.” Chë fiesta inamna jtenójuaboyama Bëngbe Bëtsá chë judiëngbe bëts taitanga Egiptocana tojánatsebacama.

³ Chëntscuana, chë bachnangbe amëndayënga y chë judiëngbeñe bëtsëjemëngcá mándayënga tmojánenefjna, Caifás, chë bachnangbe más uámana amëndayabe bëts yebnentše. ⁴ Tmojanenojuabó y tmojanenoyeuná jtseíngñase Jesús jishachama, y jtsóbama. ⁵ Pero imojtsichamo: “Quem fiestëntscuana ndoñe, entsanga yapa muanjóntša enbouenanana ca.”

Canÿe shembása botamana uanguëtše béjaye Jesusbe bestšašiñe tbojanbuešcja (Mc 14.3-9; Jn 12.1-8)

⁶ Jesús Betania pueblentše yojtsemna, Simón chë bacna nguayanánaca šocá ca uabobuatmabe yebnentše. ⁷ Chëntscuana canÿe shembása Jesúsbioye tojanabeconá. Chë shembásana tojanamba canÿe alabastro jarrëtema, jútjena canÿe puerta uámana botamana uanguëtše béjayeca. Jesús mesëshentše yojtsemnëntscuana, chë shembása chabe bestšašiñe chë botamana uanguëtše béjaye tbojanbuešcja.

⁸ Chë uatsjéndayënga chca tmojáninÿe orna, tmojanotjayaná y tmojanontšé ichámuana: —¿Ndáyeca nÿe bonamente chë soye chca yojtsemna ca? ⁹ Chamna, matmënjobenanga chë béjaye becá crocenánama juiyana y chánaca ndbomnjëmënga matmënjújabuache ca.

¹⁰ Jesús chë soye tojanuena; as tojanëyana: —¿Ndáyeca ndoñe cachcá quem shembása šmochanjonÿaye ca? Ntšamo tonjamcá tšabá entsemna. ¹¹ Er chë ndbomnjëmëngna nÿets tempo tšëngaftangbeñe mochanjëftsemna, pero atše tšëngaftangaftaca ndoñe nÿets tempo quichásemna. ¹² Ntšamo chë shembása tojamcá, chë botamana uanguëtše béjaye atšbe cuerpiñe jabuéšcjëse, cha šontseprónta atše juatbontsa tescama. ¹³ Ndegombre cbëyana, quem luariñe ndayéntsnaca Bëngbe Bëtsabe soyëngama chamojtsabuayiyná chentše, ntšamo quem shembása tojamámnaca becá mochanjëftsóyebuambaye, chca, entsanga chabiamama chamotsenójuabnama ca —Jesús tojanëyana.

Judas tojána bachnangbe amëndayëngbioye, Jesús chamuishachama (Mc 14.10-11; Lc 22.3-6)

¹⁴ Canÿa chë bnëtsana uta uatsjéndayënguentsá, Judas Iscariote ca uabainá, tojána bachnangbe amëndayëngaftaca jencuëntama. ¹⁵ Y tojanatjá: “¿Ntsachetšá šmatjtabuénaye y Jesús tšëngaftangbe cucuatšiñe cbochjayentšbashejuana ca?”

As chëngna, unga bnëtsana ralbenga tmojtanabuená. ¹⁶ Y cach orscana Judas yojtsenguaye ntšámose y ntseco ora, Jesús chëngbe cucuatšiñe jayentšbáshejuanama.

Jesús chabe uatsjéndayëngaftaca Bashco saná tojanse (Mc 14.12-25; Lc 22.7-23; Jn 13.21-30; 1 Co 11.23-26)

¹⁷ Chë Bashco fiesta bojatsenté, chë levadúraca ndëpormana tandëse jasama fiestëntscuana, chë uatsjéndayënga Jesúsbioye tmojanobeconá y tmojantjá: —¿Ndëmoca aca cojtseboše bënga fchaiprontama Bashco saná chacosama ca?

¹⁸ Y Jesús tojanëyana: —Chë bëts puebloye motsajna canÿe bacobe yebnoye y cha šmochjauyana: “Buatëmbayá tonjayana: ‘Atšbe ora ya echanjobuache, y atše acbe yebnoye sëntsá, Bashco fiesta jamama atšbe uatsjéndayëngaftaca ca.’ ”

¹⁹ As chë uatsjéndayënga tmojanma ntšamo Jesús tojanamëndacá y chë Bashco fiesta saná tmojanprontá.

²⁰ Y tojanibétata orna, Jesús chë bnëtsana uta uatsjëndayëngaftaca mesëshentse yojtsemna. ²¹ Y imojtseantscuana, Jesús tojanéyana: —Ndegombre cbëyana, canya tsëngaftanguentsá uayayëngbe cucuatšiñe sochanjáboshjona ca.

²² Chora chë uatsjëndayënga puerte ngménaca imojtsemna y tmojanontsé canyánya Jesús jatjayama: —Bëngbe Utabná, ¿nderado atse cha chtsemna ca?

²³ As Jesús tojanéjua: —Canya nda chabe tandëse entsefchecuacná cach atse sëntsefchecuacná scnenentse, cha uayayëngbe cucuatšiñe sochanjáboshjona.

²⁴ Ndegombre, Bëngbe Bëtsá Entsá tbojanbemáftaca echanjopása ntšamo Bëngbe Bëtsabe uabemana palabrenguiñe chabiamana iuayancá; pero, jtsa lastema chë bochjáboshjonabiamana! Más tsabá chabiamana manjamna ndoñe ntjónyñana ca.

²⁵ As Judas, chë boshjuaná, Jesúsbioye tbojantjá: —Buatëmbayá, ¿nderado atse chtsemna ca?

Y Jesús tbojanjuá: —Ndegombre tcjayana ca.

²⁶ Imojtseantscuana, Jesús tandëse tojanca, Bëngbe Bëtsábioye chama tbojtanchuá, tojanjatá y chë uatsjëndayënga tojanatsatá. Y mëntsá tojánayana: “Mocñënga, mosënga. Atsbe cuerpo entsemna ca.”

²⁷ Chentsana, canye coptema vínoyeca tojanaca, Bëngbe Bëtsábioye tbojtanchuá y chë uatsjëndayënga tojanëfsaé. Y mëntsá tojánayana: “Nyetscanga quem coptémentšana mofënga. ²⁸ Quem vínoye atsbe buiñe entsemna. Atsbe buiñe echanjuábuashana entsanga chamotsetatsëmbuama ntšamo Bëngbe Bëtsá entsanga tojanašebuachenacá aiñe yochjochnënguama. Chë buiñe bëtská entsangbiama echanjuábuashana, chëngbe bacna soyëngama perdonánënga chamotsemnama. ²⁹ Y ndegombre cbëyana, morscana atse ya ndoñe más chë uvasentšana obocniye quichaisofsiye. Chë tsëm vínoye tsëngaftangaftaca chanjofsiye, atsbe Taitabe amëndayoca chamojtsemna ora ca” —Jesús tojánayana.

Jesús tojánayana, chábioye ndoñe bonjanabuátma ca Pedro yochjánayanama (Mc 14.26-31; Lc 22.31-34; Jn 13.36-38)

³⁰ Bëngbe Bëtsá jëtschuayama tmojancantá chentsana, Olivos tjashoye tmojëftsanbocana. ³¹ Choca Jesús tojanéyana: —Tsëngaftanga nyetscanga quem ibeta átšbeñe ošbuáchiyana šmochantsobuetse y šmochántsacheta, er Bëngbe Bëtsabe uabemana palabrenguiñe, cha mëntsá tojánayana: “Chë oveshëngbe abujénya chanjóba y chë oveshënga mochantsáshana ca.” Chca tsëngaftangaftaca echanjopása, uayayënga chašmojishache ora. ³² Pero obanënguentsana chaitayenentsana, tsëngaftangbe natsana Galileoye chanjá ca —cha tojanéyana.

³³ Chora Pedro tbojanjuá: —Masque nyetscanga ábeñe ošbuáchiyana chamotsobuetse y chamotsacheta, ntšamo ácaftaca yochjopása causa, atse ndocna te ca.

³⁴ As Jesús tbojanayana: —Ndegombre cbëyana, cam ibeta, ngallo cabá ndécánta ora, aca unga soye cochanjayana ndoñe šconduabuatma ca.

³⁵ Pero Pedro tbojanayana: —Masque chašotsemna ácaftaca jóbanama, atse ndoñe quichátayana ndoñe cbonduabuatma ca.

Y nyetsca uatsjëndayëngnaca cachcá imojtsichamo.

Getsemaní luarentse Jesús Bëngbe Bëtsáftaca tbojanencuentá (Mc 14.32-42; Lc 22.39-46)

³⁶ Chentsana, Jesús chabe uatsjëndayëngaftaca canye luare Getsemaní ca uabáinoye tojána. Choca tojanéyana: “Muentse motbiama, chëntscuana atse choye chanjá Bëngbe Bëtsáftaca jencuëntama ca.”

³⁷ Y Pedro y chë Zebedeobe uta uaquiñata tojëftsanëbiatse. Choca yojóntša puerte ngménaca y corente cochtsetšenaná jtsemnama. ³⁸ Jesús tojanéyana: “Atsbe ainana

puerte ngménaca entsemna, mo jobanamcá. Muentše moquedanga y átseftaca šmochtsefšna ca.”

³⁹ Chora Jesús más natsanoye tojána, tojanoshamentšé y fshantsóntscoca yojotsejbéna, y mēntšá Bēngbe Bētsáftaca tbojanencuentá: “Atšbe Taitá, jopódianēse moma atše japadésama ndoñe chašondětsemnama. Pero ntšamo atše stsebošcá ndoñe chaondětsemna, sinó ntšamo aca cojtsebošcá ca.”

⁴⁰ Chentšana, Jesús chabe unga uatsjéndayēngbioye tojtanabo y chēngna imnétsomañe. Chca tojánanýena ora, Pédrēbioye tbojaniyana: “¿Ni mo canýe horatema tšēngaftanga šmonjobená átseftaca jtsefšnana ca?” ⁴¹ Smochtsefšna y Bēngbe Bētsáftaca šmochtsencuéntaye, chca, bacna soye jamama ndoñe chacmondócochēnguama. Tšēngaftanga ndegombre šmontseboše espíritoca Bēngbe Bētsá joyeunayama, pero cuerpiñe añemo ndoñe quešmátsbomna ca” —Jesús tojanéyana.

⁴² Uta soyama tojtesaná y mēntšá Bēngbe Bētsáftaca tbojanencuentá: “Atšbe Taitá, atše japadésama ndoñe chašondětsemnama jamama ndoñe jopódianēsna, nýe ntšamo aca cojtsebošcá chaotsemna ca.”

⁴³ Y tojtanabo ora, chē uatsjéndayēnga cachiñe imnétsomañe; yapa ocnaye causa nýe imojtsefshétana. ⁴⁴ As Jesús cachcá yojēftsēnyaye, y ungama cachiñe tojtesaná Bēngbe Bētsáftaca jencuéntama, y cach palabrēnga tojánayana.

⁴⁵ Chora chē uatsjéndayēngbioye tojtanabo y tojanéyana: “¿Cabá šmotsomañe y šmotsochnañe ca? Ya ora tocjobuache, Bēngbe Bētsá Entšá tbojanbemá bacna soye amēngbe cucuatšīne mochanjáboshjona. ⁴⁶ Motsbananga, cuajna. Minýēnga, chē boshjuaná ya entsebeconá ca.”

Uayayēnga Jesús tmojánishache

(Mc 14.43-50; Lc 22.47-53; Jn 18.2-11)

⁴⁷ Jesús cabá yojtsóyebuambnantscuana, Judas, canýe chē bnētsana uta uatsjēndayēnguentšá, tojánashjango, y cháftaca imojtsemna ba entšanga espadējangaca y ngarotbéngaca prontánēnga. Chēnga imojamna chē bachnangbe amēndayēnga y chē judiēngbeñe bētsējemēngcá amēndayēngbe ichmónēnga. ⁴⁸ Judas, chē boshjuaná, tojanjuabó ntšamo jamana entšanga jinýanýiyama ndēmua Jesús bētsemnana. Chíyeca yojáuyana: “Nda chajiauámocho, cha echántsemna. Smochjishache ca.” ⁴⁹ Cachora Judas Jesúsbioye tojanobeconá y tbojanчуá: —Buajtana, Buatēmbayá ca.

Y tojtanámocho.

⁵⁰ Jesús tbojaniyana: —Enutá, moma chē ndayá jabomama tcojabo ca.

Chorna, chē entšanga tmojanobeconá, Jesús tmojánishache y tmojanánatse.

⁵¹ Chca orna, canýe enutá Jesúsēftaca yojtsemná, chabe espadēja tojanenosēngbotētšena, y chē bachnangbe más uámana amēndayabe oservenábioye canýe matscuaše tbojtsanēštjango.

⁵² As Jesús tbojaniyana: “Espadēja matosēngbuajonýá. Nda espadējaca tbojóba chana, cach espadējaca echanjóbana. ⁵³ ¿Aca ndoñe condětatsēmbo, atše atšbe Taitábioye stjaimpádase, cha cachora atšbiamana nanjichamuá bnētsana utama más ejércitēnga angelotémēngaca? ⁵⁴ Pero chcasna, ¿ndayá Bēngbe Bētsabe uabemana palabrēnguiñe endayancá ntšamo nanjochnēngo? Chiñe endayana ntšamo entsopasancá jochnēnguama canmēna ca.”

⁵⁵ Cachora Jesús entšanga tojanatjá: “¿Ndáyeca šmojabo espadējangaca y ngarotbéngaca atše jishachama, mo atše canýe bacá uamana entšá cuaftsemncá ca? Atše cada te Bēngbe Bētsabe bēts yebnoca tšēngaftangaftaca sēnjántbemana abuátambaye, y choca ndoñe chešmátanishache. ⁵⁶ Pero lempe quem soyēnga chca entsopasana, cachcá chaotsemnama ntšamo Bēngbe Bētsabe uabemana palabrēnguiñe chē Bēngbe Bētsabe juabna oyebuambnayēnga tmojanayancá ca” —Jesús tojánayana.

Cachora nÿetsca uatsjéndayënga tmojtsanëuatjaná y tmojtsanacheta, y Jesús chë uayayëngaftaca cachcá tmojesanonÿá.

Jesús tmojanánatse chë judiëngbe más uámana amëndayëngbioye
(Mc 14.53-65; Lc 22.54-55, 63-71; Jn 18.12-14, 19-24)

⁵⁷ Chë Jesús tmojánishachënga, tmojanánatse, Caifás chë bachnangbe más uámana amëndayabe yebnoye. Chentse chë ley abuátambayënga y chë judiëngbeñe bëtsëjemëngcá amëndayënga tmojánenefjna. ⁵⁸ Pedro bënocana Jesús tbojanasto, chë bachnangbe más uámana amëndayabe chashjóntsoñe; choye tojánamashëngo y chë Bëngbe Bëtsabe bëts yebnoca josticiëngaftaca yojótbema, chca, jtsetatšëmbuama ntšamo yochjopásama.

⁵⁹ Chë bachnangbe amëndayënga, chë bëtsëjemëngcá amëndayënga y ínÿenga judiëngbe amëndayënga imojtsenguaye ndánaca masque uayátsenaye soye Jesusbe contra cháuyanama, as chënga jobenayama cha chaóbana ca jayanama, ⁶⁰ pero ndoñe tmonjáninÿena, masque banga tmojánashjajna Jesusbe contra uayátsenaye soyënga jayanama. Cabana, útata tbojánashjango, ⁶¹ y chata tbojánayana: “Quem boyabása tonjayana canobena Bëngbe Bëtsabe bëts yebna jtsenásatajchcana y nÿe unga tese jtëtsjebuana ca.”

⁶² As chë bachnangbe más uámana amëndayá tojantsá y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

⁶³ Pero Jesús nÿe iytëca yojtsemna. Chíyeca chë bachnangbe más uámana amëndayá tbojanianya: —Bëngbe Bëtsá Ainabe mándoca cbomandá chašcuyana aca ndegombre chë Cristo, chë Bëngbe Bëtsabe Uaquiñá comna o ndoñe ca.

⁶⁴ Chora Jesús tbojanjuá: —Aca ndegombre yomncá tcjayana. Y quem sóynaca cbëyana: Tšëngaftanga šmochanjinÿe, atše, Bëngbe Bëtsá Entšá tbojanbemá, chë nÿets obenana bomnabe catsbioica jtsetbemanana y celoca jantsetëshiñe jtsaboyana ca.

⁶⁵ Chora chë bachnangbe más uámana amëndayá chabe uichëtjonëjuangá yojt-senántšajatanëca, puerte ibojtsetna causa, y tojánayana: —¿Ntšamo quem boyabása tonjoyebuambacá, Bëngbe Bëtsabiana entsemna mo cha cuafjoyenguangcá, chë chabe Uaquiñá yomna ca cha tonjayana ora! ¿Ndayama más entšanga šochjätëjamoto Jesusbe contra chamuayanama? ⁶⁶ ¿Ntšamo šmatjayana ca? —cha tojanatjá.

As chë entšanga tmojanjuá: —Ndegombre cha bëts bacna soye entsebomna; jóbanama bontsemna ca.

⁶⁷ Chora tmojanontsé Jesús juebëbuashëtjnayana, jabuache jantsetayana y ínÿengna imojtsejuëbjantsetaye, ⁶⁸ y imojtsatsësnaye: “Cristo, aca ndegombre Bëngbe Bëtsabe juabna oyebuambnaya tcomnëse, jmomalisiá nda tcmënjajantsetá ca!”

Pedro tojánayana Jesúsbioye ndoñe bonjanabuátma ca
(Mc 14.66-72; Lc 22.55-62; Jn 18.16-18, 25-27)

⁶⁹ Chëntscuana Pédrëna shjoca yojtsemna, chashjoca yojtsetbemana. Chora, canÿe shembása chentša oservená tbojanobobconá y tbojanianya: —Acnaca, Jesús chë Galileocáftaca conjánana ca.

⁷⁰ Pero Pédrëna, nÿetscangbe delante tojánayana chábioye ndoñe bonjanabuátma ca, mëntšá jayanëse: —Ntšamo contsichamcá, ndoñe quešnátësertana ca.

⁷¹ Chora Pedro bësoye yojábocna. Chentšna, inÿe shembása oservená chábioye tbojáninÿe y chë inÿe entšanga tojanëyana: —Cha, Jesús chë Nazaretocáftaca enjánana ca.

⁷² Pedro cachiñe tojánayana ndoñe bonjanabuátma ca, y mëntšá yojtsejúraye: —¿Chë boyabása ndoñe quetsatabuatma ca!

⁷³ Chentšana, chë chentse imojtsemnënga Pédrëbioye tmojanobconá y tmojanianya: —Ndegombre, ácnaca chë uatsjéndayënguentsá condmëna. Chë contsoyebuambnacá contsoyátëmbana ca.

⁷⁴ Chora Pedro tojanontsé ichámuana, Bëngbe Bëtsá chašotsecastigá ndoñe ndegombre soye stsichámese ca; yojtsejúraye y yojtsichamo: —¿Chë boyabása ndoñe quetsatabuatma ca!

Y cachora canye ngallo yojacánta. ⁷⁵ Y Pedro yojenójuaboye ntšamo Jesús tbojanianama. Cha mëntšá tbojanianama: “Cabá ngallo ndécánta ora, aca unga soye cochanjayana ndoñe šconduabuatma ca.” Y chentšana tojésanbocna y corente ngménaca yojtsenóbošachna.

27

Jesús, Pilátbioye tmojanánatse (Mc 15.1; Lc 23.1; Jn 18.28-32)

¹ Tojanbinýna ora, nyetsca chë bachnangbe amëndayënga y judiëngbeñe bëtsëjemëngcá amëndayënga tmojánenefjna jenóyeunayama ntšamo jamëse Jesús chaóbanama. ² As, Jesús tmojanëcuébatsëca y tmojanánatse, y chca, Pilato, chë Judeoca Romano mandadbe cucuatšinë tmojánboshjona.

Ntšamo Judas tojanóbana

³ Judas, chë boshjuaná, Jesús jóbanama ibojtsemnana tojanuena ora, puerte yojtsenócochinýena ntšamo tojánchjanguama, y chë unga bnëtsana ralbenga chë bachnangbe amëndayënga y bëtsëjemëngbioye tojtanamba, ⁴ y mëntšá tojanëyana: —Puerte bacna soye tijama. Atše canye bacna soye ndbomná tšëngaftangbe cucuatšinë tijáboshjona chaóbanama ca.

Pero chënga tmojanjuá: —¿Chë soye ndayá bëngbiana? Cach aca cochátotatsëmbñe ca.

⁵ As Judas chë ralbenga Bëngbe Bëtsabe bëts yebnentše yojesëtsana, y yojá y yojétsentsešaye.

⁶ Chë bachnangbe amëndayëngna chë ralbenga tmojtanatbaná y tmojánayana: —Quem crocenánama buiñe echanjuábuashana; ntšamo leyiñe endayancá, bënga ndoñe quemuátobena chë Bëngbe Bëtsabiama soyënga quëcjnyëtémiñe chana jasegórana ca.

⁷ Chcasna, chënga tmojanenoyeuná, chë crocenánacna chë Alfarerbe Luare ca uabaina fshantse jabuámiyana, y chca, canye luare jtsebomnana ndayentše chë inye luarëngocana entšanga áshjajnënga jutabuantsama. ⁸ Chíyeca, chë fshantse mëntscoñama Buiñe Luare ca iuabaina. ⁹ Chca, tojanochnëngo ntšamo Jeremías, chë Bëngbe Bëtsabe juabna oyebuambnayá, tempscá tojanayancá, ndayá yochjanchnënguama. Chana mëntšá tojánayana: “Y chë unga bnëtsana ralbenga tmonjanca, ntsachetšá chë Israeloca entšanga cha tmojanamanacá, ¹⁰ y chánaca chë Alfarerbe Luare tmonjanbuamé, ntšamo Bëngbe Bëtsá šonjanmandacá ca.”

Jesús Pilatbe delante (Mc 15.2-5; Lc 23.2-5; Jn 18.33-38)

¹¹ Chentšana Jesús, chë mandado Pilátbioye tmojanánatse y cha mëntšá tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

¹² Chë bachnangbe amëndayënga y chë bëtsëjemënga Jesús mal imojtsequédantscuana, cha ndocá ntjojuana. ¹³ Chíyeca Pilato tbojantjá: —¿Ndoñe contsuenana lempe ntšamo acbe contra montsichamcá ca?

¹⁴ Pero Jesús ni canye palabra ndoñe ntjojuana. Chë causa, chë mandado ndoñe yontsetátšëmbo ntšamo jajuaboyana.

Jesús chaóbana ca tmojánayana (Mc 15.6-20; Lc 23.13-25; Jn 18.38-19.16)

¹⁵ Bashco fiesta ora, chë mandado yojanamana canye utamená jëtsboshjonana, nda entšanga tmojuabuayaná. ¹⁶ Chë tempo canye uachuana utamená inamna, Jesús

Barrabás ca uabainá. ¹⁷ Nýetsca entsanga chentše imojtsemna ora, Pilato tojanatjá: “¿Tšëngaftanga nda šmojtseboše atše chjëtshjonama, Jesús Barrabás o Jesús, chë Cristo ca monduabobuatmá ca?”

¹⁸ Er chë mandado yojtsetátšëmbo, entsangna envidia causa Jesús chabe cucuatšiñe tmojánboshjonama.

¹⁹ Pilato chë tribunal ca uabáinentše yojtsetbemanëntscuana, chabe shema canya tbojanichmó mëntšá cha jauyanama: “Chë nýetsca soyënguiñe tšabá ama entsábioye ndocá matsborlánana; chabe causa ibeta otjénayoca puerte sënjasufrí ca.”

²⁰ Pero chë bachnangbe amëndayënga y chë bëtsëjëmënga entsanga tmojanayënjaná, Barrabás jëtshjonama y Jesús chaóbana ca chamuayanama. ²¹ Chora chë mandado cachiñe tojanatjá: —¿Chë útatentsana nda šmojtseboše atše chjëtshjonama ca?

Y chënga tmojánayana: —¡Barrabás ca!

²² Pilato tojanatjá: —¿As, ndayá Jesús, chë Cristo ca uabobuatmáftaca atše chjama ca?

Y nýetscanga tmojanjuá: —¡Motsecrucificá ca!

²³ Chora Pilato tojtëtanatjá: —¿Ndáyeca? ¿Ntšamo cha tojobuachjanguá ca?

Pero chënga cachiñe tmojanáyebuachena: —¡Motsecrucificá ca!

²⁴ Ndocá jamama yontsobenama y entsanga más jabuache enbouenanama tmojanontšema Pilato tojáninýe ora, cha tojanmandá búyeshe juabuíyëboñana y nýetscangbe delante yojtsenacuentšabiá. Mëntšá tojánayana: —Atše ndocá chiyátayana, ni chiyatsma quem boyabása chaóbanama. Tšëngaftanga lempe šmonjama ca.

²⁵ Chora nýetsca entsanga tmojanjuá: —¡Quemuá yochjóbanama, bënga y bëngbe básengbiama castigo chaotsemna ca!

²⁶ As Pilato, Barrabás tbojtanboshjona; tojanmandá soldadënga Jesús jabuache chamotsetsetšenama y chentšana entsangbe cucuatšiñe tbojánboshjona chamocrucificama.

²⁷ Chentšana, chë mandadbe soldadënga Jesús tmojanánatse chë mandadbe bëts yebnentša chashjoye y choca nýetsca soldadënga chabe shëconana tmojanójoto. ²⁸ Chorna, entsáyá tmojtsanabotsca y shbuenda uafjatsenga entsáyá mo reycá tmojanichëtjo.

²⁹ Canýe coronësha tmojanapormá uchmašëfjangaca y tmojanabestšajó, y catšbioica cucuatšiñe canýe niñëfja. Chorna, chabe shecuatšentše imojtsofshëntsamëntšenaye y imojtsáboyejuana. Mëntšá imojtsichamo: “¡Bayté judiëngbe Rey cochtsemna ca!”

³⁰ Chëngnaca imojtsanbuashëtjnaye y cach niñëfjaca bestšašentše imojtsëtsjanjnaye.

³¹ Y chca imnaftsáboyejuanentšana, chë shbuenda uafjatsenga entsáyá tmojtsanabotsca y cachabe entsáyá tmojtanichëtjo, y chora, jacrucificama tmojanánatse.

Jesús tmojanrucificá

(Mc 15.21-32; Lc 23.26-43; Jn 19.17-27)

³² Chë entsanga chentšana tmojánbocana ora, tmojánenbetše canýe bacóftaca, Simón ca uabainá, Cirene pueblócá. As, cha tmojanmandá Jesusbe cruz chauetsocutsama.

³³ Canýe luare Gólgota ca uabáinoca tmojánashjajna ora (hebreo biyañe chca endayana “Obanabe Bestšashe Luare ca”), ³⁴ Jesúsbioye vínoye hiéloyeca enájuañniye tmojanabuiyë chaofšema; pero yojaftántia y ndoñe yonjábosena chiye jofšiyama.

³⁵ Ya tmojanrucificá orna, chë soldadënga Jesusbe entsáyamna, tsbanánoye tmojanëtšena, chca, jtsetatšëmbuama ndabiama yochjanáquedama. ³⁶ Y chora chënga chentše tmojanotbiamá Jesús jtsebojanýama. ³⁷ Y chabe bestšaše juatsboicna canýe uabemana soye tmojananjo. Chiñe yojétsayana ndáyeca cha tmojanrucificama, mëntšá: MUA JESÚS ENDMËNA, CHË JUDIËNGBE REY ca.

³⁸ Utata bacna soye ochjajnayátnaca chënga chentše tmojanrucificá, canýa Jesusbe catšbioica y chë ínýana chabe uañicuayoica. ³⁹ Y chëjana imojtsachñëjuana entsangna, Jesús imojtsóyenguaye, imojtsobestšfshanenaye ⁴⁰ y imojtsatsaye: “¡Aca chë icobena

Bëngbe Bëtsabe bëts yebna jtsenásatajhcana y nÿe unga tese jëtsjebuana, cach aca ments-bocá! ¡Ndegombre Bëngbe Bëtsabe Uaquiñá tcomnëse, chë cruzocana matastjango ca!”

⁴¹ Chë bachnangbe amëndayënga, ley abuátambayënga y chë judiëngbeñe bëtsëjemëngcá mándayënga cachcá imojtsóyenguaye. Mëntsá imojtsichamo: ⁴² “Cha ínÿenga tojëftsatsëbacá, pero cachá jéntsibocama ndoñe quenátobena. Cha Israeloca entsangbe Rey tojtsemnëse, chë cruzocana chauatastjango, y chca, bënga chábeñe fchtsošbuáchiye. ⁴³ Cha tojayana Bëngbe Bëtsábeñe puerte yojtsošbuaché ca. ¡Mora Bëngbe Bëtsá chabuatsbocá, cha ndegombre muábioye tbobobonshánësel, er cha tonjánayana Bëngbe Bëtsabe Uaquiñá canmëna ca” —chënga imojtsichamo.

⁴⁴ Y chë bacna soye ochjajnayata, Jesúseftaca ibojtsecrucificanátnaca cachcá ibojtsóyenguaye.

Jesús tojanóbana

(Mc 15.33-41; Lc 23.44-49; Jn 19.28-30)

⁴⁵ Nÿetsto orscana las tresëntscoñe, nÿets quem luare yojtseibétata. ⁴⁶ Chca orna, Jesús chabe biyañe tojanáyebuachena: “Elí, Elí, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonýá ca?”)

⁴⁷ Chca tmojanuena ora, báseftanga chentše imojtsemna entsanguentshana imojtsichamo: “Cha Elías, chë Bëngbe Bëtsabe juabna oyebuambnayá, bontsechembuana ca.”

⁴⁸ As chora, chentša canýa tojëftsánótjajo canýe esponjëshe janguanguama, untja vínoyeca chëshe tojanfchecuacuá, canýe niñëfjiñe tojananguësëtjo y Jesúsbioye tojanbeconá chaofšema. ⁴⁹ Pero ínÿengna tmojánayana: “Cachcá mochjonýaye, er Elías tayochjabo jabátsbocama ca.”

⁵⁰ Pero Jesús cachiñe jabuache tojanoyó y tojanóbana. ⁵¹ Y cachora, Bëngbe Bëngbe Bëtsabe bëts yebnoca yojújonýana entsëjua tsëntsaca yojtsenájataye, tsbanánocana fshantsoye. Chëjua bënëjua inauamna y chë tsatsëntsaca inaujonýana. Fshantse yojuangmëmana, ndëtsbenga yojtsashtëtsana, ⁵² y chë cuevëshënga obanëngaca yojtsëtëfjo y banga Bëngbe Bëtsabe entsanga tmojtanayena. ⁵³ Y chënga, Jesús tojtanayenentsana, chë cuevëshënguentshana tmojánbocana, y Jerusalén, chë uámana bëts pueblo ca uabáinoye tmojánamashjna y ba entsángbioye tmojánebëbuacana.

⁵⁴ Chë soldadëngbe amëndayá y chë ínÿenga, Jesús jtsebojanýama cháftaca tmojanoquedanga, chë fshantse yojuangmëmanama tmojáninýe ora, y nÿetsca chë yojtsëchnëjuana soyëngama, puerte auatjanánënga imojtsemna y tmojánayana: “¡Ndegombre quem boyabása Bëngbe Bëtsabe Uaquiñá yomna ca!”

⁵⁵ Ba shembásengnaca chentše imojtsemna y bënëcana imojtserreparana. Chëngna, Galileocana Jesús tmojanasto y cha imojanájabuachana. ⁵⁶ Chë shembásengbeñe imojtsemna María Magdalena; María, Santiago y Josebe mamá; y Zebedeobe uaquiñatbe mamá.

Jesús tmojanatbontsá

(Mc 15.42-47; Lc 23.50-56; Jn 19.38-42)

⁵⁷ Ya yojtseibétatana ora, canýe bomna boyabása, José ca uabainá, tojánashjango. Cha inamna Arimatea luarocá y Jesusbe ustoná. ⁵⁸ José tojána Pilato jinýama, Jesusbe cuerpo jotjañama. As Pilato tojanmandá chë cuerpo chamontšabuáchema. ⁵⁹ José chë cuerpo tojanca y canýe nduatsenga lino entsëjuaca tbojanandmaná. ⁶⁰ Y canýe chabe tsëm cuevëshiñe tbojanajó. Tempo cha inamánda chë cuevëshna ndëtsbenguiñe chamopormama. Canýe bëts ndëtsbé tojansjoná y chë cuevëshoye amashjuanentše tojánachto; y chentšana José yojtsatoñe. ⁶¹ Pero María Magdalena y chë inýe Mariyna chentše tbojtsanoquedañe y chë cuevëshe ndirichiñe tbojanótbema.

Soldadënga tmojána Jesús yojtsatbontsánentše jtsebojanýama

⁶² Yëfsana, chë ochnayté, chë bachnangbe amëndayënga y chë fariseunga cányiñe tmojána Pilato jinýama. ⁶³ Tmojaniana: —Taita, bënga fsëntsejuabná ntšamo chë bostero cabá ainá ora tonjánayanama, chë unga tianoye cha jtayenama ca. ⁶⁴ Chíyeca, momandá chë cuevëshe soldadënga chamotsashanjá unga tentscuana. Chca, chabe uatsjëndayënga ndoñe ibeta chamondabo chabe cuerpo jabétsatbëbama, y chentšana chënga entšanga chamúyana, Jesús tojtayena ca. Y chca, chabiamma quem ústonoye bostero soye, chë cachabiamma tojánayana soyëngama puerte más bacá nántsemna ca —chënga tmojaniana.

⁶⁵ As Pilato tojanéyana: —Tšëngaftanga cach tšëngaftangbiamma soldadënga šmondábamna. Motsajna y chë cuevëshe cuedádoca šmochtsashanjá, ntšamo šmondëtatšëmbcá ca.

⁶⁶ Chora chënga tmojána chë cuevëshe jtsashanjá; chë ndëtšbena, tsengájaseca imojuinýnaná, ntsotatšëmbcá ndocná choye chaondámashënguama, y soldadënga chentšë tmojëftsanashejuana.

28

Jesús tojtanyena

(Mc 16.1-8; Lc 24.1-12; Jn 20.1-10)

¹ Ochneyté chentšana, chë inýe semana bojatsenté yojtsebínýana ora, María Magdalena y chë inýe María tbojána cuevëshoye jarrepárama. ² Ndeolpe fshantse tojanangmëmana, er Bëngbe Bëtsabe canýe ángel celocana tojántasma, chë cuevëshoye tojanobeconá, chë atamiana ndëtšbé tojtsanjuaná y chiñe tojanótbema. ³ Chë ángelna mo canýe tcuinýejcá yojtsebuashinýinýana, y chabe uichëtjonëjuangá uafjantsëjuangá mo jantšetëshcá yojtsamna. ⁴ Chë soldadënga chca tmojáninýe ora, de auatja yojtsangmëmnaye y mo obanëngcá imojtsemna.

⁵ Chora chë ángel chë shembásatbioye tojanéyana: “Ndoñe batauatjana. Atšë sëntsetatšëmbo tšëngaftanga Jesús, chë tmonjancrucificá cha šmojtsenguama. ⁶ Cha muentšë ndoñe quenátsmëna; cha tontayena, ntšamo cachá tonjanayancá. Mabata y šochjinýe cha endëtsesegoranentšë. ⁷ Betsco motsata y chë uatsjëndayënga šochjáuyana: ‘Jesús tontayena y tšëngaftangbe natsana Galileoye echanjá; choca šmochanjinýe ca.’ ” Y chora cha tojánayana: “Chca šondmëna tšëngaftanga jauyanana ca.”

⁸ Cachora chë shembásata chë cuevëshentšana tbojésanbocna, auatjanánata pero puerte oyejuayata, y tbojëftsannotjajo chë soye chë uatsjëndayëngbeñe jobuambayama. ⁹ Y ndeolpe Jesús chata tojánebëbuacna y tojanacheuá. Chatna, chábioye tbojanobëconata, tbojtanadorata y chabe shecuatšë shëconana imojtobojcjuá. ¹⁰ Y Jesús tojanéyana: “Ndoñe batauatjana. Motsata atšbe uatsjëndayënga, atšbe catšátanga jáuyanama Galileoye chamotsá y choca atšë šmochjinýe ca.”

Ntšamo chë soldadënga tmojánayana ndayá tojanochñënguama

¹¹ Chë shembásata ibojtsayëntscuana, básefta soldadënga chë bëts puebloye tmojána y ntšamo tojanopasacá lempe chë bachnangbe amëndayëngbeñe tmojanobuambá. ¹² As chë bachnangbe amëndayënga, chë judiëngbeñe bëtsëjemëngcá mandayëngaftaca tmojánenefjna jenóyeunayama. Chëngna chë soldadëngbioye bëtscá crocénana tmojtanatšatá, ¹³ y mëntšá tmojanabuayená: “Tšëngaftanga šmochjayana, ibeta šmotsomáñëntscuana, Jesusbe uatsjëndayënga tmojabo y chabe cuerpo tmojabétsatbëba ca. ¹⁴ Y chë mandado chë soyama chaojátatšëmbonëse, bënga lempe cháftaca fchjenóyeunaye, chca, tšëngaftangaftaca ndocá chaondopasama ca” —chënga tmojanéyana.

¹⁵ As chë soldadënga chë crocénana tmojanóyëngacñe y tmojanma ntšamo chë mándayënga tmojanabuayenacá. Ba entšanga chë cuento tmojanuena y mëntscóñama judiënga cachcá mondbëtsichamo.

Jesús chë uatsjédayënga tojanichamó, Bëngbe Bëtsabe soyëngama nyetsquénache jábuayenama

(Mc 16.14-18; Lc 24.36-49; Jn 20.19-23)

¹⁶ Chentšana, chë bnětsana canýe uatsjédayënga Galileoye tmojána, chë ndēmua tjoye Jesús chënga tojanabuayená choye. ¹⁷ Y Jesús tmojáninýe ora, tmojtanadorá. Pero báseftangna imojétsejuabnaye nderado cha ndoñe Jesús yontsemna ca. ¹⁸ Jesús chëngbioye tojanobeconá y tojaněyana: “Bëngbe Bětsá nyets mando atše šonjatšetá celoca y quem luarentše. ¹⁹ Chcasna, motsajna, nyets luarënguenache oyenënga atšbe uatsjédayënga šmochjábiamá. Entšanga šmochjubaye atšbe Taitá, atše chabe Uaquiñá y chë Uámana Espíritbe uabaina jayaněse, átšbeñe šmošbuachéyeca, ²⁰ y šmochjabuatambá lempe ntšamo atše tchojamëndacá chënga chamóyeunama. Y ndegombre atše nyets tempo tšëngaftangaftaca chanjěftsemna, quem luare jopochócantscuana ca” —Jesús tojaněyana.

San Marcos

Juan chë Ubayaná entsanga yojanabuayiyná

(Mt 3.1-12; Lc 3.1-9, 15-17; Jn 1.19-28)

¹ Měntsá tojanoboatsé chë tsabe noticiēnga Běngbe Bětsabe Uaquiñá Jesucristbiamá.

² Ntsamo bayté entsemna, chë Běngbe Bětsabe juabna oyebuambnayá Isaías chabe librěsañe yojěftsayancá, ntsamo Běngbe Bětsá chabe Uaquiñábioye ibojauyanama cha tojanábema ora:

Minye, atšbe abuyiynayá acbe natsana sěntsichamná, chë aca jabama lempe echanjaprónta cha.

³ Entsanga ndoyena luaroca cha enduáyebuache měntsá:

“Běngbe Utabná echanjabo ca;

mo nda canye benache tojtseprontacá canye uámana entsá jashjanguama,

cachcá tsěngaftanga, cha jabama ainaniñe tsabe juabněngaca šmochtseprontana ca” — cha tojanábema.

⁴ Chcase, Běngbe Bětsá Juan tbojanichmó, y cha tojánbocna entsanga ndoyena luaroca, Běngbe Bětsabe soyěngama abuyiynaye y entsanga ubáyana. Cha entsanga yojanětsěsnaye: “Tsěngaftangbe bacna soyěngama ngmėnaca šmochtenójuaboye, chca amana šochtsajbaná, y Běngbe Bětsabe benache šmochtishache. Chora cbochjúbaye, y Běngbe Bětsá tsěngaftangbe bacna soyěngama cmochanjáperdonaye ca.” ⁵ Njěts Judea luarocana chábioye entsanga imojánbocana, y Jerusalenentsana njětsca entságnaca, y Běngbe Bětsábioye chěngbe bacna soyěngama jaimpáda chentsana, Juan Jordán ca uabaina bėjayiñe chěnga yojanėbáyana.

⁶ Juanbe entsáyá inauapormana camellbe stjėnasheca y bobache yojanasnana; chapulinatémėnga y tjañe méloye inasaye. ⁷ Y měntsá entsanga yojanětsěsnaye: “Atšbe ústonoye inya echanjabo, atšbiamá más obenana bomná; chíyeca atše mercedo taitstato-buajoñe, ni mo jotsejbiyana chabe shecochětjoněshentsa corriėja jajafjonama. ⁸ Atsna búyeshca cbondėubáyana, pero chë echanjabábeyecna, Běngbe Bětsá bochanjíchmuá chë Uámana Espíritu tsěngaftangbe ainaniñe cháuamashėnguama ca.”

Juan, Jesúsbioye tbojanabaye

(Mt 3.13-17; Lc 3.21-22)

⁹ Chë tempo, Galilea luarocana Nazaret pueblentsana Jesús yojěftsebozna, y Juan yojtsemnoye tojána; y Jordán bėjayiñe Jesúsbioye cha tbojanabaye. ¹⁰ Bejajoicana yojtashėbėbozna orna, tojáninye celoca atěfjniñe, y chë Uámana Espíritu chábioye mo palomatemcá yojtsastjajuana. ¹¹ Y celocana Běngbe Bětsá měntsá tbojanianyana: “Acna atšbe bonshana Uaquiñá condmėna; acbiamá corente sěntsoyejuá ca.”

Jesús tojanobená Satanás jayėnjanama

(Mt 4.1-11; Lc 4.1-13)

¹² Chentsana chë Uámana Espíritu Jesúsbioye entsanga ndoyena luaroye tbojanánatse. ¹³ Canta bnětsana te chë entsanga ndoyena luaroca tbojanjėtana, y Satanasna yojanabó jisháchichiyama. Chë luarentše tsátjaye bayėnga imnajena; chentsana, Běngbe Bětsabe angelėnga cha imojtseservena.

Jesús tojanontsé Galileoca chabe trabajo jamana

(Mt 4.12-17; Lc 4.14-15)

¹⁴ Juan cárceloye tmojanėtámentsana, Jesús Galileoye tojesaná; y chiñe cha yojanabuayiyná chë tsabe noticiēnga Běngbe Bětsabiamá. ¹⁵ Jesús entsanga yojanětsěsnaye: “Ora tocjobuache, Běngbe Bětsabe amėndayana echanjóshjango. Tsěngaftangbe bacna

soyëngama ngménaca šmochtenójuaboye, y chca amana šmochtsajbaná y Bëngbe Bëtsabe benache šmochtishache; y ainaniñe chë tšabe noticiënga Bëngbe Bëtsabiana šmochjóyëngacñe ca.”

Jesús tojánachembo canta boyabásenga beonga ashebuánayënga cha chamuastama
(Mt 4.18-22; Lc 5.1-11)

¹⁶ Galilea uafjajónaye tsachajana Jesús yojtsaye ora, cha tojánanýe Simón y chabe uabentsá Andrés; chatna atarraiešhangá ibnetsashbuétsetšañe, er beonga ashebuánayata chata ibnamna. ¹⁷ Chora Jesús tojanëyana: “Atšeftaca mabata. Atše cbochanjábiama Bëngbe Bëtsabiana entšanga anguayata; y morscana, nýe beonga ashebuánayata ndoñe quešochátsmëna ca.”

¹⁸ Y cachora chatbe atarraiešhangá cachcá tbojésanaboshjuana y Jesús tmojanasto.

¹⁹ Más chcoye yojátaye orna, Jesús tojánanýe Santiago y chabe uabentsá Juan, Zebedeobe uaquiñata; chatna barquëshañe ibnetsotbemañe, chatbe atarraiešhangá atapórmayñe. ²⁰ Chora Jesús chë útata tojánachembo; as chatna, chatbe taitá Zebedeo chë barquëshañe tmojésanboshjona chabe peóngaftaca y Jesús seftaca tbojtsanoñe.

Jesús, bacna bayëjbe juabna cánýabioye tbojanbojuaná
(Lc 4.31-37)

²¹ Chentšana, Jesús y chabe uatsjéndayënga Capernaum ca uabaina puebloca tmojánashajna. Chë ochnayté, Jesús chë judiëngbe enefjuana yebnentše tojánamashëngo y yojóntša entšanga jabuátambama. ²² Entšanga imojtsenjnanaye ntšamo Jesús yojtsabuatambacá, er chama mo canýe mando bomnacá yojtsóyebuambnaye, ndoñe nýe ntšamo Moisesbe ley abuátambayënga imojanabuatambacá. ²³ Chë pueblentše judiëngbe enefjuana yebnentše yojtsemna canýe entšá bacna bayëja uambayá, y chábeyeca chë boyabása yojóntša mëntšá uayebuáchana: ²⁴—¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atše sëndétatsëmbo nda aca comnama, aca chë Bëngbe Bëtsabe Uamaná ca.

²⁵ Chora Jesús chë bayëjbioye tbojtsanácacana, y tbojanianyana: —¡lytëca móbema y chábentšana maisebocna ca!

²⁶ Chora chë bacna bayëjna tojanma chë boyabása ataque chaboshachama, jabuache tojanoyó y chábentšana tojésanbocna. ²⁷ Chama, nýetsca entšanga ojnánanënga imojtsemna, y mëntšá imojtsentjanaye: “¿Ndayá chca yojtsemna? ¿Canýe tsëm buatëmbana soye? ¡Quem boyabása mando bomnacá y obenacá entsabuatambá, y chca, chë bayëjenga cha jtsamëndayana y chëngnaca joyeunayana ca!”

²⁸ Y betscó nýets Galilea luarentša pueblënguenache Jesusbiana yojtsótatsëmbo.

Jesús, Simón Pédrëbe uambén mamábioye tbojanšná
(Mt 8.14-15; Lc 4.38-39)

²⁹ Chentšana, chë enefjuana yebnentšana tmojánbocana y Santiago y Juánoftaca Jesús tojána, Simón y Andresbe yebnoye. ³⁰ Simonbe uambén mamá šocá inajájona, jabuache calentóraca, y Jesúsbioye chë šocabiama tmojanianyana. ³¹ As chora, Jesús tojanobconá, chë šocábioye tbojanábuacuešhache y tbojanatsbaná. Cachora chë calentora tbojtsanóbojuanañe; y cachora cha tojtantsbaná y tojanontsé chënga jobuácuedana.

Jesús ba šoquënga tojanashná
(Mt 8.16-17; Lc 4.40-41)

³² Chë te jetiñe, shinýe ya yojuenatjëmbe ora, chë luarentša nýetsca šoquënga y bacna bayëjenga uambayënga Jesúsbioye tmojanënatse; ³³ y nýetsca entšanga bësoye imojobeconá. ³⁴ Jesús banga tojanashná, nýetsca šocana bomnënga, y ba bacna bayëjenga entšanguentšana tojtanëbuacna; y ndoñe tonjanalesenciá chë bayëjenga chamóyebuambama, er chënga imnatátsëmbo cha chë Cristo bëtsemnama.

*Chë judiëngbe enefjuana yebnënguenache Bëngbe Bëtsabe soyëngama Jesús yojanabuayiyá
(Lc 4.42-44)*

³⁵ Yëfsana cabá cachëse, cabá ibetcá, Jesús tojëftsantsbaná, chë pueblentsana tojëftsanbocna y entsanga ndoyena luaroye tojtsanoñe, choca Bëngbe Bëtsáftaca jencuéntama. ³⁶ Pero Simón y chabe enutëngna tmojána jetsenguanguama; ³⁷ y tmojtsaninýena ora tmojanianyana: —Nýetscanga cmontsenguá ca.

³⁸ Y Jesús tojanéyana: —Inýoye cuajna, cam béconana pueblëngoye, chíñnaca Bëngbe Bëtsabe soyëngama entsanga chayábuayenama; er chama atše sënjabo ca.

³⁹ Y chentsana, Jesús yojánana Bëngbe Bëtsabiamama entsanga abuayiyenaye chë judiëngbe enefjuana yebnënguenache, nýets Galileiñe, y entsángbentsana bacna bayëjënga yojtëbuacana.

*Jesús, canya bacna nguayanánaca šocábioye tbojanshná
(Mt 8.1-4; Lc 5.12-16)*

⁴⁰ Chentsana, canye boyabása bacna nguayanánaca šocá Jesúsbioye tojanobeconá; y joshaméntšase mëntšá tbojanimpadá: —Aca tcojtsebošëse, aca catjobenaye atšbe šocana jtsebojuánama ca.

⁴¹ Jesús chabiamama tbojanongmé; cucuátšeca tbojánbojajo y tbojanianyana: —Aíñe sëntseboše. ¡šocana cbotsebojuaná ca!

⁴² Y cachora chë šocana tbojtsanóbojuanañe y tšabá yojtsatsmëna. ⁴³ Chora Jesús chábioye tbojtanicmó, pero puerte mëntšá tbojanmandá: ⁴⁴ —Mouena; ndocnábeñe quem soye cattsecuéntaye; nýe Jerusalenoca báchnëbioye motsa y cha cochjinýinýiye aca mora ya tšabá cojtsatsmënama. Chora cochjuátšëmbona ntšamo Moisés chabe leyiñe tojanmandacá, Bëngbe Bëtsábioye chama jëtschuayama, chca, nýetsca entsanga chamotatšëmbona mora ya tšabá cojtsatsmënama ca.

⁴⁵ Pero chë boyabásana, chentsana tojëftsanbocna y cachora yojóntša nýetsquénache entsanga yapa acúntayana Jesús tbojanshnama. Chë causa, Jesús ndoñe yontsobena entsangbe delante pueblënguenache jtsanana, ndayá nýe chë pueblënga béconana y nýetsca chë entsanga ndoyena luarënguiñe yojánana; pero nýets luarëngocana chábioye entsanga imojánashjajuana.

2

*Jesús, canye jama ndobenábioye tbojanshná
(Mt 9.1-8; Lc 5.17-26)*

¹ Chentsana, Jesús Capernaumoye tojtashjango; y entsanga imojátatšëmbona, Jesús yebnentše yojtsatsmënama. ² Mallajta entsanga chentše tmojanójoto; chë causa chë yebnentše ya tondaye más luare entsangbiamama yontsemna, ni mo chë amashjuanentše, y Jesús Bëngbe Bëtsabe soyëngama yojtsabuayiyenaye. ³ Chora tojanopasá, canta boyabásenga tmojánashjango, canye entsá jama ndobená imojtsaismana. ⁴ Pero ndoñe tmonjanobená Jesús yojtsemnoye cha juambana, tša entsanga causa. Chcasna, chë canta boyabásenga yebna tsbanánoca, Jesusbe tatsëtsoca batšá tmojánatëfjo y chëjana chë jama ndobená tjuashiñe tmojanëstjango. ⁵ Jesús tojáninýe chënga tša imojtsošbuaché chë šocá jáshnama cha yojanobenama; as chë jama ndobenábioye tbojanianyana: “Sobreno, mouena; acbe bacna soyënga tcbontsebojperdoná ca.”

⁶ Chentše báseftanga judiëngbe ley abuátambayënga imnatbemana; chënga chora mëntšá imojtsejuabnaye: ⁷ “¿Ntšámoyeca quem boyabása chca yojtsichamo? Jesús ndoñe tšabá Bëngbe Bëtsabiamama quenátichamo; mo chábioye cuafjoyenguangcá entsemna. Ndocna entsá quenátobena ínýabioye bacna soyëngama japerdónana; nýe Bëngbe Bëtsana aíñe ca.”

⁸ Pero Jesús cachora lempe yojtsetátšëmbo ntšamo chënga ainanoca imojtsejuabnacá; as tojanéyana: “¿Ndáyeca chca tšëngaftanga ainaniñe šmojtsejuabná? ⁹ ¿Tšëngaftangbiamama

ndayá más paselo nántsemna tšëngaftangbe delante chë jama ndobenábioye atše jauyanana: ‘Acbe bacna soyënga tcbontseboperdoná’, o ‘Matëtsbaná, acbe tjuashe mesocñe y motsa ca?’ ¹⁰ Y chca, mora atše cbochanjínÿanÿiye Bëngbe Bëtsá Entšá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

Y chë jama ndobenábioye tbojanianana: ¹¹ “Atše cbëyana, matëtsbaná, acbe tjuashe mesocñe y acbe yebnoye motsatoñe ca.”

¹² Cachora chë jama ndobená tojtantsbaná, chabe tjuashe yojescocñe, y entšangbiajana chentsana yojésebecna. Chama nÿetsca entšanga imojenjnaná y Bëngbe Bëtsábioye imojtsatschuanaye, y mëntsá imojtsichamo: “Nÿa ndocna te tša bëts soye chemuáisinÿe ca.”

Jesús, Levíbioye tbojanchembo chabuastama
(Mt 9.9-13; Lc 5.27-32)

¹³ Chentsana, Jesús cachiñe chë uafjajónaye tsachoye tojesaná; ba entšanga chábioye imojobeconá, y Jesús yojtsabuátambaye. ¹⁴ Chentsana yojtsataye orna, Jesús tbojáninÿe Levíbioye, Alfeobe uaqiñá, yojtsanotbemañe, entšanga impuesto atjanayacá inétsotrabañe. Chora Jesús tbojanianana: “Smasto ca.”

Y Leví tojantsbaná y tbojanasto.

¹⁵ Tojanopasá, Jesús Levibe yebnentše yojtsesaye, y banga Romocama entšanga impuesto atjanayënga y inÿe bacna entšanga, mesëshentše cánÿiñe imojtsetbiámana, Jesús y chabe uatsjëndayëngaftaca; er ba entšanga cha imojústona. ¹⁶ Chë fariseunga y chë ley abuátambayënga, chë entšángaftaca Jesús yojtsesama tmojáninÿe ora, chabe uatsjëndayëngbioye tmojanatjá: —¿Ndáyeca tšëngaftangbe buatëmbayá, entšanga impuesto atjanayëngaftaca y bacna soye amëngaftaca yojtsesá ca?

¹⁷ Jesús chca tojanuena; as mëntsá tojanëjua: —Chë salud tmotsobomñënga, ashnayá ndoñe ntsëjabótana, pero chë šoquënga aíñe. Y atše ndoñe chiyátabo chë Bëngbe Bëtsabe bominiñe tšabá amënga jabáchembuama, ndayá chë bacna soye amënga imomna ca juabnayënga átšbioye jabáchembuama ca.

Jesús tmojanatjá chë Bëngbe Bëtsáftaca jencuëntama tondaye saytescama
(Mt 9.14-17; Lc 5.33-39)

¹⁸ Canÿe, Juan chë Ubayanabe ústonënga y chë fariseungbe usetonënga, Bëngbe Bëtsáftaca jencuëntama tondaye ntjascá imojtsemna ora, básefta entšanga Jesúsbioye tmojanobeconá y mëntsá tmojanianana: —Juanbe ústonënga y chë fariseungbe usetonënga monduamana tondaye ntjascá jtsemnana Bëngbe Bëtsáftaca jencuëntama. ¿Ndáyeca acbe uatsjëndayënga ndoñe chca ca?

¹⁹ As Jesús tojanëjua: —Chë casamento fiestentše, chë ófjanënga saná ndoñe ntsabuáshebenana. ¿Ntsámo chca ndoñe nántsemna? Chë tojobouamá entšá chëngaftaca tojtsemnëntscuana, chë ófjanënga bëtská jasana y cháftaca oyejuayënga jtsemnana. ²⁰ Pero ora echanjobuache y chë boyabása chëngbentšana mochantsánatseñe; chora cocayé chë ófjanënga echántsamna tondaye ntjascá jtsemnana. Ntsámo chë tojobouamá boyabása y chë ofjanëngaftaca endmëncá, cachcá endmëna atše y atšbe uatsjëndayëngaftacnaca.

²¹ “Ndocná, canÿe tanguá entšayá, base tsëm entšëjuaca jtarmëndana; chca tcojamëse, chë tsëm entšëjua jtsabéconana y chë tanguá entšayá más jtsatanëcanana, y chca, chë uátanëcniñe más bëtsiñe jtsabemana. ²² Y cach ndoñe, chë tojtseshayana vínoye tanguá jasabenguiñe ntjataftsuámayana; er chë jasabenga jtseshëbéfjuana y chë vínoye jtsabuáshanana, y chë vínoye y chë jasabenga tondayama ntjatoservënanana. Chíyeca comna, chë tojtseshayana vínoyna tsëm jasabenguiñe juaftsuámana; chca, chë jasabenga y chë vínoye josérviana ca” —Jesús tojánayana.

Jesube uatsjëndayënga canÿe ochnayté trigo tmojanátabebe
(Mt 12.1-8; Lc 6.1-5)

²³ Canÿe ochnayté, Jesús canÿe jajajana yojtsaye; y chabe uatsjéndayënga chëjana imojtsachñëjuana ora, tmojanontsé trigo juatabebiana. ²⁴ Chë fariseunga chca imojinÿe ora, Jesúsbiöye tmojanianyana: —Minÿe. ¿Ntšamo acbe uatsjéndayënga montsamcá, ndoñe quenátslesenciana ochnayté jtsamama ca?

²⁵ Pero cha tojanëjua: —¿Ndoñe šmëndualía y šmondëtatšëmbo ntšamo Rey David y chabe enutënga tmojanmama shëntseca imojtsemna ora y jasama yojtsëjaboto ora? ²⁶ Chca ora, Abiatar chë judiëngbe bachnangbe más uámana amëndayá inamna ora, David Bëngbe Bëtsabe yebnoye yojámashëngo, y chë luarentše Bëngbe Bëtsá yojamnama inÿinÿnaye tandëšënga yojase; y chë cháftaca imojánajna entšágnaca yojátšataye. Y chë tandëšna nÿe bachnangbiama belesenciana jasama. Masque David chca tojanma, Bëngbe Bëtsá ndoñe tonjánayana David canÿe bacna soye tojanma ca.

²⁷ Y Jesús más tojánayana: —Bëngbe Bëtsá ochnayté entšabiama tojama y entšá ndoñe tbojánbema nÿe chë ochnayté ndoñe chaondëtrabajama. ²⁸ Chíyeca, Bëngbe Bëtsá Entšá tbojanbemá, ndayá entšá ochnayté tojtsama sóynaca jtsemándayana ca.

3

Chë buashana cucuatše bomna entšá (Mt 12.9-14; Lc 6.6-11)

¹ Chentšana, Jesús cachiñe chë judiëngbe enefjuana yebnoye tojésanamashëngo; y chentše canÿe boyabása yojtsemna, buashana cucuatše bomná. ² Chë fariseunga chiñe imojtserrondana jinÿama nderado Jesús chë ochnayté chábioye tabuanjashnama, as chca chënga jtsebomnama ndaye sóyeca cha mal jaquédana. ³ Chora Jesús chë buashana cucuatše bomnábioye tbojanianyana: —Chentše, entšangbe delante motsa ca.

⁴ Y chë fariseunga tojanatjá: —¿Ndayá yojtselesenciana ochnayté jamama, tšabe soye o ndoñe tšabe soye? ¿Jatsbocama o jtsepochócama ca?

Pero chënga ndocá tmonjanjuá, nÿe iytëca imojobiama. ⁵ Chora Jesús rábiaca y ngménaca chë fariseunga tojanënÿanÿé, chënga ainaniñe josértama ndoñe montseboše causa; y chë buashana cucuatše bomnábioye tbojanianyana: —Macuenÿanëjaná ca.

As chë boyabása tojanacuenÿanëjaná, y chora tšabá chëtša yojtsatamna cach inÿetšacá. ⁶ Pero chë fariseungna, chentšana tmojésanbocana ora, Rey Heródesbe ustonëngaftaca tmojanenoyeuná Jesusbe contra, y tmojanontsé juabnayana ntšamo jamëse Jesús jóbama.

Mallajta entšanga Jesúsbiöye tmojanobeconá

⁷ Chentšana, Jesús chabe uatsjéndayëngaftaca tojanoluaré mar béjaye tsachoye, y Galileocana bëtscá entšanga tmojanasto. ⁸ Inÿe entšágnaca chábioye tmojanobeconá Judeocana, Jerusalenocana, Idumea ca uabaina luarocana, Jordán béjaye chenguanocana, Tiro y Sidón pueblëngocana. Chënga tmojanobeconá, Jesús tša bëtš soyënga yojtsamama tmojanuena ora. ⁹ Jesús chabe uatsjéndayënga tojanëyana: “Motsajna y canÿe barquësha atšbiama šmochjuaprónta, tša entšanga ndoñe chašmondëtsatsëntšnama ca.” ¹⁰ Er cha banga tojanashná, y chë causa, nÿetscanga šocana bomnënga chábioye tmojanajuatsëntšená cha jabojuama.

¹¹ Y chë bacna bayëjënga uambayëngna, Jesús tmojinÿe ora, betscó chabe she-cuatšentše imojtsofshëntsaméntšenaye, y chë bacna bayëjëngbeyeca mëntšá imojtsáyebuache: “¡Aca Bëngbe Bëtsabe Uaquiñá condmëna ca!”

¹² Pero Jesús puerte tojanamëndá, nda cha bëtsemnama entšangbe delante ndoñe chamondëtsichámuama.

Jesús chë bnëtsana uta uatsjéndayënga tojanabacacá (Mt 10.1-4; Lc 6.12-16)

¹³ Chentšana, Jesús canye batsjoye tojántsjua, y ndëmuanyënga tšabá tbojanínÿnanënga tojánachembo. Y chëngna chábioye tmojanobeconá. ¹⁴ Chora, chënguentšana bnëtsana útata tojanëbuáyana, chamotsetjëmbambnama, y Bëngbe Bëtsabe soyëngama entšanga chámabuayenama; ¹⁵ y chënga obenana tojanatšatá entšángbentšana bacna bayëjënga jtëbuacanama. ¹⁶ Mënga mondmëna chë bnëtsana uta bocacánënga: Simón, chë ndábioye Pedro ca Jesús tbojanabaye; ¹⁷ Santiago y chabe uabentsá Juan, Zebedeobe uaquiñata, chata tojanëbaye “boanerges ca”, y chca endayana “uajuesayabe uaquiñata ca”; ¹⁸ Andrés, Felipe, Bartolomé, Mateo, Tomás, Santiago, Alfeobe uaquiñá; Tadeo, Simón chë celote ca uabobainá; ¹⁹ y Judas Iscariote, chë chentšana ndoñe baytesna, Jesús uayayëngbe cucuatšinë bochjanboshjoná.

Ley abuátambayënga tmojánayana, Jesús Satanásbentšana obenana tojanóyëngacñe ca (Mt 12.22-32; Lc 11.14-23; 12.10)

²⁰ Chentšana, Jesús yebnoye tojtanamáshëngo, y tša entšanga chentše tmojanójoto; chë causa, ni cha ni chabe uatsjëndayënga, ni mo jasama luare ndoñe imontsebomna.

²¹ Jesusbe pamíllanga ntšamo cha yojtsepásama tmojántatšëmbona ora, tmojána cha jetsbetšama, er entšanga imojtsencuéntaye cha opá tojtsanóbema ca.

²² Y chë ley abuátambayënga Jerusalenocana tmojánashjajnëngna Jesusbiamama mëntsá imojtsichamo: “Chabe ndegombre mandayá Beelzebú, cach Satanás yojtsemna. Cha, chë bacna bayëjënga amëndayá, Jesúsbioye obenana tbojatšetá entšángbentšana bacna bayëjënga chauatëbuacnama ca.”

²³ Chënga chca imojtsichámuama, Jesús chënga tojánachembo, y cuentëngaca tojanontšé jáuyanana, jinÿanÿiyama chënga canye ndoñe ndegombre soyiñe imojtsemnama, mëntsá: “¿Ntšamo Satanás nantsobena cachá jtenábocnama ca? ²⁴ Canye amëndayábentše entšanga tmojtsenojatá y tmojtsenáyase, chë amëndayana ndoñe ntjatotonana. ²⁵ Cachcá, canye yebnentše pamíllanga tmojtsenojatá y tmojtsenáyase, chë pamíllanga ndoñe tšabá nÿets tempo quemochátsmëna. ²⁶ Y cachcá, Satanás y chábënga ndoñe tmontsenëyeunana y cachabe contra tojtsemnëse, chabe amëndayana ndoñe más queochátstotona; y cha ya ndoñe más chëngbe amëndayá queochátsmëna.

²⁷ “Ndocná quenátobena canye corente añemo bomna entšabe yebnoye jamashënguana y chabe soyënga jtsebocana, ndoñe natsana tconjshétsebatsëquëse. Nÿe tcojshétsebatsëquëse cocayé cuanjobenaye cha jefcana.

²⁸ “Ndegombre cbëyana, Bëngbe Bëtsá entšangbe nÿetsca bacna soyënga echanjáperdonaye, y ntšamo Bëngbe Bëtsabiamama y inÿengbiamama ndoñe tšabá tmontsichamo soyëngnaca; ²⁹ pero chë Uámana Espíritbiamama ndoñe tšabá ichámëngna ndocna te queochátaperdonaye, er nÿetsca tescama castigánënga jtsemnana chënga jtsamnana ca” —Jesús tojánayana.

³⁰ Jesús chca tojanëyana, er chënga imojtsichamo cha bacna bayëja ibojtsambá ca.

Chë Jesusbe ndegombre pamíllanguentšënga (Mt 12.46-50; Lc 8.19-21)

³¹ Chëntscuana, Jesusbe mamá y catšátanga choye tmojánashjajna, pero nÿe shjoca imojtsemna; y canya tmojanichmó cha jachembuama. ³² Chë ba entšanga chentše chabe shëconana imojtsetbiámanëngna, chora tmojanianana: —Acbe mamá, acbe catšátanga y uabëngana shjoca montsemna; aca cmontsenguá ca.

³³ Chora cha tojanëjua: —¿Nda atšbe mamá yomna, y ndëmuanyënga atšbe catšátanga ca?

³⁴ Chentšana, chë chabe shëconanana tbiamanëngbioye jarrepárase, tojánayana: —Quemënga mondmëna atšbe mamá y atšbe catšátanga. ³⁵ Er ndánaca, ntšamo Bëngbe Bëtsá yobošcá tojtsamá, jtsemnana atšbe catšata, atšbe uabena y atšbe mamá, atšbe ndegombre pamíllanguentšá ca.

4

Chë jenabe cuento
(Mt 13.1-9; Lc 8.4-8)

¹ Chentsana, uafjónaye tsachoca Jesús tojtëtanontsé Bëngbe Bëtsabe soyëngama jabuátambama. Mallajta entsanga tmojanobeconá causa, chë uafjónayentse yojanamna canÿe barquëshoye Jesús tojánasëngo y tojanótbema; y chë entsanga tsachoca imojtsemna. ² Chora cuentëngaca ba soyëngama tojanabuatambá.

Mëntšá tojanëyana: ³ “Smochjouena; canÿe jená chë jénaye jaujquëshama yojëftsebocna. ⁴ Yojsëjquëshaye orna, básefta jénaye benache juachañe yojuatquécjana; pero jaja shloftšënga imojástajna y lempe imojtsósañe. ⁵ Inÿe meshëngna ndëtsbenguiñe yojuatquécjana, ndoñe yapa fshantse binÿnentse. Chiñna betscó yojuábocna, ndoñe yapa jashenocana fshantse yojanmëna causa; ⁶ pero yojuábocna orna, puerte yojojënyána y yojtsancta; y yojtsábojo yapa tbëtëjënga tondaye causa. ⁷ Inÿe meshëngna uchmëshangañe yojuatquécjana; chë uchmashá yojuájua ora, lempe yojtsatscué, y chca, chë jénayentšana tondaye yonjuashájona. ⁸ Pero inÿe meshëngna, uanguaniñe yojuatquécjana, y bëtscá tšabe shajuanënga chiñe yojóbocna: ínÿenache, canÿe meshentšana unga bnëtsana meshënga yojóbocna; ínÿenachna, chnënguana bnëtsana meshënga; y ínÿenachna patse meshënga ca” —cha tojánayana.

⁹ Y chentsana, Jesús más tojánayana: “Chë jouenama tmojtsobenënga, šmochjouena ca.”

Ndáyeca Jesús cuentëngaca yojánabuatambaye
(Mt 13.10-17; Lc 8.9-10)

¹⁰ Chentsana, Jesús canÿa yojoquéda ora, chë chabe béconana imojtsemnënga chabe bnëtsana uta uatsjëndayëngaftaca, tmojantjá ndayá chë cuento bétsayanama. ¹¹ As Jesús tojanëjua: “Bëngbe Bëtsá tšëngaftanga cmontsinÿanÿná nÿetsca chë mo iytëmencá yomna soyënga chabe amëndayama, pero chë ínÿengbioye ndoñe; chë soyëngama chënga lempe cuentëngaca sëntsëtsëtsná. ¹² Chca, masque beca chamotsafšna, ndoñe chamondobená chë Bëngbe Bëtsabe soyënga jinÿama; y masque beca chë soyënga chamouena, ndoñe queochátësertana, chënga Bëngbe Bëtsábioye ndoñe chamondëtobéconama, y cha ndoñe chaondáperdonama ca.”

Jesús chë jenabe cuentama tojanabuayená
(Mt 13.18-23; Lc 8.11-15)

¹³ Chentsana, Jesús tojanëyana: “¿Quem cuentama ndoñe tcmónjósertase, ntšamo chcase nÿetsca cuentëngama cmochjóserta ca? ¹⁴ Chë jená endmëna chë tšabe noticiëngama abuayiynayá. ¹⁵ Básefta entsanga mondmëna mo chë benache juachañe yojuatquécjana jenaycá. Chëngna Bëngbe Bëtsabiamá soyënga jouenana; pero chora Satanás betscó jabana, chëngbe ainaniñe yojtsemna Bëngbe Bëtsabe palabra jabétsabuajuanama, chënga chiñe ndoñe chamondëtsošbuáchema. ¹⁶ Inÿe entsanga mondmëna mo chë ndëtsbenguiñe yojuatquécjana jenaycá; chëngna Bëngbe Bëtsabe palabra jouenana y oyejuayënga jtsemnana; ¹⁷ pero ndoñe nÿets tempo chana jochájua; y chca, ndoñe bayté Bëngbe Bëtsáftaca ntjëftsemnëngana, ndoñe yapa tmonsasbuaché causa. Inÿenga mochantsëbuayënja, y Bëngbe Bëtsábeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonÿaye. ¹⁸ Inÿenga mondmëna mo chë uchmëshangañe yojuatquécjana jenaycá. Chënga Bëngbe Bëtsabe palabra mochanjouena, ¹⁹ pero quem luarentša soyëngaca oyejuayënga jtsemnana yapa mochántseboše, y nÿe bomnana jëftsebomnana yapa mochanjésenuabnaye. Chë soyama y inÿe ba soyëngama yapa enócochinÿena causa, Bëngbe Bëtsabe soyëngama echantsebnëtjomba, y ndoñe quemochátama ntšamo Bëngbe Bëtsá tojayancá. ²⁰ Pero ínÿenga mondmëna

mo chë uanguaniñe yojuatquécjana jenaycá. Chëngna Bëngbe Bëtsabe palabra botamana mochanjouena; nyëts ainánaca mochántseprontana chiñe jtsošbuáchiyama. Mo canye betiye becá tšabá tojtseshajuancá, chënga bëtscá tšabe soyënga Bëngbe Bëtsabiama mochántsama. Inyënga ínÿengbiama más bëtscá soyënga mochanjama; y chca, ínÿenga mochántsemna mo chë unga bnëtsana meshe tojanshajo jenaycá, ínÿenga mo chë chnënguana bnëtsancá, y ínÿengna mo chë patse meshënga tojanboté jenaycá ca” —Jesús tojánayana.

Chë uajuinÿanëshama cuento

(Lc 8.16-18)

²¹ Mëntsánaca Jesús tojánayana: “Ndocná juiyëbana canye uajuinÿanëshama cajonëshe o jutsnëshama tajsoye juajájuama. Ndoñe; uajuinÿanëshama juiyëbana tsbanánoca juajájuama, lempe chaotsebínÿnama. ²² Ndocna yoiytëmena soye ntjinÿencá queochaisoquéda, y chë ndótatsëmbo soye ntsotatsëmbcá queochaisoquéda. ²³ Chë jouenama tmojtsobenënga, smochjouena ca.”

²⁴ Y mëntsánaca Jesús tojanëyana: “Tšabá smochjájuaboye ntšamo smojtsuenanama. Nye batšatema smojouenëse, nye batšatema cmochanjósertaye; pero aiñe tšabá smojouenëse, chama corente cmochanjósertaye; y Bëngbe Bëtsá echanjama tšëngaftanga más soyëngama chacmósertama. ²⁵ Er nda Bëngbe Bëtsabe soyëngama tšabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama josértama ndoñe tontsebošá, chë nye batšá ibosertana soyëngama bochantsebnatjëmbe ca” —cha tojánayana.

Chë ojuajna jenayama cuento

²⁶ Jesús mëntsánaca tojanëyana: “Bëngbe Bëtsabe amëndayana endmëna mo ntšamo canye boyabása jénaye tojuatbontsá ora ehandbopasacá: ²⁷ masque cha cada ibeta jtsojájuana y bnëté jotsbanama, ibeta o bnëté, chë jénayentsana juabocnana y juájuana, ntšamo chca yojsájjuajnama chë boyabása ntjatstatsëmbcá. ²⁸ Chë fshantse cachabe ponto jamana ndayánaca chiñe chaójuama; natsana tsbuanachëtëma jóbocnana, chentsana chë espiga, y chentsana chë meshënga jashájonana. ²⁹ Y chë meshënga ya tojtsebóchichna orna, játbanama jabocnana, chë saná josháchiñama ora ya tojobuácheyeca ca” —Jesús tojánayana.

Chë mostaztiye jenayama cuento

(Mt 13.31-32; Lc 13.18-19)

³⁰ Jesús mëntsánaca tojanëyana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenama? ³¹ Endmëna mo canye mostaza jénaye jajoca tcojajecá. Ndegombre, nyëtsca quem luarentša jenayëngama, mostaza jénaye chë más básëtëma endmëna; ³² pero tcojajé orna, jójuana, y jajañe chë más bëtš betiye jóbëmana, ba bëtš buacuashëngaca; chíyeca chë jaja shloftšënga jana y chiñe uajajonëtemëngá jauábopormana ca.”

Ndayëca Jesús cuentëngaca entsanga yojanabuayiná

(Mt 13.34-35)

³³ Chca Jesús Bëngbe Bëtsabe soyëngama entsanga yojanabuatambá, ba cuentënguentšana, mo chë tmonjouena cuentcá, ntsachëtšá chë entsanga josértama tmojobenacá. ³⁴ Tondaye yonjanabuatambá ndoñe cuentëngaca ntsemëncá; pero chabe uatsjëndayëngna lempe yojanabuayiná, cánÿënga tmojtsemna ora.

Jesús chë binÿia y chë béjaye bonguana yojëtsbëma

(Mt 8.23-27; Lc 8.22-25)

³⁵ Cach te, yojtseibétatana ora, Jesús chabe uatsjëndayënga tojanëyana: “Uafjajónaye chenguana cuajna ca.”

³⁶ Chorna, chë entsanga jesabáshejuanëse, chë uatsjéndayënga Jesús tmojtsanánatseñe, cach yojánenjaquena barquëshañe; y inye entsángnaca inye barquëshangañe tmojanasto. ³⁷ Chentšana, chë uafjajónaye béjayiñe tša jabuache binýia yojóshjango; olëshënga chë barquësha imojtsétsbotsana, y chë causa chë barquësha yojóntša búyesheca jtsobuajútjiana. ³⁸ Y chëntscuana, barquësha stëtsoica, tsëntsenëshañe Jesús yojtsomañe. Chora chë uatsjéndayënga tmojtsanfšená y tmojanianyana: —¡Buatëmbayá! ¿Tondayana cmontsentšamna bënga chašotsënatjëmbama ca?

³⁹ As Jesús tojantsbaná, chë binýia tbojanácacana, y chë bëts uafjajónayoye tojánayana: —¡Natjëmbana cochtsemna! ¡Bonguana ca!

Y cachora chë binýia yojëtstëcja, y lempe bonguana yojtsatsmëna. ⁴⁰ Chora chabe uatsjéndayënga tojanéyana: —¿Ndáyeca tša šmojtsauatja? ¿Bëngbe Bëtsá tšëngaftanga jujabuáchama yobenama cabá ndoñe šmontsošbuaché ca?

⁴¹ Chama, chënga puerte auatjanánënga imojtsemna y mëntšá imojtsenatsëtsnaye: “¿Nda quem boyabása yomna? Cha tonjayana y chë binýia y chë béjaye tmonjoyeuná ca.”

5

Chë Gerasa luaroca bacna bayëja uambayá (Mt 8.28-34; Lc 8.26-39)

¹ Chentšana, uafjajónaye chenguánoica tmojánashjajna, Geraseno ca uabaina entsangbe luaroye. ² Jesús barquëshoicana tojánastjango, y cachora, chë obanëngbe cuevëshënguentshana canýe entsá, bacna bayëjbe juabna uambayá, tojánbocna y tbojanjébingo. ³ Chë boyabásana, obanëngbe cuevëshënguenache inoyena, y ndocná yonjobena cha jtsebátsëcana, ni mo cadenëjuangaca; ⁴ er ba soye cadenëjuangaca y inye soyëngaca cha nyetsá tmojanbatsëca, pero cha nyetsca soye yojtsátabebe y yojtsenájaca, y ndocná yonjobenaye cha bonguana chaotsemnama. ⁵ Nyets tempo, bnëtë y íbeta, obanëngbe cuevëshënguenache y tjañenache yojánana yoye, y ndëtšbéngaca enotsetšenaye. ⁶ Jesúsbioye bënocana tbojáninýe ora, chábioye tojanótjajo y chabe natsanoica yojoshëntsamentšiyë; ⁷ y mëntšá yojtsáyebuache: —¿Ndayá átšeftaca cojtseboše, Jesús, celoca Bëngbe Bëtsabe Uaquiñá? ¡Bëngbe Bëtsabe delante cboimpadá, ndoñe šcatjatsetšená ca!

⁸ Chca tbojanianyana, er Jesús chábioye tbojanianyana: —¡Bacna bayëjbe juabna, chábentšana maisebocna ca!

⁹ Chentšana Jesús tbojantjá: —¿Ntsamo cabaina ca?

Y chë bacna bayëjëngbe juábnaca cha tbojanjuá: —Atšna Legión ca sënduabaina, bëtsçanga fsëndmëna causa ca.

¹⁰ Y tša Jesús ibojtserruana chë luarentšana ndoñe chaondëtëbuacanama. ¹¹ Chentša béconana ba cotšënga imnajena, batsjoca imnétsosañe; ¹² as chë bacna bayëjënga Jesúsbioye tmojanimpadá: —Chë cotšëngbioye šmichamó, chëngbeñe fchayamashjna ca.

¹³ Y Jesús aíñe tojanalesenciá; as chë bacna bayëjënga chë entsábentšana tmojésanbocana y chë cotšëngbeñe tmojánamashjna. Cachora chë mo uta uaranga cotšënga batsjocana peñëšëjana uafjajónayoye imojtsoshbuetše y yojtsatajo.

¹⁴ Chora, chë cotšënga anýenënga tmojtsanacheta auatjanánënga, y tmojána chama jacuéntama chë puebloca y chabuenache; y entsanga tmojánabo ntšamo tojanopasacá jinýama. ¹⁵ Jesús yojtsemnoye chë entsanga tmojánashjajna ora, tmojáninýe chë tempo bacna bayëjënga uambayá, inétsoybemañe, entsáyá uichëtjoná y chabe nyets juábnaca. Y chë entsanga chama imojtsëuatjaná. ¹⁶ Chë tmojáninýënga imojtsecuëntaye, ntšamo chë bayëjbe juabna uambayáftaca tojanopasama, y chë cotšëngaftaca ntšamo tojanopasámna. ¹⁷ Chora chë entsanga tmojanontsé Jesús impadánana chë luarentšana chaotsatoñama.

¹⁸ Jesús chë barquëshoye tojtanásëngo ora, chë tempo bacna bayëjbe juabna uambayá tbojanimpadá chabolesenciá cháftaca jama ca. ¹⁹ Pero ndoñe tbonjanlesenciá, sinó mëntšá tbojaniyana: “Acbe yebnoye motsatoñe, acbe pamíllangbioye, y cochjácuntaye ndayá Bëngbe Utabná ácaftaca tojamama, y ntšamo cha ácbioye tcmojalastemama ca.”

²⁰ Chentšana, chë entšá yojtsatoñe y tojanontšé Decápolis uabaina pueblënguenache jacúntana lempe ntšamo Jesús cháftaca tojanmca; y nyetscanga imojtsenjnanaye.

Jesús canye shembásabioye tbojanshná y Jairëbe bembetémbioye tbojtanayená (Mt 9.18-26; Lc 8.40-56)

²¹ Chentšana, Jesús cachiñe chë uafjajónaye chenguana tojesaná barquëshañe. Chocna ba entšanga tmojanobuashconá, y Jesús chë uafjajónaye tsachañe yojtsemna. ²² Chorna, tojánashjango chë judiëngbe enefjuana yebnentša canye mandayá, Jairo ca uabainá. Jesúsbioye tbojáninye ora, chábentše tojanoshëntsamentšé, ²³ y tša ibojtseimpadana, mëntšá: —Atšbe bembetema ya echantsóbana; Diosmanda mabo, acbe cucuatšënga chábeñe cochjajáua, salud chauatinýenama y cháuatayenama ca.

²⁴ As Jesús cháftaca tojána; pero bëtsca entšanga imojtsëstona, chábioye imojtsenatsëntšenaye. ²⁵ Chë entšanguentše yojtsaye canye shembása šocá; cha ya bnëtsana uta uata oboftjajuanánaca inapadecena. ²⁶ Cha puerte tojansufrí, ba ashnayëngbe cucuatšinë, y lempe ntsachetšá inabomncá tojanpochocá jenóshnama; pero ndoñe ibontsatstëcacjana, nye más peor ibojtsobiamnaye. ²⁷ Chë shembása vojouena ntšamo Jesús ba šoquënga tojánashnama, y as stëtšoicana entšangbe tsëntsajana vojobeconá, y Jesusbe entšayá yojauábojajo. ²⁸ Cha chca tojanma, er yojtsejuabnaye: “Masque nye mo chabe entšayá sibiájua chajauábojajo, y salud chantsatsbomna ca.” ²⁹ Y cachora chë oboftjajuanana ibojtsobojuána; y chabe cuerpiñe ibojebiónana ya tšabá yojtsatsmënama. ³⁰ Chora Jesús yojasëntia chábentšana obenana vojóbocnama, mo ndábioye tbojashná orcá; as cha tojanobuértana entšángbeñe y tojanatjá: —¿Nda atšbe entšayá tojuabojajo ca?

³¹ Chabe uatsjëndayënga tmojanjuá: —Aca contsonýá chë entšanga cmontsatsëntšená, y cabá cochjátsnoticiaye nda entšayá tojuabojajo ca.

³² Pero Jesús cátoye yojtserreparana jinýama nda tbojánbojajuama. ³³ As chë shembása, chë ntšamo cháftaca yojopásama jtsetatšëmbëse, tojanobeconá ngmëmnyá y auatjananá, chabe natsanoica tojanoshëntsamentšé, y lempe ntšamo ndegombre cháftaca tojanopasacá Jesúsbioye tbojaniyana. ³⁴ Chora Jesús tbojaniyana: —Bembe, Bëngbe Bëtsábeñe icošbuachéyeca shnaná contsatsmëna. Natjëmbana motsatoñe; acbe šocana tontsopochocá ca.

³⁵ Jesús cabá yojtsóyebuambnantscuana, báseftanga tmojánashjajna chë judiëngbe enefjuana yebnentša mandayabe yebnocana, y chë shembásetembe taitá tmojaniyana: —Acbe bembe tontsóbana; ¿ndayama más Buatëmbayá chama cochjátebëyaboma ca?

³⁶ Y Jesús, ntšamo chënga imojtsichamcá ntjatuenancá chë judiëngbe enefjuana yebnentša mandayábioye tbojaniyana: —Ndoñe matauatjana. Nye Bëngbe Bëtsábeñe cochtsošbuáchiye cha tšabá chaotsatsmënama ca.

³⁷ Y Jesús ndoñe tonjanalesenciá Jairëbe yebnoye banga chamuastama; nye Pedro, Santiago y Juan, Santiagbe uabentsana, aiñe. ³⁸ Chentšana, chë mandayabe yebnoye tmojánashjajna ora, Jesús tojánanye entšanga tša imojtsenbouenana, entšanga imojtsošachiye y puerte ngmënaca imojtseyoye. ³⁹ As chë yebnoye tojánamashëngo y chë entšanga tojanëyana: “¿Ndayama tša šmojtsenbouenana y tša šmojtsendëntjana? Chë shembásetema ndoñe chenatóbana, nye endëtsomañe ca.”

⁴⁰ Pero entšanga nye imojtsáfchaye. As Jesús nyetsca entšanga shjoye tojtanëbuacna, y tojéftsanëbiatše chë basetembe bëtsëtsata y chabe enutënga; y chë shembásetema yojtsemnoye tojánamashëngo. ⁴¹ Chora Jesús tbojanábuacueshache y cachëngbe biyañe tbojaniyana: “Talita, cum ca.” (Chca endayana “Shembásetema, matëtsbaná ca”).

⁴² Cachora, chë bnëtsana uta uata bomna shembásetema tojtantsbaná y yojtsobena jama. Y chë entsanga chama imojtsenjnanaye. ⁴³ Pero Jesús corente tojanamëndá ndocnábeñe chama ntsecuéntayana ca, y tojanamëndá chë bássetema saná chamuiyé chaosama.

6

Jesús Nazaret puebloca (Mt 13.53-58; Lc 4.16-30)

¹ Chentšana Jesús tojëftsanbocna y cachabe luaroye tojtanashjango, y chabe uat-sjéndayënga cháftaca tmojána. ² Ochnayté tojanobuache ora, Jesús tojanontšé chë judiëngbe enefjuana yebnentše entsanga jabuátambana.

Chë ba entsanga cha jóyebuambayama tmojanuenënga, imojenjnaná y tmojánayana: “¿Ndëmoca quem boyabása lempe chca tojuatsjinýe? ¿Ndaye osertánana mua tmojatšetá, y ntšámoyeca cha yojtsobena chca bëts soyënga jtsamana ca? ³ ¿Mua ndoñe chë calpintero yondmëna, Mariybe uaquiñá, y chabe catsátanga ndoñe mondmëna Santiago, José, Judas y Simón; y chabe uabéngnaca muentše ndoñe bëngaftaca mondoyena ca?” —chënga imojtsichamo.

Chë causa chënga tmojanotjyaná, y ndoñe montseboše joyeunayana. ⁴ As Jesús tojanéyana: “Nýetsca luarënguenache canýe Bëngbe Bëtsabe juabna oyebuambnayábioye bëtsá jabemana, pero ndoñe chca cachabe luarentše, ni cachabe pamíllangbenache, ni cachabe yebnentše ca.”

⁵ Chë entsanga chentše chábeñe ndoñe montsanošbuaché causa, Jesús ndoñe tonjanobená ni canýe bëts soye Bëngbe Bëtsabe obenánaca chentše jëftsemana; nýe básefta šoquëngbeñe cucuatšënga tojanajáj y tojanashná. ⁶ Jesús ojnananá yojtsemna cachábentša entsanga chábeñe ndoñe montsanošbuaché causa.

Jesús, chabe uatsjéndayënga tojanichamó Bëngbe Bëtsabe amëndayama jábuayenama (Mt 10.5-15; Lc 9.1-6)

Chentšana, chë chaboye base pueblënguenache Jesús yojánana, Bëngbe Bëtsabe soyëngama abuatambaye. ⁷ Y chë bnëtsana uta uatsjéndayënga Jesús tojánachembo, y utáta ínýoye tojanichamó, entsángbentšana bacna bayëjënga jtëbuacnama obenana jatsatayëse; ⁸ y mëntšá yojáuyana: “Benachiñama tondaye šmattsambaye, nýe canýe jatjonëfja; ndoñe šmattsambaye saná, ni shecnaja, ni crocénana uasnanëchiñe. ⁹ Nduámanëshe šmochjesóshecohëtjo, y nýe canýájua šmochjesíchëtjo ca.”

¹⁰ Mëntšánaca tojanéyana: “Posada chacmojúyentsáme yebnentše šmochtsoquedañe inýe puebloye játantscuana. ¹¹ Canýe luaroye chašmojáshajna y ndocná posada chacmonjuyentsáme, y joyeunayama ndoñe chamontsebošëse, chentšana šmochjésebocana, y shecuatšentša polvëshe šmochjésenstoto, chca, chëngbioye jinýanýiyama chënga ndoñe tšabá tšëngaftangaftaca tmonjamama ca.”

¹² Chentšana, chë uatsjéndayënga tmojëftsanbocana y entsanga imojánabuayiyenaye, chë tšabe benache chámuatishachama, bacna soyënga amana jtsajbanase. ¹³ Entšángbentšana ba bacna bayëjënga tmojtanëbuacna, y ba šoquënga aceitýeca tmojananëttojjo y tmojanashná.

Ntšamo Juan chë Ubayaná tojanóbana (Mt 14.1-12; Lc 9.7-9)

¹⁴ Rey Herodes Jesusbiana yojátatšëmbona, er nýetsquénache nýetsca entsanga chabiama imojtsóyebuambnaye. Entšanga Jesusbiana imojtsichamo: “Juan chë Ubayaná obanënguentšana tojtayena, chíyeca cha chca obenana yojtsebomna ca.”

¹⁵ Inýengna imojtsichamo: “Cha entsemna chë Bëngbe Bëtsabe juabna oyebuambnayá Elías ca.”

Y ínÿengna: “Muana canÿa Bëngbe Bëtsabe juabna oyebuambnayá, mo chë temp-squëngcá ca.”

¹⁶ Heródesna ntšamo entšanga Jesusbiamá imojtsichamcá tojanuena ora, tojánayana: “Mua Juan entsemna, chë atše sënjanmandá bestšaše chamotsëstjanguamá, mora obanënguentsana tojtayena ca.”

¹⁷ Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámiamá. Herodes chca tojanma Herodíasbe causa, chabe uabentsá Felipbe shema. Herodes chë shëmaftaca tojanobouamá, Felipe cabá ainá ora. ¹⁸ Y chama, Heródesbioye Juan ibojánbuayiynaye: “Ndoñe quenátslesenciana acbe uabentsabe shema acbe shema chaotsemnama ca.”

¹⁹ Chë causa, Herodías Juánbioye puerte ibojuáya, y yojánboše jtsóbama; pero ndoñe yontsobena, ²⁰ er Herodes yojántatšëmbo, Juan canÿe nÿetsca soyënguiñe tšabá amá, nÿe Bëngbe Bëtsábioye sempre oservená inamnama. Chama cha yojánauatja y ndoñe yonjanaleséncia cha chamóbama. Y Juan Bëngbe Bëtsabe soyëngama Heródesbioye tbojtse-buayiyná ora, ntšamo jajuaboyana ndoñe yontsetátšëmbo, pero masque chca, oyejuayá Juánbioye ibnayeunana. ²¹ Pero Herodías tojáninÿena mocna ora Juan chamóbama. Heródesbe cumpleño oboyejuaye ora, bëtscá saná tmojanprontá, y Herodes yojúbuaja chabe amëndayënga, soldadëngbe amëndayënga y Galileoca uámana entšanga. ²² Chora, chë oboyejuaye luaroye Herodíasbe bembe tojánamashëngo, tojanlantsá, y Herodes y nÿetsca ófjanënga chama tša imojtsóyejuaye. As chë rey, chë tobiášbioye tbojaniyana: —Ndayánaca šmotjañe y atše cbochjátšetaye ca.

²³ Y jajúrase, mëntsá tbojanšbuachená: —Ntšamo chašcojotjañcá cbochjátšetaye, masque atšbe amëndayentša bomnanentšana tsëntsañnaca ca.

²⁴ Chentsana, chë tobiáše yojëftsebozna y chabe mamábioye ibojatjaye: —¿Ndayá chjotjañe ca?

Y chabe mamá ibojuá: —Juan chë Ubayanabe bestšaše ca.

²⁵ Cachora chë tobiáše betscó chë rey yojtsemnoye tojtanamáshëngo, y tbojaniyana: —Atše sëntseboše, cam ora Juan chë Ubayanabe bestšaše canÿe šcnenëšiñe chašcuatšetá ca.

²⁶ Herodes chama corente tbojanongmé, pero chë entšangbe delante y jajúrase tbojanšbuachená causa, ndoñe yonjobenaye ntšamo tbojaniyancá jebëbuetámenana.

²⁷ Cachora chë rey canÿe soldado ibojíchnua, Juanbe bestšaše chauiyëbama. ²⁸ As chë soldado cárceloye tojána, Juánbioye bestšaše tbojtsanëštjango, y canÿe šcnenëšiñe tojanamba. Chë tobiášbioye tbojanëntšabuaché, y chana, chabe mamábioye.

²⁹ Juanbe ústonënga chama imojátatšëmbona ora, choye tmojánashhajna, chabe cuerpo tmojésanocñe y jauábtontsama tmojána.

Jesús shachna uaranga boyabásenga saná tojanacaredadó

(Mt 14.13-21; Lc 9.10-17; Jn 6.1-14)

³⁰ Chë Jesús tojánichamonga chábioye tmojtashhajna ora, lempe ntšamo tmojanmama y tmojanabuatambama cha tmojancuentá. ³¹ Chora Jesús tojanëyana: “Cuajna ínÿoye, entšanga ndoyena luaroye, batšatema jóchnama ca.” Cha chca tojánayana, er tša entšanga imojtsaye y imojtsabëbana; ni mo jasama ndoñe luare imontsebozna.

³² As cánÿenga barquëshañe tmojtsanoñe, entšanga ndëbínÿnoye. ³³ Pero chënga imojtsoñama entšanga tmojánanÿe, y ndëmuanÿenga imojamnama imojtsetátšëmbo; chcasna, chë entšanga shecuátšëca betscó tmojána, nÿetsca pueblënguentsana, y chëngbe natsana choye tmojánashhajna. ³⁴ Chentsana, chë barquëshoicana tojánastjango ora, Jesús ba entšanga tojánanÿe; chëngbiamá tbojanongmé, er imojtsemna mo abujénÿa ndbomna oveshëngcá; y tojanontšé ba soyëngama jabuátambana.

³⁵ Ya jetiñe yojtsemna orna, chabe uatsjëndayënga tmojanobobeconá y tmojaniyana: —Ya jetiñe entsemna, y quem luariñe ndocná quenatiyena. ³⁶ Entšanga cuantichamuá,

pueblotémengoye y inye luaréngoye chamotsoñama, ndayánaca jasama chamobuámiñama ca.

³⁷ Y Jesús tojanéyana: —Tšengaftanga saná chéngbioye šmochjacaredádaye ca.

Chora chénga tmojanianyana: —Crocénana queftsátsbomna, uta patse denario nyetśá, chéfta entsangbiama saná jabuámiyama ca.

³⁸ As Jesús tojanéyana: —¿Bueta tandése šmojtsebomna? Marrepárange ca.

Ya imojtsetátšëmbo ora, tmojanianyana: —Shachna tandése y uta beónata fséntsebomna ca.

³⁹ Chora Jesús entsanga tojanaméndá ínÿoca ínÿoca chamoshénts jatbiamama. ⁴⁰ As chénga tmojanotbiama patse patsénga y shachna bnétsátsanénga. ⁴¹ Chora Jesús ché shachna tandése y ché uta beónata tojanca, y celoye jontješiyése, Běngbe Bětsábioye chama tbojtanchuá. Chentšana ché tandésénga tojanjatá y chabe uatsjédayénga tojanayentsbuaché ché entsanga jatsatayama. Y ché uta beónatnaca nyetscanga tojanéjátaye. ⁴² Nyetscanga tmojanse jtoshachaye nyetśá. ⁴³ Y chentšana, ché tandése y ché beonentšana ojamnétéménga tmojanatbaná, y bnétsana uta sbarécua tmojanajutjé. ⁴⁴ Ché saná tmojansénga imojamna shachna uaranga boyabásenga, shembásenga y básenga ntjacuntacá.

*Jesús bėjaye juatsbuacá yojtsaye
(Mt 14.22-27; Jn 6.16-21)*

⁴⁵ Chentšana, Jesús chabe uatsjédayénga tojanaméndá ché barquëshoye jtašnjama, ché uafjajónaye chenguana jangana y chabe natsana Betsaida ca uabaina puebloca jashajajana. Chénga imojtsebocanénts cuana, Jesús ché entsanga yojtichamuá. ⁴⁶ Nyetscanga tojtanadiošoftá ora, tjoye cha tojtsanoñe Běngbe Bětsáftaca jencuéntama.

⁴⁷ Yojtsebétatana ora, ché barquëshu uafjajónaye tséntsaca yojtsamna, y Jesús, canya fshantsoca. ⁴⁸ Jesús tojáninÿe chéngbiama totcá yojtsemna, ché barquëshaca natsanoye jtsayana, er binÿia chéngbe contra yojtsemna. Ya binÿana ora, chéngbioye vojobeconá, bėjaye juatsbuacá yojtsaye, y ya chéngbiajana nÿe ndericho jachnėnguama yojtsemna. ⁴⁹ Y chénga, ché bėjaye juatsbuacá cha yojtsayama tmojáninÿe ora, tmojanjuabó cha canÿe añemése yojtsemna ca, y tmojanontśé yoyana; ⁵⁰ er nyetscanga chca tmojáninÿe y cochauatjanánénga imojtsemna. Pero Jesús cachora tojanéyana: “¡Añemo šmochtsebomna; atśe Jesús sėndmėna; ndoñe matauatjėngana ca!”

⁵¹ Chorna, chénga imojtsemna barquëshoye cha tojánaséngo, y ché jabuache binÿia tojanéjbana, y nyetscanga puerte auatjanánénga y ojanánénga imojtsemna. ⁵² Chénga tmojáninÿe chéfta entsanga tandése jujátayana, pero chéngbe ainanoca cabá ndoñe imontsobena josértana, Jesús lempe jamama obená bétsemnama.

*Genesaret ca uabáinoca Jesús ba šoquėnga tojanashná
(Mt 14.34-36)*

⁵³ Ché uafjajónaye tmojánenashbuachengo ora, Genesaret ca uabaina luaroye tmojánashjajna, y ché uafjajónaye tsachoca ché barquëshu tmojanětsbua. ⁵⁴ Ché barquëshoicana tmojánastjajna y cachora entsanga Jesús tmojantėmbá. ⁵⁵ Chíyeca, ché luariñe yebnėnguenache betscó chénga tmojána, y tmojanontśé ché šoquėnga tjuashėnguiñe juyambana, ché ndémoye tmojanuena Jesús yojtsemna luaroye. ⁵⁶ Y ndayentśe cha tojámashėngüentśe, pueblėnguiñe, bėts pueblėnguiñe y base pueblotémėnguiñnaca, ché šoquėnga benachoye imojtsėbuacana, y Jesús corente imojtseimpadana ché šoquėnga chaualesenciá, nÿe mo chabe entsayá sibuájua juabojajuana. Y nyetscanga tmojuábojajėnga tšabá imojtsatsmėna.

7

*Ndáyeca canÿe entsá Běngbe Bětsabe delante ndoñe tšabia nántsemna
(Mt 15.1-20)*

¹ Chentšana, fariseunga Jesúsbioye tmojanobeconá y báseftanga ley abuátambayëngnaca, Jerusalenocana áshjajnënga. ² Chënga tmojáninÿe básefta Jesusbe uatsjëndayënga, cabá ndase ora, ndoñe montsacuentšabiá ntšamo chë judiënga imojanamancá. ³ Er chë fariseunga y nÿetsca judiënga imojanamana jtsacuéntšabiana ba soye, ndayá jasama ora, ntšamo chëngbe bëts taitanga imojanamancá. Chënga imojanjuabná, chca jtsamëse Bëngbe Bëtsabe delante tšábenga jtsatsmënama ca. ⁴ Chë sananga enocana tmojtashjango ora, ba soye ndoñe tmontsácuentšabese, tondaye ntjasana; y ba soyëngnaca imojánama, pero nÿe chëngbe bëts taitanga chca jamana imojanamánayeca, mo chë béjayeca juabáyana tazëšënga, matbajënga, calderëshënga y jutsnëshangá. ⁵ Chë causa, chë fariseunga y chë ley abuátambayënga Jesús tmojantjá: —¿Ndáyeca acbe uatsjëndayënga ndoñe montsama ntšamo bëngbe bëts taitanga monjanamancá, y montsesá ntsacuéntšabiase, ndoñe ntšamo bënga judiënga fsënduamancá, Bëngbe Bëtsabe delante tšabá jtsatsmënama ca?

⁶ Chora Jesús tojanëyana: —Nÿe tšabá chë Bëngbe Bëtsabe juabna oyebuambnayá Isaías tšëngaftangbiana tojánayana, bacna entšanga chë ntšamo ndegombre šmojuabnacá ndinÿinÿnayënga ca, mëntšá enduabemanentše:

Quem entšanga mondbétsichamo Bëngbe Bëtsá tša tšabia yomna ca; chca nÿe uayásaca, pero chëngbe ainanentše ndocna tšabe juabnëngaca.

⁷ Pero chënga nÿe bonamente mondbétsichamo Bëngbe Bëtsá tša tšabia yomna ca; chënga nÿe entšangbe mandënga jtsabuátambayana, y Bëngbe Bëtsabe mandënga ndoñe ca —cha tojánayana.

⁸ Chora Jesús tojanëyana: —Ntšamo Bëngbe Bëtsá tojanmandacá stëtsoye tšëngaftanga šmojtsequedá, nÿe ntšamo entšanga monduamancá jtsamama ca.

⁹ Y mëntšánaca tojanëyana: “Tšëngaftanga ntšamo Bëngbe Bëtsá tojanmandacá stëtsoye jtsequédana, nÿe ntšamo tšëngaftangbe anteunga imojanamancá jtsamama. Tšëngaftanga jtsejuabnayana tšabá šmojtsama ca chca šmojtsama ora. ¹⁰ Moisés tonjánayana: ‘Acbe bëtsétsata ndoñe stëtsoye catjáquedaye’, y ‘nda chabe bëtsétsatbiana ndoñe tšabá tonjoyebuambá chana, jóbanama jtsemnana ca.’ ¹¹ Pero tšëngaftanga šmondbétsichamo, canÿe entšá yobena chabe taitá o chabe mamá jáuyanana: ‘Lempe sëndbomna soyënga corbán entsemna, chíyeca ndoñe quetsátobena juajabuáchana ca’ (corbán endayana “Bëngbe Bëtsabiana uátšëmbona soyënga ca”). ¹² Tšëngaftanga šmondbétsichamo, nda chca tojayanëse, ya ndoñe obligaciónaca ntsemnana chabe taitá o mamabiana ndayánaca jamama ca. ¹³ Chca, tšëngaftanga šmontsama entšanga Bëngbe Bëtsabe palabra stëtsoye chamoquedama, mo tondaye tontsamancá, chë cuenta jtsamama ntšamo anteunga imojanamancá, ntšamo entšángbeñe tempscana y mëntscoñama yochnëjuancá. Y ba soyënga tšëngaftanga cachcá šmontsama ca” —Jesús tojánayana.

¹⁴ Chora Jesús, cachiñe entšanga tojtanachembo y tojanëyana: “Nÿetscanga šmochjouena y chacmësertá. ¹⁵ Ndayá entšá tojttesacá, ndoñe ntjábemana ndoñe tšabia Bëngbe Bëtsabe delante. Inÿetšá comna: ntšamo entšá tojtsejuabná y tojtsoyebuambnacá endobena jabemana ndoñe tšabia Bëngbe Bëtsabe delante. ¹⁶ Chë jouenama tmojtsobenënga, šmochjouena ca” —cha tojánayana.

¹⁷ Jesús entšanga tojëftsanabashejuana y yebnoye tojtanamáshëngo ora, chabe uatsjëndayënga tmojantjá ntšamo cha tojánayanama. ¹⁸ As cha tojanëyana: “¿Tšëngaftángnaca cabá ndoñe cmontsësertana ca? ¿Cabá ndoñe cmontsësertana, lempe ntšamo entšá tojascá ndoñe ntsoyebenana chábioye jabemana ndoñe tšabia Bëngbe Bëtsabe delante; ¹⁹ er ainanoye ndoñe ntjómashënguana, sinó uafsbioye, y chentšana cuerpentšana jtabocnana ca?”

Y chca, Jesús tojánayana nÿetsca sananga tšabá jasama yomna ca y chë saná ndoñe ntjamana canÿe entšá bacna soye chaotsamama ca. ²⁰ Y mëntšánaca tojánayana: “Ntšamo chë entšá tojtsejuabná y tojtsoyebuambnacá, chë soye cocayé endobena

entsá jabemana ndoñe tšabia Bëngbe Bëtsabe delante. ²¹ Er ainanocana jtsóbocanana bacna juabnënga: shembásaftaca o boyabásaftaca bacna soye jamama, jatbëbama, jóbama, ²² bacna juabnënga boyá o shémbioye ínÿaftaca jáingñama, jtsatbomnayama, nÿetsca bacna soyënga jamama, ínÿënga jáingñama, nÿe cachá jenomándama ntsoyencá jtsiyenama, ínÿabioye jtsántšabošama, ínÿabiama jtsayátšenayama, jtsenábotamnayama y nÿe opënga jtsobiamnayama. ²³ Nÿetsca quem bacna soyënga entsabe ainanocana jóbocnana, y cha jabemana ndoñe tšabia Bëngbe Bëtsabe delante ca” —cha tojánayana.

Canÿe shembása inÿe luarocana ashjargoná Jesúsbeñe yojtsošbuaché
(Mt 15.21-28)

²⁴ Jesús chentšana, Tiro ca uabaina luaroye tojtsanoñe, y canÿe yebnentše tojánamashëngo. Cha yojtseboše ndocná chama chaondëtsetatšëmbuama; pero ndoñe yonjobenaye iytëmenana jatsmënana. ²⁵ Y betesco, canÿe shembása, canÿe bembe bacna bayëjbe juabna uambayá ibnabomná, Jesusbiamna oyebuambnayana yojouena ora, chábioye tojánabo y chabe shecuatšentše tojanoshëntsamentšé. ²⁶ Chë shembása ndoñe yonjamna judiá, sinó Sirofenicia luarocá. Tojánabo y Jesúsbioye tbojanimpadá chabe bembetëmbentšana bacna bayëja chabuataócnama. ²⁷ Pero Jesús tbojanianana: — Atše šondmëna natsana judío entsangbiamna chë soyënga jamana; chentšana cocayé chanjobenaye chca inÿe entsangbiamna jamana. Atše acbiamna, canÿe ndoñe judiá, soyënga stjamëse, nántsemna mo chë básengbe saná quešënga cuaftsëbuajocá ca.

²⁸ Y cha tbojanjuá: —Arseñor, chca jtsemnana. Pero chë quešëgnaca mondbase chë básënga tmojtsesá ora tmojatquécjanatemënga. Chcasna, Diosmanda átšnaca šmotsajabuache ca.

²⁹ As Jesús tbojanianana: —Tšabá tcjayana; chcasna, acbe yebnoye motsatoñe. Chë bacna bayëja acbe bembetëmbentšana tonjësebocon ca.

³⁰ Chentšana, chë shembása chabe yebnoye tojtaná, y tbojáninÿëna chë bembetema jutsnëshentše yojtsojajoñe, y chë bacna bayëja ya ndoñe chábeñe yontsemna.

Jesús, canÿe boyabása tësmá y ndëbiábioye tbojanshná

³¹ Tiro pueblentšana Jesús tojëftsanbocon, y Sidón y Decápolis luarentša pueblënguëjana jachnënguse, Galilea uafjajónayoye tojánashjango. ³² Cha chentše yojtsemna ora, chábioye tmojanánatse canÿe entsá tësmá y ndëbiá, y tmojanimpadá chabe cucuatšënga chë šocábeñe chaojájoma, chaboshnama. ³³ Chorna Jesús entsangbentšana luaroye tbojanánatse, cánÿata. Chora chë šocabe matscuašoye ntšabuafjënga yojajué, cucuatšinë yojabuashëtjo, y chë šocabe bichtaja yojábojajo. ³⁴ Chentšana, Jesús celoye tojanontješé, jabuache yojáshachna, y hebreo palabriñe tbojanianana: “¡Efata ca!” (Chca endayana “¡Chacmotsauenana ca!”)

³⁵ Cachora, chë boyabásabe matscuaše tšabá yojtsatmëna y tšabá yojtsuenana; chë bichtaja tšabá yojtóbema y tšabá yojtsóyebuambnaye. ³⁶ Y Jesús chë entsanga tojanamëndá chama ndocnábeñe ntsecuëntayana. Pero masque tša chama yojtsamëndaye, entsanga más chabiamna imojtsencuëntaye. ³⁷ Chama chë entsanga puerte imojtsenjnanaye, y mëntšá imojtsichamo: “¡Lempe tšabá entsama! Chë tësmënga chamouenama, y chë ndëbianga chamóyebuambama entsama ca.”

8

Jesús canta uaranga entsanga saná tojanacaredadó
(Mt 15.32-39)

¹ Chë tempo, ba entsanga Jesúsbioye cachiñe tmojanobeconá, y jasama tondaye imontseboconna. As Jesús chabe uatsjëndayënga tojánachembo y tojanëyana: ² —Quem entsangbiamna šontsengmena, er ya unga te átšeftaca montsemna y mora jasama

tondaye quemátsbomna. ³ Cachëngbe yebnoye tondaye ntjascá stichamuase, shëntsama benachëjana nantsabuátëcja; y báseftanga bën luarocana tmojabo ca.

⁴ As chabe uatsjëndayënga tmojanianana: —¿Ntsamo nda nanjobenaye quem luarentse, ndocna entsá ndoyenentse, chëfta entsangbiama saná jinÿenama ca?

⁵ Chora cha tojanatjá: —¿Bueta tandëse šmojtsebomna ca?

Y chënga tmojanjuá: —Canÿsëftaše ca.

⁶ Chentsana, Jesús tojanamëndá entsanga chamoshëntsjatbiamama. Chorna, chë canÿsëfta tandëse tojanca y Bëngbe Bëtsábioye chama tbojtanchuá. Chentsana tojanjatá, chabe uatsjëndayënga tojanëjatá, y chëngna chë entsangbioye. ⁷ Básefta beonatémëngnaca innabomna; as Jesús, Bëngbe Bëtsábioye chama tbojtanchuá y chabe uatsjëndayënga tojanamëndá entsanga jujátayama. ⁸ Nÿetscanga tmojanse jtoshachaye nÿetsá. Chentsana cabá canÿsëfta bëts sbarëcua tmojanajutjé chë ojamnëtémëngaca. ⁹ Chë tmojansënga imojamna mo canta uaranga nÿetsá. Chentsana Jesús chë entsanga tojtanadiošoftá. ¹⁰ Chora Jesús barquëshañe tojánenojayiye chabe uatsjëndayëngaftaca, y tmojtsanoñe Dalmanuta ca uabaina luaroye.

Chë fariseunga tmojánbošena, Jesús chaoma canÿe bëts soye, chabe ndegombre obenana jinÿyama

(Mt 16.1-4; Lc 12.54-56)

¹¹ Chentsana, fariseunga tmojánabo y tmojanontsé Jesúseftaca enatsëtsnayana. Y jisháchichiyama, imojtseimpadana canÿe bëts soye chaoma, as jtsetatšëmbuama Jesusbe obenana Bëngbe Bëtsábioyana ndegombre tainóbocanama. ¹² Y Jesús ngménaca, jabuache yojáshachnëse, mëntsá tojánayana: “¿Ndáyeca tšëngaftanga, chë mora oyenënga, šmojtseboše canÿe bëts soye chaimama tšëngaftanga atšbe obenana jinÿanÿiyama ca? Ndegombre cbëyana, quem entsanga ndocna chca soye quemochátinÿe ca.”

¹³ Chorna chë entsanga cachcá tojesanënyá, chë barquëshoye yojtamáshëngo, y uaf-jajónaye chenguana yojtsoñe.

Jesús tojanabuayená fariseungbe buatëmbana soyëngama

(Mt 16.5-12)

¹⁴ Chë uatsjëndayënga yojésebnëtjomba ndaye soye jasama jesocñama, y chë barquëshoye nÿe canÿe tandëse imojtsebomna. ¹⁵ Jesús tojanëyana: —Smochtsantješna; cuedado šmochtsebomna fariseunga y Heródesbe levadurama ca.

¹⁶ Chora chë uatsjëndayënga tmojanontsé enatsëtsnayana: —Chca entsichamo, bënga tandëse ndoñe tmonjesocñama ca.

¹⁷ Jesús yojtsetátšëmbo, chabe uatsjëndayënga imojtsejuabnaye chana tandëšama yojtsëtsnaye ca; pero ndegombre chana yojtsóyebuambnaye ndayá ntsamo fariseunga y Herodes bacna soyënga jtsamëse imojoyenama. Chcasna, mëntsá tojanëyana: —¿Ndáyeca tandëšama šmojtsoyebuambná? ¿Cabá ndoñe cmontsësertana, ni šmontsetátšëmbo? ¿Ainanoca ndoñe šmontseboše chacmësertama? ¹⁸ Bominÿe šmondobomna, pero ndoñe quešmátobena jinÿyana; jouenama šmondobena, y ndoñe quešmátuenana, y ndayá tijamama ndoñe quešmatsjuabná. ¹⁹ Chë shachna uaranga entsanga shachna tandëšentsana sënjanëjatá chentsana, ¿bueta sbarëcua chë ojamnëtémëngaca šmënjanajutjé ca? —cha tojanatjá.

Y chënga tmojanjuá: —Bnëtsana utácua ca.

²⁰ —Y chë canÿsëfta tandëšentsana canta uaranga entsanga sënjanëjatá chentsana, ¿bueta bëts sbarëcua chë ojamnëtémëngaca šmënjanajutjé ca?

Y chënga tmojanjuá: —Canÿsëftácua ca.

²¹ As Jesús tojanëyana: —¿Y cabá ndoñe cmontsësertana ca?

Jesús canÿe jtanábioye tbojanshná, Betsaida puebloca

²² Chentshana tmojánashjajna Betsaida puebloca; y chora, entsanga canye boyabása jtaná Jesúsbioye tmojanánatse, y tmojanimpadá cha jabojuana chabotseshnama. ²³ As, chë jtanábioye tbojanábuacueshache, y chë pueblo chaboye tbojanánatse. Chorna, yebuáyeca ibojabuchanëtjo, y chábeñe cucuatšënga yojajájua, y tbojantjá nderado ndayá jinýama tajojtsanobena ca. ²⁴ As chë jtaná yojontješiyé y tojánayana: —Boyabásenga sentsénýa; mo betiyëngcá montsemna, pero montsobonjná ca.

²⁵ Chora Jesús, chë jtanabe fšnébeñe cachiñe cucuatšënga yojajájua. Y chë boyabása yojtsobena lempe tšabá jinýama; ya shnaná yojtoquéda. Y yojtsobena nyetsca soyënga botamana jinýana. ²⁶ Chentshana, Jesús cachabe yebnoye tbojtanichmó y mëntšá tbojaniyana: —Chë pueblöye ndoñe catjëftsamashëngo ca.

*Pedro tojánayana, Jesús chë Cristo bëtsemnama
(Mt 16.13-20; Lc 9.18-21)*

²⁷ Chentshana, Jesús tojánbocna chabe uatsjëndayëngaftaca Cesarea de Filipino luaroca publëngoye, y benachiñe chabe uatsjëndayënga tojanatjá: —¿Nda atše bëtsemnama ca entsanga imojtsichamo ca?

²⁸ Y chënga tmojanianyana: —Inýenga montsichamo Juan chë Ubayaná ca, ínýengna Elías ca, y ínýengna, canye Bëngbe Bëtsabe juabna oyebuambnayá ca.

²⁹ As Jesús tojanatjá: —Y tšëngaftangna, ¿nda atše bëtsemnama ntšamo šmochjayana ca? Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

³⁰ Chentshana Jesús corente chënga tojanamëndá, chë nda cha yojamnama ndocnábeñe ntsecuëntayana.

*Jesús tojánayana cha ibojamna jóbanana y jtsayenana ca
(Mt 16.21-28; Lc 9.22-27)*

³¹ Y Jesús tojanontšé chabe uatsjëndayënga jabuátambana, cha, chë Bëngbe Bëtsá Entšá tbojanbemá, ibojamna puerta jasúfriana ca; chë judiëngbeñe bëtšëjemëngcá amëndayëngbiama, chë judiëngbe más uámana bachnangbe amëndayënga y ley abuatambayëngbiama uabotená jtsemnana ca. Entšanga mochjanóba, pero unga tianoye yochtanayena ca. ³² Nyetscanga catafjosertaycá chama yojtsóyebuambnaye. As Pedro, Jesúsbioye luaroye tbojanánatse, y tojanontšé jtsáuyanana. ³³ Pero Jesús yojobuértana, chabe uatsjëndayënga tojanënýanýé, y Pédrëbioye mëntšá tbojtsanbochembo: “¡Satanás, átšbentsana mojuaná! Pedro, acbe juabnënga Bëngbe Bëtsábiocana ndoñe quenatóbocana, sinó nýe entsángbentsana ca.”

³⁴ Chentshana, Jesús chabe uatsjëndayënga y chë inýe entsanga tojánachembo chamouenama, y tojanéyana: “Nda atšbe uatsjëndayá jtsemnana tojtseboše, cháuyana nýe Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonýá atše juastama, y atšbiama jasúfriama chaotseprontana y cruciñe jobanámnaca. ³⁵ Nda tojtsama quem luarentše bëtscá soyënga jtsebomnana y atšbiama jasúfriama ndoñe tontseprontana, chë nyetsca tescama yomna tšabe vida echanjopérdia. Pero nda quem luarentša soyënga cachcá tojëftsonýá atše juastama, y chë tšabe noticiënga atšbiama abuatambaye causa, masque chaóbana, chë nyetsca tescama yomna tšabe vida echántsebomna. ³⁶ ¿Ndayama entšá buanjosérvia nyetsca quem luarentša soyënga jtsebomnana, chë nyetsca tescama yomna tšabe vida tojtsoperdese? ³⁷ Er canye entšá chë nyetsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë nyetsca tescama yomna tšabe vida jtsebomnana. ³⁸ Chcasna, nda mora atšbiama y atšbe buayenana soyëngama tojtsëuatja entsángbeñe, chënga chë Bëngbe Bëtsabiama nduauenanënga y bacna soye amënga, chë Bëngbe Bëtsá Entšá tbojanbemánaca chabiama echantsëuatja, chabe Taitabe bëtš obenánaca y chabe angelëngaftaca chaojésabo ora ca” —cha tojanéyana.

9

¹ Měntsánaca Jesús tojaněyana: “Ndegombre cběyana, báseftanga muentše montsemnēnga ndoñe quemochatóbana, Běngbe Bětsá entsángbeñe chabe obenánaca jabomándama jabana ntjěftsinýcá ca.”

Jesús inýetsá tojanobinýná
(Mt 17.1-13; Lc 9.28-36)

² Chentšana chněnguana tianoye, Jesús tojěftsaněbiatše Pedro, Santiago y Juan, y inýoye tojanēnatse nýe chēnga, canýe běts tjoye. Y chēngbe delante Jesús inýetsá tojanobinýná; ³ chabe uichětjonějuangá tša yojtsabuashinýyana; corente uafjantsějuangá yojtsamna; nýa chca juafjantsama ndocná quem luarentše quentatobenaye. ⁴ Chca orna, chē uatsjéndayēnga tmojáninýe, Moisés y Elías tbojanobinýná Jesúseftaca encuéntaye.

⁵ Chora Pedro, Jesúsbioye tbojanianyana: “¡Buatēmbayá, tša tšabá bēngbiamana cuanmēna muentše jtsemnana ca! Mora fchanjapórma unga tambotémēnga: cánýetema acbiamana, inýetema Moisesbiama y inýetema Elíasbiama ca.”

⁶ Chca tojánayana, chē uatsjéndayēnga yapa auatjanánēnga imojtsemna causa, y Pedro ndoñe yontsetátšēmbo ntšamo jayanana. ⁷ Chora canýe jantšetēshe yojóbema, y chēngbioye yojáutsbotse; y chē jantšetēshoicana canýe oyebuambnayana tojanóbocna, mēntsá: “Mua atšbe bonshana Uaquiñá endmēna; cha šmochtseyeunana ca.”

⁸ Y ndeolpe, chēngbe shēconana tmojanrrepará ora, ya ndocná más tmonjáninýe; nýe Jesús canýa chēngaftaca yojtsemna.

⁹ Chē tjocana imojtsatstsmaye ora, Jesús chē uatsjéndayēnga tojanamēndá: — Běngbe Bětsá Entšá tbojanbemá obanēnguentsana candétayenēntscuana, chē mēnté tjoca šmonjinýe soyama ndocnábeñe šmattsecuéntaye ca.

¹⁰ Chē uatsjéndayēnga aínē chca tmojanuena; pero chēnga imojtsentjanaye ndayá cha yojtsentšáyana, cha yochtanayena ca cha tojánayana ora. ¹¹ Y Jesúsbioye imojtsetjanaye: —¿Ndáyeca chē ley abuátambayēnga mondbětsichamo, canmēna Běngbe Bětsabe Uámana Uabuayanabe natsana Elías jabana ca?

¹² As cha tojanějua: —Ndegombre, canýa Eliascá natsana echanjabo, y ntšamo jtsemnama yomncá lempe echánjabatsma. Pero ntšamo Běngbe Bětsabe uabemana palabrenguiñe endayancana, Běngbe Bětsá Entšá tbojanbemá puerta caochjasúfria, y inýenga puerta camochtsáboyēnja ca. ¹³ Ndegombre cběyana, canýa Eliascá ya tonjabo, y cháftaca entsānga tmonjanma lempe ntšamo tmojabošencá, ntšamo chaochnēnguama Běngbe Bětsabe uabemana palabrenguiñe endayancá.

Jesús, canýe basa bayějbe juabna uambayábioye tbojanshná
(Mt 17.14-21; Lc 9.37-43)

¹⁴ Chentšana, chēnga tmojtaná chē inýe uatsjéndayēngbioye. Chora, Jesús tojáninýe ba entsānga chē uatsjéndayēngbe shēconana imojtsemnama, y básefta ley abuátambayēngna chēngaftaca imojtsenatsětsnaye. ¹⁵ Nýetsca entsānga cha tmojáninýe ora, imojenjnaná y tmojanótjajo cha jachuayama. ¹⁶ Chora Jesús chēnga tojanatjá: —¿Ndayama chēngaftaca šmenatsětsná ca?

¹⁷ Y canýa entsānguentsá tbojanjuá: —Buatēmbayá, muentše ácbioye sēnjuánatse atšbe uaquiñá; bacna bayějbe juabna entsambá, y chē causa, jóyebuambayama ndoñe quenátobena. ¹⁸ Nýe ndayéntsánaca cha tojtsemnentše, chē bayēja chábioye jishachana y jtsenajuáchesēnjana; chentše uayoicana shashiye jtsabocanana, jtsenoftěšfjojnayana y obanacá jtsatsjájonana. Acbe uatsjéndayēnga sēnjaimpadá chē bacna bayēja chamuátábocnama, pero ndoñe chematobená ca —cha tbojanianyana.

¹⁹ As Jesús tojánayana: —¡Nýetšá ndošbuáchiyënga ca! ¿Buetayté šojtsemna tšëngaftangaftaca jëftsemnana? ¿Buetayté uantado tšëngaftangaftaca chjëftsemna? ¡Moye chë básetema mánatse ca!

²⁰ Chora chë básetema chábioye tmojanánatse; y chë bayëja Jesúsbioye tbojáninýe ora, tojanma chë basa ataque chaboshachama, y chë basa fshantsoye yojashajaye, yojtsojan-duounaye y uayoicana shashiye yojtsábocana. ²¹ As Jesús chë básabe taitábioye tbojantjá: —¿Buetayté chca yojtsepása ca?

Y cha tbojanjuá: —Bássetema orscana chca; ²² ba soye, chë bayëja chábioye iñoie jtsatmetšana y buyeshoye jtashbuetšana, jtsóbama. Chíyeca, nderado ndayá chabiamama jamama tcojtsobenëse, bënga šmotsalastemá y šmotsëjabuache ca.

²³ Chora Jesús tbojanianya: —¿Ndáyeca “ndayá jamama tcojtsobenëse ca” šcjauyana? Nda Bëngbe Bëtsábeñe tojtsošbuáchebiamama lempe endopodena ca.

²⁴ Y cachora chë básabe taitá tojanáyebuachena: —Aíñe, Bëngbe Bëtsábeñe sëntsošbuaché; Diosmanda, ¡más jtošbuáchiyama šmajabuache ca!

²⁵ Y bëtsá entšanga imojtsójotoma Jesús tojáninýe ora, chë bacna bayëja tbojtsan-bochembo mëntšá: —¡Bacna bayëja, chë bássetema tësmá y ndëbiá biamnayá; chábentšana maisebocna y ndocna te más chábeñe catjésamashëngo ca!

²⁶ Y chë bayëja chábentšana yojésebocna, yojtseyoye y chë básabioye jabuache ibojese-shatíyíyë; y chë básana mo obanacá tojanoquedá, y chë causa banga imojtsichamo cha obaná yojtsemna ca. ²⁷ Pero Jesús tbojanábuacueshache y tbojtanatsbaná; y chë básana yojtëtsaye.

²⁸ Chentšana, Jesús canýe yebnoye tojánamashëngo, y chabe uatsjëndayëngna luaroca cha tmojantjá: —¿Ndáyeca bënga ndoñe fsënjobená chë bayëja jtabocnana ca?

²⁹ Y Jesús tojanëjua: —Chca bayëjënga jtëbuacanamna jobenayana nýe Bëngbe Bëtsáftaca jencuëntase, chabuájabuachama jaimpádase ca.

Jesús cachiñe tojánayana cha ibojamna jóbanana y jtayenana ca
(Mt 17.22-23; Lc 9.43-45)

³⁰ Chentšana tmojëftsanbocna ora, Galilea luarëjana imojtsajna; y Jesús yojtseboše chama ndocná chaondëtsetatšëmbuama, ³¹ er cha chabe uatsjëndayënga yojtsabuátambaye. Mëntšá cachabiamama yojanëtsëtsnaye: “Bëngbe Bëtsá Entšá tbojanbemá entšangbe cucuatšíñe mochanjáboshjona; mochanjóba, pero chentšana unga tianoye echántayena ca.”

³² Pero chënga ndoñe yontsósertana ntšamo Jesús yojtsanëtsëtsnacá, y chama jatstjanayamna chënga imojtsauatja.

¿Nda chë más uamaná yomna?
(Mt 18.1-5; Lc 9.46-48)

³³ Chora Capernaum puebloye chënga tmojánashjajna; y cach yebnentse imojtsemna ora, Jesús chë uatsjëndayënga tojanatjá: “¿Ndayama benachiñe šmabáyenatsëtsnaye ca?” ³⁴ Chëngna nýe iytëca tmojanobiamama, er benachëjana chënga imnayénatsëtsnaye, chënguentsá nda chë más uamaná bëtsemnana. ³⁵ As Jesús tojanótbema, chabe bnëtsana uta uatsjëndayënga tojánachembo y tojanëyana: “Ndánaca nýetscangbiamama chë más uamaná jtsemnana tojtsebošëse, cha chë más nduamaná chaóbema y nýetscanga chaot-saserverna ca.” ³⁶ Chora Jesús canýe bássetema tbojánishache, chëngbe tsëntsaca tbojanatsá, tbojantbá y chënga tojanëyana: ³⁷ “Ndánaca, átšbeñe ošbuachiyá bëtsemnayeca, tbojofja canýa mo quem basetemcá, chana atše jofjana; y nda atše sojofja, chora cha nýe atše ndoñe ntjofjana, sinó chë šojichmó chábioynaca jofjana ca.”

Nda ndoñe bëngbe contra tontsemná, bëngaftaca jtsemnana
(Mt 10.42; Lc 9.49-50)

³⁸ Juan, Jesúsbioye tbojanianyana: —Buatëmbayá, bënga fsënjinye canye boyabása, y cha aca jótšëmbonëse, bacna bayëjbe juabna entsångbentsana endëtëbuacana; pero cha bëngaftaca ndoñe quenátsmëna causa, chama fsënjesauyaná ca.

³⁹ As Jesús tbojanjuá: —Ndoñe šmatjuauyaná; er ndocná quenátobena canye bëts soye jamana Bëngbe Bëtsabe obenánaca, atše jótšëmbonëse, y chentšana atšbe contra jatóyebuambnayana. ⁴⁰ Ndegombre, nda ndoñe bëngbe contra tontsemná, bëngaftaca jtsemnana. ⁴¹ Y ndánaca, masque nye búyeshtema tšëngaftanga tcmojubuatšatá, tšëngaftanga átšbenga bëtsemnayeca, chábioye Bëngbe Bëtsá canye uacanana soye bochantatšetaye, cha chë tšabe soye tojamama ca.

Resjo yomna, nderado bacna soyënga cuanjama
(Mt 18.6-9; Lc 17.1-2)

⁴² Chentšana Jesús tojánayana: “Canya átšbeñe ošbuachiyábioye mo quem basetemcá, nda tbojaingñé atše ustonama chaotsajbanama, más tšabá chabiama nántsemna canye bëts nantsnëbé chamotsetamošëntšbua y mar béjayoye asentoye chamotsashbuetše chabotsenatjëmbama. ⁴³ Nderado acbe cucuatšeca bacna soye tcojama, más tšabá nántsemna chë cucuatše chacotsenacuéstjango. Acbiama más tšabá endmëna celoye jamashënguana nyetsca tescama vida jtsebomnama, nye canye cucuatše bomná, y ndoñe nyets útatsëca infiernoye chacmotocá jama, chë ndocna te yochanjáfsana íñeshoye; ⁴⁴ choca útšëñënga puerte nyetsca tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátsfsana.

⁴⁵ “Nderado acbe shecuatšeca bacna soye tcojama, acbiama más tšabá nántsemna chë shecuatše chacotsenashecuástjango. Acbiama más tšabá endmëna cosheto celoye jamashënguana nyetsca tescama vida jtsebomnama, y ndoñe nyets útatsëca infiernoye chacmotsëtšena; ⁴⁶ choca útšëñënga puerte nyetsca tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátsfsana.

⁴⁷ “Nderado acbe bomínýeca bacna soye tcojinýe y cachca soye tcojama, más tšabá nántsemna chë bominye chacotsenobuchjátsëca. Acbiama más tšabá endmëna Bëngbe Bëtsabe amëndayoye jamashënguana nye canye bominye bomná, y ndoñe nyets útabeca infiernoye chacmotsëtšena; ⁴⁸ choca útšëñënga puerte nyetsca tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátsfsana.

⁴⁹ “Tamó tšabe soye endmëna. Ntšamo chë tamó canye tšabe soye endmëncá, Bëngbe Bëtsá echanjama nyetsca tšëngaftangbiana tšábënga chašmotsemnama, chë átšbeñe betsošbuáchema šmojtsepadecena ora šmojauantase. ⁵⁰ Tamó tšabe soye endmëna. Pero chë tamó fténana tojtsóbemëse, ndoñe quešmátobena jamana cachiñe chabe tempsca sanana chaotsatsbomnama, ni saná jatamuama. Mo tšabe tamocá entsangbiana šmochtsemna, chëngbeñe jtsiyenëse ntšamo Bëngbe Bëtsá yobošcá, y nyetscángaftaca natjëmbana šmochtsiyena ca” —cha tojánayana.

10

Ndayá Jesús tojanabuatambá bouamnënga tmojtsenëtšenama
(Mt 19.1-12; Lc 16.18)

¹ Chentšana, Jesús chë luarentšana tojëftsanbocna y tojána Judea luaroye y Jordán chenguana. Entšanga cachiñe chábioye tmojánabo, y cha chënga yojtsabuátambaye, chë ntšamo jamana yojanamancá. ² Básefta fariseunga chábioye tmojanobeconá, y jisháchichiyama mëntšá imojtsetjanaye: —¿Queojtselesenciana canye boyá chabe shëmbioye cachcá jesonýayama ca?

³ Chora cha tojanëjua: —¿Ntšamo Moisés chë soyëngama tcmëñjanamëndaye ca?

4 Y chënga tmojánayana: —Moisés tojanalesenciá chë boyá chabe shémbioye chabuiyé canye tsbuanácha, ndayéchañe chaotsayana cha ya ndoñe chabe shema yontsemna ca, y chora cachcá chabe shema chabuesonýá ca.

5 Chora Jesús tojanéyana: —Tšëngaftanga Bëngbe Bëtsabe mandënga ainaniñe jójyëngacñama ndoñe quešmátsboše causa, Moisés chca tšëngaftanga tcmojëftsanamëndá.

6 Pero quem luare jobojátšama orna, “Bëngbe Bëtsá canye boyabása y canye shembása tonjánabiamá. 7 Chiyeca, chë boyabása chabe taitá y chabe mamá echanjésabashejuana, chabe shëmaftaca jenútanama, 8 y chë útatna mo canýacá bochántsemna.” Y chca, ya ndoñe útata quebochátsmëna, sinó nýe mo canýacá. 9 Chcasna, entsá ndoñe chaondëndbema ndayá Bëngbe Bëtsá mo canýiñcá tojëftsema soye ca —cha tojánayana.

10 Ya cach yebnoca imojtsatsmëna ora, chabe uatsjëndayënga cach soyama imojtëstjaye. 11 Y Jesús tojanéyana: “Nda chabe shémbioye cachcá tbojesonýá y ínÿaftaca tojtóbouamase, cha chë natsana shémbioye ínÿe shembásaftaca jtseíngñayana; chana canye uabuatmá jtsebomnana. 12 Y chë shema chabe boyábioye cachcá tbojesonýá, y ínÿaftaca tojtóbouamase, chánaca chë natsana boyábioye ínÿaftaca jtseíngñayana; canye uabuatmá jtsebomnana ca” —Jesús tojánayana.

*Jesús, basetémëngbiamá Bëngbe Bëtsábioye tbojanimpadá
(Mt 19.13-15; Lc 18.15-17)*

13 Entšanga, basetémënga Jesúsbioye tmojanënatse, chauabájajuama y Bëngbe Bëtsábioye chëngbiamá chaboimpadama; pero chabe uatsjëndayëngna tmojanontšé chë basetémënga unachayënga jtsécácanana. 14 Jesús chca tojáninýe ora, tbojánetna y chë uatsjëndayënga tojanéyana: “Cachcá mónýaye chë basetémënga átšbioye chamuabo y ndoñe matéuyanana; er Bëngbe Bëtsabe amëndayana endmëna chë mo quem basetémëngcá imomnëngbiamá. 15 Ndegombre cbéyana, nda Bëngbe Bëtsabe soyënga ndoñe tonjójyëngacñe mo canye basetemcá jtsošbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

16 Y chë basetémënga tojanchebá, y chëngbeñe cucuatšënga jajájuase, Bëngbe Bëtsábioye tbojanimpadá tšabe bendicionënga chëngbeñe chaotsemnana.

*Canye bomna entsá Jesúsbioye tojána
(Mt 19.16-30; Lc 18.18-30)*

17 Jesús jama tojtëtanontšé ora, canye boyabása chábioye tojanótjajo, chabe shecuatšentše tojanoshëntsamentšé, y mëntsá tbojantjá: —Tšabe Buatëmbayá, ¿ndayá šojtsemna jamana chë nýetsca tescama yomna tšabe vida jtsebomnana ca?

18 Y Jesús tbojanjuá: —¿Ndáyeca “tšabia ca” šcjauyana? Tšabia nýe canýa endmëna: Bëngbe Bëtsá. 19 Aca icotátšëmbo Bëngbe Bëtsá tojanmandacá: “Ndoñe catjóba, acbe shema ínÿaftaca ndoñe cattseíngñaye, ndoñe catjatbëba, ndoñe catjuaboínýena, ínÿëngbioye ndoñe catjáingñaye ndayánaca jabacama, y acbe bëtsëtsata ndoñe stëtšoye catjáquedaye ca.”

20 Chora chë boyabása tbojanjuá: —Buatëmbayá, atše lempe chë mandënga básetema orscana sëndocumplina ca.

21 Jesús bonshanánaca tbojanonýinýe y mëntsá tbojanianana: —Canye soye cmontsebuáshbena jamana: Motsa, lempe ntšamo icobomncá cochjetsatobuiye, y chë crocénana, ndbomnjémënga cochtsatsataye; chca, celoca canye bëts bomnana cochántsebomna. Chentšana, cochjabo y šcochjuasto ca.

22 Pero chë bobóntsbioye ínÿetšá ibojtsínýnana Jesús chca tbojanianama; y puerte ngmënacá yojtá, cha puerte bomná inamna causa.

23 Chora Jesús cátoye tojanrrepará y chabe uatsjëndayënga tojanéyana: —¡Puerte totcá entsemna bomnëngbiamá Bëngbe Bëtsabe amëndayoye jamashënguama ca!

²⁴ Chca imojouena ora, chë uatsjéndayënga ojnanánënga imojtsemna, pero Jesús cachiñe tojanoyebuambá y mëntśá tojanéyana: —Atśbe básënga; ¡puerte totcá entsemna Bëngbe Bëtsabe amëndayoye jamashënguama! ²⁵ Ndegombre, más paselo endmëna chë coshufjentśa atëfjnëjana canye camello chauachnëngo, y ndoñe canye bomná Bëngbe Bëtsabe amëndayoye jamashënguana ca.

²⁶ Pero chë uatsjéndayënga nye más imojtsenjnanaye y imojtsentjanaye: —¿As, nda yochjobenaye atsbocaná jtsemnana ca?

²⁷ Chora Jesús tojanënyanyé y tojanéyana: —Entśanga ndoñe quemátobena jamana canya atsbocaná chaotsemnama, pero Bëngbe Bëtsá aíñe; er Bëngbe Bëtsá lempe jamama endobena ca.

²⁸ Chora Pedro tbojaniyana: —Aca contsonyá, bënga lempe chë fsëndbomna soyënga fsënjéseboshjona y ácaftaca fsëntsajna ca.

²⁹ As Jesús tojánayana: —Ndegombre cbëyana, ndánaca átśbioye jaserviama y chë tśabe noticiënga jábuayenama, tojéseboshjona chabe yebna, catśátanga o uabénanga, bebmá o befta, o básënga, o fshantsënga, ³⁰ cha mora quem luarentśe echanjójyëngacñe chama patse soye más yebnënga, catśátanga, uabénanga, bebmanga, básënga y fshantsënga, masque puerte chaosufrima ínÿënga mochántsama; y chë inÿe luarocna, chë nÿetsca tescama yomna tśabe vida echanjónÿëna. ³¹ Pero banga, mora uámanënga imomnënga, nduámanënga mochántsemna; y banga, mora nduámanënga imomnëngna, uámanënga mochántsemna ca —Jesús tojánayana.

*Jesús cachiñe tojánayana cha jóbanama y jtayenama
(Mt 20.17-19; Lc 18.31-34)*

³² Chentśana Jerusalenoye imojtsaye, y Jesús yojtsebnaatsana. Chë uatsjéndayënga puerte ojnanánënga imojtsemna, Jesús ndauatjca choye yojtsayama; y inÿe becá entśanga ústonoye imojtsajnëngna, imojtsayáuatja. Jesús cachiñe chabe bnëtsana uta uatsjéndayënga barie tojánachembo y tojanontśë jáuyanana ntśamo cháftaca jopásama yojtsemnana. ³³ Mëntśá tojanéyana: “Tśëngaftanga śmontsonyá, Jerusalenoye bënga mora montsajnama. Chocna, chë Bëngbe Bëtsá Entśá tbojanbemá, chë bachnangbe amëndayënga y ley abuatambayëngbe cucuatśiñe mochanjáboshjona, y chënga mochanjayana cha chaóbana ca; y ndoñe judiëngbe cucuatśiñe mochanjáboshjona. ³⁴ Chënga mochantsáboyejuana, mochántsebuashëtotojo, mochántsetjanja y mochanjóba, pero chentśana unga tianoye cha echántayena ca.”

*Santiago y Juan, Jesús tmojanimpadá canye pavor cháuabiamama
(Mt 20.20-28)*

³⁵ Chora, Santiago y Juan, Zebedeobe uaquiñata, Jesúsbioye tbojanobeconá y tmojanianya: —Buatëmbayá, bëndata fsëntseboşe pavor chaşcuabiamama ntśamo chacbojaimpadacá ca.

³⁶ Y Jesús tojanatjá: —¿Ndayá şojtseboşe atşe tsëndatbiamama chjamama ca?

³⁷ Y chata tbojanianya: —Aca reycá chacojtsemánda ora, cochjaleséncia bëndata fchayobená jótbemana, canya acbe catśbioica y inÿa acbe uañicuayoica ca.

³⁸ As Jesús tojanéjua: —Ntśamo śmontsotjanañama tsëndata ndoñe queśnátstatśëmbo. ¿Ntśamo atşe chaitsesufrincá, tsëndátnaca cachcá jasúfriama taşatjobenaye? ¿Y entśanga puerte bacá chacmojtsebuatsená ora, taşochjauánta, ntśamo atşe chjauantacá ca?

³⁹ Y chata tbojanianya: —Aíñe fchanjobenaye ca.

Y Jesús tojanéyana: —Ndegombre tsëndátnaca atścá şochanjasúfria, y atśbe causa cmochántsamna bëtscá soyëngama jasúfria. ⁴⁰ Pero atşe ndoñe quetsátobena jamándana nda atśbe catśbioica y atśbe uañicuayoica chaótbemama. Chë útentşe entsemna ndëmuanÿëngbiamama atśbe Taitá tojaprontacá ca.

41 Chë inye bnétsana uatsjédayënga chca tmojanuena ora, tmojanontsé Santiago y Juánoftaca jotjáyanana. 42 Pero Jesús nyetsca uatsjédayënga tojánachembo y tojanéyana: “Tšëngaftanga šmondétatsëmbo, quem luarentša améndayënga lempe jtsemándayana, nña mo nduiñënga cuaftsemncá; y chë bëtsëtsa entšanga chëngbe obenánaca jtsemándayana, ntšámnaca jtsamëse, chë inye entšanga sempre chamotsayaunanama. 43 Pero tšëngaftangbeñe ndoñe chca chaondétsemna. Inyetsá; masna, nda tšëngaftangbeñe chë más uamaná jtsemnama tojtseboše, cha bontsemna chë ínÿënga jtsaservénana; 44 y ndánaca tšëngaftanguentsá chë más uamaná jtsemnama tojtsebošá, bontsemna jtsemnana nyetscangbiamana, mo nÿe ínÿabiamana nyets tempo oservenacá. 45 Cachcá, Bëngbe Bëtsá Entšá tbojanbemá ndoñe chenátabo cha chamotseservénama, ndayá ínÿënga jabáserviama. Y mo nda, ínÿënga játsebacama cuafjopagacá, cha echanjóbana ba entšanga atsebácanënga chamotsemnana ca” —cha tojánayana.

Jesús canÿe jtanábioye tbojanshná
(Mt 20.29-34; Lc 18.35-43)

46 Chentšana, Jesús y chabe uatsjédayënga Jericó uabaina pueblöye tmojánashjajna. Y Jesús chabe uatsjédayëngaftaca y bëtscá entšangaftaca Jericó pueblentšana yojtsaisebocana ora, Timeobe uaquiñá, Bartimeo ca uabainá, canÿe jtaná lemošna otjanañá, benache juachañe yojtsetbemana. 47 Y Jesús Nazaretocá chëjana yojtsachnëjuanama cha yojátatsëmbona ora, tojanontsé mëntsá uayebuáchana: —¡Jesús, Davídbentšana Entšá, šmotselastemá ca!

48 Chorna, banga chë jtaná imojtsácacana iytëca chaóbemama. Pero cha más yojtsáyebuache: —¡Davídbentšana Entšá, šmotselastemá ca!

49 Chora Jesús tojantsá y chë ínÿënga tojanéyana: —Chë jtaná mochembo ca.

As chë jtaná tmojanchembo, y mëntsá tmojanianyana: —¡Añemo cochtsebomna; motsbaná! Jesús cmontsechembuana ca.

50 Y chë jtaná, quefsaíya jtsenátsejquëse, yojontsënja y betscó Jesúsbioye yojobeconá.

51 Chora, Jesús chë jtanábioye tbojantjá: —¿Ndayá cojtseboše atše achiamana chjamama ca? Y chë jtaná tbojanjuá: —¡Buatëmbayá, šmolesenciá atše chašuatabínÿnama ca!

52 As Jesús tbojanianyana: —Motsatoñe. Tšabá jtsatsmënana Bëngbe Bëtsábeñe icošbuachéyeca, tšabá contsatsmëna ca.

Y cachora cha tšabá ibojtabinÿna, y Jesúsbioye benachëjana ibojtsëstona.

11

Jesús Jerusalenoje tojánashjango
(Mt 21.1-11; Lc 19.28-40; Jn 12.12-19)

1 Ya Jerusalenoje imojtsebeconá ora, Betfagé y Betania pueblënga béconana, Olivos ca uabaina tjashe juachañe, Jesús uta chabe uatsjédayata tojanichamó, 2 y mëntsá tojanéyana: “Tsëndatbe natsana entsemna base pueblotëmoye motsata. Chašojáshjango y cachora šochanjínÿëna canÿe burrotema utsbuaná; chábeñe cabá ndocná tonjenojayé. Sochjuajafjoná y šochjuánatse. 3 Nderado nda, ¿ndáyeca šmojtsanachá ca? chacmojátjase, šochjojuá: ‘Bëngbe Utabná bontsájaboto y chora bochantabáiseboshjona ca.’ ”

4 As chata tbojána, y tbojáninÿëna chë burrotema tsáshenañe, canÿe bësásañe utsbuaná, y imojuajafjoná.

5 Y básefta entšanga chiñe imojtsemnënga, chátbioje tmojanéyana: “¿Ndayá šojtsama? ¿Ndayeca chë burrotema šojtsajafjná ca?”

6 As chata tbojanjuá ntšamo Jesús tojanéyancá; y chë entšanga tmojanalesenciá chë burrotema chamuánatsama. 7 Chentšana, chë burrotema Jesúsbioje tmojanánatse; chë burrotëbeñe chatbe entšayá tbojanátatse, y Jesús chábeñe tojanenojayé. 8 Bëtscá entšanga chëngbe entšayá chë benachëjana imojtsanëtëtsatsana, y ínÿënga chë jajoca

imojuatëtsetse buacuashangá chiñe imojuacjaye. ⁹ Y chë natsana imojtsajnënga y chë ústonoyënga mëntsá imojtsaiuáye buache: “¡Bëngbe Bëtsá matschuanga! ¡Corente bendición bomná, chë Bëngbe Utabnabe obenánaca tojabá! ¹⁰ ¡Tša tšabá chë echanjóshjango amëndayana, bëngbe bëts taitá David yojëftsemánda orcá! ¡Bëngbe Bëtsá celocá matschuanga ca!”

¹¹ Jesús Jerusalenoye tojánashjango, y Bëngbe Bëtsabe bëts yebnoye tojánamashëngo. Chabe shëconana lempe yojëftserrepárase, y ya yojtseibétatana causa, chabe bnëtsana uta uatsjëndayëngaftaca tojëftsanbocna, Betania puebloye.

Jesús tojánayana canye betiye ndoñe más chaondëshájona ca
(Mt 21.18-19)

¹² Yëfsana, Betaniocana Jerusalenoye chënga imojtésajna ora, Jesús tbojánishëntsena. ¹³ Bënocana canye higo betiye yojinýe; as tojána jontješiyama tainashajo o ndoñe. Pero nýe tsbuanáchënga chiñe yojínýena, chora ndoñe shajo tempo bëtsemna causa. ¹⁴ As Jesús chë higo betiyoye tojánayana: “¡Ndocna te más chaondëshájona entšanga chamosama ca!”

Y chabe uatsjëndayënga imojouena ntšamo cha tojanayancá.

Jesús, Bëngbe Bëtsabe bëts yebnentsana enënga y obuámnayënga tojtanëbuacna
(Mt 21.12-17; Lc 19.45-48; Jn 2.13-22)

¹⁵ Jerusalenoye tmojánashjajnantsana, Jesús Bëngbe Bëtsabe bëts yebnoye tojánamashëngo, y tojanontsé chentšana jtëbuacnana chë chentše imojtsena y imojtsobuámnayënga. Chëntšnaca imojtsemna entšanga canye crocénana enënga, y chë crocénana nýe Bëngbe Bëtsabe bëts yebnentsama inoservena. Chë entšanga crocénana atrocayëngbe mesëshangá tojtsanenásatajchquëca, y chë palomatëmënga enëngbe tšenëšëngnaca; ¹⁶ y ndoñe tonjanalesenciá ndocná Bëngbe Bëtsabe bëts yebnëjana chë soyënga chaotsëchnëjuanama. ¹⁷ Y tojanontsé entšanga mëntsá jabuátambana: “Ndegombre, Bëngbe Bëtsabe uabemana palabrënguiñe cha mëntsá tojánayana: ‘Atšbe bëts yebna echantsabaina nýetsca luarentša entšangbiamá átšeftaca encuéntaye yebna ca’; pero tšëngaftangna atbëbanëngbe oyeniñe chë yebna šmojtsebema ca” —Jesús tojanëyana.

¹⁸ Chë bachnangbe más uámana amëndayënga y chë ley abuátambayënga tmojántatšëmbona ntšamo yojochnënguama; as tmojanontsé enójuabnayana ntšamo jobenayana cha jóbana, cha imojtsebiauatja causa, er nýetsca entšanga imojtsenjanaye ntšamo cha yojanabuátambana. ¹⁹ Pero yojtseibétatana ora, Jesús chabe uatsjëndayëngaftaca chë bëts pueblentsana yojesóbocñe.

Chë higo betiye tojtsanbuashá
(Mt 21.20-22)

²⁰ Yëfsana cachëse, cachëjana imojtésachnëjuana ora, tmojáninýe chë higo betiye parejo tbëtëjëngaca yojtsebuashá. ²¹ Chora Pedro yojenójuaboye ntšamo yojopásama; as Jesús bioye tbojanayana: —¡Buatëmbayá, minýe; chë tconjayana ndocna te más tšabe betiye chaotsemnana betiye tojtsebuashá ca!

²² Y Jesús tbojanayana: —Bëngbe Bëtsábeñe šmochtsošbuáchiye. ²³ Ndegombre cbëyana, nderado nda quem tjoye tojayana, “¡chentšana mojuaná y bëts uafjajónayoye motsëshbuetše ca!” y chca tojayana ainaniñe inýetsá juabna ntjatsbomncá, y ainaniñe puerte tojtsošbuaché ntšamo tojayancá aíñe yochjochnënguama, ndegombre chca echanjochnëngo. ²⁴ Chiyeca cbochanjáuyana, lempe ntšamo Bëngbe Bëtsáftaca chašmojtsencuënta ora chašmojtsotjanañama, ainaniñe corente šmochtsejuabnaye ya šmojóyëngacñe ca, y ndegombre chca šmochántsebomna. ²⁵ Y Bëngbe Bëtsáftaca chašmojtsencuënta ora, šmochjenójuaboye nderado nda ndaye bacna soye tšëngaftangbiamá tojamama, y cháftaca cabá etonánënga šmojtsemnëse,

šmochtseperdóna; chca, Bëngbe Bëtsá, celoca endmëná, tšëngaftangbe bacna soyëngama chacmotsaperdonama. ²⁶ Pero inya ndoñe šmonjaperdonasna, Bëngbe Taitá, celoca endmëná, cach ndoñe tšëngaftanga quecmochátaperdonaye ca —cha tojánayana.

Jesusbe obenana

(Mt 21.23-27; Lc 20.1-8)

²⁷ Chca tojanopasá chentšana, Jerusalenoye chënga tmojesaná. Jesús Bëngbe Bëtsabe bëts yebnëjana yojtsobuertanëntscuana, chábioye tmojanobeconá bachnangbe amëndayënga, ley abuátambayënga y chë judiëngbeñe bëtsëjemëngcá amëndayënga, ²⁸ y mëntšá tmojantjá: —¿Ndaye deréchoca chë contsama soyënga aca cojtsama ca? ¿Chca jtsamama nda obenana tcmënjatšetá ca?

²⁹ As Jesús tojanëyana: —Atšnaca sëntsebmoma canye soye tšëngaftanga jatjayama. Chašmojojuase, átšnaca cbochjáuyana ndaye deréchoca atše chca stsama. ³⁰ ¿Nda Juan chë Ubayaná tbojanichmó entsanga jubáyama, Bëngbe Bëtsá o entsanga? Smëyana ca.

³¹ Chora chënga tmojanontšé mëntšá enatsëtsnayana: “ ‘Bëngbe Bëtsá ca’ chamojojuase, cha šochanjáuyana: ‘As ¿ndáyeca chë cha tcmojanabuayená soyënguiñe ndoñe šmonjanošbuaché ca?’ ³² Pero ndoñe quemuátobena jayanana ‘entsanga ca’.” Chca tmojánayana, er chënga entsangbiana imojánauatja, er nyetscanga imojanjuabná, Juan ndegombre Bëngbe Bëtsabe juabna oyebuambnayá yojamnana. ³³ Chcasna, chënga tmojanjuá: —Bënga ndoñe queftsátstatšëmbo ca.

Y Jesús tojanëyana: —As atše cach ndoñe quebochatëyana ndaye deréchoca atše chca stsama ca.

12

Chë puerte bacna trabájayëngbiana cuento

(Mt 21.33-46; Lc 20.9-19)

¹ Chora Jesús tojanontšé cuentëngaca jabuátambana. Mëntšá tojanëyana: “Canye entšá bëtská uvas betiyënga yojáje, y chë shëconana yojajëtja. Chë uvasëšangá juantsëtetjamna canye base luare yojajutjo; y canye tsbanana jebna soye yojapórma chiñe jtsashanyama. Chentšana, inye trabájayënga chë jajañe yojúyentsame, y chana inye luaroye yojtsoñe. ² Chë uvasëšangá juashacama tempo yojobuache orna, chë jajañe nduiño canye oservená ibojíchmua chë arrëndayënga jáuyanama ntsachetšá chë nduiño ibojtsotocánama. ³ Pero chëngna, cha imojishache, imojtsejantšetaye, y tondaye ntajatacá imojtichmuá. ⁴ Chentšana, chë nduiño inye oservená ibojíchmua; pero chana, bestšaše imojtselísia y podesca imojtsóyenguango. ⁵ Chentšana inya ibojatichmuá, y chana chë arrëndayënga imojtsóba. Y bángnaca yojichamuá; pero chëngna, ínÿengna imojtsajantšetaye y ínÿengna imojtsëbaye.

⁶ “Chë nduiño cabá canya ibojtsábojamna jíchmuama: cachabe bonshana uaquiñá. Cabana, cha ibojíchmua y mëntšá yojtsejuabnaye: ‘Atšbe uaquiñá cocayé mochanjóyeunaye ca.’ ⁷ Pero chë arrëndayënga cha imojinÿe ora, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbanga, y lempe chabe otocana soyënga bëngbiana echanjoquéda ca.’ ⁸ Chcasna, cha imojishache, imojtsóba y chë uvas betiyënga jajañentsana más chcoye imojetsëtšena ca” —Jesús tojancuentá.

⁹ Jesús chca jacuéntama tojanpochocá ora, tojánayana: “Y asna, ¿ndayá chë fshantse nduiño yochjama ca? Cha co echanjá y chë trabájayënga echanjetsëbaye, y inye trabájayënga chë uvas betiyënga jajañe echanjárrendaye.

¹⁰ “¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntšá endayana:

Chë yebna jebuanënga tmojtsanaboté ndëtšbé,
mora chë más bëts uashacuanësentše entsejájona.

11 Chë soye Bëngbe Utabná, Bëngbe Bëtsá chca tojama, y bënga chama ojnanánënga fsëntsemna ca.”

12 Chora, chë bachnangbe amëndayënga y chë bëtsëjemëngcá mándayënga tmojánbošena Jesús jishachana, er chënga tmojanenótatšëmbona cha chca tojancuentá jinýanýiyama chënga mo chë puerte bacna trabajayëngcá imojanmënama. Pero entsangbiama imojtsauatja, chíyeca cachcá tmojanonýá y chentsana imojtsóñënga.

Chë Romoca bëts mandadbiama impuesto jtsatsquëcjnyama

(Mt 22.15-22; Lc 20.20-26)

13 Chentsana chënga, básefta fariseunga y Heródesbe ústonënga Jesúsbioye tmojanichamó, ndayá cha tojayaniñe jisháchichiyama, as chca jtsebomnama ndaye sóyeca mandadëngbeñe cha mal jaquédana. 14 Chënga tmojána y Jesús tmojanियana: —Buatëmbayá, bënga fsëndétatšëmbo aca ndegombre soyënga cnetsabuátambama, y ndoñe jatuenanana nýe ntšamo entsanga tmojatichamcá, er acbiama tondaye quenatámana nda más uamaná o nduamaná tomnana; y contsabuatambá ndegombre tšabe vida jtsebomnama, ntšamo Bëngbe Bëtsá yomandacá. Chcasna, ¿tšabá tanántsemana, César, chë Romoca bëts mandadbiama bënga impuesto jtsatsquëcjnyana? ¿Fchtsatsquëcjnyaye o ndoñe ca? —chënga tmojantjá.

15 Jesús yojtsetátšëmbo, chënga bacna entsanga ntšamo ndegombre tmojuabnacá ndinýinýnayënga imojamnama; chíyeca tojanéyana: —¿Ndáyeca tšëngaftanga šmojtseboše chë sóyeca atše jisháchichiyama? Canýe denario crocénana šmiyëboñe, atše chayobená jinýama ca.

16 As canýe crocénana tmojanoyé y Jesús tojanéyana: —¿Ndabe jubiá quem crocenániñe yojtsemna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubiá; cha chca enduabaina ca.

17 Chora Jesús tojanéyana: —Chcasna, César šmochtoyiye cha ibotocana soye; y Bëngbe Bëtsana cha ibotocana soye ca.

Y nýetscanga chama imojenjnaná.

Obanënga jtayenama Jesús tmojantjá

(Mt 22.23-33; Lc 20.27-40)

18 Chentsana, báseftanga saduceo ca uabaina entsanga tmojána Jesús jinýama. Chënga imojanjuabná obanënga ndocna te ntayenana ca. Chíyeca, Jesús mëntšá tmojanियana:

19 —Buatëmbayá, Moisés tojëftsanabema, nderado canýe boyá tojóbana y básënga ndoñe tonjëftsabáshejuanësna, canmëna chë uabentsá chë shémaftaca jtobouamayana, chca, chabe uabochená obanabiama básënga jtsabamnama ca. 20 Y chcase, canýe, canýsëfta catsátanga monjamna. Chë natsaná tonjanobouamá y tontsanóbana básënga ntjëftsabashejuancá. 21 Chentsana, chë ústona uabentsá chë shémaftaca tonjanobouamá, pero chana tontsanóbana, básënga ntjëftsabashejuancá; chë inýe uabentsáftaca cachcá tonjanopasá. 22 Chca, nýetsca canýsëfta catsátangaftaca cha tonjanobouamá, pero ndocná básënga ntjëftsabáshejuanana. Y chentsana chë shembásanaca tontsanóbana. 23 Y morna, chë obanënga chamojtayena ora, ¿ndabe chë canýsëfta catsátanguentšabe shema chë shembása yochtsemna, nýetscanga cháftaca tmojanobouamase ca? —chënga tmojantjá.

24 As Jesús tojanéyana: —Ntšamo Bëngbe Bëtsabe uabemana palabrënguiñe endayancá ndoñe tcmónjosertá, ni Bëngbe Bëtsabe obenanama. Chíyeca ntšamo ndoñe yondmëncá šmonsichamo. 25 Er obanënga chamojtayena ora, ni boyabásënga ni shembásënga quemochatóbouamnaye, y chca, chënga mochántsemna mo celoca angelotemëngcá. 26 Y chë obanënga jtayenama, ¿Moisesbe librëšañe ndoñe šmëndualía ntšamo Bëngbe Bëtsá tbojanianama, chë betiyetema yojtsángbototjuana ora? Bëngbe Bëtsá mëntšá tbojanियana: “Atše sëndmëna Abraham, Isaac y Jacobëbe Bëtsá ca.” 27 Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entsangbe Bëtsá ca,

er masque chënga tmojanóbana, chënga cabá Bëngbe Bëtsáftaca mondoyena. Tšëngaftanga canye ndoñe ndegombre soyiñe šmontsemna ca —tojanëyana.

*Chë más bëts uámana mando
(Mt 22.34-40)*

²⁸ Chentše yojtsemna canye ley abuatambayá. Cha yojouena ntšamo Jesús y chënga imojtsenatsëtsnayana, y yojtsetátšëmbo Jesús tšabá tojanëjuama. As, tojanobeconá y Jesúsbioye tbojantjá: —¿Ndayá chë más bëts uámana mando yomna ca?

²⁹ Y Jesús tbojanjuá: —Chë más uámana mando mëntsá endmëna: “Israeloquënga šmochjouena, Utabná, Bëngbe Bëtsá endmëna, y nye canye Bëngbe Utabná endmëna, ndocná más. ³⁰ Utabná Bëngbe Bëtsá cochtsebobonshana nyets acbe ainánaca, nyets espíritoca, nyets juábnaca y nyets añémoca.” ³¹ Y chentšana quem inye mándnaca: “Ndëmua entšánaca cochtsebobonshana, ntšamo cach aca cuenobobonshancá.” Ndocna mando quem uta mandama más quenatámana ca —Jesús tojánayana.

³² Chora, chë ley abuatambayá Jesúsbioye tbojanayana: —Buatëmbayá, puerte tšabá tcjayana. Ndegombre yomncá contsichamo, nye canye Utabná endmëna y ndocná más. ³³ Y cha jtsebobonshánana nyets ainánaca, juábnaca y añémoca, y ndëmua entšánaca jtsebobonshánana cachá cuenobobonshancá, puerte cuámana. Cach nyetsá ndoñe quenatámana bayënga jtsëbánayana, ni chë uátšëmbona soyënga Bëngbe Bëtsá jëtschuayama ca.

³⁴ Cha nyets juábnaca tbojanjuama Jesús tojáninye ora, tbojanayana: —Batšatema cmontsebuáshbena jtseprontánama, Bëngbe Bëtsá chacolesenciama acbe ainanentše jtsemándayama ca.

Y chentšana, ya ndocná yonjenñëmua Jesús más jatstjanayama.

*¿Cristo ndabe entšábentšana yomna?
(Mt 22.41-46; Lc 20.41-44)*

³⁵ Jesús Bëngbe Bëtsabe bëts yebnentše yojtsabuátambaye ora, tojánayana: “¿Ndáyeca chë ley abuátambayënga mondbëtsichamo chë Uámana Uabuayaná Davídbentšana iuabó ca?

³⁶ Cach David, chë Uámana Espíritbe mándoca mëntsá tojánayana: Bëngbe Bëtsá, atšbe Utabná Crístbioye tbonjanayana:

atšbe catšbioica mótbema,

atšbe obenánaca, acbe uayayënga acbe cucuatšinë chamoquedama chjamëntscuana ca.

³⁷ ¿Ntsámose Cristo Davídbentšana Entšá nántsemna, cach David ‘Utabná ca’ chábioye tbojtsabobuátmëse ca?” —cha tojanëyana.

Y chë bëts cá entšanga, oyejuayënga imojtsuenana.

*Jesús chë ley abuátambayëngbiama tojánayana, chënga ndoñe tšabá montsama ca
(Mt 23.1-36; Lc 11.37-54; 20.45-47)*

³⁸ Mëntsánaca Jesús chënga yojtsabuátambaye: “Cuedado šmochtsebmoma y ndoñe šmattsama chë ley abuatambayëngcá. Chënga jtsogusetánana bënëna entšayangaca jtsajnana y jtsebošana tsáshenañe entšanga nya respétoca chamotsacheuanama. ³⁹ Chë judiëngbe enefjuana yebnënguenache, chë más uámana luarënguiñe jtsetbiámanana, y chë fiestënguenache nya quëfseroca. ⁴⁰ Pero chënga, viudángbioye chë tmobomna soyënga jtsabacayana, y entšangbe delante tšabá chamotsënyama, y chëngbioye imojtsaíngñama ndoñe chaondëtsótatšëmbuamna, Bëngbe Bëtsáftaca tša jtseñcuéntayana. Chë causa, Bëngbe Bëtsá ínÿengbiama más chënga echanjácastigaye ca” —Jesús tojánayana.

*Jesús yojtsënyaye chë crocénana quëcjnyayënga
(Lc 21.1-4)*

⁴¹ Jesús jabuátambama tojanpochocá ora, tojanótbema Bëngbe Bëtsabe bëts yebnentše, chë crocénana quëcjnyayëtema ndirichiñe; y chë crocénana quëcjnyayënga yojtsënyaye. Bëts cá bomnëngna beca crocénana imojtsequëcjnyaye. ⁴² Chora, canye viudá nd-bomnëjëmna yojbeconá y nye uta crocénana chëtëmiñe yojaftsesegóra. ⁴³ Chora

Jesús chabe uatsjéndayënga tojánachembo chamobéconama, y mëntšá tojanéyana: “Nde-gombre cbéyana, quem viudá ndbomnëjema, Bëngbe Bëtsabiana nyetscangbiana más tonjëftseseGORÁ. ⁴⁴ Chë bomnëngna chë yojtsóyentsjamentšana tmonjëftseseGORÁ, y cabá bomnana imotsóbomñe; y chë viudana tonjëftseseGORÁ lempe ntsachetsá yobomncá; masque tša ndbomnëjema, chë vida jtsebomnama lempe ntsachetsá yobomncá tonjëftseseGORÁ ca.”

13

Jesús tojánayana chë Bëngbe Bëtsabe bëts yebna lempe mochjápochocama
(Mt 24.1-2; Lc 21.5-6)

¹ Jesús Bëngbe Bëtsabe bëts yebnentsana tojëftsanbocna ora, canye chabe uatsjendayá tbojaniana: —Buatëmbayá, minye, jtša bëts ndëtsbenga, y tša botamana bëts yebnënga ca!

² Chora Jesús tbojaniana: —Tšabá cochjinye tša botamana bëts yebnënga. Pero muentše ndoñe queochaisoquéda ni mo canye ndëtsbé inyëbé juatsboye. Lempe mochantsePOCHÓCA ca.

Ntsamo yochtsemna quem luare jopochócama te chaojtsobeco ora
(Mt 24.3-28; Lc 21.7-24; 17.22-24)

³ Chentšana, Olivos tjashoye chënga tmojána. Bëngbe Bëtsabe bëts yebnentsa ndirichiñe yojamna; y Jesús tojanótbema ora, Pedro, Santiago, Juan y Andrés iytëcana tmojantjá, ⁴ ntšamo cha tojanayancá ntseco yochjanopásama, y chca jopásama ya tojtsobecuama entšanga chamotsetatsëmbuama, ndayá Bëngbe Bëtsá yochjanma ca.

⁵ Chora Jesús tojanéjua: “Cuedado šmochtseBOMNA ndocná chacmondáingñema.

⁶ Banga mochanjabo y mochantsabíchamo chënga Jesús imomna ca. Mochántsichamo: ‘Atše chë Cristo sëndmëna ca’, y chca, ba entšanga mochanjáingñaye.

⁷ “Entšanga tmojtsentsjanama y nderado mochjentsjámna tšëngaftanga chašmojouena ora, ndoñe šmattsauatja; er chca chaochnënguama entsemna, pero masque chca, chora chë quem luare jopochócama tempo cabá ndoñe queochátsmëna.

⁸ Canye luarentša entšanga inye luaroca entšangaftaca mochántsentsjanaye, y canye amëndayábentša entšanga inye amëndayábioca entšangaftácnaca; ba luarënguenache fshantse echanjuangmëmana y bëts shëntsana echanjóshjango. Masque chca jasúfriase, más chcoye cabá más mochanjatssúfria.

⁹ “Pero tšëngaftangna cach tšëngaftangbiana šmochtsantješna; entšanga cmochanjáshëche y amëndayëngbe cucuatšinë cmochanjábashejuana, judiëngbe enefjuana yebnënguenache cmochanjátsetšenaye. Atšbe ústonënga bëtsemna causa, mandadëngbioye y reyëngbioye cmochanjunatse, choca, chëngbe delante ntšamo atšbiana šmotatsëmbcá chašmuayanama. ¹⁰ Er entseyta, quem luare cabá ndopochóca ora, Bëngbe Bëtsabe tšabe noticiënga nyetsca luarënguentša entšangbioye chaóshjanguama.

¹¹ Y inyëngbe cucuatšinë jabáshejuana chcmojtsënachá ora, ndoñe šmattsenócochinëna ntšamo chora šmochjayanama. Chora šmochjayana ntšamo Bëngbe Bëtsá yochjamcá tšëngaftanga chašmuayanama, er tšëngaftanga cányënga ndoñe chora quešmochátoyebuambnaye, ndayá chë Uámana Espíritu tšëngaftangbiajana echantsóyebuambnaye.

¹² “Canye catšata cachabe catšata inyëngbe cucuatšinë bochanjáboshjona chamotsóbama, y bëtsëtsanga cachëngbe básënga mochanjábashejuana chamotsëbáyama; y chë básënga chëngbe bëtsëtsangbe contra mochántsemna y chamotsëbáyama mochanjábashejuana. ¹³ Atšbe ústonënga bëtsemna causa, nyetsca luarënguentša entšanga cmochantsëbuayënja; pero nda nyets tempo átšbeñe ošbuachiyá totsomñe, atsbocaná echántsemna.

14 “Chë Bëngbe Bëtsabe juabna oyebuambnayá Daniel, chë puerte uabouana soye quem luare jopochócama tojéftsanabema. Chë puerte uabouana soye, chca jtsemnama ínÿoca tšëngaftanga chašmojinÿe ora (nda tojtsalía, chabosertá), šmochántsetatšëmbo chë puerte ngménana tempo tojóshjanguama; chorna, chë Judeoca chamojtsemna entsanga, batsjabengoye chamotsacheta; 15 chama, nda cachabe yebnentša tsbanánoca chaojtsemna, chocana ndoñe chaondétastjango, ni chaondétamashëngo tsoicana ndayá jesábocnama; 16 y nda jajoca chaojtsemna, yebnoye ndoñe chaondéta ni mo chabe quëfsaíya jesácñama. 17 ¡Tša lastema chë tempo ngomámanënga o ochóchaye šesonga chamojtsabamna shembásengbiama! 18 Bëngbe Bëtsá šmochtseimpadana chë ngménana tempo ndoñe chaondóshjango uaftena tempo ora, 19 er chora puerte ngmenancá echántsemna. Tša jabuache ngmenancá, quem luare jobojátšama orscana y mentscoñama y más chcoye, cachcá ngménana ndoñe ntjamnana. 20 Chë puerte ngménana tempo, yapa bën ndoñe chaondétsemnama Bëngbe Bëtsá ndoñe tonjalesenciase, ndocná quentatsbocá; pero cha, chabe ubuáyanënga, chabe bocacánënga corente endábabuanÿeshanayeca, echanjama yapa bën tempo ndoñe chaondétsemnama.

21 “Chora nderado nda chacmojáuyana: ‘Minÿe, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana. 22 Er mochanjábocana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chënga mochanjama bëts soyënga chëngbe obenana jinÿanÿiyama, entsanga jáingñama, y tmojobenase, chë Bëngbe Bëtsabe bocacánëngnaca. 23 ¡Cuedado šmochtsebmoma! Cabá chca ndochnëngo ora, lempe tcbonjabuayená ca” —Jesús tojanëyana.

*Bëngbe Bëtsá Entšá tbojanbemá quem luaroye echanjésabo
(Mt 24.29-44; Lc 21.25-36)*

24 Mentsánaca Jesús tojanëyana: “Pero chë tempo, entsanga puerte chamojasufrí chentsana, shinÿe ndoñe queochátsbuashinÿinÿana, juashcona ndoñe queochátsbinÿnaye, 25 celocana estrellënga echanjatquécjana, y quem luarentša tsbanánoca espíritënga obenana bomnënga echanjángmëmana. 26 Y chora, entsanga mochanjinÿe, Bëngbe Bëtsá Entšá tbojanbemá jantšetëshiñe echántsaboye, corente obenánaca y corente buashinÿinÿaniñe. 27 Chora cha chabe angelënga echanjámëndaye chë Bëngbe Bëtsabe ubuáyanënga júbuajama, nÿets luarëngocana, quem fshantsoca cánÿoica juachoicana, celoca ínÿoica juachóntscoñe.

28 “Chë higo betiyama šmochjuatsjinÿe: Tsëm buacuafjënga tojtsebmoma ora y tojtsaiséjotsana, jtsotatšëmbuana chë tšabe tempo ya tojtsaisobecuama. 29 Cachcá, chë soyënga ndayama tšëngaftanga tcbonjauyancá chašmojinÿe ora, šmochántsetatšëmbo Bëngbe Bëtsá Entšá tbojanbemá ya jésabama yojtsemnama. 30 Ndegombre cbëyana, lempe chca echanjochnëngo, morsca entsanga cabá ndóbana ora. 31 Celoca y quem luare echanjopochóca, pero atšbe palabra ndocna te queochaisopochóca.

32 “Pero Bëngbe Bëtsá Entšá tbojanbemá ndayté y ntseco ora yochjésabama, ndocná quenátstatsëmbo, ni chë celoca angelënga, ni Bëngbe Bëtsabe Uaquiñá. Nÿe chë Taitá chama yotátšëmbo.

33 “Chíyeca, cuedado šmochtsebmoma y yejuana šmochtsantješna, er ndoñe quešmátstatsëmbo mocna ora yochtsemna Bëngbe Bëtsá Entšá tbojanbemá jésabama tempo. 34 Echántsemna mo canÿe entsacá; chana inÿe luaroye ya jëftsebocnama ora, chabe oservénënga jëftsamëndana chabe yebna chamotsinÿenama. Cada ona canÿe trabajo jëftsebónÿiyana, y chë shanÿá jëftsemándana botamana chaotsantješnama. 35 Chcasna, cuedado šmochtsebmoma, šmochtsantješna, er ntšamo chë trabajayëngcá chë yebna nduiño ntseco jtashjanguama, ndoñe ntsetatšëmbuana, mo nderado jétatana, tsëntseto ora, bínÿanoye o cachëse, tšëngaftanga cachcá, Bëngbe Bëtsá Entšá tbojanbemá ntseco

jésabama ndoñe quešmátstatšëmbo; ³⁶ ndoñe cuedado šmontsebomñese, nderado cha nyē ndeolpe nántashjango, tšëngaftanga ndëprontánënga šmojtsemna ora, mo ftsomañe cuenta. ³⁷ Chíyeca, ntšamo tšëngaftanga cbochanjauyancá, nyëtscanga chanjáuyana: ¡Puerte cuedado šmochtsebomna ca!” —Jesús tojánayana.

14

Entšanga imojtsejuabnaye ntšamo jamëse Jesús jishachama
(Mt 26.1-5; Lc 22.1-2; Jn 11.45-53)

¹ Bashco fiestama uta te yojetsájamna, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama fiesta, chë levadúraca ndëpormana tandëse say-ora. Chë judiëngbe bachnangbe amëndayënga y chë ley abuátambayënga imojtsenguaye ntšamo Jesús jishachana jtseíngñase, y jtsóbama. ² Báseftanga imojtsichamo: “Quem fiestëntscuana ndoñe, er nderado entšanga yapa muanjónťša enbouenanana ca.”

Canýe shembása botamana uanguëtšë béjaye Jesusbe bestšašíñe tbojanbuešcja
(Mt 26.6-13; Jn 12.1-8)

³ Jesús Betanioca yojtsemna, Simón chë bacna nguayanánaca šocá ca uabobuatmabe yebnentšë; mesëshentšë Jesús yojtsemna ora, canýe shembása tojánashjango. Chë shembása yojúshjango canýe alabastro jarrëtema jútjena canýe becá uámana y botamana uanguëtšë béjayeca, ena nardana uanguëtšiyë; chana chë jarrëtema yojátsba y chë béjaye Jesusbe bestšašíñe tbojanbuešcja. ⁴ Chca tmojáninyë ora, báseftanga chentšë imojtsemnënga tmojanotjayaná y mëntšá imojtsenatsëtsnaye: —¿Ndáyeca nyë bonamente chë soye yojtsemna ca? ⁵ Chamna, matmënjobenanga chë béjaye unga patse denario crocénánama juiyana, y chánaca ndbomñëjmënga matmënjújabuache ca.

Y chë shembásabiama podesca imojtsichamo.

⁶ Chora Jesús tojanëyana: —¿Ndáyeca quem shembása ndoñe cachcá šmochanjonýaye ca? ¡Ndocá matatsana! Atšbiama tšabe soye tonjama. ⁷ Er ndbomñëjmënga nyëts tempo tšëngaftangbeñe mochanjëftsemna, ndayténaca šmojábošena ora, šmatjobenaye tšabe soye chëngbiama jamana; er atšë tšëngaftangaftaca ndoñe nyëts tempo quichásemna. ⁸ Quem shembása lempe ntšamo tojobenacá atšbiama tonjama. Chca tonjama ora, atšbe cuerpo tonjaprontá atšë juatbontsa tescama, cabá ndoñe obaná sëntsemna ora. ⁹ Ndegombre cbëyana, quem luaroca ndayéntšnaca Bëngbe Bëtsabe tšabe noticiënga chamojtsabuayiyná chentšë, ntšamo quem shembása tojamámnaca becá mochanjëftšóyebuambaye, chca, entšanga chabiama chamotsenójuabnama ca —cha tojanëyana.

Judas tojána bachnangbe amëndayëngbioye, Jesús chamuishachama
(Mt 26.14-16; Lc 22.3-6)

¹⁰ Chentšana, Judas Iscariote, canýe chë bnëtsana uta uatsjendayënguentšá, tojána chë bachnangbe amëndayëngaftaca jencuéntama, Jesús chëngbe cucuatšíñe jaboshjonama. ¹¹ Chca tmojanuena ora, chënga imojóyejuaye y tmojanšbuachená crocénana jtabuényana. Y cach orscana Judas yojtsenguaye ntšamo jamana y ndëmua ora, Jesús chëngbe cucuatšíñe jaboshjonana.

Jesús chabe uatsjendayëngaftaca Bashco saná tojanse
(Mt 26.17-29; Lc 22.7-23; Jn 13.21-30; 1 Co 11.23-26)

¹² Chë Bashco fiesta bojatšenté, chë levadúraca ndëpormana tandëse sayté, chë uatsjendayënga Jesús tmojantjá: —¿Ndëmoca cojtseboše bënga fchaiprontama, Bashco saná chacosama ca?

Chca te chë judiënga imojanamana, Bëngbe Bëtsá jëtschuayamna canýe oveshá jóbana chora jasama, chë Egiptocana chëngbe bëts taitanga Bëngbe Bëtsá tojánatsebacama jtenójuaboyama.

13 As Jesús uta chabe uatsjédayata tojanichamó y mēntšá tojanéyana: —Chē bēts puebloye motsata. Chašojáshjango ora, canye bacó cmochanjóbiatše, matbajiñe búyeshe echantsabuyambaye; cha šochjuasto y šochtserreparana ndémuanye yebnentše yochjámashēnguama; 14 y chē yebna nduiño šochjauyana: “Buatēmbayá tonjayana: ¿Ndayentše chē tsañe yojtsemna, Bashco saná atše atšbe uatsjédayēngaftaca jasama ca?” 15 As cha cmochanjínñanyiye canye bēts tsañe, tsbanana pisoca, lempe prontániñe; chentše šochjapróna bēnga mochjasama ca.

16 As chē uatsjédayata tbojána y tbojáninñena lempe ntšamo Jesús tojanéyancá; y chentše chē Bashco saná tbojanprontata.

17 Tojanibétata ora, Jesús chē yebnoca tojánashjango, chabe bnētsana uta uatsjédayēngaftaca. 18 Y mesēshentše imojtseye ora, Jesús tojanéyana: —Ndegombre cbéyana, canya tšēngaftanguentšá, átšeftaca entsesá cha, uayayēngbe cucuatšīñe šochanjáboshjona ca.

19 Chorna chē uatsjédayēnga ngménaca imojtsemna, y tmojanontšé canjánya cha jatjayana: —¿Atše chtsemna ca?

20 Y Jesús tojanéjua: —Canya chē bnētsana utatentšá entsemna. Chabe tandēse cach atše sēntsefchecuacná šcnenentše cha entsefchecuacná. 21 Ndegombre, Bēngbe Bētsá Entšá tbojanbemáftaca echanjopása ntšamo chabiamá Bēngbe Bētsabe uabemana palabrēnguiñe endayancá. Pero, itša lastema chē bochjáboshjonabiama! Chabiamá más tšabá manjamna ndoñe ntjónñana ca —Jesús tojánayana.

22 Imojtseantscuana, tandēse tojanca, Bēngbe Bētsábioye chama tbojtanchuá, tojanjataye y chabe uatsjédayēnga tojanéjatá, y mēntšá tojánayana: “Mocñēnga, mosēnga, atšbe cuerpo entsemna ca.”

23 Chentšana, canye coptema vínoyeca tojanaca, Bēngbe Bētsábioye tbojtanchuá, chabe uatsjédayēnga tojanēfsašé, y nyetscanga tmojanofsé. 24 Mēntšá tojánayana: “Quem vínoye atšbe buiñe entsemna. Atšbe buiñe echanjuábuashana entšanga chamotsetatšēmbuama ntšamo Bēngbe Bētsá entšanga tojašebuachenacá ndegombre yochjochnēnguama. Chē buiñe bētscá entšangbe tšabiamá echanjuábuashana. 25 Y ndegombre cbéyana, morscana ya ndoñe más chē uvasēentšana obocniye quichaisofsiye. Chē tsēm vínoye tšēngaftangaftaca chanjofsiye, Bēngbe Bētsabe amēndayoca chamojtsemna ora ca” — tojánayana.

Jesús tojánayana, chábioye ndoñe bonjanabuátma ca Pedro yochjánayanama (Mt 26.30-35; Lc 22.31-34; Jn 13.36-38)

26 Bēngbe Bētsábioye jētschuayama tmojancantá chentšana, Olivos tjashoye tmojētsanbocana. 27 Jesús tojanéyana: —Nyetsca tšēngaftanga quem ibeta átšbeñe ošbuáchiyana šmochantsobuetše y šmochántascheta, er Bēngbe Bētsabe uabemana palabrēnguiñe, cha mēntšá tojánayana: “Chē oveshēnga abuajénya chanjóba y chē oveshēnga mochantsáshana ca.” Chca tšēngaftangaftaca echanjopása, uayayēnga chašmojishache ora. 28 Pero obanēnguentshana chaitayenentšana, tšēngaftangbe natsana Galileoye chanjá ca —cha tojanéyana.

29 Chora Pedro tbojanianya: —Masque nyetscanga áceñe ošbuáchiyana chamotsobuetše y chamotsacheta, atše nña ndocna te ca.

30 Chora Jesús tbojanianya: —Ndegombre cbéyana, cam ibeta, ngallo cabá uta soye ndēcánta ora, aca unga soye cochanjayana ndoñe šconduabuatma ca.

31 Pero Pedro más yojtsichamo: —Masque chašotsemna ácaftaca jóbanama, atše ndoñe quichátayana ndoñe cbonduabuatma ca.

Y nyetscanga cachcá imojtsichamo.

Getsemaní luarentše Jesús, Bēngbe Bētsáftaca tbojanencuentá (Mt 26.36-46; Lc 22.39-46)

³² Chentšana, canye luare Getsemani ca uabainoye tmojana. Chocna Jesús tojaneyana: “Muentse motbiana, chentscuana atse choye chanja, Benge Betsaftaca jencuentama ca.”

³³ Y tojefsanebiatse Pedro, Santiago y Juan. Choca cha yojontsa puerte ngmenaca jtsemnama y corente cochtsetseenaná. ³⁴ Chengbioye tojaneyana: “Atsbe ainana puerte ngmenaca entsemna, mo jobanamca. Muentse moquedanga y smochtsefsna ca.”

³⁵ Chentšana, Jesús más natsanoye tojana, tojanoshentsamentse y fshantsontscoca tojanotsejbena y Benge Betsabioye tbojanimpada, jopodianese, che tsa japadesa ora ndoñe chaondoshjanguama. ³⁶ Mentša yojsichamo: “Atsbe Taita, aca lempe jamama condobena; tojopodese, cochjama atse japadesama ndoñe chaondetsemnama. Pero ntšamo atse stsebošca ndoñe chaondetsemna, sino ntšamo aca cojtsebošca ca.”

³⁷ Chentšana, chabe unga uatsjendayengbioye tojtanabo, y chengna imnetsomañe. Chca tojananyena ora, Pedrebioye tbojaniana: “Simón, ¿cotsomañe? ¿Ni mo nye canye hora jtsefsnama ndoñe tconjobená? ³⁸ Smochtsefsna y Benge Betsaftaca smochtsencuentaye, bacna soye jamama ndoñe chacmondócochenguama. Tšengaftanga ndegombre smontseboše espírituca Benge Betsa joyeunayana, pero cuerpiñe ndoñe añemo quešmátsbomna ca.”

³⁹ Jesús cachiñe tojesaná y Benge Betsaftaca tbojanencuentá, cach palabrenga jayanese. ⁴⁰ Yojtabo orna, che uatsjendayenga cachiñe imnetsomañe; chenga imojtsefshetana ocnaye causa, y ndoñe imontsobena ntšamo jojuana.

⁴¹ Chentšana, tojtesaná y tojtanabo ora tojaneyana: “¿Cabá smotsomañe y smotsochnañe? Nye nyetsá; hora tocjobuache, Benge Betsa Entša tbojanbemá bacna soye amengbe cucuatšine mochanjáboshjona. ⁴² Motsbananga, cuajna. Minyenga, atse boshjuaná ya entsebeconá ca.”

Uayayenga Jesús tmojanishache

(Mt 26.47-56; Lc 22.47-53; Jn 18.2-11)

⁴³ Jesús cabá yojsóyebuambnantscuana, Judas, canye che bnetsana uta uatsjendayenguentša, tojanashjango y cháftaca ba entsanga espadjangaca y ngarotbengaca prontanenga. Chenga imojamna che bachnangbe amendayenga, ley abuátambayenga y judiengbeñe betsejemengca mandayengbe ichmónenga. ⁴⁴ Judas, che boshjuaná, tojanjuabó ntšamo jamana entsanga jinyanjyama ndemua Jesús betsemnana. Chiyeca, yojauyana: “Nda chajauámocho, cha echantsemna; smochjishache y cuedádoca smochjuánatse ca.” ⁴⁵ Chcasna, Judas Jesúsbioye tojanobeconá y tbojaniana: “¡Buatembayá ca!”

Y tbojanámocho. ⁴⁶ Chora che entsanga tmojanishache y tmojanánatse.

⁴⁷ Pero canya chentse Jesúsftaca yojtsemná, chabe espadja yojenosengbotentsena, y che bachnangbe más uamana amendayabe oservená canye matscuaše tbojtsanestjango.

⁴⁸ Y Jesús che entsanga tojanatjá: “¿Ndáyeca smojabo espadjangaca y ngarotbengaca atse jishachama, mo atse canye bacá uamana entša cuaftsemncá ca? ⁴⁹ Atse cada te tšengaftangbeñe sendetsemna Benge Betsabe bets yebnoca abuátambaye, y ndocna te choca chešmátanishache. Pero tšengaftanga chca átseftaca smontsama, cachca ntšamo Benge Betsabe uabemana palabrenguiñe endayancá chaotsemnama ca” —tojanayana.

⁵⁰ Chorna, nyetsca uatsjendayenga tmojtsanëuatjaná y tmojtsanacheta, y Jesús cachca che uayayengaftaca tmojesanonjá. ⁵¹ Canye bobontse Jesúsbioye ibojtséstona, nye canye uafjantse entsējua uichetjoná. Cha che entsanga tmojanishache, ⁵² pero chengbe cucuatšine che entsējua jesáboshjonese, che bobontsna enáša yojsachá.

Jesús tmojanánatse che judiengbe uamana amendayengbioye

(Mt 26.57-68; Lc 22.54-55, 63-71; Jn 18.12-14, 19-24)

⁵³ Chentšana, Jesús tmojanánatse che bachnangbe más uamana amendayábioye; y chocna, nyetsca che bachnangbe amendayenga, betsejemengca amendayenga y ley

abuátambayënga tmojánenefjna. ⁵⁴ Pedro bënocana Jesús tbojanasto, chë bachnangbe más uámana amëndayabe yebnentša chashjónscoñe; y chentše tojanoquedá. Chë Bëngbe Bëtsabe bëts yebnoca josticiëngaftaca yojtsetbemana; iñe juachaca yojtsešbonena.

⁵⁵ Chë bachnangbe amëndayënga y chë judiëngbe uámana mándayënga imojtsenguaye canya, nda ndayánaca Jesusbe contra cháuyana, as jobenayama cha chaóbana ca jayanama; pero ndoñe montsaninyana. ⁵⁶ Er masque banga Jesusbe contra uayátsenaye soyënga imojtsichamo, nyetscanga ndoñe cachca soye montsanichamo.

⁵⁷ Báseftanga imojtsaye y mëntšá Jesusbe contra, ndoñe ndegombre betsemncá tmojánayana: ⁵⁸ “Bënga cha fsënjoyeuná mëntšá: ‘Atše quem Bëngbe Bëtsabe bëts yebna, entsangbe pormana yebna, chantsepochoça; y unga tese inye Bëngbe Bëtsabe bëts yebna, entsángbeyeca ndëpormana yebna chanjëtšjebo ca.’ ”

⁵⁹ Pero masque chca imojtsichamo, nyetscanga ndoñe cachca soye montsanichamo.

⁶⁰ Chorna, chë bachnangbe más uámana amëndayá yojtsetbaná, nyetscangbe tsëntsaca yojtsaye, y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

⁶¹ Pero cha nye iytëca yojtsemna y ndocá ibontsëjuana. Chë bachnangbe más uámana amëndayá cachiñe tbojtëtantjá, mëntšá: —¿Aca chë Cristo icomna, Bëngbe Bëtsá chë nda fsëndadoranabe Uaquiñá ca?

⁶² Y Jesús tbojanjuá: —Arseñor, atše cha sëndmëna; y tsëngaftanga šmochanjinye, atše, Bëngbe Bëtsá Entšá tbojanbemá, chë nyets obenana bomnabe catsbioica chantsetbemana, y celoca jantsetëshiñe chántsaboje ca.

⁶³ Chora, chë bachnangbe más uámana amëndayá chabe uichëtjonëjuangá yojt-senántšajatanëca, puerte ibojtsetna causa, y tojánayana: —¿Ndayama más entsanga šochjátëjaboto Jesusbe contra chamuayanama ca? ⁶⁴ Tsëngaftanga šmonjouena ntšamo chë entsá entsichamcá, y chca Bëngbe Bëtsabiana entsemna mo cha cuafjoyenguangcá, chë chabe Uaquiñá yomna ca cha tonjayana ora. ¿Ntšamo tsëngaftanga šmatjayana ca? —cha tojanëyana.

Y nyetscanga tmojánayana, cha ndegombre bacna soye yojtsebomna y jóbanama ibojtsemna ca.

⁶⁵ Chorna báseftanga tmojanontšé Jesús buashëtjnayana; jubiá imojútsbotse, imojtsetantšetaye y imojtsetjanaye: “¡Momalisiá nda tcmënjajantšetá ca!” Y chë Bëngbe Bëtsabe bëts yebnoca josticiëngna imojtsajuebjantsetaye.

*Pedro tojánayana Jesúsbioye ndoñe bonjanabuátma ca
(Mt 26.69-75; Lc 22.56-62; Jn 18.15-18, 25-29)*

⁶⁶ Pédrëna, tsmanoca yojtsemna chashjoca. Chora, canye shembása, chë bachnangbe más uámana amëndayabe oservená yojáshjango; ⁶⁷ y Pédrëbioye tbojáninye ora, cha iñe juachaca yojtsanšbonena, yejuana ibojonýinýiye y tbojanianya: —Acnaca, Jesús Nazaretocáftaca conjánana ca.

⁶⁸ Pero Pedro tojánayana chábioye ndoñe bonjanabuátma ca; y mëntšá tojánayana: —Ndayama cojtsichámuama ndoñe quetsátstatšëmbo, ni quešnátësertana ca.

Y shjoye, amashjuanóntscoñe yojábocna; y chora canye ngallo yojacánta. ⁶⁹ Chë oservená cachiñe Pédrëbioye tbojáninye y tojanontšé chë inyënga jauyanana: —Muánaca Jesusbe uatsjendayënguentsá entsemna ca.

⁷⁰ Pero chana cachiñe tojánayana Jesúsbioye ndoñe bonjanabuátma ca. Chentsana, chë chentše imojtsemnënga Pedro tmojätaniyana: —Ndegombre aca chënguentsá contsemna; ácnaca Galileocá contsemna ca.

⁷¹ Pero Pedro tojanontšé ichámuana: —¡Bëngbe Bëtsá chašotsecastigá ndoñe ndegombre soye stsichámëse ca! —y yojóntša júrayana— ¡Atše chë entsá ndoñe quetsatabuatma, ndabiana tsëngaftanga šmontsatsëtsná ca!

⁷² Y cachora chë ngallo uta soyama yojacánta, y Pedro yojenójuaboye ntšamo Jesús tbojanianama: “Ngallo cabá uta soye ndécánta ora, aca unga soye cochanjayana ndoñe šconduabuatma ca.” Y tojanontsé enóbošachiyana.

15

Jesús Pilátbioye tmojanánatse

(Mt 27.1-2, 11-14; Lc 23.1-5; Jn 18.28-38)

¹ Tojanbinýna ora, chë bachnangbe amëndayënga, chë judiëngbeñe bëtsëjemëngcá amëndayënga y ley abuatambayënga cánýentše tmojánenefjna, nyëtsca chë luarentša más uámana mandayëngaftaca, jenóyeunayama ntšamo jamëse Jesús jóbama. Jesús tmojanëcuébatšëca y tmojanánatse, y Pilato, chë Judeoca mandadbe cucuatšinë tmojánboshjona.

² Pilato Jesúsbioye tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

³ Chë bachnangbe amëndayënga bëtscá soyënga Jesusbe contra imojtsichamo; ⁴ chíyeca Pilato cachiñe Jesúsbioye tbojantjá: —¿Ndocá šcochanjojuá ca? Minýe; bëtscá soyënga acbe contra montsichamo ca.

⁵ Pero Jesús ndoñe más tbonjanjuá; chë causa, Pilato ndoñe yontsetátšëmbo ntšamo jajuaboyana.

Jesús chaóbana ca tmojánayana

(Mt 27.15-31; Lc 23.13-25; Jn 18.38–19.16)

⁶ Cada Bashco fiesta ora, Pilato yojanamana canýe utamená jëtsboshjonana, ndánaca entšanga tmojuabuayaná. ⁷ Chë tempo yojamna canýa Barrabás ca uabainá; cárceloye inautámena chabe enutëngaftaca. Chëngna entšanga tmojtsanëbaye, mandadëngbe entšángaftaca imojentsjaná ora. ⁸ Chora, entšanga tmojánashhajna y tmojanontsé Pilátbioye jauyanana, ntšamo Bashco fiesta ora jamama yojanamancá chaomama. ⁹ Y Pilato tojanéjua: —¿Tšëngaftanga šmojtseboše tšëngaftangbe rey atše chjëtsboshjona ca?

¹⁰ Chca tojánayana, er Pilato yojtsetátšëmbo, chë bachnangbe amëndayëngna envidia causa Jesús chabe cucuatšinë tmojánboshjonama. ¹¹ Pero chë bachnangbe amëndayëngna entšanga tmojanañemó chamuenbouénanama, Pilato jauyanama chëngbiama Barrabás chabuatsboshjona ca. ¹² Y Pilato tojanatjá: —¿Y ntšamo chjama chë “judiëngbe Rey ca” šmondubobuatmáftaca ca?

¹³ Y chënga tmojanáyebuachena: —¡Motsecrucificá ca!

¹⁴ Y Pilato entšanga tojanéyana: —¿Ndáyeca? ¿Ntšamo cha tojobuachjanguá ca?

Pero chëngna más añémoca tmojtëtanayebuachena: —¡Motsecrucificá ca!

¹⁵ As Pilato, entšángaftaca tšabá joquédama yojtsebóšeyecna, Barrabás tbojtanboshjona. Yojámëndaye soldadënga jajuache Jesús chamotsetšenama; y chentšana soldadëngbe cucuatšinë tbojánboshjona, chamocrucificama.

¹⁶ Chentšana, chë soldadënga Jesús tmojanánatse chë mandadbe bëts yebnentša chashjoye, y nyëtsca soldadënga tmojánachembo chamobéconama. ¹⁷ Shbuenda uafjatsenga uinýna entšayá mo reycá tmojanichëtjo; canýe coronësha tmojanapormá uchmašëfjangaca y tmojanabestšajó. ¹⁸ Y chentšana tmojanontsé jachuayana: “¡Bayté judiëngbe Rey cochtsemna ca!”

¹⁹ Canýe niñëfjaca Jesús bestšašinë imojtsëtsjanjnaye, imojtsebuashëtjnaye, y chabe delante imojtsofshëntsaméntšenaye. ²⁰ Y chca imnaftsáboyeyuanentšana, chë shbuenda uafjatsenga entšayá tmojtsanabotsca y cachabe entšayá tmojtanichëtjo, y pueblo chaboye tmojanánatse jacrucificama.

Jesús tmojan crucificá

(Mt 27.32-44; Lc 23.26-43; Jn 19.17-27)

²¹ Chora, canye entsá chëjana yojsatashjajuana, Simón ca uabainá, Cirene pueblóca, Alejandro y Rufbe taitá; jajocana yojsatachnëjuana; y chë soldadëngna imojuatária Jesusbe cruz jëftsocutsayama.

²² Jesús tmojanánatse Gólgota ca uabaina luaroye (hebreo biyañe endayana “Obanabe Bestsashe Luare ca”); ²³ y tmojanabuiyé vínoye mírraca enájuabniye, pero Jesús ndoñe yonjuáyëngacñe. ²⁴ Y chentšana tmojancrucificá; y chabe entsayangamna, tsbanánoye tmojanétsena jinýama ndayá cada ona yochjëftsanácñama.

²⁵ Cachëse, base mošenana ora Jesús tmojancrucificá. ²⁶ Y chabe bestsaše juatsboicna canye uabemana soye tmojananjo. Chiñe yojétsayana ndáyeca cha tmojancrucificama, mëntsá: MUA CHË JUDIËNGBE REY ENDMËNA ca.

²⁷ Y cháftaca útata bacna soye ochjajnayátnaca tmojanacrucificá, canya chabe catsbioica, y ínýana chabe uañicuayoica. ²⁸ Chca cháftaca tmojanma, chaochnënguama ntšamo Bëngbe Bëtsabe uabemana palabrenguiñe chabiamá iuayancá, mëntsá: “Y chábioye tmonjáninýe mo chë puerte bacna soye amënguentsá canya cuaftsemncá ca.”

²⁹ Y chëjana imojsachnëjuana entsanga, Jesús imojsóyenguaye, imojt-sobestšfshanenaye y imojsatsaye: “¡Aca chë Bëngbe Bëtsabe bëts yebna cochtsánenasatajchca y nýe unga tese cochtanjebo, ³⁰ cach aca mentsbocá y cruzocana matastjango ca!”

³¹ Cachcá chë bachnangbe amëndayënga y chë ley abuátambayënga imojsáboyejuana, y chënga imojtsenatsësnaye: “Cha ínýenga tojëftsatsebacá, pero cachá jéntsbecama ndoñe quenátobena. ³² ¡Chë Cristo, chë Israeloca Rey! ¡Cruzocana chauatastjango, bënga jinýama y chábeñe chaftsošbuachema ca!”

Y cháftaca ibojtsecrucificanátnaca ibojtsóyenguaye.

Jesús tojanóbana

(Mt 27.45-56; Lc 23.44-49; Jn 19.28-30)

³³ Nýetsto orscana y las tresëntscoñe, nýets quem luare yojtseibétata. ³⁴ Chca orna, Jesús chabe biyañe tojanáyebuachena: “Eloi, Eloi, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá scojonýa ca?”)

³⁵ Chca tmojanuena ora, báseftanga chentše imojtsemnënga imojtsichamo: “Mouenënga, chë Bëngbe Bëtsabe juabna oyebuambnaya Elías bontsechambuana ca.”

³⁶ As chora, canya tojanótjajo, untja vínoyeca canye esponjëshe tojanfchecuacuá, canye niñëfjiñe tojananguësëtjo y Jesúsbiyoye tojanbeconá chaofšema; y tojánayana: “Cachcá mochjonýaye, er Elías tayochjabo jabátëstjanguama ca.”

³⁷ Pero Jesusna, jabuache tojanoyó y tojanóbana. ³⁸ Y chë Bëngbe Bëtsabe bëts yebnoca yojújonýana entsëjua tsëntsaca yojtsenájataye, tsbanánocana fshantsoye. Chëjua bënëjua inauamna y chë tsatsëntsaca inaujonýana. ³⁹ Chë romano soldadëngbe amëndayá, Jesusbe ndirichiñe yojtsemna; y ntšamo cha tojanobancá tbojáninýe ora, tojánayana: “¡Ndegombre quem boyabása Bëngbe Bëtsabe Uaquiñá yomna ca!”

⁴⁰ Básefta shembásengnaca chentše imojtsemna, bënocana imojtserreparana; chënguentsë imojtsemna María Magdalena; María, Santiago chë más basa y Josebe mamá; y Salomé. ⁴¹ Chë shembásengna Jesús tmojanasto y tmojanájabuache cha Galileoca yojamna ora; y inýe ba shembásengnaca chentše imojtsemna, chë cháftaca Jerusalemoye tmojánanga.

Jesús tmojanatbontsá

(Mt 27.57-61; Lc 23.50-56; Jn 19.38-42)

⁴² Chë yëfsana ochnayté yojtsémnayeca, cach te yojánamna saná japróntana chë yëfsana jasama. Ya yojtseibétatana ora, ⁴³ Pilato yojtsemnoye tojána canye boy-abása, José ca uabainá, Arimatea pueblóca; cha inamna canye chë luarentša uámana mandayënguentsá. Cha Bëngbe Bëtsabeñe yojtsošbuáchiye y yojanobátmana chabe

amëndayana chaóshjanguama. Nduatjca Pilátbioye Jesusbe cuerpo tbojanotjañe. ⁴⁴ Pilato yojenjaná Jesús tša betscó yojóbanama; as tojanmandá chë soldadëngbe amëndayá chamuachembo, jatjayama Jesús ya bën obaná tayojétsemnama. ⁴⁵ Chë soldadëngbe amëndayana Pilátbioye ibojauyana Jesús ya obaná yojtsemna ca; y as chora, Josébioye tbojanlesenciá Jesusbe cuerpo chabotsámbañama. ⁴⁶ Chora, José canye uafjantse lino entsëjua tojanabuamé, Jesusbe cuerpo cruzocana tbojanéstjango, chë lino entsëjuaca tbojanandmaná, y canye cuevëshiñe ndëtsbeñe pormánëshiñe tbojan-jajó; chentsana canye ndëtsbé tojansjoná, y chë cuevëshoye amashjuanentse tojánachto. ⁴⁷ María Magdalena y María, chë José y Santiagbe mamá, tbojáninye ndayentse Jesusbe cuerpo tbojanájoma.

16

Jesús tojtanayena

(Mt 28.1-10; Lc 24.1-12; Jn 20.1-10)

¹ Ochnayté tojanopasá ora, María Magdalena, María Santiagbe mamá, y Salomé, botamana uanguëtse béjaye tmojanabuamé, chíyeca jama Jesusbe cuerpo janëtjuama; ² y tmenguse, chë semana bojatšéntena, cabá cachëse, shinye yojábocna ora, chë cuevëshoye tmojána. ³ Imojtsaye ora imojtsayénatsëtsnaye: “¿Chë cuevëshoye amashjuanentša ndëtsbé nda bochtsabuajuána ca?”

⁴ Pero imojontješiyé ora, tmojáninye chë cuevëshoye amashjuanentša bëts ndëtsbé, chentsana juanániñe. ⁵ As chënga choye tmojánamashjna y choye tmojáninye canye bobontse bën uafjantse entsëjua uichëtjoná, chë cuevëshentša catsbioica inétsotbemañe; y chë shembásenga imojouatjaná. ⁶ Pero chë bobontse tojanéyana: “Ndoñe matauatjéngana; tsëngaftanga šmondënguá Jesús Nazaretocá, chë tmonjancrucificá cha. Cha ya tontayena; muentse ndoñe quenátsmëna. Minyënga cha enjëftsejajonentse. ⁷ Motsajna, y Pedro y chë inye uatsjéndayënga šmochjáuyana: ‘Jesús tsëngaftangbe natsana Galileoye echanjá. Choca cha šmochanjinye, ntšamo cachá tmojanëyancá ca.’ ”

⁸ As chë shembásenga betscó chë cuevëshentšana tmojésanbocana, er puerte auatjanánënga imojtsemna y ngmëmnyënga imojtsemna; y chë causa, chë soyama ndocná tmonjaniyana.

Jesús, María Magdalénbioye tbojánebëbocna

(Jn 20.11-18)

⁹ Jesús tojtanayenentšana, chë semana bojatšénté, Jesús natsana María Magdalénbioye tbojánebëbocna. Tempo Jesús chábensana canyësëfta bacna bayëjënga tojtanébuacana. ¹⁰ Cha Jesúsbioye ainá tbojáninýentšana, tojána Jesúseftaca imojánajnënga chama jaúnayama; chëngna ngménaca y šachénaca imojtsemna. ¹¹ Pero chënga tmojanjuabó nderado mo ndoñe ndegombre yontsemna ca, chë Jesús ainá yojtsemna ca, y María Magdalena chábioye tbojáninye ca tmojanuena ora.

Uta ustonata Jesúsbioye tbojáninye

(Lc 24.13-35)

¹² Chentsana, uta ustonátbioye, básefta yebnënga yojamna luaroye ibojétsaye ora, Jesús tojánebëbuacna, mo inya cuaftsemncá. ¹³ Chora chata tbojésanshëcna chë inyënga chama jacúntama; pero chëngna cach ndoñe ndegombre ca tmojanjuabó.

Jesús chë uatsjéndayënga tojanichamó, Bëngbe Bëtsabe soyëngama nyëtsquénache jábuayenama

(Mt 28.16-20; Lc 24.36-49; Jn 20.19-23)

¹⁴ Cabana, Jesús chë bnëtsana canye uatsjéndayënga tojánebëbuacna, chënga imojtsesaye ora; y tojanëcácana chë cha ainá yojtsemnama ndoñe ndegombre yontsemna

ca tmojánjuaboma y nýets ainánaca chábeñe ndoñe montsanošbuachema, er cha ainá tmojáninyënga chama tmojanacuntá ora, chca ndoñe ndegombre yontsemna ca chë uatsjédayënga tmojánayana.

¹⁵ Chentšana Jesús tojanéyana: “Nýets luarëngoye motsajna, y nýetsca entšanga chë tšabe noticiëngama šmochtsabuayiynaye. ¹⁶ Nda chiñe chaojtsošbuaché y tšëngaftanga chašmojuabaye, cha atsbocaná echántsemna; pero nda ndoñe tontsošbuaché, cha nýets tempo castiganá echántsemna. ¹⁷ Chë átšbeñe ošbuáchiyënga ndegombre soyënga imojtsabuayiynama, entšanga mëntšá mochántsetatšëmbo: atše jótšëmbonëse, átšbeñe betsošbuachéyeca, entšángbentšana bacna bayëjëngbe juabna mochantábocna; tempo chënga ndmabiyañe mochantsóyebuambnaye. ¹⁸ Masque nderado cucuatšinë mëtscuayënga tmojishache o veneno tmojofšënga, ndocá quemochatšpása; y šoquëngbeñe cucuatšënga chamojajá ora, chënga shnánënga mochántsatšmëna ca” —Jesús tojanéyana.

Jesús Bëngbe Bëtsábioye tojtaná

(Lc 24.50-53)

¹⁹ Bëngbe Utabná Jesús jóyebuambayama tojanpochocá chentšana, celoye cha tmojtanatsbaná, y uámana luarentše, Bëngbe Bëtsabe catsbioica yojtót'bema jtsemándayama. ²⁰ Y chë uatsjédayëngna tmojánbocana y Bëngbe Bëtsabe soyëngama nýetsquénache entšanga tmojanabuayená. Cach Bëngbe Utabná chënga yojanëjabuáchana, y yojánama entšanga chamotsetatšëmbuama chë buayenana soye ndegombre Bëngbe Bëtsabe soyënga bëtsemnama, chë uatsjédayënga bëtš soyënga jamama obenana chamotsebonnama cha jtsamëse.

San Lucas

Jabojátšama

¹ Ba entšanga Jesusbe historia tmojuábema, ntšamo bēngbeñe ndegombre tojopasacá. ² Chē historia juabemamna, chēnga tmojanuena ntšamo Jesusbe uatsjéndayēnga y inye entšanga chabiamna immencuentaycá. Chē entšangna tmojáninye y tmojanuena ndayá Jesús tojanmama y ntšamo tojanayancá, y chentšana chabe tšabe noticiēnga entšángbioye tmojanabuayená. ³ As, átšnaca sēnjontsé cuedádoca juanotíciana lempe ntšamo Jesusbiamna imojtsichamcá, tojanobojatšentšana méntscoñe. Mora šontsinýana tšabá yojtsemna acbiamna juabemana ntšamo ndegombre yomncá, uámana taitá Teófilo, chē tijuanoiciá soyēngama, ntšamo ndegombre bēngbeñe tojopasacá. ⁴ Ba soyēnga Jesusbiamna tcmojabuátēmbanga, y atše sēntseboše aca chacotsetátšēmo, ntšamo tcojouencá ndegombre yomnana.

Canye ángel tojanabuayená Juan chē Ubayaná jónýnama

⁵ Herodes Judea luaroca rey inamna ora, yojamna canye judiēngbe bachna, Zacarías ca uabainá. Cha yojamna Abíasbe bachnanguentša pamillo. Chabe shemna, Isabel ca yojanabaina, y chana Aarónbentšana entšá inamna (Aarón, chē más uámana bachnangbe natsana amēndayá). ⁶ Chatna tšabá amata ibnamna Bēngbe Bētsabe bominyiñe, y ntšamo Bēngbe Bētsá yomandacá ibojoyena; y chca, ndocná yonjanobena jayanana chata ndoñe tšabá ibonjánama ca. ⁷ Básēnga tondaye ibonjánabamna, Isabel šešona jtsebmomnana ndobena causa, y chatna ya bētsanánata ibojtsemna.

⁸⁻⁹ Chē bachnanga Bēngbe Bētsabe bēts yebnentše tmojtsoSERVERENA ora, sempre imojanamana jabocacayana, nda tšabá tbojtsonyená, Bēngbe Bētsábioye atschuanaye luaro ye cháuama incienso jajuinýiyama. Canye, Zacaríasbe entšanga Bēngbe Bētsabe bēts yebnoca, Bēngbe Bētsábentše imojtsoSERVERENA orna, Zacaríasbioye tšabá ibojonýena; y chca, cha ibojotóca jana incienso jajuinýiyana. ¹⁰ Zacarías, incienso yojtsejuinýnantscuana, ba entšanga shjoca imojtsemna, Bēngbe Bētsáftaca encuéntaye. ¹¹ Nye ndeolpe, Bēngbe Utabnabe canye ángel tojanonýná chē incienso jajuinýiyama altarentša catšbioica. ¹² Zacarías chábioye tbojáninye ora, tojanenjnaná y corente uatjana tbojanábuache.

¹³ Chora chē ángel tbojaniyana: —Zacarías, ndoñe matauatjana. Bēngbe Bētsá tonjouena ntšamo tconjaimpadacá. Acbe shema Isabel canye šešona bochantsebmomna, boyabásetema, y chana Juan ca cochjuabaye. ¹⁴ Chama aca corente oyejuayá cochántsemna, y bētsá entšanga mochanjóyejuaye acbe uaquiñá tojonýnama. ¹⁵ Er cha, Bēngbe Bētsabiamna canye uámana entšá echántsemna. Ndocna te queochaisofsiye vínoye, ni jabuáchiye. Chē Uámana Espíritu chabe ainaniñe echantsemándaye, cha cabá ndonýna orscana. ¹⁶ Banga Israeloca entšanga, ntšamo cha chaojayanama mochanjontsé joyeunayana Bēngbe Bētsá, chēngbe Utabná. ¹⁷ Cha echanjášhango chē Bēngbe Bētsabe Uámana Uabuayanabe natsana, y echántsebmomna obenana y canye espíritu ntšamo chē Bēngbe Bētsabe juabna oyebuambnayá Elías inabomncá. Chabe natsana echanjášhango, bētsétsanga chēngbe básēngaftaca ndoñe chamondétsentsjanama, y chē nduauenanēnga cachiñe chamotsat-sjuabnama ntšamo chē Bēngbe Bētsabe bominyiñe tšabá amēnga mondbetsejuabnaycá. Y chca, entšanga cha echantsapróntaye Bēngbe Utabná jabama orscama ca —chē ángel tbojaniyana.

¹⁸ As Zacarías chē ángelbioye tbojantjá: —¿Ntšamo atše stjobenaye jtsetatšēmbuana chē šcontsatsá soye ndegombre bétsemnana? Er atše ya bētsējema sēntsemna y atšbe shémnaca cachcá ca.

19 Chora chë ángel tbojanjuá: —Zacaría, atše ángel Gabriel sëndmëna; atše Bëngbe Bëtsábioca sëndoserverna. Cha šonjichmó chë tšabe noticiënga aca jauyanama y jue-nayama. 20 Morna, chë cbontsatsá soyiñe ndoñe quecatošbuaché causa, ndëbiá coch-anjoquéda, y ntšamo cbontsatsacá chaojopasá ora, chama tempo chaojtsemna ora, chora jóyebuambayama cochantobenaye ca.

21 Chë ángel Zacaría seftaca yojtsóyebuambnantscuana, entšanga shjoca Zacaría sbiama imojtsobátmana, y mëntšá imojtsejuabnaye: “¿Ndáyeca tša bën Bëngbe Bëtsabe bëts yebnentše ibojtsobiamná ca?” 22 Zacaría tojtanbocna ora, ndoñe yontsobena chë entšángaftaca jóyebuambayana. Chënga tmojántatšëmbona, chë Bëngbe Bëtsábiocane atschua-nayentše Zacaría mo otjenayoquëcá Bëngbe Bëtsábiocana canye soye tojáninýama, er chëngbioye jatšëmbombonana yojáuyana, ndëbiá yojoquéda causa.

23 Chabe tempo, chë Bëngbe Bëtsabe bëts yebnentše jtsetrabájayama tojanpochocá ora, Zacaría cachabe yebnoye tojtaná. 24 Chentšana baseftaytese, chabe shema Isabel ngomamaná yojoquéda, y chë causa, chë shema shachna ishinýe cach tsoca yebnentše totanoquedá. 25 Cha mëntšá yojtsichamo: “Bëngbe Utabná mora atšbiamna tojtenojuabó, entšángbentše atšbe ngmënanana jtsebojuánama, básenga tondaye béntsabamna causa ca.”

Canye ángel tojanabuayená Jesús jónýnama

26 Isabel chnënguana ishinýe ngomamaná yojtsemna ora, Bëngbe Bëtsá, ángel Gabriel tbojanichmó Galilea luaroye, Nazaret ca uabaina puebloye, 27 canye shembása María ca uabainá jauatsëtsayama. Mariyna cabá boyabása nduabuatmá inamna, pero Joséftaca jobouamayama tbojanšbuachená. Y Josena, rey Davídbentšana entšá inamna. 28 Chë ángel Mariýbioye tojána y mëntšá tbojančuá: —¡Mouena. Bëngbe Bëtsá tšabe bendición acbiamna tonjama! ¡Bëngbe Utabná ácaftaca entsemna ca!

29 Chca tojanuena ora, María yojenjaná chë soyama, y yojtsejuabnaye ndáyeca chë ángel chca tbojančuama.

30 Chora chë ángel tbojanijana: —María, ndoñe matauatjana, Bëngbe Bëtsá entsama tšabe bendicionënga chacotsebomnama. 31 Aca ngomamaná coch-anjoquéda y canye šešona boyabásetema cochántsebomna, y chana Jesús ca cochjuabaye. 32 Cha puerte echantsámana, y entšangna Bëngbe Bëtsabe Uaquiñá ca chábioye mochantsábobuatma. Y Bëngbe Bëtsá chë Utabná, chábioye canye rey bochanjábema, ntšamo David yojamncá, 33 y Jacóbëbentšana entšanga nyetsca tescama echantsamëndaye, y chabe mándayana ndocna te queochaisopochóca ca —chë ángel tbojanijana.

34 Chentšana María chë ángelbioye tbojantjá: —¿Ntšamo chca yochjopása, cabá ndoñe boyá sëntsebomñese ca?

35 Y chë ángel tbojanjuá: —Chë Uámana Espíritu echanjabo nyets ácebeñe, y Bëngbe Bëtsabe obenánaca ngomamaná coch-anjoquéda. Chabe obenana mo jantšetëshcá cmochanjaboušbotse; chíyeca chë echanjónýna šešona Uamaná echántsemna, y chábioye Bëngbe Bëtsabe Uaquiñá ca mochantsábobuatma. 36 Mouena, Isabel, acbe primá, canye šešona bochantsebomna, masque ya bëtsananá cha entsemna; chë “šešona ndbomná ca” monjanabobuatmá, mora ya chnënguana ishinýe ngomamaná entsemna, 37 er Bëngbe Bëtsá lempe jamama endobena ca —cha tojánayana.

38 Chora María chë ángelbioye tbojanijana: —Bëngbe Bëtsabe oserverná atše sëntsemna. Bëngbe Bëtsá átseftaca chaoma ntšamo šcojauyancá ca.

Y chentšana chë ángel tojtsatanoñe.

María tojána Isabel jabuáchama

39 Chentšana, María tojanoprontá y tojanochëmo canye puebloye, Judeoca tjañenache luariñe. 40 Chocna cha, Zacaría be yebnentše tojánamashëngo y Isabélbioye tbojančuá. 41 Isabel ntšamo María tbojančuama tojanuena ora, Isabel be šešona chabe uafsbioye tojanobonjó, y chë Uámana Espíritu Isabélbeñe tojánamashëngo chabe ainaniñe

jtsemándayama. ⁴² Chcasna, Isabel jabuache tojánayana: —¡Bëngbe Bëtsá acbiana más tšabe bendicionënga entsama nÿetsca shembásengbiana, y chë cochántsebomna šešonbiámna cachcá! ⁴³ Atše mercedo taitatobuajoñe, atšbe Utabnabe mamá chašubobuáchama; ⁴⁴ er atše sënjouena ntšamo šconjachuá, y cachora atšbe šešona oyejuayá atšbe uafsbioye tonjobonjó. ⁴⁵ ¡Aca Bëngbe Bëtsábeñe tcojošbuaché; cojtsetátšëmbo Bëngbe Bëtsá ntšamo tcmojašbuachenacá yochjamama; chíyeca puerte oyejuayá cochántsemna ca!

⁴⁶ Chora María tojánayana:

“Nÿets ainánaca Bëngbe Utabná chantsadorana,

⁴⁷ y Bëngbe Bëtsá, atšbe Atsbocayabiana corente chanjóyejuaye.

⁴⁸ Bëngbe Bëtsá atšbiana tojtenojuabó, atše chabe oservénëjema.

Er morscana muentša entsanga nÿetscanga puerte oyejuayá ca šmochantsábobuatma.

⁴⁹ Bëngbe Bëtsá, chë nÿets obenana bomná, chabe obenánaca bëts soyënga atšbiana tonjama.

¡Bëngbe Bëtsá puerte Uamaná ca entsabaina!

⁵⁰ ¡Morsca entsanga y más chcoyënga, chábioye yeunanëngbiana, cha sempre bochántsengmena!

⁵¹ Cha, chabe obenánaca bëts soyënga tojama,

y chë nÿe cachënga bëtsëtsanga enobiamnayëngbe juabna tojtsepochochá;

⁵² reyëngbioye chëngbe mándayentsana tojtsatsatše;

pero chë nÿe cachënga bëtsëtsanga ndenobiamnayëngbioye, uámanënga tojábiana.

⁵³ Chë shëntseca imomnëngbioye, chamosama bëts cá cha tojatsatá,

pero chë bomnëngbioyna tondaye tonjatsatá.

⁵⁴ Cha tojanëjabuache chabe entsanga Israeloca, chabe oservénënga,

y ndoñe tbonjánebnatjëmbe jtsalastemánana,

⁵⁵ nÿetsca tescama chë Abraham y chábentsana entsángbioye,

ntšamo bëngbe bëts taitanga Bëngbe Bëtsá tojanašebuachenacá ca” —cha tojánayana.

⁵⁶ Mariyna unga ishinÿe Isabélaftaca tojanoquedá, y chentsana cachabe yebnoye tojtaná.

Juan chë Ubayaná tojanonÿná

⁵⁷ Isabel jtsešócanama tojanóntsabuache ora, canÿe šešona boyabásetema tojanonÿná.

⁵⁸ Isabelbe juachañe oyenënga y chabe pamíllanga tmojántatšëmbona ntšamo Bëngbe Bëtsá chábioye ibojalastemama, y chama corente Isabélaftaca tmojanoyejuanga. ⁵⁹ Chë šešona posuftayté yojtsebomna ora, tmojánashjango y chëtémbioye chë más delicadentse base bobachtema tmojantëtše, ntšamo chë judiënga imojanamancá. Chënga imojétseboše chë šešónbioye Zacarías ca juabáyana, cach beftcá; ⁶⁰ pero chabe mamá tojanëyana: —Ndoñe. Quem šešona echantsabaina Juan ca.

⁶¹ As chënga Isabélbioye tmojanianyana: —Acbe pamíllangbeñe ndocná chca quenatabaina ca.

⁶² Chora chënga jatšëmbombonana Zacaríasbioye tmojantjá, ntšamo chë šešona chaotsabainama cha yojtseboše ca. ⁶³ Zacaríasna jatšëmbombonana canÿe tablëbé tojanëyá y chiñe tojanábema: “Cha entsabaina Juan ca”. Y chë causa, nÿetscanga ojanánënga imojtsemna. ⁶⁴ Y cachora Zacarías jóyebuambayama yojtobenaye, y yojontšë Bëngbe Bëtsábioye jëtschuayana. ⁶⁵ Chë juachañe oyenënga nÿetscanga tmojanëuatjaná, y Judeoca nÿetsca chë tjañenache luariñe entsanga chë soyëngama imojtsencuëntaye.

⁶⁶ Nÿetscanga chë soyëngama tmojántatšëmbona ora, chëngnaca corente chama imojtsejuabnaye y mëntsá imojtsichamo: “¿Chë básetema, bëtsá ora nda yochtsemna ca?” Y ndegombre, Bëngbe Bëtsabe obenana cháftaca yojtsemna.

Zacarías, Bëngbe Bëtsábioye jëtschuayama

⁶⁷ Chë Uámana Espíritu tbojanmandá ora, Zacarías, chë basetembe taitá, Bëngbe Bëtsabe mándoca jtsóyebuambnayëse, mëntsá tojánayana:

⁶⁸ “¡Chë Utabná, chë Israeloca entsangbe Bëtsá matschuanga, er cha tonjabo chabe entsanga jabújabuachama y jabátsebacama!

⁶⁹ Cha bochanjíchmuá canýe atsebacayá puerte obenana bomná, y cha echántsemna Bëngbe Bëtsabe oserverená Davídbentšana entsá;

⁷⁰ ntšamo Bëngbe Bëtsá bayté entsemna, chë chabe juabna oyebuambnayëngbiajana, chë chábenga imomnëngbiajana bënga šojanašebuachenacá, mëntsá:

⁷¹ Cha canýa bochanichmuá bëngbe uayayënga y nyetsca uaboyënjëngbiana bënga jabátsebacama;

⁷² bëngbe bëtsétsangbioye jálastemama, y jenójuaboyama y jamama chabe uámana trato,

⁷³ ntšamo Bëngbe Bëtsá, bëts taitá Abrahámbioye tbojanšbuachenacá.

⁷⁴ Cha tbojanšbuachená bëngbe uayayëngbiana bënga jabátsebacama, chca, bënga ndauatjá Bëngbe Bëtsá jaserviama,

⁷⁵ y chabe entsangcá, nyetsca soyënguiñe tšabá amënga, Bëngbe Bëtsabe delante nyetsca te bëngbe vidënguiñe jëftsiyena.

⁷⁶⁻⁷⁷ Y aca, atšbe básetemna, Bëngbe Bëtsabe juabna oyebuambnayá ca cmochantsábobuatma,

entsángbioye Bëngbe Bëtsabe soyëngama cochtsabuayiynama,

Bëngbe Utabná cabá ndáshjango ora, bacna soyënga amana chamuajbanama;

as Bëngbe Bëtsá chëngbe bacna soyënga echanjáperdonaye, y Bëngbe Utabná jabama mochantsopróntaye.

⁷⁸⁻⁷⁹ Bëngbe Bëtsá bënga puerte šualastemánayeca,

canýa bëngbe juabnënga binýnayá bochanjíchmuá,

bënga chë bacna soyënga causa mo ibetiñcá y obanëngbe luarentšcá vida bomnëngbioye jabátsebacama,

y jabuátambama ntšamo natjëmbana jtsiyenana ca” —cha tojánayana.

⁸⁰ Chë básetema yojontsé jobóchana y chabe espíritnaca puerte. Bayté, entsanga ndoyena luarënguenache cha yojëftsiyena, Bëngbe Bëtsá Israeloca entsángbioye cha tojáninýanýentscuana. Chentšana, chamuábuatmanamna tojanontsé Israeloca entsángbeñe jóyebuambayana.

2

Jesucristo tojanonýná

(Mt 1.18-25)

¹ Chë tempo yojamna canýe Romoca bëts mandado, Augusto ca uabainá; y cha, chë natsanama tojanmandá nyetsca entsanga chamuenábemama. ² Chë soye tojanochnëngo Cirenio ca uabainá Siroica mandado yojamna ora. ³ Chamna, nyetscanga tojanotocá jtan-gana jenábemëngama, cada ona ndëmoca chëngbe bëts taitanga imojëftsiyena puebloye.

⁴ As, Joséna Galilea luarentšana Nazaretocana yojëftsebozna y Judeoye, Belén puebloye, tojtaná. Tempo, Josebe bëts taitá rey David, Belenoca inoyena. Y José, Davídbentšana entsá inámnayecna, choye jenábemama tojtaná. ⁵ Maríaftaca tojána jenábemama, y muana tbojanšbuachená Joséftaca jobouamayama. María ngomamaná yojtsemna, ⁶ y Belenoca ibojtsemnëntscuana, chë ora tbojanóntšabuache jtsešocanama.

⁷ Y chentše María ibojtsebomna chabe natsana šešona, canýe boyabásetema. Posadoca tondaye luare yontsemna causna, chata nýe uacnëngbe átana tambuentše tbojanoquedá. Y Jesús tojanonýná orna, María tbojtanëntsacjuá y canýe bachetémiñe tbojanajó.

Chë angelotëmënga y chë oveshënga abujënyëngana

8 Belén béconana, chë ibeta, oveshënga abujänýanga shëntsjoa cachëngbe oveshëngaftaca imojtsemna. 9 Nýe ndeolpe, Bëngbe Bëtsábiocana canýe ángel tojánébëbuacna, y Bëngbe Bëtsábentsana corente yojtsebuashinýinýana chëngbe shëconániñe. Chama chënga puerte imojocochauatjaná.

10 Chora chë ángel tojanéyana: “Ndoñe matauatjëngana. Sënjabo tšabe soyënga tonjopasama jábuayenama, nýetscanga chamóyejuama. 11 Mora chë David tonjanonýná pueblentše canýe šësona tonjonýná. Cha tšëngaftangbe atsebacayá echántsemna y tšëngaftangbe entšangbiámnaca. Cha endmëna chë Bëngbe Bëtsabe Uámana Uabuayaná, Cristo ca uabainá, y Bëngbe Utabná. 12 Ndegombre chca entsemnama mëntšá šmochanjátatsëmbona: canýe šësona ntsacjuaná y uacnëngbe bachetëmiñe jajoná šmochanjínýena ca” —cha tojanéyana.

13 Cachora, celocana mallajta angelënga chë natsana ángelbentše tmojánbocana y Bëngbe Bëtsábioye mëntšá imojtsatschuanaye:

14 “¡Bëngbe Bëtsá, celoca entsemná matschuanga!

Bëngbe Bëtsábioye yeunanëngbiamá, Bëngbe Bëtsá corente entsoyejuá; quem luariñe chëngbeñe puerte tšabá chaotsemna ca.”

15 Chentšana chë angelënga celoye tmojésanshëcuana. Y chora chë oveshënga abujänýanga tmojanontšë jeniyanana: “Belenoye cuajna, chë quem tojopasá soye jinýama. Ndegombre, Bëngbe Bëtsá chë soye šojanýanyé ca.”

16 As betesco tmojána y tmojánanýena María, José y chë šësonatema bachetëmiñe jajoná. 17 Chë šësona tmojáninýe ora, chënga tmojanacuntá Jesusbe bëtsëtsata y chë ínýengbioye, ntšamo chë šësonbiamá chë ángel tojanéyancá. 18 Nýetscanga chë tmojanuenënga tmojanenjaná ndayá chë oveshënga abujänýanga imojtsacúntama. 19 Pero Mariyna nýe cachabe ainanoca quem soyëngama más bën inétsenojuabnañe.

20 Chentšana, chë oveshënga abujänýanga tmojtaná Bëngbe Bëtsá atschuanaye, ndayá tmojáninýama y tmojanuenama. Nýetsá tojanopasá lempe ntšamo chë ángel tojanéyancá.

Bëngbe Bëtsabe bëts yebnoye Jesús tmojanamba

21 Posufta te tojánashjache ora, chë basetëmbioye chë más delicadentše base bobachtema tmojantëtše, Bëngbe Bëtsabe entšá bëtsemnama chaotsinýnama, ntšamo judiënga imojanamancá; y Jesús ca tmojanabaye, ntšamo chë ángel tbojaniancá, María cabá ndoñe ngomamaná yontsemna ora.

22 Y chë tempo tojanóshjango, ndaye ora José y María yojtsamna jamana ntšamo Moisesbe leyinë iuayancá, ndayá jamama yojanmëncá, canýe shembása Bëngbe Bëtsabe delante tšabia jtsatsmënama, canýe šësona tbojtsebomnentsana. Asna, Jerusalenoye tbojánata y chë básetema tmojanamba, Bëngbe Bëtsabe bëts yebnoca jinýinýiyama, 23 ntšamo chë Bëngbe Utabná Moisésbioye tbojaniyé leyënguiñe iuayancá, mëntšá: “Canýe yebnentše chë natsana šësona boyabása tojtsemnësna, Bëngbe Bëtsábioye cha jinýinýiyana chábioye chabotseservénama ca.” Chcasna, chë básetema Bëngbe Bëtsabe bëts yebnoye tmojanamba. 24 Y tmojanamba janshana uta shloftše, Bëngbe Bëtsá jëtschuayama, ntšamo Bëngbe Utabnabe leyinë yomandancá. Chiñe mëntšá endayana: “Chë natsana šësona chaojonýná ora, boyabásetema tojtsemnëse, janshana šmochjuamba uta fchetnatémata o uta šësona palomatémata, Bëngbe Bëtsá jëtschuayama ca.”

25 Jerusalenoca inamna canýe bacó, Simeón ca uabainá; cha inamna nýetsca soyënguiñe tšabá amá, y yojanienana ntšamo Bëngbe Bëtsá yomandacá. Cha yojanóbátmana chë tempo ndaye ora, Bëngbe Bëtsá bochjanichmuá canýa Israeloca entšanga cháuatsebacama. Y chë Uámana Espíritu chabe ainaniñe yojtsemna; 26 chíyeca, cabá lempe chca ndopása ora, cha yojtsetátšëmbo cha ndoñe yochjanóbanama, chë Bëngbe Bëtsabe Uámana Uabuayaná ntjëftsinýcá. 27 Chë Uámana Espíritu tbojanmandáyeca,

Simeón Bëngbe Bëtsabe bëts yebnoye tojána; y Jesusbe bëtsëtsata chë básetema tmojanamba ora, ntšamo Moisesbe leyíñe iuayancá chabiamama jamama ora, ²⁸ Simeón tbojanocutsá y Bëngbe Bëtsábioye tbojtanchuá. Cha mëntsá tojánayana:

²⁹ “Bëngbe Utabná, mora šmolesenciá, atše acbe oservená natjëmbana jóbanana, er ya tconjama ntšamo šconjanšbuachenacá;

³⁰ atše chë entsangbe Atsebacayá sënjinýe.

³¹ Aca cha tcojichmó nyets luarenache entsangbiamama.

³² Cha chë ndoñe judiëngbe juabnënga binýnáyá echántsemna; y chábeyeca, nyets quem luarentše mochanjátatsëmbona, chë acbe entsangbiamama, Israeloquëngbiamama ca” —cha tojánayana.

³³ José y María ibojenjanata ntšamo Simeón Jesusbiamama yojtsichámuama. ³⁴⁻³⁵ Chentsana, Simeón Bëngbe Bëtsábioye tbojanimpadá tšabe bendicionënga chata chabotsebomnama chaomama; y María, chë Jesusbe mamábioye tbojaniyana: “Quem soyënga corente cmochanjacochtsetšenaná, mo ainana espadějaca cuafjenëchnëngcá. Cha Israeloca banga echanjápochocaye y banga echanjátsebacaye; y chca, ntšamo banga ainaniñe imojuabnacá echantsótatsëmbo. Israeloca banga quem básetema mochantsábotena y chabe palabréngnaca ca” —cha tbojaniyana.

³⁶ Chéntsnaca yojtsemna canýe shembása Bëngbe Bëtsabe juabna oyebuambnáyá, Ana ca uabainá; cha yojamna Fanuelbe bembe y Aserbe pamillentšá; ya bëtsananá cha inamna. Nýe canýsëfta uata cha yojëftsebouamna; ³⁷ y chabe boyá tojanóbanentsana, cha posufta bnëtsana y canta uata viudá inamna. Ndocna te Bëngbe Bëtsabe bëts yebnentsana yonjábocana, y chentše tojanoquedá bnëtë y ibeta, Bëngbe Bëtsáftaca encuëntaye y cha atschuanaye; y chama, ba soye yojanamana tondaye ntjascá jtsemnana. ³⁸ Simeón, María y Josébioye yojsëtsësnaye ora, Ana chëngbioye yojobeconá, y chë Atsebacayá tojanonýnama Bëngbe Bëtsábioye tbojtanchuá chentsana, Jerusalenoca entsángbioye, chë canýe atsebacayá Israeloca entsangbiamama imojanobatmanëngbioye tojanéyana, chana Jesús yojëtsemna ca.

Jesús Nazaret puebloca

³⁹ José y María lempe ntšamo chë Utabnabe leyënguiñe iuayancá tbojanma ora, Galilea luaroye tbojtanata, cachëngbe puebloye, Nazaretoye. ⁴⁰ Y chë básetema yojsobóchaye, y más añemo yojtsejacana y más osertánana yojtsebomna. Y Bëngbe Bëtsá yojánama cha bëtscá tšabe bendicionënga chaotsebomnama.

Jesús Bëngbe Bëtsabe bëts yebnoca

⁴¹ Chabe bëtsëtsata ibojanamana cada uata Jerusalenoye jana Bashco fiestama, chë Bëngbe Bëtsá chë judiëngbe bëts taitángbioye Egiptocana tojánatsebacama jtenójuaboyama fiesta. ⁴² Jesús bnëtsana uta uata tojánashjache ora, Jerusalenoye tmojána, ntšamo imojanamancá. ⁴³ Chë fiesta tojanopochocá chentsana, chabe bëtsëtsata yebnoye ibojtsataye, y chata ntsetatsëmbcá, Jesusna Jerusalenoca yojsotquedañe. ⁴⁴ Chata ibojëtsejuabnaye Jesús chë inýe entsángaftaca yojsataboye ca; chcasna, canýe te nyetsá benachëjana tbojánata ora, tbojanontsé chabe pamíllangbeñe y ubuatmëngbeñe jtsenguanguana, ⁴⁵ pero ndoñe ibonjobenaye jtsinýenana. As, chata chora Jerusalenoye tbojésanshëcona choca cha jetsenguanguama.

⁴⁶ Unga tianoye chata tbojanobená Bëngbe Bëtsabe bëts yebnentše cha jetsinýenana. Chana chë Moisesbe ley abuátambayëngbe tsëntsaca inétsotbemañe, chëngbioye inayau-nana, inatjanaye. ⁴⁷ Nyetsca ouenanënga imojtsenjanaye Jesús tša osertaná inamnama, y tša tšabá jojuama cha yojsobenama. ⁴⁸ Chabe bëtsëtsata chca tbojáninýe ora, chátnaca ibojenjaná. Chora, chabe mamá tbojaniyana: —Uaquiñá, ¿ndáyeca chca bëndátaftaca tcojama? Taitá y atše corente enócochinýenata cbondënguá ca.

⁴⁹ As Jesús tojanëyana: —¿Ndáyeca atše šmonguá? ¿Ndoñe šondétatšëmbo atše šomna atšbe Taitabe yebnentše jtsemnana ca?

⁵⁰ Pero chë bëtsëtsata ndoñe tonjanësertá ntšamo cha tojanëyancá.

⁵¹ Chentšana Jesús chë bëtsëtsataftaca Nazaretoye tojtaná y chata yojtsayaunana. Y chabe mamana nÿe cachabe ainanoca chë soyëngama más bën inétsenojuabnañe. ⁵² Jesús yojtsobóchaye y más juabna yojtsebmna; y Bëngbe Bëtsá y nÿetsca entšanga corente oyejuayënga chabiama imojtsemna.

3

Juan chë Ubayaná entšanga yojanabuayiná (Mt 3.1-12; Mc 1.1-8; Jn 1.19-28)

¹ Bnëtsana shachna uatama Tiberio César Romoca bëts mandado yojamna ora, Poncio Pilato yojamna Judeoca mandado, Heródesna Galileoca rey, chabe catšata Felipe Iturea y Traconitoca rey, y Lisániasna Abilinioca rey. ² Anás y Caifás chë bachnangbe más uámana amëndayata ibojamna. Cach tempo, canÿe luare entšanga ndoyenentše Bëngbe Bëtsá tbojanatsëtsá Juánbioye; Juan, Zacaríasbe uaquiñá. ³ As Juan nÿetsca luarënguëjana Jordán béjaye béconana tojánachnëngo, entšanga mëntsá utsëtsnaye: “Tšëngaftangbe bacna soyëngama ngménaca šmochtenójuaboje, chca amana šmochtsajbaná y Bëngbe Bëtsabe benache šmochtishache. Chora chochjúbaye, y Bëngbe Bëtsá tšëngaftangbe bacna soyëngama cmochanjáperdonaye ca.” ⁴ Chë soye tojanopasá, cachcá ntšamo chë Bëngbe Bëtsabe juabna oyebuambnayá Isaías chabe librëšañe yojëftsabemcá. Cha mëntsá tojanábema: Entšanga ndoyena luaroca canÿa enduáyebuache:

“Bëngbe Utabná echanjabo ca; mo nda canÿe benache tojtseprontacá canÿe uámana entšá jashjanguama, cachcá, tšëngaftángnaca, Bëngbe Utabná jabama ainanentše tšabe juabnëngaca šmochtseprontana.

⁵ Nÿetsca jachañe echantojútjia, y tjañe y batsjabenga mochantenájachibiaye. Chë scundma benachënga ndirichëjënga echántsatsmëna, y chë bacá mana benachënga mochantenájachibiaye.

Mo chë chca tmojtsamëngcá, canÿe benache japróntana canÿe rey cháuashjanguama, tšëngaftángnaca bëtscá šmochtseprontana tšëngaftangbe ainaniñe, Bëngbe Utabná jabama.

⁶ Y nÿetsca entšanga mochanjinÿe chë Atsebacayá Bëngbe Bëtsábentšana jabana ca” —cha tojanábema.

⁷ Chë entšanga Juan chaubáyama imojánbocana ora, Juan yojanëtsëtsnaye: “¿Mëtscuaye entšanga! ¿Nda tcmënjáuyana chë echanjóshjango uabouana castigüentšana šmochjotsbocá ca? ⁸ Bëngbe Bëtsábeñe ndegombre ošbuáchiyënga šmochtsemna, as chca chaotsinÿna, tšëngaftanga chë bacna soyënga amana ndegombre šmojtsajbanama. Y ndoñe šmattsejuabnaye cach tšëngaftangbiana jayanama: ‘Bëngna Abrahábentšana entšanga, Bëngbe Bëtsabe entšanga fsëndmëna ca’. Er atše chanjayana, Bëngbe Bëtsá quem ndëtšbéngacnaca Abrahábentšana entšanga nanjábiana. ⁹ Tatšniá ya entsaprontana chë betiyeshënga tbëtëjëngocana jtseshatëtsetšama. Ndaye betiye ndoñe tonjashájona, jtseshatëtšana y iñoye jtsatmetšana; tšëngaftangaftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye ca” —cha yojanëtsëtsnaye.

¹⁰ —¿Y as, ndayá jamama šojtsamna ca? —chora chë entšanga tmojantjá.

¹¹ Y Juan tojanëjua: —Chë uta quëfsáiya uabomná bontsemna canÿiyá jutštayana chë tondaye tonduabomná. Saná bomná bontsemna juajatayana chë tondaye saná tondbomnábioye ca.

¹² Romocama entšángbioye impuesto atjanayëngnaca jenábayama tmojánabo. Chënga Juánbioye tmojantjá: —Buatëmbayá, ¿ndayá jamama šojtsamna ca?

¹³ Y Juan tojanéyana: —Nýe ntšamo chë leyíñe yomandancá entsángbioye crocénana šmochtsayëngacaye ca.

¹⁴ Básefta soldadëngnaca chábioye tmojantjá: —¿Ndayá jamama šojtsamna ca?

Y Juan tojanéyana: —Ndocnábioye tondaye šmatjáboca, ni jauátjanase, ni nýe ndayámnaca bonamente jobuáchëse; y nýe ntsachetšá šmacaná crocenánaca oyejuayënga šmochtsomñe ca.

¹⁵ Entšanga chë Bëngbe Bëtsabe Uámana Uabuayanabiama imojtsobátmana, y chëngna Juanbiama imojétsejuabnaye nderado cha chë Bëngbe Bëtsabe Uámana Uabuayaná nanjamna ca; ¹⁶ pero Juan tojanéyana: “Ndegombre, atše béjayeca cbondubáyana. Pero chë echanjabá atšbiama corente más obenana endbomna, y atše merecido taitساتو buajoñe ni mo jotsejbiyana chabe shecochëtjonëshentša corriëja jajafjonama. Chë Bëngbe Bëtsabe benache chamojtishachëngbiama, Bëngbe Bëtsá echanjama chë echanjabábeyeca, chë Uámana Espiritu chëngbe ainaniñe cháuamashënguama. Pero chë ndoñe chamontishachëngbiama, Bëngbe Bëtsá echanjama chë echanjabábeyeca, chënga corente castigánënga chamotsemnana, mo iñeshequécá. ¹⁷ Canýe entsá chabe mëtštá cucuatšíñe jiyëbana, chabe trigo jtsóbobemama, y chë ndoservena shácuanënga jtsejashtsëtsana. Chabe trigo chë grano uaquëcjnaye tsañe jtsabuájua, y chë ndoservena shácuanëngna iñeshoye jtsatmetšana. Cachcá, chë átšbentšana echanjabá, chë tšabe entsanga echanjúbuaja, y chë bacna entsangna iñeshiñe echantsacastígaye, y chë iñe ndocna te queochátsfsana ca” —cha tojanéyana.

¹⁸ Chca y inýe palabrëngaca Juan chë tšabe noticiëngama yojanabuayiyná. ¹⁹ Tempo, Juan Heródesbioye tbojanácacana, cha tojanobouamama cachabe catsata Felipbe shémaftaca, Felipe cabá oyena ora; chana Herodías ca uabainá. Chama Juan tbojanácacana y nýetsca bacna soyënga Herodes tojanmámnaca. ²⁰ Pero Herodes Juánbioye joyeunaye luariñna, cabá inýe más bëts bacna soye tojatanma: Juánbioye cárceloye tbojtsanëtame.

Juan, Jesúsbioye tbojanabaye

(Mt 3.13-17; Mc 1.9-11)

²¹ Pero Herodes Juánbioye cabá ndutame ora, Juan ba entsanga tojanëbaye, y Jesúsna tojánabo jenábayama. Ibojtsabayanëntscuana, Jesús Bëngbe Bëtsáftaca ibojtsencuëntaye; y chora celoca yojotëfjo, ²² y chë Uámana Espiritu mo canýe palomatemcá Jesúsbioye yojtsastjajuana; y celocana Bëngbe Bëtsá tbojanianyana: “Acna atšbe bonshana Uaquiñá condmëna. Acbiama corente sëntsoyejuá ca.”

Jesusbe bëts taitanga

(Mt 1.1-17)

²³⁻³⁸ Jesús unga bnëtsana uata yojtsebomna, entsángbeñe Bëngbe Bëtsabe soyëngama jóyebuambayama yojontšé ora. Entšanga imojanjuabná Jesús Josebe uaquiñá yojamna ca.

José yojamna Elibe uaquiñá.

Elí Matatbe uaquiñá

y Matatna Levibe uaquiñá.

Leví yojamna Melquibe uaquiñá,

Melqui Janabe uaquiñá

y Jana Josebe uaquiñá.

José yojamna Matatíasbe uaquiñá,

Matatíasna Amosbe uaquiñá.

Amós Nahumbe uaquiñá,

Nahúm Eslibe uaquiñá

y Esli yojamna Nagaiibe uaquiñá.

Nagai yojamna Maatbe uaquiñá,

Maatna Matatíasbe uaquiñá.
Matatías Semeibe uaquiñá,
Semei Josecbe uaquiñá
y Josec yojamna Judabe uaquiñá.
Judá yojamna Joananbe uaquiñá
y Joanán Resabe uaquiñá.
Resa Zorobabelbe uaquiñá,
Zorobabel Salatielbe uaquiñá,
y Salatielna Neribe uaquiñá yojamna.
Neri yojamna Melquibe uaquiñá,
Melqui Adibe uaquiñá.
Adi Cosambe uaquiñá,
Cosam Elmadambe uaquiñá,
y Elmadamna yojamna Erbe uaquiñá.
Er yojamna Jesusbe uaquiñá
y Jesús Eliezerbe uaquiñá.
Eliezer Jorimbe uaquiñá
y Jorimna Matatbe uaquiñá.
Matat yojamna Levibe uaquiñá,
Leví Simeonbe uaquiñá
y Simeón Judabe uaquiñá.
Judá Josebe uaquiñá,
José Jonambe uaquiñá,
y Jonamna yojamna Eliaquimbe uaquiñá.
Eliaquim yojamna Meleabe uaquiñá,
Melea Menabe uaquiñá.
Mena Matatbe uaquiñá,
y Matata yojamna Natanbe uaquiñá.
Natán yojamna Davidbe uaquiñá,
David Isaíbe uaquiñá
y Isaína Obedbe uaquiñá.
Obed Boozbe uaquiñá,
Booz Salabe uaquiñá
y Sala yojamna Naasonbe uaquiñá.
Naasón yojamna Aminadabëbe uaquiñá,
Aminadab Adminbe uaquiñá
y Admin Arnibe uaquiñá.
Arni Esrombe uaquiñá,
Esrom Fáresbe uaquiñá
y Fáresna yojamna Judabe uaquiñá.
Judá yojamna Jacobëbe uaquiñá,
Jacob Isaacbe uaquiñá
y Isaacna Abrahambe uaquiñá.
Abraham Tarebe uaquiñá
y Taré yojamna Nacorbe uaquiñá.
Nacor yojamna Serugbe uaquiñá,
Serug Ragaube uaquiñá
y Ragauna Pelegbe uaquiñá.
Peleg Heberbe uaquiñá,
y Heber yojamna Salabe uaquiñá.

Sala yojamna Cainanbe uaquiñá,
 Cainán Arfaxadbe uaquiñá
 y Arfaxadna Sembe uaquiñá.
 Sem Noebe uaquiñá
 y Noé yojamna Lamecbe uaquiñá.
 Lamec yojamna Matusalenbe uaquiñá,
 Matusalén Enocbe uaquiñá
 y Enocna Jaredbe uaquiñá.
 Jared Mahalaleelbe uaquiñá,
 y Mahalaleelna yojamna Cainanbe uaquiñá.
 Cainán yojamna Enosbe uaquiñá,
 Enós Setbe uaquiñá,
 Set Adanbe uaquiñá
 y Adán Bëngbe Bëtsabe uaquiñá.

4

Jesús tojanobená Satanás jayëñjanama (Mt 4.1-11; Mc 1.12-13)

¹ Juan, Jesúsbioye tbojanabáyentsana, chë Uámana Espíritu Jesusbe ainaniñe yojt-semándaye. Jesús Jordán bejayoícana tojtaná y chë Uámana Espíritna entšanga ndoyena luaroye tbojanánatse. ² Chentše canta bnëtsana te tbojanjëtana, y Satanasma yojanabó Jesús jisháchichiyama. Chë canta bnëtsana tentscuana Jesús tondaye tonjanse, y cabana ibojeshëntsena.

³ Chora Satanás tojésanabo y tbojaniyana: —Aca ndegombre Bëngbe Bëtsabe Uaquiñá tcomnëse, momandá quem ndëtsbenga tandëse chaobiama ca.

⁴ As Jesús tbojanjuá: —Bëngbe Bëtsabe uabemana palabrenguiñe mëntsá endayana: “Entsá nÿe tandëseca ndoñe vida ntsebomnana ca.”

⁵ Chentšana, Satanás canÿe bëts tjoye tbojanánatse y betscó nÿetsca quem luarentša amëndayëngbenache tbojaninÿinÿé. ⁶ Chora Satanás tbojaniyana: —Atše nÿets obe-nana cbochjätsetaye y lempe quem amëndayëngbenache yobinÿna soyëngnaca. Atše lempe chca sënjóyëngacñe y sëntsobena jatsetayama nda stsebošábioye. ⁷ Aca chaco-joshëntsamentšé y chašcojadorase, lempe nÿetsá acbiama echántsemna ca.

⁸ Chora Jesús tbojanjuá: —Bëngbe Bëtsabe uabemana palabrenguiñe mëntsá endayana: “Acbe Bëtsá, chë Utabná cochtsadorana y nÿe cha cochtseserverna ca.”

⁹ Chentšana, Satanás Jerusalenoye tbojanánatse y Bëngbe Bëtsabe bëts yebnentše chë más tsbanánoca tbojanatsá, y tbojaniyana: —Aca ndegombre Bëngbe Bëtsabe Uaquiñá tcomnëse, muentšana fshantsoye montsënja, ¹⁰ er Bëngbe Bëtsabe uabemana palabrenguiñe endayana:

Bëngbe Bëtsá chabe angelënga echanjichamuá, chacmotsinÿenama.

¹¹ Chënga buacuatšëngaca cmochanjishache, shecuatše ndocá ndëtsbeñe chacondomama ca —cha tbojaniyana.

¹² Chora Jesús tbojanjuá: —Bëngbe Bëtsabe uabemana palabrenguiñe mëntsá endayana: “Ndoñe matsbošana acbe Bëtsá chë Utabná bacna soyëngama jacocheñguama ca.”

¹³ Cabana, Satanás tojanajbaná bošana Jesúsbioye bacna soyëngama jacocheñguama, y bënama Jesúsbentšana tojtsanojuánañe.

Jesús tojanontsé Galileoca chabe trabajo jamana (Mt 4.12-17; Mc 1.14-15)

¹⁴ Chentšana, Jesús Galileoye tojesaná chë Uámana Espíritbe obenánaca, y nyetsca entšanga chë luariñe chabiamá imojtsencuéntaye. ¹⁵ Jesús yojtsabuátambaye chë judiëngbe enefjuana yebnënguenache, y nyetscanga cha imojtsatschuanaye.

Jesús Nazaret puebloca
(Mt 13.53-58; Mc 6.1-6)

¹⁶ Chentšana Jesús Nazaretoye tojtashjango, chë pueblentse cha tojanoboché, y ochnayté, ntšamo cha yojanamancá, chë judiëngbe enefjuana yebnentse tojánamashëngo. Y chocna tojantsbaná Bëngbe Bëtsabe palabra jualíama. ¹⁷ Chë Bëngbe Bëtsabe juabna oyebuambnayá Isaíasbe librëša tmojaníyé chaulíama. Chë librëša yojutëfjona orna, tojáninýena mëntšá uábemanentse:

¹⁸ “Chë Utabnabe Espiritu átšeftaca entsemna, er atše uabayaná stsemna chë Bëngbe Bëtsabe tšabe noticiënga chë ndbomnëngbeñe jóyebuambayama.

Cha šonjichmó jábuayenama, chë utámenënga chentšana ya chamuáisebocanama; jamama chë jtanënga chamobenama tšabá jubínýnama;

jamama chë ínýengbe causa imosufrínënga, tempcá cachcá tšabá chamotsatsmënama;

¹⁹ y entšanga jáuyanama ndëmua ora chë Utabná chabe entšanga yochjatsebacaye ca.”

²⁰ Jesús jualíama tojanpochocá y chora chë uajabuachanábioye chëša tbojtaniyé y tojtanoítbema. Nyetsca entšanga chë enefjuana yebnentse imojtsemnënga Jesúsbioye imojtsobuáuatja. ²¹ Chora Jesús tojanontsé mëntšá jayanana: —Camënté tšëngaftangbeñe tonjopasá ntšamo quem librëšañe iuabemancá ca.

²² Nyetscanga Jesusbiamá tšabá imojtsencuéntaye y ojnanánënga imojtsemna tša botamana cha yojtsóyebuambnama. Y chënga imojtsentjanaye: —¿Quem boyabása ndoñe Josebe uaquiñá yondmëna ca?

²³ Jesús yojtsetátšëmbo ntšamo cha tojánayaniñe chënga ndoñe tmonjanóšbuachema. As tojanëyana: —Ndegombre tšëngaftanga ntšamo entšanga mondëntšayancá atše šmochanjauyana: “Ashnayá, cach aca menoshná ca”. Y tšëngaftanga šmojtsejuabná atše jauyanama: “Bënga fsënjouena chë bëts soyënga Bëngbe Bëtsabe obenánaca Capernaumoca tcojamama. Ntšamo contsichamcá ndegombre tojtsemnëse, cach acbe pueblëntšnaca cachcá moma ca”.

²⁴ Y cachora Jesús más tojanoyebuambá, mëntšá: “Ndegombre cbëyana, ni canýe Bëngbe Bëtsabe juabna oyebuambnayábíbioye cachabe pueblentse tšabá quematonýá.

²⁵ Ndegombre cbëyana, Elías, chë Bëngbe Bëtsabe juabna oyebuambnayá, Israeloca inamna ora, ba viudanga chentše imojamna. Chë tempo, unga uata y tsëntsañe nyetsá ndoñe tonjanafté y bëts shëntsana chë luariñe yojtsebinýna. ²⁶ Pero Bëngbe Bëtsá, Elíasbioye ndoñe tbonjanichmó ni mo canýe Israelentša viudábíbioye, y aíñe tbojanichmó ínýoye, Sarepta ca uabáinoye, Sidón béconana, canýe chentša viudábíbioye. ²⁷ Eliseo, chë Bëngbe Bëtsabe juabna oyebuambnayá, Israeloca inamna ora, chentše banga imojamna bacna nguayanánaca šoquënga, y ni mo canýa chentša šocábíbioye tbonjanshná, pero aíñe canýe šocábíbioye, Naamán ca uabainá, cach bacna nguayanánaca, Sirocá ca” —cha tojánayana.

²⁸ Chë judiëngbe enefjuana yebnentse imojtsemna entšanga chca tmojanuena ora, puerte tojánëtëna. ²⁹ As, chora chënga tmojantsbaná, chë pueblentsana Jesús imojtábocna y más tsjuanoye canýe peñëšëjana imojuánatse. Chënga imojanajebna cach peñëšiñe, y chë entšanga imojtseboše Jesús chocana jtsajuatsëntšana. ³⁰ Pero Jesusna chëngbe tsëntsajana tojánachnëngo y ínýoye tojtsanoñe.

Jesús, bayëjbe juabna cányábíbioye tbojanbojuaná
(Mc 1.21-28)

³¹ Chentšana, Jesús cach Galileoye tojesaná, Capernaum puebloye, y choa tojanontsé, chë ochnayté, chë judiëngbe enefjuana yebnentse entsanga jabuátambana. ³² Entsanga imojtsenjnanaye ntšamo Jesús yojtsabuátambama, er chamna mo canye mando bomnacá yojtsóyebuambnaye.

³³ Chë enefjuana yebnentse, canye boyabása bacna bayëja uambayá yojtsemna, y chabe causa chë boyabása tojanontsé mëntšá uayebuáchana: ³⁴ —¡Cachcá šmonyá! ¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atše sëndétatšëmbo nda aca connama, aca chë Bëngbe Bëtsabe Uamaná ca.

³⁵ Chora Jesús chë bacna bayëjbioye tbojtsanácacana y tbojanianyana: —¡Iytëca móbema y chábentšana maisebocna ca!

As chora chë bayëja entsanguentse chë boyabásabioye tbojanshajayé, y ndocá ntjëftsemcá chábentšana yojésebocna. ³⁶ Chë soyama nyetsca entsanga imojénjnanaye y mëntšá imojtsenatsëtsnaye: “¡Tša chca palabrënga! ¡Quem entsá mandayacá y obenacá chë bayëjënga entsamënda, y chënga montsaisebocana ca!”

³⁷ Y Galileoca nyetsca pueblënguine Jesusbiana yojtsótatšëmbo.

Jesús, Simón Pédrëbe uambén mamábioye tbojanshná

(Mt 8.14-15; Mc 1.29-31)

³⁸ Chentšana, Jesús chë judiëngbe enefjuana yebnentšana tojëftsanbocna y Simonbe yebnentse tojánamashëngo. Simonbe uambén mamá šocá inajájona jabuache calentóracá, y chë chentse imojtsemna entsanga chabiana Jesusbioye tmojanimpadá. ³⁹ Chora Jesús chë šocábioye yojotsejbéna y tojánayana: “¡Calentora mojuaná ca!” Y chë calentora tbojtsanóbojuanañe. Y cachora, cha tojtantsbaná y tojanontsé chënga jobuácuedana.

Jesús ba šoquënga tojanashná

(Mt 8.16-17; Mc 1.32-34)

⁴⁰ Shinye yojuenatjëmba ora, banga inye y inye šocana bomnënga Jesusbioye tmojanënatse, y cha nyetsca šoquëngbeñe cucuatšënga tojanajajó y tojanashná. ⁴¹ Chora, ba šoquëngbentšana bacna bayëjënga imojtsaisebocana y mëntšá imojtsanchembumbuana: “¡Aca chë Bëngbe Bëtsabe Uaquiñá condmëna ca!” Pero Jesusna yojtsécácana y ndoñe tonjanalesenciá chamóyebuambama, er chë bayëjënga imnatátšëmbo cha chë Cristo bëtsemnana.

Chë judiëngbe enefjuana yebnënguenache, Bëngbe Bëtsabe soyëngama Jesús entsanga yojanabuayiná

(Mc 1.35-39)

⁴² Yëfsana tojanbinýna ora, Jesús chë pueblentšana tojëftsanbocna, y canye luaroye, entsanga ndoyenoye tojtsanoñe. Pero entsanga tmojána cha jetsenguanguama, y cha yojtsemnoye tmojánashjajna. Chënga imojétseboše Jesús cach pueblentse chaotsoquedáñama, ⁴³ pero Jesús tojanëyana: “Atše šontsemna chë tšabe noticiënga Bëngbe Bëtsabe amëndayama inye pueblënguenáchnaca jábuayenana. Chama Bëngbe Bëtsá šonjichmó ca.”

⁴⁴ Y chentšana, Jesús yojánana Bëngbe Bëtsabiana entsángbioye abuayinaye, chë judiëngbe enefjuana yebnënguenache Judeoca.

5

Canye te mallajta beonga ashebuánaye te

(Mt 4.18-22; Mc 1.16-20)

¹ Canye te, Jesús, Genesaret ca uabaina uafjajónaye tsachañe yojtsemna ora, ba entsanga tmojánashjajna, y chënga tša imojtsenajuatsëntsnaye Bëngbe Bëtsabe palabra jouenama. ² Jesús, chë uafjajónaye tsachañe bécoñe tojáninye uta ena barquësha; chë beonga ashebuánayëngna barquëshanguentšana tmojëftsanbocna atarraiëshangá

jetsáboshabiama. ³ Jesús canye barquëshañe tojánamashëngo; chësha Simónbeshia in-aumna. Chora Simónbioye mëntsá tbojanianyana: “Quem tsacháñentsana chcoye mëyamba ca.”

⁴ Tojanótbema ora, Jesús chë barquëshoicana tojanontsé entsanga jabuátambama. Jabuátambama tojanpochocá orna, Simónbioye tbojanianyana: —Shbuatsëntsoye barquëshia mëyamba y tsëngaftangbe atarraïëshangá šmochjushbuetše, beonga jashebuáyama ca.

⁵ Pero Simón tbojanjuá: —Buatëmbayá, nÿets ibeta fsëndanguá y tondaye chibiátashebuaye. Pero aca chca tcjayánayecna, cachiñe atarraïëshia chantëtëshbuetše ca.

⁶ Tmojanëshbuetše orna, bëtsca beonga tmojánishëche y chëngbe atarraïëshangá tojanontsé jtsatanëcanana. ⁷ As, chë inÿe barquëshañe imojtsemna enutëngbioye tmojánëfjatsëmba, jabújabuachama chamuábama. Chora chënga tmojánabo, y nÿets uta barquëshia beóngaca tmojanajutjé. Tša chëftanga causa, tojanontsé chë uta barquëshia jtsenatjëmbambana. ⁸ Simón Pedro chca tojáninÿe ora, Jesús bentše tojanoshëntsamentsé y tbojanianyana: —¡Bëngbe Utabná, atše bacna soye amá sëndmëna, chíyeca átšbentsana mojuaná ca!

⁹ Chë tša beonga jashebuáyama Jesús tojanmama, Simón y chë cháftaca imojtsemnënga imojouatjana. ¹⁰ Santiago y Juan, chë Zebedeobe uaquiñata y Simonbe enutata, chátnaca auatjanánata ibojtsemna. Chora Jesús Simónbioye tbojanianyana: —Ndoñe matauatjana. Morscana, entsanga Bëngbe Bëtsabiama cochántsanguaye, y nÿe beonga ashebuanayá ndoñe quecochátsmëna ca.

¹¹ As chora chë barquëshangá tsachoye tmojtanëyamba y lempe jéseboshjonëse, Jesús tmojanasto.

Jesús, canÿa bacna nguayanánaca šocábioye tbojanshná

(Mt 8.1-4; Mc 1.40-45)

¹² Jesús canÿe pueblentše yojtsemna ora, chentše tojánashjango canÿe entsá bacna nguayanánaca šocá. Chë šocá Jesúsbioye tbojáninÿe ora, tojanoshëntsamentsé y jubiaca fshantsóntsoñe yojotsejbéna y tbojanimpadá: —Bëngbe Utabná, aca tcojtsebošëse, aca catjobenaye atšbe šocana jtsebojuánana ca.

¹³ As Jesús cucuátšeca tbojánbojajo y tbojanianyana: —Aíñe, sëntseboše. ¡šocana cbotsebojuaná ca!

Y cachora chë šocana tbojtsanóbojuañe. ¹⁴ Chora Jesús tbojanmandá: —Ndocnábeñe chë soye cattsecuëntaye; nÿe Jerusalenoca báchnëbioye motsa, y cha cochjinÿinÿiye aca mora ya tšabá cojtsatsmënama; y chora cochjuátšëmbona ntšamo Moisés chabe leyiñe tojanmandacá, Bëngbe Bëtsábioye chama jëtschuayama, chca, nÿetsca entsanga chamotatšëmbona mora ya tšabá cojtsatsmënama ca.

¹⁵ Pero ndayá Jesús yojtsamama más entsanga imojátatšëmbona, y ba entsanga imojtsójotoye chábioye joyeunayama y chëngbe šocanëngama chauashnama. ¹⁶ Pero Jesús yojanamana jtsoñana entsanga ndoyena luarëngoye y choca Bëngbe Bëtsáftaca ibnéncuentaye.

Jesús, canÿe jama ndobenábioye tbojanshná

(Mt 9.1-8; Mc 2.1-12)

¹⁷ Canÿe te, Jesús yojtsabuatambá ora, chentše básefta fariseunga y ley abuátambayënga imojtsetbiámana, Galileoca nÿetsca pueblënguentsana áshjajnënga, Judeoquënga y Jerusalemnoquënga. Y chora Jesús šoquënga yojtsashnaye, Bëngbe Bëtsabe obenánaca.

¹⁸ Chora tojanopasá, básefta boyabásenga canÿe šocá, jama ndobená, tjuashiñe choye imojuamba. Chënga imojétseboše tsoye cha juambana, Jesús yojtsemnoye, ¹⁹ pero jamashjnama ndoñe tmonjanobená, tša entsanga causa. Chcasna, gradasëšënguëjana chë yebnentša tsbanánoye tmojánasëngo y batšá tejëshe tmojtsanjuaná. Chorna, chë

atëfjnëjana chë šocá tjuashiñe tmojanéstjango, entšangbe tsëntsaca, Jesusbe natsanoica. ²⁰ Jesús tojáninye cha chë šocá jáshnama bétsobenama chënga puerte imojtsošbuáchema. As, chë jama ndobenábioye tbojaniyana: “Bacó, acbe bacna soyënga tcbontseboperdoná ca.”

²¹ Chora chë ley abuátambayënga y chë fariseunga mëntšá tmojanontsé juabnayana: “Quem boyabása ndoñe tšabá Bëngbe Bëtsabiama quenátichamo; mo chábioye cuafjoyenguangcá entsemna. Ndocna entšá quenátobena bacna soyëngama inya japerdónana; nýe Bëngbe Bëtsá aíñe ca.”

²² Pero Jesús yojtsetátšëmbo ntšamo chënga imojtsejuabnayama; as tojanëyana: “¿Ndáyeca tšëngaftangbe ainaniñe chca šmojtsejuabná? ²³ ¿Tšëngaftangbiama ndayá más paselo nántsemna tšëngaftangbe delante jayanama: ‘Acbe bacna soyënga tcbontseperdoná’, o jayanana: ‘Matëtsbaná y motsa ca’? ²⁴ Y chca, morna atše cbochanjínjanyie, chë Bëngbe Bëtsá Entšá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

As Jesús chë jama ndobenábioye tbojaniyana: “Atše cbëyana, matëtsbaná, tjuashe mesocñe y acbe yebnoye motsatoñe ca.”

²⁵ Cachora chë jama ndobená tojtantsbaná entšangbe delante, chë cha inajájona tjuashe yojescñe y Bëngbe Bëtsábioye atschuanaye chentšana yojtsatoñe. ²⁶ Chama nýetsca entšanga imojénjanaye y Bëngbe Bëtsá imojtsatschuanaye. Y corente auatjanánënga imojtsichamo: “Mënté bëts soyënga tmonjinýe ca.”

Jesús, Levíbioye tbojanchembo chabuastama
(Mt 9.9-13; Mc 2.13-17)

²⁷ Chca yojochnëngüentšana, Jesús chentšana tojëftsanbocna y canýe entšábioye tbojáninye, Leví ca uabainá, chë entšángbioye impuesto Romocama atjanayentše inétsobemañe. Chora Jesús tbojaniyana: “Smasto ca.”

²⁸ Y Leví lempe tojésanboshjona, tojantsbaná y Jesús tbojanasto.

²⁹ Chentšana, Levina bëts fiesta chabe yebnentše Jesusbiama yojama. Y chë fiestentše imojtsemna banga impuesto atjanayënga; y inýe entšángnaca mesëshentše imojtsetbiámama. ³⁰ Chora, chë fariseunga y chë ley abuátambayënga tmojanontsé chë Jesusbe uatsjëndayëngbiama podesca oyebuambnayana; y chëngbioye mëntšá tmojanëyana: — ¿Ndáyeca tšëngaftanga impuesto atjanayëngaftaca y bacna soye amëngaftaca šmojtšesá y šmojtsofšëšná ca?

³¹ Y Jesús tojanëjua: —Salud bomnënga ashnayá ndoñe ntsëjabótana, pero šoquëngna aíñe. ³² Y atše ndoñe chiyátabo chë Bëngbe Bëtsabe bominyiñe tšabá amënga jabáchembuama, sinó chë bacna soye amënga imomna ca juabnayënga Bëngbe Bëtsábioye jabáchembuama ca.

Jesús tmojantjá chë Bëngbe Bëtsáftaca jencuéntama tondaye saytescama
(Mt 9.14-17; Mc 2.18-22)

³³ Chora chënga Jesúsbioye tmojaniyana: —Juan chë Ubayanabe uatsjëndayënga y chë fariseungbe usetonënga monduamana ba soye Bëngbe Bëtsáftaca jtsencuéntayana, y chama ba soye tondaye ntjascá jtsemnana; pero acbe uatsjëndayënga nýe nýets tempo jesosañana y jesofšëšnañana ca.

³⁴⁻³⁵ Chora Jesús tojanëjua: —Chë boyabása bouamná chë ofjanëngaftaca tojtsemnëntscuana, chëngbioye saná ndoñe ntsabuáshebenana. ¿Ntšamo chca ndoñe nántsemna? Chë tojobouamá cha chëngaftaca tojtsemnëntscuana, chë ófjanënga bëtská jasana y cháftaca oyejuayënga jtsemnana. Pero ora echanjóshjango y chë boyabása chëngbentšana mochantsánatseñe; chora cocayé chë ófjanënga echántsamna tondaye ntjascá jtsemnana. Ntšamo chë tojobouamá cha y chë ofjanëngaftaca endmëncá, cachcá endmëna atše, atšbe uatsjëndayëngaftacnaca ca —cha tojanëjua.

³⁶ Jesús mēntsánaca tojanacuntá jabuátambama: “Ndocná queonýbatatētse basájua tsēm entsayañe, tanguá entsayá jtarméndama. Chca tcojamēse, chē tsēm entsayá jtsandbema, y chē tcojuatētse entsējua chē tanguájuañe ndoñe tšabá ntsinýnana. ³⁷ Y cach ndoñe, chē tojtseshayana vínoye tanguá jasabenguiñe ntjataftsuámayana. Tcojuaftsuamasna, chē jasabenga jtseshébēfjuana y chē vínoye jtsabuáshanana; y chca, chē vínoye y chē jasabenga tondayama ntjatoservénana. ³⁸ Chíyeca co, chē tojtseshayana vínoyna tsēm jasabenguiñe juaftsuámama. ³⁹ Ndocná, chē bóchena vínoye tojatēmo y chentšana játsbošana chē tojtseshayana vínoye jatofšiyana; cha jayanana: ‘Chē bóchena vínoye tša tšabe ye ca.’”

6

Jesusbe uatsjéndayēnga ochnayté trigo tmojanátabebe (Mt 12.1-8; Mc 2.23-28)

¹ Canýe ochnayté, Jesús canýe jajajana yojtsaye; chabe uatsjéndayēnga trigo imojtsaiuatabnaye, imojtsaiúshenēcaye, y imojtsaiuasaye. ² Chē causa, básefta fariseunga tmojanatjaye: —¿Ndayeca šmojtsama chē ochnayté jamama ndoñe quenátslesenciana soye ca?

³ Y Jesús tojanējua: —¿Ndoñe šmēndualía y šmondētatsēmbo, ntšamo rey David y chabe enutēnga tmojanmama shēntseca imojtsemna ora y jasama yojtsējaboto ora? ⁴ Chca orna, David Bēngbe Bētsabe bēts yebnentse yojámashēngo y chē Bēngbe Bētsá chentse yojamnama inýinýnaye tandēsēnga yojase, y chē cháftaca imojánajna entsángnaca yojátšataye. Y chē tandēsna nýe bachnanga belesenciana jasama. Masque David chca yojama, Bēngbe Bētsá chora ndoñe tonjánayana David canýe bacna soye tojanma ca — Jesús tojanējua.

⁵ Y Jesús más tojanéyana: “Chē Bēngbe Bētsá Entśá tbojanbemá, chē entsá ochnayté tojtsama sóynaca jtsemándayana ca.”

Chē buashana cucuatše bomna entsá (Mt 12.9-14; Mc 3.1-6)

⁶ Inýe ochnayté, chē judiēngbe enefjuana yebnoye Jesús tojánamashēngo y tojanontsé jabuátambana. Y chentse yojtsemna canýe entsá, catsbioica cucuatše buashanētse bomná; ⁷ y chē ley abuátambayēnga y fariseunga chiñe imojtserrondana jinýama nderado Jesús chē ochnayté chábioye tabuanjashna, as chca chēnga jtsebomnama ndaye sóyeca Jesús mal jaquédana. ⁸ Pero Jesús chēngbe juabna yojtsetátšēmbo; asna chē buashana cucuatše bomna boyabásabioye tbojaniyana: “¡Motsbaná y chentse tsēntsaca motsa ca!” Y chē entsá yojojtbaná y entsangbe tsēntsaca yojojtaye. ⁹ Chora Jesús chē inýengbioye tojanéyana: “¿Ndayá yojtselesenciana ochnayté jamana, canýe tšabe soye o canýe ndoñe tšabe soye? ¿Jatsbocana o jtsepochócana ca?”

¹⁰ Y nýetscanga chabe chabuajana imojtsemnēnga tojanēnyānyé, y chē buashana cucuatše bomnábioye tbojaniyana: “Macuenýanējaná ca.” Y chē boyabása tojanacuenýanējaná, y tšabá chētša yojtstatamna. ¹¹ Pero chē inýengna puerte tmojanotjayaná, y tmojanontsé enatsētsnayana ndayá muanjobenaye Jesusbe contra jamana ca.

Jesús chē bnētsana uta uatsjéndayēnga tojanabacacá (Mt 10.1-4; Mc 3.13-19)

¹² Chē tempo, Jesús tjoye tojána Bēngbe Bētsáftaca jencuéntama; y nýets ibeta cháftaca tbojanencuentá. ¹³ Tojanbinýna ora, chabe ústonēnga tojánachembo, y chēnguentšana tojanēbuáyana bnētsana uta uatsjéndayēnga, chē ndēmuanýēnga “chabe ichmónēnga cánaca” tojanēbobaye. ¹⁴ Chēnga imojamna: Simón, chē Pedro cánaca Jesús tbojanabobayá; Andrés, Simonbe catsáta; Santiago y Juan, Felipe y Bartolomé, ¹⁵ Mateo y Tomás,

Santiago, Alfeobe uaquiñá; Simón, chë celote ca uabobainá; ¹⁶Judas, Santiagbe uaquiñá; y Judas Iscariote, chë más chcoye, Jesús uayayëngbe cucuatšine bochjanboshjoná.

Jesús ba entsanga yojanabuatambá y yojánashnaye
(Mt 4.23-25)

¹⁷ Chentšana, Jesús chëngaftaca chë tjocana tojtantsmá y canye jachañe tojanoquedá ba chabe ustonëngaftaca y ba inye entsángaftaca. Ba entsanga choye tmojánabo Judeocana, Jerusalenocana y Tiro y Sidón, chë mar béjaye béconana pueblënguentšana, Jesúsbioye oído jabuájuama y chëngbe šocanëngama chauashnama. ¹⁸ Y chábeyeca chë bacna bayëjbe juabna uambayënga tšabá imojtsatsmëna. ¹⁹ Njetsca entsanga tša imojtseboše y ndayánaca imojtsama Jesús jabojuama, er chábentšana bëts obenana yojtsóbocana y njetscanga yojtsashnaye.

Chë ndegombre oyejuayana bomnënga y ndëmuanyëngbiama tša lastema yochtsemna
(Mt 5.1-12)

²⁰ Jesús chabe uatsjëndayëngbiyoye tojanontješé y tojanéyana: “Puerte oyejuayënga tšëngaftanga, chë quem luarentša soyënga ndbomnënga, er Bëngbe Bëtsabe amëndayentša soyënga tšëngaftangbiama entsemna ca.

²¹ “Puerte oyejuayënga tšëngaftanga chë mora oshëntsiyënga, er becá šmochantóshachaye ca.

“Puerte oyejuayënga tšëngaftanga chë mora šmošachenga, er chentšana šmochántsaténbiajuaye ca.

²² “Puerte oyejuayënga šmochtsemna, entsanga chacmojtšëbuayënja ora, chacmojtšatëbuacana ora, chacmojtšëyanguá ora, y tšëngaftanga ndoñe tšabá šmontsama ca chënga chamojtšichamo ora, tšëngaftanga atšbe ústonënga bëtsemnama. ²³ Chë te puerte šmochjóyejuaye, er celoca canye bëts uacanánana šmochántsebomna. Chëngbe bëts taitanga, cachcá chë Bëngbe Bëtsabe juabna oyebuambnayëngaftaca tmonjanma ca.

²⁴ “Pero ¡tša lastema tšëngaftanga bomnëngbiama, er mora oyejuayënga jtsemnama ya bëtscá šmojóyëngacñe ca!

²⁵ “¡Tša lastema tšëngaftanga chë mora shachanëngbiama, er shëntsana šmochántsebomna ca!

“¡Tša lastema tšëngaftanga chë mora oyejuayëngbiama, er ngménama šmochanjénóbošachna ca!

²⁶ “¡Tša lastema tšëngaftangbiama njetsca entsanga tšabá chamojtsoyebuambná ora; er cachcá chëngbe bëts taitanga monjánama chë Bëngbe Bëtsabe ndoñe ndegombre juabna oyebuambnayëngaftaca ca!” —Jesús tojanéyana.

Chë uayayëngbiama bonshánana jtsebomnana
(Mt 5.38-48; 7.12)

²⁷ “Pero tšëngaftanga, átšbiyoye ouenanënga cbéyana: Tšëngaftangbe uayayënga šmochtsababuánjeshana; chë tcmojtšëbuayënjëngbiama tšabe soyënga šmochtsama; ²⁸ chë tšëngaftangbiama bacna soyënga bošëngbiama, Bëngbe Bëtsá šmochtseimpadana tšabe bendicionënga chamóyëngacñama; chë tcmojóyanguanguëngbiama, Bëngbe Bëtsá šmochtseimpadana. ²⁹ Nderado ndánaca cányoica tcmojajuebjantšetase, cochjomiye chë ínyoica cachcá chacmomama; nderado ndánaca quëfsaiya tcmojuábocana, cachcá cochjonýaye acbe shabuanguanëjuanaca chauetsacñama. ³⁰ Ndánaca chacmojtjañábioyna, jatšetayana; y nda ndayánaca chacmojefcábioyna, ndoñe catjontšínýena chacmatoyema. ³¹ Inyëngaftaca šmochtsama, ntšamo chë ínýenga tšëngaftangaftaca chamotsamama šmojtsebošcá.

³² “Tšëngaftanga, nye chë tcmojtsababuánjeshanënga šmojtšababuánjeshanëse, ¿ndaye tšabe soye chca šmattsama?; er chë bacna entsángnaca chca mondbëtsama. ³³ O nderado, nye chë tšëngaftangbiama tšabe soyënga tmojtšamëngbiama tšabe soyënga šmojtšamëse,

¿ndaye tšabe soye chca šmattsama?; er bacna entšágnaca chca mondbétsama. ³⁴ O nýe chë cmochtëchenanguama šmojtsejuabnángbioye šmojúyentsamëse, ¿ndaye tšabe soye chca šmattsama?; er chë bacna entšágnaca mondbetsenántšamiana, chëngbentsana cachcá jtóyëngacñama jtsobátmanëse. ³⁵ Pero tšëngaftangna cmontsamna chë uayayënga jtsababuányëshanana; y tšabe soyënga chëngbiama jtsamana y júyentsamiana, chëngbentsana ndayánaca jtóyëngacñama ntjatobatmancá. Chca, tšëngaftanga uacanánana cuenta canýe bëts soye šmochanjóyëngacñe, y celoca endmëna Bëngbe Bëtsabe básënga šmochántsemna; Bëngbe Bëtsá chë ndochuanayëngaftaca y bacna entšangaftácnaca tšabia comna. ³⁶ Inýëngbiama lastemadënga šmochtsemna, ntšamo tšëngaftangbe Taitá yomncá ca” —Jesús tojánayana.

Ndoñe ntsichámuana chë ínýënga tšabá o ndoñe tšabá tmonjamama
(Mt 7.1-5)

³⁷ “Ndocá ínýëngbiama šmattsichamo chë ndoñe tšabá tmontsamama, y Bëngbe Bëtsá ndoñe queochátichamo tšëngaftanga ndoñe tšabá šmonjama ca. Inýëngbiama ndoñe šmattsichamo ndoñe tšabá tmonjama ca, y Bëngbe Bëtsá ndoñe queochátichamo tšëngaftanga ndoñe tšabá šmonjama ca. Inýënga šmochjáperdonaye y Bëngbe Bëtsá cmochanjáperdonaye. ³⁸ Inýëngbioye šmochjatsataye y Bëngbe Bëtsá cmochántatsataye. Mo nda canýe biaco medidiñe bëtscá tojajutjé, uashëshe y cmojtiyecá, Bëngbe Bëtsá cachcá cmochántatsataye. Ntšamo tšëngaftanga ínýëngbioye chašmojábiama, uabouana o ndoñe jabuache soyënga, Bëngbe Bëtsá cachcá tšëngaftangbioye cmochanjábiama ca” —Jesús tojánayana.

³⁹ Jesús quem cuéntnaca tojánayana jabuátambama: “¿Canýe jtaná nantsobena inýe jtaná jtsanachayama? ¿Chca ndoñe nýets útata ndaye tšuabentšë buanjótsatšë? ⁴⁰ Chë uatsjendayá ndoñe ntsemnana chë buatëmbayabiama más bëtsá. Pero chabe uatsjëndayana chaojapochocá ora, cach buatëmbayacá jtsemnana.

⁴¹⁻⁴² “Canýa chabe bominyiñe canýe niñëfja tojtsebomnëse, cha ndoñe ntsoberenana chabe catsátbioye jauyanana: ‘Acbe bominyentsana canýe polvështema jtsebuchjátsëcama šmolesenciá ca’. Natsana cha bontsemna cachabe bominyentsana chë niñëfja jtsebuchjátsëcana, tšabá jinýama jobenayama, chabe catsatbe bominyentsana chë polvotema jtsebuchjátsëcama. ¡Cachcá entsemna acbiama, bacna entšá chë ntšamo ndegombre tcojuabnacá ndinýinýayá! Chë tša bacna soye cojtsama ca acbe catsátbioye tcojauyana ora, cach aca tša bëts bacna soyënga cojtsamama ntjenujuaboycá; y chca, aca jamana canýe bacna soye. Natsana cmontsemna chë cach aca ndoñe tšabe soyënga cojtsamama ngmënaca jshatenójuaboyana y chca amana jshétsajbanana, y chentšana cocayé cochantsobena acbe catsata juajabuáchana ntšamo tšabá yomncá chaotsamama ca” —Jesús tojánayana.

Tšabe betiye o ndoñe tšabe betiye tondmënana, jtsotatšëmbuana ntšamo tojashajoncá
(Mt 7.17-20; 12.34-35)

⁴³ “Ndoñe queonýbatsmëna, chë canýe tšabe betiyiñe podësca soye jashájonana; ni canýe ndoñe tšabe betiyiñe tšabe soye jashájonana. ⁴⁴ Betiyënga jtsabuatomana ntšamo cada betiye tojtseshajcá. Uchmašëshentsana quenátopodena higuëbé jocñana; ni uvašëša, shëshëntša betiyentsana. ⁴⁵ Chë tšabe entšana, chabe ainanoca tšabe juabnënga bomnentsana jtsóyebuambnayana; y chë bacna entšana, chabe ainanoca ndoñe tšabe juabnënga bomnentsana jtsóyebuambnayana. Er ndayá becá ainanoca tomnama entšá jtsóyebuambnayana ca” —Jesús tojánayana.

Chë uta ucuatjoniñe
(Mt 7.24-27)

⁴⁶ “¿Ndáyeca tšëngaftanga atše šmnétsatsaye, ‘Utabná, Utabná ca’, y ntšamo atše stsichamcá ndoñe ntsamana? ⁴⁷ Cbochanjáuyana ndacá yomna nda átšbioye tojabo, atšbe palabra tojouena y ntšamo stsichamcá tojtsama: ⁴⁸ Cha endmëna mo canye entšacá, nda canye yebna jajebuamna becá fshantse jashenoye yojajutjo y ndëtsbenguiñe yojúcuatjoye. Béjayënga yojtsóftjajna ora, chë yebnëjana yojobuachnëngo, pero ndoñe yonjobenaye juashajayana, er chë ndëtsbenguiñe jabuache yojaúcuatjona. ⁴⁹ Pero nda atšbe palabra tojouena y ntšamo stsichamcá ndoñe tontsama, endmëna mo canye entšacá, nda canye yebna yojajebo nye fshantsiñe, tondayiñe ntjucuatjoycá. Béjaye yojóftjango y jabuache chë yebnoye yojobuá ora, chë yebna yojtsáshajaye y lempe yojtsopochóca ca” —Jesús tojánayana.

7

Jesús canye Romano soldadëngbe amëndayabe bochichnayábioye tbojanshná (Mt 8.5-13)

¹ Entšángbioye chca jáuyanana tojanpochocá ora, Jesús Capernaum puebloye tojána. ² Chentše yojoyena canye romano soldadëngbe amëndayá. Cha ibnabomna canye bochichnayá puerta bonshaná, y chora cha šocá yojtsemna, ya jtsóbanama. ³ Jesús ba šoquëngbioye yojáshnama encuëntayana chë amëndayá yojouena ora, báseftanga bëtsëjemëngcá amëndayënga cha tojanichamó, chauábama Jesús jaimpádama y chabe bochichnayábioye chabotseshnáñama. ⁴ Chënga Jesúsbioye tmojánashjango y tša imojtseimpadana, mëntsá: “Quem soldadëngbe amëndayá mercedo entsebuájona chacotsájabuachama; ⁵ er cha bëngbe luarentša entšángbioye corente endábabuanyëshana, y cachá chë bëngbe enefjuana posada šonjayentsjebó ca.”

⁶ Jesús chëngaftaca tojána. Pero chë mandayabe yebnoye imojtsebeconá ora, chë soldadëngbe amëndayá básefta amiguënga yojichamuá, Jesúsbioye mëntsá chamuauyanama: “Atšbe Utabná, ndoñe yapa matenócochinyenana átšbioye jabama. Atše mercedo taitatobuajoñe aca atšbe yebnoye chacuamashënguama; ⁷ chíyeca ni mo añemo chiyatentšetá jama aca jajëbenguama. Morna nye cochjayana y atšbe bochichnayá tšabá echántsmëna. ⁸ Er atše sëndábamna átšbioye mándayënga y átšnaca soldadëngbe amëndayá sëndmëna. Atše canye soldádbioye stjauyana ‘motsa ca’, cha cachora jana; y ínÿabioye stjauyana ‘mabo ca’, cha cachora jabana; y nderado atšbe bochichnayábioye ndayánaca chaomama stjamánda, chánaca cachora chë soye jamana ca” —cha yojáuyana.

⁹ Jesús chca tojanuena ora, chë mándayabiama yojenjnaná, y jobuértanëse chë ba entšanga cha ustonëngbioye tojanéyana: “Ndegombre cbéyana, ni mo nyëts Israelentše, ni canya quem boyabasacá tša ošbuachiyá chiyátinÿena ca.”

¹⁰ Y chë ichmónënga yebnoye tmojtaná orna, tmojáninÿena chë bochichnayá ya tšabá yojtsatsmëna.

Jesús tojanma canye viudabe uaquiñá cháuatayenama

¹¹ Chca tojanopasá chentšana, Jesús yojétsaye Naín ca uabaina puebloye, y cháftaca chabe uatsjëndayënga y ba entšanga imojtsaye. ¹² Chë pueblo amashjuanoye yojtsebeconá orna, entšanga chë pueblentšana canye obaná imojtsábocana jauátbontsama; chë obaná canye viudabe uaquiñá inamna y nye cha uaquiñá. Bëtská entšanga chë obanabe mamá imojtsetjëmbambnaye. ¹³ Bëngbe Utabná chë viudábioye tbojáninÿe ora, chabiama tbojanongmé y tbojanianyana: “Ndoñe matošachena ca.”

¹⁴ Y jobéconase, chë ataúse tojánbojajo, y chë obaná atambayënga tmojantsá. Y Jesús chë obanábioye tbojanianyana: “Bobontse, atše cbéyana: ¡Matëtsbaná ca!”

¹⁵ Chora chë obaná tojtantsbaná y tojanontsé oyebuambnayana; y chabe mamábioye Jesús chë bobontse tbojtánatse. ¹⁶ Nyëtsca entšanga tša uatjana yojubache chca tmojáninÿe ora, y Bëngbe Bëtsá imojtsatschuanaye, mëntsá jayanëse: “Bëngbentše canye

Bëngbe Bëtsabe juabna oyebuambnayá cuatënjonýná ca.” Y mëntsánaca: “Bëngbe Bëtsá tojabo chabe entsanga jabújabuachama ca.”

¹⁷ Y nýets Judea luaréjana y chë chábuañe luarenache entsanga imojátatsëmbona ndayá Jesús tojanmama.

Juan chë Ubayanabe ichmónënga
(Mt 11.2-19)

¹⁸ Juan, lempe ntšamo Jesús yojsamama yojátatsëmbona; er chabe ústonënga chama tmojançantá. As Juan, chënguentšana útata tojánachembo, ¹⁹ y Jesúsbioye yojichamuá jatjayama cha tajojamna chë Cristo, chë jabama ibojanmëná, chë Uámana Uabuayaná, o ínýabiama jatobátmama tajojétsamna ca. ²⁰ As chë Juanbe ichmónënga Jesúsbioye tmojanobeconá y tmojanianyana: —Juan chë Ubayaná šonjichamo jatjayama, aca ndegombre cojtsemna chë Cristo, chë jabama ibojanmëná, o šojtsamna ínýabiama jatobátmana ca.

²¹ Chë ichmónata tbojánashjango ora, Jesús banga yojsashnaye, šocanëngama y tsetšanëngama; bacna bayëjbe juabna uambayënga tšabá imojtsatsmëna, y jtanënga tšabá yojsatëbinýna. ²² Chora Jesús mëntsá tojanéjua: —Motsata y Juánbioye šochjauyana ntšamo šojinýe y šououencá: Chë jtanënga tšabá entsatëbinýna, chë coshetënga tšabá montsatana, chë bacna nguayanánaca šoquënga shnánënga montsatsmëna, chë tësmënga montsuenana, chë obanënga tmontayena, y chë ndbomnjémëngbioye chë tšabe noti-ciënga montsabuyayná. ²³ ¡Puerte oyejuayá chaotsemna, nda atše ndoñe bacna soye stsama ca jtsejuabnayëse, átšbeñe ošbuáchiyana ndoñe tontsajbaná cha ca! —Jesús tojanéyana.

²⁴ Chë Juanbe ichmónata chentšana tbojésanbocnentšana, Jesús tojanontsé Juanbiana entsanga jáuyanana, mëntsá: “Juan jinýama šmojánbocna ora, ¿ndayá jinýama šmojánbocana entsanga ndoyena luaroye? ¿Canýe entsá ainaniñe tondaye añemo ndbomná, mo canýe šëše bínýiaca shatiyeynëščá? ²⁵ Y ndoñese, ¿ndayá jinýama choye šmojánbocana? ¿Canýe boyabása uámana entsayaca bopormaná? Ndoñe. Tšëngaftanga šmondëtatšëmbo chë uámana entsayaca bopormánënga y chë bëtsá bomnánaca nýe tondayama ntsecochinýencá vida bomnëngna, reyëngbe yebnënguiñe mondbëtsiyenama. ²⁶ Asna, ¿ndayá jinýama choye šmojánbocana? ¿Canýa Bëngbe Bëtsabe juabna oyebuambnayá? Ndegombre; y cbëyana, canýa Bëngbe Bëtsabe juabna oyebuambnayabiama más bëtsá. ²⁷ Cha, Juan, endmëna ndabiama Bëngbe Bëtsá chabe uabemana palabrenguiñe tojánayana mo chabe ichmonacá, mëntsá tojánayana ora:

Cristo, atšbe entsá natsana sënjichmó acbiana chaóyebuambama, entsanga jábuayenama aca jabama ainaniñe tšabe juabnëngaca chamotseprontánama ca. ²⁸ Ndegombre cbëyana: Nýets tempo entsángbeñe, ndocná quenátsmëna Juan chë Ubayanabiama más bëtsá; masque chca, Bëngbe Bëtsabe amëndayoca chë más batšá uamaná, cha más bëtsá echántsemna ntšamo mora Juan yomnama ca” —Jesús tojánayana.

²⁹ “Nýetsca entsanga chca Juánbioye tmojanóyeunanga y chë Romocama entsángbioye impuesto atjanayëngnaca, nýets ainánaca tmojánayana Bëngbe Bëtsá nýetsca soyënguiñe tšabá amá yomna ca; er tmojánenabaye ntšamo jubáyama Juan yojanamancá. ³⁰ Pero chë fariseunga y ley abuátambayënga, ntšamo jubáyama Juan yojanamancá jójyëngacñama ndoñe tmonjánbošena ora, tmojtšanoboté ndayá Bëngbe Bëtsá chëngbiana jamama yojanjabnacá.”

³¹ Jesús mëntsánaca tojánayana: “Cbochanjáuyana ndayacá morsca entsanga imomna, y ndayëngcá chënga imomna. ³² Chënga mondmëna mo chë plazëngoca mondbetsetbiámama basetemëngcá; chëngna mëntsá jabuache jtsenatsayana: ‘Tšëngaftangbiana fsënjaflautá y ndoñe chešmatlantšá; ngmëna fsënjavërsiá y ndoñe chešmatenóbošachna ca.’ ³³ Juan chë Ubayaná tonjánabo y ndoñe quenjatamana bëtsá entsángbeñe jtsemnana, ni tandëse jasana, ni vínoye jofšiyana; y tšëngaftanga šmontsichamo chana bacna

bayëjbe juabna uambayá inamna ca. ³⁴ Morna, chë Bëngbe Bëtsá Entśá tbojanbemá tonjabo y chana aíñe entsamana bëtscá entsángbeñe jtseyayana y jtsofššnayana, y tšëngaftanga chabiamá šmotsichamo: ‘Chana yapa uasayá y vínoye tmoyá entsemna y Romocama entsángbioye impuesto atjanayënga y bacna soyënga amëngbe amigo ca’.

³⁵ Pero Bëngbe Bëtsá endbëtsinÿinÿnaye cha nÿets osertánana bomná yomnama, chë ndayá cha tojama ora ndayá chentšana inobocna soyëngaca ca” —cha tojánayana.

Jesús, chë fariseo Simonbe yebnentše

³⁶ Canÿe fariseo Jesúsbioye tbojanofja saná jauasama, y Jesús chabe yebnoye tojána y mesëshentše yojótbema. ³⁷ Chë pueblentše yojamna canÿe shembása, bacna vida bomná. Jesús chë fariseobe yebnentše yojtsesama chë shembása yojátatsëmbona; as cha chë yebnoye tojánashjango y tojanamba canÿe alabastro botellëše, jútjena canÿe botamana uanguëtše béjaye. ³⁸ Jesusbe shecuatšentše yojoshëntsamentšiyë, šachénaca; shëchbuíyeca chabe shecuatšënga yojtsefchecucná y cachabe stjënashaca ibojtsatsshéchojuaye. Chabe shecuatšënga yojtonguëtsëntšiyë y chë botamana uanguëtše béjaye ibojtashecbuéscacja.

³⁹ Chë fariseo Jesúsbioye ofjaná chca tojáninÿe ora, mëntsá Jesusbiamá yojtsejuabnaye: “Cha ndegombre canÿe Bëngbe Bëtsabe juabna oyebuambnayá tojtsemnëse, nantsetátšëmbo nda y mocna shembása yomna chë bontsebana shembása: canÿe bacna vida bomna shembása ca.” ⁴⁰ As Jesús chë fariséobioye tbojanianyana: —Simón, cuentado palabra šmotsoyeuná ca.

Y chë fariseo tbojanjuá: —Arseñor, Buatëmbayá ca.

⁴¹ Y Jesús tojánayana: —Canÿe entśá crocénana uyentšamianá, uta ndebénata yojánabamna. Canÿa shachna patse denario crocénana ibojandebena, y chë ínÿana, shachna bnëtsana. ⁴² Pero chë útata tondaye ibontsebomna ndayentšana cha jëtsëntšabuáchiyama; as chë uyentšamianá nÿets útata chë ndebénana yojtsaperdónaye.

Chora chë fariséobioye tbojanianyana: —Mora šmëyana, ¿chë útatentšana nda más chë uyentšamianábioye buantsebobonshana ca?

⁴³ Y Simón tbojanjuá: —Atše šontsinÿyana chë más bëtscá ndebená ca.

Y Jesús tbojanianyana: —Ndegombre, ntšamo endmëncá tcjayana ca.

⁴⁴ Jesús, chë shembásabioye jontješiyëse, Simónbioye tbojanianyana: —Minÿe quem shembása. Atše acbe yebnoye sënjamashëngo y aca búyeshe ndoñe chešcatabuatsšetá atšbe shecuatšëngama. Y quem shembásana, cachabe shëchbuíyeca šontseshecjabebé y chabe stjënashaca šontseshecbojó. ⁴⁵ Ndoñe chešcatámocho, pero cha tonjámashëngo orscana ndoñe ntjájbanana atšbe shecuatšënga onguëtsëntšnaye.

⁴⁶ “Aca bestšašínë aceitiye ndoñe chešcatsbuešcja, y chana aíñe botamana uanguëtše béjaye šonjashecbuešcja. ⁴⁷ Chcasna atše cbëyana, cha šonjinÿanÿé atšbiamá corente bonshánana yojtsebomna, er atše chabe bëtscá bacna soyënga sëntseboperdoná; pero nda nÿe básefta bacna soyëngama stjaperdóna chana, nÿe batšatema bonshánana jtsebomnana ca.”

⁴⁸ Y chora Jesús chë shembásabioye tbojanianyana: “Acbe bacna soyëngama perdonaná contsemna ca.”

⁴⁹ Chora chë ofjanënga chentše imnatbiámanëngna tmojanontšé enatsëtsnayana: “¿Nda quem entśá yojtsemna, chë bacna soyëngámna entśángbioye jtsaperdónayana ca?”

⁵⁰ Y Jesús más chë shembásabioye tbojanianyana: “Aca átšbeñe icošbuachéyeca, atsbocaná cochántsemna; natjëmbana motsatoñe ca.”

8

Chë Jesúsbioye imojanájabuachana shembásënga

¹ Chca tojanopasá chentšana, Jesús bëtš y base pueblënguëjana yojánana, tšabe notiçiënga Bëngbe Bëtsabe amëndayama entsánga abuátambaye y abuayiyenaye. Chë bnëtsana uta uatsjëndayëngna cháftaca imojtsajna. ² Básefta shembásëngnaca imojtsetjëmbambaye;

chëngbentsana Jesús bacna bayëjënga tojtanëbuacna y šocanëngama tojanashná. Chënga imojamna, María chë Magdalena ca uabobainá, ndábentsana Jesús canÿsëfta bacna bayëjënga tojtanëbuacna; ³ Juana, Cuzbe shema (Cuza yojamna rey Heródesbe canÿe uajabuachaná); Susana y inÿe shembásenga; chëngna chë imojánbomna soyëngaca chëngbioye imojanëjabuáchana.

Chë jenabe cuento

(Mt 13.1-9; Mc 4.1-9)

⁴ Ba pueblënguentšana mallajta entsanga tmojánbocana Jesús jinÿama. Ba entsanga jouenama tmojanobeconá ora, Jesús mëntsá tojanacuntá: ⁵ “Canÿe, canÿe jená jénaye jaujuëshama yojëftseboconá. Yoÿtsëjquëshaye orna, básefta jénaye benache juachañe yojuatquécjana; chiñna entsanga imojtsebotájaye, y jaja shloftšënga imojástjajna y imojtsósañe. ⁶ Inÿe meshëngna ndëtsbenguiñe yojuatquécjana. Yojuábocna orna, betscó yoÿtsábojo, chë fshantsiñe ndoñe yapa búyeshe yonjamna causa. ⁷ Inÿe meshëngna uhmëshangañe yojuatquécjana y chë uhmëshangá lempe yoÿtsatscué, chë jénayeca cánÿiñe yojuábocna ora. ⁸ Inÿe meshëngna, uanguaniñe yojuatquécjana. Yojuájua orna, bëtscá yojuashájona; canÿe jénayentsana nÿa mo patse meshënga yojuashájona.”

Jesús chca jacuéntama tojanpochocá ora, tojanáyebuachena: “Chë jouenama tmojt-sobenënga, šmochjouena ca.”

Ndáyeca Jesús cuentëngaca yojánabuatambaye

(Mt 13.10-17; Mc 4.10-12)

⁹ As chora chabe uatsjëndayënga tmojantjá: —¿Ntsamo chë cuento yoÿtsayana ca?

¹⁰ Y Jesús tojanéyana: —Bëngbe Bëtsá tšëngaftanga cmontsinÿanÿná nÿetsca chë mo iytëmencá yomna soyënga chabe amëndayama, pero chë inÿëngbioyna ndoñe; chë soyëngama chënga lempe cuentëngaca sëntsetsëtsná. Chca, masque corente chamot-safšna, ndoñe chamondobená Bëngbe Bëtsabe soyënga jinÿama; y masque becá quem soyënga chamouena, ndoñe queochátësertana ca.

Jesús chë jenabe cuentama tojanabuayená

(Mt 13.18-23; Mc 4.13-20)

¹¹ “Chë cuento mëntsá endayana: Chë jénaye Bëngbe Bëtsabe palabra entsemna. ¹² Chë benache juachañe yojuatquécjana básefta jénaye endayana chë básefta entsanga Bëngbe Bëtsabiama soyënga tmojouenënga; pero chora Satanás betscó jabana chënga Bëngbe Bëtsabe palabra jabétsabuajuanama, chca, chënga ndoñe chamondëtsošbuáchema y bacna soyënguentšana ndatsebácanënga chamotsemnana. ¹³ Inÿe entsanga mondmëna mo chë ndëtsbenguiñe yojuatquécjana jenaycá. Chë entsangna Bëngbe Bëtsabe palabra jouenana y oyejuayënga jtsemnana. Pero ndoñe nÿets tempo chana jocochájuana; y chca, ndoñe bayté Bëngbe Bëtsáftaca ntjëftsemnëngana, cha ndoñe yapa tmontsašbuaché causa. Inÿënga mochantsëbuayënja y Bëngbe Bëtsabeñe betsošbuáchiyama mochan-jasúfrianga; chë causa, Bëngbe Bëtsabe palabra cachcá chënga mochanjesonÿaye. ¹⁴ Inÿe entsanga mondmëna mo chë uhmëshangañe yojuatquécjana jenaycá. Chëngna Bëngbe Bëtsabe palabra jouenana, pero quem luarentša soyëngaca oyejuayënga jtsemnana yapa jesenójuabnayana, y mallajta crocénana y ba soyënga jtsebomnana yapa jésebošana; chama y ba soyëngama yapa enócochinÿena causa, Bëngbe Bëtsabe soyëngama echantsebnëtjomba y ndoñe quemochátama ntsamo Bëngbe Bëtsá tojayancá. ¹⁵ Inÿe entsangna mondmëna mo chë uanguaniñe yojuatquécjana jenaycá. Chëngna Bëngbe Bëtsabe palabra botamana mochanjouena; tsabe ainánaca Bëngbe Bëtsabe palabriñe jtsošbuáchiyama jtseprontánëngana. Mo canÿe betiye puerta tsabá toÿtseshajuancá, chënga bëtscá tsabe soyënga Bëngbe Bëtsabiama mochántsama. Chca mochántsama, Bëngbe Bëtsabeñe jtsošbuáchiyëse y nÿetsca soyënguiñe puerta uantadënga jtsemnëse ca” —Jesús tojanabuayená.

*Chë uajuinÿanëshama cuento**(Mc 4.21-25)*

¹⁶ “Ndocná canÿe uajuinÿanëshama juajuinÿenana, chentshana ndaye sóyeca chëshama jtséstama o jutsnëshama tajsoye jtsajájuama; juajuinÿenana ndayá tsbanánoca juajájuama, chë luarentse amashjuanëngbiama chaotsebínÿnama. ¹⁷ Er ndocna yoytëmena soye, ntjinÿcá queochaisoquéda, y chë entsangbiama ndótatsëmbo soye, ntsotatsëmbcá queochaisoquéda.

¹⁸ “Chcasna, botamana smochjouena, er nda Bëngbe Bëtsabe soyëngama tšabá tbojoserotá, Bëngbe Bëtsá echanjama cha más ba soyëngama chaboserutama; pero nda chë soyëngama ndoñe tontsebošá, chë nÿe batšá ibosertana soyëngama bochantsebnatjëmba ca” —Jesús tojánayana.

*Chë Jesusbe ndegombre pamíllanguentsënga**(Mt 12.46-50; Mc 3.31-35)*

¹⁹ Chora, chabe mamá y chabe catšátanga chë Jesús yojtsemnentse tmojánashjajna, pero ndoñe imontsobena chábioye jobéconana, yapa entsanga causa. ²⁰ As canÿa Jesúsbioye mëntsá tbojaniyana: —Acbe mamá y acbe catšátanga shjoca montsemna y montseboše aca jinÿama ca.

²¹ As Jesús tojánayana: —Chë Bëngbe Bëtsabe palabra tmojouenënga y ntšamo tmojouencá tmojtsamënga jtsemnana atšbe mamá y atšbe catšátanga, atšbe ndegombre pamíllanguentsënga ca.

*Jesús chë binÿia y chë béjaye bonguana yojëtsbema**(Mt 8.23-27; Mc 4.35-41)*

²² Canÿe te, Jesús chabe uatsjëndayëngaftaca canÿe barquëshoye tojánamashëngo y chënga tojanëyana: “Uafjajónaye chenguana cuajna ca.”

As tmojána; ²³ y imojtsenachnëjuanëntscuana Jesús yojtsomaná. Ndeolpe, chë béjayiñe corente jabuache binÿia yojóshjango y yojontsé béjaye chë barquëshoye jtsobuajútjiana. Y chca, chëngbiama puerte resjo yojtsemna. ²⁴ Chora chë uatsjëndayënga tmojána Jesús jetsefšenama y mëntsá tmojaniyana: —¡Buatëmbayá! ¡Buatëmbayá! ¡Montsenatjëmbambana ca!

Chora Jesús tojantsbaná y chë binÿia y chë bëts olëshëngoye tojanmandá: “Bonguana šochtsemna ca.” Y chë binÿiayana tojanëjbana y lempe bonguana yojtsatsmëna.

²⁵ Chentshana Jesús chabe uatsjëndayënga tojanëyana: —¿Bëngbe Bëtsá tšëngaftanga jujabuáchama yobenama, cabá ndoñe smontsošbuaché ca?

Y chënga auatjanánënga y ojnánánënga mëntsá imojtsenatsëtsnaye: —¿Nda quem boyabása yomna? ¡Cha tojanmandá ora, masque chë binÿia y chë béjaynaca joyeunayana ca!

*Chë Gerasa luaroca bacna bayëja uambayá**(Mc 8.28-34; Mc 5.1-20)*

²⁶ Chentshana Gerasa ca uabaina luaroye tmojánashjajna, Galilea ndirichiñe. ²⁷ Jesús fshantsoye tojánastjango ora, chë pueblcana canÿe entsá chábioye tojánabo. Cha ya bayté bayëjbe juabna yojtsebomna, ndocna entsáyá yonjanichëtjona; y yebniñe ndoñe yonjaniyena, sinó obanëngbe cuevëshënguenache. ²⁸ Chë entsá, Jesúsbioye tbojáninÿe ora, chabe natsanoica yojoshëntsamentšiyey y mëntsá yojtsáyebuache: —¿Ndayá átšeftaca cojtseboše, Jesús chë celoca Bëngbe Bëtsabe Uaquiñá? ¡Diosmanda ndoñe šcatjatsetšená ca!

²⁹ Chca tbojaniyana, er Jesús tojanmandá chë bacna bayëjbe juabna chábentshana chaueseocnama. Ba soye chë bayëja yojánama chë entsá ndoñe tšabá chaotsemnama. Chë entsanga imojuamana cucuatšentsana y shecuatšentsana cha jtsëtsbuayana bonguana chaotsemnama, pero chana jtsatabebiana, y chë bacna bayëjbe mándoca

entšanga ndoyena luarëngoye yojánachana. ³⁰ Jesús chë boyabásabioye tbojantjá: —¿Ntšamo cabaina ca?

Y cha tbojanjuá: —Atše sënduabaina Legión ca.

Cha chca tojánayana, er chábeñe ba bacna bayëjënga tmojánamashjna. ³¹ Y chë bayëjënga Jesús tmojanimpadá, chë corente uabouana tboye ndoñe chaondíchamuama. ³² Chentša béconana ba cotsënga imnajena, tjoca inmëtsosañe; as chë bayëjënga Jesús tmojanimpadá chë cotsëngbeñe jamashjna chaulaesciamama, y Jesús aífne chca tojanalesenciá. ³³ As chë bayëjënga chë entšábentšana tmojésanbocana y chë cotsëngbeñe tmojánamashjna; y chentšana, chë cotsënga batsjocana peñëšëjana uafjónayoye imojtsoshbuetše y yojtsatajo.

³⁴ Chë cotsënga anýenënga chca yojopásama tmojáninýe ora, chentšana tmojtsanacheta y tmojána chë soye jacuéntama chë puebloca y chiñe luarenache. ³⁵ Entšanga tmojánbocana ndayá tojanopasacá jinýama, y Jesús yojtsemnoye tmojánashjajna ora, tmojáninýe chë entšá chë ndábentšana bayëjënga tmojtanbocna, Jesusbe shecuatšentše yojtsótbemañe, entšayá uichëtjoná y chabe nýets juábnaca. Y chë entšanga chama corente imojouatjaná. ³⁶ Ntšamo yojopasacá tmojáninýëngna entšángbioye tmojanacuntá ntšamo chca chë bacna bayëjbe juabna uambayá chora ya tšabá yojtsatsmënana. ³⁷ Chentšana, nýetscanga chë Gerasa luarentše oyenënga Jesúsbioye imojtseimpadana chë luarentšana ínýoye chaotsoñama, er chënga corente imojtsauatja. As Jesús chë barquëshoye tojtanamáshëngo y chentšana tojtsanoñe. ³⁸ Chë entšá chë ndábentšana bacna bayëjënga tmojtanbocana, Jesúsbioye tbojanimpadá cháftaca jama chabolesenciamama; pero cha ndoñe tbonjanlesenciá. Jesús tbojanmandá chauatoquedama y mëntšá tbojaniyana: ³⁹ “Acbe yebnoye motsatoñe y cochjácuntaye lempe ntšamo Bëngbe Bëtsá acbiamama tojamcá ca.”

Chentšana chë boyabása yojtsatoñe, y nýets pueblëjana tojanacuntá ntšamo Jesús chabiamama tojanmcá

Jesús canýe shembásabioye tbojanshná y tojanma Jairëbe bembetema cháuatayenama (Mt 9.18-26; Mc 5.21-43)

⁴⁰ Jesús chë uafjónayoye chenguánoica tojtanashjango ora, nýetsca entšanga oyejuayënga tmojtanofja, er nýetscanga chabiamama imojanobátmana. ⁴¹ Chora tojánashjango canýe entšá, Jairo ca uabainá. Cha inamna chë pueblentše chë judiëngbe enefjuana yebnentša mandayá. Jesusbe shecuatšentše yojoshëntsamentšiyey y ibojtseimpadana chabe yebnoye cháuama; ⁴² er chë nýe canýe bembe cha ibnabomná, bnëtsana uta uata bomná, chora ya jóbanama yojtsemna.

Y Jesús yojtsayëntscuana, chë entšanga chábioye imojtsojuatsëntšenaye. ⁴³ Chë entšanguentše yojtsayey canýe shembása, oboftjajuanánaca šocá; cha ya bnëtsana uta uata chca inapadecena. Lempe ntšamo yojanbomncá ashnayëngbioye atóbocayíñe yojtsepochóca, y ndocná yonjobenaye cha jáshnana. ⁴⁴ Chë shembásana stëtšoicana Jesúsbioye yojobeconá y chabe entšayá sibúájua tojanábojajo. Y cachora chë oboftjajuanana ibojtsobojuána. ⁴⁵ Chora Jesús tojanatjá: —¿Nda šjabojajo ca?

Nýetscanga imojtsichamo ndoñe ca; as Pedro tojánayana: —Buatëmbayá, entšanga cmontsatsëntšená y cmontsayájuatsëntšenaye ca.

⁴⁶ Pero Jesús cachiñe tojánayana: —Pronto nda šojábojajo, er atše sënjasenté obenana átšbentšana jóbocnana, mo nda stjashna orcá ca.

⁴⁷ Chë shembása tojáninýe Jesús yojtsetátšëmbo cha tbojánbojajuama. As chora, ngmëmnyayá tojána y Jesusbe shecuatšentše yojoshëntsamentšiyey; y nýetscangbe delante tojanobuambá, ndáyeca tbojánbojajuama, y ntšamo cachora tšabá tojtanuquedama. ⁴⁸ Chora Jesús tbojaniyana: —Bembe. Bëngbe Bëtsábeñe icošbuachéyeca shnaná contsatsmëna. Natjëmbana motsatoñe ca.

⁴⁹ Jesús cabá yojtsóyebuambnantscuana, chë judiëngbe enefjuana yebnentša mandayábiocana canya tojánashjango, y chë mandayábioye tbojaniyana: —Acbe bembe ya tontsóbana; ndoñe más chë Buatëmbayábioye matébëyabomana ca.

⁵⁰ Pero Jesús chë soye tojanuena; as chë mandayábioye tbojaniyana: —Ndoñe matauatjana. Nye Bëngbe Bëtsábeñe cochtsošbuáchiye y acbe bembe tšabá echántsatsmëna ca.

⁵¹ Chë yebnoye tmojánashjajna ora, Jesús ndoñe tonjanalesenciá banga choye jamashjnama, nye Pedro, Juan y Santiago y chë shembásetembe bëtsëtsatna aíñe. ⁵² Nÿetscanga imojtsenóbošachiye y ngménaca imojtsóyebuambnaye, pero Jesús tojanëyana: “Ndoñe matenóbošachengana. Cha ndoñe chenatóbana; cha nye endëtsomañe ca.”

⁵³ Chë entsanga Jesúsbioye nye imojtsáfchaye, er chënga imojtsetátšëmbo chë shembásetema obaná yojëtsemnama. ⁵⁴ Chora Jesús chábioye tbojanábuacueshache y jabuache tbojaniyana: “¡Shembásetema, matëtsbaná ca!”

⁵⁵ Y cha tojtanayena y cachora tojtantsbaná; y Jesús tojanamëndá chë shembásetema saná chamuajuatšé, chaosama. ⁵⁶ Chë shembásetembe bëtsëtsata puerte ojanánata ibojtsemna; y Jesús tojanamëndá, ndayá tojanopasama ndocnábeñe ntsecuëntayana.

9

Jesús, chabe uatsjëndayënga tojanichamó, Bëngbe Bëtsabe amëndayama jábuayenama
(Mt 10.5-15; Mc 6.7-13)

¹ Chentšana, Jesús chabe bnëtsana uta uatsjëndayënga tojánachembo, y mando y obenana tojanatsatá bacna bayëjënga entsángbentšana jtëbuacanama y šocanëngama jashnayama. ² Tojanichamó Bëngbe Bëtsabe amëndayama jábuayenama y entsángbioye jashnayama. ³ Y mëntšá tojanëyana: “Benachiñama tondaye šmattsambaye: ni jatjonëfja, ni shecnaja, ni saná, ni crocénana; ni inye entsëjua jenotrócama cach ndoñe. ⁴ Canye yebnentše posada chacmojúyentšame ora, chentše šmochjoquéda inye puebloye játantscuana. ⁵ Nderado ndayentše posada ndoñe chacmonjuyentšame, chentšana šmochjésebocana y shecuatšentša polvëshe šmochjésentoto, chca, chëngbioye jinÿanÿiyama chënga ndoñe tšabá tšëngaftangaftaca tmonjamama ca” —Jesús tojanabuayená.

⁶ Asna chë uatsjëndayënga tmojëftsanbocana y tmojána, nÿetsca chë base pueblotëmënguenache chë tšabe noticiënga abuayiynaye y entsanga šocanëngama áshnaye.

Herodes y Jesús
(Mt 14.1-12; Mc 6.14-29)

⁷ Jesusbiamá y ntšamo yojtsanopasánama rey Herodes tojántatšëmbona; y ndoñe yontsetátšëmbo ntšamo jtsejuabnayana, er báseftanga imojtsanichamo Juan chë Ubayaná obanënguentšana tojtanayena ca, ⁸ inyënga imojtsanichamo chë Bëngbe Bëtsabe juabna oyebuambnayá Elías cachiñe tojánbocna ca, y inyëngna canya chë tempo imojanmëna Bëngbe Bëtsabe juabna oyebuambnayënguentšá obanënguentšana tojtanayena ca. ⁹ Pero Heródesna tojánayana: “Cach atše sënjanmandá Juanbe bestšaše chamotsëstjanguama. ¿As, nda cha nántsemna, chë ndabiamá chca soyënga jtsóyebuambnayana sëntsuenana ca?”

Chíyeca Herodes yojtsenguaye ntšamo jamëse Jesús jinÿama.

Jesús shachna uaranga boyabásenga saná tojanacaredadó
(Mt 14.13-21; Mc 6.30-44; Jn 6.1-14)

¹⁰ Chë Jesús tojánichamonga chábioye tmojtanashjango ora, lempe ntšamo chënga tmojanmama tmojancuentá. Y Jesús, nye chënga jëftsëbiatšese inÿoye tojtsanoñe, Betsaida ca uabaina puebloye. ¹¹ Pero chë entsanga chë soye tmojántatšëmbona, y as tmojanasto; y

Jesusna tšabá chënga tojanëbuaja, y Bëngbe Bëtsabe amëndayama yojsëtsësnaye, y chë šoquënga imojtsemnëngbioye tojanashná.

¹² Ya jetiñe yojsobiamná orna, chë bnëtsana uta uatsjëndayënga Jesúsbioye tmojanobeconá y mëntšá tmojanianyana: —Chë entsanga cuantichamuá, jóchnama y saná jonguangoñama chamotsama chë béconana pueblotémënguenache y luarënguenache; er quem luariñe ndocná quenatiyena ca.

¹³ Jesús chora tojanëyana: —Tšëngaftanga saná chëngbioye šmochjacaredádaye ca.

Pero chënga tmojanjuá: —Nye shachna tandëse y uta beónata fsëntsebomna; nyëtscangbiama saná jabuámiyama nderado nda tojasna, aïñe cuanjacaredádaye ca.

¹⁴ Er mo shachna uaranga boyabásenga immamna. Pero Jesusna chabe uatsjëndayënga tojanëyana: —Mamëndá nyëtscanga chamotbiamama shachna bnëtsátsanënga ca.

¹⁵ As chënga chca tmojanma y nyëtsca entsanga tmojanotbiamama. ¹⁶ Chora, Jesús chë shachna tandëse y chë uta beónata tojanca, y celoye tojanontješé, Bëngbe Bëtsábioye chama tbojtanchuá, tojanjatá y chabe uatsjëndayënga tojanantregá entsángbioye chamuatsatama. ¹⁷ Nyëtsca entsanga tmojanse jtoshachaye nyëtšá, y cabá bnëtsana uta sbarëco tmojanajutjé chë ojamnëtëmëngaca.

Pedro tojánayana, Jesús chë Cristo bëtsemnama

(Mt 16.13-19; Mc 8.27-29)

¹⁸ Canye te, Jesús canya Bëngbe Bëtsáftaca ibojsencuëntaye ora, chabe uatsjëndayënga cháftaca imojtsemna. Chora tojanatjá: —¿Nda atše bëtsemnama entsanga imojtsichamo ca?

¹⁹ Y chënga tmojanjuá: —Báseftanga montsichamo Juan ca, ínÿengna Elías ca, y ínÿengna canye Bëngbe Bëtsabe juabna oyebuambnayá tempscá mora tojtayena ca.

²⁰ As Jesús tojanatjá: —Y tšëngaftangna, ¿nda atše bëtsemnama ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

Jesús tojánayana cha ibojamna jóbanana y jtayenana

(Mt 16.20-28; Mc 8.30-9.1)

²¹ Pero Jesús corente chënga tojanamëndá ndocnábeñe chama ntsecuëntayana. ²² Y mëntšá cachabiamama tojánayana: —Chë Bëngbe Bëtsá Entšá tbojanbemá bontsemna puerte jasúfriana, chë judiëngbeñe bëtšëjemëngcá amëndayëngbiama, chë judiëngbe bachnangbe más uámana amëndayëngbiama y ley abuátambayëngbiama uabotená jtsemnana. Entšanga mochanjóba, pero unga tianoye cha echántayena ca.

²³ Chentšana nyëtsca entsanga tojanëyana: “Nda atšbe uatsjendayá jtsemnama tojtseboše, cháuyana nye Bëngbe Bëtsá yobena sempre chabe vidiñe jtsemándayama, chabe quem luarentša soyënga cachcá chauesonýá atše juastama, y cada te chaotseprontana átšbeyeca jasúfriama, y cruciñe jobanámna. ²⁴ Nda tojtsama quem luarentše bëtscá soyënga jtsebomnama y atšbiamama jasúfriama ndoñe tontseprontana, chë nyëtsca tescama yomna tšabe vida echanjobuetše. Pero nda quem luarentša soyënga cachcá tojëftsonýá atše juastama, masque chaóbana, chë nyëtsca tescama yomna tšabe vida echántsebomna. ²⁵ Er ¿ndayama entšá buanjosería nyëtsca quem luarentša soyënga jtsebomnana, cha pochocaná jtsemnama tojtsá y chë nyëtsca tescama yomna tšabe vida tojtsoyerdese? ²⁶ Er ndëmuanye entšá, atšbiamama o atšbe buayenana soyëngama tojtsëuatja, chë Bëngbe Bëtsá Entšá tbojanbemánaca chabiamama echantsëuatja, cha chabe bëtš buashinÿinÿaniñe chaojésabo ora, chabe Taitabe bëtš obenánaca y chabe angelotëmëngaftaca adoraná. ²⁷ Ndegombre cbëyana, báseftanga muentše montsemnënga quemochatóbana, Bëngbe Bëtsá chabe obenánaca entsángbeñe jabomándama jabana ntjëftsinýcá ca” —cha tojánayana.

Jesús inyetsá tojanobinýná
(Mt 17.1-8; Mc 9.2-8)

²⁸ Měntsá tojanopasá: Chca palabrēnga tojanoyebuambá chentsana posuftaytese, Jesús tojéftsanébiatše Pedro, Santiago y Juan, y canye tjoye tojántsjua, Bēngbe Bětsáftaca jencuéntama. ²⁹ Bēngbe Bětsáftaca ibojtsencuéntantscuana, chabe jubiá inyetsá yojtsinýna, y chabe uichětjonējuangá tša uafjantsējuangá yojtsamna y tša yojtsabuashinýinýana. ³⁰ Chora uta boyabásata tbojanonýná, Jesúseftaca ibojtsencuéntaye. Chata ibojamna Moisés y Elías; ³¹ corente buashinýinýaniñe ibojtsemna, y chēnga imojtsencuéntaye ntšamo Jesús Jerusalenoca jasúfriana y jóbanana. ³² Masque Pedro y chabe enutata tša ocnayēnga imojtsemna, nýe imojtsefšna y tmojáninýe Jesusbe juachañe tša yojtsebuashinýinýana y chē uta boyabásata cháftaca ibojtsemna. ³³ Chē uta boyabásata Jesús bentsana ibojoluára ora, Pedro, Jesús bioye tbojanianana: “Buatēmbayá, ¡tša tšabá bēngbiana cuanmēna muentše jtsemnana ca! Mora fchanjapórma unga tambotémēnga: cánýetema acbiana, ínýetema Moisesbiana y ínýetemna Elíasbiana ca.”

Pero Pedro ndoñe yontsetátšēmbo ntšamo yojtsichámuama. ³⁴ Y chca yojtsóyebuambnantscuana, canye jantšetēshe yojóbema, y chēngbioye yojáutsbotse, y chēnga chē tsoye imojtsemnana tmojáninýe ora, chē uatsjéndayēnga chama imojtsauatja. ³⁵ Chora chē jantšetēshoicana canye oyebuambnayana tojanóbocna, mēntsá: “Mua atšbe Uaquiñá endmēna, atšbe uabuayaná; cha šmochtseyeunana ca.”

³⁶ Chē oyebuambnayana tmojanuenentsana, tmojáninýe Jesús canya yojtsemna. Chē uatsjéndayēnga iytēca imojtsemna, y chē tempo ndocnábioye chama imonjuyenaye.

Jesús, canye basa bacna bayēbe juabna uambayábioye tbojanshná
(Mt 17.14-21; Mc 9.14-29)

³⁷ Yěfsana, chē tjocana tmojtantsmá ora, ba entsānga tmojánbocana Jesús jajébenguama. ³⁸ Chora, chē entsānguentsana canye boyabása tojanontsé mēntsá uayebuáchana: —Buatēmbayá, Diosmanda atšbe uaquiñá minýe. Nýe cha atšbe uaquiñá endmēna; ³⁹ y mora, bayēbe juabna chábioye bontsēsháchichana, y nýe ndeolpe jóntsana yoyana, ataque joshachana y uayoicana shashiye jtsabocanana. Y chábentsana chē bayēja ndoñe betscó ntjésebocnana, y cuerpiñe corente maltrataná jeseboshjonana. ⁴⁰ Acbe uatsjéndayēnga sēnjaimpadá chē bayēja chábentsana chamuatábocnana, pero ndoñe chematobená ca.

⁴¹ As Jesús tojánayana: —¡Nýetsá ndošbuáchiyēnga y bacna entsānga! ¿Buetayté šojtsemna tšēngaftangaftaca jēftsemnana y jtsēuantánana ca?

Chora chē boyabásabioye tbojanianana: —Moye chē uaquiñá mánatse ca.

⁴² Chē basa yojtsebeconá ora, chē bacna bayēja chábioye tbojanshajayé y inýe ataque tbojanēshache. Pero Jesús chē bayēbioye tbojanácacana, chē basetémbioye tbojanshná y chabe taitábioye tbojtāntregá. ⁴³ Y nýetscānga puerte ojnānānēnga imojtsemna, Bēngbe Bětsá tša obenana bomná inamnama.

Jesús cachiñe tojánayana cha ibojamna jóbanana y jtayenana ca
(Mt 17.22-23; Mc 9.30-32)

Nýetsca entsānga, ndayá Jesús yojtsamama ojnānānēnga imojtsemnēntscuana, chabe uatsjéndayēnga cha tojanéyana: ⁴⁴ “Quem soye tšabá šmochjouena y ndoñe chacmondébnětjomba: Chē Bēngbe Bětsá Entšá tbojanbemá entsāngbe cucuatšīne mochanjáboshjona ca.”

⁴⁵ Pero chēnga ndoñe yontsósertana ntšamo Jesús yojtsētsētsnacá, er Bēngbe Bětsá ndoñe tonjanalesenciá chama chaósertama; y imojtsauatja Jesús jaimpádana chama chauabuayenama.

¿Nda chē más uamaná yomna?
(Mt 18.1-5; Mc 9.33-37)

⁴⁶ Chë tempo, chë uatsjéndayënga tmojanontsé enatsëtsnayana, nda chë más uamaná bétsemnama. ⁴⁷ Jesús yojtsetátšëmbo ntšamo chënga imojtsejuabnayama; asna, canye básetema tbojánishache, chabe juachaca tbojántbema, ⁴⁸ y chëngbioye tojanëyana: “Nda átšbeñe ošbuachiyá bétsemnama, quem basetëmbioye tbojofja, chana atše jofjana; y nda atše šojofja, chana chë nda šojichmó chábioynaca jofjana. Chíyeca, tšëngaftanguentše chë más nduamaná, cha chë más uamaná entsemna ca.”

Nda bëngbe contra ndoñe tontsemná, bëngaftaca jtsemnana

(Mc 9.38-40)

⁴⁹ Juan, Jesúsbioye tbojaniyana: —Buatëmbayá, bënga fsënjinye canye boyabása y cha aca jótšëmbonëse, entšángbentšana bacna bayëjbe juabna endëtëbuacana; pero cha bëngaftaca ndoñe quenátšmëna causa, chama fsënjësauyaná ca.

⁵⁰ As Jesús tbojanjuá: —Ndoñe šmatjuauyaná; er nda bëngbe contra ndoñe tontsemná, bëngaftaca jtsemnana ca.

Santiago y Juánbioye Jesús tojanëcácana

⁵¹ Jesús celoye jtama yojtsobeco ora, nyëts añémoca cha yojtsejuabnaye Jerusalenoye jama. ⁵² Natsana báseftanga tojanichamó, y chënga tmojána canye base pueblotémoye Samaria luaroca, posada chabiana janguangoñama; ⁵³ pero chë luarentša entšanga ndoñe tmonjánbošëna posada juantšamiana, er tmojántatšëmbona cha Jerusalenoye yojétsayama, chë chëngbe uayayëngbe uámana puebloye. ⁵⁴ Chabe uatsjéndayata, Santiago y Juan, chë soye tbojáninye ora, Jesús tmojaniyana: “Bëngbe Utabná, ¿quetseboše bëndata fchaimandá celocana íñeshe chaótsatše y quem entšanga chaotsapochóca ca?”

⁵⁵ Pero Jesús yojobuértana y chátbioye tojtsanëcácana, chca juabna bomna causa.

⁵⁶ Chentšana chënga inye pueblotémoye tmojtsanoñe.

Chë Jesús juastama bošënga

(Mt 8.19-22)

⁵⁷ Benachëjana imojtsajna ora, canye boyabása Jesúsbioye tbojaniyana: —Atšbe Utabná, atše sëntseboše aca juastana ndémoye chacojtsá choye ca.

⁵⁸ Y Jesús tbojanjuá: —Chë zorrënga cuevëshënga mondbomna ndayentše jtsiyenama y chë shloftsetémëngna uajajonëshangá; pero chë Bëngbe Bëtsá Entšá tbojanbemá ndoñe quenátšbomna ndayentše jóchnama ca.

⁵⁹ Jesús inye entšábioye tbojaniyana: —Smasto ca.

Pero cha tbojanjuá: —Atšbe Utabná, šmolesenciá atšbe taitá chjshesabotbontsañe ca.

⁶⁰ As Jesús tbojaniyana: —Chë Bëngbe Bëtsabiana mo obanëngcá imomnënga, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsëtebuantsañe. Acna, motsa y Bëngbe Bëtsabe amëndayama entšanga cochjabuayená ca.

⁶¹ Inyana Jesúsbioye tbojaniyana: —Atšbe Utabná, atše sëntseboše aca juastama, pero šmolesenciá natsana atšbe pamíllangbiana jaisodiósoftama ca.

⁶² As Jesús tbojaniyana: —Nda cachabe soyëngama tbojtsengmena, Bëngbe Bëtsabe amëndayocama ndoñe ntsošervénana; er cha jtsemnana mo canye arayacá, chë tojtse-trabája ora, stëtšoye tojtsaisantješncá ca.

10

Jesús canyëšëfta bnëtsana y uta entšanga tojanichamó Bëngbe Bëtsabe soyëngama jábuayenama

¹ Chë soyënga chentšana, Bëngbe Utabná Jesús inye canyëšëfta bnëtsana y úatnaca tojanabacacá, y utáta chabe natsana tojanichamó, chë cha ibojtsemna jama pueblëngoye y luarëngoye.

² Měntšá chēnga tojanéyana: “Canýe bēts jajañe bēts cá játbanama entsemna, pero peonga báseftanga; chíyeca, chentša nduíñbioye jaimpádana ba peonga chauichamó chē jaja saná játbanama. Cachcá, quem luarentse bēts cá entšanga montsemna Bēngbe Bētsábioye nduabuátmēnga, y chēngbioye chabiana abuayiynayēnga nýe báseftanga. Chíyeca, Bēngbe Bētsá moimpadanga ba abuayiynayēnga chauichamó quem entšanga chábioye júbuajama. ³ Motsajna; šmochjinýe, atše tšēngaftanga cbontsichamná mo oveshēnga cuenta, tjañe quešēngbeñe. ⁴ Ndoñe šmattsambaye shecnaja, ni crocénana šmattsaiuábuenana, ni shecochētjonēshe; y nda chacmojacheuá ora, ndoñe yapa bēn chentše šmatjáisenobiamnaye.

⁵ “Ndaye yebnentše chašmojámarshjna ora, natsana šmochjayana: ‘Lempe tšabá quem yebnentše chaotsomñe ca’. ⁶ Y chē yebnentše chca juabna bomna entšanga tmomñesna, chē tšabiana ndegombre chentše echántsemna; pero ndóñese, chca tšabiana chentše ndoñe queochátsmēna. ⁷ Canýe yebnentše šmochjoquéda, y šmochjase y šmochjofsiye ntšamo chentše chacmojacaredadaycá; er chē trabajayá merecido jtsebuájonana chca juacánama. Canýe pueblentše nýe inýe y inýe yebnēnguenache ndoñe matajnana.

⁸ “Ndaye pueblentše chašmojámarshjna y tšabá chacmojúbuajentše, šmochjase ntšamo chentše chacmojacaredadaycá; ⁹ chentša šoquēnga šmochjáshnaye y šmochjáuyana: ‘Bēngbe Bētsabe amēndayana tšēngaftangbeñe entsemna ca’. ¹⁰ Pero canýe pueblentše chašmojáshjango y ndoñe chacmonjúbuaja, chentša tsashenangoye šmochjábocana y mēntšá šmochjayana: ¹¹ ‘¡Chē tšēngaftangbe pueblentša polvēshe, chē bēngbe shecuatšēnguiñe tojuanjēshe, camuentše fšcuesenstētoná, chca, tšēngaftanga chašmotsetatšēmbuama ndoñe tšabá šmonjamama! Pero masque chca, šmochtsetatšēmbo chē Bēngbe Bētsabe amēndayana tšēngaftangbeñe entsemnama ca.’ ¹² Ndegombre cbéyana, quem luare jopochócama te, chē luarentša entšángbioye Bēngbe Bētsá puerte jabuache echantsacastígaye, y Sodoma pueblota bacna entšángbioye ndoñe nýa nyetsá jabuache ca” —Jesús tojánayana.

Chē nduauenana entšanga (Mt 11.20-24)

¹³ “¡Tša lastema Corazín pueblota entšangbiama! ¡Tša lastema Betsaida pueblota entšangbiama! Er chē muentše Bēngbe Bētsabe obenánaca sēnjama soyēnga, chē bēts pueblēnga Tiro y Sidonoca chca matēnjochnēnguse, chentša bacna entšanga ya tempo chēngbe bacna soyēngama ngmēnaca matmēntenójuabonga y Bēngbe Bētsabe benache matmēntishache, y chca tmojamama chaotsótatšēmbuama, uajojēsha entšayangaca matmēntopormanga y jatinýashiñe matmēnjotbiama. ¹⁴ Pero ntšamo entšanga tmojamama, tšabá o ndoñe tšabá bētsemnama jayanama chaojobuache ora, tšēngaftanga más bēts castigo šmochántsebomna, chē Tiro y Sidonoca bacna entšangbe castiguama. ¹⁵ Y tšēngaftanga, Capernaum pueblentša entšanga, ¿celóntscoca atsebánanēnga šmochtsemna ca šmojtsejuabnanga? ¡Chē uabouana infiernoyme cmochantsēsetjango!

¹⁶ “Nda tšēngaftanga tcmojoyauná, chana atše joyeunayana; y nda tšēngaftanga tcmojtsēbaté, chana atše jtsabotena; y nda atše šojtsaboté, chana chē nda šojichmó chábioye jtsabotena.”

Chē canýsēfta bnētsana y uta entšanga tmojtanashjajna

¹⁷ Chē canýsēfta bnētsana y útatna Jesús yojtsemnoye tmojtanashjajna, puerte oyejuayēnga; y chábioye mēntšá tmojaniyana: —¡Bēngbe Utabná, aca jótšēmbonēse, chē bacna bayējēngnaca šonjoyauná ca!

¹⁸ Y Jesús tojanéyana: —Ndegombre. Y tšēngaftanga Satanásbioye chca šmontseyēnjaná ora, entsemna mo Satanás celocana canýe tcuinýcá jtsotsatšana stjinycá. ¹⁹ Atšna obenana tcbonjatšatá mētšcuayēnga y alacranēngbeñe chašmotsajnama, y bēngbe uayayá Satanasbe nyets obenana jáyēnjanama, tšēngaftanga ndocá ntjapasacá. ²⁰ Pero

móyejuanga, ndoñe chë bacna bayëjenga chacmóyaunama obenana šmojtsebomnama, sinó tšëngaftangbe uabaina celoca ya yojtšábemanama, er tšëngaftanga chë nyetsca tescama yomna tšabe vida šmochántsebomna ca —cha tojanëyana.

Jesús puerte tojanoyejuá
(Mt 11.25-27; 13.16-17)

²¹ Chora Jesús, chë Uámána Espíritbeyeca, corente oyejuayá tojánayana: “Atše cbatschuá, Taita, celoca y quem luarentša Utabná. Aca, chë nye batsá tatsëmbënga tconjanýanyé, chë tša tatsëmbënga y osertánëngbiama tcojaiytëme soyënga. Aíñe, chama cbontsadorana, Taita, aca chca chaotsemnama tcojábosenayeca.

²² “Atšbe Taitá lempe chca šonjatšetá. Chë Uaquiñábioye ndocná corente quebnatábuatma; nye chë Taitá aíñe. Y chë Taitábioye ndocná corente quebnatábuatma; nye chë Uaquiñá aíñe, y ndëmuanýengbiome chë Uaquiñá tojtseboše nda chë Taitá yomnama jinýanyiyama, chëngnaca chë Taitábioye mochantsábuatma ca.”

²³ Chentšana, Jesús chabe uatsjëndayëngbiome tojanobuértana y nye chëngbiome tojanëyana: “¡Puerte oyejuayënga chë ntšamo tšëngaftanga šmontsonýacá jinýama tmojtsoebenënga! ²⁴ Er atše chëyana, banga Bëngbe Bëtsabe juabna oyebuambnayënga y reyënga tmojánbošena chë tšëngaftanga šmontsonýá soyënga jinýana, pero ndoñe tmonjáninýe; y tmojánbošena chë šmontsuenana soyënga jouenana, pero ndoñe tmonjanuena ca” —cha tojánayana.

Chë Samarioca tšabe entšabiama cuento

²⁵ Canýe judiëngbe ley abuatambayá yojontšé Jesúseftaca jóyebuambayama, y jisháchichiyamna mëntšá tbojantjá: —Buatëmbayá, ¿ndayá šojtsemna jamana chë nyetsca tescama yomna tšabe vida jtsebomnama ca?

²⁶ Y Jesús tbojanjuá: —¿Ntšamo leyiñe iuábemana? ¿Ndayá chiñe condbétsaliaye ca?

²⁷ Chë ley abuatambayá tbojanjuá: —“Chë Utabná Bëngbe Bëtsá cochtsebobonshana nyets ainánaca, nyets espírituca, nyets añémoca y nyets juábnaca”; y “ndëmua entšánaca cochtsebobonshana, ntšamo cach aca cuenobobonshancá ca.”

²⁸ Chora Jesús tbojanijana: —Tšabá šconjojuá. Chca cochtsama y chë nyetsca tescama yomna tšabe vida cochántsebomna ca.

²⁹ Pero chë ley abuatambayá tšabá jenoquédamna Jesúsbiome tbojantjá: —Y ¿ndase chë ndëmua entšánaca yomna ca?

³⁰ As Jesús tbojanjuá: —Canýe, Jerusalenocana Jericó benache canýe entšá yojtsetsamá, y básefta salteadorënga imojébëbocna. Lempe imojtsefca, chë entšayánaca; imojtsejantšetaye y chentšana imojtsatóñënga, y chë entšá batsá obaná imojësebošjona.

³¹ Ndeolpe, chë benachëjana canýe judiëngbe bachna yojtšachnëjuana. Chë entšábioye ibojinýe ora, nye chabuacá yojtšëchnëguañe. ³² Cachcá, canýe Levita, chë canýe Bëngbe Bëtsabe bëts yebnoca trabajayá chëjana yojtšachnëjuana; y chë entšábioye ibojinýe orna, nye chabuacá yojtšëchnëguañe.

³³ “Chorna, cach benachëjana canýe samaritano ináboye. Chë entšábioye ibojinýe orna, ibojóngmia. ³⁴ Chábioye yojobeconá, aceitiye y vínoyeca ibojáshna, y lisianënguñe entšëjuaca ibojuantsacjuá. Chabe couayiñe ibojëftsensajiyeye, canýe yebnoye posada uyentšamianoye ibojuánatse, y chentše chábioye ibojëftsinyena. ³⁵ Yëfsana, chë samaritano uta denario crocénana yojenóbojatsëca, chë mo uta tesca trabajuama crocénana nyetsá, y chë posada nduíñbioye ibojesabuenaye, y mëntšá ibojauyana: ‘Quem boyabása cochtsinyena, y nderado más crocénana muabiamana chacojenábojafjonasna, mëjana chaitísachnëjuana ora, cbochjabáisabuenaye ca.’ ³⁶ Y chcasna, ¿chë unganguentšana nda cmojtsinyana chë entšabiama yojtsejuabnaye cha cachacá entšá inamnana ca?”

³⁷ Y chë ley abuatambayá tbojanjuá: —Chë entšabiama tbojanongmé cha ca.

Y Jesús tbojanijana: —Asna, motsa y cachcá cochjama ca.

Jesús, María y Martbe yebnentše

³⁸ Chentšana, Jesús benachëjana yojtsaye y canÿe base pueblotémoye tojëftsanamashëngo; y canÿe shembása Marta ca uabainá, chabe yebnentše tbojanofja.

³⁹ Martna canÿe quenata ibnabomna, María ca uabainá. Cha Jesusbe shecuatšentše yojótbema chabe palabra jouenama; ⁴⁰ y chëntscuana Marta ba soyënga yojtsama. Cha Jesúsbioye tojanobeconá y tbojaniyana: —Utabná, ¿tondayana cmontsentšamna, atšbe quenata nÿe canÿa chašonÿá lempe jamama ca? Mëyana chašuájabuache ca.

⁴¹ Chora Jesús tbojanjuá: —Marta, Marta, bëtscá soyëngama contsenócochinÿena y contsenomantšná; ⁴² pero nÿe canÿe soye endmëna chë yoiyta soye jamama. María chca jamama tojobuáyana, chë más tšabe soye, y ndocná queochatsma cha chaotsajbanama ca.

11*Ntšamo Bëngbe Bëtsáftaca cuanjencuénta
(Mt 6.9-15; 7.7-11)*

¹ Canÿe, Jesús Bëngbe Bëtsáftaca ibojtsencuéntaye canÿe luarentše. Tojanpochocá orna, canÿa chabe uatsjendayënguentsá tbojaniyana: —Bëngbe Utabná, Bëngbe Bëtsáftaca jencuéntama šmabuatambá, ntšamo Juan chabe uatsjendayëngaftaca tojanmcá ca.

² Y Jesús tojanëyana: —Bëngbe Bëtsáftaca chašmojtsencuénta ora, šmochjayana: Bëngbe Taitá, acbe uabaina chë más uámana uabainana chauesomñe. Acbe amëndayana chaóshjango.

³ Mënté šmiyatšatá, cada te šnetsëjaboto tandëse.

⁴ Bacna soyënga fsënjama: šmotsaperdónaye;

er bëngnaca nÿetscanga chë bëngbiama bacna soyënga amëngbioye fsëndbetsaperdónaye. Bacna soyënga jamama šojocohëngo ora, šcochjuyabuache chca ndenobuíyama.

⁵ Jesús mëntsánaca tojanëyana: “Nderado aca acbe bacóbioye tsëntseto ora tcojá y tcojauyana: ‘Bacó, Diosmanda unga tandëse šmotsemná, ⁶ er canÿe atšbe amigo yebnocá tonjáshjango y tondaye quetsátsbomna cha jonánjama ca.’ ⁷ Ndegombre, cha tsocana tcmojojuá: ‘Ndoñe šmatébeyabomana. Bëšása ya entsatámena y atše y atšbe básenga ya fsëntsocjá; ndoñe quetsátobena mora jotsbanana y chë tandëse jámnana ca.’ ⁸ Ndegombre, chë bacó ndoñe tonjotsbaná chë tandëse jámnama, cháftaca šuenatsëtsnámase, cha pronto jotsbanana chca uébëyabomana ndoñe tconjajbaná causa, y lempe ntšamo cmojtsajabotcá cha cmochanjoyiye. ⁹ Chcasna, atše cbëyana: Smochjotjañe y Bëngbe Bëtsá cmochanjátšataye; smochjánguango y smochanjínÿena; smochjachembo y cmochanjébëtafjo. ¹⁰ Er ndánaca ndayá tojtsotjanañá, jóyëngacñana; y tojtsenguá cha, jónÿenana; y nda tojtsechembuanábioye jebiatëfjuana ca.

¹¹ “¿Nda tšëngaftanguentsana nantsobena, taitá tojtsemnëse, cachabe uaquiñábioye canÿe mëtscuaye jatštayana, beona tbojtsotjanañe ora; ¹² o canÿe alacránashe joyiyana, shëmnëbé tbojtsotjanañe ora? ¹³ Y chca, tšëngaftanga, bacna soyënga amënga, tšëngaftangbe basetemëngbioye tšabe soyënga jatšatayama šmojtsamanëse, ¿más chë celoca Taitá, chë Uámana Espíritu echanjátšataye, chca tmojtsotjanañëngbioye ca!” —Jesús tojánayana.

*Fariseunga tmojánayana Jesús Satanásbentšana obenana tojanóyëngacñe ca
(Mt 12.22-30; Mc 3.20-27)*

¹⁴ Jesús canÿe entšábentšana canÿe bacna bayëja tbojtanábocna. Chë bayëja ndëbiá chë entšábioye tbojánbema, y chábertšana tojésanbocna ora, chë ndëbiá tojtanontsé oye-buambnayana. Y chë entšanga chama imojenjnaná; ¹⁵ pero báseftanga imojtsichamo: “Beelzebú, cach Satanás, chë bacna bayëjëngbe amëndayá, quem boyabásabioye obenana tbojatšetá chë bayëjënga chauatëbuacnama ca.”

16 Y ínÿenga, Jesús jisháchichiyamna tmojanimpadá canÿe bÿets soye chaoma, jinÿanÿiyama cha celoca obenana inabomna o ndoñe. 17 Pero Jesús yojtsetátšëmbo ntšamo chÿengbe juabna bÿetsemnana. As tojanÿyana: “Canÿe amëndayábentše entsanga tmojtsenojatá y tmojtsenáyase, cachÿenga jtsenpochócana; y canÿe yebnentše oyenÿenga tmojtsenojatá y tmojtsenáyase, chÿe pamíllanga tšabá nÿets tempo ndoñe quemochátsmëna. 18 Cachcá, Satanás tojtsenojatá y cachabe contra tojtsemnëse, ¿ntšamo nantsobena chabe mándayana quem luarentše jÿeftsebomnana? Chca sÿentsichamo, er tšÿengaftanga šmotsichamo Beelzebube obenánaca chÿe bayÿÿenga stsatÿebuacana ca; 19 pero chca ndegombre tojtsemnëse, ¿ndábeyeca tšÿengaftangbe usetonÿenga obenana imojtsebomna chÿe bacna bayÿÿenga jtÿebuacnama? Chíyecna, cachÿenga montsinÿinÿná ntšamo ndegombre yomnana, y tšÿengaftanga ndoñe ndegombre soye šmotsichámuama. 20 Y atšna, Bÿengbe Bÿetsabe obenánaca entsángbentsana chÿe bayÿÿenga sÿendÿetÿebuacana; y chÿe soye entsinÿinÿná, Bÿengbe Bÿetsabe amëndayana tšÿengaftangbioye tojóshjanguama.

21 “Canÿe corente añemo bomna entsá, bÿetscá ármangaca chabe yebna tojtsinÿenÿe, chÿe tsoca tomna soyÿenga ndoñe ntjotšana. 22 Pero inÿa chabiamá más añemo bomná tojabo y tjobabetseyÿenjaná, chÿe cha yojanašbuaché armangá jtsabocana y chÿe tobomna sóynaca; y ntšamo chÿe inÿa tojtsebošcá chÿe soyÿengaca jamana.

23 “Nda ndoñe átšeftaca tontsemná, atšbe uayayá jtsemnana. Y nda átšeftaca ndoñe tontsetrabája, chana atšbe contra jtsetrabájayana ca” —Jesús tojánayana.

Ndayá inopása chÿe bacna entsángaftaca

(Mt 12.43-45)

24 “Canÿe bacna bayÿÿe canÿe entsábentsana tojésebocna ora, bojojo luarÿenguenache chÿe bayÿÿe jtsanana, ndayentše jóchnama onguayinÿe. Ndoñe tonjínÿena ora, jenójuaboyana: ‘Atšbe oyenoye, chÿe ndayentsana sÿenjÿtsebocnoye chanjesshécona ca.’ 25 Y choye tojtashjango ora, jinÿenana lempe tšabá cha jtesamashÿenguama, mo tsjajniñe y prontániñe cuaftsemncá. 26 Chora chÿe bayÿÿe jana y inÿe canÿsÿÿefta bayÿÿÿenga, chabiamá más opÿÿÿenga jobiatšana, nÿetscanga choye jamashjnama, chÿe boyabásabeñe joyénanama. Y chca, chÿe boyabása tempscama más bacna entsá jtoquédana, chora chÿe natsanama más bayÿÿÿenga abamna causa ca” —Jesús tojánayana.

Chÿe ndegombre oyejuayana

27 Jesús chÿe soyÿenga yojtsichamÿentscuana, entsanguentše canÿe shembása yoyuayebuáchena: —¡Puerte oyejuayá chÿe quem luaroye tcmojúshjango y tcmojÿtseboché shembása ca!

28 As Jesús tbojanianá: —Más oyejuayana bomnÿngna, chÿe Bÿengbe Bÿetsabe palabra tmojouena y chca tmojtsamÿenga ca.

Chÿe bacna entsanga Jesús tmojanimpadá canÿe bÿets soye chaoma, chabe obenana jinÿyama

(Mt 12.38-42; Mc 8.12)

29 Entšanga más imojtsótotoye Jesús yojtsemnentše, y Jesús tojanontšé jáuyanana: “Morsca entsanga puerte bacna entsanga; chÿenga montsotjanañe atše canÿe bÿets soye chaima atšbe obenana jinÿyama, pero ndoñe chca quemochátinÿe, sinó nÿe chÿe ndayá yomna mo chÿe Jonásoftaca tojanopasá soycá. 30 Er chca, ntšamo Jonás Nínive pueblaca entsanga canÿe bÿets soye tojaninÿanÿÿe Bÿengbe Bÿetsá obená yomnama chamotsetatšÿembuama, chÿe Bÿengbe Bÿetsá Entšá tbojanbemánaca entsinÿanÿná morsca entsángbioye, Bÿengbe Bÿetsabe amëndayana tojóshjanguama. 31 Bÿengbe Bÿetsá ntšamo morsca entsanga tmojanmama yochjayana te, chÿe Sur luaroca reiná echanjotsaye y morsca entsángbiama echanjayana ndoñe tšabá tmonjama ca; er chana chÿe quem luare iuajbana luarÿengocana tojánabo Salomonbe osertanánaca palabrÿenga jouenama, y chÿe mora muentše entsemnana, Salomonbiamá más uamaná endmëna. 32 Chÿe entsanga

tšabá o ndoñe tšabá tmonjamama jayanama te, chë Nínive bëts puebloca entšágnaca mochanjotsaye y mochanjayana morsca entšanga ndoñe tšabá tmonjama ca; er chënga, Jonás yojtsabuayiynaye ora, tmojanoyeuná y chë tšabe benache tmojtanishache, y chë mora muentše entsemnana, Jonasbiamá más uamaná endmëna ca” —Jesús tojánayana.

Chë cuerpama uajuinjänësha
(Mt 5.15; 6.22-23)

³³ “Ndocná canye uajuinjänësha juajuinjenana, canye iytëmena luaroye juajájuama, ni canye cajonëshe tajsoye, sinó canye tsbanana luaroca juajájuama, chca, chë luaroye amashjuanëngbiamá chaotsebínynama. ³⁴ Acbe bominye tšabá totsomñëse, acbe cuerpama mo canye uajuinjänëshacá jtsemnana; chíyeca aca jtsobenana, ntšamo tcojtsamcá chë bomínyecá jtsonyayana. Chë bominye ndoñe tšabá tontsemnësa, chë bominye ton-daye ntsoybenana jamana, ntšamo tcojtsamcá chacobená jinýama. Cachcá, acbe ainaniñe tšabe juabnënga tcojtsebomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnësa, lempe ntšamo chacojtsamcá ndoñe tšabá queochátsmëna. ³⁵ Cuedado šmochtsebomna, tšëngaftangbe ainaniñe nýe tšabe juabnënga chaotsemnana, chca, lempe ntšamo chašmojtsamcá tšabá chaotsemnana, y bacna juabnënga ndoñe chaondëtsemnana. ³⁶ Chcasna, lempe ntšamo šmojtsamcá tšabá tojtsemnëse y ndocna bacna sóyesna, tšëngaftanga bëtscá tšabe soyënga šmochántsama; y chca, tšëngaftanga šmochántsemna mo canye uajuinjänësha puerte tšabá tojtsebinýnacá ca” —Jesús tojánayana.

Jesús chë fariseungbiamá y ley abuátambayëngbiamá tojánayana, chënga ndoñe tšabá montsama ca
(Mt 23.1-36; Mc 12.38-40; Lc 20.45-47)

³⁷ Jesús chca jayanama tojanpochocá ora, chábioye canye fariseo tbojanofja chabe yebnoye jauasama. As Jesús tojánamashëngo y mesëshentše tojanótbema. ³⁸ Chë fariseo tojanëuatjaná, Jesús ntsacuentšabiacá jasama yojontsé causa, ndoñe ntšamo chë judiënga imojanamancá, Bëngbe Bëtsabe delante tšábënga jtsatsmënama. ³⁹ Pero Bëngbe Utabná tbojaniyana: “Tšëngaftanga fariseunga šmondmëna mo entšangcá ndëmuanýënga chë tazëšënga y šcnenënga shjoicajana jtsóbojabiana, pero tsoyna nýe cachcá jonýayana. Tšëngaftanga becá jtsamana entšangbiamá mo tšabëngcá jtsinýnama; pero tšëngaftangbe ainantše jútjena entsemna nýe jtsatbëbanama y bacna soyënga jtsamama juabnëngaca. ⁴⁰ ¡Juabna ndbomnënga! Tšëngaftanga ndoñe šmondëtatsëmbo, chë tšëngaftangbentsana entšanga ndayá jinýama imobencá tojamá, chë tšëngaftangbe tsoye yomna soyëngnaca tojamama; y chíyeca, chabiamá cachcá enduámana ndayá tšëngaftangbe ainanoye yomna soyënga, y chë entšangbe delante šmojama soyënga. ⁴¹ Tšëngaftanga cmontsamna, chë soyënguiñe ndayá ainaniñe yomnentsana ínýëngbioye jatšatayana, y chca, lempe ntšamo chašmojtsamcá Bëngbe Bëtsabe delante tšabá echántsemna ca.

⁴² “¡Tša lastema tšëngaftangbiamá fariseunga! Tšëngaftanga Bëngbe Bëtsabiamá jtsequëcnayana chë jajañentša sananga bnëtsanentsana canye soye nyetsá, y chë binche matatëmënguentsana menta, ruda y nyetsca binche matatemënguentsánëna; pero nýe batšá jtsamana chë nyetscanga cachca derechënga chamotsebomnana y cha jtsebobonshánama. Quem soyënga cocayé cmontsamna jtsamana, chë inýe tšabe soyënga ntjajbanacá ca.

⁴³ “¡Tša lastema tšëngaftangbiamá fariseunga! Tšëngaftanga tša jtsebošana chë judiëngbe enefjuana yebnënguenache chë más uámana luarënga jtsebomnana, y benachiñe nýa puerte respétoca entšanga chacmotsacheuanayama ca.

⁴⁴ “¡Tša lastema tšëngaftangbiamá! Smondmëna mo obanënga uatbontsaniñcá, ndoñe ntsinýnana, y entšanga ntsetatsëmbcá chiñe jtsebotájayana. Chca šmondmëna, er

tšëngaftangbe ainana entsemna jútjena bacna juabnëngaca, pero entsangbiana ndoñe chca quešmátinÿna ca.”

⁴⁵ Jesús chca tojánayana ora, canÿe ley abuatambayá tbojaniyana: —Buatëmbayá, chca palabrënga contsoyebuambná ora, bëngbiámnaca ndoñe tšabá quecátichamo ca.

⁴⁶ Pero Jesús tojánayana: —¡Tša lastema tšëngaftangbiámnaca, chë ley abuátambayënga! Mo canÿe entsá, couáybioye canÿe uauta uasmanësha tbojuasmá, y chësha ndoñe yapa chaondëtsautama tondaye tontsamcá, tšëngaftanga entsángbioye jtsamëndayana bëtscá mandënga chamotsocumplínama, pero cach tšëngaftanga ni mo batšatëmnaca jtsamana chë mandënga jtsocumplínama ca.

⁴⁷ “¡Tša lastema tšëngaftangbiana! Tšëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entsanga chamotsemnama, chëngbe cuevëshënga jtsatspórmayëse; pero chë mo chëngcá, canÿe buayenana sóyeca tmojabëngbioye ndoñe ntsayaunanana. Y chë tempsquënga chca oyebuambnayëngbioye tšëngaftangbe bëts taitanga tmojtsanëbaye. ⁴⁸ Chca jtsamëse, tšëngaftanga šmontsinÿanÿná, ntšamo chë bëts taitanga tmojanmccá tšabá yomna ca tšëngaftanga šmojtsejuabnama, er chënga chë oyebuambnayëngbioye tmojtsanëbaye y tšëngaftangna chëngbe cuevëshënga jtsatspórmayana.

⁴⁹ “Chíyeca, Bëngbe Bëtsá chabe bëts osertanánaca tojánayana: ‘Atše chëngbioye chanjichamuá atšbe juabna oyebuambnayënga y atšbiana abuayinayënga, y báseftangbioye mochantsëbaye y ínÿengbioyna mochantsëcamiye ca.’ ⁵⁰ Y chca, nÿets castigo morsca entsángbeñe echántsemna, nÿetsca Bëngbe Bëtsabe juabna oyebuambnayënga tmojóbanama, Bëngbe Bëtsá quem luare tojanma orscana; ⁵¹ Abëlbioye tbojanóba orscana, Zacarías tmojanóbantscoñe. Zacaríasna Bëngbe Bëtsabe bëts yebnentše tmojanóba, altar y chë entsanga Bëngbe Bëtsábioye imojánadorana luariñe. Chcasna, Bëngbe Bëtsá echanjama chë oyebuambnayënga tmojanóbanama, morsca entsángbeñe nÿets castigo chaotsemnama ca.

⁵² “¡Tša lastema tšëngaftangbiana, chë ley abuátambayënga! Tšëngaftanga jtsamana, Bëngbe Bëtsabe soyëngama jtsetatšëmbuama entsangbiana yapa totcá chaotsemnama. Cach tšëngaftanga ndoñe quešmátobena chë soyëngama tšabá jtsetatšëmbuana, y chama jtsetatšëmbuama tmojtsebošëngbioyna ndoñe quešmatalesénciaye ca” —Jesús tojánayana.

⁵³ Jesús chë soyënga tojánayanama, chë ley abuátambayënga y fariseunga puerte tojánëtëna, y cha chentšana yojtsaisebocana ora, tmojanontšë chábioye becá tjanayana, y imojtsama ba soyëngama chaóyebuambama, ⁵⁴ chca, jisháchichiyama jtsebošëse, cachá ntšamo tojayana sóyeca chënga jtsebomnama ndáyeca chábioye mal jaquédana.

12

Jesús, chë bacna entsanga ntšamo ndegombre tmojuabnacá ndinÿinÿayëngbiana tojanabuatambá

¹ Chëntscuana, ba uaranga entsanga chentše tmojanójoto; tša entsanga causa, nÿetscanga imojtsenatsëntsenaye. Chora Jesús tojanontšë jóyebuambayama, y natsana chabe uatsjëndayëngbioye tojanéyana: “Chë fariseungbe buatëmbana soyëngama cuedado šmochtsebomna, chënga mondmëna bacna entsanga, ntšamo ndegombre tmojuabnacá ndinÿinÿayënga. Ntšamo chë levadura jamana nÿetsana chauábochema, cachcá chëngbe buatëmbana soyëngaca, chë fariseunga montsobena jamana bëtscá entsanga ntšamo ndoñe tšabá tontsemncá chamotsamama. ² Er ndocna yoiytëmena soye, ntjinÿcá queochaisoquéda; y chë ndótatšëmbo soye, ntsotatšëmbcá queochaisoquéda. ³ Chíyeca, chë mora nÿe tšëngaftangbiana šmojtsichamo soyënga, chë entsangbiana mo ibetiñcá cuaftsemna soyënga, entsanga chama botamana mochanjátatšëmbona. Y chë iytëcana šmojtsichamo soyënga, nÿetsca entsángbioye mochántsabuyinayey, mo nda canÿe yebnentša tsbanánocana noticiënga tojtsayebuachcá ca” —cha tojanéyana.

Nda ndegombre cuantsebiauatja

(Mt 10.26-31)

⁴ “Tšëngaftanga, atšbe amiguënga, cbochjáuyana: Ndoñe matauatjëngana nÿe chë tšëngaftangbe cuerpo japochócama imobenëngbiana, pero chentšana más jamana ndoñe ntsobenana. ⁵ Cbochanjabuayená ndábioye cmojtsamna jtsebiauatjana: šmochtsebiauatja chë nda vida jtsabuajuánama y chentšana infierno ye jtsichámuama obenana endbomnábioye; chábioye cocayé šmochtsebiauatja ca.

⁶ “¿Shachna jaja shloftšetémënga ndoñe nÿe uta denario crocenánama mondbétsena? Pero masque chca, Bëngbe Bëtsá chëngbiana sempre jesenójuabnayana. ⁷ Y tšëngaftangbiana Bëngbe Bëtsá lempe endëtatsëmbo, y bueta stjënëjënga tšëngaftangbe bestšašinë yomnámnaca. As ndoñe matauatjëngana; tšëngaftanga ba jaja shloftšëngbiana corente más šmonduámama ca” —Jesús tojánayana.

Ndabiana Jesucristo yochjayana chabe entšá yomna ca

(Mt 10.32-33; 12.32; 10.19-20)

⁸ “Atše cbëyana, nda atšbe entšá yomna ca entšangbe delante tojayanabiana, chë Bëngbe Bëtsá Entšá tbojanbemánaca, Bëngbe Bëtsabe angelëngbe delante echanjayana chë entšá chabia yomna ca; ⁹ pero nda entšangbe delante, atšbe entšá ndoñe yondmëna ca tojayanabiana, chë Bëngbe Bëtsá Entšá tbojanbemá, Bëngbe Bëtsabe angelëngbe delante echanjayana, cha chabe entšá ndoñe yondmëna ca.

¹⁰ “Bëngbe Bëtsá bochanjaperdóna, nda chë Bëngbe Bëtsá Entšá tbojanbemabiana ndoñe tšabá tontsichamuábioye, pero chë Uámama Espíritbiana ndoñe tšabá tontsichamuábioyna ndoñe.

¹¹ “Tšëngaftanga chë judiëngbe enefjuana yebnëngoye, ntšamo entšanga bétsamama ichámëngbioye y mandadëngbioye chacmojunatse ora, ndoñe šmattsenócochinÿena ntšamo o ndáyeca šmochjenéuyanama, o ndayá šmochjayanama; ¹² er chë Uámama Espíritu cmochanjabuayená ntšamo jayanama tojtsemncá, jóyebuambayama chacmojt-samna ora ca” —Jesús tojánayana.

Entšabiana resjo yomna, nÿe yapa bomnana jesejuabayana

¹³ Chentšana, canÿa entšanguentsá Jesúsbioye tbojaniana: —Buatëmbayá, atšbe catšata momandá chë átšbioye otocana soyënga chašuatoyé ca.

¹⁴ Y Jesús tbojaniana: —Bacó, ¿nda atše šojábema tsëndatbe ujanayá ca?

¹⁵ Y entšángbioye tojanëyana: —Šmochjinÿe y cuedado šmochtsebomna chë nÿe yapa soyënga jtsebomnama bošama; er masque bëtscá soyënga chašmotsóbomñe, chca ndoñe quešmochátstatšëmbo aiñe tšabe vida taišmochjónÿenama ca.

¹⁶ Y chora mëntšá tojanacuntá: “Inamna canÿe bomna entšá, y chabe fshantsënguiñe tša jaja saná yojtsopodena. ¹⁷ Chë bomná chora mëntšá yojtsejuabnaye, ‘¿Y morna, ntšamo chjama? er ndoñe quetsátsbomna ndayentše atšbe jaja saná jtsobocjayama ca.’ ¹⁸ Y mëntšá yojeniyana: ‘Chë grano uaquëcnaye yebnënga chantsendbiana, y inÿe más bëtš yebnënga chanjëtšjebo, y chiñe nÿetsca atšbe jaja saná chantsóbocjaye y nÿetsca atšbe soyëngnaca. ¹⁹ Y chora atše chjeniyana: Bacó, bëtscá soyënga contsebocjana, ba uatama cmochanjuáshjache. Morna, cochjóchna, cochjase, cochjatëmo, cochjóboyejuaye ca.’ ²⁰ Pero Bëngbe Bëtsá chábioye ibojauyana: ‘Obëjema, cach quem ibeta cochanjóbana; y asna, chë contsebocjana soye, ¿ndabiana yochtsemna ca?’ ”

²¹ Y Jesús chora tojánayana: “Chca endbopása chë nÿe chabiana bomnana tojtsejuabá y bëtscá Bëngbe Bëtsabe soyënga ndoñe tonjëftsashjáftaca ca.”

Bëngbe Bëtsá chabe básenga jtsanÿenana

(Mt 6.25-34)

²² Chentšana, Jesús chabe uatsjëndayënga tojanëyana: “Quem soye cbëyana: Ndoñe šmattsenócochinÿena ndayá šmochjase o šmochjofšiyë vida jtsebomnama, ni ndaye

entsáyá šmochjuíchëtjuama cach ndoñe. ²³ Ndegombre, vida chë sanama más enduámama y cuerpo chë entsáyama más. ²⁴ Chë ftsenga shloftšënga šmochjanýe: tondaye ntjájena, ni jaja saná ntjátbanana, ni grano uaquëcjnaye yebnënga ntsebomnana; pero Bëngbe Bëtsá chënga saná jtsatšatnayana. ¡Y tšëngaftanga chë ftsenga shloftšëngbiama puerte más šmonduámama! ²⁵ Masque chca endmëna, masque canýa tša tojesenócochinýena, ¿ntšamo nanjobenaye jamana, chë ntsachetšá vida yochtsebomnentsana canýe hora vida más jabotiyana? ²⁶ Chcasna, nýe chë base soye jamama ndoñe šmontsobenëse, ¿ndayama chë inýe soyëngama šmochjatenócochinýena?

²⁷ “Šmochjuinýe chë lirio uantšefjushangá jtsajuajnana: ndoñe ntsetrabájayana, ni ntseshabiamnayana. Pero atše cbëyana, ndegombre ni mo rey Salomón, nýetsca chabe bomnánaca, chë lirio uantšefjushangacá nýetšá botamana quenjatspormana. ²⁸ Bëngbe Bëtsá tša botamana shácuana tojuama, y chë shácuana mënté jajoca jtsamnana y yëfsana iñoca. Cha chë shácuanaca chca tojamëse, ndegombre tšëngaftangbiámna Bëngbe Bëtsá echanjama entsáyá chašmotsábomnana, jentsanga Bëngbe Bëtsábeñe nýe batšá ošbuáchiyënga! ²⁹ Chíyeca, ndoñe šmattsenócochinýena ndayá jasama o jofšiyama onguayiñe; ³⁰ er chë soyëngama quem luarentša entsanga mondbëtsenocochinýena, pero tšëngaftanga ndoñe. Tšëngaftangna canýe Taitá šmondbomna, y cha endétatšëmbo ndayá cmëjabótama. ³¹ Más tšabana, tšëngaftanga šmochtseboše Bëngbe Bëtsá tšëngaftangbe ainaniñe chaotsemándama, y chë cmojtšëjaboto soyënga nýe šmochanjóyëngacñe ca” — Jesús tojánayana.

Chë celoca bomnana (Mt 6.19-21)

³² “Ndoñe matauatjëngana atšbe ústonënga, atšbe básefta oveshënga, er Bëngbe Bëtsá tšabá tbonjuinýnana chabe amëndayana tšëngaftanga jatšatayama. ³³ Lempe ntšamo šmobomncá šmochtsatobuiye y chë ujabotëngbiöye šmochtsatšataye. Mo ndotan-guánaye shecnajiñe crocénana cuafjacjacá, celoca tšabe soyënga šmochjobuajo. Choca ndocna te queochaisopochóca, atbëbanënga choye ndoñe quemochátamashjna jatbëbama, y mejojón ndoñe queochatspochóca; ³⁴ er chë ndayentše tšëngaftangbe bomnana tojtsem-mentša soyëngama, ainánaca tšëngaftanga šmochántsejuabnaye ca” — Jesús tojánayana.

Bëngbe Utabná yochjésabama jtseprontánana

³⁵ “Mo chë oservénënga, chë entsáyá uichëtjonënga y uajuinýananëshangaca chëngbe nduiño yochtashjanguama cuaftsobatmancá, tšëngaftanga šmochtseprontana Bëngbe Utabná yochjésabama. ³⁶ Chca, tšëngaftanga šmochántsemna mo chë oservénënga, tšabe entsáyaca bopormánënga y uajuinýananëshangaca chëngbe amëndayá casamentocana yochtashjanguama cuaftsobatmancá; y chca, chë nduiño tojabochembo ora, cachora chë oservénënga jtebiatëfjuama. ³⁷ Puerte oyejuayënga chë oservénënga, chë nduiño tojtashjango ora tmojtsefšnënga. Ndegombre cbëyana, chora chë mandayá sëndorëche echantásnaye, mesëshentše chë oservénënga echanjätbiamna, y saná echanjuuatšiyë. ³⁸ Puerte oyejuayënga chënga, chë tmojtsefšnënga cha tojtashjango ora, masque tsëntseto ora o bínyanoye. ³⁹ Quem soye tšabá chacmësertá: chë yebnentša nduiño, ntseco ora atbëbaná yochjabama tojtsetatšëmbëse, cha ndoñe nanjalesencia ndocná jushañe chaondbemama, chë yebnoye jtsamashënguama y jtsatbëbama. ⁴⁰ Tšëngaftángnaca šmochtseprontana, er chë Bëngbe Bëtsá Entšá tbojanbemá echanjésabo, entsanga chama tondaye tmontsejuabná ora ca” — Jesús tojánayana.

Chë tšabe oservená y chë bacna oservená (Mt 24.45-51)

⁴¹ Pedro, Jesúsbiöye tbojanianayana: —Utabná, ¿chë tconjayana cuento nýe bëngbiama o nýetscangbiama yochtsemna ca?

⁴² Y Bëngbe Utabná tbojanjuá: —¿Nda yomna chë oservená, ntšamo chë nduiño tojtsebošcá amá y nyets juábnaca amá? Cha jtsemnana nda chë nduiño bochjëftsebošhona chë yebnentšënga chaotsanýenama, y jasama tojtsemna ora chaújuatšema. ⁴³ Puerte oyejuayá chë oservená, chë nduiño tojtashjango ora, cha tbojínýena jtsamëse ntšamo tbojtsemncá. ⁴⁴ Ndegombre cbëyana, chë nduiño chábioye bochanjaimpáda nyetsca chabe soyënga chabotsinýeñama. ⁴⁵ Pero chë oservená, chabe nduiño betscó ndoñe yochantaboca tojtsejuabná, y tojontsé chë inýe oservénënga, boyabásenga y shembásenga jtsajantšetayana, becá jtsesana, jofšiyana y jtsótmenana, ⁴⁶ cha ndoñe tontsejuabná te y tontsetátšëmbo ora, chabe nduiño echántashjango y puerte jabuache bochantsecastíga, y echanjama cha jasúfriama chabotsemnana, mo chë Bëngbe Bëtsábeñe ndošbuáchiyënga mochanjasufriacá.

⁴⁷ “Chë oservená, nda tojtsetátšëmbo ndayá chë nduiño tojtsebošama, pero ndoñe tontseprontana y ndoñe tontsobedecena, cha ba soye mochántsetjanja. ⁴⁸ Y chë oservená, ntsetatšëmbcá ntšámnaca tojabuachjuanguá, y chë causa chamotsetjanjama tbojtsemnësna, chana más batšá mochántsetjanja. Nda bëtscá soyënga tmojatštábioye jauyanana, bëtscá soyënga chaoma ca; y nda bëts trabajo tmojabonyébioyna jauyanana, más bëts trabajo chaoma ca.”

Jesusbe causa, entšángbeñe más jtsentsjanayana
(Mt 10.34-36)

⁴⁹ “Atše sënjabo quem luariñe jabojuinýiyama, y jtsa sëntseboše malaye ya ctsangbototjuana! ⁵⁰ Atše šontsemna puerte jasúfriana, y jpuerte ngménaca sëntsobátmana chca chaotsemnana! ⁵¹ ¿Tšëngaftanga šmojtsejuabná atše tijabo quem luarentše entšanga natjëmbana chamotsiyenama? Ndegombre ndoñe chca queochátsmëna; atše sënjabo causa, entšanga más mochántsejtsjanaye. ⁵² Er mëntescana, canýe yebnentše, shachnënga ndoñe quemochátenëyeunana, únganga útatbe contra y útata úngangbe contra mochántsemna. ⁵³ Taitá uaquiñabe contra echántsemna, y uaquiñá taitabe contra; bebmá, bembëbe contra, y bembë bebmabe contra; uambén mamá, bebincuabe contra, y bebincuá uambén mamabe contra ca” —cha tojánayana.

Ndaye tempo yochtsemnana ntšamo inétsotatšëmbo
(Mt 16.1-4; Mc 8.11-13)

⁵⁴ Mëntšánaca Jesús entšanga tojanëyana: “Tšëngaftanga, chë jantšetëshënga shinýe uenatjëmbambanoicana tojóboचना šmojinýe ora šmondbétsichamo ‘echanjuafté ca’, y ndegombre chca jopásana. ⁵⁵ Y tsmoicana tojtsebínýia orna, tšëngaftanga šmondbétsichamo ‘echanjóñëyana ca’, y ndegombre chca jopásana. ⁵⁶ ¡Bacna entšanga, chë ntšamo ndegombre šmojuabnacá ndinýinýayënga! Ntšamo quem luarentše yochtsemnana, ndayá celoca šmojinýama tša tšabá šmojtsetatšëmbëse, ¿ndáyeca ndoñe šmontsobena jtsetatšëmbuana ndaye bëts soye quem tempo Bëngbe Bëtsá cmojtsinýanýnana ca?” —Jesús tojánayana.

Chë uayayáftaca natjëmbana jtenbemana
(Mt 5.25-26)

⁵⁷ “¿Ndáyeca cach tšëngaftanga ndoñe šmondbéyana ndayá tšabá bëtsemnana? ⁵⁸ Nderado nda tcmojtsedemandá y cabildoye jotsánama cmojtsemna, cabá choye ndáshjango ora, betscó cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandadna josticiëngbe cucuatšíñe cmochanjáboshjona, y chënga cárceloye cmochanjutame. ⁵⁹ Ndegombre cbëyana, chentšana ndoñe quecochtétsbocna, nyets ndebénana candesopagantscuana ca” —Jesús tojánayana.

13

Bëngbe Bëtsabe benache jtishachana

¹ Cach ora, báseftanga tmojána Jesús jinýama, y tmojancuentá ndayá chë mandado Pilato tojanmama; chana básefta Galileoca boyabásenga tojtsanëbaye, y chëngbe buiñe yojenajuabó chë Bëngbe Bëtsábioye jëtschuayama tmojanóba bayëngbe buiñeca.

² Y Jesús chënga tojanéyana: “¿Tšëngaftanga šmojtsejuabná, chë Galileoca entšanga chca tmojapasá, chë luarentša inýe boyabásengbiama chënga más bacna soye amënga imojamna causa ca? ³ Ndegombre cbéyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana. ⁴ O, ¿tšëngaftanga šmnétsejuabnaye, chë Jerusalemntša bnétsana posufta entšanga tmojanóbanënga, chë Jerusalemoca binche uafjajónaye Siloé béconana tsbanana jebna soye tojtsanáshajaye ora, chënga imojamna chë ínýenga Jerusalemntše oyenëngbiama más bacna soyënga amënga ca? ⁵ Ndegombre cbéyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana ca” —Jesús tojanéyana.

Chë ndëshajona higo betiyama cuento

⁶ Jesús mëntšá tojanacuntá jabuátambama: “Canýe entšá jajoca canýe higo betiye inabomna, y yojá nderado nantseshájonama, pero tondaye yonjínýena. ⁷ Chcasna, chë jajañe bojanýábioye cha ibojauyana: ‘Mouena, ya unga uata tsabó quem higo betiyoje jaborrepárama, nderado nantseshájonama, pero ndocna te tondaye chiyátinýena; chíyeca, motsetëtše. ¿Ndayama quem jajañe yochjátsjena ca?’ ⁸ Pero chë jajañe inýená ibojauyana: ‘Bacó, inýe uata cachcá monýá, fshantse chanjáboplojua y uanguanëshe chanjabotboto. ⁹ Nderado chca jamëse, nanjashájona; y ndoñesna, chora cocayé cuantsetëtše ca.’ ”

Jesús canýe ochnayté, canýe tséštjona shembásabioye tbojanshná

¹⁰ Canýe, canýe ochnayté Jesús yojontsé entšanga jabuátambana, chë judiëngbe ene-fjuana yebnentše, ¹¹ y chentše yojtsemna canýe shembása; cha ya bnétsana posufta uata yojtsešoca. Canýe bacna bayëja chábeñe tojánamashëngo y chca tseštjoná tbojtsanbema, y tondayama yontsobena jtondiríchana. ¹² Jesús chábioye tbojáninýe ora, tbojanchembo y mëntšá tbojanianyana: “Batá, mora ya ndoñe šocá quecátsmëna ca.”

¹³ Chora Jesús chabe cucuatšënga chábeñe tojanjajó, y cachora chë shembása yojtondirícha, y tojanontsé Bëngbe Bëtsábioye jëtschuayama. ¹⁴ Pero chë enefjuana yebnentša mándayana tbojánetna, Jesús chë shembása ochnayté tbojanshnama, y entšanga tojanéyana: —Chnënguana te comna jatrabájama; chora šmochjabo jenóshnama; ochnaytese ndoñe ca.

¹⁵ Y Bëngbe Utabná tbojanjuá: —¡Bacna entšanga, ntšamo ndegombre šmojuabnacá ndinýinýnayënga! ¿Tšëngaftanguentšá ndocná chë ochnayté chabe uacná o chabe burrotema buanjuajafjoná, juanatsama béjaye chaofšema? ¹⁶ Chcasna, quem shembása, canýa Abrahábentšana entšá, y Satanasbe causa bnétsana posufta uata šocá yojtsemna, ¿ndoñe tšabá yondmëna canýe ochnayté chë bayëja jtsebojuánana ca?

¹⁷ Jesús chca tojánayana ora, chabe uayayënga imojtsëuatja, y nyetsca entšanga imojtsóyejuaye Jesús tša bëts soyënga yojtsamama.

Chë mostaztiye jenayama cuento (Mt 13.31-32; Mc 4.30-32)

¹⁸ Jesús mëntšánaca tojánayana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenana ca? ¹⁹ Endmëna mo canýe mostaza jénaye, canýe entšá jajañe tojajecá; chiyna jójuana y canýe bëts betiye jóbemana; tša bëtsashe jóbemana, chíyeca chë jaja shloftšënga chë buacuashënguiñe uajajonëtemëngá jauábopormana ca.”

*Chë levadurama cuento
(Mt 13.33)*

²⁰ Mëntšánaca Jesús tojánayana: “¿Ndaye sóyeca chjobenaye Bëngbe Bëtsabe amëndayama jábuayenama ca? ²¹ Endmëna mo levadurcá; canye shembása chana jenájubana unga medida arninýañe, nýetsana chauabochama ca.”

*Chë base utëntśá bëshása
(Mt 7.13-14, 21-23)*

²² Jerusalemoye benache, Jesús entsanga yojsabuátambaye bëts pueblënguñe y base pueblotëmënguñe. ²³ Canya chábioye tbojantjá: —Bëngbe Utabná, ¿nýe báseftanga imomna chë atsebácanënga mochtsemnënga ca?

Y Jesús tbojanjúá: ²⁴ —Puerte šmochtsentsena chë base utëntśá bëshásajana jamashnama; er ndegombre cbëyana, banga mochántseboše chëjana jamashnama, pero ndoñe quemochatobenaye. ²⁵ Chë yebnentsa nduiño chaojotsbaná y chë bëshása chaojtatámentsana, tšëngaftanga chë shjoca chašmojtsemnënga, šmochántsechembuana, mëntśá jtsichámëse: “Utabná, šmebëtafjo ca.” Pero cha cmochanjáuyana, “Atše ndoñe quetsátstatsëmbo ndëmoquënga tšëngaftanga šmomnama ca.” ²⁶ Chora tšëngaftanga šmochanjontsé ichámuana: “Acaftaca cánýiñe fsënjase y fsënjofsé, y aca bëngbe tsáshenañe tconjabuatambá ca.” ²⁷ Pero cha cmochanjójuaye: “Ya tcbonjáuyana, ndëmoquënga šmomnama ndoñe tstátšëmbo ca. ¡Atšbentsana mojuánanga, bacna soyënga amënga ca!

²⁸ “Chora chentše puerte šmochanjenóbošachna y tsetšanama juatsašënga šmochantsenoftëšjojnaye, Abraham, Isaac, Jacob y nýetscanga Bëngbe Bëtsabe juabna oyebuambnayënga Bëngbe Bëtsabe amëndayoca imojtsemnana chašmojinýe ora, y tšëngaftanga chentšana cmochtëbuacanama. ²⁹ Y shinýe bocanoicana y uenatjëmbambanoicana, tsmanoicana y tsjuanoicana entsanga mochanjabo y juasama mochanjotbiana Bëngbe Bëtsabe amëndayentše. ³⁰ Y banga mora nduámanënga imomnënga, chora uámanënga mochántsemna; y banga mora uámanënga imomnënga, chora nduámanënga mochántsemna ca” —Jesús tojánayana.

*Jesús tbojanongmé Jerusalemëntša entsangbiana
(Mt 23.37-39)*

³¹ Jesús chë soyënga tojanéyana ora, básefta fariseunga tmojánashjajna y tmojanianyana: —Muentšana motsatoñe; Herodes entseboše aca jtsóbama ca.

³² Y Jesús tojanéjua: —Motsajna y šmochjauyana chë corente studio bomná, mo tjañe mesetcá: “Minýe, mënté y yëfse entsángbentsana bacna bayëjënga sëndëtëbuacana y šoquënga sëndáshnaye, y baseftaytesna chanjapochóca ca.” ³³ Pero atše šontsemna mënté y yëfse jtsayana, y baseftaytesna Jerusalemoye jana, er ndoñe tšabá ntsemnana canya Bëngbe Bëtsabe juabna oyebuambnayá Jerusalemëntša chábuañe chaóbana ca.

³⁴ “¡Jerusalemëntša entsanga, Jerusalemëntša entsanga, tšëngaftanga chë Bëngbe Bëtsabe juabna oyebuambnayënga jtsëbáyana, y chë Bëngbe Bëtsabe ichmónëngbiye ndëtšbëngaca jtsatëchënganjana jtsëbáyama! ¡Bueta soye atše sënjábošena tšëngaftanga átšbiye júbuajama, mo canye tuamba chabe bolletotëmënga juatëngmiáša tajsoye cuaftajayecá, pero tšëngaftanga ndoñe chešmátsbošena! ³⁵ Y šmochjinýe, mora atše cachcá cbochanjesénýaye, y chca, atšna enánanga cbochanjésabashejuana, mo canye yebna cachcá tcojesonýa y énañe tcojeseboshjoncá. Y ndegombre, tšëngaftanga morscana ndoñe más atše quešmochátinýe; y atše šmochántinýe, chë: ‘¡Corente bendición bomná, Bëngbe Utabnabe obenánaca tojabá ca!’ chašmojtsichamo ora ca” —Jesús tojánayana.

14

Jesús, canye uafshachanáca šocábioye tbojanshná

¹ Canye ochnayté, Jesús tojana jasama fariseungbe canye amëndayabe yebnoye; y chë fariseunga yejuana imojtserreparana, er ndayá Jesús nanjama. ² Chéntšnaca, chabe delante yojtsemna canye entšá uafshachaná naca šocá. ³ As Jesús chë ley abuátambayënga y fariseunga tojanatjá: “¿Quenlesenciana canye ochnayté canye šocá jáshnama o ndoñe ca?”

⁴ Chëngna ndocá tmonjanjuá. As Jesús chë šocábioye tbojánishache, tbojanshná y tbojaniyana chaotsatoñe ca. ⁵ Y chë fariseunga tojanëyana: “¿Nda tšëngaftanguentsá, nderado chabe uaquiñá o uacná canye tboye tojtsótsatše, cachora ndoñe nanjá jet-sejátsëcama, masque ochnayté totsomñëse ca?”

⁶ Y chënga ndocá tmonjanobená cha jojuana.

Chë casamentoye ófjanënga

⁷ Jesús tojaninýe ntšamo chë ófjanënga quëfseroye imojtsachnëjuana jotbiamama; as mëntšá chënga tojanabuayená: ⁸ “Canye casamentama nda chacmojojfa ora, quëfseroca ndoñe catjót bema, er nderado inýe ofjaná acbiamama más uamaná ústonoye nandaboye; ⁹ y nderado chë tsëndatbe ofjajaná nanjabo y cmatjauyana: ‘Mua chentše chaótbema, maluaré ca’, y chora cmatjotóca ouatjentše chafjoca jana jatótbemana. ¹⁰ Chamna, nda chacmojojfa ora, chafjoca cochjót bema, chca, chë ofjajaná chaojabo ora chacmëyana: ‘Taita, quëfseroye motsëchnëngoñe ca’. Y chca, aca chë chentše tmojtsetbiámanëngbiamama uamaná cochántsemna. ¹¹ Er nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamná, aiñe bëtsá mochanjábema ca.”

¹² Y chë tbojanofja entšábioynaca Jesús mëntšá tbojaniyana: “Fiesta chacojama o sananga chacojtsebomna ora, ndoñe cattšëbuájajana acbe amiguënga, catsátanga, ni pamíllanga, ni acbe juachañe oyenënga bomnënga; er chëngnaca, fiesta chamojtsebomna ora, aca cmochantétofja, y chca ya acbe uacanana soye cochántsebomna. ¹³ Chamna, canye fiesta chacojama ora, cochjúbuaja ndbomnjëmënga, jama ndobenënga, coshetënga y jtanënga, ¹⁴ y aca corente oyejuayá cochántsemna; er chënga ndoñe quemochatobenaye cachcá aca jtëtofjana, pero acna acbe uacanana soye cochántsebomna, chë Bëngbe Bëtsabe bominiñe tšábënga imomnënga chamojtayena ora ca” —cha tbojaniyana.

Chë bëts sanama cuento (Mt 22.1-10)

¹⁵ Chca tojanuena ora, canya chë mesëshentše tbemaná tojánayana: —¡Puerte oyejuayá echántsemna Bëngbe Bëtsabe amëndayoca juasama chaojtsemná ca!

¹⁶ Chora Jesús tbojaniyana: —Canye bacó canye bëts saná yojapróna y ba entšanga yojúbuaja. ¹⁷ Juasama ya yojobuache ora, canye oservená ibojíchnua chë ófjanënga jáuyanama chamotsajna, ya lempe yojtseprontana ca. ¹⁸ Pero chorna nyetscanga imojtšë jtsoyátšëmbuana. Canya yojayana: “Cabá mora canye fshantse sënjobuámiñe, y šontsemna jana jarrepárama. Chcasna, aslëpaye šmotsepacenciá ca.” ¹⁹ Inya yojayana: “Bnëtsana toronga sënjobuámiñe, y šontsemna jana jányama, jaárama taimochjoservia. Chcasna, aslëpaye šmotsepacenciá ca.” ²⁰ Y inya yojayana: “Cabá mora sëntsobouamá, y chë causa, ndoñe quichatobenaye jama ca.” ²¹ Chora chë oservená yojesshëcona y lempe chabe nduiñbioye ibojauenaye. Chë nduiño tša ibojtsetna, y chë oservenábioye ibojauyana: “Cam ora motsa tsashenangoye y benachëngoye, y moye cochjunatse ndbomnjëmënga, jama ndobenënga, jtanënga y coshetënga ca.” ²² Chentša bënëntscose, chë oservená chë nduiñbioye ibojauyana: “Bacó, ya sënjama ntšamo šconjamandacá, y cabá inyëngbiamama luare entsemna ca.” ²³ As chë nduiño ibojauyana: “Motsa benachëngoye y betiyetemëngaca jetjaniñëngoye, y entšanga cochjautáriaye moye chamuábama, atšbe yebna chaojutjiamama; ²⁴ er ndegombre cbëyana, chë natsana sënjobuajënguentšá ndocná atšbe saná queochatsse ca.”

Ntšamo yomna Cristbe ustoná jtsemnama (Mt 10.37-38)

²⁵ Mallajta entsanga Jesús imojtséstona; as cha tojanobuértana y tojanéyana: ²⁶ “Nderado nda átsbioye tojabo, y ntšamo chabe taitá, chabe mamá, chabe shema, chabe básenga, chabe catšátanga y uabénanga tuababuánýeshanama, y ntšamo cachá tuenobobonshánama, atše ndoñe más corente šontsebobonshánese, cha ndoñe ntsoberenana atšbe uatsjendayá jtsemnana. ²⁷ Y nda, atšbiamana ndoñe tontseprontana jasúfriama y cruciñe jobanámnaca, y nyetsca chabe quem luare soyenga ndoñe tonjéseboshjona atše juastama, cha ndoñe ntsoberenana atšbe uatsjendayá jtsemnana.

²⁸ “Nderado nda tšëngaftanguentsá tojtsejuabná canye tsbanana jebna soye japórmama, ¿cha natsana ndoñe nanjót'bema jinýama ntsachetšá crocénana chentše yochjuába, y japochócama nyetsá crocénana tayojtseboimnana? ²⁹ Chca ndóñese, nderado chë uajat-sana ucuatjoniñe tojapormá y lempe jajebuama ndoñe tonjobenase, nyetscanga chca tmojinýenga, muantsáfchaye y mentsá muantsichamo: ³⁰ ‘Quemějema jajebuama tonjontsé, y japochócama ndoñe chenatobená ca.’

³¹ “O ¿ndaye rey inye réyefata jéntsama tbojotocase, natsana ndoñe nanjót'bema jajuboyama, nderado nanjobenaye bnétsana uaranga soldadéngaftaca chë inýabioye jayénjanana, chë inya uta bnétsana uaranga soldadéngaftaca tojtsabose? ³² Y ndóñesna, chë inye rey cabá bënoca tojtsemna ora, básefta entsanga echanjichamuá, cha jauyanama más tšabá yomna ndoñe jatentsjanayana ca.

³³ “Chcasna, ndánaca tšëngaftanguentsá, lempe ntšamo tobomncá ndoñe cachcá tonjesonýá, cha ndoñe ntsoberenana atšbe uatsjendayá jtsemnana ca” —Jesús tojánayana.

Chë tamó fténana tojtsebocna ora

(Mt 5.13; Mc 9.50)

³⁴ “Tamó tšabe soye endmëna; pero chë tamó fténana tojtsóbemëse, tšëngaftanga ndoñe quešmatobena jamana tempcá sanana cachiñe chaotsasmënana, ni saná jatamuama. Chë ftëna tamó tondayama ntsošervënana, cachcá, chë atšbe uatsjendayënga jtsemnana tmojtsebošënga, pero lempe jéseboshjonama ndoñe tmontseboše, cach ndoñe chama ntsošervënana. ³⁵ Chë ftëna tamó ndoñe ntsošervënana ni fshantsama, ni uan-guanëshama. Nye jtsëtšenana. Chë jouenama tmojtsobenënga, šmochjouena ca” —Jesús tojánayana.

15

Chë ótsëna oveshabiana cuento

(Mt 18.10-14)

¹ Nyetsca chë Romocama impuesto entsángbioye atjanayënga y inye bacna soyënga amënga, Jesúsbioye imojánajna chabe palabra jouenama; ² y chë fariseunga y ley abuatambayënga chama Jesusbiana podësca imojtsoyebuambná, mentsá: —Mua bacna soyënga amëngaftaca entsenuta y chëngaftaca entsesá ca.

³ As Jesús mentsá tojanacuntá, chënga jabuatambama: ⁴ —¿Nda tšëngaftanguentsá, canye patse oveshënga tojtsabamna, y canya tbojtsobuétšëse, chë inye esconëfta bnétsana y esconëfta oveshënga shëntsjañe ndoñe cachcá nanjesënyaye, y nanjá chë otšená jetsenguanguama candëtsónýeñëntscuana? ⁵ Y tbojtsinýena ora, oyejuayá chë oveshá jesotantšájuana; ⁶ y yebnoye tojtashjango orna, chabe amiguënga y juachañe oyenënga jáchembuana y mentsá jáuyanana: “Atšeftaca móyejuanga, er chë sentsanobuetše oveshá sentsinýena ca.” ⁷ Atše cbëyana, cachcá, celócnaca más oyejuayana jtsebínýnana, canye bacna soyënga amá tšabe benache tojtishachabiana, y ndoñe nya yapa, esconëfta bnétsana y esconëfta tšabe soyënga amëngbiana, chë ndoñe yondujaboto bacna soyënga amana jtsajbanana ca.

Chë crocénana tojetsónýena shembásabiana cuento

8 “O mēntśá, ¿ndēmua shembása, bnētsana uámana crocénana tojtsebomna y cánŷana tojtsobuétsēse, chora ndoñe canŷe uajuinŷanēsha nanjuajuinŷená, y cuedádoca chē yebna nantsetsjajo y botamana chē crocénana nantsenguango candētsónŷeñēntscuana? 9 Y tojtsinŷena ora, chabe amiguēnga y juachañe oyena shembásenga jáchembuana, y mēntśá jáuyanana: ‘Atšeftaca móyejuanga, er chē sēntsanobuetše crocénana sēntsinŷena ca.’ 10 Atše cbēyana, cachcá, chē Bēngbe Bētsabe angelotémēngbeñe oyejuayana jtsebínŷnana, nŷe canŷe bacna soyēnga amá chē tšabe benache tojtishachabiana ca” —Jesús tojánayana.

Chē uaquiñá bacna benachiñe ayá

11 Jesús mēntśánaca tojanacuntá: “Canŷe entśá uta uaquiñata yojánabamna; 12 y canŷe, chē ngomēnche uaquiñá chabe taitábioye ibojauyana: ‘Taita, atšbe otocana soyēnga šmatatšetá ca.’ As chē befta lempe chē uta uaquiñata yojtējátaye.

13 “Chentśana baseftaytesna, chē más bobontse uaquiñá lempe ntšamo ibojobuachcá yojtsatobuiye y chē crocénánaca bēn luaroye yojtsoñe, y choca, cha nŷe ntšamo ibojochēngcá, mocá yojenobuiye, y chca, lempe yojtsepochóca. 14 Lempe crocénana yojtsoshañe orna, bēts shēntśana chē luarentše yojóshjango, y chē causa cha ibojotóca shēntseca jtsejétanana. 15 As, cha yojá trabajo jonguangoñama y yojínŷena chē luarentśa canŷe entśábentše; chana, chabe jajoye ibojíchmua cotšēnga jtsanŷenama. 16 Chē bobontśana yojtseboše chē cotšbe saná jtsesana, pero ndocná tondaye ibonjanájuatśnaye.

17 “Cabana, botamana yojinŷe ntšamo yojtsepasacá, y mēntśá yojenójuaboye: ‘¡Bueta trabájayēnga atšbe taitabe yebnentše bētscá saná mondētsóbomñe, y atše muentše shēntśama chanjóbana ca! 18 Chantá atšbe taitabe yebnoye y mēntśá cha chanjauyana: Taita, šmotseperdoná. Atše tijama ndayá Bēngbe Bētsá ndoñe yondbošcá, y ntšamo aca ndoñe condbošcá. 19 Mora ya merecido taitatobuajoñe acbe uaquiñá jtsabáinama; nŷe canŷe acbe trabajayacá Diosmanda šmatofja ca.’ 20 Chca jēftsenójuaboyēse, yojontśé cachabe yebnoye jtana.

“Cabá bēnoca yojtsemna ora, chabe taitá chábioye ibojinŷe, y chabe uaquiñabiana ibojóngmia, y jajébenguama betscó yojá; ibojajebengo, ibojtotsejcuá y tša yojtsóyejuayayama chē uaquiñábioye ibojtámochó. 21 Chora chē uaquiñá ibojauyana: ‘Taita, šmotseperdoná. Atše tijama ndayá Bēngbe Bētsá ndoñe yondbošcá, y ntšamo aca ndoñe condbošcá; mora ya merecido taitatobuajoñe acbe uaquiñá jtsabáinama ca.’ 22 Pero chē Taitana chabe oservénēnga yojámēndaye: ‘Betscó chē más tšabe entśayá mauaca y matspormanga, montšabuechētjo y matsshecochētjo. 23 Mora chē más minŷica uacná šmochjuánatse y šmochjášhua. ¡Mochjase y mochjóboyejuaye ca! 24 Quem atšbe uaquiñá mo obanacá endánmēna y mora bēnga montsetátsēmbo cha ainá yotsomñama. Quem atšbe uaquiñá mo otšenacá endánmēna y mora tmontsinŷena ca.’ Y chentśana imojontśé joboyejuayama.

25 “Chē yebnoca fiesta yojtsemnēntscuana, chē mayor uaquiñana jajoca inétsomñe. Yebnoye yojtsataye y ya béconana yojtsemna orna, cha yojouena imojtsabuastoye y imojtselántsaye. 26 As chora cha canŷe oservénábioye ibojachembo y mēntśá ibojatjaye: ‘¿Ndayá bēngbe yebnentše yojtsopasana ca?’

27 “As chē oservená ibojojuá: ‘Acbe uabentsá tontashjango y chama acbe taitá šonjutarié chē más minŷica uacná jáshbuama, cha tšabá tojtashjanguama ca.’ 28 Pero chē uabóchena catšatna corente ibojtsetna y ndoñe yontseboše tsoye jtamashēnguana. As cach befta yojábocna chē catšátbioye jaimpádama chauatamashēnguana. 29 Chora cha chē taitábioye ibojauyana: ‘Taita, aca condétátsēmbo bueta uata cbetsajabuáchanama, nŷets tempo cbetseyeunanama, pero ndocna te ni mo canŷe chivotema chešcaisatštá atšbe amiguēngaftaca joboyejuayama. 30 Y masna, acbe uaquiñá chē bacna vida bomna

shembásengaftaca acbe crocénana pochocayá tojtashjango ora, chë más minyica uacná chabiamá tcojášhua ca' —chë uaquiñá ibojauyana.

³¹ “Chora chë befta ibojojuá: ‘Atsbe uaquiñá, aca sempre átseftaca condétsemna y lempe ntšamo atše tsbomncá acbiámnaca endmëna. ³² Pero mora tšabá entsemna joboyeuayama y joyeuayëngama; er acbe uabentsá mo obanacá endánmëna, y mora bënga montsetátšëmbo cha ainá yotsomñama; mo otšenacá endánmëna, y mora tmontsinyëna ca.’ ”

16

Chë nduiñbe ndoñe tšabe uajabuachaná biamá cuento

¹ Jesús mëntsánaca chabe uatsjédayënga tojanacuntá: “Inamna canyë bomna entsá, y cha ibnabomna canyë uajabuachaná chabe soyënga chaotsinyënama; y chë nduiño imojuenaye chë uajabuachaná chabe soyëngaca ndoñe tšabá yontsamama. ² Asna, chë nduiño ibojachembo y mëntsá ibojauyana: ‘¿Ntsámo acbiamá šmotsatsësnacá ndegombre yojtsemna ca? Mora cuenta šmatatštá ntšamo atšbe soyëngaca tcojamama, er morscana ya ndoñe atšbe soyënga inyëná quecochátsmëna ca.’ ³ Chë uajabuachaná yojontsé jenójuaboyana, y mëntsá yojenyana: ‘¿Y mora ntšamo chtsemna, chë nduiño atšbe trabajuentšana šojtabocna ora? Ndoñe añemo quetsátsbomna fshantse jatrabájama, y lemošna jótjañamna sentsëuatja. ⁴ Ya sëntsetatšëmbo ndayá chjama, chca, atšbe trabajuentšana chašojtabocna ora, atše jtsabamnama ndëmuanyënga chëngbe yebnentše chašmofjama ca.’

⁵ “Chentsana, canyánya chë chabe nduiñbioye ndebëngë yojáchembo. Cányabioye ibojatjaye: ‘¿Ntsachetšá atšbe nduiño icondebena ca?’ ⁶ Y cha ibojojuá: ‘Canyë patse barrilëshangá aceitiye ca.’ As cha ibojauyana: ‘Muentše acbe recibëcha entsamna; mora mótbema y inyácha nyë shachna bnëtsana barrilëshangama matapormá ca.’ ⁷ Chentsana inyabioye ibojatjaye: ‘Y acna, ¿Ntsachetšá icondebena ca?’ Y cha ibojojuá: ‘Canyë patse medida trigo ca.’ As cha ibojauyana: ‘Muentše acbe recibëcha entsamna; chiñe nyë posufta bnëtsanama mábema ca.’ ⁸ Chentsana, chë nduiño tšabá yojayana chë ndoñe tšabá ama mayordombiamá, cha stúdioca yojamama. Chë nyë quem luarama enójuabnaye entsanga, cachëngbe soyëngaca puerte studio bomnënga mondmëna; y chë entsangbe juabnënga binynayábënga ndoñe nya yapa ca.

⁹ “Atše cbabuayená, quem luarentše, chë bacna soyënga amëngbe luarentša bomnánaca amiguënga šmochjábiamá, inyënga jtsëjabuáchanëse. Chca, chë bomnana tojtsopochocá ora chašmotsabamna ndëmuanyënga chë nyëtsca tescama oyenoye chacmúbuajama ca.

¹⁰ “Nda básefta soyënguiñe lempe tšabá tojama, bëtská soyënguiñnaca lempe tšabá echanjama; y nda básefta soyënguiñe ndoñe tšabá tonjama, bëtská soyënguiñnaca cach ndoñe tšabá queochatsma. ¹¹ Chcasna, quem luarentše, chë bacna soyënga amëngbe luarentša bomnánaca ndoñe tšabá šmonjamëse, ¿nda chë ndegombre bomnana, chë Bëngbe Bëtsabe soyënga cmochjábanyie? ¹² Y chë ndoñe tšëngaftangbe sóyeca ndoñe tšabá šmonjamëse, ¿nda cmochjantšabuáchiye ndayá tšëngaftangbiamá yomncá ca?

¹³ “Ndocná ntšobenana uta mandayata jtsaservénana; er canyabioye bochantšáboyënja y chë inyabioyna bochantšebobonshana, o canyabiamá tšabá echántsetrabajaye, y chë inyabiamna ndoñe tšabá. Ndoñe quecátobena Bëngbe Bëtsá jtsebobonshánana, nyë quem luarentša soyënga jtsebomnama tcojtsebošëse ca” —Jesús tojánayana.

¹⁴ Chë fariseunga, becá crocénana jtsebomnama bošënga imnamna, lempe chca chënga tmojanuena, y Jesúsbioye imojtsáboyëjuana. ¹⁵ As Jesús tojanëyana: “Tšëngaftanga entsangbe delante mo tšábënga cuaftsemncá jtsenobiamnayana, pero Bëngbe Bëtsá endëtátšëmbo ndayá tšëngaftangbe ainaniñe yomnana; er ndayá entsanga más tojtsebošcá, Bëngbe Bëtsá jtsáboyënja ca.

Moisesbe ley y Bëngbe Bëtsabe amëndayana

¹⁶ “Moisesbe ley y chë Bëngbe Bëtsabe juabna oyebuambnayënga tsëngaftanga cmon-janabuayiyá, Juan chë Ubayaná quem luaroye tonjánabëntscuana. Cha tonjánabo orscana montsabuayiyá chë tsabe noticiënga Bëngbe Bëtsabe amëndayocama, y nyëtscanga tša montseboše choye jamashënguama ca.

¹⁷ “Más paselo endmëna, celoca y quem luare chaopochocá, y ndoñe chë ntšamo leyinë iuayancá, chë ndayá jopásama yomnama, ni mo canye punto ndoñe chca chaondëtsemnama ca” —Jesús tojánayana.

Ndayá Jesús tojanabatambá chë bouamnënga tmojtseñtšenama
(Mt 19.1-12; Mc 10.1-12)

¹⁸ “Nda chabe shëmbioye cachcá tbojesonýá y ínÿaftaca tojtóbouamase, cha chë natsana shëmbioye ínÿaftaca jtseíngñayana; y nda chë útšena shembásaftaca tojobouamá chana, canye uabuata má jtsebomnana, y chca, chana canye bacna soye jtsamana ca” —Jesús tojánayana.

Chë bomná y chë ndbomnjëjema Lázaro

¹⁹ “Canye bomna entšá inamna; cha yojanamana uámana y botamana shbuenda uafjatsenga y lino entšayangá jtichëtjuana, y cada te bëts fiestënga yojánama. ²⁰ Canye ndbomnjëjmëna inamna, Lázaro ca uabainá, bacna nguayanánaca šocá; y cha yojanamana chë bomnabe bëšásëntše fshantsiñe jótbemana. ²¹ Quem ndbomnjëjema yojtseboše chë bomná yojtsesayentšana yojatquëcjana sanángaca jtoshachayana; y chë quešënga innaboye chabe nguaye cuerpo jajáfuama. ²² Canye te Lázaro yojtsóbana, y Bëngbe Bëtsabe angelënga Abrahámbioye cha imojtamba, chë nyëtscanga oyejuayënga mondmëna luaroye. Chë bomnánaca yojóbana y imojuátbontsa.

²³ “Chë bomná infiernoca puerte ngmëniñe yojtsesufrina ora, tsbanánoye yojtješiyë y bënoca Abraham ibojinÿe, y Lázaro cháftaca yojtsemna. ²⁴ As chë bomná yojuyebuáchena: ‘¡Taita Abraham, šmolastemá! Lázaro michmó chabe ntšabuafja chaofchecuacuá y atšbe bichtaja chauabofchecuacuaye, er quem ñeshoca tša sëntsesufrina ca.’ ²⁵ Pero Abraham ibojauyana: ‘Uaquiñá, menojuabó, aca fshantsoca vida conjánbomna ora, lempe ntšamo icojabošcá tconjanóyëngacñe, y Lázaro chë cuenta tondaye quenjátsbomna; pero morna, cha tsabá y oyejuayá entsemna, y aca jabuache ngmënanana contsebomna. ²⁶ Y inÿe soye, canye bëts tbuañe entsemna tsëngaftangbiocana mëntscoñe; chca, chë tsëngaftangbioye muentšana jenachnënguama tmojtsebošënga ndoñe chamondëtsoyena, ni chocana bëngbioye cach ndoñe ca.’

²⁷ “Y chë bomná ibojauyana: ‘Masque chca, Taita Abraham, Diosmanda Lázaro michmó atšbe taitabe yebnoye; ²⁸ choca sëndábamna shachna catsátanga; as chaúyana ntšamo moca atše stsepasana y ntšamo jamëse chënga ndoñe chaondëtšamna quem ngmëñënga luaroye jabama ca.’ ²⁹ Chora Abraham ibojauyana: ‘Chënga ya mondbomna ndayá Moisés y chë Bëngbe Bëtsabe juabna oyebuambnayënga tmojëftsanábema soyënga; ¡chëngbioye chamoyauná ca!’ ³⁰ Chë bomná ibojojuá: ‘Ndoñe, Taita Abraham; nderado obanënguëntšana canya chëngbioye tojase, aínë chë tsabe benache muan-tishache ca.’ ³¹ Pero Abraham ibojauyana: ‘Chënga ni mo Moisés, ni chë Bëngbe Bëtsabe juabna oyebuambnayëngbioye ndoñe tmonjóyaunase, Bëngbe Bëtsabeñe ndoñe quemochatošbuáchiye, masque canye obaná chauatayenëse, chëngbioye jábuayenama ca’” —Jesús tojancuentá.

17

Resjo yomna, nderado bacna soyënga cuanjama
(Mt 18.6-7, 21-22; Mc 9.42)

¹ Jesús chabe uatsjéndayënga tojanëyana: “Sempre echanjëftsemna juabnënga bacna soyënga jamama; pero, itša lastema chë entsabiama ndabe causa ínÿenga bacna soyënga tmojama! ² Más tšabá chabiamana nántsemna canÿe nantsnëbé chamotsetamosëntšbua y mar béjayoye chamotsashbuetsë, y ndoñe chë canÿa Bëngbe Bëtsábeñe ošbuachiyá bacna soye chaomama juanatsana. ³ Cuedado šmochtsebomna.

“Acbe catsata bacna soye tojamëse, cochjuácacana; y yochtsajbaná ca cha tojayanëse, cochtseperdóna. ⁴ Masque nÿe canÿe te, canÿsëfta soye ntšámnaca tcmojaborlá, y canÿsëfta soye ‘chca ndoñe más quebochatsbólra ca’ tcmojauyanëse, aca cmontsemna cha jtseperdónana ca” —Jesús tojánayana.

Bëngbe Bëtsábeñe jtsošbuáchiyëse, corente obenana jtsebomnana

⁵ Chë uatsjéndayënga Bëngbe Utabnábioye tmojaniyana: —Ošbuáchiyana šmababuaté ca.

⁶ Y chë Utabná tojanëjua: —Tšëngaftanga ošbuáchiyana, batsatema masque nÿe mo mostaza jenaycá šmojtsebomnëse, quem sicomoro betiyoye šmatjauyana: “quemuentšana mojashtse y mar béjayoca mojé ca”, y quem betiye chca nanjama ca.

Chë oservená ndayá ibomna jamana

⁷ “Nderado canÿa tšëngaftanguentsá canÿe bochichnayá tbojtsebomna, cha jajocana tojtashjango jajañe arayocana o uacnënga anÿenocana, ¿chábioye bochjauyana: ‘Matabo y mabose ca’? ⁸ Ndoñe, chamna mëntšá bochanjauyana: ‘Jetiñe juasama cochjuábua, y moprontá atše jaserviama atše candëse y candofšentscuana; y chentšana aca cochjase y cochjofsiye ca.’ ⁹ Y chë bochichnayábioye ndoñe quebochtëtschuaye ndayá tbojutariecá cha tojamama. ¹⁰ Tšëngaftángnaca cachcá, lempe ntšamo Bëngbe Bëtsá tcmojutariecá chašmojama ora, cmontsamna jayanana: ‘Nduámana oservëngë fsëndmëna; er nÿe ntšamo jamama šuamncá tifjama ca’ ” —Jesús tojánayana.

Jesús, bnëtsanënga bacna nguayanánaca šoquënga tojanashná

¹¹ Jerusalenoye benache, Jesús tojánachnëngo Samaria y Galilea luarëjana. ¹² Y canÿe pueblotëmoye tojánashjango ora, bnëtsana boyabásënga bacna nguayanánaca šoquënga chábioye tmojána; chábentšana bënoca chënga tmojanoquedá, ¹³ y mëntšá imojtsáyebuache: —¡Jesús, Buatëmbayá, šmotsalastemá ca!

¹⁴ Jesús chënga tojánanÿe ora, tojanëyana: —Jerusalenoca bachnángbioye motsajna, y chënga šmochjínÿanÿiye tšëngaftanga mora ndëšoquënga šmojtsemnama ca.

Y tojanopasá, chë bnëtsanënga cabá imojétsayëntscuana, ya shnánënga imojtoquedaye. ¹⁵ Canÿa chënguentsá, shnaná yojtsemnama tojáninÿe ora, yojesshëcona Bëngbe Bëtsábioye jabuache atschuanaye; ¹⁶ y Jesusbe delante yojoshëntsamentsiye, jubiaca fshantsóntscoñe yojotsejbëna, y chábioye ibojtsatschuanaye; y chë boyabásana Samarioca entšá inamna.

¹⁷ Chora Jesús tbojaniyana: —Bnëtsanënga mondmëna chë shnánënga tmontoquedanga. ¿Ndayentšë chë inÿe esconëftanga imojtsemna? ¹⁸ ¿Nÿe quem boyabása, inÿe luarocana ashjanganá, tojesshëcona Bëngbe Bëtsá jëtschuayama? ¿Ndáyeca chë ínÿenga ndoñe ca?

¹⁹ Y chë entsábioye tbojaniyana: —Matëtsbaná y motsatoñe; Bëngbe Bëtsábeñe aca icošbuachéyeca shnaná contsatsmëna ca.

Ntšamo Bëngbe Bëtsabe amëndayana yochjóshjango (Mt 24.23-28, 36-41)

²⁰ Canÿe, chë fariseunga Jesús tmojantjá, mocna ora chë Bëngbe Bëtsabe amëndayana yochjanóshjanguama; y cha tojanëjua: “Bëngbe Bëtsabe amëndayana chaojóshjango ora, tšëngaftanga ndoñe quešmochatobenaye chca jinÿana. ²¹ Chora ndoñe quemochátichamo ‘Muentšë entsemna’ o ‘Choca entsemna ca’; er Bëngbe Bëtsabe amëndayana ya tšëngaftangbeñe entsemna ca” —cha tojánayana.

²² Jesús chabe uatsjéndayënga tojanëyana: “Canÿe tempo echanjóshjango, y chora tšëngaftanga šmochántseboše canÿe te jtsebomnana, ntšamo chë Bëngbe Bëtsá Entšá tbojanbemá tšëngaftangbeñe enjëftsemna orcá; pero chora ndoñe chca queochatóshjango. ²³ Chora báseftanga mochántsechamo: ‘Muentše entsemna’ o ‘Choca entsemna ca’; pero choye ndoñe šmatjá, ni šmatjúseto. ²⁴ Er chë tojatcuinÿe ora, ntšamo celoca catoica juachoica tojabuashinÿinÿenacá, chca echántsemna chë Bëngbe Bëtsá Entšá tbojanbemá quem luaroye chaojésabo te. ²⁵ Pero natsana cha bontsemna puerte jasúfriana, y morsca entšangbiana uabotená jtsemnana.

²⁶ “Ntšamo Noé yojaniyena ora tojanopasacá, cachcá echanjopása chë Bëngbe Bëtsá Entšá tbojanbemá quem luaroye chaojésabo ora. ²⁷ Chë tempo, entšanga imnasaye, innofšësnaye, innóbouamnaye; natjëmbana imojtsiyeñe, y chca, natjëmbana imojtsomñe, Noé chë barquëshoye tojánamashënguentscuana; pero chora uabouana uaftena tojánashjango y chë entšanga tojtsanapochocá. ²⁸ Cachcá ntšamo Lot yojaniyena ora tojanopasacá: entšanga imnasaye, innofšësnaye, innóbouamnaye, imojtsena, sananga innajena y innajebuana; ²⁹ pero Lot Sodoma bëts pueblentšana tojëftsanbocna ora, Bëngbe Bëtsá tojanma celocana íñeshe y azufre chauaftema, y chentša entšanga tojtsanapochocá. ³⁰ Cachcá echántsemna chë Bëngbe Bëtsá Entšá tbojanbemá chaojtonÿná ora.

³¹ “Chë tena, nda cachabe yebnentša tsbanánoca chaojtsemna, y chabe soyënga cach tsoca tojtsebomnëse, chocana ndoñe chaondétastjango chë soyënga jesabobocnama; y nda jajoca chaojtsemna, yebnoye ndoñe chaondéta. ³² Menójuabonga ntšamo Lotbe shémaftaca tojanopasama. ³³ Nda tojtsentšena quem luarentše bëtscá jtsebomnana y atšbiana jasúfriana ndoñe tontseprontana, chë nÿetsca tescama yomna tšabe vida echanjobuetše. Pero nda quem luarentša soyënga cachcá tojonÿá atše juastama, masque chaóbana, chë nÿetsca tescama yomna tšabe vida echántsebomna.

³⁴ “Atše cbëyana, chë ibeta, chë Bëngbe Bëtsá Entšá tbojanbemá chaojtonÿná ora, útata canÿe jutsnëshañe bochántsemna; canÿa mochanjesbetše y chë ínÿana ndoñe. ³⁵ Uta shembásata cánÿiñe bochántsejanÿcoye; canÿa mochanjesbetše y chë ínÿana ndoñe. ³⁶ Uta boyabásata jajoca bochántsetrabajaye; canÿa mochanjesbetše y chë ínÿana ndoñe ca” — cha tojanëyana.

³⁷ Chora chë uatsjéndayënga Jesús tmojantjá: —Utabná, ¿ndëmoca chca yochjopása ca? Y cha tojanjuá: —Chë obanabe cuerpo tojtsemnentše chë gallinacënga jojotana ca.

18

Chë viudá y chë mandadbiama cuento

¹ Jesús mëntšá tojanacuntá, entšanga jabuátambama, Bëngbe Bëtsáftaca nÿets tempo jtsencuëntayana yomnama, ainaniñe añemo jtsebomnana ndocna te ntjajbanacá. ² Mëntšá tojánayana: “Canÿe pueblentše canÿe mandado inamna; chana ni Bëngbe Bëtsábioye ndoñe bonjánebiauata, ni entšanga yonjánayaunana. ³ Chë pueblentše canÿe viudánaca inamna; chana canÿe demanda yojánbomna. As chë mandádbioye yojobeconá y mëntšá ibojauyana: ‘Diosmanda atšbe uayayá motsecastigá ndayá šojaborlama ca.’ ⁴ Bayté chë mandado ndoñe yonjábosena chë viudábioye joyeunayama; pero chentšana cha yojenójuaboye: ‘Masque Bëngbe Bëtsá ndoñe quetsátebiauatja, ni entšanga ndoñe quetsátayaunana, ⁵ pero quem viudá cada ora endabó causa, aíñe chanjóyeunaye, chabe uayayá chanjacastiga; ndóñesna cada te nandaboye y cabana ya šochanjanamëntša ca.’”

⁶ Chentšana Bëngbe Utabná tojánayana: “Smonjouena ntšamo chë ndoñe tšabá ama mandado yojayancá. ⁷ Y chca, ¿Bëngbe Bëtsá chabe bocacánënga ndoñe yochanjátsebacaye? Chënga mora ínÿengbe causa montsesufrina y cada te Bëngbe Bëtsá mondbëtseimpadana chaújabuachama. ¿Más chamuatobatná ca yochjáuyana? ⁸ Atše

cbéyana, Bëngbe Bëtsá betscó tšëngaftanga cmochanjátsebacaye, tšëngaftanga chë ínÿengbe causa mora šmojtseufrínënga. Pero chë Bëngbe Bëtsá Entšá tbojanbemá chaojésabo ora, ¿cabá Bëngbe Bëtsábeñe ošbuáchiyënga quem luarentse entšanga yochjánÿena ca?” — Jesús tojánayana.

Chë fariseo y chë Romocama impuesto atjanayabiama cuento

⁹ Báseftanga imojtsanjuabná chënga tšabe entšanga imnamna ca, pero chë ínÿengbioye imojtsëbuayënja; chíyeca Jesús mëntšá tojanacuntá jabuátambama: ¹⁰ “Uta boyabásata Bëngbe Bëtsabe bëts yebnoye tbojána Bëngbe Bëtsáftaca jencuéntama: canÿa yojamna fariseo, y chë ínÿana, canÿe Romocama entšángbioye impuesto atjanayá. ¹¹ Chocna chë fariseo, tsanana Bëngbe Bëtsábioye mëntšá ibojtsecuéntaye: ‘Bëngbe Bëtsá, cbontsatschuaná atše chë ínÿengcá ndoñe quetsatsmënema: atbëbanënga, puerte bacna soye amënga y shëmbioye ínÿaftaca íngñayënga; y ni quem Romocama impuesto atjanayacá ndoñe quetsatsmënema. ¹² Atše sënduamana, ácaftaca jencuéntamna, canÿe semaniñe uta soye tondaye ntjascá jtsemnana; y lempe stjonÿenentšana, bnëtsanentšana canÿe soye acbiama sëndëquëcñá ca.’ ¹³ Pero chë Romocama impuesto atjanayana, bënoca yojtsemna, ni celoye ntjontješiyá, yojtsenócochjantšetaye y mëntšá yojtsichamo: ‘¡Atšbe Bëtsá, šmotselastemá, atšajema bacna soye amá tsmëna causa ca!’”

¹⁴ Chentšana Jesús tojánayana: “Atše cbéyana, quem Romocama impuesto atjanayá chabe yebnoye tojtaná chabe bacna soyëngama perdonaná, pero chë fariseo ndoñe. Er nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamná, aíñe bëtsá mochanjábema.”

Jesús, basetémëngbiama Bëngbe Bëtsábioye tbojanimpadá (Mt 19.13-15; Mc 10.13-16)

¹⁵ Entšanga imojanamana Jesúsbioye basetémënga junatsana chauabájajuama, y Bëngbe Bëtsábioye chëngbiama chaboimpadama; pero chë uatsjëndayënga chca tmojáninÿe ora, tmojanontšé chë basetémënga unachayënga jtsëcácanana. ¹⁶ Pero Jesusna chë basetémënga tojánachembo, y mëntšá tojánayana: “Cachcá mónÿaye chë basetémënga átšbioye chamuabo, y ndoñe matéuyanana; er Bëngbe Bëtsabe amëndayana endmëna chë mo quem basetëmëngcá imomnëngbiama. ¹⁷ Ndegombre cbéyana, nda Bëngbe Bëtsabe soyënga ndoñe tonjóyëngacñe mo canÿe basetëmá jtsošbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

Canÿe bomna entšá Jesúsbioye tojána (Mt 19.16-30; Mc 10.17-31)

¹⁸ Canÿe mandayá Jesúsbioye tbojantjá: —Tšabe Buatëmbayá, ¿ndayá šojtsemna jamana chë nÿetsca tescama yomna tšabe vida jtsebomnama ca?

¹⁹ Y Jesús tbojanjuá: —¿Ndáyeca šcjauyana “tšabia ca”? Tšabia nÿe canÿa endmëna: Bëngbe Bëtsá. ²⁰ Aca condétatšëmbo ntšamo Bëngbe Bëtsá tojanmandacá: “Acbe shema ínÿaftaca ndoñe cattseíngñaye, ínÿa ndoñe catjóba, ndoñe catjatbëba, ndoñe catjuaboínÿena y acbe bëtsétsata ndoñe stëtsoye catjáquedaye ca.”

²¹ Chora chë boyabása tbojanjuá: —Atše lempe chca básetema orscana sëndocumplina ca.

²² Jesús chca tojanuena ora, tbojaniana: —Cabá canÿe soye cmontsebuáshbena jamana: lempe ntšamo icobomncá cochjetsatobuiye, y chë crocénana, ndbomnëjëmënga cochtsatsataye; chca, celoca canÿe bëts bomnana cochántsebomna. Chentšana, cochjabo y šcochjuasto ca.

²³ Chë entšá chca tojanuena ora, puerte ngménaca yojtsemna, er cha corente bomná inamna. ²⁴ Chca ngmená tbojáninÿe ora, Jesús tojánayana: —¡Yapa totcá bomnëngbiama entsemna Bëngbe Bëtsabe amëndayoye jamashënguama! ²⁵ Ndegombre, más paselo

endmëna canÿe camello chë coshufjentša atëfjnëjana chauachnëngo, y ndoñe canÿe bomná Bëngbe Bëtsabe amëndayoye jamashënguana ca.

²⁶ Chora, chë chca imojouenënga tmojánayana: —¿As nda yochjobenaye atsbocaná jtsemnana ca?

²⁷ Y Jesús tojanëjua: —Ndayá entšanga ndoñe mondobena jamana, Bëngbe Bëtsá aíñe endobena jamana ca.

²⁸ Chora Pedro, Jesúsbioye tbojaniyana: —Bëngbe Utabná, aca contsonÿá, bënga lempe chë fsëndbomna soyënga fsënjëseboshjona, y ácaftaca fsëntsajna ca.

²⁹ Jesús chora tojanëyana: —Ndegombre chëyana, ndánaca Bëngbe Bëtsábioye jasérviana, chabe amëndayama jtsabuayiynayëse, cachcá tojëftseboshjona chabe yebna, shema, catsátanga, bëtsëtsanga o básenga, ³⁰ cha mora quem luarentse chë soyëngama más echanjóyëngacñe, y chë inÿe luarocna, chë nyetsca tescama yomna tšabe vida ca.

Jesús cachiñe tojánayana cha jóbanama y jtayenama

(Mt 20.17-19; Mc 10.32-34)

³¹ Jesús chabe bnëtsana uta uatsjëndayënga barie tojánachembo, y mëntšá tojanëyana: “Smontsetátšëmbo mora Jerusalenoye bënga montsajnama, y choca lempe echanjochnëngo ntšamo chë Bëngbe Bëtsabe juabna oyebuambnayënga, chë Bëngbe Bëtsá Entšá tbojanbemabiana tmojanabemcá; ³² er choca cha chë ndoñe judiëngbe cucuatšinë mochanjáboshjona, y mochantsáboyejuana, mochanjóyenguango, mochántsebuashëttoj; ³³ y chamojátjanjentsana, mochanjóba, pero unga tianoye cha echántayena ca.”

³⁴ Chë uatsjëndayënga tondaye tonjanësertá, ni montsetátšëmbo ndayá bëtsemnana ntšamo Jesús yojtsëtsësnacá, er chëngbiana yojamna josértama ndopodena soyënga.

Jesús, Jericó pueblaca canÿe jtanábioye tbojanshná

(Mt 20.29-34; Mc 10.46-52)

³⁵ Tojanopasá, Jesús Jericó pueblöye yojtsebëconaye ora, canÿe jtaná benache juachañe inatbemana, lemošna otjanañe. ³⁶ Entšanga chëjana imojtsachnëjuanama tojanuena ora, yojanotícia ndayá yojtsopasana ca, ³⁷ y chë entšanga tmojaniyana, —Jesús Nazaretocá entsebeconá ca.

³⁸ As cha yojontsé uayebuáchana: —¡Jesús, Davídbentšana Entšá, šmotselastemá ca!

³⁹ Chë natsana imojtsajnënga chë jtaná imojtsácacana, iytëca chaóbemama; pero cha más yojtsáyebuache: —¡Davídbentšana Entšá, šmotselastemá ca!

⁴⁰ As Jesús tojantsá y tojanmandá cha chamobetšama. Cha ya bécoñe yojtsemna ora, Jesús tbojantjá: ⁴¹ —¿Ndayá cojtseboše atše acbiana chjamama ca?

Y chë jtaná tbojanjúá: —Atšbe Utabná, atše sëntseboše chašuatábínÿnama ca.

⁴² Chora Jesús tbojaniyana: —Matinÿe, Bëngbe Bëtsábeñe betsošbuachéyeca shnaná contsatmëna ca.

⁴³ Y cachora cha tšabá ibojtabinÿna, y Jesúsbioye ibojtsëstona, Bëngbe Bëtsá atschuanaye. Y nyetsca entšanga, chca tmojáninÿe ora, Bëngbe Bëtsá imojtsatschuanaye.

19

Jesús y Zaqueo

¹ Jesús Jericó pueblöca tojánashjango ora, chë pueblëjana cha yojtsachnëjuana. ²⁻³ Chora, canÿe bomna entšá, chë Romocama entšanga impuesto atjanayëngbe amëndayá, Zaqueo ca uabainá, yojtseboše Jesús jinÿama. Pero ndoñe yontsobena jinÿama, bëtská entšanga causa y cha becuá inamna causa. ⁴ Chcasna, cha betesco natsanoye tojafsanótjajo y canÿe sicomoro betiyeshoye tojánashëngo, chca, Jesús chëjana tojtsachnëjuana ora, jinÿama jobenayama. ⁵ Jesús chë betiyeshoye tojánashjango ora, tsbanánoye tojanontješé y

Zaquéobioye tbojáninýe. As Jesús tbojaniyana: “Betsco chocana matastjango, Zaqueo, er mënté chanjá acbe yebnoye jatema ca.”

⁶ Chora Zaqueo betsco tojtanastjango y chentšana puerte oyejuayá Jesúsbioye tbojanofja. ⁷ Entšanga chca tmojáninýe ora, tmojanontšé Jesusbe contra mëntšá ichámuana: “Jesús tonjá canýe bacna soyënga amabe yebnentše jatema ca.”

⁸ Chora Zaqueo tojantsá, Bëngbe Utabná Jesús bentše, y mëntšá tbojaniyana: —Mouena, atšbe Utabná, atšbe bomna soyënguentsana tsëntsañe ndbomnjémënga chanjátšataye y nda más crocénana tijëftseyëngacá, chë ntsachetšá tijëftsefcama canta soye más chantoyiye ca.

⁹ As Jesús tbojaniyana: —Mënté, aca acbe bacna soyënguentsana atsbocaná contsemna, er Zaqueo, ácnaca Abrahábentšana entšá condmëna. ¹⁰ Er chë Bëngbe Bëtsá Entšá tbojanbemá tojabo chë pochocánënga jtsemnama imojtsajnënga jabétsanguama y jabátsebacama ca.

Chë crocenánama cuento (Mt 25.14-30)

¹¹ Entšanga chë soyënga imojtsuenana, y Jesús inýe soye tojanacuntá jabuátambama, er cha ya Jerusalén béconana yojtsemna, y entšanga imojtsejuabnaye chë Bëngbe Bëtsabe amëndayana ya yochjanóshjango ca.

¹² Jesús tojanéyana: “Canýe luarentša uámana entšá inýe bën luaroye yojá, cachabe luarentša rey chamobemama y chentšana cachábioye jtama. ¹³ Cabá nda ora, chabe bnëtsana oservénënga yojáchembo y bëtscá crocénana cada cánýabioye yojëftsayentšbuachiye, y mëntšá yojëftséyana: ‘Quem crocenánaca trato šmochjábema atše candëtabëntscuana ca.’ ¹⁴ Pero cachabe luarentša entšanga cha imojuáya, as chëngna básefta entšanga imojichamuá chë inýe bën luaroca mëntšá chamuayanama: ‘bënga ndoñe queftsátsboše cha bëngbe rey chaotsemnama ca’.

¹⁵ “Pero pronto chë luarentša rey cha imojábema. Y chë luaroye yojtá orna yojamánda chë crocénana yojëftsayentšbuáchenga chamobéconama, jtsetatšëmbuama ntsachetšá cada ona chë crocenánaca yojongánama. ¹⁶ Chë natsaná yojáshjango y yojayana: ‘Taita, acbe crocénana bnëtsana soye más tonjoboté ca.’ ¹⁷ Y chë rey ibojojuá: ‘Tša tšabá, tšabe oservená. Aca quem base soyiñe ntšamo tchojamandacá tšabá tcojámayeca, bnëtsana pueblentša mandado chacotsemnama cbojayé ca.’ ¹⁸ Chentšana inýa yojáshjango y yojayana: ‘Taita, acbe crocénana shachna soye más tonjoboté ca.’ ¹⁹ Y chë rey ibojauyana: ‘Acnaca shachna pueblentša mandado cochántsemna ca.’

²⁰ “Chorna inýa yojobeconá y mëntšá yojayana: ‘Taita, muentše acbe crocénana entsatsmëna; canýe pañueléjuañe bonguana sëntsejajo. ²¹ Atše acbiama uatjana šonjuábuache, er aca canýe tšátjaye entšá condmëna; aca chë ndoñe condbuajonentšana jocñana y chë ndoñe tconjajé luarentšana jaja saná jobuátbanana ca.’ ²² As chë rey ibojauyana: ‘Bacna oservená, cach acbe palabréngaca chanjínýanýiye aca ndoñe tšabá tconjamama. Atše chë ndoñe sëndbuajonentšana jocñana y chë ndoñe sënjajé luarentšana jobuátbanana tsuamanama icojátatšëmbëse, ²³ ¿ndáyeca ndoñe tconjá chë crocénana bancoca jetsobuájua, y atše camoye matijtabo ora, mašctoyé chë crocénana y chë chentšana tojoboté crocénanënaca ca?’ ²⁴ Y chë chentše imojtsemna entšanga yojáuyana: ‘Chë crocénana motseboca y chë bnëtsana soye más tojabotébioye chana motsatšetá ca.’ ²⁵ As chënga imojojuá: ‘¡Pero cha ya bnëtsana soye más entsebmoma ca!’ ²⁶ Y chë rey yojójuá: ‘Atše cbéyana, nda tojtsebmónábioye, más mochanjátšetaye; pero nda tondaye tondbomnábioye, chë tojtsejuabná batšatema yobomna sóynaca mochantseboca ca. ²⁷ Y chë atše uayayënga, chë chëngbe rey atše chaitsemnama ndoñe monjánbošëngna, moye mënatsé y atšbe delante šmochtsëbaya ca’ ” —cha chora yojayana.

Jesús Jerusalenoye tojánashjango
(Mt 21.1-11; Mc 11.1-11; Jn 12.12-19)

²⁸⁻²⁹ Chca tojéftsanayana chentšana, Jerusalenoye yojétsaye ora, Jesús tojánashjango canye tjashoye, Olivos ca uabáiniñe, Betania y Betfagé pueblënga béconana. Chora, uta chabe uatsjédayata tojanichamó, ³⁰ mëntšá jáuyanëse: “Tsëndatbe natsana entsemna base pueblotémoye motsata. Chašojáshjango ora, canye burrotema utsbuaná sochanjínýena. Chábeñe cabá ndocná tonjenojayé. Sochjuajafjoná y sochjuánatse. ³¹ Y nderado nda ndáyeca šojtsajafjná ca chacmojátjasna, sochjauyana: ‘Bëngbe Utabná bontsájaboto ca.’ ”

³² Chë uatsjédayata tbojána y lempe ntšamo Jesús tojanëyancá tbojáninýena. ³³ Y chë burrotema imojtsajafjná orna, chë burrotema nduiñënga tmojanëyana: —¿Ndáyeca chë burrotema šojtsajafjná ca?

³⁴ Chora chata tbojánayana: —Bëngbe Utabná bontsajabótoyeca ca.

³⁵ Chentšana Jesúsbioye chë burrotema tmojanánatse, y chë burrotémbeñe chatbe entšayá tbojanájatse, y chábeñe Jesús tmojanenjayé. ³⁶ Y cha yojtsachnëjuana ora, entšanga chëngbe entšayá benachëjana imojtsëtëtsatsana.

³⁷ Olivos tjashe tsmanoye yojtsebeconá ora, chë bëtsá entšanga, Jesúsbeñe ošbuáchiyënga, tmojanontsé uayebuáchana y Bëngbe Bëtsá oyejuayënga jëtschuayana, Bëngbe Bëtsabe obenánaca bëts soyënga Jesús tojanmama. ³⁸ Chënga mëntšá imojtsichamo: “¡Corente bendición bomná chaotsemna, chë Bëngbe Utabnabe obenánaca tojabo Rey ca! ¡Celoca tšabá entsemna! ¡Bëngbe Bëtsá matschuanga ca!”

³⁹ Chë entšanguentše básefta fariseunga imojtsemnënga, Jesús tmojanianyana: —Buatëmbayá, acbe ústonënga mëcácana chca ndoñe chamondëtsáyebuachama ca.

⁴⁰ Pero Jesús mëntšá tojanëjua: —Ndegombre cbëyana, mënga iytëca tmojobiamëse, chë ndëtšbënga muanjuayebuáchena ca.

⁴¹ Jesús Jerusalén béconana tojánashjango, y chë bëts pueblo tojáninýe ora, chentša entšangbiama tojánenobošachna. ⁴² Y mëntšá tojánayana: “¡Malaye šmëntsetátšëmbo, nýe mo mënténaca, ndayá yojtseita tšëngaftangbeñe lempe tšabá chaotsomñama! Pero mora chë soye tšëngaftangbe bominyama entsëtëmëna. ⁴³ Er Jerusalenoca bacna tenga echanjóshjango; chora uayayënga chentša shëconánëjana canye tapiëse mochantsepórma, mochantsejëtja y nýetsca juachoicana mochanjontsé tšëngaftanga jtsatsejana, ⁴⁴ y lempe mochantsepochoáca. Muentša oyenënga mochantšëbaye, y ni mo canye ndëtšbé inýebé juatsboca quemochaiseboshjona, chë Bëngbe Bëtsá tšëngaftanga játsebacama tojabo ora, ndoñe chešmatoyeuná causa ca” —Jesús tojánayana.

Jesús, Bëngbe Bëtsabe bëts yebnentšana enënga y obuámnayënga tojtanëbuacna
(Mt 21.12-17; Mc 11.15-19; Jn 2.13-22)

⁴⁵ Chentšana, Bëngbe Bëtsabe bëts yebnoye Jesús tojánamashëngo y tojanontsé chë chentše imojtsenënga chentšana jtëbuacnana, ⁴⁶ y tojanëyana: “Bëngbe Bëtsá chabe uabemana palabrenguiñe tojayana: ‘Atšbe bëts yebna echántsemna átšëftaca encuéntaye yebna ca’, pero tšëngaftangna, atbëbanëngbe oyeñiñe chë yebna šmojtsebema ca.”

⁴⁷ Y cada te, Bëngbe Bëtsabe bëts yebnentše Jesús entšanga yojtsabuátambaye; y bachnangbe amëndayënga, ley abuátambayënga y chë pueblentša mandayëngnaca imojtsenguaye ntšamo jamëse cha jóbana. ⁴⁸ Pero ndoñe tmonjáninýena ntšamo, er nýetsca entšanga corente imojtseyeunana ntšamo cha yojtsoyebuambnacá.

20

Jesusbe obenana
(Mt 21.23-27; Mc 11.27-33)

¹ Canye te, Bëngbe Bëtsabe bëts yebnentše Jesús yojtsabuátambaye, y chë tšabe noticiëngama yojtsabuayiyná ora, tmojánashajna bachnangbe amëndayënga, ley abuátambayënga, judiëngbeñe bëtsëjemëngcá mandayëngaftaca cányiñe; ² y Jesús tmojanianyana: —Sméyana; ¿ndaye deréchoca chë contsama soyënga aca cojtsama ca? o ¿chca jtsamama nda obenana tcmënjatšetá ca?

³ Chora Jesús tojanëjua: —Atšnaca canye soye sëntsebomna tsëngaftanga jatjayama. Smochjojuanga. ⁴ ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga ca?

⁵ Chora chënga tmojanontšé enatsëtsnayana: “ ‘Bëngbe Bëtsá ca’ chamojojuase, cha šochanjáuyana: ‘As ¿ndáyeca chábeñe ndoñe šmonjanošbuaché ca?’ ⁶ Y ndoñe quemuátobena jayanana ‘entšanga ca’; entšanga ndëtsbéngaca buattsëbaye, er nyëtscanga becá mondëjuabná Juan ndegombre Bëngbe Bëtsabe juabna oyebuambnayá yojamnama.” ⁷ Chcasna, chënga tmojanjuá ndoñe monjántatsëmbo nda Juan tbojanichmó entšanga jubáyama ca.

⁸ Y Jesús tojanëyana: —Asna atše cach ndoñe quechchatëyana ndaye deréchoca chca stsama ca.

Chë puerte bacna trabájayëngbiama cuento
(Mt 21.33-44; Mc 12.1-11)

⁹ Chentšana Jesús tojanontšé entšanga jáuyanana, y quem cuéntoca tojanabuatambá: “Canye entšá uvas betiyënga yojáje y chë fshantse inye trabájayënga yojúyentšame, y baytescama bën luaroye yojtsoñe. ¹⁰ Chë uvasëšangá juashacama tempo yojobuache orna, chë jajañe nduiño canye oservená ibojíchmua chë trabájayënga jáuyanama ntsachetšá cha ibojtsotocánama. Pero chëngna cha imojtsejantšetaye, y tondaye ntoyiyá imojtichmuá. ¹¹ Chentšana inya ibojíchmua; pero chë trabájayënga cha imojtsejantšetaye, imojtsóyenguango, y tondaye ntoyiyá imojtichmuá. ¹² Chë nduiño inya ibojatichmuá; pero chánaca chënga imojtsejantšetaye, imojtselísia, y chentšana imojtábocna.

¹³ “Chora chë nduiño yojenyana: ‘¿Y mora ntšamo chjama ca? Cach atšbe bonshana uaquiñá chanjíchmua; nderádose cha aíñe mochanjóyeunaye ca.’ ¹⁴ Pero chë trabájayënga, chë uaquiñá imojinye orna imojenyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe; motsóbanga y nyëtsca chabe otocana soyënga bëngbiama echanjoquéda ca.’ ¹⁵ Chcasna, chë uvas jajañentšana cha imojtsábocna y imojtsóba.”

Chora Jesús tojanatjá: —Y asna, ¿ntšamo šmojtsejuabná, ndayá chë jajañe nduiño chë trabájayëngaftaca yochjama ca? ¹⁶ Cha co echanjá y chë trabájayënga echanjetsëbaye, y chë uvas betiyënga jajañe inye trabájayënga echanjárrendaye ca.

Chë entšanga chca tmojanuena ora, tmojánayana: —¡Bëngaftaca ndocna te chca chaondopasá ca!

¹⁷ Pero Jesús tojanënyanyé y tojánayana: —As ¿ndayama Bëngbe Bëtsabe uabemana palabrenguiñe iuayana?:

Chë yebna jebuanënga tmojtsanaboté ndëtsbé, mora chë más bëts uashacuanëšentše entsejájona ca.

¹⁸ Ndánaca chë ndëtsbeñe chaojotsatšá, chëbé bochántsatcacaye; y chë ndëtsbé ndábeñnaca chaojótsatše, polvëshe bochántsebema ca —Jesús tojánayana.

¹⁹ Chë bachnangbe amëndayënga y ley abuátambayënga tmojanenótatsëmbona Jesús chca tojanacuntá jinyanüyama, chënga mo chë puerte bacna trabájayëngcá imojamnama; asna tmojánbošena cachora jishachana, pero entšangbiama imojtsauatja.

Chë Romoca bëts mandadbiama impuesto jtsatsquëcjnyama
(Mt 22.15-22; Mc 12.13-17)

²⁰ Chentšana chënga báseftanga tmojanichamó, mo ndegombre tšabe entšanga cuaft-semncá chamobiamëse, Jesús jisháchichiyama, nderado ndayá cha tojayaniñe; y chca chënga jobenayama cha jishachana y chëngbe mandádbioye juanatsama. ²¹ As chënga tmojantjá: —Buatëmbayá, bënga fsëntsetatšëmbo ntšamo aca cojtsoyebuambná y cojtsabuatambacá ndegombre tšabá yomnama, ntšamo ndegombre Bëngbe Bëtsá yobošcá, y acbiama tondaye quenatámana nda más uamaná o nduamaná tomnana. Aca con-tsabuatambá ndegombre tšabe vida jtsebomnama, ntšamo Bëngbe Bëtsá yomandacá. ²² Chcasna, šmëyana, ¿tšabá tayojtsemna bënga, César, chë Romoca bëts mandadbiama, impuesto jtsatsquécjnayana o ndoñe ca?

²³ Jesús yojtsetátšëmbo, ntšamo cha tojayaniñe jisháchichiyama chënga imojtsebošama; as tojanëyana: ²⁴ —Chë šmatsquécjná crocénana šminÿinÿenga ca; ¿ndabe jubiá chë crocénaniñe yojtsemna, y ntšamo muentše entsabemancá nda chca iuabaina ca?

Y chënga tmojanjúá: —Césarbe jubiá; cha chca enduabaina ca.

²⁵ Y Jesús tojanëyana: —César šmochtoyiye cha ibotocana soye; y Bëngbe Bëtsana cha ibotocana soye ca.

²⁶ Y chca, chë ichmónënga ndoñe imonjobenaye jisháchichiyana, ndayá cha entšangbe delante tojayaniñe. Masna, ntšamo tojanëjuama, ojanánënga iytëca imojobiama.

Obanënga jtayenama Jesús tmojantjá

(Mt 22.23-33; Mc 12.18-27)

²⁷ Chentšana, báseftanga saduceo ca uabaina entšanga tmojána Jesús jinÿama. Chënga imojanjuabná obanënga ndocna te ntayenana ca. Jesús mëntšá tmojantjá: ²⁸ —Buatëmbayá, Moisés bëngbe leyënguiñe tojëftsanabema, nderado canÿe boyá tojtsóbana y básenga ndoñe tonjëftsabáshejuanësna, canmëna chë uabentsá chë shémaftaca jto-bouamayana, chca, chë chabe uabochená obanabiama básenga jtsabamnama ca. ²⁹ Chcase, canÿe bëngbentše canÿsëfta catšátanga monjamna. Chë natsaná tonjanobouamá y tontsanóbana, básenga ntjëftsabashejuancá; ³⁰ chentšana chë inÿa chë shémaftaca tonjanobouamá, y cachcá tonjanopasá. ³¹ Chë inÿe uabentsá chora cháftaca tonjanobouamá, pero tontsanóbana básenga ntjëftsabashejuancá; y cachcá, chë inÿe uabentséngnaca cháftaca tmonjanobouamá, pero nÿetscanga tmonjanóbana básenga ntjëftsabashejuancá. ³² Cabana, chë shembásanaca tontsanóbana. ³³ Y chcasna, chë obanënga chamojtayena ora, ¿ndabe chë canÿsëfta catšatanguentšabe shema chë shembása yochtsemna, nÿetscanga cháftaca tmojanobouamase ca? —chënga tmojantjá.

³⁴ Chora Jesús tojanëjua: —Quem luarentše boyabásenga y shembásenga mondbétsobouamnaye; ³⁵ pero chë echanjóshjango luaroye jama y obanënguentsana jtayenama merecido jtsebuájonama chamojobenangna, masque boyabásenga o shembásenga, ya ndoñe quemochatóbouamnaye, ³⁶ ni queochátopodena chënga chamóbanama, y chca, chënga mochántsemna mo angelëngcá, y Bëngbe Bëtsabe básenga mochántsemna, obanënguentsana mochtayénayeca. ³⁷ Y Moisésnaca, chë yojtsángbototjuana betiyetémama tojanábementše, bënga šontsinÿanÿná chë obanënga innátayenama; chentše Bëngbe Bëtsá tojánayana cha yomna Abraham, Isaac y Jacobëbe Bëtsá ca. ³⁸ Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entšangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

³⁹ Chora básefta ley abuatambayënga Jesús tmojanianyana: —Buatëmbayá, tšabá tcjayana ca.

⁴⁰ Y ya ndoñe más montsenñémua inÿe soyëngama jatstjanayana.

¿Cristo ndabe entšábentsana yomna?

(Mt 22.41-46; Mc 12.35-37)

⁴¹ Jesús tojanatjá: “¿Ndáyeca tšëngaftanga šmnétsichamo chë Uámana Uabuayaná, chë Cristo, Rey Davídbentsana iuabó ca? ⁴² Er cach David, chabe librëšaňe Salmos ca uabainëšaňe, tojánayana:

Bëngbe Bëtsá, atšbe Utabná Crístbioye tbojanayana:

‘Atšbe catšbioica mótbema,

⁴³ atšbe obenánaca, acbe uayayënga acbe cucuatšíňe chamoquedama chjamëntscuana ca.’

⁴⁴ ¿Ntsámose, Cristo, Davídbentsana nántsemna, cach David ‘Utabná ca’ chábioye tbojtsabobuátmëse ca?” —cha tojanatjá.

Jesús chë ley abuatambayëngbiama tojánayana chënga ndoňe tšabá montsama ca
(Mt 23.1-36; Mc 12.38-40; Lc 11.37-54)

⁴⁵ Njetsca entšanga imojtsuenana, y Jesús chabe uatsjëndayënga tojanëyana:
⁴⁶ “Cuedado šmochtsebomna, y ndoňe šmattsama chë ley abuatambayëngcá; chënga jtsogusetánana bënëna entšayangaca jtsajnana, y jtsebošana tsáshenaňe entšanga becá respétoca chamotsacheuanayama. Chënga chë judiëngbe enefjuana yebnënguenache chë más uámana luarënguiňe jtsetbiámanana, y fiestënguiňe nŷa quëfseroca. ⁴⁷ Pero chë viudángbioye chë tmobomna soyënga jtsabacayana; y entšangbe delante tšabá chacmotsënyama y chënga imojtsaíngñama ndoňe chaondëtsótatšëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá ínŷëngbiama más chënga echanjácastigaye ca” —Jesús tojánayana.

21

Jesús yojtsënyaye chë crocénana quëcjnyënga
(Mc 12.41-44)

¹ Bëngbe Bëtsabe bëts yebnentše, Jesús yojtsënyaye chë bomnënga crocénana jtse-quëcjnyayana chë crocénana quëcjnyëtémiňe; ² y canŷe viudá ndbomnjëmnaca tbojáninŷe, uta crocénana chëtémiňe yojaftsesegóra. ³ Chora Jesús tojánayana: “Ndegombre cbëyana, quem viudá ndbomnjëma, Bëngbe Bëtsabiama njetscangbiama más becá tonjëftsesegorá; ⁴ er njetscanga tmonjëftsesegorá chë yojtsóyentsjamentšana, pero chana, masque tša ndbomnjëma, cha vida jtsebmomna lempe ntsachetšá yobomncá tonjëftsesegorá ca.”

Jesús tojánayana Bëngbe Bëtsabe bëts yebna lempe mochjápochocama
(Mt 24.1-2; Mc 13.1-2)

⁵ Báseftanga imojtsichamo chë Bëngbe Bëtsabe bëts yebnama, tša yojtsebotamanana puerte uámana ndëtsbéngaca y chë entšanga imojanamana juambana Bëngbe Bëtsábioye uátšëmbona soyëngaca ca. As Jesús tojánayana: ⁶ —Canŷe tempo echanjóshjango, y lempe ntsamo mora muentše šmontsonŷacá tondaye queochatoquéda, ni mo canŷe ndëtsbé inŷebé juatsboye. Lempe mochantseepochóca ca.

Ntsamo yochtsemna quem luare jopochóca te chaojtsobeco ora
(Mt 24.3-28; Mc 13.3-23)

⁷ Chora chënga tmojantjá: —Buatëmbayá, ¿ntseco chca yochjopása? ¿Y ndayá Bëngbe Bëtsá yochjama, chca jopásama yojtsobecuama entšanga chamotsetatšëmbuama ca?

⁸ Y Jesús tojánayana: —Cuedado šmochtsebomna ndocná chacmondáingñema. Er banga mochanjabo y mochantsabíchamo chënga atše imomna ca. Mochántsi chamo: “Atše chë Cristo sëndmëna”, y “Mora chë tempo entsemna ca”. Pero ndoňe šmatjóyaunaye.

⁹ Y tšëngaftanga, entšanga imojtsentsjanama y entšanga mandadëngbe contra imojtsemnama chašmojtsuenana ora, ndoňe šmattsauatja, er entseyta natsana chë soyënga chaochnëngo; pero masque chca, chë quem luare jopochóca tempo cabá ndoňe queochátsmëna ca.

¹⁰ Y mëntsánaca Jesús tojanëyana: “Canŷe luarentša entšanga, inŷe luaroca entšángaftaca mochántsejtsjanaye; y canŷe amëndayábentša entšanga, inŷe amëndayábioa

entsangaftácnaca. ¹¹ Ba luarënguifne jabuache echanjuangmëmana, bëts shëntsana, y entsanga pochócaye šocanënga echanjóshjango; y celoca echántsemna puerte uabouana soyënga y bëts soyënga, entsanga jinÿanÿiyama quem luare ya yochtopochócama.

¹² “Pero cabá ndoñe chca chaondochnëngo ora, tsëngaftanga cmochanjíshëche y chašmosufrima mochántsama; bënga judiëngbe enefjuana yebnëngoye cmochanjunatse játssetšenama y cárceloynaca cmochanjáutame, y reyënga y mandadëngbióynaca cmochanjunatse, atšbe ústonënga bëtsemna causa. ¹³ Chca šmochanjapása, ntšamo atšbiama šmotatšëmbcá chënga chašmëyanama. ¹⁴ Natsana ndoñe šmatjátsjuabnaye jenëuyanama ntšamo chora jóyebuambayana, ¹⁵ er atše chanjama puerte tsabá y osertanánaca tsëngaftanga chašmóyebuambama; y chca, tsëngaftangbe uayayënga ndoñe quemochatobenaye jayanana ndoñe tsabá šmontsichamo ca, y ndocá jojuama quemochatobenaye. ¹⁶ Pero uayayëngbe cucuatšifne cmochanjábashejuana cach tsëngaftangbe bëtsëtsanga, catšátanga, pamíllanga y amiguënga; y tsëngaftanguentsana báseftanga cmochantsëbaye. ¹⁷ Y nÿetsca entsanga cmochantsëbuayënja, atšbe ústonënga bëtsemna causa. ¹⁸ Pero tsëngaftangbe bestšašentsana ni mo canÿe stjënëja quecmochátabajajo. ¹⁹ Tsëngaftanga nÿets tempo átšbeñe ošbuáchiyënga chašmojtsemnëse, chë nÿetsca tescama yomna tsabe vida šmochántsebomna ca.

²⁰ “Jerusalén nÿets shëconana soldadënga chašmojanÿe ora, šmochtsetátšëmbo Jerusalén jopochócama tojobuáchama. ²¹ Chorna, chë Judeoca oyenënga batsjabengoye chamotsacheta; Jerusalenentše chamojtsemnënga, chentsana chamuaisebocana; y chë jajenache chamojtsemnëngna, Jerusalenoye ndoñe chamondésamashjna. ²² Er chora echántsemna chë entsangbe jabuache castigo; lempe ntšamo Bëngbe Bëtsabe uabemana palabrenguiñe endayancá chora echanjochnëngo. ²³ ¡Tša lastema chë tempo shembásenga ngomámanëngbiamia o ochóchaye básenga chamojtsabamnëngbiamia! Er chora corente ngmënanana quem luarentše echántsemna, y quem luarentša entsangbiamia chë uabouana castigo. ²⁴ Inÿenga espadëjaca mochanjóbana, y inÿengbiyoye nÿetsca luarënguëjana utámenënga mochanjunatse; y chë ndoñe judiëngna, Jerusalenoca entsangbiyoye mochántsatsejaye y mochantsëbaye, chca chaotsemnama Bëngbe Bëtsá tojalesenciantscuana ca” —Jesús tojánayana.

*Bëngbe Bëtsá Entsá tbojanbemá quem luaroye echanjésabo
(Mt 24.29-35, 42-44; Mc 13.24-37)*

²⁵ Mëntsánaca Jesús tojánayana: “Chora bëts soyënga echantsinÿna shinÿiñe, juashconifne y estrellënguifne; y quem luarentša entsanga tša mochántsauatja, ndayá jamama ntsetatšëmbcá, chë mar béjaye y olëshënga corente echantsefshauenana causa. ²⁶ Entsanga echantsabuatëcja tša auatja causa y ndayá quem luariñe yochjopásama enócochinÿena causa; er chë quem luarentša tsbanánoca espíritënga obenana bomnënga echanjángmëmana. ²⁷ Y chora entsanga mochanjinÿe, chë Bëngbe Bëtsá Entsá tbojanbemá jantsetëshiñe echántsaboye, puerte obenánaca y corente buashinÿinÿaniñe. ²⁸ Chë soyënga jochnënguama chaojobojatšé ora, añemo šmochjentsëtayey y bestšaše játsbanase šmochjarrepára, er chora echántsemna chë tsëngaftangbe atsebacayana ca” —Jesús tojánayana.

²⁹ Mëntsánaca Jesús tojanëyana jabuátambama: “Smochjinÿe canÿe higo betiye o ndaye inÿe betiÿnaca. ³⁰ Tojtsaisëjotsanama šmojinÿe ora, jtsetatšëmbuana chë tsabe tempo ya yojtsaisobecuama. ³¹ Cachcá, chë soyënga yojtsëchnëjuanama chašmojinÿe ora, šmochtsetátšëmbo chë Bëngbe Bëtsabe amëndayana ya yojtsobecuama.

³² “Ndegombre cbëyana, lempe chca echanjochnëngo, morsca entsanga cabá ndóbana ora. ³³ Celoca y quem luare echanjopochóca, pero atšbe palabra ndocna te queochaisopochóca.

34-35 “Cuedado šmochtsebomna y ndoñe šmatjaleséncia tšëngaftangbe ainana bacna juabnëngaca chaotsemnama, jenomándama ntsobencá mocá enobuena causa, tmoye causa y nye quem luarentša soyëngama enócochinÿena causa; y tšëngaftanga prontánënga šmochtsemna, nye ndeolpe chë te chaojobuache ora; y tšëngaftanga ndëprontánënga ndoñe chašmondëtsemna, mo tšëngaftangbiama canÿe uachmaniñe cuaftsemncá. Er nyetsca quem luarentša entsangbiama chca echántsemna. 36 Cuedado šmochtsebomna y yejuana šmochtsantješna; nye ntseco órnaca Bëngbe Bëtsáftaca šmochtsencuéntaye, chca, chë echanjopása soyëngama jótsbocama chašmobenama, y chë Bëngbe Bëtsá Entšá tbojanbemabe delante jashjanguama ca” —Jesús tojanëyana.

37 Jesús, bnëtë Bëngbe Bëtsabe bëts yebnentše yojánabuatambaye, y ibetna, Olivos uabaina tjashoye yojánaye joquédama. 38 Y nyetsca entsanga cabá cachëse Bëngbe Bëtsabe bëts yebnoye imojánajna Jesús joyeunayama.

22

Entšanga tmojanjuabó ntšamo jamëse Jesúsbiöye jishachama
(Mt 26.1-5, 14-16; Mc 14.1-2, 10-11; Jn 11.45-53)

1 Ya yojétsobeco Bashco fiesta, chë levadúraca ndëpormana tandëse saye fiesta, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama. 2 Chë bachnangbe amëndayënga y ley abuátambayënga imojtsenguaye ntšamo jamëse Jesús jóbana, pero entsangbiama imojtsauatja.

3 Chora Satanás, Judas chë Iscariote ca uabobuatmabe ainaniñe bacna juabnënga tojanjajó. Chánaca yojamna chë bnëtsana uta uatsjendayënguentšá; 4 y tojána, chë bachnangbe amëndayënga y Bëngbe Bëtsabe bëts yebnoca soldadëngbe amëndayëngaftaca jencuéntama, ntšamo Jesús chëngbe cucuatšine jayentšbáshejuanama. 5 As chënga imojóyejuaye, y Judas tmojanšbuachená crocénana chama jtatšetayana. 6 Y Júdasna aiñe ca tojánayana; y cach orscana cha yojtsenguaye ntšamo jamana y ndëmua ora Jesús chëngbiöye jayentšbáshejuanama, ndocna entsanga ora.

Jesús chabe uatsjëndayëngaftaca Bashco saná tojanse
(Mt 26.17-29; Mc 14.12-25; Jn 13.21-30; 1 Co 11.23-26)

7 Chë Bashco fiesta ora tojanóshjango, chë levadúraca ndëpormana tandëse sayté; chë te yojamna, Bëngbe Bëtsá jëtschuayamna canÿe oveshá jóbana chora jasama. 8 As Jesús, Pedro y Juánbiöye tojanëyana: —Motsata y saná šochjaprónta Bashco fiestama bënga mochjasama ca.

9 Chora chata tbojantjá: —¿Ndëmoca cojtseboše chë saná fchjapróntama ca?

10 Y Jesús tojanëjua: —Jerusalenentše chašojámashëngo ora, canÿe bacó cmochanjóbiatše, matbajiñe búyeshe echantsabayambaye. Cha šochjuasto, y šochtsonÿaye ndëmuanÿe yebnentše cha yochjámashënguama; 11 y chentša nduiño šochjauyana: “Chë Buatëmbayá šonjichamó aca jauyanama: ‘¿Ndayentše chë tsañe yojtsemna, Bashco saná atše atšbe uatsjëndayëngaftaca jasama ca?’ ” 12 As cha cmochanjínÿanÿiye canÿe bëts tsañe, tsbanana pisoca; ya lempe echántseprontana, y chentše, Bashco fiestama saná šochjaprónta ca.

13 As chë útata tbojána, y tbojáninÿena lempe ntšamo Jesús tojanëyancá, y chentše chë Bashco saná tbojanprontata.

14 Jasama tojanobuache ora, Jesús mesëshentše tojanótbema chabe uatsjëndayëngaftaca, chë cachënga más chcoye chabe ichmónënga ca uabáinënga. 15 Chora Jesús tojanëyana: “Tša sëndánboše quem Bashco saná tšëngaftangaftaca jasama, atše cabá ndoñe chandësufri ora. 16 Muentšana ndoñe más quemëntša saná quicháisesse, Bëngbe Bëtsabe amëndayana candóshjanguëntscuana. Chora echantsótatšëmbo ntšamo quem fiesta ndegombre iuayancá ca.”

¹⁷ Chorna canye coptema vínoyeca tojanaca, Bëngbe Bëtsábioye tbojtanchuá y mëntśá tojánayana: “Quem coptema vínoye menáfšenga; y cbëyana, ¹⁸ chë uvas betiyentśa shajuanentśana obocniye ndoñe más quichaisofšiye, Bëngbe Bëtsabe amëndayana candóshjanguëntscuana ca.”

¹⁹ Chentśana, tandëse tojanca y Bëngbe Bëtsábioye tbojtanchuá; tojanjatá, tojanatśatá y mëntśá tojánayana: “Quem soye, atśbe cuerpo entsemna, y chanjóbana tšëngaftangbe tšabiama. Ntśamo mora bënga montsamcá šmochtsama, atśbiama jtenójuaboyama ca.”

²⁰ Tmojansentśana, chë coptémaca tojanma cachcá ntśamo chë tandëseca tojanmcá y mëntśá tojánayana: “Quem coptema vínoye entsemna chë Bëngbe Bëtsabe tšëmtrato entśangftaca. Atśbe buiñe echanjuábuashana, tšëngaftanga chašmotsetatśëmbuama ntśamo Bëngbe Bëtsá entśanga tojanašebuachenacá ndegombre yochjochnënguama. Chë buiñe tšëngaftangbe tšabiama echanjuábuashana. ²¹ Pero chë uayayëngbe cucuatśiñe šochjaboshjoná, mesëshentśe átśeftaca entsemna. ²² Ndegombre, chë Bëngbe Bëtsá Entśá tbojanbemáftaca echanjopása, ntśamo Bëngbe Bëtsá chabiama tojanjuabocá. ¡Pero tśa lastema chë bochjáboshjonabiama ca!” —Jesús tojánayana.

²³ Chorna chë uatsjëndayënga tmojanontśé entjanayana, chënguentsá nda chë boshjuaná bëtsemnana.

Nda chë más uamaná yomna

²⁴ Chë uatsjëndayënga imojtsenatsëtsnaye chënguentsá nda chë más uamaná bëtsemnana. ²⁵ As Jesús tojanéyana: “Chë ndoñe judiëngbeñe, chë reyënga chëngbe entśangbioye nÿe ntśámnaca jtsamëndayana, y chentśa amëndayënga jtsamana, entśanga chëngbioye tśabe soye amënga ca chamotsëboboátmama. ²⁶ Pero tšëngaftangbeñe ndoñe chca chaondëtsemna; chamna, tšëngaftangbeñe chë más uamaná mo chë más basacá chaóbema, y chë mandayá mo chë oservenacá. ²⁷ Er, ¿ndase chë más uamaná yomna, chë mesëshentśe jasama tojotbemá o chë uajuatśnayá? Ndegombre co chë mesëshentśe tojotbemá; pero atśna tšëngaftangbeñe sëntsemna mo chë oservenacá.

²⁸ “Atśbe padecëniñe tšëngaftanga sempre átśeftaca šmondëtsemna. ²⁹ Chíyeca, atśbe bariëna, canye amëndayana chochanjatsataye, ntśamo atśbe taitá canye amëndayana šojatśtacá; ³⁰ chca, atśbe amëndayoca mesëshentśe átśeftaca šmochanjase y šmochanjofšiye, y uámana tbemaniñe mo reyëngcá šmochanjotbiama, chë Israeloca bnëtsana uta pamíllanga entśangbiama chašmuayanama tśabá o ndoñe tśabá chënga tmonjamama ca” —Jesús tojánayana.

Jesús tojánayana, chábioye ndoñe bonjanabuátma ca Pedro yochjánayanama (Mt 26.31-35; Mc 14.27-31; Jn 13.36-38)

³¹ Jesús mëntśánaca tojánayana: —Simón, Simón; cochtsetátśëmbo, Satanás obenana tonjotjañe tšëngaftangftaca nÿe ntśámnaca jamama, mo chë trigo matënga tcojtsashatiyeynacá; ³² pero atśna Bëngbe Bëtsá sënjaimpadá, átśbeñe ošbuáchiyana ndoñe chacmondëtsebuáshbenama. Y aca, nÿets ošbuáchiyana átśbeñe chacojtsatsbomna ora, chë inÿe ošbuáchiyënga cochjújabuache átśbeñe sempre chamotsošbuáchema ca.

³³ Chora Simón tbojanayana: —Bëngbe Utabná, atśe sëntseprontana ácaftaca cárceloye jámnaca y jobanámnaca ca.

³⁴ Y Jesús tbojanayana: —Pedro, atśe cbëyana, cam ibeta bínÿanoye, ngallo cabá ndécánta ora, aca unga soye cochanjayana ndoñe šconduabuátma ca.

Chë más jabuache ora yojtsobeco

³⁵ Chentśana Jesús tojanatjá: —¿Chë ni shecnájaca, ni crocenánaca, ni shecchëtjonësheca tcbonjanichamó ora, nderado ndayá tcmojanabuáshebena ca?

Y chënga tmojanjuá: —Tondaye ca.

³⁶ Chora tojanéyana: —Mora ndoñe chca; shecnaja tobomná, chëja chauesocñe y crocenánama shecnébénaca; y nda ndoñe espadëja tondbomna, chabe quëfsáiya chaotsatábuiye y canye espadëja chauatobuámiñe. ³⁷ Er cbéyana, entseyta átseftaca chaopasá, ntšamo Bëngbe Bëtsabe uabemana palabrënguiñe atšbiamá iuayancá, mëntšá: “Y chábioye tmonjáninye mo chë puerte bacna soye amënguentsá canya cuaftsemncá ca.” Y lempe ntšamo atšbiamá iuabemancá, mora ya echanjochnëngo ca —Jesús tojanéyana.

³⁸ As chënga tmojanianya: —Bëngbe Utabná, muentše uta espadëja entsemna ca.

Y japochócamna cha tojánayana: —Nye nyetsá ponto ca.

Getsemaní luarentše, Jesús Bëngbe Bëtsáftaca tbojanencuentá
(Mt 26.36-46; Mc 14.32-42)

³⁹ Chentšana, Jesús tojánbocna y ntšamo yojanamancá Olivos tjashoye tojána, y chabe uatsjëndayënga tmojanasto. ⁴⁰ Choca tmojánashjajna ora, Jesús tojanéyana: “Bëngbe Bëtsá moimpadanga, bacna soye jamama ndoñe chacmondócochënguama ca.”

⁴¹ Y chë uatsjëndayëngbentsana yojoluára, mo canye ndëtsbé jutsenëntscoca nyetsá, y yojoshëntsamentsiye Bëngbe Bëtsáftaca jencuëntama. ⁴² Jesús mëntšá tojánayana: “Taita, aca tcojtsebošëse, moma atše ndoñe chašondëtsemna chca jasúfriana. Pero ntšamo atše stsebošcá ndoñe chaondëtsemna, sinó ntšamo aca cojtsebošcá ca.”

⁴³ Chca orna celocana canye ángel tbojánëbëbocna, añemo chaotsebomnama juajabuáchama. ⁴⁴ Jesús tša ngmëniñe yojtsemna, y Bëngbe Bëtsáftaca más ibojtsencuëntaye. Y chabe bosese yojtsemna mo fshantsiñe buiñe cuaftsebuastëtjuancá.

⁴⁵ Bëngbe Bëtsáftaca jencuëntama tojanpochocá ora, tojtantsbaná y chabe uatsjëndayënga imojtsemnoye tojána; y chënga imnëtsomañe, tša ngmënaca imojtsemna causa. ⁴⁶ Chora tojanéyana: “¿Ndáyeca šmotsomañe? Motsbananga y Bëngbe Bëtsá šmochtseimpadana, bacna soye jamama ndoñe chacmondócochënguama ca.”

Uayayënga Jesús tmojánishache
(Mt 26.47-56; Mc 14.43-50; Jn 18.2-11)

⁴⁷ Jesús cabá yojtsóyebuambnantscuana, ba entsanga chentše tmojánashjajna. Chë Judas ca uabainá, canya chë bnëtsana uta uatsjëndayënguentsá, chë entsangbe natsana yojtsaye. Cha yojobeconá Jesús juamóchama; ⁴⁸ pero Jesús tbojanianya: “Judas, ¿canye juamochëse chë Bëngbe Bëtsá Entšá tbojanbemá uayayëngbe cucuatšinë cochjaboshjona ca?”

⁴⁹ Chë Jesúseftaca imojtsemnënga tmojáninye ntšamo chora yochjanopásama; as tmojanianya: —Bëngbe Utabná, ¿espadëjaca fšcotsatsejaye ca?

⁵⁰ Y canya chënguentsá, chë bachnangbe más uámana amëndayabe bochichnayábioye catšbioica matscuaše tbojtsantëtše, y tbojtsanëštjango. ⁵¹ Chora Jesús tojanéyana: —Cachcá monyá; nye nyetsá ponto ca.

Y chë bochichnayábioye chë matscuaše tbojánbojajo y tbojanshná. ⁵² Chentšana, chë bachnangbe amëndayënga, chë Bëngbe Bëtsabe bëts yebnentša soldadëngbe amëndayënga y chë judiëngbeñe bëtsëjemëngcá amëndayënga, chë cha juanatsama tmojánabënga, Jesús tojanéyana: “¿Ndáyeca espadëjangaca y ngarotbéngaca šmojabo atše jishachama, mo atše canye bacá uamana entsá cuaftsemncá ca? ⁵³ Atše cada te tšëngaftangaftaca sënjamna Bëngbe Bëtsabe bëts yebnentše, y ni chešmátanbojajo. Pero ora tocjobuache tšëngaftanga chca chašmomama, y Satanás ntšamo yojtsebošcá tšëngaftangbeñe echantsemándaye ca” —Jesús tojanéyana.

Pedro tojánayana Jesúsbioye ndoñe bonjanabuátma ca
(Mt 26.57-58, 69-75; Mc 14.53-54, 66-72; Jn 18.12-18, 25-27)

⁵⁴ Chentšana Jesús tmojánishache, y chë bachnangbe más uámana amëndayabe yebnoye tmojanánatse. Y Pedro bënëcana ibojtsëstona. ⁵⁵ Choca, chashja tsëntsaca, canye ñeshe tmojanangbotjó y entsanga chë shëconana imojtsetbiámana; y Pédrënaca

chentše chëngaftaca yojótbema. ⁵⁶ Chora, canye shembása chentša oservená, Pédrëbioye tbojáninýe chë ñe juachaca yojtsetbemana; tbojanonýinýe y tojánayana: —Muánaca cháftaca endánmëna ca.

⁵⁷ Pero Pedro ndoñe ca tojánayana, y chë shembásabioye mëntsá tbojaniyana: —Sobrená, atše cha ndoñe quetsatabuatma ca.

⁵⁸ Ndoñe yapa bën y inya chábioye tbojataninýe y tbojaniyana: —Acnaca chë uatsjendayënguentsá condmëna ca.

Pero Pedro tbojanjúá: —Bacó, atše ndoñe quetsátsmëna ca.

⁵⁹ Chentša benëntscosna, inya más yojátayana: —Ndegombre, muánaca cháftaca enjánana; muánaca Galileocá entsemna ca.

⁶⁰ Y Pedro tojánayana: —Bacó, ndayama cojtsichámuama ndoñe quetsátstatsëmbo ca.

Cachora, y Pedro cabá yojtsóyebuambnantscuana, canye ngallo yojacánta. ⁶¹ Chora Bëngbe Utabná yojobuértana y Pédrëbioye tbojanonýinýe; y Pedro chora yojenójuaboye ntšamo Bëngbe Utabná tbojaniyanama: “Cam íbeta bínýanoye, ngallo cabá ndécánta ora, aca unga soye cochanjayana ndoñe šconduabuatma ca.” ⁶² As Pedro shjoye tojánbocna, y corente ngmënaca yojtsenóbošachna.

Jesús imojtsáboyejuana
(Mt 26.67-68; Mc 14.65)

⁶³ Chë Jesús imojtsebojanýá entsanga cha imojtsáboyejuana y imojtsejantšetaye; ⁶⁴ y jtsabuchëntsacjuase, imojtsetjanaye: “¡Momalisiá, nda tcmënjajantšetá ca!” ⁶⁵ Y imojtsóyenguaye, nýe mocá soyënga jtsatsëtsnayëse.

Jesús, chë judiëngbe uámana mándayëngbe delante
(Mt 26.59-66; Mc 14.55-64; Jn 18.19-24)

⁶⁶ Tojanbinýna ora, chë bëtsëjemëngcá amëndayënga, bachnangbe amëndayënga y ley abuátambayënga tmojánenefjna, y chëngbioye Jesús tmojanánatse. Choca tmojantjá: ⁶⁷ —Smëyana, ¿aca Bëngbe Bëtsabe Uámana Uabuayaná, chë Cristo comna ca?

Y Jesús tojanëjua: —Aíñe ca tchojáuyanëse, tšëngaftanga chama átšbeñe ndoñe quešmochatošbuáchiye. ⁶⁸ Y nderado tchojájtasna, tšëngaftanga ndoñe quešmochatojúá ca. ⁶⁹ Pero cam orscana, chë Bëngbe Bëtsá Èntsá tbojanbemá, chë Bëngbe Bëtsá nýets obenana bomnabe catsbioica echántsatsbemana ca.

⁷⁰ Chora nýetscanga tmojantjá: —¿As, aca chë Bëngbe Bëtsabe Uaquiñá comna ca?

Y Jesús tojanëjua: —Cach tšëngaftanga chca šmontsichamo; atše cha sëndmëna ca.

⁷¹ As chora chënga tmojánayana: —¿Ndayama más entsanga šochjátëjabeto Jesusbe contra chamuayanama? Er cach bënga chabe uayásentsana chca tmonjouena ca.

23

Jesús, Pilatbe delante
(Mt 27.1-2, 11-14; Mc 15.1-5; Jn 18.28-38)

¹ Nýetsca mándayënga tmojëftsantsbaná, y Pilátbioye, chë Judeoca mandádbioye Jesús tmojanánatse. ² Y chentše tmojanontsé cha mal jaquédana, mëntsá: —Bënga fsënjínýena mua entsabuatambá bacna soyënga, quem luarentša entsangbe amëndayëngbioye ndëtsayaunanama. Cha entsichamo bënga ndoñe šontsamna Césarbiama impuesto jtsat-squëcñayana ca; y entsichamo cha yomna chë Cristo, chë Bëngbe Bëtsabe Uámana Uabuayaná, mo canye reycá ca.

³ Chora Pilato Jesúsbioye mëntsá tbojantjá: —¿Aca chë judiëngbe Rey cojtsemna ca?

Y Jesús tbojanjúá: —Aíñe, aca ndegombre yomncá tcjayana ca.

⁴ As Pilato, chë bachnangbe amëndayënga y entsanga tojanëyana: —Atše ni mo canye soye chiyátinýena, quem boyabása castiganá chaotsemnama jayanama ca.

⁵ Pero chënga más tmojanáye buachena: —Nýets Israel luarëjana entsabuatambá, Galilea entsangbe amëndayëngbe contra jtsemnana. Galilea luaroca chca tonjabojatšé y mora moca Judeócnaca cachcá entsama ca.

Jesús Rey Heródesbe delante

⁶ As Pilato, Galilea luarama yojouena ora, tojanatjá Jesús Galileocá tajojamnana. ⁷ Y Jesús aíñe Galileoca yojamnana cha tojántatšëmbona ora, Rey Heródesbioye cha tbojanichmó. Herodes inamna Galileoca mandado y chora Jerusalenentše cha yojtsemna. ⁸ Herodes Jesúsbioye tbojáninýe ora, corente tojanoyejuá. Chana tempscana inaboše Jesús jinýama. Cha ba soyënga Jesusbiamna tojanuena, y yojtseboše jinýama Jesús jamana canýe bëts soye, Bëngbe Bëtsabe obenánaca. ⁹ Heródesna ba soyënga tbojantjá, pero cha ndocá tbonjanjuá. ¹⁰ Y chéntšnaca, chë bachnangbe amëndayënga y judiëngbe ley abuatambayënga imojtsemna, y Jesús corente mal imojtsequédaye.

¹¹ Chora, Herodes y chabe soldadënga Jesúsbioye corente imojtsáboyënja, y jtsaboyejuanamna, botamana entšayangá tmojanichëtjo, mo canýe reycá; chentšana cachiñe Pilátbioye tmojesanichmó. ¹² Cach te Herodes y Pilato tbojtanenatsëtsaye; tempna chata ibojenáyata.

Jesusbiamna chaóvana ca tmojánayana

(Mt 27.15-26; Mc 15.6-15; Jn 18.39-19.16)

¹³ Chentšana Pilato, chë bachnangbe amëndayënga, chë pueblentša amëndayënga y nýetsca entšanga tojánachembo, ¹⁴ y mëntšá tojanëyana: —Tšëngaftanga quem entšá átšbioye šmojuánatse, mo bacna soye entšángbeñe abuatambayacá, mandadënga ndëtsayaunanama ca; tšëngaftangbe delante lempe sënjatjá, tšëngaftanga ba soyënga muabiamna šmonjayana, pero atšna ni mo canýe soye chiyátinýena, quem boyabása castiganá jtsemnana ibojtsemna ca jayanama. ¹⁵ Herodes cach ndoñe, chíyeca cachiñe bëngbioye cha tbojesichmó. Quem boyabása ni mo canýe ndoñe tonjobuachjanguá jóbanama chabotsemnana. ¹⁶ Chcasna, jabuache chamotsecastigá y chentšana chanjëtšboshjona ca —cha tojánayana.

¹⁷ Yojamna canýe utamená jëtšboshjonana, ntšamo Bashco fiesta ora jamana imojanamancá. ¹⁸ Pero chora entšanga cánýiñe tmojanáye buachena: —¡Jesús chaóvana! ¡Barrabás matsboshjona ca!

¹⁹ Barrabás inautámena, mandadëngbioye ndëtsayaunanama chë bëts pueblentše entšanga tojánenautanama y entšá óbanaye causa. ²⁰ Pilato cachiñe tojánayana Jesúsbioye jëtšboshjonama yojtsanboše ca; ²¹ pero entšangna más tmojtétanayebuachena: —¡Motsecrucificá! ¡Motsecrucificá ca!

²² Pilato ya unga soyama tojtétanayana: —¿Ntšamo bacna soye mua tojobuachjanguá ca? Ni mo canýe bacna soye chiyátinýena, mua jóbanama chabotsemnana. Chcasna, chanjacastíga y chora chanjëtšboshjona ca.

²³ Pero chëngna más imojtsechembumbuana Jesús chamotsecrucificama. Cabana, chë bachnangbe amëndayënga y chë entsangbe jabuache chembumbuanánaca, Pilato tmojanëyëñaná Jesús chamóbama. ²⁴ As Pilato tojanmandá ntšamo chë entšanga imojtsotjanañcá chaotsemnana; ²⁵ as chora Pilato, Barrabásbioye cachcá tbojtanboshjona, chë nda inautámena mandadëngbioye ndëtsayaunanama entšángbioye tojánenautanama y entšá óbanaye causa. Y Jesusna entsangbe cucuatšinë tbojánboshjona, ntšamo chënga tmojtsebošcá chamomama.

Jesús tmojan crucificá

(Mt 27.32-44; Mc 15.21-32; Jn 19.17-27)

²⁶ As jacrucificama Jesús tmojanánatse. Chora jajocana inátaboye canye boyabása, Simón ca uabainá, Cirene luarocá; y cha Jesusbe cruz tmojancutsá, Jesusbe ústonoye chaotsambama.

²⁷ Y banga chë pueblentsa entsanga imojtséstona; y chë shembásenga imojtsëstonëngna imojtsayošachiye y ngménaca imojtsanioye, Jesús chca yojtsepásama. ²⁸ As Jesús chëngbioye tojanobuértana y tojanéyana: “Jerusalenentsa shembásenga, atšbiamana ndoñe matošachena; cach tšëngaftangbiamana y tšëngaftangbe básengbiamana šmochjenóbošachna. ²⁹ Canye te echanjóshjango y chë te šmochántsihamo: ‘Tša tšabá chë shembásenga šešona ndbomnëngbiamana, chë quem luaroye šešonga ndoñe tmonjëftséshejajnëngbiamana, y chë šešonga ndoñe tmonjëftsabachengbiamana ca.’ ³⁰ Chora entsanga jetsóitanama mochántseboše y mochanjontsé ichámuana: ‘¡Tjashënga šmotsëtebuantsá y batsjabenga šmotsaitame ca!’ ³¹ Atše, chë ndocna bacna soye amá, chíyeca puerte obená, chca šmojaborlase, ¿ntšamo mochjama chë ndegombre bacna soye amëngaftaca, chíyeca ndobenënga? O mëntsá, ¿chë nguëfshna betíyeca chca tmojtsamëse, ntšamo chë tojtsebuashá betíyeca mochjama ca?’ —cha tojanéyana.

³² Jesúseftaca cruciñe jóbanama, útata bëts bacna soyënga ochjajnayátnaca imojtsënachaye. ³³ Chë “Obanabe Bestšashe ca” uabaina luaroye tmojánashajna ora, Jesús tmojancrucificá y chë bëts bacna soyënga ochjajnayátnaca, canya chabe catšbioica y chë ínÿana chabe uañicuayoica. ³⁴ Chora Jesús mëntsá tojánayana: “Taita, mëngbe bacna soye motsaperdónaye, er ntšamo montsamama chënga ndoñe quemátstatsëmbo ca.”

Chë soldadënga Jesusbe entsayamna, tsbanánoye tmojanétsena, chënga jtenájatayama. ³⁵ Entšanga chentše imojtsemnënga chca imojtsonÿaye, y chë pueblentsa mandayëngnaca Jesús imojtsáboyejuana y mëntsá imojtsenatsëtsnaye: “Inÿëngna aíñe tojëftsatsëbacá; mora cachá chauentsbocá, cha ndegombre Cristo, chë Bëngbe Bëtsabe Uámana Uabuayaná tomnëse ca.”

³⁶ Soldadëngnaca Jesús imojtsáboyejuana; tmojanobeconá y untja vínoye imojtsefsësnaye, ³⁷ y mëntsá imojtsatsaye: “¡Chë judiëngbe Rey tcomnësna, cach aca mentsbocá ca!”

³⁸ Jesusbe bestšaše juatsboicna canye uabemana soye tmojananjo; chiñe mëntsá yojtsanábemana: MUA CHË JUDIËNGBE REY ENDMËNA ca.

³⁹ Canye bëts bacna soyënga ochjajnayá yojtsecrucificaná, Jesúsbioye mëntsá tbojanóyenguango: —Chë Bëngbe Bëtsabe Uámana Uabuayaná tcomnësna, mentsbocá y bëndátnaca šmatsebocá ca.

⁴⁰ Pero chë inÿe bëts bacna soyënga ochjajnayana mëntsá tbojanácacana: —¿Ni mo Bëngbe Bëtsá ndoñe condërrespetana? Bëndátnaca bontsamna chacá jóbanama.

⁴¹ Ndegombre bëndata muentše bontsemna bëts bacna soyënga ochjajnayana causa, y chíyeca chca jasúfriama bontsamna. Pero quem boyabása ni mo canye bacna soye ndoñe tonjobuachjanguá ca.

⁴² Y chorna, quem bëts bacna soyënga ochjajnayá Jesúsbioye tbojanianyana: —Jesús, atšbiamana cochtenójuaboye aca reycá jabomándama chacojtabo ora ca.

⁴³ Y Jesús tbojanjuá: —Ndegombre chëyana, mënté átseftaca celoca, chë nÿetscanga oyejuayënga mondbetsemnoca, aca cochantsatsmëna ca.

Jesús tojanóbana

(Mt 27.45-56; Mc 15.33-41; Jn 19.28-30)

⁴⁴ Nÿetsto orscana las tresëntscoñe nÿets quem luare yojtseibétata. ⁴⁵ Y shinÿe yojtsajbaná binÿanayana, y Bëngbe Bëtsabe bëts yebnentše yojújonÿana entsëjua tsëntsaca yojtsenájataye. Chëjua bënëjua inauamna y chë tsatsëntsaca inaújonÿana. ⁴⁶ As Jesús tojanáyebuachena: “Taita, atšbe espíritu acbe cucuatšíñe šcoboshjona ca.”

Y chca jayanama tojanpochocá ora, tojanóbana.

⁴⁷ Chë romano soldadëngbe amëndayá chca tojáninÿe ora, Bëngbe Bëtsábioye tbojtanadorá, mëntsá jayanëse: “Ndegombre, quem boyabása ainaniñe tšabe juabnënga bomná inamna ca.”

⁴⁸ Nÿetsca entsanga chë soye jinÿama tmojánabënga, chca tojanopasama tmojáninÿe ora, tmojanontsé jtangana enocochjantšetaye, ngménama. ⁴⁹ Pero Jesusbe nÿetsca ubuátmënga y chë shembásenga Galileocana tmojanastëngna, chaboca tmojanouquedá chë soyënga onÿayiñe.

Jesús tmojanatbontsá

(Mt 27.57-61; Mc 15.42-47; Jn 19.38-42)

⁵⁰ Yojanmëna canÿe boyabása, José ca uabainá, canÿe Judeoca pueblócá, Arimatea ca uabaina; cha inamna canÿa chë pueblentša uámana amëndayënguentsá y canÿe tšabe entsá y nÿetsca soyënguiñe tšabá amá. ⁵¹ Chánaca yojanobátmana chë Bëngbe Bëtsabe amëndayana chaóshjanguama, y tondaye tbonjanogustá ntšamo chë inÿe amëndayënga tmojanjuabó y Jesúseftaca tmojanmcá. ⁵² Cha Pilátbioye tojána y Jesusbe cuerpo tbojanotjañe. ⁵³ José chë cruzocana Jesusbe cuerpo tbojtanëstjango, canÿe lino entsëjuaca tbojanandmaná y canÿe cuevëshiñe, peñëshiñe pormániñe, tbojanjajó. Chentse cabá ndocná mondëjajo. ⁵⁴ Yëfsana ochnayté bëtsemnayecna, cach te yojanotocana saná japróntana chë yëfsana jasama; y chë ochnayté ya yojtsebínÿana.

⁵⁵ Chë shembásenga, Galileocana Jesús tmojantjëmbabanga, tmojána y chë cuevëshe tmojáninÿe, y tmojanrrepará ntšamo Jesusbe cuerpo tmojanjajoma. ⁵⁶ Yebnoye tmojtaná orna, tmojanprontá botamana uanguëtse béjayënga y soyënga chë cuerpiñe janëtjuama.

Chë ochnaytena chënga tmojanochná, ntšamo Moisesbe leyinÿe yojanmandancá.

24

Jesús tojtanayena

(Mt 28.1-10; Mc 16.1-8; Jn 20.1-10)

¹ Y tmengo, chë inÿe semana bojatšéntena, cabá cachëse, Jesús tmojanatbontsá cuevëshoye chë shembásenga tmojána, y tmojanamba chë tmojanprontá botamana uanguëtse soyënga. ² Pero choye tmojánashjajna orna, tmojáninÿena chë cuevëshoye amashjuanentša ndëtsbé chentšana juanániñe, ³ y choye tmojánamashjna ora, Bëngbe Utabná Jesusbe cuerpo ndoñe tmonjáninÿena. ⁴ Chë shembásengna ndoñe imontsetátšëmbo ntšamo jajuaboyana chë soyama; chora, uta boyabásata, uabuashinÿinÿana entsayá uichëtjonata chentse tbojabántsaye. ⁵ Y chë shembásenga tmojanëuatjanama y fshantsoye imojtsatsejbénama, chata tbojanëyana: “¿Ndáyeca obanëngbentse chë vida totsobomná šmojtsenguá ca? ⁶ Muentse cha ndocná quenátsmëna, er cha ya tontayena. Menójuabonga ndayá cha tmojanëyanama, cha cabá Galileoca enjamna ora. Cha tonjánayana: ⁷ ‘Chë Bëngbe Bëtsá Entsá tbojanbemá bontsemna bacna soye amëngbe cucuatšinë chamoboshjonama, chamocrucificama y unga tianoye cháuatayenama cá’ —chata tbojánayana.

⁸ Chora chë shembásenga Jesusbe palabréngama imojtenójuaboye, ⁹ y chë cuevëshentšana tmojtaná ora, chë tšabe noticiënga chë bnëtsana canÿe uatsjëndayënga y inÿe entsángbioye tmojanacuntá. ¹⁰ Chë uatsjëndayëngbioye chca cuentayëngna imojamna María Magdalena, Juana, y María, chë Santiagbe mamá, y chë inÿe shembásenga chëngaftaca imojamnënga. ¹¹ Pero chë uatsjëndayëngna mëntsá chë shembásengbiana imojëtsejuabnaye: “Chënga montsoyebuambná mo corente juabna ndbomnëngcá ca.” Y chca, chënga chë soyiñe ndoñe montsanošbuaché.

¹² Pero chentšana, Pedro tojëftsantsbaná y ochamanana chë Jesús tmojanjajó cuevëshoye tojána. Y chocha yojtsemna ora, yojtsejbéna tsoye jontješiyama, pero nÿe ena

entšëjuangá yojuinÿe, chë Jesús tmojanbochmëjuangá. As Pedro ojnananá yebnoye yojtá, chca tojanopasama.

Chë Emaús puebloye benachiñe
(Mc 16.12-13)

¹³ Cach te, uta uatsjéndayata Emaús puebloye ibojtsaye. Emaús yojamna Jerusalenocana bnëtsana canÿe kilómetroca. ¹⁴ Chata ibojtsayencuéntaye lempe ntšamo tojanopasama. ¹⁵ Y tojanopasá, ibojtsencuéntaye y ibojtsenatsëtsnayëntscuana, cach Jesús tojanobconá y chátaftaca cánÿiñe yojtsaye; ¹⁶ masque imojtsonÿaye, ndoñe ibontsobena cha jótëmbana. ¹⁷ Jesús tojanëyana: —¿Ndayama benachiñe šuabanencuéntaye ca?

As chata ngménaca ibojtsaye, ¹⁸ y canÿa, Cleofás ca uabainá, tbojaniyana: —¿Nÿe aca cojtsemna, inÿe luarocana ashjangoná Jerusalenentše oyená, ndayá chentše quem diënga yopasánama ndëtatsëmbuá ca?

¹⁹ Chora cha tojanëyana: —¿Ndaye soyënga ca?

Y chata tbojaniyana: —Chë Jesús Nazaretocáftaca tonjopasá soyëngama. Cha enjamna canÿe Bëngbe Bëtsabe juabna oyebuambnayá, puerte obenana bomná ndayá jamama y jayanama, Bëngbe Bëtsabe delante y nÿetsca entšangbe delante. ²⁰ Y ntšamo, chë bachnangbe amëndayënga y chentša mandadënga ínÿengbe cucuatšične tmonjáboshjona, jóbanama ibojtsemna ca entšanga chamuayanama y chamocrucificama. ²¹ Bënga chabiama fsënjanobátmana, Césarbe cucuatšentsana Israeloca entšangbe atsebacayá chaotsemnama; pero morna ya unga te entsemna chca tonjopasá. ²² Y mora ndayá, básefta shembásenga bëngbe enutënga ójnanana soyënga šonjáuyana. Chënga cabá cachëse chë Jesusbe cuerpo tmonjanjajó cuevëshoye tmonjá, ²³ y chabe cuerpo ndoñe tmonjínÿena; as chora chënga bëngbiöye tmontabo y montsabíchamo angelënga tmojëftsanÿe y chënga catmënjayana cha ainá yojtsatsmëna ca. ²⁴ Bëngbentsana baseftángnaca chentšana chë cuevëshoye tmonjá, y tmojínÿena ntšamo chë shembásenga tmonjayancá, pero Jesús ndoñe tmojëftsinye ca —chata ibojtsichamo.

²⁵ As Jesús chata tojanëyana: —¿Tša juabna ndbomnënga y tša uenana jošbuáchiyama, chë Bëngbe Bëtsabe juabna oyebuambnayënga tmojánayana soyëngama! ²⁶ ¿Mo ndoñe yonjamna chë Uámana Uabuayaná chë soyënga chaosufrima, y chentšana nÿetsca entšanga corente cha chamuatschuama ca?

²⁷ Chentšana Jesús tojanontsé chata jábuayenana, lempe ntšamo chabiama yojanoyebuambnacá chë Bëngbe Bëtsabe uabemana palabrenguiñe; yojontsé Moisesbe librëšangañe y chë Bëngbe Bëtsabe juabna oyebuambnayëngbe librëšangañnaca.

²⁸ Chë ibojétsaye puebloye imojtsebeconá ora, Jesús tojanma mo más chcoye cuaftacá. ²⁹ Pero chatna tmojanatarié chentše chaotsoquedáñama, mëntšá jauyanëse: —Bëndátaftaca motsoquedañe; ya jetiñe entsemna y ya echanjaibétata ca.

As Jesús chátaftaca tojtsanoquedañe. ³⁰ Chentšana tojanopasá, juasama mesëshentše imojtsetbiámana ora, Jesús chë tandëse tojanca, Bëngbe Bëtsábioye tbojtanchuá, chë tandëse tojanjatá, y chata tojanatsatá. ³¹ As, chora chë uatsjéndayata ibojobenaye Jesús jótëmbana; pero chana nÿe ndeolpe yojuenatjëmbe. ³² Chora chata ibojtsenatsëtsnaye: “Chë benachiñe Bëngbe Bëtsabe uabemana palabrengama šondabuayiyiná ora, ndegombre bëngbe ainaniñe más bontseboše cha más chašotsabuayiyinama, ¿ndoñe chca ca?”

³³ As, cachora tbojëftsantsbanata y Jerusalenoye tbojtanata; choca tmojáninÿena chë bnëtsana canÿe uatsjéndayënga cánÿentše imojtsemna y chëngbe enutëngnaca; ³⁴ y mëntšá imojtsichamo: —¿Ndegombre Bëngbe Utabná tojtayena; Simónbioye tbojébëbocna ca!

³⁵ As chata tbojanontsé jacúntana, ntšamo benachiñe tbojanpasacá, y ntšamo Jesúsbioye imojtëmbe, chë tandëse tojanjatá ora.

*Jesús chabe uatsjédayënga tojánëbëbuacna
(Mt 28.16-20; Mc 16.14-18; Jn 20.19-23)*

³⁶ Chë uatsjédayënga chë soyëngama cabá imojtsencuéntantscuana, Jesús chëngbe tsëntsaca tojabántsaye y mëntsá tojanëyana: “Chë atšbe ainaniñe tšabe ebionana tšëngaftangaftaca chaotsemna ca.”

³⁷ Pero chënga tša auatjanánënga imojtsemna, y canye añemëse imojétsonyaye ca imojtsejuabnaye. ³⁸ Pero Jesús tojanëyana: “¿Ndáyeca auatjanánënga šmojtsemna? y ¿ndáyeca tšëngaftangbe ainaniñe chca šmojtsejuabná ca? ³⁹ Atšbe cucuatšënga y atšbe shecuatšënga minyënga; šmobjajo y šmochanjinye. Cach atšbe sëntsemna. Canye añemësna, ni mëntsena ni betašënga ntsebomnana; pero tšëngaftanga šmontsonyá, atšna aíñe ca” —tojanëyana.

⁴⁰ Chca yojtsichámëse, chabe cucuatšënga y chabe shecuatšënga tojaninyanýe. ⁴¹ Y chënga cabá ndoñe montsanošbuaché, chca noticiama corente imojtsóyejuama y tša ojanánënga imojtsemna causa; as Jesús tojanatjá: “¿Muentše ndayá jasama quešmëbomna ca?”

⁴² As canye tabena buana beonbiana tmojanoyé; ⁴³ Jesús tojanocñe y chëngbentše tojanse. ⁴⁴ Chentšana Jesús tojanëyana: “Quem palabrenga entsemna ntšamo cabá tšëngaftangaftaca sënjamna ora tcbonjanëyancá: Entsemna, lempe chaopasá ntšamo atšbiana iuabemancá, Moisesbe leyënguiñe, chë Bëngbe Bëtsabe juabna oyebuambnayëngbe uabemana librëšangañe y Salmos librëšañnaca ca.”

⁴⁵ Y chora chë uatsjédayënga, Jesúsbeyeca tmojanobená chë Bëngbe Bëtsabe uabemana palabrengama josértana. ⁴⁶ Chentšana Jesús tojanëyana: “Ntšamo atšbiana iuabemancana yomna, chë Bëngbe Bëtsá Entšá tbojanbemá chaosufrí y unga tianoye chauatayena ca. ⁴⁷ Y morna atšbe uabaina jayanëse, átšbeñe betsošbuáchema, nyets quem luarentše šmochjontša entšanga atšbiana jábuayenama, bacna soyënga amana chamuajbanama, as chca, Bëngbe Bëtsá chëngbe bacna soyëngama cháuaperdonama; chë soyënga Jerusale-
nentše chaobojatšé. ⁴⁸ Tšëngaftanga atšbiana soyënga šmonjinýe y šmondétatšëmbo. ⁴⁹ Atšbe Taitabe šbuachenaná, tšëngaftangbiana chanjíchmu. Pero morna camuentše Jerusale-
nentše moquedanga, Bëngbe Bëtsabe obenana chašmóyëngacñëntscuana ca” —
cha tojanëyana.

*Jesús celoye tojtantsjuá
(Mc 16.19-20)*

⁵⁰ Chentšana, Jesús chabe uatsjédayënga ínýoye tojanënatse, Betania pueblo béconana. Y chabe buacuatšënga játsbanase, Bëngbe Bëtsá tbojanimpadá chë uatsjédayënga tšabe bendicionënga chamóyëngacñama. ⁵¹ Chca yojtsamëntscuana, cha chëngbentšana tojanoluaré y tojanontsé celoye játsjuana. ⁵² Chë uatsjédayëngna, Jesús tmojtanadorá chentšana, Jerusalenoye oyejuayënga tmojtaná; ⁵³ y cada te, Bëngbe Bëtsabe bëts yebnoye imojánajna, Bëngbe Bëtsá jëtschuayama.

San Juan

Cristo, chë Bëngbe Bëtsabe Uámana Oyebuambnayana ca Uabainá

¹ Quem luare ndobojátša ora, Cristo, chë Bëngbe Bëtsabe Uámana Oyebuambnayana ya yojtsemna; chora cha, chë chca uabainá, Bëngbe Bëtsáftaca yojtsanmëna, y cachá Bëngbe Bëtsá inamna. ² Ndegombre cha, chë tempšana Bëngbe Bëtsáftaca yojtsanmëna. ³ Cháftaca, Bëngbe Bëtsá lempe tojanma; cháftaca ndóñesna, lempe ntšamo mora yomncá, Bëngbe Bëtsá tondaye matënjanma. ⁴ Cachábeñe nyets vida inamna, y quem vídaca tojánabo quem luarentša entsangbe juabnënga jabuábinÿnayama. ⁵ Cha tonjánabo moye, chë entsangbe juabnënga ndoñe binÿniñe yonjamnoye, chiñe jabobínÿnayama. Cha sempre chca yobínÿna, y Satanás chë entsangbe juabnënga ndoñe binÿniñe chaondëtsemnama amá, ndoñe yondobena chë binÿnayabe obenana jtsejuánana.

⁶ Inamna canÿe boyabása, Juan ca uabainá; y Bëngbe Bëtsá tbojanichmó, ⁷ binÿnayabiama chaóyebuambama; entsángbeñe binÿnayabiama cháuyanama, chca, ntšamo Juan chë binÿnayabiama tojayana soyëngaca, nyetscanga Jesúsbeñe chamotsošbuáchema. ⁸ Juan ndoñe yonjamna chë binÿnayá. Cha inamna canÿe ichmoná, chë nda binÿnayá yomnabiama entsángbeñe chauabáyanama. ⁹ Chë ndegombrá quem luaroye tonjánabo chë entsangbe juabnënga jabuábinÿnayama.

¹⁰ Chë Bëngbe Bëtsabe Uámana Oyebuambnayana quem luariñe yojtsanmëna; masque cháftaca Bëngbe Bëtsá quem luare tojanma, nda cha yojamnama muentša oyenënga ndoñe monjántatšëmbo. ¹¹ Cachabe luare entsángbioye tonjánabo, y entsanga ndoñe tmonjánbošena cha joffjana. ¹² Nyetscanga, ndëmuanÿënga cha tmojanëbuaja y chábeñe tmojtsošbuáchenga, cha derecho tonjanatšatá jtsoybenama Bëngbe Bëtsabe básenga ca jtsabáinama. ¹³ Quem ošbuáchiyëngna, chca jtsemnama ndoñe tmonjanobená entsangbe buiñentšana tmojanonÿnáyeca, o ndaye entsabe juabnentšana. Nÿe Bëngbe Bëtsábeyeca chca chabe básenga imojtsabaina.

¹⁴ Cha, chë Bëngbe Bëtsabe Uámana Oyebuambnayana, entsá tojanóbema, y quem luare bëngaftaca yojëftsiyena. Cha yomna chë Bëngbe Bëtsabe nÿe canÿe Uaquiñá; chíyeca bënga tifjáninÿe chabe bëts obenana y chabe tšabe juabna, chë Bëngbe Bëtsábentšana tojanóyëngacñana. Cha corente jtsababuánÿeshanëse šojánanÿena y yojëftsiyena ntšamo ndegombre inamncá. ¹⁵ Juan mëntšá chabiamá yojanáyeuache: “Chabiamá sënjanoyebuambná, chë ndabiamá chora atše sënjánayana, chë átšbentšana jabamana atšbiamá más uamaná endmëna, er atše cabá ndonÿna orna, cha ya yojtsemna ca.”

¹⁶ Cha tša tšabe ainana bómnyeyeca, bënga nyetscanga mallajta tšabe bendicionënga tmojóyëngacñe. ¹⁷ Moisesbiajana tifjanóyëngacñe chë Bëngbe Bëtsá tojanmandá soyënga. Pero Jesucristbeyeca, Bëngbe Bëtsá tšabe bendicionënga bëngbiamá tojama y chë ndegombre soyënga bënga tmojëftsashjache. ¹⁸ Ndocná, ndocna te Bëngbe Bëtsábioye tbonjinÿe. Chë nÿe canÿe Uaquiñá ibobomná, cach Bëngbe Bëtsá yomna; y cha, Bëngbe Bëtsá chë Taitáftaca cánÿiñe mo canÿacá yomna. Mua, chë Uaquiñá, bëngbiamá tojama, Bëngbe Bëtsá juabuátmanama chaotsopodënama.

Juan chë Ubayaná Jesucristbiama tojanabuayená (Mt 3.11-12; Mc 1.7-8; Lc 3.15-17)

¹⁹ Canÿe te, Jerusalenoca judiënga tmojanichamó básefta chëngbe bachnanga y levitënga, chë Bëngbe Bëtsabe bëts yebnoca trabájayënga, Juan yojtsemnoye, cha nda bëtsemnama chamuatjayama. ²⁰ Chocna, Juan chëngbeñe ndegombre tojanobuambá: — Atše, chë Bëngbe Bëtsabe Uámana Uabuayaná ndoñe quetsátsmëna ca.

²¹ As chora, cachiñe tmojantjá: —As, ¿ndase cojtsemna? ¿Chë Bëngbe Bëtsabe juabna oyebuambnayá Elías ca?

Y Juan tojanējua: —Atše cha ndoñe quetsátsmëna ca.

Chora chënga tmojantjá: —As, ¿chë Bëngbe Bëtsabe juabna jabóyebuambayama jabamá ca?

Y Juan tojanējua: —Ndoñe ca.

²² Chora chënga tmojaniana: —Asna, ¿aca ndase cojtsemna? Bënga šontsamna nda aca cojtsemnama jtsetatšëmbuana, as chë šonjadespachenga jacúntama. ¿Ndayá cojtsobena cach acbiana jayanama ca?

²³ Y Juan mëntsá tojanējua: —Atše sëntsemna chë ndabiana Bëngbe Bëtsabe juabna oyebuambnayá Isaías mëntsá tojanábema: “Entšanga ndoyenoca canye abuyaynayá echántsemna, y entšanga mëntsá echántsbuayayay: Bëngbe Utabná echanjabo ca. Mo nda canye benache tojtseprontacá, tšëngaftángnaca cachcá, cha jabama tšabe juabnëngaca šmochtseprontana ca.”

²⁴ Chorna, báseftanga chë fariseungbe ichmónënguentsana, ²⁵ Juan tmojantjá: —Chë Bëngbe Bëtsabe Uámana Uabuayaná, Cristo ca uabainá, ndoñe tcontsemnësna, ni Elías, ni chë Bëngbe Bëtsabe juabna jabóyebuambayama jabamá ndóñesna, ¿ndáyeca entšanga cojtsëbayana ca?

²⁶ Chora Juan tojanējua: —Atšna, béjayeca entšanga sëndëubáyana. Pero tšëngaftangbeñe canya entsemna; cha ndoñe quešmatábuatma; ²⁷ y cha atšbe ústonoye echanjášhango. Atše merecido taitatobuajoñe, ni mo jotsejbiyama, chabe shecochëtjonëshentsa corriëja jajafjonama ca.

²⁸ Chca tojanopasá, canye pueblo Betania ca uabáinentše, Jordán béjaye chenguana. Cach béjayiñe, Juan entšanga yojanëbáyana.

Jesús chë Bëngbe Bëtsabe Oveshatema ca uabainá

²⁹ Yëfsana, Juan yojtsemnoye Jesús yojtsebëconaye, y chë cháftaca imojtsemna entšanga tojanëyana: “Smochjinye. Chë nda Bëngbe Bëtsá tbojichmó y iytanana Oveshatemcá entsobiamná cha, entsashjajuana ca. Cha jóbaniñe, quem luarentša entšanga bacna soyëngama perdonánënga mochántsemna. ³⁰ Atše chabiana cbonjutsëtsná, mëntsá sënjanayana ora: ‘Atšbe ústonoye canya echanjášhango. Cha atšbiana más uamaná endmëna, er atše cabá ndonyna ora, cha ya yojtsemna ca.’ ³¹ Tempna, cach atše ndoñe quetsjátantatšëmbo nda cha bëtsemnana. Pero atšna ínÿenga béjayeca ubáyana sëndabó, Israeloca entšanga quem boyabása chamuábuatmanama ca” —Juan tojanëyana.

³² Chentšana Juan mëntsánaca tojanobuambá: “Chabiana mëntsá bominye sënjanajó: chë Uámana Espíritu, mo canye palomatemcá, celocana tonjánastjango y quem boyabásabe juatsbuañe tonjanototóna. ³³ Atše cabá ndoñe quetsjátantatšëmbo nda cha bëtsemnana, pero chë béjayeca jubáyama šonjanichmó cha, mëntsá šonjaniana: ‘Nda chacojinye, chë Uámana Espíritu jastjanguana y chabe juatsbuañe jototonana, chábeyeca atše chanjíchmua chë Uámana Espíritu entšangbe ainaniñe cháuamashënguama ca.’ ³⁴ Y morna, atše aíñe chca tijinye, y ndegombre tšëngaftanga cbëyana, cha chë Bëngbe Bëtsabe Uaquiñá entsemna ca” —cha tojanëyana.

Chë Jesusbe natsana ústonënga

³⁵ Yëfsana, Juan chabe uatsjëndayënguentsana útataftaca cachoca yojtésemna. ³⁶ Jesús yojtsachnëjuanama, Juan tbojáninye ora, tojanëyana: “Sochjinye. Mua entsemna nda Bëngbe Bëtsá tbojichmó y iytanana Oveshatemcá entsobiamná cha ca.”

³⁷ Chora chë Juanbe uta uatsjëndayata, chca tbojanuena ora, Jesús tmojanasto. ³⁸ Jesús tojesanontješé y tojánanye chata imojétsëstonama. As, tojanatjá: —¿Ndayá šojtsenguá ca?

Y chata tbojaniana: —¿Rabí, ndayentše icoyena ca? (Rabí endayana “Buatëmbayá ca”.)

³⁹ Chora Jesús tojanějua: —Mabo y šochjinýe ca.

As chata tbojána y tbojáninýe ndayentše cha yojaniyenana. Y chentše cháftaca tojéftsanaJETana, ya jetiñe mo las cuatro ora yojtsemna causa.

⁴⁰ Chë Jesusbiana oyebuambnayana Juánbioye tbojanóyeunata y Jesús tbojanasto útatentšana cánýana Andrés ca yojanabaina; cha yojamna Simón Pédrëbe catšata.

⁴¹ Andrés, cabá ndocna inýe soye ndëma ora, tojána chabe catšata Simón janguanguama. Y tbojáninýena ora, Simónbioye tbojanianyana: “Chë Bëngbe Bëtsabe Uámana Uabuayaná, Cristo, fsënjínýena ca.”

⁴² Chentšana Andrés, Simónbioye tbojanánatse Jesús yojtsemnoye. Jesús, Simónbioye tbojáninýe ora, tbojanianyana: “Aca condmëna Simón, Jonasbe uaquiñá, pero Cefas ca cochantsabaina ca.” (Chcana endayana “Pedro o ndëtšbé ca”.)

Jesús, Felipe y Natanael tojánachembo chamuastama

⁴³ Yëfsana, Jesús tojanjuabó Galilea luaroye jama. Benachiñe Felípbioye tbojáninýena y tbojanianyana: “Smasto ca.”

⁴⁴ Chë boyabása Felipe, Betsaida pueblóca inamna. Andrés y Pédrëna cach pueblóca ibnamna. ⁴⁵ Chentšana Felipe tojána Natanael janguanguama; y tbojanianyana: —Chë ndabiana leyënga librëšangañe Moisés tojanábema cha fsënjínýena ca. Cachabiana, Bëngbe Bëtsabe juabna oyebuambnayëngnaca tmojanábema. Cha Jesús entsemna, Josebe uaquiñá, chë Nazaretocá ca.

⁴⁶ Chora Natanael tbojanianyana: —¿Ndaye tšabe soye Nazaretocana nanjopódia jóbocnama ca?

Y Felipe tbojanjuá: —Mabo y cochjinýe ca.

⁴⁷ Natanael yojtsebéconama, Jesús tbojáninýe ora tojánayana: —Moye canýe entšá entsabó; cha ndegombre endomerecena Israelbentšana entšá jtsemnama. Cha tšabe entšá endmëna; ndocnábioye quebnatsíngña ca.

⁴⁸ Chora Natanael Jesúsbioye tbojantjá: —¿Ntšamo atše šcuabuatma ca?

Y Jesús tbojanjuá: —Felipe cabá aca ndëchembo ora, atše tcbonjinýe, chë higo betiye tēchetsoye condëtsomñe ora ca.

⁴⁹ As, Natanael tbojanianyana: —Buatëmbayá, ¡aca chë Bëngbe Bëtsabe Uaquiñá comna! ¡Aca, chë Israeloca entšangbe Rey ca!

⁵⁰ Chora Jesús tbojanjuá: —¿Aca átšbeñe cojtsošbuaché, nýe chë higo betiye tēchetsoye tcbójnýe ca tcbójauyanama? Ndegombre, chë soyama más bëts soyënga cochanjnýe ca.

⁵¹ Chentšana Jesús tojanéyana: —Ndegombre šcuayana: Tšëngaftanga šmochanjnýe celoca atëfjniñe, y Bëngbe Bëtsabe angelotëmënga jtsetsjuajnana y jtsastjajuanana Bëngbe Bëtsá Entšá tbojanbemabe tatsëtsoca.

2

Canýe casamento Galilea luaroca, Caná pueblentše

¹ Chentšana unga tianoje, canýe casamento inamna, canýe pueblentše Caná ca uabáinentše, Galileoca. Chë oboyejuayoca Jesusbe mamá yojtsemna. ² Jesús y chabe uatsjëndayëngnaca chë casamentoca ófjanënga imojtsemna. ³ Chë oboyejuayentše, vínoje yojtso pochóca y Jesusbe mamá tbojanianyana: —Ya tondaye vínoje quemátsbomna ca.

⁴ As, Jesús tbojanjuá: —Mama, ¿ndáyeca chca atše šcojtsatsá? Atšbe ora cabá ndoñe ntjoshjanguana ca.

⁵ Chentšana, chabe mamá, chentša oservénënga tojanéyana: —Lempe šmochjama, ntšamo cha chacmojuayancá ca.

⁶ Chocna, chnënguana ndëtsbé matbaja inamna. Chca matbajënguentša béjayeca, judiënga imojanamana jtsacuéntšabiana cabá ndëse ora, ntšamo tempo entsanga imojanamancá, Bëngbe Bëtsabe delante tšábenga jtsatsmënana. Cada matbajiñe, mo shachna o canÿsëfta bnëtsanájua béjaye yojanába.

⁷ Chora Jesús chë oservénënga tojanamëndá: “Quem matbajënga béjayeca mobuajutetjé ca.” Y chënga, chora lempe tmojanbuajutetjé.

⁸ Y Jesús tojanéyana: “Morna, báseye mobuatsjo y chë fiesta otocanábioye mabuyamba ca.” Y chënga chca tmojanma.

⁹ Chora, chë fiesta otocaná, chë béjaye Jesús vínoye tojanbemiye tojanftantiá, ndëmocana yojóbocnama ntsetatšëmbcá. Pero chë oservénëngna aiñe imojtsetátšëmbo ndëmocana, er cachënga chë béjaye tmojanbuatsjo. As, chë fiesta otocanana, chë bobontse bouamnábioye tbojanchembo, ¹⁰ y tbojaniyana: “Nÿetscanga monduamana natsana chë más uámana vínoye jushebëcana, y chë ófjanënga becá tmojatëmo ora, chë más batšá uámaniye. Pero acna, chë más uámana vínoye morscama tcojtsabofjajó ca.”

¹¹ Ntšamo Jesús tojanmcá Caná pueblentše, Galileoca, yojamna chabe natsana bëts soye Bëngbe Bëtsabe obenánaca. Y chca, chabe bëts obenana y uámanana cha tojaninÿanyé; y as, chabe uatsjëndayënga chábeñe imojtsošbuaché.

¹² Chca tojanopasá chentšana, Jesús canÿe pueblo, Capernaum ca uabáinoye tojt-sanoñe. Chorna, chabe mamá, chabe catšátanga y chabe uatsjëndayënga cha tmojan-tjëmbambá, y choca baseftatescama tmojanoquedá.

*Jesús Bëngbe Bëtsabe bëts yebnentšana bacna entsanga tojtanëbuacna
(Mt 21.12-13; Mc 11.15-18; Lc 19.45-46)*

¹³ Ya canÿe judiëngbe bëts fiesta, chë Bashco fiesta yojétsobeco, chë ntšamo Bëngbe Bëtsá chëngbe bëts taitanga Egiptocana tojánatsebacama jtenójuaboyama. Chë fiestama Jesús Jerusalenoye tojána. ¹⁴ Jerusalenoca, Bëngbe Bëtsabe bëts yebnentše, Jesús tojánanÿena uacnënga, oveshënga y paloma enënga, y entsángbioye crocénana atrocayënga, chëngbe luarënguenache imojtsetbiámana. ¹⁵ Jesús chca tojánanÿe ora, biajënga tojanaca, tjan-janëja tojanobopormá, y Bëngbe Bëtsabe bëts yebnentšana nÿetscanga tojtanëbuacna, chëngbe oveshënga y uacnëngaca. Chentšana Jesús, Bëngbe Bëtsabe bëts yebnentšama yojanoserverna crocénana atrocayëngbe crocénana tojtsanëjquësheshe, y chë mesëshangá tojtsanenásatajchquëca. ¹⁶ Chë paloma enëngna Jesús tojanéyana: —¡Quem soyënga lempe muentšana matábocana! ¡Ndoñe matsbuamnana ni mátenana atšbe Bëtsabe yebnentše, mo cánÿentše jiyama luarentše cuaftsemncá ca!

¹⁷ Y as, chabe uatsjëndayënga tmojanenojuabó ntšamo Bëngbe Bëtsabe uabemana palabrenguiñe iuayanama: “Bëngbe Bëtsabe yebna jtseboguianama juabna, nÿets átšbeñe entsemna ca.”

¹⁸ Chora, judiënga Jesús tmojantjá: —¿Ndaye bëts soye cochjama bënga chašcuinÿanyëma, aca ndaye deréchoca bëngaftaca chca cojtsobenama ca?

¹⁹ As Jesús tojanéjua: —Quem Bëngbe Bëtsabe yebna menásatajchca, y atše unga tese chtëtsbaná ca.

²⁰ Chora chë judiënga tmojaniyana: —Canta bnëtsana chnënguana uatiñe, quem Bëngbe Bëtsabe yebna tmojanjebo. ¿Y aca, nÿe unga tese lempe cochtëtsjebo ca?

²¹ Pero Bëngbe Bëtsabe yebna, ndayama chora cha chca tojánayana, cachabe cuerpo yojtsemna, ndoñe chë jebna soye. ²² Chama, Jesús obanënguentšana tojtanayena ora, chabe uatsjëndayënga tmojanenojuabó ntšamo muentše cha tojanéyanama. Chca ora, Bëngbe Bëtsabe uabemana palabrenguiñe y Jesús chora tojánayana palabrenguiñe más chënga imojtsošbuaché.

Jesús nÿetsca entsangbe juabna iuábuatma

²³ Jesús Jerusalenoca chë Bashco fiestama yojtsemnëntscuana, entšanga tmojáninÿe Jesús jamana bëts soyënga Bëngbe Bëtsabe obenánaca. Chíyeca, ba entšanga chábeñe imojtsošbuaché. ²⁴ Pero Jesús chëngbeñe ndoñe yontsošbuaché, cha nyetscanga yojanëbuatma causa. ²⁵ Y Jesús ndoñe bonjanájaboto chë entšangbe soyëngama chabotsebuayiynama, er cachá entšangbe ainaniñe nyetsca juabnënga yojanábuatma.

3

Jesús y Nicodemo

¹ Inamna canÿe boyabása Nicodemo ca uabainá. Cha yojamna fariseunguentšá y judiëngbe canÿe amëndayá. ² Chana ibeta Jesúsbioye tojána y tbojaniyana: — Buatëmbayá, bënga fsëntsetatšëmbo aca canÿe buatëmbayá comnama, Bëngbe Bëtsabe ichmoná. Ndocná quenátobena jamana quem bëts soyënga, aca contsama soyënga, Bëngbe Bëtsá cháftaca ndoñe tontsemnëse. Chíyeca bënga chca fsëntsetatšëmbo ca —cha tbojaniyana.

³ Chora Jesús tbojanjuá: —Ndegombre cbëyana, nda ndoñe cachiñe tontonÿná, cha ndoñe quenátobena Bëngbe Bëtsabe amëndayana jinÿama ca.

⁴ Y Nicodemo tbojantjá: —¿Ntšamo, canÿe entšá ya bëtsá tojtsemna ora, nantsobena cachiñe jtónÿnama ca? Ndegombre, cha ndoñe ntsoobenana cachabe mamabe cuerpiñe jtamashënguana cachiñe jtónÿnama ca.

⁵ Chora Jesús tbojanjuá: —Ndegombre cbëyana, béjayeca y chë Uámana Espíritbeyeca ntjonÿnacá, ndocná quenátobena Bëngbe Bëtsabe amëndayoye jamashënguama. ⁶ Nda bëtsétsabentšana tojonÿná cha, quem luarentša entšangcá jtsemnana; pero chë Uámana Espíritbeyeca tojonÿná chana, jtsemnana canÿa chë Uámana Espíritu ainaniñe bomná. ⁷ Ndoñe matenjnanana ntšamo tbonjauyanama: “Nyetscanga entsamna cachiñe jtónÿnama”. ⁸ Chë binÿia ndëmuajana tojtseboše jtsemnana, chëjana jtsanana. Masque entšanga, chë binÿiayama jtsuenanana, ndoñe ntsetatšëmbuana ndëmocana yobama y ndëmoye yojtsoma. Cachcá, tsëngaftanga ndoñe quešmátstatšëmbo ntšamo entšanga chë Uámana Espíritbeyeca tmojtsónÿnama; pero tsëngaftanga šmontsetatšëmbo aíñe chca yomnama ca —Jesús tbojaniyana.

⁹ Chora Nicodemo tbojantjá: —¿Ntšamo chca nántsemna ca?

¹⁰ Y Jesús tbojanjuá: —Aca, canÿe Israeloca abuatambayá, ¿chë soyëngama ndoñe condétatšëmbo ca? ¹¹ Ndegombre cbëyana, bëngna chë fststátšëmbo soyëngama fsëntsoyebuambná, y chë tifjinÿe soyëngama ndegombre bëtsemnana fsëntsichamo. Pero tsëngaftangna, chë cbontsëtsëtsná soyënguiñe ndoñe quešmatošbuaché. ¹² Atse, quem luarentša soyëngama sënjoyebuambá y tsëngaftanga átšbeñe ndoñe chešmatošbuaché. Y as, ¿ntšamo átšbeñe šmochtsošbuáchiye, celoca soyëngama cbojtsëtsëtsnase?

¹³ “Ndocná, nÿe cachábeyeca Bëngbe Bëtsábioye tonjátsjua. Nÿe chë celocana tojabá aíñe, chë Bëngbe Bëtsá Entšá tbojanbemá. ¹⁴ Y chcase, ntšamo Moisés entšanga ndoyenoca bronca mëtscuaye tsbanánoca tbojananguësëtjca, šoquënga tsabá chamotsatsmënama; cachcá entsemna, Bëngbe Bëtsá Entšá tbojanbemá entšanga chamuatsbanama; ¹⁵ chca, nyetscanga chábeñe tmojtsošbuáchenga, chë nyetsca tescama yomna tsabe vida chamotsebomnama ca” —Jesús Nicodémbioye tbojaniyana.

Ntsachetšá Bëngbe Bëtsá entšanga iuababuánÿeshana

¹⁶ Mëntšánaca Jesús tojánayana: —Bëngbe Bëtsá quem luare entšángbioye tša yojánababuanÿeshanayeca, chë nÿe canÿe Uaquiñá ibobomná, bëngbioye tbojichmó, nyetsca chábeñe ošbuáchiyënga ndoñe chamondóbanama, y aíñe chë nyetsca tescama yomna tsabe vida chamotsebomnama. ¹⁷ Er Bëngbe Bëtsá chabe Uaquiñá quem luaroye ndoñe tbonjichmó quem luare entšangbiama jabáyanama ntšamo

tmojamama castigánënga chaotsamnama ca, sinó, entsanga chábeyeca atsebácanënga chamotsemnama.

¹⁸ “Nda Bëngbe Bëtsabe Uaquiñábeñe tojtsošbuáchebiamá, Bëngbe Bëtsá ndoñe queochátayana ntšamo cha tojamama, castiganá chaotsemna ca. Pero chë Uaquiñábeñe ndoñe tontsošbuáchebiamá, mora Bëngbe Bëtsá ya tojayana, ntšamo tojamama cha castiganá chaotsemna ca, chë Bëngbe Bëtsá nýe canýe Uaquiñá ibobomnábeñe ndoñe yontsošbuaché causa. ¹⁹ Chca, chë ndoñe tmontsošbuáchengbiamna cha ya tojayana, ntšamo tmojamama castigánënga chamotsemna ca; er chë entsangbe juabnënga binýnayá quem luaroye tojabo, pero ba entsanga tmojábošena jtsomñana, chë entsangbiamá bacna juabnëngaca chamotsebomnama amáftaca. Chënga sempre bacna soyënga jtsamana; chíyeca chënga jtsebošana cháftaca jtsomñana. ²⁰ Chë bacna soyënga tojtsamá ndoñe ntsebošana, chë binýnayá chabe bacna soyënga chabuinýinýema, ni chabe bacna soyëngama chabuácacanama. Chíyeca, chë bacna soyënga jtsamëse oyená, chë binýnayábioye jtsáboyënjana, y chë binýnayábioye ndoñe ntjabana. ²¹ Pero nda sempre tojtsiyena ntšamo ndegombre yomncá jtsamëse, chana aíñe chë binýnayábioye jabana, chë binýnayá chabiamá chabuinýinýema, chë tojama soyëngna, ntšamo Bëngbe Bëtsá tojtsebošcá tojamama ca” —Jesús tojánayana.

Juan chë Ubayaná cachiñe Jesucristbiamá tojanabuayená

²² Chca tojanopasá chentšana, Jesús chabe uatsjëndayëngaftaca básefta Judeoca pueblëngoye tojtsanoñe. Chiñe, baseftatescama chë uatsjëndayëngaftaca tojanoquedá, entsanga ubáyana. ²³ Cach tempo, Juanënaca entsanga yojanëbáyana Enonoca, Salim béconana, er choça bëtscá bójaye inabinýna. Ba entsanga choye imojtsaye, y Juan chënga yojanëbáyana. ²⁴ Chca tojanopasá, chë Heródesbe soldadënga Juan cabá ndutame ora.

²⁵ Chë tempo, básefta Juanbe ústonënga tmojanontsé inýe judíoftaca enatsëtsnayana ntšamo tempo judiënga chë jtsacuéntšabiamá imojanámanama. ²⁶ Chora, chënga Juánbioye tmojánabo y tmojaniyana: —Buatëmbayá, chë Jordán chenguánoica ácaftaca enjamná, ndabiamá tša tšabá conjanoyebuambná, mora entsanga entsëbayana y nýetscanga cha montsëstona ca.

²⁷ As Juan tojanéyana: —Ndocná quenátobena tondaye ntsebomnana, Bëngbe Bëtsá ndoñe tbonjatsetase. ²⁸ Cach tsëngaftanga tšabá šmonjanuena y šmontsobena ndegombre yomnana jayanana, atše ndoñe chë Bëngbe Bëtsabe Uámana Uabuayaná tsjanmëna ca sënjánayanama; sinó, Bëngbe Bëtsá atše šojanichmó chë Uabuayanabe natsana, chabiamá entsanga jabábuayenama. ²⁹ Chë tobiáše tojtsobouamá ora, chë bobontse chábioye jtsebomnana; y chabe amigna, chabiamá jtsobátmanana y chë bobontse bouamnabe oyeambuambnayana jtsuenanana; y chca tojtsuenana ora, tša oyejuayá cha jtsemnana. Cachcá, ntšamo chë Uabuayaná yojtsamama y yojtsóyeambuambnama sëntsuenana ora, átšnaca corente oyejuayá sëntsemna. ³⁰ Cha bontsemna más uamaná jtsemnana, pero atše šontsemna más nduamaná jtsemnana ca —Juan tojanéyana.

Ntšamo yomna chë celocana tojabá

³¹ Mëntšánaca Juan tojánayana: “Chë tsbanánocana tojabá, nýetsca entsangbiamá más uamaná endmëna. Chë quem luare oyená quem luare entsangcá jtsemnana y quem luarentša soyëngama jtsóyeambuambnayana, pero chë celocana tojabana, nýetsca entsangbiamá más uamaná endmëna. ³² Cachá ntšamo tojinýe y tojouencá entsoyebuambná, pero chë entsichamo soyënguiñe ndocná quenatošbuaché. ³³ Nda ntšamo cha tojtsóyeambuambnañe tojtsošbuaché y chca tojtsama, jtsinýanýnayana Bëngbe Bëtsá ndegombre soyënga inetsichámuama. ³⁴ Chcasna, Bëngbe Bëtsabe ichmonana, jtsóyeambuambnayana ntšamo Bëngbe Bëtsá tojtsichamcá. Bëngbe Bëtsana chë ichmonábioye tbojichmó chë Uámana Espíritu, nýets tempo corente chabotsájabuachanama, ntšamo cach Bëngbe Bëtsá tojtsichamo y cachcá chaotsichámuama. ³⁵ Chë Taitá Uaquiñábioye bondbobonshana,

y chë Uaquiñábioye obenana tbojatšetá nÿetsca soyënguine jtsemándayama. ³⁶ Nda chë Uaquiñábeñe tojtsošbuaché, chë nÿetsca tescama yomna tšabe vida echántsebomna; y nda chë Uaquiñábioye ndoñe tbontsašbuaché, chana chë vida ndoñe queochátsbomna, y chë Bëngbe Bëtsabe uabouana castigo nÿetsca tescama chábeñe echántsemna ca” —cha tojánayana.

4

Jesús y chë Samaria luaroca shembása

¹ Chë fariseunga tmojanuena Jesús, Juanbiamá más ústonënga yojt sabamnama, y más entšanga yojtsebéyanama. ² Pero ndegombre, cach Jesús ndocnábioye bonÿanábayana, sinó chabe uatsjédayënga. ³ Bëngbe Utabná Jesús, ntšamo chë fariseunga tmojanuena tojántatšëmbona ora, Judea luarocana tojëftsanbocna y Galileoye tojtaná.

⁴ Choye jtamna ibojamna Samaria luarëjana jachnënguana. ⁵ Samariocna, canÿe pueblo Sicar ca uabáinoye Jesús tojánashjango. Chë pueblo yojamna, chë Jacob chabe uaquiñá Josébioye tojëftsanlargá fshantse béconana. ⁶ Choca yojamna cánÿentšë atëfjóniñe, búyeshe jobuatsjuama, Jacobëbe atëfjóniñe ca uabáiniñe. Mo nÿetsto ora, chentšë Jesús yojtsemna, aniñe uamëntšnaya, chë atëfjóniñe batsjaca yojótbema. ⁷⁻⁸ Chabe uatsjédayëngna chë pueblöye tmojána saná jobuámiñama. Chora, canÿe shembása Samariocá, chë atëfjónoye tojánashjango, búyeshe jauafcama; as Jesús tbojaniyana: —Búyeshtema šmabuatšetá ca.

⁹ Y chë shembása tbojanjuá: —Aca canÿe judío condmëna y atšna canÿe samaritaná. ¿Ntšamo cojt sobena atšë búyeshe juabuátjañama ca? (Cha chca tojánayana, er canjanopasana, judiëngna samaritanëngaftaca ndoñe monjanenatsëtná.)

¹⁰ Chora Jesús tbojanjuá: —Aca mo cojtsetatšëmbo nÿe ntšamo Bëngbe Bëtsá aca jatšetayama yojtsebošcá, y nda chë búyeshe cmojtšábuatjanañama, acna más cha catjuábuatjañe, y chana béjaye vida bomniye cmatjuabuátšëta ca.

¹¹ Y chë shembása tbojaniyana: —Señor, tondaye quecátsbomna nÿe mo ndayecnaca búyeshe jabuatsjuama, y chë atëfjóniñe corente tboca endmëna; y as, ¿ndayentšana cochjobenaye béjaye vida bomniye atšë juabuatšetayama? ¹² Bëngbe tempsca bëts taitá Jacob, quem atëfjóniñe bëngbiamá tojëftsanboshjona. Cachá, chabe básenga y chabe bayënga muentšana búyeshe tmojëftsanofšë; y ¿aca chabiamá más bëtsá comna ca? —chë shembása yojtšichamo.

¹³ As Jesús tbojanjuá: —Nÿetscanga chë quem búyeshentšana tmojofšënga, chënga cachiñe echantëtëjuendaye. ¹⁴ Pero chë chanjuabuátšëta ye búyeshentšana tojofšë chana ndocna te cachiñe quebochëtajuendaye. Cha chanjuabuátšëta ye búyeshna, chábeñe echántsemna mo cánÿentšë béjaytema obocaniñcá, chë nÿetsca tescama yomna tšabe vida jtsebmomna ca —cha tbojaniyana.

¹⁵ Chora chë shembása tbojaniyana: —Señor, chca búyeshe šmabuatšetá, as atšë ndoñe cachiñe chašondetsajuendama, ni búyeshe jauafcama moye jtsaboyama ndoñe chašondëtsemnama ca.

¹⁶ As Jesús tbojaniyana: —Motsa acbe boyá jachembuama y cochjésabo ca.

¹⁷ Chora chë shembása tbojanjuá: —Boyá ndoñe quetsátsbomna ca.

As Jesús tbojaniyana: —Tšabá tcjayana boyá ndoñe condbomna ca. ¹⁸ Er, aca shachna boyanga conjánabamna, y chë mora contsebmomnana, acbe boyá ndoñe quenátsmëna. Ntšamo tconjayancá ndegombre entsemna ca.

¹⁹ Chë shembása chca tojanuena ora, Jesúsbioye tbojaniyana: —Señor, mora atšë sëntsetatšëmbo, aca canÿa Bëngbe Bëtsabe juabna oyebuambnayá comnama. ²⁰ Bëngbe tempsca bëts taitanga quem tjoca Bëngbe Bëtsá monjánadorana; pero tšëngaftanga, judiënga šmondbétsichamo, bënga Bëngbe Bëtsá jadóramna, Jerusalenoca chë luare canmëna ca.

²¹ Chora Jesús tbojanjuá: —Shembása, šmoyeuná; canye tempo echanjóshjango y chora tsëngaftanga ndoñe quecmochátamna Bëngbe Bëtsá jadóramna, ni quem tjoye jabanana, ni Jerusalenoye jana. ²² Tsëngaftanga samaritanënga ndoñe quešmatábuatma nda šmetsadoránama; pero bënga aíñe fsënduábuatma, er chë atsebacayá judiënguentsana endabó. ²³ Pero ora entsoshjajuana, ya chë tempo tojobuache, ndaye ora chë Bëngbe Bëtsá chë Taitá ndegombre atschuanayënga, chë Espíritbeyeca y ndegombre juabnëngaca chábioye mochántadorana. Er chë Taitá entseboše chë chábioye adórayënga chca chamotsamama. ²⁴ Bëngbe Bëtsá, Espíritu endmëna; y chë chábioye adórayënga entsamna, chë Uámana Espíritbeyeca y ndegombre juabnëngaca cha jtsadoránana ca — Jesús tbojaniana.

²⁵ Chora chë shembása tbojaniana: —Atse sëndëtatšëmbo, canmëna chë Bëngbe Bëtsabe Uámana Uabuayaná, chë Cristo jabana ca; y cha chaojáshjango orna, cha nyetsca soyëngama cašochjabuayená ca.

²⁶ As Jesús tbojaniana: —Atse, chë ácaftaca entsoyebuambná cha, cha entsemna ca.

²⁷ Chëntscuana, Jesusbe uatsjëndayënga tmojtashajna, y tmojtsanëuatjaná, Jesús canye shembásaftaca yojtsoyebuambná causa. Pero ndocná Jesús tbonjantjá: ¿Ndayá cháftaca cojtseboše? o ¿Ndáyeca cháftaca cojtsoyebuambná ca?

²⁸ Chorna, chë shembása chabe uafcanëja tojésanboshjona, y chë pueblöye betscö tojtaná. Chocna, entsanga tojanëyana: ²⁹ “Mabënga canye boyabása jinÿama ca. Cha atse šonjauyana lempe ntšamo tijamcá. ¿Chë boyabása, chë Cristo tanántsemna ca?” —cha yojsichamo.

³⁰ As chë entsanga chë pueblöcana tmojánbocana y Jesús yojtsemnoye tmojánashajna.

³¹ Chca yojsopasánëntscuana, chë uatsjëndayënga Jesúsbiöye imojtseimpadana: —Buatëmbayá, batšatema mose ca.

³² Pero cha tojanëyana: —Atse canye soye jasama sëntsebomna. Tsëngaftanga chë soyama ndoñe quešmatstatšëmbo ca.

³³ Chora chë uatsjëndayënga tmojanontsé entjanayana: —¿Nderado nda jasama chabiama tojiyëbo ca?

³⁴ Y Jesús tojanëyana: —Chë šonjichmó cha ntšamo yojtsebošcá jamana, y chabe trabajo japochócana, chë soyënga mo sanacá atšbiana entsemna. ³⁵ Tsëngaftanga šmondbétsichamo: “Cabá canta ishinyë entsashbena jaja saná chaotsebínÿnama ca”; pero atse cbëyana: Minÿënga tša entsanga moye montsabëbana; chënga montsemna mo jajañe saná játbánama tojtseprontancá. ³⁶ Tsëngaftanga šmontsemna mo chë saná atbanayëngcá. Chëngna jajañe jtsetrabájayana, y chëngbe uacanána jtsësháchiñana. Cachcá, tsëngaftanga cmontsamna atšbiana entsanga júbuajana, chë nyetsca tescama yomna tsabe vida chamotsebomnama. Chë jaja saná átbánaye ora, jenënga y chë atbanayënga cánÿiñe oyejuayënga jtsemnana. Cachcá, chë entsanga átšbeñe chamojtsošbuaché ora, nyetscanga, chë atšbiana obuájajanënga y chë atšbiana trabájayëngnaca cánÿiñe oyejuayënga mochántsemna. ³⁷ Quem entsangbe ichámuana, canye ndegombre soye endmëna: “Chë jená canÿa jtsemnana, y atbanayana inÿa ca.” ³⁸ Atse tsëngaftanga cbonjichamó canye soye játbánama, y tsëngaftanga tondaye chešmatsma chca chaotsebínÿnama. Inÿënga chiñe bëtscá tmonjëftsetrabája, y tsëngaftangna, chëngbe trabajënguentsana šmojolograñe ca — Jesús tojánayana.

³⁹ Bëtscá entsanga, Samarioca pueblëntšënga Jesúsbeñe imojtsanošbuaché, ntšamo chë shembása tojanëyanama. Chë shembása tojanëyana: “Lempe ntšamo atse tijamcá cha šonjauyana ca.” ⁴⁰ As chë samaritanënga, Jesús yojtsemnentše tmojánashajna ora, tmojanimpadá chëngaftaca chaotsoquedáñama. Y as Jesús, uta te chentše tbojëftsanjétana. ⁴¹ Y más entsanga, cach ntšamo Jesús yojsanëtsëtsnacá tmonjanuena ora, chábeñe imojtsanošbuaché.

⁴² Y chë shembása chë entsanga tmojaniana: “Mora cocayé fsëntsošbuaché, ndoñe nýe ntšamo aca šcojáuyanama, sinó cach bēnga chábioye oído fsēnjabuajóyeca; y mora fsēntsetatšēmba ndegombre cha yojtsemna chë quem luare entsangbiana Atsebacayá ca.”

Jesús, canýe mandado uajabuachanabe básabioye tbojanshná

⁴³ Uta te chentšana, Jesús Samariocana tojáisanbocna y Galileoye tojataná. ⁴⁴ Cach Jesús mēntšá tojánayana: “Canýa Bēngbe Bētsabe juabna oyebuambnayá, cachabe luarentše oyenēnga ndoñe bētsá ntjabemēngana ca.” ⁴⁵ Galileoca oyenēnga Jerusalenoye tmojána, y tmojáninýe nýetsca bēts soyēnga ntšamo Jesús Bashco fiesta ora choca tojanmcá. Chýyeca, Jesús Galileoye tojtanashjango ora, chēnga tšabá tmojtanojja.

⁴⁶ Galileocna, Jesús cachiñe Caná puebloye tojésanashjango, chë béjayeca vínoye cha tojábementše. Choca yojtsemna canýe mandadbe uajabuachaná, y chabe uaquiñana Capernaum puebloca šocá yojtsejájona. ⁴⁷ Jesús Judeocana Galileoye tojánashjanguama, chë uajabuachaná tojanuena ora, Jesúsbioye tojána y ibojtseimpadana chabe yebnoye cháuama, chabe uaquiñá chabuetseshnáñama, er ya jtsóbanama yojtsemna ca. ⁴⁸ As Jesús tbojaniana: —Tšēngaftanga, Bēngbe Bētsabe obenana jinýanýiyama bēts soyēnga atše jamama ndoñe šmonjinýēse, átšbeñe ndocna te ntsošbuáchiyana ca.

⁴⁹ Chora, chë mandadbe uajabuachaná Jesúsbioye tbojaniana: —Taita, betesco mabo, atšbe uaquiñá cabá ndóbana ora ca.

⁵⁰ As Jesús tbojaniana: —Acbe yebnoye motsatá. Acbe uaquiñá ainá endētsomñe ca.

Chë boyabásana tojanošbuaché ntšamo Jesús tbojaniancá y tojtaná. ⁵¹ Cha yojsataye orna, chabe oservēnēnga tmojānbocana jajébenguama y tmojaniana: —Acbe uaquiñá tšabá entsatsmēna ca.

⁵² As cha tojanatjá: —¿Ntseco orscana tbēnjatēcja ca?

Y chēnga tmojanjuá: —Tonjopasá yēfse, mošenana orscana chë calentora tbonjábosana ca.

⁵³ Chora chë taitá tojanenojuabó, cachca ora Jesús tbojaniana: “Acbe uaquiñá ainá endētsomñe ca”. Y cha y nýetscanga chabe yebnentše oyenēnga Jesúsbeñe imojt-sanošbuaché.

⁵⁴ Ntšamo Jesús chora, chë uajabuachanabe uaquiñabiama tojanmcá, Judeocana Galileoye yojsataye orna, yojamna chabe utama chca bēts soye jamama, Bēngbe Bētsabe obenana jinýanýiyama, Galilea luaroca.

5

Jesús canýe jama ndobenábioye tbojanshná

¹ Baseftayté chentšana, chë judiēnga canýe oboyejuaye te imojtsebmna ora, Jesús Jerusalenoye tojána. ² Choca, chë Oveshēngbe amashjuana ca uabáinentše yojamna canýe binche uafjájónaye, entsangbe pormániñe. Chë béjayna judiēngbe biyañe Betzata ca inauabaina. Chë béjaye juachañe shachna amashjuana otsbojebniñe inamna. ³ Chiñna ba šoquēnga jtanēnga, coshetēnga y jama ndobenēnga imojtsecjana; chë béjaye chamobonjoma imojtsobátmana. ⁴ (Nderado nderado, Bēngbe Bētsábioica canýe ángel yojanamana jastjanguana chë béjaye jabónjuama. Chca ora, chë béjayoye natsana tojamashēnguá, chabe šocanama tšabá jtsatsmēnana.) ⁵ Chë šoquēnguiñe canýe boyabása inamna, unga bnētsana y posufta uatama jama ndobená. ⁶ Jesús chë jajonábioye tbojáninýe ora y ba uatama chca yojamnana tojántatšēmbona ora, tbojantjá: —¿Quecojtseboše tšabá jtsatsmēnana ca?

⁷ Y chë šocá tbojanjuá: —Taita, ndocná quetsátsbmna nda chašuájabuache béjayoye jamashēnguama, chë béjaye tojtsobonjná ora. Y atše béjayoye jamashēnguama stseboše ora, inýa atšbe natsana jtsamashēnguana ca.

⁸ Y Jesús tbojaniana: —Matētsbaná, acbe tjuashe mesocñe y matontšé jóyenana ca.

⁹ Cach ora chë boyabása tšabá yojsatsmëna, chabe tjuashe tojésanocñe y tojanontšë jtsanana. Chca tojanopasá ora, chë ochnayté inamna. ¹⁰ Chíyeca, chë tbojanshnábioye chë judiënga tmojanianyana: —Mëntena ochnayté. Mënté ndoñe quenátópodena aca tjuashe jtsecutsnana ca.

¹¹ Y chë boyabása tojanéyana: —Chë šonjashná cha mëntšá šonjauyana: “Acbe tjuashe mesocñe y montšé jóyenana ca”.

¹² As chënga tmojantjá: —¿Nda yojtsemna chë “acbe tjuashe mesocñe y montšé jóyenana ca” tcmojuayaná ca?

¹³ Pero chë shnaná ndoñe yontsetátšëmbo nda tbojanshnama. Chocna bëtská entšanga imojtsemna; chcasna, Jesús chëngbe tsëntsajana tojanenatjëmbe.

¹⁴ Chentšana, Jesús Bëngbe Bëtsabe bëts yebnentšë chë boyabásabioye tbojáninýena y tbojanianyana: —Mouena; mora aca ya ndoñe šocá quecátsmëna; bacna soyënga ndoñe cachiñe cattsama. Aíñese, acbiamu puerte mal echanjopása ca.

¹⁵ Chë boyabása tojtsanoñe y chë judiënga tojanéyana: —Chë šonjashná cha Jesús entsemna ca.

¹⁶ Chë causa, chë judiënga imojtsenguaye ntšamo Jesús ndayánaca jabórlana, cha ochnayté chë soyënga tojanmama. ¹⁷ Pero Jesús tojanéyana: “Atšbe Taitá nyets tempo tšabe soyënga endbëtsama; cachcá, átšnaca tšabe soyënga sëntsama ca.”

¹⁸ Jesús tojanma ntšamo ochnayté ndoñe yonjanapodencá, y Bëngbe Bëtsabiamu tojánayana “Atšbe Taitá ca”. Mëntšá Jesús yojsanobiamná cach Bëngbe Bëtsacá. Chama, chë judiënga más imojtseboše Jesús jóbama.

Bëngbe Bëtsabe Uaquiñabe obenana

¹⁹ Chentšana Jesús tojanéyana: “Ndegombre šcuayana: Bëngbe Bëtsabe Uaquiñá, nýe cachabe cuenta tondaye quenátobena jamana. Cha jtsonýayana ntšamo chabe Taitá tojtsamcá. Ntšamo chë Taitá tojtsamcá, chë Uaquiñánaca jtsamana. ²⁰ Er Bëngbe Taitá chabe Uaquiñábioye bondbobonshana, y lempe ntšamo cha tojtsamcá chábioye bondinýinýná; y más bëts soyënga bochanjinýinýiye, chë soyëngama tšëngaftanga chašmenjanama.

²¹ Chë Taitá endama obanënga chámuatayenama y tšabe vida chamotsebomnama; cachcá, chë Uaquiñá entsama tšabe vida chamotsebomnama, ndëmuanýënga cha tojtsebošcá.

²² Chë Taitá ndocnabiamu jatichámuana tšabá o ndoñe tšabá yontsama ca. Chabe Uaquiñábioye nyets obenana tbonjatšëta nyetscangbiamu jayanama tšabá o ndoñe tšabá tmontsamama. ²³ Chca, chënga chamuinýinýé Bëngbe Bëtsabe Uaquiñá puerte uamaná yomnama, ntšamo Bëngbe Bëtsá puerte uamaná yomnama nyetscanga mond-betsinýinýnacyá. Nda chë Uaquiñábioye ndoñe más uamaná tbontsebiamná, cach ndoñe más uamana ntsebiamnayana chë Taitábioye, nda chë Uaquiñá tbojichmóbioye.

²⁴ “Ndegombre šcuayana: Nda ntšamo atšë sëntsichamcá šojoyeuná, y chë muentšë šonjichmó chábeñe tojtsošbuaché, chë nyetsca tescama yomna tšabe vida jtsebomnana. Chabiamu chë Uaquiñá ndoñe queochátayana castiganá chaotsemna ca. Chca, Bëngbe Bëtsabiamu cha ya ndoñe más mo obanacá queochátsmëna, chábeñe ndošbuáchiye causa; y ya ndoñe nyetsca tescama castiganá queochátsmëna. Y aíñe, chë nyetsca tescama yomna tšabe vida echántsebomna.

²⁵ “Ndegombre šcuayana: Chë jobuáchama te ya tojjobuache. Chë te, chë Bëngbe Bëtsabiamu mo obanëngcá imomnënga mochanjouena Bëngbe Bëtsabe Uaquiñá jtsóyebuambnayana. Nda chca tšabá chašojoyeuná cha, tšabe vida echántsebomna. ²⁶ Er ntšamo Bëngbe Taitá obenana endbomncá, cachá jamama entšanga vida chamotsebomnama, chabe Uaquiñábioynaca obenana tbojatšëta entšanga vida chamotsebomnama jamama. ²⁷ Chë Uaquiñá endmëna nda Bëngbe Bëtsá Entšá tbojábema; chíyeca chë Taitá chábioye obenana tbojatšëta nyetscangbiamu jayanama tšabá o ndoñe tšabá tmontsamama. ²⁸ Chama ndoñe matenjanana. Er canýe tempo echanjobuache, y chora chë Uaquiñá obanënga echántsachembuana; chënga mochanjouena

y cach ora, chëngbe oyenocana mochanjésebocana. ²⁹ Tšabe soyënga tmojëftsemënga, obanënguentsana mochántayena, chë nyetsca tescama yomna tšabe vida jtsebomnama. Pero bacna soyënga tmojëftsemëngna obanënguentsana mochántayena nyetsca tescama castigánënga jtsemnama ca” —Jesús tojanéyana.

Jesús, ndegombre Bëngbe Bëtsabe ichmoná inamna

³⁰ Mëntsánaca Jesús cachatbiama tojánayana: “Nye átsbeyeca tondaye quetsátobena jamama. Chë Taitá šontsemánda ntšamo nyetscangbiama jayanama tšabá o ndoñe tšabá tmontsamama. Nye chca atše sentsobena chë soye jamama. Ndoñe quetsátsboše jamana nye ntšamo cach atše stsebošcá; pero sempre sëndbétseboše jamama, ntšamo Taitá, chë šonjichmó cha tojtsebošcá. Chýyeca atše nyetscangbiama sentsichamo tšabá o ndoñe tšabá tmontsamama; y ntšamo nyetscangbiama sentsichamcá, ndegombre endmëna.

³¹ “Ntšamo cach atšbiama tijayanama, ndegombre entsemna ca stsichámëse, ntšamo stsichamcá, nyetscangbiama tondaye ntsámanana. ³² Pero inya entsemna. Cha endétatšëmbo y entsichamo ntšamo ndegombre atšbiama yomncá; y sëntsetatšëmbo ntšamo cha atšbiama yojtšichamcá, nyetscangbiama aíñe yojtšámanama. ³³ Tšëngaftanga ínÿenga šmojanichamó atšbiama Juan jatjayama; y ntšamo cha tcmojauyancá ndegombre endmëna. ³⁴ Masque chë soyënga cha tcmojáuyana, ndoñe quešnatájaboto ndocna entsá atšbiama chaotsichamo ‘cha aíñe chca endmëna ca’. Atše quem soyënga sentsichamo ndayá nye tšëngaftanga atsebácanënga chašmotsemnama. ³⁵ Juan enjamna mo canye uajuinÿanësha tojtšajuinÿana y tojtšabuashinÿinÿancá. Tšëngaftanga chabe buashinÿinÿanana šmonjinÿe, y šmonjábóšena rato cháftaca oyejuayënga jtsemnama. ³⁶ Pero chë atše sënjama soyëngacna más entsinÿinÿena ntšamo atšbiama ndegombre yomncá, chë ntšamo Juan atšbiama tojánayanama. Ndayá atšbe Taitá šojabonyé jamama, ntšamo atše sentsamcá, entsinÿinÿná ndegombre chë Taitá šojichmoma. ³⁷ Atšbe Taitá, chë šojichmó chánaca entsichamo ntšamo atšbiama ndegombre yomncá, masque ndocna te chabe oyebuambnayana chešmatuena, ni ntšamo cha yomncá chešmátinÿe. ³⁸ Pero tšëngaftangbe ainanoye chabe palabra ndoñe tonjómashëngo, cha tbojichmóbeñe tšëngaftanga ndoñe quešmatošbuaché causa. ³⁹ Tšëngaftanga, Bëngbe Bëtsabe palabra tša jtsatsjëndayana, er šmondobátmana, chca jtsamëse chë nyetsca tescama yomna tšabe vida jónÿenama. Y Bëngbe Bëtsabe uabemana palabrenguiñe atšbiama endayana ntšamo ndegombre yomncá; ⁴⁰ pero masque chca, tšëngaftanga ndoñe quešmátsboše atše jtšëstonana, y chca, tšabe vida jtsebomnama.

⁴¹ “Atše ndoñe quetsátsboše entsanga yapa tšabá atšbiama chamotsichámuama. ⁴² Y inÿe soye, atše puerta cbondëbuatma, y sëndétatšëmbo tšëngaftanga Bëngbe Bëtsá ndoñe šmondobonshánama. ⁴³ Atšna atšbe Taitabe cuenta sënjabo, y tšëngaftanga ndoñe quešmátsboše atše jofjana. Pero inya, cachabe cuenta tojabábioye cocayé aíñe šmatjofja. ⁴⁴ Tšëngaftanga corente jésebošana, ínÿenga tšëngaftangbiama tšabá chamotsichámuama, y ínÿengbiama tšabá jtsichámuama; pero ndoñe ntsebošana chë nye canye Bëngbe Bëtsá tšëngaftangbiama cachcá chaotsichámuama. Chca šmojtsamëse, ¿ntšamo šmochtsobena Bëngbe Bëtsabeñe jtšošbuáchiyana? ⁴⁵ Ndoñe šmattsejuabnaye, atšbe Taitabe delante tšëngaftangbe contra atše chjayana ca ntšamo tšëngaftanga šmojtsamama. Tšëngaftanga tša jtsobátmanana atsebácanënga jtsemnama, chë ntšamo Moisesbe leyíñe endayancá šmojtsamama; pero ndegombre, ntšamo cha tojayancá, cach tšëngaftangbe contra entsemna. ⁴⁶ Tšëngaftanga, chë Moisés tojëftsanabema soyiñe šmojtšošbuachese, átsbeñnaca šmattšošbuáchiye, er cha atšbiama tojanábema. ⁴⁷ Pero chë tojanábema soyiñe tšëngaftanga ndoñe šmontšošbuachesna, ¿ntšamo šmochjobenaye chë atše sentsichamo soyënguiñe jtšošbuáchiyana ca?” —Jesús tojanéyana.

6

Jesús shachna uaranga boyabásenga saná tojanacaredadó
(Mt 14.13-21; Mc 6.30-44; Lc 9.10-17)

¹ Chë soyënga tojanopasá chentsana, Jesús chabe uatsjédayëngaftaca tojána Galilea uafjónaye chenguana. Chë uafjónayna Tiberias cánaca inauabaina. ² Ba entsanga imojtséstona, er chënga tmojáninýe cha bëts soyënga jtsamana, šoquënga jtsashnayëse. ³ As Jesús tjoye tojántsjua, y choca chabe uatsjédayëngaftaca tojanótbema. ⁴ Ya judiëngbe canýe fiesta, chë Bashco fiesta, yojétsobeco.

⁵ Jesús tojanótbema ora, tojanontješé y tojánanýe ba entsanga chábioye imojet-sebéconaye. As Felípbioye tbojanianyana: —¿Ndayentše saná cuanjabuámiye nýetsca quem entsanga chamosama ca?

⁶ Jesús chca tbojanianyana, ana Felípbioye jinýama ntšamo cha tabuanjojuama; er cach Jesús tšabá inatátsëmbo ndayá jamama. ⁷ Y Felipe tbojanjuá: —Ni mo uta patse denario crocenánaca nanjopódia tandëse jabuámiyama, nýetsca entsanga nýe mo batšatémnaca chamuétsesama ca.

⁸ Chorna, Jesusbe canýe uatsjendayá, Andrés ca uabainá, Simón Pédrëbe catsata, Jesúsbioye tbojanianyana: ⁹ —Muentše entsemna canýe básetema y cha shachna cebada tandëse y uta beónata entsebomna. Pero, ¿ndayase nýe nýetšatema chëfta entsangbiamca?

¹⁰ As Jesús tojánayana: —Entsanga méyana chamotbiamca ca.

Becá shácuana chë luariñe inamna, y nýetsca entsanga chiñe tmojanoshéntsjatbiamca. Chë entsanguentše shachna uaranga boyabásenga imojtsemna. ¹¹ Chora Jesús, chë tandëse chabe cucuatšihne tojanca, y Bëngbe Bëtsábioye chë tandëšama tbojtanchuá; y chabe uatsjédayënga tojanëjatá, y chë uatsjédayëngna nýetsca entsanga imojtset-biámanënga tmojanatšatá. Cachcá Jesús chë beónaca tojanma, y ntšamo entsanga imoanbošcá tmojanatšatá. ¹² Nýetscanga tmojanse y tmojtanoshachá ora, Jesús chabe uatsjédayënga tojanéyana: —Chë ojamnëtemënga šmochtsatbananga, tondaye nýe cachcá ntjëftsonýayama ca.

¹³ As chënga tmojanatbaná, y chë tmojanse shachna cebada tandësentšana tojanójamëtemëngaca, bnëtsana uta sbarëcua tmojanajutjé. ¹⁴ Chë entsanga quem bëts soye Jesús jamama tmojáninýe ora tmojánayana: “Ndegombre quem boyabása, chë quem luaroye jabama Bëngbe Bëtsabe juabna jabóyebuambayama cha entsemna ca.”

¹⁵ Jesús yojtsetátšëmbo entsanga chëngbe rey jabemama imojetsebošama. Chíyeca cach tjoye tojtsaisanoñe canýa jtsomñama.

Jesús béjaye juatsbuacá yojtsaye
(Mt 14.22-27; Mc 6.45-52)

¹⁶ Tojanibétata ora, Jesusbe uatsjédayënga chë uafjónayoye tmojantsmá; ¹⁷ barquëshañe tmojtanenojayé, y tmojanontšé jenashbuachënguana, chca, Capernaumoca jenbocnama. Ya ibeta yojtsemna, y Jesús cabá ndoñe chëngbioye ntashjanguana. ¹⁸ Chca imojtsenashbuachnëjuana orna, chë béjayiñe jabuache binýia tojanóshjango y bëts olëshënga chë barquëshoye yojtsóyantšetaye. ¹⁹ Shachna o chnënguana kilómetro chënga tmojána ora, tmojáninýe Jesús chëngbioye yojtsebëconaye, béjaye juatsbuacá yojtsaye. Chënga chca tmojáninýe ora tša tmojanocochauatjaná, ²⁰ pero Jesús tojanéyana: “Atše sëndmëna; ndoñe matauatjëngana ca.”

²¹ Chora chë uatsjédayënga oyejuayënga imojtseboše Jesús chë barquëshoye jofjana, y ndoñe bënëntscose ya chë imojtsaye luaroye tmojánashjajna.

Entsanga Jesús tmojánanguango

²² Yëfsana, nýetsca entsanga, chë uafjónaye chenguánoica tmojananoquedanga tmojáninýe, chë inýe yëfsana chë nýe canýe barquëshaja yojuamnëshañe Jesusbe

uatsjéndayënga tmojtsanoñama, y Jesús chëngaftaca ndoñe tonjánama. ²³ Pero chëntscuana, Tiberias pueblentšana inye barquëshangá tojanáshjajna canye luarentse, chë Bëngbe Utabná Jesús chabe Taitábioye tbojtanchuá chentšana, entšanga saná tmojanse luare béconana. ²⁴ Asna, ni Jesús ni chabe uatsjéndayënga chentse ndoñe montsemnama chë entšanga tmojáninýe ora, chë barquëshangañe tmojtanenojayé y Capernaumoye tmojána Jesús jetsenguanguama.

Jesús, chë nyetsca tescama yomna tšabe vida jtsebomnama tandëse

²⁵ Chë uafjónaye chenguánoye tmojánashjajna ora, Jesús tmojáninýena y mëntšá tmojantjá: —¿Buatëmbayá, ntseco ora muentse tcojášhango ca?

²⁶ Y Jesús tojanéyana: —Ndegombre cbëyana, tšëngaftanga ndoñe atse quešmatsnguá, chë bëts soyënga tijamama, sinó nýe chë jtoshachaye nyetšá tandëse šmojasama. ²⁷ Ndoñe matenángmenana chë nýe ndoñe bën y jopochócana sanama; chë ndmopochócaye saná, chë nyetsca tescama yomna tšabe vida jtsebomnama saná šmochjúanguango. Chë saná, Bëngbe Bëtsá Entšá tbojanbemá cmochanjátšataye, er Bëngbe Bëtsá chë Taitá tonjinýanyé, tšabe soyëngaca, cha chábioye tbojuábuayanama ca —tojánayana.

²⁸ Chora chë entšanga tmojantjá: —¿Ndayá fchjama ntšamo Bëngbe Bëtsá yojtsebošcá chaotsemnama ca?

²⁹ Chca tmojantjá ora, Jesús tojanéyana: —Chë Taitá entseboše tšëngaftanga chabe ichmonábeñe chašmotsošbuáchema ca.

³⁰ Chora chënga tmojanianyana: —¿Ndaye tšabe soye cochjama acbe obenana bënga jinýanýiyama ca? Chë soye chaftsjinýëse, ácebeñe fchantsošbuáchiye. ¿Bëngbiama taic-ochjama ca? ³¹ Bëngbe tempsca bëts taitanga entšanga ndoyenoca maná ca uabaina saná tmojanse. Bëngbe Bëtsabe uabemana palabrenguiñe mëntšá endayana: “Cha celoca tandëse tonjanatšatá chamosama ca” —chënga tmojánayana.

³² Chora Jesús tojanéyana: —Ndegombre cbëyana, Moisés chënga ndoñe chë celoca tandëse tonjanatšatá; Bëngbe Bëtsá Bëngbe Taitá chëngbioye tojanatšatá chë maná ca uabaina tandëse; y cha endmëna nda celocana chë ndocna te ndmopochócaye tandëse ndegombre cmondatsatná. ³³ Er Bëngbe Bëtsábíocana tandëse entsemna chë celocana tojastjanguá; y cha quem luare entšangbiama entsama chë nyetsca tescama yomna tšabe vida chamotsebomnama ca —cha tojanéyana.

³⁴ Chora chënga tmojanimpadá: —Taita, chë tandëse sempre šcochtsatšatnaye ca.

³⁵ Y Jesús tojanéjua: —Atse sëndmëna entšanga chë nyetsca tescama yomna tšabe vida jtsebomnama tandëse. Nda atse chašojtsëstona, sempre oyejuayá echanjëftsemna y Bëngbe Bëtsabe soyënga nyets tempo echanjesóbomñe, mo nda nyets tempo saná totsobomñcá, y ndocna te tbontsishëntsaná. ³⁶ Pero ntšamo ya tcbonjauyancá, tšëngaftanga atse šmonjinýe y cabá ndoñe átšbeñe quešmatošbuaché. ³⁷ Nda atšbe Taitá atšbiama tbojabocacá, cha atse šochantsëstona; y nda átšbioye šojtsëstona, átšbentšana quichtëtábocna. ³⁸ Er atšna celocana sënjabo chë šojichmó cha ntšamo yojtsebošcá jamama, y ndoñe nýe ntšamo atse stsebošcá. ³⁹ Y chë šojichmó cha entseboše, ni mo canya chë atšbiama tojabacacá chentšana, atse chailesenciá pochocaná chaotsemnama; y quem luare jopochócama tena, nyetscanga atšbiama tojábacacangbiama chámuatayenama atse chaimama. ⁴⁰ Er atšbe Taitá entseboše, nda chabe Uaquiñábioye tbojinýe y chábeñe tojtsošbuaché, chë nyetsca tescama yomna tšabe vida chaotsebomna, y quem luare jopochócama tena, cha cháuatayenama atse chaimama ca —Jesús tojanéyana.

⁴¹ “Atse sëntsemna chë celocana tojóshjango tandëse ca” Jesús tojanéyana causa, chë judiënga tmojanontsé chabiamama podesca ichámuana. ⁴² Chënga mëntšá imojtsichamo: —¿Mua ndoñe Jesús yondmëna, chë Josebe uaquiñá? Chabe bëtsëtsata bënga tmotsábuatmñe. ¿Ntšamo cha mora yochjátichamo celocana tojástjango ca?

⁴³ As Jesús tojanéyana: —Atšbiamá ndoñe podesca matichámuana. ⁴⁴ Ndocná quenátobena atše juastana, chë Taitá, chë šojichmó cha, ainaniñe chca chaotsebošama ndoñe tbonjuajabuáchese; y atše chanjama cha cháuatayenama quem luare jopochócama te. ⁴⁵ Chë tempsquënga Bëngbe Bëtsabe juabna oyebuambnayënga mëntšá tmojanábema: “Cach Bëngbe Bëtsá nyetscanga echanjabuatambá ca.” Chcasna, nda atšbe Taitábioye tbojoyeuná, y ntšamo chë Taitá tbojabuatëmbacá tojuatsjinýe, cha atše šochanjuasto.

⁴⁶ “Ndocná atšbe Taitá tbonjinýe. Nýe chë Bëngbe Bëtsábiocana tojabá aíñe. ⁴⁷ Ndegombre šcuayana: Nda átšbeñe tojtsošbuaché, chë nyetsca tescama yomna tšabe vida echántsebomna. ⁴⁸ Atše sëndmëna entšanga chë nyetsca tescama yomna tšabe vida chamotsebomnama tandëse. ⁴⁹ Masque tšëngaftangbe bëts taitanga, entšanga ndoyenoca chë maná ca uabaina saná tmojanse, pronto tmojanóbana. ⁵⁰ Pero atše sëntsoyebuambná ndayá chë celocana tojóshjango tandëšama. Nda chë tandëse tojase, ndoñe queochatóbana. ⁵¹ Atše sëntsemna entšanga chë nyetsca tescama yomna tšabe vida jtsebomnama tandëse, chë celocana tojóshjanguëse. Nda quem tandëse tojase, nyetsca tescama nýe ainá echanjesomñe. Chë chanjátšataye tandëšna, cach atšbe cuerpo entsemna. Chca chanjama quem luare entšanga chë nyetsca tescama yomna tšabe vida chamotsebomnama ca” —Jesús tojánayana.

⁵² Chora chë judiënga tmojanontsé enatsëtsnayana: —¿Ntšamo cha yochjobenaye cachabe cuerpo jatšatayana bënga jasama ca?

⁵³ As Jesús tojanéyana: —Ndegombre šcuayana: Tšëngaftanga Bëngbe Bëtsá Entšá tbojanbemabe cuerpo ndoñe šmonjase y chabe buiñe ndoñe šmonjofšese, ndegombre tšabe vida ndoñe quešmochátsbomna. ⁵⁴ Nda atšbe cuerpo tojase y atšbe buiñe tojofšé, chë nyetsca tescama yomna tšabe vida echántsebomna, y quem luare jopochócama te atše chanjama cha cháuatayenama. ⁵⁵ Atšbe cuerpo ndegombre saná endmëna, y atšbe buiñe ndegombre ofšëšnayıye. ⁵⁶ Nda atšbe cuerpo tojase y atšbe buiñe tojofšé, átšeftaca cánýiñe mo canýacá echántsemna, y átšnaca cháftaca. ⁵⁷ Atšbe Taitá, chë šojichmó cha, vida endbomna, y atše chábeyeca vida sëndbomna; cachcá, nda atšbe cuerpo tojase, chana átšbeyeca vida jtsebomnana. ⁵⁸ Chë ndaye soyama atše sëntsoyebuambná, atšbe cuerpo y atšbe buiñe, entsemna chë celocana tojóshjango tandëse. Masque tšëngaftangbe bëts taitanga chë maná ca uabaina tandëse tmojanse, pronto tmojanóbana; pero quem tandëse ndoñe cachcá quenátsmëna. Nda quem tandëse tojase, nýe nyets tempo vida echanjesóbomñe ca —Jesús tojánayana.

⁵⁹ Chë soyëngna Jesús tonjanabuatambá Capernaum pueblentše, chë judiëngbe enejuana yebnentše.

Chë nyetsca tescama yomna tšabe vida jtsebomnana palabrënga

⁶⁰ Chca tmojanuena ora, banga Jesusbe ústonënga imojtsichamo: —Ntšamo cha entsichamcá yapa totcá entsemna mo ndegombre cuaftsemncá joyeunayama. ¿Nda buanjóyeunaye ca?

⁶¹ Jesús yojtsetátšëmbo chënga ndoñe tšabá imontsichámuama; as, chënga tojanatjá: —¿Ntšamo cbontsëtsëtsnacá ndoñe tšabá cmontsëuenana ca? ⁶² Y chcasna, Bëngbe Bëtsá Entšá tbojanbemá, chë cha tempo inamna luaroye tojëttsjuama šmojinýese, ¿ntšamo šmattsejuabnaye? ⁶³ Bëngbe Bëtsabe Espíritu entsama entšanga chë tšabe vida chamotsebomnama. Chë cuerpo ndoñe uámana soye quenátsmëna; chë tcbonjúuyana soyënguiñe entsemna chë Uámana Espíritbe uajabuáchenana y chë tšabe vida. ⁶⁴ Pero masque chca entsemna, tšëngaftangbentšana banga átšbeñe ndoñe quešmatošbuaché ca —Jesús tojánayana.

Er Bëngbe Bëtsabe soyëngama entšanga jábuayenama Jesús tojanbojatsé orscana, cha inatátšëmbo ndëmuanýënga chábeñe ndoñe mochanjanošbuáchiye, y nda chë uayayëngbe

cucuatšiñe yochjéftsayentšbashejuana. ⁶⁵ Y Jesús yojtétóntša oyebuambnayana: — Chíyeca, atše tšëngaftanga tcbonjáuyana: “nda atše juastama ainaniñe chaotsebošama atšbe Taitá ndoñe tbonjuájabuache, cha ndoñe quešochatasto ca”.

⁶⁶ Chë causa, chentšana, ba chabe ústonënga cachcá tmojesanonýá, y cháftaca ya ndoñe imontsajna. ⁶⁷ Chora Jesús, chë bnëtsana uta uatsjëndayënga tojanéyana: —¿Y tšëngaftángnaca, jtsoñama y atše jéseboshjonama šmojtseboše ca?

⁶⁸ Chora Simón Pedro tbojanjuá: —Bëngbe Utabná Jesús, ¿chcasna ndábioye fchjanga ca? Nýe aca šcontsëtsëtsná chë nýetsca tescama yomna tšabe vida jtsebomnama palabrënga.

⁶⁹ Acbeñe fsëntsošbuaché, y mora fsëntsetatšëmbo aca chë Bëngbe Bëtsabe Uamaná comnama ca.

⁷⁰ Chora Jesús tojanéyana: —Atše tcbonjabacacá, chë bnëtsana útata; pero canýa tšëngaftanguentšana, mo Satanasbe canýe trabajayacá entsemna ca.

⁷¹ Judas Iscariote, chë Simonbe uaquiñabiama chca Jesús tojánayana. Er chana masque canýa chabe bnëtsana uta uatsjëndayënguentšá inamna, Jesús uayayëngbe cucuatšiñe yochjáftsayentšbashejuana.

7

Jesusbe catsátanga chábeñe ndoñe montsanošbuaché

¹ Chë soyënguentšana, Jesús Galilea luarëjana yojánana. Chë tempo, judiënga imojtsanjuabnaye ntšamo jamëse cha jóbama. Chíyeca, Jesús ndoñe yontseboše Judeoye jama.

² Chora, judiëngbe canýe bëts fiesta semana yojtsobeco. Quem fiestënguëntscuana, chë judiënga imojanamana tambënguiñe jtsiyenana. ³ As chora Jesusbe catsátanga tmojanianyana: —Muentše ndoñe catjoquéda; Judeoye motsa, choca condbomna ústonënga, ntšamo contsamcá chócnaca chaminýama. ⁴ Er nda tojtseboše chamotsábuatmama, chabe soyënga ndoñe iytëcana ntsamana. Aca bëts soyënga Bëngbe Bëtsabe obenánaca contsamësna, motsa y nýetscangbe delante chca cochjama ca —chënga tmojanianyana.

⁵ Er ni mo cach Jesusbe catsátanga chábeñe ndoñe montsanošbuaché. Chíyeca chënga chca tmojanianyana.

⁶ Chora Jesús tojanëjua: —Atšbe ora cabá ndoñe quentóshjango, pero tšëngaftangbiamama mocna órnaca tšabá endëtsomñe. ⁷ Chë nýe quem luarama enójuabnaye entšanga ndoñe quemátobena tšëngaftanga jtsëbuayënjana, pero átsbioyna aiñe, er atše puerte tšabá sëntsinýanýná ntšamo chënga imojtsamcá ndoñe tšabá yontsemnama. ⁸ Tšëngaftanga chë fiestama šmochjá. Atšbe ora cabá ndoñe quentóshjango. Chíyeca atše choye ndoñe quicháta ca —cha tojánayana.

⁹ Jesús chë soyënga tojanéyana y cach Galileoca tojtsanoquedañe.

Chë tambënguiñe jtsiyenama fiesta

¹⁰ Chabe catsátanga chë fiestoye tmojána chentšana, Jesúsna tojána, masque ndoñe entšángbeñe, sinó mo iytëcana cuenta. ¹¹ Chë fiestocna, judiënga Jesús imojtsenguaye y imojtsichamo: —¿Ndayentše chë boyabása yojtsemna ca?

¹² Entšángbeñe ba soyënga chabiamama iytëcana imojtsichamo. Inýenga chabiamama imojtsichamo: “Cha tšabia endmëna ca”; pero ínýengna: “Cha entšanga entsaíngña ca”.

¹³ Pero ndocná Jesusbiamama becá añémoca yontsoyebuambná, chë judiëngbe amëndayëngbiamama imojtsauatja causa.

¹⁴ Chë fiesta semana tsëntsañe yojtsó ora, Jesús Bëngbe Bëtsabe bëts yebnentše tojánamashëngo, y tojanontsé jabuátambana. ¹⁵ Chentše chë judiënga, ntšamo Jesús tojanabuatambacá tmojanuena ora, ojnanánënga imojtsichamo: —Bëtscá ntjuatsjinýcá, ¿ntšamo nýetsá nantsetatšëmbo ca?

¹⁶ As Jesús tojanëjua: —Atšbe buatëmbayana ndoñe nýe átsbentšana quenatóbocana, ndayá chë šonjichmó chábentšana. ¹⁷ Nda tojtseboše jamama ntšamo chë šojichmó cha

yajtsebošcá, cha echántsetatsëmbo atšbe buatëmbayana Bëngbe Bëtsábiocana yóbocanama o nÿe átšbentsana. ¹⁸ Nda nÿe cachabe juábnaca tojtsoyebuambná, jtsebošana entšanga más bëtsá chamobemama; pero nda bëtscá tojtsama, chë tbojichmóbioye entšanga más bëtsá chamobemama, cha cocayé ntšamo ndegombre yomncá jtsóyebuambnayana, y ndocnábioye ntseíngñayana.

¹⁹ “Ndegombre, Moisés tšëngaftangbiana ley tojëftsanaboshjona. Pero masque chca, tšëngaftanguentšá ndocná quenátama ntšamo cha tojëftsanmandacá. Y ¿ndáyeca šmojtseboše atše jóbama ca?” —Jesús tojanatjá.

²⁰ Chora entšanga tmojanjuá: —¿Ndegombre aca bacna bayëjbe juabna contsambá! ¿Nda yajtseboše aca jóbama ca?

²¹ Chora Jesús tojanëyana: —Nÿetsca tšëngaftanga ojnánënga atše šmontsonyá, atše canÿe ochnayté canÿe entšá tijashnama. ²² Pero, Moisés tcmonjanamëndá básetema base bobachtema chë más delicadentše jatëtšana, chaotsinýnama (ndoñe nÿe Moisésbeyeca chca, sinó Moisesbiana más tempsca bëts taitanga chca jamama imojanamánayeca); y tšëngaftanga canÿe básetema base bobachtema chë más delicadentše jatëtšana, masque chë te canÿe ochnayté totsomñëse. ²³ Y mora, ntšamo Moisés tcmojëftsanamëndacá ndoñe cachcá ntjonýayama, canÿe básetema chca jatëtšana masque ochnayté; as, ¿ndáyeca atše šmojtsayaná, atše ochnayté canÿe entsabe nÿets cuerpo tijashnama? ²⁴ Nÿe batsá jinÿëse, ínÿengbiana ndoñe matichámëngana tšabá o ndoñe tšabá tmonjama ca. Ntšamo chë soyënga ndegombre bëtsemnama natsana lempe tšabá jshëtsetatsëmbëse, šmochjayana tšabá o ndoñe tšabá tmonjama ca —Jesús tojánayana.

Jesús tojánayana ndëmocana cha tojánabama

²⁵ Chora básëftanga Jerusalemoca oyenënga tmojanontšë ichámuana: —¿Mua ndoñe yontsemna chë jóbama montsenguá cha ca? ²⁶ Masque ba entšangbe delante entsoyebuambná, ndocná chábioye ndocá ntjauyanana. ¿Nderado mo chë bëngbe amëndayënga imojtsejuabná cha chë Cristo, chë Uámana Uabuayaná yajtsemna ca? ²⁷ Pero bënga mondëtatšëmbo ndëmocá quem boyabása yomnana; y chë cuenta, chë Cristo chaojabo ora, ndocná queochátstatšëmbo ndëmocana cha yochjabama ca —chënga imojtsichamo.

²⁸ Chca tojanuena ora, Bëngbe Bëtsabe bëts yebnentše Jesús yojtسابuátambayëntscuana, cha jabuache tojánayana: —¿Tšëngaftanga šmojtsejuabná atše ndegombre šmabuatma, y ndëmocana tijabama šmojtsetátšëmbo ca! Pero nÿe atšbe cuenta, ndoñe chiyátabo, ndayá canÿa šojichmóyeca, nda ntšamo ndegombre yomncá nÿetsca soyëngama endbëtsoyebuambnaye; y tšëngaftanga cha ndoñe quešmatábuatma. ²⁹ Atšna aíñe cha sënduábuatma, er atše chábentsana sënjabo y cha quem luaroye šojichmó ca —Jesús tojánayana.

³⁰ Jesús chca tojánayana ora, chënga tmojánbošena cha jishachama, pero ndocná tbonjánishache, er cha chca japásama cabá ndoñe ora tonjanóshjango. ³¹ Banga chentše Jesúsbeñe imojtsanošbuaché y tmojánayana: “Chë Uámana Uabuayaná chaojabo ora, ¿quem boyabásabiana más tšabe soyënga yochjama ca?”

Chë fariseunga tmojánbošena Jesús jishachama

³² Chë fariseunga tmojántatsëmbona ntšamo entšanga Jesusbiana iytëcana imojtsencuëntaye. As, chënga y chë bachnangbe amëndayënga tmojanichamó básëftanga Bëngbe Bëtsabe bëts yebnoca josticiënga, Jesús chamuishachama. ³³ Chora Jesús tojánayana: “Muentšana nÿe baseftayté tšëngaftangaftaca chanjëftsemna; chentšana, chë šojichmó chábioye chanjëtspadésa. ³⁴ Chora tšëngaftanga atše šmochántseguaye, pero ndoñe quešmochátinÿena; y ndayentše chántsemnoca ndoñe quešmochatobenaye jashjan-guama ca.”

³⁵ Chora chë judiënga tmojanontsé entjanayana: “¿Ndëmoye quem boyabása yochjá, y bënga ndoñe mochanjobenaye jinÿenama ca? ¿Inÿe fshantsëngoye, judiënga tmojuashanëngbioye yochjá, y choca chë ndoñe judiënga yochjabuatambá? ³⁶ ¿Ntsamo yojtsentšáyana cha šonjauyancá, chë ‘tšëngaftanga atše šmochántsenguaye, pero ndoñe quešmochátinÿena; y ndayentše chántsemnoca ndoñe quešmochatobenaye jashjanguama ca?’” —chënga imojtsichamo.

Béjayënga vida bomniye

³⁷ Chë fiesta jopochócama te yojamna chë más uámana te. Chë te, Jesús entšángbentše tojantsá y jabuache tojánayana: “¿Nda tbojtsajuendá, átšbioye chauabo y chaofsé! ³⁸ Ntsamo Bëngbe Bëtsabe uabemana palabrenguiñe endayancá: ‘Nda átšbeñe tojtsošbuaché, cha echántsemna mo ndabe ainanentsana vida bomna béjayënga tojtsobocancá.’ Chca echántsemna átšbeñe ošbuáchiyëngbiama ca” —cha tojánayana.

³⁹ Chë sóyeca, Jesús yojtseboše jayanana, chábeñe ošbuáchiyënga chë Uámana Espíritu mochjanóyëngacñe ca; er chë Uámana Espíritu cabá ndoñe tonjánabo, Jesús corente bëtsá yojamnama cabá ndoñe tmonjaninÿinÿé causa.

Nÿetsca entsanga ndoñe cachcá Jesusbiana imontsejuabnaye

⁴⁰ Chca tmojanuena ora, ínÿenga imojtsichamo: —Quem boyabása ndegombre chë Bëngbe Bëtsabe juabna oyebuambnayá entsemna, chë Cristbe natsana jabamá ca.

⁴¹ Inÿenga imojtsichamo: —Ndegombre cha chë Cristo, chë Uámana Uabuayaná entsemna ca.

Pero ínÿengna: —Ndoñe, er chë Cristo Galileocana ndoñe queochátabo. ⁴² Ndegombre, Bëngbe Bëtsabe uabemana palabrenguiñe endayana, chë Cristna rey Davidbentsana entšá canmëna, y Belenocana caochjabo ca, cach pueblcana ndayentsá David inamna ca —chënga imojtsichamo.

⁴³ Y chca, ínÿengna Jesusbe pavor imojtsemna, y ínÿengna chabe contra. ⁴⁴ Inÿenga imojtseboše Jesús jishachama, pero ndocná tbonjánishache.

Chë amëndayënga Jesúsbeñe ndoñe montsanošbuaché

⁴⁵ Chë fariseunga y bachnangbe amëndayënga imojtsemnoye chë Bëngbe Bëtsabe bëts yebnoca josticiënga tmojtanashajna ora, tmojanatjá: —¿Ndáyeca ndoñe Jesús šmonjuánatse ca?

⁴⁶ Chora chë josticiënga tmojanéjua: —Ndocná quenatoyebuambná ntsamo chë boyabása tonjoyebuambacá ca.

⁴⁷ Chora chë fariseunga tmojanéyana: —¿Tšëngaftángnaca šmojalesenciá cha chacmaingñema ca? ⁴⁸ ¿Nderado bëngbe amëndayënguentšá o bënga fariseunguentšá nÿe mo canÿa chábeñe tayojtsošbuaché? ⁴⁹ Pero quem entsanga, ntsamo leyíne iuayancá nduabuátmënga, bacna soyëngaca sempre mochanjëftsemna ca —chënga imojtsichamo.

⁵⁰ Chora Nicodemo, canÿa fariseunguentšá, chë Jesúsëftaca jencuéntama ibeta tojána cha, tojánayana: ⁵¹ —Ntsamo bëngbe leyíne endayancá, bënga ndoñe quemuátobena jayanana canÿe entšá castiganá jtsemnama ibojtsemna ca, cha cabá ntjoyeunaycá, ndayá cha tojamama jtsetatšëmbuama ca.

⁵² Chora chënga Nicodemo tmojanjuá: —¿Acnaca chábeñe cojtsošbuaché y mo canÿe Galileoca entšacá cojtsejuabná ca? Bëngbe Bëtsabe uabemana palabrenguiñe cochjuatsjinÿe, y cochanjinÿe ni canÿa Bëngbe Bëtsabe juabna oyebuambnayá Galileocana yochjabo ca.

Chë shema boyábioye ínÿaftaca ingñayá

⁵³ Fariseunga y bachnangbe amëndayënga chë josticiëngbioye tmojanëcácanentsana, cada ona cachabe yebnoye imojtsatónënga.

8

¹ Pero Jesusna canye tjoye, Olivos ca uabainoye tojtsanoñe. ² Y chë yëfsana cachëse, Jesús cachiñe Bëngbe Bëtsabe bëts yebnoye tojesaná. Nýetsca entsanga tmojanobeconá jouenama, y Jesús tojanótbema y tojanontsé jabuátambama.

³ Chorna, báseftanga ley abuátambayënga y fariseunga tmonjánashjajna, y canye shembása tmojanëshjango. Chana tmojáninýena chabe boyábioye ínÿaftaca ibnetsoíngñañëntscuana; nýetscangbe tsëntsaca tmojanatsá, ⁴ y Jesús tmojanianyana: — Buatëmbayá, quemuá fsënjínýena chabe boyábioye ínÿaftaca bondëtsoíngñañëntscuana. ⁵ Leyiñe Moisés šonjanamëndá mëntśá uamana shembásengna ndëtšbéngaca jtsëbáyama. ¿Aca ntšamo catjayana ca?

⁶ Jesús chca tmojanianyana ana jisháchichiyama, chca chënga jtsebomnama ndáyeca chabe contra jayanana. Pero Jesús nýe fshantsoye yojotsejbéna y yojóntša ntšabuáfjaca fshantsiñe juabemama. ⁷ Chënga nýe imojtsetjanaye causa, Jesús tojantsbaná y tojanéyana: —Nda tsëngaftanguentśá tondaye bacna soyënga tondbomná, chaobojsatšë ndëtšbeca jatëchënjama ca.

⁸ Chentšana Jesús cachiñe fshantsoye yojtotsejbéna, y yojtëtóntša fshantsiñe jtëtabemama. ⁹ Chca tmojanuena ora, entsanga tmojanontsé canýánÿa chentšana jésebocanana; natsana chë más bëtsanánënga y chë ínÿengna ústonoye. Canýa Jesús tonjanoquedá y chë shembásanaca. ¹⁰ As, Jesús tojtantsá y tbojantjá: —¿Shembása, ndayentše chë acbe contra ichámënga imojtsemna? ¿Ndocná acbiama tonjayana castiganá chacotsemna ca?

¹¹ Ndoñe, Taita, ndocná ca —chë shembása tbojanjúá.

Chora Jesús tbojanianyana: —Atše cach ndoñe acbiama quichátayana castiganá chacotsemna ca. Morna, motsatoñe, pero ndoñe más bacna soye cattsama ca.

Jesús yomna quem luarentša entsangbe juabna binýnayá

¹² Jesús cachiñe Bëngbe Bëtsabe bëts yebnentše yojtsabuátambaye, y entsanga mëntśá tojanéyana: —Atše sëndbínýna quem luare entsangbe juabnënga. Nda atše chašojtsëstona, cha echantsiyena atše chë binýnayáftaca; y ndoñe mo ibetiñcá queochátaye, y chca, tšabe vida echántsebomna ca.

¹³ Chora chë fariseunga Jesús tmojanianyana: —Aca nýe cach acbiama chca contsoyebuambná; chcana, chë ntšamo contsichamcá tondaye quenatámana ca.

¹⁴ As chora Jesús tojanéjua: —Ntšamo cach atšbiama sëntsichamcá aíñe entsámana, masque nýe atše stsichamo ntšamo atšbiama ndegombre yomncá. Er atše sëndëtatšëmbo ndëmocana tijabo y ndëmoye ttsá. Pero tsëngaftanga ndoñe chca quešmatststšëmbo. ¹⁵ Tsëngaftanga šmondbëtsichamo ínÿengbiamá tšabá o ndoñe tšabá tmontsamama, chca, nýe ntšamo entsanga mondbetsejuabnaycá. Pero atšna ndocnabiamá chca quetsátichamo. ¹⁶ Atše ndoñe nýe canýa quetsátsmëna ínÿabiamá jayanama tšabá o ndoñe tšabá tontsamama; ndayá atšbe Taitá, chë šonjichmó cha, átšeftaca chca jayanana. Chíyeca, atše ínÿabiamá tšabá o ndoñe tšabá tonjama ca stsichamo ora, ntšamo stsichamcá ndegombre jtsemnana. ¹⁷ Tsëngaftangbe leyíñe enduábemana, uta entsata ndayámnaca cachcá tbojayanëse, ntšamo chata tbojayancá puerte jtsámanana ca. ¹⁸ Y morna, atše sëntsichamo chë ntšamo cach atšbiama ndegombre yomncá, y atšbe Taitá, chë šonjichmó chánaca entsichamo ntšamo atšbiama ndegombre yomncá ca —Jesús tojánayana.

¹⁹ Chora chënga tmojantjá: —¿Ndayentše acbe Taitá yojtsemna ca?

Y Jesús tojanéjua: —Tsëngaftanga ndoñe quešmatábuatma ni atše ni atšbe Taitá. Atše šmojtsábuatmëсна, atšbe Taitánaca šmattsábuatma ca.

²⁰ Bëngbe Bëtsabe bëts yebnoca, chë crocénana jacjayama luarentše yojtsabuátambaye ora, Jesús chca tojánayana. Pero masque cha chentše yojtsemna, ndocná tbonjánishache, er chca japásama cabá ndoñe ora tonjánóshjango.

“Chë chanjá luaroye, tšëngaftanga ndoñe quešmátobena jama”

²¹ Chora Jesús yojtétóntša oyebuambnayana: —Atše chantá, y chora tšëngaftanga atše šmochántseguaye. Masque chca, šmochanjóbana tšëngaftangbe bacna soyëngama ndëperdonánënga. Chë chanjá luaroye, tšëngaftanga ndoñe quešmátobena jama ca —Jesús tojánayana.

²² Chora chë judiënga tmojanontsé enatsëtsnayana: —¿Mo nderado yojtsejuabná jt-senóitanama, y chíyeca yojtsichamo chë cha yochjá luaroye bënga ndoñe montsobena jama ca?

²³ Chora Jesús tojanëyana: —Tšëngaftanga quem luaroquënga šmondmëna; atšna tsbananocá, celocá sëndmëna. Tšëngaftanga nÿe quem luarama enójuabnayënga šmondmëna, pero atše ndoñe. ²⁴ Chíyeca atše chca tcbonjáuyana, chë “tšëngaftangbe bacna soyëngama ndëperdonánënga šmochanjóbana ca”. Er, nda atše ndegombre bëtsemnama ndoñe chašmontsošbuachese, tšëngaftangbe bacna soyëngama ndëperdonánënga šmochanjóbana ca.

²⁵ Chora chënga tmojantjá: —¿As aca ndase cmëna ca?

Y Jesús tojanëyana: —Entšanga jabuátambama sënjanbojatsé orscana chama tcbonjáuyana. ²⁶ Atše ba soyënga sëntsebomna tšëngaftangbiama jayanama, tšëngaftangbe contra jayanama; pero chë šonjichmó cha nÿetsca soyëngama ndegombre endbétsichamo, y atšna ntšamo chábensana tijouencá, cachcá quem luare oyenënga sentsëtsësná ca —cha tojanëyana.

²⁷ Pero chënga ndoñe tonjanësertá Jesús cachabe Taitabiama chca tojanëyanama.

²⁸ As Jesús tojanëyana: —Bëngbe Bëtsá Entšá tbojanbemá chašmojatsbaná ora, šmochántsetatsëmbo nda sëndmëná atše bëtsemnama. Cachcá, tšëngaftanga šmochántsetatsëmbo, nÿe cach atšbe juábna atše tondaye jamama sëndobenama. Nÿe ndayá atšbe Taitá šojabuatëmbacá atše sëndoyebuambná. ²⁹ Y chë šonjichmó cha ndoñe nÿe canÿa quešnátsošjuana. Chca endmëna, er atše sempre sëndbétsama ntšamo cha oyejuayá jabemama tojtsemncá ca —Jesús tojánayana.

³⁰ Jesús chca tojánayana ora, banga chábeñe imojtsanošbuaché.

Bëngbe Bëtsabe básenga y chë nÿe bacna soye jtsamama vida bomnënga

³¹ Chora Jesús, chë chábeñe imojtsošbuaché judiënga tojanëyana: —Ntšamo cbontsëtsësnacá tšëngaftanga sempre šmojtsamëse, ndegombre atšbe uatsjëndayënga šmochántsemna. ³² Ntšamo ndegombre yomncá šmochántsetatsëmbo; y ntšamo ndegombre yomncá jtsetatsëmbëse, atsebácanënga šmochántsemna ca.

³³ Chora chënga tmojanjuá: —Bëngna Abrahámbentsana entšanga fsëndmëna, y ndocná ndocna te chešnáisishëche nÿe chabiamama nÿets tempo jtsoservénama. As, ¿ndáyeca šcojtsëtsësná bënga atsebácanënga fchtsemna ca?

³⁴ Chora Jesús tojanëyana: —Ndegombre šcuayana: Nda bacna soyënga tojtsama, cha nÿe bacna soyënga jamama juabnëngaca mandaná jëftsemnana. ³⁵ Canÿe os-ervená ndoñe nÿets tempo chë pamillentšá ntjëftsemnana, ntšamo canÿe uaquiñá sempre chë pamillentšá jesomñancá. ³⁶ Y chca, Bëngbe Bëtsabe Uaquiñá chac-mojátsebacase, tšëngaftanga ndegombre atsebácanënga šmochántsemna bacna soyënga juabnënguentšana. ³⁷ Atše sëndétatsëmbo tšëngaftangna Abrahámbentsana entšanga šmomnama; pero tšëngaftanga smontseboše atše jóbama, ntšamo atše cbontsëtsësnacá ainaniñe jýëngacñama ndoñe quešmátsošboše causa. ³⁸ Ntšamo atšbe Taitábioca tijinÿcá, cach soyëngama atše sëntsoyebuambná. Tšëngaftangnaca, cachcá ntšamo tšëngaftangbe taitábentsana šmojouencá smontsama ca —tojanëyana.

³⁹ Chora chënga tmojanjuá: —Bëngbe uámana bëts taitá, Abraham endmëna ca.

As Jesús tojanëyana: —Tšëngaftanga Abrahambe básenga ca jtsabáinama merecido smojtsebuajónëse, chë ntšamo Abraham tojëftsema y cachcá tšëngaftanga šmattsama.

⁴⁰ Atšna ntšamo ndegombre yomncá sëndoyebuambná, ntšamo Bëngbe Bëtsábentšana tsouenancá. Pero mora tšëngaftanga šmontseboše atše jóbama; Abraham ndocna te chca chenausobuachjanguá. ⁴¹ Tšëngaftangna, ntšamo tšëngaftangbe taitá tojëftsemcá y cachcá jtsamana ca —Jesús tojánayana.

Chora chënga tmojaniana: —Bënga nÿe enaquécana básenga ndoñe queftsátsmëna. Chë nÿe canÿe taitá fsëndbomná, Bëngbe Bëtsá endmëna ca.

⁴² Chora Jesús tojanëyana: —Bëngbe Bëtsá ndegombre tšëngaftangbe taitá tojtsemnëse, tšëngaftangna atše šmattsebobotshana. Er atšna, Bëngbe Bëtsábiocana sënjabo y muentse sëntsemna. Nÿe atšbe ponto ndoñe chiyátabo; Bëngbe Bëtsá šonjichmó. ⁴³ ¿Ndáyeca tšëngaftanga ndoñe šmontsobena atšbe palabrenga josértana? Co, ntšamo cbontsëtsësnacá joyeunayama ndoñe quešmátsoše causa chca. ⁴⁴ Tšëngaftangbe taitá Satanás endmëna. Tšëngaftangna chabe entšanga šmondmëna; chíyeca, tšëngaftanga šmontseboše jamama cachcá ntšamo cha tojtsebošcá. Quem luare jobojátšama orscana, Satanás entšá obanayá endmëna. Satanasbe juabnoca, ndocna tšabe soyënga ni ndegombre soyënga ntsebínÿnana. Chíyeca, ndocna te cha ntšamo ndegombre yomncá ntsamana. Cha canÿe bostero endmëna, y chábentšana nÿetsca bostero soyënga jtsóbocanana. Chíyeca, cha tojtsebostero ora, nÿe ntšamo cachá yomnama jtsichámuana. ⁴⁵ Atšna sempre ntšamo ndegombre yomncá chondutsëtsná; chíyeca, chë sëntsichamo soyiñe tšëngaftanga ndoñe quešmatošbuaché. ⁴⁶ ¿Nda tšëngaftanguentšá nanjobenaye jinÿanÿiyana atše ndaye bacna soye tijamama? Y atše, nÿe ntšamo ndegombre yomncá stsichámëse, ¿ndáyeca chë tijayaniñe ndoñe šmontsošbuaché? ⁴⁷ Nda Bëngbe Bëtsabe entšá tomna, ntšamo Bëngbe Bëtsá tojtsichamcá jtsuenanana. Pero tšëngaftangna ndoñe Bëngbe Bëtsabe entšanga quešmátsmëna. Chíyeca, ntšamo Bëngbe Bëtsá entsichamcá ndoñe quešmátsoše jouenama ca —Jesús tojanëyana.

Cristo Abrahambiana más natsana ya yojtsemna

⁴⁸ Chora chë judiënga tmojaniana: —Ajá, bënga co ndegombre fstsichamo, aca nÿe samaritano y bacna bayëjbe juabna uambayá comna ca fstsichamo ora ca.

⁴⁹ Y Jesús tojanëjua: —Atše ni mo canÿe bayëjbe juabna quetsatambá. Ntšamo atše sëntsamcá, endmëna jinÿanÿiyama atšbe Taitá Bëngbe Bëtsá uamaná yomnama; pero tšëngaftangna, atše chca tsmënana ndoñe quešmatinÿinÿná. ⁵⁰ Atše ndoñe quetsátsoše ínÿenga atše más uamaná chašmobemama. Pero inÿa endmëna; cha aiñe endboše atše bëtsá bëtsemnama chaminÿanÿema. Y chánaca endmëna chë ínÿengbiana tšabá o ndoñe tšabá tmontsamama endbetsichamuá. ⁵¹ Ndegombre šcuayana, nda ntšamo atše sëntsichamcá tojouena y chca tojama, ndocna te queochatóbana ca —Jesús tojánayana.

⁵² Chora chë judiënga tmojaniana: —Mora cocayé fsëntsetatšëmbo aca ndegombre bacna bayëjbe juabna uambayá comnama. Abraham tojanóbana, y cachcá, nÿetscanga Bëngbe Bëtsabe juabna oyebuambnayëngnaca. ¿Y mora aca cochjátichamo, “Nda ntšamo atše sëntsichamcá tojouena y chca tojama, cha ndocna te queochatóbana ca”? ⁵³ ¿O aca, bëngbe bëts taitá Abrahambiana más bëtsá comna? Cha tojanóbana, y Bëngbe Bëtsabe juabna oyebuambnayëngnaca. ¿Ndase cojátsmëna ca aca cojatsjuabná ca? —chënga imojtsichamo.

⁵⁴ Chora Jesús tojanëjua: —Atše nÿe cach atše más bëtsá stsenobiamnasna, chë soye tondaye nantsámana. Pero chë más bëtsá šojtsebiamná cha, atšbe Taitá endmëna, cach ndabiana tšëngaftanga šmondbétsichamo tšëngaftangbe Bëtsá canmëna ca. ⁵⁵ Pero tšëngaftanga cha ndoñe quešmatábuatma; atše aiñe. Y atše, “cha ndoñe quetsatabuatma ca” stsichámëse, átšnaca cach tšëngaftangcá canÿe bostero stsemna. Pero ndegombre atše cha sënduábuatma, y ntšamo cha tojtsichamcá, atše sëndouenana y cachcá sëndbétsama. ⁵⁶ Tšëngaftangbe uámana bëts taitá Abraham, chë atše jabama te jinÿama yojtsejuabnaye

ora, puerte oyejuayá yojtsemna. Y pronto tojéftsaninÿe, y puerte tojanoyejuá ca —Jesús tojánayana.

⁵⁷ Chora chë judiënga tmojanianya: —Aca cabá ndoñe shachna bnëtsana uata quecátsbomna; y as, ¿ntšamo cochjátichamo, Abraham tcojéftsinye ca?

⁵⁸ Chora Jesús tojanējua: —Ndegombre cbëyana, Abraham cabá ndoñe ainá quen-jatsmëna ora, atše ya sënjëtsemna ca.

⁵⁹ Jesús chca tojanējua ora, chënga ndëtšbenga tmojanájaca cha jtsatëchënganjama. Pero Jesusna oitanánana, Bëngbe Bëtsabe bëts yebnentsana tojésanbocna.

9

Jesús tojanma, canÿe boyabása jtaná onÿnaná chabuabínÿnama

¹ Canÿe luarëjana yojtsachnëjuana ora, Jesús canÿe boyabásabioye tbojáninÿe. Chë boyabásana jtaná inónÿna. ² Chë uatsjëndayënga Jesús tmojantjá: —Buatëmbayá, ¿ndáyeca quem boyabása jtaná inónÿna? ¿Camuá bacna soyënga tojamama, o chabe bëtsëtsangbe bacna soyënga causa ca?

³ Chora Jesús tojanējua: —Ni cachabe bacna soyëngama, y ni chabe bëtsëtsangbe bacna soyënga causa. Chca endmëna ndayá entšanga jinÿanÿiyama ntšamo Bëngbe Bëtsá yobencá. ⁴ Cabá yojtsësháchena ora, šontsamna jamana ntšamo chë šonjichmó cha yojtsebošcá. Ndoñe usháchena tempo echanjóshjango; chora ndocná tondaye jamama queochatobenaye. ⁵ Quem luariñe chjëftsemnëntscuana, atše quem luare entšangbe juabnënga binÿnayá chanjëftsemna ca —tojanējyana.

⁶ Chca tojánayanentšana, Jesús fshantsiñe tojanbuashëtjo, y chë yebuáyeca batšá ngüiche tojánbema, y chë jtaná chë ngüicheca tbojanbuchanëtjo. ⁷ Chora chë jtaná tbojaniyana: —Motsa y metsobúchjabebiyë, chë binche uafjajónaye entšangbe pormániñe, Siloé ca uabáiniyoca ca. (Siloé, judiëngbe biyañe endayana “Ichmoná ca”).

Y chë jtaná tojána; choca yojetsobúchjabebiyë, y yebnoye tojtaná ora, ya ibojtsabinÿna. ⁸ Chë juachañe oyenënga y chë jtaná tempo lemošna otjanañana tmojáninÿënga, imojt-sentjanaye: —¿Mua ndoñe yondmëna chë enjanamana jótbemana lemošna jótjañama ca?

⁹ Inÿenga imojtsichamo: —Cha entsemna ca.

Y inÿengna: —Cha ndoñe quenátsmëna, pero chacá entsábona ca.

Y cach shnaná yojtsichamo: —Atše cha sëndmëna ca.

¹⁰ As chë entšanga tmojantjá: —¿Ntšamo chca mora cmojtsabinÿna ca?

¹¹ Y cha tojanējua: —Chë boyabása, Jesús ca uabainá, ngüiche yebuáyeca tonjábema, šonjabuchanëtjo y šonjauyana: “Motsa y Siloé uafjajónayiñe metsobúchjabebiyë ca”. Chcasna, atše sënjá, sënjetsobúchjabebiyë y cachora šontsabinÿna ca.

¹² Chora chënga tmojantjá: —¿Ndayentše cha yojtsemna ca?

Y chana: —Atše ndoñe quetsátstatšëmbo ca —tojanējua.

Chë jtana shnanábioye fariseunga imojtsetjanaye

¹³ Chora chë entšanga, chë jtaná inamná fariseúngbioye tmojanánatse. ¹⁴ Chë Jesús batšá yebuáyeca ngüiche tojánbema, y chë jtaná tojanma te, canÿe ochnayté inamna. ¹⁵ As chë fariseunga chë boyabása tmojantjá: —¿Ntšámoyeca mora cmojtsabinÿna ca?

Chora cha tojanējua: —Cha ngüiche yebuáyeca tonjábema y šonjabuchanëtjo. Sënjetsobúchjabebiyë, y cachora šonjuabinÿna ca.

¹⁶ As chora básefta fariseunga imojtsichamo: —Chë jtaná chabotsabinÿnama tojamá ndoñe tonjochná, y ochnayté tojatrabajá. Chíyeca cha Bëngbe Bëtsabe entsá ndoñe quenátsmëna ca.

Inÿenga imojtsichamo: —Cha canÿe bacna soyënga amá tojtsemnëse, ¿ntšamo nantsobena canÿe bëts soye Bëngbe Bëtsabe obenánaca jamama ca?

Y chca, ínÿenga Jesusbe pavor imojtsemna, y ínÿengna chabe contra. ¹⁷ Chama chënga cachiñe chë jtaná inamná tmojtëtantjá: —Er aca mora chacmotsabinÿnama cha tojamëse, ¿chabiama ntšamo catjayana ca?

Chora cha tojanëjua: —Chana canÿa Bëngbe Bëtsabe juabna oyebuambnayá entsemna ca.

¹⁸ Pero chë judiënga ndoñe montsanošbuaché, cha chë jtaná inamnama y chora ibojtsabinÿnama. As chënga, ínÿenga tmojanichamó chë boyabásabe bëtsëtsata jobi-atšama. ¹⁹ Chë bëtsëtsata tbojánashjango ora, chë judiënga tmojanatjá: —¿Quem boyabása tsëndatbe uaquiñá yomna ca? ¿Ndegombre tašojtsichamo cha jtaná inonÿnama? Chcase, ¿ntšamo mora cha ibojtsabinÿna ca?

²⁰ Chora chë bëtsëtsata tmojanëjua: —Aíñe fsëndëtatšëmbo cha bëndatbe uaquiñá endmënama y jtaná tonjanonÿnama. ²¹ Pero ndoñe queftsátstatšëmbo ntšámoyeca mora chca ibojtsabinÿnama, ni bëndatbe uaquiñá chabotsabinÿnama nda tojamama cach ndoñe. Cachá motjanga. Ya bëtsá entsemna, y cachá entsobena tšëngaftanga razón jatšatayama ca —chata tbojánayana.

²² Tempo, chë judiënga imojenóyeunaye, chëngbe enefjuana yebnënguentsana jtëbuacanana chë Jesús ndegombre chë Uámama Uabuayaná, chë Cristo yojamna ca tmojayanënga. Chë bëtsëtsatna chama ibojtsauatja; ²³ chíyeca tmojanëyana: “Cha ya bëtsá entsemna. Cachá motjanga ca”.

²⁴ As cachiñe chë judiënga chë jtaná inamná tmojanchembo y tmojanianyana: —Bëngbe Bëtsabe delante cach acbiama ndegombre mobuambá. Bënga fsëndëtatšëmbo chë boyabása canÿe bacna soyënga amá yomnama ca.

²⁵ Chora cha tojanëjua: —Cha canÿe bacna soyënga amá o ndoñe tondmënama, atše ndoñe quetsátstatšëmbo. Atše nÿe mëntsá sëntsetatšëmbo: Atše jtaná sënjanmëna, pero mora šontsabinÿna ca.

²⁶ Chora chënga cachiñe tmojatantjá: —¿Ntšamo tcmënjama? ¿Ntšamo cha tënjama chacmotsabinÿnama ca?

²⁷ Y cha tojanëjua: —Ya tcbonjáuyana y ndoñe chešmatoyeuná. ¿Ndáyeca cachiñe šmojtseboše jatuenama? ¿Tšëngaftángnaca šmojtseboše chabe ústonënga jtsemnama ca?

²⁸ Chora chënga cha tmojtsanóyenguango y tmojanianyana: —Acna canÿe chabe ustóná cojtsemna, pero bënga ndoñe; bëngna Moisesbe ústonënga fsëndmëna. ²⁹ Bënga fsëndëtatšëmbo, Bëngbe Bëtsá Moisésbioye tbojanatsëtsama, pero chë boyabásabiama ndoñe queftsátstatšëmbo ni mo ndëmocana cha tojabama ca —chënga imojtsichamo.

³⁰ Chora chë boyabása tojanëjua: —¿Ntšamo chca nántsemna! Tšëngaftanga ndoñe šmontsetátšëmbo ndëmocana cha tojabama; pero chašuabinÿnama cha tonjama. ³¹ Bënga tšabá mondëtatšëmbo, bacna soyënga amënga Bëngbe Bëtsá ndoñe queondbátayaunanama. Chana, nÿe chábioye adorayá y ntšamo cha tojtsebošcá amábioye joyeunayana. ³² Quem luare jobojátšama orscana ndocna te quenaisótatšëmbo canÿe jtaná onÿnanabiama ndánaca cha chabotsabinÿnama tojëftsemama. ³³ Quem boyabása, Bëngbe Bëtsabe ichmoná chabe soyënga jamama ndoñe tontsemnëse, tondaye nantsobena jamama ca —chë entsá tojánayana.

³⁴ As chë fariseunga tmojanianyana: —¿Ndayá! Aca tcojanonÿná orscana, corente bacna soyënga amá tcomnëse, ¿ntšamo mora bënga šcochjátabatambaye ca?

Y chora chë judiëngbe enefjuana yebnentsana cha tmojtanáocna.

Chë Bëngbe Bëtsabe soyëngama mo jtanëngcá imomnënga

³⁵ Chë jtaná tmojtanáocnama Jesús tojanuena ora, tojána cha janguanguama. Tbojáninÿena ora tbojanianyana: —¿Aca Bëngbe Bëtsá Entšá tbojanbemábeñe quecojtsošbuaché ca?

³⁶ Y cha tbojanjuá: —¿Taita, nda cha yojtsemna, as atše chábeñe jtsošbuáchiyama ca?

³⁷ As Jesús tbojaniyana: —Aca ya tconjinÿe; chë ácaftaca entsoyebuambná cha entsemna ca.

³⁸ Chora, chë boyabása Jesús bentsë tojanoshamentšë jëtschuayama y tbojaniyana: —Atšbe Utabná, aíñe sëntsošbuaché ca.

³⁹ Chora Jesús chë entsanga tojanëyana: —Atšë quem luaroye tijabo ndayá entsanga jinÿanÿiyama ntšamo cachënga Bëngbe Bëtsabe soyëngama imojuabnama. Chë Bëngbe Bëtsabe soyëngama ndosertánënga, chë soyënga atšë chanjínÿanÿiye ora, mo jtanëna shnanëngcá mochántsemna; y chë Bëngbe Bëtsabe soyëngama corente imotátšëmbo ca juabnayëngna chanjínÿanÿiye, nÿe batšá Bëngbe Bëtsabe soyëngama imotatsëmbuama. Y chca, chënga, masna mo jtanëngcá mochántsemna y ndoñe mo chë jinÿama obenëngcá.

⁴⁰ Básefta fariseunga Jesúseftaca imojtsemnënga chca tmojanuena ora, cha tmojaniyana: —Ndegombre bënga ndoñe mo jtanëngcá queftsátsmëna ca.

⁴¹ Chora Jesús tojanëjua: —Tšëngaftanga Bëngbe Bëtsabe soyëngama ndëtatsëmbënga šmojtsemna ca, y ndegombre chë soyëngama ndoñe cmontsësertana ca šmojobuambase, ndayá šmojtsamcá Bëngbe Bëtsá mo bacna soyënga cuenta ndoñe queochátönÿaye. Pero tšëngaftanga corente Bëngbe Bëtsabe soyëngama cmojtsësertana ca šmojtsichámësna, Bëngbe Bëtsá ndoñe queochatobenaye tšëngaftangbe bacna soyëngama jáperdonana ca — Jesús tojanëyana.

10

Chë oveshënga abujjënÿa y chabe oveshënga

¹ As Jesús tojanëyana: “Ndegombre šcuayana: Nda chë oveshëngbe luaroye bëshashajana ndoñe tonjámashëngo, pero aíñe inÿajana tojtsamáshëngo, chana canÿe atbëbaná y abacayá jtsemnana. ² Pero chë bëshashajana tojamashënguana, chë oveshënga anÿená jtsemnana. ³ Chë bëshásha ebtajuaná, chë bëshásha jebëtafjuana, y chë oveshënga abujjënÿa ntšamo cada ona tmabaincá chë oveshënga jáchembuana. Y chë oveshënga jtsetatsëmbuana chëngbe abujjënÿa yojtsachembuanama; y chë luarentšana cha jubuacnana. ⁴ Nÿetsca oveshënga tmojábocana ora, chë abujjënÿa chënga jtsebënantsanana, y chë oveshënga jtsëstonana, er chabe oyebuambnayana chënga joyátëmbana. ⁵ Pero chë tmondubuatmábioyna chë oveshënga ndoñe ntjuastana; nÿe chábentšana jtsachetëngana, chë oveshënga chabe oyebuambnayana ndoñe ntjoyátëmbana causa ca” — Jesús tojánayana.

⁶ Jesús entsanga chca tonjanacuntá, pero chënga ndoñe ntjosértana ntšamo yojtsentšayancá.

Jesús, chë oveshënga tšabe abujjënÿa

⁷ As Jesús cachiñe tojanëyana: “Ndegombre cbëyana: Atšë sëndmëna chë bëshásha oveshënga mondbétsamashjuanëjana. ⁸ Nÿetscanga chë atšbe natsana tmojánabënga, atbëbanënga y abacayënga imnamna, pero chë oveshënga ndoñe chëngbioye ntjóyaunayana. ⁹ Atšë chë bëshásha sëndmëna. Nda quem bëshashajana tojamashënguá, atsbocaná echántsemna. Canÿe oveshá jamashënguana y jabocnana, y shácuana jónÿenana. Cachcá, chë quemëjana tojamashënguá, lempe echanjónÿena.

¹⁰ “Chë atbëbaná jabana nÿe jatbëbama, jóbama y lempe jtsepochócama; pero atšna, entsanga vida chamotsebomnama y átšeftaca bëtscá tšabe vida chamotsebomnama tijabo.

¹¹ “Atšë sëndmëna chë oveshënga tšabe abujjënÿa. Chë oveshënga tšabe abujjënÿa sempre jtseprontánana chëngbiamá jóbana, chabe oveshënga ababuánÿeshanayeca. ¹² Pero nda nÿe crocenánama totrabája y chë oveshënga ndoñe chábënga tmontsemna, cha nderado tojinÿe canÿe tjañe quešë chë oveshëngbioye tojtsobécocnama, cachora nÿe cachcá jesënyayana y jtsachana. Chë tjañe quešë oveshënga jtsacamiyana, y chë

oveshëngna nÿe cátoye jtsachetana. ¹³ Cha jtsemnana nÿe crocenánama trabajayá; chabiama nÿe chë uacanánana más uámana soye jtsemnana, y chë oveshëngbiamana tondayana ntsentsámmana; chíyeca cha jtsachana.

¹⁴ “Atše sëndmëna chë oveshënga tšabe abujénÿa. Atše chënga sëndëubuatma, y chëngnaca atše šmonduábuatma. ¹⁵ Cachcá, chë Taitá Bëngbe Bëtsá atše šonduábuatma y atše chábioye. Atše sempre sëndétseprontana jóbanama, atšbe oveshënga sëndababuanÿeshánayeca. ¹⁶ Atše inÿe oveshënga sëndábamna, pero chënga ndoñe quem luariñe oveshënga quemátsmëna. Atše šontsemna chëngnaca moye junatsana. Chëngnaca atšbe oyebuambnayana mochanjouena, y muentša oveshëngaftaca cánÿiñe mochántsemna, y atšna nÿetsca chë oveshëngbiamana chë abujénÿa chántsemna.

¹⁷ “Atše sempre sëndétseprontana jóbanama, chora jtayenama. Chíyeca chë Taitá šondbobonshana. ¹⁸ Ndocná atšbe vida quešochatsbojuána, pero chënga sëndababuanÿeshánayeca sempre sëndétseprontana jóbanama, cach atše chca sëndbošeyeca. Derecho sëndétsóboñe chëngbiamana jóbanama, y chora jtayenama. Chca endmëna ntsamo atšbe Taitá šonjamandacá ca” —Jesús tojánayana.

¹⁹ Chë soyënga chë judiënga tmojanuena ora, cachiñe banga Jesusbe contra y inÿengna Jesusbe pavor imojtsemna. ²⁰ Banga imojtsichamo: —Chana bacna bayëjbe juabna uambayá y corente juicio ndbomná entsemna. Y as ¿ndáyeca cha mochjátsyeunana ca?

²¹ Pero inÿengna imojtsanichamo: —Ndocna bacna bayëjbe juabna uambayá ntsobenana chca jóyebuambayama. ¿Canÿe bayëja nantsobena jamama canÿe jtaná chabotsabinÿanama ca?

Chë judiënga ndoñe imontsošbuáchiye Jesús Bëngbe Bëtsabe Uaquiñá bétsemnana

²² Canÿe uaftena tempo inamna, y Jerusalemntše canÿe fiesta imojtsebomna. Chë fiesta inamna cada uata, Bëngbe Bëtsabe bëts yebna tempo cachiñe tmojtanjebuama entšanga jtenójuaboyama. ²³ Jesús Bëngbe Bëtsabe bëts yebnoca yojétsana, canÿe amashjuana otsbojebniñe, Salomonbe Amashjuana ca uabáinentše. ²⁴ Chora, chë judiënga tmojanóbobuashcona, y tmojantjá: —¿Buetaytentscuana bënga fchjëftsemna acbiamana ndegombre soye ntsetatsëmbcá? Aca chë Cristo cojtsemnëse, chama lempe tšabá šmanÿanÿé ca.

²⁵ As Jesús tojanëjua: —Ya tcbonjáuyana y tšëngaftanga átšbeñe ndoñe ntsošbuáchiyana. Chë atše sëndama soyënga, atšbe Taitá Bëngbe Bëtsabe obenánaca, cmontsinÿanÿná nda atše bétsemnana. ²⁶ Pero tšëngaftanga átšbeñe ndoñe quešmatošbuaché, er tšëngaftanga atše ndoñe quešmatëstona, ntsamo chë oveshënga chë tšabe abujénÿa mondbetsëstoncá. ²⁷ Chë atše šmondústonënga, atše šmondbóyeunaye y šmondbëuasto. Atše chënga sëndëubuatma. ²⁸ Atše chanjama, quem entšanga chë nÿetsca tescama yomna tšabe vida chamotsebomnana; chënga ndocna te pochocánënga quemochátsmëna, y ndocná quenátobena átšbentsana chënga jefcana. ²⁹ Atšbe Taitá Bëngbe Bëtsá, chë entšanga atše chašmuastama tojamá, nÿetscangbiamana más bëtsá endmëna, chíyeca ndocná quenátobena chábentsana chënga jefcana. ³⁰ Chë Taitá y atše canÿa fsëndmëna ca —Jesús tojánayana.

³¹ Chora, chë judiënga cachiñe ndëtsbënga tmojanájaca Jesús jtsatëchënganjama. ³² Pero Jesús tojanëyana: —Atše tšëngaftangbeñe, ba bëts soyënga sënjama atšbe Taitá Bëngbe Bëtsabe obenánaca. ¿Ndëmua chentša soyama atše šmochtsatëchënganja ca?

³³ Chora chë judiënga tmojanjúá: —Ni canÿe quem bëts soyëngama bënga queftsátsboše aca jtsatëchënganjama. Aca Bëngbe Bëtsabiamana ndoñe tšabá quecátichamo; mo chábioye cuafjoyenguangcá entsemna. Aca nÿe canÿe entšá condmëna, pero acna contsichamo cach aca Bëngbe Bëtsá comna ca; chíyeca bënga fsëntseboše ndëtsbéngaca aca jtsatëchënganjama ca —chënga tmojanijana.

³⁴ Chora Jesús tojanéyana: —Bëngbe Bëtsabe uabemana palabrenguiñe mëntšá en-dayana: “Atše sënjayana tšëngaftanga diosënga šmomna ca.” ³⁵ Bëngbe Bëtsá chca tojánayana chë chabe palábraca y cha chamotseservénama tojánamandangbiamá; ndocná quenátobena jinýanýiyana ni mo canýe soye Bëngbe Bëtsabe uabemana palabrenguiñe, ndoñe ndegombre soye yomnama. ³⁶ Y atšbiamá, Bëngbe Bëtsabiacá uabuayaná y quem luare ichmoná, ¿ntšamo tšëngaftanga šmojtšobena jayanama, “aca Bëngbe Bëtsabiamá ndoñe tšabá quecátichamo ca”, chë Bëngbe Bëtsabe Uaquiñá sëndmëna ca atše tijayanama? ³⁷ Ntšamo atšbe Taitá endamcá atše ndoñe sëntsamëse, tšëngaftanga átšbeñe ndoñe šmattsošbuáchiye. ³⁸ Pero, ntšamo atšbe Taitá endamcá atše aiñe stsamëse, masque ndoñe átšbeñe šmontsošbuaché, nýe chë Taitabe obenánaca soyënga tijamama šmochtsošbuáchiye. As, canýe ora chašmotsetátšëmbo y chacmësertá, chë Taitá átšbeñe yomnama y atše chábeñe tsmënama ca —Jesús tojanéyana.

³⁹ Chora chënga cachiñe tmojánbošena Jesús jishachama, pero cha chëngbentsana tojanotsbocá.

⁴⁰ Chentšana, Jesús Jordán béjaye chenguana tojesaná y choca tojtsanoquedañe. Chentše Juan tempo entšanga yojanébáyana. ⁴¹ Ba entšanga tmojána Jesús jinýama, y mëntšá imojtsichamo: “Ndegombre, masque Juan ni mo canýe bëts soye Bëngbe Bëtsabe obenánaca tonjëftsema, lempe ntšamo quem boyabásabiamá tonjanoyebuambacá, ndegombre yojamna ca.” ⁴² Y chentše, ba entšanga Jesúsbeñe imojtsanošbuaché.

11

Lázaro tojanóbana

¹ Inamna canýe boyabása šocá, Lázaro ca uabainá. Cha inoyena canýe pueblo Betania ca uabáinentše, Marta y Maríaftaca, chabe uabénata. ² Quem María inamna nda Bëngbe Utabná Jesusbe shecuatšíñe botamana uanguëtsiye tbojanáshecbuešcja, y chabe stjënashaca tbojtanshecbojó cha. ³ Chë uta uabénatna ínýenga tmojanichamó Jesús jauenayama: —Bëngbe Utabná, chë aca condbobonshaná šocá entsemna ca.

⁴ Jesús chca tojanuena ora, tojánayana: —Quem šocana ndoñe quenátsmëna Lázaro chaóbanama. Pero aiñe entsemna Bëngbe Bëtsabe obenana entšanga jinýanýiyama, y Bëngbe Bëtsabe Uaquiñá chamuatschuama ca.

⁵ Jesús corente yojánababuanýëshana Marta, María y chatbe uaftše Lázaro. ⁶ Masque chcasna, Lázaro šocá yojtsemna ca Jesús tmojanियana ora, cabá uta te más cha yojétsemna luarentše tojtsanoquedañe. ⁷ Chentšana, chabe uatsjéndayënga tojanéyana: —Judeoye cachiñe cuajna ca.

⁸ As chë uatsjéndayënga tmojanियana: —Buatëmbayá, baseftayté entsemna chë luaroca judiënga cmonjanbuachetá ndëtšbéngaca jtšóbama; y mora, ¿cabá choye jtésama cojtseboše ca?

⁹⁻¹⁰ Chora Jesús tojanéyana: —Bnëtsana uta hora bnëté endmëna. Nda bnëté tojtšana, ndoñe ntjojéstjiana, binýniñe bëtsemnayeca. Cachcá átšeftaca endmëna, tondaye quenátopodena átšeftaca jopásana, atše jóbanama cabá ndoñe tonjobuache ora. Pero íbeta tojtsanëse, cha jtsojéstjiana, ndoñe binýniñe causa. Cachcá, bënga šontsamna yojtsësháchenëntscuana jatrabájana. Atšbe jóbanama tempo chaojóshjango ora, ya ndoñe queochátëshachena jatrabájama ca —tojánayana.

¹¹ Chentšana tojanéyana: —Bëngbe amigo Lázaro tojtsomaná, pero atše choye chanjá jetsefšenama ca.

¹² Chora chë uatsjéndayënga tmojanjuá: —Bëngbe Utabná, tojtsomanase yojtsayana chana tšabá yochtsatsmëna ca.

¹³ Pero Jesús yojtsanëtsëtsná ndayá Lázaro tojtsanóbana ca, y chabe uatsjéndayëngna imojtsejuabnaye Lázaro ndegombre yojtsomáñama. ¹⁴ As Jesús tšabá tojanéyana: —Lázaro tontšóbana. ¹⁵ Atše sëntsoyejuá choca atše ndoñe tsmënama, tšëngaftangbe tšabiamá

chaotsemnama; chca, tšengaftanga más átšbeñe chašmotsošbuáchema. Pero cuajna cha jinŷama ca.

¹⁶ Chora Tomás, chë Gemelo ca uabobainá, chë inŷe uatsjéndayënga tojanëyana: “Bëngnaca cuajna, cháftaca mochjóbana ca.”

Jesús iuama entšanga chámuatayenama y chë nŷetsca tescama yomna tšabe vida chamotsebomnama

¹⁷ Jesús chë béconana tojánashjango ora, tojántatšëmbona Lázaro ya canta te uatbontsána yojtsemnama. ¹⁸ Betania pueblo yojamna Jerusalén béconana, mo unga kilómetroca. ¹⁹ Ba judiënga tmojána Marta y María jautsëtsayama y jatjëmbambayama ndoñe tša ngménaca chabondëtsemnama, chatbe uaftše tojanóbana causa. ²⁰ Jesús yojtsashjajuanama Marta tojántatšëmbona ora, tojánbocna cha jajëbenguama, pero María cach yebnentše tojanoquedá.

²¹ Chora Marta Jesúsbioye tbojaniyana: —Bëngbe Utabná, aca muentše macmënëse, atšbe uaftše ndoñe matënjóbana. ²² Pero atše sëntsetatšëmbo, masque ndayánaca mora Bëngbe Bëtsá chacojotjañe, y cha lempe chca cmochjátsetaye ca.

²³ Y Jesús tbojanjuá: —Ache uaftše echántayena ca.

²⁴ Chora Marta tbojaniyana: —Aíñe, atše sëndëtatšëmbo cha yochtayenama, pero quem luare jopochócama te, nŷetsca obanënga mochtayena ora ca.

²⁵ As Jesús tbojaniyana: —Atše sëndmëna chë entšanga chámuatayenama y chë nŷetsca tescama yomna tšabe vida chamotsebomnama endamá. Nda átšbeñe tojtsošbuaché, masque chaóbana, echántayena. ²⁶ Y nda cabá ainá totsomñe y átšbeñe tojtsošbuaché, ndocna te queochatóbana. ¿Chë cbontsatsá soyiñe quecojtsošbuaché ca? —Jesús tbojanjtjá.

²⁷ Chora Marta tbojaniyana: —Aíñe, Bëngbe Utabná, atše ábeñe sëntsošbuaché, aca chë Cristo, chë Bëngbe Bëtsabe Uaquiñá y chë quem luaroye jabamá comnama ca.

Jesús, Lázaro yojtsátbontsana cuevëshentše yojenóbošachna

²⁸ Chca tojánayanentšana, Marta tojtaná chabe quenata María jachembuama, y iytëcana tbojaniyana: “Buatëmbayá tonjášhango y entseboše aca jinŷama ca.”

²⁹ María chca tojanuena y cachora tojëftsanbocna y tojána Jesús jinŷama. ³⁰ Jesús cabá ndoñe chë puebløye tonjánamashëngo; yojëtsemna Marta tbojanjébingo luarentše. ³¹ Chë yebnentše imojtsemna judiënga, María tša ngménaca ndoñe chaondëtsemnama tjëmbambayënga, tmojánbocana María juastama; er chë tojëftsantsbaná y tojëftsanbocna ora, chë judiënga imojtsejuabnaye, Lázaro yojtsátbontsana luaroye María yojtsaye, choca jošachnama ca.

³² Jesús yojtsemnentše María tojánashjango ora, chábentše tojanoshamentšé y tbojaniyana: —Bëngbe Utabná, aca muentše macmënëse, atšbe uaftše ndoñe matënjóbana ca.

³³ María y cháftaca tmojánashjajna judiënga, nŷetscanga imojetsenóbošachiye; y Jesús chca tojáninŷe ora, corente tbojancochtsetšena y puerte ngménaca yojtsemna. ³⁴ Chora Jesús tojanatjá: —¿Ndayentše cha šmojuatbontsá ca?

Y chënga tmojanjuá: —Bëngbe Utabná, mabo y cochjinŷe ca.

³⁵ Chora Jesús tojánenobošachna. ³⁶ As chë judiënga tmojánayana: —¡Minŷënga, tša ibnabobonshana ca!

³⁷ Pero inŷe judiënga imojtsichamo: —Chë jtaná chabuabínŷnama tojamá, ¿tondaye tonjobená jamama, Lázaro ndoñe chaondóbanama ca?

Lázaro tojtanayena

³⁸ Jesús, cachiñe puerte cochtsetšenaná, chë uatbontsánøye tojanobeconá. Chë luarna cuevëshe inamna, y amashjuanentše canŷe bëts ndëtšbeca yojtsatámena. ³⁹ Chora Jesús tojanëyana: —Chë ndëtšbé mojuánanga ca.

Chora Marta, chë obanabe uabena tbojanianana: —Bëngbe Utabná, mora ya bacá yojtsonguëtsé, er ya canta te entsemna cha tontsóvana ca.

⁴⁰ Y Jesús tbojanjuá: —Ndegombre, ya tbonjauyana, aíne átšbeñe tcojtsosbuáchese, cochjinýe Bëngbe Bëtsá puerte obená y bëtsá bëtsemnama ca.

⁴¹ Chora chë ndëtšbé tmojanjuaná; Jesús celoye yojontješiyé y Bëngbe Bëtsábioye tbojanianana: “Taita, cbatschuá átšbe opresido tcojouenama. ⁴² Atše sëndétatšëmbo aca sempre šcondbëtseyeunanama; atše chca tbonjauyana, muentše montsemna entšangbe tšabiana, chca, aca atše šcojichmoma, chënga chamotsošbuáchema ca.”

⁴³ Chca tojánayanentšana, jabuache tojánayana: “¡Lázaro, chentšana matsbocna ca!”

⁴⁴ Y cachora chë obaná tojtanbocna, cucuatšënga y shecuatšënga entšëjuaca batsëcná, y chabe jubiá base entšëjuaca uamochëcjuaná. As Jesús tojanéyana: “Motsejafjoná y jama chaotsobena ca.”

*Chë judiëngbe amëndayënga tmojanenoyeuná Jesúsbioye jóbama
(Mt 26.1-5; Mc 14.1-2; Lc 22.1-2)*

⁴⁵ Chë soyëngama, banga chë judiënguentsana, María jatjëmbambayama tmojánanga, y ntšamo Jesús tojanmcá tmojáninýënga, Jesúsbeñe imojtsosbuaché. ⁴⁶ Pero inýe judiënga fariseúngbioye tmojána, ntšamo Jesús tojanmama chënga jacúntama. ⁴⁷ As, chë fariseunga y chë bachnangbe amëndayënga tmojánenefjna inýe judiëngbe amëndayëngaftaca, y tmojánayana: —¿Ndayá mochjobenaye cháftaca jamama? Quem boyabása bëts soyënga entsama. ⁴⁸ Nýe cachcá chamojonýase, nýetsca entšanga chábeñe mochantsošbuáchiye; chë romanëngbe amëndayënga mochanjabo y lempe mochantsepochoá, Bëngbe Bëtsabe bëts yebna y bëngbe luare Israel ca —chënga imojtsichamo.

⁴⁹ Pero canýa chënguentsá, Caifás ca uabainá, chë uata chë bachnangbe más uámana amëndayá inamná, tojanéyana: —Tšëngaftanga tondaye quešmátstatšëmbo. ⁵⁰ Y ndoñe quešmatsjuabná, tšëngaftangbiana más tšabá yojtsemna nýe canýe boyabása Israeloca entšangbiana chaóbana, y ndoñe nýets bëngbe luare chamotsepochoá ca —cha tojanéyana.

⁵¹ Pero Caifás chë soye nýe cachabe juábnaca ndoñe chca tonjánayana. Cha, chë uata chë bachnangbe más uámana amëndayá inámnayeca, Bëngbe Bëtsabe Espíritbe obenánaca tojánayana Jesús ibojamna Israeloca entšangbiana jóbana ca. ⁵² Y ndoñe nýe Israeloca entšangbiana, sinó chë inýe luarënguiñe Bëngbe Bëtsabe básenga tmojanáshanënga chamuatábama, as chca, nýetscanga nýe canýe luarentša entšanga chamotsemnama.

⁵³ Chcasna, cach tescana judiëngbe amëndayënga tmojanenoyeuná Jesús jóbama.

⁵⁴ Chíyeca Jesús entšángbeñe, Judea luariñe ya ndoñe yontsana. Chë luarentšana tojéftsanbocna y canýe luaroye tojtsanoñe, entšanga ndoyeniñe béconana, canýe pueblo Efraín ca uabáinoye. Y chentše chabe uatsjëndayëngaftaca tojtsanoquedañe.

⁵⁵ Judiëngbe Bashco fiestama batšá yojtsájamna, y ba entšanga pueblënguentsana Jerusalenoye imojtsajna, soyënga choca jamama ntšamo tempo inamncá, chca, Bëngbe Bëtsabe bominyama tšábenga jtsemnama, chë Bashco fiesta cabá ndobuache ora.

⁵⁶ Chocna, judiënga Jesús imojtsenguaye, y Bëngbe Bëtsabe bëts yebnentše imojtsentjanaye: “¿Ntšamo šmojtsejuabná, cha tayochjabo o ndoñe quem fiestama ca?”

⁵⁷ Chë fariseunga y chë bachnangbe amëndayënga tmojanmandá, nderado nda Jesús ndayentše tojtsemnama tojtsetatšëmbësna, chaobuambá ca, as Jesús jishachama.

12

*María, botamana uanguëtsiye Jesúsbeñe tbojanáshecbuešcja
(Mt 26.6-13; Mc 14.3-9)*

¹ Chnënguana te chë Bashco fiestama yojtsájamna ora, Jesús Betania puebloye tojtaná. Lázaro, chë Jesús tojtanayená cha, choca inoyena. ² Chentšana bëts saná Jesusbiana

tmojanábua. Marta tojanëjuatśé, y Lázaro yojtsemna chë Jesúseftaca juasama mesëshañe imojtsetbiámanënguentse. ³ As María canye jarrëtema tojanaca; chiñe yojanaftsuumna canye botamana uanguëtsiye, bëtscá uámaniye, ena nárdoca pormániye. Chë uanguëtsiye, María, Jesusbe shecuatsënguiñe tbojanáshecbueścja, y cachabe stjénashaca tbojtanshechojó. Chora, chë yebnentse ena nardiyana yojtsonguëtsiye.

⁴ Chora, canya Jesusbe uatsjendayënguentśá, Judas Iscariote, chë Jesús uayayëngbe cuatśiñe yochjanayentsbashejuaná, tojánayana: ⁵ —Quem botamana uanguëtsiye unga patse denario crocénana enduámana. ¿Ndáyeca ndoñe šmonjuiye y ndbomnjémënga chë crocénana mašmëntsatsatá ca?

⁶ Pero Judas chca tojánayana, chë ndbomnjémëngbeñe ntsejuabnaycá, sinó cha atbëbaná inamna causa. Judas chëngbe crocénana shecnëšiñe yojánatbëna, y ba soye, chë shecnëšoye imojanatsuáma crocénanentsána cha yojánatbëbana.

⁷ As Jesús tbojanjuá: —Cachcá monyá. María mëntscoñe chë botamana uanguëtsiye iuabofjájona, cha jobenayama átśbeñe jabuéścjama, er ndoñe bën y atśe šmochanjaitëme. ⁸ Chë ndbomnjémëngna tšëngaftangbeñe sempre mochanjesomñe, pero atśe ndoñe ca —tojánayana.

Judiënga tmojanenoyeuná Lázaro jóbama

⁹ Ba judiënga tmojántatśëmbona Jesús Betanioca yojtsemnama, y choye tmojána, ndoñe nye Jesús jinýama, sinó Lázarnaca, chë Jesús tbojtanayená cha. ¹⁰ As chë bachnangbe amëndayënga tmojanenoyeuná Lázarnaca jóbama. ¹¹ Chabe causa, ba judiënga chëngbioye cachcá tmojesanëñya y Jesúsbeñe imojtsošbuaché.

Jesús Jerusalenoye tojánashjango

(Mt 21.1-11; Mc 11.1-11; Lc 19.28-40)

¹² Chë yëfsana, mallajta entśanga, Jerusalenoca fiestama tmojánashjajnënga, tmojántatśëmbona Jesús choye yochjánashjanguama. ¹³ As chëngna palma betiye buacuafjënga tmojanatëtsetśe, y Jesús jajëbenguama tmojánbocana, y mëntśá imojtsáyebuache: “¡Bëngbe Bëtsá matschuanga! ¡Corente bendición bomná chë Bëngbe Utabnabe obenánaca tojabá! ¡Corente bendición bomná chë Israeloquëngbe Rey ca!”

¹⁴ Jesús canye burrotema tbojáninýena y chábeñe tojanenoyayé. Ntśamo Bëngbe Bëtsabe uabemana palabrenguiñe iuayancá, cachcá tojanopasá. Chiñe mëntśá endayana Jerusalenoca entśangbiana:

¹⁵ Sión bëts puebloca oyenënga, ndoñe matauatjëngana.

Minýënga, tšëngaftangbe Rey burrotëmiñe enjaquená entsabó ca.

¹⁶ Chca orna, Jesusbe uatsjëndayënga chë soyëngama ndoñe tonjanësertá; pero chentśana, Jesús corente bëtsá yomnama Bëngbe Bëtsá tojaninýanyé ora, chë uatsjëndayënga chama tmojanenoyuabó, lempe ntśamo Bëngbe Bëtsabe uabemana palabrenguiñe iuayancá y cachcá Jesúseftaca tojanopasama.

¹⁷ Chë Jesúseftaca imojtsemna entśanga, Lázarbioye uatbontśanoye tbojanchembo ora y chentśana tbojtanayená ora, ntśamo tmojáninýama chora imojtsecuëntaye.

¹⁸ Chíyeca, ba entśanga tmojánbocana Jesús jajëbenguama, chë bëts soye Bëngbe Bëtsabe obenánaca cha tojanmama tmojanuénayeca. ¹⁹ Pero chë fariseunga imojtsenatsëtsnaye: “Tšëngaftanga šmontsonyá bënga tondaye jamama quemuátobenama y más, inýetscanga cha montśëstona ca!”

Básefta Grecia luaroca entśanga Jesús tmojánanguango

²⁰ Bashco fiestama, chë Bëngbe Bëtsá jadórama Jerusalenoye tmojánangbeñe, básefta griego entśángnaca imojtsemna. ²¹ Chëngna, Felipe chë Galilea luarocá, chë Betsaida pueblócábioye, tmojanobeconá y tmojanimpadá: “Señor, bënga fsëntseboše Jesús jinýama ca.”

²² Chora Felipe tojána Andrés jauyanama, y chë útatna Jesúsbioye tbojána, chë grieguëngbiana jauenayama. ²³ Jesús chata tojanéyana: “Chë Bëngbe Bëtsá Entśá tbojanbemá corente bëtsá yomnama jinýanýiyama te ya tojobuache. ²⁴ Ndegombre scuayana: Canýe trigo jénaye ndoñe fshantsiñe tmonjuatbontśá y ndoñe tonjóbanëse, nýe cach canýe trigo jénaye jesomñana. Pero tmojuatbontśá y tojóbanase, bëtsá jashájonana. ²⁵ Cachcá, nda nýe cachá tojtsenóbobonshana, cha chabe vida echanjëftsobuetse. Pero nda nýe cachá ndoñe tontsenóbobonshana y ntšamo atše stemandacá, quem luariñe vida tojtsebomnëntscuana cha tojtsamëse, chë nýetsca tescama yomna tšabe vida echántsebomna. ²⁶ Nda ntšamo stemandacá jamama tojtseboše, atše chašotsëstona. Chca, ndayentše atše chaitsemna, chánaca, chë atše oservená, chentše chaotsemna. Atše šojtseservénabiana, atšbe Taitá Bëngbe Bëtsá echanjínýanýiye bëtsá yomnama ca” —Jesús tojánayana.

Jesús tojánayana cha yochjanóbanama

²⁷ Y más Jesús tojánayana: “¡Mora tša cochtsetšenaná sëntsemna! ¿Atše chjayana: ‘Taita, chë átšeftaca echanjopása soyënga šmotsebojuaná ca?’ Ndoñe; er más chama atše quem luaroye tijabo. ²⁸ Taita, šminýanýé aca puerte bëtsá y obená comnama ca.”

Y cachora, celocana canýe oyebuambnayana tojanóbocna mëntśá: “Ya tcbonjinýanýé atše puerte bëtsá y obená tsmënana, y mora cachiñe cachcá chanjama ca.”

²⁹ Entšanga chca tmojanuena ora, ínýenga imojtsichamo nýe tojanjuésase ca; pero ínýengna imojtsichamo: —Canýe ángel chábioye tbonjuatsëtsá ca.

³⁰ Chora Jesús tojanéyana: —Ntšamo šmonjouencá, atšbiana ndoñe quenátsmëna, sinó tšëngaftangbiana. ³¹ Mora chë tempo entsemna, chë quem luare entšanga tmojëftsema bacna soyënga jinýanýiyama y chëngbe castiguama jayanama. Y mora, chë nýetsca bacna soyënga mandayá, quem luarentšana mochántábocna. ³² Pero atše fshantsocana atšbananá chaitsemna ora, nýetsca entšanga átšbioye chanjúbuaja ca — Jesús tojánayana.

³³ Chca cha yojtsichamo, ana jinýanýiyama ntšamo jóbanama ibojamnama. ³⁴ Chora chë entšanga tmojanjuá: —Bëngbe Bëtsabe uabemana palabrenguiñe endayana, y chíyeca bënga fsëndétatšëmbo chë Cristo nýetsca tescama vida yochtsebomna ca. As, ¿ndáyeca cojtsichamo, Bëngbe Bëtsá Entśá tbojanbemá chamuatsbanama yojtsemna ca? ¿Nda yojtsemna Bëngbe Bëtsá Entśá tbojanbemá ca? —chënga imojtsichamo.

³⁵ Y Jesús tojanéyana: —Nýe baseftatescama chë entšangbe juabnënga binýnayá tšëngaftangbeñe entsemna. Chë binýnayá cabá tšëngaftangbeñe yojtsemnëntscuana, cháftaca šmochtsajna. Chca, mo ibetiñcá ndoñe quešmochátajna. Nda ndoñe binýniñe tojtsana, cha ndoñe ntsetatšëmbuana ndëmuajana yojtsana. ³⁶ Chë binýnayá cabá tšëngaftangafaca endëtsemnëntscuana, chábeñe šmochtsošbuáchiye; as, tšëngaftangbe juabnënga binýniñe echántsemna ca —Jesús tojánayana.

Chë soyënga tojánayanentšana, Jesús tojtsanoñe y entšangbiana yojetsóitana.

Ndáyeca chë judiënga Jesúsbeñe ndoñe montsanošbuaché

³⁷ Masque Jesús, judiëngbe delante ba bëts soyënga Bëngbe Bëtsabe obenánaca tojëftsema, chënga ndoñe chábeñe ntsošbuáchiyana, ³⁸ ntšamo Bëngbe Bëtsabe juabna oyebuambnayá Isaías tojanabemcá, cachcá chaotsemnama. Isaías mëntśá tojánayana:

Bëngbe Utabná, ¿nda bëngbe buayenana soyiñe yojtsošbuaché?

Y ¿nda tbojosertá, acbe obenana tcojinýinýé ora ca?

³⁹ Chíyeca chënga ndoñe montsobena Jesúsbeñe jtsošbuáchiyama, er Isaías mëntśánaca tojëftsanabema:

⁴⁰ Bëngbe Bëtsá tojama chënga chabe soyëngama ndoñe botamana chamondëtsejuabnama y chabe soyënga ainaniñe ndoñe chamondóyëngacñama, as ndoñe chaondëtšësertánama ca.

Y Bëngbe Bëtsá entsichamo: “Chca entsemna, chënga atšbe benache ndoñe chamondishachama, y atšbe ndoñe ntjátsebacama; y chca, chënga mochántsemna mo ndëshnana entsangcá ca.”

⁴¹ Isaías chca tojánayana, er tojáninÿe Jesús puerte bëtsá y obená yojamnama, y chca chë uabemaniñe Jesusbiana yojanoyebuambná.

⁴² Pero masque chca iuábemanëse, ba judiënga imojtsanošbuaché, y banga judiëngbe amëndayëgnaca Jesúsbeñe imojtsanošbuaché. Pero chëngna, Jesúsbeñe imojtsošbuáchema entsángbeñe ndoñe montsichamo. Chca imojánama chë fariseungbiana auatja causa, chë judiëngbe enefjuana yebnënguentsana ndoñe chamondëtëbuacnama.

⁴³ Chëngbiana más yojanámana, entsanga chëngbiana chamotsichamo tša uámanënga imojamna ca, y ndoñe, Bëngbe Bëtsá chca chaotsamama.

Jesusbe palabrëngaca yochtsótatsëmbo entsanga tšabá o ndoñe tšabá tmonjamama

⁴⁴ Chora Jesús mëntsá jabuache tojánayana: “Nda átšbeñe tojtsošbuaché, ndoñe ñe átšbeñe ntsošbuáchiyana; chë nda šojichmó chábeñnaca cha jtsošbuáchiyana. ⁴⁵ Cachca, nda atšbe šojtsonÿá, chë šojichmó chábioynaca cha jtsonÿayana. ⁴⁶ Atšbe quem luaroye tijabo entsangbe juabnënga jacobínÿyana, chca, nda átšbeñe tojtsošbuaché, mo ibetiñcá ndoñe chaondëtsemnama. ⁴⁷ Pero nda atšbe soyëngama tojouena, pero ntšamo sentsichamcá ndoñe tontsama, atšbe chabiana ndocá quichátayana tšabá o ndoñe tšabá tonjama ca. Atšbe ndoñe chiyátabo, ntšamo quem luarentša entsanga tmojamama tšabá o ndoñe tšabá yontsemna ca jatichámuama; quem luaroye sënjabo ndayá chënga jabátsebacama. ⁴⁸ Nda atšbe šojtsaboté y atšbe palabrëngama ndoñe šonjoyeuná, ya entsebomna nda chabiana yochjayana bëts castigo jtsebomnama ibojtsemna ca. Atšbe tianoyebuambá palabrëngaca, quem luare jopochócama te chabiana chca echántsayana. ⁴⁹ Er atšbe ndoñe ñe atšbe juábnaca quetsatoyebuambná. Chë Taitá, chë šonjichmó cha, šonjamandá ntšamo jayanana y ndayá jabuátambana. ⁵⁰ Atšbe sëndétatsëmbo, atšbe Taitá tojamandá orna, cha jamándana entsanga chë ñyetsca tescama yomna tšabe vida chamotsebomnama. Chíyeca, ndayá sentsichamcá, endmëna ntšamo atšbe Taitá Bëngbe Bëtsá šojamandacá ca” —Jesús tojánayana.

13

Jesús chabe uatsjëndayënga tojanashecjabebé

¹ Bashco fiesta cabá ndobuache ora, Jesús yojtsetátatsëmbo chabe tempo tojanóshjanguama, quem luarentšana jëftsebocnama y chabe Taitábioye jtama. Ntšamo Jesús chábinga yojanababuanÿeshancá, chë quem luare imojamnënga, chórncaca yojtseboše chë bëts bonshánana puerte más jinÿanÿiyana.

² Pero Satanás, Júdasbe ainaniñe bacna juabnënga tojanajó, uayayëngbe cucuatsiñe Jesús jayentšbáshejuanama. Judas Iscariote, Simonbe uaquiñá. ³ Jesús yojtsetátatsëmbo chabe Taitá Bëngbe Bëtsá ñyets obenana tbojánatsetama. Cachcá, Jesús yojtsetátatsëmbo, Bëngbe Bëtsábíocana cha tojánabama y cachábioye jtama ibojtsemnama. ⁴ Chcasna, chë ibeta jasama tmojanpochocá ora, mesëshentsana tojantsbaná, chabe juatsboye uichëtjoníya tojanenátsejca y canÿe tuallëjua tojanenasná. ⁵ Chentsana, canÿe bachešiñe búyeshe tojanbuešcja y tojanontsé chabe uatsjëndayënga jushecjabebiyana y jtšhechojuana cha yojtsasnana tuallëjuaca.

⁶ Pero, Simón Pedro tbojanobuache ora, Jesúsbioye tbojaniyana: —Atšbe Utabná, ¿aca šochjuashecjabiá ca?

⁷ Chora Jesús tbojanjuá: —Atšbe sentsama soye mora ndoñe quecmátësertana; pero más chcoye aiñe cmochanjoserá ca.

⁸ As Pedro tbojaniyana: —¡Ndocna te šcatjuashecjabiá ca!

Pero Jesús tbojaniana: —Ndoñe chachonjuáshecjabese, atšbia ndoñe quecochátsmëna ca.

⁹ Y Simón Pedro tbojaniana: —¡Atšbe Utabná, as nÿe atšbe shecuatsënga ndoñe, ndayá atšbe cucuatšënga y bestšášnaca ca!

¹⁰ Pero Jesús tbojanjá: —Nda bebená tojtsemna, nÿe shecuatše jtsashecjabiama jtsajabótana, ndoñe nÿetšá cachiñe. Nda tojtsobebé, ndoñe tsengá ntsemnana. Cachcá, mo bebënënga cuenta tšëngaftanga šmontsemna; pero canÿa muentše entsemna, y cha mo bebenacá ndoñe quenátsmëna.

¹¹ Jesús yojtsetátšëmbo nda chë uayayëngbe cucuatšifne boshjuaná yochtsanmënama, chíyeca tojánayana: “Tšëngaftanguentsá canÿa entsemna, cha mo bebenacá ndoñe quenátsmëna ca”.

¹² Jushecjabebiyama tojanpochocá ora, chabe juatsboye uichëtjoníya tojtaníchëtjo, y mesëshentše tojtanótbema. Chora tojanëyana: —¿Chë tcbonjábiamá soyama quecmojtsësertana ca? ¹³ Tšëngaftanga atše šmondbauyana Buatëmbayá y Bëngbe Utabná ca; tšabá chca šmontsichamo, er atše ndegombre chca sëndmëna. ¹⁴ Atše, tšëngaftangbe Buatëmbayá y Utabná, tcbonjushecjabebé; chcasna, tšëngaftángnaca cmontsamna jenáshecjabebiyana. ¹⁵ Ntšamo quem sóyeca tcbonjanÿanÿecá, tšëngaftanga cachcá šmochtsama. ¹⁶ Ndegombre šcuayana, chë oservená chabe nduiñbiama ndoñe más uamaná ntsemnana. Cachcá, chë ichmoná chë tbojichmobiama ndoñe más uamaná quenátsmëna. ¹⁷ Quem soyënga chašmojuatsjinÿe y chca chašmojamëse, tšëngaftanga puerte oyejuayënga vida šmochanjëftsebmna.

¹⁸ “Atše sëndëtatsëmbo chë tijábacacangbiamá, chíyeca atše nÿetscangbiamá ndoñe chca quetsatoyebuambná. Y ntšamo Bëngbe Bëtsabe uabemana palabrenguiñe endayancá cachcá chaotsemnana, chë ‘canÿa átšeftaca tandëse tonjasá, atšbe contra echántsemna ca’, cachcá echanjopása. ¹⁹ Mora, cabá ndoñe chca tonjopasá ora, lempe chë soyënga sentsichamo. As, chca chaojopasá ora, átšbeñe šmochantsošbuáchiye, y as šmochántsetatsëmbo atše tsmëna chë nda sëndmëná. ²⁰ Ndegombre šcuayana: Nda atše tijichmóbioye tbojofja, cha atše šochanjofja; y nda atše šojofja, cha chë nda šojichmóbioye bochanjofja ca” —Jesús tojánayana.

*Jesús tojánayana uayayëngbe cucuatšifne Judas bochjáboshjonama
(Mt 26.20-25; Mc 14.17-21; Lc 22.21-23)*

²¹ Chë soyënga tojánayanentsana, Jesús corente cochtsetšenaná yojtsemna, y tojánayana: —Ndegombre šcuayana, canÿa tšëngaftanguentsá uayayëngbe cucuatšifne šochanjáboshjona ca.

²² Chora, chabe uatsjëndayënga tmojanontsé enonÿinÿayana, y ndoñe montsetátšëmbo ndabiamá Jesús chca tojánayanama. ²³ Canÿe uatsjëndayá, chë Jesús puerte ibnabobonshaná, Jesusbe juachaca inatbemana. ²⁴ As, Simón Pedro chábioye tbojánëfjatsëmbo, ndabiamá Jesús chca tojánayanama Jesúsbioye chabotjama. ²⁵ Chë puerte bonshana uatsjëndayá, Jesúsbioye batšatema más tojanosjoná y tbojantjá: —Bëngbe Utabná, ¿nda cha yojtsemna ca?

²⁶ Chora Jesús tbojanjá: —Atše canÿe base tandëtema chanjafchécuacuaye y ndábioye chajoyé, cha entsemna ca.

As Jesús canÿe base tandëtema tojanfchecuacúa, y Judas, Simón Iscariotbe uaquiñábioye, tbojanoyé. ²⁷ Tandëse tojanóyëngacñe y cach ora, Satanás Júdasbe ainaniñe bacna juabnënga tbojáncochëngo. As Jesús tbojaniana: “Chë cochanjama soye, cam ora moma ca.”

²⁸ Pero ni canÿa chë jasama imojtsetbiamanënguentsá tbojanësertá, ndayama Júdasbioye chca tbojanianama. ²⁹ Judas inamna chëngbe crocénana shecnëšifne uambayá; chíyeca ínÿenga tmojanjuabó Jesús chca ibojtsatsaye, ana ndayá yojtseita soye chë fiestama chauabuámiyama, o ndbomnjëmënga ndayánaca chauatšatama ca.

³⁰ Júdasna chë base tandëtema tojanóyengacñe, y cachora chentšana tojéftsanbocna. Chora ya ibeta yojtsemna.

Chë tsëm mando

³¹ Judas tojéftsanbocnentšana, Jesús tojánayana: —Ora tojjobuache, Bëngbe Bëtsá Entšá tbojanbemá corente bëtsá y obená yomnama jinÿanÿiyama; y mua echanjinÿanÿiye Bëngbe Bëtsá corente bëtsá y obená yomnama. ³² Cha echanjinÿanÿiye Bëngbe Bëtsá chca yomnama, chíyeca Bëngbe Bëtsánaca echanjinÿanÿiye corente bëtsá y obená yomnama, y mora entsemna chë ndaye ora Bëngbe Bëtsá chca chabiana yochjinÿanÿiye. ³³ Atšbe básenga, baseftatescama tšëngaftangaftaca séntsemna. Chora šmochántsenguaye, pero ntšamo judiënga sënjauyancá, mora cachcá tšëngaftanga cbëyana: Chë chanjá luaroye, tšëngaftanga ndoñe quešmátobena jama ca. ³⁴ Canÿe tsëm soye cbetsamëndá: Nÿetscanga šmochtsenbobonshana. Ntšamo atše tšëngaftanga cbondábabuanÿeshana, cachcá tšëngaftanga šmochtsenbobonshana. ³⁵ Tšëngaftanga šmojtsenbobonshánëse, nÿetsca entšanga mochántsetatsëmbo, tšëngaftanga atšbe uatsjëndayënga šmomnama ca — Jesús tojanëyana.

Jesús tojánayana, chábioye ndoñe bonjanabuátma ca Pedro yochjánayanama (Mt 26.31-35; Mc 14.27-31; Lc 22.31-34)

³⁶ Chora Simón Pedro tbonjantjá: —Bëngbe Utabná, ¿ndëmoye cochjá ca? As Jesús tbojanjuá: —Atše sentsá luaroye, mora aca ndoñe quecátobena atše juastana, pero más chcoye aíñe šcochanjuasto ca.

³⁷ As Pedro tbojanayana: —Atšbe Utabná, ¿ndáyeca ndoñe séntsobena mora aca juastama? ¡Atše séntseprontana acbiana jóbanama ca!

³⁸ Chora Jesús tbojanayana: —¿Ndegombre cojtseprontana atšbiana jóbanama? Ndegombre cbëyana, cabá ngallo ndëcánta ora, aca unga soye atšbiana cochanjayana: “Cha ndoñe quetsatabuatma ca”.

14

Jesús beyeca entšanga jobenayana Bëngbe Bëtsábioye jama

¹ Mëntsánaca Jesús tojánayana: —Ndoñe ainana tsetšanënga matsmënana. Tšëngaftanga Bëngbe Bëtsábeñe šmondošbuaché; átšbeñnaca šmochtsošbuáchiye. ² Atšbe Taitá Bëngbe Bëtsá endmënoca, ba luarënga joyénanama endmëna. Ndoñe chca tontsemnëse, atše chca matchënjáuyana. Morna, cha endmënoye atše chanjá tšëngaftangbiana canÿe luare joyénanama jabuáprontama. ³ Atše chajjá y chë luare chacbojabuaprontá ora, cachiñe moye chanjésabo, tšëngaftanga átšeftaca junatsama. As, atše chaitsemnoye, tšëngaftángnaca chašmotsá joyénanama. ⁴ Atše chanjá choye ntšamo jama y jashjanguama ya šmontsetátšëmbo ca — Jesús tojánayana.

⁵ Chora Tomás Jesúsbioye tbojanayana: —Bëngbe Utabná, ndëmoye cochjama ndoñe queftsátstatšëmbo. As, ¿ntšamo bënga fchtsetátšëmbo ntšamo choye jama ca?

⁶ Chca tbojanayana ora, Jesús tbojanjuá: —Atše sëndmëna benachcá; chëjana tcojtsase, pronto jashjanguana. Atše sëndmëna ntšamo ndegombre yomncá sempre oyebuambnáyá, y entšanga chë nÿetsca tescama yomna tšabe vida chamotsebomnama endamá. Nÿe átšbeyeca endopodena ndayëjana jama, y atšbe Taitá Bëngbe Bëtsábioca jashjanguama. ⁷ Tšëngaftanga atše šmojtsábuatmëse, atšbe Taitánaca šmattsábuatma. Morscana ya cha šmonsábuatma y cha šmontsonÿá ca — tbojanayana.

⁸ Pero Felipe tbojanayana: —Atšbe Utabná, nÿe chë Taitá šmanÿanÿé, ndayama más ca.

⁹ Chora Jesús tbojanayana: —Chëfta te tšëngaftangaftaca séntsemna, y ¿cabá ndoñe atše šcontsábuatma, Felipe? Nda atše šojinÿe, chë Taitá Bëngbe Bëtsábioynaca jinÿana. As, ¿ntšamo atše šcojtsatsá, chë Taitá šmanÿanÿé ca? ¹⁰ ¿Ndoñe condošbuaché,

atsbe Taitá átšbeñe y átšnaca chábeñe nye canýacá ftsmënama? Chë cbontsëtsëtsná soyënga, ndoñe nye atsbe juábnaca chca quetsatoyebuambná. Atšbe Taitá, chë átšbeñe vida endbomná jtsamana lempe ntšamo stsamcá. ¹¹ Muiñe šmochtsošbuáchiye: Atšbe Taitá átšbeñe endmëna, y átšnaca chábeñe mo nye canýacá sëndmëna. Chama ndoñe šmونتsošbuachese, as nye chë tijama soyëngámñaca átšbeñe šmochtsošbuáchiye. ¹² Ndegombre šcuayana, nda átšbeñe tojtsošbuaché, ntšamo atše tijamcá y cachcá cha echántsama. Atšbe Taitá entsemnoye atše chanjá, chíyeca, chë átšbeñe ošbuachiyá, chama más bëts soyënga echanjama. ¹³ Tšëngaftanga ndaye sóynaca Bëngbe Bëtsábioye šmojtjañe, y chca šmojama atše jótšëmbonëse, átšbeñe šmošbuachéyeca, lempe šmochanjóyëngacñe; chca, chë Uaquiñá echanjínýanýiye chë Taitá corente bëtsá y obená yomnana. ¹⁴ Tšëngaftanga ndaye sóynaca atše šmojtjañe, y chca šmojama atše jótšëmbonëse, átšbeñe šmošbuachéyeca, atše chë soye chanjama ca —Jesús tojánayana.

Jesús tojanašebuachená chë Uámana Espíritu jíchmuama

¹⁵ Mëntsánaca Jesús tojánayana: “Tšëngaftanga atše šmojtsebobonshánëse, ntšamo cbontsamëndacá cachcá šmochanjama. ¹⁶ Chca chašmojamëse, atšbe Taitá Bëngbe Bëtsá tšëngaftangbiama chanjaimpáda, tšëngaftanga jabújabuachama y jabáñemuayama inýa cha chabuichmoma, chë Uajabuachaná nyetsca tescama tšëngaftangaftaca chauétsemnana. ¹⁷ Cha, chë Uámana Espíritu endmëna chë nyetsca soyënguiñe ntšamo ndegombre yomncá oyebuambnayá. Chë nye quem luarama enójuabnaye entšanga, chë átšbeñe ndošbuáchiyënga ndoñe quematonýá, ni quematábuatma. Chíyeca chënga ndoñe quemátobena cha jóyëngacñana. Pero tšëngaftanga aiñe cha šmontsábuatma. Cha tšëngaftangaftaca entsemna, y tšëngaftangbe ainaniñe sempre echanjëftsiyena.

¹⁸ “Atše ndoñe quebocháisabashejuana, mo uajchonga cuenta chašmotsemnana. Tšëngaftangbioye chanjésabo. ¹⁹ Muentšana baseftaytese, chë nye quem luarama enójuabnaye entšanga ndoñe más quešmochátonýaye; pero tšëngaftangna aiñe, atše cachiñe šmochántinýe. Atše ainá chántsemna, chíyeca tšëngaftanga átšeftaca tšabe vida šmochántsebomna. ²⁰ Chë Uámana Espíritu tšëngaftangbe ainaniñe chašmojóyëngacñe ora, tšëngaftanga šmochántsetatšëmbo, atše atšbe Taitábeñe nye canýacá tsmënama; cachcá, tšëngaftanga šmochántsetatšëmbo, tšëngaftanga átšeftaca cachcá nye canýacá šmomnana y átšnaca tšëngaftangaftaca. ²¹ Nda totátšëmbo ntšamo atše tijamandacá y sempre chca tojtsama, cha ndegombre šojtsebobonshana. Nda átšbioye šojtsebobonshana, chábioye atšbe Taitánaca bochántsebobonshana. Atšnaca cha chántsebobonshana, y nda atše tsmënama cha chanjinýinýiye ca” —Jesús tojánayana.

²² Chora, inýe Judas, ndoñe Judas chë Iscariote, Jesúsbioye tbojanijana: —Bëngbe Utabná, ¿ntšamo chca yojtsemna, nye bënga šcochjínýanýiye ntšamo cach aca comnana, y nyetsca quem luarentšëngbioye ndoñe ca?

²³ Chora Jesús tbojanjuá: —Nda atše šojtsebobonshana, ntšamo atše sëntsoyebuambnacá echanjama. Atšbe Taitánaca chábioye bochántsebobonshana, y bëndata chábioye fchanjabo y chábeñe vida fchantsebomna. ²⁴ Nda ndoñe šontsebobonshana, ndoñe queochátama ntšamo sëntsoyebuambnacá. Ntšamo sëntsoyebuambnacá ndoñe nye atšbe juábnaca quenátsmëna, sinó chë Taitá, chë šonjichmó chabe juábnaca.

²⁵ “Atše cabá tšëngaftangaftaca sëntsemnëntscuana, lempe quem soyëngama sëntsoyebuambná. ²⁶ Chë Uajabuachaná, chë Uámana Espíritu, atšbe impadanánaca atšbe Taitá bochanjíchmuama. Cha lempe cmochántsabuatambaye, y echanjama nyetsca chë tcbonjáuyana soyëngama chašmuatenójuaboma.

²⁷ “Chë atšbe ainaniñe puerte tšabe ebionana tšëngaftangbiama šcuétseboshjona, cbet-satšatá. Chë nye quem luarama enójuabnaye entšanga cmondbétsatšatnaye soyëngcá ndoñe quenátsmëna, chë atše cbontsatšatná ainaniñe puerte tšabe ebionana. Ainana

tsetšanënga ndoñe matsmënana, ni matauatjëngana. ²⁸ Ya šmonjouena ntšamo tcbonjauyancá: ‘chanjá y tšëngaftangbioye chanjésabo’. Tšëngaftanga atše šmojtsebobonshánëse, šmattsóyejuaye atše chë Taitábioye jama šojtsemnama, er chë Taitá atšbiama más bëtsá endmëna. ²⁹ Quem soyënga tcbonjáuyana, cabá ndoñe chca tonjopasá ora; as, chca chaojopasá ora, chiñe jenójuaboyëse átšbeñe chašmotsošbuáchema.

³⁰ “Chë quem luarentša bacna soyënga mandayá endabó; chíyeca atše ya ndoñe bëtsá tšëngaftangaftaca quichaisóyebuambaye. Pero cha tondaye quenátobena atše jabórlana. ³¹ Masque cha chca endmëna, chca entsemna, atše chë Taitábioye tsbobonshánama quem luarentša entšanga chamotsetatšëmbuama. Ntšamo atšbe Taitá šojamandacá, atše cachcá tsámama chamotsetatšëmbuama.

“Motsbananga. Muentšana cuajna ca” —Jesús tojanëyana.

15

Jesús yomna mo chë tsabe uvas betiyá

¹ Mëntšánaca Jesús tojánayana: “Atše sëndmëna mo chë tsabe uvas betiyá, y atšbe Taitá Bëngbe Bëtsá chë tsabe uvas betiye inyënacá. ² Chë inyëná, chë uvas betiyentša buacuafjënga ndëshajuanëfjënga jtsebuácuëtsetšana; pero chë uvas betiyentša buacuafjënga shajuanëfjënga jtsobolímpiana, bëtsá chaotseshájuanama. Nda ndoñe tontsama ntšamo Bëngbe Bëtsá tojtsebošcá, jtsemnana mo chë ndëshajuana buacuafjëngcá; y chë causa, chë Taitá chábioye corente bochantsecastíga. ³ Tšëngaftanga šmonjouena ntšamo tijayancá; bëtsá chca šmontsama. Chíyeca mora tšëngaftanga šmontsemna mo chë limpiana y shajuana buacuafjëngcá. ⁴ Atšeftaca cányiñe mo canyáca šmochtsemna y atše tšëngaftangaftácnaca. Chë buacuafja uvas betiyentšana juanánëfja ndoñe ntsoobenana nye cachabe ponto jashájonana. Cachcá, tšëngaftanga átšeftaca ndoñe cányiñe mo canyáca šmontsemnëse, ndoñe šmattsobena Bëngbe Bëtsabiama bëtscá soyënga jamama.

⁵ “Atše chë tsabe uvas betiyá sëndmëna y tšëngaftanga chë buacuafjëngcá. Nda átšeftaca cányiñe mo canyáca tojtsemna y atše cháftacnaca, cha Bëngbe Bëtsabiama bëtscá soyënga echanjama, mo canye buacuafja becá tojtseshajuancá. Er, tšëngaftanga atšbe uajabuáchenana ndoñe šmontsebošnëse, átšeftaca cányiñe mo canyáca ndoñe šmontsemna causa, tondaye šmattsobena jamama. ⁶ Canya átšeftaca cányiñe mo canyáca ndoñe tontsemnëse, cha jtsemnana mo canye buacuëtšëna buacuafja, utšenëfja y buashánëfjácá. Chca buacuafjënga, entšanga jtsatbanana, íñeshoye jtsëtšenana y chentše jtsejuinýiyana. Cachcá, nda ndoñe átšeftaca cányiñe mo canyáca tontsemna, ndoservená jtsemnana y luaroca cha mochantsesegóra.

⁷ “Tšëngaftanga átšeftaca cányiñe mo canyáca šmojtsemna y ntšamo atše tijayancá šmojtsamëse, lempe ntšamo šmojtsebošcá šmochjotjañe, y lempe šmochanjóyëngacñe. ⁸ Chë shajuana buacuafjëngcá tšëngaftanga chašmojtsemna ora, šmochanjínyanýiye atšbe Taitá corente bëtsá y obená yomnama. Y chca, tšëngaftanga atšbe ndegombre uatšjëndayënga šmochántsemna. ⁹ Ntšamo chë Taitá šondbobonshancá, átšnaca cachcá tšëngaftanga cbondábabuanýeshana. Chíyeca, šmochtsiyena atšbe bonshánama jtsejuabnaye. ¹⁰ Atše sëndama ntšamo atšbe Taitá šondëmandacá. Chíyeca atše sëndoyena chabe bonshánama jtsejuabnaye. Cachcá tšëngaftángnaca, ntšamo atše cbontsamëndacá šmojtsamëse, atšbe bonshánama jtsejuabnaye šmochantsiyena.

¹¹ “Atše chca cbontsëtsëtsná, chë atše sëntsebojna oyejuayana tšëngaftángnaca chašmotsebojnana, y tšëngaftanga puerte chašmotsóyejuama. ¹² Mëntšá cbetsamëndá: Ntšamo atše cbondababuanýeshancá, cachcá šmochtsenbobonshana. ¹³ Chë chabe amiguëngbiana tojóbanabiama, ndocna quenátobena chabiama más bonshánana jtsebojnana. ¹⁴ Ntšamo atše tijamandacá tšëngaftanga šmojtsamëse, atšbe amiguënga

šmochántsemna. ¹⁵ Chë oservená ndoñe ntsetatsëmbuana ndayá chabe nduiño tojt-samama. Chíyeca atše tsëngaftanga oservénënga ca ndoñe quechatëtsëtsná. Morscana mëntsá cbontsëtsëtsná: ‘Tsëngaftangna atšbe amiguënga šmontsemna ca’, er lempe ntšamo atšbe Taitábentsana tijuatsjinýcá, tsëngaftanga tcbonjinýanýé. ¹⁶ Tsëngaftanga ndoñe atše chešmatábuayana, pero atše aiñe tsëngaftanga tcbonjabacacá y tcbon-jubuáyana, Bëngbe Bëtsabe trabajo jamama; y chca, mo canýe betiye sempre tojtse-shajuana y chë shajuana ndocna te tontsopochocacá, tsëngaftanga chašmotsemnama. Chca, lempe ntšamo atšbe Taitá šmojtjañcá, y chca šmojama atše jótsëmbonëse, átšbeñe šmošbuachéyeca, cha lempe cmochanjátšataye. ¹⁷ Mëntsá atše cbetsamëndá: ‘Smochtsenbobonshana ca’ —Jesús tojanéyana.

Jesús y chabe entsanga, chë nýe quem luarama enójuabnayëngbiama uaboyëñjanënga

¹⁸ Mëntsánaca Jesús tojánayana: ‘Pero chë nýe quem luarama enójuabnaye entsanga tcmojtsëbuayënjëse, šmochjenójuaboye, natsana chënga atše šmonjanáboyënjama. ¹⁹ Tsëngaftanga, chë nýe quem luarama enójuabnaye entsanguentsana šmojtsemnëse, chënga cmattsababuánýeshana cachëngbengbioycá. Pero tsëngaftanga ndoñe chë nýe quem luarama enójuabnaye entsanguentsana quešmátsmëna, y atšna, chë quem luare oyenënguentsana tsëngaftanga tcbonjabacacá. Chíyeca chë nýe quem luarama enójuabnaye entsanga tsëngaftanga cmontsëbuayënja. ²⁰ Smochjenójuaboye ntšamo tcbonjáuyanama: ‘Chë oservená chabe nduiñbiama ndoñe más uamaná quenátsmëna ca’. Chënga monjánama atše chaisufrima; tsëngaftangnaca chašmotsesufrínama mochántsama. Entsanga ntšamo atše tijayanentsana ntsachetšá tmojtsamcá, cachcá chënga mochántsama ntšamo tsëngaftanga chašmojtsëtsëtsná chentsana. ²¹ Chë chacmojtsëbuayënjënga, chë šojichmó cha ndoñe quematábuatma. Chíyeca chënga lempe chca cmochanjáborlaye, atšbe causa.

²² ‘Atše ndoñe matijabo y chënga ndoñe matijáuyanëse, ndegombre ndoñe bacna soye mattsebonna. Pero mora, chëngbe bacna soyëngama chënga ndoñe quemátobena jayanana, ‘¡Chca fsënjama ntsetatsëmbcá ca!’ ²³ Nda atše šojtsáboyënja, atšbe Taitábioynaca jtsáboyënjana. ²⁴ Atše chë bëts soyënga Bëngbe Bëtsabe obenánaca chëngbeñe ndoñe matijamëse, ndegombre chënga ndoñe bacna soyënga mattsebonna. Pero mora, masque ntšamo sënjamcá tmonjinýëse, chënga atše šmontsáboyënja y atšbe Taitábioynaca. ²⁵ Chca chënga montsama, ntšamo chëngbe leyënguiñe enduabemancá cachcá chaopasama. Chiñe mëntsá endayana: ‘Nýe tondayama chënga šmonjanáboyënja ca.’

²⁶ ‘Atše, atšbe Taitábentsana chë Uajabuachaná y añemuayá tsëngaftangbioye chanjíchmuá. Cha chë Uámana Espíritu endmëna, chë nýetsca soyënguiñe ntšamo ndegombre yomncá oyebuambnayá. Cha endmëna chë Taitábentsana ichmoná; y cha lempe atšbe tsabe soyënga cmochantsëtsëtsnaye. ²⁷ Chorscana, tsëngaftangnaca atšbiama entsanga šmochantsëtsëtsnaye, er tsëngaftanga átšeftaca šmondëtsemna, entsanga jábuayenama atše sënjanbojatšé orscana ca’ —Jesús tojánayana.

16

¹ Mëntsánaca Jesús tojánayana: ‘Atše quem soyënga cbontsëtsëtsná, tsëngaftanga átšbeñe ošbuáchiyana ndoñe chašmondájbanama, atšbe causa chašmojtsesufrina ora. ² Chëngna, chë judiëngbe enefjuana yebnënguentsana cmochantëbuacana. Chca tempo chaojobuache ora, chë tsëngaftanga chacmojtsëbáyënga mëntsá mochántsejuabnaye: ‘Bënga tsábá tmonjama ca. Ntšamo Bëngbe Bëtsá yojtsebošcá, cachcá bënga tmonjama ca.’ ³ Chënga, chë Taitá Bëngbe Bëtsá ndoñe quematábuatma, y átšbioye cach ndoñe. Chíyeca, chca cmochanjáborlaye. ⁴ Atše chca tsëngaftanga cbontsëtsëtsná, ntšamo tcbonjáuyanama chašmuenójuaboma, chca tempo chaojobuache ora ca’ —Jesús tojánayana.

Ndayá chë Uámana Espíritu inétsama

Mëntśánaca tojánayana: “Entśanga jábuayenama sēnjanbojatsé orscana, chē echanjopása soyēngama ndoñe quecbēnjatanētsēsna, er atše tšēngaftangaftaca sēnjētsemna. ⁵ Pero morna, chē sojichmó cha yomnoye chantá; y tšēngaftanguentśá ndocná sochanjatjaye, ‘¿ndēmoye cojtsá ca?’ ⁶ Mora, tšēngaftangbe ainana ngmēnaca entsemna, atše chca tcbonjáuyana causa. ⁷ Pero ndegombre ścuayana: Atše chanjá y chca tšēngaftangbe tśabiana echántsemna. Atše ndoñe quetsjase, chē Uajabuachaná y añemuayá ndoñe tšēngaftangbioye queochátabo. Pero aínē chanjá, y chora cha tšēngaftangbioye chanjíchmuá. ⁸ Cha chaojášhango ora, echanjama quem luarentśa entśanga corente chamotsetátśēmbo ndayá ndegombre yomna bacna soyēnga jtsamana, ndayá ndegombre yomna chē Bēngbe Bētsabe bominiñe tśabia jtsemnana, y ndayá yomna chē Bēngbe Bētsá entśangbiana jayanana tśabá o ndoñe tśabá tmonjamama. ⁹ Entśanga átśbeñe ndoñe quematośbuaché. Chíyeca chē Uajabuachaná echanjama chēnga corente chamotsetátśēmbo ndayá ndegombre yomna chē bacna soyēnga jtsamana. ¹⁰ Chē Taitábioye chanjá y atše ndoñe más queśmochátinje. Chíyeca chē Uajabuachaná echanjama chēnga corente chamotsetátśēmbo ndayá ndegombre yomna Bēngbe Bētsabe bominiñe tśabia jtsemnana. ¹¹ Quem luarentśa bacna soyēnga mándayabiana Bēngbe Bētsá ya tonjayana, ntśamo cha tojamama ndoñe tśabá yontsemna ca y nyetsca tescama castiganá chaotsemna ca. Chíyeca chē Uajabuachaná echanjama entśanga corente chamotsetátśēmbo, ndayá ndegombre yomna chē Bēngbe Bētsá entśangbiana jayanana tśabá o ndoñe tśabá tmonjamama.

¹² “Atše cabá ba soyēnga sēntsebomna tšēngaftanga jáuyanama. Masque chcasna, mora tšēngaftanga ndoñe queśmátobena chē soyēngama josértana. ¹³ Pero chē Uámana Espiritu, chē nyetsca soyēnguiñe ntśamo ndegombre yomncá oyebuambnayá, chaojášhango ora, lempe ntśamo ndegombre yomncá cmochanjabuatambá. Cha ndoñe nje cachabe juábnaca queochátoyebuambnaye. Ntśamo chē Taitá chábioye tbojauyancá, tšēngaftanga cachcá cmochanjáuyana, y cha cmochanjábuayenaye ntśamo yochjopásama. ¹⁴ Atśbe soyēnguentśana cha echanjójyēngacñe, y cach soyēngama cmochanjabuatambá. Chcase cha cmochanjínñanñiye atše bētsá y obená bētsemnana. ¹⁵ Lempe ntśamo chē Taitá endbomncá, atśbe soyēngnaca endmēna. Chíyeca atše tcbonjáuyana, chē Uámana Espiritu atśbe soyēnguentśana yochjójyēngacñe y cach soyēngama cmochjabuatambá ca.”

¹⁶ “Baseftayté y atše ndoñe más queśmochátinje. Inye baseftayté y cachiñe śmochantétinje ca” —Jesús tojanéyana.

“Tšēngaftangbe ngmēnana, oyejuayana echanjóbema”

¹⁷ Chora Jesusbe básefta uatsjéndayēnga imojtsentjanaye: —¿Ntśamo yojsentśáyana, chē “baseftayté y atše ndoñe más queśmochátinje, y inye baseftayté y cachiñe atše śmochantétinje, er atše chē Taitábioye chanjá ca”? ¹⁸ ¿Ntśamo yojsentśáyana, chē “baseftayté ca”? Ndoñe quemuátstatśēmbo ntśamo yojsentśáyana ca —chēnga imojtsichamo.

¹⁹ Jesús yojsentśáyana chēnga chca jatjayama imojtsebośama, y tojanéyana: — Atše tcbonjáuyana: “Baseftayté y atše ya ndoñe más queśmochátinje, y inye baseftayté y cachiñe atše śmochantétinje ca.” ¿Chē soyēngama śmojsentjaná ntśamo stsentśáyana? ²⁰ Ndegombre ścuayana: Tšēngaftanga śmochanjenóbośachna y puerte ngmēnēnga śmochántsemna, pero chē nje quem luarama enójuabnaye entśanga corente oyejuayēnga mochántsemna. Masque tśa ngmēnēnga śmochántsemna, chentśana tšēngaftangbe ngmēnana, oyejuayana echanjóbema. ²¹ Canye shembása tbojontśabuache šešona jónñnama ora, tśa ngmēnaca cha jēsemnana, puerte tbojtsesetše causa. Chē šešona ya tojonñná ora, cha ndoñe ntsenójuabnayana chē tśa ibuántsetśama. Canye šešona quem luaroye cháúashjanguama chē shembása tojamayeca, chora cha tśabá y oyejuayá jtsemnana. ²² Ndegombre, tšēngaftangnaca cachcá, chora tśa ngmēnaca śmochántsemna.

Pero atše tšëngaftangbioye chajjésabo ora, atše šmochantětínÿe y corente oyejuayënga šmochántatsmëna. Y ndocná queochatobenaye chë oyejuayana jabuajuánana.

²³ “Chë te chaojóshjango ora, tšëngaftanga ndocá atše quešmochatstjaye. Ndegombre šcuayana, lempe ntšamo atšbe Taitá šmojtjañcá, y chca šmojama atše jótšëmbonëse, átšbeñe šmošbuachéyeca, cha lempe cmochanjátataye. ²⁴ Méntscñoñama, atšbe Taitá tondaye chešmatotjañe atše jótšëmbonëse. Cha motjañënga y šmochanjóyëngacñe, y chca, bëtscá oyejuayana šmochántsebmna ca” —Jesús tojanëyana.

Jesucristo, quem luarentše mandayábioye yëñjanayá

²⁵ Méntśánaca Jesús tojánayana: “Chë soyëngama lempe cuentëngaca tšëngaftanga tcbonjáuyana; pero tempo echanjobuache, chora atše ya ndoñe más cuentëngaca quebochátëtsëtsnaye; chë cuentna, puerte botamana lempe atšbe Taitabiama cbochanjáuyana. ²⁶ Chë tena, atše jótšëmbonëse, átšbeñe šmošbuachéyeca, atšbe Taitábioye šmochanjotjañe. Y atše cbëyana; chca, chë te ndoñe quešochatájaboto tšëngaftangbiamana atšbe Taitá jatsimpadánana. ²⁷ Atše ndoñe quichatsimpadana, er cach Taitá tšëngaftanga cmondábabuanÿeshana. Tšëngaftanga atše šmondobobonshánama, y Bëngbe Bëtsábíocana atše tijabama šmojtsošbuáchema, chë Taitá cmondábabuanÿeshana. ²⁸ Atše chë Taitábíocana sënjabocna y quem luaroye sënjabo. Pero mora quem luare chanjëftsebmshjona atšbe Taitábioye jtama ca” —Jesús tojánayana.

²⁹ Chora chabe uatsjëndayënga tmojanayana: —Mora ya ndoñe cuentëngaca quecatoyebuambná, chíyeca lempe paselo josértama bëngbiamana entsemna. ³⁰ Mora fsëntsetatšëmbo aca nÿetsca soyëngama cotatšëmbuama, y ndoñe quenátsiyta ndocná aca chacmátstjanama, er aca chëngbe juabnënga jtsabuatumana, chënga cabá aca ndëtjaye ora. Chíyeca bënga fsëntsošbuaché aca Bëngbe Bëtsábíocana tcojabama ca —chënga tmojanayana.

³¹ As Jesús tojanëyana: —¿Mora chiñe šmojtsošbuaché ca? ³² Ya tempo tocjobuache y cam ora entsemna, tšëngaftanga nÿetsquénache šmochanjuáshana y atše nÿe canÿa šmochanjésebmshjona. Pero atše ndoñe nÿe canÿa quichátsmëna, chë Taitá átšeftaca entsémnyayeca. ³³ Atše lempe quem soyënga cbontsëtsëtsná, tšëngaftangbe ainaniñe tšabe ebionana chašmotsebmnama, átšeftaca cánÿiñe mo canÿacá jtsemnëse. Quem luar-entše šmochanjasufrina; pero añemo šmochtsebmna, atše ya chë quem luarentša mandayá sënjayëñaná ca —Jesús tojánayana.

17

Jesús chabe uatsjëndayëngbiamana Bëngbe Bëtsábíoye tbojanimpadá

¹ Jesús chë soyënga tojánayanentšana, celoye tojanontjésé y Bëngbe Bëtsábíoye tbojanayana: “Taita, atšbe te ya tocjobuache. Minÿanÿé, atše acbe Uaquiñá, corente bëtsá y obená bëtsemnama. As, atše acbe Uaquiñá, aca corente bëtsá y obená comnama chainÿanÿema. ² Mora aca nÿets obenana šconjatšetá nÿetsca entsángbeñe, nÿetscanga chë atšbiamana tcojábacacanga chë nÿetsca tescama yomna tšabe vida chamotsebmnama atše chaimama. ³ Chë nÿetsca tescama yomna tšabe vida jtsebmnanana endmëna aca, chë nÿe canÿe y ndegombre Bëngbe Bëtsá jtsabuatumana, y atše Jesucristo, acbe ichmoná.

⁴ “Lempe ntšamo šconjamandacá atše sënjapochocá, y chca quem luariñe sënjama aca corente bëtsá y obená comnama jinÿanÿiyama. ⁵ Taita, quem luare cabá ndoñe quenjatšmëna ora, aca tconjaninÿanÿé atše corente bëtsá y obená ácaftaca bëtsemnama. Mora moma atše cachcá ácaftaca chaitsemnama.

⁶ “Aca quem luarentša entsanguentšana quem boyabásenga tconjabacacá y atšbiamana šconjinÿinÿé. Atše chënga sënjanÿanÿé ntšamo ndegombre aca comnama. Chënga acbe entsanga mondmëna; y acna, chë atšbiamana chënga šconjinÿinÿiyá. Chënga acbe palabra tmonjouena y tšabá tmonjoyeuná. ⁷ Chíyeca chënga mondetatšëmbo, lempe

ntšamo atše tsbomncá ácbentšana tijóyëngacñama. ⁸ Atše chënga sënjáuyana ntšamo aca šcojauyancá, y chënga montsošbuaché chë atše sënjauyaniñe. Chíyeca, chënga ndegombre mondétatšëmbo atše acbiocana tijabama, y montsošbuaché aca chë atše šcojichmó cha comnama.

⁹ “Atše chëngbiana cbontseimpadana. Chë nÿe quem luarama enójuabnaye entšangbiana ndoñe quecbátsimpadana, pero aiñe chë atšbiana šcojinÿinÿiyëngbiana, er chënga acbe entšanga mondmëna. ¹⁰ Lempe ntšamo atše tsbomncá, acbiámnaca endmëna; y cachcá, lempe ntšamo cobomncá, atšbiámnaca endmëna. Acbengbe vidëngaca aca tcojinÿanyé atše corente bëtsá y obená bëtsemnama.

¹¹ “Atše ndoñe quem luarentše quešocháisetotona, pero chënga aiñe cabá camuentše mochanjëftsemna. Atše chantá ácaftaca jtsatsmënama. Uámana Taitá, chë atšbiana šconjínÿinÿiyënga acbe obenánaca cochtsanÿena. Chca ntšamo bëndata mo canÿacá bondmëna, chëngnaca cachcá chamotsemnama. ¹² Atše chëngaftaca sëntsemnëntscuana, chënga sëntsanÿena, aca šconjatšetá obenánaca. Atše chënga sëndánÿena, y ni canÿa queochátsmëna infiernoca pochocaná, nÿe chë infiernoca pochocaná jtsemnama ibomná chana aiñe, ntšamo acbe uabemana palabrënguiñe endayancá, cachcá chaotsemnama.

¹³ “Morna chë aca condmënoye chantá; pero atše cabá quem luariñe sëntsemnëntscuana chca chënga sëntsëtsëtsná, chca, chë atše sëntsebomna puerte bëtscá oyejuayana chëngnaca chamotsebomnama. ¹⁴ Atše chënga sënjáuyana ntšamo aca šconjauyancá. Ntšamo atše ndoñe quetsátsmëna chë nÿe quem luarama enójuabnaye entšanguentšá, cachcá, chënga cach ndoñe quemátsmëna. Chíyeca, chë nÿe quem luarama enójuabnaye entšanga chënga montsëbuayënja. ¹⁵ Atše ndoñe quecbátsimpadana, chënga quem luarentšana chacúbuacanama; pero aiñe, nÿetsca bacna soyënguentsana chacuatsebacama. ¹⁶ Ntšamo atše ndoñe quetsátsmëna chë nÿe quem luarama enójuabnaye entšanguentšá, cachcá, chënga cach ndoñe quemátsmëna. ¹⁷ Cochjama chënga acbe entšanga chamuétsemnama, y chca, nÿe acbiana vida chamotsebomna. Chca cochjama, ntšamo ndegombre yomncá chënga imoyenama. Ntšamo aca condbetsichamcá, ndegombre endmëna. ¹⁸ Ntšamo aca quem luaroye šconjanichmocá, cachcá átšnaca chënga sëntsachamná, quem luare entšanga jábuayenama. ¹⁹ Chëngbiana atše cachiñe mëntsá cbëyana: Atše nÿe acbiana sëndmëna. Y chca, chëngnaca, ntšamo acbiana ndegombre yomncá jtsóyebuambnayëse acbe entšanga chamotsemna, y chca, nÿe acbiana vida chamuétsebomna, ntšamo ndegombre yomncá chënga imoyenama.

²⁰ “Pero nÿe chëngbiana ndoñe quecbátsimpadana, sinó chë átšbeñe mochtsošbuáchiyëngbiamnaca, chë atšbiana šconjínÿinÿiyënga, chëngbioye atšbiana ínÿenga chamojtsabuayiyiná ora; ²¹ as chënga nÿetscanga cánÿiñe mo canÿacá chamotsemnama. Ntšamo aca, Taita, átšeftaca cánÿiñe mo canÿacá bondmëna y átšnaca ácaftaca, cachcá chëngnaca cánÿiñe mo canÿacá bëndátaftaca chamotsemnama cbontseimpadana. Y chca, quem luarentša nÿetsca entšanga, atše šcojichmoma chamotsošbuáchema. ²² Ntšamo chë obenana y uámanana šconjatšetacá, cachcá átšnaca chënga sënjatšatá. As, ntšamo bëndata cánÿiñe mo canÿacá bondmëna, chëngnaca cachcá cánÿiñe mo canÿacá chamotsemnama. ²³ Atše chëngbe ainaniñe sëntsemna, y aca átšeftaca cánÿiñe mo canÿacá bondmëna; as, chëngnaca nÿetsca soyënguiñe cánÿiñe mo canÿacá chamotsemnama. Y chca, quem luarentša entšanga chamotsetátšëmbo aca šcojichmoma, y chamotsetátšëmbo ntšamo atše šcondbobonshancá, chëngnaca cachcá condábabuanÿeshanama.

²⁴ “Taita, atšbiana chënga šconjínÿinÿiye. Atše mëntsá sëntseboše: chë atše chántsemnoca, chëngnaca chamotsemna, y chentše, chë šconjatšetá obenana y uámanana chënga chámuinÿe. Quem luare cabá ndoñe quenjatsmëna orscana, šconjánbobonshana; chíyeca, cachora tconjaninÿanyé atše corente bëtsá y obená bëtsemnama. ²⁵ Taita,

nÿetsca soyënguiñe tšabá amá, masque chë nÿe quem luarama enójuabnaye entšanga ndoñe quecmatábuatma, atše aíñe cbonduábuatma, y quem boyabásenga montsetátšëmbo, aca comna chë šcojichmó cha. ²⁶ Atše chënga sënjinÿanÿé ntšamo ndegombre aca comnama, y más chanjínÿanÿiye; chca, ntšamo šcondbobonshancá, chëngnaca cachcá chamotsenbobonshánama y atše chëngbe ainaniñe chaitsemnama ca” —Jesús tojánayana.

18

Uayayënga Jesús tmojánishache

(Mt 26.47-56; Mc 14.43-50; Lc 22.47-53)

¹ Chë soyënga Jesús tojëftsanayanentšana, chabe uatsjéndayëngaftaca tojëftsanbocna, chë binche béjaye Cedrón ca uabáiniye chenguana jama. Chentše inamna canÿe tjashetema; y Jesús chabe uatsjéndayëngaftaca choye tojánamengo. ² Y Judas, chë Jesús uayayëngbe cucuatšíñe boshjuaná, tšabá chë luare yojanábuatma, er Jesús y chabe uatsjéndayënga ba soye chentše imojánenefjuana. ³ Chora Judas tojánashjango, y cháftaca ba soldadënga y básefta Bëngbe Bëtsabe bëts yebnoca josticiënga; chënga imojamna chë bachnangbe amëndayënga y fariseungbe ichmónënga; nÿetscanga uajuinÿanëshangaca, lamparëshangaca y espadëjangaca uajátënga.

⁴ Jesusna yojtsetátšëmbo lempe ntšamo cha yochjanpásama; chíyeca, natsanoye tojánbocna y chë entšanga tojanëyana: —¿Nda šmojtsenguá ca?

⁵ Y chënga tmojanjuá: —Jesús, chë Nazaretocá fsëntsenguá ca.

As Jesús tojanëjua: —Atše cha sëndmëna ca.

Y Judas, chë boshjuaná, chánaca chë entšangaftaca yojtsemna. ⁶ Jesús tojanëyana: “Atše cha sëndmëna ca”, y cachora chë entšanga tmojtanoštëtsánanga y fshantsoye tmojánshajaye.

⁷ Chora Jesús cachiñe tojanatjá: —¿Nda šmojtsenguá ca?

Y chënga tmojanjuá: —Jesús, chë Nazaretocá ca.

⁸ As Jesús tojanëyana: —Ya tcbonjáuyana: “Atše cha sëndmëna ca.” Atše šmojtsenguasna, mënga cachcá šmochjónÿaye chamotsóñengama ca.

⁹ Chca tojanopasá, ana ntšamo Jesús tojanayancá cachcá chaotsemnama, chë “Atšbe Taitá Bëngbe Bëtsá, chë šconjínÿinÿiye entšanguentsana ni canÿa pochocaná queochátsmëna ca”.

¹⁰ Simón Pedro canÿe espadëja inasëngbuájonÿana; asna, tojanenosëngbotëntšena y chë bachnangbe más uámana amëndayabe canÿe oservenábioye catšbioica matscuaše tbojt-sanëštjango. Chë oservená Malco ca inauabaina. ¹¹ As Jesús, Pédrëbioye tbojanianyana: “Acbe espadëja matosëngbuajonÿá. Ntšamo atšbe Taitá Bëngbe Bëtsá tojanmandacá, chë atše puerte ngmënana jtsebomnama, ¿ndoñe chca chaondëtsemna ca?”

Jesús, Anasbe yebnoca

(Mt 26.57-58; Mc 14.53-54; Lc 22.54)

¹² Chentšana chë soldadënga, chëngbe amëndayá y Bëngbe Bëtsabe bëts yebnoca josticiënga Jesús tmojánishache y tmojanëcuébatšëca. ¹³ Natsanëna, Anás, Caifasbe uambén taitábioye Jesús tmojanánatse. Caifás chë uata inamna chë bachnangbe más uámana amëndayá. ¹⁴ Caifás yojamna nda judiënga tojanëyana: “Tšëngaftangbiamá más tšabá entsemna canÿe boyabása Israeloca entšangbiamá chaóbana ca.”

Pedro tojánayana Jesúsbioye ndoñe bonjanabuátma ca

(Mt 26.69-70; Mc 14.66-68; Lc 22.55-57)

¹⁵ Simón Pedro y inÿe uatsjendayá Anasbe yebnoye Jesús imojtsëstona. Chë inÿe uatsjendayábioyna, chë bachnangbe más uámana amëndayá ibnauábuatma; chíyeca, cha tojanobená Jesúsëftaca chabe chashjóntscoñe jashjanguana. ¹⁶ Pero Pédrëna nÿe shjoca, amashjuanentše tojanoquedá. Chcasna, chë inÿe uatsjendayá tojánbocna y chë bëshása

ehtaftuana shembásaftaca tojanoyebuambá. Chora Pedro tbojanēmashēngo. ¹⁷ As chē shembása Pédrēbioye tbojaniyana: —¿Acnaca ndoñe chē boyabásabe uatsjendayá condmēna ca?

Y Pedro tbojanjuá: —Ndoñe; atše cha ndoñe quetsatabuatma ca.

¹⁸ Tša yojtšesēsna causna, chē oservénēnga y chē josticiēnga shjoca tmojanniñé y chentše imojtósboniye. Y Pédrēnaca chēngaftaca yojtšesbonena.

Ntšamo chē bachnangbe más uámana pasado amēndayá, Jesúsbioye tbojantjá
(Mt 26.59-66; Mc 14.55-64; Lc 22.66-71)

¹⁹ Chora, chē bachnangbe más uámana pasado amēndayá tojanontsé Jesús jatjayama chabe uatsjendayēngbiana y ndayá cha entšanga yojánabuatambamnaca. ²⁰ Y Jesús tbojanjuá: —Atše nyetsca entšangbe delante sēnjoyebuambá. Sempre chē entšangbe enefjuana yebnēnguenache sēndabuatambá, y Bēngbe Bētsabe bēts yebnócnaca, nyetsca judiēnga mondbētsenefjuanentše; y chca, iytēmencá tondaye chiyatoyebuambá. ²¹ ¿Ndáyeca chca šcojtsetjaná? Atšbe palabra tmojouenēnga májtaye, as chēnga chacmēyana ntšamo atše tijáuyanama. Chēnga mondētatsēmbo ntšamo atše tijayanca ca —Jesús tbojanjuá.

²² Jesús chē soyēnga tojánayana ora, canye josticio chentše yojtsemná, Jesúsbioye tbojanjuebjantšetá y tbojaniyana: —¿Chca chē bachnangbe más uámana amēndayá cuanjojuá ca?

²³ Y Jesús tbojanjuá: —Ndoñe tšabá tijayanēsna, šmēyana ndayentše chē podesca palabra yojtsemna; y tšabá tijóyebuambasna, ¿ndáyeca šcojajuebjantšetá ca?

²⁴ Chentšana, Anás tojanmandá, chē bachnangbe más uámana amēndayá Caifasbe yebnoye, Jesús batsēcná chamuánatsama.

Pedro cachiñe tojánayana Jesúsbioye ndoñe bonjanabuátma ca
(Mt 26.71-75; Mc 14.69-72; Lc 22.58-62)

²⁵ Chēntscuana, Pedro yojtšesbonena, tsanana chē iñe juachaca. Chora chē entšanga tmojantjá: —¿Aca ndoñe chabe uatsjendayēnguentšá condmēna ca?

Y Pedro ndoñe ca tojánayana: —Atše ndoñe quetsátsmēna ca —cha tojánayana.

²⁶ Chora, chē bachnangbe más uámana amēndayabe canye oservená Pédrēbioye tbojaniyana: —¿Atše ndoñe cháftaca chē tjashetémoca tchbonjinye ca?

Chē oservená inamna chē Pedro tbojtsanmatstētšabe pamillo.

²⁷ Y Pédrēna cachiñe ndoñe ca tojánayana, y cachora canye ngallo yojacánta.

Jesús Pilatbe delante

(Mt 27.1-2, 11-14; Mc 15.1-5; Lc 23.1-5)

²⁸ Chentšana, Caifasbe yebnentšana Jesús tmojanánatse chē romano mandadbe yebnoye. Ya yojtsebínjyana, y chē bēts yebnoye chē judiēnga ndoñe tmonjánamashjna, er chēnga imojtseboše chē Bashco saná jasama. Judiēnga ndoñe imonjobena Bashco saná jasana, chca tempo canye ndoñe judiēbe yebnoye nda tojámashēnguse. ²⁹ Chíyeca Pilato tojánbocna y chēnga tojanéyana: —¿Ndayá quem boyabásabe contra šmochjayana ca?

³⁰ Chora chē entšanga tmojanjuá: —Bacá uamaná ndoñe tontsemnēse, ndoñe matifjuánatse ca.

³¹ As Pilato tojanéyana: —Tšēngaftanga matánatse, y ntšamo cach tšēngaftangbe leyíñe iuayancá muabiana šmochjayana tšabá o ndoñe tšabá tonjamama ca.

Y chē judiēnga tmojanjuá: —Bēnga derecho queftsátsbomna ndocná jóbama ca.

³² Chca tojanopasá, ana ntšamo Jesús cachá jóbana tojanayancá cachcá chaotsemnama. ³³ As Pilato cach yebnoye tojtanamáshēngo, Jesús tbojanchembo y tbojantjá: —¿Aca chē judiēngbe Rey cojtsemna ca?

³⁴ Y Jesús tbojanjuá: —¿Ntšamo šconjatjacá, cach aca chca cojtsejuabnáyeca chca yojtsemna o ínnyēnga atšbiana tcmojacuentáyeca ca?

³⁵ Chora Pilato tbojaniyana: —¿Mo atše judío quetsmëna? Cach ácbioca entsanga y chë bachnangbe amëndayënga muentše tcomjúshjango. ¿Ndayá tcojama ca?

³⁶ Chora Jesús tbojanjuá: —Atšbe jamándama luare ndoñe quem luarentše quenátsmëna. Aíñe tojtsemnësna, atšbe ústonënga muantsatsejaye atše chë judiëngbe cucuatšíñe ndoñe chašmondoboshjonama. Pero atšbe jamándama luare ndoñe quem luarentše quenátsmëna ca —Jesús tbojanjuá.

³⁷ As Pilato tbojaniyana: —¿As aca rey cojtsemna ca?

Y Jesús tbojanjuá: —Tšabá tcjayana; atše rey sëndmëna. Chama atše tijonýná y quem luaroye tijabo; y atše sënjabo ndegombre soyëngama jabóyebuambayama. Y chca soyënga jtsamëse tmoyenënga, atše jtseyeunanana ca.

³⁸ Chora Pilato tbojaniyana: —¿Y ndayase chë ndegombre soye yomna ca?

Jesusbiana tmojánayana chaóbana ca
(Mt 27.15-31; Mc 15.6-20; Lc 23.13-25)

Chca tbojantjá chentšana, Pilato cachiñe tojánbocna judiëngaftaca jóyebuambayama, y tojanéyana: —Atše ni mo canýe soye chiyátinýena, quem boyabása castiganá chaotsemna ca jayanama. ³⁹ Pero tšëngaftanga šmondétatšëmbo, Bashco fiestama atše canýe utamená cachcá jëtsboshjonama. ¿Šmojtseboše chë judiëngbe Rey chjëtsboshjona ca?

⁴⁰ Chorna nýetsca entsanga cachiñe tmojanáyebuachena: —¡Ndoñe, cha ndoñe! ¡Barrabás matsboshjona ca!

Barrabasna canýe bacá uamana entšá inamna.

19

¹ Chora Pilato, Jesús tbojanánatse y tojanmandá chamotsetjanjama. ² Y canýe coronësha uchmašëfjangaca chë soldadënga tmojanapormá y Jesús tmojanabestšajó; y canýe shbuenda uafjatsenga entsayá mo reycá tmojanichëtjo. ³ Chorna chënga imojtsóbobecocnaye y jtsafchayama imojtsatsëtsnaye: “¡Bayté judiëngbe Rey cochtsemna ca!” Y imojtsejuebantšetaye.

⁴ Pilato cachiñe tojánbocna y entsanga tojanéyana: —Smochjouena; cha chanjuábocna, chë boyabása castiganá chaotsemna ca jayanama atše ni mo canýe soye ndoñe sënjinýenama chašmotsetatšëmbuama ca.

⁵ As Jesús tojánbocna chë uchmašëfjangaca coronësha uabestšajoná y chë shbuenda uafjatsenga entsayá mo reycá uichëtjoná. Y Pilato tojanéyana: —¡Muentše chë boyabása entsemna ca!

⁶ Chë bachnangbe amëndayënga y chëngbe josticiënga cha tmojáninýe ora, tmojanontšë uayebuáchana: —¡Motsecrucificá! ¡Motsecrucificá ca!

Chora Pilato tojanéyana: —Cach tšëngaftanga mánatse y smochjacrucificá; atše ni mo canýe soye chiyátinýena quem boyabása castiganá chaotsemna ca jayanama ca.

⁷ Chora chë judiënga tmojanjuá: —Bëngna canýe ley fsëndbomna, ntšamo chiñe endayancana, quem boyabása jóbanama bontsemna, Bëngbe Bëtsabe Uaquiñá entsenobiamná causa ca.

⁸ Pilato chca tojanuena ora, más yojtšauatja. ⁹ Cachiñe chabe yebnoye tojtanamáshëngo y Jesús tbojantjá: —¿Ndëmocá aca cmëna ca?

Pero Jesús ndocá tbojanjuá. ¹⁰ Chora Pilato tbojaniyana: —¿Ndoñe šcochanjojuá ca? ¿Ndoñe condétatšëmbo, aca jacrucificama o jëtsboshjonama atše tsobenama ca?

¹¹ As Jesús tbojanjuá: —Acbe obenana Bëngbe Bëtsá ndoñe macmënjánatšetase, tondaye cattsobena átšeftaca jamama; chíyeca, acbe cucuatšíñe šonjaboshjoná, acbiana más bëts bacna soye tonjama ca.

¹² Cach orscana Pilato yojtšenguaye ntšamo jamana, jobenayama Jesús jëtsboshjonama; pero chë judiënga imotsáyebuache: —¡Chacojëtsboshjonësna, Césarbe amigo ndoñe condmëna! ¡Nda rey tojtšenobiamná chana, Césarbe uayayá jtsemnana ca!

¹³ Pilato chë soyënga tojanuena ora, chashjoye Jesús tbojanábocna. Pilato tojanótbema chabe puestentše tribunaloca. Chë tribunaloca chashjaña hebreo biyañe Gabata ca inauabaina, y endayana “ndëtsbéngaca pormániñe ca”. ¹⁴ Bashco fiestama canye te yojtsájamna, y mo nýetsto ora yojtsemna. Chora Pilato chë judiënga tojanëyana: — ¡Muentše tšëngaftangbe rey entsemna ca!

¹⁵ Pero chënga tmojanáyebuachena: — ¡Chaóbana! ¡Chaóbana! ¡Motsecrucificá ca!

As Pilato tojanatjá: — ¿Tšëngaftangbe rey atše chjacrucificá ca?

Y chë bachnangbe amëndayënga tmojanjuá: — Bëngbe rey nýe César endmëna, ndocná más ca.

¹⁶ Chentšana Pilato, chëngbe cucuatšiñe Jesús tbojánboshjona chamocrucificama y chë judiënga cha tmojanánatse.

Jesús tmojanrucificá

(Mt 27.32-44; Mc 15.21-32; Lc 23.26-43)

¹⁷ Jesús tojánbocna chabe cruz tantšajónana y tmojanánatse canye luaroye, “Obanabe Bestšashe ca” uabáinoye (hebreo biyañe Gólgota ca inauabaina). ¹⁸ Chentše cha tmojanrucificá y inye útatnaca cátaoica tmojanrucificá; Jesusna tsëntsaca. ¹⁹ Pilato tojanmandá canye uabemana soye chë cruciñe chamuanjuama. Chiñe yojetsábemana: JESÚS NAZARETOCÁ, JUDIËNGBE REY ca. ²⁰ Y ba judiënga chë uabemana soye tmojanalía, er chë Jesús tmojanrucificá luare Jerusalenó béconana inamna, hebreo, latín y griego biyañe yojetsábemana. ²¹ Chca juabemama tojanmandáyeca, chë bachnangbe amëndayënga Pilato tmojanianya: — Ndoñe matabiamnana “Judiëngbe Rey” sinó ntšamo cachá tojayancá, “Judiëngbe Rey atše sëndmëna ca”.

²² Pero Pilato tojanëjua: — Ntšamo tijuábema cachcá chaotsábemana ca.

²³ Chë soldadënga Jesús tmojanrucificá chentšana, chabe entšayangá tmojanájaca y cántañe tmojanajatá, nýetsca canta soldadëngbiama. Chabe cmešëjua tmojanaca; chëjuana yojanamna nduajonanëjua, nýetsëjua uabianánëjua. ²⁴ As chë soldadënga tmojáneniyana: “Ndoñe matjuátanëca; más tšabana tsbanánoye mochjútšena, ndabiamna yochjuáquedama chaotsotatsëmbuama ca.”

Chca tojanopasá ana ntšamo Bëngbe Bëtsabe uabemana palabrenguiñe endayancá cachcá chaotsemnama, chë “Atšbe entšayangá tmojatenájataye; atšbe cmešëjuamna tsbanánoye tmonjanëtšena, ndabiamna jauquédama jtsotatsëmbuama ca.” Y lempe chca chë soldadënga tmojanma.

²⁵ Jesusbe cruz juachaca imojtsemna chabe mamá; chë mamabe quenata María, Cleofasbe shema; y María Magdalena. ²⁶ Jesús chabe mamábioye tbojáninýe, y chabe juachacna chë Jesusbe bonshana uatsjendayá yojtsemna. Chora chabe mamá tbojanianya: “Mama, chentše acbe uaquiñá entsemna ca.”

²⁷ Y chë bonshana uatsjendayá tbojanianya: “Chentše acbe mamá entsemna ca.”

Cach orscana, chë uatsjendayá chabe yebnentše Jesusbe mamábioye tbojanofja.

Jesús tojanóbana

(Mt 27.45-56; Mc 15.33-41; Lc 23.44-49)

²⁸ Jesús yojtsetátšëmo ya lempe tojanchnënguama, chíyeca chentšana y ntšamo Bëngbe Bëtsabe uabemana palabrenguiñe endayancá cachcá chaotsemnama, tojánayana: “Sontsajuendá ca.”

²⁹ Chentše inamna canye matbaja buajútjena untja vínoyeca. As, chë soldadënga canye esponjëshe chë vínoyeca tmojanfchecuacuá, canye hisopo niñëfjiñe tmojananguësëtjo y játsbanase, Jesusbe uayásoye tmojanbeconá. ³⁰ Chë untja vínoye Jesús tojanofšé ora, tojánayana: “Ya lempe tocjochnëngo ca.”

Tojanotsejbé y tojanóbana.

Canye soldado chabe lanzësaca costillaca Jesúsbioye tbojanashacuá

³¹ Bashco fiestama canye te yojtsájamna, y chë judiënga ndoñe imontseboše chë crucificánënga cachentše chë ochnayté chamotsemnana, chë te puerte uámana te bétsemnayeca. As Pilato tmojanimpadá chë crucificánënga shecuatsënga jetsatcacayama y chë cuerpënga chentšana jtsejuánama chaomandama. ³² As chë soldadënga tmojána y shecuatsënga imojtsatcacaye, natsana canya y chentšana chë inya, Jesúsfeftaca yojtsecrucificaná. ³³ Pero Jesúsbioye tmojanobeconá ora, ya obaná tmojáninye; chíyeca chabe shecuatsënga ndoñe tmonjanatcacá. ³⁴ Masque chca, canye soldado Jesúsbioye costillaca canye lanzësaca tbojanashacuá. Y cachora buiñe y búyeshe chentšana tonjanóbocna. ³⁵ Chë mëntsá cuentayá chentše enjamna y tonjáninye, y ndegombre entsichamo; cha endétatšëmbo ndegombre yojt sichámuama, chca, tšëngaftángnaca chiñe chašmotsošbuáchema. ³⁶ Chë soyënga chca tojanopasá, ntšamo Bëngbe Bëtsabe uabemana palabrënguiñe endayancá cachcá chaotsemnana. Chiñe endayana: “Ni mo canye betaše cha quemochatsëntšátca ca.” ³⁷ Y inyoca, Bëngbe Bëtsabe uabemana palabrënguiñe endayana: “Chë tmojenachentšá bominye mochanjabuájua ca.”

Jesús tmojanatbontsá

(Mt 27.57-61; Mc 15.42-47; Lc 23.50-56)

³⁸ Chë soyënga tojanopasá chentšana, José Arimateocá, Pilátbioye tbojanimpadá Jesusbe cuerpo jesocñama chabolesenciama. José inamna Jesusbe canye ustoná, masque nye iytëcana, chë judiëngbiama auatja causa. Pilato aiñe tbojanlesenciá; as José tojána y Jesusbe cuerpo yojtsámbañe. ³⁹ Nicodemo, chë ibeta Jesúsbioye tbojanbuachá, chánaca tojánashjango y tojanëyamba unga bnëtsana kilo mirra y áloe enájua bnana. ⁴⁰ As José y Nicodemo Jesusbe cuerpo tbojanca y tmojanandmaná chë botamana uanguëtše soyëngaca unëtjona entsëjuangaca. Judiënga chca imnauamana, obaná juatbontsama ora. ⁴¹ Jesús tmojancrucificá luarentše canye base jajañe inamna, y chiñe canye tsëm cuevëshe, entsangbe pormánëshe, obanëngbiama; chëshiñe cabá ndocna obaná mondëjajo. ⁴² Asna, nye chentše Jesusbe cuerpo tmojansegorá, chë Bashco fiestama canye te yojtsájamna causa, y chë cuevëshe chë béconana inámnayeca.

20

Jesús tojtanyena

(Mt 28.1-10; Mc 16.1-8; Lc 24.1-12)

¹ Chë inye semana bojatsenté, cabá cachëse, cabá ndëbinyna ora, María Magdalena chë cuevëshoye tojána y tojáninye inyoca yojtsemna chë cuevëshoye amashjuanentsa ndëtšbé. ² Asna, tojëftsantótjajo y tojána chë Simón Pedro y chë inye uatsjendayá, ndábioye Jesús tša ibnabobonshana ibojtsemnoye. Chora tojanëyana: “Bëngbe Utabnabe cuerpo chë cuevëshentšana tmojtsámbañe y ndayentše tmotsejájoma ndoñe queftsátstatšëmbo ca.”

³ Chora Pedro y chë inye uatsjendayá chentšana tbojëftsanbocna y chë cuevëshoye tbojánata. ⁴ Nyets útata ibojtsëchamana, pero chë inye uatsjendayá Pédrëbiama más betscó tojanótjajo y natsana chë cuevëshoye tojánashjango. ⁵ Tojanotsejbé y chë chentše tmojanacjá entsëjuangá tojáninye, pero choye ndoñe tonjánamashëngo. ⁶ Chentšana, Simón Pedro chabe ústonoye tojánashjango y chë cuevëshoye tojánamashëngo, y tojáninye chë chentše tmojanacjá entsëjuangá. ⁷ Y chë Jesús juabestšëntsacjuama tojanaservé entsëjuana ndoñe chë inyájua yontsamna, sinó inyoca botamana uandmanánëjua. ⁸ Chora chë inye uatsjendayá, chë cuevëshoye natsana tojanashjanguá, choye tojánamashëngo. Tojáninye y Jesús tojtanyenama yojt sanošbuaché. ⁹ Chëntscoñe chë útata cabá ndoñe yontsósertana ntšamo Bëngbe Bëtsabe uabemana palabrënguiñe endayancá, chë Jesús obanënguentšana jtayenama ibojamnama. ¹⁰ Chentšana chë uatsjendayata chatbe oyenoye tbojtaná.

*Jesús, María Magdalénbioye tbojánēbēbocna
(Mc 16.9-11)*

¹¹ Pero María chentše tojanoquedá, chē cuevēshe juachaca šachénaca; yojtsošachentscuana tojanotsejbé cuevēshoye jarrepárama. ¹² Y tojáninýe uta angelotémata uafjantsējua uichétjonata, Jesusbe cuerpo yojéftsejajóntše ibojtsetbemana. Canýa tséntšénēshoica y chē ínýana matsēsoica. ¹³ Chora chata tmojanianyana: —Shembása, ¿ndayama cošaché ca?

As cha tojanjúá: —Atsbe Utabná tmojtsámabañe, y ndayentše tmojtsejájoma ndoñe quetsátstatsēmbo ca.

¹⁴ Chca tojánayana ora, tojanostētšantješé y tojáninýe chentše Jesús yojtsemna, pero María ndoñe yontsetátšēmbo cha Jesús bétsemnama. ¹⁵ Chora Jesús tbojanianyana: —Shembása ¿ndayama cošaché? ¿Nda congua ca?

María yojtsejuabnaye chē boyabásana yojtsemna chentša base jajañe uaishanyá ca; chíyeca tbojantjá: —Bacó, aca tcojuambēsna, šmēyana ndayentše cojtsejajó, as atše cha jesocñama ca.

¹⁶ As Jesús tbojanianyana: —¡María ca!

Chora María chábioye tojanontješé y tbojanianyana: —¡Rabuni ca! (hebreo biyañe chca endayana “Buatēmbayá ca”).

¹⁷ Chora Jesús tbojanianyana: —Ndoñe šcatábojajo, er atše cabá ndoñe atsbe Taitábioye quetstétstsjua. Pero motsa atsbe catsátangbioye y cochjáuyana, atše stsetsjuá atše y tsēngaftangbe Bētšábioye, atše y tsēngaftangbe Taitábioye ca.

¹⁸ As María Magdalena tojána y Jesusbe uatsjéndayēnga tojanéyana cha chē Utabnábioye tbojáninýe ca y cha chē palabrēnga tojánayana ca.

*Jesús chabe uatsjéndayēnga tojánēbēbuacna
(Mt 28.16-20; Mc 16.14-18; Lc 24.36-49)*

¹⁹ Tojanibétata ora, cach semana bojatsenté, chē uatsjéndayēnga tmojánenefjna canýe luarentše, pero lempe tmojtanatame, chē judiēngbiama auatja causa. Chora Jesús tojánamashēngo, chēngbe tsēntsaca tojantsá y mēntšá tojanacheuá: “Chē atsbe ainaniñe tšabe ebionana tsēngaftangaftaca chaotsema ca.”

²⁰ Y chca tojanéyana ora, chabe cucuatšēnga y costillaca tojaninýanýé. Chora chē uatsjéndayēnga oyejuayēnga imojtsemna, chēngbe Utabná tmojáninýama. ²¹ As Jesús cachiñe tojanéyana: “Chē atsbe ainaniñe tšabe ebionana tsēngaftangaftaca chaotsemna. Ntšamo atsbe Taitá Bēngbe Bētšá šojichmocá, átsnaca cachcá tsēngaftanga cbontšachamná ca.”

²² Chca tojánayana ora, chēngbioye tojangouo y tojanéyana: “Chē Uámana Espiritu šmochjójyēngacñe. ²³ Ndēmuanýenga chēngbe bacna soyēngama chašmojáperdonanga, perdonánēnga mochántatsmēna; y ndoñe chašmonjáperdonasna, ndēperdonánēnga mochántsemna ca.”

Tomás, Bēngbe Utabnábioye ainá tbojáninýe

²⁴ Pero Tomás, chē Gemelo ca uabobainá, canýa chē bnétsana uta uatsjéndayēnguentsá, chē uatsjéndayēngaftaca ndoñe yontsemna, Jesús tojánashjango ora.

²⁵ Chíyeca, “bēnga chē Utabná fsēnjinye ca”, chē inýe uatsjéndayēnga tmojanianyana ora, Tomás tojanéjua: “Atše chabe cucuatšiñe chē uajabonjana uinýniñe ndoñe sēnjinye, y chiñe atsbe ntšabuafja ndoñe sēnjajué y atsbe cucuatše chabe costillaca ndoñe, ndoñe quichátošbuachiye ca.”

²⁶ Canýe semana tojanochñēngo ora, chē uatsjéndayēnga cachiñe canýe luarentše tmojánenefjna. Y Tomásnaca chēngaftaca yojtsemna. Masque chentše atámeniñe yojtsemna, Jesús tojánamashēngo, chēngbe tsēntsaca tojantsá y tojanéyana: —Atsbe ainaniñe tšabe ebionana tsēngaftangaftaca chaotsemna ca.

²⁷ Chora Tomásbioye tbojaniyana: —Acbe ntšabuafja muentše mojué y atšbe cucuatše minye; acbe cucuatše miyëbo y atšbe costillaca mojué. Y ndošbuachiyá ndoñe matsmënana, sinó atše tijtayenama cochtsošbuáchiye ca.

²⁸ As Tomás tbojaniyana: —¡Atšbe Utabná y atšbe Bëtsá ca!

²⁹ Chora Jesús tbojaniyana: —Tomás, nye šconjínÿeyeca cojtsošbuaché. ¡Bëngbe Bëtsá chaoma puerte oyejuayënga chamotsemna chë nÿe ntjinÿcá tmojošbuachenga ca!

Ndayama quem librëša tmojanábema

³⁰ Jesús, chabe uatsjéndayëngbe delante inÿe bëts soyënga Bëngbe Bëtsabe obenánaca tonjëftsema, pero quem librëšañe ndoñe quenatábemana. ³¹ Y quem librëšañe soyëngna, entsábemana tšëngaftanga chašmotsošbuáchemá, Jesús, chë Cristo y Bëngbe Bëtsabe Uaquiñá bëtsemnama; y chcase, chábeñe chašmojtsošbuachese, chábeyeca chë nÿetsca tescama yomna tšabe vida chašmotsebonnama.

21

Jesús, canÿsëfta chabe uatsjéndayënga tojánëbëbuacna

¹ Chca tojanopasá chentšana, Jesús inÿe soye chabe uatsjéndayënga tojánëbëbuacna, Tiberias mar béjaye tsachañe. Chora mëntsá tojanopasá: ² Cánÿentše imojëtsemna Simón Pedro; Tomás, chë Gemelo ca uabobainá; Natanael, chë Galilea luarocá, Caná pueblócá; Zebedeobe uaquiñata y Jesusbe inÿe uta uatsjéndayata. ³ Simón Pedro chënga tojanëyana: —Sëntsá beonga jashebuáyama ca.

As chënga tmojanjuá: —Bëngnaca ácaftaca fchanjá ca.

As tmojána y canÿe barquëshoye tmojánamashjna; pero chë ibeta tondaye tmonjáninÿena. ⁴ Ya yojtsebínÿana orna, Jesús chë tsachoca yojtsemna, pero chë uatsjéndayënga ndoñe imontsetátšëmbo cha Jesús yojamnama. ⁵ Chora Jesús tojanatjá: —Básenga, ¿tondaye šmonjashbuá ca?

Y chënga tmojanjuá: —Tondaye ca.

⁶ As Jesús tojanëyana: —Barquëshá catsbioica chë atarraiëshá mëtsena y beonga šmochanjáshebuaye ca.

As chënga chca tmojanma, y chora chësha jtabocnama ndoñe imontsobena, nÿetsá beonga tmojánishëche causa. ⁷ As chë Jesusbe bonshana uatsjendayá, Pédrëbioye tbojaniyana: “¡Bëngbe Utabná entsemna ca!”

Simón Pedro chca soye tojanuena y cachora entšayá tojtánichëtjo, er nduichëtjoná yojtsemna, y chë béjayoye tojanoshbuëtse. ⁸ Chë inÿe uatsjéndayëngna chë barquëshañe tmojána, y chë atarraiëshá jútjena beóngaca imojtsásjaye, er chë tsachocama bécoñe imojtsemna, nÿe canÿe patse metroca. ⁹ Fshantsoye tmojánastjajna ora, chënga tmojáninÿena canÿe chebániñe pormániñe, y chentšna canÿe beona y tandëšnaca yojtsesegorana. ¹⁰ Chora Jesús tojanëyana: “Chë šmonjáshebuaye beonguentšana báseftanga miyëbo ca.”

¹¹ Simón Pedro chë barquëshoye tojánamashëngo, y chë atarraiëshá jútjena bëts beóngaca, uasjoónana tsachóntscoñe tojanëyamba. Mo canÿe patse y shachna bnëtsana y unga beóngaca; pero masque nÿetsá beonga, chë atarraiëshá ndoñe ntjuatanëcanana.

¹² Chora Jesús tojanëyana: “Mabënga, šmochjase ca.”

Chë uatsjéndayënguentšana ni canÿa yontsenñëmua cha jatjayama nda cha yojamnama, er nÿetscanga imojtsetátšëmbo cha chë Utabná bëtsemnama. ¹³ Chora Jesús tojanobeconá, chë tandëse tojanca y chënga tojanatšatá, y chë beónacnaca cachcá tojanma.

¹⁴ Chóracna, Jesús ya unga soyama chabe uatsjéndayënga yojtsanebëbuacana, obanënguentšana tojtanayenentšana.

Jesús, Simón Pédroftaca tojanoyebuambá

¹⁵ Jasama tmojanpochocá ora, Jesús, Simón Pédrëbioye tbojantjá: —Simón, Juanbe uaquiñá, ¿quemëngbiana más quešcbonshana ca?

Y Pedro tbojanjuá: —Atšbe Utabná, aíñe. Aca condětatsëmbo atše aíñe cbondbobonshánama ca.

As Jesús tbojaniana: —Atšbe entsanga, mo oveshatemëngcá imomnënga, cochtsanÿena ca.

¹⁶ Chora cachiñe tbojantjá: —Simón, Juanbe uaquiñá, ¿quešcbobonshana ca?

Y Pedro tbojanjuá: —Atšbe Utabná, aíñe. Aca condětatsëmbo atše aíñe cbondbobonshánama ca.

As Jesús tbojaniana: —Atšbe entsanga, mo oveshëngcá imomnënga, cochtsanÿena ca.

¹⁷ Y unga soyama tbojtëtantjá: —Simón, Juanbe uaquiñá, ¿quešcbobonshana ca?

Pedro puerte tbojanongmé, ya unga soyama “quešcbobonshana ca” tbonjantjá causa; y tbojanjuá: —Atšbe Utabná, aca lempe condětatsëmbo. Aca condětatsëmbo atše aíñe cbondbobonshánama ca.

As Jesús tbojaniana: —Atšbe entsanga, mo oveshëngcá imomnënga, cochtsanÿena.

¹⁸ Ndegombre cbëyana: Más bobontse conjamna ora, conjanamana cach aca jtichëtjuana y ndëmoye jama cojtseboše choye jtsoñana; pero tanguá chacojtsemna orna, buacu-atšënga cochanjatsbaná, y inÿa cmochantichëtjo y ndëmoye jama ndoñe chacontseboše choye cmochanjuánatse ca —Jesús tbojaniana.

¹⁹ Chca tojánayana, ana jtsotatsëmbuama ntšamo Pedro jóbanama ibojamnama, y chë chca jóbanëse, Bëngbe Bëtsá corente bëtsá y obená bëtsemnama Pedro yochjáninÿanÿiyama. Y chca tojánayanentšana, Pédrëbioye tbojaniana: —Smasto ca.

Jesusbe bonshana uatsjendayá

²⁰ Pedro tojesanenostëtsantješé y tojáninÿe, Jesusbe bonshana uatsjendayá ústonoye yojtsaye. Cha enjamna chë monjansá ora, Jesús cabá ndóbana ora, chë Jesúsbioye más tonjanosjoná y tbonjantjá: “Bëngbe Utabná, ¿nda chë boshjuaná yochtsemna ca?”

²¹ Pedro chábioye tbojáninÿe ora, Jesúsbioye tbojantjá: —Atšbe Utabná, y cháftaca, ¿ntšamo yochjopása ca?

²² Chora Jesús tbojanjuá: —Atše quem luaroye jesabámëntscuana cha ainá chauesomñama atše stsebošëse, ¿aca ndayá chama cmatjátsëntšamna? Acna nÿe šmasto ca.

²³ Chíyeca, chentšana, Jesucristbeñe ošbuáchiyëngbenache nÿetscanga imojánichamo, chë uatsjendayá ndoñe yochanjanóbana ca. Pero Jesusna ndoñe chca tonjánayana, sinó “atše quem luaroye jesabámëntscuana cha ainá chauesomñama atše stsebošëse, ¿aca ndayá chama cmatjátsëntšamna? ca”.

²⁴ Mua endmëna chë uatsjendayá; cha entsichamo quem soyënga ndegombre yojamnama, y camuá quem librëšañe lempe tonjuábema. Y bënga mondětatsëmbo cha ndegombre soye endóyebuambnama.

²⁵ Jesús inÿe ba soyënga tonjëftsema; tša bëtscá soyënga endmëna, nderado lempe cada canÿe soye tcojuábema y librëšangá tcojuapormá, atše sëntsejuabná, nÿetsca chëšangá quem luarentše ndoñe nanjuába.

Hechos

Jesús tojanasebuachená chë Uámana Espíritu jíchmuama

¹ Teófilo, atšbe natsana librëšaňe tbonjuábobema lempe ntšamo Jesús tojanmama y tojánabuatambama, chca tojanbojatsé orscana, ² y Bëngbe Bëtsá celoye tbojtanatsbanantscuana. Cabá celoye ndëta orna, chë chabe ichmonëngcá tojanabacacá boyabásengna Jesús tojëftsanamëndá, chë Uámana Espíritbiajana, ndayá jamama yojánamnana. ³ Jesús cruciňe tojanóbana y tojtanayenentsana, ba soye chë ichmónënga yojánebëbuacana, chca, chënga jinýanyiyama cha ndegombre tojtanayenama. Canta bnëtsana tentscuana cha yojánebëbuacana y Bëngbe Bëtsabe amëndayama chënga yojanabuatambá.

⁴ Canýe, Jesús chabe ichmónëngaftaca yojëtsemna ora, mëntšá tojanamëndá: — Jerusalenentsana ndoňe šmatjábocana. Camuentše šmochjobátma, ntšamo atšbe Taitá tcmonjanašebuachenacá chaóshjanguëntscuana, ndayama atše tbonjúyana.

⁵ Ndegombre, Juan entsanga béjayeca tonjanëbaye; pero ndoňe baytesna, Bëngbe Bëtsá chë Uámana Espíritu bochanjíchmuá, tšëngaftangbe ainaniňe jtsemándayama cháuamashënguama ca.

Jesús celoye tojtantsjuá

⁶ Canýe, chë ichmónënga Jesúseftaca cánýiňe imojtsemna ora, chënga tmojantjá: — ¿César y chë Romoquëngbe amëndayentsana tašcochjatsebacá, y mora bënga, Israeloca entsanga, canýe Rey quemochtsatsbomna ca?

⁷ As Jesús tojanëyana: —Tšëngaftanga ndoňe quecmátamna chë soyëngama jtsetatšëmbuana. Nýe atšbe Taitá aiňe; y cha, chabe obenánaca echanjamánda mocna ora y ndayté chca chaopasama. ⁸ Chë Uámana Espíritu tšëngaftangbe ainaniňe jtsemándayama chaojabo ora, tšëngaftanga obenana šmochanjóyëngacňe. Chentsana, ntšamo atšbíama šmotatšëmbcá, chë tbonjabuatambá soyënga, entsanga šmochjúyana Jerusalenentše, nyets Judea luariňe, Samarioca y quem luarentša nyets luarënguenáchnaca ca.

⁹ Chë soyënga tojánayanentsana y chabe uatsjëndayënga imojtsonýaye ora, Bëngbe Bëtsá, Jesúsbioye tbojtanatsbaná y canýe jantšetëshe chábioye ibojútsbotse y ndoňe más tmonjanobená cha jinýama. ¹⁰ Jesús celoye yojtsetsjuama chënga bën imojtserreparánëntscuana, nýe ndeolpe, uta boyabásata uafjantse entšayaca bopormánata chëngbe juachaca tbojabántsaye, ¹¹ y chëngbioye tmojanëyana: “Galileoca entsanga, ¿ndáyeca celoye šmojtsantješana? Jesús, chë tšëngaftangaftaca enjamná celoye tontá y ntšamo mora šmonjinýcá cha celoye jtama, cachcá quem luaroye cha echanjésabo ca.”

Júdasbe cuenta Matías tmojanábuayana

¹² Jesusbe ichmónënga chë Olivos tjashocana Jerusalenoje tmojtaná. Chë tjocana Jerusalenóntscóňna bécoňe inamna, ndayëntscoca canýe ochnayté jama yojanlesenciana nyetšá. ¹³ Jerusalenoje tmojtanashajna orna, chë yebnentša tsbanánoca tsoye tmojtanášëngo. Chentše yojánatana Pedro, Juan, Santiago, Andrés, Felipe, Tomás, Bartolomé, Mateo, Santiago chë Alfeobe uaquiňá, Simón chë Celote ca uabobainá, y Judas, chë Santiagbe uaquiňá. ¹⁴ Chënga sempre imojanamana jtnefnana Bëngbe Bëtsáftaca jencuéntama básefta shembásengaftaca, María Jesusbe mamá y Jesusbe catšátangaftaca.

¹⁵ Chë tempo tmojánenefjna canýe patse y uta bnëtsana Jesucristbeňe ošbuáchiyënga, y canýe, Pedro tojantsá y tojanëyana: ¹⁶ “Jesucristbeyeca atšbe catšátanga, endánëyta ntšamo Bëngbe Bëtsabe uabemana palabrenguiňe iuabemancá chaohnënguama, y tempo, David chë Uámana Espíritbeyeca chiňe tojanábema ntšamo Júdasëftaca yochjanopásama; chcasna, Judas uayayënga tojanënatse Jesús chamuishachama. ¹⁷ Júdasnaca

bëngbe enutá enjamna y Jesús chábioynaca tbonjanábuayana bëngcá chabe trabajuíne jtsoservénama. ¹⁸ Tšëngaftanga šmondétatsëmbo, chë Judas bacna soye tojanmama tmojtanabuená crocenánacna fshantse tmojánbuamema. Chentšana cha tojtsanótsatše y chabe bestšaše tsëntsaca tbojtsanashtétšena y chabe uafsbentšana nyetsca chabe chunchullëjuangá tojtsanáshana. ¹⁹ Jerusalemntše oyenënga chë soyama tmojántatsëmbona ora, chë fshantse chëngbe biyañe Acéldama ca tmojanabaye. Acéldama endayana ‘Buiñe Luare ca’. ²⁰ Salmos librëšañe, Jesucristo uayayëngbe cucuatšiñe boshjuanabiama mëntšá enduábemana:

Chabe yebna éñañe chaotsemna

y ndocná chentše chaondëtsiyena ca.

Y mëntšánaca endayana:

Chabe cuenta inya chabe trabajo chaoma ca.

²¹ “Chcasna, mora muentše montsemna taitanga bëngaftaca mondenutënga, Bëngbe Utabná Jesús bëngaftaca enjamnëntscuana, ²² Juan Jesúsbioye tbonjanabaye orscana y Bëngbe Bëtsá Jesúsbioye bëngbentšana celoye tbontanatsbanantscuana. Y mora šontsamna canya mënguentšá juabuáyanama, Jesús tojtanayenama entšángbioye bëngaftaca jábuayenama ca.”

²³ As chora útata tmojanabocacá: José, nda Barsabás ca imojanábobuatma y ínÿengna Justo ca; y chentšana Matías. ²⁴ Chora Bëngbe Bëtsáftaca mëntšá tmojanencuentá: “Bëngbe Utabná, aca nyetscangbe ainana icuabuatma; chcasna, šminyanýe nda quem útatentšana cochjuábuayanana, ²⁵ canye ichmonacá Júdasbe cuenta chaotrabajama. Judas ya ndoñe canye ichmoná quenátsmëna, bacna soye tojama causa, y cha mora yojtsemna chë ndayentše jtsemnama ibomna luaroca ca” —chënga tmojánayana.

²⁶ Y nda chë ichmoná yochtsemnama jtsotatsëmbuamna tsbanánoye tmojanëtšena y Matías tbojanobuache; as cach orscana, Jesucristbeñe ošbuáchiyënga chabiama imojanjuabná mo canye Jesusbe ustonacá, cachcá ntšamo chë bnëtsana canye uatšëndayëngbiama chënga imojanjuabnacá.

2

Chë Uámana Espiritu ošbuachiyëngbeñe tojánamashëngo

¹ Pentecostés ca uabaina fiesta tojanobuache ora, chë jaja sananga tmojanobuátbanama fiesta te, Jesucristbeñe ošbuáchiyënga nyetscanga cánÿiñe canye luarentše imojtsemna. ² Ndeolpe, celocana mo canye jabuache binÿiécá yojtsaishauenana y chca, tša jabuache shauenanana tojanóshjango nyets yebnentše, chënga imojtsetbiámanentše. ³ Y chora bichtajënga mo iñeshcá yojónÿna y canyánÿabeñe yojojátaye. ⁴ Chca chë Uámana Espiritu tojánamashëngo chëngbe ainaniñe jtsemándayama; chora nyetscanga tmojanontšé inÿetšá biyangana, chënga tempo ndmabiyañe, ntšamo chë Uámana Espiritu yojtsamcá chënga inÿetšá chamotsebiyama.

⁵ Chë tempo Jerusalemntše imojtsemna ba judiënga, Bëngbe Bëtsá puerte adórayënga, nyets luarëngocana áshjajnënga; chënga tmojánabo Bëngbe Bëtsá jëtschuayama. ⁶ Entšanga chë shauenanana tmojanuena ora, tmojanójoto y ndoñe imontsetátšëmbo ntšamo jtsejuabnayana ndayá yojtsopasánama, er chë inÿe luarocana áshjajnënga imojtsuenana chë Jesucristbeñe ošbuáchiyënga inÿetšá biyangana jtsóyebuambnayana, ntšamo cada ona chënga imojanbiyacá. ⁷ Chë soyëngama entšanga puerte imojenjnaná y mëntšá imojtsenatsëtsnaye: “Chë chca montsóyebuambnanga Galileoquënga mondmëna. ⁸ Chcase, ¿ntšámoyeca bënga imojtsobena chënga joyaunayana cach bënga mondëbiyacá ca? ⁹ Muentše montsemna Partioquënga, Medioquënga, Elam, Mesopotamia y Judeoquënga, Capadocia, Ponto y Asia luaroquëngnaca, ¹⁰ Frigioquënga, Panfilia, Egipto y Libia, chë Cirene béconana luaroquënga. Báseftangna Romoquënga montsemna;

11 chëngbeñe nderado judiënga camuentše onÿnánënga, pero ínÿengna ndoñe, y chënga Bëngbe Bëtsá mondbëtsatschuanaye cach ntšamo chë judiënga monduamancá. Inÿengna Cretocana y Arabiocánënaca tmojabo. ¡Y bënga montsobena chë Galileoca judiënga joyaunayana Bëngbe Bëtsá bëts soyënga tojamama cach bënga mondëbiyacá ca!” —chë entšanga imojtsichamo.

12 Chë causa nÿetscanga imojtsenjanaye y ntšamo jtsejuabnayama ntsetatšëmbcá imojtsemna y imojtsentjanaye: “¿Ndayá chë soye yojsayana ca?”

13 Pero ínÿengna, chë soyëngama chëngbioye imojtsëbayajuana y imojtsichamo: “Chënga tëmiënga montsemna ca.”

Ntšamo Pedro chora tojanoyebuambá

14 Chentšana, Pedro tojantsá chë inÿe bnëtsana canÿe ichmónëngaftaca y jabuache tojanontšé chë entšanga jáuyanana, mëntšá: “Atšbe entšanga judiënga y nÿetscanga Jerusale- nentše oyenënga, tšabá šmochjouena. Ntšamo tojopasama cbochanjábuayenaye, as chacmësertama. 15 Tšëngaftanga šmontsejuabná atše y atšbe enutënga tëmiënga fstsemna ca, pero ndegombre, tëmiënga ndoñe queftsátsmëna; cabá cachëse, base mošenana ora ctsomñe. 16 Pero ntšamo entsopasánamna, Bëngbe Bëtsabe juabna oyebuambnayá Joel mëntšá tojanábema:

17 Bëngbe Bëtsá mëntšá tojánayana: ‘Quem luare jopochócama te chaojtsobeco ora, chë soyënga echanjochnëngo.

Atše chanjama, atšbe Espíritu nÿetscangbe ainaniñe cháumashënguama.

Chentšana, tšëngaftangbe uaquiñënga y bemianga atšbe soyëngama entšanga mochantsëtsësnaye;

tšëngaftangbe bobontsëngna, atše chanjama soyënga mochantsonÿaye mo otjenayoquëcá; y tšëngaftangbe bëtsëjëmëngna atšbe soyënga mochantsotjénaye.

18 Chca ora, atše chanjama nÿetsca atšbe oservëngbiama, boyabásenga y shembásenga, chëngbe ainaniñe atšbe Espíritu cháumashënguama, as chënga atšbe soyëngama entšanga mochantsëtsësnaye.

19 Atše chanjama bëts soyënga celoca;

y quem luariñe echántsemna buiñe, iñeshe y ngonana mo jantšetëshcá, atšbe obenana jinÿanÿiyama.

20 Cabá chë puerte uámana te, chë Bëngbe Utabná bëts soyënga jamama ndobuache ora, shinÿe ndoñe queochátsbuashinÿinÿana

y juashcona buánganëtema mo buiñcá echántsemna.

21 Y as, ndánaca Bëngbe Utabná tbojtsotšëmbuaná, cha bochanjatsbocá.’

Chca Joel tempo tojanábema ca” —Pedro tojánayana.

22 Chora Pedro tojatanëyana: “Israeloquënga, šmochjouena ntšamo cbochan- jauyancá: Bëngbe Bëtsá ndegombre tcmonjaninÿanÿé, Jesúsbioye chabe trabajo bi- amnayá cha tbojánbemama. Chë soye Bëngbe Bëtsá tcmonjaninÿanÿé, Jesús chë Nazare- tocáftaca cha tojanma bëts soyëngaca y ójnanana soyëngaca, Bëngbe Bëtsabe obe- nana jinÿanÿiyama. Cach tšëngaftanga chë soyëngama šmondëtatšëmbo, Bëngbe Bëtsabe obenánaca chë soyënga tšëngaftangbeñe Jesús tonjánmayeca. 23 Ndegombre tšëngaftangbe cucuatšinë Jesús tmonjánboshjona, pero cabá ndëboshjona ora, Bëngbe Bëtsá tojanjuabó ntšamo jopásana yojamnama; y ntšamo tšëngaftanga cháftaca šmochjanmámnaca cha inatátšëmbo. Tšëngaftangna Jesús šmonjanishache y šmonjanma cha chamóbama y chamocrucificama, bacna entšangbe cucuatšinë. 24 Pero Bëngbe Bëtsá tojama cha cháuatayenama; y chë obanëngbe luarentšana tbojatsbocá, er ndoñe yonjopodena cha obaná chaoquedama ca” —cha tojánayana.

25 Chora Pedro tojatanëyana: “Rey David tempo Jesusbiamama mëntšá tojëftsanabema, ntšamo cha Bëngbe Bëtsábioye tbojanianama:

Atšbe Utabná, aca sempre átšeftaca condbétsemna,
y sempre átšeftaca condboquedá atše juajabuáchama,
chíyeca ndocná queochatobenaye atše jauátjanama.

²⁶ Chíyeca atše corente oyejuayá sěntsemna,
y atšbe uayásaca cbontsatschuaná.

Atše masque chanjóbana, tšabá sěndětatsěmbo aca atšbe Bětsá, atše chaitayenama
cochjamama.

²⁷ Aca, Běngbe Bětsá, obaněngbe luarentše ndoñe quešcochátsboshjona,
y ndoñe queochatsleséncia acbe uámana oservenabe cuerpo chaotsopochocama.

²⁸ Aca chě tšabe benache šconjaninýinýé, ntšamo tšabe vida jtsebomnama.

Aca átšeftaca condbétsemnama, atše puerte oyejuayá sěntsemna ca —David
tojěftsanabema ca.”

²⁹ Chentšana Pedro tojataněyana: “Baconga y batanga, šontsemna ndegombre
tšěngaftanga jábuayenana tšabá chacmėsertama. Běngbe tempsca běts taitá David to-
janóbana y tmojanatbontsá, y běnga montsemna cha tmojanatbontsá luare béconana.

³⁰ Cach David canýe Běngbe Bětsabe juabna oyebuambnayá inamna. Cha tšabá
inatátsěmbo Běngbe Bětsá bětscá tbojanšbuáchenama, Davidbe entšanguentšana canýa,
Cristo, cach Davidcá rey jabemama. ³¹ David inatátsěmbo chě Uámana Uabuayaná,
chě Cristo, cháuatayenama Běngbe Bětsá yochjanmama. Chama cha tojánayana y
tojěftsanabema, obaněngbe luarentše Cristo ndoñe ntjěftseboshjonana y Běngbe Bětsá
ndoñe ntjalesénciana chabe cuerpo chaotsopochocama ca. ³² Běngbe Bětsá tojama Jesús
cháuatayenama y běnga cha fsěnjinye. Chíyeca běnga fsěntsetatsěmbo chca ndegombre
bétsemnama. ³³ Běngbe Bětsá, Jesús celoye tbontanatsbaná chabe catšbioica jtsatsměnama
jtsemándayama, y Běngbe Bětsá chě Uámana Espíritu Jesúsbiolye tbojaněntšabuaché ntšamo
chě Taitá tbojanšbuachenacá. Ntšamo tšěngaftanga šmontsonýá y šmontsuenancá
entsemna, Jesucrísoftaca chě Uámana Espíritu běngbe ainaniñe cháumashěnguama Běngbe
Bětsá tojámayeca. ³⁴ David ndoñe Jesuscá celoye tonjána, pero měntšá tojěftsanábema:

Běngbe Bětsá atšbe Utabná Crístbiolye tbonjanianya:

‘Atšbe catšbioica cochtsetbemana,

³⁵ acbe uayayěnga acbe cucuatšíně chamoquedama atšbe obenánaca chjaměntscuana ca.’

³⁶ Chora Pedro tojataněyana: “Tšěngaftanga nýets Israeloquěnga šmochtsetátšěmbo,
atše ndegombre cach Jesusbiana sěntsóyebuambnama. Cha tšěngaftanga
šmonjancrucificá, pero Běngbe Bětsá chábioye tbonjábema Běngbe Utabná y chabe Uámana
Uabuayaná, chě Cristo ca.”

³⁷ Chě soyěnga tmojanuena ora, entšanga cochtsetšenáněnga imojtsemna, y Pedro y
chě inýe ichmóněngbiolye tmojaněyana: —Baconga, ¿ndayá mora jamama šojtsamna ca?

³⁸ As Pedro tojanějua: —Ngménaca šmochtenójuaboye bacna soyěnga šmojtsamama,
chca amana šmochtsajbaná y Běngbe Bětsabe benache šmochtishache. Chca
chašmojama ora, chochanjubaye mo chábeñe ošbuachiyěngcá, Jesucristo atše
jótšěmboněse. Chcase, Běngbe Bětsá tšěngaftangbe bacna soyěngama cmochanjáperdonaye
y echanjama chě Uámana Espíritu tšěngaftangbe ainaniñe jtsemándayama
cháumashěnguama. ³⁹ Běngbe Bětsá chě soyěnga tcmonjanašebuachená tšěngaftangbiana,
tšěngaftangbe básengbiana y nýets chě bėn luarěnguenache imomna entšangbiana,
nýetscanga chě Běngbe Utabná Běngbe Bětsá chábioye jabama chaojubuáyaněnga ca.

⁴⁰ Inýe palabrěngnaca Pedro tojataněyana y bětscá tojanabuayená měntšá: “¡Běngbe
Bětsá chě Israeloca bacna entšanga echanjácastigaye. Chašmótsbocamna, chěngbentšana
šmochtsojuánañe ca!”

⁴¹ Ba entšanga imojtsanošbuaché ntšamo Pedro tojanéyanama y tmojánenabaye. Cach te mo unga uaranga entšanga nyetsá tmojanoboté, Jesucristbeñe ošbuáchiyënga jtsemnama. ⁴² Chënga corente imojtseboše jtsamama chë Jesusbe ichmónënga imojtsabuatambá soyënga. Tšabá yojsacochebiona nyetscanga cányiñe jtsemnama y imojanamana mo chë Jesucristbeñe ošbuachiyëngcá cányiñe jtsesayana y cányiñe Bëngbe Bëtsáftaca jtsencuéntayana.

Ntšamo chë natsana Crístbeñe ošbuáchiyënga vida imnabomna

⁴³ Nyetscanga imojtsenjnanaye, chë ichmónënga bëts soyënga y inye soyënga chabe obenana jinyaníyama chamomama Bëngbe Bëtsá tojánmayeca. ⁴⁴ Nyetsca chë Jesucristbeñe ošbuáchiyënga sempre cányiñe mo canyáca imojtsemna y nyetsca chëngbe bomna soyënga nyetscangbiamana yojtsemna. ⁴⁵ Chënga imojanamana fshantsënga jtsatobuíyana y chë imojánbomna soyëngnaca, y chë crocénana jujátayana ntšamo chë ínÿënga tojtsëjabotcá. ⁴⁶ Cada te imojanamana Bëngbe Bëtsabe bëts yebnentše jénefnana cha jëtschuayama, y yebnënguenache cányiñe imojtsesaye oyejuayënga y ndoñe ojëndayënga. ⁴⁷ Chënga imojanamana Bëngbe Bëtsá jtsatschuanayana, y nyetsca entšanga imojtsejuabnaye chë Jesucristbeñe ošbuáchiyëngbiamana tšabe entšanga imojamna ca. Y cada te Bëngbe Bëtsá yojsama más ošbuáchiyënga chamóbotema, chë ndëmuanÿënga cha yojsatsebacayënga.

3

Pedro canÿe coshétbioye tbojanshná

¹ Canÿe te, Pedro y Juan Bëngbe Bëtsabe bëts yebnoye tbojánata bëts mošenana ora. Chca ora entšanga imojanamana Bëngbe Bëtsáftaca jtsencuéntayana. ² Bëngbe Bëtsabe bëts yebnentše canÿe cosheto yojtsemna; tojanonÿná orscana chca šocá inamna. Entšanga imojanamana cada te cha juanatsana canÿe luaroye, Bëngbe Bëtsabe bëts yebnoca, Botamana Amashjuana ca uabáinoye, chë tmojtsachnëjuanënga lemošna chaótejañama. ³ Pedro y Juan Bëngbe Bëtsabe bëts yebnoye jamashënguama chë cosheto tojánanÿe ora, canÿe lemošna chátbioye yojótejañe. ⁴ Chatna chë šocá imojtsonÿaye, y Pedro tbojaniyana: “Scochtsënÿaye ca.”

⁵ As cha yojsënÿaye y yojtsejuabnaye ndayá chjójyëngacñe ca. ⁶ Chora Pedro tbojaniyana: “Quetsátsbomna ni crocénana, ni castellano aca jatsetayama, pero atše chanjama Jesucristbe obenánaca ndayá acbiamana jamama atše stsobencá: Jesús chë Nazaretocá obenana endbomna; chíyeca atše cbëyana chabe mándoca, matëtsbaná y cochtsana ca.”

⁷ Pedro chca tbojaniyana ora, tbojanábuacueshache catšbióicatše y tbojtanatsbaná, y cachora chë cosheto shecuatšinë y shëmiabeñe añemo yojsatsbomna. ⁸ As chë cosheto, canÿe jontsënÿese tšabá tojtantsá y tojanontšé tšabá jtsanana, y Bëngbe Bëtsabe bëts yebnoye Juan y Pédroftaca tojánamashëngo; yojsayontsënÿenaye y Bëngbe Bëtsá ibojtsatschuanaye, tbojanshnama. ⁹ Chë Bëngbe Bëtsabe bëts yebnentše imojétsemnënga nyetscanga cha tmojáninÿe tšabá jtsanana y Bëngbe Bëtsá jtsatschuanayana. ¹⁰ Chënga imnatátšëmbo cha chë cosheto yojamnana, chë nda yojanamana Bëngbe Bëtsabe bëts yebnoca, chë Botamana Amashjuanentše jótbemana, entšanga lemošna jotejañama. Cha tšabá yojsatsmënamna entšanga ojnanánënga imojtsemna.

Ntšamo Pedro tojanoyebuambá Salomonbe Amashjuana ca uabáinentše

¹¹ Chë cosheto ya shnaná ora, ndoñe yontseboše Juan y Pédrëbentšana joluárana. As, nyetsca entšanga ojnanánënga tmojanótjajo chë amashjuana otsbojebniñe, Salomonbe Amashjuana ca uabáinoye, chë Juan, Pedro y chë cosheto shnaná imojétsemnoye. ¹² Pedro chë entšanga tojánanÿe ora, tojanéyana: “Taitanga y mamanga, Israeloquënga, ¿ndáyeca chë soyëngama ojnanánënga šmojtsemna? ¿Ndáyeca nÿe šcojtsëbuáutja? ¿Šmojtsejuabná

nýe bëndatbe obenánaca quem boyabása tiffashná ca? ¿O šmojtsejuabná quem boyabása tiffashná bëndata Bëngbe Bëtsá puerte tšabá ftsadoránayeca? ¹³ Bëngbe Bëtsá, ndábeñe Abraham, Isaac y Jacob imojanošbuaché y ndábeñe bëngbe bëts taitanga imojanošbuaché, cha tonjinýanýé chabe oservená Jesús chë más uamaná yomnama. Cha tšëngaftanga chë mándayëngbe cucuatšíñe šmonjánboshjona chamóbama. Pilato enjëtseboše Jesús jëtsboshjonama, pero tšëngaftanga Pilatbe delante šmonjánayana chca ndoñe šmontsanboše ca, y chíyeca Pilato ndoñe tbontanboshjona. ¹⁴ Jesús uamaná y nýetsca soyënguiñe tšabá amá enjamna, pero tšëngaftangna cha šmontsanaboté y Pilato šmonjanimpadá chabe cuenta canýe boyabása, entsá obanayá, chabuatsboshjonama. ¹⁵ Y chca, chë ndegombre tšabe vida chašmotsebomnama amábioye tšëngaftanga šmonjanóba. Pero Bëngbe Bëtsá tojanma cha cháuatayenama y bënga chë soye fsënjáninýe y chama fsëndétatšëmbo. ¹⁶ Jesús puerte obená endmëñayeca, quem cosheto añémoca entsatsmëna. Ntšamo šmonjinýe y šmonjatatšëmboncá ndegombre tonjopasá Jesúsbeñe betsošbuáchema. Chë Jesúsbeñe jtsošbuáchiyana tonjama cha tšabá tšëngaftangbeñe chaotsatsmënama.

¹⁷ “Taitanga y mamanga, atše sëndétatšëmbo tšëngaftangbe causa y tšëngaftangbe amëndayëngbe causa Jesús tojanóbanama. Pero tšëngaftanga chca šmojanma, ndayá šmojétsamama ntsetatšëmbcá. ¹⁸ Tempo, Bëngbe Bëtsá chë chabe juabna oyebuambnayënga tojanamëndá entsanga jábuayenama, chë Bëngbe Bëtsabe Uámana Uabuayaná puerte ngmëñana yochtsanbomnama. Morna, ntšamo Bëngbe Bëtsá tojanayancá ya tonjochnëngo. ¹⁹ Chcasna, ngmëñaca menójuabonga bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache, chca, tšëngaftangbe bacna soyënga cha chacmabuajuánama. Chca chašmojamëse, Bëngbe Bëtsá echanjama tšëngaftangbe ainaniñe oyejuayana chašmotsóbomñama, ²⁰ y tšëngaftangbioye bochanjíchmuá Jesús, chë tempo chabe Uámana Uabuayaná Bëngbe Bëtsá tbojanbemá. ²¹ Canýe te echanjóshjango, Bëngbe Bëtsá lempe tsmëmacá jëtsbemama. Chë tentscuana Jesús bontsemna celoca joquédana. Chca echanjochnëngo ntšamo Bëngbe Bëtsá chabe juabna oyebuambnayëngbiajana entsanga tojanabuayenacá. ²² Moisés bëngbe bëts taitanga tojanabuayená: ‘Chë Utabná Bëngbe Bëtsá canýe chabe juabna oyebuambnayá ntšamo atše sëndmëncá, cmochanjayentšíchmuá. Cha tšëngaftangbentšana echanjábocna y tšëngaftanga cmontsamna ntšamo chacmojtsëtsëtsnacá cha jtseyeunanana. ²³ Ndánaca chábioye ndoñe chabonjoyeuná, cha bontsemna chë Bëngbe Bëtsabe entsángbentšana luaroca jtsemnama y chamotseepochocama ca’ —cha tojánayana.

²⁴ “Y nýetsca chë Bëngbe Bëtsabe juabna oyebuambnayëngnaca Samuel orscana, entsanga tmojanabuayená ndayá quem tempo yochjanchnënguama, ntšamo mora montsonýacá. ²⁵ Chabe juabna oyebuambnayëngaftaca Bëngbe Bëtsá tojanašebuachená bëts soyënga tšëngaftangbiama, y tšëngaftangbe bëts taitángaftaca canýe trato tojábema; chë soyënga cabá tšëngaftangbiama entsemna. Bëngbe Bëtsá Abrahámioye mëntsá tbojanianya: ‘Chë ácbentšana entsángbeyeca tšabe bendicionënga chanjama nýetsca quem luarentša entsangbiama ca.’ ²⁶ Bëngbe Bëtsá tojama chabe oservená cháuatayenama y natsana tšëngaftangbioye tbojanichmó, bacna soyënga amana chašmotsajbanama. Y chca, Bëngbe Bëtsá jamama tšëngaftangbeñe tšabe bendicionënga chaotsemnama ca” — Pedro tojánayana.

4

Pedro y Juan Jerusalenentša mandadëngbe delante

¹ Pedro y Juan cabá entsanga imojtsëtsësnaye; chorna chë chata ibojtsemnoye tmojánashjajna judiëngbe bachnanga, Bëngbe Bëtsabe bëts yebnentša soldadëngbe amëndayá y saduceo ca uabaina judiëngbe amëndayënga. ² Chatna entsángbioye imojtsabuátambaye Jesús tojtanayenama y chë soye yojánayana obanënga ndegombre

mochtayena ca. Chë causa, chë tmojánashjajna amëndayënga tojánëta. ³ As, Pedro y Juan tmojánishëche y ya jetiñe yojtsemna causa, cárceloye tojanëtame yëfsanëntscuana. ⁴ Masque chca, banga entsanguentsana, ntšamo Pedro y Juan tbojanayancá tmojanuenënga, aiñe Jesucristbeñe imojtsošbuáchiye. Chë tentscuana shachna uaranga Jesucristbeñe ošbuáchiyënga imojtsemna, nÿe boyabásenga jacuëntase.

⁵ Yëfsana, chë judiëngbe amëndayënga, judiëngbeñe bëtsëjemëngcá amëndayënga y ley abuátambayënga Jerusalenentše tmojánenefjna. ⁶ Chéntšnaca imojtsemna, chë bachnangbe más uámana amëndayá Anás ca uabainá, Caifás, Juan, Alejandro y chë bachnangbe más uámana amëndayëngbe nÿetsca pamíllangnaca. ⁷ Chora chënga tmojanmandá Pedro y Juan junatsama, y chëngbe tsëntsaca tojanatsá y mëntšá tmojanatjá: —¿Ndabe obenánaca chë soyënga šojtsama, o, nda derecho tcmënjatsatá chë soyënga chašotsamama ca?

⁸ As Pedro, chë Uámana Espiritu chabe ainaniñe corente jtsemándayëse, mëntšá tojanëjua: —Israeloca mándayënga y bëtsëjemënga, ⁹ mënté šconjatjá chë jama ndobenáftaca tšabe soye tifjamama y ntšamo cha mora jama yojtsatobenama. ¹⁰ Chcasna, ntšamo tojopasama chochanjabuayená, chca, tšëngaftanga y nÿetsca Israeloca entsanga chë soyënga chašmotsetatšëmbuama. Quem boyabása, chë tšëngaftangbe tsëntsaca entsemná, Jesucristo chë Nazaretocabe bëts obenánaca chca tšabá entsatsmëna. Y Jesús endmëna nda tšëngaftanga šmonjancrucificá y ndabiama Bëngbe Bëtsá tojanma cháuatayenama. ¹¹ Jesusbiamá Bëngbe Bëtsabe uabemana palabrënguiñe mëntšá endayana: “Chë yebna jebuanënga tmontsanaboté ndëtšbé, mora chë más bëts uashacuanëšentše entsejájona ca”. Tšëngaftanga šmondmëna mo chë yebna jebuanëngcá, er Jesúsbiyoe šmontsanaboté y mora cha chë más uamaná entsemna. ¹² Nÿe cha yobena tšëngaftanga játsebacama. Bëngbe Bëtsá ndocna inÿe entsábioyoe tbonjatšetá chabe obenana chca jamama; chíyeca quem luarentše ndocná más quenátobena bënga játsebacama. Nÿe Jesucristbe obenánaca aiñe ca —Pedro tojánayana.

¹³ Chënga imojenjnana Pedro y Juan tša añémoca ibojtsóyebuambnama tmojáninÿe ora, y chata tempo nduatsjínÿenata y librëša nduabuatmata bëtsemnama tmojántatšëmbona ora. Chca chë mándayënga tmojántatšëmbona chata Jesúseftaca bayté ibojamnama. ¹⁴ Y entsanga imojtsonÿaye chë tmojanshná cha chentše chátaftaca yojtsemnama; chë causa, chënga ndocá más tmonjanobená chatbe contra jatichámuana. ¹⁵ As chora tmojanamëndá chentšana chábuaisebocnama y chentše tmojanoquedangna chë soyama imojtsenatsëtsnaye. ¹⁶ Chënga imojtsentjanaye: “¿Ndayá chátaftaca mochjama ca? Jerusalemntše oyenënga montsetatšëmbo chata chë bëts soye Bëngbe Bëtsabe obenánaca tbojamama; chë causa, bënga ndoñe quemuátobena jayanana chata chca ndoñe tbonjama ca. ¹⁷ Pero entsanga chama ndoñe más chamondëtsencuëntamna, chata mochjáuyana: ‘Ndoñe más entsángbeñe Jesús šmattsebáyana; y ndoñe chašmonjouenëse, jabuache castigo šochántsebomna ca.’ ”

¹⁸ As chë mándayënga cachiñe chata tmojánachembo y tmojanamëndá ndoñe más Jesús jtsebáyana, ni chabiama entsángbeñe jtsabuátambayana. ¹⁹ Pero Pedro y Juan tbojánayana: “¿Ntšamo tšëngaftanga šmatjayana ntšamo fchanjayanama ca? Ndegombre, Bëngbe Bëtsabe bominiñe ndoñe tšabá quenátsmëna tšëngaftangbiyoe aiñe joyaunayana y chábioyoe ndoñe. ²⁰ Er bënga queftsátobena jtsajbanana oyebuambnayana chë tifjinÿe y tifjouena soyëngama ca.”

²¹ Chë mandayëngna chátbioyoe tojtsanautatjá, pero chentšana tmojtanabáshejuana. Nÿetsca entsanga Bëngbe Bëtsá imojtsatschuanaye ntšamo tojanopasama; chíyeca, chë mándayënga ndoñe tmonjanobená tondaye ntjinÿenana ntšamo chata jácastigama. ²² Chë boyabása, ndáftaca chata chë bëts soye Bëngbe Bëtsabe obenánaca tbojanma, inabomna canta bnëtsana uatama más.

Jesucristbeñe ošbuáchiyënga Bëngbe Bëtsá tmojanimpadá más añemo chauatsatama

²³ Pedro y Juan ya tmojtanabáshejuana ora, tbojánata chë inÿe ošbuáchiyëngaftaca jaten-inÿenama y lempe ntšamo chë bachnangbe amëndayënga y bëtsëjemëngcá mándayënga chátbioye tmojanëyancá, chëngbioye tmojanacuntá. ²⁴ Chënga chca tmojanuenentšana, nÿetscanga cánÿiñe tmojanontšé Bëngbe Bëtsáftaca mëntšá jencuëntama: “Bëngbe Utabná, aca chë nda tojama celoca, fshantse, nÿetsca béjayënga y lempe ntšamo chenache yomncá, ²⁵ chë Uámana Espíritbiajana tcojánayana y acbe oservená David, ntšamo tcojanayancá tojanábema, mëntšá:

¿Ndáyeca entšanga yapa imojtsetsátjaye ca?

¿Ndáyeca imojtsejuabná nÿe bonamentiama soyënga jamana?

²⁶ Quem luarentša reyënga y amëndayënga imoprontánënga, nÿetscanga tmojenoyeuná Bëngbe Bëtsá y chabe Uámana Uabuayaná chë Cristbe contra jtsemnama ca —cha tojanábema.

²⁷ “Ndegombre chca tonjopasá. Rey Herodes y Poncio Pilato, quem bëts pueblentse, ndoñe judiëngaftaca y israelitëngaftaca tmonjánenefjna, jenóyeunayama ntšamo jamana, Jesús chë acbe uámana oservená y chë Uámana Uabuayaná tcojabemábioye jóbama.

²⁸ Tempo, Bëngbe Bëtsá, acbe obenánaca y ntšamo icnabošcá tcojanmandá ntšamo mora chaotsemnama, y chënga chca Jesúseftaca tmonjama. ²⁹ Morna Bëngbe Bëtsá, mouena ntšamo chënga montsichamo, bënga jasúfriama cašojtsamna ca; chcasna, cochjama bënga fchayobená Jesusbe tšabe noticiënga bëts añémoca entšángbeñe jtsóyebuambnayama, ³⁰ y cochjama acbe obenánaca šoquënga tšabá chamotsatsmënema y cochjama bënga fchayobená bëts soyënga jamama, Jesús chë uámana oservenabe obenánaca y cha jótšëmbonëse ca” —chënga tmojánayana.

³¹ Bëngbe Bëtsáftaca jencuëntama tmojanpochocá orna, chë tmojánenefjntšë tojanangmëmama; y nÿetscangbe ainaniñe chë Uámana Espiritu tojanontšé más jtsemándayana, y chënga tmojanontšé más añémoca Bëngbe Bëtsabe soyëngama entšanga jábuayenama.

Nÿetsca bomna soyënga nÿetscangbiamá yojtsemna

³² Jesucristbeñe ošbuáchiyënga, nÿetscanga canÿe juabna imojtsebomna y ainaniñe cach canÿe ebionana. Ndocná ntjatichamuana chabe soyënga nÿe chabiamá yojtsemna ca, pero aiñe imojtsichamo, “atše sëndbomna soyënga nÿetscangbiamá entsemna ca”. ³³ Chë Jesusbe ichmónëngna puerte obenánaca mëntšá imojtsichamo: “Fsënjinÿe y fsëntsetatšëmbo Bëngbe Utabná Jesús obanënguëntšana tojtayenama ca.” Y Bëngbe Bëtsá yojtsama chë ichmónënga bëts cá tšabe bendicionënga chamotsebomnama. ³⁴ Jesucristbeñe ošbuachiyëngbeñe ndocná yonjamna ndayánaca uajabotá, er nÿetscanga fshantse o yebna bomnënga imojanamana jtsatobuíyana, y chë crocénana ³⁵ chë ichmónëngbioye jayentšbuáchiyana, ntšamo tojtsëjabotcá nÿetscanga jujátayama. ³⁶ Chca tojanma canÿa Bëngbe Bëtsabe bëts yebnoca trabajayá, José ca uabainá; cha chë ichmónënga imojanábobuatma Bernabé ca (y chca iuayana “Añemuayá ca”). Bernabé yojamna Chipre luarocá. ³⁷ Chana, fshantse yojtsatobuiye, y chë crocénana Jesusbe ichmónëngbioye yojáyentšbuachiye, chë uajabótëngbiamá chaoservema.

5

Ntšamo Ananías y Safiraftaca tojanopasá

¹ Inamna canÿe bacó, Ananías ca uabainá, y chabe shemna, Safira ca. Chatna canÿe fshantse tbojáníye. ² Ananías y Safirna tbojanenóyeunata; chcasna, batšá crocénana cachatbiamá tbojanobuajó y chë tojanójama crocénana ichmónëngbioye Ananías tojanamba, pero tojanëyana chana canjamna nÿets crocénana ntsachetšá chë fshantsama tbojanosháchiñe ca. ³ As Pedro tbojaníyana: “Ananías, ¿ndáyeca tcojalesenciá Satanás acbe ainaniñe bacna juabnënga chacmócochënguama, Uámana Espiritu chë crocénanama

jabuambayama ca? Acna chë fshantsama tcmojtabuená crocenánentsana cach acbiama batśá tcontábojama. ⁴ Cabá ntsatobuiye ora, chë fshantse ácbeshe endánmëna y tcojtsatobuíyentsana chë crocénana acbiana y chánaca condánobena ntśamo tcojtseboścá jamama. ¿Ndáyeca acbe ainaniñe tcojajuabó chë crocenánama chca jobostérama? Chca jamëse, ndoñe nýe entsángbioye quecatabuambná, sinó Bëngbe Bëtsánaca ca” —Pedro tbojaniyana.

⁵ Ananías chë palabrënga tojanuena ora, obaná tojánshajaye. Y nýetscanga chama tmojánatśëmbonënga corente imojtsauatja. ⁶ Chentśana, básefta bobontśënga tmojánashajna y Ananíasbe cuerpo entsëjuaca tmojanandmaná y jauábtontsama tmojanamba.

⁷ Mo unga horëntscose, Ananíasbe shema Safira tojánashjango, pero ndoñe yontsetátśëmbo ntśamo chabe boyáftaca tojanopasama. ⁸ Chora Pedro tbojantjá: — Ndegombre śmëyana, ¿chë śmonjayana nýetśnama chë fshantse śmojiye ca?

As chë shema tbojanjuá: —Aíñe, nýetśnama fsënjiye ca.

⁹ Pedro tbojaniyana: —¿Ndáyeca tsëndata šojenoyeuná Bëngbe Utabnabe Espíritu jabuambayama, y cabá castigo jtsebomnama ndoñe šontsobatmana ca? Acbe boyá jauábtontsama tmonjuambënga muentše bësoca montsemna y mora ácnaca cmochanjuamba ca.

¹⁰ Cachora Safira Pédrëbe shecuatśentše obaná tojánshajaye. Chë bobontśënga tmojanamáshjna ora, obaná Safira tmojáninýena; asna, chentśana tmojanamba y cachabe boyabe juachaca tmojanatbontśá. ¹¹ Y nýetsca Jesucristbeñe ośbuáchiyënga chentše imojtsemnënga y nýetscanga chë soye tmojánatśëmbonënga, corente imojtsauatja.

Ba bëts soyënga chë ichmónënga tmojanma, Bëngbe Bëtsabe obenana jinýanýiyama

¹² Chë Jesucristbe ichmónëngaftaca ba bëts soyënga entsángbeñe yojtsebinýna Bëngbe Bëtsabe obenana jinýanýiyama; y nýetsca Jesucristbeñe ośbuáchiyënga imojanamana Bëngbe Bëtsabe bëts yebnoca jénefnana, Salomonbe Amashjuana otsbojebnentše.

¹³ Chë ínýenga, chë Jesucristbeñe ndośbuáchiyëngna, imojtsauatja Jesucristbeñe ośbuáchiyëngaftaca jtsenutana; pero entsangna chë ośbuáchiyëngbiana tśabá imojtsencuëntaye. ¹⁴ Bëngbe Utabnábeñe ośbuáchiyënga más imojtsóbotena, bëtscá boyabásenga y shembásengnaca. ¹⁵ Tśa bëts soyënga chë ichmónëngaftaca yojtsebinýna; chíyeca entsanga imojanamana jutsnëshangañe y tjuashënguiñe tsáshenoye šoquënga jubuacnana, chca, Pedro chëjana tojtsachñëjuana ora, nýe mo chabe sómbrenaca chëngbe cuerpëjana chaochnënguama, shnánënga jtsatsmënama. ¹⁶ Jerusalén chábuañe pueblënguentsana ba entsanga imojanamana jabana, y šoquënga y bacna bayëjbe juabna uambayënga imojtsëyabó; y nýetscanga shnánënga imojtsatsmëna.

Bëngbe Bëtsá tojanma Pedro y chë inýe ichmónënga cárcelocana natjëmbana chámuaisebocnama

¹⁷ Chë ichmónënga tśa tśabá imojtsamama, chë judío bachnangbe más uámana amëndayá y chabe ústonënga, chë saduceunga, puerte envidia imojtsebomna. ¹⁸ As chë ichmónëngbioye tmojánishëche y chë bëts pueblentśa cárceloye tojtsanëtame. ¹⁹ Pero ibetna, Bëngbe Utabná canýe ángel tbojanichmó y chë utámenentśa bëšaśangá cha tojánatëfjo, chënga tojtanëbuacna y mëntśá tojanëyana: ²⁰ “Motsajna, Bëngbe Bëtsabe bëts yebnentše śmochjámashjna, y entsanga śmochjabuayená ntśamo cuanjama chë nýetsca tescama yomna tśabe vida jtsebomnama, Jesucristoftaca cánýiñe mo canýacá jtsemnëse ca.” ²¹ Ntśamo tmojanuencá, yëfsana cabá cachëse Bëngbe Bëtsabe bëts yebnoye tmojána y tmojanontśé entsanga jabuátambana.

Chëntscuana, chë bachnangbe más uámana amëndayá y chabe ústonënga, chë Israeloca bëtśëmëngcá mándayënga y inýe chentśa amëndayënga tmojánachembo jénefnama y

jenóyeunayama; as chora chënga tmojanmandá chë utámenocana chë ichmónënga jobiatsama. ²² Pero chë soldadënga chë utámenoye tmojánashjajna ora, chënga chentšë ndoñe tmonjánanýena. Chcasna, chënga tmojtaná chë mándayënga chca jaúnayama. ²³ Y tmojánayana: “Chë utámenoca fsënjínýena lempe tšabá endëtsëtámeñe y soldadëngna nýetsca bësášangá monduabojanýanga; pero fsënjatëfjo y tsoye fsënjámashjna orna ndocná chibiátinýena ca.”

²⁴ Chë bachnangbe amëndayënga y chë Bëngbe Bëtsabe bëts yebnentša soldadëngbe amëndayá chca tmojanuena ora, yojtsëtëmnana y imojtsentjanaye ndayá chentšana yochjanopásama. ²⁵ Chorna, chënga imojtsemnentše canýe boyabása tojánashjango y mëntšá tojanéyana: “Chë šmojutámiënga mora Bëngbe Bëtsabe bëts yebnoca montsemna, entšanga montsabuatambá ca.”

²⁶ Chë soldadëngbe amëndayá tojána soldadëngaca, chë Jesusbe ichmónënga junatsama; pero nýe tšabá tmojanënatse, er chënga entšangbiama imojtsauatja, nderado cachëngbioye ndëtsbéngaca muantsëbaye. ²⁷ Chëngbioca tmojanéshejajna ora, mandayëngbioye tmojanënatse; chora chë bachnangbe más uámana amëndayá mëntšá tojanéyana: ²⁸ —Bënga jabuachana tcbontsëuyaná y tcbonjáuyana ndoñe šmontselesenciana jtsóyebuambnayama chë boyabása Jesús tojánayana yojtsemna jabuátambama soyëngama ca. Masque chcasna, mora tšëngaftanga nýetsca chë Jerusalemntša oyenënga chabe soyëngama šmojtsabuatambá y šmojtseboše, cha tojanóbanama castigo bëngbeñe chaotsemnana ca.

²⁹ Chorna, Pedro y chë inýe ichmónënga tmojánayana: —Bënga šontsamna nat-sana Bëngbe Bëtsá joyeunayana y chentšana entšángbioye. ³⁰ Chë Taitá, nda bëngbe bëts taitanga monjánadorana, cha tojama Jesús cháuatayenama, chë nda tšëngaftanga šmonjanóba canýe cruciñe juajabonýese. ³¹ Bëngbe Bëtsá tbontatsbaná y chabe catšbioica tbojëtstbema, jtsamëndayama, y tbojábema entšangbe Unachayá y Atsebacayá, chca, Israeloca entšanga ngménaca chamuenójuaboma bacna soyënga imojtsamama y chca amana chamotsajbanama, y chëngbe bacna soyëngama perdonánënga chamotsemnana. ³² Bënga fsëntsichamo ndayá bënga ndegombre tifjinýe Bëngbe Bëtsá chca jtsamana ca; chë Uámana Espíritnaca chë soyëngama endbëtsoyebuambnaye. Bëngbe Bëtsá endbëtsama chë Uámana Espíritu cháuamashëngo chë tmojtseyeunanëngbe ainaniñe jtsemándayama ca —chënga tmojánayana.

³³ Chë mándayënga chca tmojanuena ora, puerte tmojanotjayaná y tmojánbošena chë ichmónënga jtsëbáyama. ³⁴ Pero chë mándayënguentše yojtsemna canýe fariseo, Gamaliel ca uabainá. Chana canýe ley abuatambayá inamna y entšanga puerte imnarrespetana. As cha tojantsá y tojanmandá chë ichmónënga ratotema chentšana jubuacnama. ³⁵ Chentšana chë inýe mándayënga tojanéyana: “Israeloca taitanga, puerte cuedado šmochtsebomna ntšamo quem boyabásengaftaca šmochjamama. ³⁶ Quem soyama šmochjenójuaboye: Ndoñe bayté quenátsmëna, Teudas tonjánbocna y cha enjánichamo canýe uámana entšá canjamna ca, y mo canta patse entšanga cha tmojanasto. Pero chora ínýenga cha tmontsanóba y chabe ústonënga tmontsanáshana, y chca lempe tontsanopochocá. ³⁷ Chentšana, chë entšanga jenábemama enjamna ora, Judas chë Galileocá tonjánbocna y tonjanma báseftanga cha chamuastama; pero chánaca ínýenga tmontsanóba y nýetsca chabe ústonënga tmontsanáshana. ³⁸ Chíyeca atše cbéyana, quem boyabásenga matabáshejuana y ndocá mataborlánana. Ntšamo chënga montsamancá, nýe entšangbe juabna y nýe chëngbe trabajo tojtsemnëse, betscó echanjopochóca. ³⁹ Pero chca Bëngbe Bëtsabe soye tomnëse, tšëngaftanga ndoñe quešmochatobenaye jáyënjanama. Cuedado šmochtsebomna, nderado mo Bëngbe Bëtsabe uayayënga šmuatjanenobiamana ca” —cha tojanéyana.

Y as chënga Gamaliel tmojanoyeuná. ⁴⁰ Chcasna, chë ichmónëngbioye tmojánachembo, tmojtsanachebuánganja y tmojanéyana Jesusbe uabáinaca entšángbeñe ndoñe cha-

mondëtsoyebuambná ca; y chentšana tmojtanabáshejuana. ⁴¹ Chora chë ichmónënga chë amëndayëngbentsana puerte oyejuayënga tmojésanbocna, er Bëngbe Bëtsá tojanalesenciá jasúfriama, chënga Jesusbiana oservénënga bëtsemnayeca. ⁴² Chentšana, chënga cada te imojanabuatambá y Jesús, chë Uámana Uabuayaná, chë Cristo bëtsemnama entšángbioye imojanabuayiyná, Bëngbe Bëtsabe bëtš yebnentše y yebnënguenáchnaca.

6

Chë ichmónëngbiana ujabuáchanënga tmojanëbuáyana

¹ Chë tempo, Jesucristbeñe ošbuáchiyënga betscó imojtsóbotena. Chora chë Jesucristbeñe ošbuáchiyëngbentše, chë judiënga griego biyanga batsá imojtsetšátjaye y chë judiënga hebreo biyangbiana mëntšá tmojánayana: “Chë griego biyangbe viudángbioye ndoñe cachcá quemnatëjabuáchana ntšamo chë hebreo biyangbe viudángbioye cada te montsëjabuachancá ca.”

² Asna, chë bnëtsana uta ichmónënga nyetsca chë Jesucristbeñe ošbuáchiyënga tmojanëbuaja y tmojanëyana: “Ndoñe tšabá quenátsmëna, bënga jtsajbanana Bëngbe Bëtsabe palabra oyebuambnayana nye chë viudanga jtsanyënama chë tojtsëjaboto soyënguiñe.

³ Chcasna, baconga y batanga, tšëngaftanguentsana canyësëftanga mëbuáyana, tšabá mandbomnëngcá šmëbuátmënga, chamotsemna osertánënga y chë Uámana Espiritu chëngbe ainaniñe chaotsemánda, as chënga chë ujabótënga jtsëjabuáchanama trabajo fchanjábanyiye. ⁴ Y bëngna šontsamna nyets tempo Bëngbe Bëtsáftaca jtsencuëntayana y Bëngbe Bëtsabe palabra entsanga jtsabuayiynayana ca” —chënga tmojánayana.

⁵ Nyetscanga tojanogusetá ntšamo chë ichmónënga tmojanayancá; as, Esteban tmojanábuayana; canye boyabása puerte ošbuáchiyá cha inamna y chë Uámana Espiritu chabe ainaniñe yojanmánda. Chentšana tmojanëbuáyana Felipe, Prócoro, Nicanor, Timón, Parmenas y Nicolás (cha inamna ndoñe judío entsá, Antioquía bëtš pueblócá, y cha yojanamana Bëngbe Bëtsá jtsadoránana mo cach judiëngcá). ⁶ Chentšana chënga tmojanënatse Jesucristbe ichmónënga imojtsemnoye; chocna, chë Jesusbe ichmónënga Bëngbe Bëtsá tmojanimpadá chë ichmónëngbe trabajënguiñe chë ubuáyanënga chaujabuachama, chëngbe cucuatšënga chëngbe bestšašentše jajájuase.

⁷ Más banga Bëngbe Bëtsabe palabra imojtsuenana, y chca, Jesucristbeñe ošbuáchiyënga más imojtsóbotena, y Jerusalenentše más ošbuáchiyënga betscó imojtsóbotena. Y ba judiëngbe bachnángnaca tmojanontšé Jesucristbeñe jtsošbuáchiyana, ntšamo chë ínÿenga imojtsanošbuachecá.

Esteban tmojánishache

⁸ Esteban, Bëngbe Bëtsabe obenana y chábensana tšabe bendicionënga yojtsebomnëse, entšángbeñe bëtš soyënga yojtsama. ⁹ Báseftanga “Ya Cachcá Atabashejuana Oservénënga ca” uabainëngna tmojanontšé Estëbanoftaca enatsëtsnayana. Chënga imojamna judiënga Cirenoquënga, Alejandriokuënga, Cilicia y Asioquëgnaca, y chëngbe enefjuana luare yojanabaina “Ya Cachcá Atabashejuana Oservénëngbe Yebna ca”. ¹⁰ Pero chë Uámana Espiritu tojanma Esteban chaóyebuambama bëtscá osertanacá, y chíyeca chënga ndoñe imontsobena ntšamo cha jojuana. ¹¹ As chënga báseftanga tmojanëbuénaye Estëbanbe contra podesca soye chamuayanama, mëntšá: “Cha fsënjoyeuná Moisesbiana y Bëngbe Bëtsabiama ndoñe tšabá jtsóyebuambnayana, mo cuafjoyanguangcá ca.” ¹² Chcase chënga tmojanma entsanga, bëtšëjemëngcá mándayënga y ley abuatambayënga Estëbanbe contra chamóntša enbouenanana; y as, Esteban tmojanotbá y chë mándayënga imojtsemnoye imojuíchëmo. ¹³ Y tmojanënatse básefta entsanga, uayátsenaye soyënga y podesca soyënga Estëbanbe contra chamuayanama; as chënga mëntšá tmojánayana: “Mua bacna soyënga entsichamo chë Bëngbe Bëtsá jtsadoránama bëtš yebnama y Moisesbe leyëngama. ¹⁴ Y fsënjoyeuná cha jayanana, Jesús Nazaretocá Bëngbe Bëtsabe bëtš yebna caochtsepochóca

y caochjama bēnga n̄ye chabe mandēngaca mandánēnga chamotsiyenama y ndoñe ntšamo Moisés bēngbe bēts taitanga tojēftsanabatambacá ca.”

¹⁵ Chē mándayēnga y n̄yetscanga chentše imojétsetbiamanēnga Esteban tmojanon̄ȳin̄ȳé ora, tmojánin̄ȳe chabe jubíá yojtsebuashin̄ȳin̄ȳana mo can̄ȳe ángelbe jubiacá.

7

Ntšamo Esteban tojanenēuyaná

¹ Chora chē bachnangbe más uámana amēndayá, Estébanbioye tbojantjá: —¿Ntšamo acbiana montsichamcá ndegombre yojtsemna ca?

² As Esteban tojanējua: —Taitanga y baconga, mouenēnga. Bēngbe Bētsá, chē corente uamaná endmēná, Abrahám bioye tbojánēbēbocna, cha Mesopotamioca yojaniyena ora; tbojánēbēbocna, Harán bēts pueblocá joyénanama cabá nda ora, ³ y Bēngbe Bētsá tbojaniyana: “Metseboshjona acbe fshantse y acbe pamíllanga y cbochanjin̄ȳin̄ȳiye luaroye cochjá ca.” ⁴ As Abraham chabe luare Caldea tojēftsanboshjona y tojána Haránoca joyénanama. Chabe taitá tojanóbanentšana, Bēngbe Bētsá Abrahám bioye chē luaroye tbojanánatse, chē mora tsēngaftanga šmotsiyentše. ⁵ Pero quem luariñe ni mo base fshantse ndoñe tbonjēftsanatšetá, ni mo ndayentše jtsiyenama. Pero aín̄e Abrahám bioye tbojanšbuachená chē fshantse jatsetayama, chabiana y chabe básengbiama, Abraham tojóbanentšana. Chca tbojanšbuachená ora, Abraham ni can̄ȳe šešona bonjánbomna. ⁶ Y Bēngbe Bētsá mēntšá tbojaniyana: “Chē ácbentšana entšanga, ín̄ȳengbe luaroca áshjajnēnga mochántsemna, y choca oyenēnga chēngbe oservénēnga chēngbioye mochanjábiana y canta patse uatēntscuana jabuache mochanjasufrina ca.”

⁷ Y mēntšánaca tbojaniyana: “Pero atše chanjácastigaye chca oservénēnga chacmojábiana luarentša entšanga; y as, chentšana chē ácbentšana entšanga mochanjésebocana y mora bontsemna luaroye mochanjésabo y muentše atše šmochántadorana ca.” ⁸ Bēngbe Bētsá Abrahám bioye tbojanšbuachená n̄ye cha y chabe básengbe Taitá cha jtsemnama y jamama tsabe bendicionēnga chēngbeñe chaotsemnama, y chama, chaotsin̄ȳnamna tbojanmandá chabe šešona, boyabásetema tojon̄ȳná ora, base bobachtema chē más delicadentše jatētšana. Chíyeca, chabe uaquiñá Isaac tojanon̄ȳná ora, posufta tianoye Abraham base bobachtema chē más delicadentše tbojantētše. Isaac cachcá tojanma chabe uaquiñá Jacóboftaca y Jacob cachcá tojanma chē chabe bnētsana uta uaquiñēngaftaca. Chēnga monjamna chē Israeloca bnētsana uta bēts pamíllangbe taitanga.

⁹ “Quem uaquiñēnga bēngbe bēts taitanga monjamna. Chēngna, chēngbe uabentsá Josébioye envidia imnabomna y tmojtsatanobuiye, Egiptoye can̄ȳe oservenacá chamotsánatseñama. Pero Bēngbe Bētsá Josébioye n̄yets tempo ibnauájabuachana, ¹⁰ chíyeca n̄yetsca chabe ngmenēnguentsana tbojanatsbocá y Bēngbe Bētsá tojanma cha chaotsetatšēmbuama tsabá jóyebuambayama chē Egiptoca réybentše, Faraón ca uabainá. Bēngbe Bētsá tojanma chē Faraón chaoyejuá ntšamo José yojamnama; chíyeca Faraón Josébioye tbojánbema Egiptoca mandado y chabe yebnēnguentsē oyenēngbiámna.

¹¹ “Chē tempo, Egiptó y Canaán luariñe bēts shēntsana tojanóshjango y puerte ngmēnana yojtsemna y bēngbe bēts taitanga ndoñe imontsobena saná jón̄ȳenama.

¹² Pero Jacob tojántatšēmbona Egiptoca saná yojtsemnama; asna, chabe uaquiñēnga, chē bēngbe bēts taitanga choye tojanichamó. Chora yojamna chē natsanama chēnga Egiptoye jama. ¹³ Uta soyama chēnga tmojtesaná ora, José chabe catšátanga tojanējyana: ‘Atše José sēndmēna, tsēngaftangbe uabentsá ca.’ Chca chē Faraón Josebe pamíllangbiama tojántatšēmbona. ¹⁴ Chentšana, José tojanmandá chabe taitá Jacob y n̄yetsca pamíllanga Egiptoye chamotsama. Can̄ȳséfta bnētsana shachnēnga imojamna chē Egiptoye tmojánanga. ¹⁵ Chcasna, Jacob Egiptoye tojána choca joyénanama. Choca cha tojanóbana y chē in̄ȳe bēngbe bēts taitángna. ¹⁶ Jacob y chabe básenga,

ntšamo imojtsobancá, chëngbe cuerpo Siquem bëts puebloye imojtsatambaye y tmojanëtebuantsá, Abraham tojëftsambuamé cuevëshënguiñe. Abraham canye crocenánama Hamorbe uaquiñëngbioye, chëshënga yojtëyentsbuamiñe Siquem puebloca.

¹⁷ “Ntšamo Bëngbe Bëtsá Abrahámbioye tbojanšbuachenacá jamama yojtsobeco ora, Egiptoca corente tmojanoboté Israeloca entsanga y banga chënga imojtsemna. ¹⁸ Cabana, Egiptoca inye rey tojanoyayé y cha Josébioye ndoñe tbonjanabuátmana. ¹⁹ Chë reyna, bëngbe entsanga, chë bëngbe bëts taitángbioye tojanaingñé y tojanma chënga puerta chamosufrima; tojanamëndá, chë tmojtsónýna šešonatëmënga cachcá jtsënyáyana chamotsóbanama. ²⁰ Chë tempo canye básetema tojanonýná y cha Moisés ca tmojanabaye. Bëngbe Bëtsá Moisesbiana oyejuayá yojtsemna y chabe bëtsétsata cach yebnentše tmojanboché unga ishinyëntscuana. ²¹ Cachcá jonýayama yojtsamna orna, Faraonbe bembe tbojanocñe y mo cachabe uaquiñá cuenta tbojanboché. ²² Chca, chë Egiptoquënga imnatátsëmbo soyënga Moisés tmojanbuatëmbá y canye uámana entsá tojánbocna jóyebuambayama y ndayánaca jamama.

²³ “Canta bnëtsana uata tojánashjache ora, tojanenojuabó jama jtsetatšëmbuama ntšamo chë Israeloquënga, chabe entsanga imojtsemnama. ²⁴ Canye, Moisés tojáninye canye Egiptocá canye Israelocábioye ibojtsejantšetaye ora; as Moisés tbojanoboguiyaná y chë Egiptocábioye tbojtsanóba. ²⁵ Moisés yojtsanjuabnaye chë Israeloquënga yojtsósertana, Bëngbe Bëtsá yochjanma cach Moisesbe obenánaca chë Egiptoca mandentsana chëngbioye játsebacama ca. Pero chë Israeloquënga ndoñe yontsésertana. ²⁶ Yëfsana, Moisés tojánanyena útata, cach Israelocata, ibojtsentsjanaye; chora cha betesco tojána jetsëuyanama y tojanëyana: ‘Tsëndata catsata šondmëna, ¿ndáyeca šojtsentsjanata ca?’ ²⁷ As, chë inýabioye ibojtsetsjanayá Moisésbioye tbojtsanajuatsëntše y tbojanianyana: ‘¿Nda bëngbeñe tcmënjajayé mandado y chë tšabá o ndoñe tšabá ftsamama chacuayanama ca?’ ²⁸ ¿Cojtseboše átsnaca jóbama, ntšamo tonjopasá yëfse chë Egiptocábioye tconjobacá ca?’ ²⁹ Moisés chca tojanuena ora, Madián luaroye tojtsanachá y choca yojoyena inye luarocana ashjanganacá. Chentše uta uaquiñata yojëftsabamna.

³⁰ “Chentšana canta bnëtsana uatëse, entsanga ndoyena luariñe, Sinaí tjañe béconana, canye ángel tbojánëbëbocna zarzësha yojtsángbototjuanentše. ³¹ Moisés yojenjnaná ndayá yojtsonýama y tšabá jinýama tojanobeconá ora, tojanuena Bëngbe Bëtsá mëntšá ibojtsatsëtsnaye: ³² ‘Atše acbe bëts taitangbe Bëtsá sëndmëna, Abraham, Isaac y Jacobëbe Bëtsá ca.’ Moisés chama tojanëuatjaná, ibojtsengmëmnyaye y añemo ndoñe yontse-bomna choye jontješiyama. ³³ As Bëngbe Utabná tbojanianyana: ‘Motsenóshecbotsca, er aca contsemnentše nýe atšbiana luare endmëna, er átsnaca chentše sëntsemna. ³⁴ Ndegombre sënjinýe ntšamo atšbe entsanga Egiptoca montsesufrina y sënjouena chëngbe oyaboyuayana, y atše sënjabo chënga jabátsebacama. Chcasna, mabouena, Egiptoye cbochanjíchmuca ca’ —Bëngbe Bëtsá tbojanianyana.”

³⁵ Chentšana Esteban tojanëyana: “Quem Moisés entsanga tmojtsanaboté y tmojanianyana: ‘¿Nda bëngbeñe tcmënjajayé mandado y chë tšabá o ndoñe tšabá ftsamama chacuayanama ca?’ Masque chca, Bëngbe Bëtsá mo mandayacá y atsebacayacá tbojesanichmó, chë zarzëshentše tojanobinýná ángeloftaca. ³⁶ As Moisés, bëngbe bëts taitanga Egiptocana tojésanëbuacna y bëts soyënga tojanma, y inye soyënga Bëngbe Bëtsabe obenana jinýanýiyama Egiptentše, chë Buángana ca uabaina mar béjayentše y entsanga ndoyena luarentše, canta bnëtsana uatëntscuana. ³⁷ Cach Moisés Israeloca entsanga mëntšá tojanëyana: ‘Bëngbe Bëtsá tšëngaftanguentsana canýa bochanjábema atšcá Bëngbe Bëtsabe juabna oyebuambnayá ca.’ ³⁸ Moisés Israeloca entsángaftaca yojëftsemna chë entsanga ndoyena luaroca. Choca chë entsanga tmojánenefjna Sinaí tjañe béconana. Chentšna canye ángel Moisésoftaca tojanoyebuambá, bëngbe bëts taitángbioye chë buayenana soye Moisés chaóyebuambama, chë entsanga tšabe vida jónýenama palabrenga; y Moisés chca tojanma, bëngnaca chë palabrenga jounama jobenayama.

³⁹ “Pero bēngbe bēts taitanga ndoñe tmonjánbošena joyeunayama, masna n̄ye tmojtsanaboté y Egiptoje jesshéconama imojtsaiseboše. ⁴⁰ Moisés cabá chē tja tsjuanoca chē ángeloftaca yojtsemna ora, chēngbe bachnangbe más uámana amēndayá Aarónbioye mēntśá tmojanianyana: ‘Bēngbe Bētsabe cuenta šmayentšpormá can̄ye buashin̄yinyana soye jadórama, bēnga chašúnatsama. Er bēnga quemátstatšēmo ndayá yojtsopasana Moisés, chē Egiptocana šonjēftsēbuacnáftaca ca.’ ⁴¹ As tmojanma can̄ye buashin̄yinyana soye mo can̄ye uacnabecá y cha jadórama ba bayēnga tmojanēbaye, y tmojanóboyejuanga cachēnga chē soye tmojanpormáyeca. ⁴² Chē causa, Bēngbe Bētsá chēngbentšana tojtsanojuánañe y cachcá tojesanēñyaye chēngbe bacna soyēnga causa, estrellatēmēnga chamotsadoránama. Chca jochnēnguama, Bēngbe Bētsabe juabna oyebuambayēngbe librēšañe mēntśá endayana, ntšamo Bēngbe Bētsá tojanayancá:

Israeloca entšanga,

¿Atše jētschuayama bayēnga chešmēnjanēbaye y chē soyēnga chešmēnjanátšēmbona, chē canta bnētsana uata entšanga ndoyena luarentše tšēngaftanga šmonjēftsemna ora?

⁴³ Atše jadóra cuentna, chē Molocbiana jebna soye šmonjanacutsá y cha šmonjánadorana,

y chē Refánbe estréllacnaca cachcá šmonjánama.

Chē soyēnga mo Bēngbe Bētsá cuenta šmonjánbomna y cach tšēngaftanga šmonjanobopormá jadórama.

Mora chē causa atše chanjama, Babilonientšana más chcoye tšēngaftanga chacmotsēnatsama ca” —chiñe endayana.

⁴⁴ “Bēngbe tempsca bēts taitanga entšanga ndoyena luaroca, chē jatsjacama opodena yebna imnabomna; chē yebnentše Bēngbe Bētsá chēngaftaca tojanoyebuambá. Inajebna ntšamo Bēngbe Bētsá Moisésbioye tbojanmandacá, y cha tojanma ntšamo chaojebuama Bēngbe Bētsá tbojanin̄yinyecá. ⁴⁵ Bēngbe bēts taitangna chēngbe taitāngbentšana chē jatsjacama opodena yebna chēngbiana tmojanóyēngacñe, y chēnga chē Canaán luaroye Josuéftaca, chē in̄ye luaroquēngaftaca jēntsjama tmojána ora, chē jebna soye tmojanamba y chocna, Bēngbe Bētsábeyeca chentša entšāngbioye Israeloquēngbentšana tmojtanēbuacna; y chē jebna soyna chē tmojanayēñjaná luarentše tojanoquedá, rey David yojēftsiyenēntscuana. ⁴⁶ David tšabá mandbomná inamna, chíyeca Bēngbe Bētsá cháftaca puerta yotsóyejuaye. David chábioye lesencia tbojanotjañe jajebuama, Bēngbe Bētsá chē Jacob tbojanadorá cha, chentše chaotsiyenama. ⁴⁷ Pero Salomón inamna nda chē Bēngbe Bētsabe bēts yebna tojanjebuá. ⁴⁸ Masque chē celoca Bēngbe Bētsá, entšangbe jebna yebniñe ndoñe quenatiyena. Ntšamo Bēngbe Bētsabe juabna oyebuambnayá tojanabemcá, ndayá Bēngbe Bētsá tojanayancá:

⁴⁹ ‘Celoca endmēna chē luare ndayentšana atše tsmánda,

y quem luare endmēna n̄ye mo can̄ye tšenētemcá ndayentše atšbe shecuatsēnga chjajaye.

As, ¿ntšamo atšbiana jebna yebna šmochjajebo ca?’ —chē Utabná jayanana—;

‘o ¿ndaye yebnentše atše jóchnama chjobenaye,

⁵⁰ ndegombre cach atše n̄yetsca chē soyēnga tijamēse ca?’ ”

⁵¹ Esteban mēntśánaca tojanéyana: “Tšēngaftanga n̄yets tempo josértama ndēbošēnga šmondmēna; šmondbomna ainana mo chē Bēngbe Bētsabeñe ndošbuáchiyēngbe ainancá, y Bēngbe Bētsabe soyēngama nduauenanēnga šmondmēna. Tšēngaftanga ndocna te quešmátsboše chē Uámana Espiritu joyeunayana. Ntšamo tšēngaftangbe bēts taitanga monjanianyencá, tšēngaftāngnaca cachcá. ⁵² ¿Bēngbe Bētsabe juabna oyebuambnayēnguentsana, ndábioye tšēngaftangbe bēts taitanga ndoñe monjanacmena? Chē Bēngbe Bētsá tojanichamó entšanga chēnga tmojtsanēbaye, y mēngna entšāngbioye imojanabuayiyiná Cristo, chē ntšamo Bēngbe Bētsá yobošcá amá yochjánabama. Pero morna,

uayayëngbe cucuatšifne cha šmojábošhona y šmojóba. ⁵³ Bëngbe Bëtsabe mandënga angelëngaftaca tšëngaftanga šmonjanóyëngacne, pero chë soyënga ndoñe quešmátsyeunana ca” —cha tojanëyana.

Esteban ndëtsbéngaca tmojanóba

⁵⁴ Chentša mándayënga chca tmojanuena ora, Estébanoftaca tmojanotjayaná y tmojanenaftëšbonzentsé, rábiaca imojtsemnama. ⁵⁵ Pero chë Uámana Espíritu Estébanbe ainaniñe corente yojtsemándaye. Celoye yojontješiyë y Bëngbe Bëtsabe buashinÿinÿanana yojinÿe, y Jesús, Bëngbe Bëtsabe catšbioica yojtsatsana. ⁵⁶ As, Esteban tojánayana: “¡Mouenënga, séntsonÿá celoca entsatëfjna y Bëngbe Bëtsá Entšá tbojanbemá Bëngbe Bëtsabe catšbioica entsemna jtsamëndayama ca!”

⁵⁷ Chora chënga jabuache imojtseyoye, imojtsenamatsachto ndoñe más ntsue-nanama y Estébanbioye tmojanontsënja. ⁵⁸ Chentšana, chënga chë pueblentšana tmojtsanábočna y ndëtsbéngaca tmojtsanatëchënganja. Chë Estébanbioye mal tmojanquedangna entsayangá tmojtsanenátsejca y canÿe bobontse, Saulo ca uabainá, tmojtsanábonÿiñe chaotsinÿenama.

⁵⁹ Ndëtsbéngaca imojtsénanantscuana, Esteban Bëngbe Bëtsáftaca ibojtsencuëntaye y mëntšá tojánayana: “Bëngbe Utabná Jesús, atšbe espíritu šmóyëngaca ca.”

⁶⁰ Chentšana Esteban tojanoshamentsé y jabuache tojánayana: “¡Bëngbe Utabná, chëngbe bacna soye motsaperdoná ca!” Y chca tojánayana ora, tojanóbana.

8

1 Saulo chentše yojtsemna y tšabá imojtsama ca yojtsejuabnaye, Esteban tmojanóbama.

Saulo yojánama chë Crístbeñe ošbuáchiyënga chamotsesufrínama

Cach te, inÿënga tmojanontsé Jesucristbeñe ošbuáchiyënga Jerusalenentše ucamenana y jtsamana puerta chamotsesufrínama; chcasna, chënga tmojtsanacheta y Samarioye y Judeoye tmojanáshana. Nÿe chë Jesucristbe ichmónënga ndócnoye tmonjánacheta. ² Básefta boyabásënga, Bëngbe Bëtsá adórayëngna, Esteban tmojanamba jauátbontsama y chabiamana puerta tmojánenobošachna. ³ Chëntscuana, Saulo yojtsentsëna Jesucristbeñe ošbuáchiyënga jtsapochócama y yebnënguenache yojánamashjuana boyabásënga y shembásënga sjojónana ubuacana jutámiamana.

Felipe Samaria luaroca tšabe noticiëngama yojanabuayiyiná

⁴ Y Jesucristbeñe ošbuáchiyënga tmojanáshanëngna nÿetsquénache imojánabuayiyinaye Jesusbe tšabe noticiënga. ⁵ Chca, Felipe Samarioye tojána y tojanontsé chë Bëngbe Bëtsabe Uámana Uabuayaná, Cristbiamana, chentša entsanga jábuayenama. ⁶ Entšanga imojánenefjuana Felipe joyeunayama y tmojáninÿe bëts soyënga cha jtsamana, Bëngbe Bëtsabe obenana jinÿanÿiyama. Chënga nÿetscanga ntšamo Felipe yojtsichamcá tšabá imojtseyeunana. ⁷ Banga bayëjbe juabna uambayënga tšabá imojtsatsmëna y chë bacna bayëjënga jabuache jtsaiyoyëse chëngbentšana imojtsaisebocana; y banga jama ndobenënga y coshetënga tšabá imojtsatsmëna. ⁸ Chë soyama chë pueblentša oyenënga corente imojtsóyejuaye.

⁹ Pero canÿe pueblentše Samarioca inamna canÿe boyabása, Simón ca uabainá; cha tempo inamna canÿe bocjuaná y chë Samarioca entsanga chabe soyëngama imojánenjnanaye. Cha yojánichamo cha canÿe uámana entšá canjamna ca. ¹⁰ Y chábioye corente imnayeunana nÿetscanga, uámanënga y nduámanëngnaca. Entšanga imojánichamo: “Mua entsemna chë Bëngbe Bëtsabe bëts obenana inÿanÿinayá ca.”

¹¹ Y ndegombre chënga corente imnayeunana, er cha chë bocjuanana soyëngaca bayté chë entsanga ingñënënga y ojnánánënga yojtsabamna. ¹² Pero chë luarentša entsangna, Felipe tmojanoyeuná chë cha yojtsëtsëtná tšabe noticiënga Bëngbe Bëtsabe amëndayama

y chë Jesucristbiana tšabe soyënga. Chorna chënga Jesucristbeñe imojtsošbuáchiye, y boyabásenga y shembásenga tmojánenabaye. ¹³ Y cach Simónënaca Jesucristbeñe yojtsošbuáchiye y tojanenábaye, y chentšana cada te Felípeftaca cha yojtsanmëna. Cha tojáninÿe Felipe chë bëts soyënga Bëngbe Bëtsabe obenánaca jamana, y chama ojnananá yojtsemna.

¹⁴ Chë Jerusalenoca imojtsemna ichmónënga tmojántatsëmbona Samarioca entšanga Bëngbe Bëtsabe palabra tmojanóyeunama; as, chora Pedro y Juan choye tmojanichamó. ¹⁵ Pedro y Juan Samarioye tbojánashjango ora, chentše Jesucristbeñe ošbuáchiyëngbiana Bëngbe Bëtsá tmojanimpadá, as chë Uámana Espíritu chëngbeñe cháuamashënguama jtsemándayama. ¹⁶ Er cabá ni mo cánÿabeñe chë Uámana Espíritu tonjánamashëngo; chënga tmojánenabaye Bëngbe Utabná Jesús jótšëmbonëse, chábeñe ošbuáchiyënga jtsemnama imojtsebóseyeca. ¹⁷ As Pedro y Juan chëngbe bestšašifne cucuatšënga tbojancjá, y chca, chë Uámana Espíritu tojánamashëngo chëngbe ainaniñe jtsemándayama.

¹⁸ Simón tojáninÿe, chë ichmónënga entšángbeñe cucuatšënga tmojacjá ora, chë Uámana Espíritu chëngbeñe jamashënguana. As chora Simón chë ichmónënga tojanëyana: — Quem crocénana mosháchiñe, ¹⁹ y átsnaca chë obenana šmatšetá, y ndábeñnaca cucuatšënga chaijajajó ora, chábeñnaca chë Uámana Espíritu cháuamashëngo ca.

²⁰ As Pedro tbojaniyana: —¡Acbe crocénana infernoye chaotsá y ácnaca, chë Bëngbe Bëtsabe tšetana soye crocénánaca jobuámiñama yopodena ca tcojajuabó causa! ²¹ Ndegombre, aca bëngaftaca ndoñe quecátsmëna, ni bëngbe trabajo acbiana quenátsmëna, Bëngbe Bëtsabe delante acbe ainaniñe tšabe juabnënga ndoñe quecátbomna causa. ²² Ngménaca cochjenójuaboye quem bacna soye tcojamama y chca amana cochtsajbaná y Bëngbe Bëtsá cochjaimpáda, aca chca tcojajuaboma nderádose cmatjaperdóna. ²³ Atše sëntsetatsëmbo, acbe ainaniñe tša bacna juabnënga ínÿengbiana yojtsemnama; y bacna soyënga amana jtsajbanama ndoñe quecátobena causa, aca mo canÿe ntsacjuanacá contsemna ca —Pedro tbojaniyana.

²⁴ As chora Simón tojanëyana: —Bëngbe Utabná atšbiana šochjaimpáda, ntšamo šmonjauyancá ndoñe chandëpasama ca.

²⁵ Pedro y Juan, ntšamo Bëngbe Utabná Jesucristbiana tbojaninÿcá y ibnatatsëmbcá entšanga imojtsëtsësnaye. Chentšana, Jerusalenoye tbojésanata y tbojánachnëngo ba Samarioca pueblënguëjana, tšabe noticiënga entšanga abuayiynaye.

Felipe y chë Etiopía luaroca reinabe uajabuachaná

²⁶ Chentšana, Bëngbe Utabnabe canÿe ángel Felípbioye tbojaniyana: “Moprontá y tsmána luarëngoye motsa, Jerusalenentšana Gaza ca uabaina bëts pueblöye benachëjana ca.” Chë benachna entšanga ndoyena luarëjana yojanachnëngona. ²⁷ As Felipe yojëftsëtsbaná y tojána. Benachiñe tbojáneninÿëna canÿa Etiopía luarocáftaca. Etiopía luaroca canÿe reiná inamna y chë boyabásana chabe uajabuachaná y chabe crocénana bojanÿá inamna. Chana Jerusalenoye tojánabo Bëngbe Bëtsá jadórama. ²⁸ Chora Etiopía luaroye yojtsataye, chabe cochëshañe inayésenotbemañe, y chë Bëngbe Bëtsabe juabna oyebuambnayá Isaíasbe uabemana librëša yojtsaiualíaye.

²⁹ Chora chë Uámana Espíritu Felípbioye tbojaniyana: “Mobeconá y chë cochësha juachaca cochtsaye ca.” ³⁰ As Felipe betscó yojobeconá. Chora yojouena chë Etiopía luarocá, Isaíasbe uabemana librëša yojtsaiualíaye; as tbojantjá: —¿Chë contsalía soye quecmojtsosertana ca?

³¹ Y chë Etiopía luarocá tbojanjuá: —¿Ntšamo šochjosërta, ndocná šonjabuayenase ca? Y Felípbioye tbojaniyana: —Diosmanda, atšbe cochëshoye másëngo y atšbe juachaca mabótbema ca.

³² Isaíasbe uabemana librëšañe mëntsá yojtsalíaye: Cha tmojanánatse mo canÿe oveshá jóbama cuafjuanatscá;

y chë mo canÿe oveshá tmojtsëtsbotjná ora, cha iytëca jtsemnana, chánaca cachcá, chacá tondaye chenátanayana.

³³ Entšanga tmonjanma cha puerte chaosufrima, mo cha canÿe nduamaná cuaftsemncá y ntšamo ndoñe betsomerecencá cháftaca tmonjanma.

Ndocná nanjobenaye chabe básengbiana jacuéntana, quem luarentša chabe vida tmontsanbojuaná causa ca.

³⁴ Chora chë Etiopía luaroca uajabuachaná Felípbioye tbojanianana: —Diosmanda, šmobuayená, ¿ndabiana Bëngbe Bëtsabe juabna oyebuambnayá chca yojtsichamo, cachabiana o ínÿabiana ca?

³⁵ As Felipe tojanontsé, chë Isaíasbe librëšañe yojtsayana sóyeca, Jesusbe tšabe noticiënga jábuayenama.

³⁶ Chentša bënëse, canÿe bėjaye obëjniñe juachañe ibojsachnëjuana. Chora chë uajabuachaná tojánayana: —Muentše bėjaye entsemna. ¿Ndáyeca ndoñe nanjopódia atše muentše uabainá jtsemnama ca? Diosmanda, šmabaye ca.

³⁷ As Felipe tbojanianana: —Jesucristbeñe nÿets acbe ainánaca tcojtsošbuáchese, aíñe echanjopódia juabáyama ca.

Y chë boyabása tbojanjuá: —Aíñe, sëntsošbuaché Jesucristo Bëngbe Bëtsabe Uaquiñá yomnama ca.

³⁸ As chë Etiopiacá tojanmandá chë cochësha chauátotonama. Chentšana, nÿets útata chë bėjayoye tbojanashëbëbuástjango y Felipe, chë Etiopioaca uajabuachanábioye tbojanabaye.

³⁹ Chë bėjayentšana tbojtancocna ora, chë Uámana Espíritu Felipe ibojsánatseñe y chë uajabuachaná ya ndoñe más Felípbioye ibontsonÿaye, pero corente oyejuayá yojsatoñe. ⁴⁰ Felipe tojántatšëmbona Azoto bëts puebloca yojtsemnama, y chentšana tojána nÿetsca pueblënguenache chë tšabe noticiënga abuayiynaye, Cesarea puebloye jashjanguëntscuana.

9

Ntšamo Saulo Crístbeñe ošbuachiyá tojanóbema (Hch 22.6-16; 26.12-18)

¹ Saulo chëntscuana cabá Bëngbe Utabnábeñe ošbuachiyënga yojanautatjná jtsëbáyama. Chama cha tojána chë bachnangbe más uámana amëndayábioye, ² uabemana tsbuanachangá jauátjañama, as chëchangaca jobenayama chë Damascoca judiëngbe enefjuana yebnëngoye jama, y chocna, chë Jesucristo tojaninÿanÿé Benache ustoniñe, boyabásenga o shembásenga tojánÿenëse, jótabayama y Jerusalenoye junatsama. Y chca jamama tojánocna. ³ Pero ya Damasco béconana yojsaye orna, nÿe ndeolpe chabe juachañe celocana canÿe bëts tcuinÿe tojanbuashinÿinÿena. ⁴ Chora Saulo fshantsoye tojánshajaye y canÿe oyebuambnayana tojanuena, mëntšá: —Saulo, Saulo, ¿ndáyeca chca šcojtsacmena ca?

⁵ As Saulo tbojantjá: —¿Nda comna, Bëngbe Utabná ca?

Y chë oyebuambnayana tbojanjuá: —Atše sëndmëna Jesús y aca condama atšbe entšanga chamotsesufrínama. ⁶ Pero matëtsbaná y Damascoye mamáshëngo; chentše canÿa cmochanjabuayená ndayá jamama cmojtsemnama ca.

⁷ Chë Sáuloftaca imojánajna boyabásenga tša auatjanánënga imojtsemna y chíyeca ndoñe imontsobena jóyebuambayana; er nÿe chë oyebuambnayana tmojanuena, pero ndocná tmonjáninÿe. ⁸ As Saulo fshantsentšana tojtantsbaná y tojtanobuchatëfjona ora, tondaye yontsobena jinÿana. Chcasna, chë ínÿenga tmojëftsanobuacuetëntsé y chca, Damascoye tmojanánatse. ⁹ Chentše yojëftsemna unga te, jinÿama ntšobencá, ni ntjascá y tondaye ntjofšiyá.

¹⁰ Damascoca Jesucristbeñe canye ošbuachiyá inoyena, Ananías ca uabainá. Cha Bëngbe Utabnábioye mo otjenayoquécá tbojáninye y Bëngbe Bëtsá tbojaniana: —Ananías ca.

As cha tbojanjuá: —Bëngbe Utabná, ¿ndayá chjama ca?

¹¹ Y Bëngbe Utabná tbojaniana: —Moprontá y motsa chë “Ndericho tsáshenañe ca” uabáinoye, y Júdasbe yebnentše cochjanotícia canye boyabásabiama, Saulo ca uabainábiami, Tarso pueblócá; cha mora Bëngbe Bëtsáftaca bentsencuénta. ¹² Saulo ya tonjinye mo otjenayoquécá, canye entsá Ananías ca uabainá entsamashjuana y chabe cucuatšënga chabe bestšašine entsejájua, chca, cha chabuatabínynama ca.

¹³ Ananías chca tojanuena ora, tojánayana: —Bëngbe Utabná, banga ba soyënga chabiama šmonjacuentá; Jerusalenoca tša bacá acbe entsanga imomnënga tojáborye. ¹⁴ Y mora entsebomna mando chë bachnangbe amëndayëngbentsana, muentše aca otšëmbuanënga jótabayama ca.

¹⁵ As Bëngbe Utabná tbojaniana: —Motsa, er atše cha sënjuábuayana atšbiama chaotrabajama; chaóyebuambama ndoñe judiëngbeñe, reyëngbeñe y Israeloca entsángbeñnaca, y chca, chënga atšbiama chamotatsëmbonama. ¹⁶ Atše cha chanjinyniye ntsachetsá ibojtsemna átšbeyeca jasúfriama ca.

¹⁷ As Ananías tojána Saulo yojtšanmëna yebnoye. Tojánamashëngo ora, Saulëbe bestšašine chabe cucuatšënga tojanjajó y tbojaniana: “Jesucristbeyeca atšbe catšata, Saulo, Bëngbe Utabná Jesús, chë benachëjana conjanabó ora cmonjanebëbocná, šonjichmó aca chacmatabínynama y chë Uámana Espíritu acbe ainaniñe jtsemándayama cháuamashënguama ca.”

¹⁸ Cachora, Sálëbe bominyentsana mo beonbe bobachëshëngcá tojantquécjana, y chca, ibojtsatabinyna; chora tojantsbaná y tojanenábaye. ¹⁹ Chentsana, Saulo tojanse y añemo yojtatsbomna y baseftayté chë Jesucristbeñe ošbuáchiyëngaftaca tbojántotona, Damascoca.

Damasco puebloca Saulo entsanga yojanabuayiná

²⁰ Saulo cachorscana tojanontsé jábuayenama judiëngbe enefjuana yebnënguenache, Jesús Bëngbe Bëtsabe Uaquiñá bëtsemnama. ²¹ Chë imojtsuenanënga nyetscanga imojtsenjanaye y mëntsá imojtsichamo: “Mua entsemna chë Jerusalenoca Jesúsbioye otšëmbuanënga endanëbanayá, y mora camuá Damascocoye tojabo, Jesucristbeñe ošbuáchiyënga jabótabayama y chë bachnangbe amëndayëngbe cucuatšine jabáshejuanama.”

²² Pero Saulo cada ora más añémoca yojtsoyebuambnaye y puerte tšabá yojaninjanyná Jesús Bëngbe Bëtsabe Uámana Uabuayaná bëtsemnama. Chíyeca chë Damascoca judiënga ndoñe imontsobena ntšamo cha jojuana.

Ntšamo Saulo judiëngbentsana tojtšanachá

²³ Bayté tojanochnëngo ora, judiënga tmojanenoyeuná ntšamo jamëse Saulo jóbama, ²⁴ pero Saulo chë soye tojántatšëmbona. Bnëtë y ibeta, chë bëts pueblentsa bëšašanguenache chënga chabiama imojananjá, jtsóbama; ²⁵ pero chë Jesucristbeñe ošbuáchiyënga, ibeta, cha canye bëts sbarëcuiñe tmojtšanatsuamá, y chë pueblentsa shëconana tapiëšëjana tmojtšanëštjango. Chca cha tojanotsbocá.

Saulo Jerusalenoca

²⁶ Saulo Jerusalenoye tojánashjango ora, yojtseboše chë Jesucristbe ichmónëngaftaca jenútanama, pero nyetscanga imojtsebiauatja y ndoñe imontsošbuaché Saulo Jesucristbe ustoná yojtsemnama. ²⁷ Chcasna, Bernabé Sálëbioye tbojëftsanbetše y chë Jesucristbe ichmónëngbioye tbojanánatse, y tojanacuntá Saulo benachiñe Bëngbe Utabnábioye tbojáninýama, ntšamo Bëngbe Utabná tbojanianama y ntšamo cha Damascoca tša

añémoca Jesusbiamá entšanga tojánabuayenama. ²⁸ As Saulo Jerusalenentše tojanotoná y chë Jesucristbe ichmónëngaftaca yojánana. Bëngbe Utabnabiamá bëts añémoca entšanga yojanabuayiná y ²⁹ yojanoyebuambná y imojanenatsëtsná chë griego biyá judiëngaftaca; pero chëngna imojtsenëyeunana Saulo jtsóbama. ³⁰ Jesucristbeñe ošbuáchiyënga chca tmojántatšëmbona ora, Saulo Cesarea luaroye tmojanánatse, y chentšana Tarso puebloye tmojanichmó.

³¹ Y chca, Jesucristbeñe ošbuáchiyënga Judeoca, Galilea y Samaria luarentše chora ya ndoñe más montsansufrina y natjëmbana imojtsemna, y nyetscanga más ošbuáchiyana imojtsebmna. Ntšamo Bëngbe Bëtsá yojanbošcá, imojtsaniyena cha jtsatschuanayëse; y chë Uámana Espíritbe uajabuáchenanaca, Jesucristbeñe ošbuáchiyënga más tmojanoboté.

Pedro Enéasbioye tbojanshná

³² Pedro yojánabuache nyetsca chë Jesucristbeñe ošbuáchiyëngbenache. Y chca, Lida puebloca Bëngbe Bëtsabe entšanga jabuachámnaca tojána. ³³ Lida pueblentše canya tbojáninýena, Eneas ca uabainá. Cha jama ndobená inamna y posufta uata jutsnéshañe chca inajájona. ³⁴ Pedro tbojaniyana: “Eneas, Jesucristo tcmónjashná. Matëtsbaná y acbe tjuashe motsejacadá ca.” Y cachora chë jama ndobená tojtantsbaná.

³⁵ Nyetscanga chë Lida pueblentše y Saronoca oyenënga chë entšá shnaná tmojáninýe. Y as, chënga bacna soyënga amana tmojtsanajbaná y cach orscana tmojanontšé Bëngbe Utabnábeñe ošbuáchiyana.

Pedro tojanma Dorcas cháuatayenama

³⁶ Chë tempo, Jope puebloca yojaniyena canye shembása Jesucristbeñe ošbuachiyá, Tabita ca uabainá, o griego biyañna Dorcas ca. Cha nyets tempo tšabe soyënga yojánama y yojanamana chë tojtséjabotënga jujabuáchana. ³⁷ Pero chora, šocana tbojanshache y tojtsanóbana. Tmojtsanbebé chentšana, canye tsoye tsbanana tsañoca chabe cuerpo tmojtanaajajó. ³⁸ Jope inamna Lida béconana, y Lidentše Pedro yojtsemna; y chë Jope pueblentše Jesucristbeñe ošbuáchiyënga tmojántatšëmbona Pedro choca yojtsemnama. Asna, uta boyabásata tmojanichamó Pedro jauyanama: “Diosmanda, betscó Jope puebloye mabo ca.”

³⁹ As Pedro tojëftsantsbaná y chë uta boyabásaftaca tojána. Choye tmojánashhajna ora, tmojanánatse chë Dórcasbe cuerpo yojtsemnoye, tsbanánoca; chorna, nyetsca viudanga šachénaca Pédrëbioye tmojanóbobuashcona y imojtsinýinýenaye chë Dorcas yojuajonaná entšayangá y cmešëjuangá, cabá chëngaftaca yojëftsemna ora. ⁴⁰ Pedro tojanmandá nyetscanga chentšana chamotsebocanama; chora Pedro yojoshëntsamentšiyë y Bëngbe Bëtsáftaca ibojencuentá. Chentšana, Pedro chë obanábioye tbojanonýinýe y tbojaniyana: “Tabita, matëtsbaná ca.”

As Dorcas tojtanobuchatëfjona y Pédrëbioye tbojáninýe ora, tojanótbema. ⁴¹ Chora Pedro tbojanábuacueshache y tbojtanatsbaná. As Pedro tojánachembo nyetsca chë Jesucristbeñe ošbuáchiyënga, chë viudanga y chë inýenga, y Dorcas ainá tojtaninýanýe. ⁴² Chë soye nyets Jope pueblentše tojanótatšëmbona y banga Bëngbe Utabnábeñe imojtsošbuáchiye. ⁴³ Y Pedro bayté Jope pueblentše tojanoquedá, Simón chë bobáchëshiñe trabajayabe yebnentše.

10

Pedro y Cornelio

¹ Cesarea pueblentše inamna canye boyabása Cornelio ca uabainá; cha inamna chë Italiano ca uabaina soldadëngbe amëndayá. ² Cornelio Bëngbe Bëtsábioye ibnarrespetana y nyetsca chabe yebnentša oyenëngaftaca Bëngbe Bëtsá puerte imojánadorana. Becá crocénana inaquëcjnaye chë judiënga ndbomnjëmënga jujabuáchama y sempre Bëngbe Bëtsáftaca ibnëncuentaye.

³ Canÿe te, mo bëts mošenana ora, cha botamana tojáninÿe mo otjenayoquëcá, mëntšá: Bëngbe Bëtsabe canÿe ángel Cornelio yojtsemnoye yojtsamashjuana y tbojaniyana: — ¡Cornelio ca!

⁴ Cornelio chë ángelbioye ibojtsonÿaye y auatjananá tbojaniyana: —Taita, ¿ndayá yojtsemna ca?

Y chë ángel tbojaniyana: —Bëngbe Bëtsá condbétseimpadanama y chë ujabótënga condbëtsëjabuachanama, Bëngbe Bëtsá ácaftaca entsoyejuá y lempe cmochanjóyeunaye. ⁵ Chcasna, mora básefta boyabásenga Jope bëts puebloye michamó y Simón, chë Pedro ca monduabobuatmá, moye chamuánatse. ⁶ Cha posada entsebmna inÿe Simónbentše, chë bobáchëshiñe trabajayabe yebnentše. Chabe yebna mar béjaye tsachañe endmëna. Cha cmochanjauyana ndayá jamama cmojtsemna ca.

⁷ Chë Cornéliëbioye ibojuatsëtsaye ángel tojtsatanoñe ora, Cornelio chabe oservenënguentshana útata tojánachembo y canÿe soldádnaca, chabe uajabuachaná, Bëngbe Bëtsá adorayá; ⁸ lempe ntšamo yojopasacá chënga tojanacuntá y chentshana Jope puebloye tojanichamó.

⁹ Yëfsana mo nÿetsto ora, chënga benachiñe Jope béconana imojtsajnëntscuana, Pedro yebnentša tsbanánoye tojánašëngo, Bëngbe Bëtsáftaca jencuëntama. ¹⁰ Becá tbojánishëntsena y jasama yojtseboše; pero imojtsebopróntantscuana, Pedro mo otjenayoquëcá mëntšá tojáninÿe: ¹¹ Celoca yojtsatëfjna y mo canÿe bëts entšayëjuacá yojtsabá y nÿets canta sibientsana yojtsëjonÿana. ¹² Chë entšayëjuañe imojtsemna nÿetscna bayënga, ósjojnaye bayënga y nÿetscna shloftšëngnaca. ¹³ Y tojanuena canÿe oyebuambnayana mëntšá: —Motsbaná, Pedro; mobaye y quem bayënga mose ca.

¹⁴ Chora Pedro tojánayana: —Ndoñe, atšbe Utabná. Atše ndocna te chiyáisese Moisesbe leyinë ndoñe yondëlesenciana jasama bayënga y chë jasama ndoñe tšabá imomna bayënga ca.

¹⁵ Y cachiñe tojtëtanuena chë oyebuambnayana mëntšá: —Bëngbe Bëtsá tojalesenciá y canÿe bayá tšabá jasama yomna ca tojayanëse, aca ndoñe matsjuabnana chë bayá jasama ndoñe tšabá yontsemna ca.

¹⁶ Chë soye unga soyama chca tojanopasá chentshana, chë entšayëjua celoye tojtanátsjua. ¹⁷ Pero Pedro ndoñe yontsetátšëmbo ntšamo tojaninÿcá ndayá chabiamama yojtsayanama. Chëntscuana, chë Cornéliëbe ichmónënga noticiánana Simónbe yebnocatmojánashjajna y shjoca bëšoca imojtsobátmana. ¹⁸ Tmojanchembo ora, tmojanënoticiá Simón, chë Pedro ca uabobainá, chentše taibojatanama.

¹⁹ Pedro, ndayá tojáninÿama chabosertama yojtsenójuabnantscuana, chë Uámana Espíritu tbojaniyana: “Mouena, muentše mora unga boyabásenga cmontsenguá. ²⁰ Motsbaná, mocana matastjango y yapa ntjatenuabnayscá chëngaftaca cochjá, er atše chënga sënjichamó ca”.

²¹ As Pedro tojtanastjango y chë tmojánashjajnënga tojanëyana: —Atše sëndmëna chë šmontsenguá cha. ¿Ndáyeca moye šmojabo ca?

²² Chora chënga tmojanjuá: —Cornelio šonjichamó. Cha endmëna chë soldadëngbe amëndayá, canÿe tšabá mándbomna entšá y Bëngbe Bëtsábioye adorayá, y nÿetsca judiënga chabiamama tšabá mondbëtsoyebuambnaye. Bëngbe Bëtsabe canÿe ángel chábioye tbojabuayená ntšamo jamana aca chábioye chacotsama, as chë ndayá cha jauyanama cojtsebmncá cha jouenama ca.

²³ As chënga tojanëmashëngo y posada tojanëyentsame. Yëfsana Pedro chë unga boyabásëngaftaca tojána. Básefta Jesucristbeñe ošbuáchiyënga Jope pueblentšënga Pedro tmojantjëmbambá.

²⁴ Chë inye yëfsana Cesarea puebloye tmojánashjajna. Chentše Cornelio Pédrëbiam a yojtso batmana, y Cornelio tojanëbuaja pamíllanga y tšabe amiguëgnaca chentše imojtsemna. ²⁵ Pedro tojánashjango ora, Cornelio tojánbocna jajëbenguama y chabe shecutšentše yoJoshëntsamentšiy e cha jadórama. ²⁶ Pero Pédrëna tbojtanatsbaná y mëntšá tbojanianyana: —Matëtsbaná, atše cach aquëcá nye canye entšá sëndmëna ca.

²⁷ Pedro Cornélioftaca encuëntaye chë yebnentše tojánamashëngo y ba entšanga tojánanyëna, chentše tmojanójtënga. ²⁸ Chora Pedro tojanëyana: —Cach tšëngaftanga šmondëtatšëmbo chë judiëngbe leyënguiñe endayana ndoñe yondopodena canye judío ndoñe judío entšangaftaca jenútanama y ni mo chëngbe yebnënguenache jábuachama ca. Pero Bëngbe Bëtsá šonjinýinýe atše ndocna te šondmëna ínýabiam a jatsjuabnayana cháftaca jenútanama ndoñe tšabá yondmëna ca. ²⁹ Chíyeca, šmonjobetše ora, ndocá ntjatichamcá nye sënjabo ca.

Chora tojanatjá: —¿Ndáyeca šmojobetše ca?

³⁰ As Cornelio tojánayana: —Canta te entsemna, camëntša ora, muentše sëndánmëna Bëngbe Bëtsáftaca encuëntaye y ndeolpe sënjinýe atšbe delante canye boyabása uabuashinýinýana entšayaca bopormaná. ³¹ Cha šonjauyana: “Cornelio, Bëngbe Bëtsá condbëtseimpadanama y chë ujabótënga condbëtsëjabuachanama, Bëngbe Bëtsá ácaftaca entsoyejuá y lempe cmochanjóyeunaye ca. ³² Básefta boyabásenga Jope bëts puebloye michamó y Simón chë Pedro ca monduabobuatmá moye chamuánatse ca. Cha posada entsebomna inye Simónbentše, chë bobáchëshiñe trabajayabe yebnentše, y chabe yebna mar bėjaye tsachañe endmëna. Cha cmochanjauyana ndayá jamama cmojtsemna ca.” ³³ Chcasna, cachora sënjichamó aca jobetšama, y aslëpaye jabama tcojóyaunama. Y as morna, nyetscanga Bëngbe Utabnabe delante fsëntseprontana jouenama lempe ntšamo Bëngbe Bëtsá tcmojamandacá ca —cha tojánayana.

Ntšamo Pedro tojanoyebuambá Cornéliëbe yebnentše

³⁴ Pedro chora tojanontšë mëntšá jóyebuambayama: —Mora atše šontsosertana, ndegombre Bëngbe Bëtsabiam a nyetscanga cachcá uámanënga imomnama. ³⁵ Nyets luarënguenache Bëngbe Bëtsá júbuajana cha tmojtsatschuaná y tšabe soyënga tmojtsamënga. ³⁶ Tšëngaftanga šmondëtatšëmbo, Bëngbe Bëtsá Israeloca entšanga tojánabuayenama, tšabe noticiënga jtsóyebuambnayëse, chënga nyetscanga ainaniñe tšabe ebionana chamotsebomnama, Jesucristbeyeca; y cha endmëna nyetsca entšangbe Utabná. ³⁷ Tšëngaftanga šmondëtatšëmbo ntšamo nyets Judeoca tonjanopasama. Chë soye Galilea luaroca tojanobojatšë, Juan entšanga yojanabuayinýá orscana, chënga bacna soyënga amana chamotsajbanama y chamuenábayama. ³⁸ Šmondëtatšëmbo ntšamo Bëngbe Bëtsá, Jesús Nazaretocábioye tbojanábuayanama y tojanma chë Uámana Espíritu chabe ainaniñe cháuamashënguama, y tojanma Jesús corente obená chaotsemnama; y šmondëtatšëmbo ntšamo Jesús enjánana entšangbiam a tšabe soyënga amiñe y nyetscanga chë Satanás yojánama chamosufrimënga áshnaye, er Bëngbe Bëtsá cháftaca yojtsemna.

³⁹ “Bënga fsënjáninýe y fsëndëtatšëmbo lempe ntšamo Jesús tojanmcá Jerusalenoca y nyets Judea luariñe; y cha tmonjanóba, canye cruciñe jacrucificase. ⁴⁰ Pero Bëngbe Bëtsá tonjanma unga tianoye cha cháuatayenama y bëngbeñe chaonýnama. ⁴¹ Cha nyetsca entšangbe delante ndoñe chenátanbocna, pero aiñe bëngbeñe, chë tempo Bëngbe Bëtsá šojanëbuáyanënga, Jesús tojtanayenama chamuinýama. Y tojtanayenentšana bënga cháftaca fsënjanse y fsënjanošé. ⁴² Cha šonjichamó entšanga jábuayenama y jayanama ndegombre cha yomna chë Bëngbe Bëtsabe uabuayaná, chë nda obanëngbiam a y ainëngbiam a yochjayana tšabá o ndoñe tšabá tmonjamama. ⁴³ Bëngbe Bëtsabe juabna oyebuambnayënga nyetscanga cach Jesusbiam a tmojánayana, nda Jesúsbeñe tojtsošbuaché, chábioye Bëngbe Bëtsá chabe bacna soyëngama bochanjaperdóna, Jesusbe obenánaca ca.”

Ndoñe judiënga chë Uámana Espíritu tmojanóyëngacñe

⁴⁴ Pedro chë palabrënga cabá yojtsóyebuambnantscuana, chë Uámana Espíritu tojánamashëngo nyetsca chë imojtsuenanëngbe ainaniñe jtsemándayama. ⁴⁵ Chë judiënga Jesucristbeñe ošbuáchiyënga Pédroftaca tmojánabënga imojenjnaná, chë Uámana Espíritu ndoñe judiëngbeñnaca cháúamashënguama Bëngbe Bëtsá tojanmama. ⁴⁶ Chënga imojtsuenana chënga inyetsá jtsebiayangana, chënga tempo ndmabiyañe y jtsichámuana Bëngbe Bëtsá bëts soyënga tojanmama.

⁴⁷ Chora Pedro tojánayana: “Pero mëngna chë Uámana Espíritu tmonjýëngacñe ntšamo bënga tmonjoyëngacñecá. Chcasna, ndocná queochatobenaye jamana chënga uabáinënga ndoñe chamondëtsemnama ca.” ⁴⁸ As Pedro tojanamëndá chënga jubáyama, Jesucristo jótšëmbonëse. Chentšana chënga tmojanimpadá baseftayté chëngaftaca chaoquedama.

11

Ntšamo Pedro chë Jerusalemoca imojánenefjuana ošbuachiyëngbioye tojanëyana

¹ Jesucristbe ichmónënga y chë Judeoca Jesucristbeñe ošbuáchiyënga tmojántatšëmbona, chë ndoñe judiëngnaca Bëngbe Bëtsabe palabriñe imojtsošbuáchema. ² Pero Pedro Jerusalemoye tojesaná ora, báseftanga chabiamana ndoñe tšabá tmonjánayana. Chënga imojamna chë juabnayënga, chë ndoñe judiënga ošbuáchiyënga boyabásenga canjánamna chë más delicadentse base bobachtema tëtšëñënga jtsemnama ca, ntšamo chë judiënga imojanamancá, as chënga jobenayama chë judiënga ošbuáchiyëngaftaca jenútanama ca. ³ As Pedro tmojantjá: —¿Ndáyeca tcojá chë ndoñe judiënga jábuachama y chëngaftaca tcojase ca?

⁴ Chora Pedro lempe chënga tojanacuntá ntšamo chë ndoñe judiëngbioye cha tojána orscana tojanopasama. Cha tojanëyana: ⁵ —Atše Jope puebloca sënjamna y Bëngbe Bëtsáftaca sënjencuénta ora, mo otjenayoquécá sënjáninýe celocana mo canýe bëts entšëjuacá átšbioye enjétsabeconaye y nyets canta sibiocana enjétsëjonýana. ⁶ Y botamana sënjanrrepará ndayá chë tsoye bëtsemnama y sënjáninýe choye monjëtsemna uamna y tjoca bayënga, ósjojnaye bayënga y nyetscna shloftšëngnaca. ⁷ Y sënjanuena canýe oyebuambnayanama mëntšá: “Motsbaná, Pedro; mobaye y quem bayënga mose ca.” ⁸ Chora atše sënjánayana: “Bëngbe Utabná, ndoñe; atše ndocna te chiyáise chë Moisesbe leyíñe ndoñe yondëlesenciana jasama bayënga y jasama ndoñe tšabá imomnënga ca.” ⁹ Chentšana cachiñe sëntétanuena chë celocana oyebuambnayanama mëntšá: “Bëngbe Bëtsá tojalesenciá y canýe bayá tšabá jasama yomna ca tojayanëse, ndoñe matsjuabnana chë bayá jasama ndoñe tšabá yontsemna ca.” ¹⁰ Chë soye unga soyama chca tonjanopasá y chentšana chë entšëjua celoye tontanátsjua. ¹¹ Y cachora unga boyabásenga Cesarea pueblcana ichmónënga, chë posada sëndbomnentse tmonjánashjajna, atše janguanguama. ¹² Y chë Uámana Espíritu šonjanmandá atše yapa ntjatenojwabnycá chëngaftaca jama; y quem chnënguana Jesucristbeñe ošbuachiyëngnaca átšeftaca tmonjána. Nyetscanga canýe entšá Cornelio ca uabainabe yebnoye fsënjánamashjna; ¹³ y chana bënga šonjanacuntá ntšamo tojáninýe, cachabe yebnentše canýe ángel ibojtsebiatsana y mëntšá tbojaniyana: “Básefta boyabásenga Jope bëts puebloye michamó y moye chamuánatse Simón, chë Pedro ca monduabobuatmá, ¹⁴ y cha cmochanjabuayená ntšamo aca y acbe yebnentša oyenënga šmochjotsbocá ca.” ¹⁵ As, atše jóyebuambayama sënjanbojatsé orna, chë Uámana Espíritu tonjánamashëngo chëngbe ainaniñe jtsemándayama, ntšamo bëngbeñe natsana tonjanamashëngcá.

¹⁶ “Chora sënjanenajuabó ntšamo Bëngbe Utabná tonjánayanama: ‘Ndegombre, Juan entšanga béjayeca tonjanëbaye; pero Bëngbe Bëtsá chë Uámana Espíritu bochanjíchmuá, tšëngaftangbe ainaniñe jtsemándayama cháúamashënguama ca.’ ¹⁷ Chcasna, chëngnaca Bëngbe Bëtsá chë Uámana Espíritu tonjatsatá, ntšamo bënga, chë Utabná Jesucristbeñe

ošbuáchiyënga, šonjanatsatacá. Y chca, atše ndoñe quetsátsmëna canye tša uamaná, Bëngbe Bëtsá jauyanama ntšamo cha yobošcá ndoñe chaondëtsemna ca.”

¹⁸ Jerusalemoca Jesucristbeñe ošbuáchiyënga chë soyënga tmojanuena ora, ndocá más tmonjantjá y Bëngbe Bëtsá tmojtanchuá, mëntšá: —¡Asna, Bëngbe Bëtsá chë ndoñe judiëngnaca tojalesenciá chëngbe bacna soyëngama ngmënaca chamuatenójuaboma y chca amana chamotsajbanama, chë nyetsca tescama yomna tšabe vida chamotsebom-nama ca!

Ntšamo Antioquía puebloca tojanobojatšé, entšanga Jesucristbeñe ošbuáchiyana

¹⁹ Esteban tmojanóba chentšana, tmojanontsé chë Jesucristbeñe inye ošbuachiyëngnaca jatëcamiyama. As chentšana báseftanga yojtsamna bën luarëngoye jtsachetëngana Fenicioye, Chipre y Antioquía luarëngoye, y chenache chënga Jesucristbe soyëngama imojanoyebuambná, pero nye judiëngbiama. ²⁰ Pero báseftanga imojamna Chipre y Cirene luaroquënga, y chënga Antioquía bëts puebloye tmojánashjajna orna, chë ndoñe judiëngbeñnaca tmojanoyebuambá, Jesús, chë Utabnabe soyëngama jabuayenase. ²¹ Bëngbe Utabnabe obenana chëngaftaca yojtsemna, y chca, ba entšanga tmojanajbaná bacna soyënga amana y tmojanontsé Bëngbe Utabnábeñe jtsošbuáchiyana.

²² Jerusalemoca Jesucristbeñe ošbuáchiyënga chë soye tmojántatšëmbona ora, Antioquía luaroye Bernabé tmojanichmó. ²³ Bernabé choye tojánashjango orna, tojáninye ntšamo Bëngbe Bëtsá tšabe bendicionënga chëngbeñe tojanmama y chama corente tojanoyejuá. Nyetscanga tojanabuayená chamotsiyena nyets ainánaca Bëngbe Utabnábeñe jtsošbuáchiyëse. ²⁴ Bernabé inamna canye entšá tšabe soyënga amá, chë Uámana Espiritu chabe ainaniñe yojtsemándaye y bëtscá ošbuachiyá inamna. Y banga tmojanontsé Bëngbe Utabnábeñe jtsošbuáchiyana.

²⁵ Chentšana, Bernabé Tarso puebloye tojána Saulo janguanguama, ²⁶ y tbojáninyena ora, Antioquía luaroye tbojëftsanbetše. Antioquía luarentšna canye uata nyetsá Jesucristbeñe ošbuáchiyëngaftaca cányiñe ibojëftsemna y ba entšanga tmojanabuatambá. Antioquioca inamna chë ndayentše natsanama Jesucristbeñe ošbuáchiyënga Cristbe ústonënga ca imojtsëbuatma.

²⁷ Chë tempo, básefta Bëngbe Bëtsabe juabna oyebuambnayënga Jerusalemocana Antioquía luaroye tmojána. ²⁸ Chënguentshana canya Agabo ca uabainá tojantsá y chë Uámana Espiritbeyeca tojánayana, mëntšá: “Nyets luariñe entšanga oyeñiñe bëts shëntsana echanjóshjango ca.” Y ndegombre chca tojanopasá, Claudio Romoca bëts mandado inamna ora. ²⁹ Chcasna, chë Antioquía bëts pueblentša Jesucristbeñe ošbuáchiyënga imojenóyeunaye ntsachetšá crocënanëñnaca juíchmuana, ntšamo cada ona tojobenacá, Judeoca Jesucristbeñe ošbuáchiyënga jujabuáchama. ³⁰ Chca tmojanma, y Bernabé y Sáuloftaca chë crocëñana tmojanichmó chë Judeoca Jesucristbeñe ošbuáchiyënguentše bëtsëjemëngcá amëndayëngbioye.

12

Santiago tmojanóba; Pedro tmojanëtame

¹ Chë tempo, rey Herodes básefta Jesucristbeñe ošbuáchiyënga tojánishëche jutámiamama y jatsetšenama. ² Tojanmandá espadëjaca chamóbama Santiago, Juanbe catšata; ³ y Herodes tojántatšëmbona judiënga chë soye tojanogúsetama; as, cha tojanmandá Pédrëñnaca chamutámiamama. Chca tojanopasá chë levadúraca ndëpormana tandëse sayté, Bashco fiesta ora. ⁴ Pedro tmojánishache orna, Herodes tojanmandá chamutámiamama, y chë cárceloca soldadënga cantátanga tmojanenajatá cántentše cha chamotsebojanýama. Herodes yojëtsejuabnaye, Bashco fiesta tojochnëngo ora Pedro juabocnama, entšangbe delante jayanama cha chaóbanama. ⁵ Chcasna, Pedro yojtsëtámëna y chë soldadënga

corente imojtsebojanýá. Pero Jesucristbeñe ošbuáchiyëngna bëtscá Bëngbe Bëtsá imojtseimpadana Pédrëbiana.

Bëngbe Bëtsá tojanma Pedro natjëmbana cárcelocana cháuissebocnama

⁶ Canýe te yojtśájamna Herodes entsangbe delante Pedro juabocnama. Chë te ibetna, Pedro yojtśomañe y cátatoica canýe soldado yojtsemna; uta cadenëjuaca yojtśabatsëcna y inýe soldadëngna bësócana chë utámeniñe imojtsebojanýá. ⁷ Ndeolpe, Bëngbe Utabnabe canýe ángel tojánbocna, y lempe chë utámeniñe yojtsebuashinýinýana. Chora chë ángel tëchañe Pédrëbioye tbojánbojajo, tbojanfšená y tbojanianyana: “Betsco motsbaná ca.” Y cachora chë cadenëjuangá Pédrëbe buacuatsënguentšana tojanatquécjana, ⁸ y chë ángel tbojanianyana: “Matichëtjo y matóshecochëtjo ca.” Pedro tojanma ntśamo chë ángel tbojanianyancá, y chora chë ángel tbojátaniyana: “Mataquëfsayé y śmasto ca.”

⁹ Pedro utámenocana chë ángel ibojtsëstona, pero ndoñe yontsetátśëmbo aiñe ndegombre o ndoñe bentsemna chë ángel yojtśama cha chocana cháuissebocnama; masna, ibojtsinýana mo canýe otjénayoca cuaftsemncá ca. ¹⁰ Y útentse chë soldadënga imojtsebojanýajana chata tbojánachnëngo y yerëša bësásoye tbojánashjango, chë ndayëša yojanamna tsáshenoye jabocnama; y chë bësásana nýe cachabe ponto yojotëfjo. Chentšana tbojëftsanbocna ora, canýe tsáshenëjana ibojtsaye, y nýe ndeolpe chë ángel Pédrëbentšana yojtsojuánañe.

¹¹ Nýa chora Pedro tbojanosertá y tojánayana: “Mora tśabá śjosertá, ndegombre Bëngbe Utabná chabe ángel tbojichmó atśe jatsbocama Heródesbe cucuatśentšana y lempe ntśamo judiënga átśeftaca jamama imojuabnámnaca ca.”

¹² Pedro chë soyama juicio tojanca ora, tojána María, Juanbe mamabe yebnoye; Juan, Marcos ca imojanábobaina. Y chë yebnentśe banga cánýiñe imojtsemna, Bëngbe Bëtsáftaca encuéntaye. ¹³ Pedro chë tsashenoica bësásoca tojanchembo ora, canýe oservená, Rode ca uabainá, tojánbocna jarrepárama. ¹⁴ Chë oservená Pédrëbioye tbojanoyatëmbá ora, corente oyejuayá yojtsemna y cha, jebiatëfjo cuentna, cach tsoye tojesaná chë tśabe noticia jaúnayama, Pedro bësoca yojtsemna ca. ¹⁵ Chë tsoca imojtsemnëngna chora tmojanianyana: “¿Opá chectsebocna ca?”

Pero chë oservená yojtśichamo ndegombre ca. Y chënga tmojanianyana: “¡Chabe ángel ctsemna ca!”

¹⁶ Chëntscuana Pedro cabá yojtsechembuana; tmojánebiatëfjo y tmojáninýe ora, chënga puerte imojenjnaná. ¹⁷ Pero Pedro tojánefjatsëmbo iytëca chamobiamama y tojanacuntá ntśamo Bëngbe Utabná utámenocana tbojánatsbocama. Chentšana tojanéyana: “Ntśamo tonjopasama Santiago y chë Jesucristbeñe inýe ošbuáchiyënga śmochjaúnaye ca.”

Chora Pedro chë yebnentšana tojtáisebocna y ínýoye yojáta.

¹⁸ Tojanbinýna ora, chë soldadënga puerte imojóntśa enbouenanana, ntśamo Pédroftaca tojanopasama ndoñe imontsetátśëmbo causa. ¹⁹ As Herodes tojanmandá Pedro chamotsenguanguama; pero jtsinýenama ndoñe imonjobenaye orna, Herodes chë soldadënga tojanatjá ndayá Pédroftaca tojanopasana y chentšana tojanmandá chë cha imojanbojanýá soldadënga jtsëbáyama. Chë soyënga tojanochnëngo chentšana, Herodes Judea luarentšana tojëftsanbocna y Cesarea luaroye tojtśanoñe, y choca tojtśanoquedañe.

Herodes tojanóbana

²⁰ Herodes corente yojtsetśátjaye Tiro y Sidonoquëngaftaca; as chënga tmojanenoyeuná Heródesbioye jama. Canýe uámana uajabuachaná, Blasto ca uabainábioye tmojanayeuamaná, y chana tojanašebuachená Herodes jauyanama ndoñe más entjáyánanënga chamondëtsemnama, er Tiro y Sidonoca entsanga vida imnabomna Heródesbe luaroca sanángaca. ²¹ Chcasna, rey Herodes inýe tescama tojánachembo. Chë tena, jóyebuambayama Herodes uámana entsayaca yojtóporma y yojótbema chabe

mándaye tbemanentše; chentšana tojanonguamé. ²² Chora entsanga tmojanontsé mēntšá uayebuáchana: “¡Chē entsoyebuambná cha entsá ndoñe quenátsmēna! ¡Chana canye dios entsemna ca!” ²³ Cachora, Bēngbe Bētsabe canye ángel tojanma Herodes šocana chaboshachama, chabe cuenta Bēngbe Bētsá chamuatschuama entsanga ndoñe yonjáuyana causa. Herodes tojanóbana mamángaca sasná.

²⁴ Pero chē tempo más bētsca entsanga Bēngbe Bētsabe palabra imojtsuenana y Jesucristbeñe imojtsošbuáchiye.

²⁵ Bernabé y Saulo chatbe trabajo tbojéftsanma ora, Jerusalenocana Antioquía luaroje tbojésanata y Juan, chē Marcos ca uabobuatmá, chátaftaca tmojéftsanbetše.

13

Bernabé y Saulo tbojanbojatsé Bēngbe Bētsabe trabajo jamama

¹ Antioquía luaroca Jesucristbeñe ošbuáchiyēnguentše imojtsemna Bēngbe Bētsabe juabna oyebuambnayēnga y ošbuachiyēngbiyoye abuátambayēnga. Chēnga imojanabaina Bernabé, Simón (chē Sibetá ca uabobuatmá), Lucio Cirenocá, Manaén (nda tojanoboché cánjiñe Herodes, chē Galileoca réyefata) y Saulo. ² Canye te, Bēngbe Utabná imojtsatschuanaye y chama tondaye ntjascá imojtsemna ora, chē Uámana Espiritu tojánayana: “Mora šmochjalesencia Bernabé y Saulo tšēngaftangbentšana chabuétsebocnama; chatna canye trabajuama sēnjabacá ca.”

³ Bēngbe Bētsá jētschuayama tondaye ntjascá imojtsemnēntscuana y cháftaca imojtsencuántantscuana, chēngbe cucuatšēnga chatbe bestšaše juatsboica tmojancjá, chatbe trabajuiñe chaújabuachama Bēngbe Bētsá jtseimpadánese. Y chentšana chátbiyoye tmojtana-diošoftá.

Bernabé y Saulo Chipre luaroca

⁴ As Bernabé y Saulo, chē Uámana Espiritbeyeca ichmónata, Seleucia ca uabáinoje tbojánata y chentšana bejaycá, Chipre luaroye. ⁵ Salamina bēts puebloye tbojánashjango ora, tbojanontsé Bēngbe Bētsabe palabrama entsanga jábuayenama, chentša judiēngbe enefjuana yebnēnguenache. Juan Marcos mo chatbe uajabuachanacá ibojtsebomna.

⁶ Nyets chē luarējana tmojánachnēngo orna, Pafos puebloye tmojánashjajna; y chentše tmojáninýena canye judío tatsēmbuá, Barjesús ca uabainá. Cha yojánichamo cha canjamna canye Bēngbe Bētsabe juabna oyebuambnayá ca, pero ndoñe chca yonjamna.

⁷ Chē tatsēmbuá inatrabájaye chē Chipre luaroca mandadbiama, Sergio Paulo ca uabainá; y chē mandadna corente osertaná inamna. Cha yojtseboše Bēngbe Bētsabe palabra jouenama; as tojanmandá Bernabé y Saulo jobiatšana. ⁸ Pero chē tatsēmbuá, grieguiñe Elimas ca uabainá, Saulo y Bernabebe contra yojtsemna y yojtsama chē mandado ndoñe chaondētsošbuáchema, ntšamo chē Jesucristbeñe ošbuáchiyēnga imojanošbuachecá. ⁹ Chora, Saulo chē Pablo ca imojanábobuatmabe ainaniñe chē Uámana Espiritu corente yojtsemándaye; as chē tatsēmbuábioyeyeuana ibojonýinýiye, ¹⁰ y tbojanianya: “¡Abuambnayá, puerte bacna entsá, Satanasbe uaquiñá y tšabe soyēnga ndoñe chaondētsebínýnama trabajayá! Bēngbe Utabnabe nyetsca ndegombre soyēngama aca contsichamo uayátsenaye soyēnga yojtsemna ca. ¹¹ Mora, Bēngbe Bētsá cmochanjacastíga, jtaná cochanjoquéda y baseftayté jinýama quecochatobenaye ca.”

Cachora Elimas mo ibetiñcá yojoquéda y ibojtsonguaye canya buacuetēntšnana chabuánatsama, jtaná yojtsemna causa. ¹² Chē mandado chca tojáninýe ora, Jesucristbeñe yojtsošbuaché y yojenjnaná Bēngbe Utabnabe soyēnga tojanatsjínýama.

Pablo y Bernabé Antioquía pueblentše, Pisidia luaroca

¹³ Pablo y chabe enutēnga, Páfocana, bejaycá Perge puebloye tmojatananga, Panfilia luaroca. Pero Juan tojésanabashejuana y Jerusalenoye tojésanshēcona. ¹⁴ Pergentšana Antioquía puebloye tbojatanata; chē pueblo inamna Pisidia luare béconana. Chentšana,

ochnayté, chë judiëngbe enefjuana yebnoye tbojánamashëngo y tbojanótbema. ¹⁵ Moisesbe leyiñe y Bëngbe Bëtsabe juabna oyebuambnayëngbe uabemana librëšangañe tmojanalía orna, chë enefjuana yebnentša mándayënga canya tmojanichmó chënga jáuyanama: —Israeloquënga, bënga fsëntseboše entšanga chašmabuayená, nderado ndayá jayanama šmojtsebomñese, muentša entšanga añemo chamotsebomnama ca.

¹⁶ As Pablo tojantsá y entšángbioye cucuátšeca tojánefjatsëmbo iytëca chamobiamama, y tojánayana: —Smochjouena Israeloquënga y ndoñe judiënga Bëngbe Bëtsá adórayënga. ¹⁷ Israeloca entšanga mondadorana Bëtsá, Bëngbe Bëtsá, bëngbe bëts taitanga tojanëbuáyana, y tojanma chënga corente bëtsçanga chamotsemnama, chënga Egiptoca inye luarocana ashjajnëngcá imojoyena ora. Y chentšana, cachabe obenánaca chë luarocana chënga tojésanëbuacana. ¹⁸ Canta bnëtsana uata nyetsá, Bëngbe Bëtsá entšanga ndoyena luaroca chënga yojanëuantana, ¹⁹ y cha tojanma chë Canaán luaroca canyšëftentša entšanga chamopochocama y bëngbe bëts taitanga chëngbe fshantsënga nduiñënga tojánabiamama. ²⁰ Chë tempo, chë Bëngbe Bëtsá Abrahámbioye quem fshantse jatšetayama tbojanšbuachená orscana, y chë tempo, chë bëngbe bëts taitanga chë fshantse tmojanóyëngacñëntscuana, canta patse y shachna bnëtsana uata tojanochnëngo.

“Chentšana, Bëngbe Bëtsá chëngbiamama mandadënga tojánabiamama, Bëngbe Bëtsabe juabna oyebuambnayá Samuel chëngbe mandayá yojëftsemna tempëntscuana. ²¹ Chentšana, Israeloquënga Samuel tmojanimpadá canye rey chabojayé chaotsamëndama; as Bëngbe Bëtsá Saúlbioye chëngbe rey tbojánbema, canta bnëtsana uatëscama. Saúl inamna Cisbe uaquiñá y Benjaminbe bëts pamillanguentsá. ²² Más chcoyna, Bëngbe Bëtsá Saúlbioye chë mándayentsana tbojtsanjuaná, y chentšana Davídbioye mo chëngbe reycá tbojánbema. Chabiamama Bëngbe Bëtsá tojánayana: ‘Atše sëndëtatšëmbo, David, Isaíbe uaquiñá, canye tšabe entšá yomnama y chama atše sëndoyeuá, y cha sempre endëprontana ntšamo atše stsebošcá jtsamama ca.’ ²³ Davídbentšana canye entšá Jesús enjamna, nda Bëngbe Bëtsá tbojanichmó Israeloca entšanga jabátsebacama, ntšamo cach Bëngbe Bëtsá chëngbe bëts taitanga tojanašebuachenacá. ²⁴ Cabá Jesús ndëbocna ora, Juan nyetsca Israeloquënga tojanabuayená bacna soyënga amana chamotsajbanama y chamuenábayama. ²⁵ Juanbe trabajo jopochócama yojtsobeco ora, cha tojánayana: ‘¿Nda atše tsmënama tšëngaftanga šmojuabná ca? Chë tšëngaftanga šmontsejuabná atše tsmëna ca cha, atše ndoñe quetsátsmëna. Pero átsbentšana echanjabo canya, y atše merecido taitatobuajoñe ni mo jotsejbiyama chabe shecochëtjonëshentša corriëja jajafjonama ca.’

²⁶ “Chcase morna, Abrahámbentšana entšanga y ndoñe judiënga Bëngbe Bëtsá adórayënga; bëngbiamama entsemna quem buayenana soye, chë Bëngbe Bëtsá entšanga jatsebacana. ²⁷ Masque cada ochnayté, Bëngbe Bëtsabe juabna oyebuambnayëngbe uabemana palabra monjanalía chëngbe enefjuana yebnentše, Jerusalemntša oyenënga y chentša mándayënga ndoñe quenjatanësertana nda Jesús bëtsemnama, y chë tmojtsalía soyëngama cach ndoñe. Y chca, chënga Jesús chamóbama tmojánboshjona ora, chë chca amënga tmojanma ntšamo Bëngbe Bëtsabe juabna oyebuambnayëngbe librëšangañe iuabemancá. ²⁸ Y masque ndocna bacna soye tmonjáninýena Jesús jóbana chabotsemnama, Pilato tmojanimpadá chaomandá chábioye jóbama. ²⁹ Chentšana, lempe ntšamo Bëngbe Bëtsabe uabemana palabrënguiñe iuayancá Jesúsëftaca tojanochnëngo ora, chabe ústonënga chë cruzocana tmojtanëštjango y tmojanatbontsá. ³⁰ Pero Bëngbe Bëtsá tojanma Jesús cháuatayenama. ³¹ Chë Galileocana Jerusalemoye cháftaca tmojánanga, baytentscuana Jesús yojánebëbuacana; y morna, lempe ntšamo Jesusbiamama tmojaninýcá, chënga entšángbeñe montsoyebuambná.

³² “Y chca, mora bënga chë tšabe noticiënga cbontsëtsëtsná. Ntšamo Bëngbe Bëtsá bëngbe bëts taitanga tojanašebuachenacá, ³³ cha tonjama, bënga chë chëngbe entšanguentšëngbiamama, chca chaotsemnama. Y Bëngbe Bëtsá chca tojama, Jesús

cháuatayenama cha jamëse. Rey David, Bëngbe Bëtsabe uabemana palabrenguiñe, segundo salmentse mëntsá tojanábema, ntšamo Bëngbe Bëtsá Jesúsbioye tbojanianama:

Aca atšbe uaquiñá condmëna.

Mënté entsanga sënjinÿanyé aca atšbe Uaquiñá comnama ca.

³⁴ Y tempo Bëngbe Bëtsá chabe uabemana palabrenguiñe tojaninÿanyé cachá jamama Jesús cháuatayenama y ndoñe cachiñe chaondóbanama, mëntsá tojánayana ora:

Chë ndegombre soyënga y chë tšabe bendicionënga ntšamo David sënjanšbuachenacá, tšëngaftanga cbochanjátataye ca.

³⁵ Inÿoca Bëngbe Bëtsabe uabemana palabrenguiñe, Salmos librëša uabiamnayá, mëntsá tojanábema ntšamo Jesús Bëngbe Bëtsábioye tbojanianama:

Aca ndoñe quecochatslesencia atšbe cuerpo,

chë acbe Uámana oservenabe cuerpo chaotsopochocama ca.

³⁶ David, chabe tempo imojoyenëngbiana tojanma, ndayá cha chaomama Bëngbe Bëtsá tojanjuabocá. Cha tojanóbana y tmojanatbontsá chë chabe bëts taitángbioye tmojanëtabuantsá luarentse, y chabe cuerpo tojanopochocá. ³⁷ Pero chë Bëngbe Bëtsá tojanma chauatayenamabe cuerpna, ndoñe tonjanopochocá.

³⁸⁻³⁹ “Asna, baconga y batanga, atše sëntseboše tšëngaftanga quem soye chašmotsetátšëmbo: Ndayá Jesús tojanmama, entsanga chëngbe bacna soyëngama perdonánënga montsemna. Jesúsbeyeca, nÿetsca chábeñe tmojtsošbuáchenga, bacna soyëngama perdonánënga mochántsemna. Ntšamo Moisesbe leyiñe iuayancá tmojanmama, chënga ndoñe tmonjanobená chca perdonánënga jtsemnama;

nÿe Jesúsbeñe jtsošbuáchiyëse chënga perdonánënga jtsemnana. ⁴⁰ Cuedado šmochtsebonna, ntšamo Bëngbe Bëtsabe juabna oyebuambnayënga tmojanayancá, tšëngaftangaftaca ndoñe chaondochnënguama. ⁴¹ Bëngbe Bëtsá mëntsá tojánayana:

Smochjouena. Tšëngaftanga chë ntšamo atše tijayancá šmojtšábotenga,

ojnanánënga šmochántsemna y šmochanjóbana.

Tšëngaftanga cabá vida šmobomnëntscuana, atše bëts soyënga chanjëftsema,

y masque ndánaca chë soyëngama chacmojtsacúnta,

tšëngaftanga chiñe ndoñe quešmochatošbuáchiye ca” —Pablo tojanoyebuambá.

⁴² Pablo y chabe enutënga chë judiëngbe enefjuana yebnentsana tmojëftsanbocna ora, chë ndoñe judiënga chëngbioye tmojanaimpadá, chë inÿe ochnaytescama chë soyëngama más jábuayenama. ⁴³ Chentse chë te jénefnama tempo tojanopochocá ora, ba judiënga y ndoñe judiënga, chë Bëngbe Bëtsábioye imojánadorana mo chë judiëngcá, Pablo y Bernabé tmojanëseto. Y chatna chënga tmojanabuayená nÿets tempo chamotsejuabnama, Bëngbe Bëtsá chëngbiana tšabe soyënga yojtsamama.

⁴⁴ Chë inÿe semana, chë ochnaytena, nÿa mo nÿetsca chë pueblentse oyenënga tmojanobeconá Bëngbe Bëtsabe palabra jouenama. ⁴⁵ Pero ba entsanga choye jouenama tmojánama chë judiënga tmojáninÿe ora, tmojanotjayaná, ba entsanga Pablo imojtseyeunanama; as chënga tmojanontsé mocá ichámuana ndayá cha yojtsóyebuambnama, y chábioye oyenguayana. ⁴⁶ As Pablo y Bernabé más añémoca mëntsá tbojánayana:

“Endánÿyta, natsana tšëngaftanga, chë judiënga šmomnënga, Bëngbe Bëtsabe palabra jshabuayenana. Pero tšëngaftangna chë palabra šmontsaboté, y šmontsejuabná tšëngaftangbiana ndoñe tšabá yontsemna chë nÿetsca tescama yomna tšabe vida jtsebomnana ca; chë causa, bënga fchantsoñe chë ndoñe judiëngbeñe Bëngbe Bëtsabe palabra jóyebuambayama. ⁴⁷ Er Bëngbe Bëtsá chama šjanichamó, mëntsá jauyanëse:

Aca tcbonjuábuayana chë ndoñe judiëngbioye tšabe noticiënga jábuayenama, chaósertama. Y chca, aca chëngbiana cochántsemna mo canÿe binÿnayacá.

Chca, ácbeyeca nÿets luarënguenache entsanga atše chanjatsebacá ca.”

⁴⁸ Chë ndoñe judiënga chca tmojanuena ora, puerte imojtsóyējuaye y tmojanontsé mëntsá ichámuana: “Bëngbe Utabnabe palabra tšabá bëngbiana entsemna ca.” Y

chora, chë nyetsca tescama yomna tšabe vida jtsebomnama Bëngbe Bëtsá tempo tojánabacacanga, tmojanontšé Jesúsbeñe jtsošbuáchiyana. ⁴⁹ Y chca, nyets chë luariñe más entšanga Bëngbe Bëtsabe palabra imojtsuenana. ⁵⁰ Pero chë judiënga tmojanoyebuambá, shembásengaftaca Bëngbe Bëtsá adórayënga y uámanënga, y chë pueblentša uámana taitángaftaca, jamama Pablo y Bernabé chabosufrima y chë luarentšana jtëbuacnama. ⁵¹ As, Pablo y Bernabé tbojésanshecstëtonata, judiënga jinÿanÿiyama chënga ndoñe tšabá tmojanmama; y chentšana, Iconio puebloye tbojtsanoñe. ⁵² Pero Jesucristbeñe ošbuáchiyënga corente oyejuayënga imojtsemna, y chë Uámana Espíritu chëngbe ainaniñe corente yojtsemándaye.

14

Pablo y Bernabé Iconio puebloca

¹ Iconioca, Pablo y Bernabé cánÿiñe tbojánamashëngo chë judiëngbe enefjuana yebnentše y corente obenánaca Bëngbe Bëtsabe palabra tbojanoyebuambá. Chíyeca, ba judiënga y ndoñe judiënga Jesucristbeñe imojtsošbuaché. ² Pero chë judiënga Jesucristbeñe ndošbuáchiyënga, chë ndoñe judiëngbiyoye tmojanayëñaná, Pablo y Bernabebiamama podesca chamotsejuabnama. ³ Chíyeca, Pablo y Bernabé bayté chentše tbojanototoná y ndauatjca Bëngbe Utabná Jesucristbiamama tbojanoyebuambá. Bëngbe Utabná obenana chata tojanatšatá bëts soyënga jtsamama, y chë soyëngaca Bëngbe Utabná entšanga tojaninÿanÿé, ndayá chë ichmónata ibojtsoyebuambnacá ndegombre bëtsemnama, chë Bëngbe Bëtsá nyetscanga iuababuánÿeshanana. ⁴ Pero nyetsca chë pueblentša entšanga ndoñe cachcá imontsejuabnaye; ínÿenga chë judiëngaftaca imojtsemna, y ínÿengna chë Jesucristbe ichmonátaftaca. ⁵ As, chë judiënga y ndoñe judiënga chentša mandayëngaftaca tmojanenoyeuná chata jtsatsetšenama y ndëtsbéngaca jtsébáyama. ⁶ Pero Pablo y Bernabé chama tbojántatšëmbona orna, tbojtsanëchañe Litra y Derbe puebloye, Licaonia luaroca, y choca chábuañe luarëngoye; ⁷ y chë luarënguenáchnaca, chata Jesucristbe tšabe noticiënga entšanga tmojanabuayená.

Litra puebloca, ndëtsbéngaca Pablo tmojtsanatëchënganja jtsóbama

⁸ Litra puebloca inamna canÿe boyabása jama ndobená. Ndocna te yondobena jana, chca cosheto inónÿna causa. Chë boyabásana yojtsetbemana ⁹ ouenana ntšamo Pablo yojtsichamcá. Y Pablo chábioyey tbojanonÿinÿé ora, tojántatšëmbona chë šocá tša yojtsošbuáchema, shnaná jtsatsemnama; ¹⁰ as Pablo, juayebuáchenëse tbojaniyana: “¡Motsbaná y acbe shecuatsëngaca tšabá motsa ca!”

Chora chë boyabása, canÿe jontsëñjese tojantsá y yojóntša anana. ¹¹ As chë entšanga, ndayá Pablo tojanmca tmojaninÿe ora, tmojanontšé uayebuáchana chë Licaonia luar-entša biyañe, mëntšá: “¡Bëngbe diosënga bëngbiyoye tbojatsma mo entšatcá ca!”

¹² Bernabé imojtsábobuatma Zeus ca, mo chë chëngbe diosënga amëndayacá; y Páblëna Hermes ca, mo chë inÿe diosëngbiama oyebuambnayacá. Páblëbioyey chca imojtsábobuatma, er cha más yotsoyebuambná. ¹³ Zeusbiamama chentša bachna inabomna canÿe yebna chë pueblo chaboca, chábioyey jadórana. Chë bachna, uacnënga tojanënatse y uantšëfjushangá tojanëyamba chë Zeus jadórana yebnentša amashjuanoye; y cha y chë entšanga imojtseboše chë uacnënga jashebuáyana y jajuinÿiyana, chca, chë ichmonátbioyey jadórana.

¹⁴ Bernabé y Pablo chama tbojántatšëmbona ora, entšayá tbojtsanenántšajatanëca, entšanga jinÿanÿiyama, ntšamo chënga imojtsamcá chata tondaye yonjógusetama, y tbojëftsantotjajo entšangbe tsëntsajana y mëntšá ibojtsaychembumbuana: ¹⁵ “Baconga y batanga, ¿ndáyeca chca šmojtsama ca? Bëndata cach tšëngaftangcá entšata fsëndmëna. Muentše bëndata fsëntsemna nÿe jábuayenama Bëngbe Utabná Jesucristbe tšabe noticiënga, tšëngaftanga chë quem ndoservena soyënga, vida ndbomna soyënga adórayana

chašmotsajbanama, y Bëngbe Bëtsá Ainabe benache chašmatishachama. Ndegombre, cha tojanma celoca, fshantse, nyetsca béjayënga y lempe ntšamo chenache yobinýncá. ¹⁶ Masque tempo, Bëngbe Bëtsá entšanga tojanalesenciá cada ona chaoma ntšamo tojtsejuabnacá, tšabá cachëngbiama yojtsémnayeca, ¹⁷ Bëngbe Bëtsá ndocna te ntjájbanana tšëngaftanga jtsinýanýnáyana, cachá tojama tšabe soyëngaca, mocna Bëtsá cha yomnana. Cha endama tšëngaftangbiama chauaftema y chë matënga botamana chaoshájonama, y beca saná cmondatsatná; y cha endama tšëngaftangbe ainaniñe corente oyejuayana chašmotsebomnana ca” —chata tbojánayana.

¹⁸ Masque chë soyënga tbojánayana, nye batšatema más bën y ya ndoñe matbënjanoenata chë entšanga jtsëuyanana uacnënga jashebuáyama, chca, chátbioye jadórama.

¹⁹ Chca ora, básefta judiënga tmojánashjajna Pisidioca, Antioquíocana y Iconiocana, y chentša entšángbioye tmojanayëñaná, Jesucristbe ichmonatbe contra chamotsemnana. Chcasna, Pablo ndëtsbéngaca imojtséñanaye y chabe cuerpo chë pueblo chaboye tmojt-sansjojó, er chënga imojtsejuabnaye Pablo ya obaná yojtsemna ca. ²⁰ Pero Jesucristbeñe ošbuáchiyënga Pablo tmojanóbobuashcona orna, cha tojtantsbaná y cachiñe chë pueblöye tojtesaná; y chë yëfsana, Bernabéftaca Derbe pueblöye tojána.

²¹ Derbe pueblöca Jesucristbe tšabe noticiënga entšanga tmojanabuayená, y chca, entšanga Jesucristbeñe imojtsošbuáchiye. Chentšana chata tbojésanshëcona Listra, Iconio y Pisidioca Antioquiöye. ²² Chë luarënguenache chata ibojánana chë Jesucristbe ustonëngbioye atañémuaye, cada te chábeñe más chamotsošbuáchema. Y entšángbioye tmojanéyana: “Bëngbe Bëtsabe amëndayoye jamashënguamna, bënga šontsamna quem luarentše bëtsca jëftsepadecénana ca.” ²³ Nyetsca ošbuachiyëngcá enefjuanenache, bëtsëjemëngcá mándayënga tmojanabacacá, chentša Jesucristbeñe ošbuáchiyënguentsana, cachënga chentša ošbuachiyëngbioye jtsamëndayama. Bëngbe Bëtsá jëtschuayama tondaye ntjascá imojtsemna y cháftaca imojtsencuënta ora, cha tmojanimpadá, chë ošbuáchiyënga Bëngbe Utabnabe cucuatšinë chamotsemnana, ndábeñe chënga imojtsošbuaché.

Pablo y Bernabé, Sirioca Antioquía pueblöye tbojtánata

²⁴ Pisidia luarëjana tbojánachnëngo ora, Panfilia luaroye tbojánashjango. ²⁵ Perge pueblentše Jesucristbe tšabe noticiënga entšángbioye tmojanabuayená, y chentšana Atalia pueblöye tbojánata. ²⁶ Chentšana, Bernabé y Pablo, bejaycá tbojtánata Sirioca Antioquía pueblöye. Chentša entšanga Bëngbe Bëtsá tmojanimpadá chata chabe cucuatšinë chabotsemnana, chë trabajuiñe chaotsanýenama; y chorna, chë trabajo ya tbojanpochocá. ²⁷ Choye tbojtánashjango ora, nyetsca Jesucristbeñe ošbuachiyëngbioye tmojánachembo, y tmojanacuntá ntšamo Bëngbe Bëtsá tšabe soyënga chátaftaca tojanmama, y ntšamo Bëngbe Bëtsá tojaninýanýé, chë ndoñe judiëngnaca chamotsobenama Jesucristbeñe jtsošbuáchiyama. ²⁸ Y Pablo y Bernabé bayté chentše tbojanototoná Jesucristbeñe ošbuáchiyëngaftaca.

15

Ichmónënga y bëtsëjemëngcá mándayënga Jerusalenoca tmojánenefjna jencuëntama

¹ Chë tempo, báseftanga Judeocana áshjajnënga tmojanontsé, Antioquía pueblentše, chentša Jesucristbeñe ošbuáchiyënga mëntšá jabuátambana: “Base bobachtema chë más delicadentše ndoñe šmonjenotëtšëse, ntšamo Moisesbe leyiñe endayancá, ndoñe quenátöpodena tšëngaftanga atsebácanënga jtsemnana ca.” ² Chíyeca, Pablo y Bernabé jabuachana chca buatëmbayëngaftaca imojánenatsëtsnaye. Cabana, tmojanëbuáyana Pablo, Bernabé y ínýënga Jerusalenöye chamotsama, choca chë Jesucristbe

ichmónëngaftaca y chë chentše Jesucristbeñe ošbuachiyëngbeñe bëtsëjemëngcá mandayëngaftaca chama chamencuentama.

³ Chcasna, chë Antioquioca imojánenefjuana Jesucristbeñe ošbuáchiyënga Jerusalenoye chënga tmojanichamó. Fenicia y Samaria luarëjana imojtsachnëjuana ora, chënga tmojanacuntá ntšamo chë ndoñe judiënga chëngbe tempsca soyënguiñe ošbuáchiyana tmojtsanajbanama y chora Bëngbe Bëtsábeñe imojtsošbuáchema. Jesucristbeñe chentša ošbuáchiyënga chca tmojanuena ora, puerte oyejuayënga imojtsemna.

⁴ Pablo y chë ínÿenga Jerusalenoye tmojánashjajna ora, chentša Jesucristbeñe ošbuáchiyënga, Jesucristbe ichmónënga y bëtsëjemëngcá mándayënga chëngbioye tmojanëbuaja. Chentšana, Pablo y Bernabé tbojanacuntá lempe ntšamo Bëngbe Bëtsá chátaftaca yojamcá. ⁵ Pero básefta fariseunga, chora ya Jesucristbeñe ošbuáchiyënga, tmojantsá y mëntsá tmojánayana: “Chë ndoñe judiënga entsamna chë más delicadentše base bobachtema tëtšenënga jtsemnana, bënga judiëngcá; y tšëngaftanga cmontsamna chënga jáuyanana, ntšamo Moisesbe leyënguiñe iuayancá chamotsamama ca.”

⁶ As, chë Jesucristbe ichmónënga y bëtsëjemëngcá mándayënga tmojánenefjna jencuëntama, chë ndoñe judiënga aíñe o ndoñe yonjánamnama chë más delicadentše base bobachtema tëtšenënga jtsemnana, ntšamo chë judiënga imojanamancá. ⁷ Bën y bëtscá chënga tmojanencuentá chentšana, Pedro tojantsbaná y mëntsá tojanëyana: “Jesucristbeyeca catšátanga, tšëngaftanga šmondëtatšëmbo, ya bayté entsemna Bëngbe Bëtsá tšëngaftangbentšana atše šonjanábuayana, Jesucristbe tšabe noticiënga chë ndoñe judiënga jábuayenama, chca, chënga Bëngbe Utabnábeñe chamotsošbuáchema. ⁸ Bëngbe Bëtsá jtsetatšëmbuana lempe ntšamo entsanga tmojtsejuabnacá. Y cha šonjaninÿanyé, chë ndoñe judiëngnaca imnobena chabe entsanga jtsemnana, chábeñe tmojtsošbuáchese, chë Uámana Espíritu chëngbe ainaniñe cháúamashënguama cha tojanma ora, ntšamo cha bëngbe ainaniñe tojanmcá. ⁹ Y chca, Bëngbe Bëtsabiama nÿetscanga cachcá monduámana, judiënga y ndoñe judiëngnaca; y cha tojama chë ndoñe judiëngnaca chëngbe bacna soyëngama perdonánënga chamotsemnana y ainaniñe tšabe juabna chamotse-bomnana, Bëngbe Bëtsabe palabriñe jtsošbuáchiyëse. ¹⁰ Y mora, ¿ndáyeca tšëngaftanga ndoñe šmontseboše ntšamo Bëngbe Bëtsá tojamcá? Pero tšëngaftanga šmontseboše, chë ndoñe judiënga Jesucristbeñe ošbuáchiyënga lempe chë leyentša mandënga chamot-socumplínama, mo nda ínÿabioye uauta uasmanësha cuaftsasmëmnacá; pero lempe chë mandënga, ni bëngbe bëts taitanga ni bënga ntsobenana jocúmpliana. ¹¹ Y chca ndoñe chaondëtsemna. Bënga mondošbuaché bënga atsebácanënga imomnana Bëngbe Utabná Jesús chabe tšabe juabna šojaninÿanyéyeca, y Bëngbe Bëtsá cachcá chë ndoñe judiëngnaca tojatsebacá ca” —cha tojanëyana.

¹² Chorna, chentše imojtsemna entsanga nÿetscanga iytëca tmojanobiama, y tmojanuena Bernabé y Pablo jtsóyebuambnayana, chë bëts soyëngama, Bëngbe Bëtsabe obenana entsanga jinÿanyiyama, y inÿe soyëngama chabe obenánaca, ntšamo chë ndoñe judiëngbeñe Bëngbe Bëtsá chátaftaca tojanmcá.

¹³ Chë útata jóyebuambayama tbojanpochocá ora, Santiago mëntsá tojánayana: “Jesucristbeyeca catšátanga, šmochjouena: ¹⁴ Simón šonjabuayená ntšamo Bëngbe Bëtsá natšana tojaninÿanyé, chë ndoñe judiëngnaca cha iuanÿenama, y chíyeca cha chënguentsana banga tojubuáyana chabe entsanga chamotsemnana. ¹⁵ Ntšamo Simón šonjabuayenacá entsemna cachcá ntšamo chë Bëngbe Bëtsabe juabna oyebuambnayënga tmojanayancá, ntšamo yochjanopásama y ntšamo Bëngbe Bëtsabe uabemana palabrenguiñe endayancá, mëntsá:

¹⁶ Chentšana atše chanjésabo

y chë Rey Davidbe pamíllanga cachiñe uámanënga chantabiama;

mo nda canÿe uáshajayena yebna tojëtšjebcá, atše, Davidbe pamíllanga cachiñe uámanënga chantabiama;

17 chca, chë inÿe entšanga chamonguango ndayá jamana atše, tšëngaftangbe Utabná, más chašmotsábuatmama, nÿetsca ndoñe judiënga, chë atšbe entšanga chamotsemnama atše tijábacacanga.

18 Chca atše, tšëngaftangbe Utabná sěntsichamo, nda ya bayté entsemna tonjanma entšanga chë soyënga chamotsetatšëmbuama ca — chiñe endayana.”

19 Chentšana Santiago mēntšá tojanéyana: “Chíyeca atše sěntsejuabná, bēnga ndoñe šontsamna chë ndoñe judiëngbiamana jamana más totcá chaotsemnama Jesucristo jtsěstonama. 20 Chamna, šontsamna chēnga juabuábiamana y jáuyanana ndoñe chamondětsesá, sananga chë ndaye soyënga entšanga tmojuabná diosēnga yomna ca jadórana tmojuiyēbana; bacna soyënga shembásenga o boyabásengaftaca ndoñe chamondětsama y ndoñe chamondětsesá tšesana bayēngbe mēntšena, y buiñe cach ndoñe ca. 21 Er chë natsana tempēnga orscana, nÿetsca pueblēnguenache mondmēna chë Moisés tojěftsanayana soyënga entšangbioye abuayiyayēnga; y chabe leyēnga, nÿetsca ochnayté mondbetsalíaye chë bēnga judiëngbe enefjuana yebnēnguenache ca” —cha tojanéyana

Chë Jerusalenoca ichmónēnga y bētsějēmēngcá mándayēnga canÿe tsbuanácha tmojanichmó chë ndoñe judiëngbiamana

22 Chentšana, chë Jesucristbe ichmónēnga y bētsějēmēngcá mándayēnga, nÿetsca chë Jesucristbeñe ošbuáchiyēngaftaca tmojanenoyeuná chēnguentšana báseftanga jabacacayama, Pablo y Bernabéftaca Antioquía puebloye jíchamuama. Chcasna, tmojanēbuáyana Judas, chë Barsabás ca uabobuatmá, y Silas; chata ibnamna uámanata chë Jesucristbeñe ošbuáchiyēnguentše. 23 Y chēngaftaca canÿe tsbuanácha tmojanichmó, y chiñe mēntšá yojétsayana:

Bēnga chë Jesucristbe ichmónēnga y chë bētsějēmēngcá mándayēnga, cach tšëngaftangcá Jesucristbeñe ošbuáchiyēnga, fsěntseboše Bēngbe Bětsá salúdoca chacmotsábouamna, tšëngaftanga chë ndoñe judiënga, Jesucristbeñe ošbuáchiyēnga, Antioquía puebloca y Siria y Cilicia luarēngoca oyenēnga.

24 Bēnga fsěntsetatšēmo bēngbentšana báseftanga choye tmojángama, bēnga ntjamēndacá, y fsěntsetatšēmo mocna soyënga cmojtsabuátambama y chë causa, tšëngaftanga ndoñe šmontsetatšēmo ntšamo jtsejuabnayana ndayá jamama yomnana, Jesucristbe canÿe ndegombre ustoná jtsemnama. 25 Chcasna, bēnga fsēnjenoeyuná y šonjúnŷnana tšabá yojtsemna báseftanga bēnguentšana jabacacayana tšëngaftangbioye jontješiyama chamotsama, y Pablo y Bernabé, chë Jesucristbeyeca bēngbe bonshana catšátataftaca, choye chamotsama. 26 Chë úatna ba soye tbojotsbocá vida jáshbiamana, Bēngbe Utabná Jesucristbiamana oservéniñe. 27 Chátaftaca Judas y Silas fsēnjichamó; y chatna cach tšëngaftangaftaca bochanjóyebuambaye ntšamo quem tsbuanáchañe yojtsábemanama. 28 Chë Uámana Espíritu y bēnga cachcá fsěntsejuabná, bēnga ndoñe šontsamna tšëngaftanga jamēndana bētscá jabuache mandēnga Moisesbe leyēnguiñe chašmotsocumplínama. Nÿe quem uámana soyënga chiñe aiñe cmontsamna jtsobedecánana: 29 Ndoñe šmattsesaye mēntšena, chë ndaye soyënga entšanga tmojuabná diosēnga yomna ca jadórana tmojóba bayēngbiana; ndoñe šmatjofsiye buiñe, ni šmatjase tšesana bayēngbe mēntšena; y shembásenga y boyabásengaftaca bacna soyënga ndoñe šmattsama. Chë soyënga ntšamcá, tšabá šmochanjama.

Bēngbe Bětsá salúdoca chacmotsábouamna ca —chiñe yojétsayana.

30 Chcasna, chë quem Jerusalenocana ichmónēnga tmojésanodiošoftanentšana, Antioquía puebloye tmojána; y chocna, nÿetsca chë Jesucristbeñe ošbuachiyēngbioye tmojanēbuaja y chë tsbuanácha tmojanayentšbuaché 31 Chë Antioquía pueblentša Jesucristbeñe ošbuáchiyēnga ntšamo chë tsbuanáchañe yojtsábemancá tmojanalía ora, bēts añemo tmojtanca y corente imojtsóyejuaye. 32 Judas y Silas Bēngbe Bětsabe juabna

oyebuambnayata ibnamna; as, chátnaca chë chentša Jesucristbeñe ošbuachiyëngbioye ba soyënga tmojanëyana, chënga añemo chamotsatsbomnama y Jesucristbeñe corente chamotsošbuáchema. ³³ Chentšana baseftaytese, chentša Jesucristbeñe ošbuáchiyënga chëngbioye tmojanadiošoftá, chë ndëmuanyënga tmojanichamóngbioye jtama. ³⁴ Pero Sílasna tšabá ibojtsinýana cachentše más jëftsajëtanama. ³⁵ Pablo y Bernabé baseftayshinýe Antioquía pueblentše tbojanototoná y ba ínýengaftaca Bëngbe Utabná Jesucristbe tšabe noticiënga entsanga tmojanabuatambá y tmojanabuayená.

Pablo cachiñe inýe luarëngoye tojána, Bëngbe Bëtsabe trabajo jamama

³⁶ Chentšana baseftaytese, Pablo Bernabébioye tbojaniyana: “Bëngbe Utabnabe palabra tbonjanabuayená luarëngoye bochjésa, choca Jesucristbeñe ošbuáchiyënga jábuachama y jányama ntšamo imojtsemnama ca.”

³⁷ Bernabé yojtseboše, Juan chë Marcos ca uabobuatmábioye chátaftaca jëftsbetšama. ³⁸ Pero Páblëna ndoñe tšabá ibontsinýana cha jëftsbetšana, er Juan chátbentšana tojtsanojuánañe Panfilia luarocana, y ndoñe tonjanatjëmbambá, Bëngbe Bëtsabe trabajo japochócantscuana. ³⁹ Y chë palabrama tondaye tbonjanenóyeunata causna, Pablo y Bernabé cachcá tbojesanenonýaye. Y chca, Bernabé, Marcos tbojëftsanbetše, y beyaycá Chipre luaroye tbojánata; ⁴⁰ y Páblëna, Silas tbojanábuayana jëftsbetšama. Chë Antioquía pueblentša Jesucristbeñe ošbuáchiyënga Bëngbe Bëtsá tmojanimpadá Pablo y Silas Bëngbe Utabnabe cucuatšihne chabotsemnama, chatbe trabajuiñe chaotsanýenama. Chentšana, Pablo Sílasftaca tbojánbocna y ⁴¹ Siria, Cilicia luarënguëjana tojánachnëngo entsanga añemo atšatnaye, chë luarenache enefjuana ošbuáchiyënga Jesucristbeñe más chamotsošbuáchema.

16

Pablo Timotéobioye tbojáninýena

¹ Chentšana Pablo tojánashjango Derbe y Listra luaroye, y chentše tbojáninýena canýe Jesucristbeñe ošbuachiyá, Timoteo ca uabainá; cha inamna canýe judiá Jesucristbeñe ošbuachiyabe uaquiñá y chabe taitana griego entsá inamna. ² Chë Listra y Iconioca Jesucristbeñe ošbuáchiyënga Timoteobiana tšabá imojanoyebuambná. ³ Pablo tojánbošena Timoteo jëftsbetšama; pero cabá ndetsbetše orna, Pablo base bobachtema chë más delicadentše tbojantëtše, ntšamo judiënga imojanamancá. Cha chca tojanma, jobenayama chë judiënga imojoyena luarëngoye cháftaca jama, er nyetsca judiënga imnatátšëmbo Timoteobe taitá griego inamnana. ⁴ Chë ibojtsachnéjuana pueblënguenache chata ibojtsana Jesucristbeñe ošbuachiyëngbioye abuyaynaye, ntšamo Jerusalemca Jesusbe ichmónënga y bëtsëjemëngcá mándayënga tmojanamëndacá, ndayá chë Jesucristbeñe ošbuáchiyënga ndoñe judiënga jamama yojtsamncá. ⁵ Nyets luarenache enefjuana ošbuáchiyënga, Jesucristbeñe más imojtsošbuáchiye, y cada te Jesucristbeñe ošbuáchiyënga más imojtsóbotena.

Pablo mo otjenayoquécá canýe Macedonioca entsábioye tbojáninýe

⁶ Chë Uámana Espíritu, Pablo y Sílasbioye tojaninýanyé, chata ndoñe yontsanamna Asia luaroca Bëngbe Bëtsabe palabra entsanga jábuayenana; asna, tbojánachnëngo Frigia y Galacia luarëjana. ⁷ Y Misia luaroca enajëbanoye tbojánashjango ora, tmojanjuabó tsjuana jana, Bitinia luaroye; pero chë Uámana Espíritu tojanabuayená choye ndoñe chabondëtsama. ⁸ Misia luarëjana tmojánachnëngo ora, Troas luaroye chënga tmojána. ⁹ Chë te ibeta, Pablo mo otjenayoquécá tojáninýe canýe Macedonioca boyabása ibojtsebiatsana y mëntšá ibojtseimpadana: “Diosmanda Macedoniocoye mabo y šmabëjabuache ca.” ¹⁰ Pablo chca tojáninýe y cachora lempe tmonjanprontá Macedoniocoye jama. Atšnaca, chë quem soyënga uabiamnayá, chënga sënjétsatjëmbambnaye.

Bënga fsënjétsejuabnaye ndegombre Bëngbe Bëtsá šojtsanachembuana choye jama ca, Jesucristbe tšabe noticiënga choca entšanga jábuayenama.

Pablo y Silas Filipos puebloca

¹¹ As, Troasentšana bejaycá fsënjána Samotracia luaroye, y yëfsana Neápolis puebloye, ¹² y chentšana Filíposoye. Filipos enjamna canye uámana bëts pueblo Macedonioca y bëtscá romanënga oyeñiñe. Chë luarentse baseftayté fsënjanoquedanga. ¹³ Canye ochnaytena, chë pueblentšana fsënjéftsanbocna y chë fshájaye tsachoye fsënjána. Fsënjanuena chentše canjamna canye luare Bëngbe Bëtsáftaca jencuéntama ca, y fsënjána janguanguama. Fsënjáninýena ora, chentše fsënjanothbiana y Bëngbe Bëtsabe palabra fsënjanoyeuambá chentše tmojanójoto shembásengbiana. ¹⁴ Enjamna canye shembása, Lidia ca uabainá, Tiatira pueblócá, y cha enjamna uámana uabuángana uafjatsenga entsáyá uená. Cha inamna Bëngbe Bëtsábioye adorayá y chentše Páblëbioye ibotseyeu-nana. Bëngbe Bëtsá tojanma cha chabosertá lempe ntšamo Pablo yojtsoyebuambnacá, Jesucristbeñe chaotsošbuáchema. ¹⁵ Cha y chabe yebnentše oyeñënga tmonjánenabaye ora, Lidia mëntšá šonjanaimpadá: “Tšëngaftanga šmonjayana atše Jesucristbeñe ndegom-bre stsošbuaché ca; chcasna, mabënga yebnoye, átšbentše chašmoquedama ca.”

Y šonjanëtaríe bënga chentše joquédama.

¹⁶ Canye te, chë Bëngbe Bëtsáftaca encuéntaye luaroye fsënjétsajna orna, šonjanëbiatše canye tobiáše, oservená, bacna bayëjbe juabna uambayá; chë causa cha malisi-ayá inamna. Chabe nduiñënga becá crocénana imojanójacañe, chë tobiáše yojan-malísiaye soyëngama. ¹⁷ Chë tobiáše tonjanontsé Pablo y bënga usetonana y mëntšá enjétsaychembumbuana: “¡Quem boyabásenga montsemna chë celoca Bëngbe Bëtsabe os-ervénënga y tšëngaftanga cmontsabuyaiyná ntšamo Bëngbe Bëtsá yobena tšëngaftanga játsebacama ca!”

¹⁸ Y bayté chca enjanchembumbuana; chë causa, Pablo bonjétssetana y cabana, ton-janobuértana y chë bacna bayëjbioye mëntšá tbonjanianana: “¡Jesucristbe obenánaca y cha jótšëmbonëse, cbontsemánda chë tobiásbentšana chacuaisebocnama ca!”

Y cachora chë bacna bayëja chë tobiásbentšana tojésanbocna.

¹⁹ Pero, chë bayëjbe juabna chárentšana tojésanbocnama y chëngbiana más crocénana jabemama chora chë tobiáše ndoñe yontsobenama, chë tobiáše nduiñënga tmojáninýe ora, Pablo y Silasbioye tmojánishëche y tmojtsanasjojoye plazoye, mandayëngbioye.

²⁰ Chë mandayëngbioye tmojanënatse ora, chënga mëntšá imojtsichamo: “Quem boyabásata judío entšata bondmëna, y muatbe causa bëngbe pueblentša entšanga montsenbouenana, ²¹ y bontsabuatambá soyënga jamama ntšamo chë judiënga imua-mancá y bëngbe leyënguiñe chë soyënga jamama ndoñe quenátslesenciana. Bënga ndoñe quešnátamna ni jouenana, ni jamana chë soyënga, romanënga bëtsemnayeca ca” —chënga imojtsichamo.

²² Chora chë entšanga tmojanontsé uaye buáchana; as, chë mándayënga tmojanamëndá chata entsáyá jtsëtsejquëcana y niñëfjëngaca jtsachebuáanganjana. ²³ Jabuache tmo-janachebuáanganjentšana, cárceloye tmojanautame y chë utámenënga shanýá tmojan-mandá yejuana chaotsabuajëñýama. ²⁴ Chca tmojanmandá ora, chë utamianá chata tojanënatse chë más tsoye utámenoye y shecuatšentšana tsbuanëšiñe tojanatsebuá.

²⁵ Pero tsëntseto orna, Pablo y Silas ibnétsocantañe Bëngbe Bëtsá jëtschuayama, y cháftaca ibnéncuentaye; y chë inye utámenëngna chca imojtsuenana. ²⁶ Ndeolpe, corente jabuache yojtsëbánjua y chë utámena yebna fshantsocana yojtsábonjnaye. Cachora, nyëtsca chë utámenentša bëšašangá tojantëfjo y nyëtsca utámenënga chë cadenëjuangá yojtsayentsjafjona. ²⁷ Pero chë utámenënga shanýá tojanofšená y chë utámenentša bëšašangá yojtsatëfjnama tojáninýe ora, cha tojanjuabó nyëtsca utámenënga tmojtsana-cheta ca; chë causa, chabe espadëja yojenosëngbotëntšena jtsenóitanama. ²⁸ Pero

Pablo tbojánbochembo: —¡Acbe cuerpo ndocá matenábomana; nyetscanga camuentše fsëndëtsomñe ca!

²⁹ Asna, chë utámenentša shanyá canye uajuinyänëshá tojanëyá y chë utámenoye ochamanana tojánamashëngo y auatja causa ngmëmnyáy Pablo y Sílasbe shecuatšentše yojoshëntsamentšiyé. ³⁰ Chentšana tojtänëbuacna y tojanëyana: —Señórata, ¿ndayá šojtsemna jamama atše atsbocaná jtsemnama ca?

³¹ Y chata tbojanjuá: —Bëngbe Utabná Jesúsbeñe cochtsošbuáchiye, y chca, Bëngbe Bëtsá aca cmochanjatsbocá y acbe yebnentše oyenëngnaca ca.

³² Y cha y nyetscanga chë yebnentše imojtsemnënga, Bëngbe Utabnabe palabra tmojanabuayená. ³³ Cach ora chë ibeta, chë utamianá chata tojanënatse chë lisianënguiñe jetsajabiama. Chentšana, cha y chabe pamíllanga tmojánenabayé. ³⁴ Chentšana, chë utamianá chata tojanënatse chabe yebnoye y saná tojanacaredadó. Cha y nyetscanga chë yebnentše oyenënga oyejuayënga imojtsemna, Bëngbe Bëtsábeñe imojtsošbuáchema.

³⁵ Yëfsana cachëse, chë mandayëngna soldadënga tmojanichamó, chë utamianá jamándama Pablo y Silas chauatabáshejuanama. ³⁶ Chë utamianá Páblëbioye tbojanianyana: —Chë mándayënga šmonjamandá tsëndata jtabáshejuanama. Chcasna, šontsobena natjëmbana jtsatoñana ca.

³⁷ Pero Pablo chë soldadënga tojanëyana: —Bëndátnaca fsëndmëna mo Romoca onýnanatcá derecho bomnata y šonjáchebuanganja entšangbe delante, bacna soyënga aíñe o ndoñe tatifjamama cabá ndinýanýiye ora, y cárceloye šmonjautame. ¿Y mora imojtseboše iytëcana jtabáshejuanama? Chca ndocna te chaondëtsemna; cach mándayënga chamuabo jabátëbuacnama ca —cha tojánayana.

³⁸ Chentšana, chë soldadëngna chë mandayëngbeñe tmojanobuambá ntšamo Pablo y Silas tbojanayancá; chca chënga tmojántatšëmbona chatna mo Romoca onýnanatcá derecho bomnata ibnamnama; chë causa, chë mándayënga puerte imojtsauatja. ³⁹ Chcasna, cach mándayënga tmojána chata perdón jatëtejañama; chentšana tmojtänëbuacna y tmojanëyana: “Diosmanda, muentšana inye luaroye motsoñata ca.” ⁴⁰ As chata chë utámenentšana tbojëftsanbocna y Lídiëbe yebnoye tbojëftsanata. Chentšna, Jesucristbeñe ošbuáchiyëngaftaca tmojánenefjna y chata tbojánayana soyëngaca chëngbioye tmojanañemó. Y chentšana, chata inýoye tbojtsanoñe.

17

Tesalónica puebloca, Pablo y Sílasbioye ndoñe tšabá tmojanëbuaja

¹ Pablo y Silas inye luaroye ibojtsaye ora, Anfípolis y Apolonia bëts pueblënguëjana tbojánachnëngo y canye bëts pueblo, Tesalónica ca uabáinoye tbojánashjango. Chentše, chë judiënga canye yebna imnabomna chënga jénefnama. ² Páblëna, ntšamo enjanamancá, cada ochnayté chë jénefnama yebnoye yojánaye, unga semanëntscuana, y chentše chë judiëngaftaca yojanoyebuambná y imojánëtsëtsnaye. Bëngbe Bëtsabe uabemana palabrënguiñe iuayana soyëngaca, ³ chënga yojanabuayiyiná y ndegombre yojaninyänýná, Bëngbe Bëtsabe Uámana Uabuayaná jóbanama y chentšana jtayenama ibojamnama. Y mëntšá yojanëtsëtsná: “Chë Cristo, Jesús endmëna, ndabiama atše cbontsabuyayiyiná ca.”

⁴ Judiënguentsana báseftanga chiñe imojtsošbuáchiye y Pablo y Silas tmojanëseto más jouenama. Ba grieguënga, Bëngbe Bëtsá adórayënga, Jesucristbeñe imojtsošbuáchiye y ba uámana shembásengnaca. ⁵ Pero chë judiënga ndošbuáchiyënga chca tmojáninýe ora, puerte envidia imojtsebonna. Asna, chënga tmojánachembo banga, tondaye amënga y bacna entšanga, y chënga tmojanenutaná jamama nyetsca chë pueblentša entšanga chamotsenbouéñanama; y canye entšá, Jasón ca uabainabe yebna chënga tmojtsanabuache, Pablo y Silas jtsanguanguama, chentšana jesëbuacnama y entšangbe cucuatšinë jabáshejuanama. ⁶ Pero chentše ndocná tmojáninýena; as chë entšanga Jasón imojtsesjojoye y chentša mándayënga imojëtsemnoye tmojanánatse y Jesucristbeñe inye

ošbuachiyëngnaca choye tmojanënatse, y mëntšá imojtsáyebuache: “¡Chë boyabásata, chë ndëmuanÿata ibojtsama nÿetsca luarentša entsanga chamuenbouéanama, quem luaróynaca tbojabo, ⁷ y Jasón chabe yebnentše chata tojúbuaja ca! ¡Chënga montsama ntšamo chë Romoca bêts mandadbe mandënguiñe ndoñe quenatslesenciancá, er chënga montsichamo inÿe rey canmëna, Jesús ca, y cha, César chë Romoca mandadbe cuenta nÿetscángbeñe yojtsemánda ca!” —chënga imojtsáyebuache.

⁸ Chë entsanga y chë pueblentša mándayënga chca tmojanuena ora, corente imojenbouénana. ⁹ Pero Jasón y chë ínÿenga, cháftaca imojtsemnënga, crocénana tmojtanjajó, y as tmojtanabáshejuana.

Pablo y Silas Berea Puebloca

¹⁰ Ya ibeta yojtsemna orna, chë Jesucristbeñe ošbuáchiyënga tmojanma cachora Pablo y Silas Berea bêts puebloye chabuétsebocnama. Y chata choye tbojánashjango ora, chë judiëngbe enefjuana luaroye tbojánata. ¹¹ Chentša judiënga imojamna más tšabe ainana bomnënga chë Tesalonicoca judiëngbiama; chcasna, oyejuayënga chë buayenana soye Jesucristbiama tmojanóyëngacñe, y cada te Bëngbe Bëtsabe uabemana palabra imojanalía, jtsetatšëmbuama, ntšamo Pablo y Silas ibojtsëtsëtsnacá aíñe o ndoñe ndegombre yojtsemnama. ¹² Y chca, ba chentša judiënga chatbe palábraca Jesucristbeñe imojtsošbuáchiye, y Grecia luaroca ba uámana shembásenga y boyabásengnaca. ¹³ Pero, Pablo Bereoca chë Bëngbe Bëtsabe buayenana soyama entsanga yojtsabuayiynama chë Tesalonicoca judiënga tmojántatšëmbona ora, chënga choye tmojána y tmojanma chentša entsanga chamuenbouéanama. ¹⁴ Chcasna, banga Jesucristbeñe ošbuáchiyënga tmojanma cachora Pablo chentšana chauétsebocnama y béjaye tsachoye chaotsoñama; chëntscuana, Silas y Timoteo Bereoca tbojanoquedá. ¹⁵ Pablo tmojantjëmbambá entsangna, Atenas ca uabaina bêts pueblóntscoñe cháftaca tmojána. Chentšana, Pablo chënga tojanabuayená chamuaishéconama Silas y Timoteo jaúnayama betesco jtsayana, Pábloftaca jateninÿenama.

Pablo Atenas puebloca

¹⁶ Pablo Atenas bêts puebloca Silas y Timoteo yojtsëbatmanëntscuana, puerte tbojanongmé, er cha tojáninÿe chentša entsanga imojtsadorana bêtsca cachëngbe pormana soyënga, ndayama chënga imojanjuabná diosënga yojamna ca. ¹⁷ Chíyeca, chë judiëngbe enefjuana yebnentše, judiënga y ndoñe judiënga Bëngbe Bëtsá adorayëngaftaca imojánenatsëtsnaye, y cada te chentša plazoca chë ndëmuanÿenga chentše imojanashjajuanëngaftácnaca. ¹⁸ Y báseftanga, ntšamo jtsejuabnayama entsanga abuátambayënga, epicureunga y estoiquënga ca uabainëngnaca Pábloftaca imojánenatsëtsnaye. Inÿenga imojtsichamo: “¿Ndayama quem bostero yojtsoyebuambná ca?” Y ínÿengna: “Chana inÿe luarëngoca entsangbe diosëngbiama muentše entsabóyebuambnaye ca.”

Chënga chca imojtsichamo, er Páblëna Jesusbiama y chë obanënga jtayenama yojanoyebuambná. ¹⁹ Asna, chentša entsanga cha tmojanánatse canÿe luaroye, entsanga jénefnama y oyeambuambnayënga joyaunayama luare, Areópago ca uabáinoye. Chentše imojanamana uámanënga jénefnana, nderado ndabiama jayanama tšabá o ndoñe tšabá tonjamama. Chora Pablo tmojantjá: —¿Chë aca contsabuatambá soyënga ndayá bétsayanana bënga quefstsobena jtsetatšëmbuama ca? ²⁰ Aca tsëm soyënga šcontsëtsëtsná y bënga fsëntseboše jtsetatšëmbuana ndayá chë soyënga bétsayanana.

²¹ Er nÿetscanga Atenasentša oyenënga y inÿe luarëngocana áshjajnëngna, corente yojanogúsetana chë tojtsopasana tsëm soyëngama jtsuenanana y jtsencuëntayana.

²² As Pablo tojantsá chëngbe tsëntsaca chë Areópago ca uabáinentše y tojánayana: —Atenasentša entsanga: ntšamo bominÿe sënjjajjá, atše sëntsetatšëmbo tšëngaftanga ba diosënga puerte šmayaunana y šmadoránama. ²³ Atše sëndánrreparana tšëngaftangbe diosënga šmétsadorana luarënguenache y sënjjínÿena canÿe altar y chentše mëntšá

iuábemana: “Chë Bëtsá nduabuatmabiama ca”. Y morna, chë Bëtsá chë nda ntsabuatmcá šmadoránabiama, atše chontsabuaiyná.

²⁴ “Chë Bëtsá quem luare y lempe ntšamo chentše yomncá tojanma; cha endmëna quem luarentše y celoca Utabná, y cha ndoñe quenatiyena cha jadórama entšangbe jebna yebnënguiñe, ²⁵ ni quebnatájaboto ndocná chabiama tondaye chaondëtsama, er cha endmëna nda inétsama bënga vida chamotsebomnama y jtseshachnayama chamot-sobenama, y cha nyetsca soyënga šnetsatšatnaye.

²⁶ “Cha nÿe canÿe boyabásabentšana nÿets luarënguentsä entšanga tojánabiama, nÿets quem luarentše chamotsiyenama; y cha quem soyënga cabá ndëma ora, tojanjuabó mocna ora y ndayentše entšanga chamuetsiyenama; ²⁷ chca, Bëngbe Bëtsá chamonguan-guama, masque chabiama ndoñe corente tmontsetátšëmbo, y chamuinÿena y chábeñe chamotsošbuáchema; pero ndegombre, Bëngbe Bëtsá bëngbentše cada cánÿabentšana ndoñe bënoca quenátsmëna. ²⁸ Ntšamo canÿa tojanayancá: ‘Bënga Bëngbe Bëtsáftaca cánÿiñe mo canÿacá mondmëna; chábeyeca bënga vida mondbomna, jobónjuama mon-dobena y ainënga mondmëna ca’. Ntšamo tšëngaftanguentsä báseftanga bëts soyëngama uabiamnayëngnaca tmojanayancá: ‘Bënga nÿetscanga Bëngbe Bëtsabe básenga mondmëna ca’. ²⁹ Y chcasna, Bëngbe Bëtsabe pamíllanga bënga tmomnëse, ndoñe quešnátamna jtse-juabnayana Bëngbe Bëtsá yomna mo cach entšangbe castellano, midio o chë ndëtsbeca pormana soyëngcá ca, er chë soyëngna nÿe ntšamo entšanga tmojajuabocá y tmojt-sobencá japórmana. ³⁰ Pero Bëngbe Bëtsá tojanjuabó ndoñe ntjatonÿayana chë entšangbe tempsca ndosertánana, y morna, nÿetsca luarënguentsä entšanga entsamënda, ndaye bacna soyënga tmojtsamama ngmëncaca chamuenojuabó, chca amama chamotsajbaná y Bëngbe Bëtsabe benache chamuatishache ca. ³¹ Bëngbe Bëtsá canÿe te tojuinÿnaná, y chë tena, ndocnábioye ínÿabiama más tšabá ntjatonÿayacá, cha echanjayana entšanga tšabá o ndoñe tšabá tmonjamama; lempe chca cha echanjama canÿa cachá tbojabocacá entšáftaca, Jesús; y chca yochtsemnamna, Bëngbe Bëtsá entšanga tojinÿanÿé, chë boca-caná Jesús cháuatayenama cachá tojánmayeca ca” —Pablo tojánayana.

³² Chë obanënga mochtayenama ichámuana chë entšanga tmojanuena ora, báseftanga Pablo imojtsáboyejuana, y ínÿengna mëntsá imojtsichamo: —Bënga fsëntseboše chë contsichamo soyënga más chcoye cachiñe jatuenama ca.

³³ As Pablo chëngbentšana tojésanbocna. ³⁴ Pero báseftanga aíñe Jesucristbeñe imojt-sošbuáchiye y Pablo tmojanasto más jatuenama; chënguentsë imojamna Dionisio, canÿa chë Areopagoca tbiamanënguentsá; canÿe shembásanaca, Dámaris ca uabaina, y ínÿenga.

18

Pablo Corinto puebloca

¹ Chë soyënga tojanochnëngüentsana, Pablo Aténasentšana Corinto bëts puebloye tojána. ² Chocna, canÿe judío Ponto luaroca onÿnanáftaca tbojáneninÿena, Aquila ca uabainá. Cha y chabe shema Priscila, cabá chora cuenta Italia luarocana tbojánabo, nÿetsca judiënga Romocana chamuáisebocanama choca bëts mandado Claudio tojan-mandá causa. Pablo tojána chata jautsëtsayama, ³ y ntšamo chata jamama Páblëncaca jamama inatátšëmboyecna, chátaftaca yojtsoquedañe y cánÿiñe chënga innatrabájaye; chënga innatátšëmbo mo tambotemëngcá entšëjuaca japórmana. ⁴ Y nÿetsca ochnayté, Pablo yojanamana chentša judío entšangbe enefjuana yebnoye jana, Bëngbe Bëtsabe soyëngama jóyebuambayama, y puerte yojtsentšena judiënga y ndoñe judiënga chamot-sošbuáchema, ntšamo cha yojtsanëtsëtsnacá ndegombre bëtsemnama.

⁵ Silas y Timoteo Macedoniocana choye tbojánashjango ora, Pablo nÿets tempo Bëngbe Bëtsabe soyëngama entšanga yojtsabuayiynaye y puerte tšabá chë judiënga yojan-inÿanÿná, Jesús ndegombre Bëngbe Bëtsabe Uámama Uabuayaná bëtsemnama. ⁶ Pero chë judiënga Páblëbe contra imojtsemna y tmojanontšë podesca chabiama ichámuana. Asna,

Pablo chabe uichëtjonyangá yojtsenántšasjajaye, chënga jinÿanÿiyama chënga ndoñe tšabá tmonjánchjanguama, y tojanéyana: “Tšëngaftanga ndatsebácanënga chašmojóbanëse, cach tšëngaftanga šmochtsótatsëmbñe; atšna ndoñe. Mëntescana chë ndoñe judiënga jábuayenama chantsoñe ca.”

⁷ Chorna, chë judiëngbe enefjuana yebnentsana tojëftsanbocna y canÿe boyabása, Ticio Justo ca uabainábioye tojtsanoñe. Cha Bëngbe Bëtsábioye ibojánadorana y chë enefjuana yebnentsa juachaca inoyena. ⁸ Y Crispo, canÿe chë enefjuana yebnentsa mandayá, Bëngbe Utabná Jesucristbeñe yojtsošbuáchiye y nÿetsca chabe pamíllangnaca; y banga chë Corintentsëgnaca Jesucristbeñe imojtsošbuáchiye, Pablo yojtsoyebuambná ora; y chënga tmojánenabaye. ⁹ Canÿe ibeta, Bëngbe Bëtsá Páblëbioye mo canÿe otjenayoquëcá tbojanianana: “Ndoñe matauatjana; nÿe cochtsana atšbe soyëngama oye-buambnaye y ndoñe iytëca cattsemana. ¹⁰ Er atše ácaftaca sëntsemna y ndocná quecmochátsbojajo ntšámnaca jáborlama; atše bëtscá entsanga quem pueblentse sëndábamna ca.” ¹¹ Chcasna, Pablo Corintentsë canÿe uata y chnënguana shinÿe tojanototóná, Bëngbe Bëtsabe palabra entsanga abuátambaye.

¹² Pero, Galión chë Acaya luarentša mandado inamna orna, chë judiënga imojenóyeunaye Páblëbe contra; cha tmojánishache y chë tribunaloye tmojánánatse. ¹³ Chocna, chë mandado tmojanianana: —Mua entsanga entsëtsëtsná y entsama chënga Bëngbe Bëtsá chamotsadorana, pero ndoñe ntšamo bëngbe leyënguiñe endayancá ca.

¹⁴ Pablo jóyebuambayama uatajanóntša orna, Galión chë judiënga tojanéyana: —Quem entsá nderado ínÿabioye matbënjóba o ndayánaca chca matënjobuachjanguá, as cocayé atše matijótbema tšëngaftanga judiënga yejuana joyaunayama; ¹⁵ pero ntšamo šmotsichamcá entsemna nÿe buatëmbana soyëngama, nÿe tšëngaftanga šmëbuatma entsangbiama y cach tšëngaftangbe leyëngama; chcasna, cach tšëngaftanga cmontsamna jenóyeunayana y jamana ntšamo chašmojenoyeunacá. Atše quem base soyëngama ndoñe quetsátsboše ngoberna jtsemnana ca.

¹⁶ As Galión tojanamëndá chë tribunal luarentšana chë judiënga jtëbuacnama. ¹⁷ Chorna, chë entsanga tmojánishache chë judiëngbe enefjuana yebnentsa mandayá, Sóstenes ca uabainá, y Galionbe delante imojtsejantšetaye. Pero Galión chë soye tondayana ibontsentšamna.

Pablo Antioquiye tojtaná y chentsana cachiñe inÿe luarëngoye tojána, Bëngbe Bëtsabe trabajo jamama

¹⁸ Pablo cabá bayté Corintentsë tbojántotona. Chentsana, Jesucristbeñe ošbuachiyëngbentsana tojesanodiošoftá y bejaycá Siria luaroye tojána, Priscila y Aquílaftaca. Cabá Sirioye nda ora, Cencrea puebloca nÿets stjënashë yojtsenátstbotje, Bëngbe Bëtsábioye jinÿinÿiyama canÿe soye tbojanšbuáchenama. ¹⁹ Efeso puebloye tmojánashjajna ora, Páblëna Priscila y Aquila tojésanabashejuana. Chentsana, cha tojána chë chentsa judiëngbe enefjuana yebnoye y chentsë chë judiëngaftaca yojanoyebuambná y imojánenatsëtsnaye. ²⁰ Báseftanga Pablo tmojanimpadá inÿe baseftayté chentsë chauesomñama, pero chana ndoñe tonjanoyauná; ²¹ chentsana, chëngbentsana tojesanodiošoftá, mëntšá jëftsëyanëse: “Nderádose cachiñe chantésabo tšëngaftanga jabábuachama, Bëngbe Bëtsá šojalesenciase ca.”

Chora, Pablo bejaycá Efesocana tojëftsanbocna. ²² Cesarea puebloye tojánashjango ora, tojána jacheuayama Jesucristbeñe ošbuáchiyënga Jerusalemoca; y chentsana Antioquiye tojána. ²³ Chentsë baseftayté yojëftsemna; y chentsana, Pablo tojesaná Galacia y Frigia luarënguenache, Jesucristbeñe ošbuáchiyënga añemo atšatnaye.

Apolos, Efeso puebloca Bëngbe Bëtsabe soyëngama yojanabuayiná

²⁴ Cach tempo, Efesoye tojánashjango canÿe judío, Apolos ca uabainá, Alejandría bëtš pueblócá; cha puerte obená inamna jonguamiyama y corente inatátšëmbo Bëngbe

Bëtsabe uabemana palabréngama. ²⁵ Bëtsá tojánatsjinýe chë Bëngbe Utabná tojaninýanýe benachama; añémoca yojanoyebuambná y Jesusbe soyéngama botamana yojanabu-atambá, masque cha nýe ntšamo Juan entšanga tojánabuatambama y tojanébáyama inatátšëmbo. ²⁶ Ndauatjá Apolos tojanontsé jóyebuambayama chë judiëngbe enefjuana yebnentše. Pero Priscila y Aquila cha imojóyeunaye ora, barie tmojanchembo y más botamana tmojanbuayená, ntšamo Bëngbe Bëtsabe inýinýena benache bëtsemnama. ²⁷ Apolos Acaya luaroye jama yojtseboše orna, Jesucristbeñe ošbuáchiyënga bëtscá tmojanañémó y choca Jesucristbeñe ošbuáchiyëngbiamá canýe tsbuanácha tmojanichmó, chca, Apolos choca tšabá chamofjama. Acaya luaroye tojánashjango ora, Jesucristbeñe ošbuáchiyënga bëtscá tojanéjabuache. Bëngbe Bëtsá chëngbe tšabiamá yojanjuabnáyeca, chënga Jesucristbeñe corente imojtsošbuáchiye. ²⁸ Entšangbe delante chë judiëngaftaca jabuachana imojánenatsëtsnaye y nýetscanga tojaninýanýe, ntšamo ndoñe tšabá inamncá chë judiënga imnatátšëmbuama; y Bëngbe Bëtsabe uabemana palabréngaca chënga tojaninýanýe, Jesús Bëngbe Bëtsabe Uámana Uabuayaná bëtsemnama.

19

Pablo Efeso puebloca

¹ Apolos Corintoca yojtsemnëntscuana, Páblëna chë tjañe luarënguëjana tojánachnëngo y Efesoye tojánashjango; chentše básefta ošbuáchiyënga tojánanýena, pero chëngna nýe ntšamo Juan chë Ubayaná tojanabuatambacá imnatátšëmbo. ² Pablo chënga tojanatjá: —¿Uámana Espíritu chenjánabo tšëngaftangbe ainaniñe jtsemándayama, Jesucristbeñe ošbuáchiyënga šmojanóbiamá ora ca?

Chora chënga tmojanjuá: —Ni mo queftsátstatsëmbo chë Uámana Espíritu yomnama ca.

³ Y Pablo tojanéyana: —As, ¿ntšamo šmojánenabaye ca?

Y chënga tmojanjuá: —Fsënjánenabaye ntšamo Juan entšanga yojanëbayancá ca.

⁴ As Pablo tojanéyana: —Juan tojanëbaye chë bacna soyënga amama ngménaca tmojanenojuabó, chca amana tmojanajbaná y chë Bëngbe Bëtsabe benache tmojánishachënga, y entšanga yojanëtsëtsná chë chábentsána yochjanashjanguábeñe chamotsošbuaché ca; y cha Jesús endmëna ca —Pablo tojánayana.

⁵ Chca tmojanuena ora, chënga tmojánenabaye Bëngbe Utabná Jesús jótšëmbonëse, chábeñe imojtsošbuáchema. ⁶ Pablo chëngbe bestšašinë chabe cucuatšënga tojanajajó ora, Uámana Espíritu chëngbe ainaniñe tojánamashëngo jtsemándayama; tmojanontsé inýetsá biyangana, chënga tempo ndmabiyañe, y Bëngbe Bëtsabe juabna imojtsoyebuambná. ⁷ Chentše imojtsemna bnëtsana uta entšanga.

⁸ Unga shinýëntscuana Pablo yojánaye chë judiëngbe enefjuana yebnoye y ndauatjá Jesucristbe soyéngama yojanoyebuambná; entšángaftaca imojánenatsëtsnaye y entšanga yojanëtsëtsná Bëngbe Bëtsabe amëndayama, chënga chábeñe chamotsošbuáchema. ⁹ Pero ba nduauenanënga ndoñe imontsošbuaché y Bëngbe Utabná tojaninýanýe Benachama entšángbeñe bacna soyënga imojtsichamo. Chcasna, Pablo chëngbentšana tojtsanojuánañe y nýe chë Jesucristbeñe ošbuáchiyënga tojanëbuaja canýe scueloye, canýe entšá Tirano ca uabainabe yebnoye. Chentše cada te chë ouenanëngaftaca yojanoyebuambná, ¹⁰ y chca yojánama uta uatëntscuana; y chca, nýetscanga Asia luaroca oyenënga Bëngbe Utabnabe palabra tmojanuena, judiënga y ndoñe judiëngnaca. ¹¹ Y Bëngbe Bëtsá puerte bëts soyënga Pábloftaca yojtsama. ¹² Tša bëts soyënga tojanma; chíyeca, nýetsca chë Pablo tojuabojajo entšayá y pañuelëjuangá, entšanga imojanamana šoquëngbioye juyambana, y chca tmojama orna, chë šocanënga juenatjëmbana y chë bacna bayëjënga entšángbentšana jésebocanana.

¹³ Pero básefta judiënga tsáshenañe bacna bayëjënga entšángbentšana imojtanëbuacana. Chë judiënga imojtseboše chë bayëjënga jtëbuacnana, Bëngbe Utabná Jesús jótšëmbonëse. As, chë bacna bayëjëngbioye mëntsá imojtsëtsëtsnaye: “Bëngbe Utabná Jesús, Pablo

bondbetsebayaná jótšëmbonëse y chabe obenánaca cbontsamënda muabentšana chašmuaisebocnama ca.”

¹⁴ Chca imojánama chë judío Esceva ca uabainabe canÿsëfta uaquiñënga. Esceva inamna bachnangbe amëndayá. ¹⁵ Pero canÿe, Escévëbe uaquiñënga chca tmojánayana orna, chë bacna bayëja mëntšá tojanëjua: “Atše Jesús sënduábuatma y sëndëtatsëmbo nda Pablo yomnana; pero tšëngaftanga, ¿ndëmuanÿenga šmomna ca?”

¹⁶ As, cachora chë bacna bayëjbe juabna uambayá chëngbioye tojanontsënja y tša añemo bomná bëtsemnayeca chënga tojtsanayëñaná, jabuache jtsajantšëtayëse; chë causa, chënga chë yebnentšana tmojtsanacheta enašënga y lisiánënga. ¹⁷ Nÿetscanga Efesoca oyenënga, judiënga y ndoñe judiënga, chca tmojántatsëmbona y corente imojtsanauatja. Y chca, Bëngbe Utabná Jesús entšanga más imojtsatschuanaye.

¹⁸ Jesucristbeñe imojtsošbuachiyënguentsana, banga imojánashjajuana y entšangbe delante imojtsecompšaye, tempo bacna soyënga tmojanmama; ¹⁹ banga, chë bocjuanana soyënga jamama imojanëntšëñënga, chëngbe bocjuanana librëšangá tmojaniyëbo y entšanga imojtsantješna ora, chëšangá imojtsajuinÿiye. Tmojanjuabó ntsachetsá chë librëšangá betsámanama y tojanóbocna shachna bnëtsana uaranga crocénana nÿetsá. ²⁰ Y chca, Bëngbe Utabnabe palabra más ba entšanga imojtsuenana y chiñe imojtsošbuáchiye y Bëngbe Bëtsá chabe obenana entšangbeñe yojtsinÿinÿnaye.

²¹ Chca tojanochnëngüentsana, Pablo tojanjuabó Macedonia y Acaya luarënguëjana jachnënguse, Jerusalenoje jésama. Y yojtsejuabnaye cha ibojtsemna Jerusalenentšana Romoje jama ca. ²² Asna, chabe uajabuachanënguentsana útata, Timoteo y Erasto, Macedonioje cha tojanichamó. Chëntscuana Pablo baseftayté más Asia luarentše tbojanjëtana.

Efesoca entšanga tmojánenbouenana

²³ Chë tempo, Efesoca entšanga corente tmojánenbouenana, chë Bëngbe Utabná yojtsinÿanÿná Benache imojtsisháchichanëngbe causa. ²⁴ Chë entšanga chca tmojanma, er canÿe entšá mídioca soyënga pormayá, Demetrio ca uabainá, chënga tojanayëñaná chca jamama. Cha yojanamana binche soyetëmënga japórmana y chëtëmënga yojáninÿna mo chë Efeso puebloquëngbe diosá Artemisa jadórana bëts yebncá. Demétrioftaca imojantrabájangna bëtsá crocénana imojanójacañe chë soyetëmënga eniñe. ²⁵ Demetrio tojanëbuaja cháftaca imojantrabájanga y ínÿenga cach mídioca soyënga pórmayënga, y mëntšá tojanëyana: “Baconga, tšëngaftanga šmondëtatsëmbo, bënga bëtsá crocénana jtsebomnamna quem trabajuentšana chca jopódiana. ²⁶ Pero tšëngaftanga šmontsonÿá y šmontsuenana ntšamo chë Pablo ca uabainá yojtsichamcá. Cha entsichamo, chë entšangbe pormana soyënga ndoñe yontsemna jtsadoránana ca; y chca ba entšanga tojabuayená y chënga aíñe montseyenana. Chë soyna ndoñe nÿe muentše Efesentše chca quenátopasana; nÿets Asia luaríñnaca chca entsopasana. ²⁷ Resjo entsemna; chca causa, entšanga bëngbe trabajuama ndoñe tšabá quemochátichamo y chë uámana Artemisa jadórana bëts yebnama mochántichamo uámana yebna ndoñe yondmëna ca. Y chca, Artemisbe obenana entšanga mochantsábotena y Artemisa ndoñe bañe quemochátabuatma, nda Asientše y nÿets luaríñnaca mondadorana ca.”

²⁸ Chca tmojanuena ora, chca pórmayënga puerte tojánëñe y tmojanáyebuachena: “¡Efesoquëngbe Artemisa corente bëtsá endmëna ca!”

²⁹ Y chca, nÿetsca chë pueblentša entšanga tmojánenbouenana. Tmojanotabá Gayo y Aristarquëbioye, Macedonioca boyabásata, Páblëbe tjëmbambnayata; y sjojónana tmojanënatse chëngbe enefjuana yebnóntscóñe. ³⁰ Pablo tojánbošena choye jamashënguama chë entšangáftaca jóyëuambayama, pero Jesucristbeñe ošbuáchiyënga ndoñe tmonjanlesenciá. ³¹ Chë Asioca mándayëngbentše báseftanga immamna Páblëbe amiguënga, y chënga Páblëbioye palabra tmojanafja chë jénefnama yebnoye ndoñe chaondámashënguama.

³² Chëntscuana, entšanga imojtsejotonocna, ínÿenga imojtsechembumbuana canÿe soye y ínÿengna inÿe soye, chënga corente imojtsenbouenana causa, y banga chentše imojtsemnënga ndoñe imontsetátšëmbo ndayama choye tmojanobéconama. ³³ Pero básefta judiënga, canÿe entšá, Alejandro ca uabainá, chë entšangbe natsanoye tmojanajuatsëntše, y báseftanga cha tmojanbuayená ntšamo yojtšopasánama. Asna, Alejandro tojánéfjatsëmbo cucuátšeca iytëca chamobiamama, er cha yojtseboše entšangbe delante chë judiënga jobuauyanama. ³⁴ Pero, Alejandro judío bemnama chë entšanga tmojántatšëmbona ora, nÿetscanga tmojanáyebuachena uta horëntscuana, mëntšá: “¡Efe-soquëngbe Artemisa corente bêtsá endmëna ca!”

³⁵ Chë pueblentša mándayëngbe uajabuachaná, entšanga iytëca jábiamama tojanobená ora, tojanëyana: “Efe-soquënga, nÿets luariñe endótatšëmbo, quem pueblentše oyenënga iuamna jtsinÿenana chë Artemisa jadórama bêts yebna y chë cha jadórama celocana ot-satsena ndëtšbé. ³⁶ Ndocná quenátobena chama jayanama ndoñe ndegombre yondmëna ca. Chcasna, natjëmbana motsomñënga y tondaye matamëngana corente tšabá ntjshajuaboycá. ³⁷ Tšëngaftanga quem boyabásenga moye šmojunatse, masque Artemisbe yebnentše tondaye tmonjatbëba y bëngbe Artemisbiana ndoñe podesca tmonjoyebuambá. ³⁸ Demetrio y cháftaca šmotrabájanga, nderado ndabiama ndaye demanda šmojtsebomnësna, cabildoca endatëfjna y chentše mándayënga montsemna chë demandënga jouenama, y chëngbentše cada ona šmochjëftsendemánda. ³⁹ Y tšëngaftanga inÿe soye šmojtseguasna, cmontsamna ntšamo bëngbe leyënguiñe yomandancá, nÿetsca quem pueblentše oyenëngaftaca jenóyeunayana. ⁴⁰ Ndayá mënté tojopasá causa, resjo entsemna bëngbiana chamuayana, ntšamo leyënguiñe yomncá bënga ndoñe montsama ca; y bënga ndoñe quemuátobena ndayá jojuana, ndáyeca quem enbouenanana tojopasá ca šojátjayëse ca” —cha tojanëyana. ⁴¹ Y chca jyanëse, chë entšanga tojtanichamó.

20

Pablo, Macedonia y Grecia luaroye tojána

¹ Chë enbouenanana tojanochnëngo ora, Pablo chë Jesucristbeñe ošbuachiyëngbiyoye tojanëbuaja jábuayenama, añemo chamotsatsbomnama; tojesanodiošoftá y Macedoniyoye tojéftsanbocna. ² Chë luarënguëjana cha tojánachnëngo Jesucristbeñe ošbuáchiyënga becá añemo atatsatnaye, ba chabe palabréngaca; chentšana, Grecia luaroye tojánashjango, ³ y chentše unga ishinÿe tojanoquedá. Barquëshañe Sirioyoye játama Pablo yojtseprontana orna, tojántatšëmbona chë judiënga cha jtsóbama tmojanenóyeunama. Asna, tojanenojuabó jesshëconama, cach Macedonia luarëjana jésachnënguse. ⁴ Pablo quem boyabásenga tmojantjëmbambá: Sópater, chë Bereocá, Pirrbe uaquiñá; Aristarco y Segundo, Tesalónicocata; Gayo, Derbe pueblócá; Timoteo; y Tíquico y Trófimnaca, Asia luarocata. ⁵ Chënga tmonjanonatsé y šonjanëbatma Troasoca. ⁶ Chë levadúraca ndëpormana tandëse saye fiestentšana, Filíposentšana barquëshañe fsënjëftsanbocna y shachna tianoye, Troasoca chë tmonjanonatsenga fsëntanishëche, y chentše canÿe semana fsënjanoquedanga.

Ntšamo tojanopasá Troas puebloca

⁷ Chë inÿe semana jobojátšama te, fsënjánenefjna Jesucristbeñe ošbuachiyëngcá tandëse jajátayama, cánÿiñe jasama; y Pablo entšanga enjétsëtsësnaye. Cha bonjamna yëfsana chentšana jëftsebocnana; chë causa, más bën chëngaftaca tonjanoyebuambá, tsëntsetëntscuana. ⁸ Fsënjamna canÿe tsoye tsbanana tsañoca y chentše ba uajuinÿanëshangá enjanamna; ⁹ y canÿe bobontse, Eutico ca uabainá, ventanentše enjántbemana. Pablo bën enjanoyebuambná causa, chë bobontse ocnayana tbojanábuache. Cabana, corente tojtšanomana ora, chë unga tsañocana tontšanótsatse y

obaná chora tmontanatsbaná. ¹⁰ As, Pablo tonjánastjango, chë bobóntsbioye tbonjanotsbuajó y tbonjanotsejcuá. Y chë entsanga tonjanéyana: “Ndoñe nyetsá matauatjengana; ainá cha entsatsmëna ca.”

¹¹ Chentsana Pablo cach tsbanánoye tonjesaná y tandëse tonjanjatá, jtenójuaboyama ndayá Jesús jóbánëse tojanmama. Chora Pablo chë entsángaftaca tonjanse y tontëtanontsé oyebuambnayana, jabinÿnëntscuana. Chora Pablo chentsana tontsanoñe. ¹² Y chë otsatšena bobontsna ainá imojtsatánatseñe, y chama chë entsanga corente oyejuayënga imojtsemna.

Pablo Troasentsana Mileto puebloye tojána

¹³ Bëngna fsënjanonatsé y barquëshañe fsënjána Aso pueblóntscoñe, chentsana Pablo jtesbetšama, ntšamo fsënjanenoyeunacá, er Pablo tonjánbošena fshantscá choye jana. ¹⁴ Asoca Pábloftaca fsëntaneninyëna ora, bëngaftaca barquëshañe cha tonjána Mitilene puebloye. ¹⁵ Chentsana fsënjéftsanbocna y yëfsana Quío luarëjana fsënjánachnëngo, y chë inÿe yëfsana Samos luaroye fsënjánashjajna. Chentsana fsënjána y yëfsana Mileto puebloye fsënjánashjajna. ¹⁶ Chca tonjanochnëngo er Pablo ndoñe chenátanbošena Efesoye jama, Asia luariñe ndoñe yapa ndétsemnama. Chca tojánbošena er cha enjëtseboše betscó Jerusalenoca jtsatsmënana, tojopodesna chë judiëngbe fiesta, Pentecostés ca uabaina fiestama.

Ntšamo Pablo chë Efesoca ošbuachiyëngbeñe bëtsëjemëngcá mándayënga tojanéyana

¹⁷ Miletocana Pablo tonjanmandá chë Efesoca ošbuachiyëngbeñe bëtsëjemëngcá mándayënga jobiatšana. ¹⁸ Chënga tmonjánashjajna ora, Pablo tonjanéyana: “Tšëngaftanga šmondëtatšëmbo ntšamo atše quem Asia luaroye sënjabánashjango orscana tšëngaftangbeñe snetsamana. ¹⁹ Nyets tempo Bëngbe Utabná sëndëserveda y cach atše uamaná ndoñe quetsatenobiamná. Corente shëchbuiye tijëftsoperdé y ba soyënguiñe tijasufri, chë judiënga atše jóbama mondboše causa. ²⁰ Y lempe ntšamo tšëngaftangbe tšabiamna yomncá tbonjabuayená; tondaye ntjatsbuetamencá. Nyetscangbe delante sënjabuatambá y tšëngaftangbe yebnënguenáchnaca. ²¹ Judiënga y ndoñe judiënga Bëngbe Bëtsabe soyëngama sënjabuayená, bacna soyënga amama ngménaca chamuenójuaboma y chca amana chamotsajbanama, Bëngbe Bëtsabe benache chamuishachama y Bëngbe Utabná Jesúsbeñe chamotsošbuáchema. ²² Y mora Jerusalenoye chanjá; Uámana Espíritu chca šontsemánda y ndayá choca chjapásamna ndoñe quetsátstatšëmbo. ²³ Nyë mëntsá aíñe sëndëtatšëmbo: Nyetsca bëts pueblënguenache ndayëjana atše chandbëtsana, Uámana Espíritu šondbëtsebuayiynaye entsanga cašmochjutame y puerta chaisufrima camochjama ca. ²⁴ Atšbe vida cach atšbiamna ndoñe yapa quenatámana, chaitsaina o chayóbana. Pero atšbiamna iuámanana endmëna ndayá atše jobenayana atšbe trabajo jëftseepochócana, ndayá Bëngbe Utabná Jesús šojanmandá jamama, chë tšabe noticiënga Bëngbe Bëtsá entsángaftaca tšabia yomnama jábuayenama.

²⁵ “Y mora atše ndegombre sëntsetatšëmbo, tšëngaftangbentšana, chë ndëmuanÿëngbentše Bëngbe Bëtsabe amëndayama sënjabuayená, ndocná atše más quešmochátinÿe. ²⁶ Chíyeca, atše ndegombre mënté cbetséyana: Atše tondaye quetsátstatšëmbo nderado nda ndatsbocaná chaojóbanabiamna, ²⁷ er atše ntšamo Bëngbe Bëtsá jamama yojuabnacá lempe tbonjabuayená, tondaye ntsebuetamencá. ²⁸ Chcasna, cach tšëngaftangbiamna šmochtsantješna y nyetscanga muentše Jesucristbeñe ošbuachiyëngbiámna. Chëngbeñe mo chëngbe abujajëngcá Uámana Espíritu tcmonejajayé, Bëngbe Bëtsabe entsanga chašmotsanÿenama, chënga Bëngbe Bëtsá chábënga tojábiama, chabe Uaquiñabe buiñe juabuáshanëse y jóbánëse, mo bëtsca cuafjopagacá. ²⁹ Atše sëntsetatšëmbo, atše chaitsoñe orna, banga mochanjabo y chënga mochántsemna mo corente tšátjaye tjañe quešëngcá, Jesucristbeñe ošbuachiyënga chábeñe ošbuachiyana chamotsajbanama chënga jamama. ³⁰ Y tšëngaftangbentšánëncá

báseftanga mochanjábocana y entsángbioye uayátsenaye soyënga mochanjabuatambá, chca, báseftanga Jesucristbeñe ošbuáchiyënga chë ínÿengbentsana chamotsoluarema y nÿe chë abuátambayëngbioye chamotsésetonama. ³¹ Chcasna, sempre šmochtsantješna; ndoñe chacmondébnëjtjomba, atše unga uatëntscuana, bnëté y ibeta, tšëngaftanga cada ona cbondétsabuayiynama y chama atše puerte tijasufrí.

³² “Y morna, Jesucristbeyeca catsátanga, Bëngbe Bëtsabe cucuatšinë cbétsabashejuana y ntšamo tšëngaftangbiama chabe tšabe juabna yomnama palabréngaca, tšabá chašmuesomñe. Cha endobena jamama tšëngaftangbe ainaniñe más chašmotsošbuáchema, y endobena tšabe soyënga tšëngaftanga jatšatayama, ndayá jatšatayama tojanašebuachenacá mo tšëngaftangcá entsángbioye, ndëmuanÿenga cha tojáchembo chabe entsanga chamotsemnama. ³³ Atše ndocnabe crocénana, o castellano o entsayá atšbiama quetsatántšaboše; ³⁴ más inÿetšá, y tšëngaftanga lempe šmondétatšëmbo, atše cach atšbe cucuatšeca tijëftsetrabajama, atšbiama y átšeftaca imojamnëngbiama opresido enjamna soyënga janguanguama. ³⁵ Atše nÿets tempo sëndinÿanÿná entsá chca ibomnama, chë jabuache jatrabájana y chë ujabótënga jujabuáchana, quem Bëngbe Utabná Jesusbe palabréngama sempre jtsejuabnayëse: ‘Canÿe entsá más oyejuayá jtsemnana ndayánaca ínÿabioye tbojtsatšetná ora, y ínÿabioye tbojtseyëngacá ora ndoñe nÿa nÿetšá ca’ ” —Pablo tonjanoyebuambá.

³⁶ Pablo chë soyënga tonjánayanentsana, tonjanoshamentšé y nÿetscanga chentše monjëtsemnëngaftaca Bëngbe Bëtsá tmonjanótšëmbona. ³⁷ Nÿetscanga tmonjánenobošachna y Pablo tmontanotsejcuá y tmontanámochó. ³⁸ Y entsanga corente ngménaca monjëtsemna, chënga ndocna te más cha mochántinÿe ca Pablo tojanëyana causa. Chentšana, chënga chë barquëshá enjetsamnëntscoñe cha tmonjantjëmbambá.

21

Pablo Jerusalenoye tojána

¹ Chë Jesucristbeñe ošbuáchiyënga fsënjëftsanabashejuana ora, barquëshañe fsënjanojayé y ndericho Cos luaroye fsënjána; chë yëfsana Rodasoye y chentšana Pátara puebloye. ² Pátara pueblentše canÿe barquëshá fsënjáninÿena, Fenicioye enjétsaye; asna, chëshañe fsënjanojayé y chentšana fsënjëftsanbocna. ³ Fsëntsanachnëjuana ora, fsënjáninÿe Chipre luare; Chipre bëngbe uañicuayoica tonjanoquedá y bëngna Sirioye fsënjétsaye. Tiro pueblentše chë barquëshentša uasmanëshangá jëftsáboshjonama yojámnayeca, chë puebloye bënga fsënjëftsanamashjna. ⁴ Chentšna, Jesucristbeñe ošbuáchiyënga fsënjánanÿena y canÿsëfta te chëngaftaca fsënjanoquedá. Chënga Pablo tmonjanianyana cha ndoñe ibonjamna Jerusalenoye jtsayana ca, er chë Uámana Espiritu tojanabuayená ndayá choca cháftaca jopásama. ⁵ Chë canÿsëfta te tonjanochnëngo ora, chentšana fsënjëftsanbocna y nÿetscanga parejo chëngbe shémangaftaca y básengaftaca šonjanatjëmbambá chë pueblo chabóntscoñe; y chentše, chë chënÿañe fsënjanošamentšé y Bëngbe Bëtsá fsënjanimpadá. ⁶ Chentšana, fsënjesanodiošoftá y chë barquëshoye fsëntanášëngo; chentšana chë ošbuáchiyënga cachëngbe yebnëngoye tmontaná.

⁷ Tirentsana fsënjëftsanbocna y Tolemaida puebloye fsënjánashjajna; y chentše tonjanopochocá bëngbiama bejaycá chë te ayana. Tolemaidentše Jesucristbeñe ošbuáchiyënga fsënjanocheuá y chëngaftaca canÿe te fsënjanoquedanga. ⁸ Yëfsana, bënga chentšana fsënjëftsanbocna y Cesarea luaroye fsënjánashjajna. Chocna, bënga fsënjána Felipe chë Jesucristbiama tšabe noticiënga abuayiynayabe yebnoye y cháftaca fsënjanoquedanga. Felipe enjamna canÿa chë Jesucristbe ichmónëngbioye ujabuachanënguentšá, Jerusalenoca ubuáyanënga. ⁹ Felipe enjánabamna canta ndëbouamna bemianga y chënga monjamna Bëngbe Bëtsabe juabna oyebuambnayënga. ¹⁰ Ya bayté chentše fsënjëtsemna orna, Judeocana tonjánashjango

canÿa Bëngbe Bëtsabe juabna oyebuambnayá, Agabo ca uabainá. ¹¹ Agabo bëngbioye tonjánashjango ora, Páblëbe uasnanëja tonjanca y cucuatšënga y shecuatšënga cachá tonjanenabatsëca y mëntšá tonjánayana: “Uámana Espíritu entsichamo, Jerusalemoca quem uasnanëja nduíñbioye chë judiënga mëntšá camochjama y ndoñe judiëngbe cucuatšëne camochjáboshjona ca.”

¹² Chca fsënjanuena ora, bënga y chentša entsanga Pablo fsënjanimpadá Jerusalemoye ndoñe chaondëtsama. ¹³ Chora Pablo tonjánayana: —¿Ndáyeca šmojtsošaché y šmojtsama atšbe ainaniñe puerte ngménana chaotsemnama ca? Atše séntseprontana y ndoñe nÿe chašmobatsëcama; Jerusalemoca jobanámnaca séntseprontana, Bëngbe Utabná Jesusbiamca —cha tonjánayana.

¹⁴ Jáyënjana nadoñe chibiatanobená ora, ndoñe más chibiatanimpadá; nÿe mëntšá fsënjanianca: —Ntšamo Bëngbe Utabná yojtsebošcá chaotsemna ca.

¹⁵ Chë soyënga tonjanochnëngüentsana, fsënjanoprontá y Jerusalemoye fsënjána. ¹⁶ Cesareoca, básefta Jesucristbeñe ošbuáchiyënga choye šonjanatjëmbambá y chocna, chënga šonjanënatse canÿe Chipre luaroca entsabe yebnoye, Mnasón ca uabainá, ndábentše bënga joquédama. Mnasón tempscana inamna Jesucristbeñe ošbuachiyá.

Pablo tojána Santiago jauatsëtsayama

¹⁷ Jerusalemoye fsënjánashjajna orna, chentša Jesucristbeñe ošbuáchiyënga oyejuayënga šonjanëbuaja. ¹⁸ Yëfsana, Pablo bëngaftaca tonjána Santiago jábuachama, y chentše, nÿetsca chë ošbuachiyëngbeñe bëtsëjemëngcá mandayëngnaca monjëtsemna. ¹⁹ Pablo tonjanacheuá y chentšana tonjanacuntá lempe ntšamo Bëngbe Bëtsá Páblëbe trabájoca chë ndoñe judiëngbeñe tojanmama.

²⁰ Chca tmonjanuena ora, Bëngbe Bëtsá tmontanchuá y Pablo mëntšá tmonjanianca: “Morna, Jesucristbeyeca bëngbe catsata, contsonyá ntšamo ba uaranga judiënga Jesucristbeñe imojtsošbuáchemca, y chënga nÿetscanga montsantješna nÿetsca Jesucristbeñe ošbuáchiyënga chë Moisesbe leyentša nÿetsca mandënga chamotsocumplínama. ²¹ Y entsanga chëngbioye noticia tmojatšatá, aca chë inÿe luarënguenache imoyena judiënga cojtsabuatambá, Moisés tojanmandá soyënga ndoñe ntseyeunanama y basetëmënga base bobachtemca chë más delicadentše ndoñe ntjatëtšama, ntšamo bënga judiënga fsënduamancá, y ntšamo bënga fsëndëtatšëmbcá ndoñe chamondëtsamana ca. ²² Y morna, ¿ntšamo chë soyëngama cochtsemana? Ndegombre, chënga mochanjätatšëmbona aca moye tcojabama. ²³ Chcasna, ntšamo cbochanjabuayenacá cochjama: Bëngbentše canta boyabásënga montsemna y chënga entsamna Bëngbe Bëtsabiamca canÿe šbuachenana soye jamama. ²⁴ Aaftaca cochjunatse, chëngaftaca cochtsemna y chëngcá cochtsama Bëngbe Bëtsabe delante tšábënga jtsatsmënama ntšamo chamojtsama ora, y ntsachetšá jëtsjájua chaojtsamncá, aca cochjëtšájua, as chënga chamobená nÿets stjënashë jtsenátšbotjiamca, jinÿanÿiyama, ntšamo Bëngbe Bëtsábioye tmojašbuachenacá ya tmojamama. Y chca, nÿetsca judiënga mochanjinÿe ndoñe ndegombre yontsemna chë ntšamo chëngbioye acbiamca tmojacuntacá; masna, chënga mochanjätatšëmbona aca ndegombre ntšamo Moisesbe leyinÿe yomandancá icuamama. ²⁵ Y chë ndoñe judiënga Jesucristbeñe imojtsošbuachengbiamna, bënga ya fsënjubuábiamca y fsënjáuyana ndayá jtsocumplínama chënga yojtsamnama, mëntšá: ‘Ndoñe chamondëtsesá mëntšëna, chë entsanga tmojtsejuabná diosënga imomna soyënga jadórama tmojiyëbana; ni buiñe, ni tšëšana bayëngbe mëntšëna; y ndoñe chamondëtsama bacna soyënga shembásënga y boyabásëngaftaca ca’ ” —chënga tmojánayana.

Bëngbe Bëtsabe bëts yebnentše judiënga Pablo tmojánishache

²⁶ As Pablo, yëfsana chë cántanga tonjanënatse y chëngaftaca tonjanma soyënga Bëngbe Bëtsabe delante tšábënga jtsatsmënama. Chentšana, Pablo Bëngbe Bëtsabe bëts yebnoye tonjánamashëngo chë bachnanga júnayama, ndaytëntscöñe yojamna chë cantangbiamca

soyënga jtsamama, Bëngbe Bëtsabe delante tšábenga jtsatsmënama, y jayanama ndayté chëngbiamama yojtsemna ndaye ora cada ona ibojtsemna ndayánaca Bëngbe Bëtsabe bëts yebnoye juambana, Bëngbe Bëtsabiamama juatšëmbonama.

²⁷ Chënga tmojanenoyeuná y tmojánayana canÿsëfta tentscuana chca jamana ca. Chë canÿsëfta te ya jochnënguama yojtsemna orna, básefta judiënga Asioquënga Pablo tmojáninÿe Bëngbe Bëtsabe bëts yebnoca y tmojanma entšanga chamuenbouénanama. Y cha tmojánishache, ²⁸ mëntšá jtsayebuáchëse: “¡Israeloca entšanga, šmabëtsëjabuache ca! Quem boyabása entsemna chë nÿets luarënguenache iuana abuatambaye soyënga bëngbe entšangbe contra, y ntšamo bëngbe leyënguiñe endayanama contra, y quem Bëngbe Bëtsabe bëts yebnama ndoñe tšabá yontsoyebuambná. Y cabana quem Bëngbe Bëtsabe bëts yebnoye grieguënga tojúmashengo, y chca cha tonjama chë Bëngbe Bëtsabe bëts yebna Bëngbe Bëtsabe bominiñe ndoñe tšabá chaondëtsemnama ca” —chënga imojtsichamo.

²⁹ Chca imojtsichamo, er entšanga Pablo tmojáninÿe chë bëts pueblentše Tróximo Efesocáftaca; y imojtësejuabnaye chábioye Bëngbe Bëtsabe bëts yebnoye Pablo tbojanánatse ca.

³⁰ Nÿetsca chë pueblentša entšanga tmojánenbouenana, y ochamanana chë Pablo yojtsemnoye tmojánashajna. Pablo tmojánishache y Bëngbe Bëtsabe bëts yebnentšana shjoye tmojtsansjojó, y cachora chentša bëšašangá tmojtanatame. ³¹ Jtsóbama ya imojtsebuachéta ora, chë Romoca soldadëngbe mandayá tojántatšëmbona nÿetsca chë bëts pueblentša entšanga imojtsenbouenana. ³² Asna, chë mandayá chabe soldadënga y inÿe chentša amëndayënga tojánachembo y cánÿiñe chë entšanga imojtsemnoye tmojëftsanótjajo. Entšanga, chë mandayá y chë soldadëngbioye tmojánanÿe ora, tmojtsanajbaná Pablo jantšetayana.

³³ Chorna, chë soldadëngbe amëndayá tojanobeconá, Páblëbioye tbojánishache y tojanmandá uta cadenëjuaca cha chamotsebátsëcama y tojanatjá: “¿Nda mua yomna y ndayá tojama ca?” ³⁴ Pero chë entšángbeñe, ínÿenga canÿe soye imojtsáyebuache y ínÿengna inÿe soye; y chca, ntšamo ndegombre tojanopasama jtsetatšëmbuama chë mandayá ndoñe tonjanobená; chcasna, cha tojanmandá Pablo chë soldadëngbe oyenoye chamuánatsama. ³⁵ Chë soldadëngbe oyenoca grádasbengoye tmojánashajna ora, chë soldadënga tojanotocá Pablo cutsnana juambama, chë entšanga tša rábiaca imojtsemna causa, ³⁶ er chënga ústonoye imojétsaye y “¡Chaóbana ca!” imojtsaiuáyebuache.

Ntšamo Pablo entšangbe delante tojanenëuyaná

³⁷ Chë soldadëngbe oyenoye ya jamashënguama imojtsemna orna, Pablo chë soldadëngbe amëndayábioye tbojantjá: —¿Tašcatjaleséncia ratotema ácaftaca jóyebuambayama ca?

Y chë mandayá tbojanjuá: —¡Aca icobena griego biyañe jóyebuambayama! ³⁸ As, ¿aca ndoñe condmëna chë Egíptocá, chë ndoñe bayté quenátsmëna entšanga yojanëtsëtsná chë mándayëngbe contra chamotsemnama y chë canta uaranga podesca uamana entšanga puñálaca uajatëngaftaca, entšanga ndoyena luaroye tojanbocná ca?

³⁹ Chora Pablo tbojanjuá: —Atše judío sëndmëna, Tarso puebloca onÿnaná, canÿe uámana pueblentše Cilicia luaroca; Diosmanda šmolesenciá entšanga jáuyanama ca.

⁴⁰ As, chë soldadëngbe amëndayá chca tbojanlesenciá. Páblëna chë gradashenguiñe tojantsá y cucuatše tojanatsbaná entšanga iytëca chamobiamama. Nÿetscanga iytëca imojtsemna orna, Pablo hebreo biyañe mëntšá entšanga tojanëyana:

22

¹ “Baconga y taitanga, mora šmochjouena atše jenëuyanama ntšamo chjayancá ca.”

² Pablo cachëngbe biyañe, hebreo biyañe yojtsóyebuambnama entšanga tmojanuena ora, más iytëca tmojanobiamama. As Pablo tojanëyana: ³ “Atše judío sëndmëna. Tarso pueblentše, Cilicia luaroca sënjanonÿná, pero muentše Jerusalemntše sënjanoboché

y sëndétatšëmbo soyëngna Gamaliélbeyeca chca botamana sënjanatsjinÿe. Cha corente tšabá šonjanbuatëmbá bëngbe bëts taitangbe leyënga; nÿets atšbe ainánaca Bëngbe Bëtsá sëndëserveda, ntšamo nÿetsca tšëngaftanga mora šmontsamancá. ⁴ Atše sënjánama chë Jesucristo tojaninÿanÿé Benache ústonënga chamosufrima y chamóbanama; boyabásenga y shembásenga sënjanëtabaye y cárceloye sënjanautame. ⁵ Chë judío bachnangbe más uámana amëndayá, nÿetsca chë judiëngbeñe bëtsëjemëngcá mándayënga y inÿe muentša mándayënga mondobena jayanana ntšamo sentsichamcá ndegombre yomnama. Chënga uabemana tsbuanachangá šmonjaniyé, bëngbe catšátanga judiënga chamotsetatšëmbuama atše mando stsanbomnama, Jesucristbeñe ošbuáchiyënga jótabayama; y Damascoye sënjána choca Jesucristbeñe ošbuáchiyënga jótabayama, moye Jerusalenoye junatsama jacastígayama.”

*Pablo tojanacuntá ntšamo Jesucristbeñe ošbuachiyá tojanóbema
(Hch 9.1-19; 26.12-18)*

⁶ “Pero canÿe te benachiñe Damasco béconana sënjétsaye orna, mo nÿetsto ora, nÿe ndeolpe atšbe juachañe canÿe bëts tcuinÿe celocana tonjanbuashinÿinÿena. ⁷ Y fshantsoye sënjétseshajaye y canÿe oyebuambnayana sënjanuena mëntšá: ‘Saulo, Saulo, ¿ndáyeca šcojtsacmena ca?’ ⁸ Atše sënjantjá: ‘¿Nda comna, Bëngbe Utabná ca?’ Y chë oyebuambnayana šonjanjuá: ‘Atše sëndména Jesús Nazaretocá, y aca condama atšbe entšanga chamotsesufrínama ca.’ ⁹ Chë átšeftaca monjánajnënga chë bëts tcuinÿe tmojáninÿe y tmojanouatjananga, pero chë oyebuambnayana ndoñe tmonjanuena. ¹⁰ Chora atše sënjantjá: ‘¿Bëngbe Utabná, ndayá jamama šojtsemna ca?’ Y cha šonjaniyana: ‘Matëtsbaná y mëtëtontsé Damascoye jama. Chentše canÿa cmochanjabuayená ndayá jamama cmojtsemnama ca.’ ¹¹ Chë tcuinÿe yapa tonjanbuashinÿinÿena causa, atše jtaná sënjanoquedá. Chcasna, chë inÿënga šmontanobuacuetëntsé y chca, Damascoye sënjánashjango.

¹² “Chentše enjamna canÿe bacó Ananías ca uabainá; cha inoyena ntšamo Bëngbe Bëtsá yobošcá y yojánama ntšamo bëngbe leyënguiñe iuayancá, y nÿetsca chentša judiënga monjanamana chabiama tšabá jtsóyebuambnayana. ¹³ Cha tonjánabo atše jinÿama y tonjánashjango ora, šonjaniyana: ‘Jesucristbeyeca atšbe catšata, Saulo, chacmotsatabinÿna ca.’ Cachora y cha sënjáninÿe.

¹⁴ “Chentšana cha tonjánayana: ‘Bëngbe bëts taitangbe Bëtsá aca tcmojuábuayana, ntšamo cha acbiama yobošcá chacotsetatšëmbuama, chë nÿetsca soyënguiñe Tšabá Amá chacuinÿama y cachabe uayášentšana chacóyeunama. ¹⁵ Bëngbe Bëtsá chca tojama, aca chë chabe buayenana soyëngama entšángbeñe chacóyeuambama, y chamna nÿets luarentša entšángbeñe cochjacuénta, ntšamo tcojinÿe y tcojouencá. ¹⁶ Y mora, jndoñe más matobátmanana! Motsbaná y cochjenábaye Jesucristo jótsëmbonëse, chca, acbe bacna soyëngama perdonaná chacotsemnama ca’ ” —cha šonjaniyana.

Pablo tojanacuntá ntšamo chë ndoñe judiëngbioye tmojánichmoma

¹⁷ “Jerusalenoye sëntaná ora, Bëngbe Bëtsabe bëts yebnoye sënjána cháftaca jencuéntama, y ndeolpe atše mo otjenayoquécá sënjanoquedá. ¹⁸ Chca orna, Bëngbe Utabná sënjáninÿe y cha mëntšá šonjaniyana: ‘Betsco motsa y cam ora Jerusalemntšana métsebozna; quemuentša entšanga ndoñe quecmochatóyeunaye ntšamo atšbiama condétatšëmbo y contsëtsësnacá ca.’ ¹⁹ Atše sënjanjuá: ‘Bëngbe Utabná, chënga mondétatšëmbo atše sënjánana nÿetsca chëngbe enefjuana yebnënguenache y chë ácebeñe ošbuáchiyënga sënjanëtámiana y sënjánatsetsenaye; ²⁰ y acbiama ndegombre oyebuambnayá Esteban tmonjanóba ora, átšnaca chentše sënjamna y tšabá imojtsama ca chama sënjëtsejuabnaye, y cabá chë monjanóbanangbe entšayëjuangá atše chora sënjanabojanÿá ca’ —atše sënjanjuá. ²¹ Pero chca sënjánayana ora, Bëngbe Utabná šonjaniyana: ‘Motsa; atše bën luarëngoye, ndoñe judiëngbioye cbochanjíchmuca ca.’ ”

Pablo y chë soldadëngbe amëndayá

²² Chë entsanga chëntscoñe tmojanuena; pero chë ndoñe judiëngbiana tojanoye-buambá orna, chënga tmojanontsé uayebuáchana: “¡Ndoñe tšabá quenátsmëna cha vídaca chaotsemnama! ¡Motsóba ca!” ²³ Y chënga más imojtsáyebuache; puerte rábiaca chëngbe uichëtjonëjuangá tsbanánoye imojtsëbéntaye y tsbanánoye polvëshe imojtsëtšana; ²⁴ chë causa, chë mandayá tojánayana chë soldadëngbe oyenoye Pablo chamotsëmashëngo ca, y tojanmandá chamotsetjanja chaobuambama ndáyeca entsanga chca chabe contra imojtsáyebuache. ²⁵ Pero jtsetjanjama ya tmojanbatsëca orna, chentše imojtsemna soldadëngbe amëndayábioye Pablo tbojantjá: —¿Tšëngaftanga šmobena canýe entsá derecho bomná mo canýa Romoca onýnanacá jatjanjana, ndegombre tšabá o ndoñe tšabá tonjamama cabá ndayana ora ca?

²⁶ Chë básefta soldadëngbe mandayá chë soye tojanuena ora, tojána y nýetsca soldadëngbe amëndayábioye chama ibojuenaye, mëntšá: —¿Ndayá cochjama? Chë entsá derecho bomna mo canýa Romoca onýnanacá canmëna ca.

²⁷ As chë amëndayá tojána Pablo yojtsemnoye y tbojaniyana: —Smëyana, ¿aca derecho bomná mo canýa Romoca onýnanacá comna ca?

Y cha tbojanjuá: —Arseñor ca.

²⁸ Chora chë amëndayá tojánayana: —Atše becá crocénana sënjëtšajó mo canýa Romoca onýnanacá derecho jtsebomnama ca.

As Pablo tbojanjuá: —Y atšna derecho bomná mo canýa Romoca onýnanacá sëndmëna atše tijanonýná orscana, er atšbe taitá chca derecho bomná inamna ca.

²⁹ Chcasna, chë jatjanjama imojtseprontanënga, Páblëbentšana tmojanjuaná; y chë mandayánaca tojanjuaná y yojsauatja, Pablo derecho bomná mo canýa Romoca onýnanacá yojamnama tojántatšëmbona ora, er cha tojanmandá Pablo chamotsebátsëcama.

Pablo, Jerusalenentša uámana mándayëngbe delante

³⁰ Chë soldadëngbe amëndayá yojtseboše ndegombre jtsetatšëmbuama ndaye soyama judiënga Páblëbe contra imojtsichámuama; asna, yëfsana tojanmandá cadenëjuangá jt-sajafjonana y chë bachnangbe amëndayënga y nýetsca chë judiëngbe amëndayënga chamobéconama. Chentšana, Pablo tbojanábocna y chëngbe delante tbojanatsá.

23

¹ Chora Pablo, nýetsca chë mandayëngbioye tojanënyanyé y tojanëyana: —Taitanga, atše mënténtscoñe tsiyena jtsamëse ntšamo Bëngbe Bëtsá yobošcá y chabe delante atšbe ainana natjëmbana endëtsomñe ca.

² As, Ananías, chë bachnangbe más uámana amëndayá, tojanmandá Páblëbe béconana imojtsemnënga cha chamotsáyejantšetama. ³ Pero chora Pablo Ananíasbioye tbojanjuá: —¡Bëngbe Bëtsá ácnaca cmochanjëtšjantšetá, bacna entsá, ntšamo ndegombre tcojuabnacá ndinýinýnayá! Aca chentše contsetbemana tšabá o ndoñe tšabá tija-mama jayanama, ntšamo Moisesbe leyiñe yomandancá; as, ¿ndáyeca cojtsemánda chašmojantšetama? Chca chë leyiñe ndoñe quenátšlesenciana ca.

⁴ As, chabe béconana imojtsemna entsanga tojánayana: —¿Chca chë Bëngbe Bëtsabe bachnangbe más uámana amëndayábioye cochjóyenguango ca?

⁵ Chora Pablo tojánayana: —Taitanga, atše ndoñe quetsátstatšëmbo cha chë bachnangbe más uámana amëndayá yomnama. Er Bëngbe Bëtsabe uabemana palabrenguiñe mëntšá endayana: “Entšangbe mandayabe contra ndoñe catjayana ca.”

⁶ Pablo tojáninýe chë mándayënguentše báseftanga saduceunga y ínýengna fariseunga imojtsemnama; as, mëntšá tojanáyebuachena: —Taitanga, atše fariseo sëndmëna; atšbe bëtsëtšanga fariseunga mondmëna. Atše, jtsošbuáchiyëse chë obanënga mochtayenama tsobátmana causa, atše ndoñe tšabá sëntsama ca tšëngaftanga šmochjayana ca.

⁷ Pablo chca tojánayana ora, chë fariseunga y saduceunga tmojanontsé enatsëtsnayana, y chë causa nyëtsca entšanga ndoñe cachcá imontsejuabnaye. ⁸ Er chë saduceunga jtsichámuana chë obanënga ndoñe ntayenana ca, y ni angelënga, ni espíritënga ndoñe mondmëna ca; pero chë fariseunga aiñe chë soyënguiñe jtsošbuáchiyana. ⁹ Y nyëtscanga tša imojtsáyebuache; asna, básefta fariseunga ley abuátambayënga tmojantsbaná y jabuachana mëntsá imojtsáyebuache: “Quem boyabása ndocna bacna soye tonjama. Nderado mo Bëngbe Bëtsabe canye ángel o espíritu muábioye ndegombre tbojauyana ca.”

¹⁰ Entšanga más imojtsáyebuache y chë soldadëngbe amëndayá yojtšauatja nderado entšanga Pablo muantsatcacaye; as, cha tojanmandá soldadënga chamua Pablo chë entšángbentsana jaisábocnama y chë soldadëngbe oyenoye cachiñe jesánatsama.

¹¹ Yëfsana ibeta, Bëngbe Utabná Pablëbioye tbojánëbëocna y tbojaniyana: “Pablo, ainaniñe añemo cochtsebomna. Ntšamo aca atšbiana condëtatsëmbo y muentše Jerusalenentše condoyebuambnacá, cachcá cmontsemna Romoca jamama ca.”

Judiënga tmojanenoyeuná Pablo jtsóbama

¹² Chë inye yëfsana, judiënguentsana báseftanga tmojanenoyeuná Pablo jtsóbama, y tmojanjurá tondaye ntjasana, ni ntjofšiyana, cha jóbantscuana. ¹³ Chca jamama tmojanjuabó entšanga imojamna canta bnëtsanëngama más. ¹⁴ Chënga tmojána chë bachnangbe amëndayënga y judiëngbeñe bëtsëjemëngcá mandayëngbioye y mëntsá tmojánayana: “Bënga Bëngbe Bëtsá mëntsá fsënjašbuachená y bacna soyënga bëngbeñe chaotsemna chca ndoñe fsënjocumplise: Tondaye ntjasana, ni ntjofšiyana, Pablo jóbantscuana. ¹⁵ Morna, tšëngaftanga y chë inye muentša mandayëngaftaca chë soldadëngbe amëndayá šmochjaimpáda Pablo moye chabuánatsama; y šmochjauyana chca yojtsemna ana chë ndayá yojtšopasánama más botamana cha jatjayama ca; y bëngna fchtseprontana cha jtsóbama, cabá moye ndáshjango ora ca.”

¹⁶ Pero, Pablëbe uabenbe uaqiñá chë soye tojántatsëmbona; asna, tojána chë soldadëngbe oyenoye, chama Pablo jauenayama. ¹⁷ Chorna, Pablo canye básefta soldadëngbe mandayábioye tbojanchembo y tbojaniyana: “Diosmanda quem basa mánatse chë nyëtsca soldadëngbe amëndayábioye; canye soye entsebomna chábioye juenayama ca.”

¹⁸ As, cha chë bobontse tbojëftsanbetše, chë nyëtsca soldadëngbe amëndayábioye tbojanánatse y tbojaniyana: “Chë utamená Pablo šonjachembo y šonjaimpadá quem bobontse ácbioye juanatsana; mua caojtsebomna canye soye aca jauyanama ca.”

¹⁹ Chë soldadëngbe amëndayá chë bobóntsbioye tbojëftsanobuácuëtëntsiye, luaroye tbojanánatse y tbojantjá: —¿Ndayá cojtsebomna atše jauyanama ca?

²⁰ As chë bobontse tbojaniyana: —Judiënga tmojenoyeuná taitá jaimpádama, yëfse chëngbe amëndayëngbioye Pablo chacuánatsama, y chënga cmochanjauyana chca yojtsemna ana chë ndayá yojtšopasánama más botamana cha jatjayama ca. ²¹ Pero ndoñe catjóyaunaye; chënguentsana canta bnëtsanëngama más entšanga iytëmenënga Pablëbiana montsanjá. Chënga tmojajurá, bacna soye chëngbeñe chaotsemna ndoñe tmonjocumplise, tondaye ntjasana, ni ntjofšiyana, Pablo jóbantscuana. Mora chënga montseprontana y montsobátmana ntšamo aca chë soyama cochjáuyanama ca —chë bobontse tbojaniyana.

²² Chentsana, chë soldadëngbe amëndayá chë bobóntsbioye tbojanmandá, ndayá ibojuenayama ndocnábeñe ntsecuëntayana, y chentsana tbojtanichmó.

Pablo tmojanánatse Félix, chë Cesareoca mandádbioye

²³ Chentsana, chë soldadëngbe amëndayá tojánachembo útata chë inye soldadëngbioye mándayënguentsana, y tojanamëndá chamoprontama uta patse soldadënga, inye canyëfta bnëtsanënga couayënguiñe y inye uta patse lanzëšangaca, Cesarea pueblöye ibeta, las nueve ora jabocanama; ²⁴ y tojanamëndá couayënga chamoprontá Pablo

chauenójayema. Y tojanmandá tšabá y ndocá ntjapasacá Pablo chamuánatsama, Félix chë Cesareoca mandádbioye. ²⁵ Y canýe tsbuanácha chëngaftaca tojanichmó y chëchañe mëntšá vojtsábemana:

²⁶ Claudio Lisias, chë bëts uámana mandado Felixbiamá: Salud bomná chacotsomñe.

²⁷ Judiënga quem boyabása tmojishache y montseboše jtsóbama; pero cha mo canýa Romoca onýnanacá derecho bomná yomnama sënjåtatsëmbona ora, atšbe soldadëngaftaca sënjá y chëngbe cucuatšentsana cha sënjatsbocá. ²⁸ Atše sëntseboše jtsetatsëmbuana ndaye soyama chënga chabe contra imojtsichámuama; as, cha sënjuánatse nýetsca chë judiëngbe amëndayënga montsemnoye; ²⁹ y chentšana, atše sënjåtatsëmbona chënga chabe contra imojtsichamo ana cachëngbe leyentša soyëngama, pero cha tondaye tonjobuachjanguá, cha jóbama bënga chašotsamnama, ni mo cárceloye jutámiamá. ³⁰ Pero atše sënjåtatsëmbona chë judiënga tmojenoyeuná cha jtsóbama; chíyeca, cam ora cha ácbioye sëntsichamná, y chabe contra ichámëngna sënjáuyana, ndayá muabe contra jayanama imojtsebomncá acbe delante chamuayana ca.

³¹ Chentšana, chë soldadënga tmojanma ntšamo tmojanamëndacá, ibeta Pablo tmojëftsanbetše y Antípatris puebloye tmojanánatse. ³² Yëfsana, chë shecuátšeca tmojána soldadëngna cach soldadëngbe oyenoye tmojésanshëcuana, y chë couayiñe enjaquenënga Pábloftaca tmojána. ³³ Cesareoye chënga tmojánashjajna ora, chë tsbuanácha chë mandádbioye tmojanantšabuaché, y Páblënaca chabe cucuatšinë tmojánhoshjona. ³⁴ As chë mandado chë tsbuanácha tojanalía; chentšana, cha tojanënoticiá ndaye luarocá Pablo inamnama, y Cilicia luarocá cha inamnama cha tojántatsëmbona ora, ³⁵ tbojaniyana: “Acbe contra ichámënga chamobeconá ora, ácbioye oído cbochjabuájua ca.”

Chentšana, cha tojanmandá Rey Heródesbe bëts yebnoca Pablo chamotsebojanýama.

24

Ntšamo Pablo chë mandado Félixbe delante tojanenëuyaná

¹ Shachna tianoye, Ananías, chë bachnangbe más uámana amëndayá, Cesareoye tojána báseftangaftaca chë judiëngbeñe bëtsëjemëngcá mándayënguentsana y canýa entšanga obuauyayáftaca, Tértulo ca uabainá; y chë mandádbioye chënga tmojána Páblëbe contra jayanama.

² Pablo tmojanábocna ora, Tértulo tojanontsé chabe contra jayanama y Félixbioye tbojaniyana: “Aslëpaye, taita mandado, ácbeyeca bënga natjëmbana fsëndoyena y aca puerta obiashjachá cómnayeca ba tšabe soyënga quem luarentša entšangbiamá yojtsebinýna. ³ Nýets tempo y nýetsquénache chë soyënga fsëndóyëngacañe, bëts uámana mandado, y bënga chama corente cbondetsechuaná. ⁴ Pero ndoñe yapa bën jatenbiamnayamna, Diosmanda ratotema šmotsoyauná. ⁵ Bënga fsëntsetatsëmbo quem boyabása entšanguentše entsemna mo bacna shacuancá, nýets luarënguenache yojtsana y yojtsama chë judiënga nýetscanga cachca soye ndoñe chamondëtsejuabnama, y cha yojtsemna chë Nazaretocabe ustonëngbe uanatsaná. ⁶ Y tonjábosena jamama Bëngbe Bëtsabe bëts yebna, Bëngbe Bëtsabe bominiñe ndoñe tšabá chaondëtsemnama; chíyeca bënga cha fsënjotbá. Bënga fsënjábosena chabiamá jayanana tšabá o ndoñe tšabá tonjamama, ntšamo bëngbe leyënguiñe endayancá; ⁷ pero chë soldadëngbe amëndayá Lisias tonjontremeté y jabuachana bëngbe cucuatšentsana tbojtsánatseñe, ⁸ y tonjayana chë chabe contra ichámëngna caojtsamna ácbioye chama jabana ca. Cach taitá chacojatjá ora, ndegombre soyënga cochántsetatsëmbo ndáyeca bënga muabe contra fstsichámuama ca” —cha tojánayana.

⁹ Y chë judiënga chentše imojëtsemnëngna imojtsanichamo aíñe chca tojanopasá y lempe ndegombre yojtsemna ca.

¹⁰ Chentšana, chë mandado Páblëbioye tbojánefjatšëmbo chaóyebuambama; as Pablo tojánayana: “Atše sëndétatšëmbo aca ba uatama comna muentša entsangbiana tšabá o ndoñe tšabá tmonjamama ichamuá; chcasna, tondayama ntsauatjca y puerte oyejuayá acbe delante šcuenëuyaná. ¹¹ Ntšamo cach aca jtsetatšëmbuama contsobencá, cabá bnëtsana uta te entsemna atše Jerusalenoye sënjá, Bëngbe Bëtsá jadórama. ¹² Y quemënga ndoñe chešmátinýena nderado ndáftaca jabuachana enatsësnayíñe, ni entsanga chamuenbouénanama amiñe, Bëngbe Bëtsabe bëts yebnoca, ni chëngbe enefjuana yebnënguenache, ni inýe luarënguenache chë bëts pueblentse. ¹³ Quem entsanga tondaye quemátsbomna ntšamo jayanama, atšbe contra montsichamo soyënga ndegombre yojtsemna ca. ¹⁴ Pero ndegombre endmëna y chanjayana, atše bëngbe taitangbe Bëtsá sëndëserveda, jtsiyenëse ntšamo Bëngbe Bëtsá šonjaninýanyé benache yomncá; y quem entsanga montsichamo, básefta soyënga ntšamo bënga quem Tsëm Benache ústonënga fstsošbuachecá, ndoñe ndegombre yondmëna ca. Pero atšna nyetsca chë Moisesbe leyíñe y Bëngbe Bëtsabe juabna oyebuambnayëngbe uabemana librëšanguentša soyënguiñe sëndošbuaché; ¹⁵ y atše cach chëngcá, puerte jtsošbuáchiyëse Bëngbe Bëtsábeñe sëndobátmana cha yochjama chë mochjóbanënga chámuatayenama, nyetsca entsanga, lempe tšabá amënga y chë ndoñe tšabá amëngnaca. ¹⁶ Chíyeca, atše nyets tempo puerte tšabá sëndama, tondayama ntjatenócochinýenama y atšbe ainana natjëmbana chaotsomñama, Bëngbe Bëtsabe delante y entsangbe delántnaca.

¹⁷ “Básefta uatama inýe luarënguenache atše sëndánana; ndoñe bayté quenátsmëna cach atšbe luaroye sëntashjango, chentša ndbomnëjëmënga jujabuáchama ndayánaca jatšatayama y bayënga jobáyama, Bëngbe Bëtsá jëtschuayama. ¹⁸ Atše sënjama soyënga Bëngbe Bëtsabe delante tšabá jtsatsmënama; chentšana, básefta Asioca judiënga Bëngbe Bëtsabe bëts yebnentse šmonjínýena, pero ndoñe chešmátinýena ni ba entsángaftaca, ni enbouenaniñe. ¹⁹ Chë šmonjínýenënga entsamna ácbioye jabana y acbe delante atšbe contra chamuayana, nderado ndayá tmojtsebomnëse. ²⁰ O ndóñesna, cach quemënga, muentše montsemnënga chamuayana, chë judiëngbe amëndayëngbioye atše šmonjuánatse ora, atše ndayá tjobuáchjanguama chešmënjínýena, atše castiganá jtsemnama šojtsemna ca chënga chamuayanama; ²¹ o nderado nántsemna chë atše chëngbentse sëntsemna ora, mëntšá tijuáyebuachenama: ‘Atše chë obanënga mochtayenama puerte jtsošbuáchiyëse sëndobátmana causa, tšëngaftanga atšbe contra šmochjayana ca.’”

²² Félix bëtská inatátšëmbo Bëngbe Utabná tojaninýinýé Benache ústonënga imojanošbuaché soyëngama; as, Pablo chca yojtsoyebuambná ora, cha tojanmandá ndoñe más chë soyama chë te jatóyebuambnayana, y chë entsanga tojanëyana: “Chë soldadëngbe amëndayá Lisias chaojášhango ora, chanjayana ntšamo quem tšëngaftangbe sóyeca jamama ca.”

²³ Y chentšana soldadëngbe amëndayábioye tbojanmandá Pablo jtsebojanýama, pero nýe utamená ndoñe chaondëtsemna ca; y tojanmandá, Páblëbe amiguënga jalesénciayana ntšamo tmojtsebošcá cha chamuauájabuachama.

²⁴ Chentšana baseftaytese, chë mandado Félix Cesareoye tojtanashjango, chabe shema Drusíaftaca, canýe judiá. Chorna, cha tojanmandá Pablo jachembuana y tojanuena ntšamo Pablo yojtsichamo, ntšamo canýa nanjobenaye Jesucristbeñe ošbuachiyá jtsemnama. ²⁵ Pero, nyetsca soyënguiñe tšabá jtsamama, cachá jenomándama jtsoebenama y ntšamo tmojamama nyetsca entsangbiana Bëngbe Bëtsá yochjayanama Pablo tojanoyebuambá ora, Félix tojanëuatjaná y Páblëbioye tbojanianyana: “Mora, mata; luare quëtstsebomna ora, cbochjachembo ca.”

²⁶ Jëtsboshjonama Pablo crocénana chabuatabuenámnaca Félix inobátmana; y chca, ba soye ibojanóffajana cháftaca jencuëntama. ²⁷ Y chca uta uata tojanochnëngo; chentšana, Félix ya ndoñe más chë mandado yontsemna y chabe cuentna Porcio Festo mandadcá

tmojántbema. Félix yojtseboše chë judiëngbe delante tšabá joquédama, chíyeca utamená Pablo tbojëftsanboshjona.

25

Pablo Festbe delante

¹ Festo chë luaroye tojánashjango y unga tianoeye, Cesarea pueblentšana Jerusalenoye cha tojána. ² Chocna, chë bachnangbe amëndayënga y chë más uámana judiënga Féstbioye tmojána Páblëbe contra jayanama. ³ Y tmojanimpadá, mo chëngbiamá canye bëts pavor cuenta, cha chaomandá Pablo Jerusalenoye chamuánatsama. Chëngna imojétsejuabnaye Pablo benachiñe chamotsóbama. ⁴ Pero Festo tojanéyana, Páblëna Cesareoca utamená yojtsemna y baseftaytese cha choye jtama ca. ⁵ Y tojanéyana: “Chamna, tšëngaftangbe amëndayënga átšeftaca Cesareoye chamua y chë boyabása ndaye bëts soye tojobuáchjanguase, choca chabe contra šmochjayana ca.”

⁶ Festo Jerusalenentše posufta o bnëtsana te más chëngaftaca tbojëftsanjétana y chentšana Cesareoye tojtaná. Yëfsana, cha tojanótbema chabe puestentše tribunaloca y tojanmandá Pablo choye chamuánatsama. ⁷ Pablo choye tojánashjango ora, Jerusalenocana tmojánashjajna judiënga tmojanobobeconá y ba uabouana soyënga chabe contra imojtsichamo, pero ni canye chë soyëngama tmonjanobená jinÿanÿiyana chca ndegombre bëtsemnama.

⁸ Y Pablo, cachá jenëuyanama mëntšá yojtsichamo: —Atše tondaye chiyatobuachjanguá, ni judiëngbe leyëngama, ni Bëngbe Bëtsabe bëts yebnama, ni Romoca bëts mandadbe contra ca.

⁹ Festo yojtseboše chë judiëngaftaca tšabá joquédama; as Páblëbioye tbojantjá: —¿Tacatjábošena Jerusalenoye jama, choca atše quem acbe soyama jayanama ca?

¹⁰ As Pablo tojánayana: —Atše sëntsemna chë Romoca bëts mandado tojichamá amëndayëngbe delante y chënga entsamna jayanama atše tšabá o ndoñe tšabá sënjamama. Ntšamo ndegombre contsetatsëmbcá, judiëngbe contra atše ndocna bacna soye chiyatsma. ¹¹ Nderado atše ndaye bëts soye tijobuachjanguá y chama atše jóbanama šojtsemnëse, atše tondaye quichátayana atše ndoñe chayóbanama; pero atšbe contra montsichamo soyëngama tondaye ndegombre tontsemnëse, ndocná queochatobenaye chëngbe cucuatšične atše jaboshjonana. Chíyeca, Diosmanda chë Romoca bëts mandado cháuyana tšabá o ndoñe tšabá sënjama ca —Pablo tojánayana.

¹² As Festo, chë soyama chabe buayiynayënga tojanatjá y chentšana tojánayana: —Chë Romoca bëts mandado quem soyama cháuyanama tcojábošënësna, chábioye cochjá ca.

Festo, Rey Agrípaftaca tbojanencuentá ntšamo Pábloftaca jamama

¹³ Chentšana baseftayté tojanochnëngo ora, Rey Agripa y Berenice Cesareoye tbojána, Festo jauatsëtsayama. ¹⁴ Bayté chata chentše tojanajétana; y chca, Festo chë réybioye tbojancuentá Páblëbe soyama. Cha mëntšá tbojanianya: —Muentše endmëna canye entšá, Pablo ca uabainá; Félix utamená tbonjëftseboshjona, atše mandadca sënjontšé ora. ¹⁵ Jerusalenoca sëndánmëna ora, chë bachnangbe amëndayënga y chë judiëngbeñe bëtsëjemëngcá mándayënga Páblëbe contra demanda tmonjajajó y šmonjaimpadá cha jóbanama ibojtsemna ca atše jayanama. ¹⁶ Y atše sënjáuyana: “Chë romanënga ndoñe quematamana ndocnabiamá jayanana cha jóbanama ibojtsemna ca, chabe contra ichámënga chabe delante ndoñe tmontsemnëse, chca, chama jenëuyanama cha chaobenama ca.”

¹⁷ Chíyeca, chënga moye tmonjabo ora, ndoñe yapa bën ntjatenobiamnaycá cach yëfsana atšbe puestentše tribunaloca sëntótbema y sënjamandá chë boyabása jobetsana. ¹⁸ Pero chabe contra ichámënga, ntšamo atše sëndanjuabnacá chënga mochjayanamna ni mo canye bëts soye chabe contra chemátayana, chënga jóyebuambayama tonjóyentšbuache ora.

¹⁹ Chënga chabe contra montsichamo, nÿe cachëngbe Dios ntšamo jadórama yomnana y

canya Jesús ca uabainábiamana; cha tojanóbana, pero Pablo entsichamo cha ainá yotsomñe ca.

²⁰ “Chora atse ndoñe quetstétsetatsëmbo ntšamo chë soyiñe jamana; asna, Pablo sënjanjá Jerusalenoye jama tayojétseboše ca, choca atse jayanama tšabá o ndoñe tšabá cha tonjanmama. ²¹ Pero cha šonjaimpadá camuentse jaboshjonana, cach Romoca bëts uámana mandado chë soyama tojayanëntscuana ca. Chcasna, atse sënjamandá cha chamotsebojanýama, chë mandádbioye jíchmuama atse jobenayëntscuana ca” —Festo tbojancuentá.

²² Chca tbojanencuentá ora, Agripa Féstbioye tbojaniyana: —Atšnaca sëntseboše chë boyabása joyeunayama ca.

Y Festo tbojanjuá: —Cach yëfse oído chábioye cochanjabuájua ca.

²³ Chë yëfsana, Agripa y Berenice corente uachuanentse chë tribunaloye tbojánamashjna y chátaftaca tmojánamashjna chë soldadëngbe amëndayënga y chë pueblentša uámana taitanga. Chentšana Festo tojanmandá Pablo jobetsana; ²⁴ y chora cha tojánayana: “Rey Agripa y nyetsca taitanga bëngaftaca šmojtsemnënga: Chentse entsemna chë boyabása. Nyetsca judiënga chabe contra átsbentse montsabíchamo, Jerusalenoca y quem Cesarea puebléntšnaca, y nýa jtsayebuáchëse tša šmontseimpadana cha chaóbanama; ²⁵ pero atse sëntsejuabná quem boyabása tondaye tonjama, jóbanama chabotsemnana ca. Y más, cachá šonjaimpadá chë Romoca bëts uámana mandado César chabe soyama cháuyanama; chcasna, chca chanjama, chábioye cha chanjíchmu. ²⁶ Pero atse, atšbe bëts uámana mandádbioye quem boyabásabiamana juábobemama ndocna serto soye quetsátsbomna causa, tšëngaftangbe delante cha tijatsá, y masna, acbe delante, bëts rey Agripa; chca, lempe chacojatjá chentšana, ndayá juabemama atse chaitsebomnana. ²⁷ Er atse sëntsejuabná ndoñe corente juabnayabe soye yomna, canýe utamená jíchmuana y ndayama chabe contra tmojtsichámuama ndoñe lempe ntjuabemana ca” —cha tojánayana.

26

Pablo tojanontsé rey Agripbe delante jóyebuambayama

¹ Chentšana, Agripa Páblëbioye tbojaniyana: —Jóyebuambayama contselesenciana, cach aca chacuenëuyanama ca.

As Pablo, chë réybioye jachuyama cucuatse tojanatsbaná y jenëuyanama tojanontsé mëntšá jayanama: ² —Atse ndegombre sëntsoyejuá mora chjobenaye acbe delante jóyebuambayama, uámana rey Agripa, chca, atse jenëuyanama nyetsca soyëngama ntšamo judiënga atšbe contra montsichámuama; ³ y más sëntsoyejuá, taitá conduábuatmama lempe ntšamo judiënga monduamancá y condétatsëmbo chë judiënga ndayama imuenoboyebuambnana. Chcasna, Diosmanda uantádoca šmotsoyeuná.

Pablo tojanacuntá ntšamo cha tempo inamnama

⁴ “Nyetsca judiënga mondétatsëmbo ntšamo atse tempscana chëngbeñe tsiyenama, bobontse sënjamna orscana, atse sënjanonýná luarentse y Jerusalenentse. ⁵ Chëngnaca mondétatsëmbo y montsobena jayanana, chënga tmojtsebošëse, chca ndegombre yomnana; atse nyets tempo fariseucá vida sëndbomna, y chë fariseunga mondoyena más soyënga jtsamëse chë judiëngbe leyëngaca chë inýe judiëngbiamana. ⁶ Y mora, ntšamo Bëngbe Bëtsá bëngbe bëts taitanga tojanašebuachenacá, chë obanënga jtayenama cha yochjamama puerta jtsošbuáchiyëse atse obatmana causa, šmojuánatse atšbe contra jayanama. ⁷ Bëngbe bnëtsana uta Israeloca bëts pamíllanga mondobátmana chë šbuachenana soye chëngbiamana chaóshjanguama y chíyeca, cada te bnëtë y ibeta chënga Bëngbe Bëtsá mondadorana y mondësverna. Y atse cach soyama obatmana causa, bëts rey Agripa, judiënga mora atšbe contra montsabíchamo. ⁸ ¿Ndáyeca tšëngaftanga

judiënga šmojtsichamo, chë obanënga chámuatayenama Bëngbe Bëtsá yochjamama jtsosbuáchiyama ndoñe šmontsobena ca?

Pablo tojanacuntá, ntšamo tempo cha Jesucristbeñe ošbuáchiyënga yojanaborlánama

⁹ “Y cach átšnaca sënjanjuabná atše šojamna lempe ntšamo stjobenacá jamana, Jesús chë Nazaretocábeñe ošbuáchiyënga corente chamosufrima, ¹⁰ y chca Jerusaleñentše atše sënjanma. Chë bachnangbe amëndayënga mando šmonjanatšetá, y chca, banga Jesucristbeñe ošbuáchiyënga cárceloye sënjanëtame; y jtsëbáyama ca chëngbiama montsanichamo ora, átšnaca aiñe chca chamoma ca sënjánichamo. ¹¹ Y ba soye, chë judiëngbe enefjuana yebnënguenache jabuache chënga sënjanatsetšená, chënga Jesucristo ústonana chamotsajbanama, y chëngaftaca tša etonaná sënjëtsemna causa, chë inye luarëngoca bëts pueblënguenáchnaca chënga sënjanëcamena.”

Pablo tojanacuntá ntšamo cha Jesucristbeñe ošbuachiyá tojanóbema (Hch 9.1-19; 22.6-16)

¹² “Y cachcá jamama canye te Damascoye sënjëtšaye; chë bachnangbe amëndayënga uabemanëchangá šmonjanëtšabuaché chca jamama y, cachënga choye šmonjanichmó. ¹³ Pero, uámana rey, chë benachëjana mo njetsto ora, sënjáninye canye bëts tcuinye celocana, shinýama corente más enjëtsebinýnaye, y atše y chë átšeftaca ajnëngbe shëconana corente enjëtsebuashinýinýana. ¹⁴ Nyetscanga fsënjánshajaye y atše sënjanuena canye oyebuambnayana, hebreo biyañe, mëntsá šonjëtšatsaye: ‘Saulo, Saulo, ¿ndáyeca chca šcojtsacmena ca? Cach aca bacá contsenabomá, atšbe entšanga chamosufrima tcojtsama ora, mo uacná ngmëche niñëfjiñe cha tojtsoscunjná orcá, cachá jenótsetšenana ca.’ ¹⁵ As atše sënjánayana: ‘¿Nda comna, Bëngbe Utabná ca?’ Y chë Utabná šonjanjuá: ‘Atše sëndmëna Jesús, y aca condama atšbe entšanga chamosufrima ca. ¹⁶ Pero matëtšbaná y matëtšá. Atše cbonjébëbocna jinýinýiyama aca tchojuábuayanama atše šcochjasérviamá, y chacotsetatšëmbuama y entšanga chacuacuntama, mora tconjinýe soyama y más chcoye atšbiama chochanjinýinýiye soyëngámñaca. ¹⁷ Atše chanjama judiënga y ndoñe judiënga tondaye chacmondëborlama; y morna, ndoñe judiëngbioye cbontsichamná, ¹⁸ chënga atšbe soyëngama josértama aca chacomama. Chca, chënga bacna juabnënga ndoñe chamondëtsebmna, mo ibetiñe cuaftsemnëngcá, sinó mo binýniñcá chamotsemna átšeftaca, atše chë entšangbe juabnënga binýnayá. Satanasbe cucuatšifne ndoñe chamondëtsemnama, sinó Bëngbe Bëtsabe obenánaca chamotsiyenama; chënga átšbeñe chamotsošbuáchema, y chca, chëngbe bacna soyëngama perdonánënga chamotsemnama y chënga chamotsebmnama canye luare entšángaftaca, chë ndëmuanýengbioye Bëngbe Bëtsá tšabe entšanga y chabe entšanga tojábiamá, chënga átšbeñe betsošbuáchiyama ca’ ” —cha šonjanianá.

Pablo tojanma ntšamo chë mo otjenayoquëcá tojaninýcá

¹⁹ “Chcasna, bëts rey Agripa, atše sënjanma chë mo otjenayoquëcá sënjáninýe ora ntšamo Cristo šonjaniancá; ²⁰ y natsana, Damascoca entšanga chë tšabe noticiëngama sënjanabuayená; chentšana, Jerusaleñoquënga y nyetsca chë Judea luaroquënga y ndoñe judiëngnaca; chënga sënjánainpadana bacna soyënga amama ngmëñaca chamuatenójuaboma, chca amana chamuajbaná y Bëngbe Bëtsabe benache chámuatishachama, y soyënga chamotsama jinýinýiyama chca ndegombre tmojanmama. ²¹ Chca sënjánama causa, judiënga Bëngbe Bëtsabe bëts yebnoca šmonjanishache y tmonjánbošena atše jtsóbana. ²² Pero Bëngbe Bëtsá sempre šonduájabuachana, y chca, cada te mëntscoñama, nyetscanga Bëngbe Bëtsabiamá sëndabuayinýá, uámanëngbioye y nduámanëngbioynaca; nýe ntšamo Moisés y Bëngbe Bëtsabe juabna oyebuambnayënga tmojanayancá, ntšamo yochjopásama atše sëndoyebuambná; inýetšá ndoñe. ²³ Chënga tmonjánayana: ‘Bëngbe Bëtsabe Uámana Uabuayaná, Cristo jóbana bontsemna; pero chaojóbanentšana, cha chë natsaná echántsemna obanënguentšana jtayenama, y cha judiëngbioye y ndoñe

judiëngbioye echanjabuayená, y chca, chënga mochántsetatšëmbo nÿetscanga chábeñe tmojtsošbuáchenga atsebácanënga mochtsemnama ca.’ ”

Pablo tojanma rey Agrípbioye jáyëñjanama, Jesucristbeñe ošbuachiyá chaóbemama

²⁴ Pablo, cachá jenéuyanama chë soyënga tojánayana ora, Festo mëntšá tojanáyebuachena: —¡Pablo, opá cojtsóbema! Yapa ualíaye causa, opá tcojtsóbema ca.

²⁵ Pero Pablo tbojanjuá: —Opá ndoñe quetsátsmëna, bëts uámana Festo; inÿetšá entsemna; atše sëntsoyebuambná nÿets juábnaca, y ndegombre soyënga. ²⁶ Chentše rey Agripa entsuenana, y cha puerte tšabá chë soyëngama endëtatsëmbo, chíyeca, tondayama ntjatauatjca, atše chabe delante sëntsoyebuambná; atše corente sëndëtatsëmbo chánaca chë soyëngama yotatšëmbuama, er ndayá Jesús tojanmcá, ndoñe tonjopasá ndaye iytemena chaboye. ²⁷ Bëts rey Agripa, ¿Bëngbe Bëtsabe juabna oyebuambnayënga tmojánayana soyënguiñe aca quecošbuaché? Atše sëntsetatšëmbo aíñe chiñe cošbuáchema ca —Pablo tbojaniyana.

²⁸ Chora Agripa tbojanjuá: —Batšatema más y mašcjayëñaná Jesucristbe ustoná atše jóbemama ca.

²⁹ As Pablo tojánayana: —Nÿe batšatema más o bëts cama más, atše Bëngbe Bëtsá sëntseimpadana, ndoñe nÿe bëndatbe barie, sinó nÿetscanga chë mora šmojtsuenanënga, atšcá Cristbe ústonënga chašmobiamama, pero utámenënga ndoñe chamondëtsemna, ntšamo mora atše sëntsemncá ca.

³⁰ Chorna, chë rey, chë mandado, Berenice y chë chëngaftaca imojantbiámanënga tmojantsbaná, ³¹ y luaroye tmojána chë soyama jencuéntama. Mëntšá imojtsichamo: —Quem boyabása ndocna bacna soye tonjama jóbanama chabotsemnama, ni mo utamená jtsemnama ndoñe quebnátsmëna ca.

³² Y Agripa Féstbioye tbojaniyana: —Chë Romoca bëts mandado, quem chabe soyama cháuyanama cachá ndoñe matënjábošenëse, bënga matmënjobená quem boyabása jëtsboshjonama ca.

27

Roma bëts puebloye Pablo tmojanichmó

¹ Italia ca uabaina luaroye Pablo jíchmuama tmojanenoyeuná ora, atše, quem librëša uabiamnayá, cháftaca sënjána. Chora Pablo y chë inÿe utámenënga Julio ca uabainabe cucuatšíñe tmonjánabashejuana. Julio enjamna canya chë Romoca bëts mandadbe soldadënguentša mandayá. ² Asna, fsënjánašëngo canye Adramitio puebloca barcuíñe; ya chë Asioca bëts pueblëngoye juama enjétsamna. Cesarea pueblentšana fsënjánbocna y Aristárnaca bëngaftaca enjëtsemna; cha enjamna Tesalónica bëts pueblócá, Macedonia luaroca.

³ Chë inÿe yëfsana, Sidón puebloye fsënjánashjajna. Chentše Julio, tšabá mandbomná Pábloftaca enjëtsemna; tbonjanlesenciá chabe amiguëngbioye chauabuáchama, chënga chamofjama y chamóbocuedama. ⁴ Sidonocana fsënjéftsanbocnentsana, bëngbe contra corente enjëtsebinÿiaye. Chíyeca, Chipre fshantsënga catšbioicajana, ndoñe yapa quentëtsebinÿiayëjana bënga fsënjána. ⁵ Cilicia y Panfilia luarënga béconana mar bejaycá fsënjánachnëngo, y Mira bëts puebloye fsënjánashjajna, Licia luaroca.

⁶ Chë soldadëngbe amëndayá, canye Alejandría puebloca barco chentše tonjáninÿena, Italia luaroye yojétsaye; asna, šonjanamëndá chë barcuíñe jenójaiyana. ⁷ Baseftaytentscuana uenana fsënjánana y pordonto fsënjánobená Gnido pueblentša ndirichiñe jashjanguana. Cabá bëngbe contra enjëtsebinÿiaye causa, Salmón luarëjana fsënjánachnëjna, Creta fshantsënga béconana, ndoñe yapa quentëtsebinÿiayëjana. ⁸ Y chca, pordonto bejaycá fsënjánana, fshantsënga béconana; chentšana, canye pueblo, Tšabe Puertënga ca uabáinentše fsënjánashjajna, Lasea ca uabaina pueblo béconana.

⁹ Chca, bayté tonjanochñengo y chora chë bejaycá jama puerte resjo enjésemna, er ya chë judienga bayenga jobáyama te tonjanochñengo, Bëngbe Bëtsá chëngbe bacna soyëngama cháuaperdonama, y chora chë uaftena tempo joshjanguama ya enjétsobeco.

¹⁰ Chíyeca Pablo chë entsanga mëntsá tonjanabuayená: “Baconga, atse šontsinýana mora puerte resjo entsemna bejaycá játama, y ndoñe tšabá queochátsmëna, ni chë uasmanëshangama, ni chë barcuama y bëngbiamana cach ndoñe, mo nderado muanjanóbana ca.”

¹¹ Pero chë soldadëngbe amëndayá Páblëbioye ndoñe ntjoyeunayana; más, chë barcuentsa mandayá y chë barco nduñbiyoeye aña. ¹² Ndoñe tšabá yonjamna, chë barco chora enjésemnentše chë uaftena tempëntscuana jëftsemnana; chë causa, nýa mo nýetscanga tmonjanenoyeuná cachiñe bejaycá chentšana játama, nderado cuanjobenaye Fenice puebloye jashjanguama y chentše jëftsemnana chë uaftena tempo tojopochocantscuana. Chë pueblo Creta luaroca enjamna; y choye jamashënguamna enjamna shinýe endbetsenatjëmbambana juachoica tsjuanoicajana y tsmanoicajana.

Mar béjayiñe puerte uaftena y binýia tojanóshjango

¹³ Chentšana tonjanontsé tsmanoicana batšá binýiayana, chíyeca chë entsanga tmonjanjuabó ya yojsanopodena jtëtóntsana jama ca. As, chentšana fsënjëftsambocna y bejaycá fsënjána, Creta fshantsënga beconañëjana. ¹⁴ Pero baseftayté chentšana, chë fshantsëngocana tonjanontsé corente jabuache binýiayana y chë barquëshoye enjétsoshjajuana. Chë binýia yojanabaina Nordeste binýia ca. ¹⁵ Chë barcna nýe chë bínýiëbe ponto tonjanontsé uayana; chë binýia enjétsobayëjana jama ndoñe quentétsopodena causa, šonjanotocá nýe ntšamo tojtsebinýiacá chašúyambama. ¹⁶ Chentšana fsënjánachñëjna Cauda ca uabaina stëtsoicajana, base fshantsënga mar béjayoca; chiñe ya ndoñe tša jabuache quentétsëbinýiaye y pordonto fsënjánobená buyeshoicana jtabocnana chë barco enjanasjá canouše, ndoñe chaondëtsóndbemama. ¹⁷ Ya chë barquëshoye fsëntanëshëngo orna, chë entsanga lazëjangaca chë barquëshana tmonsanabatsëcaca, más uamorochëshana chaotsamnana. Pero chënga monjétsauatja nderado chë barco chë Sirte ca uabaina cascajuentše nanjësánjua; asna, chë barcuentsa ancla tmonjanashëbëútsëna, chë barco ndoñe betesco chaondëtsábonjnana, y ntšamo enjësantbinýiaycá fsënjána. ¹⁸ Chë inýe yëfsana y chë binýiayana cabá jabuache enjésemna causa, chënga tmonjanontsé chë barcuentsa uasmanëshangá jtsëshbuétsëtsana; ¹⁹ y unga tianoye bëngnaca šonjanotocá, cach bëngbe cucuátšëca, chë barcuentsa soyënga buyeshoye jtsëtšanana. ²⁰ Baytentscuana bënga ndoñe chibiatanobená jinýana ni shinýe, ni estrellatëmënga, tša tonjétsëbetata causa; y tša jabuache enjétsëbinýiaye causa, bënga ya ndoñe quefstëtsanobatmana chentšana jótšocana.

²¹ Ya bayté enjésemna y chëntscuana tondaye saná ntjascá fsënjésemna. Chentšana, Pablo bëngbe tsëntsaca tonjantsá y tonjánayana: “Baconga, tšabá manjamna atse mašmënjanoeyená y Creta luarocana ndoñe matmënjëftsambocna; chca mora ndoñe mal mamojtsepasá y ndoñe nýa nýetsá matmënjobuetše. ²² Pero mora ngmënaca ndoñe matsmëñëngana; masque chë barco echantsenatjëmba, tšëngaftanguentšá ndocná queochatóbana. ²³ Ibeta canýe ángel šonjébëbocna; Bëngbe Bëtsá, ndabia atse sëndmëna y nda sëndëserveda, cha tbojichmó; ²⁴ y chë ángel mëntsá šonjauyana: ‘Pablo, ndoñe matauatjana; entseyta aca chë Romoca bëts mandádbioye chacotsama, y aca Bëngbe Bëtsábia cómnayeca, nýetsca quem barcuñe ajnënga jobanámentsana cha echanjatsebacá ca.’ ²⁵ Chcasna, baconga, ndoñe matauatjëngana, er atse Bëngbe Bëtsábeñe corente sëntsošbuaché y lempe ntšamo chë ángel šonjauyancá echanjóbocna. ²⁶ Pero mora entseyta canýe fshantse mar béjayiñe chašúshejanguama ca” —cha tonjanëyana.

²⁷ Canýe ibeta, uta semana fsënjánana chentšana chë Adriático ca uabaina mar béjayiñe fsënjésemna, y nýe ínýoye y ínýoye chë binýia šonjétsëyambaye. Y mo tsëntseto yojésemna

orna, chë barcuentsä trabájayënga tmojanjuabó ya fshantse béconana imojétsemna ca. ²⁸ As chënga tmonjanmedidá ntsachetšá chë búyeshe buatyoye inamnama y tonjanóbocna unga bnëtsana y chnënguana metro; más chcoye cachiñe tmonjanmedidá y uta bnëtsana canýsëfta metro tonjanóbocna. ²⁹ Chënga monjétsauatja nderado bëts ndëtšbéngaca nanjetsántšëtjiama; asna, chë barco stëtšoicajana canta ancla buyeshoye tmonjanashëbëútsëna, chë barco ndoñe más chaondëtsábonjnama, y tša monjëtseboše betscó chaobínýnama. ³⁰ Chëntscuana, chë barcuentsä trabájayënga tmojánbošëna chentsana jtsachetana; chamna, chënga tmojanontšé chë canouše buyeshoye justjanguana, pero chca imojétsama, mo chë anclënga chë barco natsanoica cuafstëstjajuancá. ³¹ Pero Pablo chë soye tojáninýe, y chë soldadëngbe amëndayábioye y chë soldadëngbioye tonjanëná y mëntšá tonjanéyana: “Chë barcuentsä trabájayënga cach quem barcuentsë ndoñe chamonjoquedase, tšëngaftanga ndoñe quešmochatobenaye muentšana jótsbocama ca.”

³² As, chë soldadënga tmonjána y chë canoušentsä lazëjënga tmontsantëtsetse y buyeshoye chëse tmontsantsatse.

³³ Enjëtsebinýana ora, Pablo nýetscanga tonjanaimpadá ndayánaca chamosëngama, mëntšá jáuyanëse: “Ya uta semana entsemna y tšëngaftanga ni mo batšatema chešmatamaná, y tondaye chešmatsbmuananga. ³⁴ Diosmanda, masque nýe mo batšatémnaca šmochjase. Chca cmontsamna jamana ndoñe chašmondóbanama, er ndocná ndocá queochatspása ca.”

³⁵ Pablo, chca tonjánayanentsana, canýe tandëse tonjanca y nýetscangbe delante Bëngbe Bëtsábioye tbontanchuá. Chorna, tonjanjatá y tonjanontšé jasama. ³⁶ Chentsana nýetscanga tmonjanenñemó y chëngnaca tmonjanse. ³⁷ (Chë barcuentsë nýetscanga fsënjamna uta patse y canýsëfta bnëtsana y chnënguanënga.) ³⁸ Ntšamo imnabošcá tmonjansentsana, buyeshoye trigo tmontsanashaná, chca, chë barco ndoñe yapa chaondëtsautama.

Chë barco tojtsanenatjëmbe

³⁹ Ya tonjanbinýna ora, chë barcuentsä trabájayënga ndoñe quemëntëtsetatšëmbo ndaye fshantse chentšë bëtsemnama, pero tmonjáninýe chë fshantsentšë canýe luare jachañe, chë béjaye chë luaroye omashjuanentšë, y chiñe canýe chënyañe enjamna; as chënga tmonjanjuabó jarrepárana nderado cuanjobenaye chëjana chë barco chë fshantsoye juyambana. ⁴⁰ Asna, chë anclentsä lazëjënga tmontsantëtsetse y chë anclënga buyeshoye tmontsanboshjuana, y chë timón, chë barco juyambama oservena soyentsä uabatsëcnëjëngnaca tmontsanjafjoná. Chorna, chë barcuentsä natsanoica niñëšiñe entšëjua tsbanánoye tmontanëšëngo, y chë binýia tonjanma chë barco chaontšé chë chënyoye juabëconama. ⁴¹ Pero chë barco canýe luaroye tonjánashjango, y chentšë chë béjaye catatoicajana enjetsobuá y chë barco cánýentšë, bëtscá cascajo buyeshiñe binýnentšë tontsanajo. Chë barcuentsä natsanoica lado chë cascajuiñe entsanajuena, ndócnoye juabónjuama ntsopodencá, y chë stëtšoica lado puerte entsanashatyiyná y lempe entsanandbiamná, yapa binýia causa y búyeshe chentšë enjëtsojantšëtaye causa.

⁴² Chora, chë soldadënga tmonjanjuabó chë utámenënga jtsëbáyana, jachbabëse chënga ndoñe chamondëtsachetama. ⁴³ Pero chë soldadëngbe amëndayá inaboše Pablo jatsbocama, y chíyeca chë soldadëngbioye ndoñe chenatanalesenciá chca jamana; y tonjanmandá nýetscanga chë jachbabama obenëngna natsana chë buyeshoye joshbuetsana tsachoye chamuashjanguama, ⁴⁴ y chë ínýengna tablëshënguiñe o chë barcuentsä pedazënguiñe chamoshbuetsama. Y chca, nýetscanga fsënjanošená tšabá y ndocá ntjapasacá fshantsoye jashjanguama.

28

Pablo Malta luaroca

¹ Ya n̄yetscanga fshantsoca t̄sabá fs̄enj̄tsemna ora; fs̄enj̄antats̄ẽmbona ch̄ẽ luare Malta ca yojanabaina. ² Ch̄ẽ luarent̄sa ents̄anga b̄ẽngaftaca corente t̄sabá mándbom̄n̄ga monj̄tsemna; can̄yẽ íñeshe tmonjanangbotj̄o y šonjan̄ẽbuaja chocha b̄ẽnga jat̄ošboniyama, er t̄sa enj̄etsaftena y yapa enj̄etses̄sna. ³ Pablo tojanatbaná básefta buashana chames̄ẽfj̄enga y ch̄ẽ íñeshoye enj̄etseshac̄naye ora, can̄yẽ m̄ets̄cuaye toj̄ánbocna y enj̄etsachaye, chent̄še yapa obon̄yaye causa, y Pábl̄ẽbe cucuat̄siñe tontsanonj̄yá. ⁴ Ch̄ẽ luarent̄sa ents̄anga, ch̄ẽ m̄ets̄cuaye Pábl̄ẽbe cucuat̄siñe vojtsajon̄yanama tmonj̄ánin̄yẽ ora, monj̄etsenats̄ẽsnaye: “Quem boyabása ndegombre in̄ya obanayá cuanm̄ena; mar b̄ejayoca joban̄ament̄šana tojotsbocá, pero chca uamana causa, diosá Justicia ndoñe quebnatsles̄encia cha vida chaotsebom̄nama ca.”

⁵ Pero Pablo tontsanenacuest̄et̄oná y íñeshoye ch̄ẽ m̄ets̄cuaye tbontsants̄at̄še y Pablo ndocá chenatanpasá. ⁶ Ch̄ẽ ents̄anga imoj̄etsejuabnaye chábioye bochtsacuefshachá y n̄yẽ ndeolpe obaná yochjashajaye ca. Pero b̄en tonjanoch̄n̄go y ndocá chenátanopasama ch̄ẽnga tmonj̄ánin̄yẽ ora, ya ndoñe cachcá quem̄ent̄ets̄anjuabnaye y tmonjanont̄šẽ ichámuana Pablo can̄yẽ dios inamna ca.

⁷ Chent̄ša b̄econana inamna ch̄ẽ luarent̄sa mandayabe fshants̄ẽnga. Cha šonjan̄ẽbuaja y corente t̄sabá šonjanacuedá, unga tents̄cuana. Ch̄ẽ taitana Publio ca inauabaina. ⁸ Ch̄ẽ tempo, Públīẽbe taitá šocá jutsn̄ëshañe inaj̄ajona, calentórac̄a y buiñeca buamach̄n̄ẽjuanánaca. Pablo tonj̄ána cha jin̄yama y tonj̄ánamash̄ẽngo; B̄ẽngbe B̄ets̄ábioye tbonjanimpadá y ch̄ẽ šocábeñe chabe cucuat̄s̄ẽnga tonjanjajó, y chca, cha shnaná enj̄etsats̄m̄ena. ⁹ Chca tonjanopasá chent̄šana, ch̄ẽ luarent̄sa in̄yẽ šoqūenga Pábl̄ẽbioye monj̄ánajna y cha enj̄ánashnaye. ¹⁰ B̄ets̄cá t̄šabe soȳenga chent̄še b̄ẽngbiama tmonjanma, y cachiñe jat̄ama ya ch̄ẽ barcuñe fs̄entanenojayenga orna, lempe nt̄šamo bejaycá jama šonjan̄ẽjbotcá ch̄ẽnga šonjanat̄šatá.

Pablo Romoye toj̄ánashjango

¹¹ Ch̄ẽ fshants̄ent̄še mar b̄ejayoca unga ishin̄yẽ fs̄enj̄ẽftsemna, y chent̄šana can̄yẽ Alejandriocana yojanabá barcuñe fs̄enjanenoyajé; ch̄ẽ barco n̄yets uaftena tempo ch̄ẽ luarent̄še yoj̄ẽftsamna y enjanabaina Cástor y Pólux ca, mo ch̄ẽ roman̄ẽngbe uta diosata catsatcá. ¹² Chent̄šana, Siracusa b̄ets̄ puebloye fs̄enj̄ánashjajna y chent̄še unga te fs̄enj̄ẽftsemna; ¹³ y chent̄šana fshantse b̄econana bejaycá fs̄enj̄ána, Regio puebloye jashjangūents̄cuana. Ȳẽfsana, tsmanoicana tsjuanoye enj̄etsebin̄ȳiaye, y chca, ch̄ẽ in̄yẽ ȳẽfsana Puteoli puebloye fs̄enj̄ánashjajna. ¹⁴ Chent̄še básefta Jesuc̄rístbeñe ošbuáchiȳenga fs̄enj̄ánan̄ȳena, y šonjan̄ẽbuaja ch̄ẽngaftaca can̄yẽ semana chent̄še j̄ẽftsaj̄etanama; y chent̄šana Romoye fs̄enj̄ẽftsanbocna. ¹⁵ Romoca Jesuc̄rístbeñe ošbuáchiȳenga ya imoj̄etsetats̄ẽmbo b̄ẽnga choye fchjanashjajnama; chcasna, ch̄ẽnga tmonj̄ánbocna b̄ẽnga jaj̄ebenguama can̄yẽ luare Foro del Apio y Unga Tabern̄enga ca uabainóntscoñe. Pablo ch̄ẽnga tonj̄ánan̄ȳe ora, B̄ẽngbe B̄ets̄á tbontanchuá y puerta añemoca enj̄etsemna. ¹⁶ Romoye fs̄enj̄ánashjajna ora, soldad̄ẽngbe am̄ẽndayá Pábl̄ẽbioye tbonjalesenciá cán̄yabe yebn̄ent̄še chaotsiyenama, y tonjanmandá can̄yẽ soldado chabotsebojan̄yama.

Ndayá Pablo Romoca tojanma

¹⁷ Choye fs̄enj̄ánashjajnent̄šana unga tianoye, Pablo tonjanmandá chent̄še imnoyena judīenga más uáman̄ẽnga chamob̄econama; y n̄yetscanga ya tmoj̄ánenef̄jna ora, cha tojan̄eyana: —Cats̄átanga judīenga, masque at̄še tondaye chiyatsma b̄ẽnga judīenga mondb̄ets̄sama soȳẽngama contra, ni b̄ẽngbe b̄ets̄ taitanga imojanamana soȳẽngama contra, judīenga Jerusalenoca šmonjanishache y roman̄ẽngbe cucuat̄siñe šmonj̄ánboshjona. ¹⁸ Ch̄ẽ roman̄ẽnga lempe šmonjant̄já chent̄šana, monj̄etseboše at̄še j̄etsboshjonana, er ndocna bacna soye chemátanin̄ȳena at̄še j̄obanama chašotsemnama. ¹⁹ Pero ch̄ẽ judīenga

ndoñe quemtétseboše atše chašmuatsboshjonama; chíyeca, šonjanotocá jáimpadana cach Romoca bēts uámana mandado cháuyana atše tšabá o ndoñe tijanmama, masque atše tondaye quetsátsbomna, cach atšbe luarentša entšanga, judiēngbe contra jayanama. ²⁰ Chíyeca, atše tcbonjúbuaja jányama y jáuyanama, er ndayama chē Israeloca entšanga puerte jtsošbuáchiyēse mondobátmanama, chē obanēnga mochtayenama, atše mora utamená sēntsemna ca —tojanēyana.

²¹ Chora chēnga tmojanianyana: —Bēnga ni mo canye tsbuanácha Judeocana fchiy-atáyēngaca acbiama noticiēngaca, y ni canye catšata judío, chocana moye ashja-jnēnguentšá, ndocna bacna soye acbiama chešnatacuntá. ²² Bēnga fsēntseboše jouenana ntšamo aca cojuabnama, er ntšamo Jesucristbe ustonēngbiamama fstsētátšēmbcá, entsemna ana nýets luarenache chēngbe contra entšanga imojtsichamo ca.

²³ Asna, canye tescama Pablo tmojanianyana chca chaotsemnama; y chē tena, ba entšanga chē Pablo posada inabomnoye tmojanobeconá. Y cachēscana tojanjētanēntscuana, Pablo entšanga yojanētsētsná Bēngbe Bētsabe amēndayama, ndayama cha ininýe y inatátšēmbo; y yojtsentšena chēnga jáyēnjanama Jesúsbeñe chamotsošbuáchema, Moisesbe leyēnguentša soyēngaca y Bēngbe Bētsabe juabna oyebuambnayēngbe uabemana librēšangañe soyēngaca. ²⁴ Báseftanga aíñe imojtsošbuáchiye ntšamo Pablo yojtsanētsētsnacá ndegombre bētsemnama, pero inýengna ndoñe. ²⁵ Nýetscanga ndoñe cachcá montsanjuabnaye causa, tmojanontsé chentšana jésebocanana. As Pablo tojanēyana: “Nýets razónaca chē Uámana Espíritu tšēngaftangbe taitanga tojanēyana, Bēngbe Bētsabe juabna oyebuambnayá Isaíasbiajana, mēntšá:

²⁶ Motsa chē entšanga jauyanama:

‘Bētscá šmochantsuenana, pero tondaye quecmochátēsertana; tša šmochantsafšna, pero tondaye quešmochátinýe.

²⁷ Muentša entšanga ainánaca josértama ndoñe quemátsboše causa, chēnga nduauenanēnga montsemna y nduabinýnēngnaca; chēnga bomínýeca ndoñe chamondobená jinýama, ni chēngbe matscuašeca jouenama, ni chēngbe ainánaca josértama ndoñe chamondobená, chca, atšbe benache ndoñe chamondishachama, atše ndoñe ntjátsebacama ca.’ ”

²⁸ Pablo chora mēntšá tojanēyana: “Ndegombre šmochtsetátšēmbo, cach quem Bēngbe Bētsabe buayenana soyēnga entšanga bacna soyēnguentšana játsēbacama, chē ndoñe judiēngbioye mochanjábuayenaye, y ndegombre chēnga cocayé aíñe mochanjóyeunaye ca.” ²⁹ (Pablo chca tojánayana ora, chē judiēnga chentšana imojésebocana y tša imojtse-natsētsnaye.)

³⁰ Pablo uta uata chentše tonjanoquedá canye uántsamena yebnentše; y nýetscanga cha jauatsētsayama monjánajnēnga cha enjanēbuájajana. ³¹ Nýetscangbe delante puerte añémoca entšanga enjanabuayiyiná Bēngbe Bētsabe amēndayama, y enjanabuatambá soyēnga Bēngbe Utabná Jesucristbiamama, y ndocna Romoca mandayá quebēnjatanauyá chca jtsamama.

Romanos

Pablo Romoca ošbuáchiyënga jacheuayama

¹ Atše Pablo, Jesucristbe oservená, quem tsbuanácha sèntsabiamná. Bëngbe Bëtsá šonjanchembo Jesucristbe ichmoná jtsemnama, y šonjanbocacá chabe tšabe noticiëngama entšanga chayábuayenama.

² Ya bayté entsemna, Bëngbe Bëtsá chabe juabna oyebuambnayëngaftaca chë tšabe noticiënga entšanga tojanašebuachená, y chënga chca tmojëftsánábema Bëngbe Bëtsabe uabemana palabrenguiñe. ³⁻⁴ Chë tšabe noticiëngna, chabe Uaquiñá Bëngbe Utabná Jesucristbiamá jtsóyebuambnayana. Entšá quetsomñecana, tojanonýná canýe rey Davidbentša entšábentšana; pero chabe espíritu sempre uamanáyecna, Bëngbe Bëtsá chabe obenánaca entšanga tojaninýanyé Jesucristo chabe Uaquiñá bétsemnama. Cha chca tojaninýanyé chë Uaquiñá cháuatayenama cha tojanma ora.

⁵ Chábeyeca, Bëngbe Bëtsá atše canýe bëts soyama šojanábuayana, Jesucristbe ichmoná jtsemnama, chabe soyëngama entšanga jábuayenama, y nyets luarënguenache Jesucristbeñe ošbuáchiyënga chamotsemnama, y chca, ntšamo cha yomandacá chënga chamotseyeunanama. ⁶⁻⁷ Tšëngaftángnaca chëngbeñe šmontsemna, tšëngaftanga chë Romoca šmoyenënga, ndëmuanyënga Bëngbe Bëtsá tcmojáchembo Jesucristbenga chašmotsemnama. Atše tšëngaftangbiamá sèntsabiamná, tšëngaftanga Bëngbe Bëtsabe bonshánënga y chabe entšanga chašmotsemnama chëmbonënga. Atše sèntsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y chaboma tšëngaftanga ainaniñe tšabe ebionana chašmotsebonnama.

Pablo tša inaboše Roma bëts puebloye jama

⁸ Jabojátšamna, Bëngbe Bëtsá, Jesucristbiamá šcuatschuá, cada ona tšëngaftanguentšabiama, er nyets quem luariñe entšanga tša monjesoyebuambná tšëngaftanga Jesucristbeñe bëtscá šmojtsošbuáchema. ⁹ Bëngbe Bëtsá, nda nyets ainánaca sëndëserveda, tšabe noticiënga chabe Uaquiñabiamá abuayinayañe, endétatšëmbo atše nyets tempo Bëngbe Bëtsáftaca stsencuénta ora, tšëngaftangbiamá sëndétseimpadanama; ¹⁰ y mora Bëngbe Bëtsá sëntseimpadana, nýa mora y cha tojtsebošëse, chašolesenciá jama tšëngaftanga jautsëtsayama. ¹¹ Er atše tša sënýešëboše tšëngaftanga jányama, chca, atše chayobená jamama chë Uámana Espíritbentšana yóbocana tšabe soyënga tšëngaftanga chašmotsebonnama; y chca, tšëngaftanga ainaniñe bëts añemo chašmotsebonnama, y Jesucristbeñe corente chašmotsošbuáchema; ¹² o más tšabá jayanamna, tšëngaftanga y átšeftaca mochjenájabuache ainaniñe bëts añemo jtsebonnama, tšëngaftanga y átšnaca Jesucristbeñe tša imošbuachéyeca.

¹³ Y morna, Jesucristbeyeca catšátanga, sëntseboše tšëngaftanga chašmotsetátšëmbo atše ba soye jama tijájuaboma, tšëngaftanga jautsëtsayama, pero méntscoñama ndoñe tsjobenaye. Atše sëntseboše ndayá chayobená jamana ínýënga tšëngaftangbioca Jesucristbeñe chamotsošbuáchema, ntšamo ínýëngbeñe ndoñe judiëngbeñe tonjopasacá. ¹⁴ Atše Jesucristbiamá canýe oservená sëndmëna, y chíyeca nyetscángaftaca obligaciönaca sëntsemna, chë pueblënguiñe oyenëngaftaca y bën tjoye oyenëngaftaca, chë uatsjinýenëngaftaca y ndoñe chcangaftácnaca. ¹⁵ Chíyeca atše tša sëntseboše tšëngaftanga chë Romoca šmoyenëngnaca chë tšabe noticiënga jábuayenama.

Chë tšabe noticiënga Bëngbe Bëtsabe obenana jtsinýanyayana

¹⁶ Atše ndoñe quetsátëuatja chë tšabe noticiënga jtsabuayiynayama, er chë noticiënga jtsinÿanÿnayana Bëngbe Bëtsabe obenana; y chë obenánaca, nÿetscanga Jesucristbeñe ošbuáchiyënga jtsobenana atsebácanënga jtsemnana, natsana chë judiënga chca ošbuáchiyënga, pero chë ndoñe judiëngnaca. ¹⁷ Er chë tšabe noticiënga jtsinÿanÿnayana ntšamo Bëngbe Bëtsá inétsama entšanga chabe bominiñe tšábenga chamotsemnana. Y entšanga chabe bominiñe tšábenga jábiamana, chënga Jesucristbeñe tmojtsošbuáchema. Ntšamo Bëngbe Bëtsabe uabemana palabrenguiñe endayancá: “Nÿe ndabiana Bëngbe Bëtsá tojama chabe bominiñe tšabia chaotsemnana, cha Bëngbe Bëtsábeñe betsošbuáchema, cha ndegombre chë nÿetsca tescama yomna tšabe vida echántsebmna ca.”

Bëngbe Bëtsabe delante nÿetscanga culpa bomnënga mondmëna

¹⁸ Bëngbe Bëtsá celocana tojinÿanÿé, chë uabouana castigo, tša tbojetnama entšangbiana chaotsemnana, ainaniñe bacna juabnënga bomnëngbiana y chë bacna soyënga amëngbiana y ndëmuanÿengbiana, masque Bëngbe Bëtsabe ndegombre soyënga jtsotatšëmbñana, tša bacna soyënga tmojtsama causa, ndoñe ntjalesénciana cachënga jtsiyenama ntšamo ndegombre yomncá. ¹⁹ Bëngbe Bëtsá echanjácastigaye, er ntšamo entšanga imobencá Bëngbe Bëtsabiana jtsetatšëmbuama soye, chëngaftaca sempre endëtsemna. Y chca endmëna, Bëngbe Bëtsá chë soye tojinÿanÿéyeca. ²⁰ Bëngbe Bëtsá quem luare tojanma orscana, entšanga mondetsovena botamana josértana, Bëngbe Bëtsabe obenana ndocna te yochjëftsopochócama y cha ndegombre Bëngbe Bëtsá yomnana. Chë soyënga Bëngbe Bëtsabiana entšanga quemátobena jinÿana; nÿe jtsetatšëmbuamna aíñe. Entšanga mondobena chë soyënga Bëngbe Bëtsabiana jtsetatšëmbuana, cachá tojanma soyëngaca. Chcasna, chënga ndoñe quemátobena jayanana bacna soye tmojama, cha nduabuatma causa ca. ²¹ Chënga Bëngbe Bëtsabiana mondetatšëmbo, pero ndoñe ntsebošana chábioye jadórana, “aca ndegombre Bëngbe Bëtsá condmëna ca” jtsichámëse, ni cha ntsatschuanayana. Pero, ntšamo chënga tmojtsejuabnacá tondaye ntsámanana; ndoservena juabnëngaca y bacna juabnëngaca montsiyena, y chca, chënga montsiyena, jtsamëse ntšamo cachëngbe juabnënga yomncá, mo ibetiñe cuaftsajncá. ²² Chënga jtsichámuana corente osertánënga imomna ca, pero ndegombrna juabna ndbomnënga mondmëna. ²³ Chënga ndoñe ntsadoránana Bëngbe Bëtsá, chë ndocna te yochjëftsobaná; chë cuenta, soyënga tmojobopormá mo entšangcá, y chëngna aíñe jóbanana; o soyënga shloftšëngcá o bayëngcá, o osjojnayëngcá, y chënga diosënga imomna ca jtsejuabnayëse jtsadoránana.

²⁴ Chíyeca, Bëngbe Bëtsá cachcá tojónÿa, cachëngbe ainaniñe puerte bacna juabnëngaca mandánënga chamotsiyenama, y chca, bacna soyëngnaca ínÿengaftaca imojtsama; chë soyëngamna jtsëuatjana chënga entsamna. ²⁵ Chënga chca jtsemnana, er ndoñe tmonjábošena Bëngbe Bëtsabe ndegombre soyënguiñe jtsošbuáchiyana, pero chë ndoñe ndegombre soyënguiñe cocayé jtsošbuáchiyana; chënga jtsadoránana y jtse servénana, Bëngbe Bëtsá quem luarentše tojama soyënga; pero ndoñe ntsadoránana, ni ntseservénana cach Bëngbe Bëtsá, chë nÿetsca chë soyënga tojanmá. Entšanga nÿets tempo cha chamotsatschuaná. Chca chaotsemna.

²⁶ Entšanga chca ndoñe tšabá tmonjámayeca, Bëngbe Bëtsá cachcá tojónÿa, chënga ínÿengaftaca bacna soyënga jtsamama chamotsebošama; chë soyëngamna jtsëuatjana chënga entsamna. Y chca, chë shembásengnaca tmojtsajbaná boyabásengaftaca jtsamana ntšamo tšabá yomncá, inÿe shembásengaftaca bacna soyënga jtsamama. ²⁷ Cachcá, boyabásenga tmojtsajbaná shembásengaftaca jtsamana ntšamo tšabá yomncá; y tša imojtseboše inÿe boyabásengaftaca bacna soyënga jtsamama. Chënga chë inÿe boyabásengaftaca bacna soyënga imojtsama causa, entsamna jtsëuatjana, y chë soyëngama castigánënga mochántsemna, cachëngbe cuerpënguiñe jasúfriase, ntšamo chëngbe bacna soyëngama yojtsëmerecencá.

28 Chënga ndoñe tmonjábošena jtsiyenana jtsejuabnayëse, ntšamo entšanga Bëngbe Bëtsabiamama imotatsšëmbcá ndegombre bëtsemnama. Chíyeca Bëngbe Bëtsá cachcá tojónya, cachëngbe ndbémana juábnaca chamotsiyenama; y chca, chënga ba soyënga jtsamana, jamama ndoñe yontsamncá. 29 Chënga nyetscna bacna soye jtsamana: ainaniñe nyetscna bacna juabna jtsebomnana, nye cachëngbiamama bëtscá soyënga jtsebomnana tša jésebošana, y ínÿengbioye ntšámnaca jáborlama jtsebošana; chënga nye játsbošana inya tojtsebomna soyënga jtsebomnana, ínÿenga jtsëbánayana. Mondmëna penzentserënga, ínÿenga áingñayënga, puerte bacna soyënga ínÿengbiamama bošënga, y uayátsenayënga. 30 Chënga ínÿengbiamama podesca jtsóyebuambnayana, Bëngbe Bëtsá jtsáyayana, ínÿenga jtsóyanguayana, nye cachëngbe soyënga más iuámana ca jésejuabnayana, tša jtsenábotamnayana, jésejuabnayana ntšamo muanjobenaye más bacna soyënga jamana; chëngbe bëtsetsangbioye ndoñe ntsayaunanana. 31 Chënga ndoñe ntsebošana chë tšabe soyëngama chaósertama, tondayama palabra ndbomnënga, ndocnábioye ntsebobonshánana y ndocnabiamama ntjóngmiana. 32 Y chënga corente mondëtatšëmbo chca soyënga amëngbiamama, Bëngbe Bëtsá chabe leyíñe tojayana jóbanama yojtsëmerecena ca; pero masque chca, chënga nyets tempo chca jtsamana, y oyejuayënga jtsënyayana ínÿenga cachcá tmojtsama ora.

2

Bëngbe Bëtsá echanjama chë ndoñe tšabe soye amënga bëts castigo chamotsebomnana

1 Chcasna tsëngaftanga, chë ínÿenga ndoñe tšabá montsama ca šmojtsichámënga, ndoñe quešmatobena jayanana ndáyeca chca cach tsëngaftanga šmojama soyëngama. Tsëngaftanga chca ínÿengbiamama šmojtsichamo ora, jtsinÿanyñayana cach tsëngaftangnaca ndoñe tšabá šmonjamama, y castigánënga jtsemnana cmontsamna, er tsëngaftanga cachëngcá šmojtsiyena. 2 Bënga mondëtatšëmbo, Bëngbe Bëtsá ntšamo ndegombre yomncá inétsamama, chë chca amëngbiamama ndoñe tšabá tmonjama ca y castigánënga jtsemnana yojtsamna ca cha tojayana ora. 3 Y tsëngaftanga, chë ínÿenga ndoñe tšabá montsama ca šmojtsichámënga, y cachca soyënga šmojtsama, ¿šmojatsjuabná Bëngbe Bëtsabe castigüentšana šmochjotsbocá ca? 4 Bëngbe Bëtsá tsëngaftangbiamama corente tšabe juabna endbomna; mora ndoñe quecmátacastigaye, y tsëngaftangacna puerte uantado nye chca endëtsemna. ¿Chama tsëngaftanga cha šmojtsábotena? ¿Ndoñe šmondëtatšëmbo Bëngbe Bëtsá chca corente jtsababuánÿeshanëse cmojtsënÿa, tsëngaftanga juabna chašmotrocama y chabe benache chašmuishachama cha yobóšeyeca? 5 Er tsëngaftanga ndoñe quešmátsboše chacmotsësertánama, y bacna soyënga amama jtsajbanama ndoñe quešmátsboše causa, šmontsama más bëts castigo chašmotsebomnana, chë ndayté Bëngbe Bëtsá ntšamo entšanga tmojamcá tšabá o ndoñe tšabá bëtsemnama yochjayana ora; chë te, Bëngbe Bëtsá echanjamánda chë ndoñe tšabe soye amënga bëts castigo chamotsebomnana, y chë tšabe soye amëngna, uacanana soye; y chca echanjama ntšamo ndegombre yomncá, y echanjínÿanyÿe cha tša tbojetna, entšanga ndoñe tšabá tmonjamama. 6 Chca, chë te, ntšamo cada ona tojëftsemama, Bëngbe Bëtsábentšana echanjóyëngacñe. 7 Ndëmuanÿenga nyets tempo tšabá jtsamëse imoyena, y chca imonguá Bëngbe Bëtsá más uámanënga chauabiamama, cha chëngbiamama tšabá chaotsoyebuambná y tšabe vida jtsebomnana chaoma; chë te chëngbiamama Bëngbe Bëtsá echanjama, chë nyetsca tescama yomna tšabe vida chamotsebomnana. 8 Inÿenga imoyena, nye cachëngbe juabnëngaca cachënga tšabá jtsomñama; y ntšamo ndegombre tšabá yomncá tmojtsaboté, ntšamo ndoñe tšabá yomncá jtsamama. Y Bëngbe Bëtsá chë te, ndoñe tšabá tmonjëftsobuachjanguamna puerte etonaná echanjayana nyetsca tescama castigánënga jtsemnana chënga yojtsamna ca. 9 Bëngbe Bëtsá echanjama, chca amëngna puerte chamosufrima y lastemcá chëngbiamama chaotsemnana, er yapa tsetšënanana chëngbiamama echanjëftsemna; chca echántsemna chë chcángbeñe judiënga imomnëngbiamama natsana,

y ndoñe judiëngbiámnaca. ¹⁰ Pero chë te, Bëngbe Bëtsá echanjama, ntšamo tšabá yomncá amëngna puerte uámanënga chamotsemnana, chëngbiama corente tšabá echanjóyebuambaye, y echanjama chënga cháftaca tšabá tempcá chamotsatsmënana; y chca echántsemna chë chcángbeñe judiënga imomnëngbiama natsana, pero ndoñe judiëngbiámnaca.

¹¹ Er Bëngbe Bëtsabiama nyetscanga cachcá monduámana. ¹² Chë Moisesbe ley ndoñe monduábomnënga, bacna soye tmojamama castigo mochántsebmna, masque leyënga ndoñe tmonduábomnëse, ndayá yojtsamna jamama chaúyanama; y chë Moisesbe leyënga imuabomnëngbiama, bacna soye tmojamama, Bëngbe Bëtsá echanjayana chënga ndoñe tšabá tmonjama ca y castigo chamotsebmna ca, chë leyënguiñe iuayana soyëngaca. ¹³ Chca endmëna, er Bëngbe Bëtsá ndoñe queonybatsma entšanga chabe bominiñe tšabënga chamotsemnana, nye ntšamo chë leyiñe iuayancá tmojt-suenanama, sinó ntšamo leyënguiñe iuayancá, ndayá jamama yojtsamncá tmojt-samëse. ¹⁴ Chë ndoñe judiënga chca leyënga ndoñe quematábomna, pero chëngbe ainanentša juabnënga tojtsëtsësná ndayánaca jamana, y ndayá chamotsamama ntšamo chë leyënguiñe tomandancá chënga tmojamëse, chënga jtsinýanýnaya tšabá imotátšëmbo ndayá aíñe o ndoñe inétsamna jamama, masque leyënga ndoñe tmonduábomnëse, ndayá yojtsamna jamama chaúyanama. ¹⁵ Ntšamo tmojtsiyencá chënga jtsinýanýnaya, ndayá leyiñe yomandánama chënga ainaniñe cachcá imojuabnama. Ntšamo chënga ainaniñe imotátšëmbo y imojuabnacá ndayá cachënga tmojamama, jtsinýanýnaya chënga ntšamo chë leyiñe yomandánama cachcá imojuabnama. Inye ora, chëngbe juabnënga echantsëtsësnaye aíñe o ndoñe tšabá tmonjama ca; y ndayté, Bëngbe Bëtsá nyetscangbiama ntšamo tmojamama yochjayana ora, cachëngbe ainaniñe tmojajuabó soyëngaca, cha echanjínýanýnye ndayá tšabá o ndoñe tšabá tmonjamama. ¹⁶ Chë te, Bëngbe Bëtsá nyetscangbiama echanjayana chëngbe juabnëngama y ntšamo tmojamama, ndayá entšanga tempo ndoñe tmonjáninýama; cha chca echanjama Jesucrísoftaca; y chë atše sëndabuayiná tšabe noticiënga entsichamo ndegombre chca yochtsemnana.

Judiënga y Moisesbe ley

¹⁷ Y mora tšëngaftangbiama, chë judiënga šmomna ca ichámënga, y tša šmojtsejuabná Moisesbe léyeca tšëngaftanga tšabe vida jtsebmnama, y jtsenábotamnayana Bëngbe Bëtsabe ubuáyana entšanga šmomna ca; ¹⁸ tšëngaftanga chë ntšamo Bëngbe Bëtsá yobošcá tšëngaftanga chašmotsamama tatsëmbënga, y chë leyentšana šmojuatsjinýe jobocacayana ndayá más tšabá jamama tojtsemncá. ¹⁹ Tšëngaftanga tša jésejuabnaya, šmobena ínýënga chë ntšamo tšëngaftanga cmësertancá ndosertánënga jujabuáchama ca, mo jtanënga unachayënga cuaftsemnëngcá, o mo chë ndoñe binýniñcá oyenëngbe juabnënga binýnayeñgá; ²⁰ tšëngaftanga jtsejuabnaya chë ntšamo tšabá yomncá ndosertánëngbiama abuyayinayeñgá šmomna ca, y mo chë basengcá tondaye nduatsjínýenëngbiama abuátambayënga ca. Tšëngaftanga tša jésejuabnaya chë ley šmobomnana, lempe šmotátšëmbo ca y ntšamo šmojtsichamcá ndegombre yojtsemna ca. ²¹ Y chcasna, tšëngaftanga chë ínýënga abuátambayënga, ¿ndáyeca ndoñe cach tšëngaftanga šmondëtsánatsana? Tšëngaftanga ínýëngbiye jtsabuayinayana ndoñe chamondëtsatbëbanama; as, ¿ndáyeca cach tšëngaftanga šmnëtsatbëbana? ²² Tšëngaftanga jtsichámuana, acbe shema o boyábíoye ndoñe ínýaftaca cattseíngñaye ca; as, ¿ndáyeca tšëngaftanga cachcá šmnëtsama? Tšëngaftanga jtsáboyënjana soyënga chë ndayama ínýënga tmojtsichamo diosënga yomna ca y jtsadórayana; as, ¿ndáyeca chë soyënga chënga jadórama yebnënguentsana uámana soyënga šmnëtsatbëbana? ²³ Tšëngaftanga tša jtsenábotamnayana chë ley šmobomnana; as, ¿ndáyeca šmonýbëtsama ínýënga Bëngbe Bëtsabiama podësca chamotsóyebuambnama, tšëngaftanga chë leyentša mandënga jobedësama ndocna te ntsebošana causa? ²⁴ Chama, Bëngbe Bëtsabe uabemana

palabrënguïñe mëntśá endayana: “Tšëngaftanga judiëngbe causa, ndoñe judiëngbeñe Bëngbe Bëtsabiana ndoñe tšabá quematoyebuambná ca.”

²⁵ Tšëngaftanga ntšamo leyïñe yomandancá šmojtsamëse, Bëngbe Bëtsábenga šmomnana jinÿanÿiyama, chë más delicadentse base bobachtema tëtšenënga jtsemnana tšabá nántsemna; pero ntšamo chiñe tomandancá ndoñe šmontsamëse, chca tëtšenënga jtsemnana, tondayama ntšoservénana, y chca, tšëngaftanga jtsemnana mo chë más delicadentse base bobachtema ndëtëtšenëngcá. ²⁶ Y chë ndoñe judiënga chë más delicadentse base bobachtema tëtšenënga, judiëngcá ndoñe quemátsmëna; pero chënga ntšamo leyïñe yomandancá tmojtsamëse, ndegombre Bëngbe Bëtsá chënga echanjúbuaja mo cachabe entšangcá. ²⁷ Y chca, tšëngaftanga judiëngbiana Bëngbe Bëtsá echanjayana ndoñe tšabá šmonjama ca, ntšamo leyïñe yomandancá ndoñe šmontsama causa. Cha chca echanjama, er bëtscá ndoñe judiënga mondmëna y chënga ntšamo leyïñe yomandancá mondocumplina, pero chënga ndoñe quemátsmëna tšëngaftangcá tëtšenënga, jtsinÿnama Bëngbe Bëtsábenga šmomnana. Tšëngaftanga, masque Bëngbe Bëtsabe uabemana ley šmondúabomna y chë más delicadentse base bobachtema tëtšenënga šmondmëna, cabá ndoñe šmontsama ntšamo leyïñe iuayancá, ndayá jamama cmojtsamnana.

²⁸ Chcasna, nda chë más delicadentse base bobachtema tmojatëtse ora, chábioye chë soye ndoñe ntjábemana canÿe ndegombre judío. Y canÿe entśá ndoñe Bëngbe Bëtsábiana ntsemnana nÿe ínÿenga chë más delicadentse base bobachtema tmojatëtšama. ²⁹ Y canÿe entśá ndegombre judío jtsemnana, ntšamo chabe ainaniñe tomncá, cha Bëngbe Bëtsabe entśá yomnana tojtsinÿanÿnase. Y chca, canÿe ndegombre judío, Bëngbe Bëtsabe entśá yomnana chaotsinÿnamna ndoñe quenátsmëna chë más delicadentse base bobachtema jtsetëtšenana, sinó ntšamo Bëngbe Bëtsá tojamcá chabe ainaniñe chaotsebínÿnama. Bëngbe Bëtsabe Espiritu jamana entśá chca ainana chaotsebomnana, ndayá inétsinÿanÿnaye cha canÿe ndegombre judío yomnana; y chë uabemana ley ndoñe quenátobena chca jamana. Bëngbe Bëtsá endmëna chë tšabe soye entšabiana ichamuá; entšanga ndoñe.

3

¹ Chcase, ndánaca šuatjatjaye, as ¿Bëngbe Bëtsabe entśá jtsemnana jëftsashjáchama, más tšabá yojtsemna canÿe judío jtsemnana ca? ¿Base bobachtema chë más delicadentse tëtšená jtsemnana becá yojtsámana ca? ² Aíñe, chca jtsemnana corente enduámana y nÿetsca soyënguïñe; natsana chjayana, Bëngbe Bëtsá, judiënga chabe palabra tojanabanÿé, nÿetscangbiana chamotsinÿenama. ³ Y morna, ¿ndayá yochjopása nderado judiënguentse báseftanga ya ndoñe chca tmontsentšénëse? Y chë causa, ¿Bëngbe Bëtsánaca yochtsajbaná ntšamo tojašebuachenacá amana? ⁴ ¡Ndoñe, ndegombre ndoñe! Chca ndoñe cha queochatsma; tšëngaftanga šmondétatšëmbo Bëngbe Bëtsá sempre endbétsama ndayá jamama tojašebuachenacá, masque nÿetsca entšanga bosterënga chamotsomñe. Er Bëngbe Bëtsabe uabemana palabrënguïñe Bëngbe Bëtsabiana mëntśá endayana:

Aca ntšamo chacojayana ora, nÿetscanga mochanjinÿe aca ntšamo ndegombre yomncá cnétsamama;
y chacojtsenëuyaná ora, sempre cochanjínÿanÿiye acbe contra tmojtsoye-
buambnángbioye, chënga ndoñe tšabá montsamama ca.

⁵ Pero bënga ndoñe tšabe soye montsama ca báseftanga tmojayana ora, Bëngbe Bëtsá siempre tšabá inétsamama entšanga más tšabá jinÿama tmojtsobenëse, ¿ntšamo bënga mochjayana? ¿Bënga imojtsobena jayanana Bëngbe Bëtsá ndoñe tšabá tonjama ca, bëngbiana castigo chaotsemna ca cha tojayana ora? (Morna atše sëntsoyebuambná ntšamo entšanga jóyebuambayama monduamancá.) ⁶ ¡Ndoñe, ndegombre ndoñe! Ndoñe quemátobena chca jayanama. Bëngbe Bëtsá nÿets tempo ntšamo ndegombre yomncá

ndoñe tontsamëse, ndegombre cha ndoñe nanjobenaye jayanama nyetsca quem luar-entša entsangbiana, ntšamo tmojamcá tšabá o ndoñe tšabá bétsemnama.

⁷ Nderado nda tojayana: “Atše ndaye bacna soye stjama y ndoñe ntšamo ndegombre yomncá tojtsemna, y chë soye tojoservé Bëngbe Bëtsá puerte uamaná y bëtsá yomnama jinÿanÿiyama, y Bëngbe Bëtsá sempre ntšamo ndegombre yomncá tojtsamama jinÿama entsanga tmojtsobenëse, ¿ndáyeca Bëngbe Bëtsá cabá iuichamo ntšamo atše tijamcá ndoñe tšabá yontsemna ca y atše canÿe bacna soye amá stsemna ca?” ⁸ Y chcase, ndánaca mëntsá nanjátayana: “Ntšamo ndoñe tšabá yondmëncá mochjama, chca, entsanga chámuinÿe Bëngbe Bëtsá puerte tšabia yomnama ca.” Ndegombre, atše mal jaquédama báseftanga tmojayana atše chca stsabuatambá ca; Bëngbe Bëtsá chca abuátambayënga echanjácastigaye, ntšamo castigánënga jtsemnama imomerecencá.

Ntšamo entsá tojtsamama, Bëngbe Bëtsabe bominiÿiñe ndocná tšabia ntsemnana

⁹ Y asna, ¿Bëngbe Bëtsá bënga judiënga ínÿengbiana más tšabá šonÿa? ¡Ndoñe, ndegombre ndoñe! Atše ya sënjinÿinÿé judiënga y ndoñe judiëngnaca, chë bacna soyënga jamama juabnëngaca mandánënga imomnana. ¹⁰ Er Bëngbe Bëtsabe uabemana palabrenguiñe mëntsá endayana:

Ntšamo entsá tojtsamama, ndocná Bëngbe Bëtsabe bominiÿiñe tšabia quenátsmëna.

¡Ndoñe, ndegombre ndoñe, ni mo canÿa chca quenátsmëna!

¹¹ Ndocná quenátsmëna ntšamo ndegombre yomncá chabotsosertánama;

¡Ndocná quenátsmëna nda chaotseboše Bëngbe Bëtsáftaca jtsemnama!

¹² Nyetscanga ndoñe tšabe benache tmojishache y chiñe montsajna.

Chënga nyetscanga Bëngbe Bëtsabe bominiÿiñe tondayama quemátoservena.

Ndocná quenátsmëna ntšamo tšabá yomncá chaotsamama, ¡ni canÿa ndoñe!

¹³ Ntšamo tmojtsichamcá puerte bëts bacna soye jtsemnana, mo canÿe obanabe cuevëshe atëfjnëshe puerte bacá tojtsonguëtšecá.

Chënga tmojtsoyebuambná soyëngaca ínÿengbiöye jtsaíngñayana.

Chë tmojtsichamo soyëngaca puerte bacna soye ínÿengbiana jtsamana, mo canÿe mëtscuaye tbojtseftëtše orcá, chë veneno canÿe entsáböyöye jóbana.

¹⁴ Chënga, nyets tempo ínÿengbiana podesca jtsichámuana, y siempre jtsóyebuambnayana chë ínÿenga ntšámnaca jáborlama.

¹⁵ Siempre jtseprontánana ínÿengbiöyöye ntšámnaca jáborlama y jobáyama.

¹⁶ Chënga siempre jtsiyenana ínÿenga chamotsesufrínama jtsamëse, y nÿe ntšámnaca jtsaborlánana.

¹⁷ Chënga ndocna te tondaye ntjamana nyetscanga natjëmbana chamotsiyenama;

¹⁸ Chënga ndoñe ntsiyenana Bëngbe Bëtsabiama jtsejuabnayëse, cha chë más bëtsá nyetscangbiana yomnama ca —chiñe endayana.

¹⁹ Er bënga mondëtatšëmbo, lempe ntšamo leyiñe iuabemancá, chë leyëngaca mandánënga imoyenëngbiana yomnama. Chcasna, chë ley endmëna, Bëngbe Bëtsabe delante ndocná chaondobená jayanama, cha ndoñe tšabá tonjama, chama ndoñe yonjátatšëmbo causa ca; y endmëna jinÿanÿiyama, ntšamo tmojamcá tšabá o ndoñe tšabá bétsemnama Bëngbe Bëtsá nyetscangbiana yochjayana ora, nyetscanga yojtsamna chabe delante jayanama, ndáyeca ntšamo tšabá yomncá ndoñe tmonjama ca. ²⁰ Er, Bëngbe Bëtsá ndoñe queochatsma ndocná chabe bominiÿiñe tšabia chaotsemna, ntšamo leyiñe yomandancá cha tojamama; chë ley bëngbiana jamana, nÿe bënga bacna soye tmojamama chamotsetatšëmbuama.

Ntšamo Bëngbe Bëtsá inama entsanga chabe bominiÿiñe tšábënga chamotsemnana

²¹ Pero mora, Bëngbe Bëtsá tonjinÿanÿé ntšamo cha inama entsanga tšábënga chabe bominiÿiñe chamotsemnana; y Bëngbe Bëtsá ndoñe ntjamana canÿa chabe bominiÿiñe tšabia chaotsemnana, ntšamo ibomncá cha tojtsamama, ntšamo chë leyënguiñe y

mandënguiñe yomncá. Pero masque mora chca, Bëngbe Bëtsá tonjinÿanÿé, Moisesbe leyiñe y Bëngbe Bëtsabe juabna oyebuambnayëngbe librëšangañe yopodena jinÿenana chca yochtsemnama. ²² Bëngbe Bëtsá jamana entšanga chabe bominiÿiñe tšábenga chamotsemnama, chënga Jesucristbeñe tmojtsošbuáchema. Bëngbe Bëtsá nÿetscanga Crístbeñe ošbuáchiyëngbiama chca jamana, y chabiama nÿetscanga cachcá monduámána; ²³ er nÿetscanga bacna soye tmojama, y chë causa, ndocna entšá tonjobená jashjáchana ndocna bacna soye ndbomná jtsemnama y puerte bëtsá jtsemnama, ntšamo Bëngbe Bëtsá tojanjuabocá entšanga chamotsemnama. ²⁴ Pero Bëngbe Bëtsá chëngbiama corente tšabe juabna bómna yeca, mo ndayá cuafjatšatacá, cha jamana chënga chabe bominiÿiñe tšábenga chamotsemnama. Bëngbe Bëtsá chca tojanma, Cristo Jesús beyeca, entšanga atsebácanënga chamotsemnama y ya ndoñe más bacna soyënga jamama juabnëngaca mandánënga chamondëtsemnama cha tojanma ora. ²⁵ Bëngbe Bëtsá cha tbojanábuayana, chabe buiñe juabuáshanëse y jóbanëse, cha chaotsemna ndábeyeca Bëngbe Bëtsá entšanga bacna soyëngama jáperdonama; Jesucristbeñe jtsošbuáchiyëse entšanga jobenayana perdonánënga jtsemnama. Bëngbe Bëtsá chca tojanma, jinÿanÿiyama cha inétsama entšanga tšábenga chabe bominiÿiñe chamotsemnama, chë entšanga bacna soyënga tmojanmama chë tempo ntjatonÿaycá, er cha chë tempo corente uantado chëngaftaca yojtsemna y chëngbe bacna soyëngama ndoñe yonjánacastigaye. ²⁶ Cha lempe chca tojanma, jinÿanÿiyama cha sempre ntšamo ndegombre yomncá inétsamama, y nÿetscanga Jesucristbeñe ošbuáchiyënga chabe bominiÿiñe tšábenga chamotsemnama inétsamama.

²⁷ Chcáyeca, entšá ndoñe ntšobenana tondayama ntsenábotamnayana. Chca endmëna, er Bëngbe Bëtsá tšabia chabe bominiÿiñe jabemana, ndoñe ntšamo leyiñe tomandancá cha tojtsamama, sinó nÿe Jesucristbeñe tojtsošbuáchema. ²⁸ Y chca jayanëse, mora bënga tšabá montsetátšëmbo, Bëngbe Bëtsá inétsama canÿe entšá tšabia chabe bominiÿiñe chaotsemnama, nÿe Jesucristbeñe tojtsošbuáchema, y ndoñe ntšamo leyiñe yomandancá cha tojtsamama.

²⁹ ¿O Bëngbe Bëtsá nÿe judiëngbe Bëtsá yomna? ¿Ndoñe judiëngbe Bëtsánaca cha ndoñe yondmëna? Aíñe, chëngbe Bëtsánaca cha endmëna; ³⁰ er nÿe canÿe Bëtsá nÿetscangbiama endmëna, y cha echanjama chë más delicadentse base bobachtema tëtšenënga imomnëngbiama y ndoñe chcangbiámna, chabe bominiÿiñe tšábenga chamotsemnama, Jesucristbeñe tmojtsošbuáchema. ³¹ Chcasna, Bëngbe Bëtsá jamana entšanga chabe bominiÿiñe tšábenga chamotsemnama, Jesucristbeñe tmojtsošbuáchema; ¿chca yojtsayana chë ley nÿe tondayama yondoservenaca? ¡Ndoñe, ndegombre ndoñe! Inÿetšá, chca jamana chë ley más chaotsámanama.

4

Ntšamo Abrahánoftaca tojanopasá

¹ Morna Abrahambiamama mochjóyebuambaye, bëngbe tempsca bëts taitá, y mochjinÿe ndayá tojánatsjinÿe Bëngbe Bëtsábeñe ošbuáchiyana bomnëntšana. ² Abraham chabe bominiÿiñe tšabia chaotsemnama, ndayá cha tojanmama Bëngbe Bëtsá matënjanmëse, cha matënjanobená entšángbeñe ndayama jtsenábotamnayana, pero Bëngbe Bëtsabe delante ndoñe; ³ er Bëngbe Bëtsabe uabemana palabrenguiñe mëntšá endayana: “Abraham, Bëngbe Bëtsábeñe yojtsošbuáchiye, y chíyeca Bëngbe Bëtsá tonjánayana cha chabe bominiÿiñe tšabia yojamna ca.”

⁴ Canÿe entšá trabajayá, crocénana josháchiñana ndayá tojamama, pero chë crocénana ndoñe nÿe tšetanana ntsemnana, sinó chana jtsemnana ntšamo cha tojtsomerecencá. ⁵ Er menójuabonga, nda tondaye tontsama Bëngbe Bëtsá cháuyanama cha chabe bominiÿiñe tšabia yomna ca, pero aíñe tojtsošbuaché Bëngbe Bëtsábeñe, nda endbáyana chë bacna soye tmojamënga mora mo ndoñe chca cuafjamcá chamotsemna ca, chabiama Bëngbe Bëtsá echanjama chabe bominiÿiñe tšabia chaotsemnama, chabe ošbuáchiyama.

⁶ Rey David cachcá chabe librésañe tojánayana, chë ndabiama Bëngbe Bëtsá jayanana chabe bominyiñe tšabia chaotsemna ca, masque chabiama chca cháuyanama tondaye tonjamëse. David chca entsabiama tojánayana, cha puerte echantsoyejuaye ca. ⁷ Chabe librésañe mëntsá tojanábema:

¡Tša oyejuayënga jtsemnana chë Bëngbe Bëtsá chëngbe bacna soyënga tojáperdonanga, chë Bëngbe Bëtsá chëngbe bacna soyënga tojabuajuánanga!

⁸ ¡Puerte oyejuayá jtsemnana chë Bëngbe Bëtsá mo ndoñe bacna soye cuafjama cuenta tbojtsonyá cha ca!

⁹ ¿David tojánayana nÿe chë más delicadentse base bobachtema tëtšenënga imomnëngbiam a oyejuayana yomna ca? Ndoñe; ndoñe chca mondmëñgbiámna. Y muentse tmonjayana, Abraham Bëngbe Bëtsábeñe yojtsošbuachéyeca, Bëngbe Bëtsá tojánayana cha chabe bominyiñe tšabia yojamna ca. ¹⁰ Y ¿ntseco chca tojanopasá? ¿Abraham ya chë más delicadentse base bobachtema tëtšená yojtsemna ora, o cabá ndoñe chca yontsemna ora? Ndegombre, Abraham cabá ndoñe chca tëtšená yontsemna ora. ¹¹ Y cabá chentšana, Abraham base bobachtema chë más delicadentse tëtšená yojtsemna; y chca yojamna jinÿanÿiyama, Bëngbe Bëtsá tempo ya chabiama tojánayana cha chabe bominyiñe tšabia yojamna ca, cha Bëngbe Bëtsábeñe yojtsošbuáchema. Lempe chca tojanopasá, jinÿanÿiyama Abraham mo taitacá yomnama Bëngbe Bëtsábeñe imošbuachéngbiam a, masque ndoñe base bobachtema chë más delicadentse tëtšenënga mondmëna. Y cachcá Bëngbe Bëtsá chë ošbuáchiyëngbiam a tojánayana, chënga chabe bominyiñe tšábenga imomna ca. ¹² Y Abrahámna endmëna mo chë taitacá, chë más delicadentse base bobachtema tëtšenënga imomnëngbiam a, pero aiñe Bëngbe Bëtsábeñe corente jtsošbuáchiyëse imoyenëngbiam a, cachcá ntšamo bëngbe bëtš taitá Abraham Bëngbe Bëtsábeñe yojtsošbuachecá. Y cha cabá chë más delicadentse base bobachtema ntsetëtšena ora, ya chca yojtsošbuáchiyë.

Jtsošbuáchiyëse, ntšamo Bëngbe Bëtsá tojanašebuachenacá jóshjanguana

¹³ Bëngbe Bëtsá tojanašebuachená Abrahambiam a y chábentšana entsangbiam a, quem luare chëngbiam a yochjëftsemna ca. Y chca tojanašebuachená, ndoñe Abraham ntšamo leyiñe yomandancá betsobedecënana, sinó cha Bëngbe Bëtsábeñe yojt-sanošbuáchema, y chíyeca Bëngbe Bëtsá tojánayana cha chabe bominyiñe tšabia yojamna ca. ¹⁴ Pero, ntšamo Bëngbe Bëtsá tojanašebuachenacá, bënga ntšamo chë leyiñe yomandancá tmojtsamëngbiam a yojtsemna ca tmojayanëse, Bëngbe Bëtsábeñe jtsošbuáchiyana tondayama nantsoserverna, y ntšamo Bëngbe Bëtsá tojanašebuachenacá tondaye ntsámanana. ¹⁵ Chë ley juabocnana, Bëngbe Bëtsá puerte etonaná entsanga cháucastigama, chënga ntšamo chiñe iuayancá ndoñe tmonsamama; pero ndocna mandënga tontsemnëse, ndocná ntšobenana chë ndoñe tontsayancá ndoñe ntjamana.

¹⁶ Y chca, Bëngbe Bëtsá Abrahámbyoye tbojanšbuachená, cha yojtsanošbuachéyeca, ntšamo Bëngbe Bëtsá tojanašebuachenacá, ndegombre chaotsemnama chë Bëngbe Bëtsábeñe imošbuáchema mo Abrahám-bentšana entsangcá imomnëngbiam a; y Bëngbe Bëtsá chca tojanašebuachená, cha chëngbe tšabiam a iuantjéšnayeca. Chë mo Abrahám-bentšana entsangcá imomnëngbeñe, ndoñe quemnatsmëna nÿe chë ntšamo ley yomandacá inmëtsamënga, sinó nÿetscanga chë ntšamo Abraham tojanošbuachecá Bëngbe Bëtsábeñe imošbuachëngnaca. Y Abraham nÿetscanga bëngbiam a, Bëngbe Bëtsábeñe ošbuáchiyënga, mo taitacá endmëna. ¹⁷ Ntšamo Bëngbe Bëtsábeñe uabemana palabrënguiñe endayancá, Bëngbe Bëtsá Abrahámbyoye ibojtsatsëtsnaye ora: “Atse sënjama aca ba luariñe entsangbiam a atšbe bominyiñe taitá chacotsemnama ca.” Chë ntšamo tojanašebuachenacá ndegombre tšabe soye endmëna, er Bëngbe Bëtsá chca Abrahambiam a yojanjuabná; y Bëngbe Bëtsá endmëna ndábeñe Abraham yojtsanošbuaché, y nda inétsama entsanga chámuatayenama, y nda inamánda y entsanga jobenayana jinÿama ndayá ndocna te tmonjaninÿcá.

18 Abraham Bëngbe Bëtsábeñe yojtsošbuáchiye y yojtsobatmana ntšamo tbojanšbuachenacá chaotsemnama, masque entsábe juabniñe ndoñe chca ntjátsjuabnayana; y chca, cabana cha tojánashjache jtsemnana “ba luariñe entsangbe taitá”, ntšamo Bëngbe Bëtsá tbojaniancá: “Acbentšana entsanga tša mallajta mochántsemna, ndocná queochatobenaye jacúntana ca”. 19 Abraham yojanobatmanentscuana, cha puerte chábeñe yojtsanošbuaché, ntšamo tbojanšbuachenacá jójyengacñama, masque Abraham yojtsonyaye ya bëtsanánějema yojtsemnana, er ya mo patse uata yojtsebmna, y chabe shema, Sara, ndoñe yonjobena šešonga jtsabamnama. 20 Abraham ndocna te tonjanajbaná Bëngbe Bëtsábeñe ošbuáchiyana, y ni mo canye ndoñe yonjanjuaboje chë ntšamo Bëngbe Bëtsá tbojanšbuachenacá ndoñe joparéjana ca; sinó más corente chábeñe yojtsanošbuaché, y chca Bëngbe Bëtsábioye ibojtsatschuanaye, 21 er cha tšabá inatátšëmbo, ntšamo tbojanšbuachenacá jamama, ndegombre Bëngbe Bëtsá obená inamnama. 22 Chíyeca, Bëngbe Bëtsá tojánayana cha chabe bominyiñe tšabia yojamna ca. 23 Pero, chabe bominyiñe tšabia yojamna ca Bëngbe Bëtsá tojánayana ora, ndoñe nye Abrahambiama chca ntsóyebuambnayana; 24 ndayá bëngbiámnaca, ndëmuanýengbiama Bëngbe Bëtsá yochjayana chabe bominyiñe tšábenga imomna ca, bënga Bëngbe Bëtsábeñe imošbuachéyeca; Bëngbe Bëtsá, nda tojanma Bëngbe Utabná Jesús cháuatayenama. 25 Bëngbe Bëtsá tojanalesenciá entsanga Jesús chamóbama, bënga bacna soyënga tmojanma causa, y Bëngbe Bëtsá tojanma cha cháuatayenama. Bëngbe Bëtsá chca tojanma jobenayama, bënga chabe bominyiñe tšábenga jábiamama.

5

Mora bënga Bëngbe Bëtsabe bominyiñe tšábenga montsemna

1 Er Bëngbe Bëtsá tojama bënga chabe bominyiñe tšábenga chamotsemnana, bënga chábeñe imošbuachéyeca; mora tempcá tšabá Bëngbe Bëtsáftaca bënga montsatsmëna, Bëngbe Utabná Jesucristbeyeca. 2 Bënga Crístbeñe mondošbuáchema, cha tojama bënga chamotsetatšëmbuama Bëngbe Bëtsá tša tšabia yomnama, y Bëngbe Bëtsábíocana tšabe soyënga jtsebmne mora chamotsiyenama. Bënga tša oyejuayënga jésemnana, er Bëngbe Bëtsábeñe jtsošbuáchiyëse mondobátmana cha puerte uámanënga y bëtsétsanga šochjábiama, batšá ntšamo cachá yomncá. 3 Y ndoñe nye chama bënga oyejuayënga jésemnana, ndayá bënga tmojtseufrina y padecena soyënguiñe tmojtšajna órnaca. Chca mondbama, er bënga mondétatšëmbo bënga tmojtseufrina orna, bënga juatsjínýana ntšamo uantadënga jtsemnana padecena soyënguiñe tmojtsemna ora, Bëngbe Bëtsábeñe jtsošbuáchiyëse. 4 Bënga padecena soyënguiñe tmojtsemna ora, más tšabá uantadënga jtsemnana mondobénayeca, Bëngbe Bëtsá oyejuayá bëngaftaca jtsemnana, padecena soyënguentsana ndegombre tšabá tmojachnëngo ora. Bëngbe Bëtsá oyejuayá bëngaftaca chaotsemnana bënga tmojama ora, bënga jtsobenana más jtsobátmanana, ntšamo šojašebuachenacá cha yochjamama. 5 Bënga chca tmojt-sobátmanëse, ndocna te nye bonamente quemochatobátmana, er Bëngbe Bëtsá šojinýanyé tša bëtscá cha šuababuánýeshanama. Bëngbe Bëtsá chca tojama chë Uámana Espíritbeyeca, y cha endmëna nda Bëngbe Bëtsá tbojanichmó bëngbe ainaniñe chaotsemnana jtsemándayama.

6 Tempo bënga tondaye chemuatanobená jamana Bëngbe Bëtsabe bominyiñe tšábenga jtsemnana, y chora Cristo tojanóbana bënga chë bacna soyënga tmojamëngbe tšabiama, nya chama tempo yojamna ora. 7 Ndoñe paselo quenátsmëna jajuboyana, ndáyeca canya nantseprontana jóbanama canya ntšamo chë leyiñe yomandancá jamama tojt-samanabiama; pero, canya bëtscá jtsababuánýeshanëse tšabe soyënga ínýengbiama tojt-samabiama, nderádose chabiama jóbanama cuantseprontana. 8 Pero Bëngbe Bëtsá bënga šojanýanyé tša šuababuánýeshanama, er bënga cabá bacna soyënga ntsamcá imojoyena ora, Cristo bëngbiama tojanóbana.

⁹ Cristo, chabe buiñe juabuáshanëse bēngbiana tojanóbanayeca, Bēngbe Bētsá tojanma bēnga chabe bominyiñe tšábenga jtsemnama. Y chca endmēnayeca, ndegombre Cristo šochanjátsebacaye, entšanga ndoñe tšabá tmonjama ca y castigo chēngbiana chaotsemna ca Bēngbe Bētsá chaojayana ora. ¹⁰ Bēnga tempo Bēngbe Bētsá imojanáya; pero cha tojanma bēnga cháftaca tempcá tšabá chamotsatsmēnama, chabe Uaquiñá tojanóbanayeca. Y mora, bēnga natjēmbana cháftaca chamotsemnama ya tojama ora, ndegombre atsebácanēnga mochántsemna, chabe Uaquiñá ainá yómnayeca. ¹¹ Y ndoñe nñe chca, ndayá bēnga cháftaca puerte oyejuayēnga chamotsemnámnaca Bēngbe Bētsá jamana, ndayá Bēngbe Utabná Jesucristo bēngbiana tojánmayeca. Y mora, chábeyeca Bēngbe Bētsá tojama bēnga cháftaca tempcá tšabá chamotsatsmēnama.

Adán y Cristo

¹² Canñe entšá bacna soye tojanma causa, nñetsca entšanga bacna soyēnga amēnga tmojábcana; y cha tojanóbana, bacna soyēnga tojanma causa. Y chca, nñetsca entšanga entsamna jóbanama, er nñetscanga bacna soyēnga tmojama. ¹³ Bēngbe Bētsá Moisésbioye chē leyēnga cabá nduántšaboshjona ora, entšanga quem luarentše bacna soyēnga tmojanma. Pero ndocna ley tontsemna ora, Bēngbe Bētsá ndoñe ntjatonjáyana entšanga bacna soyēnga tmojamama. ¹⁴ Nñetsca entšanga, Adánbentsana Moisésbentscoñe, nñetscanga yojánamna jóbanama, ntšamo cach Adán tojanmcá ndoñe tmonjanmēngnaca, ntšamo cha ndoñe chaondēmama Bēngbe Bētsá tbojanmandacá cha tojanma ora. Y Adánbeñe entšanga mondobena jinñyama, ntšamo chē jabama ibojamná canñe soyēnguiñe yochtsanmēna.

¹⁵ Pero ntšamo chē útata tbojanmcá ndoñe cachca soye quenátsmēna; er Bēngbe Bētsá entšangbe tšabiana jtsejuabnayēse tšabe soyēnga chēngbiana tojanma ora, ndoñe yonjamna mo ntšamo Bēngbe Bētsá tbojanmandacá ndoñe chaondēmama Adán tojanma orcá. Tšēngaftanga šmondétatšēmbo, nñe canñe entšá canñe bacna soye tojanma causa, cha tojanma nñetsca entšanga jóbanama chaotsamnama, pero Bēngbe Bētsá entšangbe tšabiana yojuabnáyeca, más bēts soyēnga jamana, chē Adánbe bacna soye entšangbiana bacna soyēnga tojanmama. Chca, Bēngbe Bētsá tojanma ba entšanga bēts cá tšabe soyēnga chamotsebomnama; y chca tojama, nñe canñe entšá, Jesucristo, tšabe soyēnga tojánmayeca. ¹⁶ Chē ba entšanga bēts cá tšabe soyēnga chamotsebomnama Bēngbe Bētsá tojamentšana endóbocana soye, puerte inñetsá comna, chē entšá Adán, canñe bacna soye tojanmentšana tojanóbocna soyama. Adán bacna soye tojanmentšana, Bēngbe Bētsá tojánayana chana bacna soye tojanma y castigo jtsebomnama ibojtsemna ca, y nñetsca entšángnaca chē causa; pero masque nñetscanga bacna soyēnga tmojama, Bēngbe Bētsá entšangbe tšabiana ndoñe bēndētsebnatjēmbayeyeca, tojanma entšanga chabe bominyiñe tšábenga chamotsemnama y chē bacna soyēngama castigánēnga ndoñe chamondētsemnama. ¹⁷ Ndegombre endmēna, canñe entšá bacna soye tojanma causa, nñetsca entšanga jóbanama yojtsamna. Pero puerte más, canñe entšá Jesucristo tojanma. Ndēmuanñēngbiana Bēngbe Bētsá tojama bēts cá tšabe soyēnga chamotsebomnama, ndēmuanñēngbiana Bēngbe Bētsá tojama chabe bominyiñe tšábenga chamotsemnama, y Bēngbe Bētsábicana chca tmojóyēngacñēnga, chēnga nñetscanga mochantsiyena bacna soyēnga jtseyēnjanayēse y nñetsca tescama mo bētsētsangcá; y chca echántsemna ndayá Cristo tojánmayeca.

¹⁸ Y chca, ntšamo canñe entšá, Adán, canñe bacna soye tojanmama, Bēngbe Bētsá tojánayana nñetscanga bacna soye tmojanma y castigánēnga chamotsemna ca; cachcá ntšamo canñe entšá, Cristo, puerte tšabe soye tojánmayeca, Bēngbe Bētsá jayanana nñetscanga imojtsobena chabe bominyiñe tšábenga jtsemnama y chē nñetsca tescama yomna tšabe vida jtsebomnama ca. ¹⁹ Y ntšamo Bēngbe Bētsá tbojanmandacá ndoñe

chaondēmama canye entśá tojanma causa, nyetsca entśanga bacna soye amēnga tmojanobiama; cachcá, ntśamo Bēngbe Bētsá tbojanmandacá canye entśá, Jesucristo, tojánmayeca, Bēngbe Bētsá tojanma bētscá entśanga chabe bominyiñe tśábenga chamotsemnana.

²⁰ Chē ley entśangbe cucuatśiñe tmojanáboshjona, jinyanñiyama ntśamo ndegombre yomna bacna soyēnga jtsamana; pero entśanga más bacna soyēnga imojtsama ora, Bēngbe Bētsá cabá más chēngbe tśabiama yojtsanjuabnaye y más tśabe soyēnga chēngbiamama yojtsama. ²¹ Chcasna, mora mochjayana, entśanga bacna soyēngaca puerte mandánēnga imojamna, y chca, nyetscanga jóbanama yojamna ca. Pero mora, ya ndoñe chca quenátsmēna, er Bēngbe Bētsá tojama entśanga chabe bominyiñe tśábenga chamotsemnana, Bēngbe Utabná Jesucristbeyeca chē nyetsca tescama yomna tśabe vida chamotsebomnana; chíyeca mora bēnga montsobena jtsiyenama, Bēngbe Bētsá šojatśatá tśabe soyēnga lempe bēngaftaca jtsemnēse.

6

Crístbeyeca bēnga tśabe vida jtsebomnana

¹ Y asna, ¿ntśamo mochjayana? ¿šojtsamna jtsiyenana sempre bacna soyēnga jtsamēse, chca, Bēngbe Bētsá šuababuánñeshanama más chašotsinñanñama, cha más bacna soyēnga bēnga jtsaperdónayēse? ² ¡Ndoñe, ndegombre ndoñe! Tempo bēnga monjaniiyena bacna soyēnga jamama juabnēngaca mandánēnga, pero mora bēnga montsobena jtsiyenana chē juabnēnga tondaye bēngbioye ntsamcá, y chca, bēnga montsobena mo obanēngcá chē soyēngama jtsemnana; y as, ¿ndáyeca bēnga muatjátsjuabnaye ntśamo ndoñe tśabá tontsemncá jatiyenana? ³ Er ndegombre tśēngaftanga šmondētatsēmo, bēnga uabáinēnga tmojananoquedá ora, tmonjaninñanñé bēnga Cristo Jesúseftaca cánñiñe mo canñacá bētsemnana; y bēnga uabáinēnga tmonjananoquedá ora, enjamna mo bēnga cuafjobancá, ntśamo Cristo tojanobancá. ⁴ Bēnga uabáinēnga tmonjananoquedá ora, enjamna mo bēngnaca cháftaca cuafjobancá, y cháftaca uatabuantsanēngcá. Chca yojamna, bēnga chamotsobenama mo tsēm entśangcá jtsiyenama, ntśamo Crísoftaca tojanopasacá, cha cháuatayenama Bēngbe Bētsá tojanma ora, chabe puerte bēts obenánaca.

⁵ Bēnga Crísoftaca cánñiñe mo canñacá jtsemnēse, cha tojanóbana ora mo bēngnaca cháftaca cuafjobancá enjámnayeca, ndegombre bēnga cánñiñe mo canñacá cháftaca mochántsemna, bēnga cachiñe vida nyetsca tescama chamotsatsbomnana Bēngbe Bētsá jtsamēse, ntśamo Cristo cháuatayenama cha tojanmá. ⁶ Y bēnga mondētatsēmo, chē ntśamo bēngbe vida enjamncá, bacna juabnēngaca mandánēnga, Jesucristbeñe cabá ntsošbuáchiye ora, mora ya ndoñe chca yontsemnana; y chca entsemna mo chē tempsca vida chaóbanama cuafjamcá, Cristo tmojanrucificá ora. Chca yojamna, Bēngbe Bētsá jobenayama chē bacna soyēnga jamama bēngbe juabnēnga jtsepochócama; y chca, ya ndoñe más chē bacna soyēngaca mandánēnga chamondētsemnana, mo nyets tempo nye ínñabiamama oservenēngcá. ⁷ Er canye entśá tojóbanama ora, chē bacna soyēnga chábioye ya ndoñe más ntsemándayana. ⁸ Er Cristo tojanóbana ora, mo bēngnaca cháftaca cuafjobancá endmēnayeca, cháftaca jtsiyenámncá bēnga montsošbuaché. ⁹ Bēnga mondētatsēmo Cristo cháuatayenama y ndocna te cha cachiñe jatóbanama Bēngbe Bētsá tojanmama; y ndocna obenana queochatsma cha cachiñe chauatóbanama. ¹⁰ Cha tojanóbana, y chē bacna soye jamama juabnēnga ndocna te ntjobenayana chábioye jamándana, y ínñyenga ndoñe imontsobena ntśamo cha jabórlana; y ntśamo mora cha yoyencá, Bēngbe Bētsá jtsešervénama yomna. ¹¹ Cachcá, tśēngaftanga cmontsamna jtsejuabnayana, chē ya ndoñe más bacna soyēngaca mandánēnga šmojtsemnana, pero vida šmobomna lempe jtsamēse Bēngbe Bētsá tśēngaftangaftaca oyejuayá chaotsemnana, Cristo Jesúseftaca cánñiñe mo canñacá jtsemnēse.

¹² Tšëngaftanga cmontsamna, chë bacna soyënga jamama ainanentše šmobomna juabnëngaca ndoñe más mandánënga ntsemnana, chca, tšëngaftanga ndoñe chašmondétsamama juabnëngaca nÿe cach tšëngaftanga, tšëngaftangbe cuerpiñe tšabá jtsomñama. ¹³ Tšëngaftanga ndoñe quecmátamna jalesénciana ndaye tšëngaftangbe cuerpentša soye, bacna soyënga jamama chaoservema. Chamna, tšëngaftanga cmontsamna Bëngbe Bëtsá jauyanana, lempe ntšamo tšëngaftanga šmomncá, cha jasérviamna chaotsemna ca, tšëngaftanga chë šmomna mo ya ndoñe más obanëngcá Bëngbe Bëtsabiamna, y tojanma tšabe vida chašmotsebomnana; y jauyanana nÿetsca tšëngaftangbe cuerpentša soyëngna Bëngbe Bëtsá jasérviamna yojtsemna ca. ¹⁴ Ndoñe quecmátamna bacna soyëngaca mandánënga jtsemnana, er tšëngaftanga ndoñe quešmátiyena leyiñe iuayana soyëngaca mandánënga, y šmondoyena Bëngbe Bëtsá tšëngaftangbiamna tšabá jtsejuabnayëse.

Ošbuachiyá obligaciónaca jtsemnana ntšamo tšabá yomncá jamama

¹⁵ Y asna, ¿bënga imojtsobena bacna soyënga jamana, chë leyiñe iuayana soyëngaca ndëmandánënga imomnana, y Bëngbe Bëtsá bëngbiamna tšabá jtsejuabnayëse bënga imoyenama? ¡Ndoñe, ndegombre ndoñe! ¹⁶ Tšëngaftanga tšabá šmondétatšëmbo, ínÿabe cucuatšifne mo nÿets tempo nÿe ínÿabiamna oservenëngcá šmojoquedá ora, cha jtsobedecénama, ndegombre tšëngaftanga chë nduiñbiamna nÿets tempo oservëngca jtsemnana. Chcasna, cachcá jtsemnana, chë tšëngaftanga šmojabocacá bacna soyëngaca mandánënga jtsemnana, y chca jtsemnana mo Bëngbe Bëtsabe bominiñe tšëngaftanga nÿetsca tescama obanënga cuaftsemncá, o Bëngbe Bëtsá jtsobedecénama, y chca, chabe bominiñe tšábënga jabocanana. ¹⁷ Pero šontsamna Bëngbe Bëtsá jtsatschuanayana, er tempo tšëngaftanga mo nÿe ínÿabiamna oservenëngcá šmojamna, bacna soyënga jamama juabnëngaca mandánënga; pero mora nÿets ainánaca šmojoyeuná, ntšamo chë tcmojanabuatambá soyënguiñe šmojoyëngacñécá. ¹⁸ Bëngbe Bëtsá tšëngaftanga cmojatsebacá, bacna soyëngaca ndëmandánënga chašmotsemnana, y morna mo Bëngbe Bëtsabiamna oservenëngcá šmojabocna, ntšamo tšabá yomncá jtsamama. ¹⁹ Muentše sënjoyebuambá ntšamo entšanga mondbetsichamcá, er tšëngaftanga ndoñe corente juabna quešmátsbomna toto palabrënga chacmósertama. Tempo, tšëngaftanga šmonjanamana jalesénciana, lempe ntšamo šmojamncá mandánënga jtsemnana, bacna soyënga shembásaftaca o boyabásaftaca jamama juabnëngaca, y nÿe ndaye bacna soyënga jamama juabnëngaca. Cachcá, mora tšëngaftanga cmontsamna jalesénciana tšëngaftanga chašmotsemnana juabnëngaca mandánënga tšabe soyënga jtsamama, chca, ndegombre Bëngbe Bëtsabe entšanga chašmotsemnana.

²⁰ Tšëngaftanga, cabá bacna soyënga jamama juabnëngaca mandánënga šmonjamna ora, tšëngaftanga ndoñe obligaciónaca quešmënjatsmëna ntšamo Bëngbe Bëtsabiamna tšabá yomncá játamama. ²¹ ¿Ndaye tšabe soye tšëngaftanga šmojosháchiñe chë tempo šmojánama soyënga amiñe? Tondaye; y mora chë soyëngama šmojtsëuatja. Chca soyënga tcojamentšana jóbocnana, entšá nÿetsca tescama castigana chaotsemnana, mo Bëngbe Bëtsabe bominiñe nÿetsca tescama obaná cuaftsemncá. ²² Pero mora, ndoñe quešmátsmëna bacna soyënga jamama juabnëngaca mandánënga, y mora bëtscá šmojtsentšena Bëngbe Bëtsá jtseyeunanana y jtsešervénana. Chca jtsamana, tšëngaftangbiamna puerte tšabá entsemna, er chca, Bëngbe Bëtsabe entšanga šmochántsemna, y cabana, chë nÿetsca tescama yomna tšabe vida šmochántsebomna. ²³ Bacna soyënga tcojtsamentšana jóbocnana entšá nÿetsca tescama castigana chaotsemnana, mo Bëngbe Bëtsabe bominiñe nÿetsca tescama obanënga cuaftsemncá; pero, Bëngbe Bëtsá šojtsatšatná soyënguentšana, jóbocnana chë nÿetsca tescama yomna tšabe vida jtsebomnana, Cristo Jesús Bëngbe Utabnáftaca cánÿiñe mo canÿacá jtsemnëse.

7

Chë bouamnátbentsana ndayá bëngbiama mochjuatsjinje

¹ Jesucrístbeyeca catsátanga, tšëngaftanga šmotátšëmbo ntšamo chë leyënga entsangbiama inétsemnama; tšëngaftanga šmotátšëmbo, ntšamo chë leyiñe tojtsayancá canje entsá chaotsamamna, nje chë entsá tojtsainëntscuana chábioye jtsemándayana.

² Chcasna, canje bouamna shembása, ntšamo chë leyiñe endayancá bontsemna chabe boyáftaca jëftsemnana, chë boyá tuainëntscuana; pero chë boyá tojtsóbanësna, chë leyiñe endayana, chë shemna canya jtoquédana, chë boyabiama ndëmandaná ca. ³ Y chca, chë shema inje boyabásaftaca chabe boyábioye tbojaingñé, chë boyá cabá vida totsóbomñe ora, chë shemna jtsabáinana chabe boyábioye ínñaftaca ingñayá ca. Pero chabe boyá tojtsóbanëse, chë leyiñe endayana chë shemna canya jtoquédana, chë boyabiama ndëmandaná ca, y cha jtsobenana ínñaftaca jtobouamayana; y chca tojama ora, boyábioye ínñaftaca ingñayana ndoñe ntsemnana.

⁴ Tšëngaftanga chë ošbuachiyëngaftácnaca cachcá endmëna; ya ndoñe más chë léyeca mandánënga quešmátsmëna, er Cristo tojanóbana ora šmojánbocna, mo chë soyëngama obanënga cuafjoquedangcá, ínñabe entsanga jtsemnana, Crístbenga, ndabiama Bëngbe Bëtsá tojanma cháuatayenama; y chca jtsemnëse, bënga bëtscá soyënga ntšamo tšabá yomncá chamotsamama, Bëngbe Bëtsá jaserviama. ⁵ Bënga chë nje ntšamo cabënga innabošcá monjanijena ora, chë ley enjanoservena bëngbe ainaniñe chamotsebomnama bacna soyënga jamama puerte bëts juabnënga, nje bënga tšabá jtsomñama. Ba bacna soyënga tmonjanma, y chë causa bënga šonjánamna njeysca tescama castigánënga jtsemnana, mo Bëngbe Bëtsabe bominiñe njeysca tescama obanënga cuaftsemncá.

⁶ Pero mora Bëngbe Bëtsá šojatsebacá chë léyeca ndëmandánënga chamotsemnana; chë ley tempo enjamna bëngbiama mo canje amëndayacá. Pero mora bënga chë leyama mo obanëngcá montsemna; chca, bënga ndoñe chamondëtsiyenama ntšamo tempo enjamncá, chë uabemana leyëngaca mandánënga, y aiñe tsmëcá chamotsiyenama, ntšamo chë Uámana Espíritu iuamcá bënga vida chamotsebomnama.

Bacna soye jamama juabna tcojtsebomñëse, chë ley jamana entsá bacna soye chaomama

⁷ Báseftanga muanjayana cach ley bacna soye yomna ca; ndegombre, chë ley ndoñe chca quenátsmëna. Chë léyeca atše tšabá sëndétatšëmbo ndayá yomna bacna soye jamana. Atše ndocna te matijántatšëmbona ndayá yomna chë “ínñabioye jtsántšabošana”, “ínñabioye ndoñe cattsantšaboše ca” chë leyiñe ndoñe matmëñjanábemëse. ⁸ Pero bacna soyënga jamama juabnënga atše bomna causa tonjanma, atše puerte chaitsebošama chë ndoñe šonjamna jtsebošana soyënga; y chca chë juabnëngaca tonjanopasá, atše chë leyënguiñe ndayá iuayanama jtsejuabnayëse. Er ndocna ley tondmëna ora, entsá ndoñe ntsetatšëmbuana ndayá yomna bacna soye jtsamana. ⁹ Canje tempo enjamna, chora atše sënjanijena leyëngama ntsetatšëmbcá, pero ntšamo leyiñe iuayancá sënjanabuátmana ora, ndayá jamama ndoñe yonjamnama, atše sënjanontsé chë bacna soyënga jamama juabnëngaca mandaná jtsemnana; ¹⁰ y chora atše sënjántatšëmbona, chë causa šojtsanmëna njeysca tescama castiganá jtsemnana, mo Bëngbe Bëtsabe bominiñe njeysca tescama obaná cuaftsemncá. Bëngbe Bëtsá chë mando tojanma, atše chë njeysca tescama yomna tšabe vida jtsebomnama chayobenama, chë ley jtseyeu-nanëse; pero ndoñe chiyatanobedecé causa, chë mando tonjanma atše chašotsemna njeysca tescama castiganá jtsemnana. ¹¹ Chë leyentša mandiniñe inje soyënga ndoñe šonjëtsemna jamama ca yojsayánayeca, chë bacna soyënga jamama juabnënga átšbeñe, šmonjaningñé bacna soyënga jamama; y chë mando bëtsemnana, chë bacna soyënga jamama juabnënga tmonjanma atše chašotsemna njeysca tescama castiganá jtsemnana, mo Bëngbe Bëtsabe bominiñe njeysca tescama obaná cuaftsemncá.

¹² Pero bēnga mēntšá mochjayana: chē leyna tšabe soye endmēna, er Bēngbe Bētsábiocana tojanóbcna, y chē mandēngnaca Bēngbe Bētsábiocana tojanóbcna ca; chiñe endayana ndayá tšabá yomna jamana y chca tšabá jtsemnana. ¹³ Y asna, ¿quem tšabe soye tojanma atše chašotsemna nŷetsca tescama castiganá jtsemnama, mo Bēngbe Bētsabe bominiñe nŷetsca tescama obaná cuaftsemncá? ¡Ndoñe, ndegombre ndoñe! Chē bacna soyēnga jamama juabnēnga atše bomna causa, chca átšeftaca tonjanopasá. Chē tšabá yomna sóyeca, chē bacna soyēnga jamama juabnēnga tmonjanma atše chašotsemna nŷetsca tescama castiganá jtsemnama. Chca chē juabnēngaca tonjanopasá, entšanga jobenayama jtsetatšēmbuama ndayá yomna bacna soye jamana; y chē mando, bacna soye jamama ndoñe yondmēna ca jtsichámuana causa, nŷetsca entšanga mondobena jinŷana canŷe bacna soye, mo canŷe puerte bēts bacna soycá.

¹⁴ Bēnga mondētatsēmbo chē ley Bēngbe Bētsabe ley yomnama, pero atšna nŷe canŷe entšá sēndmēna, canŷa nŷets tempo nŷe bacna soyēnga jamama juabnēngaca mandaná. ¹⁵ Ndegombre ndoñe quešnátēsertana ntšamo sēntsamcá, er ndoñe ntsamana ndayá jamama stsebošcá, pero aíñe jtsamana ndayá jamama ndoñe šontsogustancá. ¹⁶ Pero chē atšbe ainaniñe stsejuabná ndoñe tšabá tontsemna soye stsamēse, ndayama leyiñe iuayana ndoñe candmēna ntsamana ca, chca atše jtsinŷanŷayana chē ley ndegombre tšabe soye yomnama. ¹⁷ Chcasna, atše ya ndoñe ntsemnana chē chca tojtsamá, ndayá chē bacna soye jamama atšbe ainaniñe yomna juabnēnga jtsamana atše chca jamama. ¹⁸ Atše sēndētatsēmbo, atšbe ainaniñe tondaye yontsemna ntšamo tšabá yomncá atše jamama. Masque sēntseboše ntšamo tšabá yomncá jamama, ndoñe quetsátobena chca jamama. ¹⁹ Atše ndoñe quetsátama chē tšabe soye ndayá jamama sēndbošcá, pero aíñe sēntsama chē bacna soye ndayá jamama ndoñe sēndbošcá. ²⁰ Chē ndayá ndoñe jamama sēntsebošcá stsamēse, chca jtsayanana, atše ya ndoñe stsemna chē chca yojtsamá, sinó chē bacna soye jamama atšbe ainaniñe yomna juabnēnga chca yojtsama.

²¹ Chca, atše tijátatsēmbona ndayá átšeftaca yojtsopasánana; masque, ntšamo tšabá yomncá jamama stseboše, bacna juabnēnga sempre jtsemándayana atše bacna soye chaimama. ²² Atšbe ainanoca puerte sēntsoyejuá, Bēngbe Bētsábiocana yóbocana mandēngama. ²³ Pero atše sēnjínŷena inŷe soye átšeftaca yojtsopasánama; chē bacna soye jamama atšbe ainaniñe yomna juabnēnga yojtsama atše ndoñe ntjamama ntšamo atšbe juabnoca yomna mo ndegombre soycá, mo chē bacna soyēngaca mandaná cuaftsemncá.

²⁴ ¡Tša lastema atšbiama! Chē bacna soye jamama juabnēnga átšbeñe entsemánda, y entsama atše chašotsemna nŷetsca tescama castiganá jtsemnama, mo Bēngbe Bētsabe bominiñe nŷetsca tescama obaná cuaftsemncá. ¿Nda nanjobenaye chentšana atše jatsbocama? ²⁵ Nŷe Bēngbe Bētsá endmēna nda yobena atše jatsbocama, Bēngbe Utabná Jesucrístbeyeca. Chábioye chama mochtsatschuanaye. Atšbe ainanoca atše aíñe sēntsejuabná chē ley puerte tšabe soye yomna ca, y jobedésama sēntseboše; pero chē bacna soye jamama átšbeñe yomna juabnēngaca, atše bacna soyēnga sēntsama, ntšamo chē juabnēnga šontsemandacá.

8

Ntšamo Bēngbe Bētsabe Espíritu yomandacá jtsiyenana

¹ Y chca, Bēngbe Bētsá ndoñe ntjayanana, Cristo Jesúseftaca cánŷiñe mo canŷacá imomnēnga, chēngbe bacna soyēngama nŷetsca tescama castigánēnga jtsemnama yojtsamna ca. ² Er, chē Uámana Espíritoftaca mandánēnga mondmēnayeca, Bēngbe Bētsá šojatsebacá, bēnga chē bacna soye jamama juabnēngaca mandánēnga ndētsemnama, y nŷetsca tescama castigánēnga ndētsemnama, mo Bēngbe Bētsabe bominiñe nŷetsca tescama obanēnga cuaftsemncá. Chē Uámana Espíritu jamana bēnga ndegombre tšabe vida chamotsebomnama, cánŷiñe mo canŷacá Cristo Jesúseftaca jtsemnēse. ³ Bēngbe Bētsá

tojanma ndayá Moisesbe ley ndoñe tonjanobenacá, er entšanga mondoyena nýe ntšamo cachënga imobošcá, y nýe cánýenga ndoñe ntsoobenana jamana ntšamo tojtsamncá. Bëngbe Bëtsá tojánayana entšángbeñe bacna juabnëngbe mando jtsepochoçama ca, y chama chabe Uaquiñá tbojanichmó. Cha quem luaroye mo canýe entšacá tojánabo, canýe ainánaca, mo chë entšanga bacna soye amëngbe ainancá, pero ndocna te ni mo canýe bacna soye ndoñe tonjëftsema; y tojánabo, chábeyeca entšanga bacna soyëngama perdonánënga chamotsemnana. ⁴ Bëngbe Bëtsá chca tojanma, bënga chë mora oyenënga jtsamëse ntšamo chë Uámana Espíritu ainaniñe yomandacá y ndoñe nýe ntšamo bënga entšanga tmojtsebošcá, chamobenama tšabá jamana ntšamo chë leyiñe yomandancá, ntšamo šojtsamncá.

⁵ Chë nýe cachënga tšabá jtsomñama cachëngbe juabnëngaca imoyenënga, nýe sempre jésejuabnayana bacna soyënga jtsamama, chca bacna juabnëngaca mandánënga; pero ntšamo chë Uámana Espíritu ainaniñe iuamëndacá oyenëngna, sempre jésejuabnayana tšabe soyënga jamama, ntšamo chë Uámana Espíritu yobošcá. ⁶ Ntšamo chë nýe cachá tšabá jtsomñama juabnëngaca mandaná oyenentšana jóbocnana entšá nýetsca tescama castiganá chaotsemnana, mo Bëngbe Bëtsabe bominiñe nýetsca tescama obaná cuaftsemncá; y ntšamo chë Uámana Espíritu tojtsemandacá oyenentšana jóbocnana chë nýetsca tescama yomna tšabe vida jtsebomnana y ainaniñe tšabe ebionana. ⁷ Chë nýets tempo oyenënga nýe ntšamo tmojtsebošcá nýe cachënga tšabá jtsomñama jtsejuabnayëse, Bëngbe Bëtsabe uayayënga jtsemnana, er chënga ndoñe ntšamana ntšamo cha tojtsamëndacá, y chca jamama ndoñe ntsoobenana; ⁸ y chca, chë nýe chca bacna juabnëngaca oyenënga, ndoñe ntsoobenana jamana ntšamo Bëngbe Bëtsá tšabá tbojtsinýancá.

⁹ Pero tšëngaftanga ndoñe quešmátiyena nýe cach tšëngaftanga tšabá jtsomñama cach tšëngaftangbe juabnëngaca, sinó šmojtsiyena ntšamo chë Uámana Espíritu tšëngaftangbe ainaniñe cmamëndacá, er chë Uámana Espíritu sempre tšëngaftangbe ainaniñe iuétsemna. Nda ndoñe quem Cristbe Espíritu tondbomná, ndoñe Cristbia ntsemnana. ¹⁰ Pero Cristo sempre tšëngaftangbe ainantse vida totsóbomñëse, masque tšëngaftangbe cuerpënga yochjopochóca, quem luarentse entšanga bacna soyënga jtsamana causa, tšëngaftangbe espíritu nýets tempo vida echanjesóbomñe, er Bëngbe Bëtsá tojama tšëngaftanga chabe bominiñe tšábënga chašmotsemnana. ¹¹ Y Bëngbe Bëtsabe Espíritu, Jesús cháuatayenama tojamabe Espíritu, sempre tšëngaftangbe ainaniñe tojtsemnëse, Bëngbe Bëtsá, chë Cristo cháuatayenama tojamá, echanjama chë tšëngaftangbe yochjóbana cuerpo, cachiñe vida chaotsatsbomnana. Cha chca echanjama chabe Espíritoftaca, y mua sempre tšëngaftangbe ainaniñe iuétsemna.

¹² Chcasna, Jesucristbeyeca catšátanga, šontsamna jtsiyenana ntšamo chë Uámana Espíritu ainaniñe šuamëndacá; ndoñe quešnátamna jtsiyenana nýe bënga tšabá jtsomñama cabëngbe bacna juabnëngaca; ¹³ er nýe bënga tšabá jtsomñama cabëngbe bacna juabnëngaca šmojtsiyenëse, castigánënga šmochántsemna, mo Bëngbe Bëtsabe bominiñe obanënga cuaftsemncá; pero Uámana Espíritbeyeca, chca juabnëngaca nýetsca bacna soyënga jtsamana jtsajbanama šmojobenase, chë nýetsca tescama yomna tšabe vida šmochántsebomna.

¹⁴ Ntšamo chë Uámana Espíritu yomandacá tmojtsamëngna, Bëngbe Bëtsabe básënga jtsemnana. ¹⁵ Er Bëngbe Bëtsá ndoñe tonjama bënga ainaniñe canýe espíritu chamotsebomnana, mo nýe ínýabiama nýets tempo oservenëngcá chašotsamëndama, y chca cha chaoma bënga cachiñe chamotsëuatjama; sinó chë Bëngbe Bëtsá tojama bënga chamotsebomnana Espíritu jamana bënga Bëngbe Bëtsabe básënga chamotsemnana, y chë Espíritu endama “Atšbe Taitá ca” bënga Bëngbe Bëtsá chamotsechembuanama. ¹⁶ Y chë Uámana Espíritu y bëngbe espíritu canýe ora jayanana bënga Bëngbe Bëtsabe básënga imomna ca. ¹⁷ Y Bëngbe Bëtsabe básënga mondménayeca, bëngnaca mochanjóyëngacñe ndayá cha chabe básënga jatšatayama tojašebuachenacá; bënga y Cristo cánýiñe chë

soyënga mochanjóyëngacñe, er bënga inye soyënguiñe tmojasufrí cachcá ntšamo Cristo tojansufricá, Bëngbe Bëtsá uámanënga y bëtsëtsanga chásuabiamama, ntšamo cach Cristo yomncá.

Bëngbe Bëtsá bëtsëtsanga y uámanënga šochjábiama

¹⁸ Atše ndegombre sëndétatsëmbo, ntšamo quem tempo bënga imosufrincá, puerte batsatema yomna chë bëngbe tšabiama uámanana y buashinýinýanana Bëngbe Bëtsá šochjínýanýiyama. ¹⁹ Lempe ntšamo Bëngbe Bëtsá tojamcá endmëna mo tša cuaftsobatmancá, chaobuache chë Bëngbe Bëtsá ntšamo chabe básenga imomnama jinýanýiyama ora. ²⁰ Er lempe ntšamo Bëngbe Bëtsá tojamcá, mora ndoñe yontsoserverna ntšamo chaotsemnama cha tojanjuabocá. Chca tojanopasá, ndoñe chë lempe ntšamo cha tojanmcá chca chaotsemnama tojánbošenayeca, ndayá cabá chë soyënga tojanmentšana, Adán bacna soye tojanmentšana, Bëngbe Bëtsá tojanjuabó ntšamo cha tojanmcá joserviama ndoñe ndayama ntšamo cha tempo tojanjuabocá. Pero lempe ntšamo Bëngbe Bëtsá tojanmcá entsemna mo cuaftsobatmancá canye te, ndëmua ora chë soyënga chaoservema cha yochjamama jtsetatsëmbëse, ntšamo quem luare jobojátšama ora chama cha yojanjuabnacá; ²¹ Bëngbe Bëtsá canye te yochjama lempe ya ndoñe más chaondetsopochocama. Y chora, ntšamo Bëngbe Bëtsá yochjamcá chabe básenga chamotsemnama, lempe ntšamo cha yojanjuabnacá, chabe uámanana y buashinýinýanana jtsebmomnama, cachcá yochjama lempe chë cha tojanma soyëngaca.

²² Er bënga mondétatsëmbo lempe ntšamo Bëngbe Bëtsá tojanmcá mëntscoñama yomna mo canye shembása šešona jtsebmomnama ora tbojtsetsetšama tojtsobësnacá; er lempe ntšamo cha tojanmcá entsemna mo tša cuaftsebošcá Bëngbe Bëtsá chaomama, chë soyënga chaoservema ndayama cha tempo tojanjuabocá. ²³ Pero ndoñe nye chë lempe ntšamo Bëngbe Bëtsá tojanmcá yojtsemna mo chë shembasacá, sinó bëngnaca; y bënga ainaniñe mondbomna chë Uámana Espíritu, y chë soye endmëna ndayá natsana bënga tmojanóyëngacñe, chë Bëngbe Bëtsá bëtscá soyënga šochjátšatayentšana; bënga bëngbe ainanoca tša jesobësnayana, bënga chabe básenga chamotsemnama Bëngbe Bëtsá chaomama mondobátmanëntscuana, y chca, Bëngbe Bëtsá chaoma bënga ndocna te ndopochócama cuerpënga chamotsebmomnama. ²⁴ Bënga, Bëngbe Bëtsábeñe jtsošbuáchiyëse monjobátmana ntšamo cha tojanayancá chaomama, y chíyeca cha bënga šojatsebacá; pero ndayama tmobatmancá, ya tojtsëchnëjuanama bënga tmojtsonýase, chora chama ya ndoñe ntjátobatmanëngana. Er ndocná jatobátmanana chë ndayá jinýama ya tojobenacá. ²⁵ Pero ndayama bënga tmobatmancá, cabá ndoñe jinýama tmontsobena soye tojtsemnëse, bënga jtsamnana Bëngbe Bëtsábeñe jtsobátmanana, uantadënga jtsemnëse, ntšamo tojayancá Bëngbe Bëtsá chaomëntscuana.

²⁶ Uámana Espíritnaca bënga šochandbëtsëjabuachana, er bënga ainaniñe ndoñe corente ntsošbuáchiyana. Bënga ndoñe quemuátstatsëmbo Bëngbe Bëtsáftaca jencuéntana ntšamo ndegombre tšabá yomncá; pero cach Espíritu Bëngbe Bëtsábioye bëngbiamama jtsotjanañana, mo chca ora chabe ainanoca tša cuaftsobësnacá; y ndayá chca ora tbojtsotjanañamna, bënga ndoñe ntjobenayana bëngbe palábraca chama jóyebuambayama. ²⁷ Y Bëngbe Bëtsana, ntšamo entšanga ainanoca tmojtsebošcá yonýá, y ntšamo chë Espíritu jayanama tojtsebošcá yotáttsëmbo, er chë Espíritu chabe entšangbiamama ibotjanañe, ntšamo Bëngbe Bëtsá yobošcá.

Bënga ayëñjanayëngama más tmojábocana

²⁸ Y bënga mondétatsëmbo, Bëngbe Bëtsá nyetsca soyënguiñe inétsama cha imobobonshánëngbe tšabiama, ndëmuanýënga cha tojáchembo chabe entšanga chamotsemnama, ntšamo cha jamama yojanjuabnacá. ²⁹ Jesucristbeñe imošbuachéngbiamna, Bëngbe Bëtsá quem luare tojanma orscana yojanjuabná y chënga tojanabacacá chca chamotsemnama, y chë tempscana tojaninýnaná chënga chabe Uaquiñacá chamotsemnama;

chca, chabe Uaquiñá chë bëtscá catšátangbeñe chë natsaná chaotsemnana. ³⁰ Y chë Bëngbe Bëtsá chca tojánabacacangnaca, tojánachembo chabe entšanga chamotsemnana; chëngbiana tojanma chabe bominyiñe tšábenga chamotsemnana, y chëngbiámnaca yochjama chabe uámanana y obenanentsana chamotsebomnana.

³¹ Y asna, ¿chë soyëngama ntšamo mochjayana? Co Bëngbe Bëtsá bëngaftaca tojtsemnëse, bënga jáyënjana ndocná queochatobenaye ca. ³² Cha tondaye tonjanma chabe Uaquiñá jasúfriama ndoñe chabondëtsemnana, sinó tojanalesenciá entšanga chamóba, nyetsca bëngbe tšabiama. Bëngbe Bëtsá chabe Uaquiñáftaca chca tojanmëse, ndegombre Bëngbe Bëtsá lempe sochanjátšataye. ³³ ¿Nda nanjobenaye jayanama chë Bëngbe Bëtsá tojábacacanga bacna soyënga tmojama y castigánënga chamotsemna ca? Ndocná; er cach Bëngbe Bëtsá endmëna nda tojayana bënga chabe bominyiñe tšábenga imomna ca. ³⁴ Y asna, ¿nda nanjobenaye jayanama bënga castigánënga jtsemnana šojtsamna ca? ¿Cristo Jesús cha yojtsemna? Ndoñe. Cristo, nda bëngbiana tojanóbana, pero cabá más, ndabiama Bëngbe Bëtsá tojanma cháuatayenama, y mora Bëngbe Bëtsabe catšbioica yojtsetbemana, jamándama y puerte bëtsá chentše jtsemnana; y choca, chánaca bëngbiana Bëngbe Bëtsábioye ibotjanañe. ³⁵ ¿Ndayá nanjobenaye Crístbentsana, chë tša šondababuanyëshanábentsana bënga jtsajuánayana? ¿Padecena soyënguiñe jtsemnana, tša jtsetsetšana, bënga chamosufrima inyënga tmojtsama ora, tondaye saná shëntsana ora, tondaye entšayá tmonsábomna ora, o resjo bëngbiana tojtsemna ora, o bënga jtsëbáyama inyënga tmojtseboše ora? ³⁶ Ntšamo Bëngbe Bëtsabe uabemana palabrenguiñe endayancá, canyë entšá Bëngbe Bëtsábioye ibojauyana ora: Ace causa entšanga cada te šontsëtsësná bënga jtsëbáyama ca; entšanga bëngbioye nyë ntšámnaca jtsaborlánana; bëngaftaca jamana mo chë jobáyama oveshëngaftaca mondbetsamcá ca.

³⁷ Pero ndoñe; nyetsca chë soyënguentšana bëngna ayënjana yëngama más tmonjábocana, cha bënga šuababuányëshanayeca. ³⁸ Er atše tšabá sëndétatšëmbo tondaye yondobena, bënga Bëngbe Bëtsábentsana, chë tša šondababuanyëshanábentsana jtsajuánayana: masque ainënga o obanënga tmojtsemna; ni angelënga, ni amëndayënga chca jamama quemátobena; ni chë mora yojtsëchnëjuana soyënga, ni chë más chcoye yochjopása soyënga; ni ndocna obenana cach ndoñe; ³⁹ ndocna quem luarentša tsbanánoca soye, ni quem luarentša tajsoica soye; ni ndocna inyë soye ntšamo Bëngbe Bëtsá tojamcá, quenátobena chca bënga jtsajuánayama. ¡Ndocna soye quenátobena bënga Bëngbe Bëtsábentsana, chë bënga šondababuanyëshanábentsana jtsajuánayana, chë Cristo Jesús Bëngbe Utabnáftaca Bëngbe Bëtsá šojanýanýë bonshánentsana!

9

Bëngbe Bëtsá Israeloca entšanga tojabacacá, uámanënga chamotsemnana

¹ Atše, Crísoftaca cányiñe mo canyácá quetsomñecana, ntšamo sëntsichamcá ndegombre endmëna; atše ndoñe quetsátsbostero. Atšbe ainanoca juabnënga, Uámana Espíritbeyeca jtsemandánëse, chë šmonybëuyana tšabá o ndoñe tšabá tijamama, šmontsatsësná atše ndoñe stsebosterama. ² Ndegombre, atše puerte ngménaca atšbe entšangbiana, chë Israeloquëngbiana sëntsemna y atšbe ainana tša šontsetsetše, chënga Jesucristbeñe jtsošbuáchiyama ndoñe quemátsboše causa. ³ Tšabá tojtsemnëse, atše stjobenaye jtsebošana cach atše Bëngbe Bëtsábeyeca nyetsca tescama castiganá y Crístbentsana luaroca jtsemnana, atšbe entšanga, chë cach atšcá buiñe bomna entšanga jujabuáchama. ⁴ Chënga mondmëna chë Israeloca entšanga, chë Bëngbe Bëtsabe bocacana entšanga. Bëngbe Bëtsá chënga chabe basengcá tojánabiama y chë tša bëtsá y uamaná cha yomnana chënga tojaninýanýë. Bëngbe Bëtsá ba soye chënga tojanabuayená ndayá cha chëngbiana yojánboše y ndayá chëngbiana jamama, y chë ley chëngbe cucuatšinë tojanáboshjona. Chënga monjántatšëmbo ntšamo Bëngbe Bëtsábioye ndegombre jadórana, y chënga mondbomna

chë Bëngbe Bëtsabe šbuachenánana: chënga cha játsebacana. ⁵ Chënga mondmëna chë bëngbe tempsca uámana bëts taitangbentsánënga, y Crístnaca mo canye entsacá, mo canye Israeloca entsangbentsacá tojánabo; y cha endmëna Bëngbe Bëtsá, nyetsca soyënguifne mandayá. Nyetsca entsanga nyets tempo cha chamotsatschuaná. Chca chaotsemna.

⁶ Atše ndoñe quetsátichamo, ndayá jamama tojanašebuachenacá ndoñe Bëngbe Bëtsá tonjama ca; er, nyetsca Israeloca entsangbentsënga ndoñe Bëngbe Bëtsabe ndegombre entsanga quemátsmëna. ⁷ Ni nyetsca Abrahámbentsana entsanga, ndoñe chabe ndegombre básenga quemátsmëna; er Bëngbe Bëtsá Abrahámbioye tbojanianana: “Chë ácbentsana entsanga nye Isaácbentsana mochanjabo ca.” ⁸ Chca entsayana, bëngna ndoñe šontsamna jtsejuabnayana Abrahámbentsana nyetsca entsangbiamama mo Bëngbe Bëtsabe basengcá; inyetsá, nye chë Bëngbe Bëtsá tbojanšbuachenáyeca Abraham yojánabamna básengbiamama cocayé entsemna jtsejuabnayana, Abrahámbentsana ndegombre entsanga bëtsemnama. ⁹ Er mëntsá endmëna ntšamo Bëngbe Bëtsá tojánayana, Abrahámbioye tbojanšbuachená ora: “Camëntša tempo entsba uata chanjésabo, y Sara canye šešona bochántseboamna ca.”

¹⁰ Pero nye nyetsá ndoñe quenátsmëna. Chë Rebecbe uta básatna canye taitá ibnabomna, bëngbe tempsca bëts taitá Isaac. ¹¹⁻¹² Bëngbe Bëtsá, Rebécbioye tbojanianana: “Acbe mayor uaquiñá, acbe ngomënche uaquiñábioye bochanjasérvia ca.” Cha chca tojánayana jinýinyiyama chë básatbentsana canya cha tbojánbocacama, Jacob, y ndoñe chë inye basa, Esaú, chca jamama tempo cha tojanjuabóyeca. Rebécbioye chca tbojanianana chë básata cabá ndonýna ora, y ni canye basa cabá ndocna soye ndama ora. Y chca, ntšamo tojanopasacana, tojanopasá chë básatbentsana canya y ndoñe chë inya chca chaotsemnama Bëngbe Bëtsá tbojanábuayanayeca, y ndoñe ndayá chata tbojanmama. ¹³ Ntšamo Bëngbe Bëtsá chabe uabemana palabrenguifne tojanayancá: “Jacob sënjanbobonshana, y Esaú sënjanáboyënja ca.”

¹⁴ Y asna, ¿ntšamo mochjayana? ¿Bëngbe Bëtsá ndoñe cachcá nyetscángaftaca endëtsemna ca? ¿Ndoñe, ndegombre ndoñe! ¹⁵ Er Bëngbe Bëtsá Moisésbioye tbojanianana: Atše šochanjóngmia nda chaitsebošabiamama, y nda chaitsebošá chanjalastéma ca.

¹⁶ Y chca, Bëngbe Bëtsá canye entsá jabocacayana, ndoñe ndayá chë entsá tojtsebošama o tojamama, ndayá Bëngbe Bëtsá tbojalastemama. ¹⁷ Er Bëngbe Bëtsabe uabemana palabrenguifne, Faraón chë Egiptoca réybioye cha tbojanianana: “Atše rey tcbonjábema, tša bëtscá atšbe obenana yomnama nyetscanga ácheñe chayinýanyëma, y nyets luarentša entsanga atšbiamama chamotatsšëmbonama ca.” ¹⁸ Y chca, Bëngbe Bëtsá jalastémama nda tojtsebošábioye, y nda tojtsebošábioye jalesénciana chabiamama nduauenaná chaotsomñama.

¹⁹ Pero ndánaca tsëngaftanguentsá šuatjatjaye: “Bëngbe Bëtsá chca tojtsamëse, ¿ntšamo cha nantsobena jayanana canye entsá bacna soye tojama ca? ¿Nda nanjobenaye chë ndayá Bëngbe Bëtsá tojtsebošama corente contra jtsemnana?” ²⁰ Pero, nye entsá quecotsemñecá, ¿ntšamo catjobenaye tša uamaná comna ca jtsejuabnayana, Bëngbe Bëtsá jatstjanayama ndáyeca canye soye chca yojtsama ca? ¿Chë pormana soye chë chca tojamábioye buanjauyana: “¿ndáyeca chca šcojama ca?”? ²¹ Chë fshantse soyënga pormayá jtsobenana canye fshantsentsana jamana, canye matbaja uámana tescama, y inýajna cada te chaotsoservénama. Cachcá, Bëngbe Bëtsá jtsobenana jamana ntšamo cha tojtsebošcá, ndayá cha tojama sóyeca.

²² Bëngbe Bëtsá yojáboše jinýanyiyama entsángaftaca tbojánatnama, chëngbe bacna soyëngama; y yojáboše cha puerte obená yomnama jinýanyiyama. Chíyeca, chënga tša yojanëuantana, chënga chë ndëmuanýengbiamama Bëngbe Bëtsá yochjánayana chëngbe bacna soyëngama castigánënga jtsemnana yojánamna ca, chë ndëmuanýenga jtsapochócama Bëngbe Bëtsá yojtsanprontana. ²³ Y chánaca yojáboše jinýanyiyama cha puerte uamaná y bëtscá yomnama. Cha tojama, bënga chë ndëmuanýenga cha šojanalastemá, chabe

obenantšana y uámanantšana chamotsebomnama; y cha tempo chca tojanjuabó bēnga uámanēnga y bētsētsanga jábiamama. ²⁴ Bēnga mondmēna chē ndēmuanyēnga Bēngbe Bētsá chama šojánachembo, ínŷengna judío entšanguentšana, y ínŷengna ndoñe judiēngbentšana. ²⁵ Ntšamo chabe uabemana palabrēnguiñe, Oséasbe librēšañe Bēngbe Bētsá tojanayancá:

Entšanga ndoñe átšbenga mondmēnēnga, chēnga “atšbe entšanga ca” chantsēbobuatma; y canyē luarentša entšanga ndoñe sēnjánababuanyēshanēnga, chēngna “atšbe bonshánēnga ca” chantsēbobuatma.

²⁶ Y cach luare ndayentše Bēngbe Bētsá tojánayana: “Tšēngaftanga atšbe entšanga ndoñe quešmátsmēna ca”,

cachentše Bēngbe Bētsá ainá chēnga echanjáuyana “atšbe básenga ca”.

²⁷ Israeloca entšangbiamama, Isaías jabuachana tojánayana:

Masque Israeloca entšanga puerte banga chamotsemna, nŷa mo chē mar bėjayoca chēñyañe cascajca,

Bēngbe Bētsá nŷe báseftanga chentšana echanjátsebacaye;

²⁸ er, ndoñe bēn y Bēngbe Utabná canyē y nŷetsca tescama echanjayana,

nŷets quem luarentša entšangbiamama ndayá chēnga tmojamama tšabá o ndoñe tšabá bétsemnama,

y chēngaftaca echanjama ntšamo chaojayancá ca —cha tojánayana.

²⁹ Ntšamo Isaías tojanayancá, Bēngbe Bētsá Israeloca entšángaftaca ntšamo jamama tojanoyebuambá ora:

Bēngbe Utabná, nŷets obenana bomná,

ínŷengna bēnga jtsapochócama cha tojanalesenciá ora,

báseftanga bēngbe entšanguentšēnga ainēnga chamotsomñama ndoñe matēnjanmēse,

bēnga mora pochocánēnga mamojtsemna, mo chē Sodoma y Gomorra pueblēngoca entšangcá ca,

cha nŷetscanga y nŷetsca tescama tojtsanapochócaye ca.

Israeloca entšanga y chē tšabe noticiēnga

³⁰ Chcasna, mora mēntšá mochjayana: ndoñe judiēnga tondaye monjánama Bēngbe Bētsabe bominyiñe tšábenga jtsemnama, pero cha tojanma chēnga chabe bominyiñe tšábenga chamotsemnama, chēnga chábeñe imojtsošbuáchiyama. ³¹ Pero, Israeloca entšanga imojánboše Bēngbe Bētsabe bominyiñe tšábenga jtsemnama, ntšamo chē leyiñe iuayancá jtsamēse; pero ndoñe chca tmonjanobená. ³² ¿Y ndáyeca chca? Co chē Bēngbe Bētsabe bominyiñe tšábenga jtsemnama, chábeñe jtsošbuáchiyēse, chēnga tondaye monjánama causa chca, sinó chca jtsemnama imojánboše nŷe ntšamo leyiñe iuayancá jtsamēse. Y chca, chēngna Jesús tmojtsanaboté, ntšamo chē Bēngbe Bētsabe uabemana palabrēnguiñe chē tmojtsanábotengbiamama endayancá, chēngbiamama cha yomna mo chē ndētšbé ndayiñe chēnga jtsojestjiamcá ca. ³³ Bēngbe Bētsabe uabemana palabrēnguiñe cha chca tojánayana:

Smochjinŷe, atše sēnjama Jerusalenentše canya chaotsemna, y cha endmēna mo ndētšbecá ndayentše chēnga mochjojestje,

y canyē peñescá ndayēse yochjama chēnga chamotsótsatsama;

pero nda chábeñe tojtsošbuaché, ndocna te nŷe bonamente queochátobatmana ca.

10

¹ Jesucristbeyeca catšátanga, atše nŷets ainánaca sēntseboše y Bēngbe Bētsá sēntseimpadana, cha Israeloca entšanga cháuatsebacama. ² Atše sēndétatšēmba y sēntsobena chēngbiamama jayanama, chēnga puerte mondboše Bēngbe Bētsá jaserviama, pero ntšamo chēnga yojtšesertancá, ntšamo Bēngbe Bētsá jaserviama yojtšamnamna, ndoñe quenátsmēna ntšamo ndegombre yomncá. ³ Chēnga ndoñe tonjanēsertá

ntšamo Bëngbe Bëtsá inétsama entšanga chabe bominiñiñe tšábenga chamotsemnana, y cachënga tmojánguango ntšamo jamëse jobenayama Bëngbe Bëtsabe bominiñiñe tšábenga jtsemnana; pero ndoñe chca tmonjanobená, chë entšanga chabe bominiñiñe tšábenga chamotsemnana ntšamo Bëngbe Bëtsá inetsamcá ainánaca ntjoyëngacñëcá. ⁴ Er Cristo tojama entšanga ndoñe chamondëtsama ntšamo leyiñe iuayancá, Bëngbe Bëtsabe bominiñiñe tšábenga jtsemnana, chca, chënga chamobenama chabe bominiñiñe tšábenga jtsemnana, Crístbeñe jtsošbuáchiyëse.

⁵ Chë Bëngbe Bëtsabe bominiñiñe tšábenga jtsemnana bošëngbiama, ntšamo leyiñe iuayancá jtsamëse, Moisés mëntsá tojánayana, chëngbiama tojanábema ora: “Nda tojtsama nyëtsca mandënga ntšamo leyënguiñe endayancá, tšabe vida echántsebomna, nyëts tempo chë leyëngaca mandaná ca.” ⁶ Mëntsá endmëna ntšamo Bëngbe Bëtsabe uabemana palabrënguiñe iuayana, entšanga chabe bominiñiñe tšábenga chamotsemnana ntšamo cha inétsamama, Jesucristbeñe jtsošbuáchiyëse: “Ndoñe cattsetjanaye: ‘¿Nda celoye yochjátsjua ca?’ (chca endmëna ndayá Cristo quem luaroye chaotsmama); ⁷ o, ‘¿Chë obanënga imomna luaroye yochjátsma ca?’ (chca endmëna ndayá Cristo chë obanënga imomna luarentšana chaotsjuama).” ⁸ Ntšamo Bëngbe Bëtsabe uabemana palabrënguiñe iuayancá mëntsá endmëna: “Tšëngaftanga paselo šmontsobena ntšamo Bëngbe Bëtsá tojabuayenacá jouenama, tšëngaftanga ya chama palabrëngaca šmojoyebuambá y tšëngaftangbe ainaniñe chama šmojtsejuabná.” Chë buayenánana endmëna ndayá bënga ftsabuayiynacá, y chiñe endayana Jesucristbeñe jtsošbuáchiyama šojtsamna ca. ⁹ Chë buayenana soyënguiñe endayana, Jesús ndegombre Bëngbe Utabná yomna ca aca tcojayanëse, y Jesucristo cháuatayenama Bëngbe Bëtsá tojanmama, nyëts ainánaca tcojtsošbuáchese, Bëngbe Bëtsá cmochjatsbocá ca. ¹⁰ Er ainanoca bënga Jesucristbeñe jtsošbuáchiyana y Bëngbe Bëtsá jamana cachabe bominiñiñe tšábenga chamotsemnana; palabrëngaca bënga jinñanñiyana ndegombre Jesucristbeñe imojtsošbuáchema, y Bëngbe Bëtsá bënga játsebacana.

¹¹ Er Bëngbe Bëtsabe uabemana palabrënguiñe mëntsá endayana: “Nda Bëngbe Bëtsábeñe tojtsošbuaché, ndocna te nyë bonamente queochátobatmana ca.” ¹² Judiënga y ndoñe judiënga atsebácanënga mondmëna cach sóyeca, er canñe Utabná nyëtscangbe Utabná endmëna, y cha tmojtsotsëmbuanëngbiama, cha bëtscá jtsamana. ¹³ Er Bëngbe Bëtsabe uabemana palabrënguiñe mëntsá endayana: “Ndánaca Bëngbe Utabná tbojtsotsëmbuanábioye, cha bochanjatsbocá ca.” ¹⁴ Pero, ¿ntšamo cha mochjótšëmbona, chábeñe ndoñe tmontsošbuáchese? ¿Y ntšamo chábeñe mochtsošbuáchiye, chabiama jóyebuambayama ndoñe tmonjouenëse? ¿Y ntšamo chabiama mochjouena, chabe buayenana soyënga chënga jáuyanama ndocná tontsemnëse? ¹⁵ ¿Y ntšamo chabe buayenánana mochtsabuátambaye, chëngbioye jíchamuama ndocná tontsemnëse? Ntšamo Bëngbe Bëtsabe uabemana palabrënguiñe endayancá: “¡Tša tšabá chë buayenánana abuátambayënga tmojáshjajna ora ca!”

¹⁶ Pero nyëtscanga chë tšabe noticiënga ndoñe ntjoyeunayana. Cach Isaías mëntsá tojánayana: “Utabná, ¿nda chë mondabuayiyná soyënguiñe yojtsošbuaché ca?” ¹⁷ Chcasna, chë tšabe noticiënga jouenëse, entšanga jobenayana Jesucristbeñe jtsošbuáchiyana; y nda Crístbiama tojtsabuayiynase, entšanga chabe buayenánana jouenana.

¹⁸ Pero atše šcotjá: ¿ndegombre nandmëna judiënga chë buayenánana ndoñe tmonjanuena ca? ¡Aíñe, chënga aíñe tmonjanuena! Ntšamo Bëngbe Bëtsabe uabemana palabrënguiñe endayancá, chë Bëngbe Bëtsabe buayenana soyëngama oyebuambnayëngbiama:

Chëngbe oyebuambnayana nyëts quem luariñe tojóshjango,

y chëngbe palabrënga nyëts luarënguentša entšangbenache tojuáshana ca.

¹⁹ Pero cachiñe šcotjá: ¿Israeloca entšanga chë buayenánana ndoñe tonjanësertá ca? Natsana, Moisés mēntšá tojánayana, chë ndoñe judiēnga Jesucrístbeñe tmojtsošbuaché ora, ntšamo chë judiēnga mochtsanjuabnayama tojanoyebuambá ora:

Atše, Bēngbe Bētsá, chanjama, ndayá chë ndoñe judiēnga chamojashjache soyēngama tšēngaftanga chašmotsíyentsbuašama, chēnga chë ndoñe monjamna mo tšēngaftangcá atšbe entšanga.

Atše chca chanjama chēngaftaca, chēnga chë tempo Bēngbe Bētsabe soyēngama ndoñe tonjanësertá ca.

²⁰ Isaíasnaca, Bēngbe Bētsabiana tojanoyebuambá ora, puerte añémoca tojánayana: Chë atše ndoñe šmondēnguanga, šmonjínÿena; y chë atšbiana ndoñe mondēnotíciangbioye sēnjenonÿinÿé ca.

²¹ Pero Israeloca entšangbiana mēntšá tojánayana:

Nÿets tempo atše tša sēnjánama, chēnga átšeftaca tšabá tempcá chamotsatsmēnama, pero chēnga ndoñe chemátanbošena jouenama, y atšbe contra monjētsemna ca.

11

Bēngbe Bētsá, Israeloca entšangbiana tšabe juabna yobomnama tojinÿanÿé

¹ Y as mora šcotjá: ¿Bēngbe Bētsá chabe entšanga tojtsanēbaté? ¡Ndoñe, ndegombre ndoñe! Cach atše canÿe Israelocá sēndmēna, Abrahámbeñšana entšá y Benjaminbe bēts pamillentsana entšá. ² Bēngbe Bētsá chabe entšanga ndoñe tonjubaté, chë temp-scana tojánabacacanga. Tšēngaftanga šmondētatsēmbo ntšamo Bēngbe Bētsabe uabemana palabrenguiñe endayancá, Bēngbe Bētsabe juabna oyebuambnayá Elías, Israeloca entšangbe contra Bēngbe Bētsábioye cha ibojanatsētsná ora: ³ “Bēngbe Utabná, acbe juabna oyebuambnayēnga tmojtsēbaye y acbiana pormana altarēnga tmojtsepochochá; nÿe atše vídaca tijoquedá, y chēnga montseboše átšnaca jóbama ca.” ⁴ Y mēntšá Bēngbe Bētsá tbojanjuá: “Atše canÿsēfta uaranga boyabásenga atšbiana sēnjacuedá, Baal ndoñe tmonjadoranga, ndayá entšanga tmojobopormá y imojtsejuabná canÿe dios yomna ca.” ⁵ Mórncaca cachcá entsemna, judiēnguentše báseftanga monduájamna Jesucrístbeñe ošbuáchiyēnga, ndēmuanÿēnga Bēngbe Bētsá tojabacacá, cha chēngbiana tšabe juabna bómnyeca. ⁶ Bēngbe Bētsá entšanga jabacacayana chēngbiana tšabe juabna bómnyeca; y ndoñe chca ntjamana ndayá entšanga tmojamama. Er ndayá tmojamama Bēngbe Bētsá entšanga tojabacacase, cha nanjínÿanÿiye cha chca inétsama, ndoñe nÿe chēngbiana tšabe juabna bómnyeca.

⁷ ¿Y asna? Israeloca entšanga ndoñe chemátaninÿena ntšamo Bēngbe Bētsabe bominiñe tšábēnga jtsemnana, pero chēnguentšēnga básefta bocacánēngna aiñe tmojanobená. Bēngbe Bētsá tojanalesenciá chë ínÿēnga Israeloquēnguentšana chabe buayenana soyēnga ainaniñe ndoñe chamondóyēngacñama; ⁸ ntšamo Bēngbe Bētsabe uabemana palabrenguiñe endayancá: “Bēngbe Bētsá tojama chēnga chabe soyēngama jósertama ndoñe chamondētsobenama, y mēntscōñama chēnga ndoñe quemátobena chabe soyēngama ni jinÿana ni josértana, mo nduabínÿnēnga o nduauenanēnga cuaftsemnēngcá ca.” ⁹ Davídnaca chēngbiana mēntšá tojánayana:

Mo chë entšanga canÿe fiestentse oboyejuayēnga, chēngbe uayayēngbeyeca nÿe ndeolpe ishēchenēngcá,

y mo chë bayēngbiana uachmaniñe ishēchenēngcá, chēnga mal chamopasama chaomama Bēngbe Bētsá sēntseimpadana, mo nda ndētsbeñe cuaftsojestjca.

Chca Bēngbe Bētsá chaoma, chēngbe bacna soyēngama;

y cha cháuyana chēnga puerte castigánēnga jtsemnana yojtsamna ca, bacna soyēnga tmojama causa;

¹⁰ Bēngbe Bētsá chaoma ntšamo mochjapásama chēnga ndoñe chamondobená jtsetatšēmbuana,

y chaoma puerte chamosufrima, nyets tempo padecena soyënguiñe jtsiyenëse ca —cha tojánayana.

Bëngbe Bëtsá ndoñe judiënga tojatsebacá

¹¹ As mora šcotjá: ¿Israeloca entšanga Bëngbe Bëtsá ndoñe tmonjanoyeuná ora, cha tojánayana chënga nyetsca tescama castigánënga jtsemnana yojtsamna ca, ndocna inye soye chëngbiana ntsemncá? ¿Chëngbiana yojamna mo chë ndëtsbeñe jójëstjiana y jtëtsbanama ndoñe más ntjobenayancá? ¡Ndoñe, ndegombre ndoñe! Chca ndoñe quenátsmëna. Chënga Bëngbe Bëtsá ndoñe chematanoyeuná causa, ndoñe judiënga tmonjántatšëmbona ndayá bëtsemnana Bëngbe Bëtsábeyeca atsbocaná jtsemnana; y chë causa, mora, judiënga, ndayá chë ndoñe judiënga Bëngbe Bëtsábentšana tmojoshachiñcá montsiyentšbuaše. ¹² Judiënga bacna soyënga tmojanma causa, inye entšanga quem luarentše tmojobená ba tšabe soyënga jtsebomnama. Chë judiënga tmonjanorrebajá causa, chë ndoñe judiënga ba tšabe bendicionënga Bëngbe Bëtsábentšana tmojosháchiñe. Y chca, chë bëtscá judiënga Bëngbe Bëtsá játsebacama, chënga atsebácanënga chamojtsemna ora, más bëtscá tšabe bendicionënga Bëngbe Bëtsábentšana nyetsca entšangbiana echántsemna.

¹³ Ntšamo mora chanjayancá, tšëngaftanga ndoñe judiëngbiana entsemna. Bëngbe Bëtsá šojichmó chabe soyëngama chë ndoñe judiënga jábuayenama; atše sëntsejuabná puerte uámana trabajo stebomna ca. ¹⁴ Atše sëntsobátmana, quem trabájoca atše jobenayana jamama chë cach atšcá buiñe bomna entšanguentšënga, ndayá chë ndoñe judiënga Bëngbe Bëtsábentšana tmojoshachiñcá chamotsiyentšbuaše, y chca, ndayá tijamama, Bëngbe Bëtsá chënguentsana báseftanga cháuatsebacama. ¹⁵ Er chë judiënga Bëngbe Bëtsá tojtsanébaté ora, cha tojanma inye entšanga quem luarentše cháftaca tempcá tšabá chamotsatsmënama; y chënga cha chamojoyeuná ora, corente tšabá echántsemna, nya chënga mo obanënga cuabmëncá y cuaftsatayanëngcá. ¹⁶ Nda canye arninýentšana chë natsana tandëše Bëngbe Bëtsabiana joserviama yojtsemna ca tojayanëse, jtsemnana mo nyetsana chabiana cuaftsemncá. Canye betiyentša tbëtëjënga Bëngbe Bëtsabiana yojtsemna ca canya tojayanëse, nyetsca chë betiyentša buacuafjëgnaca Bëngbe Bëtsabiana jtsemnana.

¹⁷ Chë judiënguentsë báseftanga Jesucristbeñe ndoñe montsanošbuaché ora, tšëngaftanga chë ndoñe judiënga šmonjanobená chábeñe jtsošbuáchiyana. Y chca, judiënga monjamna mo canye jena olivo betiyentšana entšanga tmojatëtse buacuafjëngcá, y tšëngaftangna mo tjoca olivo betiyentša buacuafjënga, chë jena olivo betiyeshiñe jenëfjëngcá. Mora tšëngaftanga Bëngbe Bëtsábentšana cachca tšabe soyënga chë judiëngaftaca šmontsebmoma, mo chë jena buacuafjënga y cachentša buacuafjënga cach tbëtëjëntšana lempe cuaftsoyëngacañcá. ¹⁸ Ndoñe šmattsenábotamnaye, tšëngaftanga Bëngbe Bëtsabe tšabe soyënga šmojtsebomnama, chë Jesucristbeñe ndoñe montsanošbuaché judiëngbiana yojamna soyënga. Smochtsejuabnaye, buacuafjëngna chë tbëtëjëngayeca vida jtsebomnana, y ndoñe tbëtëjënga chë buacuafjëngayeca; cachcá, tšëngaftanga nyë Bëngbe Bëtsábeyeca chë tšabe soyënga šmojtsebomna.

¹⁹ Pero tšëngaftanga šmuatjayana: “Aíñe, pero Bëngbe Bëtsá básefta judiënga tojanëbaté, Jesucristbeñe ndoñe montsanošbuaché causa; chíyeca bënga fsëjanobená mo buacuafjënga betiyiñe jenëfjëngcá chca tšabe bendicionënga Bëngbe Bëtsábentšana jóyëngacñana ca.” ²⁰ Ndegombre, chënga Jesucristbeñe ndoñe montsanošbuaché causa, mo buacuetëtšëñëfjëngcá tmonjanoquedá, pero Jesucristbeñe šmojtsošbuáchemá, tšëngaftanga šmojoquedá Bëngbe Bëtsábentšana tšabe bendicionënga jtsoyëngacañcá. Chcasna, chama ndoñe šmattsenábotamnaye; más tšabana cuedado jtsebomnana. ²¹ Er Bëngbe Bëtsá, chë Jesucristbeñe ndoñe montsanošbuaché judiënga, ndoñe tonjanaperdoná, y chënga chabe entšanga bëtsemnamna, monjamna mo cach betiyentša

buacuafjěngcá; tšěngaftanga, chě mo betiyiñe jena buacuafjěngcá šmomněnga, cha cach ndoñe quecmochátaperdonaye, chábeñe ošbuáchiyana šmojtšajbanase.

²² Bětscá šmochtsejuabnaye Běngbe Bětsá puerte tšabia yomnama, pero cha tšatjayá yomnámna šmochtsejuabnaye; tšatjayá endměna chě bacna soyěnga tmojtšaměngaftaca, pero tšěngaftangaftaca puerte tšabia. Cha tšěngaftangaftaca chca echántsemna, tšěngaftanga chca chašmojtšomerecéněntscuana; pero ndóñesna, Běngbe Bětsá echanjama tšěngaftágnaca mo buacuetěšeněfjěngcá chašmoquedama, chě tšabe bendicioněnga Běngbe Bětsábentšana ntsoyěngacañcá. ²³ Y ntšamo mora imojtsejuabnacá chě judiěnga tmojatrocá y tmojontsé Jesucristbeñe jtsošbuáchiyana, chěngnaca cachiñe chě tšabe bendicioněnga Běngbe Bětsábentšana mochanjójyěngacñe, y mochántsemna mo betiyiñe jena buacuafjěngcá, er Běngbe Bětsá becá obenana endbomna jamama ntšamo chě judiěnga tempo imojobomncá cachiñe chamotsatsbomnama. ²⁴ Chcasna, más paselo jtsemnana canye jena olivo betiyentša buacuatěšeněfja cach betiyiñe jětsjena, y ndoñe, chě tjoca olivos betiyentša buacuafja canye jena olivos betiyiñe chaójuama jájena. Cachcá, más paselo jtsemnana chě Jesucristbeñe ndoñe montsošbuaché judiěngbiama, jontšana jtošbuáchiyana y tšabe bendicioněnga Běngbe Bětsábentšana jójyěngacñana, tšěngaftanga ndoñe judiěnga chě tempo Běngbe Bětsá ndoñe šmonjanábuatměngbiama.

Běngbe Bětsá nyetscángaftaca puerte tšabia endměna

²⁵ Jesucristbeyeca catsátanga, atše sěntseboše tšěngaftanga chašmotsetátšěmbo chě tempo Běngbe Bětsá entšanga ndoñe tonjaninyānyě soyěngama. Atše sěntseboše tšěngaftanga quem soyěngama chašmotsetátšěmbo, chca, tšěngaftanga ndoñe judiěnga chě judiěngbiama más uámaněnga šmomna ca ndoñe chašmondětsejuabnama. Ndayá Běngbe Bětsá tempo entšanga ndoñe tonjaninyānyēcá, quem soye endměna: Běngbe Bětsá tojalesenciá, nye baseftatescama banga Israeloquěnga Běngbe Bětsabe soyěnga ainaniñe ndoñe chamondójyěngacñama; pero chca echántsemna, chě ndoñe judiěnguentše atsebácaněnga jtsamnama imomněnga, atsebácaněnga chamojtsemněntscuana. ²⁶ Chca chaojopasá ora, nyetsca Israelentša entšanga atsebácaněnga mochántsemna; ntšamo Běngbe Bětsabe uabemana palabrenguiñe endayancá:

Entšangbe atsebacayá Israelocana echanjabo,

y echanjama nyetsca Jacóběbentšana entšanga ndoñe más vida chamondětsebomna, bacna soyěnga jtsaměse ca.

²⁷ Y měntšá endměna ntšamo chěngbiama chjašebuachená:

chěnga játsebacana, chěngbe bacna soyěngama chajaperdónaye ora ca —chiñe endayana.

²⁸ Chě tšabe noticiěnga tmojtšanaboté causa, judiěnga Běngbe Bětsabe uayayěnga mondměna, chca, tšěngaftangbe tšabiamna chaotsemnama. Pero Běngbe Bětsá tojánabacacayeca, chěngnaca Běngbe Bětsabe bonsháněnga mondměna, er Běngbe Bětsá chěngbe tempsca uámana běts taitanga chca tojanašebuachená. ²⁹ Chca endměna, er Běngbe Bětsá ndocna te juabna ntjatrócana; nyetscanga chabe entšanga chamotsemnama tojáchemběnga, nyets tempo cha echántšababuanyěshana, y echanjama chěngbeñe tšabe bendicioněnga chaotsemnama. ³⁰ Tšěngaftanga ndoñe judiěnga tempo ndoñe šmonjánama ntšamo Běngbe Bětsá inabošcá; y mora, Běngbe Bětsá tcmojalastemá, judiěnga Běngbe Bětsá ndoñe tmonjoyeuná causa. ³¹ Cachcá, Běngbe Bětsá tšěngaftanga tcmojalastemama, judiěnga montsemna chě Běngbe Bětsá ndoñe montsobedecěngěnga, chca, Běngbe Bětsá chěngnaca cháualastemama. ³² Er Běngbe Bětsá tojinyānyě, cha ndoñe ntjoyeunayama juabněngaca nyetscanga mandáněnga imomnama, chca, nyetscanga jálastemama cha jobenayama.

³³ ¡Ndegombre, Bëngbe Bëtsá nyetscangbiana puerte tšabia endmëna, puerte osertaná y puerte obiashjachá! Ndocná quenátobena ínÿenga jábuayenama ndayá Bëngbe Bëtsá jamama inetsejuabnaycá, y ndocná quenátobena corente josértana ntšamo cha inetsamcá.

³⁴ Ntšamo Bëngbe Bëtsabe uabemana palabrënguiñe endayancá:

Ndocná quenátostatšëmbo ntšamo Bëngbe Bëtsá inetsejuabnaycá;
ndocná quenátobena cha jábuayenama ndayá jamana ibomnama.

³⁵ Ndocná quenátobena ndayánaca cha natsana jshatšetayana, chë tbojatšetabiama ndebená cha jatsmënana,

y chë ndebénama ndayánaca jtoyiyama chabotsemnana ca.

³⁶ Er lempe cha tojama, lempe cha iútabna, y lempe chabiama yomna. ¡Nyetscanga nyetsca tescama cha chamotsatschuaná! Chca chaotsemna.

12

Ntšamo jtsiyenëse Bëngbe Bëtsá jtseservénama

¹ Chcasna, Jesucristbeyeca catšátanga, Bëngbe Bëtsá bënga ba soye šojalastemáyeca, puerte cbontsaimpadana, tšëngaftanga Bëngbe Bëtsá chašmëyana tša šmojtseboše lempe jamana chábioye jadórama ca, Bëngbe Bëtsá jadórama mo ndayá cuafjobacá y cuafjuatšëmboncá, mo cabá ainá cuaftsomñcá. Smochjauyana tšëngaftanga sempre šmochtsentšena cha servénana y jtsamëse cha tšabá bëngaftaca chaotsemnana. As, chca chašmojtsama ora, ndegombre oyejuayá Bëngbe Bëtsá šmochántsebiamnaye. ² Ndoñe šmattsiyena jtsamëse ntšamo chë nÿe quem luarama enójuabnaye entšanga monduamancá, y smochjaleséncia Bëngbe Bëtsá mo tsëm entšangcá chácmbiamama, tšëngaftangbe ainana y juabna mo tsëmcá chaomëse. Chca, tšëngaftanga smochanjobenaye jtsejuabnayana y smochántsetatšëmbo ntšamo Bëngbe Bëtsá yobošcá: ndayá tšabá yomna, chë ndayá cha oyejuayá ibnabema, y ndayá ya ndoñe yondopodena más tšabá jtsemnana.

³ Ndayá Bëngbe Bëtsá atšbiana tšabá jtsejuabnayëse šojatšetama, nyetsca tšëngaftanga cbochjáuyana, ndocná cachabiama chaondëtsejuabná más uamaná yomna ca, nÿe ntsachetšá jtsenójuabnayana ibomna nyetšá. Más tšabá, cada ona cachabiama tšabá chaotsenojuabná, y chca chaotsenojuabná ntšamo chabe ošbuáchiyana yomncá, chca, chë Bëngbe Bëtsá tbojatšetá ošbuáchiyana chabiama chaotsetrabájama. ⁴ Er, ntšamo bënga cada ona mondbomna canÿe cuerpo y chë cuerpiñe ba soyënga jtsebomnana, y nyetsca soyënga ndoñe cach soyama cuerpiñe ntsoservénana, ⁵ cachcá bënga ošbuáchiyënga, masque bëtscanga imomna, Crísoftaca cánÿiñe mo canÿacá mondmënayeca, bënga mondmëna mo chabe cuerpo cuaftsemncá, y cada ona cánÿiñe mo canÿacá nyetscángaftaca.

⁶ Bëngbe Bëtsá tojama bënga cada ona chamotsebomnana ndoñe cachca chabe tšetana obenana, ntšamo Bëngbe Bëtsá cada ona bëngbe tšabiama inajuabnaycá. Y chabe juábnaca bënga jtsóyebuambnayama jtsobenama Bëngbe Bëtsá tojamëse, chca mochtsama ntsachetšá chábeñe bëngbe ošbuáchiyana yomncá. ⁷ Ošbuáchiyënga bëtscá jaserviama bënga chamotsobenama Bëngbe Bëtsá tojamëse, chca mochtsama. Tšabá jtsabuátambayama bënga chamotsobenama Bëngbe Bëtsá tojamëse, chca mochtsama.

⁸ Inÿenga jañëmuama bënga chamotsobenama Bëngbe Bëtsá tojamëse, chca šontsamna. Lempe ntšamo bënga tmobomncá inÿengbiámnaca chaotsemnana bënga jamama chamotsobenama Bëngbe Bëtsá tojamëse, nyets ainánaca chca šontsamna. Amëndayënga jtsemnana bënga chamotsobenama Bëngbe Bëtsá tojamëse, šontsamna bëtscá jamana tšabá jtsamëndayama. Inÿenga jálastemama bënga chamotsobenama Bëngbe Bëtsá tojamëse, šontsamna oyejuayënga chca jamana.

Ntšamo bënga Jesucristbeñe ošbuáchiyënga jtsamana šojtsamna

⁹ Inya chašmojtsebobonshana ora, nÿets ainánaca chca šmochtsama. Ndayá yomna ndoñe tšabe soye šmochtsaboté y chentšana šmochtsojuánañe; šmochtsentšena ntšamo tšabá yomncá jtsamama. ¹⁰ Cmontsamna nÿetscanga puerte jtsenbobonshánana, Jesucristbeyeca catšátanga quetsomñecá, chë ínÿenga bēngbiama más uámanēnga imomna ca jtsejuabnayēse.

¹¹ Ndoñe oyēnjayēnga šmattsemna, ndayá bētsá Bēngbe Utabnabiama šmochtsetrabájaye; ainaniñe corente añemo jtsebomnēse, Bēngbe Utabná sempre šmochtseservena.

¹² Tšēngaftanga Bēngbe Bētsábeñe jtsošbuáchiyēse, chábeñe šmobatmánayeca, puerte oyejuayēnga šmochtsemna; padecena soyēnguiñe chašmojtsachñējuana ora, puerte uantadēnga šmochtsemna, y sempre Bēngbe Bētsáftaca šmochtsencuéntaye.

¹³ Bēngbe Bētsabe entšanga opresido bomnēnga šmochjújabuache, y šmochtseprontana tšēngaftangbe yebnentše posada ínÿenga júyentšamiamama.

¹⁴ Bēngbe Bētsá šmochtseimpadana, chë tšēngaftanga chašmosufrima amēngbiama tšabe bendicionēnga cha chaotsamama; aíñe, cha šmochjaimpáda tšabe bendicionēnga chēngbiama chaotsamama, bacna soyēnga ndoñe.

¹⁵ Oyejuayēnga ínÿengaftaca šmochtsemna, chēnga oyejuayēnga chamojtsemna ora; ngménaca šmochtsemna, ínÿenga ngmēniñe chamojtsemna ora.

¹⁶ Šmochtsiyena nÿetscanga jtsenēyeunanēse. Nÿe cach tšēngaftanga uámanēnga ndoñe šmattsenobiamnaye, sinó chë nduámanēnga imomnēngaftaca tšabá mándbomnēnga šmochtsemna. Ndoñe šmattsejuabnaye yapa osertánēnga šmomna ca.

¹⁷ Inÿenga bacá chacmojtsaborlana ora, ndoñe šmattsatēchénanguaye; corente šmochtsentšena ntšamo nÿetsca entšangbiama tšabá yomncá jtsamama. ¹⁸ Ntsachetšá šmojobenacá, lempe šmochtsama natjēmbana nÿetsca entšāngaftaca jtšiyenama. ¹⁹ Atšbe bonshánēnga, ínÿenga bacá chacmojtsaborlana ora, ndoñe šmatjama chēnga chë causa chamotsesufrínama, ndayá Bēngbe Bētsá šmochjaleséncia chēnga cháucastigama; er Bēngbe Bētsabe uabemana palabrēnguiñe cha tojánayana: “Atše chanjama chēnga chamosufrima, ínÿenga chamosufrima tmojama causa; y chēnga chanjácastigaye, ínÿengbioye bacá tmojaborlá causa ca.” ²⁰ Chca játamamna, mēntšá šmochjama, ntšamo cachánaca tojanayancá:

Acbe uayayá tbojtseshēntsanēse, saná cochjacaredáda, y tbojtsajuendase, cochjuáfsiye.

Chca chacojamēse, cochanjama cha puerte chaotsēuatja ntšamo tcmojaborlama, y ainana corente chabotsetšena, mo chebana iñbēnga chabe bestšašiñe cuaftacjacá ca.

²¹ Ndoñe šmatjaleséncia, ntšamo ndoñe tšabá tontsemncá tšēngaftanga chacmayēnjanama. Chamna, ntšamo tšabá yomncá jtsamēse, chë ndoñe tšabe soye šmochjayēnjaná.

13

¹ Nÿetsca entšanga entsamna jtsamana ntšamo chë amēndayēnga tmojtsamēndacá, er ndocná obenana ntsebomnana, Bēngbe Bētsá ndoñe chca tbonjalesenciase, y nÿe Bēngbe Bētsá tojama amēndayēnga obenana chamotsebomnama. ² Chca, chë amēndayēngbe contra tmojtsemnēngna, ntšamo chaotsemnana Bēngbe Bētsá tojayancá contra chēnga jtsemnana; y chca contra tmojtsemnēngna, castigánēnga mochántsemna; ³ er ntšamo tšabá yomncá amēnga, ndoñe quenátamna ndayama chë amēndayēnga jatebēuatjana, nÿe chë bacna soye amēngna aíñe. Tšēngaftanga šmojtseboše jtšiyenama chë amēndayēngbioye ntjatebēuatjácá; chcasna, ntšamo tšabá yomncá šmochtsama, y chë amēndayēngna tšabe bomínÿeca mochantsonÿaye ntšamo chašmojtsamcá; ⁴ er chë amēndayēngna Bēngbe Bētsabe trabajo amēnga mondmēna, tšēngaftangbe tšabiamama. Pero bacna soyēnga

šmojtsamësna, cmontsamna jtsiyenana chë amëndayënga jtsebëuatjëse, er chënga jaccastígama obenana mondbomna, y chca mondbétsama. Chënga, Bëngbe Bëtsabe mándoca jayanana chë bacna soye amënga ndoñe tšabá tmonjama ca, y jamana chënga chamosufrima. ⁵ Chiyeca, jtseytana ntšamo chë amëndayënga tmojtsichamcá jtsamana, pero ndoñe nýe chë castigo ndoñe chašmondëtsebomnama, ndoñe chca šmontsama causa, sinó chë ainanentša tšabe juabnënga ntšamo tbojtsëtsëtsnacá joyeunayama yómnayeca. ⁶ Cachca soyëngama, amëndayëngbiama impuesto tšëngaftanga jtsatsquécjnayana; er chë amëndayënga Bëngbe Bëtsabe oservénënga mondmëna, ntšamo chiñe jtsamama tojtsamncá corente tmojtsentšëna ora.

⁷ Chcasna, tšëngaftanga šmochjáyentšbuachiye ntšamo chënga jtsebomnama tojtsamncá. Chë crocénana entšanga ayëngacayëngbiye, ndaye impuéstnaca šmochtëbuénaye; chëngna šmochtsarrespetana ntšamo yomncá, y chënga uámanënga chamotsemnama šmochtsejuabnaye.

⁸ Crocénana inýa jëtsëntsabuáchiyama chacmojtsamnëse, nýe ntoyiycá ndoñe šmatjoquéda, nýets tempo ndebénënga; nýe quem soye sempre šmochtsama: nýetscanga šmochtsenbobonshana; er nda ndëmua entšábioye tbojtsebobonshana, ya tojama ntšamo leyiñe yomandancá. ⁹ Quem mandënga, “acbe shema ínýaftaca ndoñe cattseíngñaye, inýa ndoñe catjóba, ndoñe catjatbëba, inýa tojtsebomna soye ndoñe nýe acbiama cattseboše”, y chë inýe mandënga leyiñe lempe quem mandiñe entsemna: “Ndëmua entšánaca cochtsebobonshana ntšamo cach aca cuenobobonshancá”. ¹⁰ Nda ndëmua entšábioye tbojtsebobonshana, chábioye ndoñe bacá ntjabórlana; chca, ndánaca jtsebobonshánëse, entšá jamana lempe ntšamo leyiñe yomandancá.

¹¹ Chë soyënga cmontsamna jtsamana, er bënga mondëtatšëmbo ya chë uámana tempiñe imojtsiyenama, chë mocna ora šojtsamna prontánënga jtsemnana, mo ocnayentšana cuafjofšenangcá, Jesucristo jaserviama jtsentšënése. Chca cmontsamna jamana, er chë Bëngbe Bëtsá bënga játsebacama te, mora ya más bécoñe entsemna, ntšamo chë Jesucristbeñe jtsošbuáchiyama tmonjanontšé ora enjamnama. ¹² Mora bënga mondoyena canýe luarentše bëtscá bacna soyëngaca y ngmenánaca, y chca jtsemnana mo bënga nýets tempo ibetiñe cuaftsajncá. Pero ya entsobeco chë Bëngbe Bëtsá bënga játsebacama te, mo chë ibetiñe ya jtsopochócama y binýniñe ya jontšamcá. Chiyeca mochtsajbaná bacna soyënga amana, y mochtsiyena tšabe soyënga jtsamëse, Satanás játsjama y jáyëñjanama bënga jtseprontánëse, mo canýe soldado jenëuyanama y inýa jayëñjanama ba soyënga tojenocjacá. ¹³ Ntšamo šojtsamncá mochtsiyena, ntšamo entšanga ndaye tšabe sóynaca jamama monduamancá, ínýengbiama lempe chaotsinýnëse. Chcasna, ndoñe quešnátamna yapa tmoyënga ntsemnana, ndoñe fiestënguenache ndoñe tšabe soyënga ntsamana, ndoñe bacna soye boyabása o shembásaftaca ntsamana y jenomándama ntsoyencá chca soyënga ndoñe ntsamana, nýetscanga ndoñe cachcá ntsejuabnayama ndoñe ntsamana y ndoñe ínýenga yapa ntsiyentšbuašana. ¹⁴ Chca játamamna, šmochtsiyena jtsamëse ntšamo Bëngbe Utabná Jesucristo endbetsamcá, y ndoñe nýe šmatjésejuabnaye jtsamana nýe cach tšëngaftanga tšabá jtsomñama juabnëngaca, ndayá tšëngaftanga chašmotsamama chë juabnënguiñe tojtsamncá.

14

Ndoñe šmattsóyebuabnaye inýe ošbuáchiyëngbe contra

¹ Chë Jesucristbeñe nýe batšatema ošbuáchiyënga tšabá šmochjúbuaja, y chëngaftaca ndoñe šmattsenatsëtsnaye ndayá aíñe o ndoñe jamana yontsamnama. ² Er básefta ošbuáchiyënga corente imotátšëmbo chënga nýe ndayánaca jasama imobenama, pero chë Jesucristbeñe nýe batšatema ošbuáchiyëngna, ndocna mëntšëna ntsesayana, er chënga jtsejuabnayana aíñe jasana canýe bacna soye nántsemna ca. ³ Chë nýetsca saná sayënga

ndoñe chamondětsejuabná chë inÿe soyënga ndoñe mondëtseyëngbiana, chë causa chënga más batšá uámanënga imomna ca; y chë ndaye soyënga ndoñe mondëtseyëngna, chë nÿetsca saná sayëngbe contra ndoñe chamondëtsoyebuambná, er Bëngbe Bëtsá chënga tojúbuaja mo chabe entšangcá. ⁴ Tšëngaftanga ndoñe quecmátamna chë ínÿabe oservená ndoñe tšabá tonjama ca jatichámuana. Cachabe nduiño jtsemnana nda yochjayana cha tšabá o ndoñe tšabá tonjamama. Y chë oservená jamana ntšamo tbojtsemncá, er Bëngbe Utabná obenana endbomna cha chca chaotsamama.

⁵ Báseftanga mondmëna, chënga jtsejuabnayana canÿe te inÿe tescama más uámana te yomna ca; pero ínÿengna jtsejuabnayana cada te cachcá iuámana ca. Y entsemna ndayá cada ona corente tšabá chaotsetátšëmbo, ntšamo yojuabnacá ndáyeca chca ca.

⁶ Nda tojtsejuabná canÿe te inÿe tescama más uámana te yomna ca, chca jamana Bëngbe Utabnábiama jtenójuaboyama. Y nda nÿetsca saná tojtsesá, chca jamana Bëngbe Utabnábiama jtenójuaboyama, er cha Bëngbe Bëtsábioye chë sanama jëtschuayana; y nda tojtsejuabná sananga yomna y ošbuáchiyënga chcana chamotsesama Bëngbe Bëtsá ndoñe yondboše ca, cha chë soyënga ndoñe ntjasana, Bëngbe Utabnabiama jtenójuaboyama, y chánaca Bëngbe Bëtsábioye chë sanama jëtschuayana.

⁷ Bënga ošbuáchiyënguentsana ndocná ainá ntsemnana nÿe cachabiama, ni jóbanana nÿe cachabiama. ⁸ Bënga tmojtsiyenëse, Bëngbe Utabnabiama jtsiyenana; y tmojóbanësna, Bëngbe Utabnabiama jóbanana. Chca, masque ainënga o obanënga, bënga Bëngbe Utabnábiama jtsemnana. ⁹ Chama Cristo tojanóbana y Bëngbe Bëtsá tojanma cha cháuatayenama, cha Bëngbe Utabná chaotsemnana, ainëngbeñe y chë ya tmojóbanëngbeñe chaotsemándama.

¹⁰ As, ¿ndáyeca tšëngaftanguentšë báseftanga, catšátangbe contra jtsóyebuambnayana, ndayá chënga tmojtsamama? ¿Y ndáyeca ínÿengna tšëngaftanguentšë jtsichámuana, catšátanga ndoñe uámanënga montsemna ca, ndayá chënga tmojtsamama? Er nÿetscanga šontsamna Bëngbe Bëtsabe delante jashjanguana, ntšamo cada ona tojëftsemcá tšabá o ndoñe tšabá bëtsemnana cha cháuyanama. ¹¹ Er Bëngbe Bëtsabe uabemana palabrenguiñe Bëngbe Utabná mëntšá tojánayana:

Ndegombre atše ainá sëndëtsomñe, y chíyeca atše šcojurá,
nÿetscanga atšbe delante mochanjoshëntsaméntša atše jadórana,
y nÿetscanga šmochanjauyana, “ndegombre aca Bëngbe Bëtsá condmëna ca”.

¹² Chcasna, cada ona bënga šontsamna Bëngbe Bëtsá jauyanana ntšamo tmojamama ndáyeca chca ca.

Ndoñe šmatjama inÿe ošbuáchiyënga bacna benachiñe chamótsatšama

¹³ Chíyeca, ya ndoñe quešnátamna ínÿengbe contra jtsóyebuambnayana. Chca játamamna, šmochtsejuabnaye y yejuana šmochtsantješna ndocna te tondaye ntjamana, ndayá chaoma Jesucristbeyeca acbe catšata, chaojuabó y bacna soyënga chaoma. ¹⁴ Atše sëndëtatšëmbo, mo canÿa Bëngbe Utabnáftaca cánÿiñe mo canÿacá quetsomñecá, ndocna soye yondmëna, nÿe cachabe ponto chaotsemna ndoñe tšabe soye. Pero canÿe entšá tojtsejuabná ndayánaca ndoñe tšabe soye yondmëna ca, ni jasama, ni jabojuama, chabiama cocayé chë soye nÿets tempo jëftsemnana ndoñe tšabe soye. ¹⁵ Tšëngaftanga inÿa becá šmojtsatsëtná, inÿe soyënga tšabá endmëna jasama ca, y cha tojtsejuabná, chca soyënga jasama ndoñe tšabá yondmëna ca, pero tšëngaftanga tša šmojtsatsá causa, cha chca soyënga tojase, y chentšana tbojtsebiona puerte bacna soye tojamama, chca, tšëngaftanga jtsinÿanÿnayana ndoñe šmondoyena jtsamëse chë ínÿengna jtsababuánÿeshanëse. Nÿe tšëngaftanga inÿe soyënga šmétsesayama ndoñe šmatjaleséncia chë soye chaoma inÿa, ndabiama Cristo tojanóbana, chë ndoñe ndegombre benachiñe chaoquedama. ¹⁶ Ndoñe šmatjaleséncia ndayá tšëngaftanga tšabá šmétsamama, ínÿengna ndoñe tšabá tšëngaftangbiana chamotsóyebuambnama. Chca šmochanjobenaye, ntšamo šmojtsamcá jtsajbanase, ínÿengna ndoñe tšabá tmontsoyebuambná ora. ¹⁷ Bëngbe Bëtsabe

amëndayana bēngbeñe ndoñe quenátsmēna inye soyēnga aíñe jasana o inye soyēnga ndoñe, canye soye aíñe jofsiyana o inye soye ndoñe. Pero chabe amëndayana bēngbeñe aíñe endmēna jtsamana soyēnga ndayama Bēngbe Bētsá tojayana aíñe tšabá jamama yomna ca, cháftaca tempcá tšabá jtsatsmēnana y ainaniñe oyejuayana jtsebomnana; y Uámana Espíritbeyeca bēnga jobenayana chca jamana. ¹⁸ Y nda Crístbioye chca tbojtseser-vena, jamana Bēngbe Bētsá cháftaca oyejuayá chaotsemnana, y entšangbe bominiñe tšabia jtsemnana.

¹⁹ Sempre šontsamna tšabe soyēnga jtsamana y chē soyēngaca chaopodé jamana nýetscanga natjēmbana chamotsiyenama, y ndaye sóynaca šmochtsama, ndayá inyēnga chaujabuache Jesucristbeñe corente jtsošbuáchiyama y ainaniñe bētsá añemo jtsebomnana. ²⁰ Tšēngaftanga ndaye sanánaca jasama šmobénayeca, ndoñe šmatjama chaot-sopochocama ndayá Bēngbe Bētsá ainaniñe tojamcá. Ndegombre, nýetsca sananga tšabá jasama endmēna; pero ndayá tšēngaftanga šmojasama, inya bacna benachiñe chaótsatšama šmojamēse, chē soye cocayé ndoñe tšabá ntsemnana. ²¹ Tšabá endmēna mēntsena ndoñe ntjasana, vínoye ndoñe ntjofsiyana o ndayánaca ndoñe ntjamana, pero chē soye aíñe tcojama ora, Jesucristbeyeca canye catšata chaojuaboma y bacna soye chaomama tojoservese.

²² Asna, ntšamo tšēngaftanga chē soyēngama ndegombre šmošbuachecá, nye Bēngbe Bētsá y tšēngaftangafaca chaotsemna. Canye entšá ndegombre oyejuayá jtsemnana, canye soye jamama tšabá yomna ca tojtsejuabnase, y chē soye tojamentšana, ndoñe tšabá chca yonjamna ca juabñēnga ainaniñe ndoñe tontsebomñese. ²³ Pero canye entšá ndayá tojamentšana tojayana, bacna soye tojama ca chē ndayá tojasama o tojamama, as Bēngbe Bētsánaca echanjayana cha ndoñe tšabá tonjama ca, er ntšamo tojamcá ndoñe tonjama chē soye aíñe tšabá yomnana jtsošbuáchiyēse; y ndayánaca chca ora tojtsamēse, chca jamana bacna soye jtsemnana.

15

Ntšamo inyēngbiana tšabá tojtsemncá mochtsama, ndoñe nye bēngbiana

¹ Bēnga, chē Jesucristbeñe corente ošbuáchiyēnga, šontsamna chē nye batšatema ošbuáchiyēnga jujabuáchana, chēnga bacna soyēnga tmojtsama ora, nye batšá ošbuáchiyana bomna causa; y ndoñe nye jatsēnguyana nye ndaye soyēngaca yopodena bēnga tšabá jtsemnana. ² Cada ona bēnga šontsamna jamana ntšamo cach bēngcá Jesucristbeñe ošbuachiyabiana tšabá tojtsemncá, y ndayá cha oyejuayá chaotsemnana tojama soye. Chca šontsamna, cha más bētsá Jesucristbeñe chaotsošbuáchema, y ainaniñe más añemo chaotsebomnana. ³ Er Cristo, ntšamo tojanmcá cach ndoñe tonjanma nye cha oyejuayá jtsemnana. Inyetsá, cháftaca tojanopasá ntšamo Bēngbe Bētsabe uabemana palabrēnguiñe endayancá, mo Cristo Bēngbe Bētsáftaca cuaftsoyebuambnacá: “Ntšamo entšanga montsichamcá aca joyenguanguama, atše šmontsatsētsná ca.” ⁴ Er lempe ntšamo tempo Bēngbe Bētsabe uabemana palabrēnguiñe tmojanabemcá, bēnga jabuátambama endmēna. Ndayá bēnga chiñe tmojuatsjínýama, bēnga jtsoobenana padecena soyēnguiñe tmojtsachñējuana ora uantadēnga jtsemnana, y ainaniñe más añemo jtsebomnana; y chíyeca bēnga montsobena, chábeñe jtsošbuáchiyēse, chábeñe jobátmana, ntšamo tojanayancá chaomama. ⁵ Atše, Bēngbe Bētsá sēntseimpadana, nda inétsama bēnga padecena soyēnguiñe uantadēnga chamotsemnana, y nda inétsama bēnga ainaniñe más añemo chamotsebomnana, cha chaoma nýetscanga canye juabna chašmotsebomnana, ntšamo Cristo Jesús yojanjuabnacá tšēngaftanga jtsejuabnayēse; ⁶ cha chca chaoma, nýetsca tšēngaftanga mo cánýiñe cuaftsemncá, y mo nýetscanga canye ora cuafjayancá, Bēngbe Bētsá, Bēngbe Utabná Jesucristbe Taitá, puerte bētsá y uamaná yomnana chašmuinýanýema.

Chë ndoñe judiëngbiámnaca chë tšabe noticiënga jtsemnana

⁷ Njyetscanga oyejuayënga šmochjenofja, ntšamo Crístnaca tšëngaftanga tcmojanëbuajcá, chca, entšanga chamuinýanýé Bëngbe Bëtsá puerte bëtsá y obená yomnama. ⁸ Atše sëntseboše ndayá jayanana, Cristo tojánabo judiënga jabáserviama ca, chca, jinýanýiyama Bëngbe Bëtsá sempre inétsamama ntšamo tojašebuachenacá; tojánabo ntšamo Bëngbe Bëtsá bëngbe tempsca uámana bëts taitanga tojanašebuachenacá chaocumplima; ⁹ y Bëngbe Bëtsá puerte bëtsá yomna ca chë ndoñe judiëngnaca chamuayanámnaca, cha chënga inétsalastemanama, ntšamo Bëngbe Bëtsabe uabemana palabrenguiñe endayancá, y chca tojanocumplí:

Chíyeca, atše chë ndoñe judiëngbeñe chaitsemna ora, aca chochantsatschuanaye, Bëngbe Bëtsá;

y jacántase chanjayana aca puerte bëtsá y uamaná comna ca.

¹⁰ Inýoca mëntšá endayana:

Puerte oyejuayënga chë ndoñe judiënga šmochtsemna, Bëngbe Bëtsabe bocacana entšángaftaca cánýiñe ca.

¹¹ Y ínýoca mëntšá endayana:

Bëngbe Utabná šmochtsatschuanaye tšëngaftanga ndoñe judiënga, y cha šmochtsatschuanaye njyetsca tšëngaftanga njyets luarënguenache entšanga ca.

¹² Y Isaíasnaca Bëngbe Bëtsabe uabemana palabrenguiñe mëntšá tojanábema:

Canýa Isaíbe entšanguentšana echanjabo,

y Bëngbe Bëtsá chábioye uamaná bochanjábema, njyets luarënguenache entšanga chaot-samëndama,

y chënga chábeñe jtšošbuáchiyëse, chábeñe mochantsobátmana tšabe soyënga chëngbiana chaotsamama ca.

¹³ Atše, Bëngbe Bëtsá sëntseimpadana, nda inétsama bënga chábeñe chamot-sobátmanama tšabe soyënga bëngbiana chaomama, cha chaoma tšëngaftanga ainaniñe puerte oyejuayënga chašmotsemnana y ainaniñe tšabe ebionana chašmotsebonnama, chábeñe jtšošbuáchiyëse; y Bëngbe Bëtsá chca tšëngaftangbiana chaoma, tšëngaftanga cada te más chábeñe chašmotsobátmanama, chë Uámana Espíritbe obenánaca.

¹⁴ Jesucristbeyeca atšbe catšátanga, atše corente sëndétatšëmbo tšëngaftanga puerte tšábenga šmomnama, ndayá cmamnana corente šmotatšëmbuama, y jtšenbuayiynayama šmobenámnaca. ¹⁵⁻¹⁶ Quem tsbuanáchañe básefta soyëngama sënjuábema, ntšamo šmatjátsjuabnayama atše ntjatauatjca; chca sënjama, básefta soyëngama chašmuatenójuaboma; y chca sëntsobena juabemana, er Bëngbe Bëtsá tojama atše chaitsebonna chë uámana trabajo, Cristo jtšeservénana, chë ndoñe judiënga jtšëjabuáchanëse. Atše bachnëcá sëntsoservena, Cristo stseservena ora, entšanga tšabe noticiëngama jtšabuayiynayëse; atše chca sëndama chë ndoñe judiënga Jesucristbeñe chamotsošbuáchema, y ndayánaca chamotsamama Bëngbe Bëtsá oyejuayá chëngaftaca chaotsemnana, mo chabiana canýe uatšëmbonancá. Chcánaca atše sëndama, ndoñe judiënga ndegombre Bëngbe Bëtsábenga chamotsemnana, chë Uámana Espíritbeyeca.

¹⁷ Chca, atše Cristo Jesúséftaca cánýiñe mo canýacá quetsomñecá, ndegombre sëntsobena jtsejuabnayana ntšamo Cristo jaserviama atše sëndamcá, puerte uámana soye yomnama. ¹⁸ Atše añemo sëntsebonna nýe chë ndayá Cristo átseftaca tojamama jóyebuambayama, ndoñe judiënga Bëngbe Bëtsá chamóyeunama. Chca tonjopasá, ndayá tijayanama y tijamama, ¹⁹ chë Bëngbe Bëtsabe obenana jinýanýiyama bëts soyëngama, chë chabe obenánaca tojopasá tšabe soyëngama, y chë Uámana Espiritu bëts obenánaca tojama soyëngama. Y chca, Jerusalenocana jabojátšase, njyetsca luarënguëjana Iliria luaróntsoñe, Cristbe tšabe noticiëngama njyets luarënguenache entšanga tijabuayená. ²⁰ Atše sempre canýe soye inýe soyëngama más sënjánboše, y enjamna chë tšabe noticiëngama jábuayenana, entšanga ndocna te Cristbiana oyebuambnayana tmonjanuena

luarënguenache; y chca sënjanma, atše ndoñe játamama inya tojanbojatsé trabajo, mo inyabe bojatsena yebnentše jajebuama cuafjatontsecá. ²¹ Ntšamo Bëngbe Bëtsabe uabemana palabrënguifne endayancá, chë tempo Cristbiamana ndoñe tmonjanuenëngbiamana: Chë ndëmuanyënga tempo ndocná chabiamana tonjanabuayená, chënga tšabá mochanjinye ntšamo cha yomnana; y chë ndocna te chabiamana tmonjouenënga, chabe soyëngama echanjósertaye ca.

Pablo yojanjuabná Roma bëts puebloje jama

²² Y nya chë causa, atše ndoñe chiyjobená tšëngaftangbioye jana tšëngaftanga jányama, masque ba soye tsjenojuabná choye jama. ²³ Pero mora atšbe trabajo quem luarënguifne sënjapochocá y tempscana tšëngaftanga jányama tša sëndánbošeyeca, ²⁴ sëntsejuabná mora aifne chjobenaye choye jama, tšëngaftanga jautsëtsayama, chëjana chajachnëngo ora, España luaroye chaitsá ora. Y baseftayté tšëngaftangftaca chjëftsemna, cbochjányama tšëngaftangftaca oyejuayá; chentšana Diosmanda šmochjuájabuache, y lempe ntšamo chašojtsajabotcá šmochjátsetaye jobenayama Españoloye ayana jtëtóntsama. ²⁵ Morna Jerusalenoye chanjá, choca entšanga Bëngbe Bëtsábenga imomnënga jaujabuáchama; ²⁶ er Jesucristbeñe ošbuáchiyënga Macedonia y Acaya luarentšënga, tmonjajuabó tšabá yojtsemna crocénana jájuabana chë Jerusalenoca entšanga, Bëngbe Bëtsábenga imomnënga y ndbomnëjmënga imomnënga jujabuáchama; y oyejuayënga chca tmonjama. ²⁷ Cachënga chca tmonjajuabó, y chca jamana tšabá endmëna, er judiënga tmonjanma, chë Bëngbe Bëtsábocana tmojanóyëngacñe soyënga ndoñe judiëngnaca chamotsebomnama; chíyeca ndoñe judiënga entsamna chë Jerusalenoca judiënga ošbuáchiyënga jujabuáchana, ndaye soyënga jatsatayëse, chënga vida jtsebomnama chamotsobenama. ²⁸ Y chca, quem trabajo chajapochocá ora, y chë ndoñe judiënga ošbuáchiyënga lempe tmojátbanana chajjáftsayentšbuachiye ora, chanjontsé Españoloye jama, y tšëngaftangbiajana chanjachnëngo tšëngaftanga jáftsanýama, tšëngaftangftaca baseftayté jëftsemnama. ²⁹ Atše corente sëntsetatšëmbo tšëngaftangbioye chajjá ora, chjášhango y chjama tšëngaftanga bëtscá tšabe bendicionënga Crístbentšana chašmotsebomnama, tondaye chacmondëtsabuáshebenëntscuana.

³⁰ Jesucristbeyeca catsátanga, Bëngbe Uabná Jesucristbeñe ošbuáchiyënga quetsomñecá, y bënga bonshánana chamotsebomnama chë Uámana Espiritu inétsamayeca, tšëngaftanga cbontsaïmpadana, bëtscá chašmotsentšena Bëngbe Bëtsá nyets ainánaca jtseïmpadánama, ntšamo atše sëndbetseïmpadancá, cha atše chašotsinýenama. ³¹ Cha šmochtseïmpadana chë Judea luaroca ndošbuáchiyënga ndocá chašmondëborlama, y chë Jerusalemocquënga Bëngbe Bëtsábenga, tšabá chamóyëngacñama ndayá chënga jujabuáchama chajjáftsayentšbuachiye ora. ³² Y chentšana, y Bëngbe Bëtsá chca chaojábošenëse, atše chayobená bëtscá oyejuayá tšëngaftangbioca jashjanguana tšëngaftanga jányama, y tšëngaftangftaca chaitsemna ora, batsá jóchnama chayobená. ³³ Atše, Bëngbe Bëtsá sëntseïmpadana, nda inétsama bënga ainaniñe tšabe ebionana chamotsebomnama, nyetsca tšëngaftangftaca chaotsemnama. Chca chaotsemna.

16

Ubuátmënga jacheuayama

¹ Atše sëntseboše tšëngaftanga jáuyanana Febe, Jesucristbeyeca bëngbe uabena, canye tšabe entšá endmënama; cha chë Cencrea puebloca enefjuana ošbuáchiyënga endújabuachana. ² Tšabá cha šmochjofja, mo canya Bëngbe Uabnábia quetsomñecá, ntšamo Bëngbe Bëtsabe entšanga entsamncá inyëngaftaca jenofjana. Smochjuájabuache ntšamo tbojtsajabotcá, er cha banga tonjújabuache; átšbioynaca.

³ Atšbe cuenta Prisca y Aquila šmochjacheuaye, chë átšeftaca tbonjatrabajata, Cristo Jesusbiamana oservëniñe. ⁴ Jobanámna bonjanprontana, atše jatsbocama,

ndoñe chašmondóbama. Atše chama chata sentsatacheuaná; y ndoñe nýe atše, sinó nýets luarenache enefjuana ndoñe judienga ošbuachiyéngnaca chca. ⁵ Chë ošbuachiyënga, chë Bëngbe Bëtsá jëtschuayama chatbe yebnentše jénefnama imua-manéngnaca, šmochjácheuaye. Atšbe bonshana Epeneto šmochjachuaye; cha endmëna chë natsaná Asia luaroca Jesucristbeñe jtsošbuachiyama. ⁶ María šmochjachuaye; cha tšëngaftangbeñe bëtsá tojatrabajá. ⁷ Chë cach atšcá judeocata Andrónico y Junias šmochjácheuaye. Chata canýe ora átšeftaca cárceloye bonjanëtámëna, y Jesucristbe ichmónëngbiana chata puerte uámanata bonjamna, y atšbiana más natsana tbojanontšë Jesucristbeñe jtsošbuachiyama.

⁸ Ampliato šmochjachuaye, atšbe bonshaná, er atšcá cha Bëngbe Utabnáftaca cánýiñe mo canýacá bondmëna. ⁹ Urbano šmochjachuaye, chë bëngaftaca Cristbiana oservéniñe trabajayá; y atšbe bonshana Estáquisnaca šmochjachuaye. ¹⁰ Apeles šmochjachuaye; cha ba soye tonjinýanjé Jesucristbeñe puerte yošbuáchema; y Aristóbulbe yebnentšëngnaca šmochjácheuaye. ¹¹ Chë cach atšcá judeocá Herodión šmochjachuaye, y chë Narcisbe pamillentšana Bëngbe Utabnábeñe ošbuachiyéngnaca. ¹² Trifena y Trifosa šmochjácheuaye; chata Bëngbe Utabnabiana puerte bondëtrabajá; y bëngbe bonshaná Pérsidnaca šmochjachuaye; cha bëtsá endëtrabajá, Bëngbe Utabnabiana oservéniñe. ¹³ Rufo, chë Bëngbe Utabnabiana uámana trabajayá, šmochjachuaye, y chabe mamánaca; cha mo atšbe mamacá endmëna. ¹⁴ Asíncrito, Flegonte, Hermes, Patrobas y Hermas šmochjácheuaye, y chë ínýenga Jesucristbeñe ošbuachiyënga chëngaftaca innénutanangnaca. ¹⁵ Filólogo y Julia, Nereo y chabe uabena, Olimpas y nýetsca Bëngbe Bëtsabe entšanga chëngaftaca innénutanangnaca šmochjácheuaye.

¹⁶ Nýetscanga mo Jesucristbeyeca catšatangcá šmochjenchuaye, jtenámochëse, ntšamo cach tšëngaftangbe pamíllanga puerte bonshanánaca šmondetsacheuanaycá. Nýets luarenache enefjuana Cristbeñe ošbuachiyënga cmontsacheuaná.

¹⁷ Jesucristbeyeca catšátanga, atše cbontsaïmpadana tšabá šmochjuáfšna y cuedado šmochtsebomna chë cánýenga ínýengaftaca contra chamotsemnama y ínýenga Jesucristbeñe ošbuachiyana chamotsajbanama innétsamëngbiana; chëngna, chë tšëngaftanga ndaye šmojóyëngañe buatëmbana soyëngama contra jtsoýebuambnayana. ¹⁸ Er chca amënga, ndoñe ntsentšënana Cristo Bëngbe Utabná jtserervénana, sinó jtsamana ndayá cachënga tmojtsebošcá, nýe cachëngbe cuerpama tšabá tojtsemncá; y tšabe y botamana palabréngaca chë paselo jáingñama yomna entšanga jáingñana, chëngbe ainaniñe chëngcá chamotsejuabnama. ¹⁹ Nýetsca entšanga tmojouena, chë Bëngbe Bëtsabe soyëngama ntšamo ínýenga tcmojabuatambacá, tšëngaftanga corente šmnétsayaunanama, y chíyeca atše puerte oyejuayá tšëngaftangaftaca sëntsemna. Atše sëntseboše, tšëngaftanga tšabá chašmotsetátšëmbo jtsamana ntšamo tšabá yomncá, y ntšamo bacna soyënga jamamna chašmotsemna mo ndoñe cuaftsetatšëmbcá. ²⁰ Y Bëngbe Bëtsá, nda inétsama bënga ainaniñe tšabe ebionana chamotsebomnama, ndoñe bën y echanjama tšëngaftanga Satanás chašmoyëñjanama, mo cha tšëngaftangbe cucuatšinë cuafjaboshjoncá. Atše sëntseïmpadana Bëngbe Utabná Jesús, chaoma tšabe bendicionënga tšëngaftangbeñe chaotsemnama.

²¹ Timoteo, chë átšeftaca trabajayá, tšëngaftanga cmontsacheuaná; y Lucio, Jasón y Sosípater, cach atšcá Judeoquënga, chëngnaca tšëngaftanga cmontsacheuaná.

²² Atšnaca Tercio, chë Páblëbe cuenta quem tsbuanácha uabiamnayá, tšëngaftanga cbontsacheuaná, tšëngaftanga y átšnaca Bëngbe Utabnáftaca cánýiñe mo canýacá quetsomñecá.

²³ Gayo cmontsacheuaná; atše Pablo chabe yebnentše posada sëntsebomna, y cha enduamana nýetsca chë muentša ošbuachiyënga tšabá júbuajana. Erasto, chë quem pueblentša crocénana bojanýá, tšëngaftanga cmontsacheuaná, y Jesucristbeyeca bëngbe catšata Cuártënaca.

²⁴ Atše, Běngbe Utabná Jesucristo sěntseimpadana, cha chaoma tšěngaftangbeñe tšabe bendicioněnga chaotsemnama. Chca chaotsemna.

Quem tsbuanácha juapochócoma, Pablo Běngbe Bětsábioye tbojtanchuá

²⁵ Běnga sempre mochtsinýanýnaye Běngbe Bětsá puerte uamaná yomnama. Cha endobena jamama tšěngaftanga puerte chašmotsošbuáchema; y chca, cha echanjama ntšamo chě běnga fsěndabuayiná tšabe noticiěnguiñe yomncá, ntšamo chě Jesucristbe buayenana soyěnga yomncá, y ntšamo chě Běngbe Bětsá šojinýanýé ndegombre soyěnga yomncá. Nýets tempo měntscoñama, Běngbe Bětsá chě soyěnga entsanga ndoñe tonjinýanýé, y chě causa chěnga chě soye ndoñe ntsetatsěmbuana. ²⁶ Pero morna, ntšamo Běngbe Bětsabe juabna oyebuambnayěnga tmojanabemcá, tojama bětscá entsanga chě ndegombre soyěngama chamotsetatsěmbuama; Běngbe Bětsá, chě nýets tempo vida bomná, tojanmandá entsanga nýets luarěnguenache chě ndegombre soyěngama chamotsetatsěmbuama, chěnga chábeñe chamotsošbuáchema y ntšamo cha yobošcá chamot-samama.

²⁷ Nýe canýe Běngbe Bětsá endmēna, y cha nýets osertánana endbomna. ¡Nýetscanga chamotsinýanýná cha puerte bětsá y uamaná yomnama, ndayá Jesucristo tojanmama! Chca chaotsemna.

1 Corintios

Pablo chënga jacheuayama

¹ Atše Pablo, ndábioye Bëngbe Bëtsá tbojanchembo Jesucristbe ichmoná jtsemnama, Bëngbe Bëtsá chca yojánbošeyeca, cányiñe chë Jesucristbeyeca catšata Sósteneseftaca, ² quem tsbuanácha sentsabianná tšëngaftanga chë Corinto bëts puebloca Jesucristbeñe ošbuáchiyëngbiana; ndëmuanyënga Cristo Jesúseftaca Bëngbe Bëtsá tojábiana chabe entšanga nye chábioye oservénënga, ndëmuanyënga Bëngbe Bëtsá tojáchembo chabe entšanga chašmotsemnama, chë nye quem luarama enójuabnaye entšanguentsana luarénënga, Bëngbe Utabná Jesucristbioye tmojotšëmbonëngaftaca, Jesucristo nda yomna Bëngbe Utabná y chëngbe Utabná. ³ Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y tšëngaftangbe ainaniñe tšabe ebionana chašmotsebonnama.

Bëngbe Bëtsá Jesucristbeyeca tojama tšëngaftanga ba tšabe bendicionënga chašmotsebonnama

⁴ Bëngbe Bëtsá tšëngaftangbiana sempre sëndbétsatschuanaye, er tšëngaftanga cányiñe mo canyáca Cristo Jesúseftaca šmómnyayeca, Bëngbe Bëtsá tšëngaftangbeñe tojajuabó, tšëngaftangbe tšabiana. ⁵ Chca Crístoftaca šmómnyayeca, Bëngbe Bëtsá tojama tšëngaftanga chašmotsebonnama chábentsana nyetsca tšabe soyënga, tšëngaftanga obenana chašmotsebonnama cha jamëse, Bëngbe Bëtsabe soyëngama jóyebuambayama y chë soyëngama chacmësertama. ⁶ Chca, ntšamo chonjanabuayiynacá mo Jesucristbe ndegombre soyëngcá, tšëngaftangnaca ín'yëngbioye tšabá šmojinyanjé ndegombre soyënga bétsemnama, chë ntšamo jtsiyenama. ⁷ Y chca, Bëngbe Bëtsá chabe entšanga inétsatšatnaye tšabe soyënguentsana tondaye quecmochatabuáshebena, Bëngbe Utabná Jesucristo quem luarentše yochtónyna tescama Bëngbe Bëtsábeñe jtšošbuáchiyëse chašmojtšobátmanëntscuana. ⁸ Cha echanjama tšëngaftanga chábeñe corente chašmotsošbuáchema y ainaniñe bëts añemo chašmotsebonnama, ndayá tšëngaftangaftaca jamama cha yojuabnacá chaojapochocantscuana; chca, chë Bëngbe Utabná Jesucristo nyetsca entšangbiana tšabá o ndoñe tšabá tmonjamama yochjayana te, ndocná chaondobená jayanana tšëngaftanga ndoñe tšabá šmonjama ca. ⁹ Bëngbe Bëtsá nyets tempo jtsamana ntšamo tojašebuachenacá, y cha endmëna nda tcmojánachembo cányiñe mo canyáca chašmotsemnama chabe Uaquiñá Jesucristoftaca, Bëngbe Utabná.

Choca ošbuachiyëngbeñe nyetscanga ndoñe cachcá montsanjuabná

¹⁰ Jesucristbeyeca atšbe catšátanga, tša cbontsaimpadana, chë ndayá Bëngbe Utabná Jesucristo nyetsca bëngbiana yomnama, tšëngaftanga nyetscanga cachcá chašmotsejuabnama, y tšëngaftangbeñe ndoñe más báseftanga canye soye y ín'yënga inye soye chamuatsjuabná. Y aiñe šmochtsiyena mo canyáca, nyetscanga cachcá jtsejuabnayëse y cachcá jamama jtsebošëse. ¹¹ Jesucristbeyeca atšbe catšátanga, atše chca sënjayana, er Cloebe yebnentšënga šmonjabëuenaye, tšëngaftangbeñe šmojtšenpenzentserama. ¹² Ntšamo sentsichamcá entsemna ndayá tšëngaftangbentšë báseftanga šmojtšichamo: “Atše Páblëbe ustoná sëndmëna ca”; ín'yëngna imojtsichamo: “Atšna Apólosbe ustoná sëndmëna ca”; ín'yënga: “Atšna Pédrëbe ustoná sëndmëna ca”, y ín'yëngna: “Atšna Cristbe ustoná sëndmëna ca” imojtsichamo. ¹³ Chca šmojtšamama, jtšóbocanana mo cada básefta ošbuáchiyënga canye Cristo tmojtsebonncá. ¿Pablo yojamna nda tmojancrucificá tšëngaftangbe tšabiana? ¿O tšëngaftanga uabáinënga šmomna, atše jótšëmbonëse, tšëngaftanga atšbe ústonënga bétsemnama? ¹⁴ ¡Bëngbe Bëtsá sëndbétsatschuanaye atše ndocná tšëngaftanguentsá tijanabayama; nye Crispo y Gáybioye

aíne! ¹⁵ Chca, ndocná quenátobena jayanana, atše jótšëmbonëse uabainá cha tojanoquedá ca, mo átšbeñe ošbuáchiyënga cuaftsemncá. ¹⁶ Estéfanasbe pamillentšëngnaca sënjanëbaye, pero ndoñe quetsatabouínÿna inÿa tijanabayama. ¹⁷ Er Cristo ndoñe chešnatanichmó ínÿenga jubáyama, ndayá chë chabe tšabe noticiëngama entšanga jábuayenama. Ndoñe chešnatanichmó chë soyënga jayanama, corente osertana entšangbe soyënga jtsichámëse; chca, entšanga Crístbeñe chamotsošbuáchema, ndoñe chë atšbe osertánanentšana palabréngama, sinó nÿe chë buayenánama, Cristo cruzoca bëngbiamana tojanóbanama.

Crístbeñe yomna Bëngbe Bëtsabe obenana y osertánana

¹⁸ Quem buayenánana, Cristo entšangbiamana cruzoca tojanóbanama, chë pochocánënga jtsemnana tmojtsajnëngbioye jtsinÿanana mo ndoñe corente juabna bomnëngbe soycá; pero bëngbiamana, chë Bëngbe Bëtsá nÿetsca tescama šochjátsebacangbiamna, quem buayenánana jtsinÿanÿayana Bëngbe Bëtsabe obenana. ¹⁹ Ntšamo Bëngbe Bëtsá chabe uabemana palabrénguiñe tojanayancá:

Atše chanjama chë tša osertánëngbe osertánana tondayama chaondëtsooservénama; y chanjama chë ba soyëngama osertánëngbe osertánana tondayama chaondëtšámanama.

²⁰ ¿Ntsachetšá yojtsámama chë tša osertaná y chë puerte uatsjinÿená tbojayana soyënga? ¿Ntsachetšá yojtsámama chë tša tšabá chë soyëngama juabnayá, morscá, y ínÿengaftaca enatsëtsnaye ora chëngbe ayënjanayá tojayana soyënga? Ndegombre Bëngbe Bëtsá tojinÿanÿé, chë quem luarentša bëts osertánanaca tmojayana soyënga tondaye yonduámanama. ²¹ Bëngbe Bëtsá, nÿets osertánana bomná quetsomñecá y puerte tšabá jtsejuabnayëse, ndoñe tonjanalesenciá quem luarentša entšanga cha chamotsábuatmama, chë quem luarentšënga tša osertánënga tmojánayana soyëngama. Chamna, cha tšabá tbojanínÿnana chábeñe ošbuáchiyënga játsebacana chë bënga fsëndabuayiyná soyëngama, masque ínÿengbioyona mo ndoñe corente juabna bomnabe soycá jtsinÿanana.

²² Judiënga tša jtsebošana y Bëngbe Bëtsábioye jtsotjanañana bëts soyënga chaomama, chabe obenana jinÿanÿiyama; y ndoñe judiëngna tša jtsenguayana chë puerte osertánëngbe soyënga jtsetatšëmbuama. ²³ Pero bëngna Crístbiamana entšanga fsëndabuayiyná, chë ínÿenga tmojancrucificabiamana. Quem buayenánana chë judiënga ndoñe tšabá ntjëuénanana. Y ndoñe judiënga mondbétsejuabnaye chca yomna mo canÿe ndoñe corente juabna bomnabe soycá ca; ²⁴ pero bëngbiamana, nÿetscanga Bëngbe Bëtsá chabe entšanga chamotsemnana šojáchembëngbiamna, masque judiënga o ndoñe judiënga, Crístbeñe endmëna nÿets Bëngbe Bëtsabe obenana y osertánana; ²⁵ er ndayá Bëngbe Bëtsá tojanmcá, Cristo cruzoca chaóbanama jalesénciase, banga jtsinÿanana mo canÿe ndoñe corente juabna bomnabe soycá, pero ndegombre endmëna canÿe puerte más osertaná tojama soye, lempe ntšamo entšanga imotatsëmbuama. Y ndayá cha tojamcá masque bángbioye jtsinÿanana mo canÿe tondaye obenabe soycá, ndegombre chë soye jtsinÿanÿayana Bëngbe Bëtsá puerte más obenana yobomnana, nÿets obenana ntšamo entšanga imobomnana. ²⁶ Jesucrístbeyeca atšbe catsátanga, šmochtsejuabnaye ntšamo yojamnama, Bëngbe Bëtsá chabe entšanga chašmotsemnana tmojánachembo ora. Tšëngaftangbentše nÿe báseftanga tša osertánënga šmojamna, ntšamo chë osertánana bomnënga imomnana entšanga mondbetsejuabnaycá; y báseftanga šmojamna becá mando atšetanënga o uámama pamillentšënga. ²⁷ Pero Bëngbe Bëtsá, quem luarentše ndoñe tša osertánënga tojanabacacá, chca, cha jamama chë quem luarentša soyëngama tša osertánënga chamotsëuatjama; y cha, quem luarentše ndobenënga tojanabacacá, chca, chë obenana bomnënga chamotsëuatjama. ²⁸ Bëngbe Bëtsá quem luarentšana tojanbocacá ndayá tondaye yonduamancá y ndayá ínÿenga imuabotencá; tojanbocacá ndayá tondaye yonduamancá, chca, ndayá quem luarentše tša iuamancá tondaye chaondëtšámanama. ²⁹ Y chca, Bëngbe Bëtsabe delante ndocná quenátobena jayanana

tša bëtsá cha yomna ca. ³⁰ Bëngbe Bëtsá tojama bënga Crísoftaca cánýiñe mo canýacá jtsemnëse chamotsiyenama, y chábeyeca tojama bënga chamóyëngacñama chabe osertánana bomna soyënga; chábeyeca tojama bënga tsábënga chabe bominyiñe chamotsemnama, chabe entsanga jtsemnama chamobenama, puerte tsábënga cach Bëngbe Bëtsacá, y atsebácanënga chamotsemnama. ³¹ Y chca, ntšamo Bëngbe Bëtsabe uabemana palabrënguiñe endayancá: “Nda tojtseboše jayanama cha canýe uamaná yomna ca, chamna más tsabá cha bontsemna jayanama Bëngbe Utabná puerte uamaná yomna ca.”

2

Ntšamo Pablo Cristo crucificanábiamá chënga tojanabuayená

¹ Pero, Jesucristbeyeca atšbe catšátanga, Bëngbe Bëtsabe ndegombre soyëngama tsëngaftanga jábuayenama sënjána ora, chca sënjanma ndoñe chë uámanëngbe palabrëngaca, ni chë tša osertánëngbe palabrëngaca. ² Y tsëngaftangataca sënjamna ora, ndoñe quetstëtseboše nýe ndayíñnaca jatsjuabnayana, ndayá nýe Jesucristbeñe, nda bëngbe tsábiamá tmojancrucificá. ³ Atše tsëngaftangbeñe sënjamna, mo canýa ba soyënga jamama ndobenacá, y mo canýa puerte auatjacá y tbojtsengmëmñacá, chabe trabajo jamama ndoñe jobenayama juabnaye causa. ⁴ Ntšamo cbonjanëtsëtsná y cbonjanabuayiynacá atše sënjanoyebuambá ndoñe chë tša osertánëngbe palabrëngaca, tsëngaftanga jáyënjanama chiñe chašmotsošbuáchema; pero aiñe tcbonjanayënjaná, Bëngbe Bëtsabe Espíritu y chabe obenana tsëngaftanga jinýanýiyëse, ⁵ chca, tsëngaftanga Bëngbe Bëtsabeñe chašmotsošbuáchema, ndoñe nýe entsangbe osertánanaca, sinó Bëngbe Bëtsabe obenanama.

Uámana Espíritbeyeca, Bëngbe Bëtsá jamana entsanga cha chamotsábuatmama

⁶ Pero, chë ya tmojashjáchënga Bëngbe Bëtsabeñe puerte jtsošbuáchiyama y chabe soyëngama corente jtsoertánama, chëngbeñe bënga fchandóyebuambaye becá osertánana bomna soyënga. Pero ndoñe quenátsmëna quem luarentša entsanga quem tempo mondbétsichamo soyënga, ni mora quem luarentse amëndayëngbe soyënga, ndëmuanýënga ndoñe bën y ndocna obenana bomnënga mochanjëftsoquéda. ⁷ Y aiñe, chë bënga fsëndoyebuambná osertánana bomna soyënga endmëna chë Bëngbe Bëtsá quem luarentša entsángbioye baytentscuana ndoñe tonjaninýanýé soyënga, y chca, entsanga baytentscuana chë soyënga ndoñe tmonjanábuatmana. Cha yojanjuabná chë soyënga chca yochtsanmënama, quem luare cabá cha ndëma ora, y yojanjuabná, chë soyëngaca bënga mochtsanobena puerte bëtsëtsanga y uámanënga jtsemnana, cháftaca chë nýetsca tescama yomna tsabe vida jtsebomnama. ⁸ Quem Bëngbe Bëtsabe puerte osertánana bomna soyënga endmëna canýe soye ndayá quem luarentša amëndayënga ndoñe ntsësertánana, er chënga aiñe matënjanësértase, Bëngbe Utabnábioye chënga ndoñe matmënjancrucificá, Bëngbe Utabná nda puerte bëtsá y uamaná yomna. ⁹ Bëngbe Bëtsabe uabemana palabrënguiñe quem Bëngbe Bëtsabe puerte osertánana bomna soyëngama mëntsá endayana:

Cha imobobonshánëngbiamá Bëngbe Bëtsá tojaprontá soyënga, ndocná tonjinýe, ni tonjouena y ni mo tonjajuabó ca.

¹⁰ Pero Bëngbe Bëtsá quem soyënga chabe Espíritoftaca bënga šojanýanýé, er chë Espíritu lempe jtsetatšëmbuana, chë Bëngbe Bëtsabe soyëngama puerte totcá josértama yomna soyëngámñaca.

¹¹ Entsángbeñe ndocná quenátobena jtsetatšëmbuana ndayá entsabe ainaniñe tomnama, sinó nýe chë entsabe espíritu, chë chábeñe yomná. Cachcá, nýe Bëngbe Bëtsabe Espíritu jtsetatšëmbuana ndayá Bëngbe Bëtsá tojuabnacá. ¹² Y bëngna, Bëngbe Bëtsábíocana Espíritu tmojóyëngacñe, ndoñe canýe quem luarentša espíritu, chca, bënga chašósertama

chë Bëngbe Bëtsá tojama bënga chamotsebomna soyëngama, bëngbe tšabiamana cha jtsejuabnayëse. ¹³ Bënga chë soyëngama fsëndoyebuambná, ndoñe chë quem luarentša entsángbentsana tifjuatsjinýe osertánana bomna palabrëngaca, sinó chë Bëngbe Bëtsabe Espíritu šojabuatambá palabrëngaca. Chca, Bëngbe Bëtsábiocana soyëngama bënga fsëndabuayiná, Bëngbe Bëtsabe Espíritbentsana yóbocana palabrëngaca, chë Uámana Espíritu ainaniñe imobomnéngbioye.

¹⁴ Bëngbe Bëtsabe Espíritu ndoñe tondbomná, chabe ainaniñe ndoñe ntjójyëngacñana chë Bëngbe Bëtsabe Espíritbiocana yóbocana soyënga, er chë entsabiamana chë soyënga jtsemnana mo canýe ndoñe corente juabna bomnabe soyëngcá, y chabosertama cach ndoñe ntsobenana. Chca endmëna, er entsá jobenayana quem soyëngama jtsetatšëmbuama y josértama, nýe chabe ainaniñe chë Uámana Espíritu tbojtsájabuachañe. ¹⁵ Pero nda aíñe chë Espíritu tbojtsebomna jtsobenana nýetsca soyënga tšabá jinýama chabosertama, y ndocná chë Espíritu ndoñe tbondbomná ntsobenana josértana ntšamo chë Espíritu bomná yomnama. ¹⁶ Er Bëngbe Bëtsabe uabemana palabrënguiñe mëntšá endayana: “Ndocná quenátabuata Bëngbe Utabnabe juabna, chábioye jabuátëmbama chaotsobename ca.” Pero bënga, chë ošbuáchiyënga, mondobena jajuaboyana ntšamo Cristo jojuabnacá.

3

Jatrabájama enutanánënga Bëngbe Bëtsá jasérviamana

¹ Pero, Jesucristbeyeca atšbe catsátanga, atše ndoñe chiyatanobená jóyebuambayama, mo tšëngaftanga chë Uámana Espíritoftaca mandánënga šmojatsmëncá, sinó nýe cachënga tšabá jtsomñama juabnënga bomna entsángbioycá, mo basetemëngbioycá, Cristbe soyëngama josértama ndobenënga. ² Mo canýe bebmácá, chabe basetémbioye nýe létsiye jafšiyana y paselo jabmuánama sananga, chë básetema chcana jasama cabá ndoñe ntsobenana causa, cachcá, atše cbonjanabuatambá Bëngbe Bëtsabiamana nýe chë más paselo josértama soyëngama, y ndoñe inýe soyënga más totcá josértama soyënga, er tšëngaftanga ndoñe quešmënjatobena chca soyëngama josértana. Y ni mora, tšëngaftanga quešmátobena Bëngbe Bëtsabe soyëngama josértana, chë josértama más totcá yomna soyëngama; ³ er tšëngaftanga cabá šmojtsama, nýe ntšamo cach tšëngaftanga tšabá jtsomñama tšëngaftangbe juabnënga yomncá. Y tšëngaftanga ínýengaftaca cabá yapa šmojtsenántšaboše y nýe ínýëngbioye jayëñjanama soyënga šmojtsamëntscuana, tšëngaftanga šmojtsama nýe ntšamo cach tšëngaftanga tšabá jtsomñama tšëngaftangbe juabnënga yomncá, y chca, tšëngaftanga šmojtsiyena mo chë nýe quem luarama enójuabnaye entsángcá. ⁴ Er canýa: “Atše Páblëbe ustoná sëndmëna ca”, y ínýana: “Atše Apólosbe ustoná sëndmëna ca” tojayana ora, chca jtsamana mo chë nýe quem luarama enójuabnaye entsángcá.

⁵ Tšëngaftanga chca šmojamama, atše šontsemna tšëngaftanga játjayana: ¿Ndayá Apolos yomna? ¿Ndayá Pablo? Chatna co nýe Bëngbe Bëtsábioye oservénata bondmëna, ndátbeyeca tšëngaftanga Jesucristbeñe šmojtsošbuaché, y bëndata cada ona fsënjama chë Bëngbe Bëtsá šojanýanyé trabajo. ⁶ Atsna, mo nda jajañe jénaye cuafjuatbontsacá, tšëngaftangbeñe sënjanbojatsé chë trabajo, Bëngbe Bëtsabe soyëngama jábuayenama; y Apolos, mo nda chë jajañe matënguiñe béjaye cuaftsebuešcñnacá, enjantrabája cach atše sënjanbojatsé chiñe; pero Bëngbe Bëtsá, ntšamo matatémënga chauájuaama endbet-samcá, tojama banga tšëngaftanguentše Jesucristbeñe chamotsošbuáchemana. ⁷ Ntšamo, chë jená y chë matënguiñe béjaye buešcñnayá ndoñe yapa ntsámanana chiñe shajuanënga chaóbocnama, nýe Bëngbe Bëtsá aíñe, cachcá, nda Bëngbe Bëtsabiamana entsanga jábuayenama trabajo tojabojatsé y nda chentšana tojášhjangó cach trabajuiñe jóntšama, ndoñe ntjamana entsanga Jesucristbeñe chamotsošbuáchemana; nýe Bëngbe Bëtsá chca jamana.

⁸ Chë jená y chë matiñe béjaye buešcñayá cach trabajuiñe jtsentšénana, y chatna mo trabajayatcá jtsámanana; y cada ona juácanana ntšamo chabe trabajo tomncá.

⁹ Bëndata fsëndmëna trabájayata Bëngbe Bëtsabiama oservéniñe, y tsëngaftanga šmondmëna mo Bëngbe Bëtsabe jajañcá, ndayentše cha yojtseboše tsabe jaja saná chaóboचना, y šmondmëna mo chë cha yojtsejebuana bëts yebncá. ¹⁰ Er Bëngbe Bëtsá atšbe tsabiama jtsejuabñayëse, chë trabajo šojabonyé, y atše mo canye puerte tsabe jebuanacá, canye yebna ndayiñe chaotsécuatjonama tojapormacá, sënjanbojatsé chë trabajo, Bëngbe Bëtsabe soyëngama tsëngaftangbeñe jábuayenama. Chentšana inya, mo chë inye yebna jebuaná tojabojatsé jajebuama chiñe más jatsjebuama nda tojatontšecá, cach atše sënjanbojatsé trabajuiñe tojanontsé. Pero cada ona botamana chaotsantješna ntšamo chë trabajo yojtsamama. ¹¹ Mo chë cányabentšana inye trabajayacá, ndoñe ntšobenana chë yebna jajebuama tojanbojatsé cha chë yebna chaotsécuatjonama tojanpormañe inye soye cachcá chaoservema jatspórmana, cachcá, ndocná chaondëtsabuatambá inye soyënga, nye ntšamo Jesucristbe soyënga yomncá aïñe, chë ntšamo atše natsana sënjanabuatambacá. ¹² Chë Jesucristbiama más uámana soyënga buatëmbayá jtsemnana mo chë castellano, midio y inye uámana soyëngaca yebna jebuanacá; y chë Jesucristbiama nye nduámana soyënga buatëmbayana mo chë niñëbenga, butšajësha y tëshenjñesheca yebna jebuanacá. ¹³ Y Cristo chaojësabo te, Bëngbe Bëtsá echanjínyanyiye ntšamo cada cányabe trabajo yomnana. Cha chë te iñesheca chca echanjínyanyiye, y chë iñesheca, Bëngbe Bëtsá echanjinnye y echanjínyanyiye ndaye trabajo cada ona tojamama. ¹⁴ Ntšamo cada cányabe trabajo yojtsámanama jtsetatšëmbuama Bëngbe Bëtsá chaojinnye ora, cha chabe trabajo aïñe yojtsámana ca queojayanëse, chë tsabe trabajayá Bëngbe Bëtsábiocana canye uacanana soye echanjójyëngacñe, er cha jtsemnana mo canye entšacá, nda canye yebna tojtsejebuana jtsejuinýama ndoñe paselo tondmëna soyëngaca. ¹⁵ Pero chë te cányabe trabajo nye batšá yojtsámanama Bëngbe Bëtsá iñesheca chaojinyanýese, chora chabe trabajo echántsemna mo chë jtsejuinýama paselo tomna soyëngaca jebuanabe soyëngcá, chentšana nyets yebna jtsejuinýana. Chë jebuaná jtsachana, pero chabe trabajo lempe jobuétšana. Cachcá, chë Bëngbe Bëtsabiama trabajo tojtsamá, nye batšá oservena trabajo, cha echanjobenaye atsbočaná jtsemnana, masque lempe ntšamo tojamcá tondaye queochaisoquéda.

¹⁶ ¿O tsëngaftanga ndoñe šmondëtatšëmbo nyetscanga cányiñe Jesucristbeñe ošbuachiyëngcá, mo chë Bëngbe Bëtsabe bëts yebncá šmomnana, y tsëngaftanguentše Bëngbe Bëtsabe Espíritu yomnana? ¹⁷ Nderado nda tojama, tsëngaftanga nyetscanga cányiñe Jesucristbeñe ošbuachiyëngcá jtsemnana chaotsopochocama, Bëngbe Bëtsá chábioye bochantsepochóca, er chë Jesucristbeñe ošbuachiyëngcá cányiñe imomnënga, jtsemnana mo chë Bëngbe Bëtsabe bëts yebncá, chabe entšanga nye chábioye jasérviana; y tsëngaftanga chca šmondmëna.

¹⁸ Ndocná cachá chaondëtsenoíngña. Nderado nda tsëngaftanguentšá tojtsejuabná cha tša osertaná yomna ca, ntšamo quem luarentša entšanga mondbëtsejuabñaye ntšamo canye puerte osertaná inëtsemnana, cha bontsemna jóbemama mo canya ndabiama quem luarentša entšanga chamuayana cha corente juabna ndbomná yomna ca, chca, ndegombre corente osertaná jtsemnana chaobenama. ¹⁹ Er chë quem luarentša entšanga tša osertánënga imotátšëmbo soyënga, Bëngbe Bëtsabe bominyiñe yomna mo chë corente juabna ndbomnabe soycá. Bëngbe Bëtsabe uabemana palabrënguiñe mëntšá endayana: “Bëngbe Bëtsá chë tša osertánënga jáyëñjanana, ndayá cachënga ínýënga jáingñama tša osertánánaca tmojtsama soyëngaca ca.” ²⁰ Y mëntšánaca endayana: “Bëngbe Utabná endëtatšëmbo chë tša osertánëngbe juabnënga tondayama yondoservënama ca.” ²¹ Chíyeca, ndocná chaondëtsichamo corente uamaná yomna ca, ndaye entšabe us-toná tomnana, er lempe ntšamo šmobomncá, Crístbeñe ošbuáchiyënga bëtsemnana, tsëngaftangbe tsabiama endmëna, y nyetscanga chë tcmojujabuachëngnaca cachcá.

²² Lempe tsëngaftangbe soye endëtsomñe: ndayá Páblëbeyeca yomncá, Apólosbeyeca, Pédrëbeyeca, ndayá quem luarentše yomncá, ndayá yomncá ainá tcojtsemna ora, tcojóbana ora, ndayá mora yomncá y chë más chcoye yochtsemncánaca. ²³ Y tsëngaftanga Crístbenga šmondmëna, y Cristna Bëngbe Bëtsábia.

4

Jesucristbe ichmónëngbe trabajo

¹ Entšanga entsamna bëngbiana jtsejuabnayana bënga fstsemna Cristbe uajabuáchanënga y Bëngbe Bëtsabe soyëngama jtsabuátambayama trabajo bomnënga, chë Bëngbe Bëtsá baytentscuana entšangbioye ndoñe tonjaninÿanÿé, pero mora aiñe tojinÿanÿé soyënga jtsabuátambayama trabajo bomnënga. ² Chca, nda canÿe trabajo tojtsebojanÿabiamna, chabe mandayá jtsobátmanana cha aiñe tsabe palabra bomná chaotsemnama. ³ Atšbe bariëna, tondaye quenatámana, ntšamo tijamcá šmojinÿe y ndoñe tsabá tijama ca šmojayanëse, o inÿe entšanga cachcá tmojayanëse mo canÿe tribunaliñcá. Ni cach atše ndoñe chca quetsátama, jtsetatšëmbuana ntšamo atšbe trabajuama tijayancá ndegombre tayojtsemnama. ⁴ Atšbe ainaniñe ndocna juabna quetsátsbomna atše chašuyanama bacna soye tijama ca, pero chca ndoñe quenátayana, ndegombre Bëngbe Bëtsabe delante ndocna bacna soye ndbomná atše stsemna ca. Er Bëngbe Utabná endmëna nda atšbe trabajo yonÿá y nda ndegombre yobena jayanama atše tsabá o ndoñe tsabá tijamama. ⁵ Chíyeca, tsëngaftanga ndoñe quecmátamna jinÿana y jayanana ínÿenga ndoñe tsabá tmonjama ca, chë nÿa chama tempo cabá ndóshjanguëntscuana, Bëngbe Utabná chama chaojésabo ora. Cha chaojésabo ora, puerte tsabá echanjinÿanÿiye chë iytëmencá yomna soyëngama, mo ibetiñe cuaftsemncá, y botamana echanjinÿanÿiye, mo binÿniñcá, ndayá jamama nÿe chëngbe ainanoca entšanga tmojajuabocá. Y chora Bëngbe Bëtsá cada entsabiana echanjayana tsabe soyënga, ntšamo tbojtsomerecencá.

⁶ Jesucristbeyeca atšbe catsátanga, chë soyëngama tsabá jábuayenamna, atše sënjama ntšamo Apolos y atše tifjatrabájama botamana chašminÿama, y chca sënjama tsëngaftangbe tsabiana, ntšamo bëndata tifjamentšana chašmuatsjinÿama jtsiyenana nÿe ntšamo Bëngbe Bëtsabe uabemana palabrenguiñe iuayancá, y ndocná tsëngaftanguentsá canÿe entsabiana chaotsenábotamnaye, y ínÿabiana ndoñe tsabá chauátoyebuambnama. ⁷ Er, ¿nda chë ínÿengbiana más uámanënga tsëngaftanga cmojtsabiamná? ¿Y ndayá šmobomna, Bëngbe Bëtsá ndoñe tcmonjatsatá soye? Y tsëngaftanga chca chašmotsebomnama cha tojanmëse, ¿ndáyeca šmojtsenabotamná mo Bëngbe Bëtsabe tšetana soyënga ndoñe tontsemncá, y nÿe cach tsëngaftangbeyeca šmojonÿencá?

⁸ Tsëngaftanga šmojtsejuabná ya lempe ntšamo cmëjabotcá Bëngbe Bëtsábiocana šmojtsebomna ca, y lempe ntšamo jtsebošama šmojtsobencánaca ca. Mo reyënga cuaftsemnëngcá cmojtsabiona, bëngbentsana tondaye ntsëjabotcá. Malaye tsëngaftanga mo reyëngcá šmojtsemna, Crísoftaca cánÿiñe jtsemándayëse; chca, bëngnaca tsëngaftangaftaca jtsemnama, cánÿiñe jtsemándayëse. ⁹ Atše šontsinÿana, bënga chë Cristbe ichmónënga Bëngbe Bëtsá šojábiana mo chë nÿetscangbiana más nduamanëngcá, mo chë jóbanama yojtsemna entšangcá. Nÿetscanga chë Bëngbe Bëtsá tojábiamënga bëngbioye jtsënÿayana mo ndoñe cachca entšanga fstsemncá; angelënga y entšangnaca cachcá bëngaftaca montsama. ¹⁰ Bënga, Cristbiana oservena causa, quem luarentša entšangbiana fsëntsinÿna mo corente juabna ndbomnëngcá; chë cuenta, tsëngaftanga šmojtsejuabná Cristbe soyëngama corente osertánënga šmomna ca. Bënga fsëndmëna chë entšangbe bominiñe ndocna obenana ndbomnënga; y tsëngaftangna šmojtsejuabná puerte obenana bomnënga šmomna ca. Tsëngaftangbioye ínÿenga puerte uámanënga y bëtsëtsanga jtsabiamnayana, pero chënga bëngbioye jtsëbuayënjana. ¹¹ Y mëntscoñama, bënga šontsabuashebebiana saná, ndayá jofšiyama y entšayá. Entšanga bëngbioye

bacá jtsaborlánana, y tondaye yebna queftsátsbomna. ¹² Y bēnga puerte jabuache fsēndētrabája cach bēngbe cucuatšēngaca. Entšanga šojóyanguango ora, Bēngbe Bētsá fchandbétseimpadana cha chaoma chēnga tšabe bendicionēnga chamotsebomnama. Bēnga chamosufrima ínŷēnga tmojtšama ora, bēnga chē soye fchandbétsoboyaye. ¹³ Inŷēnga bēngbiama bacá tmojtsoyebuambná ora, jtsababuánŷeshanēse fsēnduamana jtējuana. Quem luarentša entsangbe bominŷiñe bēnga jtsemnana chē puerte nduámanēnga, mo chē quem luarentša basurēshēngcá, chē quem luarentša entsanga tondayama ndoservénēnga, mo chē quem luarentša tsengacá; y chca endmēna mēntscoñama.

¹⁴ Quem soyēnga ndoñe quecbatēbuabiamná tšēngaftanga chašmotsēuatjama, sinó ndayá jábuayenama mo cach atšbe basengbioycá, atšbe bonshánēnga. ¹⁵ Er masque tšēngaftanga mallajta abuatambayēnga chašmotsóbomñe, jacúntama ntjobenaycá, Crístbiana chacmotsabuátambama, ndoñe banga quešmátabamna tšēngaftangbiama mo taitangcá, Cristo Jesúsbeñe jtsošbuáchiyama tcmojanējabuachama. Nŷe atše sēndmēna mo taitacá tšēngaftangbiama, mo ošbuachiyēngcá, er atše natsana tcbonjanabuayená chē tšabe noticiēnga Jesucristbiana, y tšēngaftanga chiñe šmotsanošbuaché. ¹⁶ Chíyecna, cbontsaimpadana ntšamo atše tijamcá chašmotsamama.

¹⁷ Chama Timoteo tšēngaftangbioye sēntsichamná, atšbe bonshaná, canŷe aíñe tšabe palabra bomná; Bēngbe Utabnábeñe tojanošbuachéyeca, atše Crístbiana sēnjanbuayiyiná ora, mo atšbe uaquiñacánaca cha endmēna, ntšamo chabe ošbuáchiyana yomnama. Cha echanjama tšēngaftanga chašmuatenójuaboma ntšamo atše tšēngaftangbeñe tsjoyenama, Crístbeñe ošbuachiyacá, ndayama atše nŷets tempo ošbuáchiyēnga sēndbetsabuatambaycá nŷets luare ošbuáchiyēnga enefjuanenache. ¹⁸ Tšēngaftanguentše báseftanga ya šmojatsjuabná puerte uámanēnga šmojtsemna ca, er šmojtsejuabná atše stsauatja tšēngaftangbioye jama jánŷama ca. ¹⁹ Pero Bēngbe Bētsá chašojalesenciase, sēntsobátmana betscó tšēngaftangbioye jama jánŷama. As chjinŷe ntsache obenana imobomna chē Bēngbe Bētsabe entsangcá jtsiyenama tša uámanēnga imomna ca juabnayēnga, y ndoñe nŷe ntšamo jayanama imobencá. ²⁰ Er Bēngbe Bētsá canŷe ošbuachiyabe ainaniñe tojtsemánda ora, chca jtsinŷnana ndoñe nŷe ntšamo tojtsichámuama, ndayá Bēngbe Bētsabe obenana chábeñe tojtsemnama. ²¹ ¿Tšēngaftanga ndayá más šmattseboše: atše chayá tšēngaftangbioye jaucácanama, o chayá tšēngaftangbioye jánŷama puerte bonshanánaca y ntsetšatjaycá tšēngaftanga jauyanama?

5

Ndayá cuanjama canŷe boyabása shembásaftaca bacna soye amáftaca

¹ Ndegombre nŷets luariñe entsótatsēmbo tšēngaftanguentše yojtsemna canŷa, shembásaftaca bacna soye amá, y ntšamo cha yojtsamcá puerte bacna soye yojtsemna; ni chē Bēngbe Bētsábioye nduabuátmēnga chca ntsamana: canŷe entšá cachabe mamamnáftaca bacna soye yojtsama. ² Y tšēngaftanga cabá šmojatsjuabná corente tšábēnga šmomna ca, masque chca tšēngaftangbeñe yojtsopasánēse. Tšēngaftanga cmontsamna puerte ngménaca jtsemnana, tša uabouana soye cha yojtsama causa. Canŷe entšá chca tojamáftacna, tšēngaftanga cmontsamna jamana cha ndoñe más tšēngaftangaftaca chaondenútanama mo ošbuachiyacá. ³ Y atšna, masque tšēngaftangaftaca choca ndoñe quetsátsmēna, atšbe juabna choca tšēngaftangaftaca entsemna; y chca atšbe espíritoca sēntsemnayeca, Bēngbe Utabná šojēftsanatšetá mándoca, sēnjajuabó y sēntsetatsēmbo ntšamo tšēngaftanga cmojtsamnama, chē entšá chca tojamáftaca. ⁴ Tšēngaftanga chašmojénefjna ora, chentše atšbe espíritoca tšēngaftangaftaca atše chántsemna, y atšbe espíritu chentše echántsemna Bēngbe Utabná Jesusbe obenánaca. ⁵ Y chora tšēngaftanga cmontsamna jamándana chē entšá ya ndoñe más tšēngaftangaftaca mo ošbuachiyacá chaondenútanama, mo Satanasbe cucuatšīñe cha cuafjaboshjoncá,

chca, chë quem entsá nÿe cachá tšabá jtsomñama juabnënga chaotsopochocama, y chca, Bëngbe Utabná cachiñe chaojésabo ora, chabe espíritu atsbocaná chaotsemnana.

⁶ Tšëngaftanga šmojtsejuabná puerte tšábenga y uámanënga šmomna ca, pero šmojtseleséncia canÿa tšëngaftanguentše chca chaotsamama. Chca ndoñe tšabá quenátsmëna. Tšëngaftanga ya šmondëtatšëmbo, ntšamo chë nÿe batsá levadura endbama, nÿets arninÿá chauábochema; cachcá, tšëngaftanguentše canÿa tša bacna soye chca tojama ora, nÿetscangbiana ndoñe tšabe soyënga jóbocnana. ⁷ Chíyeca, tšëngaftanga cmontsamna, chca uabouana bacna soye tojamá jtabocnana, cha ya ndoñe más tšëngaftangaftaca mo ošbuachiyacá chaondenútanama; y chora tšëngaftanga šmochántsemna mo tsëm arninÿacá, ndocna levadúraca, chë bacna juabnëngaca ya ndëmandánënga šmojtsemnayeca. Ndegombre tšëngaftanga chca šmondmëna, er Bëngbe Bëtsá tojama tšëngaftanga tsëm vida chašmotsebmoma. Bashco fiesta ora, oveshá tmojanóba, Israeloca entsanga perdonánënga chamotsemnana. Cachcá Cristo, mo chë oveshacá, tojanóbana bacna soyënguentsana bënga játsebacama. ⁸ Ntšamo chë judiënga chë fiesta ora mondbamcá, nÿets levadura ojamnana cachcá jonÿayana, cachcá, bënga šontsamna jtsajbanana oyenana bacna soyënga ínÿengbiana jamama jtsebošëse, y ndaye bacna soye jtsamëse, ntšamo tempo imojanamcá. Ntšamo chë judiënga chë fiestiñe nÿe levadúraca ndëpormana tandëse mondbetsesaycá, cachcá, bënga šontsamna jtsiyenana nÿetsca soyënga ainaniñe ndocna bacna juábnaca jtsamëse, y ndegombre yomncá jtsóyebuambnayëse y jtsamëse.

⁹ Chë inÿe atšbe tsbuanáchañe tcbonjáuyana, chë boyabása o shembásaftaca bacna soye amëngaftaca tondayama chašmondëtsencuénta ca. ¹⁰ Y chca ndoñe quetstétseboše jáuyanana nÿa tondayama chašmondëtsoyebuambná nÿetsca chë quem luarentšënga boyabása o shembásaftaca bacna soye amëngaftaca, chë nÿe cachëngbiana bëtscá soyënga jtsebmoma tša bošëngaftaca y atbëbanëngaftaca, y chë cachëngbe pormana soyënga diosënga yomnana jtsejuabnayëse adorayëngaftaca ca; er nÿa chca jamamna, tšëngaftanga cmattsamna quem luarentšana jëftsebocanana. ¹¹ Ntšamo chora sënjanayancá endmëna ndayá tondayama ntsencuéntayana, chë Crístbeñe ošbuachiyá yomna ca tojayanáftaca, y boyabása o shembásaftaca bacna soye tojtsama, o nda nÿe cachabiana bëtscá soyënga jtsebmoma tša tojtseboše, o chë cachabe pormana soyënga diosënga yomnana jtsejuabnayëse tojtsadorana, o yapa tojtsayatsená, o yapa tojtsetmó, o tojtsatbëbana. Chca entsángaftacna, ni mo šmuatjót'bema chëngaftaca cánÿiñe jasama. ¹²⁻¹³ Atše ndoñe quešnátsmëna jayanana chë ndošbuáchiyënga, chë bëngaftaca ndoñe mondbënutananga, aiñe o ndoñe tšabá tmonjamama. Bëngbe Bëtsá echántsemna nda chëngbiana yochjayana ntšamo tmojamcá tšabá o ndoñe tšabá bëtsemnana, tšëngaftanga ndoñe. Ndegombre nÿe chë ošbuáchiyënga tšëngaftangaftaca innënutanangbiana cmontsamna chca jayanana. Chcasna, šmochjama ntšamo Bëngbe Bëtsabe uabemana palabrënguiñe endayancá: “Tšëngaftanga cmontsamna, chca bacna soye amá tšëngaftangbentsana jtabocnana ca.”

6

Osbuáchiyënga jendemándama tojtsemna ora

¹ Canÿe tšëngaftanguentša ošbuachiyá inÿe ošbuachiyabiama canÿe demanda tojtsebmoma ora, ¿cha nanjá chë ndošbuáchiyënga mandadëngbioye chë soye chamojandmanama? ¿Ndáyeca chca nanjama, y ndoñe chë Bëngbe Bëtsabe entsángbioye nanjá chabe demanda chamouenama? ² Tšëngaftanga ndegombre šmondëtatšëmbo, Bëngbe Bëtsabe entsanga mochjayanama quem luarentša entsangbiana tšabá o ndoñe tšabá tmonjamama. Y chënga quem luarentša entsangbiana chca jayanama tmojtsobenëse, ¿ndoñe montsobena más base soyëngama chca jayanama? ³ Tšëngaftanga ndegombre

šmondétatsëmbo chë angelëngbiámnaca tšabá o ndoñe tšabá tmonjamama bënga moch-jayanama. Chcasna, bënga más jtobenana chë quem luarentše jéftsiyenama soyëngama chca játayanana. ⁴ Y chcase, tšëngaftangbeñe chca demandënga chë quem luarentše jéftsiyenama soyëngama tojtsemna ora, ¿ndáyeca šmatjátëbuayana chë ošbuáchiyëngbiama tondaye tmontsámána entšanga, chë soyënga chamojandmanama? ⁵ Chca sënjayana tšëngaftanga chašmotsëuatjama: ¿O tšëngaftanguentše ni mo canya yondmëna corente osertaná, ošbuachiyëngbeñe demandënga chaojandmanama? ⁶ Pero ndoñe chca: ošbuachiyëngbeñe demandënga tojtsemna ora, mandadëngbioye jana chë soyënga chamojandmanama. Y chca jamana ndošbuáchiyënga mandadëngaftaca.

⁷ Y tšëngaftangbeñe nýe demandënga jájandmanama tojtsemna ora, tšëngaftangbiama ya canye puerte bacna soye jtsemnana. ¿Ndáyeca ndoñe šmattsóboyaye ínýenga bacá cmojtsaborlana ora? ¿Ndáyeca ndoñe cachcá šmatjonýaye ínýenga cmojtsabiatbëbana ora? ⁸ Pero cach tšëngaftangaftacna inýetsá copasana, ínýengbioye bacá jtsaborlánana y jtsabiatbëbanana, y tšëngaftangcá Crístbeñe ošbuachiyëngbioynaca.

⁹ ¿Tšëngaftanga ndoñe šmondétatsëmbo, chë bacna soye amënga Bëngbe Bëtsabe amëndayoye ndoñe mochanjámashënguama? Ndoñe matenoíngñana. Ni chë boyabása o shembásaftaca bacna soye amënga, ni chë cachëngbe pormana soyënga diosënga yomna ca jtsejuabnayëse adórayënga, ni cachëngbe boyá o shema ínýaftaca ingñayënga, ni chë boyabásënga mo shembasengcá jtsinýnama bošënga, ni chë boyabásënga inýe boyabásëngaftaca bacna soye amënga, ¹⁰ ni chë atbëbanënga, ni chë nýe cachëngbiama bëtscá soyënga jtsebmomnama tša bošënga, ni chë tša tmoyënga, ni chë uayátsenayënga, ni chë ínýengbiama bacna soye jtsamëse imnétsatbëbanënga, chënga nýetscanga ndoñe quemochatobenaye Bëngbe Bëtsabe amëndayoye jamashjnama. ¹¹ Y tempo báseftanga tšëngaftanguentšënga chca šmojamna, pero Bëngbe Bëtsá tšëngaftangbe bacna soyëngama tcmojaperdoná, y chca entsemna mo bebënënga cuaftsemncá; cha tojama tšëngaftanga chabe entšanga chašmotsemnana, nýe cha chašmotseservénama, y tojama tšëngaftanga mo tšabengcá chabe bominýiñe chašmotsemnana. Lempe chca Bëngbe Bëtsá, tojama ndayá Bëngbe Utabná Jesucristo tojanmama y ndayá Bëngbe Bëtsabe Espíritu tojamama.

Bëngbe cuerpo chaotsemna Bëngbe Utabná jtseservénama

¹² Mondbétsichamo: “Atšbiama entselesenciana ndayánaca jamama, ndayama Bëngbe Bëtsá ndocá tonjayana ca.” Pero básefta soyënga jtsamana ndoñe atšbe tšabiama ntsemnana. “Atšbiama entselesenciana ndayánaca jamama ca”, pero ndoñe quichatslesencia ndaye sóyecnacá nýets tempo mandaná jatsmënana. ¹³ Mëntšánaca mondbétsichamo: “Saná uafsbiamá y uafsbíá saná chaóyëngacñama ca.” Pero Bëngbe Bëtsá canye te echanjama chë uta soye chaotsopochocama. Bëngbe Bëtsá entšabiamá cuerpo ndoñe tonjanma, boyabása o shembásaftaca bacna soye cha chaotsamama, sinó chë cuérpoca Bëngbe Utabná bënga chamoservema, y Bëngbe Utabná bëngbiama tšabe bendicionënga chaotsamama. ¹⁴ Y Bëngbe Bëtsá, nda tojama Bëngbe Utabná cháuatayenama, bëngbiámnaca chabe obenánaca echanjama chámuatayenama.

¹⁵ ¿Tšëngaftanga ndoñe šmondétatsëmbo, Crístoftaca cánýiñe mo canýacá šmomnana yomna mo tšëngaftangbe cuerpo chabe cuerpentša soye cuaftsemncá? Tšëngaftangbe cuerpo Crístbioye jaserviama endmënayëca, tšëngaftangbe cuerpo jtsemnana mo Crístbe cuerpentša soycá. ¿Ntšamo atšbe chjátobena atšbe cuérpoca, chë ndayá yomna mo Crístbe cuerpentša soycá, canye bacna vida bomna shembásaftaca bacna soye jamana, y chca atšbe cuerpo jabemana mo chë shembásabe cuerpentša soye cuaftsemncá? ¡Ndoñe, ndegombre ndoñe! ¹⁶ ¿O tšëngaftanga ndoñe šmondétatsëmbo, canye entšá canye bacna vida bomna shembásaftaca tbojéninýena ora, chë útata jóbemana mo canýacá? Er Bëngbe Bëtsabe uabemana palabrenguiñe boyabása y shembása tbojéninýenama mëntšá endayana: “Chë

útata mo canyáca bochántsema ca.” ¹⁷ Pero canye entsá Bëngbe Utabnáftaca cánýiñe mo canyáca tojtsemna ora, jtsemnana mo chë útata cach canye espíritu tbojtsebomncá.

¹⁸ Nya ndocna te canye boyabása o shembásaftaca bacna soyënga šmattsama. Nderado ndaye inye bacna sóynaca nda tojama ora, sempre jamana ndayánaca chabe cuerpentsana shjoye; pero boyabása o shembásaftaca bacna soye jamamna, lempe jamana nye cachabe cuérpoca, y chë causa, chca jamëse, cachabe cuerpama más bacna soyënga jtsamana. ¹⁹ ¿Tšëngaftanga ndoñe šmondétatšëmbo tšëngaftangbe cuerpo yomna mo canye yebncá Uámana Espiritbiama, cha tšëngaftangbe ainaniñe chaotsiyenama Bëngbe Bëtsá tojánmayeca? Ndegombre tšëngaftangbe cuerpo ndoñe tšëngaftangbe soye quenátsmëna, sinó Bëngbe Bëtsabe soye. ²⁰ Chca endmëna, er Cristo bënga játsebacama tojanóbana ora, yojamna mo cha bëtsá cuafjopagacá tšëngaftanga Bëngbe Bëtsábenga chašmotsemnana. Chíyeca, chë tšëngaftangbe cuerpëngaca chašmojtsama soyëngaca šmochtsinýanýnaye Bëngbe Bëtsá puerte uamaná y bëtsá bëtsemnana.

7

Jobouamayama jábuayenama

¹ Mora chanjóyebuambaye ndayá tšëngaftanga átšbioye šmojuábobemama. Ndegombre, canye boyabásabiama más tšabá endmëna ndoñe chaondobouamá. ² Pero choca banga boyabása o shembásaftaca bacna soye amënga imojtsemna causa, tšabá entsemna cada boyabása chabe shema chabotsóbomñe, y cada shembása chabe boyá. ³ Boyábioye bontsemna jamana chabe shembiamama lempe ntšamo jamama ibomncá, boyá bëtsemnana; y chabe shémnaca cachcá chabe boyabiamama chaoma. ⁴ Chë shembe cuerpo ndoñe nye cha cánýabiama ntsemnana, sinó chabe boyabiámnaca. Cachcá, chë boyabe cuerpo ndoñe nye cha cánýabiama ntsemnana, sinó chabe shembiámnaca. ⁵ Ni boyá, ni shema ndoñe chabondëtsejuabná jtsenbiátšbuana. Aíñe chca copodena, pero nye chë útata chca básefta tescama tbojenóyeunase, Bëngbe Bëtsáftaca jencuëntama jtsentšénama. Pero chentšana chë útata entsamna cachiñe cánýiñe jtëtsmënana, chca, Satanás ndoñe chaondobená jamama bacna soye chaócochënguama, cachënga jenomándama ndoñe tmontsobena causa.

⁶ Atše chca sentsichamo, tšëngaftanga jábuayenama, ndayá jamama šmojtselesenciana, y chca ndoñe chašmondëtsamama jamëndama. ⁷ Y atšbe bariëna, atšbe juabna entsemna malaye nyetscanga chë soyënguiñe mo atšcá šmattsemna. Pero Bëngbe Bëtsá cada ona obenana tbojatšetá tšabe soyënga jamama, Crístbeñe ošbuáchiyënga jujabuáchama, ínýënga canye soyama, ínýëngna inye soyama.

⁸ Chë cabá ndbouamnënga y viudanga sentsëtsëtsná, chëngbiamama tšabá yojtsemna ntjobouamaycá joquédana, atšcá. ⁹ Pero chca jtsemnana cachënga jenomándama ndoñe tmontsobenëse, chënga entsamna jtsóbouamayana, er más tšabá endmëna jtsóbouamayana, y ndoñe nye boyabásabiama o shembásabiama tša nyets tempo jësejuabnayana.

¹⁰ Pero chë bouamnënga sentsamënda shema chabe boyábioye ndoñe cachcá chabondetsonyá. Chca ndoñe nye atše quetsatamënda, ndayá cach Bëngbe Utabná. ¹¹ Pero, shema cachcá chabe boyábioye tbojesonyase, cha bontsemna ntjobouamaycá jtsomñana o chabe boyáftaca cachiñe jtenútanana. Y cachcá, chë boyá ndoñe quebnátsmëna chabe shema cachcá jesonýayana.

¹² Chë ínýënga chjáuyana, atšbe juabncá y ndoñe Bëngbe Utabnabe soycá, nderado canye ošbuachiyá tbojtsebomna canye shema Crístbeñe ndošbuachiyá, pero chë shema tojtseboše cháftaca joquédana jtsiyenama, cha chë shëmbioye ndoñe cachcá chabondetsonyá. ¹³ Nderado canye ošbuachiyá tbojtsebomna canye boyá Crístbeñe ndošbuachiyá, pero chë boyá tojtseboše cháftaca joquédana jtsiyenama, chë shema ndoñe chaondëtsejuabná cha cachcá jesonýayana. ¹⁴ Er Bëngbe Bëtsá tojama, canye shembása ošbuachiyá chabe entsá chaotsemnana, nye chábioye chabotseservënama,

y chca, chánaca jtsejuabnayana chë shembásabe boyá Crístbeñe ndošbuáchiyabiana mo chabiana oservena entšacá, cha chëngbeñe mo canye pamillécá jatrabájama tojtseboše ora; y cachcá, chë boyá ošbuachiyábeyeca Bëngbe Bëtsá jtsejuabnayana chabe shema Crístbeñe ndošbuáchiyabiana mo chabiana oservena entšacá, cha chëngbeñe mo canye pamillécá jatrabájama tojtseboše ora. Er chca ndoñe tontsemnëse, chë básenga muántsemna ndošbuachiyatbe básenga, Bëngbe Bëtsáftaca tondaye ndbomnënga. Ndoñe chca yondmënayeca, canya o nyets uta bëtsétsatbe ošbuáchiyama, Bëngbe Bëtsá jtsejuabnayana chë básengbiana mo chabe entšangcá. ¹⁵ Pero chë boyá o shema Crístbeñe ndošbuachiyá cachcá jtsenónyayama tša tojtsebošëse, chca chaboma. Chora, chë ošbuachiyá ndoñe ntsotocánana chë ínÿaftaca cachiñe jtëtenútanama, er Bëngbe Bëtsá tcmojáchembo natjëmbana chašmotsiyenama. ¹⁶ Chca šmochjama, er aca shema çntšamo cattsetátšëmbo, tacuatjobenaye acbe boyá jayëñjanana Crístbeñe chaotsošbuáchema, y chca, atsbocaná chaotsemnana? o aca boyá çntšamo cattsetátšëmbo, tacuatjobenaye acbe shema jayëñjanana Crístbeñe chaotsošbuáchema, y chca, atsbocaná chaotsemnana?

¹⁷ Masque ntšámnaca, cada ona chaotsiyena jtsamëse ntšamo chë Bëngbe Utabná tbojatšetá obenana yomncá, cada ona ndayá jamama Bëngbe Bëtsá tbojachembcá. Chca atše nyets luare ošbuáchiyënga enefjuanenache sëndbëtsamëndaye. ¹⁸ Nderado Bëngbe Bëtsá cánÿabioye tbojachembo, y cha ínÿengbeyeca chë más delicadentše base bobachtema tëtšená tojtsemna, ntšamo chë judiënga monduamancá, cha ndoñe chaondëtsenobianná mo ndoñe judío cuafjatsmëncá; y nderado Bëngbe Bëtsá cánÿabioye tbojachembo, y cha ndoñe chca tëtšená tontsemnëse, cha ndoñe chaondëtsejuabná tëtšená jatsmëñana, ntšamo chë judiënga monduamancá. ¹⁹ Er ndayá iuámana, ndoñe quenátsmëna chca tëtšená jtsemnana o ndoñe, ndayá ntšamo Bëngbe Bëtsá yomandacá jtsamana. ²⁰ Cada ona bontsemna jtsiyëñana, ntšamo yojoyencá, chabe entšá chaotsemnana Bëngbe Bëtsá tbojanchembo ora. ²¹ Bëngbe Bëtsá tcmojanchembo ora, nyets tempo ínÿabiana oservená cojamnëse, chama ndoñe cattsenócochinÿena. Pero nderado tojtsemna ntšámose jashjáchama ndoñe más chca ntsemnana, cach acbiana jatrabájama, as chca cochjama. ²² Er chë nÿe ínÿabiana nyets tempo oservená yojamná, Bëngbe Bëtsá chabe entšá chaotsemnana tbojanchembo ora, cha mora ošbuachiyacá, jtsemnana canya ya ndoñe más bacna soyënga jamama juabnëngaca mandaná, sinó Bëngbe Utabnabiana oservená. Cachcá, chë nÿe cachabiana trabajayá yojamná, Bëngbe Bëtsá tbojanchembo ora, mora cha nyets tempo Crístbe oservená jtsemnana. ²³ Cristo bëngbiana tojanóbana ora, yojamna mo cha bëtscá cuafjopagacá, bënga Bëngbe Bëtsabe entšanga chamotsemnana. Ndoñe šmatjaleséncia nÿe entšangbe juabnëngaca nyets tempo mandánënga chašmotsemnana, y Bëngbe Bëtsabiana chacmotsebnëtjomba. ²⁴ Chcasna, Jesucrístbeyeca atšbe catšátanga, cada ona bontsemna Bëngbe Bëtsáftaca jtsiyëñana, ntšamo yojoyencá Bëngbe Bëtsá tbojanchembo ora.

²⁵ Y chë ndëbouamna shembásengbiana, chënga aíñe o ndoñe yontsamna jobouamayamna, atše chama ndoñe Bëngbe Utabnabe canye mando quetsátsbomna, pero chanjayana ntšamo atše tsjuabnacá. Bëngbe Bëtsá atšbe tšabiana tojanjuabóyeca, entšanga montsobena jtsejuabnayana aíñe tšabe palabra bomná chiñe atše tsmëñana. ²⁶ Atše šontsinÿana, entšá ibojtsemna jtsomñana nÿe ntšamo mora yotsomñcá, er bënga mora montsiyena puerte padecena soyënguiñe. ²⁷ Shema tcobomnëse, ndoñe cachcá catjëftsonÿaye; y ndoñe tcondbomnësna, ndoñe catjátšënguaye. ²⁸ Tcojobouamase, bacna soye ndoñe quecátama; y nderado canye tobiashe tojobouamase, cach bacna soye ndoñe quenátama. Pero chë tmojt sobouamangna padecena soyënguiñe mochanjoyena quem luarentše chamojëftsemnëntscuana, y atše sëntseboše chënga jujabuáchama chca jatiyenama ndoñe chaondëtsamnana.

²⁹ Jesucrístbeyeca atšbe catšátanga, ntšamo sëntseboše jayanamna mëntšá entsemna:

Cristo quem luaroye yochjésabo orscama ya nÿe batšá entsájamna. Chíyeca, morscana y nÿets tempo más chcoye, chë bouamnënga entsamna jtsiyenana mo ndoñe bouamnënga tmontsemncá, o mëntšá, entsamna jtsentšénana Bëngbe Bëtsabe soyënguiñe, y ndoñe nÿe chë bouamná bétsemnama tbojtsemna soyënguiñe. ³⁰ Cachcá, chë puerte ngménaca tša ošachiyiñe imomnënga, entsamna jtsiyenana mo ndoñe chca tmontsemncá; y chë puerte oyejuayënga, chamotsiyena mo ndoñe chca tmontsemncá; chë soyënga buamnayënga chamotsiyena mo tondaye chëngbe soye tontsemncá. ³¹ Chë quem luarentša soyëngaca jtsiyenama imojtsentšénënga entsamna jtsiyenana mo ndoñe chca tmontsamcá, er quem luare ntšamo bënga mora monduabuatmcá, pronto echanjochnëngo.

³² Atše sëntseboše tšëngaftanga ndoñe chašmondëtsenocochinÿenama. Canÿe entšá ndoñe bouamná tontsemna ora, jtsobenana jtsentšénana Bëngbe Utabnabe soyëngama jtsejuabnayama, y ntšamo oyejuayá cha jabemama; ³³ pero chë bouamná nÿets tempo jtšenócochinÿenana quem luarentša soyëngama, jtsiyenama, y ntšamo chabe shema oyejuayá jtsebomnama; ³⁴ y chca, cha uta soyiñe canÿe ora jtsentšénana. Chë ndëbouamna shembása y chë tobiáše bontsobena jtsentšénana Bëngbe Utabnabe soyënguiñe sempre jtsejuabnayama. Chënga mondobena jtsentšénana Bëngbe Bëtsá jaserviama, ndayá chëngbe cuérpoca y chëngbe espíritoca tmojamama. Pero inÿetšá, chë bouamna shembásana, nÿets tempo jesenócochinÿenana quem luarentše vida jtsebomnama soyëngama, y ntšamo chabe boyá oyejuayá jtsebomnama.

³⁵ Atše chca cbontsëtsësná tšëngaftangbe tšabiamama, y ndoñe jamëndama ba soyënga jamama ndoñe chašmondëtsobenama, ndayá ntšamo tšabá yomncá chašmotsiyenama, y nÿe Bëngbe Utabná jtseeservénama chašmotsentšénama.

³⁶ Nderado nda tojtsejuabná chabe uatsëtsnaye tobiášeftaca jtsobouamayama ibojtsemna ca, chca jamama chë tobiáše ya bëtsá tojtsemnayeca, y chca jamama tša tšabá yojtsemna ca tojtsejuabnase, cha bontsemna jamana ntšamo tojtsebošcá. Chaot-sobouamá. Chca tojama ora bacna soye ndoñe ntsamana. ³⁷ Pero nderado inÿa, tondaye obligacionaca tontsemna y lempe ntšamo tojtsebošcá cha tojtsobena jamama, cha tšabá tojajuabó y chabe ainaniñe corente tojtsetátšëmbo, ndoñe ntobouamayana tšabá yomna ca, cha tšabá chca jtsamana. ³⁸ Chcasna, chë tobiášeftaca tojtsobouamá chana, canÿe tšabe soye jamana; pero chë ndoñe cháftaca tonjobouamá chana, canÿe más tšabe soye jamana.

³⁹ Chë shembása bouamná jtsotocánana chabe boyáftaca sempre jëftsiyenana, chë boyá vida tojtsebomnëntscuana; pero chë boyá tojóbanëse, cha jtsobenana cachiñe jtobouamayana, nda cha tojtsebošáftaca, pero chca chaoma mo canÿa Bëngbe Utabnáftaca cánÿiñe mo canÿacá quetsomñecá. ⁴⁰ Pero atše jayanamna, cha más oyejuayá nántsemna ndoñe tontóbouamase; y sëntsejuabná, átšnaca tsbomna chë Bëngbe Bëtsabe Espiritu chašotsebuayiyinama.

8

Uátšëmbona saná entsangbe pormana soyëngama

¹ Mora chanjóyebuambaye ndayá tšëngaftanga atše šmojatjama, ndayá jtseyayama, chë tempo inÿënga cachëngbe pormana soyënga, diosënga yomna ca jtsejuabnayëse jadórama tmojanátšëmbona soyëngama. Bënga mondëtatšëmbo bënga nÿetscanga osertánënga imomnama. Canÿa tbojtsosertana ora, cha nderado nanjájuaboye, chca bétsemnama puerte uamaná cha yojtsemna ca, pero canÿa, inÿënga tojtsababuánÿeshana ora, cha jtsobenana chënga becá jujabuáchana. ² Nderado nda tojtsejuabná ndegombre canÿe soye yotátšëmbo ca, cabá ndoñe yontsetátšëmbo ndayá jtsetatšëmbuama ibojtsemncá. ³ Pero nderado nda Bëngbe Bëtsábioye tbojtsebobonshana, Bëngbe Bëtsá chábioye jtsabuatmana mo chabe entšacá.

⁴ Y chë tempo ínÿenga cachëngbe pormana soyënga, diosënga yomna ca jtsejuabnayëse jadórama uátšëmbona soyëngamna, atše šcuayana: bënga corente mondétatšëmbo chë chënga imnétsadorana soyënga, diosënga yomna ca jtsejuabnayëse, ndegombre ndoñe dios quemátsmëna y nÿe canÿa Bëngbe Bëtsá endmëna. ⁵ Pero masque celoca y quem luarentše chamomna entsangbiama “diosënga ca” uabáinënga (ntšamo ndegombre endmëncá, banga quem luarentša tsbanánoca obenánaca mondmëna, entsangbiama diosënga ca ubuátmënga, y banga bëts mándoca entsangbiama “utabnënga ca” uabáinënga), ⁶ bënga chë ošbuáchiyëngbiama nÿe canÿa Bëngbe Bëtsá endmëna, Bëngbe Taitá, ndábentšana nÿetsca soyënga yóbocana, y nÿe nda jtseservénama bënga imoyena. Y nÿe canÿe Utabnánaca endmëna, Jesucristo, ndábeyeca nÿetsca soyënga yomna, y cach bëngnaca imomna.

⁷ Pero nÿetsca ošbuáchiyënga ndoñe chca quemátstatšëmbo. Básefta entsanga, Crístbeñe cabá ntsošbuáchiye ora, imojanamana ndaye sanánaca juatšëmbonana, chë chënga imojanjuabná diosënga yojamna ca soyënga jadórama; chënga, chca uatšëmbonana tmojtšesá ora, jtsejuabnayana chca uatšëmbonana bëtsemnama, y ainaniñe juabnënga jtsebomnana ndoñe tšabá tmonjamama, chana tmojase causa. Chënga, ndayá tempo imojánamama, ndoñe quemátobena tšëngaftangcá jtsejuabnayana, chcana jasana bacna soye ndoñe yondmëna ca. ⁸ Ndegombre, ndayá bënga tmojtšesacá ndoñe ntjamana bënga Bëngbe Bëtsábioye más chamuatobéconama. Bënga Bëngbe Bëtsabe bominiñe ndoñe quemochátsmëna más tšábenga aiñe tmojtšesama; ni ndoñe chcanga, ndoñe tmontšesá causa.

⁹ Pero cuedado šmochtsebomna, ndayá jamana yolesenciánama tšëngaftanga corente tšabá šmotatšëmbuama, ndayánaca jatsmana, y chca causa ínÿenga, chë soyënguiñe más batšá ošbuáchiyënga y osertánënga, ntšamo tšëngaftanga šmojtšamcá chamuatsmama, y chentšana, chëngbe ainaniñe juabnënga chamotsebomna y chëngbiye chaotsëtsësná ndoñe tšabá tmonjama ca. ¹⁰ Er, aca chë soyëngama tatšëmbuá, nderado tcojót'bema jasama canÿe luarentše, canÿe soye ndayama entsanga dios yomna ca jtsejuabnayëse adórayentše, y canÿe Crístbeñe ošbuachiyá tojtsebomna ainaniñe juabnënga ndoñe tšabá tonjamama, chca tojáseyeca, aquëcá chë soyëngama ndoñe yondétatšëmbo causa, y cha nderado chentše cojtšesama tcmojinÿëse, chë soye nanjobenaye chábioynaca jañémuana chë saná jasana, chë tempo chë soyëngama tmojanátšëmbona saná. ¹¹ Y chca aca, chë soyëngama ntšamo betatšëmbuama tcojamama, catjama chë Jesucristbeyeca acbe catšata, chë ndoñe corente ošbuachiyá, y ndoñe aquëcá chë soyëngama corente tatšëmbuá, cha pochocaná chaotsemnama, er chabe ainantše echántsemna juabnënga canÿe bacna soye tojamama, chë saná tojasama. Chca nderado cánÿabioye catjama, ndabiama Cristo tojanóbana, cha jatsbocama. ¹² Jesucristbeyeca acbe catšatbiama chca bacna soye tcojama ora, chca causa cha canÿe soye tojama, ndayama chabe juabnënga ainaniñe chabotsatsëtsná ndoñe chca chaondétsama ca; y chca, chentšana tša tojesejuabná cha canÿe bacna soye tojamama, acna canÿe bacna soye jamana, ndoñe nÿe chë catšatbiama, ndayá cach Crístbiámnaca. ¹³ Chíyeca, nderado ndayá atše stsesama, atše tsjama Jesucristbeyeca atšbe catšata chaoma canÿe soye y chca jamama chabiama canÿe bacna soye tojtsemnëse, más tšabá nántsemna ndocna te chë soye atše ntjasana, chca, atše ndoñe jatsmama cha canÿe bacna soyiñe chaótsatšama.

9

Jesucristbe ichmónëngbe derecho

¹ Ndegombre endmëna, atše ndayánaca jamana stselesenciánama y Moisesbe leyëngaca ndoñe más mandaná sëntsemnama. Cach ndegombre endmëna, atše canÿe Jesucristbe ichmoná tsmënama y Jesús Bëngbe Utabná tijinÿama; y cach tšëngaftanga mora ošbuáchiyënga jtsemnëse, šmondmëna ndayá tojóbcna Bëngbe Utabnabiama

atsbe trabajuentšana. ² Masque ínÿenga atšbiana ndoñe quematsjuabná atše canÿe Jesucristbe ichmoná tsmëna ca, tšëngaftangbiamna aiñe chca endmëna; er tšëngaftanga Crístbeñe ošbuáchiyënga šmondmënana y Bëngbe Utabnáftaca cánÿiñe mo canÿacá šmondmënana, puerte tšabá šmontsinÿanÿná atše Jesucristbe canÿe ichmoná tsmënana.

³ Mëntsá chanjayana chë atše ndoñe tšabá tijama ca imojtsichámëngbiana: ⁴ Ndegombre bënga nÿets derecho fsëndëtsóbomñe jtsobátmanama tšëngaftangbentšana, chë tchojubabuáchëngbentšana, bëngbe trabajuama saná o ndayá jofšiyama chašcuacaredadama. ⁵ Y bëngnaca derecho fsëndëtsóbomñe canÿe shema ošbuachiyá jtsebomnana y bëngaftaca cha jëftsbetšana inÿe luaroye fstsajna ora, ntšamo chë Jesucristbe inÿe ichmónënga, Bëngbe Utabnabe catšátanga y Pédrënaca mondbetsamcá. ⁶ ¿O nÿe Bernabé y atše šojtsëtocana cabëndatbe cucuátseca jatrabájana vida jtsebomnana, y ndoñe derecho fsëntsebomna ošbuáchiyënga chašotsacuédanama, Bëngbe Bëtsabiana trabájayama? ⁷ ¿Ndëmua mo canÿe soldadcá tojtsoservená, ndayá tbojtsájabotama cachá nantsatopagana, vida jtsebomnana? Ndocná canÿe jajañe uvas betiyënga ntjájena, chentša uvasëšangá ndoñe ntjuasama. Ndocná oveshënga ntsanÿenana, chë tojabuatëba létsiyentšana ndoñe ntjofšiyama. ⁸ Ntšamo atše muentše sentsichamcá ndoñe nÿe entsangbe juabna quenátsmëna; y Moisesbe leyíñnaca cachcá endayana, ⁹ er chabe leyíñe mëntsá endayana: “Aca canÿe toróftaca shajuana tmojtsatbaná luariñe chacojsetrabája ora, ndoñe catjuanguëtšenaye ca.” Y chca ndoñe quenátayana Bëngbe Bëtsá nÿe toronga inétsanÿena ca, ¹⁰ sinó inÿe más bëts soye; chca endayana ndayá ndegombre bënga, chë Bëngbe Bëtsabiana soyëngama abuayiyanyiñe trabájayënga cha šnetsanÿena ca. Chca tmojanábema bëngbiana, er chë fshantse arayá y chë meshënga atbanayá, entsamna chca jamana jtsobátmanëse, chë tmojátabe shajuanentšana batšá jójyëngacñama. ¹¹ Y chca, bënga chë tšabe noticiëngama tchojábuaenase, y chca, Bëngbe Bëtsábioncana tšabe bendicionënga chašmotsebomnana bënga tifjama, ndoñe yapa tanandátsmëna tšëngaftanga jótjañana, chë šmobomna soyënguentsana bënga jëftsiyenama chašcuatšatama. ¹² Inÿenga derecho tmojtsebomna tšëngaftanga jótjañana chë šmobomnentšana chašmuacaredadama, tšëngaftangbeñe chëngbe trabajuama, as bënga más derecho fstsebomna chca jamama.

Pero bënga tondaye checbatamëndá, bënga chë derecho bëtsebomnayeca. Chca játamamna, bënga lempe fsëntsoboyá, chca, bënga tondaye ntjátamama, y chë causa entsanga ndoñe chašondëtsayaunana, bënga chë tšabe noticiënga fstsabuayiyiná ora. ¹³ Tšëngaftanga šmondëtatšëmbo, Bëngbe Bëtsabe bëts yebnoca trabájayënga Bëngbe Bëtsabiana oservëniñe, mondbóyëngacñe chënga jasama, ndayá entsanga Bëngbe Bëtsá jadórana chabe bëts yebnoye tmojiyëbo sananguentšana. Y chë Bëngbe Bëtsá jadórana soyënga amënga, altaroca, chë juatšëmbonama luarentse, chënga jasana ndayá chentše tmojuatšëmbona soyënguentsana. ¹⁴ Cachcá, Bëngbe Bëtsá tojamandá, chë tšabe noticiënga abuayiyayëngna, vida jtsebomnamna lempe ntšamo tojtsëjabotcá chamóyëngacñe ca, chë tšabe noticiënga abuayiyayama. ¹⁵ Pero atše ndocna te chiyaisemandá ínÿenga chca chašmotsecuedánama, atše chë tšabe noticiënga abuayiyayá bëtsemnana chca derecho tsbómnyayeca, y cach ndoñe mora quem soye quec-batëbuabianná, tšëngaftanga ndayánaca atše chašmuatšetama. Atšbiana más tšabá nántsemna jóbanana, y ndoñe ntjalesénciana inÿa chaoma atše cach atšbiana oyejuayá ndoñe ntjátsmënana, ínÿengbentšana soyënga stjójyëngacñe causa.

¹⁶ Atše ndoñe quetsatsjuabná atše canÿe bëts soye stsama ca, chë tšabe noticiënga stsabuayiyinama, er atše obligaciónaca sëntsemna chca jtsamama, Bëngbe Bëtsá chama šojanchémboyeca. ¡Tša lastemcá atšbiana nántsemna, chë tšabe noticiënga ndoñe sentsabuayiyenase! ¹⁷ Chíyeca, atše chë tšabe noticiënga stsabuayiyiná nÿe atše chca jamama stsebóseyeca, atšbe uacanana soye ya stsebomna; pero atše chca stjama, y ndoñe tontsemna nÿe atše chca jamama stsebóseyeca, masque chca, atše stsama,

ndayá jtsamama Bëngbe Bëtsá šojanbonjēcá. ¹⁸ Y chca, atšbe uacanana soye endmëna atše oyejuayá jtsemnana chë tšabe noticiënga abuayiynayama, ošbuachiyëngbentsana atše vida jtsebomnama tondaye ntjatoyëngacñēcá; chca, atše tondaye quetsátama chë tšabe noticiënga abuayiynayama tsbomna deréchoca, chë atšbe trabajuentšana vida jtsebomnama.

¹⁹ Atše, masque ndocna entsábeyeca nyets tempo mandaná quetsátsmëna, puerte nduamaná sënjobema, mo canya nyets tempo ínÿabeyeca mandanacá, nyetscanga jaserviama, chca, atše chca jtsamëse, jobenayama becá entsanga, ntšamo tojopodecá, jayënjanama Crístbeñe chamotsošbuáchema. ²⁰ Chë judiëngbiamna atše sënjama chaitsiyena mo chëngcá jtsamëse y jtsejuabnayëse, chca, atše jobenayama chënga jáyënjanama Crístbeñe chamotsošbuáchema. Y chë Moisesbe léyeca mandánënga imoyenëngbiamna, atše chëngcá sënjobema, masque ndegombre chë Moisesbe léyeca mandaná ndoñe quetsátiyena; chca sëndbama chënga jáyënjanama Crístbeñe chamotsošbuáchema. ²¹ Pero chë Moisesbe léyeca ndëmandánënga oyenëngbiamna, atše chëngcá sënjobema, chënga jáyënjanama Crístbeñe chamotsošbuáchema, masque ndegombre endmëna, atše sontsemna jamana ntšamo Bëngbe Bëtsá šomandacá y ntšamo Cristo šomandacá. ²² Chë nÿe batšatema ošbuachiyëngbiamna y Bëngbe Bëtsabe soyëngama nÿe batšatema osertánëngbiamna, atše sënjama chaitsiyena mo chëngcá jtsamëse y jtsejuabnayëse, chca, atše jobenayama jamama chënga sempre Crístbeñe chamotsošbuáchema. Y lempe chca, chë atše jamana ntšamo nyetscanga imomncá atše chaitsemnana, endmëna atše jobenayama báseftanga jáyënjanama Crístbeñe chamotsošbuáchema.

²³ Atše lempe chca sëndama, bëtscá entsanga chë tšabe noticiënguiñe chamotsošbuáchema, y chca, atše atsbocaná chaitsemnana y chëngcá atše chayóyëngacñama, chë atsebácanënga Bëngbe Bëtsá yochjatšataye tšabe soyënga.

²⁴ Tšëngaftanga šmondëtatšëmbo, canye luaroye jashjanguama entsanga tmojótjajo orna, banga jotjajuana, pero nÿe canya chë uacanana soye jóyëngacñana. Chcasna, mo chë uacanana soye jóyëngacñama tmojótjajëngcá, tšëngaftanga cmontsamna jtsiyenana, chë Bëngbe Bëtsábiocana uacanana soye josháchiñama. ²⁵ Nyetscanga chë tmojótjajënga ínÿenga jáyënjanama, chënga jopróntana nyetsca soyënguiñe jtsenomándayëse, chca, canye uacanana soye, tsbuanachëngaca uapormana coronësha juayëngacñama; y chësha betesco jtsanctana. Pero bënga ndoñe; bënga mondoyena Cristbiamna soyënga jtsamëse, Bëngbe Bëtsábiocana ba tšabe soyënga mo uacanancá jóyëngacñama, y chë soyënga nyetsca tescama bënga mochanjëftsebomna. ²⁶ Y atšna, atšbe bariëna sëndëntšena Bëngbe Bëtsá jtseeservénama, ndoñe mo canya ínÿengbioye jáyënjanama tojotjajuacá, chë ndëmoye jashjanguama yomnama ntsetatšëmbcá; y cach ndoñe mo nda tojtsepeliá orcá, chora, cha nÿe ínÿoye chabe buacuatsënga tojtsëtsana y chë ínÿabe cuerpoye ndoñe. ²⁷ Mo canye tšabe peliayacá, chabe cuerpo játsëtšenana y chca chë cuerpo corente jtsemándayana, atše ndoñe quetsatsleséncia chë atše tšabá jtsomñama atšbe ainanëntša juabnënga chašotsemándama; y chca, Crístbioye jtseeservënëse chamotsiyenama ínÿengbioye stjabuayená chentšana, Bëngbe Bëtsá chašotsaboté chabe uacanana soye josháchiñama, cha ndoñe tšabá tijaservé causa.

10

Cach entsangbe pormana soyënga ndoñe chamondëtsadoránama jábuayenama

¹ Jesucristbeyeca atšbe catsátanga, atše sëntseboše tšëngaftanga chašmotsetátšëmbo bëngbe tempsca bëtš taitanga judiënga, chënga nyetscanga Bëngbe Bëtsá canye jantsetësheca benache yojaninÿanÿná, y chënga nyetscanga, chë Buángana ca uabaina mar bejayëjana tmojánachnëjna, chiñe mo bojojuiñe cuaftsomñcá. ² Chë jantsetësheca Moisés imojanëstonama, y chë mar bejayëjana tmojánama, chënga tmojanóbema Moisesbe ústonënga. ³ Chënga nyetscanga tmojanse cachca saná, chë Bëngbe Bëtsá

celocana tojanichmó saná; ⁴ y nyetscanga tmojanofsé chë Bëngbe Bëtsá tojanma chë peñësentsana chaóbcna béjaye. Cristo chëngaftaca yojtsemna jtsanýenama chënga imojtsajnëntscuana, y ntšamo chë peñësentše chëngaftaca tojanopasacá, yojaninýanýná Cristo chënga yojtsanýenama. ⁵ Masque chca, banga chënguentsënga ntšamo tmojanmama Bëngbe Bëtsá ndoñe yontsóyejuaye; y chë causa, Bëngbe Bëtsá tojanma chënga chamóbanama chë entsanga ndoyenentše.

⁶ Lempe chca tojanopasá bënga jinýanýiyama y jábuayenama ntšamo inopása entsanga bacna soyënga jamama tmojtseboše ora, bënga chca jamama ndoñe chamondëtsebošama. ⁷ Chíyeca, tsëngaftanga ndoñe šmattsadorana entsangbe pormana soyënga, ndayama ínýenga jtsejuabnayana diosënga yomna ca, ntšamo báseftanga israeloquënga tmojanmcá. Ntšamo Bëngbe Bëtsabe uabemana palabrënguifne chëngbiamama endayancá, chënga canýe ternera castellánoca tmojanpormá ora, mo dios cuaftsemncá jadórama: “Entsanga tmojanotbiamama jasama y jatmuama, y chentsana tmojantsbaná joboyejuama ca”. ⁸ Boyabása o shembásaftaca bacna soyënga ndoñe šmattsama, ntšamo báseftanga chënguentsënga tmojanmcá, y chë causa, nye canýe te, uta bnëtsana y unga uaranga entsanga tmojanóbana ⁹ Bacna soyënga ndoñe šmattsama, jinýama buetatescama Bëngbe Utabná uantado yochjéftsemnana y ndoñe sochanjacastigayama. Báseftanga chënguentsënga chca tmojanma, y chë causa tmojanóbana mëtscuayëngaca ftëtšenënga. ¹⁰ Bëngbe Bëtsabe contra ndoñe šmattsóyebuambnaye, ntšamo báseftanga chënguentsënga tmojanmcá, y chë causa, chë ángel obanayá tojanma chënga chamóbanama.

¹¹ Lempe chca bëngbe tempsca bëts taitángaftaca tojanopasá, bënga jinýanýiyama ntšamo jtsiyenana šojtsamnana, y Moisés, Bëngbe Bëtsabe uabemana palabrënguifne chca tojéftsanboshjona bënga jabuátambama, bënga, chë Jesucristo yochjésabo orscama ya batšatema yojtsájamna ora oyenëngbiamama. ¹² Chcasna, nda tojtsejuabná Bëngbe Utabnabiamama tšabá yojtsama ca y bacna soyënga ndocna te yochanjama ca, cuedado chaotsebomna, bacna soyënga amiñe ndoñe chaondótsatsama. ¹³ Ndocna entsá jatócochënguana bacna soyënga jamama, ntšamo tempo ínýenga ndoñe tonjanocochëngcá cachca bacna soyëngama, pero tsëngaftanga corente šmondétatsëmbo Bëngbe Bëtsá sempre cmochtsëjabuachanama chë padecena soyënguifne, y cha ndoñe yochanjalesénciamama bacna soyënga jamama chacmócochënguama, tsëngaftanga chca soyënga jamama jtsóboyayama obenana ntsebomncá; pero chë padecena soyënguifne chašmojtsemna ora, cha cmochanjínýanýiye ntšamo chë bacna soyënga ora tšabá jabocanama, y chca, jtsóboyayama chašmotsobenama.

¹⁴ Chíyeca, atšbe bonshánënga, ndocna te šmattsadorana cach entsangbe pormana soyënga, ndayama ínýenga jtsejuabnayana diosënga yomna ca. ¹⁵ Atše sëntsoyebuambná mo tsëngaftanga corente osertánënga cuaftsemncá. Cach tsëngaftanga šmochjenójuaboye y šmochjayana, ntšamo cbojtsëtsëtsnacá aiñe o ndoñe tšabá bëtsemnana. ¹⁶ Ntšamo Jesús chë coptema vinoyama Bëngbe Bëtsábioye tbojtanchuacá, bëngnaca cachcá Bëngbe Bëtsá chama fsëndbëtsatschuanaye. Bënga chca tmojama ora, ndegombre, jtsinýanýinayana bënga Crísoftaca cánýiñe mo canýacá imomnana, chabe buiñe juabuáshanëse bëngbiamama tojanóbanayeca. Y chë mondbajataye tandëse tmojase ora, jtsinýanýinayana bënga Crísoftaca cánýiñe mo canýacá imomnana, cha bëngbiamama tojanóbanayeca. ¹⁷ Bënga ošbuáchiyënga masque banga mondmëna, chca orna nyetscanga cach tandësentšana bënga jasana, y chíyeca bënga jtsemnana mo canýacá, mo Cristbe cuerpcá.

¹⁸ Tsëngaftanga šmochtsejuabnaye ndayá chë Israeloca bachnanga monduamanama: chënga chë altaroca tmojóba y tmojuátšëmbona bayënguentsana jasana, y chca chënga chora jtsinýanýinayana chënga cánýiñe mo canýacá imojtsemnana Bëngbe Bëtsáftaca, chë chca tmojtsadoranáftaca. ¹⁹ Y chca, atše ndoñe quetsátsboše jayanama chë entsangbe pormana soyënga mo diosënga cuaftsemncá, uámana soyënga yomna ca. Ni chë cach

entsangbe pormana soyënga diosënga yomna ca jtsejuabnayëse jadórama uátšëmbona saná inye sanama más iuámana ca. ²⁰ Pero aíne, entsanga cach entsangbe pormana soyëngama mo diosënga cuaftsemncá, chca tmojuátšëmbona ora, ndegombre chënga Satanás y chabe uajabuachanëngbioye jtsadoránana, y ndoñe Bëngbe Bëtsábioye. Y atše ndoñe quetsátsboše, tsëngaftanga chca uatšëmbonana šmojasama, cányiñe mo canyáca chë bayëjëngaftaca chašmotsemnana. ²¹ Tsëngaftanga ndoñe quešmátobena chë vínoye coptémentšana jofšiyana, ntšamo chë ošbuáchiyënga bétsemnana mondbetsamcá, y chentšana chë cach entsangbe pormana soyënga, mo diosënga cuaftsemncá jadórama vínoye coptémentšanënaca. Chca šmojama ora jtsemnana mo chë diablëngaftaca cuaftsesangcá. Y cach ndoñe quešmátobena vínoye jofšiyana y tandëse jasana, ntšamo ošbuáchiyënga bétsemnana mondbetsamcá, y chentšana cach entsangbe pormana soyënga mo diosënga cuaftsemncá jadórama fiestentša sanánaca jasana, y chca chë bayëjëngbioye jtsadoránana.

²² Bënga chca tmojtsamama, bënga mochanjama Bëngbe Utabná puerte etonaná bëngaftaca chaotsemnana, er chë bayëjëngaftaca bënga chca jtsamana. ¿O imojtsejuabná bënga chabiamama más obenana bomnënga imomna ca?

Lempe šmochjama Bëngbe Bëtsá puerte bëtsá y uamaná yomnama jinyanjyama

²³ Mondbétsichamo: “Entselesenciana ndayánaca jamana, ndayama Bëngbe Bëtsá ndocá tonjayana ca”, pero básefta soyënga atše stjama ora ndoñe nyetscangbe tsabiamama ntsemnana. “Entselesenciana ndayánaca jamama ca”, pero nyetsca soyënga ntšamo bënga tmojamcá, ošbuachiyëngbioye ndoñe ntjujabuáchana Jesucristbeñe más chamotsošbuáchema, y ainaniñe más añemo chamotsebomnana. ²⁴ Ndocná chaondëtsama lempe ntšamo tojobenacá nye cachabe tsabiamama, ndayá más chaotsama chë inyengbe tsabiamama.

²⁵ Lempe mercadoca tmojtsena soyënguentsana šmochjase, ntjatstjanaycá chë mëntsena aíne o ndoñe tmonjuátšëmbona chë cach entsangbe pormana soyënga, mo diosënga cuaftsemncá jadórama ca. Ndoñe chca šmattsetjanaye, ntšamo tsëngaftangbe ainaniñe juabnënga šmojtsebomnana; ²⁶ er ntšamo Bëngbe Bëtsabe uabemana palabrenguiñe endayancá: “Quem luare Bëngbe Utabnabe soye endmëna, y lempe ntšamo chiñe yomncánaca ca.”

²⁷ Nderado canye ndošbuachiyá tcmojúbuaja chábioca jasama, y tsëngaftanga choye jama tša šmojtsebošëse, lempe ntšamo cha chacmojonanjacá šmochjase, ndayentsana chë saná tojóbcnana ndocá ntjatstjanaycá, ntšamo tsëngaftangbe ainaniñe juabnënga šmojtsebomnana. ²⁸ Pero nderado nda tcmojáuyana: “Quem mëntsena cach entsangbe pormana soyënga mo diosëngcá jadórama tmonjanátšëmbona ca”, as ndoñe chana šmatjase, er canya chca tcmojáuyana, y ainanentše šmojtsebomna juabnënga, chë chca jamama ndoñe tsabá bétsemnana. ²⁹ Atše sëntsoyebuambná ndayá chë chca tcmojauyanabe ainaniñe juabnëngama, chë soye jasana ndoñe tsabá yondmënama, ndoñe chë tsëngaftangbe ainanentša juabnëngama.

Pero tsëngaftanga šmatjatjaye: “¿Ndáyeca atše šojtsemna jayanana ndayá atše stsobena jamama, ošbuachiyá bétsemnana, ntšamo chë inyabe ainaniñe juabna yobomnana ca? ³⁰ Y atše chë ndayá stsesama Bëngbe Bëtsá tijëtschuase, ¿ndáyeca inya šochjauyana atše ndoñe tsabá tijama ca, chë soye tijasama, chë ndayama Bëngbe Bëtsá tijëtschuá ca?” ³¹ Masque ntšámnaca, cachcá, chašmojtšesá, o chašmojtsofšëšná, o ndaye inye soye chašmojtsama, ndayama Bëngbe Bëtsá ndocá tonjayana, lempe šmochtsama Bëngbe Bëtsá puerte bëtsá y uamaná yomnama jtsinjanjyama. ³² Tondaye šmatjama ndayá chaobená jamana, inyënga Cristo chamotsábotema. Ndoñe chca šmatjama, ni judiëngbiama, ni ndoñe judiëngbiama, ni chë Bëngbe Bëtsábeñe ošbuachiyëngcá ene-fjuanëngbiama. ³³ Smochtsama ntšamo atše sëndëntšencá, nyetscanga nyetsca soyënguñe oyejuayënga jtsabamnana, lempe ntšamo stjobenacá jtsamëse, ndoñe nye atšbe

tšabiama, ndayá masna chë ín'yengbe tšabiama, chënga chamotsobenama chëngbe bacna soyënguentšana atsebácanënga jtsemnana.

11

¹ Tšëngaftanga šmochtsiyena ntšamo atše sëndamcá jtsamëse, cach ntšamo atše sëndoyencá, ntšamo Cristo inetsamcá jtsamëse.

Ntšamo yomna shembásenga tšabá jtsemnana, ošbuachiyëngcá tmojënefna ora

² Atše sëntseboše tšëngaftanga jáuyanana tšabá šmojama ca, tšëngaftanga nyetsca soyënguiñe atšbiama šmnétsenujuabnama, y tšëngaftanga šmojtsabuátambama y šmojtsamama ntšamo tčbonjanabuatambacá, cachcá ntšamo atše sënjëftsamboshjoncá.

³ Pero atše sëntseboše tšëngaftanga chacmësertá: nda nyetsca entsanga iuamënda cha, Cristo endmëna; y nda shémbioye ibománda cha, boyá endmëna; y nda Crístbioye ibománda chana, Bëngbe Bëtsá endmëna. ⁴ Nderado canye boyabása chabe bestšaše tojtsenátstbotse, inye ošbuáchiyëngaftaca cányiñe Bëngbe Bëtsáftaca tbojtsencuénta ora o Bëngbe Bëtsabe juabna tojtsoyebuambná ora, cha jamana cachá chaotsëuatjama, chabe bestšásëca chca tojama causa. ⁵ Pero nderado canye shembása chabe bestšaše ndoñe tontsenátstbotse, inye ošbuáchiyëngaftaca cányiñe Bëngbe Bëtsáftaca tbojtsencuénta ora o Bëngbe Bëtsabe juabna tojtsoyebuambná ora, cha jamana chama cachá chaotsëuatjama; jtsëuatjana mo cha lempe jshetëtšená cuaftsemncá. ⁶ Er, nderado canye shembása ndocna te tontseboše chabe bestšaše jtsenátstbotsana, chabiama más tšabá nántsemna lempe chaotsenójshetëtše. Pero tojtsejuabná utsbotjená o chca lempe jshetëtšená jtsemnana cha yochtsëuatja ca, as chabe bestšaše chaotsenátstbotse. ⁷ Boyabása ndoñe quebnátsmëna chabe bestšaše jtsenátstbotsana, er Bëngbe Bëtsá tojanma ntšamo cachá yomncá cha chaotsemnana, y chë boyabása chca jtsemnëse, jtsinýanýnáyana Bëngbe Bëtsá chabe mandayá yomnana. Pero ntšamo chë shembása yomncá, jtsinýanýnáyana chë boyabása chabe mandayá yomnana; ⁸ er Bëngbe Bëtsá, boyabása ndoñe tbonjanma shembásabentšana, ndayá shembása boyabásabentšana. ⁹ Y Bëngbe Bëtsá, boyabása ndoñe tbonjanma shembásabeyeca, ndayá shembása boyabásabeyeca. ¹⁰ Chiyeca, y chca jamama angelënga tšabá jtsinýanánayeca, shembása jtsemnana chabe bestšaše chaotsenátstbotsama, chca, chaotsinýnana inya chábeñe yomándama. ¹¹ Pero, Bëngbe Utabnábeñe ošbuachiyëngcá jtsiyenamna, boyabásenga y shembásenga cachcá jtseiytëtanana. ¹² Er masque Bëngbe Bëtsá, shembása boyabásabentšana tbojanma, mora, shembásabentšana boyabása jóbocnana; y lempe Bëngbe Bëtsábiocana endóbocana.

¹³ Cach tšëngaftanga, yejuana chama šmochtsejuabnaye y šmochjayana tšabá o ndoñe tšabá yontsemna, canye shembásabiama Bëngbe Bëtsáftaca jencuéntana, bestšaše ntsenatsbotscá. ¹⁴ Ntšamo entsanga sempre mondbetsejuabnáyca, ndayá tšabá bëtsemnana, bëngbioye jtsabuátambayana, boyabása bën stjënësha chabuájuama tojalessenciase, cha jamana cachá chama chaotsëuatjama. ¹⁵ Pero shembásabiamna, chë bën stjënësha jtsinýanýnáyana chabe botamanana y uámanana, er Bëngbe Bëtsá tojanma shembása bën stjënësha chaotsábomnana, chca, cha chaotsebomna ndáyeca chabe bestšaše jtsenátstbotsama. ¹⁶ Masque ntšámncá, ndánaca tojtseboše quem soyama más jatóyebuambayama, cha bontsemna jtsetatsëmbuana, ni bënga, ni Bëngbe Bëtsábeñe ošbuachiyëngcá enefjuanënga queftsatslesencia chca ndoñe chaondëtsemnana.

Bëngbe Utabnabiama jtenójuaboyama jasama ora, chënga ndoñe tšabá imonjánama

¹⁷ Mora cbochanjamënda soyënguiñe atše ndoñe quetsátobena tšëngaftanga jáuyanana tšabá šmojama ca, er tšëngaftanga Crístbeñe ošbuachiyëngcá šmojënefna ora, Bëngbe Bëtsá jadórama, atše šontsinýana chë soye yojtsoserverna tšëngaftanga más bacá chašmotsemnana, y ndoñe tšëngaftangbe tšabiama. ¹⁸ Natsana cbochjáuyana, atše sënjouena tšëngaftanga ošbuachiyëngcá šmojënefna ora, báseftanga canye soye

innétsejuabnaye y ínÿengna inÿetsá ca, y atše sèntsejuabná batšana ndegombre chca yojtsemna ca. ¹⁹ Ndegombre jtseytana tšèngaftangbeñe chamotsemna báseftanga canÿe soye juabnayènga y ínÿengna inÿetsá, chca, nÿetscanga chamotsetatšèmbuama ndèmuanyènga imojtsemna chë Bèngbe Bètsá tojayana chènga tšabá tmojama ca. ²⁰ Tšèngaftanga tandèse jasama y vínoye jofšiyama šmojénefjna ora, ntšamo bènga fsènduamancá, Bèngbe Utabná bèngbiana tojanóbanama jtenójuaboyama, ndayá chora tšèngaftanga šmnetsamcá, ndoñe quenátsmèna ntšamo ndegombre cmojtsamncá, chë Bèngbe Utabnabiana jtenójuaboyama jasama ora; ²¹ er chë jasama tojobuache ora, cada ona inóntša jasama ndayá tojiyèbcá, y ndoñe ntjatobátmanana nÿetscanga ndayánaca jasama chamotsebomnèntscuana; báseftanga shèntseca joquédana, y ínÿengna tša jèftsesana y jofšiyana jèftsótmenantscuana. ²² ¿Tšèngaftanga ndoñe yebna šmondpomna ndayentše jasama y jofšiyama? ¿Ndáyeca tšèngaftanga šmojtsejuabná chë innénefjna ošbuáchiyènga nduámanènga imomna ca, y šmojama chë chentše tmojtsemnènga, tondaye ndbomnènga, chamotsèuatjama? ¿Tšèngaftanga šmojtsejuabná atše cbochjáuyana tšabá šmojama ca, chë Bèngbe Utabnabiana jasama ora chca šmojamama? ¡Ndegombre ndoñe!

Bèngbe Utabnabiana jtenójuaboyama saná
(Mt 26.26-29; Mc 14.22-25; Lc 22.14-20)

²³ Er atše cach Bèngbe Utabnábèntšana ntšamo cbontsabuatèmbacá sènjanoýèngacñe: Bèngbe Utabná cach uayayèngbe cucuatšiñe tmojánboshjona ibeta, tandèse tojanca, ²⁴ Bèngbe Bètsábioye tbojtanchuá chentšana, tojanjatá y tojánayana: “Quem tandèse atšbe cuerpo entsemna; tšèngaftangbe tšabiana chanjóbana. Ntšamo mora montsamcá šmochtsama, atšbiana jtenójuaboyama ca.” ²⁵ Cachcá, chë saná tmojansentšana, coptema tojanaca y tojánayana: “Quem coptema vínoye atšbe buiñe entsemna. Atšbe buiñe echanjuábuashana tšèngaftanga chašmotsetatšèmbuama, ntšamo Bèngbe Bètsá entšanga tojanašebuachenacá pronto yochtsemnama. Cada vínoye chašmojtsofšèšná ora, chca šmochjama atšbiana jtenójuaboyama ca.” ²⁶ Er tšèngaftanga cada quemèntša tandèse chašmojtšesá ora y quem coptementšaycá chašmojtsofšèšná ora, Bèngbe Utabná chaojésabèntscuana tšèngaftanga šmochántsinÿanÿnaye cha entšangbiana tojanóbanama.

Ntšamo yomna jamana, Bèngbe Utabnabiana jtenójuaboyama jasama ora

²⁷ Chcasna, Bèngbe Utabnabiana jtenójuaboyama jasama ora, ndánaca tandèsentšana tojase y coptémentšana tojofšé, ndoñe chë ntšamo chaotsemnama Bèngbe Utabná yojanjuabnacá, chabiana Bèngbe Bètsá jayanana cha puerta bacna soye tojama ca. Chë entšá chca tojama ora, cha jtsinÿanÿnayana, Bèngbe Utabnabe cuerpo y buiñe chabiana tondaye yonduámanama. ²⁸ Chíyeca, entsemna cada ona corente chauenojuabó jtsetatšèmbuama aïñe o ndoñe yontseprontana chca jasama y jofšiyama, cabá ndèse y ndofšé ora. ²⁹ Er nderado nda tojase y tojofšé, chë Bèngbe Utabnabiana jtenójuaboyama jasama ora, cach Bèngbe Utabnabe cuerpo yomnama ntjajuaboycá, cha chë sóyeca jamana Bèngbe Bètsá chabotsecastigama. ³⁰ Chíyeca, banga tšèngaftanguentšènga šoquènga šmojtsemna, ínÿenga añemo ndbomnènga, y ínÿengna ndoñe nÿe báseftanga tmojóbana. ³¹ Pero bènga corente tmojajuabó jtsetatšèmbuama aïñe o ndoñe montseprontana ntšamo šuamncá jasama y jofšiyama, cabá ndèse y ndofšé ora; chca, Bèngbe Bètsá ndoñe buántsemna bènga játaCastigana, ntšamo tšabá yomncá ndoñe tmonjase causa. ³² Pero, Bèngbe Utabná castígoca chca šojabuayená ora, jtsemnana bènga más tšabá jtsamama chamuatsjínÿama, y chca, bayté chentšana, Bèngbe Bètsá ndoñe chabondètsemna játayanana bènga šojtsamna nÿetsca tescama castigánènga jtsemnama ca, cánÿiñe chë nÿe quem luarama enójuabnaye entšàngaftaca.

³³ Chca, Jesucristbeyeca atšbe catsátanga, tšëngaftanga chë Bëngbe Utabnabiamana saná jasama chašmojénefjna ora, cánÿiñe nÿetscanga šmochjabojátša. ³⁴ Y nderado nda tbojtseshëntsana, cachabe yebnoca chauétsese, chca, Bëngbe Bëtsá ndoñe chabondëtsemna tšëngaftanga jácastigana chora ndoñe tšabá šmonjama causa. Chë inÿe soyëngama ndayama tšëngaftanga šmonjatjá, chamna chanjamánda tšëngaftanga jányama chajjá ora.

12

Bëngbe Bëtsabe tšetana obenana, tšabe soyënga jamama

¹ Jesucristbeyeca atšbe catsátanga, atše sëntseboše tšëngaftanga chašmotsetátšëmbo Bëngbe Bëtsabe tšetana obenanama tšabe soyënga jamama, Crístbeñe ošbuáchiyënga jujabuáchama.

² Tšëngaftanga šmondëtatšëmbo, tšëngaftanga Crístbeñe ndošbuáchiyënga šmonjamna ora, inÿënga cmonjanabuatambá soyënga, y chora tšëngaftanga šmonjamna inÿabeyeca uasjanëngcá, cach entšangbe pormana soyënga mo diosënga cuaftsemncá jadórama; y chë soyëngna ni mo jóyebuambayama ntsoobenana. ³ Chíyeca, atše mora sëntseboše tšëngaftanga chašmotsetátšëmbo, ndocná ntsoobenana jayanana: “Jesús ndoñe chë Cristo quenátsmëna, ni Bëngbe Utabná ca”, chë Bëngbe Bëtsabe Espíritbe obenánaca cha tojtsóyebuambnase. Y cach ndocná ntsoobenana jayanana: “Jesús Bëngbe Utabná endmëna ca”, chë Bëngbe Bëtsabe Espíritbe obenánaca cha ndoñe tontsóyebuambnase.

⁴ Espiritu jamana bënga ndoñe chamondëtsebomnana cachca tšetana obenana tšabe soyënga jamama, pero lempe jobayana cach canÿe Espiritbeyeca. ⁵ Bënga, Bëngbe Bëtsá mondëserveda, nÿetsca soyënguiñe jtsetrabájayëse, pero cach Utabná nÿets chë trabajënga šojabanÿé. ⁶ Nÿetsca soyënga Bëngbe Bëtsabe obenánaca fsëndbëtsama, pero cach Bëngbe Bëtsá endmëna nda inétsama bënga chë soyënga jamama obenana chamotsebomnana. ⁷ Bëngbe Bëtsá inétsama cada ošbuachiyá chaotsebomnana canÿe tšetana obenana tšabe soyënga jamama, y chë soye jtsinÿanÿnayana Bëngbe Bëtsabe Espiritu chabe ainaniñe yomnana; y chë tšetana obenana jtsemnana nÿetscangbe tšabiamana. ⁸ Bëngbe Bëtsá, Espiritbeyeca, canÿa obenana jatštayana puerte osertanánaca chaóyebuambama, y inÿana obenana cach Espiritbeyeca ndayámnaca corente jtsetatšëmbëse chaóyebuambama; ⁹ inÿana cach Espiritbeyeca, obenana Crístbeñe puerte chaotsošbuáchema, y inÿabiamna, cach nÿe canÿe Espiritbeyeca, obenana jatštayana šoquënga jáshnama; ¹⁰ inÿana, obenana tšabe soyënga Bëngbe Bëtsabe obenánaca jamama, y inÿana, obenana Bëngbe Bëtsabe juabna jóyebuambayama. Inÿana, obenana corente jajuaboyama y jtsetatšëmbuama ntšamo tmojayancá Bëngbe Bëtsabe Espiritbeyeca o bacna espiritëngbeyeca tojtsemnana, y inÿana, obenana chë tempo ndmabiyáñnaca chaóyebuambama, y inÿana, obenana josértama ntšamo chë ndaye biyáñnaca jóyebuambayama obenana bomná tojtsichamcá, y inÿëngna chama jábuayenama. ¹¹ Pero cach Espiritu, chë nÿe canÿe Espiritu lempe chca jamana, ntšamo tšabá bëtsemnana cha tojtsejuabnacá cada entšábioye jatštayëse.

Nÿetsca ošbuáchiyënga cánÿiñe, mo Crístbe cuerpcá jtsemnana

¹² Cuerpo nÿe canÿe soye endmëna y chë cuerpna ba soyënga jtsebomnana; masque chë cuerpo ba soyënga jtsebomnana, nÿe canÿe cuerpo jtsemnana. Bëngaftácnaca cachcá. Bënga banga mondmëna nÿetscanga Crístbeñe ošbuáchiyënga, pero Crístbeyeca, bënga cánÿiñe mo canÿacá jtsemnana. ¹³ Er bënga nÿetscanga, judiënga o ndoñe judiënga, nÿe inÿabiamana nÿets tempo oservëngna o cachëngbiamana trabájayënga šojanëbaye, Crísoftaca cánÿiñe mo canÿacá, jtsemnana mo chabe cuerpcá, y chca yomna cach Espiritbeyeca; y Bëngbe Bëtsá tojama cach Espiritu nÿetscangbe ainanoye cháuamashënguama, bënga jtsamëndayama.

¹⁴ Cachcá, canÿe cuerpo ndoñe nÿe canÿe soye ntsebomnana, ndayá ba soyënga.

¹⁵ Nderado shecuatše tojyana: “Cucuatše ndoñe quetsátsmëna causa, atše cuerpentša

soye ndoñe quetsátsmëna ca”. Chca tojayanamna, shecuatše mo chë cuerpentša soye ndoñe cuaftsemncá ndoñe ntjátsmënana. ¹⁶ Nderado matscuaše tojayana: “Bominýe ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, matscuaše chë cuerpentša soye ndoñe cuaftsemncá ndoñe ntjátsmënana. ¹⁷ Nýets cuerpo bominýe tojtsemnëse, bënga ndoñe muantsobena jouenama. Y nýets cuerpo matscuaše tojtsemnëse, bënga ndoñe muanjobenaye jonguétsetsiyana. ¹⁸ Pero ndegombre endmëna, Bëngbe Bëtsá nýetsca soye cuerpentše tojancjá ndayentše cha tojánbošenentše. ¹⁹ Nýetsca cuerpentša soyënga nýe canýe soye tojtsemnëse, ndoñe canýe cuerpo nántsemna. ²⁰ Pero ndegombre endmëna, masque ba soyënga cuerpentše yomna, nýe canýe cuerpo jtsemnana.

²¹ Bominýe quenátobena cucuatše jauyanana: “Ndoñe quecátsiyta ca”; y cachcá, bestsaše quenátobena shecuatše jáuyanana: “Ndoñe quecátsiyta ca”. ²² Inýetsá, chë cuerpentša soyënga, chë tojtsinýana mo obenana ndbomna y nduámana soyëngcá, jtsemnana chë cuerpama más iyta soyënga. ²³ Chë cuerpentša soyëngama, ndayama bënga tmojtsejuabná más nduámana soyënga yomna ca, bënga jamana más chaotsámanama, chiñe entsáyaca jtichëtjëse. Y chë cuerpentša soyënga, ndayama bënga jtsëuatjana ínýenga chamotsonýama, bënga jamana ínýenga ndoñe chamondëtsonýama, chiñe entsáyaca jtichëtjëse. ²⁴ Pero chë cuerpentša soyëngaca, chë nýetscanga jtsonýayana y botamana jinýama jtsemnana soyëngacna, ndoñe ntseytana chca játamana. Bëngbe Bëtsá cuerpo tojama, ntšamo bënga chamotsamama chentša más nduámana soyënga, más chaotsámanama, ntšamo chë soyënga bënga tmojtsinýenama. ²⁵ Cha chca tojanma, cuerpentša nýetsca soyënga chë cuerpama trabajo cánýiñe chamotsamama, y chca, cada soye chaotsama trabajo chë cuerpentša nýetsca soyëngbe tšabiama. ²⁶ Nderado canýe cuerpentša soyama bacna soye tojopasá, chora nýetsca chë cuerpentša soyëngámnaca chca ndoñe tšabe soye jtsebínýnana; pero canýe cuerpentša soyama tcojama más uámana soye chaotsemnana o ndaye tšabe soye tojopasase, chora nýetsca chë cuerpentša soyëngámnaca chca tšabe soye jtsebínýnana.

²⁷ Cachcá, tšëngaftanga Crístbeñe ošbuáchiyënga, cháftaca cánýiñe mo canýacá jtsemnëse, mo chabe cuerpcá jtsemnana, y cada ona tšëngaftanguentsá mo chë cuerpentša soyëngcá, jtsemnana mo chabe cuerpentša soyëngcá. ²⁸ Ntšamo Bëngbe Bëtsá cuerpentše soyënga tojancjá ndayentše inabošcá, cachcá, ošbuachiyëngcá enefjuanëngbeñe Bëngbe Bëtsá tojubuáyana, natsana báseftanga mo Jesucristbe ichmonëngcá, chorna Bëngbe Bëtsabe juabna oyebuambnayënga, chorna Bëngbe Bëtsabiama abuátambayënga, chorna chë bëts soyënga Bëngbe Bëtsabe obenánaca jamama obenana bomnënga, chë šoquënga jáshnama obenana bomnënga, chë ínýengbioye puerte ujabuáchanënga, chë inýe ošbuachiyëngbioye amëndayënga, y chë nýetsca biyañe jtsóyebuambnayama obenana bomnënga, tempo ndmabiyañe. ²⁹ Ndegombre, ošbuachiyëngcá enefjuanëngbeñe nýetscanga ndoñe Jesucristbe ichmónënga ntsemnana, nýetscanga ndoñe Bëngbe Bëtsabe juabna oyebuambnayënga, nýetscanga ndoñe abuátambayënga, nýetscanga ndoñe Bëngbe Bëtsabe obenana bomnënga, bëts soyënga jamama. ³⁰ Nýetscanga ndoñe šoquënga jáshnama obenana bomnënga; nýetscanga ndoñe nýetsca biyañe jtsóyebuambnayama obenana bomnënga, tempo ndmabiyañe; ni nýetscanga ndoñe obenana bomnënga quemátsmëna, chë tempo ndmabiyañe nýetsca biyañe jtsóyebuambnayama obenana bomnënga ntšamo tmojtsichamcá josértama y ínýengbioye chama jtsabuayiynayama. ³¹ Pero tšëngaftangna puerte šmochtseboše, lempe ntšamo chašmojobenacá šmochjama, chë Bëngbe Bëtsabe más uámana tšetana obenana jëftsashjáchama.

Bonshánana jtsebomnana

Y inýe soye más, atše chochanjínýanýiye ntšamo šmojtsobena cabá más tšabá jtsiyenana, Bëngbe Bëtsá jtseservënëse.

13

¹ Nderado atše stjóyeuambaye entsangbe biyañe y angelëngbe biyañe, pero ínÿengbioye ndoñe sentsababuánÿeshanëse, atše stsemna canÿa tondayama uamaná, mo nÿe canÿe metalëshe tojtsenancá, o mo nÿe canÿe platillëshcá ndoñe tšabá tontsenanëshe. ² Y atše obenana stsebmna Bëngbe Bëtsabe juabna jóyeuambayama y nÿetsca soyëngama, y chë Bëngbe Bëtsá tempo entsanga ndoñe tonjaninÿanÿé soyënga šojtsësertana, y Bëngbe Bëtsabe nÿetsca soyëngama stsetátšëmbo, y Crístbeñe puerte stjesošbuáchiye, chca betsošbuáchema nÿa mo chë tjashënga chamobonjoma jamama, pero ínÿenga ndoñe sentsababuánÿeshanëсна, atše tondaye sëntsemna. ³ Y atše lempe ntšamo stsebmncá ndbomnjémënga stšëjátaye, y ínÿengbioye stjenontréga atšbe cuerpo chamojuinÿema, pero ínÿengbioye ndoñe sentsababuánÿeshanëse, atše ndocna uámana soye ntjashjáchana.

⁴ Canÿe entsá ínÿenga ababuanÿeshaná, uantado jtsemnana masque padecena soyënguiñe tmojtsemna órnaca, y ínÿengaftaca tšabe ainánaca mando jtsebmnnana. Inÿenga ababuanÿeshaná ndoñe ntsántšabošana ntšamo inÿa tojatsbmncá, ni ntsenábotamnayana, ni cachá chë ínÿengbiana más uamaná ntjáténobiamnayana; ⁵ ndoñe bacá mandbmnná ínÿengaftaca ntsemnana, ni nÿets tempo ntsebošana y lempe jtsamana nÿe chabiana tšabe soye jónÿenama; cha nÿe ndayámnaca ndoñe ntjetnana, ntšamo ínÿenga tmojaborlá ora jtsaperdónayana. ⁶ Inÿenga ababuanÿeshaná ndoñe ntjóyejuayana chë ndoñe tšabá yondmëna soyëngama; chë ndegombre yomna soyëngamna aíñe. ⁷ Inÿenga ababuanÿeshaná, ainaniñe añemo jtsebmnnana nÿetsca padecena soyënguiñe, lempe ntšamo más tšabá yomna soyënguiñe jtsošbuáchiyana, nÿetsca más tšabá yomna soyëngama jtsobátmanana, y jtsóboyayana nÿetsca toto soyënga.

⁸ Bonshánana nÿetsca tescama jëftsemnana. Canÿe te echántsemna, chora chë Uámana Espíritu ndoñe más queochátama entsanga Bëngbe Bëtsabe juabna chamotsóyeuambnana, ni chë ndocna te ndmabiyañe chamotsóyeuambnana, ni chë puerte jtsetatšëmbëse jóyeuambayama obenama chamotsebmnnama; ⁹ er ntšamo mora bënga imotatšëmbcá y Bëngbe Bëtsabe juábnaca jóyeuambayëse tmojayana soyënga, nÿe batšatema bëngbioye jtsinÿanÿayana Bëngbe Bëtsabe soyëngama, ndoñe lempe; ¹⁰ pero Jesucristo chaojésabo ora, y chaojama bënga chamotsemna lempe ntšamo Bëngbe Bëtsá bëngbiana yojanjuabnacá, quem soyënga, chë nÿe batšatema bëngbioye jtsinÿanÿayana Bëngbe Bëtsabe soyëngama, ya ndoñe más queochátbinÿna.

¹¹ Atše básatema ora, sënjanoyebuambná, sënjanjuabná, y soyëngama tšabá jtsetatšëmbuamna sënjanjuabná mo canÿe basatemcá; pero bëtsá sënjanóbema orna, sentsanajbaná lempe amana mo canÿe basatemcá. ¹² Cachcá, mora bënga quem luarentše nÿe batšatema Bëngbe Bëtsabe soyëngama jtsetatšëmbuana, mo canÿe espejuíñe tmojtsonÿacá, pero ndoñe nÿa corente tšabá. Pero canÿe te bënga mochántsetatšëmbo lempe nÿetsca soyëngama, bënga Bëngbe Bëtsabe delante chamojtsemna ora. Mora atše sëntsetatšëmbo nÿe batšatema Bëngbe Bëtsabe soyëngama, pero chora lempe chanjuábuatmana, ntšamo Bëngbe Bëtsá corente suabuamcá.

¹³ Pero morna, Bëngbe Bëtsabeñe jtsošbuáchiyana, chábeñe jtsobátmanana, y chábioye y ínÿengbioye jtsababuánÿeshanana, chë soyëngna nÿetsca tescama jëftsemnana; pero chentšana chë más uámana soye endmëna ínÿenga jtsababuánÿeshanana.

14

Ndmabiyañe obenana Bëngbe Bëtsabe tšetánana

¹ Bëtscá šmochtsama nÿetscanga jtsababuánÿeshanëse chašmotsiyenama, y puerte šmochtseboše jtsebmnnama chë Bëngbe Bëtsabe tšetana obenana tšabe soyënga jamama; pero chentšana masna, chë Bëngbe Bëtsabe juabna jóyeuambayama obenana. ² Er

chë tempo ndmabiyañe mora jóyebuambayama obenana bomná, Bëngbe Bëtsábioye jtsatsëtsnayana y ndoñe entsángbioye, er ndegombre entsanguentse ntšamo cha tojtsoyebuambnacá ndocná ntjosértana; chana chabe espíritoftaca jtsóyebuambnayana y ndoñe nýe chabe juábnaca, chë tempo Bëngbe Bëtsá ndocna entsábioye tbonjaninýinýe soyëngama. ³ Pero chë Bëngbe Bëtsabe juabna oyeuambnayana entsanga jtsëtsëtsnayana, chënga más chamotsošbuáchema y ainaniñe añemo chamotsebomnama, Bëngbe Bëtsabe soyëngama jábuayenama, y jamama padecena soyënguiñe tmojtsemna órnaca añemo chamotsebomnama. ⁴ Chë tempo ndmabiyañe mora jóyebuambayama obenana bomná, jtsamana nýe cha más jtsošbuáchiyama y ainaniñe añemo jtsebomnama; pero chë Bëngbe Bëtsabe juabna oyeuambnayana jtsamana chë ošbuachiyëngcá enefjuanënga chca soyënga chamotsebomnama.

⁵ Atše sëntseboše nýetsca tšëngaftanga chë tempo ndoñe šmonjanbiyañe mora jóyebuambayama obenana chašmotsebomnama, pero chama atše más sëntseboše tšëngaftanga chë Bëngbe Bëtsabe juábnaca soyënga chašmotsóyebuambnama. Chë Bëngbe Bëtsabe juábnaca soyënga oyeuambnayá más uamaná jtsemnana chë inýe biyañe oyeuambnayabiama; chca ndoñe nántsemna, ntšamo canýe biyañe tojayancá chë biyañe oyeuambnayá tbojtsësertánëse y chë ošbuachiyëngcá enefjuanënga tojábuayenase, y chca, chë soyënga tmojouenama, chënga chamotsobena más jtsošbuáchiyama y añemo jtsebomnama. ⁶ Y mora, Jesucristbeyeca atšbe catsátanga, atše nderado tchojábuache y nýe inýe biyañe tchojáuyanëse, ¿chca ntšamo cbatjújabuache? Atše jtsobenana jujabuáchana, nýe ntšamo chë biyañe tijayancá átšnaca šojtsësertánëse, y ndayá Bëngbe Bëtsá šojinýinýecá entsanga jábuayenama stjobenase, chë Bëngbe Bëtsá tojama atše jtsetatšëmbuama soye, chë Bëngbe Bëtsabe juábnaca stsoyebuambná soye o chë tšëngaftanga jabuátambama cha yoboše soye.

⁷ Entšanga monduamana ndayánaca juénanana, mo flautëfja o arpa, vida ndbomna soyënga; cada sóyeca inýetšá juénanama ndoñe tontsopodénëse, ndocná nantsobena jtsetatšëmbuama ndayá canýa chë soyëngaca yojtsënanama. ⁸ Y nderado nda trompetëfjua tojuájatëta ora, soldadënga japéliama chamoprontama, chë uajatëtaná inýetšá, nýa chama ndoñe tonjuájatëtëse, ndocná buanjoserá y jempéliama ndoñe nanjopróna. ⁹ Tšëngaftangafácnaca cachcá jtsopasánana. Inýenga paselo josértama jobenaycnana tšëngaftanga ndoñe šmonjóyebuambase, ndocná queochátstatšëmbo ntšamo šmojtsichamcá. Nántsemna mo nýe cánýenga cuaftsoyebuambnacá. ¹⁰ Atše sëntsejuabná, ndegombre quem luarentse ba inýe biyañe entsanga innëtsoyebuambnayana, y ndaye biyáñnaca tmojoyebuambá ora, sempre jtsemnana inýenga ntšamo chënga tmojtsichamcá osertánënga. ¹¹ Pero ntšamo inýa chabe biyañe šojauyancá atše ndoñe šontsësertánëse, atše stsemna canýe chabiama ndosertana biyañe oyeuambnayá, y chánaca cachcá atšbiama. ¹² Chcasna, chë Uámana Espíritu šondinýanýná obenana jtsebomnama tšëngaftanga puerte šmobóseyeca, lempe ntšamo šmojobenacá šmochtsama chca tšetana obenana jóyëngacñama, chë ošbuachiyënga más jtsošbuáchiyama y añemo jtsebomnama inétsama obenana.

¹³ Chíyeca, chë tempo ndmabiyañe mora jóyebuambayama obenana tojtsebomná, Bëngbe Bëtsá chabotseimpadana, cha chaoma ntšamo chë inýe biyañe tojayancá chabosertama y ošbuachiyënga jábuayenama obenana chaotsebomnama. ¹⁴ Pero atše Bëngbe Bëtsáftaca stjencuénta, chë ndmabiyañe jóyebuambayama cha obenana šojanatšetacá jtsóyebuambnayëse, atšbe espíritu cháftaca nantsóyebuambnaye, pero atšbe juabna ndoñe ntsetatšëmbuana ntšamo chë espíritu tojtsoyebuambnacá. ¹⁵ Y asna, ¿ntšamo atše chtsemana? Bëngbe Bëtsáftaca chanjencuénta atšbe espíritoca, pero ntšamo stsihámuaama jtsejuabnayësnaca. Bëngbe Bëtsá jëtschuayama chanjavérsia atšbe espíritoca, pero chca chanjama chíñnaca jtsejuabnayëse. ¹⁶ Nderado aca Bëngbe Bëtsá cojtsatschuaná nýe espíritoca, y canýa quem Bëngbe Bëtsabe tšetana obenanama ndosertaná tcmojóyeunase,

cha ndoñe ntsoberenana jayanana “chca chaotsemna ca”, cach aquécá cha yojtsejuabnama jinÿinÿiyama, er ntšamo cojtsichamcá cha ndoñe ntsësertánana. ¹⁷ Aca jtsobenana chca puerte tšabá Bëngbe Bëtsá jëtschuayana, pero ntšamo tcojtsamcá ndoñe ntjamana inÿa ndaye tšabe soye chaotsebomnama. ¹⁸ Atše, Bëngbe Bëtsá sentsatschuaná inÿe biyañe jóyebuambayama tšëngaftangbiamá más tsoberenama; ¹⁹ pero Crístbeñe ošbuachiyëngcá tmojënefjna ora, atše más sëndbëtseboše nÿe mo shachna palabratémnaca jóyebuambayana, chënga aíñe catafjosertacá, chca, ínÿenga jabuátambama, y ndoñe bnëtsana uaranga palabrenga jatóyebuambnayana inÿe biyañe, chënga chaósertama ndoñe tontsopodénese.

²⁰ Jesucrístbeyeca atšbe catsátanga, šmochtsajbaná basetemëngcá juabnayana. Mo šešonatemëngcá šmochtsemna, bacna soyënga jamama ntsetatšëmbcá; pero mo bëtsetsangcá tšabá šmochtsejuabnaye. ²¹ Bëngbe Bëtsabe uabemana palabrenguiñe, Bëngbe Utabná mëntšá tojánayana:

Atše quem entšángbioye chanjáuyana,

ínÿenga inÿe luarëngocana ashjajnëngaftaca, chëngbiamá canÿe ndosertana biyañe oye-
buambnayënga;

y chanjáuyana ndayá chëngbe biyañe chamojtsichamo soyëngaca;

pero ni chca, chënga ndoñe quešmochatóyeunaye ca.

²² Chcasna, inÿe biyañe jóyebuambayama obenana jtsebomnana endmëna, Bëngbe Bëtsá ndayánaca chë chábeñe ndošbuachiyëngbioye jinÿanÿiyama, y chábeñe ošbuachiyëngbioyna ndoñe. Pero, Bëngbe Bëtsabe juabna jóyebuambayama obenana jtsebomnana endmëna, Bëngbe Bëtsá ndayánaca chábeñe ošbuachiyëngbioye jinÿanÿiyama, y chábeñe ndošbuachiyëngbioyna ndoñe. ²³ Er tšëngaftanga nÿetscanga ošbuachiyëngcá šmojënefjna ora, nÿetscanga ba biyañe šmojtsoyebuambná, y choye tojámashëngo canÿa chca Bëngbe Bëtsabe tšetana obenanama ndosertaná o chábeñe ndošbuachiyá, cha nanjájuaboye tšëngaftanga opënga šmojtsóbema ca. ²⁴ Pero nÿetscanga tmojtsichamo, Bëngbe Bëtsabe juábnaca jtsóyebuambnayëse, y choye tojámashëngo canÿa Bëngbe Bëtsabeñe ndošbuachiyá o canÿa chca Bëngbe Bëtsabe tšetana obenanama ndosertaná, ntšamo chašmojtsichamcá cha bochanjosérta; y chë soye cha bochanjayëñaná cha bacna soyënga tojamama, y ndayá cha tojamiñe corente echántsejuabnaye, ntšamo nÿetscanga tmojtsichámuama. ²⁵ Y Bëngbe Bëtsá chábioye bochanjinÿinÿiye ntšamo cha ainaniñe tojajuabó y tojabošencá, ndayá ndocnábioye tbonjinÿinÿecá, y cha echanjoshëntsamentšiyë Bëngbe Bëtsá jadórama, y tšëngaftangbe delante echanjayana Bëngbe Bëtsá ndegombre tšëngaftangbeñe yojtsemna ca.

Ošbuachiyëngcá šmojënefjna ora, ntšamo tšabá yomncá lempe šmochtsama

²⁶ Chcasna, Jesucrístbeyeca atšbe catsátanga, šmojënefjna ora, cada ona ndayánaca jtsebomnana nÿetscangbiamá: ínÿengna jtsobenana javérsiama, Bëngbe Bëtsá jëtschuayama, ínÿengna jtsobenana jabuátambana o jábuayenama ndayá Bëngbe Bëtsá tojinÿanÿecá, o tempo ndmabiyañe chora jtsóyebuambnayana, o entšanga jábuayenana ntšamo inÿa inÿe biyañe tojayancá. Pero lempe šmochjama, ošbuáchiyënga más chamotsošbuáchema y más añemo chamotsebomnama Cristo jaserviama. ²⁷ Nderado inÿe biyañe jóyebuambayama tojtsemnëse, útata o nÿa másese únganga chca chamoyebuambá, y canÿánÿa; y jtseytana ndánaca ntšamo tmojtsichamcá chabosertá y nÿetscanga chama chauabuayená. ²⁸ Y chca chabosertama y nÿetscanga jábuayenama ošbuachiyëngbeñe ndocná tontsemnëse, as ošbuachiyëngcá chamojënefjna ora chë chca oyeambuambayá bontsemna ndoñe chca biyañe ntsoyebuambnayana, sinó nÿe canÿa tojtsemna ora cha jtsobenana chca Bëngbe Bëtsáftaca jencuéntana. ²⁹ Utata o únganga entsamna jayanana soyënga, Bëngbe Bëtsabe juábnaca jtsóyebuambnayëse; y chë ínÿenga jtsamnana botamana jajuaboyana y jayanana ntšamo chënga tmojayancá aíñe o ndoñe Bëngbe Bëtsábiocana tayojtsóbocanama. ³⁰ Pero canÿa Bëngbe Bëtsabe juabna tojtsóyebuambnantscuana, inÿa

chentše ouenana tbemanábioye Bèngbe Bètsá tbojinjinyé ndayánaca yojtsebomna jayanama, as chë natsana oyebuambnayá iytëca chaóbema, y chabolesenciá chë inya chaóyebuambama. ³¹ Chca, nyetscanga, canyánya jtsobenana jayanana soyënga, Bèngbe Bètsabe juábnaca jtsóyebuambnayëse, nyetscanga chamuatsjínjyama y nyetscanga añemo jatšatayama. ³² Chë Bèngbe Bètsabe juabna oyebuambnayá endobena jtsemándayana ntšamo tojtsichamcá, cha cachabe espíritoca tojtsoyebuambná ora; ³³ er Bèngbe Bètsá endmëna nda inétsama bënga natjëmbana chamotsiyenama, y ndoñe chë bënga nyetscanga cachcá ndoñe chamondëtsejuabnama, y nye ntšamo cada ona tojtsebošcá chaotsamama.

Ntšamo nyets luarënguenache, chë ošbuáchiyënga, chë Bèngbe Bètsabe entsanga mondbénefjna luarënguenache endbetsemncá, ³⁴ tšëngaftangbéntšnaca, shembásenga entsamna iytëca jobiamëngana, ošbuachiyëngcá šmojënefjna ora, er ndoñe quenátslesenciana chënga chora chamuátóyebuambnama, y aíñe chënga entsamna chëngbe boyanga jtsayaunanana, ntšamo Moisesbe leyiñe endayancá. ³⁵ Chënga ndayánaca jtsetatšëmbuama tmojtsebošëse, cachëngbe boyángbioye yebnoca chamotjanga; er ndoñe corente tšabá ntsemnana canye shembása jtsóyebuambnayana tšëngaftanga ošbuachiyëngcá šmojënefjna ora.

³⁶ ¿Tšëngaftanga šmojatsjuabná, Bèngbe Bètsabe tšabe noticiënga tšëngaftangbeñe tojanobojatšé ca, o nye tšëngaftanga chë soyënga šmojanóyëngacñe ca? Ndegombre ndoñe chca; chíyeca tšëngaftanga nye canyënga ndoñe ntsoberenana jayanama ndayá jamama cmojtsamnama. ³⁷ Nda tojtsejuabná cha Bèngbe Bètsabe juabna oyebuambnayá yomna ca, o chabe ainaniñe chë Espiritu jtsemándayama yojtsebomna ca, cha bontsemna tšabá jtsetatšëmbuana, ntšamo Bèngbe Utabná šojamandacá atše stsabiamnama. ³⁸ Pero cha ndoñe chca tontsetátšëmbo y chca ndoñe yondmëna ca tojayanëse, ndayá cha tojayancá ndoñe šmatjýëngacñe.

³⁹ Chcasna, Jesucristbeyeca atšbe catsátanga, puerte šmochtseboše Bèngbe Bètsabe juábnaca soyënga jtsóyebuambnayama obenana jtsebomnama, y ndoñe šmattsama chë tempo ndmabiyañe ínÿënga ndoñe chamondëtsoyebuambnama; ⁴⁰ pero lempe šmochjama ntšamo jamama yomncá, y ndoñe nye ntšamo cada ona tojatsjuabnacá.

15

Cristo tojtanayenama

¹ Morna, Jesucristbeyeca atšbe catsátanga, atše sëntseboše tšëngaftanga chašmuatenójuaboma atše tcbonjanabuayená tšabe noticiënguiñe, ndayá tšëngaftanga šmonjanóyëngacñe, chë ndáyeca tšëngaftanga Jesucristbeñe šmojtsošbuaché y cha jt-seservénëse šmojtsiyena. ² Chca šmobómnyeyeca, tšëngaftanga atsebácanënga šmojtsemna, pero tšëngaftanga sempre chiñe šmojtsošbuachese, ntšamo cbonjanabuayiynacá; chca ndóñesna, nye ndoñe corente tšabá ntjajuaboycá chë buayenana soyënguiñe šmojtsanošbuaché.

³ Er atše tšëngaftangbeñe sënjëftsanboshjona, Bèngbe Bètsábicana atše tijanóyëngacñe más uámana buatëmbana soyënga. Atše tcbonjabuatambá: Cristo tojanóbana bënga bacna soyënga tmojamama, ntšamo Bèngbe Bètsabe uabemana palabrenguiñe chabe juabna oyebuambnayënga chama tmojanayancá; ⁴ chë Cristo tmojanatbontsá y unga tianoye cha cháuatayenama Bèngbe Bètsá tojanmama, ntšamo Bèngbe Bètsabe uabemana palabrenguiñe chabe juabna oyebuambnayënga chama tmojanayancá; ⁵ chë Pédrëbioye tbojánëbëbocnama, y chentšana chë bnëtsana útata ca uabobáinëngbioynaca. ⁶ Chentšana mo shachna patsama más chábeñe ošbuáchiyënga tojánëbëbuacna, chënga canyëntše imojtsemna ora; chënguentšanga banga cabá vida imotsóbomñe, masque báseftanga ya tmojóbana. ⁷ Chentšana Santiágbioye tbojánëbëbocna, y chentšana nyetsca chabe ichmónëngbioye.

8 Y chentsana átsnaca šonjánébëbocna. Mo canye šešona cabá shbená tojonýnacá, Cristo chabe ichmoná šonjánbema, chë tempo chama jopróntama ntsebmncá, ndayëntscuana ínýenga cha tojanabuatambá. 9 Er atše sëndmëna chë más batšá uamaná Jesucristbe ichmónëngbeñe; y ni merecido taitatobuajoñe “chabe ichmoná ca” chašmotsábobuatmama, er atše tša sënjánama Jesucristbeñe ošbuáchiyënga chamotsesufrínama. 10 Pero Bëngbe Bëtsá atšbe tšabiamama yojanjuabná, y chíyeca atše mora tsmëna ntšamo sëndmëncá, y chabe tšabe juábnaca atšbiamama jtsamana, ndoñe nýe bonamente quenátsmëna. Er atše más sënjatrabajá, chë inýe Jesucristbe ichmónëngbiamama; pero ndegombre atše ndoñe nýe canya chca chiyatsma, sinó masna Bëngbe Bëtsá chë trabajo tojama, tšabe juabna atšbiamama jtsebomñese. 11 Ndayá más yojtsámama ndoñe quenátsmëna, atše o chënga, Jesucristbe soyëngama abuyaiynayiñe más tojatrabajá, sinó ndayá chë soyënga bëngbe buayenana soye yojtsemna, y tšëngaftanga chiñe šmojtsošbuaché.

Chë obanënga cachiñe vida mochtsatsbomnana

12 Pero bëngbe buayenana soye endmëna, Bëngbe Bëtsá tojanma Cristo cháuatayenama; as ¿ndáyeca básefta tšëngaftanga šmnëtsichamo Bëngbe Bëtsá ndoñe yochanjama chë mora obanënga chámuatayenama ca? 13 Pero chca tojtsemna, chë obanënga ndoñe mochántayenasna, Cristo cach ndoñe tontanayena; 14 y Cristo ndoñe matenjésayenëse, bënga nýe bonamente chabiamama fstsabuayiyná, y tšëngaftanga nýe bonamente chábeñe šmojtsošbuaché. 15 Y canye más bëts soye: chca tojtsemñesna, bënga muanjábocna mo chë Bëngbe Bëtsabiamama soyënga tmojinýe ca ichamëngcá, pero ndoñe ndegombre chca tontsemna; er bënga fsëndbëtsichamo, Cristo cháuatayenama Bëngbe Bëtsá tojanma ca. Pero chë obanënga ndoñe mochántayenasna, Bëngbe Bëtsá ndoñe tonjanma Cristo cháuatayenama. 16 Pero chë obanënga ndoñe mochántayenasna, Cristo cach ndoñe tontanayena. 17 Y Cristo cháuatayenama Bëngbe Bëtsá ndoñe matënjannmëse, tšëngaftanga nýe tondayama chábeñe šmojtsošbuaché; tšëngaftanga chë bacna soyëngama cabá ndoñe perdonánënga šmontsemna. 18 Y chca, chë tmojanóbanënga, Crístbeñe ošbuáchiyënga, chënga cach ndoñe chëngbe bacna soyënguentsana atsebácanënga quemochátsmëna, sinó nýetsca tescama castigánënga. 19 Bënga tmojtsošbátmana Cristo bëngbiamama tšabe soyënga chaotsamama, pero chca nýe quem luarentše bënga vida tmojtsebomñëntscuana, as bënga nýetscangbiamama más muantsomerecena, nýetscanga bëngbiamama chaotsangménama.

20 Pero chca ndoñe ndegombre quenátsmëna, er ndegombre Bëngbe Bëtsá tojanma Cristo cháuatayenama. Mo chë uanatsena shajuancá, jtsinýanýnayanama más shajuangënga chentsana yochjóbcnana, cachcá, Cristo tojtanayena ora, cha tojaninýanjé Bëngbe Bëtsá yochjanma ínýenga chábeñe ošbuáchiyënga chámuatayenama vida chamotsatsbomnana. 21 Chca, ndayá canye entšá, Adán, tojanmama, nýetscanga jóbanama yojtsamna, cachcá, ntšamo inýe entšá, Cristo, tojanmama, Bëngbe Bëtsá yochjama entšanga chámuatayenama. 22 Er ntšamo, Adánbentšana entšanga bëtsemnayeca jóbanama jtsamnana, cachcá, Crístbeñe ošbuáchiyënga bëtsemnayeca, Bëngbe Bëtsá jamana chë nýetsca tescama yomna tšabe vida chënga chamotsebomnana. 23 Pero Bëngbe Bëtsá jamana cada ona cháuatayenama nýa chama tempo tojtsemna ora. Natsana Cristo, y chentsana, Cristo cachiñe quem luaroye chaojésabo ora, nýetscanga chë Crístbe entšanga imomñënga. 24 Y chentsana, Bëngbe Bëtsá chë Taitábioye, Cristo chabe amëndayana chabojantšabuaché ora, nýetsca mandadënga, mando y obenana bomñënga corente jtsayëñjanayëse. 25 Er Cristo bontsemna ínýenga mo reycá jtsamëndayana, chabe uayayënga chabe cucuatšifne chamoquedama Bëngbe Bëtsá tojamëntscuana. 26 Canye uayayá inétsama entšanga jóbanama; pero Cristo último echanjama chabe obenana pronto chaotsopochocama. 27 Er ntšamo Bëngbe Bëtsabe uabemana palabrënguifne endayancá: “Bëngbe Bëtsá tojama Cristo nýetsca soyënguifne chaotsemándama ca.” Pero “to-

jama Cristo nyetsca soyënguiñe chaotsemándama ca” tojayana ora, jtsopodénana puerte tšabá jinñama, chca ndoñe yontsayana, Bëngbe Bëtsá Crístbeyeca mandaná yojtsemna ca; Bëngbe Bëtsá nda tojanma Cristo nyetsca soyënguiñe chaotsemándama. ²⁸ Y Cristo nyetsca soyënguiñe chaojtsemánda ora, cach Cristo, chë Uaquiñá, echántsemna Bëngbe Bëtsábeyeca mandaná, Bëngbe Bëtsá chë Cristo nyetsca soyënguiñe chaotsemándama tojanmá. Y chca, Bëngbe Bëtsá lempe echántsemna, lempe ntšamo quem luarentše yobínñiñe.

²⁹ Inyetsánaca, báseftanga cachiñe uabáinënga imojtsemna, chë ošbuáchiyënga ndu-abáinënga obanëngbe cuenta. Chca chënga jamana mo chë obanënga uabáinënga chamotsemnama cuafjamcá. Chë obanënga chámuatayenama ndoñe tontsemnëse, ¿ndáyeca entšanga chëngbe cuenta muantenábaye? ³⁰ Obanënga chámuatayenama Bëngbe Bëtsá ndoñe tonjamëse, ¿ndáyeca bënga muántseprontana nyets tempo resjuiñe jtsajnama, Crístbiamá oservena causa? ³¹ Atšbiamá cada te resjo endmëna jóbanama. Jesu-crístbeyeca atšbe catšátanga, atše sentsichamo, chca ndegombre yómnayeca, atše oyejuayá stsemna ca, mo Cristo Jesús Bëngbe Utabnabe canye oservenacá, tšëngaftanga chábeñe šmojtsošbuáchema. ³² Mo canya tšátjaye bayëngaca tojtsentsjaná orcá, atšbiamá puerte resjo enjamna jóbanama, Efeso puebloca; pero nye chë entšanga mondbétsejuabnaye jëftsashjáchama soyënga jtsebošëse chca matsjammëse, ¿ndaye tšabe soye matënjanoócna, chca atšbiamá resjo jóbanama enjamna ora? Obanënga ndoñe mochántayenësna, mocht-sama ntšamo entšanga jayanana monduamancá: “¡Mochjase y mochjofsiye, nderado yëfse muatjóbaná ca!”

³³ Ndoñe matenoíngñana. Ntšamo canya tojanayancá: “Nderado nda bacna amiguëngaftaca tojtsenutaná, cha jtsajbanana chë tšabe soyënga, ntšamo jtsamëse yojoyena.” ³⁴ Tšabá šmochtenójuaboye, y juabna ndbomnacá ndoñe; y šmochtsajbaná bacna soyënga amana, chë obanënga ndoñe mochántayena ca juabnaye causa, er báseftanga tšëngaftanguentše Bëngbe Bëtsabe soyënga ndoñe quešmatábuatma. Atše chca sentsichamo tšëngaftanga chašmotsëuatjama.

Ntšamo chë obanënga mochtayena

³⁵ Pero nderado nda nanjatjaye: “¿Ntšamo chë obanënga mochtayena ca? ¿Mocna cuerpo mochtsebomna ca?” ³⁶ ¡Juabna ndbomna entšá! Ndayá tcojajé orna, jtseytana chë jénaye chaóbanama, chë matatema vida chaotsebomnama. ³⁷ Ndayá tcojajecá ndoñe ntsemnana chë juábocnama matatema, ndayá nye chë meshe, trigo meshe o ndaye mata méshnaca jtsemnana. ³⁸ Pero Bëngbe Bëtsá jamana chë jénayentšana mata chauábocnama, ntšamo jamama cha tojajuabocá; y cha jamana cada jénayentšana canye mata chauábocnama, ntšamo chë jénayentšana chauábocnama tojtsemncá. ³⁹ Nyetsca cuerpënga ndoñe cachcá ntsemnana. Entšanga canye cuerpo mondbomna, bayënga inye cuerpo, shloftšënga inye cuerpo, y beongna inye cuerpo. ⁴⁰ Chë celoca vida bomnënga inyetsá jtsinñana, y chë quem luarentše vida bomnënga inyetsá. Pero chë buash-inyëñanana y botamanana ntšamo celoca vida bomnënga jtsinñancá, ndoñe cachcá ntsemnana chë quem luarentše vida bomnëngbe botamanancá. ⁴¹ Cachcá, shinye ndoñe quenátsbomna cachca buashinñinñana juashconcá, ni estrellëngcá; y estrellënguentše cach ndoñe cachcá ntsebuashinñinñana.

⁴² Cachcá, chë obanënga chámuatayenama Bëngbe Bëtsá chaojama ora chamojtsebomna cuerpo, ndoñe queochátsmëna cachcá ntšamo quem luarentše imojaniyena ora imojëftsebomna cuerpcá. Ntšamo chë jénaye tcojuatbontsá ora chiye jóbanana, cachcá, quem luarentše bënga mondbomna cuerpo jóbanana, inyënga juatbontsana y jtsopochócana; pero bënga chámuatayenama Bëngbe Bëtsá chaojama ora, bënga tsëm cuerpo mochántatsbomna y ndocna te queochatopochóca. ⁴³ Chë óbana cuerpo tmojuatbontsá ora, chë cuerpo tondaye ntsámanana; pero chë obanënga chámuatayenama Bëngbe Bëtsá chaojama ora, chë tsëm cuerpo puerte echántsebuashinñinñana y echantsámána. Bënga

quem luarentše imoyeněntscuana imobomna cuerpo, nŷe batsá obenana jtsebomnana; pero chě Běngbe Bětsá šochjatsataye tsēm cuerpo, puerte obenana bomna cuerpo echántsemna. ⁴⁴ Quem luarentše imobomna cuerpo endmēna cam luarentše vida chaotsebomnana; pero bēnga chāmuatayenama chaojama ora, chě bēnga mochtsebomna tsēm cuerpo, puerte chě Espíritbeyeca echántsemandana. Canŷe cuerpo quem luarentše vida chaotsebomnana yómnyeca, canŷe cuérpēnaca, jtsemnana celoca vida chaotsebomnana.

⁴⁵ Chca Běngbe Bětsabe uabemana palabrenguiñe endayana: “Běngbe Bětsá, chě natsana entšá tbojanma chaotsainama ca.” Adánbentšana nŷetsca entšanga jabocanana, pero Crístbeyeca, Běngbe Bětsá tojama banga mo tsmēma entšangcá chamotsemnana; chca, Cristo jtsemnana mo chě ústonoye Adancá; pero Cristna canŷe espíritu endmēna, y chě espíritu jamana entšanga chě nŷetsca tescama yomna tšabe vida chamotsebomnana. ⁴⁶ Pero chě celoca nŷetsca tescama vida jtsebomnana cuerpna ndoñe natsana ntjóbocnana, ndayá chě quem luarentše vida jtsebomnana cuerpo; chentšana chě celoca vida jtsebomnana cuerpo. ⁴⁷ Běngbe Bětsá, chě natsana entšá tbojanma fshántseca, y chca, cha fshantsentšana tojánbocna; Cristna, mo entšangbentšana chě natsaná tsmacá bemanacá, celocana tojánbocna. ⁴⁸ Adánbentšana, chě natsana entšá, chě fshántseca tmojanmábentšana tmojábocanēnga, ntšamo cha yojamncá jtsemnana. Cachcá, chě mo tsmēmangcá tojábiamēngna, Cristcá jtsemnana; Cristo nda celocana tojánabo.

⁴⁹ Ntšamo bēnga jtsinŷnana chě Běngbe Bětsá fshántseca tbojānbema entšacá, cachcá bēngnaca mochtsinŷna ntšamo chě celocá yomnacá.

⁵⁰ Jesucrístbeyeca atšbe catšátanga, atšbe cbochjáuyana, nŷe quem luarentše vida jtsebomnana cuerpēngaca, bēnga ndoñe ntsoobenana Běngbe Bětsabe amēndayoye jamashēnguana; ni ndayá yochjopochóca soye, ntsoobenana ndayá ndoñe yochanjopochóca soye jtsebomnana. ⁵¹ Smochjouena, atšbe canŷe soye cbochanjáuyana, y chě soye Běngbe Bětsá entšanga tempo ndoñe tonjaninŷanŷé: Bēnga ošbuáchiyēnga nŷetscanga ndoñe quemochatóbana, pero Běngbe Bětsá šochanjátrocaye mo tsmēmangcá. ⁵² Nŷe betscó, mo tcojofshetá y cachora tcojtafšnacá, quem luare ya jopochócama ora, canŷe ángel trompetéjua chaojuátēta ora, er chora trompetéjua echanjuénana, Běngbe Bětsá echanjama obanēnga chāmuatayenama, nŷetsca tescama vida jtsebomnana; y bēnga, chě ainēnga mochtsemnēngna, cha šochanjátrocaye mo tsmēmangcá jtsemnana; ⁵³ er jtseytana Běngbe Bětsá chaotrocá chě bēngbeñe jopochócama yomna soye, ndocna te yochanjopochóca soyiñe; y ndayá bēngbeñe yochjóbana soye, ndocna te yochanjóbana soyiñe. ⁵⁴ Běngbe Bětsá chca bēngaftaca chaojama ora, chě cha jatrócana ndayá bēngbeñe yochjopochocacá, ndocna te yochanjopochóca soyiñe, y ndayá bēngbeñe yochjobancá, ndocna te yochanjóbana soyiñe, chora echanjochnēngo ntšamo Běngbe Bětsabe uabemana palabrenguiñe chama endayanacá:

Běngbe Bětsá tojayēnjaná chě entšanga chamóbanama endbětsama obenana; entšanga ndoñe más quemochatóbana ca.

⁵⁵ ¡Mora entšanga chamuatóbanama chaotsama obenana ya ndoñe quenátsmēna; Běngbe Bětsá chě obenana nŷetsca tescama tojayēnjaná ca!

⁵⁶ Entšanga bacna soyēnga tmojama causa, obenana endmēna entšanga jóbanama chaot-samnama. Ndayá leyiñe iuayanama, entšá jtsetatšēmbuana ndayá yomna bacna soyēnga jamana, y chca tátšēmbó causa, chca bacna soyēnga jamama juabnēngaca mandaná jtsemnana, y cabana, jóbanama jtsemnana. ⁵⁷ ¡Pero Běngbe Bětsá mochtsatschuanaye, bēnga mo ayēnjanayēngcá cha šojábiamama, er ya ndoñe šontsamna chca jtsemnana, chě Běngbe Utabná Jesucristo bēngbiana tojanma sóyeca!

⁵⁸ Chíyeca, Jesucrístbeyeca atšbe catšátanga, atšbe bonshánēnga, Jesucrístbeñe sempre puerte šmochtsošbuáchiye y ndocna te šmatjaleséncia ndocná ni tondaye chaotsama chábeñe ošbuáchiyana chašmotsajbanama. Sempre šmochtsentšena bětscá jtsamana

Bëngbe Utabnabiamama trabájayiñe, er tšëngaftanga šmondétatsëmbo, Bëngbe Utabnabiamama trabájayiñe ndayá šmojamcá, ndocna te nÿe bonamente ntsemnana.

16

Jerusalenoca ošbuáchiyëngbiamama crocenánama

¹ Mora chanjóyebuambaye chë Jerusalenoca Bëngbe Bëtsabe entsanga nd-bomnëjëmëngbiamama tšëngaftanga šmochjuíchmua crocenánama. Atše sëntseboše tšëngaftanga chca chašmoma ntšamo chë Galacia luaroca ošbuachiyëngcá enefjuanenache chama atše sënjanabuayenacá. ² Cada tmengo, cmontsamna batšá crocénana jaluárana ntšamo chë semaniñe šmojonÿencá, y šmochtsejuabayey; chca atše choye chaijá ora, ndoñe chacmondétsamna quem uajabótama chora crocénana játatbanayana. ³ Y atše choye chaijáshjango ora, Jerusalenoye chjichamuá chë tšëngaftanga mo tšabengcá šmojubuáyana entsanga, chë Jerusalenoca ošbuachiyëngbioye tšëngaftangbe crocénana chámuayentsbuachema, y tsbuanachangá chanjúyentsbuachiye ndayá imojtsamama chënga jábuayenama. ⁴ Y nderado, átsnaca chëngaftaca jama tšabá tojtsemnëse, chënga átšeftaca chamua.

Ntšamo Pablo yojanjuabná chë luarëngoye jama

⁵ Atše sëntsejuabná tšëngaftangbioye jama jautsëtsayama, Macedonia luarëjana chaijachnëngüentsana, chentsa ošbuáchiyënga jaftsanyëse, er atše sëntsejuabná natsana Macedonia luaroye jéftsana. ⁶ Nderado baseftayté tšëngaftangbeñe chašuésejetana, o nderádose nÿets uaftena tempo; as tšëngaftanga inÿe luaroye játama chašmuájabuachama, ndëmoye jama chašojtsemnoye. ⁷ Atše ndoñe quetsátsboše nÿe betscó tšëngaftanga jáftsanyana, er atše sëntsobátmana más bayté tšëngaftangbeñe jaftsemnana, Bëngbe Utabná chca šojalesenciase. ⁸ Pero Efesoca šochanjajétana Pentecostés fiesta chaojobuáchëntscuana. ⁹ Er Bëngbe Bëtsá tojama atše jobenayama muentše chë tsabe noticiëngama banga jábuayenama, y chíyeca banga Crístbeñe montsošbuaché; pero bángnaca atšbe contra montsemna.

¹⁰ Timoteo tšëngaftangbioye chaojase, yejuana šmochtsantješna cha tondayama chaondëtsauatjama, tšëngaftangbeñe tojtsemnëntscuana, er cha Bëngbe Utabnabiamama endëtrabája, ntšamo atše sëndamcá. ¹¹ Chcasna, ndocná chábioye chabondëtsáboyënja. Bëtscá šmochjama cha natjëmbana átsbioye chauatábama, er atše cha sëntsobátmana, chë inÿenga muentše Crístbeñe ošbuáchiyëngaftaca.

¹² Y Jesucrístbeyeca bëngbe catšata Apólosna, atše bëtscá cha sënjaimpadá, chë Jesucrístbeyeca catšátanga tšëngaftanga jányama mochjángaftaca chaotsama, pero cha ndoñe chenátsbošena choye mora jama. Cha choye caochjá, chaojobená ora ca.

Pablo chënga jtadióšoftanama

¹³ Sempre šmochtsenocuedana chë Bëngbe Utabná ndoñe chašmondëtseservenama tojtsama soyëngama. Nÿets tempo, Crístbeñe y chabe soyënguífñaca šmochtsošbuáchiye. Ainaniñe puerte añemo šmochtsebomna, y bëtscá šmochtsama Bëngbe Bëtsabe obenánaca. ¹⁴ Y nÿetsca soyënga ntšamo chašmojtsamcá, bonshanánaca šmochtsama.

¹⁵ Jesucrístbeyeca atšbe catšátanga, tšëngaftanga šmondétatsëmbo, Estéfnas y chabe pamíllanga chë natsanënga monjamnama Jesucrístbeñe jtsošbuáchiyama, Acaya luaroca, y bëtscá imojtsentšena Bëngbe Utabnabiamama jtsetrabájayana, chabe entsanga jtsëjabuáchanëse. ¹⁶ Atše cbaimpadá, tšëngaftanga lempe šmochtsama ntšamo cmojtsamëndacá, chca entsanga mo tšëngaftangbe uanatsanëngcá, y ntšamo nÿetsca chë inÿenga mo bëngcá quemuiñe uajabuáchanëse trabájayënga cmojtsamëndacá.

¹⁷ Atše tša oyejuayá sëntsemna tšëngaftangbe pueblentsana Estéfnas, Fortunato y Acaico moye tmojáshjajnama, er atše sëntsobena oyejuayá chëngaftaca jtsemnana, tšëngaftangaftaca choca jtsemnana cabá ndoñe sëntsobenëntscuana. ¹⁸ Er chënga átsbioye

tmonjabo y tšëngaftangbiama šmonjauyana, y chca chënga tmonjama, atše y tšëngaftanga natjëmbana ainánaca chamotsomñama. Chënga šmochtsëtabna mo puerte uámana entšangcá.

¹⁹ Asia luaroca ošbuachiyëngcá enefjuanënga cmontsacheuaná. Aquila y Prisca y chatbe yebnentše mondbétsenefjuana ošbuáchiyënga cmontsacheuaná, Bëngbe Utabnábeñe ošbuachiyëngcá, tšëngaftangcá bétsemnayeca. ²⁰ Muentša ošbuáchiyënga nÿetscanga cmontsacheuaná. Nÿetscanga šmochjenchuaye mo Jesucristbeyeca catšatangcá, jtenámochëse, ntšamo cach tšëngaftangbe pamíllanga puerte bonshanánaca šmondbetsacheuanaycá.

²¹ Quem palabrënga tšëngaftanga jacheuayama cach atšbe cucuátšeca sëntsabiarná.

²² Nderado nda Bëngbe Utabnábioye ndoñe tbontsebobonshana, Bëngbe Bëtsá nÿetsca tescama chabocastigá. ¡Bëngbe Utabná cachiñe cochjésabo!

²³ Atše, Bëngbe Bëtsá sëntseimpadana, Bëngbe Utabná Jesús chaoma tšëngaftangbeñe tšabe bendicionënga chaotsemnana. ²⁴ Atše, nÿetsca tšëngaftanga cbondábabuanÿeshana, canÿa mo tšëngaftangcá, Cristo Jesúseftaca cánÿiñe mo canÿacá jtsemnëse.

2 Corintios

Jacheuayama

¹ Atše Pablo, Jesucristbe canye ichmoná, Bëngbe Bëtsá atše chca jtsemnama yojánbošeyeca, Jesucristbeyeca bëngbe catsata Timotéoftaca quem tsbuanácha sentsabiamná, Corinto puebloca Bëngbe Bëtsábeñe ošbuachiyëngcá enefjuanëngbiamana, y nyets Acaya luarentše Bëngbe Bëtsabe nyetsca entšangbiámna. ² Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tsëngaftangbeñe tsabe bendicionënga chaotsemnama y ainaniñe tsabe ebionana chašmotsebonnama.

Ntšamo Pablo tojansufri

³ Bënga mochtsatschuanaye Bëngbe Bëtsá, chë Bëngbe Utabná Jesucristbe Taitá, bëngbe Taitá, chë bëngbiamana lastemado yomná, y ndaye padecena soyënguiñe tmojtsemna ora, bënga šondbetsañemuayá. ⁴ Cha bënga jtsañémuayana padecena soyënguiñe tmojtsemna ora, chca, bënga chamotsobenama chë tmojtseufrinënga jañémuayama, ntšamo Bëngbe Bëtsá šojujabuachcá chënga jujabuáchëse. ⁵ Er ntšamo Cristo tojansufri, bënga tša fsëndësufrina chabiamana oservëniñe; cachcá, Cristbeyécnaca Bëngbe Bëtsá jamana bënga puerte añemo ainaniñe fchaitsebonnama. ⁶ Er bënga tmojtseufrinëse, jtsemnana bënga jobenayama tsëngaftanga jañémuayama chë šmojtseufrina ora, y atsebácanënga chašmotsebonnama, Bëngbe Bëtsabe soyëngama jouenëse. Chë padecena soyënguiñe tmojtsemna ora Bëngbe Bëtsá šojañemose, jtsemnana bënga fchayobenama tsëngaftanga jañémuayama, padecena soyënguiñe šmojtsemna ora. Chca, bënga jobenayana tsëngaftanga jujabuáchana, Bëngbe Bëtsábeñe chašmotsobátmanama, chábeñe jtsošbuáchiyëse, y lempe jtsóboyayama, ntšamo bënga fsënjasufri, šmojtseufrina ora. ⁷ Bënga sempre fsëndobátmana y tsabá fsëndëtatšëmbo chë padecena soyënguentšana tsabá šmochjábocanama, er bënga fsëndëtatšëmbo, chë ntšamo bënga fsënjasufri, tsëngaftanga šmojasufri; y cachcá, Bëngbe Bëtsá yochjama tsëngaftanga ainaniñe puerte añemo chašmotsebonnama, ntšamo bënga fchaitsebonnama cha tojamcá.

⁸ Jesucristbeyeca atšbe catsátanga, bënga fsëntseboše tsëngaftanga chašmotsetátšëmbo ntšamo bënga Asia luaroca tša fsënjasufrinana. Bënga puerte padecena soyënguiñe fsënjaneyana, nya ndoñe más jauantacá, chentsana vídaca jabocanama ntjatobatmancá. ⁹ Bënga šontsanënanana mo jóbana cuaftsamncá. Pero chë soye tonjanoservé, bënga jtsošbuáchiyama Bëngbe Bëtsábeñe, nda inétsama obanënga chámuatayenama, y ndoñe cabëngbeñe ntsošbuáchiyana. ¹⁰ Cha šojatsebacá bënga jóbana puerte resjo enjamnentsana, y cachcá šochjätsebacaye bëngbiamana cachiñe cachcá tša resjuiñe chamojtsemna ora. Bënga puerte chábeñe fsëndobátmana, puerte padecena soyënguiñe bënga chamojtsemna ora, cha cachiñe šochjätsebacama. ¹¹ Tsëngaftángnaca cmontsamna bënga jujabuáchana, bëngbiamana Bëngbe Bëtsá jaimpádase; chca, ba entšanga Bëngbe Bëtsá mochanjëtschuaye, er cha tojama bënga chábensana tsabe bendicionënga fchayóyëngacñama, cha jamëse ntšamo chënga bëngbiamana tmojanimpadacá.

Ndayeca Pablo Corinto puebloye ndoñe tonjana

¹² Canye soye endmëna ndayá oyejuayënga šojtsabiamná: bënga bëngbe ainanentsa juabnéngaca jtsetatšëmbuana puerte tsabá jtsamëse fstsienyana ca, ntšamo chë Bëngbe Bëtsabe entšanga endbetsamncá, nyetsca quem luarentša entšangbeñe, y más tsëngaftangbeñe, y bënga jtsetatšëmbuana ntšamo tsabá tifjamcá nyets ainánaca tifjamama. Bënga tondaye chibiatsma quem luarentša entšangbe osertanánaca, ndayá Bëngbe Bëtsá tša tsabia bëngaftaca bëtsemnayeca, šojújabuache chca chamotsienyana. ¹³ Er ntšamo fsëntsabiamnamna ndoñe queftsátsboše, ntšamo tsëngaftanga

šmojtsalía y cmojtsësertánentšana inÿetšá játayanana, y sentsobátmana puerte tšabá lempe chacmósertama. ¹⁴ Mora ndayá atše stsamama ndoñe lempe quecmátësertana. Pero atše sëntseboše tšëngaftanga chama corente chacmósertama; chca, Bëngbe Utabná quem luaroye chaojésabo ora, tšëngaftanga bëngbiama oyejuayënga chašmotsemnama, ntšamo bëngnaca tšëngaftangbiama oyejuayënga fchantsemncá.

¹⁵ Chca ndegombre yomnama atše sëndëtatšëmboyeca, atše sënjanjuabná tšëngaftangbioye jshétsana jánÿama, y chca, chë tšabe soye tšëngaftangbiama uta soye jamana, tšëngaftangbioye uta soye jánÿëse. ¹⁶ Atše sënjanjuabná tšëngaftanga jshaftsanÿana, Macedonioye ayiñe chëjana matijánachnëngo ora; y chentsana, ya camoye ataboye ora, tšëngaftanga cachiñe jáftsanÿana. Chca, tšëngaftanga mašmënjanobená atše juajabuáchana Judea luaroye játama. ¹⁷ Atše chca jamama tsjanjuabná ora, ¿chca tijanma ndoñe corente tšabá ntjenojuaboycá? ¿Tšëngaftanga šmatjájuaoye, ntšamo nÿe quem luarama enójuabnaye entšanga monduamancá, cachora canÿe soyama “aiñe” y “ndoñe ca” jayanëse, atše ndayánaca jamama snëtsejuabnaye ca?

¹⁸ Canÿe soye ndegombre endmëna: Bëngbe Bëtsá sempre endbama ntšamo tojayancá, y chca puerte ndegombre endmënayeca, atše ndayánaca chjama ca stjayana ora, chca ndoñe questsbatayana chentsana atšbe juabna jatstrócama, mo canÿa cachora canÿe soyama “aiñe” y “ndoñe ca” cuafjatichamcá. ¹⁹ Er Cristo Jesús, Bëngbe Bëtsabe Uaquiñá, ndabiama Silvano, Timoteo y atše tšëngaftangbeñe fsënjanabuayiyiná, ndoñe ntsejuabnayana canÿe soye jamama y chentsana jatsjuabnayana inÿetšá jatsmama, mo canÿe entšá cachora canÿe soyama “aiñe” y “ndoñe ca” cuafjatichamcá, ndayá chana nÿets tempo ntšamo tojtsejuabnacá jayanana y jamana ntšamo ndegombre yomncá, chentsana ntjatstrocyacá. ²⁰ Er ndayá cha tojamiñe, lempe ntšamo Bëngbe Bëtsá tojašebuachenacá jocúmpliana, mo chë lempe ntšamo Bëngbe Bëtsá tojašebuachenama cha “aiñe ca” cuafstsichamcá. Chíyeca, Bëngbe Bëtsá bënga tmojtsatschuaná ora, Cristo Jesúsbeyeca bënga jayanana “chca chaotsemna ca”. ²¹ Pero Bëngbe Bëtsá endmëna nda inétsama bënga y tšëngaftanga puerte Crístbeñe chamotsošbuáchema, cháftaca cánÿiñe mo canÿacá jtsemnëse; y Bëngbe Bëtsánaca endmëna nda bënga šojabacacá chabe entšanga chamotsemnama. ²² Cha tojama chë Uámana Espíritu bëngbe ainaniñe cháumashënguama jtsemándayama, y chë soye jtsinÿanÿayana bënga Bëngbe Bëtsabe entšanga imomnama. Y bëngbe ainaniñe chë Espíritu imobómnyeca, bënga corente jtsetatšëmbuana bënga mochjóyëngacñama lempe ntšamo Bëngbe Bëtsá bënga jatšatayama šojašebuachenacá.

²³ Bëngbe Bëtsá entsonÿá atše ndegombre stsihámuama. Atše Corinto puebløye cabá ndoñe chiyjá, er atše ndoñe quetsátsboše tšëngaftanga jašëchnana, chë bacna soyënga šmojamama, tchojaucácanëse. ²⁴ Bënga ndoñe queftsátsboše tšëngaftanga jamëndana ndayiñe cmojtsamna jtsošbuáchiyana; er tša šmojtsošbuachéyeca, ndoñe quešmochatajbaná Crístbeñe jtsošbuáchiyana. Bëngbe fsëntseboše ndayá tšëngaftanga jujabuáchana, corente oyejuayënga chašmotsemnama.

2

¹ Chíyeca atše ndoñe chiyjá jautsëtsayama, er atše sënjanjuabó y sënjanéniyana choye ndoñe jama ca, bacna soyënga šmojtsanmama jábuayenama, y chca, ngmënënga játabiamana, ntšamo chanÿe sënjamcá. ² Tšëngaftanga ngmënaca chašmotsemnama atše stjamëse, ¿nda yochjama atše oyejuayá chaitsemnama, sinó nÿe tšëngaftanga, chë atše ngmënënga tijábiamënga? ³ Chíyeca tcbonjanëbuábiamana chë ntšamo šmojualiacá, chca, atše choye stjáshjango ora, tšëngaftanga átšbioye ndoñe ngmená chašmondëbemama. Chca játamamna, tšëngaftangbiama más tšabá endmëna oyejuayá atše chašmobema. Atše tšabá sënjántatšëmbo ndayá átšbioye oyejuayá šojabemcá, tšëngaftangnaca chca mašmënjánbošena y oyejuayënga chë soye matcmënjánabiama. Chíyeca atše ndoñe chiyataná, nÿetscanga oyejuayënga jtsemnama ndoñe quenjatopodena ora.

⁴ Pero chë tsbuanácha tcbonjanëbuábiamama ora, atše corente šonjanongmé y ainana šonjántsetšena chca jabuache soyënga tšëngaftanga jubuábiamama, y chca jamama shëchbuíynaca sënjanoperdé. Pero atše ndoñe checbátanëbuabiama atše jatsmama tšëngaftanga puerte ngménaca chašmotsemnama, ndayá chašmotsetatšëmbuama atše tša cbababuánÿeshanama.

Perdón chë bacna soye amabiama

⁵ Y mora, chë tšëngaftangbeñe puerte ngménana chaotsemnama tojama boyabásabiamna, cha átšbioye ndoñe ngmená chešnátšbema, ntsachetšá tšëngaftanga tcmojabiamná, ínÿengbioye ínÿengbiamna más. Chca sentsichamo, er atše ndoñe quetsátsboše jayanama ntsachetšá tojamama cha más bacna soye tojama ca. ⁶ Banga tšëngaftanguentšënga ntšamo šmojamná, chë entšabiamama ya bëtš castigo entsemna. Nÿe nÿetšá ponto. ⁷ Chamna, ndayá mora cmojtsamna jamamna entsemna, cha jtseperdónana y jañémuana, chca, ndocna tšabe soye jamama ndobená ndoñe chaondëtsemnama, chë castiguama puerte ngménaca bëtsemna causa. ⁸ Chíyeca, tšëngaftanga cbaimpadá cachiñe tšabá chašminÿinÿé chábioye corente šmobobonshánama. ⁹ Tempo ya chama tcbonjanëbuábiamama, atše jinÿama tšëngaftanga aíñe o ndoñe šmontsanprontánama, lempe ntšamo tcbonjanamëndacá jamama. ¹⁰ Chcasna, ndánaca ndayánaca tšëngaftanga chašmojaperdoná ora, átšnaca cha chantseperdóna. Y atše cha chantseperdóna, ndayá japerdónama ndegombre tojtsemnëse. Y chca chanjama tšëngaftangbe tšabiamama y Cristbe delante. ¹¹ Atše tšëngaftangná, quem entšábioye šcoperdoná chë bëngbiamama tojama bacna soye; chca, Satanás ndoñe chaondobenama bënga jáingñama, er bënga mondëtatsëmbo cha inëtseboše ndaye bacna soye entšá chaotsamama.

Ndáyeca Pablo ndoñe natjëmbana Troas pueblaca tontsanoquedañe

¹² Atše Troas pueblaca sënjánashjango ora, Cristbe tšabe noticiënga jábuayenama, atše sënjáninÿe Bëngbe Utabná tojanma chentše banga chë buayenana soye chamouenama y chëngbe ainaniñe chana chamóyëngacñama. ¹³ Masque chca enjamna, atše ndoñe quetstétsobena natjëmbana ainana jtsebomnana, er atše sënjanjuabná Jesucristbeyeca bëngbe catsata Tito chentše jinÿenana, pero ndoñe chca. Chíyeca, Troas pueblentša entšanga sëntanadiošoftaná, y Macedonia luaroye sënjána.

Crísoftaca cánÿiñe mo canÿacá jtsemnëse, bënga mo ayëñjanayëngcá jtsemnana

¹⁴ Atše Bëngbe Bëtšábioye sëndbëtsatschuanaye, bënga bacna soyënga jamama juabnënga cha tojanëyëñjanama, tempo šojanamënda juabnënga; y chë mora bënga Crísoftaca cánÿiñe mo canÿacá jtsemnëse, nÿets tempo cha šnetsënachayama, mo canÿe ayëñjanayacá, y chë nÿets luarenache entšanga Cristbiamama soyënga chamotsábuatmama bëngaftaca cha yojtšamama, mo nda canÿe botamana uanguëtše soye nÿets luarënguenache chauáshanama cuaftsamná. ¹⁵ Er chë incienso tojtsejuínÿinÿana ora, entšábioye tšabá juanguëtšenana; cachcá Cristbe tšabe noticiënga fstsabuayiyná ora, Bëngbe Bëtšabiamama bënga jtsemnana chë ndëmuanÿënga tmojtšama cha oyejuayá chaotsemnama. Incienso tcojtsejuinÿná ora, nÿetscángbioye juanguëtšenana. Cachcá, Bëngbe Bëtšabe palabra fstsoyebuambná ora nÿetscanga jouenana, Cristo yojtšatsebacanga y chë pochocánënga jtsemnana imojtsajnëngnaca. ¹⁶ Chë pochocánënga jtsemnana imojtsajnëngna, pochocánënga mochanjábocana, er ntšamo bënga fsëndabuayiynacá y tmojouencá chënga tmojtšaboté; y chca, chëngbiamama chë tšabe noticiënga jtsemnana mo canÿe obanabe uanguëtšancá. Pero chë Cristo yochjátsebacangna, tšabe noticiënga tmojóyëngacñeyeca, mochanjobenaye tšabe vida nÿets tempo jtsebomnana; y chca, chëngbiamama chë tšabe noticiënga jtsemnana mo canÿe puerte botamana uanguëtšancá. Y asna, ¿nda obenana yojtsebomna chë tšabe noticiënga jábuayenama trabajo jtšamama?

17 Bënga chë tšabe noticiënga ndoñe queftsatabuayiyná, ntšamo ba entsanga imojt-samcá, mo nýe batšá uámana soyënga cuaftsemncá, y ndayánaca juácanama, mo nda ndaye nduámana soyënga cuaftsencá. Banga chca mondama; bënga ndoñe. Bënga, Crísoftaca cánýiñe mo canýacá jtsemnëse, fsëndabuayiyná mo Bëngbe Bëtsabe delante cuaftsemnëngcá, ndegombre nýe ntšamo tšabá yomncá nýets ainánaca jtsebošëse, y mo Bëngbe Bëtsabe ichmonëngcá.

3

Chë Bëngbe Bëtsabe tsëm tratama buayenana soye

1 Chca bëngbiana fstsjayana ora, tsëngaftanga cmojtsinýana ¿bënga cachiñe tiftëtontsé cabënga bëtsétsanga enobiamnayana? ¿O bënga šojtsamna, mo inýengcá, tsëngaftanga juyentšbuáchiyana o juátjañana tsbuanachangá, bënga tšabá fstsamama chëchangaca jinýanýiyama? 2 Bënga bëngbe ainaniñe puerte tšabá fsëndétatsëmbo, nýetsca entsanga, ntšamo tsëngaftanga jtsamëse šmoyencá tmojinýe ora, tsëngaftanga jtsinýanýayana bënga ndegombre ntšamo tšabá yomncá fstsamama. Chca, tsëngaftanga jtsemnana mo canýe tsbuanachacá, nýetscanga jtsabuatomana y jtsobenana jualána, bënga tšabá fstsamama. 3 Nýetscanga tšabá mondétatsëmbo Cristo tojanma tsëngaftanga chábeñe chašmotsošbuáchema, y bëngaftaca cha chca tojanmámncá. Chca, tsëngaftanga šmondmëna mo Cristbe canýe tsbuanachacá, ndayécha quem luarentša entsángbioye tojuyentšbuaché bëngaftaca. Tsëngaftanga ndoñe chešmatanobená Crístbeñe ošbuáchiyënga jtsemnana entsangbe trabájoca, er Crístbeñe šmonjanošbuaché chë Bëngbe Bëtsá Ainabe Espíritbeyeca; y chca, tsëngaftanga šmondmëna mo canýe tsbuanácha cháftaca uabemanëchacá, y ndoñe mo entsángbeyeca uabemana tsbuanachacá. Bëngbe Bëtsá chë mandënga ndëtšbé tablëbenguiñe tojanábema, entsanga chamotsobedecënana, pero tsëngaftangna Cristbe buayenana soye tsëngaftangbe ainaniñe šmojóyëngacñe.

4 Crístbeyeca Bëngbe Bëtsábeñe jtsošbuáchiyëse, bënga corente fsëndétatsëmbo chca ndegombre bëtsemnana. 5 Ndoñe quenátsmëna, nýe bënga cánýënga quem trabajo jamama ftsobena y játayanana bëngbe soye chë trabajo yojtsemna ca, er bënga jtsobenana chca jamama, nýe Bëngbe Bëtsabe ujabuáchenanaca; 6 er cha tojama bënga fchayobenama quem trabajo jamama, chë entsanga jábuayenana Bëngbe Bëtsá chabe entsángbioye tojanašebuachená soyëngama, ndayá Cristo tojanma sóyeca, mo canýe tsëm tratcá, Bëngbe Bëtsá y chabe entsángaftaca. Quem soye ndoñe quenátsmëna mo chë Bëngbe Bëtsá tempo Israeloca entsángbioye léyeca tojanašebuachená soyëngcá. Inýetsá; entsanga mondama Bëngbe Bëtsabe tsëm trato, Uámana Espíritbeyeca. Chë natsana trato, chë uabemana ley, ntšamo chiñe iuabemancá ndoñe tconjama causa, entsá jóbanama jtsemnana; pero Cristbe tšabe noticiënga, chë tsëm trato, entsanga ainaniñe tmojóyëngacñe ora, chë Uámana Espíritu jamana, chë nýetsca tescama yomna tšabe vida chënga chamotsebom-nama.

7 Quem Moisesbe ley, chë ndoñe tmonjobedecema entsanga jóbanama jtsam-nana, ndëtšbé tablëbenguiñe letrëngaca tmojanábema, y Bëngbe Bëtsá Moisésbioye tbojanantšabuaché ora, cha tša buashinýinýaniñe tojánabo. Chë causa entsanga ndoñe imontsobena ni mo jinýana Moisesbe jubiá, er tša ibojtsanjuebëbuashinýinýana, Bëngbe Bëtsáftaca tbojánencuententsana tojtano ora. Pero betscó tojanëjbana chë jubiá chca buashinýinýanana. Chë ley, chë natsana trato, Bëngbe Bëtsá tojanayentšbuaché ora, tša buashinýinýanánaca cha tojanmëse; 8 ndegombre, más bën y uámana tempo entsemna chë Bëngbe Bëtsá bënga šojanašebuachená tsëm soyënga yojtsama ora, chë Uámana Espíritu bëngbe ainaniñe cháuamashënguama Bëngbe Bëtsá tojama ora. 9 Bëngbe Bëtsá chë ley tojanayentšbuaché ora, chë ndáyeca entsanga jóbanama yojánamna, ntšamo chiñe betsayancá ndoñe tmonjama causa, chora cha chca tojanma puerte chabe buashinýinýanana jinýanýiyëse; ndegombre más bën y uámana tempo entsemna chë

mocna ora Bëngbe Bëtsá yojtsama entsanga chabe bominyiñe tsábenga chamotsemnana. ¹⁰ Er chë Bëngbe Bëtsá ley tojanayentsbuaché ora tojaninyañé buashinyinñanana, mora jtsinyñana mo ya tondaye cuabndëtsemncá, chë Bëngbe Bëtsá entsangbiamana tsëm soyënga tojtsamama tcojtsonyá ora, chë tsa buashinyinñanana yojtsemna ora. ¹¹ Er chë leyama tempo, chë ya jochñënguama tempo entsemna ora, Bëngbe Bëtsá chabe buashinyinñanana y uámanana tojinñanyëse; ndegombre chë Bëngbe Bëtsá tsëm soyënga entsangbiamana jamama ora, chë ndocna te yochanjochñëngo tempo ora, Bëngbe Bëtsá más chabe buashinyinñanana y uámanana echántsinyñanyaye.

¹² Y chca, Bëngbe Bëtsá chca bëts soyënga yochjamama fsëndobatománayeca, bënga fsëntsobena jóyebuambayama, nyetsca soyëngama jayanëse, tondayama ntjatauajcá. ¹³ Y chca, bënga ndoñe Moiescá queftsátama, chë chabe jubiá chaobuashinyinñanama Bëngbe Bëtsá tojanma ora, canýe entsëjuaca yojtsenamochëcjua; cha chca tojanma, chë Israeloca entsanga ndoñe chamondobená jinñama chë jubiá buashinyinñanana ya yojtsëchnëjuana ora. ¹⁴ Pero Bëngbe Bëtsá tojanma chënga ndoñe chaondósertama ntšamo Moiesbiajana cha tojanayancá. Y cabá quem tempo, ntšamo Bëngbe Bëtsá Moiesbioye tbojanšbuachenacá chëngbiamana jamama, Israeloca entsanga tmojtsalía ora, ndoñe ntsësertánana Bëngbe Bëtsabe ndegombre soyënga, mo chëngbiamana iytëmena soyënga cuaftsemncá, mo chë Moisés yojtsenamochëcjua entsëjuacá. Y chca endmëna, er nýe Crísoftaca cánýiñe mo canýacá jtsemnëse, chënga jtsobenana chë soyëngama jósertana, y iytëmencá ya ndoñe ntsemnana. ¹⁵ Y mëntscoñama, Moiesbe librëšangá chënga tmojtsalía ora, ndoñe ntsësertánana Bëngbe Bëtsabe ndegombre soyëngama, ntšamo chiñe tojtsayancá jamama ndoñe montseboše causa. ¹⁶ Pero canýe entsá chë Bëngbe Utabnabe benache tojishache ora, cha jtsobenana chë soyëngama josértana. ¹⁷ Y Bëngbe Utabná y Espíritu canýa bondmëna, y Bëngbe Bëtsabe Espíritu tojtsemnentše, chë bacna soyënga jamama juabñënga, ni chë ley ndoñe ntsemándayana. ¹⁸ Moisés chabe jubiañe Bëngbe Bëtsabe buashinyinñanana y uámanana tojaninyañé, y chíyeca, canýe entsëjuaca yojtsenamochëcjua, chca, chënga ndoñe chamondinñama. Pero bënga ošbuáchiyënga nyetscanga jtsinyñanyayana Bëngbe Utabnabe buashinyinñanana y uámanana, mo canýe espejo canýe soye tojtsinyñanacá, y ndoñe queftsátboše ntšámnaca jamëse chë soye jatsëytamianana. Cha bëngaftaca yojtsama cada te más chë ntšamo cha yomncá bënga chamotsemnana, cada te más bëtsëtsanga chë ntšamo cha yomncá jtsemnëse. Chca endmëna ntšamo Bëngbe Utabná yojtsama; y Bëngbe Utabná y Espíritu canýa bondmëna.

4

¹ Y chca, Bëngbe Bëtsá bëngbiamana lastemado yómnyayeca, quem trabajo šojabanýe, jtsabuayiyayama chë Crísoftaca tojašebuachená soyënga; y chíyeca bënga ndocna te ntjájbana ana ainaniñe añemo bomnana. ² Bënga fsëntsaboté chë ínýenga iytëmencá inmëtsama soyënga, chë ínýenga tmojinýe ora chama jtsëuatjana, y chë ínýenga entsanga jáingñama inmëtsama soyëngnaca, y Bëngbe Bëtsabe buayenana soye ndoñe queftsastroca ndoñe ndegombre soyëngaca. Chamna, bënga sempre nýe chë ntšamo ndegombre yomncá fsëndbëtsoyebuambnaye, mo Bëngbe Bëtsabe delante cuaftsemnëngcá jtsamëse; y chca, bënga fsëndbëtsama cada entsabe ainanentša juabñënga chamuayanama, bënga ndegombre soyënga fstsoyebuambná ca. ³ Y nderado bënga chë tsabe notiçiënga fstsabuayiyá ora, báseftanga chë soyënga chaósertama ndoñe tontsopodënëse, nýe chë pochocánënga jtsemnana tmojtsajnëngbiamana chca jtsemnana. ⁴ Chëngbiamana, chë Crístbeñe ndošbuáchiyëngbiamna, chë quem luarentše mora mandayá, Satanás, tojama chë buayenana soye ndoñe chaondëtsësertánama; chca, chënga ndoñe chamondinñama chë tsabe notiçiënguentsana puerte bëts y tsabe soyënga, chë Cristo puerte bëtsá y obená yomnana ínñanyñaye soyënga, nda nyetsca soyënguiñe Bëngbe Bëtsacá yomna. ⁵ Bënga ndoñe nýe cabëngbe soyama queftsatabuayiyá, ndayá Jesucristbiamana

mo Bëngbe Utabnacá. Bënga bëngbiana fsëndbáyana mo oservenëngcá fstsmëna ca, tsëngaftanga jujabuáchama; y chca fsëndbétsama Jesús jasérviana. ⁶ Er Bëngbe Bëtsá, nda quem luare jobojátsama ora tojanmandá binýniñe ibetentsana chaóboconama, chánaca tojama bënga ainaniñe tsabá chabe soyëngama chašotsësertánama, chca bënga fchayobená juabuátmanana chë Bëngbe Bëtsabe uámanana y obenanentsana inétsobocana osertánana, ndayá Cristbeñe bënga mondonýá.

Bënga fsëndoyena Crístbeñe jtsošbuáchiyëse

⁷ Pero chë puerte tsabe y bëts soye, chë Cristbe buayenana soye, bënga mondbomna cuerpiñe, bëngbe ainaniñe; y chë cuerpënga jtsemnana nýe mo matbajëngcá, ndoñe yapa obenana ntsebomnana, chca, jinýanýiyama tša bëts obenana Bëngbe Bëtsábiocana yóbocanama, y ndoñe bëngbentsana. ⁸ Y chca, bënga nýetsca padecena soyënguiñe vida fsëndbomna, pero ndoñe queftsátsmëna ndobenënga chë padecena soyënguentšana tsabá jabocanama; ndoñe queftsátstatsëmbo ndayá jamama šojtsamna, pero ndoñe queftsátsmëna ntsoencá jtsoátmanama quem padecena soyënguentšana tsabá jabocanama. ⁹ Inýenga montsama bënga puerte fchaisufrima, pero Bëngbe Bëtsá ndoñe nýe cachcá šontsabashejuana; mo nda ínýabioye cuafjutsencá tmojtsentsjaná ora, ya jóbama jtseprontánana, uayayënga bënga jtsebáyama imojtsejuabnangbe cucuatšiniñe fsëntsemna, pero cabá ndoñe ntjobáyana. ¹⁰ Inýenga sempre jtmana bënga bëngbe cuerpiñe puerte fchaisufrima, y jobanámna resjo jtsemnana, ntšamo Jesúsftaca tmojanmcá, cha chaosufrima y chaóbanama. Chca bëngaftaca endopasana, chca, ínýenga chamobená jinýama Jesús bëngbeñe vida yobomnana. ¹¹ Er bënga vida fchabomnëntscuana, sempre puerte resjo bëngbiana jëftsemnana jóbana, Jesúsbioye servena causa; y chca endmëna, ínýenga chamobená jinýama Jesús vida yobomnana bëngbe cuerpiñe, chë canýe te yochjopochóca cuerpo. ¹² Y chca, bënga tša fsëndësufrina y jobanámna resjo endmëna; y tsëngaftanga tsabe noticiënga šmojóyëngacñayeca, Bëngbe Bëtsá tojama chë nýetsca tescama yomna tsabe vida chašmotsebomnana.

¹³ Bëngbe Bëtsabe uabemana palabrënguiñe endayana: “Atse sëntsanosbuaché y chíyeca sënjanoyebuambá ca.” Bënga cachca ošbuáchiyana fsëndbomna chë chca tojanayanacá, y chíyeca bëngnaca Bëngbe Bëtsabeñe fsëntsošbuaché y chabiana fsëntsoyebuambná. ¹⁴ Er bënga fsëndétatsëmbo, Bëngbe Bëtsá, nda tojanma Bëngbe Utabná Jesús cháuatayenama, chánaca yochjama bënga Crístoftaca cánýiñe mo canýacá jtsemnëse, bënga chámuatayenama, y tsëngaftangaftaca cánýiñe cha yochtsemnoye šochjúshejango. ¹⁵ Lempe ntšamo bënga fstsama y fstsésufrincá tsëngaftangbe tsabiama endmëna; chca, más becá entsanga chábeñe chamojtsošbuaché ora, ba tsabe bendicionënga Bëngbe Bëtsá entsangbiana jtsemëse, más becá entsángnaca chábioye chamotsatschuaná, ndayá chëngbiana cha yochjamama; y lempe chca, Bëngbe Bëtsá puerte uamaná y obená yomnana nýetsca entsanga chamotsichámuama.

¹⁶ Chíyeca bënga ndoñe ntjájbanana ainaniñe añemo bomnana. Masque quem luarentša bëngbe cuerpo cada te jtsoPOCHÓCAYANA, Bëngbe Bëtsá jamana chë bëngbentsana nýets tempo vida yochtsebomna soye, cada te más obenana chaotsebomnana; y chca, bënga jtsemnana mo tsmëna entsangcá. ¹⁷ Ntšamo bënga mora fsëndësufrencá endmëna nýe quem luarentše vida tmojtsebomnëntscuana, y chca, chë soye jtsemnana mo canýe nduámana soycá; pero ntšamo bënga fsëndësufrencá josérviana bënga jtsebomnana chë Bëngbe Bëtsá šochjatsataye puerte bëts uámanana y obenana, cháftaca nýets tempo vida jtsebomnana, chë ndayá yomna nýetsca soyëngama más bëts y uamana soye. ¹⁸ Er bënga nýe chë tojtsopodena jinýama soyënguiñe ndoñe nýets tempo queftsatsjuabná, ndayá chë ndoñe yondopodena jinýama soyënguiñe; er chë bënga imobena jinýama soyënga ndoñe nýetsca tescama ntsemnana; pero chë bënga ndoñe mondobena jinýama soyënga cocayé nýetsca tescama jtsemnana.

5

¹ Bënga mora mondbomna canye cuerpo quem luarentse vida jtsebomnama. Quem cuerpo yomna mo chë jtsatsjacama yopodena yebncá, cánÿentse ndoñe nÿets tempo ntjëftsemnana. Bënga mondétatsëmbo, quem cuerpo canye te tojtsopochocase, Bëngbe Bëtsá yochjama bënga tsmëma cuerpënga chamotsatsbomnama, celoca nÿetsca tescama vida jtsebomnama, Bëngbe Bëtsabe pormana cuerpënga y ndoñe entsangbe pormana cuerpënga. ² Chiyeca, bënga quem luarentse chca vida tmojtsebomnëntscuana, yapa tmojtseufrina causa, bënga tša jtsebošana betesco Bëngbe Bëtsá celoye chašúyambama, y bënga nÿets tempo celoca jtsiyenama tsëm cuerpo jtsebomnama cha chaomama; ³ chca, Cristo yochjésabo ora, bënga chë tsëm cuerpoca chamotsemnana, y ndoñe nÿe espíritu ndocna cuerpoca. ⁴ Bënga quem cuerpiñe, chë quem luarentse vida jtsebomnama cuerpiñe chamojtsiyenëntscuana, yapa padecena soyënguifne sufrina causa, bënga jabuache mochanjáshachna; chca echántsemna ndoñe nÿe chë espíritu ndocna cuerpoca jtsemnana bënga imojtsebóseyeca, ndayá masna, bënga chë tsëm cuerpo chamotsebomnama Bëngbe Bëtsá chaomama imojtsebóseyeca. Bënga fsëntseboše chë bëngbeñe jopochócama yomna soye Bëngbe Bëtsá lempe chaotrocama, chca, bënga chamotsobenama celoca nÿetsca tescama vida jtsebomnama. ⁵ Y Bëngbe Bëtsá endmëna nda tojama bënga chamotseprontánama chë tsëm cuerpo jtsebomnama, y nda tojama Espiritu bëngbe ainaniñe cháuamashënguama, chca bëngbioye jinÿanÿiyama, bënga ndegombre mochjóyëngacñe ndayá Bëngbe Bëtsá tojašebuachenacá.

⁶ Y chca, bënga sempre ainaniñe bëts añemo fchandbétsebomna. Bënga fsëndétatsëmbo, quem cuerpiñe cabá vida bënga mochjëftsebomnëntscuana, bënga ndoñe mochántsemna Bëngbe Utabná yojtsemnentse. ⁷ Er mora bënga fsëndoyena jtsamëse, ntšamo Crístbeñe bënga imošbuachecá, y ndoñe nÿe ndayá jinÿama tmojtsobenama. ⁸ Bëngbe fsëntsemna ainaniñe bëts añémoca, y más fsëntseboše jájbanana quem cuerpiñe vida jtsebomnana, jama Bëngbe Utabnáftaca nÿetsca tescama vida jtsebomnama. ⁹ Chiyeca bënga bëtscá fsëndëntšena Bëngbe Utabná sempre oyejuayá jabemama, masque bënga quem luarentse quem cuerpoca tmojtsiyena, o ya ndoñe. ¹⁰ Er nÿetscanga šontsamna jashjanguana Cristbe puestoca tribunalentse, cada ona ntšamo yomerecencá chaóyëngacñama, ntšamo tšabá o ndoñe tšabá quem luarentse chabe cuerpiñe vida yojjëftsebomnëntscuana tojëftsemcá.

Jábuayenama ntšamo Bëngbe Bëtsá inama entsanga tempcá tšabá cháftaca chamot-satsmënama

¹¹ Chcasna, Bëngbe Utabná nÿetscangbiana chë más bëtsá yomnama jtsejuabnayëse, bënga bëtscá fsëndama entsanga jáyënjanama, bënga tšabá fstsamama chamotsejuabnama. Pero Bëngbe Bëtsá ya endétatsëmbo ntšamo bënga ftsmënama, y atše sëntsobátmana tšëngaftángnaca chca tšabá chašmotsetáttsëmbo, tšëngaftangbe ainanentša juabnëngaca, chë bëngbiana aíñe ca cmojtsëtsëtsná juabnënga. ¹² Bënga ndoñe cachiñe cabëngbiana queftsatoyebuambná; chca fsëntsichamo ndayá tšëngaftanga oyejuayënga bëngbiana chašmotsemnana, chca, tšëngaftanga jojuama chašmobenama, chë uamana soyënga tmojtsebiamnángbioye ndayá entsanga canye entsábeñe tmojtsonÿacá y ndoñe chca chë entsabe ainaniñe tomna soyëngaca. ¹³ Er bënga mo chë ndoñe corente juabna ndbomnëngcá fstsamëse, ntšamo báseftanga mondbetsichamcá, jtsemnana Bëngbe Bëtsá jaserviama; y bënga corente juabna bomnëngcá fstsamëse, jtsemnana tšëngaftangbe tšabiana. ¹⁴ Bënga chca fsëndmëna, Cristo šondábabuanÿeshanayeca, y chë soye endama bënga nÿe cha fchaitseservénama, er bënga fsëndenojuabná y puerte tšabá fsëndétatsëmbo, canÿa, Cristo, nÿetscangbiana tojanóbanama; y cha nÿetscangbiana tojanóbanayeca, endmëna mo cha tojanóbana ora, nÿetscanga cháftaca cuafjobancá. ¹⁵ Y Cristo nÿetscangbiana tojanóbana, chë quem luarentse vida bomnënga ndoñe más nÿe

cachëngbiana chamondëtsiyenama, sinó chabiana, nda chëngbiana tojanóbana y tojtanayena. ¹⁶ Chíyeca, bënga ya ndoñe ndocnabiana queftsatsjuabná ntšamo entšanga quem luarentše jtsejuabnayama monduamancá; masque ndegombre bënga chca Cristbiana fsënjanjuabná, mora ya ndoñe chca chabiana queftsatsjuabná. ¹⁷ Chcasna, nderado nda Crístoftaca cánýiñe mo canýacá tojtsemna, Bëngbe Bëtsá tojama cha mo canýe tsëm entšacá chaotsemnana. Ntšamo chë Crístbioye cabá nduabuátmana ora cha yojamncá, mora ya ndoñe quenátsmëna. Morna cha jtsejuabnayana y jtsamana inýe soyënga y tsëm soyënga.

¹⁸ Bëngbe Bëtsá endmëna nda chca inétsama, entšanga mo tsëm entšangcá jábiamama; y cha Crístoftaca tojama bënga tempcá tšabá cháftaca chamotsatsmënana. Y cha bënga canýe trabajo šonjanabanýé, bënga entšanga jábuayenama, Bëngbe Bëtsá inétsama entšanga tempcá tšabá cháftaca chamotsatsmënana, y entšanga jujabuáchama chca chamotsemnana. ¹⁹ O mëntšá, Cristo tojanma sóyeca Bëngbe Bëtsá yojtsama entšanga chamotsobenama tempcá tšabá cháftaca jtsatsmënana, y chca, chënga chamotsobena chëngbe bacna soyëngama perdonánënga jtsemnana, y chë soyëngama nyëtsca tescama castigánënga jtsemnana ndoñe chaondëtsamnana. Y bënga šonjanabanýé chë trabajo, entšanga jtsabuayiynayama ntšamo Bëngbe Bëtsá inama entšanga tempcá tšabá cháftaca chamotsatsmënana. ²⁰ Y chca, bënga jtsemnana Cristbe cuenta oyebuambnayënga y amënga, mo cach Bëngbe Bëtsá bëngaftaca cmojtsaimpadancá. Cristbe cuenta cbaimpadá, bëtscá šmochtsentsëna Bëngbe Bëtsáftaca tempcá tšabá jtsatsmënana. ²¹ Cristo ndocna bacna soye tonjanma, pero bëngbe bacna soyënga jabuajuánamna, Bëngbe Bëtsá cháftaca tojanma mo cha canýe bacna soyënga amá cuaftsemncá, chca, bënga Crístoftaca cánýiñe mo canýacá jtsemnëse, Bëngbe Bëtsabe bominýiñe tšábënga jtsemnana chamotsobenama.

6

¹ Chcáyeca, bënga Bëngbe Bëtsáftaca cánýiñe trabájayënga quetsomñecana, cbontsaimpadana ndoñe nyë bonamente chašmondóyëngacñe chë Bëngbe Bëtsá yojtsama soyënga, tšëngaftangbiana tšabe juabna jtsebomnëse. ² Er Bëngbe Bëtsá chabe uabemana palabrënguiñe mëntšá tojánayana:

Chë tšabe soye jamama tšabá šonjaninýana ora, atše tcbonjanoyeuná;

chë ácbioye jatsbocama te, tcbonjanájabuache ca.

Smochjinýe. Mora entsemna chë mocna ora Bëngbe Bëtsá tšabá ibojtsinýana tšabe soye jamama; mora entsemna chë mocna ora Bëngbe Bëtsá yojtseboše aca jatsbocama.

³ Bënga ndocna bacna soye queftsátama, ndayá chaoma entšanga chë tšabe noticiënga chamotsábotema, chca, ndocná podesca chaondëtsóyebuambnana bëngbe trabajuama, Cristbiana. ⁴ Inýetšá, bëngna nyëtsca soyënguiñe fsënjaniiyena mo Bëngbe Bëtsabe oservenëngcá; Bëngbe Bëtsábeñe obatmancá puerte uantadënga jtsemnëse, fstsésufrina ora; puerte padecena soyënguiñe bëtsemna causa, ndayá jamama ndoñe fsëntsetatšëmbo ora; y ainaniñe puerte ngmënaca fstsemna ora; ⁵ ínýënga šojtsatsetšená ora; cárceloye šojautame ora; entšanga bëngbe contra tmojtsenbouénana ora; jabuache trabájayiñe puerte uamëntšnayënga fstsemna ora; bayté ntsamanacá fstsemna ora; y jasama tondaye fsëntsebomna ora. ⁶ Bëngnaca fsëntsinýanýná Bëngbe Bëtsabe oservenënga fstmënana, puerte tšabe vídaca, ndocna bacna soye ntjamcá jtsiyenëse; Bëngbe Bëtsabe soyëngama corente jtsetatšëmbëse; ínýënga ntšamo šojáborlaye ora puerte uantadënga jtsemnëse; ínýëngbioye puerte bonshanánaca jtsënýayëse; Uámana Espiritu bëngbe ainaniñe jtsebomnëse; y ndegombre nyëts ainánaca nyëtsçanga jtsababuánýeshanëse; ⁷ ntšamo Bëngbe Bëtsabiana ndegombre yomncá jtsabuayiynayëse; Bëngbe Bëtsabe obenánaca ba soyënga jtsamëse; y mo chë soldadëngcá, uayayënga jáyëñanama y

chëngbiana jenëuyanama soyënga jtsebomnana, chë Satanásbioye jayënjanama y chabiama jenëuyanama ndayá Bëngbe Bëtsá sojatsatacá jtsebomnëse; y Bëngbe Bëtsá chca tojama, er cha tojama bënga chabe bominyiñe tšábenga chamotsemnana. ⁸ Bënga fsëntsinÿanÿná Bëngbe Bëtsabe oservénënga fstsmënana, ínÿënga bëngbiana tšabe soyënga tmojtsejuabná ora y bënga nduámanënga jtsemnana chënga tmojtsama ora; ínÿënga tšabe soyënga bëngbiana tmojtsoyebuambná ora y chënga bëngbiana podesca tmojt-sichamo ora; bënga áingñayënga fstsmëna ca báseftanga tmojtsejuabná ora, pero bënga ntšamo ndegombre yomncá jtsóyebuambnayëse. ⁹ Mo nduamanëngcá bënga entsángbeñe jtsënÿayana, pero banga corente tšabá bënga šondéubuatma; bëngbiana sempre resjo endmëna jóbanama, pero šmochjinÿe, bënga sempre vídaca chentšana jatóbocañana; bënga juatsjínÿama jobenayama, Bëngbe Bëtsábeyeca castigánënga fchandbésemna, pero nÿa jóbanana ndoñe. ¹⁰ Masque ngmënënga fstsemna, ainaniñe sempre oyejuayënga fchandbétsomñe; masque ndbomnëjemëngcá, pero fchandbétsama banga Bëngbe Bëtsábiocana bëtscá chamotsebomnana; quem luarentša soyënga tondaye queftsátsbomna, pero Bëngbe Bëtsabe entsanga quetsomñecana, ndegombre lempe fsëndëtsóbomñe.

¹¹ Tsëngaftangbiana, Corintoca entsanga, lempe fsënjayana, tondaye ntjaitëmcá; nÿets ainánaca, corente cbondábabuanÿeshana. ¹² Bënga puerte cbondábabuanÿeshana, pero tsëngaftangna ndoñe yapa quešcátatabuanÿeshana. ¹³ Atše cbontsaimpadana, mo canÿe taitá chabe básënga cuaftsaimpadancá, atše puerte chašmotsebobonshánama, er atše corente cbondábabuanÿeshana.

Bënga mondmëna mo Bëngbe Bëtsabe bëts yebncá

¹⁴ Crístbeñe ndošbuáchiyëngaftaca ndoñe šmatjenutaná ndayánaca jamama, er chca, chëngaftaca šmatjábocana mo chë jaárama uacnata ndoñe cachënchechata tbontsemncá. Ndegombre, chë tšabe soyënga amá y Bëngbe Bëtsabe bominyiñe tšabia mëná, nÿa tondayama cachcá ntsejuabnayana, chë Bëngbe Bëtsá tojamandacá ndoñe tontsamacá y bacna soyënga amacá. Ndegombre, chë entsangbe juabna binÿnayáftaca vida bomná, nÿa tondaye ntsebomnana chë nÿe mo ibetiñcá juabnayáftaca. ¹⁵ Cristo y Satanás, Belial cánaca uabainá, ndocna te tondayama cachcá ntsejuabnayana; y cachcá copasana, Crístbeñe ošbuachiyá y chábeñe ndošbuachiyáftaca. ¹⁶ Ndocna soyiñe cachcá ntsemnana, Bëngbe Bëtsabe bëts yebna, chë nÿe canÿe Bëngbe Bëtsábioye jadórama yebna, y chë entsangbe pormana soyënga, mo diosënga cuaftsemncá jtsadoránana soyënga; chca endmëna, er bënga, nÿetscanga cánÿiñe Jesucrístbeñe ošbuachiyëngcá, mondmëna mo Bëngbe Bëtsá Ainabe bëts yebncá, ntšamo Bëngbe Bëtsá chabe uabemana palabrënguiñe chabe entsangbiana tojanayancá:

Chëngbeñe vida chántsebomna y chëngbenache chántšana;

atše chëngbe Bëtsá chántsemna

y chëngna atšbe entsanga ca.

¹⁷ Chiyeca mëntsánaca Bëngbe Utabná chabe entsanga tojanëyana:

“Chë bacna soye amëngbentšana šmochjësebocana, y chëngbentšana šmochtsojuánañe; tondaye šmattsebana, ni šmattsama ndayá Bëngbe Bëtsabe entsangbiana ndoñe tšabá tontsemncá.

As cbochanjúbuaja,

¹⁸ y chántsemna mo canÿe taitacá tsëngaftangbiana,

y tsëngaftangna mo atšbe uaquiñënga y bembangcá.

Chca sentsichamo atše, tsëngaftangbe Utabná, nÿets obenana bomná ca” —chiñe enduábemana.

7

¹ Chcasna, atšbe bonshánënga, chca endmëna ntšamo Bëngbe Bëtsá šojašebuachenacá. Chíyeca šontsamna, Bëngbe Bëtsabe delante nyetsca soyënguiñe tšábenga jtsemnana, bëngbe cuerpama o espíritu biama bacna soye ndoñe más ntsamcá; y Bëngbe Bëtsá nyetscangbiama más uamaná yomna ca mondëjuabnáyeca, lempe ntšamo tmojobenacá mochtsiyena mo chabe entsangcá, nyetsca soyënguiñe puerte tšábenga jtsemnëse.

Ntšamo chë Corintoca entsanga juabna tmojantrócá

² Bëngbiama šmochtsenójuabnaye tšëngaftangbe ainaniñe puerte bonshanánaca. Bënga ndocnabiama bacna soye chibiatsma, ndocnabiama chibiatsma más bacna entsá chaotsemnana, y ndocnábioye chibiatsingñé. ³ Atše chca ndoñe quetsátichamo, ndoñe tšabá šmonjama ca tšëngaftangbiama jayanama, er ntšamo ya tcbonjauyancá, atše tšëngaftangbiama sempre ainaniñe puerte bonshanánaca sëndbëtsenojuabnaye; y chca, mo átšeftaca canyiñcá šmochántsemna, masque chayóbana o cabá vida chaitsóbomñëse. ⁴ Atše puerte tšabá sëndëtatšëmbo, ntšamo tšabá yomncá šmochtsamama; y tšëngaftangbiama puerte oyejuayá sëntsemna. Lempe ntšamo tsësufriñcá tsiyenama, atšbe ainaniñe bëts añemo sëndëtsóbomñe y corente sëntsoyejuá.

⁵ Macedonia luaroye fsënjánashajna orscana, ndoñe luare queftsátsbomna jóchnama, sinó nyetsca soyënguiñe fsëndëpadecena: chë bëngbe buayenana soyama contra tmojtsemnëngaftaca jabuachana enatsëtsnayëse, y bëngbe ainaniñe jtsauatjëse. ⁶ Pero Bëngbe Bëtsá, chë yapa añemo ndbomnëngbioye endbetsañemuayá, tojanma bënga ainaniñe más añemo fchaitsebomnana, Tito moye tonjánashjango ora. ⁷ Y cha tonjánabo ora, bënga ndoñe más añemo quefstëtsebomna nye cha tojánashjanguama, sinó tšëngaftanga šmojanájabuachama y ainaniñe añemo chaotsebomnana šmojanmama. Cha šonjanëyana tšëngaftanga tša šmojánboše bënga jányama ca, y šonjanacuntá ntšamo tšëngaftanga ngmënacá šmojamna, atšbiama ndoñe tšabá šmonjanma causa, y ntšamo tšëngaftangbiama atšbe tšabiana puerte iuámanana; y quem chabe noticiëngaca, cabá más sëntsoyejuá.

⁸ Er masque tšëngaftanga tša ngmënacá šmojamna chë tcbonjanëbuábiamama tsbuanáchama, mora ndoñe quetsatsjuabná más tšabá yojamna chca ndoñe jatëbuabiamana ca; masque tempo atše chca sënjanjuabná, er atše sëntsetatsëmbo chë tsbuanácha básefta tescama ngmëñënga tcmojánabiama, ⁹ mora atše puerte oyejuayá sëntsemna, ndoñe tšëngaftanga ngmëñënga šmojamnana, ndayá chë šmojánbomna ngmëñana tojanmama tšëngaftanga chašmuenójuaboma ndoñe tšabá šmontsamama, y chca amana chašmotsajbanama, tšëngaftangbe juabñënga jatrócase. Chca enjamna, er tšëngaftanga ngmëñana šmojánbomna ntšamo Bëngbe Bëtsá inabošcá; chíyeca, bënga ndocna bacna soye tšëngaftangbiama chibiatsma. ¹⁰ Ntšamo Bëngbe Bëtsá tojtsebošcá ngmëñana bomnentsana, jóbocnana chë bacna soyënga tcojamama jenójuaboyana y juabñënga jatrócana; y juabna jatrócana entsábioye juanatsana atsbočaná chaotsemnana, y cha ndocna te ntjatsjuabnayana más tšabá yojamna ndoñe chca ntjatstrócana ca. Pero ntšamo chë nye quem luarama enójuabnaye entsanga mondbetsebomncá ngmëñana bomnentsana, ndoñe ntjóbcnana juabna jatrócana; chentsana jóbocnana nye nyetsca tescama castiganá jtsemnana, mo nyetsca tescama cuafjobancá. ¹¹ Smochjinýe ndayá tojóbcna, ntšamo Bëngbe Bëtsá inabošcá ngmëñana bomnentsana: tojanma chë šmojanma soyiñe puerte chašmuenójuaboma; y ntšamo jájandmanana bëtscá chašmonguanguama; tojanma tšëngaftanga chacmetonama chë bacna soye tojanmáftaca; y castigánënga jtsemnana jtsauatjámna. Chentsana, tšëngaftanga tša šmojtsanboše atše jinýama; y šmojtsanprontana lempe jamama chca bacna soye ndoñe más chaondëtsemnana y chca tojanmábioye jacastígama. Nyetsca chë soyënguiñe tšëngaftanga šmonjinýanjé chca bacna soye ndoñe šmonjanmama; y chca, mora tondaye quenátsmëna tšëngaftanga castigo jtsebomnana chacmotsamnana.

¹² Y chca, atše chë tsbuanácha tcbonjanëbuábiamá ora, ndoñe checbátanëbuabiamá chë puerte bacna soye tojanmábeyeca, ni chë bacna soye tojanoyëngacñábeyeca; ndayá tsëngaftanga, mo Bëngbe Bëtsabe delante cuaftsemnëngcá, chë šmojanma soyiñe bëtscá chašmuenójuaboma, y chca, cha chašminyanýé tsëngaftanga bëngbe tsabiamá puerte šmenójuabnama. ¹³ Chíyeca bënga más añemo ainaniñe fsëntsebmna.

Pero ntsachetšá añemo fstsobmnama, masna puerte oyejuayënga fsëntsemna, er bënga fsënjinye Tito tša oyejuayá, er chabe ainaniñe lempe natjëmbana yojtsemna nyëtsca tsëngaftangbiama. ¹⁴ Tito tsëngaftanga jányama cabá nda ora, atše cha sënjanianyana tsëngaftanga šmochjanóyeunaye chë atše tcbonjanëbuaja palabra ca; y tsëngaftanga ndoñe chešmatsma atše chaitsëuatjama chca tijánayanama. Inyëtšá, lempe ntšamo tchojauyancá ndegombre endmëna; cachcá, ntšamo bënga Títbioye fsënjaniyancá ndegombre entsemna, chë tsëngaftangbiama fstsóyejuama. ¹⁵ Y mora Tito más cmontsababuánýeshana, ntšamo cha tcmojanamëndacá ndayá tsëngaftanga šmojanmama, y ntšamo puerte respétoca y mo uamaná cuaftsemncá chabiamá jtsejuabnayëse šmojanofjama tojtenojuabó ora. ¹⁶ Atše puerte oyejuayá sëntsemna, er atše sëndëtatšëmbo tsëngaftanga ntšamo tsábá yomncá nyëtsca soyënguifne šmochtsamama.

8

Chënga jañëmuayama, inye ošbuachiyëngbioye nyëts ainánaca jujabuáchama

¹ Y mora, Jesucristbeyeca catšátanga, bënga fsëntseboše tsëngaftanga chašmotsetátšëmbo ntšamo Bëngbe Bëtsá bëtscá tsabe bendicionënga tojama Macedonia luarentše ošbuachiyëngcá enefjuanëngbiama. ² Chënga puerte tmojasufrí, y chora chca, chënga tmojinyanýé becá imošbuáchema y tša imoyejuama; y masque puerte ndbomnjëmënga, chënga nyëts ainánaca bëtscá tmojanacaredadó Jerusalenentša ošbuáchiyënga ndbomnjëmëngbiama. ³ Atše sëndëtatšëmbo y sëntsobena jayanama chënga ndegombre tmojatsatá ntšamo tmojobenacá, y ntsachetšá imobenentsana cabá más, chënga chca imobóseyeca. ⁴ Tša šonjánaimpadana chëngbioye jálesenciama ndayánaca jamama, Jerusalenoca ošbuachiyëngbioye jujabuáchama. ⁵ Bënga ftsjanobatmanama cabá más chënga tmonjanma; natsana, chënga Bëngbe Utabná tmojanianyana lempe ntšamo cha tojtsebošcá chënga jamama imojtseboše ca, y chentšana bëngaftácncá cachcá tmonjanma; y lempe enjamna ntšamo Bëngbe Bëtsá inabošcá. ⁶ Ndayá Macedonioca ošbuáchiyënga tmojanmama bënga añemo fsënjanóyëngacñeyeca, bënga Tito fsënjaimpadá chë tsabe trabajo chaopochocama, chë tsëngaftangbeñe crocénana játbanana, Jerusalenoca ošbuáchiyënga jujabuáchama, ndayá cha jamama tojanbojatšecá. ⁷ Y morna, ntšamo tsëngaftanga nyëtsca soyënguifne tša šmomncá —puerte ošbuáchiyënga, becá obenënga Bëngbe Bëtsabe soyëngama jóyebuambayama, puerte osertánënga Bëngbe Bëtsabe soyëngama, corente juabnayënga bëtscá jamama Cristo jaserviama y bëngbioye corente ababuánýeshanënga —cachcá, mórncá bëtscá šmochjama quem trabajuiñe chë ošbuáchiyënga ndbomnjëmëngbiama, tsëngaftangbe bonshánana jtsinyanýayëse.

⁸ Chca ndoñe quechatëtsëtsná mo canýe mandcá; atše sëntseboše ndayá nyë tsëngaftanga jáuyanana ntšamo ínýenga bëtscá tmojatrabajá chë ndbomnjëmëngbiama, tsëngaftángncá cachcá chašmotsamama; y chca, chašminyanýema chë tsëngaftanga šmobomna bonshánana ndegombre bëtsemnama. ⁹ Er tsëngaftanga šmondëtatšëmbo ntšamo Bëngbe Utabná Jesucristo puerte tsabe soyënga bëngbiama tojamama, bëngbioye puerte jtsababuánýeshanëse. Celoca, cha cabá quem luaroye ndabo ora, cha bëtscá inabomna; pero tsëngaftanga ababuánýeshanayeca, mo canýe puerte nduamanacá tojanóbema. Y mora, Cristo mo canýe nduamanacá tojóbemayeca, Bëngbe Bëtsá puerte tsabe soyënga šojatšatá.

¹⁰ Tšëngaftangbe tšabiamama mëntšá cbabuayená, ntšamo quem soyiñe šmochjamama. Chë inye uata tšëngaftanga šmonjanbojatsé, ndoñe nye chë ndbomñejémëngbiama jacjayama, ndayá chca jamama jtsebošámnaca. ¹¹ Morna, chë ndbomñejémëngbiama trabajo šmochjapochóca; chca, ntšamo tšëngaftanga becá šmonjanprontana y jujabuáchama tša šmonjanbošcá, mórncaca cachcá chašmomama chë trabajo japochócama, ntšamo šmojobenacá jacjayese. ¹² Er canye entšá, jatštayama ndegombre tojtsebošese, ndayá cha tojatštacá Bëngbe Bëtsábioye oyejuayá jabemana, ntšamo cha tojtsobencá, y ndoñe ntšamo cha ndoñe tontsobencá.

¹³ Ndoñe quenátsmëna, tšëngaftanga puerte ujabótënga chašmoquedá, ínÿengbioye atšatnaye causa, chënga ndoñe yapa ujabótënga chamondëtsemnana. ¹⁴ Atše sentsichamo ndayá nyetscanga chamotsenajabuachana, chca tojtséjaboto ora ca. Mora, chë bëtscá šmobomñentšana šmontsobena chënga jujabuáchana, ndayá tojtsabuáshebencá jatšatayese; y inye orna, chënga entsamna tšëngaftanga jujabuáchana chë cmojtsabuáshebena soyëngaca. Chca, nyetscanga jóyëngacñana ndayá tojtséjaboto ora. ¹⁵ Ntšamo Bëngbe Bëtsabe uabemana palabrënguiñe endayancá: Chë tša bomnábioye ndoñe chebatanójama; y chë nye batšá bomnábioye, ndoñe quebënjatanbuáshbena ca.

Tito y chabe enutënga

¹⁶ Bëngbe Bëtsá šcuatschuá, tšëngaftanga jtsanÿenama Tito ainaniñe juabnënga chaotsebomnana cha tojanmama, cachcá ntšamo bënga fsëndbomncá. ¹⁷ Er tšëngaftangbioye chaotsama bënga fsënjanimpadá ora, cha oyejuayá aiñe ca tonjánayana choye jama; y chabiamama puerte enduámana tšëngaftangbe tšabiana; chíyeca mora echanjá tšëngaftanga jányama, chca jamama cachá yobóšeyeca.

¹⁸ Títoftaca, canya Jesucristbeyeca bëngbe catšata fsëntsichamná; chabiamama puerte tšabá ošbuachiyëngcá enefjuanëngbenache mondoyebuambná, chabe trabajuama chë tšabe noticiënga abuayiynayama. ¹⁹ Y ndoñe nye chë soye, sinó quem luarentše ošbuachiyëngcá enefjuanënga cha tmonjuábuayana bëngaftaca Jerusalenoye jama, y jujabuáchama chë ndbomñejémëngbiama trabajuiñe; chë trabajo endmëna bonshánana jinÿanÿiyama; chca fsëntsama, Bëngbe Utabná jtsatschuanayama y jinÿanÿiyama bënga chca jujabuáchama tša fstsbošama. ²⁰ Títoftaca cha fsëntsichamná, chca, ndocná chaondëtsichamo bënga ndoñe tšabá tifjama ca, ntšamo játbanama cmojtsamniñe, chë becá juabónana játbanama, ndbomñejémënga jujabuáchama; ²¹ er bënga fsëndama lempe ntšamo fstsobencá, ndoñe nye ntšamo Bëngbe Bëtsabe bominÿiñe tšabá yomncá jamama, ndayá ntšamo entšangbe bominÿiñe tšabá yomncánaca.

²² Chátaftaca inya Jesucristbeyeca bëngbe catšátnaca fsëntsichamná; cha bënga ba soyiñe šonjinÿanÿé cha yojtseboše bëtscá jamama, Cristo jaserviama, y mora más, er cha puerte bëtscá entsejuabná tšëngaftanga puerte tšabá šmochjamama. ²³ Y Titbiamna, cha quem trabajuiñe atšbe enutá endmëna, y atšcá tšëngaftangbiama endëtrabája; y chë inÿata Jesucristbeyeca bëngbe catšatatbiamna, chata bontsemna quemuentša ošbuachiyëngcá enefjuanëngbe ichmónata, chëngbiama chabóyebuambama; y chë bontsama sóyecna, chata Crístbioye corente jtsatschuanayana. ²⁴ Chíyeca, chëngbioca ošbuachiyëngcá enefjuanënga chca chamotsetatšëmbuama, chë ichmona boyabásengbioye šmochjinÿanÿiye tšëngaftanga ndegombre chënga šmojtsababuánÿeshanama, y bënga razón fstsebomnana tšëngaftangbiama oyejuayënga jtsemnana.

9

Chë inye ošbuáchiyëngbiama crocénana játbanama

¹ Chë Jerusalenoca Bëngbe Bëtsabe entšangbiama crocénana játbanamna ndoñe quenátseyta tšëngaftangbioye jatëbuabiamnayama, ² er atše ndegombre sëntsetatšëmo

tšëngaftanga tša šmojtseboše chca jujabuáchama. Macedonioca entsanga puerte oyejuayá sempre sëndbëtsëtsësnaye, Acaya luaroquënga chë inye uatscana quem trabajuiñe jujabuáchama šmoprontánama; y chë jujabuáchama tšëngaftangbe bëtscá juabnënga tmojama banga quem luarentsënga bëtscá añemo chamotsebomnama, chëngnaca chë trabajo jamama. ³ Pero Jesucristbeyeca quem catsátanga sentsichamná, ntšamo bënga oyejuayënga tifjayancá tšëngaftanga chašmotsamama, chë tšëngaftanga quem trabajuiñe bëtscá šmochjama ca; chca, ntšamo tijanayancá ndoñe nye bonamente chaondëtsemnama, y ntšamo sënjanayancá tšëngaftanga chašmotseprontánama; ⁴ er nderado báseftanga Macedonioquënga átseftaca tmojá y choca ndëprontánënga tcmojányëna chë ndbomnëjémëngbiama ujabuáchenanaca, chë soye nanjama bënga fchaitseuatjama, er ba soye fsënjayana bënga ndegombre fstsëtátšëmbo tšëngaftanga prontánënga šmochtsemna ca; y ndegombre, tšëngaftangbiama cabá más ouatjácá nántsemna. ⁵ Chíyeca, tšabá šonjuínynana Jesucristbeyeca quem catsátanga jáimpadana chënga atšbe natsana chamotsama tšëngaftanga jányama, y chacmëjabuachama chë juabónana jätbanama, ndayá tšëngaftanga tempo šmonjanašebuachenacá. Chca, atše choca chajáshjango ora, tšëngaftangbe juabónana chaotseprontana. Chca, tšëngaftanga šmochanjínyanýiye ndbomnëjémëngbiama šmojacjá, chca jamama tša šmobóšeyeca, y ndoñe nye batšatema jatšatayama y tšëngaftangbiama bëtscá jobuájuama šmojtseboše.

⁶ Quemuiñe šmochtsenójuabnaye: Nda nye batšá tojajé, cach batšá chentšana josháchiñana; y nda bëtscá tojajé, cach bëtscá chentšana josháchiñana. ⁷ Cada ona bontsemna jajájuana ntšamo chabe ainaniñe tojajuabocá; ndoñe ngmënacá o nye ínÿënga chca jamama tmojtsemándayeca. Chca chaotsemna, er nda oyejuayá toja-jajóbioye, Bëngbe Bëtscá jtsebobonshánana. ⁸ Bëngbe Bëtscá endobena jamana chábensana nyetsca tšabe bendicionënga y bëtscá soyënga tšëngaftanga chašmotsebomnama; chca, ntšamo nyetsca soyënguiñe cmojtsëjabotcá sempre chašmotsóbomñama, y cabá más bëtscá chašmotsebomnama, nyetsca tšabe obrënguiñe ínÿënga chašmëjabuachama. ⁹ Bëngbe Bëtscabe uabemana palabrenguiñe, mëntšá endayana chë bëtscá tojacjabiamá: Cha nyets ainánaca ndbomnëjémënga bëtscá jatšatayana; y chë tšabe soyënga ntšamo cha tojtsamcá nyets tempo jëftsemnana.

¹⁰ Bëngbe Bëtscá, nda endbama chaotsemna jénaye jájema y sananga jasama, cmochanjátšataye lempe ntšamo cmojtsëjabotcá, y echanjama, tšëngaftanga cabá más tšabe soyënga chašmotsamama. ¹¹ Bëngbe Bëtscá echanjama tšëngaftanga nyetsca tšabe soyënga chašmotsebomnama, chca, tšëngaftanga nyets ainánaca puerte ínÿëngbioye chašmatšatama, y bëngbeyeca, chë mochjóyëngacñënga Bëngbe Bëtscá chamotsatschuanama; ¹² er chë ujabuáchenana Bëngbe Bëtscabe entsanga tcojatsatá ora, ndoñe nye ndayá tojtsëjabotcá jatšatayana, ndayá chënga Bëngbe Bëtscá chamotsatschuanámna jamana. ¹³ Chënga Bëngbe Bëtscá mochántatschuanaye, er chë ujabuáchenanaca chëngbioye jinÿanýiyana, ntšamo Cristbe tšabe notiënguiñe iuayancá tšëngaftanga šmobedecénama, y ntšamo tšëngaftanga tšabá jamëse, nyets ainánaca bëtscá soyënga chënga y nyetscanga šmojátšatama. ¹⁴ Y chënga tša mochántseboše tšëngaftanga jányama y tšëngaftangbiama Bëngbe Bëtscá mochántseimpadana, er cha bëtscá tšabe soyënga tšëngaftangbiama tojama. ¹⁵ ¡Bëngbe Bëtscá šcuatschuá ndayá cha šojátšatama, canÿe puerte uámana soye, ndocná jobenayana tšabá jayanama ntšamo chë soye bëtsemnana!

10

Ntšamo Pablo tojánayana ínÿënga chabe contra imojtsichamo ora

¹ Y mora, atše Pablo, cbochanjáimpada, tšëngaftangbioye puerte bonshanánaca jtsënyayëse, y tšëngaftangbiama tšabá jamama jtseprontánëse, ntšamo cach Cristo endbetsamcá. Báseftanga tšëngaftangbioquënga imojtsichamo atše puerte nduamaná tsnenóbema atše tšëngaftangta stsemna ora, pero corente añemo bomná tsnenóbema

jabuache soyënga jayanama tšëngaftangbentšana bënoca stsemna ora ca. ² Tšëngaftanga cbontsaïmpadana, tšëngaftanga jányama chaijá ora, atše ndoñe chašondëtsemna puerte añemo bomná jtsemnana, jabuache soyënga tšëngaftanga jáuyanama, ndoñe ntšamo atše puerte tšabá sëntsetatšëmbcá ndayá báseftangaftaca jamama šojtsotocana, chë ndëmuanýënga imojtsejuabná, nýe bënga tšabá jtsomñama juabnëngaca bënga fstsiyena ca. ³ Ndegombre bënga quem luarentše fsëndoyena, pero ndoñe queftsátspelia Cristbiana, ntšamo quem luarentša entsanga monduamancá; ⁴ er chë ndaye sóyeca bënga Cristbe soyëngama fsëndépéla, ndoñe quenátsmëna mo chë ndaye sóyeca chë nýe quem luarama enójuabnaye entsanga japéliama monduamancá, ntšamo nýe chënga tšabá jtsomñama juabnënga yomncá. Inýetsá, chë ndaye soyëngaca bënga fsëndépéla, Bëngbe Bëtsá jtsinýanana puerte obenana bomna soyënga yomna ca; y endmëna chë Satanás tojtsemánda soyënga jayënjanama, puerte jabuache soyënga jayënjanama. Mo nda canýe uayayábioye jtsepochochancá, chë Bëngbe Bëtsabe osertánana ndoñe yonduámana ca jinýanýiyama soyënga ichámëngbiama, ⁵ y Bëngbe Bëtsabe osertánana jtsabotema juabnënga bomnëngbiama, bënga fsëndama ntšamo chënga tmojtsichamcá tondaye chaondëtsámanama. Y chë japéliama fsëndbomna soyëngaca, bënga fsëndbétsama chca juabnayana chamotsajbanama, y chamotsobena ntšamo Cristo yomandacá jtsamana. ⁶ Bënga fsëntseprontana chë Cristbiana nduauenanënga jácastigama, lempe ntšamo Cristo cmojtsamëndacá tšëngaftanga chašmojtsama ora.

⁷ Tšëngaftanga ndayánaca jtsonýayana nýe ntšamo tbojtsabinýnecá. Nderado nda becá tojtsejuabná Cristbia yomna ca, cha bontsemna jtsejuabnayana bëngnaca Crísbenga fstsmënama, ntšamo cha yomncá. ⁸ Er atše masque tša sëndbétsoyebuambnaye chë Bëngbe Utabná šojatšatá mandama, chë ndáyeca bënga jamama tšëngaftanga puerte chašmotsošbuáchema y ainaniñe bëts añemo chašmotsebomnama, y ndoñe tšëngaftanga ntjapochócama, chama atše ndoñe quetsátëuatja. ⁹ Atše ndoñe quetsátsoše tšëngaftanga chacmotsinýana, tšëngaftanga jaútatjayama atše stseboše ca, ndayá atšbe tsbuanáchangañe tijuábemama. ¹⁰ Er báseftanga mëntšá atšbiama imojtsichamo: “Chabe tsbuanáchangañe cha šontsamënda bëtscá soyënga jamama, y tša obenacá cha jtsóyebuambnayana; pero cha bëngaftaca tojtsemna ora, cha jtsóyebuambnayana mo canýe ndocna obenana nd-bomnacá, y ntšamo tojtsichamcá tondaye ntsámanana ca.” ¹¹ Chca entsanga entsamna jtsetatšëmbuana, ntšamo bënga fstsichamcá, tsbuanachangá juíchmuase, tšëngaftangaftaca cabá ndoñe fsëntsemna ora, tšëngaftangaftaca fchaitsemna órnaca, bënga chca fchjama.

¹² Ndegombre bënga ndoñe tša añemo queftsátbomna jayanama nýetsá uámanënga fstsmëna ca, mo chë cachënga jtšenábotamnayana uamanëngcá. Chënga jtsejuabnayana y jtsichámuana tšábenga imomna ca, nýe ntšamo cachëngbeñe ínýënga imomnama jtsonýayëse; y chca tmojtsama ora, chënga juabna ndbomnënga jtsemnana. ¹³ Bënga ndoñe yapa quifchatóyebuambaye cabëngbiama, chca, tša tšábenga bënga imomna ca jtšenábotamnayama; fchanjóyebuambaye ndayá chë bënga tifjama tšabe trabajuama, ndayá Bëngbe Bëtsá šojabanýecá, y chíñnaca entsemna ntšamo tšëngaftangbeñe Corintoca tifjamcá. ¹⁴ Chíyeca, bënga ndoñe queftsatoyebuambná chë bënga ndoñe derecho fsëntsebomnama, ntšamo ndegombre nántsemna bënga tempo tšëngaftangaftaca ndoñe mafsënjamnëse; er bënga chë natsanënga fsënjamna tšëngaftangbioye jama, Cristbiana tšabe noticiënga jábuayenama. ¹⁵ Y ndoñe quifchatóyebuambaye tša tšabá bëngbe trabajo yomna ca, chë ndayama ndoñe šontsamna chca jatichámuana, chë trabajo ndoñe bëngbe soye, sinó ínýëngbe soye yómnayeca. Chamna, bënga fsëntsobátmana tšëngaftanga Crístbeñe más chašmotsošbuáchema, y chca chaojtsemna ora, bënga fchayobená ba luariñe entsanga jábuayenana, ntšamo tšëngaftangbeñe fsëntsamcá. ¹⁶ Chca, fsëntsobátmana bënga jobenayama tšabe noticiëngama jábuayenama, chë tšëngaftangbentšana más chcoye imoyena entsángbioye; chca, bënga ndoñe yapa quifchatóyebuambaye ínýëngbe traba-

juama, Cristbe soyënga jábuayenama, mo chë soye bëngbe trabajo cuafjatsmëncá.

¹⁷ Ntšamo Bëngbe Bëtsabe uabemana palabrënguiñe endayancá: “Nda tojtseboše jayanama cha canye uámana entšá yomna ca, más tšabá cha cháuyana Bëngbe Utabná puerte uamaná endmëna ca.” ¹⁸ Er Bëngbe Bëtsá jayanana canye entšá ndegombre tšabá tojama ca, ndoñe nye cachá tojtsenábotamnabiama, ndayá Bëngbe Bëtsá chca ndegombre tojama ca Bëngbe Bëtsá tojtsejuabnabiama.

11

Pablo y chë ndoñe ndegombre ichmónënga

¹ Malaye atše šmëntjëuánta, atše básefta soyënga mo canye opá tojtsoyebuambnacá stsichámëntscuana, cach atše stsenabotamná ora. Masque ntšámnaca šmochtsëuánta.

² Bëngbe Bëtsábeyeca atše tša cbondábabuanyëshana y cbondánjena, tšëngaftanga nye cha chašmotsëstonama y ndoñe ínjenbioye. Er atše Cristo sënjašbuachená tšëngaftanga sempre cha šmochtsëstonama, y sëntseboše, cha quem luaroye yochjésabo ora, chábioye tšëngaftanga júshejanguana, mo nye chábioye sempre ustonëngcá, ntšamo canye taitá chabe bembe ndocna boyabása nduabuatmá nye canye boyabásaftaca chaóbuamama jushjanguancá. ³ Mëtscuaye Evábioye tbojaningñé, y cha tbojanínynana puerte osertanabe soyënga cuaftsatsëtsnacá, pero ndegombre ndoñe chca yonjamna. Atše sentsauatja nderado cachcá ínjennga tšëngaftangftaca muanjama y tšëngaftangbe juabna chašmotrocá, y chca, tšëngaftanga chašmotsajbaná sempre jtsejuabnayana nye Cristo nyetsca soyënguiñe jtseservénama.

⁴ Atše chama sentsauatja, er ndánaca jashjanguana y Jesusbiama tojtsabuayiyná, mo cha inye entšá cuaftsemncá, ndoñe ntšamo bënga Jesusbiama fsëndabuayiynacá, y tojtsama tšëngaftanga chašmobená canye espíritu jtsebomnana, pero ndoñe ntšamo chë Bëngbe Bëtsá tojama tšëngaftangbe ainaniñe cháumashënguama espirítcá, chë Uámana Espíritu, tšëngaftanga tšabá cha jtsëuántana. Y atše sentsauatja, tšëngaftangbe ainaniñe inye buayenana chašmóyëngacñama ndánaca tojtsamama, ndoñe cachcá chë tšabe noticiënga ntšamo ya bëngbentsana šmonjouencá, y chora tšëngaftanga chábioye becá tšabá jtsëuántana. ⁵ Pero atše sëntsejuabná tondayiñe más batšá uamaná tsmëna ca, chë Jesucristbe puerte uámana ichmónënga imomna ca juabnayëngbiama.

⁶ Atše ndoñe sënjuatsjinye ntšamo corente tšabá entšángftaca jóyebuambayama; pero atše puerte tšabá sëndëtatšëmbo ntšamo stsichámuama. Bënga puerte tšabá nyetsca soyënguiñe tšëngaftanga tcbonjanñanyé, ndegombre chca osertánana ftsbomnana.

⁷ ¿O atše ndoñe tšabá sënjama, tšabe noticiënga cbonjanabuayiyná ora, tšëngaftangbentsana atšbiama tondaye ntjotjañcá, nduamanacá jenóbemëse; chca, tšëngaftanga puerte uámanënga chašmotsemnana Bëngbe Bëtsá chaomama? ⁸ Mo ínjenache ošbuachiyëngcá enefjuanënga crocénana cuafjabaquécá, crocénana sënjanóyëngacñe chë ošbuachiyëngbentsana, tšëngaftanga jujabuáchama jobenayama. ⁹ Y tšëngaftangftaca sënjamna ora y ndayánaca šojanájaboto ora, atše ndoñe checbátantjañe atšbe opresidama, chca, tšëngaftangbiama totcá ndoñe chaondëtsemnana; er chë Jesucristbeyeca catšátanga Macedoniocana tmonjánashjajnënga, šmonjanatšetá ntšamo šojanbuashbencá. Chca, atše sënjanma, atšbe causa tšëngaftangbiama totcá ndoñe chaondëtsemnana; y sempre chca chántsama. ¹⁰ Serto, Cristbe ndegombre soyënga atšbe ainaniñe sëntsebomna; chíyeca, atše corente sëntsetatšëmbo ndocná Acaya luarentše yochjama atše chayajbaná puerte oyejuayá jtsóyebuambnayama, chë tšabe noticiënga stsabuayiyná ora; y chca chanjama atšbe opresidama chašmoyema ínjennga ntsamncá. ¹¹ ¿Y ndáyeca chca stsama? ¿Yojtsemna ndoñe cbondábabuanyëshana causa? Ndoñe. Bëngbe Bëtsá endëtatšëmbo tša cbondábabuanyëshana.

¹² Pero atše sempre chántsama ntšamo sëndamcá, chca, chë ínjennga, chë Jesucristbe puerte uámana ichmónënga imomna ca juabnayënga ndoñe chamondëtsebomna ndáyeca jatenábotamnayama, ntšamo bënga ftsamcá chënga imojtsetrabá ca. ¹³ Er chënga ndoñe

quemátsmëna Jesucristbe ndegombre ichmónënga, mondmëna chë ínÿenga jáingñama imotrabájanga, y mondama entšanga chaotsinÿanama chënga mo Jesucristbe ndegombre ichmónënga cuaftsemncá. ¹⁴ Y chama ndoñe šmatjenjaná, er cach Satanásnaca endbëtsama mo canÿe buashinÿinÿana angelcá jtsinÿnama; ¹⁵ chíyeca, ndoñe muatjenjaná, chabe oservenëgnaca tmojtsamama mo tšabe entšangcá jtsinÿnama. Pero chënga mochanjopochóca, ntšamo tmojtsomerecencá, ndayá tmojamama.

Ntšamo Pablo tojansufrí, Cristbe ichmoná bëtsemna causa

¹⁶ Cachiñe cbochtëtëyana: ndocná chaondëtsejuabná atše opá stsemna ca, cach atše stsenabotamná ora; pero chca šmojtsejuabnase, mo canÿe opabioycá šmochtsëuánta, chca, átšnaca jtsenábotamnyama jobenayama. ¹⁷ Chca jayanëse, ndoñe quenátsmëna ntšamo Bëngbe Utabná endbetsamcá, ndayá canÿe opá inetsamcá; atše tšabá jtsetatšëmbëse ndegombre stsebomna ndáyeca jobenayama jtsenábotamnyana. ¹⁸ Banga mondmëna, cachënga jtsenábotamnyana ndayá quem luarentše chënga tmojamama, as átšnaca chantsenábotamnaye. ¹⁹ Tšëngaftanga chë tša osertánënga, oyejuayënga opëngbioye jtsëuantánana. ²⁰ Atše sëndëtatšëmbo tšëngaftanga chë opëngbioye šmnetšëuantánama, er tšëngaftanga šmondëbëtsëuantana chë nÿets tempo tšëngaftanga mo chëngbe oservenëngcá tmojtsamëndayënga, o chë tšëngaftanga bëtscá tmojtsabacanga, o tmojtsaíngñanga, o chë uámanënga tmojtsenobiamnanga tšëngaftanga mo nduamanëngcá jtsamëndayama, o chë tmojtsajuebiantšëyënga.

²¹ Atše chca sëntsichamo masque sëntsëuatja chca jayanama. Bënga fsënjamna corente obenana ndbomnënga, ntšamo tšëngaftanga bëngbiana šmojayancá, tšëngaftangaftaca chca jamama.

Inÿenga, chë tšëngaftangbeñe imotrabájanga, ndayama jtsenábotamnyama tmojtsebomnëse, puerte uámana ichmónënga imomna ca jtsichámëse, átšnaca añemo sëntsebomna chama jtsenábotamnyama; chca stjayana ora, mo canÿe opá tojtsoyebuambnacá sëntsoyebuambná. ²² Chënga jtsenábotamnyana hebreunga imomnama. Atšnaca hebreo sëndmëna. Chënga jtsenábotamnyana Israeloquënga imomnama. Atšnaca Israelocá sëndmëna. Chënga jtsenábotamnyana Abrahámbentšana entšanga imomnama. Atšnaca Abrahámbentšana entšá sëndmëna. ²³ Chënga jtsichámuana Cristo imoservena ca. Atše chëngbiana cabá más tšabe oservená sëndmëna. Chca stjayana ora, mo canÿe opá tojtsoyebuambnacá sëntsoyebuambná. Atše chëngbiana más tijatrabájá, más šmojutame, más šmojatsetšená y ba soye atšbiana resjo endmëna jóbanama. ²⁴ Shachna soye judiënga šmonjantsetšená chë unga bnëtsana y esconëfta soye jasachënjëse, ntšamo chënga jacastígana monduamancá. ²⁵ Unga soye niñëbéngaca šmonjanëtsjanganja, y ndëtšbéngaca canÿe šmonjanatëchënganja. Unga soye chë atše sënjánënjaquena barco tontsanenatjëmbe, y chca ora, canÿe šonjanotocá, chë mar béjayoca tsachocana bënoca canÿe ibeta jëftsebobínÿnana y canÿe te jëftsejétanana. ²⁶ Atše beca sënjánana, y chca atšbiana resjo enjamna bëtš fshajayënguiñe y uacucuatšënga chašmuebiatbëbama; resjo cach atšbe entšángbentše, judiënga y ndoñe judiëngbentše; resjo bëtš pueblënguentše, entšanga ndoyenentše y mar béjayoca. Atšbiámna resjo enjamna chë Jesucristbeyeca atšbiana catšátanga imomna ca jtsichámuana, pero ndegombre chca ndoñe mondmënëngbeñe. ²⁷ Atše bëtscá tijatrabájá empás uamëntšnaya joquédantscuana; ba soye tijachnëngo ibeta ntsamanacá y ba soye tijachnëngo shëntseca y uajuendayá; ba soye ndayá jasama ntsebomncá; tijasufrí sësnama y tondaye entšayama.

²⁸ Quem soyëngama y inÿe ndoñe chiyátayana soyëngama más, atše cada te natjëmbana ainánaca ndoñe queschbatsmëna, er ndoñe quetsátstatsëmbo ntšamo nÿetsca ošbuachiyëngcá enefjuanënga imojtsiyenana. ²⁹ Ndánaca tšabe soye jamama tondaye añemo tontsebomna ora, atše chabiana šochandbóngmia, mo átšnaca cach

tondaye añémoca cuabndëtsemncá. Nderado ínÿenga tmojama ndánaca bacna soyiñe chaótsatsama, atše ndegombre puerte ngménaca chandbétsesufrina. ³⁰ Nderado nÿa tojátsiyta atše ndayama jatenábotamnayama, as chë atše tondaye obenana ndbomná tsmënama ínÿanÿnaye soyëngama chtsenábotamnaye. ³¹ Bëngbe Bëtsá y Bëngbe Utabná Jesucristbe Taitá, ndábioye nÿetscanga nÿetsca tescama jtsatschuanayama entsamna, cha endétatšëmbo atše ndegombre stsichámuama chë sëntsoyebuambná soyënguiñe. ³² Atše Damasco bëts puebloca sënjamna ora, chë rey Aretasbe uabuáyana mandado tojanmandá chë puebloye amashjuaniñe soldadënga chamotsebojanÿama, atše chašmishachama chëjana stsebocana ora; ³³ pero básefta enutënga, canÿe sbarëcuiñe šmontsanëštjango chë pueblentša shëconana tapiëšiñe canÿe atëfjnëjana, y chca atše sënjanobená chëngbe cucuatšëntšana jótsbocana.

12

Ndayá Pablo mo otjenayoquëcá tojáninÿe y ndayá Satanás tojanma, Pablo chaosufrima

¹ Atše šontsemna más jtsenábotamnayana, masque chca tcojamentšana ndocna tšabe soye ntjóbcnana. Mora chanjóyebuambaye, chë mo otjenayoquëcá sënjinÿe Bëngbe Bëtsabe soyëngama y Bëngbe Utabná šojinÿinÿe soyëngama. ² Atše canÿe entšá sënduábuatma, cha Crísoftaca cánÿiñe mo canÿacá endmëna y nda bnëtsana canta uata entsemna, Bëngbe Bëtsá tbojanánatse, chë celoca más tsbanánoye, Bëngbe Bëtsá yomnoye. Atše ndoñe quetsátstatšëmbo Bëngbe Bëtsá cha tbojanánatse chabe cuérpoca o nÿe chabe espiritiñe. ¡Nÿe Bëngbe Bëtsá chama yotátšëmbo! ³⁻⁴ Atše sëndétatšëmbo Bëngbe Bëtsá chë entšábioye celoye tbojanánatsama, nÿetscanga oyejuayënga imomnoye (atše ndoñe quetsátstatšëmbo Bëngbe Bëtsá tbojanánatse chabe cuérpoca o nÿe chabe espiritiñe; nÿe Bëngbe Bëtsá chama yotátšëmbo), y chentše cha tojanuena palabrenga, ndocná bontsemna jayanama palabrenga, chë ndayama entšangbiama ndoñe yontselesenciana jatichámuana. ⁵ Atše chë entšá sëndmëna. Canÿe entšá ndáftaca chca tojopasabiamá, tšabá nántsemna chama jtsenábotamnayana; pero cach atšbiama jtsenábotamnayana ndoñe tšabá ntsemnana, ndayá nÿe chë atše mo obenana ndbomnacá tsmënama ínÿinÿnaye soyëngama chantsenábotamnaye. ⁶ Y nderado jtsenábotamnayama atše stseboše, chca ora atše ndoñe stsama mo canÿe opá tojtsoyebuambnacá, er ntšamo ndegombre yomncá atše stsichamo. Pero chca ndoñe quetsátama, chca, ndocná chaondëtsejuabná ntšamo atšbiama tbojtsinÿanama o ntšamo atšbiama cha tojouenama atše más tsmëna ca. ⁷ Chiyeca, tša uamaná tsjamna ca atše ntjátsjuabnayama, atše chë Bëngbe Bëtsá tša bëts soyënga tbojaninÿinÿe entšá bëtsemnayeca, Bëngbe Bëtsá tojanma atše chaitsebomna ndáyeca puerte chaisufrima, mo canÿe bëts uchmašëfja atšbe cuerpiñe tojtsashacuancá, mo Satanásbe ichmona soycá, atše chaisufrima chaomama. ⁸ Unga soye Bëngbe Utabná sënjaimpadá chca sufrínana chašotsebojuánama; ⁹ pero Bëngbe Utabná šonjauyana: “Nÿe atšbe bonshánana endmëna lempe ntšamo cmojtsajabotcá; nÿetscanga atšbe obenana más tšabá jinÿana, chë obenana ndbomna entšangbeñe atšbe obenana stjínÿanÿiye ora ca.” Chcasna, atše puerte oyejuayá chanjóyebuambaye chë atše mo obenana ndbomnacá tsmënama ínÿinÿnaye soyëngama, Cristbe obenana átšbeñe sempre chaotsomñama. ¹⁰ Chiyeca, Cristo jasérviamá, oyejuayá chandbëtsemna atše mo obenana ndbomnacá stsemna ora, ínÿenga šmojtsoyenguá ora, puerte padecena soyënga causa ndayá jamama ndoñe sëntsetatšëmbo ora, atše puerte chaisufrima ínÿenga tmojtsama ora y puerte tšetšena ainánaca stsemna ora; er chca soyënguiñe stsemna ora, mo canÿa obenana ndbomnacá, chora Bëngbe Bëtsá jamana atše ainaniñe bëts añemo chaitsebomnama.

Nderado ndayá Corintoca ošbuáchiyënga muanjamama Pablo yojánauatja

¹¹ Atše chca chë soyëngama sëntsenabotamná ora sënjoyebuambá mo canÿe opá tojtsoyebuambnacá, pero ndegombre tšëngaftanga šmonjama atše chca chaimama. Er

tšëngaftanga šmondmëna ndëmuanyënga yojtsamna atšbiana puerte tšabá jtsichámuana, atše chca jtsenábotamnayama ndoñe chašondëtsemnama. Ndegombre, atše tondayiñe más batšá uamaná quetsátsmëna, chë Jesucristbe puerte uámana ichmónënga imomna ca juabnayëngbiana, masque atše šontsebiona mo atše tondaye cuaftsamancá. ¹² Canya Jesucristbe ndegombre ichmoná bëtsemnama inyinyñaye soyënga, tšëngaftangbeñe tonjanopasá atše choca sënjamna ora. Chca, chë Bëngbe Bëtsabe obenana inyinyñaye soyënga y chë tšabe soyënga ntšamo chora tonjanopasacá, puerte tšabá jtsinyanñayana atše canye ndegombre ichmoná tsmënama; y atše chca sënjamna, padecena soyënguiñe puerte uantado jtsemnëse. ¹³ ¿Ndayá tšëngaftanga ndoñe cachcá šmonjanóyëngacñe chë inye luarenache ošbuachiyëngcá enefjuanëngbiana? Canye soye aña, er tšëngaftangbioye tondaye ntjotjañcá, atše ndoñe chiyatslesenciá tšëngaftanga atšbe opresidama chašmuájabuachama, ntšamo inye ošbuachiyënga aña sënjalesenciá. Smochtseperdóna chca bacna soye tšëngaftangbiana tijamama.

¹⁴ Atše ya sëntseprontana, móracna unga soyama jama tšëngaftanga jányama, y mora atše cach ndoñe quebochataimpáda atšbe opresidama chašmuatájabuachama. Atše ndoñe quetsátsoše chë tšëngaftanga šmobomna soye jatsbomnana, ndayá puerte sëntseboše tšëngaftanga Cristo sempre chašmotseservënama. Atše chca jamama sëntseboše, er atše tšëngaftangbiana mo canye taitacá, Crístbeñe šmontsanošbuachéyeca, atše chabiana tcbonjanabuayená ora; sëntsejuabná chë taitanga inétsamna crocénana jájuabana básenga jtsanñenama, y ndoñe básenga chë taitangbiana. ¹⁵ Y atše corente oyejuayá lempe ntšamo tsbomncá chanjátšataye, y atše jopochócantscuanënaca, tšëngaftangbe tšabiana. Atše cada te más cbojtsababuánñeshanëse, ¿tšëngaftanga más batšá atše šmochtsebobonshana?

¹⁶ Ndoñe; tšëngaftanga tšabá šmondëtatšëmbo, atše uajabotá sënjamna ora, atše tondaye tcbonjanótjañama. Masque chca, báseftanga imojtsichamo ntšamo ínÿënga ndayíñnaca jáingñama atše tstátšëmbo ca, chëngbentsana crocénana josháchiñama; y atše catijama, ínÿënga jáingñase, nÿe ntšamo atše tsbošcá chamotsamama ca. ¹⁷ ¿O nderado atše tchojaingñé, canya chë tšëngaftangbioye sënjichamó chentsáftaca? ¹⁸ Tito sënjanimpadá tšëngaftanga jányama chaotsama, y cháftaca sënjanichmó chë inya bëngcá Crístbeyeca bëngbe catšata. ¿Nderado Tito tcmojaingñé? ¿Ndoñe ndegombre yondmëna, Tito y atše cachcá fstsjuabná y fstsboše y cachca soyënga jtsamëse ftsiyena? Ndegombre chca endmëna.

¹⁹ Nderado tšëngaftanga šmojatsjuabná bënga jenëuyanama chca cbojtsëtsëtsná ca; pero ndoñe chca quenátsmëna. Inyetsá, bënga Crísoftaca cánÿiñe mo canyáca entšangcá, Bëngbe Bëtsabe delante fsëntsoyebuambná, y lempe ntšamo tijayancá, Jesucristbeyeca atšbe bonshana catšátanga, tšëngaftangbe tšabiana tijayana, Crístbeñe corente chašmotsošbuáchema y ainaniñe bëtš añemo chašmotsebomnama. ²⁰ Er atše sëntsauatja, atše jányama chajjá ora, ndoñe chachbondánñena ntšamo tsbošcá, y tšëngaftanga atše ndoñe chašmondínñena ntšamo šmojtsebošcá. Sëntsauatja nderado bacna soyënga šmattsama: jtsenpenzentserana, ínÿëngaftaca yapa jtsenántšabošana, ndayánaca rábiaca jtsamana, nÿe tšëngaftangbiana tšabe soyënga jtsebomnama jtsebošana, ínÿëngbiana podescá ichámuana, uayátsenayënga jtsemnana, ínÿëngbiana cachënga más uámanënga jtsenobiamnayana, y nÿetscanga ndoñe cachcá ntsejuabnayana. Chca chachojánñenëse, tšëngaftanga ndoñe quešmochátsošena jóyëngacñana ntšamo tšëngaftanga jucácanama atše šochtsemncá. ²¹ Atše sëntsauatja, cachiñe jányama chajjá ora, atšbe Bëtšá chaoma atše chaitsëuatja chca šmojtsamama, y chašotsemna puerte ngmënaca jošachnama ba tšëngaftangbiana, ndëmuanyënga ya bayté bacna soyënga imojtsama y chca juabnayana ndoñe tmonjatrocá, y ndoñe tmonjajbaná chë bacna soyënga boyabása o shembásaftaca jtsamama juabnayana, y chca soyënga jtsamana y nÿetsca bacna soyënga jtsamana, jenomándama ntsobencá.

13

Inye soyengama jábuayenama y jádiosoftama

¹ Móraca ya unga soyama tsëngaftanga jányama chanjá. Atse chajáshjango ora, tojtseytëse chanjayana ntšamo báseftanga tmojamcá tsabá o ndoñe tsabá bëtsemnana. Nda bacna soye ntšamo Moisesbe leyiñe endëmandancá tojama ora, atse chanjayana cha ndoñe tsabá tonjama ca; pero útata o únganga tmojtsemnëse, chënga chamuayanama cha ndegombre chca tojamama. ² Atse tempo sënjanabuayená, chë tsëngaftanguentsënga bacna soye tmojánamënga y chë ínÿenga, atse šojtsanmëna jácastigana, chca soyënga amana ndoñe tmonjábananga. Mora, tsëngaftangbentsana bënoca sëntsemna ora, cachiñe cachcá cbëtëtabuayená, ntšamo sënjanamcá chë tsëngaftangaftaca uta soyama sënjamna ora: atse cachiñe jányama chajase, ndoñe quichatsleséncia bacna soyënga chašmotsamama y chama ntjacastigacá jatabáshejuanana. ³ Atse chca chanjama, er tsëngaftanga šmontsenguá ndayánaca tsabá chacminÿanÿema Cristo atšbiajana yoyebuambnama. Cristo ndoñe quenátsmëna mo canÿa obenana ndbomnacá, ntšamo tsëngaftangaftaca cha tojamama; ndayá chabe bëtš obenana tsëngaftangbeñe bëtscá jtsinÿanÿayana. ⁴ Er cha tmojancrucificá mo canÿa obenana ndbomnacá; pero mora, Bëngbe Bëtšá puerte obená bëtšómñeyeca, cha tojtayena. Cachcá bëngnaca, cháftaca cánÿiñe mo canÿacá jtsemnëse, mo obenana ndbomnëngcá jtsemnana; pero cháftaca mochantsiyena, Bëngbe Bëtšá puerte obená bëtšómñeyeca, tsëngaftanga jtsaservénama.

⁵ Tsëngaftanga cada ona šmochjshénojuaboye, tsabá jtsetatšëmbuama mocna entšanga bëtsemnana, jtsetatšëmbuama aíñe o ndoñe sempre Crístbeñe puerte tašmuetsošbuáchema. Smochjshénojuaboye chca šmošbuáchema ntšamo šmojtsemnama y tsabá ínÿenga šmochjínÿanÿiye. ¿Ndoñe šmondétatšëmbo Jesucristo tsëngaftangbe ainaniñe yoyenama? Ndoñesna, tsëngaftanga ndegombre ndoñe Crístbeñe ošbuáchiyënga šmontsemna. ⁶ Pero atse sëntsobátmana tsëngaftanga ndegombre chašmotsejuabnama bënga Jesucristbe ndegombre ichmónënga ftsmënana. ⁷ Y Bëngbe Bëtšá fsëntseimpadana bacna soye ndoñe chašmondëtsamama, ndoñe chë Jesucristbe ndegombre ichmónënga ftsmënana tsëngaftanga jinÿanÿiyama, ndayá ntšamo tsabá yomncá chašmotsamama. Nÿetscanga chca tmojtsamëse, nántsinÿna mo Crístbe ndegombre ichmónënga bënga ndoñe cuabndmëncá, er chca ndoñe tašuatátëjaboto jinÿanÿiyana ntšamo bënga bëngbe mándoca ftsmënana mo ichmonëngcá, tsëngaftanga jábuayenama. Pero chë soye tondayana šattsentšamna, ⁸ er bënga queftsátobena tondaye jamana Bëngbe Bëtšabe ndegombre soyëngama contra; nÿe ntšamo chabe ndegombre soyënga yomncá aíñe. ⁹ Bënga fsëntseboše ntšamo tsabá yomncá tsëngaftanga chašmotsamama, er bënga oyejuayënga fchandbëtsemna, bënga mo chë obenana ndbomnëngcá fstsemna ora, bëngbe mando jácastigama ntjatinÿanÿaycá, y tsëngaftanga ainaniñe bëtš añémoca šmojtsemna ora y puerte tsabá šmojtsemnománda ora. Bënga Bëngbe Bëtšá fchandbëtseimpadana, chca bacna soyënga amana jtsajbanase, chašmobená jtsemnana nÿetsca soyënguiñe tsábenga, y lempe ntšamo tsëngaftanga chašmotsemnama Bëngbe Bëtšá yobošcá. ¹⁰ Quem tsbuanácha cbontsëbuabiamná tsëngaftangaftaca cabá ndoñe sëntsemna ora; chca, atse choye chajá ora ndoñe chašondëtsemna jabuache jucácanana, mo canÿa puerte mandayacá, ntšamo Bëngbe Utabná šojanbemcá, tsëngaftanga jujabuáchama chábeñe corente chašmotsošbuáchema y ainaniñe bëtš añemo chašmotsebomnama, y ndoñe tsëngaftanga jatapochócama.

¹¹ Morna, Jesucristbeyeca atšbe catšátanga, tsabá chašmotsomñe, šmochtsajbaná chca bacna soyënga amana y šmochtsemna lempe ntšamo Bëngbe Bëtšá yobošcá. Smochjouena ntšamo tcbonjabuayenacá, nÿetscanga cachcá šmochtsejuabnaye, nÿetscángaftaca natjëmbana šmochtsiyena, y Bëngbe Bëtšá, chë cmondababuanÿeshaná y tsëngaftangbe ainaniñe tsabe ebionana chašmotsebomnama endamá, tsëngaftangaftaca

echántsemna. ¹² Njetscanga šmochjenuaye mo Jesucristbeyeca catšatangcá, jtenámochëse, ntšamo cach tšëngaftangbe pamíllanga puerte bonshanánaca šmondetsacheuanaycá. ¹³ Njetsca quem luaroca ošbuáchiyënga cmontsacheuaná.

¹⁴ Atše, Bëngbe Bëtsá sëntseimpadana, Bëngbe Utabná Jesucristo chaoma, njetsca tšëngaftangbeñe tšabe bendicionënga chaotsemnama. Bëngbe Bëtsabe bonshánana sempre chašmotsóbomñe, y Uámana Espíritu sempre chašmotsóbomñe, y chë Uámana Espíritoftaca cányiñe mo canyácá chašmotsomñe.

Gálatas

Pablo Galacia luaroca ošbuáchiyënga jacheuayama

¹⁻² Atše Pablo, quem tsbuanácha sentsabiamná Jesucristbeñe ošbuáchiyëngbiamá, chë Galacia luaroca ošbuachiyëngcá enefjuanëngbiamá. Jesucristo y Bëngbe Bëtsá, chë Taitá, nda tojanma Jesucristo cháuatayenama, chata šmonjanchembo chatbe ichmoná jtsemnama. Ndocna entšá chešnátanabuayana atše Cristbe ichmoná jtsemnama; ni Jesucristo, ni Bëngbe Bëtsá ndocna entšá tbonjanichmó atše chatbe ichmonacá jabuábuayanama. Atše y chë ínÿenga Jesucristbeñe ošbuáchiyënga átšeftaca montsemnënga, tšëngaftanga cbontsacheuaná. ³ Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšabe bendicionënga tšëngaftangbeñe chaotsemnama, y chaboma tšëngaftangbe ainaniñe tšabe ebionana chašmotsebomnama. ⁴ Cristo chabe derecho vida jtsobomñama cachcá tojanonÿá y tojanóbana, bëngbe bacna soyënguentsana játsebacama, y bënga chamotsobena jtsiyenama ndoñe ntšamo quem tempo entšanga imoyencá, puerte bacna soyënga imojsama ora. Cristo tojanóbana ora, tojanma ntšamo Bëngbe Bëtsá, Bëngbe Taitá endmëná yojanbošcá. ⁵ Nÿetscanga nÿetsca tescama Bëngbe Bëtsá chamotsatschuaná. Chca chaotsemna.

Nÿe canÿe ndegombre buayenana soyënga Cristbiamá endmëna

⁶ Atšbe ainanoca inÿetsá šontsebiona, er nda nanjouena, tšëngaftanga nÿe baseftayshinÿe y ya juabna šmojatstrocá y Bëngbe Bëtsá stëtsoye šmojtsequedá, nda tšëngaftanga tcmojáchembo chabe entšanga chašmotsemnama. Cha chca tojanma Crístbeyeca, er mua puerte tšabia tšëngaftangaftaca enjamna. Tšëngaftanga Bëngbe Bëtsá stëtsoye šmojtsequedá, ínÿengbe buayenana soye jouenama, y chë ínÿenga jtsichámuana chë buayenana soyënga chë tšabe noticiënga canmëna ca. ⁷ Ndegombre, ndoñe quenátsmëna inÿe ndegombre buayenánana. Ntšamo entsopasancá mëntšá entsemna: báseftanga montsama tšëngaftanga ndoñe natjëmbana ainánaca chašmotsiyenama, y becá montsama chë Cristbiamá tšabe noticiënguentsë, ba ndegombre soyënga jtsejuánama, inÿe soyënga jacjayama. ⁸ Nderado bënga o canÿe celoca ángel soyënga cmojtsabuayiyná, y ndoñe tontsemna mo chë tšabe noticiënga bënga tempo tcbonjanabuayenacá, as chë chca tojtsamabiamá ¡Bëngbe Bëtsá chaoma infiernoca becá chaosufrima! ⁹ Tempo ya chca sënjánayana; mora cachiñe šcutëtayana: Nderado nda soyënga cmojtsabuayiyná, y ndoñe tontsemna mo chë tšabe noticiënga, ntšamo tempo šmonjanoyëngacñëcá, ¡Bëngbe Bëtsá chabiamá chaoma infiernoca puerte chaosufrima!

¹⁰ Atše chca stjayana ora, ¿tšëngaftanga cmojtsinÿana atše soyënga stsama entšanga oyejuayënga átšeftaca chamotsemnama? Ndoñe chca quenátsmëna. Atše sëndboše ndayá Bëngbe Bëtsá átšeftaca oyejuayá chaotsemnama. Entšanga oyejuayënga chamotsemnama, atše cabá soyënga stsamëse, atše ya ndoñe Cristbe canÿe oservená stsemna.

Ntšamo Bëngbe Bëtsá Páblëbioye tbojanchembo, Jesucristbe ichmoná jtsemnama

¹¹ Atše sëntseboše tšëngaftanga, Jesucristbeyeca atšbe catšátanga, chašmotsetátšëmbo chë tšabe noticiënga ntšamo sëndabuayiynacá quem luarentša entšangbe juabnentšana ndoñe yondóbocanama. ¹² Ndocna entšá chë tšabe noticiënga chešnátanabuayená, ni chešnátanbuatëmbá, ndayá cach Jesucristo šonjaninÿinÿé.

¹³ Tšëngaftanga šmojátatšëmbona ntšamo atše tempo tsjanamana jtsiyenana, ntšamo judiënga Bëngbe Bëtsá mondadorancá atše cha sënjanadorana ora, ntšamo atše becá tsjánamama chë ošbuachiyëngcá enefjuanënga puerte chamosufrima, y ntšamo atše becá tsjánamama ndocná Jesucristbeñe chaondëtsošbuáchema. ¹⁴ Atše inÿe judiënga cach atšcá uata bomnëngbiamá más sënjánama Bëngbe Bëtsá adórayiñe, ntšamo judiënga

cha jadórama monduamancá, y atše nyets añémoca tša sënjantšena jtsamama ntšamo bëngbe bëts taitanga básenga jabuátambama monjanamancá. ¹⁵ Pero Bëngbe Bëtsá atšbe tšabiama yojanjuabná, y chíyeca, atše cabá ndonyna ora, canye bëts soyama cha šojanbocacá. ¹⁶ Y cha tojánbošena ora, šonjaninynyé ntšamo ndegombre chabe Uaquiñá yomnana, y šonjanchembo. Cha chca tojanma, atše chë tšabe noticiënga ndoñe judiëngbeñe chayábuayenama. Y atše ndocnábioye chiyataná ndayá jamama šojtsanmënama chašobuayenama; ¹⁷ y Jerusalemoye cach ndoñe chiyataná chë atšbiama más natsana Jesucristbe ichmónënga imojamnëngaftaca jencuëntama. Chamna, cachora Arabia uabaina luaroye sentsanoñe, y chentšana Damasco bëts puebløye sëntaná.

¹⁸ Jesucristbeñe jtsošbuáchiyama sënjanóntša orscana, unga uatëse Jerusalemoye sënjána Pédroftaca jencuëntama, y cháftaca nye uta semana sënjëftsemna. ¹⁹ Y ndocna chë Jesucristbe inye ichmónënga chiyáisananye; nye Santiago aíñe, Bëngbe Utabnabe catsata. ²⁰ Bëngbe Bëtsá šontsonyá, ntšamo tšëngaftanga cbontsëtsëtsnacá ndegombre bëtsemnama.

²¹ Jerusalemocana sënjëftsanbocnentšana, Siria y Cilicia luarëngoye sënjána. ²² Pero chë tempo, chë Jesucristbeñe ošbuáchiyënga Judea luariñe bominyeca ndoñe quešmënjatanábuatma. ²³ Nye inyëngbioye imojtsayaunana: “Nda tempo bënga puerte chamotsesufrínama enjanamá, mora entšanga entsabuayiyná, Jesucristbeñe jtsošbuáchiyama caojtsamna ca. Y tempo cha tša enjánboše jamama entšanga Jesucristbeñe ndoñe chamondëtsošbuáchema ca” —chënga imojtsichamo. ²⁴ Y entšanga Bëngbe Bëtsá imojtsatschuanaye, ndayá cha atšbiajana tojanmama.

2

Chë inye ichmónënga tmojánayana Pablo aíñe tšabá yojtsama ca

¹ Jerusalemoye sënjána orscana bnëtsana canta uatëse, cachiñe choye sënjesaná. Bernabé šonjantjëmbambá, y Tito bëndátaftaca fsënjëftsanbetše. ² Choye sënjána, choye jama šojanma Bëngbe Bëtsá šonjaninynyéyeca. Atše nye chë Jesucristbeñe ošbuáchiyëngbiamá uámanënga imojamnëngaftaca sënjanencuentá, inyëngaftaca ndoñe; y chë tšabe noticiëngama chë ndoñe judiëngbeñe sëndabuayiynama chënga sënjanacuntá. Chca sënjanma atše jtsetatšëmbuama, ntšamo tijanma y sënjëftsamcá ndoñe nye bonamente yonjanma. ³ Pero chënga tmonjánayana atše aíñe tšabá tijanma ca, y Tito, chë átšeftaca enjamná, masque Grecia luarocá enjamna, chënga ndoñe chematanmandá base bobachtema chë más delicadentše tëtšená chaotsemnama, ntšamo judiënga monduamancá, Bëngbe Bëtsábënga imomnama chaotsinynama. ⁴ Chca tonjanopasá, masque inyënga monjánboše Tito base bobachtema chë más delicadentše tëtšená chaotsemnama. Chënga tmonjánayana bëngcá Jesucristbeñe ošbuáchiyënga imojamna ca, pero ndoñe chca quemënjatsmëna. Chënga chë Jesucristbeñe ošbuáchiyëngaftaca tmojanenutaná, ndayá yojtsanopasánama chë ošbuáchiyënga ntsetatšëmbcá, mo chë ošbuáchiyëngbiamá bacna soyënga jamama cuafseitëmena cuenta. Chënga tmojánabo jtsetatšëmbuama ntšamo Jesucristo bënga atsebácanënga šojánabiamama, chë judiëngbe leyëngaca ndëmandánënga, cháftaca cányiñe mo canyacá jtsemnëse. Chënga chca tmojanma, er chënga imojtsanboše jamana, bënga chë judiëngbe leyëngaca nyets tempo mandánënga chamotsiyenama. ⁵ Pero bënga ndocna ora fchiyátanayana aíñe ca chë ntšamo chënga monjánichamo bënga šojánamna jamama soyëngama, er bënga becá fsënjánboše tšëngaftanga nyets tempo Jesucristbe ndegombre tšabe noticiënga chašmotsóbomñama.

⁶ Pero chë ndëmuanyëngbiamá entšanga monjánichamo chë uánatsanënga imojamna ca (ndayá chënga tempo imojamna atšbiama ndoñe quenatámana; Bëngbe Bëtsabiamá nyetscanga cachcá monduámana), chëngna tondaye chešmatanbuayená, ntšamo tempo tijanmama inyetsá chaimama. ⁷ Masha, chënga tmonjántatšëmbona, Bëngbe Bëtsá chë tšabe noticiënga ndoñe judiënga jábuayenama trabajo atše jamama šojanëntšabuáchema,

ntšamo judiënga jábuayenama cachcá Pédrëbioye tbojanëntšabuachecá. ⁸ Er Bëngbe Bëtsá atše chabe ichmoná šonjábema, ndoñe judiënga chabiamá jábuayenama, ntšamo cachá Pédrëbioye chabe ichmoná tbojanbemcá, judiënga chabiamá jábuayenama.

⁹ Santiago, Pedro y Juan, chë ošbuachiyënguentsá uánatsanënga, atše canye bëts trabajo chaitsebomnama Bëngbe Bëtsá tojanmama tmonjántatsëmbona ora, cucuatše šontanatsataye atše y Bernabëbioye, jinÿinÿiyama chënga šojanëbuajama mo cachëngbe trabajo amatcá. Y fsënjanenoyeuná bëndata jama, masna ndoñe judiënga jtsabuayiyayama trabajo jamama, y chëngna judiëngbeñe. ¹⁰ Chënga nÿe šonjanaimpádaye chë ošbuáchiyënga ndbomnëjëmënga Jerusalenoquëngbiamá jtsenójuabnayama; y atše bëtscá sëntsama chënga jujabuáchama.

Pablo Antioquioca Pédrëbiamá tojánayana cha ndoñe tšabá tojanma ca

¹¹ Pero Pedro Antioquía bëts pueblöye tonjánabo ora, chabe delante sënjánayana cha ndoñe tšabá tonjanma ca, er ntšamo enjanamcá ndoñe tšabá quenjatsmëna. ¹² Mëntsä tonjanopasá: Santiago básefta entsanga Antioquiöye tojanichmó, pero chënga cabá choca ndáshjajna ora, Pedro yojanamana chë ndoñe judiënga ošbuáchiyëngaftaca jtsesayana. Pero chë entsanga tmojánashjajnentšana, Pedro tojtsanajbaná chëngaftaca sayana y encuéntayana. Cha chca tojanma, ntšamo chë ndoñe judiënga ošbuáchiyënga, chë base bobachtema chë más delicadentše tëtšenënga jtsemnama yojánamna ca tmojánayanënga, chabiamá muanjájuaoyama yojtsauatja causa. ¹³ Chë inÿe judiënga ošbuachiyëngnaca tmojanontsé amana cachcá ntšamo Pedro yojtsamcá, jtsamëse ntšamo chënga imojántatsëmbo chca jamama ndoñe yonjanamncá. Y Bernabënaca, ntšamo chënga imojtsamcá jtsönÿayëse, chëngcá yojtsama, jtsamëse ntšamo cha yojántatsëmbo chca jamama ndoñe ibonjamncá. ¹⁴ Chënga ndoñe quemënjátaniyena jtsamëse ntšamo yojanamncá, ntšamo chë Jesucristbe tšabe noticiënguentsá ndegombre soyënga endmëncá. Chca sënjáninÿe ora, Pédrëbioye nÿetsca ošbuáchiyëngbe delante sënjanianyana: “Aca canye judío, mo ndoñe judío bendmëncá cojtsiyena, y ndoñe ntšamo chë judiënga jamama monduamancá; chcasna, ¿ntšamo catjobenaye jamana chë ndoñe judiënga ošbuáchiyënga mo chë judiëngcá chamotsiyenama ca?”

Bëngbe Bëtsá judiënga y ndoñe judiënga játsebacana, Jesucristbeñe tmojtsošbuáchema

¹⁵ Bënga judiënga fsëndmëna, bëngbe bëtsëtsanga judiënga monjámnayeca, y ntšamo judiënga chë ndoñe judiëngbioye mondubobuatmcá, chë “bacna soye amënga ca”, ndoñe queftsátsmëna. ¹⁶ Y bënga mondëtatšëmbo, canÿe entsá Jesucristbeñe tojtsošbuáchema, Bëngbe Bëtsá jamana cha chabe bominiÿiñe tšabia chaotsemnama, y Bëngbe Bëtsá ndoñe chca ntjamana, ntšamo chë judiëngbe leyënguiñe jamama yomna ca iuayancá chë entsá tojamama. Y bëngnaca Jesucristbeñe imojtsošbuaché, Bëngbe Bëtsá chaomama bënga chabe bominiÿiñe tšábënga chamotsemnama, pero ndoñe ntšamo chë judiëngbe leyënguiñe jamama yomna ca iuayancá bënga tmojamama. Er Bëngbe Bëtsá ndocna ora ntjamana canÿe entsá chabe bominiÿiñe tšabia chaotsemnama, ntšamo chë judiëngbe leyënguiñe iuayancá jamama ibomna ca cha tojamama.

¹⁷ Pero, bënga bëtscá mondënguá, Bëngbe Bëtsá chaomama bënga chabe bominiÿiñe tšábënga chamotsemnama, bënga Crístoftaca cánÿiñe mo canÿacá jtsemnëse, chábeñe imošbuáchema. Chca mondošbuaché, bënga chë bacna soyëngama perdonánënga chamotsemnama. Pero inÿe entsanga jtsichámuana bënga bacna soyënga amënga imomna ca, ntšamo chë Moisesbe leyiñe iuayancá ndoñe montsama causa. ¿Y chca, Cristo bacna soye amënga šuabiamná ca nántsayana? ¡Ndoñe, ndegombre ndoñe!

¹⁸ Atše, ntšamo Bëngbe Bëtsá šojaninÿinÿecá, chë šojtsemna jájbanama soyënga, cachiñe jajuaboyama y jamama stëtontšese, mo chë Moisesbe ley jtsocumplínana perdonánënga jtsemnama, atše stsemna mo nda ndayá cachá tojtsendbema y cachiñe tojtëtsjebuanacá; y ndegombre, atše stsemna canÿa ntšamo ndoñe tšabá yondmëncá amá. ¹⁹ Chë judiëngbe

leyëngaca atše sëndétatšëmbo, ntšamo chë leyënguiñe iuayancá stsamëse, Bëngbe Bëtsá ndoñe yochanjama atše chabe bominiñe tšabia chaitsemnana; y chca, atše jtsemnana mo obanacá chë castígoca, er chë leyentša mandënga stsamëse, ndoñe quetsátobena atsbocaná jtsemnana. Chë léyeca ndoñe más mandaná ntsemnana jtsebošëse, atše cachcá chë ley sënjanonýá, Jesucristbeñe jtsošbuáchiyama; y chca, atše chaitsobena jt-siyenana Bëngbe Bëtsá jtseservénëse. Atše Crísoftaca cánýiñe mo canýacá sëndmënayeca, Cristo cruciñe tojanóbana ora enjamna mo átšnaca cuafjobancá; ²⁰ y mora entsemna mo nýe atše ya ndoñe cuafsiyencá, Cristo becá vida atšbe ainaniñe entsebómnyayeca. Y ntšamo mora atše vida sëntsebomncá, entsemna atše chë Bëngbe Bëtsabe Uaquiñábeñe betsošbuáchiyama, nda šojánbobonshana, y chabe derecho vida jtsobomñama cachcá tojanonýá y atšbe tšabiamana tojanóbana. ²¹ Atše ndoñe quetsatábotena ntšamo Bëngbe Bëtsá entšangbe tšabiamana juabna yobomncá. Nderado Bëngbe Bëtsá tojama canýe entšá chabe bominiñe tšabia chaotsemnana, ntšamo chë leyiñe jamama yomna ca iuayancá cha tojtsamama, as Cristo nýe tondayama matënjánóbana.

3

Ley jtsobedecénëse o Jesucristbeñe jtsošbuáchiyëse

¹ ¡Tšëngaftanga Galacientša entšanga, yapa ndenójuabnáyënga! Entsemna mo nda tcmojtsabocjuanacá, tšëngaftangbe juabna tojtsetrocá. Ndoñe quešnátësertana ntšamo chca nanjopása, er cach atše botamana cbonjanabuayiyná, Jesucristo cruciñe tojanóbana. ² Atše sëntseboše nýe canýe soye atše chašmëyana: ¿Uámana Espíritu tšëngaftangbe ainaniñe tojánamashëngo jtsemándayama, tšëngaftanga ntšamo chë leyiñe jamama yomna ca iuayancá šmojamama, o tšëngaftanga chë tšabe noticiënga šmojanuena y chiñe šmojtsošbuáchema? ³ ¿Ndáyeca tša ndenójuabnáyënga šmomna? Bëngbe Bëtsabe Espíritbeyeca tšëngaftanga šmonjanontsé mo tsmëma entšangcá jtsemnana. ¿Y mora šmojtseboše tšëngaftangbe vidënga jachnënguama nýe entšangbe juabnëngaca jtsiyenëse? ⁴ ¿Nýetsca soyënga ndayëjana tšëngaftanga šmojachnëjna, tondayama tonjoservé? Ndegombre chca ndoñe taiuatsmëna. ⁵ Bëngbe Bëtsá, chë Uámana Espíritu tšëngaftangbe ainaniñe cháumashënguama tojanma ora, y tšëngaftangbeñe bëtš soyënga chaopasama tojama ora, ¿ndáyeca chca nanjama? ¿Tšëngaftanga ntšamo chë leyiñe jamama yomna ca iuayancá šmojtsamama, o tšëngaftanga Jesucristbe tšabe noticiënga šmojanuena y chiñe šmojtsošbuáchema?

⁶ Menójuabonga ntšamo Abraham tojanpasama. Bëngbe Bëtsabe uabemana palabrënguiñe mëntšá endayana: “Cha Bëngbe Bëtsábeñe yojtsošbuáchiye, y chíyeca Bëngbe Bëtsá tonjánayana cha chabe bominiñe tšabia yojamna ca.” ⁷ Chíyeca tšëngaftanga cmontsamna jtsetatšëmbuana, Bëngbe Bëtsábeñe ošbuáchiyënga mondmëna mo Abrahámbentšana entšangcá, cachcá ošbuáchiyana bëtsebomnana, chë chábentšana ndegombre entšangbiama más. ⁸ Bëngbe Bëtsabe uabemana palabrënguiñe endopodena jualíama, Bëngbe Bëtsá yochjanma chë ndoñe judiënga chabe bominiñe tšábënga chamotsemnana, chábeñe tmojtsošbuáchema ca. Y Bëngbe Bëtsabe uabemana palabrënguiñe, cabá chca ndëma ora, Bëngbe Bëtsá Abrahámbioye quem tšabe noticiënga tbojanbuayená: “Acbeyeca, atše chanjama nýetsca quem luarentša entšanga tšabe bendicionënga chamotsebomnana ca.” ⁹ Bëngbe Bëtsá tojanma Abraham ba tšabe bendicionënga chaotsebomnana, cha chábeñe yojtsošbuáchema. Chca, Bëngbe Bëtsá, chábeñe ošbuachiyëngbiámnaca ba tšabe soyënga jamana, cachcá ntšamo Abrahambiama tšabe soyënga tojanmcá.

¹⁰ Chë Bëngbe Bëtsá chabe bominiñe tšábënga yochjábiamana ca juabnáyënga, ntšamo leyiñe jamama yomna ca iuayancá lempe tmojtsobedecénama, chënga nýets tempo jtsiyenana jtsetatšëmbëse Bëngbe Bëtsá nýetsca tescama chënga yochjácastigayama. Er Bëngbe Bëtsabe uabemana palabrënguiñe mëntšá endayana: “Bëngbe Bëtsá jayanana nýetsca

tescama castigo chaotsebomna ca, nda nyets tempo ndoñe tontsama nyetsca mandënga ntšamo chë leyënguiñe iuabemancá ca.” ¹¹ Ndegombre, puerte tšabá entsinýinýena, Bëngbe Bëtsá ndoñe yochanjama ndocná chabe bominyiñe tšabia chaotsemnana, ntšamo chë leyiñe jamama ibomna ca iuayancá tojtsobedecënese. Chca ndegombre endmëna, er Bëngbe Bëtsabe uabemana palabrënguiñe mëntsá endayana: “Nyë ndabiama Bëngbe Bëtsá tojama chabe bominyiñe tšabia chaotsemnana, cha Bëngbe Bëtsábeñe betsošbuáchema, cha ndegombre chë nyetsca tescama yomna tšabe vida echántsebomna ca.” ¹² Jtsamana ntšamo chë leyënguiñe jamama yomna ca iuayancá, ndoñe quenátsmëna mo Bëngbe Bëtsábeñe cuaftsošbuachecá. Ntšamo Bëngbe Bëtsabe uabemana palabrënguiñe endayancá: “Nda tojtsama nyetsca mandënga ntšamo chë leyënguiñe endayancá, tšabe vida echántsebomna, nyets tempo chë leyëngaca mandaná ca.”

¹³ Pero, Cristo jóbanama ibojamna ca tmojánayanama, y cha bëngbe causa chca chamomama chënga tojanalesénciayeyeca, Cristo tojama bënga nyetsca tescama castigánënga ndoñe chamondëtsemnana, ntšamo chë leyiñe iuayancá ndoñe tmontsama causa. Ntšamo Bëngbe Bëtsabe uabemana palabrënguiñe endayancá: “Nyetsca tescama castigo chaotsebomna, nda canýe niñësiñe tmojajonyá chaóbanama cha ca.” ¹⁴ Chca tojopasá, Bëngbe Bëtsá chaomama, chë tšabe bendicionënga ntšamo cha Abrahámbioye tbojanšbuachenacá, ndoñe judiëngnaca chamotsebomnana, Cristo Jesúsbeyeca; y Jesucristbeñe ošbuachiyánaca, Bëngbe Bëtsá chaomama chë Uámana Espíritu bëngbe ainaniñe cháuamashëngo jtsemándayama, ntšamo Bëngbe Bëtsá tojanašebuachenacá.

Ndocna ley quenátobena Bëngbe Bëtsabe šbuachenana soye jatrócama

¹⁵ Jesucristbeyeca catšátanga, chë ndayá sentsichamcá endmëna ntšamo nyets tempo entsángbeñe endbetsopasancá. Uta entsáta tbojenoyeuná canýe trato jénbemama, y ntšamo tbojenšbuachenacá chaotsinýnana chatbe uabaina tsbuanáchañe tbojuábemëse, ndocná inýa más ntsoobenana jayanana ntšamo tbojentratacá ndoñe yontsoservena ca; y inýe soyënga chiñe jacjayama cach ndoñe. ¹⁶ Chcasna, Bëngbe Bëtsá ba soye Abrahámbioye tbojanšbuachená puerte tšabe bendicionënga chabiamama, y chabe entsanguentšana canýabiámnaca. Y Bëngbe Bëtsabe uabemana palabrënguiñe ndoñe quenátayana: “chabe entsanguentšëngbiámnaca ca”, mo Bëngbe Bëtsá ba entsangbiama cuafstichamcá; sinó mëntsá endayana: “acbe entsanguentšana cánýabiamama ca”. Y chca entsayana, nyë canýe entsá ca; y cha endmëna Cristo. ¹⁷ Atše ndayá mëntsá cbontsëtsëtsná: Natsana, Bëngbe Bëtsá Abrahánoftaca canýe trato tojábemama, y tbojanianyana “aíñe ca”, ntšamo tbojanšbuachenacá jamama. Chentšana canta patse y unga bnëtsana uatëse, Bëngbe Bëtsá Moisesbe cucuatšiñe chë leyënga tbojanántšaboshjona; chíyeca, chë leyënga ndoñe ntsoobenana jamana chë Bëngbe Bëtsá Abrahánoftaca tojábemama trato ndoñe chaondëtsooservénama, ni jamana ndayá Bëngbe Bëtsá tojanšbuachenacá ndoñe chaondëtsooservénama. ¹⁸ Er ndayá Bëngbe Bëtsá chabe entsanga tojatsatacá, tojtsemna chënga ntšamo chë leyiñe jamama yomna ca iuayancá tmojtsamama, chca, chë tšetana soyënga ya ndoñe nantsóbocana ndayá Bëngbe Bëtsá jamama tojanašebuáchenantšana. Pero ba tšabe bendicionënga Abrahambiamama jamama, Bëngbe Bëtsá tbojanšbuachenáyeca, Bëngbe Bëtsá chë soyënga Abrahambiamama tojanma.

¹⁹ Asna, ¿ndayama chë Moisesbe ley nantsoservena? Bëngbe Bëtsá chë leyënga tojanáboshjona, ba tšabe soyënga jamama Abrahámbioye tbojanšbuáchenantšana baytese. Bëngbe Bëtsá yojanjuabná chë ley chaoservé entsanga jinýanyiyama ndayá tšabá o ndoñe tšabá jamama bëtsemnana, chë Abrahábentšana Uámana Entšá jashjanguëntscuana, ndabiama Bëngbe Bëtsá Abrahámbioye tbojanšbuachená ba tšabe bendicionënga jamama. Bëngbe Bëtsá angelëngaftaca chë ley Moisesbe cucuatšiñe tbojanántšaboshjona, y chë entsá Moisés enjamna chë oyebuambnayá Bëngbe Bëtsáftaca y entsángaftaca. ²⁰ Uta entsáta canýe trato jénbemama, jtseytana inýe entsá chë uta

entšátaftaca chaóyebuambama; pero Bëngbe Bëtsá Abrahámbioye ba tšabe soyënga jamama tbojanšbuachená ora, nýe canýa chca tojanma, y ndoñe bonjanájaboto inýa chabiamama Abrahánoftaca chaóyebuambama.

Ndayama chë ley yomna

²¹ ¿Chca nántsayana, ntšamo Moisesbe leyiñe iuayancá, chë Bëngbe Bëtsá tojanšbuachená soyëngama contra yomna ca? ¡Ndoñe, ndegombre ndoñe! Bëngbe Bëtsá entšangbe cucuatšíne canýe ley tojanáboshjona, y chë ley tojtsobena jamana entšanga ndegombre tšabe vida chamotsebomnama, as Bëngbe Bëtsá nanjama entšanga chabe bominyiñe tšábenga chamotsemnama, ntšamo chë leyiñe jamama yomna ca iuayancá tmojtsamama. ²² Pero Bëngbe Bëtsabe uabemana palabrenguiñe endayana, nýetsca quem luarentša entšanga cachëngbe bacna soyënga jamama juabnëngaca mandánënga imomna ca, chca, Jesucristbeñe ošbuáchiyënga chamobenama ndayá Bëngbe Bëtsá tojašbuachenacá jóyëngacñama. Y chënga, Jesucristbeñe imojtsošbuáchema imojtsebomna ndayá Bëngbe Bëtsá tojanašebuachenacá.

²³ Jesucristbeñe jtsošbuáchiyama entšanga chamobenama tempo joshjanguëntscuana, bënga monjamna corente mandánënga chë léyeca, y chca enjamna mo presënga cuaftsemncá, cárceloca utámenënga. Chë ley chca enjamna, ntšamo entšanga Jesucristbeñe muanjobenaye jtsošbuáchiyama Bëngbe Bëtsá jinýanýiyama tempo joshjanguëntscuana.

²⁴ Cristo jabama tempo tonjanoshjanguëntscuana, chë ley bëngbiamama enjamna mo canýe pamillentša oservenacá, cha jtsamana chentša básenga chamotsamama ntšamo tšabá tojtsemncá. Chë ley chca yojamna, bënga Crístbeñe jtsošbuáchiyama chamobenama, y chca, Bëngbe Bëtsá chaoma bënga chabe bominyiñe tšábenga chamotsemnama.

²⁵ Pero Jesucristbeñe jtsošbuáchiyama bënga chamotsobenama mora ya tonjóshjangoyeca, chë ley ya ndoñe más quenátsmëna mo canýe entšacá, ndayá tšabá yomncá bënga chamotsamama cuaftsamcá. ²⁶ Cristo Jesúsbeñe šmojtsošbuáchema, nýetsca tšëngaftanga šmojobená Bëngbe Bëtsabe básenga jtsemnama, Cristo Jesúsëftaca cánýiñe mo canýacá jtsemnëse. ²⁷ Tšëngaftanga tcmónjanëbaye, y chca, Crístoftaca cánýiñe mo canýacá šmontsemna. Y mora šmojobená mo cach Crístcá jtsemnama. ²⁸ Chíyeca, ndayá Bëngbe Bëtsá tojamama, judiënga y ndoñe judiënga cachcanga mondmëna; nýets tempo nýe inýabiamama oservëngënga y chë nýe cachëngbiamama trabájayënga cachcanga, y boyabásënga y shembásëngnaca. Nýetsca tšëngaftanga mo canýacá šmondmëna, Cristo Jesúsëftaca cánýiñe mo canýacá jtsemnëse. ²⁹ Tšëngaftanga Crístbe entšanga šmondmënayeca, šmontsemna mo Abrahámbentšana entšanga cuaftsemncá; y chca, ntšamo Bëngbe Bëtsá Abrahámbioye tbojašbuachenacá, tšëngaftanga šmochanjóyëngacñe.

4

¹ Atšnaca sëntseboše jayanama, chë uaquiñá nda yochjóyëngacñe ntšamo tbojtsotocancá, ntšamo chabe taitá jatšetayama tbojašbuachenacá, cha cabá mo canýe basacá tojtsemnëntscuana, ndocna derecho chë soyënguiñe ntsebomnana; y chca, cha jtsemnana mo canýa nýets tempo nýe inýabiamama oservenacá, masque lempe ntšamo chabe taitá tbojašbuachenacá chë uaquiñabiamama tojtsemna. ² Chë uaquiñá tojtsobóchantscuana, entšanga jtsemnana ndëmuanýënga ntšamo cha tbojtsajabotcá jtsoinayana, y inýënga jtsejuabnayana ndayá chë taitabe soyëngaca jamama, chë uaquiñá otocana soyëngaca. Y chca jtsemnana, chë taitá tojayana tempëntscuana. ³ Mo cachcá cuaftsemncá, bënga chë ndegombre soyëngama cabá ndosértaye ora, bëngnaca mandánënga monjamna mo nýets tempo nýe inýabiamama oservëngëncá, quem luarentše imománda espirítëngaca. ⁴ Pero Bëngbe Bëtsá chabe Uaquiñá quem luaroye tbojanichmó, nýa chama tempo tojanóshjango ora; cha mo nýetsca entšangcá, canýe shembásabentšana tojanonýná, y yojoyena jtsamëse ntšamo judiëngbe leyiñe jamama ibojamna ca yojanayancá jt-samëse. ⁵ Quem luaroye chca tojánabo bënga jabátsebacama, y chamotsobenama Bëngbe

Bëtsabe basengcá jtsemnama, bënga chë tempo šonjánamna chë ley jtsobedecénana. ⁶ Y chca, tšëngaftanga ya chabe básenga šmojtsemnama jinýanýiyama, Bëngbe Bëtsá chabe Uaquiñabe Espíritu tbojanichmó, nyetscangbe ainaniñe cháúamashënguama, y chë Espíritu endama bënga Bëngbe Bëtsá chamochembo, “Atšbe Taita ca”. ⁷ Mëntsá, cada ona tšëngaftanguentsá ya ndoñe quenátsmëna mo chë nyets tempo nye ínýabiamama oservenëngcá, quem luarentše imománda espiriténgaca mandánënga, y aiñe Bëngbe Bëtsabe basa tojoquedá. Y chabe basa tojoquedáyeca, lempe ntšamo Bëngbe Bëtsá chabe básenga jatšatayama tojašebuachenacá cha echanjóyëngacñe.

Pablo, Galacia luaroquëngbiama ngmënaca yojtsanjuabnaye

⁸ Tempo, Bëngbe Bëtsá ndoñe šmonjanábuatma ora, tšëngaftanga šmojamna mo nyets tempo nye ínýabiamama oservenëngcá, ndoñe ndegombre diosënga mondmëna espiriténgaca mandánënga. ⁹ Pero mora, Bëngbe Bëtsábioye šmontsábuatma ora, o tšabá jayanama, Bëngbe Bëtsá cmojtsëbuatma ora, ¿ntšámoyeca tšëngaftanga cachiñe chë quem luarentše imománda espiriténga šmojtsayaunana? Chënga ndocna obenana quemátšbomna, y nduámanënga mondmëna. ¿Ndayeca tšëngaftanga šmojtseboše cachiñe jtsemnana mo chë nyets tempo nye ínýabiamama oservenëngcá, chë espiriténgaca mandánënga? ¹⁰ Tšëngaftanga tša jtsejuabnayana diënguñe, shinýënguñe, canýe uatentša tempënguñe y uatënguñe, mo uámana tempëngcá Bëngbe Bëtsá tšabá jadórama, y chama bëts fiestënga jtsebmomna. ¹¹ Atše corente šontsengmena, nderado atšbe trabajo tšëngaftangbeñe tondayama tonjoservé.

¹² Jesucristbeyeca atšbe catšátanga, bëtscá cbontsaimpadana, šmochtsiyena jtsamëse ntšamo atše sëndamcá, er átšnaca sënjobema ntšamo tšëngaftanga ndoñe judiënga šmondmëncá. Tšëngaftanga ndocna bacna soye atše chešatsborlá. ¹³ Tšëngaftanga šmondëtatšëmbo, atše sënjanobená chë natsana soyama tšëngaftanga chë tšabe noticiënga jábuayenama, canýe šocana šonjanontšáshjango causa. ¹⁴ Atše canýe šocana sënjanbomna causa, tšëngaftangbiama ndoñe paselo quenjatsmëna tšëngaftangbeñe atše jofjana; pero masque chca, tšëngaftanga ndoñe chešmatanaboté, ni quešmatanáboyënja; masna, tšëngaftangbeñe tšabá šmonjanofja; šmonjanofja mo canýe ángel Bëngbe Bëtsabe ichmoná šmojofjá, o cach Jesucristbioycá. ¹⁵ Ndayá chora tšëngaftangaftaca enjanopasancá, puerta oyejuayënga tcmónjánabiamama. ¿Y mora ndayá tojopasá? Ndegombre, atše sëndëtatšëmbo y sëntsobena jayanama, tšëngaftanga ndaye sóynaca atšbiama mašmënjánmama. Chë más uámana šmojánbomna soyënga atšbe cucuatšinë mašmënjánboshjona, y nýa mo chë bominyëngnaca masmënjánenobuchjatsëca atše jatšetayama. ¹⁶ Y morna, ¿ntšamo ndegombre yomncá cbojtsëtsësnama, atšbiama šmojtsejuabná mo tšëngaftangbe uayayá cuaftsemncá ca?

¹⁷ Chë ndoñe ndegombre soyënga buátëmbayënga montsinýinýná mo tšëngaftangbiama ndegombre tšabá chašmotsiyenama cuaftsebošcá, pero chca ndoñe quenátsmëna; ndayá jamama imojtsebošcá, tšëngaftangbiama ndoñe tšabá quenátsmëna. Chënga montseboše atšbe contra y atšbe buátëmbana soyëngama contra chašmotsemnama, chentšana tšëngaftanga chëngaftaca jtsemnama chašmotsebošama y chënga chašmotsababuánýëshanama. ¹⁸ Puerte tšabá endmëna atše y ínýënga chafstseboše tšëngaftangaftaca amiguënga jtsemnama, canýe tšabe soye jamama tojtsemnëse; y sempre chca chauëtsemna, tšabiamama tojtsemnëse, y ndoñe nye atše chentše tšëngaftangaftaca stsemna ora. ¹⁹ Tšëngaftanga, chë atšbiama mo atšbe basengcá šmondmëñënga, Jesucristbeñe chašmošbuáchema tcbonjanëjabuácheyeca; atše cachiñe sëntsesufrina tšëngaftangbe causa, ntšamo canýe šešona jtsebmomna ora canýe shembása jtsesufrinancá; y atše chca chanjëftsesentina, ntšamo Cristo endmëncá tšëngaftangbe vidiñe ndegombre chaojtsebínýëntscuana. ²⁰ Malaye atše, mora tšëngaftangaftaca

stsemna, atše jobenayama jinŷanŷiyama, cach tšëngaftanga jáuyanëse, ntšamo ndegombre atše tšëngaftangbiana tsësëntínana. Atše tša šontsecochëngmena tšëngaftangbiana.

Ntšamo Agar y Sáraftaca tojanopasá

²¹ Canŷe soye šmochjauyana, tšëngaftanga chë Moisesbe léyeca mandánënga jtsemnama šmojtsebošënga. ¿Ntšamo chë leyiñe endayancá tacmojtsësertana? ²² Chiñe endayana, Abraham uta uaquiñata yojánabamna ca; cánŷana Agárbeñe, canŷa chabe shembiana nŷets tempo oservená; y chë ínŷana, cachabe shémbeñe, Sara, y mua ndocnabiana nŷets tempo oservená yonjamna. ²³ Chë chabe shembiana nŷets tempo oservenabe šešona, tojanonŷná nŷe Abraham y Agar chca chaotsemnama tbojánbošenayeca; y cachabe shembe šešona tojanonŷná, Bëngbe Bëtsá chë soye jamama Abrahámioye tbojanšbuachenáyeca.

²⁴ Ntšamo Agar y Sara, y chatbe šešónataftaca tojanopasacá, bënga canŷe uámana soye šontsabatambá. Ndayá chë uta shembásataftaca tojanopasacá, uta trato entsinŷinŷná: chë shembása Agar, chë nŷets tempo nŷe ínŷabiana oservená yojamná, entsinŷinŷná chë trato Bëngbe Bëtsá y Israeloca entsángaftaca, chë Moisésoftaca Bëngbe Bëtsá leyënga entsangbe cucuatšíñe tojanáboshjona ora. Agar básenga yojtsabamna ora, chëngnaca tmojanonŷná nŷe ínŷabiana nŷets tempo oservénënga jtsemnama, y chë tratentša leyiñe soyëngaca mandánënga jtsemnama tmojtsebošëngnaca jtsemnana mo nŷe ínŷabiana nŷets tempo oservénëngcá. ²⁵ Ndayá Agáraftaca tojanopasacá entsinŷinŷná chë Sinaí batsjoca tmojánbema trato, Arabia luaroca; y chë morsca bëts pueblo Jerusalénëncaca entsinŷinŷná, er chentša entsanga montsemna chë leyëngaca mandánënga. Ntšamo Agar y chabe básenga nŷe ínŷabiana nŷets tempo oservénënga monjamncá, Jerusalemntša entsángnaca cachcá chëngcá mondmëna, chë leyëngaca nŷets tempo mandánënga bëtsemnayeca. ²⁶ Ndayá Sáraftaca tojanopasacá, chë nŷe cachabiana trabájaye shembása, entsinŷinŷná chë trato, chë tšabe bendicionënga Abrahambiana jamama chábioye tbojanšbuachená ora. Chánaca entsinŷinŷná chë Bëngbe Bëtsabe bëts pueblo celoca, Jerusalén ca uabaina pueblo, er chë chentše mochjoyénananga, mora ndoñe quemuátiyena chë leyëngaca mandánënga. Chë Crístbeñe ošbuáchiyënga mondmëna chë celoca bëts pueblo Jerusalemntše joyénanama, y chca, ndegombre chënga mondmëna celocama entsanga. ²⁷ Chë celoca Jerusalén endmëna chë ndegombre bëts pueblo chë Jesucrístbeñe ošbuáchiyëngbiana, y chca endmëna mo canŷe shembása šešonga ndabamná y aíñe chaotsabamna Bëngbe Bëtsá cuafjamcá. Quem luarentša Jerusalén endmëna chë uámana luare chë léyeca mandánënga imomnëngbiana, y chca endmëna mo canŷe shembása aíñe boyaftaquëcá, er Bëngbe Bëtsabe uabemana palabrënguifne chë shembásatbiana mëntšá endayana:

Shembása šešonga ndabamná, y ndocna te tsetšanënga ndbomná šešona jtsebomnama, moyejuá y moyó oyejuayá cojtsemnama.

Chca moma, er aca, chë shembása chabe boyabiana utšená, chë shembása boyá bomnabiana más básenga cochántsabamna ca.

²⁸ Chcasna, Jesucrístbeyeca atšbe catšátanga, ntšamo Isaac Abrahambe uaquiñá tojanobemcá, Bëngbe Bëtsá chca Abrahámioye tbojanšbuachenáyeca; cachcá, tšëngaftángnaca šmjobená Bëngbe Bëtsabe básenga jtsemnama, Bëngbe Bëtsá chca tojanšbuachenáyeca. ²⁹ Ntšamo chë tempo tojanopasacá, chë Isaac chaosufrima Ismael tojanmcá (Ismael, Abrahambe uaquiñá Agárbeñe, chë nŷe chata chca tbojánbošenayeca onŷnaná; Isaac, chë Bëngbe Bëtsabe Espíritbeyeca onŷnaná), mórnaca cachcá entsopasana: chë ndoñe ndegombre soyënga buátëmbayënga judiënga montsama bënga chamosufrima, ntšamo Isaac chaosufrima Ismael yojanamcá. ³⁰ Pero, ¿ndayá Bëngbe Bëtsabe uabemana palabrënguifne Abrahambe básatbiana iuayana? Mëntšá endayana: “Moma, chë nŷets tempo nŷe ínŷabiana oservená y chabe basa acbe

yebnentsana chábuaisebocnama, er chë nyets tempo nye ínÿabiamama oservenabe šešona ndoñe quenátobena chabe taitabe soyënga jtsebomnama. Nye chë propio shembe šešona aíñe, er chë shemna ndoñe nye ínÿabiamama nyets tempo oservená quenátsmëna.”

³¹ Chcasna, Jesucristbeyeca atšbe catšátanga, bënga ndoñe quemuátsmëna mo canÿa nye ínÿabiamama nyets tempo oservenabe básenga cuaftsemncá, er mora ya ndoñe más quemuátsmëna chë léyeca nyets tempo mandánënga. Y aíñe montsemna mo canÿe shema ndoñe nye ínÿabiamama nyets tempo oservenabe básenga cuaftsemncá, er Bëngbe Bëtsabe básenga bënga mondmëna.

5

Cristo bënga šojatsebacá

¹ Cristo bënga šojatsebacá, ndoñe más mo chë nyets tempo nye ínÿabiamama oservenëngcá chamondëtsiyenama, chë léyeca mandánënga. Nÿa šmochtsentšena nyets tempo chca atsebácanënga chašmoquedama, y ndoñe šmatjaleséncia tšëngaftanga cachiñe chë léyeca mandánënga ínÿenga chácmabiamama.

² Tšabá šmochjouena. Atše Pablo cbëyana: Nderado tšëngaftanga ndoñe judiënga, šmojalesenciá ínÿenga chë tšëngaftangbe más delicadentše base bobachtema chamotëtšama, ntšamo judiënga monduamancá, asna, ndayá Cristo tšëngaftangbiama tojanmcá tondayama nantsoservenena. ³ Ndëmanÿe entšánaca, nda tojalesenciá ínÿenga chabe más delicadentše base bobachtema chamotëtšama, cachiñe cha šcobuayená: Mora aca cmontsemna nyetsca chë judiëngbe leyentša mandënga jtsobedecénana.

⁴ Ndëmanÿenga tšëngaftangbentšana šmojtsenguá, Bëngbe Bëtsabe bominyiñe tšábenga jtsemnana, ntšamo leyiñe jamama yomna ca iuayancá jtsamëse, tšëngaftanga chca šmojtsamama, šmojama Crístoftaca cánÿiñe mo canÿacá ndoñe chašmondëtsemnana; Bëngbe Bëtsábentšanënaca šmojtsoluaré, y chca, šmontsinÿanÿná tšëngaftanga ndoñe šmontseboše, Bëngbe Bëtsá tšëngaftangbe tšabiamama jtsejuabnayeše, chácmatsebacana.

⁵ Pero bënga, Bëngbe Bëtsábeñe jtsošbuáchiyëse, mondobátmana cha yochjama bënga chabe bominyiñe tšábenga nyets tempo chamotsemnana. Y bënga chca mondobátmana, Jesucristbeñe ošbuáchiyana bómnayeca, y chë ošbuáchiyana chë Uámana Espíritbiajana bëngbiyoye endobá. ⁶ Er Crístoftaca cánÿiñe mo canÿacá tmojtsemna ora, aíñe base bobachtema tëtšenënga tmojtsemna o ndoñe, tondaye ntsámanana; ndayá puerte enduámana endmëna chë Jesucristbeñe bënga mondbomna ošbuáchiyana, y chca bëtsebomnamna bënga montsinÿanÿná ínÿenga jtsababuánÿeshanëse.

⁷ Tšëngaftanga tšabá šmonjánama, chë jtsiyenana ntšamo Bëngbe Bëtsabe ndegombre soyënga yomncá jtsamëse. Y mora, ¿nda tojama tšëngaftanga chašmotsajbanama chë Bëngbe Bëtsabe ndegombre soyënga jtsuenanama? ⁸ Ndegombre, Bëngbe Bëtsá ndoñe quenátsmëna, er cha tšëngaftanga tcmojáchembo chabe entšanga chašmotsemnana.

⁹ Ntšamo entšanga mondëntšayanacá: “Nÿe base levadura jamana nyetsana chauabochama ca”; cachcá, tšëngaftanga chë judiëngbe básefta leyëngaca mandánënga jtsemnana šmojabojátšese, šmuatjábocna nyetsca leyëngaca mandánënga. ¹⁰ Bënga Bëngbe Utabnáftaca cánÿiñe mo canÿacá bëtsemnayeca, atše corente sëntsetatšëmbo, ntšamo atšbe juabna yomncá tšëngaftangnaca cachcá šmochtsejuabnayama; y átšnaca corente sëntsetatšëmbo Bëngbe Bëtsá puerte bochjacastíga, nda tšëngaftanga natjëmbana ainánaca ndoñe chašmondëtsiyenama tojtsamábioyey, masque ndánaca cha chaotsomñe.

¹¹ Y atšbiama chanjayana, Jesucristbeyeca atšbe catšátanga, Jesucristbeñe ošbuáchiyënga base bobachtema chëngbe más delicadentše tëtšenënga chamotsemnana entšanga cabá stsabuayiynase, entšanga ya ndoñe muantsama atše chaitsesufrínama. Atše chca stsamëse, Cristo cruciñe tojanóbanama ntšamo iuayancá entšanga stsabuayiyná ora, chënga ya ndoñe átšeftaca nanjósentiaye. ¹² Pero chë natjëmbana ainánaca ndoñe chašmondëtsiyenama imojtsamëngna, ¡malaye cachënga muanjenocbóna!

¹³ Pero tsëngaftanga, Jesucristbeyeca atšbe catšátanga, Bëngbe Bëtsá tcmojáchembo chë judiëngbe léyeca ndëmandánënga chašmotsemnama. Pero chca bëtsemnama, mora ndoñe šmatjátsjuabnaye šmojtšobena jalesénciana, nye tsëngaftangbe cuerpënga tsábá chamotsemnama juabnéngaca mandánënga jatiyenama. Chamna, tsëngaftanga šmuenbobonshánayeca, nyetscanga šmochtsenájabuachana. ¹⁴ Er ntšamo Moisesbe leyentša nyetsca mandënguiñe endayancá, nye canye mandíñe lempe chca entsayana. Y chë mando endmëna: “Ndëmua entšánaca cochtsebobonshana ntšamo cach aca cuenobobonshancá.” ¹⁵ Pero ínÿenga chamotsesufrínama jtsamëse tsëngaftanga šmojtšiyenëse, mo tsátjaye bayënga tmojtšenashantsná y tmojtšenobanacá, cuedado šmochtsëbomna. Ndoñese, nyetscanga šmatjánenpochocaye.

Ntšamo chë Bëngbe Bëtsabe Espíritbeyeca vida jtsebomnama

¹⁶ Chíyeca cbochjáuyana: Nyets tempo šmochtsiyena ntšamo chë Uámana Espíritu cmotšamëndacá, y chca, tsëngaftanga ndoñe quešmochátama soyënga, nye cach tsëngaftanga tsábá jtsomñama juabnéngaca. ¹⁷ Er ndayá bënga, nye entsangbe juábnaca jamama mondbošcá, jtsemnana ndayá chë Uámana Espíritu bënga chamomama yobošcá contra; y ndayá chë Uámana Espíritu bënga chamomama yobošcá, jtsemnana ndayá bënga, nye entsangbe juábnaca jamama imobošcá contra. Chca endmënyayeca, ntšamo chë Uámana Espíritu chašmomama yobošcá šmojtšamëse, ndoñe quešmátobena jamana, ndayá cach tsëngaftanga, nye entsangbe juábnaca jamama šmojtšbošcá. ¹⁸ Tsëngaftanga, ntšamo chë Uámana Espíritu cmotšamëndacá šmojtšamëse, ndoñe quecmátamna ntšamo chë leyiñe iuayancá játamama.

¹⁹ Ntšamo entsanga, nye entsangbe juábnaca tmojtšamcá, nyetscanga paselo jtsonÿayana: chënga bacna soye boyabása o shembásaftaca jtsamana, nye chca soyëngama jësejuabnayana, y ndoñe ntšobenana cachënga jenomándama, chca soyënga jtsamëse. ²⁰ Ba uabouana soyënga jtsamana, diosënga yomna ca tmojtsejuabná soyënga jadórama, jtsencjuanayana, ínÿengaftaca jtsenáyayana, nyetscanga ndoñe cachcá chamondëtsejuabnama jtsamana, ínÿengaftaca yapa jtsenántšabošana, soyënga nye rábiaca jtsamana, ínÿengaftaca tša jesenaleganana, y cánÿenga ínÿengaftaca contra chamotsemnama jtsamana. ²¹ Nye jtsebošana ntšamo inÿa tojatashjachcá jtsebomnama, yapa tmoyënga jtsemnana, fiestënguiñe ndoñe tsabe soyënga jtsamana, y inÿe soyëngnaca mo chë soyëngcá jtsamana. Y mora atšbe cbaruayená, cach ntšamo tempo sënjanmcá: chca soyënga jtsamëse oyenënga, Bëngbe Bëtsabe amëndayoca ndoñe luare quemochátsbomna.

²² Pero, Uámana Espíritu ainaniñe tojtsemánda ora, quem soyënga chentšana jóbocnana: nyetscanga jtsababuánÿeshanana, jtsóyejuayana, natjëmbana ínÿengaftaca jtšiyenana, puerte uantado nyetsca padecéniñe jtsemnana, nyetscanga corente bonshanánaca jtšénÿayana, tsabe ainana jtsebomnana, y nyetscañe tsabe palabra bomnënga jtsemnana, ²³ jtsejuabnayana chë ínÿenga mo chabiamas más uámanënga cuaftsemncá, y cachá nyetsca soyënguiñe jenomándama jtšobenana. Y ndocna ley quenátsmëna, chca soyënga tmojtšama entsangbiamas contra cháuyanama. ²⁴ Jesucristbënga imomnënga tmojama, chënga chë nye entsangbe juabnéngaca mandánënga ndoñe ntsemnama; ya ndoñe más, chë nye cachënga tsábá jtsomñama bacna juabnéngaca mandánënga quemátsmëna, y chë nye cachëngbiamas soyënga jamama bëtscá juabnéngaca cach ndoñe. ²⁵ Bënga ndegombre tsabe vida chamotsebomnama Uámana Espíritu yojtšamayeca, bënga mochtšiyena jtsamëse lempe ntšamo Uámana Espíritu šojtsamëndacá. ²⁶ Ndoñe šmattsenábotamnaye, uámanënga jatenobiamnayëse, ndoñe soyënga mattsama ínÿenga bëngaftaca chaoséntiyayama, y ndoñe nye mochtšatšboše ntšamo inÿa tojatashjachcá jtsbomnama.

6

Nyetscanga smochtsenájabuachana

¹ Jesucristbeyeca atšbe catšátanga, nderado ndánaca bacna soye tojamama šmojinýe, tšëngaftangbentše ntšamo chë Bëngbe Bëtsabe Espíritu tojtsemandacá tmojtsamënga cmontsamna cha juajabuáchana, chë ndoñe tšabe soye amana chaotsajbanama; pero chca smochjama becá bonshanánaca jtsonýayëse. Cuedado smochtsebomna, er ndóñese, tšëngaftángnaca cmatjócochëngo cachcá soye jamama. ² Chë soyënguiñe chašmojtsepadecena ora, smochtsenájabuachana, mo chë uauta uasmanëshangá šmojtsëyambá ora, juyambama šmojtsenajabuachancá. Y chca chašmojtsama ora, ntšamo Cristo tojanmandacá smochantsocumplina.

³ Nderado nda tojtsejuabná, cha canýe uámana entšá yomna ca, pero ndoñe chca cha tondmënëse, cachá jtseñoíngñayana. ⁴ Cada ona chauenojuabó, ntšamo tojamcá tšabá o ndoñe tšabá bétsemnana. Ntšamo tojamcá tšabá tojtsemnëse, chca tojamama oyejuayá chaotsemna; pero cha ndoñe quebnátsmëna jayanana ntšamo tojamcá tšabá yojtsemna ca, chë ndayá ínýenga tmojamama más tšabá yojtsemna ca jatichámëse. ⁵ Er cada ona bontsemna jtseñojuabnayana, jtsetatšëmbuama ntšamo tojamcá tšabá o ndoñe tšabá bétsemnana.

⁶ Nda Bëngbe Bëtsabe soyëngama tojtsatsjendá, cha bontsemna chabe buatëmbayáftaca nyetsca tšabe soyënga jenájatayana.

⁷ Ndoñe matenoíngñana; ndoñe šmattsejuabnaye tšëngaftanga šmojtsobena ntšamo Bëngbe Bëtsá tojamandacá ndoñe ntjamana, castigo ntjoyëngacñécá, er ndocná quenátobena Bëngbe Bëtsá jaíngñana. Ntšamo entšanga mondëntšayancá: “Ndayá tcojajé y cachcá josháchiñana ca.” ⁸ Mo nda ndoñe tšabe fshantsiñe tojajecá, tšabe shajuana ndoñe ntjoshachiñana, cachcá, nda tojtsiyena nýe cachá tšabá jtsomñama bacna juabnëngaca, cha echanjábocna jabuache castiganá nyetsca tescama. Pero mo nda uaba fshantsiñe tojajecá, tšabe shajuana josháchiñana, cachcá nda tojtsiyena ntšamo chë Uámana Espíritu tojtsemandacá jtsamëse, chë nyetsca tescama yomna tšabe vida echántsebomna. ⁹ Chcasna, ndoñe chašondëmantšé tšabe soye jtsamama; er masque šojtsëmantšnasna, pero chë tšabe soyënga jtsamama ndoñe tmonjajbanase, canýe bëtse te echanjóshjango, bënga bëtscá tšabe soyënga josháchiñama, mo tša tšabe shajuanënga tmojashaquécá. ¹⁰ Chíyeca, tmojtsobena ora, nyetscangbiana tšabe soyënga mochjama, pero masna chë Jesucristbeñe ošbuáchiyana bómnyeyeca, bëngcá Bëngbe Bëtsabe básenga imomnëngbiana.

Quem tsbuanácha juapochócama cach Pablo tojanábema

¹¹ ¡šmochjinýe, tša bëtse letrëngaca cach atšbe cucuátšeca mora cbontsëbuabiamná!

¹² Ndëmuanýenga imojtseboše, tšëngaftanga chë ndoñe judiënga jamëndama tšëngaftangbe más delicadentše base bobachtema tëtšenënga chašmotsemnana, ntšamo judiënga monduamancá, chënga chca jtsamana nýe chë judiëngaftaca tšabá joquédama. Y chca jtsamëndayana, chënga chamosufrima ínýenga chamotsamama ndoñe mondbóšeyeca; er judiënga muanjama chënga chamosufrima, Cristo cruzoca jóbanana entšangbiana puerte iuámana ca chënga tmojtsabuayiynase. ¹³ Pero ni mo chë más delicadentše base bobachtema tëtšenënga imomnënga, ndoñe quemátama lempe ntšamo chë leyíñe iuayancá. Pero chënga jtsebošana tšëngaftanga chca tëtšenënga chašmotsemna, chënga jtseñabotamnayama jobenayama, ínýenga base bobachtema chacmatëtšama tšëngaftanga šmojalesenciana. ¹⁴ Atšeftacna ndocna te chca chaondopasá. Atše nyets tempo y becá chanjëftsóyebuambnaye ndayá atšbiana Bëngbe Utabná Jesucristo tojanmama, cha cruzoca tojanóbana ora; er ndayá choca tojanma sóyeca, atšbiana tondaye quenatámana ntšamo entšanga quem luarentše imojuabnacá y chëngbiana puerte iuámana; y ndayá atšbiana puerte iuámana, entšangbiana

tondaye quenatámana; y chë causa, atše chëngbiana mo obanacá sëndmëna. ¹⁵ Chë más delicadentše base bobachtema aínë tëtšená o ndoñe, tondaye quenatámana. Ndayá puerte iuámana endmëna, Bëngbe Bëtsá mo tsmëma entšangcá bënga šojábiana, Uámana Espíritu bëngbe ainaniñe jtsemándayëse. ¹⁶ Chë quem buatëmbana sóyeca jtsamëse šmoyenëngbiana, atše, Bëngbe Bëtsá sëntseimpadana, cha chaoma tšëngaftangbe ainana natjëmbana chašmotsebonnama y becá chacmotsalastemánama; y ndoñe nýe chëngbiana chca quetsatsimpadana, ndayá nýetscanga Bëngbe Bëtsabe entšanga imomnëngbiámnaca.

¹⁷ Y mora, nýe canýe soye cbochjáuyana: morscana ndocná chaondëtsama atše jasúfriama chašotsemnama; er atšbe cuerpiñe endëtinýna ntšamo atše tijasufri, Jesusbe oservená bëtsemnama.

¹⁸ Jesucristbeyeca atšbe catšátanga, atše sëntseimpadana Bëngbe Utabná Jesucristo chaoma tšabe bendicionënga tšëngaftangbeñe chaotsemnama. Chca chaotsemna.

Efesios

Jacheuayama

¹ Atše Pablo, Jesucristbe ichmoná Bëngbe Bëtsá chca yobóseyeca, quem tsbuanácha sèntsabiamná Efeso puebloca Bëngbe Bëtsabe entšanga y Cristo Jesúsbeñe ošbuáchiyënga imomnëngbiama. ² Atše sèntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y chata chaboma tšëngaftangbe ainaniñe tšabe ebionana chašmotsebonnama.

Crísoftaca cányiñe mo canyáca jtsemnëse, bënga mochántsebonna nyetsca tšabe soyënga, ntšamo celoca yobinýncá

³ Bëngbe Bëtsá y Bëngbe Utabná Jesucristbe Taitábioye mochjëtschuaye, er bënga Crísoftaca cányiñe mo canyáca mondmënyeyeca, Bëngbe Bëtsá tojama bënga nyetsca tšabe soyënga chamotsebonnama, ntšamo celoca yobinýncá. ⁴ Bëngbe Bëtsá bënga šojanabacacá Crísoftaca cányiñe mo canyáca chamotsemnama, cabá quem luare cha ndama orscana, bënga chabe delante chamotsemnama chabe entšanga, bacna soyëngama perdonánënga y chabe oservénënga, y bënga ainaniñe bacna soye nd-bomnënga imomna ca cha cháuyanama. ⁵ Bëngbe Bëtsá šuababuánýeshanayeca, tempo cha tojanjuabó y tojánbošena bënga mo cachabe basengcá jábiamama, chë Jesucristo yochjanma sóyeca. ⁶ Chíyeca bënga Bëngbe Bëtsábioye sempre jtsatschuanayana, cha bëngbe tšabiamama juabna yobómnyeyeca, ndayá chabe Bonshana Uaquiñáftaca bëngbe tšabiamama cha tojamama. ⁷ Bëngbe Bëtsá puerte bonshanánaca bëngbe tšabiamama bëtscá yojuabnáyeca, cha bëngbe bacna soyëngama šojtsaperdoná y šojatsebacá, er Jesús bëngbiama tojanóbana, chabe buiñe juabuáshanëse. ⁸ Bëngbe Bëtsá tojama bënga nyets osertánana y becá juabna chamotsebonnama, cha becá bonshanánaca bëngbe tšabiamama juabna yobómnyeyeca, ⁹ y tojama bënga chamotsetatšëmbuama ndayá jamama cha yobošcá, ndayá cachá tempscana yojanjuabná jamama, pero entšanga chca ndoñe tonjaninýanjé. Ndayá jamama Bëngbe Bëtsá tempo yojanjuabnacá, ndayá cha tojama bënga chamotsetatšëmbuama, cachá yojanjuabná chca jamama. ¹⁰ Ndayá jamama Bëngbe Bëtsá yojuabnacá, lempe echanjóchnëngo nya chama tempo chaojóshjango ora, y quem Bëngbe Bëtsabe juabna endmëna jamana, lempe ntšamo cha tojamcá celoca y quem luarentše, Cristo chamotsebonna nyetsca chë soyënguiñe mo chë mandayacá.

¹¹ Bëngbe Bëtsá sempre jamana nyetsca soyënga ntšamo tojtsejuabnacá y tojtsebošcá. Y Bëngbe Bëtsá bënga šojabacacá, ntšamo cabá chca ndama ora yojanjuabnacá; chca, bënga Crísoftaca cányiñe mo canyáca jtsemnëse, bënga chamóyëngacñama ndayá Bëngbe Bëtsá chabe entšanga jatšatayama tojašebuachená, mo chëngbe otocana soycá. ¹² Y Bëngbe Bëtsá chca tojama, bënga chë Crístbeñe natsana imojtsanošbuachenga, cha bënga šochjánatsebacama, tšabe soyënga jtsamëse chamotsiyenama, chca, chë inye entšanga Bëngbe Bëtsabe obenanama cha chamotsatschuanama. ¹³ Y tšëngaftángnaca, chë ndegombre buayenánana šmojanuena ora, chë Bëngbe Bëtsá bënga játsebacama buayenánana, y Crístbeñe šmojtsanošbuaché ora, Bëngbe Bëtsá tojanma tšëngaftanga Crísoftaca cányiñe mo canyáca chašmotsemnama y tcmojanainýnaná tšëngaftanga chabe entšanga bëtsemnama. Bëngbe Bëtsá chca tojanma, Uámana Espíritu tšëngaftangbe ainaniñe cháuamashënguama tojanma ora, ntšamo tempo cha tojanašebuachenacá. ¹⁴ Bënga chë Uámana Espíritu bëngbe ainaniñe mondbómnyeyeca, corente mondëtatšëmbo ndayá Bëngbe Bëtsá chabe entšanga tojašebuachenacá bënga mochjóyëngacñama. Uámana Espíritbeyeca bënga montsobena chca puerte tšabá jtsetatšëmbuama, chë Bëngbe Bëtsá chabe entšanga nyetsca tescama játsebacama y ntšamo tojašebuachenacá jatšatayama

tempo chaóshjanguentscuana; y lempe ntšamo cha bəngbiamana inétsamama, nyetscanga cha mochántsatschuanaye, cha bətsá y obená bétsemnama.

Pablo Bəngbe Bətsábioye tbojanimpadá, ošbuáchiyənga osertánana chamotsebomnama.

¹⁵⁻¹⁶ Chcáyeca, atšna, Bəngbe Bətsá tšəngaftangbiamana stseimpadana ora, sempre cha səndbətsatschuanaye, er atše sənjátatsəmbona ntšamo tšəngaftanga Bəngbe Utabná Jesúsbeñe tša šmojtsošbuáchema, y ntšamo tšəngaftanga nyetsca chə Bəngbe Bətsábenga imomnənga šmababuánjəshanama. ¹⁷ Bəngbe Bətsá, Bəngbe Utabná Jesucristbe Taitá, nda corente iuámána, səntseimpadana cha chaoma Uámána Espíritu chacmėjabuachama, corente osertánənga chašmotsemnama, y chacminyánjé nda Bəngbe Bətsá yomnana, chca, más tšabá cha chašmotsábuatmama. ¹⁸ Atše, Bəngbe Bətsá səntseimpadana, cha chaoma tšəngaftanga Bəngbe Bətsabe soyənguiñe corente osertánana chašmotsebomnama, tšəngaftanga chašmotsetatsəmbuama, ndayá Bəngbe Bətsábeñe jtsošbuáchiyése tšəngaftanga šmojtsobatmancá cha cmochjátšatayama. Bəngbe Bətsá tcmojáchembo chábeñe chca chašmotsobátmanama. Atše cha səntseimpadana, chaoma tšəngaftangnaca chašmotsetatsəmbó tša bətscá y bəts soyənga yomna ndayá chabe entsanga cha tojašebuachenacá; ¹⁹ y chašmotsetatsəmbó tša bəts soye y ndocna te ntjəftso pochócama chabe obenana yomnana, chə ndayá bəngbe ainaniñe tšabe soyənga yojtsama, bənga chə Cristbeñe ošbuáchiyəngbeñe. Cach quem puerte bəts obenana endməna, ²⁰ ndáyeca Bəngbe Bətsá tojanma Cristo cháuatayenama, y chabe catšbioica celoca tbojtantbema chaotsemándama. ²¹ Choca Cristo nyetsca soyənguiñe yojtsemánda, y más bətscá obenana y mando yojtsebomna nyetsca mándayəngbiamana, chə mando y obenana bomnəngbiamana, y cha yomna más uamaná y bətsá nyetsca chə entsangbiamana mo bətsətsangcá utabnəngbiamana, chəngbe uabaina respétoca jtsichámese. Cristo puerte bətsá endməna lempe ntšamo quem luarentše yobínjnama y Cristo yochjésabentšana yochtsebinjnamnaca. ²² Bəngbe Bətsá tojama Cristo nyetsca soyənguiñe chaotsemándama, y tbojanábuayana nyetsca soyənguiñe chaotsemándama, chábeñe ošbuáchiyəngbe tšabiamana. ²³ Cha endməna nyetsca chábeñe ošbuáchiyəngbe mandayá, y chənga mondməna mo cachabe cuerpo cuaftsemncá. Chəngbe ainaniñe cha endoyena y nyetsca luarənguiñnaca, y lempe cha endəmánda.

2

Atsebácanənga mondməna, Bəngbe Bətsá šuababuánjəshanayeca

¹ Tempo tšəngaftanga Bəngbe Bətsabiamana mo obanəngcá šmonjamna, er tšəngaftanga šmonjanijena, ntšamo Bəngbe Bətsá yomandacá ntsamcá, y bətscá bacna soyənga šmojánama. ² Chca, tšəngaftanga šmonjánama mo chə nye quem luarama enójuabnayənga monduamancá, y šmonjanəyeunana Satanás, chə bacna espíritənga obenana bomnənga y quem luarentša tsbanánoca imomnəngbe aməndayá, chə Bəngbe Bətsábioye ndəyeunanəngbe ainaniñe yománda espíritu. ³ Tempo bənga nyetscanga fsənjaniyena ntšamo tšəngaftanga šmonjanijencá. Bənga soyənga fsənjánama, nye ntšamo ftsjanbošcá nye bəngbe cuerpəngbe tšabiamana, y nye ntšamo bəngbe juabna enjamncá bacna soyənga jamama. Bənga fsənjaniyena soyənga jtsamése mo chə Bəngbe Bətsábioye nduabuatma entsanga mondbetsamcá; chə causa bənga fsənjanomerecena jtsebomnana chə Bəngbe Bətsabe uabouana castigo, cachcá chə Bəngbe Bətsábioye nduabuatməngcá. ⁴ Pero Bəngbe Bətsá sempre tša lastemado entsangbiamana endməna y sempre corente bənga šondábabuanjəshana; ⁵ y chíyeca, bənga cabá mo obanəngcá chabiamana fsənjamna ora, bacna soyənga fsənjánama causa, chora cha tojanma bənga tšabe vida chamotsebomnama y Crístoftaca cánjñe mo canjácá chamotsemnama. Bəngbe Bətsá tšəngaftangbe tšabiamana juabna bómnayeca, bacna soyənguentšana tcmojatsebacá. ⁶ Bənga Jesucrístoftaca cánjñe mo canjácá bétsemnayeca, Cristo Jesús cháuatayenama Bəngbe

Bëtsá tojanma ora y celoca tbojtantbema ora, enjamna mo bëngnaca chámuatayenama Bëngbe Bëtsá cuafjamcá y Cristo Jesúseftaca celoca cuafatbiamcá. ⁷ Chca enjamna, Bëngbe Bëtsá entsanga cháuinñanñema nyetsca joshjanguama tempënguiñe, ntšamo cha bëngbe tsabiama bëtscá juabna bëtsebomnama, cha Cristo Jesúseftaca bëngbioye tsabe juábnaca šojánanñe ora. ⁸ Er Bëngbe Bëtsá tsëngaftangbiana tsabe juabna yojánbomnayeca, tcmojatsebacá, Jesucristbeñe šmojtsanošbuáchemá; pero atsebácanënga šmondmëna, ndoñe cach tsëngaftanga ndayá šmojánmayeca, ndayá atsbocaná jtsemnana endmëna Bëngbe Bëtsabe canñe tšetana soye. ⁹ Atsebácanënga šmondmëna, ndoñe cach tsëngaftanga ndayá šmojánmayeca; chíyeca ndocná quenátobena jtšenábotamnayana atsbocaná yojtsemnana. ¹⁰ Bëngbe Bëtsá šojtabiama ntšamo bënga mondmëncá, y Cristo Jesúseftaca cánñiñe mo canñacá bëtsemnayeca, Bëngbe Bëtsá mo tsmëma entsangcá cuafatsmëncá šojtabiama, tsabe soyënga jtsamëse jtsiyenama. Y ndayá bënga tsabá mondamcá, Bëngbe Bëtsá tempo tojanprontá bënga chamotsamama.

Crístbeyeca tempcá tsabá Bëngbe Bëtsáftaca jtsatsmënaná

¹¹ Tsëngaftanga ndoñe judiënga, ndëmuanñënga judiënga cmondubuatma “chë más delicadentše base bobachtema ndëtëtšenënga ca”, chëngcá uinñanánënga ndoñe šmondmënama; chënga cachënga jtšenábobuatmana “chë más delicadentše base bobachtema tëtšenënga ca”, y cachëngbe cuerpënguiñe chca jtsamana. Mëntšá, tsëngaftanga chë ndoñe judiënga, ¹² šmochjenójuaboje ntšamo tempo šmojamnama, Crístbeñe cabá ndošbuáchiye ora. Chora, tsëngaftanga Cristo ndoñe šmonjánbomna, Israeloca entsangbiana stëtšoye šmonjanquedana, y ndoñe šmonjantátšëmbo lempe ntšamo Bëngbe Bëtsá chabe entsanga tojanašebuachenacá. Tsëngaftanga quem luarentše šmonjaniyena ndocnábeñe ntsobatmancá y Bëngbe Bëtsá ntsabuatmcá. ¹³ Pero mora tsëngaftanga Cristo Jesúseftaca cánñiñe mo canñacá šmontsemna, chë tempo Bëngbe Bëtsá ndoñe šmonjanábuatmënga, y cha tojama chábioye chašmotsábuatmama; y chca yomna, er Jesús, chabe buiñe juabuáshanëse, tsëngaftangbiana tojanóbana. ¹⁴ Cach Cristo yojtsama bënga tempcá tsabá Bëngbe Bëtsáftaca chamotsemnana. Cha tojama judiënga y ndoñe judiënga nyetscanga mo cachca entsangcá chamotsemnana, mo nda canñe tapiëse tojtsendbemcá, chë ndayëšeca canñe luarentša entsanga tmojtsenjáta, chënga enáyaye causa. ¹⁵ Cristo chënga mo cachca entsangcá tojábiana, judiëngbe leyënga y mandënga ndocna obenana chamondëtsebomnama jamëse. Chca tojama, cha jóbanëse, chë útoica entsanga mo nñe canñe tsmëma entsangcá jábiamama, cháftaca cánñiñe mo canñacá jtsemnëse. Cha chca tojanma chënga nyetscanga tsabá chamotsiyenama; ¹⁶ y Cristo cruciñe tojanóbanayeca, cha tojanma chë útoica entsanga enáyayana chamotsajbanama, y tojanma chë útoica entsanga mo canñe entsangcá chamotsemnana, chënga tempcá tsabá Bëngbe Bëtsáftaca chamotsatsmënama.

¹⁷ Cristo quem luaroye tojánabo tsabe noticiënga jabábuayenama, tempcá tsabá Bëngbe Bëtsáftaca jtsatsmënama. Cha quem tsabe noticiënga tojanabuayená tsëngaftanga chë ndoñe judiëngbioye, chë Bëngbe Bëtsá ndoñe šmonjanábuatmënga, y chë judiëngbioynaca, chë Bëngbe Bëtsá imojanábuatmënga. ¹⁸ Er chábeyeca, canñanñënga y inñënga montsobena chë Taitábioye jobéconana, er bënga nyetscanga cachca espíritu bëngbe ainaniñe mondbomna, chë Uámana Espíritu. ¹⁹ Chíyeca tsëngaftanga, Bëngbe Bëtsabe entsanguentše ndoñe quešmátsmëna mo inñe luarocana ashjajnëngcá, y ni mo cachëngbe yebnentše ndoyenëngcá, tondayama derecho ndbomnënga. Inñëtšá endmëna; tsëngaftanga derecho šmondbomna cachcá ntšamo Bëngbe Bëtsabe entsanga mondbomncá, y Bëngbe Bëtsabe básënga šmondmëna. ²⁰ Jesucristo y chabe entsanga mondmëna mo canñe jebna yebncá. Jesucristbe ichmónënga y chë Bëngbe Bëtsabe juabna oyebuambnayënga mondmëna mo chë ndëtšbënga ndayñe chë yebna tojtsëcuatjoncá; tsëngaftanga ošbuáchiyënga šmondmëna chë jebna yebnentša soyëngcá, y cach Jesucristo

mo chë más uámana luarentşe uashacuana ndëtšbecá. ²¹ Quem más uámana luarentşe uashacuana ndëtšbeñe, nyetsca chë bëts yebnentša soyënga jtsëcuatjonana, y tsbanánye más tmojatsjebëse, chë bëts yebnentşe tsëm jebna sóynaca chiñe jtsëcuatjonana. Cachcá Cristo, mo chë más uámana luarentşe uashacuana ndëtšbecá, jtsamana nyetsca chábeñe ošbuáchiyënga cháftaca cányiñe mo canyáca chamotsemnana, y ínÿengnaca cachcá chamotsemnana. Y nyetsca ošbuáchiyënga Crísoftaca cányiñe mo canyáca tmojtsemna ora, chënga jtsemnana mo Bëngbe Utabnabiana canye bëts yebna jebncá, chábioye jtsatschuanayama. ²² Y tsëngaftanga Efesoca ošbuachiyëngbiámnaca Cristo entsama, chë ínÿe chábeñe ošbuáchiyëngaftaca mo canye entsangcá chašmotsemnana. Y chë Uámana Espíritu bëngbe ainaniñe yojtsiyénayeca, bënga nyetscanga cányiñe mondmëna, mo canye bëts yebncá ndayentşe Bëngbe Bëtsá yoyena.

3

Pablo Jesucristbe trabajo yojanbonÿena, chë ndoñe judiëngbeñe jamama

¹ Chca, atşe Pablo utamená sëntsemna, Cristo Jesusbiana soyënga entsanga abuaiyinye causa, tsëngaftanga chë ndoñe judiëngbe tsabiama. ² Er tsëngaftanga ya cmontsamna jtsetatšëmbuama, Bëngbe Bëtsá tsëngaftangbe tsabiama juabna yobomnana; y chca, chë trabajo atşe šojabonÿé, tsëngaftangbe tsabiama jamama. ³ Tsëngaftángnaca cmontsamna jtsetatšëmbuama ndayá Bëngbe Bëtsá šojinÿinÿé, ntšamo cha jamama tempo tojanjuabocá, pero entsanga chca ndoñe tonjaninÿanyé, y chë soyama ya batsatema tcbonjubaábiana. ⁴ Chašmojualiá ora, šmochanjátatšëmbona Cristbe soyënga šosertánama, chë tempo ndocná yonjanábuatma soyënga, ⁵ chë tempo Bëngbe Bëtsá ndocnábioye tbonjaninÿinÿé soyënga; pero mora cha tojinÿanyé, Jesucristbe ichmónënga nÿe Bëngbe Bëtsabiama oservénëngbioye y Bëngbe Bëtsabe juabna oyebuambnayëngbioye; y cha chca tojama chabe Uámana Espíritoftaca. ⁶ Ndayá tempo Bëngbe Bëtsá ndoñe tonjaninÿanyecá mëntšá endmëna: chë ndoñe judiënga Jesucristbe tsabe noticiënguiñe chamojtsošbuaché ora, cachcá ntšamo chë judiënga ošbuáchiyënga Bëngbe Bëtsábicana mochjoshachiñcá, chëngnaca chábiocana mo otocancá chë soye mochanjóyëngacñe. Chënga mo cach judiënga ošbuachiyëngcá, Cristo mondbomna mo chëngbe mandayacá. Y chca Cristo endmëna mo bestšašcá y chënga nyetscanga mondmëna mo cachabe cuerpentša soyëngcá. Chë ndoñe judiënga ošbuáchiyënga mochanjóyëngacñe lempe ntšamo Bëngbe Bëtsá chë judiënga ošbuáchiyënga tojašebuachenacá. Chca echántsemna chë ndoñe judiëngaftaca, chënga Cristo Jesúsëftaca cányiñe mo canyáca bëtsemnayeca.

⁷ Masque ndoñe šonjanomerecena, mo ndayá cuafjatsetacá, Bëngbe Bëtsá šonjanábuayana cha jtseservénama, tsabe noticiënga entsanga jtsabuaiyinye; y cha átšëftaca chca tojanma chabe obenánaca. ⁸ Atşe nyetsca chë Bëngbe Bëtsabe entsanguentşe sëndmëna chë más nduamaná; pero Bëngbe Bëtsá bëts pavor šontsebema, šonjalesenciá chë Cristbe bëtscá tsabe soyënga chë ndoñe judiënga jábuayenama. Chë Cristbe soyënga tša bëtscá endmëna, y chca, quenátopodena chë soyënguentsana lempe jtsabuatmana. ⁹ Y chë trabajo šonjabonÿé jamama, nyetscanga botamana jinÿama chamotsobenama ndayá Bëngbe Bëtsá yochjama, ndayá cachá, chë nyetsca soyënga tojamá, tempscana yojanjuabnacá. Mëntscoñama Bëngbe Bëtsá chë soye ndocnábioye tbonjinÿinÿé, pero mora aíñe. ¹⁰ Chca, Crísteñe ošbuachiyëngbeyeca, mora chë celoca mándayënga y obenana bomnënga, chamobená juabuátmanana nyets osertánana ntšamo Bëngbe Bëtsá yobomncá. ¹¹ Bëngbe Bëtsá chca tojama, ntšamo cachá yojanjuabnacá nyetsca tescama jamama, y chca cha tojama Jesucrísoftaca, Bëngbe Utabná. ¹² Bënga Crísoftaca cányiñe mo canyáca mondmëna, y chábeñe mondošbuachéyeca, bënga montsobena Bëngbe Bëtsábioye jobéconama tondayama ntjatauatjca, y corente jtsetatšëmbëse cha ndoñe chašondubatema. ¹³ Chíyeca atşe cbontsaimpadana ndoñe

chašmondëtsajbaná ainaniñe añemo bomnana, atše séntsesufrina causa, er chë tšëngaftangbe tšabiamana tsësufrintëšana, tšëngaftangbiama tšabe soyënga endóbocana.

Cristbe bonshánana

¹⁴⁻¹⁵ Y chca, Bëngbe Bëtsá, chë Taitá, ndábentšana nyetsca pamíllanga celoca y quem luarentse uabaina imóyëngacañe, chabe delante joshaméntšase, ¹⁶ séntseimpadana, chabe bëtscá uámana bomnánaca chaoma, tšëngaftanga ainaniñe obenana y bëts añemo chašmotsebonnama, chabe Espíritbeyeca, ¹⁷ y tšëngaftanga Crístbeñe jtsošbuáchiyëse, mua tšëngaftangbe ainaniñe chaotsiyenama. Bëngbe Bëtsánaca séntseimpadana, cha y ínÿenga nyets ainánaca jtsababuánÿeshanëse, ¹⁸ tšëngaftanga y nyetsca Bëngbe Bëtsabe entšángnaca tšëngaftangaftaca, chašmotsobena josértama Crístbe bonshánana bëngbiama tša bëtscá yomnama. Nderado nda tojontsé chabe bonshánana jatšëmbonana mo canÿe soye cuaftsemncá, cha ndocna te nanjobenaye jtsetatšëmbuana tëntsoye ndayëntscoca yomna y nÿanëjoye ndayëntscoca, jashenoye ndayëntscõe y tsbanánoye ndayëntscõe yomna. ¹⁹ Atše séntseimpadana tšëngaftanga chašmobená chë bonshánana juabuátmanana (chë bonshánana puerte bëtscá endmëna causa, bënga ndocna te quemochatobenaye josértama ntšamo chë soye lempe yomnana). Pero séntseboše, tšëngaftangbe ainaniñe nÿe Bëngbe Bëtsabe soyënga chaotsemna y tšëngaftanga chašmotsiyena jtsamëse, ntšamo tšëngaftanga chašmotsamama Bëngbe Bëtsá yojuabnacá.

²⁰ Y mora, nyetscanga Bëngbe Bëtsá chamotsatschuaná. Cha obenana yobomna ntšamo bënga tmojtsojtjanañe o tmojtsejuabnama más soyënga jamama, chabe puerte bëts obenánaca; y chë obenana bëngbe ainaniñe yojtsemánda y yojtsama bënga ainaniñe sempre ošbuáchiyana chamotsebonnama. ²¹ ¡Entšanga Bëngbe Bëtsá chamotsatschuaná nyets tempo y nyetsca tescama, ndayá Crístbeñe ošbuáchiyënga tmojtsamama y cach Cristo tojamámnaca! Chca chaotsemna.

4

Uámana Espíritbeyeca bënga cánÿiñe mo canÿacá jtsemnana

¹ As, atše chë cárceloye utamená, Bëngbe Utabnabiama trabájaye causa, tšëngaftanga cbontsaimpadana, ndëmuanÿenga Bëngbe Bëtsá tcmojáchembo chabe entšanga chašmotsemnana, sempre chašmotsiyena mo chë entšangcá ndëmuanÿenga Bëngbe Bëtsá cach soyama tojánachembo y chca imomerecena. ² Cada ona chamotsenojuabná mo chë ínÿenga chabiamana más uámanënga tmojtsemncá, y nyetscángbioye puerte bonshanánaca šmochtsobátmana, y bëtscá bonshánana jtsebonnëse šmochtsenëuantana; ³ sempre šmochtsejuabnaye y šmochtsentšena tšëngaftanga nyets tempo cánÿiñe mo canÿacá chašmotsemnana, nyetsca tšëngaftanga natjëmbana jtsemnëse. Y tšëngaftanga šmontsobena cánÿiñe mo canÿacá jtsemnana chë Uámana Espíritbeyeca. ⁴ Bënga Jesucrístbeñe ošbuáchiyënga bëtsemnayeca mondmëna mo cach cuerpentšëngcá, chë Crístbe cuerpo, y cachca Espíritu bënga nyetscanga ainaniñe mondbomna. Bëngbe Bëtsá šojáchembo, bënga chábeñe jtsošbuáchiyëse, nyetscanga cachcá šochjátšatayama chamotsobátmanama. ⁵ Bënga nyetscanga cach Utabná mondbomna, cachca ošbuáchiyana Jesucrístbeñe mondbomna, y bënga nyetscanga uabáinënga mondmëna chca betsošbuáchiyama. ⁶ Bënga ošbuáchiyënga nyetscangbiama cach Bëngbe Bëtsá y Taitá endmëna. Cha bëngbe amëndayá endmëna, chabe obenana nyetscángbeñe jtšinÿnana, y nyetsca bëngbe ainaniñe chabe Espíritu endmëna.

⁷ Pero bënga, cada ona tšetana obenana tojóyëngacñe, tšabe soyënga jamama, ntšamo Cristo jatšatayama tojanbošencá, chábeñe ošbuáchiyënga jujabuáchama. ⁸ Chíyeca, Bëngbe Bëtsabe uabemana palabrenguiñe Jesucristbiama mëntšá endayana:

Cha celoye tontantsjuá, y cháftaca tonjanéyamba nyetsca chabe uayayënga, chë tojánayëñjananga, y chabe entšángbioye obenana tonjanatsatá, tšabe soyënga jamama ca.

⁹ ¿Y ndayá yojsayana chë “cha tontantsjuá ca”? Chca entsayana co Cristo natsana, quem luaroye tojánastjango ca. ¹⁰ Y Cristo, chë tojanastjanguá, cachá endmëna nda celoca chë más tsbanánoye tojtantsjuá; chca, canye ora nyetscañe cha chaotsemnama. ¹¹ Y cachá, chë tšabe soyënga jamama obenana tojanatsatá ora, tojanma chábeñe ošbuáchiyënguentše chamotsemna ínÿengna chabe ichmónënga, ínÿengna Bëngbe Bëtsabe juabna oyebuambnayënga, ínÿengna tšabe noticiënga Cristbiama abuyiynayënga, y ínÿengna ošbuáchiyënga anÿenënga y Bëngbe Bëtsabe soyëngama abuatambayënga. ¹² Cristo tojanabacacangna chabe entšángbioye mochjanëjabuache, cha tojanabanyé trabajo chënga chamotsamama, y nyetsca ošbuáchiyënga, chë nyetscanga cánÿiñe mondmëna mo Cristbe cuerpcá, cada te más ošbuáchiyana y bonshánana chamotsebomnama, ¹³ bënga nyetscanga chamobenantscuana cachca ošbuáchiyana Jesucristbeñe jtsebomnama, y Bëngbe Bëtsabe Uaquiñabiama nyetscanga lempe cachcá jtsetatšëmbuama. Chca, bënga mochanjashjache jtsemnama lempe ntšamo Cristo yomncá, mo bëtsétsanga bëtscá juabna bomnëngcá, ¹⁴ y ndoñe ñye mo basengcá, Bëngbe Bëtsabe soyëngama jtsetatšëmbuama. Chë soyënguiñe ya ndoñe más ñye mo basengcá quemochátsmëna, ndëmuanÿënga paselo jáingñama yomna. Mo canye barquësha ñye ndaye bínÿiacnaca tojtsëyambancá, básefta entšanga ñye ndaye buatëmbana soye tmojatüencá jatsyeunanana; bënga ndoñe chca quemochátsmëna, ya ndoñe más bëngbe juabna quemochatstróca, ñye ndaye tmojatüena tsëm sóyeca, ínÿengbioye áingñayënga. Chënga becá montsetátšëmbo ntšamo entšanga jáingñana, y montseboše chë montsabuatambá bostero soyënga bënga jtseyeunanama. ¹⁵ Chamna, chë Bëngbe Bëtsabe ndegombre soyëngama bonshanánaca jtsóyebuambnayëse, šontsamna jashjáchana jtsemnama lempe ntšamo Cristo yomncá. Cha bëngbe amëndayá endmëna, cachcá ntšamo bestšaše chë cuerpentša soyënga jtsemandayancá. ¹⁶ Mo canye bestšašcá, chëse jamana nyetsca chë cuerpentša soyënga ndayentše chamuenefñama y chiñe jobónjuama chamotsobenama, chë cuerpo saná chaotsebomnama jtsamëse, chca, nyets cuerpo tšabá chaóbochema, cachcá Cristo, chë nyetsca ošbuáchiyëngbe amëndayá, chabe obenánaca jamana chënga cada te más ošbuáchiyana y bonshánana chamotsebomnama. Cada cuerpentša soye tojtsama ntšamo chë soye chaotsamama tomncá, as nyets cuerpo tšabá jobóchana; cachcá, ošbuáchiyënguentše cada ona tojtsama ntšamo jamama tbojtsemncá, as nyetsca ošbuáchiyënga cada te más ošbuáchiyana mochántsebomna, puerte jtsebobonshánëse.

Crístoftaca cánÿiñe mo canÿacá jtsemnëse tsëm vida šmochtsebomna

¹⁷ Mëntšá entsemna ntšamo cbontsëtsëtsnacá, y Bëngbe Utabná endmëna nda tojama atše mando chaitsebomnama tšëngaftanga chca jáuyanama: Ndoñe más šmattsiyena bacna soyënga jtsamëse, mo chë Bëngbe Bëtsábioye nduabuátmënga mondbetsamcá; chënga jtsiyenana jtsamëse ntšamo cachëngbe ndoservena juabnënga tojtsamëndacá. ¹⁸ Chëngbe juabnoca obenana mondbomna ñye ndoñe ndegombre soyëngama josértama. Chënga ndoñe quemátsbomna chë Bëngbe Bëtsábocana yóbocana tšabe vida, er chënga ndoñe quematsleséncia chë Bëngbe Bëtsabe soyënga chëngbe ainaniñe chaómashënguama; y chca endmëna, er chënga tmojajuabó y tmojama chë Bëngbe Bëtsabe buayenana soye chëngbe ainaniñe tondaye chaondómashënguama. ¹⁹ Chënga bacna soyënga tmojtsama ora, tondayama ntsenócochinÿenana; chënga nyets tempo jesentsénana nyetsca bacna soyënga amana, y chca jtsamana tondayama ntjatenojuabnaycá.

²⁰ Pero chca ndoñe quenjatsmëna ntšamo tšëngaftanga Cristbe soyëngama šmojanatsjinÿe y ntšamo chábioye šmojanabuatmancá. ²¹ Ndegombre tšëngaftanga chabiamna šmojanuena y ínÿënga tcmojanabuatambá mo chábeñe ošbuachiyëngcá

y ntšamo chë ndegombre soyënga Jesucristbeñe endbinýncá. ²² Chcasna, ntšamo tšëngaftanga šmojanjuabná, šmojansentina y šmojanamcá Jesucristbeñe cabá ndošbuachená ora, mora lempe stëtsoye šmochjaquéda; ntšamo tempo tšëngaftanga šmojanjuabná, šmojansentina y šmojanamcá, canýe ondbiamnaye juabnentšana yojóbocana, tšëngaftanga bacna soyëngama juabnëngaca mandánënga jtsemnëse, y chë juabnënga tšëngaftangbioye cmojánaingñaye. ²³ Tšëngaftanga cmontsamna tšëngaftangbe juabniñe tsëm y tšabe juabnënga jtsebmomnana. ²⁴ Tšëngaftanga cmontsamna jashjáchana mo tsmëma entšangcá jtsemnama, y chë ntšamo tempo šmojanamcá mora ndoñe cachcá chašmondétsamama. Chca, tšëngaftanga šmochanjashjache jtsemnama ntšamo Bëngbe Bëtsá yomncá. Bëngbe Bëtsá chca tsmëma entšangcá tcmojábiamna, tšëngaftanga chašmotsiyenama jtsamëse Bëngbe Bëtsabe bominiñe tšabá yomna soyënga y chábioye jadórana soyënga, chë ndegombre soyënguentšana óbocana soyënga.

²⁵ Chcasna, ya ndoñe más šmattsebohero, ndayá cada ona cháuyana ndegombre soyënga cachacá Jesucristbeñe ošbuachiyáftaca, er nyetscanga cánýiñe mondmëna mo nýe canýe entšangcá. ²⁶ Nderado chacmojetëna, tcmojetëna causa ndaye bacna soye ndoñe šmatjama. Pero ndoñe šmatjaleséncia bënama chacmetëna y ndoñe nyets te chacmondetëna. ²⁷ Ndoñe šmatjaleséncia Satanás ndayánaca tšëngaftangaftaca chaomama.

²⁸ Chë yojanatbëbaná chauajbaná atbëbanama y jatrabájama chaontsé; cachabe cucuátseca tšabe trabajo chaotsóboma, chca, ndayánaca cha chaotsebmomnana chë ujabótënga jatsatayama.

²⁹ Bacna palabrënga ndoñe šmattsichamo, pero aíne tšabe palabrënga y nýa chorsca ujabótama palabrënga, chë inýe entšangbioye jujabuáchama más Cristcá chamotsemnama, chënga Bëngbe Bëtsábiocana tšabe bendicionënga chamóyëngacñama, chë ndayá chašmojtsetsëtsná sóyeca. ³⁰ Ndoñe šmattsama soyënga, Bëngbe Bëtsabe Uámana Espiritu chabongmema. Bëngbe Bëtsá tojama Uámana Espiritu tšëngaftangbe ainaniñe cháumashënguama, y chca, tcmojanainýnaná chabe entšanga bëtsemnayeca, chë yochjóshjango tescama, Bëngbe Bëtsá chabe entšanga nyetsca tescama yochjatsebacaye orscama.

³¹ Inýëngbiamna bacna juabnënga ainaniñe ndoñe chašmondëtsebmomna, etonánënga ndoñe chašmondëtsemna, ni inýëngaftaca ndoñe chacmondetëna. Inýëngbioye ndoñe chašmondétsabuachembuana, inýëngbioye ndoñe šmatjoyánguango y ndaye bacna sóynaca ndoñe šmattsama. ³² Nyetscángaftaca tšábënga šmochtsemna, nyetscanga šmochtsenlastemana y šmochjenperdóna, ntšamo Bëngbe Bëtsá, Cristbeyeca tcmojaperdonacá.

5

Ntšamo yomna Bëngbe Bëtsabe básënga chamotsiyenama

¹ Tšëngaftanga, Bëngbe Bëtsabe bonshana básënga quetsomñecá, nýa šmochtsentšena cachacá jtsemnama. ² Smochtsiyena nyetsca soyënga bonshanánaca jtsamëse, ntšamo Cristo šojanababuanýeshancá; chca, cha chabe derecho vida jtsobomñama cachcá tojanonýá y bëngbiamna tojanóbana. Y ntšamo Cristo tojanmcá, yojamna Bëngbe Bëtsábioye jëtschuayama, y chabe bominiñe tša tšabá yojtsemna, mo ndaye ora Bëngbe Bëtsá oyejuayá jóyëngacñana ndayá tcojóbana y altaroca tcojajuinýese, y chë soye botamana jtsonguëtsiyana.

³ Tšëngaftanga, Bëngbe Bëtsábënga šmomnënga, ndoñe quecmátamna shembása o boyabásaftaca bacna soyënga jtsamana, ni chca játamama jtsejuabnayana y jtsebošana, y chë nýe yapa jésebošana más soyënga inýëngbiamna jtsebmomnana cach ndoñe. Ni chë soyëngama ndoñe šmattsóyebuambnaye. ⁴ Bacna soye ndoñe šmattsóyebuambnaye, ni corente ntjenojuaboycá, ni nýe ntšámncana bacna soye jenbotatšëmbonana cach ndoñe, er chë soyënga tšëngaftangbiamna ndoñe tšabá ntsemnana. Chca játamamna, más tšabá,

Bëngbe Bëtsá šmochtsatschuanaye. ⁵ Er tšëngaftanga ya šmondétatšëmbo, ndocna chë shembása o boyabásaftaca bacna soye amá, ndocna chë nÿe chabe bacna juabnëngaca soyënga jtsamama oyená, o chë nÿe más soyënga ínÿengbiama jtsebomnana bošá y amá (chca jtsayanana chabiama más iuámana soyënga jtsebomnana, Bëngbe Bëtsábioye jatsbobonshánama), chca amënguentsana ndocná tondaye queochatóyëngacñe ndayá Bëngbe Bëtsá chabe entšángbioye jatšatayama tojašebuachenantšana, Cristo y Bëngbe Bëtsabe amëndayoca. ⁶ Ndocná chacmondaingñé ndoñe ndegombre tondmëna palabréngaca, bacna soyënga chašmotsamama, er chë causa chë uabouana castigo echanjobaye, ndáyeca Bëngbe Bëtsá chábioye ndëyeunanënga yochjácastigaye. ⁷ Chíyeca, chca amëngbe soyënga tondaye šmattsama.

⁸ Tempo tšëngaftanga šmojanijena bacna juabnënga jtsebomnëse y bacna soyënga jtsamëse, mo ibetiñe cuaftsiyencá, pero mora Bëngbe Utabnáftaca cánÿiñe mo canÿacá bëtsemnayeca, chabe soyënga šmontsetátšëmbo y sempre šmondétsemna cháftaca, chë entšangbe juabnënga binÿnayáftaca. Smochtsiyena jtsamëse mo chë binÿnayabe entšangcá. ⁹ Chë binÿnayábeyeca entšanga tšabe soyënga jtsamana, chë Bëngbe Bëtsabe bominiñe tšabá yomna soyënga, y ndegombre soyëngnaca. ¹⁰ Nÿa šmochtsentšena soyënga jamama, Bëngbe Bëtsá oyejuayá chaotsemnana. ¹¹ Chë mo ibetiñe cuaftsiyencá oyenëngbe bacna soyënga tondayama ntoservénana, y tšëngaftanga chca ndoñe šmattsama. Chamna, chëngbioye šmochjínÿanjÿe chënga ndoñe tšabá tmonjamama. ¹² Ndegombre, nÿe chë ndayá chënga mo iytëmencá tmojamama jóyebuambayama ya cuantsëuatja; ¹³ pero nÿetsca soyënga binÿniñe tmojacjá ora jtsopodénana tšabá jinÿama ntšamo ndegombre tomncá. Cachcá, ntšamo entšanga tmojamcá chë binÿnayá chaojinÿanjÿé ora, echantsopodena jtsotatšëmbuama ntšamo chë soyënga yomnana; ¹⁴ er ndayánaca binÿniñe tojtsinÿinÿena, jtsopodénana jinÿama ntšamo ndegombre chë soye tomncá. Cachcá, ntšamo entšanga iytëmencá tmojtsamcá chë binÿnayá chaojinÿanjÿé ora, chënga mochántsetatšëmbo bacna soyënga imojtsamama. Chíyeca mëntšá jtsichámuana:

Botamana cochjájuaboye, aca ndoñe quecátobena jenomándana, mo canÿa cuaftsomañcá; chë bacna soyënga ama causa, Bëngbe Bëtsabe bominiñe mo obanëngcá imomnënguentsana šmochtsajuánañe, y Cristo acbe juabnënga echantsebínÿnaye ca.

¹⁵ Chcasna, šmochtsantješna ntšamo tšabá yomncá jtsamëse chašmotsiyenama. Ndoñe šmattsiyena jtsamëse, mo chë Bëngbe Bëtsabe soyëngama ndosertanëngcá, pero aíñe chë chca soyëngama osertanëngcá. ¹⁶ Lempe ntšamo chašmojobenacá nÿets tempo tšabe soyënga šmochtsama, er quem tempo entšanga yapa bacna soyënga montsama. ¹⁷ Ntjenojuaboycá ndoñe šmattsama, mo chë ndosertanëngcá. Pero aíñe bëtscá šmochtsentšena ndayá Bëngbe Utabná jamama yobošcá chacmósertama. ¹⁸ Ndoñe šmattsótmenaye, er chë soye entšábioye juanatsana jenomándama ndoñe chaondëtsobenama; chamna, šmochjama Uámana Espíritu sempre y bëtscá tšëngaftangbe ainaniñe chaotsemándama. ¹⁹ Smochjenatsëtsaye Salmos librëšañe enduábemana cantënga jacántase, Jesucristbe soyëngama cantëngaca y chë Bëngbe Bëtsabe Espíritu inétsama tšëngaftanga chašmotsobena jacántama soyëngaca; chca, nÿets ainánaca Bëngbe Utabnabiama šmochjacántaye y cha šmochtsatschuanaye. ²⁰ Nÿets tempo y lempe ntšamo cha tojamama Bëngbe Bëtsá chë Taitá šmochtsatschuanaye, Bëngbe Utabná Jesucristbiajana.

Ntšamo yomna canÿe yebnentsënga chamotsemnana

²¹ Nÿetscanga šmochtsenëyeunana, tšëngaftanga Crístbioye puerte šmorrespetánayeca.

²² Shémanga, šmochtsatšëmbo tšëngaftangbe boyanga chë yebnentsa mándayënga imomnana; y nÿets tempo chca šmochtsama, Bëngbe Utabná chašmotsobedecénama.

²³ Er boyá endmëna shembe mandayá y inyëná, ntšamo Cristo chë ošbuáchiyëngbe mandayá y inyëná endmëncá. Cha chënga tojatsebaca y mora cha chënga entsamënda, mo chë bestšaše nyets cuerpo jtsemandayancá; ²⁴ y chca, ntšamo chë ošbuáchiyënga, Cristo chëngbe amëndayá yomnama imotatsëmbcá y chca jtsamana, cachcá, chë shemágnaca entsamna jtsemnana nyetsca soyënguiñe chëngbe boyángaftaca.

²⁵ Boyanga, tsëngaftangbe shémanga šmochtsababuányëshana, ntšamo Cristo chábeñe ošbuáchiyënga yojanababuanyëshancá, y chca, chabe derecho vida jtsobomñama cachcá tojanonjá y chëngbiana tojanóbana. ²⁶ Chca tojanma, chënga chabe entsanga y puerte tsábenga jábiamama; y chënga tmojánenabaye ora, tmojaninýanýe Bëngbe Bëtsá chëngbe bacna soyënga tojánabuajuanama, y chabe delante tsábenga chamotsemnana cha tojanmama. Cha chca tojanma, er chënga chábeñe imojtsanošbuaché, chabiana buayenana soyënga tmojanuena ora. ²⁷ Cha chca lempe tojanma, chë ošbuáchiyënga japróntayama corente tsábenga y uámanënga cachabiana chamotsemnana, ndocna bacna soye ndbomnënga, ni ndocna entsá chaondobená jayanama chënga imomna chë ndoñe tsábá tmonjamënga ca, ni ndocna inye cachca sóyeca. ²⁸ Ntšamo canye boyá cachabe cuerpo endbetsebobonshancá, cachcá cha bontsemna chabe shémbioye jtsebobonshánana. Nda chabe shémbioye tbojtsebobonshana, cachábioye jtsenobobonshánana, er chata cánýiñe jtsemnana mo nye canye entsá cuenta. ²⁹ Er ndocná cachabe cuerpo jtsáboyënjana, ndayá saná janguangoñana y jtsinýenana, ntšamo Cristo bënga chë ošbuáchiyëngaftaca endbetsamcá; ³⁰ er bënga nyetscanga cánýiñe mondmëna mo chabe cuerpo cuaftsemncá, y bënga mo chabe cuerpentša soyënga cuaftsemncá. ³¹ Ntšamo Bëngbe Bëtsabe uabemana palabrënguiñe endayancá: “Chíyeca, boyabása chabe taitá y chabe mamá echanjésabashejuana chabe shémaftaca jenútanama, y chë útata mo canýacá bochantsemna ca.” ³² Chë soyënga josértama puerte totcá comna, pero atše šcuayana, chë soye entsoyebuambná ntšamo Cristo chábeñe ošbuáchiyëngaftaca yomnama. ³³ Pero morna, tsëngaftanga cada ona cachabe shémbioye chabotsebobonshana, ntšamo cachá iuenobobonshancá, y shema boyábioye ndoñe stëtsoye chabondëquedá.

6

¹ Básenga, Bëngbe Utabnáftaca cánýiñe mo canýacá bëtsemnayeca, tsëngaftangbe bëtšétsangbioye šmochtsayaunana, er chca jamana tsábá endmëna. ² Moisesbe leyiñe canye mando endmëna, y chentše endmëna chë Bëngbe Bëtsabe natsana mando, ndayentše cha tojašbuachená tsabe bendicionënga jamama: “Acbe taitá y acbe mamá ndoñe stëtsoye catjéftsaquédaye, ³ tsabe vida chacuetsobomñama y quem luarentše bayté chacuetsiyenama.”

⁴ Taitanga, ndoñe šmattsama tsëngaftangbe básenga chautënama; más tsábana, chënga šmochtsabëchaye jtsabuátambayëse y jucácanëse, ntšamo Bëngbe Utabná endbetsabu-atambaycá.

⁵ Tsëngaftanga, chë nyets tempo nye ínýabiama oservëngënga, tsëngaftangbe nduiñënga šmochtsayaunana; chca šmochtsama puerte respétoca, bëtscá cuedádoca y nyets ainaniñe tsabe juabnéngaca, mo cach Crístbioye cuaftseservencá. ⁶ Y chca chë nduiñëngbioye šmochtsaservena, ndoñe nye chënga chacmojtsënýa ora, mo nda nye entsangbe delante tsábá joquédama cuaftsebošcá, ndayá Crístbe oservëngcá, chënga nyets ainánaca jtsamana ntšamo Bëngbe Bëtsá tojtsebošcá. ⁷ Nyetsca trabajotémënga šmochtsama nyets tsëngaftangbe añémoca, mo Bëngbe Utabnabiama cuaftsetrabajacá, y ndoñe nye entsangbiana. ⁸ Er tsëngaftanga ya šmondëtatšëmbo, cada ona, nyets tempo nye ínýabiama trabajayá o nye cachabiana trabajayá tomna, ntšamo tsabe soyënga tojamcá Bëngbe Utabnábiocana yochjóyëngacñe.

⁹ Y tsëngaftanga, ndëmuanýëngbiana ínýënga nyets tempo imoservena, cachcá tsábá chëngaftaca šmochjamna, tondayama ntsaútatjnayëse. Smochtsenójuabnaye, Bëngbe

Utabná chë celoca endmëná, tšëngaftanga y chëngbe mandayá yomnama, y chabiamana nÿetscanga cachcá monduámama.

Ndayá Bëngbe Bëtsá entsanga tojatsatá Satanasbiamana jenëuyanama

¹⁰ Y morna, Bëngbe Utabnáftaca cánÿiñe mo canÿacá jtsemnëse, ainaniñe bëts añemo šmochtsebomna, chë Bëngbe Utabnabe bëts obenanentsana óbocana añemo. ¹¹ Mo canÿe soldadca, ba soyënga jtochëtjuana chë tmojtsentsjananga ora uayayëngbiamana jenëuyanama, tšëngaftángnaca cachcá, nÿetsca chë Bëngbe Bëtsá cmojatsatá soyëngaca šmochtseprontana jenëuyanama, tšëngaftanga jáingñama Satanás ntšámnaca tojtsama ora, ndoñe chacmondáyënjanama. ¹² Er bënga ndoñe quemuatenojuerzana cach quem luarentša entsángaftaca jenëyënjanama, ndayá bacna espíritënga mando bomnëngaftaca; bacna espíritënga obenana bomnëngaftaca; y quem luarentša entsanga, chë bacna juabna bomna causa y Bëngbe Bëtsabe soyënga nduabuatma causa, mo ibetiñe cuaftsoyencá oyena entsángbioye amëndaye espíritëngaftaca; y chë tsbanánoca luarënguñe imomna y bacna soyënga chaotsebínÿnama ama espíritëngaftácnaca. ¹³ Chíyeca, lempe ntšamo Bëngbe Bëtsá cmojatsatáca šmochjójyëngacñe y chë soyënga jtsamëse šmochtsiyena jtseprontánama, mo canÿe soldado jenëuyanama y jáyënjanama bëtsca soyënga tojtochëtjca. Chca šmochjama, chë uayayá Satanás tšëngaftangbioye jáingñama chaojtsama ora ndoñe chacmondáyënjanama, y jenëuyanama lempe jtsamëse, chašmobená cha jayënjanama.

¹⁴ Mo canÿe soldadca, jabuache jtasnayana y cochaca canÿe morocho soye jenácochjatsana jtsevalentiamana y ndoñe chamondëyënjanama, tšëngaftángnaca cachcá, ntšamo ndegombre yomncá jtsamëse šmochtsiyena, mo chë jabuache cuaftasnacá, y chë Bëngbe Bëtsabe bominiñe tšabá yomna soyënga jtsamëse, mo chë morocho soye cochaca cuafjenacochjatsca, chca, Satanás tšëngaftangaftaca tondaye chaondobená jamama. ¹⁵ Mo canÿe soldadca jtoshëcochëtjuana betscó jobónjuama jtseprontánama, tšëngaftángnaca cachcá, Bëngbe Bëtsabe obenánaca sempre šmochtseprontana jtsabuayiyayama ntšamo Bëngbe Bëtsá inétsama entsanga tempcá tšabá cháftaca chamotsatsmënama. ¹⁶ Canÿe soldado escudo jtsebomnana chë uayayabe uajuinÿinÿana flechëjuangá chabe cuerpiñe ndoñe chaonduámashënguama. Cachcá, tšëngaftanga cmontsamna Jesucristbeñe puerte jtsošbuáchiyana, mo escudo cuaftsebomncá, chca, chë bacna soyënga mandayá Satanás tšëngaftangaftaca tondaye chaondobená jamama, tšëngaftangbe ošbuáchiyana jabuajuánama cha tojtsama ora. ¹⁷ Mo chë soldadca, canÿe morocho buchtsanëse tojtabuchëtsëse chabe bestšaše jenëuyanama, tšëngaftángnaca cachcá, sempre šmochjésejuabnaye Bëngbe Bëtsá cmojätsebacama, y chë juabna cmochanjújabuache, mo canÿe morocho buchtsanëse cuaftsabuchëtsancá. Mo canÿe soldadca, chë uayayábioye jayënjanana, chabe espadëjaca japéliase, cachcá tšëngaftanga, Bëngbe Bëtsabe palabra šmochtsóyebuambnaye Satanás jayënjanama. Uámama Espiritu jtsamana, tšëngaftanga Bëngbe Bëtsabe palabra chašmotsebomnama. ¹⁸ Nÿets tempo chë Uámama Espiritbe uajabuáchenanaca Bëngbe Bëtsáftaca šmochtsencuëntaye, lempe ntšamo Bëngbe Bëtsáftaca jencuëntama yomncá y chábioye jtseimpadánëse. Yejuana šmochtsenójuabnaye ntšamo šmojtsichámuama, Bëngbe Bëtsáftaca chašmojtsencuënta ora, y chca šmochjama Bëngbe Bëtsabeñe sempre jtsobátmanëse, y Jesucristbeñe ošbuáchiyëngbiamana nÿetscangbiamana cha šmochtseimpadana.

¹⁹ Atšbiámnaca Bëngbe Bëtsá šmochtseimpadana, atše jóyebuambayama chajontsé ora, cha chë buayenana soye chašúyanama; y atše chayobená tondayama ntjatauatjca jóyebuambayana, y chca, entsanga chayinÿanÿé Jesucristbiamana tšabe noticiënga, ndayá chënga tempo ndoñe monjántatšëmbo. ²⁰ Bëngbe Bëtsá šojichmó mo canÿa chabe cuenta oyebuambnayacá, chë buayenánama entsángbeñe jóyebuambayama, y chca bétsamama,

mora atše utamená sěntsemna. Atšbiamá Běngbe Bětsá šmochtseimpadana, atše chay-obenama Cristbe buayenánama tondayama ntjatauatjca jóyebuambayana, ntšamo atše jamama šojtsemncá.

Pablo chěnga jtadiósoftanama

²¹ Tíquico, Jesucristbeyeca běngbe bonshana catsata y canye entšá tšabe palabra bomná, Běngbe Utabnabe trabajo jamama oservéniñe, ntšamo atše stsemnama y ndayá stsamama tšěngaftanga chašmotsetatšěmbuama, lempe cmochanjácuntaye. ²² Chama cha tšěngaftangbioye sěnjichmó, ntšamo muentše fstsemnama chacméyanama, y tšěngaftanga ainaniñe añemo chašmotsebomnama chaomama.

²³ Atše sěntseimpadana Běngbe Bětsá chě Taitá y Běngbe Utabná Jesucristo, chaboma chě Jesucristbeyeca catsátangbe ainaniñe tšabe ebionana chašmotsebomnama, y Běngbe Bětsábioye y ínğengbioye puerte chašmotsababuánğeshanama, Jesucristbeñe tšěngaftangbe ošbuachiyánaca; ²⁴ y chaboma, chě Běngbe Utabná Jesucristbioye běts bonshanánaca imobobonshanğengbeñe tšabe bendicionğnga chaotsemnama, canye ndocná yondobena jatrócama bonshanánaca.

Filipenses

Jacheuayama

¹ Pablo y Timoteo, Jesucristbiamana oservénata, quem tsbuanácha fsentsabiamná Filipos bêts puebloca Bëngbe Bëtsabe entsanga imomnënga, y Jesucristoftaca cánÿiñe mo canÿacá imomnëngbiamana. Fsentsabiamná nÿetsca chë Jesucristbeñe oşbuáchiyëngbiamana, nÿetsca chentşa uanatsanëngaftaca y chë inÿe oşbuáchiyënga ujabuáchaniñe trabajayëngaftaca. ² Atşe sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tsëngaftangbeñe tsabe bendicionënga chaotsemnana, y chaboma tsëngaftanga ainaniñe tsabe ebionana chaşmotsebmomnana.

Pablo Bëngbe Bëtsábioye tbojtanchuá oşbuáchiyëngbiamana

³ Cada tsëngaftangbiamana stenojuabó ora, Bëngbe Bëtsá tsëngaftangbiamana sëndbëtsatschuanaye; ⁴ y Bëngbe Bëtsá tsëngaftangbe tsabiamana stseimpadana ora, atşe corente oyejuayá chca sëndbëtsama, ⁵ ntşamo tsëngaftanga atşe şmojuájabuachama, tsabe noticiënga Jesucristbiamana entsanga abuyaiynayiñe, tsëngaftanga Jesucristbeñe jtsoşbuáchiyama şmonjanbojatsé orscana y mëntscoñama. ⁶ Atşe corente sëntsetatşëmbo, Bëngbe Bëtsá tojanbojatsé tsëngaftangbe ainaniñe tsabe soyënga jtsamama, y más tsabe soyënga yochtsamama. Y chca yochtsama, lempe ntşamo tsëngaftangbiamana cha yojtsejuabnacá chaochnënguëntscuana, y chca, Cristo Jesús yochjésabëntscuana. ⁷ Atşe tsëngaftangbiamana sempre ainaniñe sëndbëtsenojuabnaye, chíyeca atşbiamana puerte tsabá entsemna chca tsëngaftangbiamana jtsejuabnayana. Tsëngaftanga nÿetscanga atşe şmonjuájabuache jamama chë Bëngbe Bëtsá tşa tsabia bëtsemnayeca şonjanëntşabuaché trabajo. Atşe chë Bëngbe Bëtsabe trabajo sëndbomna jamama, mora sëntsetámëna ora o natjëmbana şhjoca stsana ora, nÿetscángbioye tsabá inÿinÿnayiñe chë tsabe noticiënga ndegombre soyënga bëtsemnana, y bëtscá amiñe entsanga chë soyënguiñe corente chamotsoşbuáchemana. ⁸ Bëngbe Bëtsá yotátşëmbo ntşamo sëntsichamcá ndegombre bëtsemnana. Atşe tşa sëntseboşe tsëngaftanga jányama y cbontsababuanÿeshana cachcá ntşamo Cristo Jesús atşe şondbobonshancá. ⁹ Atşe, Bëngbe Bëtsá sëntseimpadana tsëngaftanga cada te más cha chaşmotsebobonshánama y chë inÿëngbioynaca, chca, osertánana chaşmotsebmomnana ndayá chë ndegombre soye bëtsemnana jtsetatşëmbuama, y chaşmotsetátşëmbo ndayá tsabá o ndayá ndoñe tsabá tondmënama; ¹⁰ y chca, chaşmotsobena sempre jabocacayama chë puerte tsabá yojtsemna jamama soye. Chca, Cristo yochjésabo ora, tsëngaftanga puerte tsabe vida şmochántsebmomna, bacna soyëngaca ndëmandánënga; y tondaye queşmochátama, chora chë entsanga chca ndoñe tsabá quenátsmëna ca chamuátichamuama. ¹¹ Y lempe ntşamo chaşmojtsamcá ndegombre tsabá echántsemna, y nÿe Jesucristo endobena jamama entsanga chca chamotsamama. Nÿetsca chë tsabe soyënga echántsemna, Bëngbe Bëtsá puerte bëtsá y uamaná bëtsemnana jinÿanÿiyama.

Atşbe vida endmëna Cristo jtseservénama

¹² Jesucristbeyeca atşbe catsátanga, atşe sëntseboşe tsëngaftanga chaşmotsetátşëmbo, ntşamo atşe tijapasama, más bëtscá entsanga Jesucristbiamana tsabe noticiënguiñe chamotsoşbuáchemana tojoservema. ¹³ Chca, nÿetsca chë romanëngbe mandadbe bëts yebna bojanÿá soldadënga y chë inÿe entsanga quem luarentşe montsetátşëmbo atşe utamená stsemna, atşe Cristbiamana tstrabája causa. ¹⁴ Atşe utamená sëntsemnayeca, oşbuáchiyënguentsana banga ainaniñe más añemo montsebmomna, y chíyeca chënga Bëngbe Bëtsabe palabra más y más añëmoca y tondayama ntjatauatjácá entşángbioye montsabuyainá.

¹⁵ Ndegombre entsemna, báseftanga Cristbiamá entšángbioye imojtsabuayiyná, pero chëngna nÿe ntšamo tijashjachcá šmojtsántšabošama chca, y chënga imojtseboše, bëtscá jtsamëse, atše chayotjáyanama; chíyeca chca imojtsama. Pero ínÿengna, entšángbioye montsabuayiyná tšabe soyënga ínÿengbiamá jamama ndegombre imojtsebóšeyeca. ¹⁶ Mënga chca montsama, atše šmondobonshánayeca y Bëngbe Bëtsá chë trabajo šojanëntšabuáchema mondëtatšëmboyeeca, Jesucristbiamá tšabe noticiënga ndegombre bëtsemnama entšanga jtsinÿanÿanayana; ¹⁷ pero chë ínÿengna chca imojtsama, ndoñe tšabe soyënga ínÿengbiamá imojtsebóšeyeca, ndoñe chënga chë ínÿengbiamá tšabe soyënga imojtsebóšeyeca. Chënga Jesucristbiamá imojtsoyebuambná nÿe entšanga chënga chamotsar-respetánama, y nÿe cachëngbiamá tšabe soyënga jtsebomnama imojtsebóšeyeca. Chënga jtsejuabnáyana mochjobenaye jamama atše más chašotsengménama ca, muentše utamená chjëftsemnëntscuana, chënga entšángbioye chca tmojtsabuatambá ora. ¹⁸ Pero ¿ndayase chë soye atšbiamá? Masque ntšámnaca, tšabe soyënga ínÿengbiamá tmojtseboše o ndoñe, Cristbiamá montsoyebuambná, y Cristbiamá chënga montsoyebuambnama atše oyejuayá sëntsemna.

Y cabá más chanjóyejuaye, ¹⁹ er atše sëntsetatšëmbo quem utámenentšana atše chjëseboचना. Atše sëntsetatšëmbo muentšana chjëseboचना, tšëngaftanga Bëngbe Bëtsá šmoimpadánayeca y Jesucristbe Uámana Espíritu šuajabuachánayeca. ²⁰ Atše corente jtsošbuáchiyëse Bëngbe Bëtsábeñe sëndobátmana, atše ndocna te tondaye chanjëftsema y chama chjaisëuatjama, pero aíñe nÿetscangbe delante becá añémoca chayoyebuambá, y nÿets tempo pero más mora, lempe ntšamo stsamama y stsichámuama, atše chaima entšanga chaminÿanÿema Cristo puerte bëtscá y uamaná bëtsemnama, y chca chántsama masque ainá o obaná chaitsemnëse. ²¹ Chca entsemna, er atšbe vida Cristo jt-seservénama endmëna, y nderado atše chajóbanëse, nÿetscanga puerte bëtscá soye mochanjëftsashjache. ²² Pero atše ainá stsemnëse, chanjobenaye más uámana trabajo Cristbiamá jëftsemnama. Chíyeca, atše ndoñe corente quetsátstatšëmbo ntšamo mora jobuáyanana, ainá jtsemnama o ndoñe. ²³ Ndegombre mora puerte šontsëtëmnana ntšamo jobuáyanana: atše tša sëndboše ndoñe más quem luarentše ntjëftsemnana, Crísoftaca jtsatsmënama, y ndegombre chca atšbiamá puerte tšabá nántsemna; ²⁴ pero, ínÿoicana tšëngaftangbiamá šontsemna ainá jëftsemnana. ²⁵ Atše corente sëntsetatšëmbo chca ndegombre yochtsemnama, y chíyeca sëntsetatšëmbo atše cabá ainá chjëftsemnama, tšëngaftanga jujabuáchama más Jesucristbeñe chašmotsošbuáchema, y chiñe bëtscá oyejuayana chašmotsebomnama. ²⁶ Chca, atše tšëngaftanga jutsëtsayama choye chajá ora, chašmobená inÿe soyama más Cristo Jesús jëtschuayama.

²⁷ Morna, chë más uámana soye entsemna, tšëngaftanga chašmotsama ntšamo jtsiyenama ntšamo chë Cristbiamá tšabe noticiënguiñe endayancá. Y mëntšá, cachcá, jutsëtsayama chajá o ndoñe, atše chántsetatšëmbo tšëngaftanga Jesucristbeñe ošbuáchiyama ndoñe šmontsajbanama, y aíñe becá ošbuáchiyana chábeñe šmotsobomñama; nÿetscanga cachcá šmojtsejuabnáyeca y nÿetscanga cach soye šmojtsebóšeyeca, cánÿiñe nÿetscanga enutanánënga jtsenojuerzánëse, ndocná chë tšabe noticiënguiñe tšëngaftanga šmobomna ošbuáchiyana chacmondábuajuanama. ²⁸ Tšëngaftangbe uayayëngbiamá tondayama šmattsauatja, sempre bëtscá añemo šmochtsebomna. Chca tšëngaftanga šmochanjínÿanÿiye chënga pochocánënga mochtsemnama, y tšëngaftangna atsebácanënga šmochtsemnama. Y chë soye Bëngbe Bëtsá tšëngaftangbiamá echántsama, Crístbeñe šmošbuachéyeca. ²⁹ Chca echanjopása, er Bëngbe Bëtsá tšëngaftangftaca puerte tšabia endmëna, Cristbiamá oservénënga Bëngbe Bëtsá tcmojábiamá, pero ndoñe nÿe chábeñe chašmotsošbuáchema, ndayá chabiamá chašmosufrímnaca. ³⁰ Tšëngaftanga y atše cachca soyama montsenojuerzana. Tšëngaftanga ya šmonjinÿe ntšamo atše sënjánenojuerzana, entšanga jinÿanÿiyama chë tšabe noticiënga ndegombre soyënga bëtsemnama. Y mora, tšëngaftanga noticiënga šmochanjóyëngacñe ntšamo atše cach soyama cachcá stsamama.

2

Ndoñe uámanënga šmattsenobiamnaye, ntšamo Cristo ndoñe tonjanmcá

¹ Tšëngaftanga, Crísoftaca cánýiñe mo canýacá jtsemnëse, ainaniñe bëtská añemo šmontsebmna. Cristo cmondábabuanýeshana, y chë soye tšëngaftanga cmontsējabuachana nýetsca trabajënguentsana tšabá jabocanama. Y tšëngaftanga Cristbe Espíritoftaca cánýiñe mo canýacá šmontsemna; tšëngaftanga nýetscanga šmondénbobonshana y nýetscangbiana jóngmiana šmondumana. ² Tšëngaftanga lempe chca šmobómnayeca, atše corente oyejuayá šmochjábema, er tšëngaftanga nýetscanga cachcá cánýiñe šmondëjuabná, cachcá nýetscanga šmondénbobonshana, nýetscanga mo canýe ainancá šmondbomna, y nýetscanga cachca soye šmondboše. ³ Tondaye šmattsama nýe ínýenga chë sóyeca chamotjáyana, o nýe tšëngaftanga tša bëts soyënga amënga šmomna ca entsanga chamotsejuabnama; pero ndoñe yapa uámanënga šmojtsemna ca šmochtsejuabnaye, y cada ona chaotsejuabná chë ínýenga bëngbiana más uámanënga imomnama. ⁴ Y ndocná tondaye chaondëtsama, nýe chabiana tšabe soyënga jónýenama, sinó ndayánaca chaotsama nýetscangbiámna tšabe soyënga jónýenama.

⁵ Tšëngaftanga cmontsamna jtsemnana ntšamo cach Cristo Jesús yojanjuabná y yojanamcá:

⁶ Cha nýets tempo yomna cach Bëngbe Bëtsacá y uamaná cach Bëngbe Bëtsacá, pero masque chca, ndocna te yonjanjuabná:

“Atše sëntseboše nýetsca entsanga nýets tempo atše chašmotserrespetana, ntšamo atšbe Taitá Bëngbe Bëtsá mondërrespetancá ca.”

⁷ Pero cha mo nduamanacá tonjanóbema, nýetsca chabe bomna soyënga jéftseboshjonëse, y ndegombre, mo canýe oservenacá tojanóbema.

Cha canýe entsacá tojanonýná,

y entsanga canýe ndegombre entsacá tmojáninýe.

⁸ Cachá tojanlesenciá nduamaná jtsemnama,

y sempre Bëngbe Bëtsábioye ibnayeunana, y jobanámnaca, cruciñe jóbane.

⁹ Ndayá cha tonjanmama, Bëngbe Bëtsá, chë celoca más uámana luare tbojaninýinýe

y chë más uámana uabaina, chë más bëtsëtsangbe uabainënguentsa uabaina tbojabuajo;

¹⁰ y chca, celoca imomnënga, y quem luarentše y fshantse jashenoye imomnëngnaca nýetscanga chamóshamentšema,

Jesúsbioye jëtschuayama, chabe uámana uabaina jayanëse;

¹¹ y chca, nýetscanga chamuayana Jesucristo chëngbe Utabná yomna ca,

chca, Bëngbe Bëtsá chë Taitá nýetscanga chamotsatschuanama.

Crístbeñe ošbuáchiyënga entsamna mo buashinýinýana estrellëngcá jtsemnana

¹² Chcasna, atšbe bonshana catšátanga, ntšamo atše tšëngaftangaftaca sënjamna ora, atše sempre šmonjanëyeunancá, mora más šmochtsatënëyeunana, mora atše tšëngaftangbiana bënoca stsemna ora. Bëtsëtsanga ntjatenobiamnycá y Bëngbe Bëtsá jtserrespetánëse šmochtsama soyënga, chca, tšëngaftangbe tšabe videntše, Jesucristbeñe ošbuáchiyënga quetsomñecá, tondaye chacmondëtsabuáshebenama; ¹³ er Bëngbe Bëtsá nýets tempo tšëngaftangbe ainaniñe inétsama tšëngaftanga ndayánaca chašmotsebošama y chašmotsamama, ntšamo cha yojuanbá y yobošcá chaotsemnama.

¹⁴ Ndayánaca jamama chacmojtsejaboto ora, chë soye šmochjama, chca jamama yapa totcá comna ca ntjatichamcá y ínýengaftaca jabuachana ntjatenatsëtsnycá.

¹⁵ Chca cmontsamna, chca, tšëngaftanga šmojtsama soyënguiñe ndocná ndocna bacna soye chaondínýenama, y puerte tšabe vida chašmotsebmnama. Bëngbe Bëtsabe puerte tšabe basengcá šmochtsiyena, tšëngaftanga chë šmojtsemnënga canýe luarentše puerte bacna entsángbeñe y sempre bëtská bacna soyënga jtsamana uamanëngbeñe. Chíyecna, tšëngaftanga šmochtsiyena puerte tšabe soyënga jtsamëse, y chca tšëngaftanga

šmochántsemna mo canye ibetiñe luarentse buashinýinýana estrellëngcá. ¹⁶ Chë tšabe soyëngaca entšángbioye chauinýanýé ntšamo muanjobenaye tšabe vida jtsebomnama. Chca chašmojamëse, Cristo cachiñe yochjésabo ora, atše chantsobena tšëngaftangbeyeca puerte oyejuayá jtsemnana, er ntšamo chašmojamcá echanjínýanýiye atše ndoñe nye bonamente jabuache tijatrabajá. Chca atše chántsemna mo nda bëtscá tojoprontá, y chentšana ínýengaftaca tojótjajo ora, chëngbioye tojtsayënjanacá. ¹⁷ Mo chë altaroca canye bachna buiñe tojuabuashanacá, Bëngbe Bëtsá jëtschuayama tmojóba ovesháftaca, cachcá nderado echántsemna atšbe buiñe, atše šmojóbase, chca, Bëngbe Bëtsábioye oyejuayá jabemama. Tšëngaftanga bëtscá šmojalemošná, Crístbeñe tša šmošbuachéyeca, y tšëngaftangbe ošbuachiyánëna endmëna Bëngbe Bëtsábioye oyejuayá jabemama. Chë uta soye echántsemna mo chë buiñe y chë oveshacá, Bëngbe Bëtsábioye oyejuayá jabe-mama. Atše chca stjobanëse, puerte oyejuayá stsemna, y stjama tšëngaftángnaca cachcá chašmotsóyejuama. ¹⁸ Chca, tšëngaftanga cmontsamna oyejuayënga jtsemnana, y šmochjama átšnaca oyejuayá tšëngaftangaftaca chaitsemnama.

Timoteo y Epafrodito

¹⁹ Atše becá ošbuachiyánaca Bëngbe Utabná Jesúsbeñe jtsobátmanëse, sëntsejuabná pronto chjobenaye Timoteo tšëngaftangbioye jíchmuama, tšëngaftangbiama chašuabocuéntama, y chca, atše más añemo chaitsatsbomnama. ²⁰ Er nye cha endmëna canya cach atšcá ainaniñe juabnayá, y cha ndegombre puerte entseboše tšëngaftanga tšabá chašmuetsiyenama; ²¹ chë ínýengna nyetscanga nye cachëngbe tšabiama ndayánaca jamama jtsejuabnayana, y tondaye ntsebošana Jesucristbiama jamama. ²² Pero cach tšëngaftanga ya šmondëtatsëmbo, ntšamo Timoteo chë padecena soyënguentšana tšabá tonjëtsohocñama, y ntšamo Timoteo y atše, mo canye uaquiñá chabe taitábioye cuaftsajabuachancá, cánýiñe fsënjantrabajá, más bëtscá entšanga chë tšabe noticiënga chamóyëngacñama. ²³ Chcasna, atše sëntsobátmana cha jíchmuana, ntšamo átšeftaca jopásama chaitsetátšëmbo y cachora; ²⁴ pero bëtscá ošbuachiyánaca sëntsobatmánayeca, sëntsejuabná, Bëngbe Utabná chašojtábocnëse, pronto átšnaca chjobenaye choye jama.

²⁵ Atše sëntsejuabná yojtsemna, Jesucristbeyeca bëngbe catšata Epafrodítnacá choye jíchmuana, nda átšeftaca cánýiñe endëtrabajá y chë tšabe noticiënga ndegombre soyënga bëtsemnama jinýanýiyama endenojuerzana, nda tšëngaftanga šmojanichmó atše chašuabëuájabuachama. ²⁶ Cha chanjíchmuá; cha puerte entseboše tšëngaftanga jányama, y yapa ngmënaca entsemna, cha šocá enjamnama šmojátatšëmbonama. ²⁷ Y ndegombre cha šocá enjamna, y enjétsinýna mo jtsobanamcá; pero Bëngbe Bëtsá tbonjalastemá, y ndoñe nye chábioye sinó átšbioynaca, atše ndoñe más ngmenanënga chayátsbomnama, ntšamo mora sëntsebomnama. ²⁸ Chíyeca atše más sëntseboše cha pronto jíchmuana, as tšëngaftanga cha chašmojtinýe ora, puerte oyejuayënga chašmotsemnama, y atše ndoñe yapa chašondëtsengmenama. ²⁹ Šmochjofja nyets oyejuayánaca, Bëngbe Utabnábeyeca catšátanga quetsomñecá; y nyets tempo chacá amëngbioye mo bëtšëtsangcá šmochtsëtabna, ³⁰ er batšatema más y matënjëtsohana, Cristbiama trabajayíñe uajabuachaniñe. Cha chë trabajo tonjanma atše juajabuáchama, ntšamo cach tšëngaftanga ndoñe chešmatanobenacá, atše juajabuáchama.

3

Ndayá Pablëbiama ndegombre corente yojanámana

¹ Y morna, atšbe catšátanga, ndayá Bëngbe Utabná tojamama móyejuanga. Ndoñe bacá quešnatámana, ntšamo chë inye tsbuanáchañe tbonjanëbuabiamcá cachcá cachiñe jtëtëyanama; y chë soye bëtscá cmochanjújabuache ndoñe resjuiñe chašmondëtsemnama. ² Cuedado šmochtsebomna chë ndoñe tšabe entšangbiama, mo quešëngcá imomnënga, chë puerte bacna soyënga mondbëtsamënga, y entšangbe

más delicadentse base bobachtema jatëtšana uamanënga; ³ er bënga mondmëna y ndoñe ínÿenga, chë ndegombre uinÿnanánana bomnënga, bënga Bëngbe Bëtsabe entšanguentšënga bëtsemnama, bënga chë Uámana Espíritbe uajabuáchenanaca Bëngbe Bëtsá mondadoránama, bënga chë Cristo Jesúseftaca cánÿiñe mo canÿacá bëtsemnama mondbétsoyejuama, y bënga chë ntšamo ínÿenga monduamancá bëngbe cuerpiñe jamama tondayama yondoservénama mondbétsejuabnayama.

⁴ Masque atše razón sëndëtsóbomñe, ndayá atšbe cuerpiñe tmojamcá ndegombre iuámanama jtsejuabnayama; nderado nda tojtsejuabná razón yojtsebomna chë soyënga yoserverna ca jtsejuabnayama, ndegombre atše chabiamama más razón chama stsóbomñe. ⁵ Sënjanonÿná y posufta tianoye base bobachtema chë más delicadentse šmojantëtse; atšbe nÿets uta bëtšëtsata Israeloca entšanguentšata bonjamna, y atšna Benjaminbe bëtš pamillentsá sëndmëna; atšbe tempsca bëtš taitanga nÿetscanga hebreunga immamna. Atšna fariseo sënjamna. Atše sënjánama, lempe ntšamo judiëngbe leyënguiñe endayancá, ndayá jamama šojanmëncá. ⁶ Atše tša sënjánboše Bëngbe Bëtsá jtseservénama, chíyeca Jesúsbeñe ošbuáchiyënga bëtscá sënjanëcamena; y ndayá canÿe entšá ibnëtsemna jt-samama, Bëngbe Bëtsabe bominÿiñe tšabia jtsemnama, judiëngbe ley jtsocumplínëse, chama ndocná tondaye quenjátsbomna jayanama, atše ndoñe tšabá sentsanama ca.

⁷ Pero lempe chca ntšamo atše sënjamnama y ndayá sënjánamama, puerte sënjanjuabná atšbiamama puerte yojanámana ca; pero mora, Cristo atšbe ainaniñe tonjámashëngoyeca, chë soyënga atšbiamama ya ndoñe quenatámana. ⁸ Y cabá más, tondaye atšbiamama quenatámana, chë bëtš soye jtsonÿayëse, Cristo Jesús, Bëngbe Utabná jtsabuatmana. Chábeyeca, lempe chë nÿe quem luarentša soyënga sënjësebohjona, y lempe chë soyënga atšbiamama tondayama quenátoserverna; y chca entsemna, chë bëtš soye jëftsashjáchama, Cristo jtsabuatmama, ⁹ y cháftaca cánÿiñe mo canÿacá jtsemnama. Atše ya ndoñe quetsatsnguá Bëngbe Bëtsabe bominÿiñe tšabia jtsemnama, nÿe ntšamo atše tijamama chë judiëngbe ley jtsocumplínëse, pero Crístbeñe jtsošbuáchiyëse aíñe; Bëngbe Bëtsá entsama atše chabe bominÿiñe tšabia chaitsemnama, atšbe bacna soyëngama jtseperdónase, y lempe chca entsemna atše Crístbeñe sëndošbuachéyeca. ¹⁰ Atše sëntseboše ndayá cha jtsabuatmana, chë obanënguentšana tojtanayenama cha tojaninÿanÿé obenana atše chaitsebomnama, atše cháftaca cánÿiñe mo canÿacá chaitsemna ora; y ntšamo bënga jatsebacama ora cach Cristo tojansufricá, átšnaca cachcá chaisufrima. Y cha tojanóbana orcá atše chaitsemnama; ¹¹ y ntšámnaca, atše jëftsashjáchama Bëngbe Bëtsá chaoma atše chaitayenama.

Yejuana jtsentsénëse, Bëngbe Bëtsábiocana uacanámana josháchiñama

¹² Pero atše ndoñe quetsátichamo lempe chca ya tijashjache ca, o atše ndocna bacna soye ndamá y puerte tšabia Bëngbe Bëtsabe bominÿiñe stsemna ca, pero sempre natsanoye sentsá, mo nda canÿe luaroye jashjanguama cuaftsëchamancá; y puerte jtsošbuáchiyëse sentsobátmana atše chjobenaye jtsemnama, chë ndayama Cristo šojanchembo, er Cristo Jesús ya tonjama atše chabiamama chaitsemnama. ¹³ Atšbe catsátanga, atše ndoñe quetsátichamo chca ya tijashjache ca. Pero chama canÿe soye sentsama: chë tempo atše sënjánbomna y sënjánama soyënga, mora lempe stëtsoye sënjaquedá, y bëtscá sentsama jobenayama chë jashjanguama yojtsemnoye jashjanguama, ¹⁴ chë ndëmoca yojtsemna jashjanguama luaroye jobenayama jashjanguama, mo nda canÿe luaroye jashjanguama ndayánaca juácanama bëtscá jenujuérsase cuaftsëchamancá. Cachcá, átšnaca sentsá chë Bëngbe Bëtsá šojtsachembuana uacanámana josháchiñama, Cristo Jesúsbeyeca; y chë uacanámana entsemna chë nÿetsca tescama yomna tšabe vida jtsebomnana.

¹⁵ Chca bënga šontsamna jtsejuabnayana, chë Jesucrístbeñe puerte ošbuáchiyana y nÿets tempo cha ústonënga; y nderado tšëngaftanga ndayíñnaca inÿetsá šmojatsjuabná ora,

Bëngbe Bëtsá chë sóynaca tšabá cmochanjínjänýiye. ¹⁶ Pero morna šontsamna jtsiyenana ntšamo mëntscoñama Bëngbe Bëtsabe soyëngama šojosertacá.

¹⁷ Jesucristbeyeca catšátanga, ntšamo atše sëndmëncá tšëngaftanga šmochtsemna, y chë ntšamo jtsiyenama tčbonjaninjänýecá imojtsiyenëngbioye šmochtsënýaye. ¹⁸ Ntšamo cbochanjauyancá, ya ba soye tčbonjáuyana y mora cachiñe chca chanjayana, pero chca jayanamna atše puerte ngménaca sëndbétsemna. Banga mondmëna, y chënga ntšamo vida imojtsebomnama montsinýinýná, lempe ntšamo Cristo chë cruciñe jóbaniëse bëngbiama iuayancá contra chënga imojtsemnama, ¹⁹ y chëngbioye nýetsca tescama infiernoca mochántsapochocaye. Chëngbiama chë más uámana soye yojtsemna jtsamana ntšamo cachënga tmojtsebošcá, nýe cachëngbe cuerpíñe tšabá jtsomñama. Chënga nýa mo bëts soye cuafjamcá jtsemnana chë soyënga tmojtsama ora, pero ndegombre chënga entsamna cach soyëngama jtsëuatjama; y chënga sempre jésejuabnayana chë nýe quem luarama enójuabnayëngbe soyëngama. ²⁰ Chë cuenta bëngna, ndegombre celocama entsanga mondmëna, y mora montsobátmana, chë luarocana chauabo bëngbe atsebacayá, Bëngbe Utabná Jesucristo. ²¹ Cha bëngbe cuerpënga, chë pronto jopochócama cuerpënga echanjátrocaye, jtsemnama mo chabe cuerpçá, chë obanënguentšana tojtayenabe cuerpçá; y cha chca echanjama, cha puerte obenana lempe jtsemándayama bómnyeca.

4

Bëngbe Utabnáftaca cánýiñe mo canýacá jtsemnëse oyejuayana jtsebomnana

¹ Chcasna, Jesucristbeyeca atšbe catšátanga, Bëngbe Utabnábeñe ošbuáchiyana ntjajbanacá, y puerte chábeñe jtsošbuáchiyëse, cháftaca cánýiñe mo canýacá šmochtsemna. Corente cbondábabuanýeshana y tša sëntseboše tšëngaftanga jányama. Tšëngaftangbeyeca atše puerte oyejuayá sëntsemna, y atše corente sëndbétsoyejuaye tšëngaftangbiama ínýëngbioye jáuyanama.

² Evodia sëntseimpadana y Síntiquenaca, chata chabuatenóyeunama, mo Bëngbe Utabnábeñe ošbuachiyata quetsomñecá. ³ Y ácnaca, nda puerte tšabá átšeftaca tconjatrabajá, cbontseimpadana chama chë shembásata chacújabuachama, er chata bëtsçá átšeftaca tbonjatrabajá tšabe noticiënga entsanga abuayiynayiñe. Clemente y inýe entsanga átšeftaca tmonjatrabajá cach soye amiñe. Nýetsca chëngbe uabaina entsábemana chë librëšañe, ndayentše yojtsábemana chë tšabe vida mochjónýenëngbe entsangbe uabaina.

⁴ Sempre oyejuayënga šmochtsemna, Bëngbe Utabnáftaca cánýiñe mo canýacá jtsemnëse, y cachiñe šcutétayana: ¡Móyejuanga! ⁵ Nýetscanga chamotsetátšëmbo, tšëngaftanga tšabe juabna bomnënga šmomnama. Bëngbe Utabná jésabama tempo ya entsobeco.

⁶ Tondayama šmattsenócochinýena, pero cada Bëngbe Bëtsáftaca chašmojtsencuënta ora, ndayá cmojtsëjabetama cha šmochjaimpáda. Y chca chašmojtsama ora, chánaca šochtsatschuanaye. ⁷ Chca, Bëngbe Bëtsá echanjama chë chabe ainaniñe tšabe ebionana tšëngaftanga chašmotsebomnama; chë tšabe ebionana puerte bëtsçá endmëna, y bënga entsanga quetsomñecá ndoñe ntobenana chama jósertana; y chca tšabe ebionánaca, tšëngaftangbe juabnënguiñe y ainaniñe tondayama quešmochátenocochinýena, er tšëngaftanga cánýiñe mo canýacá Cristo Jesúsëftaca šmondmëna.

Lempe ntšamo tšabá yomncá soyëngama jtsejuabnayana

⁸ Cabana, atšbe catšátanga, lempe ntšamo ndegombre yomncá soyënguiñe šmochtsejuabnaye, lempe chë respeto yomerecëniñe, nýetsca soyënguiñe entsangbe bominýiñe tšabá yomniñe, nýets tempo corente tšabá yomniñe, nýetsca soyënga entsanga yogusetániñe, y lempe chë ndayama entsanga tmojtsejuabná tša iuámana ca

soyënguiñe. Lempe chë tšabá yomna soyënguiñe y jtsatschuanayama yomna soyënguiñe šmochtsejuabnaye.

⁹ Sempre šmochtsama chë átšbentšana šmojuábouinýe soyënga, chë atšbiajana šmojóyëngacñe soyënga, chë atše šmojoyeuná soyënga y ntšamo šmojinýcá atše jtsamana. Chca šmochtsama y Bëngbe Bëtsá, chë bënga ainaniñe tšabe ebionana chamotsebomnama amá, tšëngaftangaftaca echántsemna.

Pablo tojtanacheuá tmojanájabuachama

¹⁰ Atše corente sëndoyeuá Bëngbe Utabnáftaca cánýiñe mo canýacá tsmënama, er tšëngaftanga ba ishinye chentšana, cachiñe šmojatobená atše jatinýinýiyana ntsachetšá atšbe tšabiana tšëngaftangbiana iuámanana. Chca, atše ndoñe quetsátichamo tšëngaftanga atšbiana cmojtsanebnëtjomba ca, ndayá ntšamo tšëngaftanga tšabá šmojuabnacá atše jinýinýiyama ndoñe yonjanopodena ca. ¹¹ Atše chca, ndoñe quetsátichamo uajabotá stsemna ca, er atše sënjuatsjinýe sempre oyejuayá jëftsemnana, nýe ndaye soyiñe masque batšatémnaca stsebomñese. ¹² Atše sëndétatšëmbo ntšamo yomna jtsiyenana chë vida jtsebomnama uajaboto soyënga tojtsashbenëse, y ntšamo yomna jtsiyenana chë tcuajabótama más bëtscá jtsebomñese. Atše tijuatsjinýe oyejuayá jtsemnana masque nýe ndaye soyënguiñnaca stsemna ora, jasama bëtscá stsebomna ora o masque nýe shëntseca jtsemnama šojtsemna ora, atše jtsiyenama bëtscá soyënga stsebomñese o masque ndóñnaca. ¹³ Atše lempe chca sëndobena, atše obenana jtsebomnama Cristo endbétamayeca. ¹⁴ Masque chcasna, tšëngaftanga tšabá šmonjama, atše padecena soyënguiñe sënjamna ora atše juajabuáchana.

¹⁵ Tšëngaftanga, chë Filipos pueblaca Jesucristbeñe ošbuáchiyënga, corente šmondétatšëmbo, Macedonia luarentšana sënjëftsanbocna ora, nýe tšëngaftanga atše šmonjanájabuachama; inýe ošbuáchiyënga ndoñe. Chora enjamna atšbe bojatsena tempo tšëngaftangbe luarentše chë tšabe noticiënga entšanga abuayiynayiñe; y nýe tšëngaftanga atše šmonjanájabuache. ¹⁶ Ba soye atše Tesalónica pueblaca sënjamna ora, y chašmuájabuachama šonjanájaboto ora, tšëngaftanga atšbe opresidëngama crocénana šmonjanafja. ¹⁷ Chca ndoñe quenátayana atše tsjuabná nýe tšëngaftangbentšana ndayánaca jóyëngacñama ca; chë sóyeca atše sëntseboše ndayá tšëngaftanga más tšabe soyënga chašmotsamama, Bëngbe Bëtsá tšëngaftangbiana más chaotsóyejuama. ¹⁸ Er atše ya lempe sënjóyëngacñe, y chë šuajabótama cabá más sëntsebomna. Atše chë ntšamo šjuajabotcá lempe sëntsebomna, chë tšëngaftanga Epafrodítóftaca šmonjanichmó soyëngaca. Ndayá atše šmojanichmocá, Bëngbe Bëtsabe bominiñe puerte tšabá entsemna, mo juatšëmbonama ndayá tcojóba y altaroca tcojajuinýe y botamana tojtsonguëtsecá, chora cha oyejuayá chca jóyëngacñana. ¹⁹ Atšbe Bëtsá, chabe bëtscá uámana y bëtš bomnánaca, echanjama tšëngaftanga lempe ntšamo cmëjabotcá Cristo Jesusbiajana chašmóyëngacñama. ²⁰ Entšanga nýets tempo chamotsinýanýná Bëngbe Bëtsá y Bëngbe Taitá puerte uamaná bëtsemnama. Chca chaotsemna.

Chënga jtadiósoftanama

²¹ Atšbe cuenta, nýetscanga chë Jesucristbeyeca Bëngbe Bëtsábenga imomnënga šmochjácheuaye. Atšeftaca montsemna Jesucristbeyeca catšátangnaca cmontsacheuaná. ²² Nýetscanga chë muentše Bëngbe Bëtsábenga imomnënga, y más chë romanëngbe mandadbe bëtš yebnocá oyenënga, cmontsacheuaná.

²³ Atše sëntseimpadana Bëngbe Utabná Jesucristo, chaoma tšëngaftangbeñe tšabe bendicionënga chaotsemnama.

Colosenses

Jacheuayama

¹ Atše Pablo, Jesucristbe ichmoná Bèngbe Bètsá chca yobóseyeca, y Jesucristbeyeca bèngbe catšata Timotéoftaca, ² quem tsbuanácha sèntsabiamná chë Colosas pueblaca Bèngbe Bètsábenga imomnèngbiama. Tšèngaftanga bèngcá Jesucristbeñe ošbuáchiyènga šmondmèna, y chca, Jesucristbeyeca bèngbe catšátanga. Atše sèntseimpadana Bèngbe Bètsá Bèngbe Taitá, chaoma tšabe bendicionènga tšèngaftangbeñe chaotsemnana, y chaoma tšèngaftangbe ainaniñe tšabe ebionana chašmotsebomnana.

Pablo, Bèngbe Bètsábioye tbojanimpadá Colosas pueblaca ošbuáchiyèngbiama

³ Bèngbe Bètsá, Bèngbe Utabná Jesucristbe Taitá tšèngaftangbiama fstseimpadana ora, cha sempre fchandbètsatschuanaye, ⁴ er bènga fsènjátatšèmbona ntšamo tšèngaftanga Cristo Jesúsbeñe tša šmojtsošbuáchema, y ntšamo tšèngaftanga nyetscanga chë Bèngbe Bètsábenga imomnènga šmababuánjèshanama. ⁵ Natsanama, chë ndegombre buayenánama, chë tšabe noticiènga, tšèngaftanga tcmojanabuatambá ora, tšèngaftanga botamana šmojanuena ntšamo chë buayenániñe bejtsayancá, chë tšèngaftanga šmojtsobena tšabe soyama jobátmana, Bèngbe Bètsábeñe jtsošbuáchiyèse. Chë šmontsobatmana soye entsama tšèngaftanga Jesucristbeñe puerte chašmotsošbuáchema y nyetscanga chašmotsababuánjèshanama. Bèngbe Bètsá celoca enduaquècñá chë tšèngaftanga šmojtsobatmana tšabe soye. ⁶ Chë tšèngaftanga tcmojanabuayená tšabe noticiènga más bètscá entšanga montsuenana; y chca, nyets quem luarentše entšanga montsiyena más tšabe soyènga jtsamèse. Chca entsemna ntšamo tšèngaftangbentše tojopasacá, chë natsana te chë tšèngaftanga Bèngbe Bètsabe tšabiánama šmojanuena orscana, y ntšamo Bèngbe Bètsá puerte bonshanánaca y tšabiánaca bèngbioye šuanjènama ndegombre cmojanosérta orscana. ⁷ Y chca Epafra tšèngaftanga tcmojanabuatambá, Bèngbe Bètsabe bonshánama y tšabiánama. Epafra endmèna canya bèngaftaca Cristbiana oservená, y cha bènga fsèndbobonshana; cha Cristbiana endètrabája bèngbe cuenta tšèngaftangbentše. ⁸ Cha šonjáuyana ntšamo chë Uámana Espíritu yojtsama, nyetscanga Jesucristbeñe ošbuachiyèngbioye chašmotsababuánjèshanama.

⁹ Lempe ntšamo tšèngaftangaftaca tojopasama, chë natsana te tšèngaftangbiama fsènjauena orscana y mèntscoñama, Bèngbe Bètsá sempre tšèngaftangbiama fchandbètseimpadana, cháftaca fstsencuènta ora. Bèngbe Bètsá fsèndèimpadana, chabe Espíritu chaoma tšèngaftanga chašmotsobena jtsetatšèmbuana y jtsosertánana, chca, ntšamo Bèngbe Bètsá yobošcá chašmotsamama, tšèngaftanga tšabá chašmotsetatšèmbuama. ¹⁰ Y chca, tšèngaftanga šmochantsobena jtsiyenana jtsamèse ntšamo Bèngbe Utabná yobošcá, y sempre šmochantsama ntšamo chabiana tšabá yomncá. Ntšamo tšèngaftanga chašmojtsiyencá tšabe soyènga jtsamèse, chentšana nyetsca tšabe soyènga echanjóbcna, y tšèngaftanga más tšabá Bèngbe Bètsá šmochantsábuatma. ¹¹ Atše, Bèngbe Bètsá sèntseimpadana, chabe puerte bètscá obenánaca cha chaoma tšèngaftangbe ainaniñe bèts añemo chašmotsebomnana; y chca, tšèngaftanga chë padecena soyènguiñe chašmojtsemna ora, puerte uantadènga chašmotsemnana, y ainaniñe añémoca Bèngbe Bètsábeñe becá chašmotsobátmanama. ¹² Y puerte oyejuayènga Bèngbe Taitá šmochantsatschuanaye, nda iuama bènga chamotsobena ntšamo cha chabe entšanga jatšatayama tojašebuachenacá jtsebomnana. Tšèngaftanga šmochanjóyèngacñe ntšamo cmojtsètocancá celoca, chë corente buashinjinjána luarentše. ¹³ Bèngbe Bètsá bènga šojatsebacá, Satanás, chë ibetiñe luarentša mandayabe cucuatšentsana, y tojama chë chabe bonshana Uaquiñabe

amëndayana bēngbe ainaniñe chamotsebonnama; ¹⁴ chábeyeca Bēngbe Bētsá Satanasbe cucuatšentsana šojatsebacá; o mēntšá, chábeyeca Bēngbe Bētsá bēngbe bacna soyēnga šojtsaperdoná.

Cristo tojanóbanayeca, entsanga Bēngbe Bētsáftaca tšabá jtsatsmēnana

¹⁵ Cristo tmonjáninýe ora, bēnga tmojántatšēmbona ntšamo Bēngbe Bētsá yomnana; entsanga imojobena cha jinýama, pero Bēngbe Bētsábioye ndoñe. Cha, chē Bēngbe Bētsabe Uaquiñá, ya natsana yojtsemna lempe chē Bēngbe Bētsá tojanma soyēngama; y cha lempe chē soyēngama más uamaná endmēna. ¹⁶ Chábeyeca Bēngbe Bētsá tojama lempe ntšamo celoca y quem luarentše yobinýncá, lempe ntšamo chē entsanga imobena o ndoñe mondobena jinýama soyēnga, y chē espíritēngnaca chē imobena ínýengbioye jtsamēndayana y obenana imobomna. Bēngbe Bētsá, chábeyeca y chabiamá tojama, lempe ntšamo quem luarentše yobinýncá. ¹⁷ Bēngbe Bētsá cabá nýetsca soyēnga ndama ora, Cristo ya yojtsemna; y chábeyeca mora yomna, lempe ntšamo quem luarentše chaotsemnana yojamncá. ¹⁸ Cha endmēna nda nýetscanga Bēngbe Utabnábeñe ošbuáchiyēnga iuamēnda, ntšamo chē bestšaše nýetsca chē cuerpentša soyēnga jtsemandayancá. Cha endmēna nda iuama ošbuáchiyēnga tsēm tšabe vida chamotsebonnama, y cha endmēna chē Bēngbe Bētsabe más bēts Uaquiñá. Bēngbe Bētsá tojanma, chē cachiñe ainēnga mochtatsmēnēnguentšana, cha chē natsaná chaotsemnana; nýe cha canýa chē más uámana luare chaotsebonnama, nýetscañe chaotsemándayama. ¹⁹ Er Bēngbe Bētsá yojanjuabná cachabiamá tšabá yojamna, lempe ntšamo cha yomncá, chabe Uaquiñábeñnaca chaotsemnana, ²⁰ y Bēngbe Bētsá tojánbošena, Crístbeyeca nýetsca soyēnga quem luarentše y celoca, cháftaca tempcá tšabá chaotsatsmēnana. Bēngbe Bētsá chē soye tojanma, chabe Uaquiñá cruciñe tojanóbana ora y chabe buiñe tojanábuashana ora; y chca, Bēngbe Bētsá tojanma nýetsca soyēnga quem luarentše y celoca, cháftaca tempcá tšabá chaotsatsmēnana.

²¹ Tempo, tšēngaftanga Bēngbe Bētsá stētsoye šmojanquedá y chábioye uayayēnga šmojamna, bacna soyēnga šmojanjuabná y šmojánama causa; ²² pero mora chabe Uaquiñáftaca, cha mo canýe entšacá jóbánēse, Bēngbe Bētsá tojama tšēngaftanga tempcá tšabá cháftaca chašmotsatsmēnana; y chca tojama, tšēngaftanga chabe delante nýets tempo chašmotsemnana; chora tšēngaftanga, chabe entsanga, ainaniñe ndocna bacna soye ndbomnēnga chašmotsemnana, y ndocná chaondayana ntšamo šmojamncá ndoñe tšabá yontsemna ca. ²³ Pero tšēngaftanga cmontsamna chē bētscá ošbuáchiyana šmondobomnana nýets tempo jtsebonnama, Bēngbe Utabnábeñe jtsošbuáchiyama ndocna te ntjajbanacá. Nýets tempo chē tšabe noticiēnguiñe šmochtsošbuáchiye, y ndoñe šmatjalesencia ndocná tšēngaftangbe ošbuáchiyana chaotrocama; y nýe chca puerte jtsošbuáchiyēse Bēngbe Bētsábeñe šmochtsošbátmana, ntšamo tšēngaftanga šmojanmncá, Jesucristbiamá buayenánama šmojanuena ora. Chē buayenánana endmēna ntšamo ba entsanga nýetsca quem luarentša entšángbioye tmojabuayenacá, y atšbe trabajo endmēna cach tšabe noticiēngama entsanga jtsabuayiynayana.

Pablo, ošbuáchiyēnga jasérviamá trabajo tmojanbonýé

²⁴ Atše corente sēnjesoyejuá mora tšēngaftangbiamá jasúfriama stsobenama. Ba entsanga entsamna jasúfria Cristo jasérviamá, y atše sēntsesufrina ntšamo Cristo tojansufricá, mora atše jtseufrinēse chabe cuenta, ntšamo jasúfriama yomncá. Y ntšamo sēntsesufrincá entsemna Crístbeñe ošbuáchiyēngbe tšabiamá, chē chabe cuerpcá imomnēnga, chēnga Crístbēnga bētsemnana. ²⁵ Bēngbe Bētsá atše šojábema chē Jesucristbeñe ošbuáchiyēngbe canýe ujabuachaná. Cachá chē trabajuama šojanábuayana, chca jamēse, tšēngaftangbe tšabiamá chaotsemnana. Chē trabajo endmēna, lempe ntšamo cha tojayancá entsanga jábuayenana. ²⁶ Bēngbe Bētsá nýetsca entsanga ndoñe tonjanalesencia, quem luare jobojátšama orscana y nýets tempo chē buayenánama

chamotsetatsëmbuama; pero mora, chábenga imomnënga chë soye cha tojinÿanyé. ²⁷ Bëngbe Bëtsá yoboše, chabe entsanga imomnënga chamotsábuatmama ndayá tempo chënga ndoñe tonjaninÿanyecá; y yoboše chë ndoñe judiënga jinÿanyiyama tša bëts y tsabe soye yomna chë ndegombre buayenánana, ndayá tempo inÿenga ndoñe tonjaninÿanyecá. Chë tempo ndoñe yonjanótatsëmbo buayenánana entsemna, Cristo tsëngaftangbe ainaniñe yojtsiyena, y chábeñe puerte jtsošbuáchiyëse šmojtsovena jt-sobátmanana, Bëngbe Bëtsá puerte bëtsëtsanga y uámanënga chácmbiamama, batšá ntšamo cachá yomncá. ²⁸ Bënga nÿetscángbioye Jesucristbiana fchandbëtsabuayiyenaye; fchandbëtsëtsësnaye ndayá chënga ndoñe yontsamna jtsamana, y fsëndbëtsabuatambaye nÿets osertanánaca ndayá chënga aiñe yojtsamna jtsamana, y chca, nÿetscángbioye Bëngbe Bëtsabe delante junatsama, puerte ošbuáchiyënga y osertánënga Bëngbe Bëtsabe soyënguiñe, chënga Crísoftaca cánÿiñe mo canÿacá jtsemnëse. ²⁹ Chca chaotsemnama, atše bëtscá sëndëtrabája; y chca sentsama, chë Cristo yojtsama atše chaitsebomnama bëts obenánaca.

2

¹ Atše sëntseboše tsëngaftanga chašmotsetátšëmbo, Bëngbe Bëtsá becá tsimpadánama, tsëngaftangbioye jujabuáchama, chë Laodicea puebloquënga Jesucristbeñe ošbuáchiyënga y nÿetscanga chë ndocna te atše šmonjinÿe ošbuachiyëngnaca. ² Atše chca sëndama, tsëngaftanga y chënga ainaniñe bëts añemo chašmotsebomnama, y cánÿiñe mo canÿacá chašmotsemanama, nÿetscanga jtsenbobonshánëse. Chca, nÿets osertánana tsëngaftanga chašmotsebomnama, y chë tempo Bëngbe Bëtsá entsanga ndoñe tonjaninÿanyé buayenánama chašmotsetatsëmbuama, y chë buayenánana Cristbe soye entsemna. ³ Mo canÿe bëtscá bomnana iytëmena soycá pero mora ya uinÿenana, cachcá Crístbeñe entsemna nÿets osertánana y obenana Bëngbe Bëtsá jtsabuatumama. Chë soye tempo Bëngbe Bëtsá entsanga ndoñe tonjaninÿanyé, pero mora Cristo yojtsama bënga chë uámana soyënga chamotsebomnama. ⁴ Atše chca sentsichamo, botamana pal-abréngaca ndocná chacmondáingñema. ⁵ Er masque choca tsëngaftangaftaca atše ndoñe quetsátsmëna, atšbe ainana aiñe choca tsëngaftangaftaca entsemna; y atše puerte sëntsoyejuá tsëngaftanga šmatenëyeunanama y nÿets tempo Bëngbe Bëtsábeñe šmojtsošbuáchema.

Crísoftaca cánÿiñe mo canÿacá jtsemnëse, entsanga ndegombre tsabe vida jtsebomnana

⁶ Tsëngaftanga Jesucristbeñe ošbuáchiyënga šmojanóbiana ora, šmojanayana: “Cristo Jesús, Bëngbe Utabná entsemna ca”. Chcasna, tsëngaftanga cmontsamna jtsiyenana soyënga jtsamëse mo chë cháftaca cánÿiñe mo canÿacá tojtsemnacá. ⁷ Chca šmontsobena jamana, cháftaca cánÿiñe mo canÿacá nÿets tempo jtsemnëse. Smochtsiyena jtsamëse ntšamo cha tojabuatëmbacá y cada te más chca. Cabá más smochtsošbuáchiye chë Crístbiana buayenana soyëngama, ntšamo tcmojabuatumambacá; y Bëngbe Bëtsá sempre smochtsatschuanaye.

⁸ Cuedado smochtsebomna, ndoñe šmatjaleséncia ndocná chaondëtsamama tsëngaftanga jtsajbanama Crístbeñe ošbuáchiyana jtsebomnana. Chca entsanga montseboše juabnéngaca tsëngaftanga jáingñama, nÿe básefta entsangbe juabnénga y tondayama ndoservenana juabnénga. Chë juabnénga jtsóbocanana ntšamo bëts taitanga básëngbioye mondbetsabuátambayentsana y chë espíritëngbentsana, ndëmuanÿëngbiama entsanga jtsejuabnayana chënga nÿetsca soyënguiñe imománda ca; pero Crístbentsana chë juabnénga ndoñe ntsóbocanana.

⁹ Cristo endmëna cachcá ntšamo Bëngbe Bëtsá yomncá, masque mo canÿe entsacá quem luarentše yojëtsiyena; ¹⁰ y Bëngbe Bëtsá tojama tsëngaftanga ndegombre tsabe vida chašmotsebomnama, Crísoftaca cánÿiñe mo canÿacá bëtsemnayeca; y Cristo, nÿetsca chë mándayënga y obenana bomnëngbiama más uamaná endmëna. ¹¹ Tsëngaftanga Crísoftaca

cányiñe mo canyáca bétsemnayeca, mo uinýnananëngcá šmontsemna, tšëngaftanga Bëngbe Bëtsabe entšanga šmomnama. Quem uinýnanánana ndoñe quenátsmëna mo chë más delicadentse base bobachtema tmojatëtšcá, cach entšángbeyeca ntšamo judiënga monduamancá, pero aiñe entsemna cach Cristo nda tmojuuinýnaná; y chë uinýnanánana entsemna, tšëngaftangbe ainanentšana Cristo bacna juabnënga jabuajuánayana. ¹² Tšëngaftanga šmojánenabaye ora, enjamna mo ntšamo cach Cristo tmojanatbontsacá tšëngaftanga utebuantsánënga cuaftsemncá, er tšëngaftanga šmojanajbaná jtsamana chë tempo šmojánama bacna soyënga; y ntšamo Cristo cháuatayenama Bëngbe Bëtsá tojamcá, cachcá, tšëngaftanga šmojánenabaye ora, enjamna mo tšëngaftanga chašmatayenama Bëngbe Bëtsá cuafjamcá, er mora tšëngaftanga mo tsmëma entšangcá šmondoyena. Chca tojanopasá, Bëngbe Bëtsá obená bétsemnama tšëngaftanga šmojtsošbuáchema, y chë obenana tojama Cristo cháuatayenama.

¹³ Inye tempo tšëngaftanga Bëngbe Bëtsabiama mo obanëngcá šmojamna, yapa bacna soyënga jtsamama šmojanamana causa y uinýnanánënga mo Bëngbe Bëtsabe entšangcá ndoñe šmonjámnyayeca, pero aiñe šmojanamana bacna soyënga jtsamana nýe ntšamo šmojanbošcá. Morna Bëngbe Bëtsá tojama tšëngaftanga tšabe vida chašmotsebomnama, Crísoftaca cányñe mo canyáca jtsemnëse, y Bëngbe Bëtsá bëngbe nýetsca bacna soyënga šojtsaperdoná. ¹⁴ Mo nda ba ndebénënga tojtsabamna y chama tsbuanachangá tojtsamna y chiñe tojtsayana chënga obligaciönaca imojtsemna chë ndebénana pronto jtobocana ca, pero chë entšá chëchangá tojtsandbiama chë entšanga cha ndoñe más chamondëtsendebënana, Bëngbe Bëtsá cachcá tojama, bacna soyëngama bënga šojtsaperdoná ora. Jesús bëngbe bacna soyëngama cruciñe tojanóbana ora, enjamna mo Bëngbe Bëtsá bëngbe ndebénana tojtsanpochocá cuenta. ¹⁵ Jesucristo cruciñe tojanóbanayeca, Bëngbe Bëtsá tojanayëñjaná Satanás y chabe bacna espíritënga obenana bomnënga y ínýengbioye amëndayënga; y nýetsca entšangbe delante tojaninýanyé cha chënga jtsamëndayama yobenama, mo canýe reycá chë ínýënga tojayëñjaná ora, chabe entšángaftaca natsana jtsayana y chë ayëñjanánëngna ústonoye.

Ainaniñe becá jtsebošana chë ošbuáchiyëngbiama celoca yomna soyënga

¹⁶ Ndoñe caso šmattsabiamnaye, ndoñe tšabá šmontsama ca ínýënga tšëngaftangbiama tmojtsichamo ora, ndayá tšëngaftanga šmétsesaye o šmétsosfëšnyayama, o ndayá aiñe o ndoñe šmondbétsamama Bëngbe Bëtsá jadórama fiestënga ora o shbojueta fiesta ora, o jóchnama tese. ¹⁷ Bayté entsemna, Bëngbe Bëtsá entšangbe cucuatšñe chë mandënga tojánboshjona, chë soyëngama bënga jabuátambama. Chë mandëngaca Bëngbe Bëtsá yojaninýanyñaye ndayá más chcoye jopásama; entšángbioye yojaninýanyñaye ndayá Cristo yochjanmama. ¹⁸ Báseftanga mondmëna y chënga mo nduamanëngcá entšángbeñe jtsebínýnana, pero tsoye cachënga corente uámanënga jtsenobiamnayana y angelënga jtsadórayana, mo Bëngbe Bëtsá cuaftsemncá. Ndoñe caso šmattsabiamnaye, tšëngaftanga ndoñe tšabá šmontsama ca chënga tmojtsichamo ora, ntšamo chënga tmojtsichamcá tšëngaftanga ndoñe šmontsámayeca. Chënga jtsichámuana bëts soyënga mo otjenayoquécá tmojinýe ca, y nýe cachënga puerte jtsenábotamnayana, pero chca chamotsamama razón ndoñe quemátsbomna, er nýe ntšamo inýe entšanga imnetsejuabnaycá chëngnaca cachcá jtsejuabnayana. ¹⁹ Chënga Jesucristoftaca cányñe ndoñe tmonjoquedanga, y Cristo endmëna chë nýetsca ošbuáchiyëngbe amëndayá, mo chë bestšaše nýets cuerpo jtsemandayancá. Canýe cuerpiñe chë bestšaše jtsamana nýets cuerpo chaóbochema, ntšamo Bëngbe Bëtsá tojtsebošcá, chë cuerpo ndayá jasama chaotsebomnama jtsamëse, y nýetsca chë cuerpentša soyënga chamenefñanama jtsamëse. Cachcá, Cristo jtsamana nýetsca ošbuáchiyënga cányñe mo canyáca cháftaca chamotsemnama, y cada te más tšabá cha chašmotsábuatmama.

²⁰ Cristo tojanóbana ora enjamna mo tšëngaftángnaca cuafjobancá, y Bëngbe Bëtsá tšëngaftanga cmojatsebacá chë quem luarentse imománda espíritëngbe cucuatšentšana.

As, ¿tšëngaftanga ndáyeca šmojtšiyena jtsamëse mo chë nÿe quem luarama enojuabnayëngcá? ¿Ndayeca tšëngaftanga cabá šmobedecena chca mandënga, mo: ²¹ “Chë soye ndoñe matsbanana, chca soye ndoñe catjase, o chë soye acbe cucuátšeca ndoñe catjaca ca”? ²² Lempe chë mandënga, chë ndayá canÿa ndoñe bontsemna jamana, nÿe soyëngama jtsayanana, y tempo tojochnëngo ora, chë soyënga jtsopochócana y chora tondaye ntsámanana. Chë mandënga jtsemnana nÿe ntšamo entšanga mondbetsamcá y ínÿengbioye mondbetsabatambaycá. ²³ Ndegombre, ba entšanga jtsejuabnayana chë mandënga tmojamëngbiama, puerte osertanánaca chca tmojama ca, pero ndegombre chca ndoñe quenátsmëna; er chënga jtsichámuana, ntšamo Bëngbe Bëtsá jadórama yomncá imojtsabatambá ca, jtsabatambayana entšá cabnmëna uamaná ndoñe ntsenobiamnayana ca, y jabuache cachabe cuérpoca jtsamana ca. Pero chë mandënga tondaye ntsámanana, er chë mandënga entšangbe ainanentšana ndoñe ntjajuánana chë bacna soyënga jtsamama juabnënga.

3

¹ Cristo cháuatayenama Bëngbe Bëtsá tojanma ora, enjamna mo tšëngaftángnaca Crístbeñe ošbuáchiyënga, chašmatayenama cha cuafjamcá. Chíyeca, tšëngaftangbe ainaniñe puerte šmochtseboše ndayá Bëngbe Bëtsá celoca tšëngaftangbiama yobomncá; y choca, Cristo uámana puestentše endëtbemana, Bëngbe Bëtsabe catsbioica. Y šmochtsinÿinÿnaye chca šmojtsebošama, ntšamo jtsamëse mora šmojtšiyenama. ² Tšëngaftanga nÿets tempo chë celoca soyëngama šmochtsejuabnaye, ndoñe chë nÿe quem luarentše yomna soyëngama. ³ Tšëngaftanga Crísoftaca cánÿiñe mo canÿacá jtsemnëse, jtsemnana mo tšëngaftanga ya cuafjobancá, er mora ya ndoñe quešmátiyena tempcá jtsamëse. Cristo, Bëngbe Bëtsáftaca cánÿiñe mo canÿacá endmëna, y Cristo endmëna nda mora tšëngaftangbe vida yojtsinÿena. ⁴ Ndegombre, Cristo endmëna nda endama tšëngaftanga tšabe vida chašmotsebomnama; y quem luarentše cha cachiñe chaojtonÿná ora, tšëngaftángnaca chentše cháftaca šmochántsemna, y chora ntšamo Cristo corente uamaná y bëtsá yomnama Bëngbe Bëtsá yochjinÿanÿiyicá, tšëngaftangbiámncaca echanjínÿanÿiye más bëtsëtsanga y uamanënga šmojtsemnana.

Tempsca vida y morsca vida

⁵ Tšëngaftanga, ntšamo chë nÿe quem luarama enójuabnayënga mondbetsebošcá bošana lempe šmochtsajbaná. Ndocná chaondëtseboše ndaye bacna soye boyabása o shembásaftaca jtsamana, ni chca soyënguiñe ndoñe chaondëtsejuabná; ndoñe chaondëtšiyena nÿe ínÿengbiama bacna juabnënga jtsebomnëse, y ndoñe chaondëtseboše nÿe bëtscá soyënga ínÿengbiama más jtsebomnama, er chca jtsamana jtsayanana, chabiama más yojtsámana soyënga jtsebomnana, Bëngbe Bëtsá jatsbobonshánama. ⁶ Er entšanga mondmëna y chënga chca soyënga jtsamama jtsebošana, y Bëngbe Bëtsá ndoñe ntseyeunanana. Chca entšangaftaca Bëngbe Bëtsá puerte bochanjetna, y echanjamánda chë uabouana castigo chëngbeñe chaotsemnana. ⁷ Y tempo, tšëngaftanga šmojaniyena jtsamëse, sempre nÿe chca bacna juabnëngaca, ⁸ pero mora tšëngaftanga cmontsamna lempe quem soyënga stëtsoye jaquédana: ínÿengaftaca jetnana, ínÿengaftaca rábiaca jtsemnana, ínÿabioye ntšamo jáborlama jtsebošana, ínÿengbioye joyánguanguana, y ndoñe tšabe palabrenga jtsóyebuambnayana. ⁹ Ndoñe šmattsenbuambnaye, er ntšamo tempo šmojamncá mora tšëngaftanga ya ndoñe cachcá quešmátsmëna, y mora ndoñe quešmátiyena jtsamëse ntšamo tempo šmojanamcá. ¹⁰ Y mora tšëngaftanga šmojashjache jtsemnana mo tsmëma entšangcá, y ntšamo tempo šmojanamcá ndoñe cachcá quešmátama. Bëngbe Bëtsá chca tsmëma entšangcá tmojábiamca; y cha nÿets tempo yojtsama, tšëngaftanga cada te más ntšamo cha yomncá chašmotsemnana, chca, corente tšabá cha chašmuábuatmanama. ¹¹ Chíyeca, ndayá Bëngbe Bëtsá tojamama, ndoñe judiënga y judiënga cachcanga mondmëna; chë más delicadentše base bobachtema

tétšenënga ndoñe más uámanënga quemátsmëna chë ndoñe chca mondmënëngbiama; chë inye luarëngocana áshjajnënga, bën tjoye oyenënga, chë nye ínÿabiama nyets tempo oservénënga y chë cachëngbiama trabájayënga, nyetscanga cachcanga mondmëna. Chë nye ndayá iuámana endmëna Crístbeñe jtsošbuáchiyana y nyetsca ošbuáchiyëngbe ainaniñe cha yojtsemna jtsemándayama.

¹² Tšëngaftanga Bëngbe Bëtsábenga šmondmëna. Cha cmondábabuanÿeshana y tcmo-jabacacá chabe entšanga chašmotsemnama; chíyeca, tšëngaftanga cmontsamna ínÿënga jtsinÿanÿnayana nyetscangbiama jóngmiama šmuamanama, tšabe juabna ínÿëngbiama sempre šmnétsebomnama, cada ona chë ínÿënga chabiama más uámanënga cuaftsemncá imnétsejuabnayama, nyetscanga puerte bonshanánaca šmnétsënÿayama, y nyetsca pade-cena soyënguiñe corente uantadënga šmomnama. ¹³ Nyetscanga šmochtsenëuantana y šmochjenperdóna, nderado ntšamo nda ínÿabioye tbojaborlá y chama cha tbojt-satsëtsná ora. Ntšamo Bëngbe Bëtsá tšëngaftanga tcmojaperdonacá, tšëngaftángnaca cachcá ínÿënga šmochjáperdonaye. ¹⁴ Lempe chë soyëngama más enduámana nyetscanga jtsenbobonshánana. Nyetscanga šmojtšenbobonshánëse, tšëngaftanga šmochantsobena sempre lempe chë inye soyënga corente tšabá jtsamana, ntšamo ndegombre chë soyënga jamama yomncá. ¹⁵ Cristo endama tšëngaftangbe ainaniñe tšabe ebionana chašmotsebomnama. Chë tšëngaftangbe ainaniñe tšabe ebionánaca šmochtsiyena nyetscanga natjëmbana, Jesucrístbeñe ošbuáchiyënga quetsomñecá. Bëngbe Bëtsá tcmojáchembo tšëngaftanga nyetscanga cánÿiñe mo canÿe cuerpcá chašmotsemnama, y chca, natjëmbana chašmotsiyenama. Bëngbe Bëtsá sempre šmochtsatschuanaye.

¹⁶ Chë Crístbe puerte tšabe buayenana soyënga tšëngaftangbe ainaniñe nyets tempo šmochtsambaye. Nyets osertanánaca šmochtsenbuátëmbaye y šmochtsenbuayiynaye. Nyets ainánaca šmochjacánta chë Salmos librëšañe uabemana cantënga, chë Jesucristbe soyëngama cantënga, y chë Bëngbe Bëtsabe Espíritu iuama tšëngaftanga chašmotsobena jacántama soyënga; chca šmochjama Bëngbe Bëtsá jëtschuayama. ¹⁷ Y lempe ntšamo chašmojtsama o chašmotsichamcá, Bëngbe Utabná Jesúsbeñe ošbuáchiyënga quetsomñecá chca šmochjama, siempre Bëngbe Bëtsá Bëngbe Taitábioye, chábeyeca jtsatschuanayëse.

Ntšamo ínÿëngaftaca jtsiyenama

¹⁸ Shémanga, šmochtsatšëmbo tšëngaftangbe boyanga chë yebnentša mándayënga imomnama, y nyets tempo chca jtsejuabnayëse šmochtsiyena, er tšëngaftanga Bëngbe Utabnábeñe ošbuáchiyënga quetsomñecá, chca cmontsamna. ¹⁹ Boyanga, tšëngaftangbe shémanga siempre šmochtsababuánÿeshana, y podesca palabrëngaca ndoñe šmattsëtsësnaye.

²⁰ Básënga, tšëngaftangbe bëtsëtsanga nyetscañe šmochtsayaunana; chca šmojtsamëse, Bëngbe Bëtsá oyejuayá echántsemna. ²¹ Taitanga, ndoñe šmattsama tšëngaftangbe básënga chauetënama, ainaniñe tondaye añémoca chënga ndoñe chamondëtsatsmënama.

²² Tšëngaftanga chë nyets tempo nye ínÿabiama oservénënga, tšëngaftangbe nduiñënga nyetscañe šmochtsayaunana, y ndoñe nye chënga tcmojtsënÿa ora, mo nda nye entšangbe delante tšabá joquédama tojtsebošacá, ndayá chënga šmochtsayaunana nyets ainaniñe ndegombre tšabe juabnéngaca, er tšëngaftanga Bëngbe Utabnabiama corente respeto šmondobomna. ²³ Lempe ntšamo chašmojtsamcá, nyets tšëngaftangbe añémoca šmochtsama, mo Bëngbe Utabná ndegombre cuaftseservencá, y ndoñe nye entšangbioycá. ²⁴ Tšëngaftanga ya šmondëtatšëmbo, ntšamo cha chabe entšanga tojašebuachenacá mo uacanancá, Bëngbe Utabná tšëngaftanga cmochjátšatayama. Er Cristo, chë Utabná, endmëna ndábënga tšëngaftanga šmomnana, y cha šmondëserveda. ²⁵ Pero chë ndoñe tšabe soyënga tontsamábioye, Bëngbe Bëtsá bochanjacastíga, ntšamo chë entšá bacna soyënga tojamcá, er Bëngbe Bëtsabiama nyetscanga cachcá monduámana.

4

¹ Y tšëngaftanga, ndëmuanyëngbiana ínÿenga nyets tempo imoservena, nyetsca soyënguifne tšabá šmochtsama, y nyetscangbiana cachcá šmochtsemna, chë nyets tempo nÿe tšëngaftangbiana oservenëngaftaca, er tšëngaftanga šmondëtatšëmbo celoca canÿa endmëna, ndabiana tšëngaftangnaca oservënënga šmondmëna.

Ošbuáchiyënga jábuayenama

² Nyets tempo Bëngbe Bëtsáftaca šmochtsencuëntaye, ntšamo šmojtsichámuama botamana jtsejuabnayëse y Bëngbe Bëtsá jtsatschuanayëse. ³ Bëngbe Bëtsáftaca cha šmojtsencuënta ora, bëngbiámnaca chašmochtseimpadana, cha chaoma bënga fchayobenama Bëngbe Bëtsabe palabra Cristbiana entšanga jábuayenama, chë buayenana soye ndayama tempo entšanga ndoñe monjántatšëmbo. Atše chë buayenana soye entšanga abuátambaye causa, mora cárceloye sentsëtámena. ⁴ Chcasna, Bëngbe Bëtsá atšbiana šmochtseimpadana, atše chayobenama chë buayenana soyënga entšanga jabuátambama, y chë soye atše chaima chënga corente tšabá catafjosertaycá, er atše šontsemna chca jamana.

⁵ Smochtsiyena nyetsca soyënga osertanánaca jtsamëse chë Jesucristbeñe ndošbuáchiyëngaftaca, y chca, nyets tempo ínÿenga šmochtsinÿanÿnaye tšëngaftanga Jesucristbeñe ošbuáchiyënga bëtsemnama. ⁶ Inÿengaftaca chašmojtsencuënta ora, šmochtsama ntšamo šmojtsoyebuambnacá chëngbiana tšabá chaotsemnama, y soyënga šmochtsichamo nyetscanga oyejuayana chamotsebomnama; y šmochtsetátšëmbo ntšamo cmojtsamna cada cánÿabioye jojuana.

Jtadióšoftanama

⁷ Jesucristbeyeca bëngbe bonshana catšata Tíquico, canÿe trabajayá tšabe palabra bomná y Bëngbe Utabnabiana bëngaftaca oservená, tšëngaftangbioye noticiënga echanjuamba ndayá átšeftaca tojopasama. ⁸ Chíyeca cha tšëngaftangbioye sentsichamná, chca, tšëngaftanga chašmotsetatšëmbuama ndayá bëngaftaca yojtsopasana, y cha chacmañémuayama. ⁹ Cháftaca Onésimo echanjá, Jesucristbeyeca bëngbe bonshana catšata; cha canÿe tšabe palabra bomná endmëna, nda tšëngaftangbiocana tonjánabo. Chata tšëngaftanga cmochanjácuntaye lempe ntšamo muiñe yojtsopasancá.

¹⁰ Aristarco, muentše átšeftaca cárceloye utamená, cmontsacheuaná. Y Marcos, Bernabebe primo, chánaca cmontsacheuaná. Tšëngaftanga ya buayenánënga šmontsemna ndayá jamama cmojtsamnana, Marcos tšabá jofjama, cha tšëngaftanga jautsëtsayama tojase. ¹¹ Jesús, chë Justo cánaca uabainá, chánaca cmontsacheuaná. Quem pueblentša nyetsca judiënga ošbuáchiyënguentsana, nÿe chë unga átšeftaca mondëtrabája, Bëngbe Bëtsabe amëndayana entšangbioye chaóshjanguama, y chënga mondama atše ainaniñe bëtš añemo chaitsebomnama. ¹² Epáfrasnaca cmontsacheuaná, inÿe tšëngaftangbiocá y cha Cristo Jesusbiana jatrabájama endoservena. Cha nyets tempo tšëngaftangbiana Bëngbe Bëtsábioye tša bochandbëtseimpadana, tšëngaftanga Bëngbe Utabnábeñe ošbuáchiyana ndocna te chašmondájbanama, y nyets tempo chašmotsiyena lempe jtsamëse, ntšamo chë Jesucristbeñe corente ošbuáchiyënga jtsiyenana yojtsamncá; y chca, tšëngaftanga corente šmochántsetatšëmbo ntšamo šmojtsamncá ndegombre yomna ntšamo Bëngbe Bëtsá yobošcá. ¹³ Cach atše sënjinÿe y sentsobena jayanama ntšamo cha jabuache yotrabájama, tšëngaftanga jujabuáchama, chë Laodicea puebloquënga y Hierápolis puebloca oyenëngnaca. ¹⁴ Lucas, bëngbe bonshana ashnayá, cmontsacheuaná; y Démasnaca.

¹⁵ Chë Laodiceoca Jesucristbeyeca catšátanga bëngbe cuenta šmochjácheuaye. Ninfábioynaca šmochjachuaye, y nyetsca ošbuáchiyënga chë Bëngbe Bëtsá jëtschuayama chabe yebnentše jénefnama imuamanëngnaca. ¹⁶ Quem tsbuanácha chašmojualiá chentšana, Laodiceoca ošbuachiyëngbioye šmochjuíchmua, chócnaca mëcha

chamualiamá; y tšëngaftágnaca šmochjualía chë Laodiceoca ošbuachiyëngbioye tmonjanichmó tsbuanácha, chëcha tšëngaftangbioye chaojuáshjango ora.

¹⁷ Arquipo šmochjauyana yejuana chaotsantješna chë Bëngbe Bëtsá tbojabonyé trabajo sempre tšabá chaotsocumplínama.

¹⁸ Atše Pablo, nýe quem palabrënga tšëngaftanga jacheuayama cach atšbe cucuátšeca sëntsabiarná. Smochtsenójuabnaye atše utamená stsemnama. Atše, Bëngbe Bëtsá sëntseimpadana, cha chaoma tšabe bendicionënga tšëngaftangbeñe chaotsemnama.

1 Tesalonicenses

Jacheuayama

¹ Atše Pablo, Silvano y Timotéoftaca, quem tsbuanácha sentsabiamná tšëngaftangbiana, chë Tesalónica bëts puebloca Jesucristbeñe ošbuáchiyëngbiana, tšëngaftanga chë Bëngbe Bëtsá chë Taitá y Bëngbe Utabná Jesucristoftaca cánýiñe mo canýacá šmomnënga. Atše sëntseimpadana Bëngbe Bëtsá, chaoma tšabe bendicionënga tšëngaftangbeñe chaotsemnama, y tšëngaftanga ainaniñe tšabe ebionana chašmotsebomnama.

Pablo Bëngbe Bëtsábioye tbojtanchuá chë Tesalónica pueblentsa entsangbe ošbuáchiyama

² Bënga sempre Bëngbe Bëtsá fsëndëtschuaná tšëngaftangbiana, y bënga cháftaca ftsencuënta ora, tšëngaftangbiana fchandbëtseimpadana. ³ Bënga, Bëngbe Bëtsá chë Taitáftaca ftsencuënta ora, fsëndbétsenojuabnaye ntšamo tšëngaftanga šmotrabájama, Jesucristbeñe ošbuáchiyana šmobómnayeca; ntšamo tšëngaftanga tša ínýenga šmëjabuáchana, Jesucristo šmobobonshánayeca; y ntšamo tšëngaftanga, ndocna te ntjajbanacá, jtsošbuáchiyëse Bëngbe Utabná Jesucristbeñe šmobátmanama. ⁴ Jesucristbeyeca catšátanga, bënga fsëndëtatšëmbo Bëngbe Bëtsá cmababuánýeshanama, y cha tcmojábacacama chábénga chašmotsemnama. ⁵ Bënga chë tšabe noticiënga Jesucristbiana tcbonjanabuayená ora, ndoñe nýe bënga jóyebuambayëse chca quenjatsmëna, ndayá chë Uámana Espíritbe obenanácna, y bënga corente jtsejuabnayëse chë buayenánana ndegombre soye bëtsemnama. Tšëngaftanga corente šmondëtatšëmbo ntšamo bënga ftsjamna tšëngaftangaftaca fsënjamna ora, tšabe soyënga tšëngaftangbiana nguayíñe.

⁶ Chora, ntšamo bënga fsënjanamcá y ntšamo Bëngbe Utabná enjaníyencá, tšëngaftanga šmonjanontsé amana; y chë buayenánana šmonjanóyëngacñe chë Uámana Espíritu tcmojanatšatá oyejuayánaca, masque ínýenga tmojamna tšëngaftanga puerte chašmosufrima. ⁷ Mëntsá, tšëngaftanga uánatsanënga šmonjanobiana ntšamo ndegombre jtšiyenama, nýetsca Macedonia y Acaya luarentša Jesucristbeñe ošbuáchiyëngbiana. ⁸ Tšëngaftanga šmojoyebuambá Bëngbe Utabná Jesucristbe palabrama. Mora, ndoñe nýe Macedonia y Acaya luarentše entsanga chama quemátstatšëmbo —nýets luarenache entságnaca montsetátšëmbo ntšamo tšëngaftanga Bëngbe Bëtsábeñe šmojtsošbuáchema —y chca, bënga tondaye más quešnátëjajoboto tšëngaftangbiana jatichámuama. ⁹ Cach entsanga montsoyebuambná chë bënga tcbonjánabuache ora tša tšabá tšëngaftanga šcojanëbuajama. Chëngnaca montsichamo ntšamo tšëngaftanga šmojtšajbaná chë šmojanjuabná diosënga yojamna soyënga adórayana y šmojanontsé chë tšabe benache jtishachama, y chë Bëngbe Bëtsá ndegombrá y ainá jasérviana, ¹⁰ y chca, chabe Uaquiñá Jesús jobátmama; mua celocana echanjésabo; chabiana Bëngbe Bëtsá tojanma obanënguentsana cháuatayenama, y cha šochanjátsebacaye chë uabouana castigüentsana, Bëngbe Bëtsá entsangbe bacna soyëngama chëngbiana yobomnentšana.

2

Ntšamo Pablo yojantrabája Tesalónica puebloca

¹ Cach tšëngaftanga, Jesucristbeyeca catšátanga, šmondëtatšëmbo bënga tcbonjánabuache ora ndoñe nýe bonamente quenjatsmënama. ² Tšëngaftanga šmondëtatšëmbo, bënga cabá tšëngaftangbiyënda ora, Filiposoca šonjanëyánguango y bacá šonjánaborlama; y masque tšëngaftangbioca bëngbe contra entsanga monjamna, Bëngbe Bëtsá tonjanma bënga fchayobená chë tšabe noticiënga bëts cá añémoca jabuátambama. ³ Er bënga

entsángbioye bostero soyënga ndoñe queftsjatanabuayiyná, tsëngaftangbiama bacna soyënga ndoñe queftsjatanboše, y entsanga jáingñama ndoñe queftsjatanoyebuambná. ⁴ Bëngna inyetšá; Bëngbe Bëtsá yojanjuabná bënga chabe trabajo jamama obenënga ftsjamna ca, y chca, šonjanëbuáyana chabe tsabe noticiënga entsanga jabuátambama, y chca bënga fsëndoyebuambná; chíyeca bënga ndoñe nýe entsangbe bominyiñe tsabá chaotsinyñama queftsátama, ndayá nýe Bëngbe Bëtsabiama, nda chë ndayá bëngbe ainaniñe yomnama yotátšëmbo. ⁵ Ntsamo tsëngaftanga corente šmondëtatšëmbcá, bënga ndocna te tsëngaftangbiama tsabe soyënga tifjánayana, tsëngaftanga bëngaftaca oyejuayënga chašmotsemnama; y ntsamo tsëngaftanga cbonjanëtsëtsnacá ndoñe quen-jatsmëna nýe tsëngaftangbentsana ba soyënga bëngbiama josháchiñama. Bëngbe Bëtsá chama yotátšëmbo. ⁶ Ndocna te bënga queftsatsnguá entsanga más uamanëngcá bënga chašotsabiamnama, ni tsëngaftangbentsana, ni inýengbentsana.

⁷ Masque bënga, Cristbe ichmónënga bëtsemnama, matifjanobená tsëngaftanga nýe sempre jtsamëndayana, bënga ndoñe chca chibiátanma; bënga corente jtsababuánýeshanëse cbonjánanyëna, ntsamo canýe mamá chabe básenga jtsabëchayana y corente bon-shanánaca jtsanyëna. ⁸ Tša cbonjánababuanýeshanayeca, bënga ndoñe nýe chë Bëngbe Bëtsabe tsabe noticiënga checbënjatanabuayená, tsëngaftanga chiñe chašmotsošbuáchema ntsamo bënga fsëndošbuachecá, ndayá bëngbe vidënga jáshbiamnaca fsënjanprontana tsëngaftangbe tsabiama. ¡Tša cbondábabuanýeshana! ⁹ Jesucristbeyeca bëngbe catšátanga, tsëngaftanga šmenabouínýna ntsamo bënga bëtscá y jabuache fsënjantrabajama, Bëngbe Bëtsabe tsabe noticiënga abuayiynayiñe y bëngbe vida onguayiñe, chca, tsëngaftanga ndoñe chacmondëtsamnama bëngbe uajabótama bënga jatatsatnayama.

¹⁰ Cach tsëngaftanga šmondëtatšëmbo y Bëngbe Bëtsánaca, ntsamo bënga ftsjamna tsëngaftanga chë ošbuáchiyëngaftaca fsënjamna ora; fsënjaniiyena ntsamo Bëngbe Bëtsá tsabá tbojtsinyancá, nýetscángaftaca fsënjánama ntsamo jamama šojanamncá, y ndocná quenátobena jatichámuana ntsamo fsënjanamcá ndoñe tsabá yonjamna ca. ¹¹⁻¹² Tsëngaftanga šmondëtatšëmbo, bënga bëtscá jóyebuambayëse cada ona tsëngaftanguentsá cbonjanëjabuachanama y cbonjáñañemuama, ntsamo canýe taitá chabe básengaftaca endbetsamcá. Bënga bëtscá cbonjanëtsëtsná ntsamo Bëngbe Bëtsá tsabá tbojtsinyancá chašmotsiyenama; y Bëngbe Bëtsá cmontsëbuájajana chabe amëndayoye jamashënguama y chabe obenana y buashinýinýanana jinýama.

¹³ Bënga, Bëngbe Bëtsabe tsabe soyënga cbonjanabuayiyná ora, ntsamo tcbon-janëyancá tsëngaftanga šmonjanuena y šmontsanošbuaché mo Bëngbe Bëtsábiocana buayenanancá, y ndoñe nýe entsangbe oyebuambnayanancá. Y ndegombre Bëngbe Bëtsabe buayenánana endmëna, y chë palábraca, tsëngaftanga chë chábeñe ošbuachiyëngbeñe Bëngbe Bëtsá bëtscá soyënga yojtsama. Chama sempre Bëngbe Bëtsá fsëndëtschuaná.

¹⁴ Jesucristbeyeca catšátanga, cach tsëngaftangbe luarentša entsanga cmonjanëcamena ora y šmonjansufrina, šmonjanpasá ntsamo chë Judeoca Bëngbe Bëtsábeñe ošbuachiyëngcá enefjuanënga tmonjanpasacá, y chëngna Cristo Jesusbe entsanga mondmëna. Chënga tmonjansufrí cach luarentša entsanga, chë judiënga, chëngbioye monjanëcamena ora. ¹⁵ Chë judiëngbe bëtš taitanga, Bëngbe Bëtsabe juabna oyebuambnayëngbioye tmojtsanëbaye, y ntsamo chëngbe bëtš taitanga tmojanmccá, chëngnaca Bëngbe Utabná Jesúsbioye tmojanóba, y chënga mondama bënga chaftsesufrínama. Chënga ndoñe tsábënga Bëngbe Bëtsabe bominyiñe quemátsmëna, y nýetsca entsangbe contra montsemna.

¹⁶ Chë ndoñe judiëngbioye, Bëngbe Bëtsá cháuatsebacama jábuayenama fstseboše ora, chë judiënga bëtscá jtsamana bënga ndoñe fchandobenama chca jamama. Judiënga nýets tempo bacna soyënga monjánama; pero chë entsanga jábuayenama bënga ndoñe fchandobenama jtsamana, entsemna chë último bacna soye ntsamo chë judiënga jamama imojtsobencá, más ya ndoñe; y mora, cabana, Bëngbe Bëtsá ya puerte chëngaftaca tbojetna y echanjácastigaye.

Pablo tša yojánboše, Tesalónica pueblaca entsanga jánÿama

¹⁷ Jesucristbeyeca catšátanga, bēnga tšēngaftangbentsana baseftayté jēftseboचना sonjanotocá ora, masque ndoñe choca tšēngaftangaftaca queftsjatanmēna, sempre tšēngaftangbiama fsēnjanenuabná, y tša fsēnjánboše tšēngaftangbioye jtésana jautsētsayama.

¹⁸ Bēnga fsēnjánboše tšēngaftangbioye jésana; chíyeca cach atše Pablo, ba soye sēnjanóshenguēnja jobenayama choye jésama, pero Satanás yojantrabája bēnga ndoñe fchandobenama chca jamama. ¹⁹ Atše sēntsanboše tšēngaftanga jautsētsayama, er tšēngaftangbeyeca Bēngbe Utabná Jesusbe delante, cha yochjésabo ora, ntšamo tšēngaftanga šmoyenama, bēnga puerte jtsošbuáchiyēse fchantsobatmana, corente oyejuayēnga fchtsemnama y más bētsētsanga fchtsemnama. ²⁰ Aíñe, ndegombre, ntšamo tšēngaftanga šmoyenama, bēnga bētská añémoca ntšamo tšēngaftangbeñe tifjamama fsēndbétsoyebuambnaye, y tša oyejuayēnga fsēntsemna.

3

¹ Chíyeca ya ndoñe chibiatanobená más jatobátmanana tšēngaftanga jautsētsayama; as fsēnjanjuabó nÿe bēndata Atenas bēts pueblentse joquédana, ² y jíchmuana Jesucristbeyeca bēngbe catšata Timoteo, chē bēngaftaca trabajayá, Bēngbe Bētsábioye oservéniñe, tšabe noticiēnga Cristbiama entsanga abuyayñe. Fsēnjanichmó chacmañémuayama y chaotsamama tšēngaftanga Jesucristbeñe más chašmotsošbuáchema; ³ y chca, ndocná Jesucristbeñe ošbuáchiyana chaondájbánama, masque tšēngaftanga Jesúsbeñe ošbuáchiyēnga bétsemnama, ínÿenga imojtsama chašmotsesufrínama. Er cach tšēngaftanga šmondētatsēmbó bēnga šojtsamna chca quem luarentse jēftsepdecénana. ⁴ Y cabá tšēngaftangaftaca fsēnjēftsemna ora, tcbonjanéyana bēnga šojánamna jasúfriana; y ndegombre chca tonjopasá, ntšamo tšēngaftanga ya šmondētatsēmbcá. ⁵ As y chē tšēngaftangbiama jtsetatsēmbuama más jatobátmanana ndoñe quetstétsobenayeca, sēnjanjuabó šojtsemna Timoteo jíchmuana. Sēnjanichmó atše jtsetatsēmbuama aíñe bētská o ndoñe tšēngaftangbe ošbuáchiyana Jesucristbeñe tayoamnama, er atše yapa sēnjanjuabná nderado Satanás tojanma tšēngaftanga bacna soyēnga chašmotsamama, y chca, bēngbe trabajo tondayama chaondētsoservénama.

⁶ Pero mora, Timoteo tšēngaftangbiocana tontashjango y tonjúshjango noticiēnga, y bēnga chama oyejuayēnga fsēntsemna, ntšamo tšēngaftanga bētská Jesucristbeñe šmojtsošbuáchema y nÿetscanga šmenbobonshánama. Cha šonjacuntá ntšamo tšēngaftanga corente oyejuayēnga bēngbiama šmuatenajuabnama, y ntšamo tšēngaftanga tša šmojtseboše bēnga jánÿama, cachcá ntšamo bēnga tšēngaftanga jánÿama tša fsēntsebošcá. ⁷ Quem sóyeca, Jesucristbeyeca catšátanga, y mora chē bēnga nÿetsca chē padecena soyēnga ftssebomna ora y ínÿenga bēnga jasúfriama imojtsama ora, bēts añemo fsēntsebozna, ntšamo tšēngaftanga tša Jesucristbeñe šmojtsošbuáchema jtsetatsēmbēse. ⁸ Jtsetatsēmbuana tšēngaftanga sempre puerte tšabá Bēngbe Utabnáftaca šmoyenama, entsama bēnga más añémoca chaftsiyenama. ⁹ Mora fchantsovena Bēngbe Bētsá jtsatschuanayana tšēngaftangbiama, y chē tšēngaftangbeyeca chabe delante bēnga oyejuayana ftsbomnámnaca. ¹⁰ Cada te, bnēté y ibeta, tša Bēngbe Bētsá fsēndétseimpadana jobenayama tšēngaftanga jautsētsayama chašualesenciama, Bēngbe Bētsabe palabra tšabá chašmobedecema, chē buayenánana ntšamo yojtsashbencá jabuátambama.

¹¹ Bēnga, Bēngbe Bētsá fsēntseimpadana, cachá y Bēngbe Utabná Jesús, chašújabuache bēnga fchayobenama tšēngaftangbioye jama jautsētsayama. ¹² Y Bēngbe Utabná chaoma más bētská chašmotsenbobonshánama, y cachcá corente nÿetscángaftaca, ntšamo bēnga cbondababuanÿeshancá. ¹³ Chca, tšēngaftangbe ainaniñe bētská añemo šmochántsebozna; y Bēngbe Utabná Jesús cachábengaftaca chaojésabo ora, Bēngbe Bētsá Bēngbe Taitabe delante ndocná chaodayana, ntšamo tšēngaftanga šmojamcá ndoñe tšabá yontsemna ca, er tšēngaftanga šmondmēna Bēngbe Bētsábēnga, nÿe cha jtseservénama.

4

Ntsamo jtsiyenama, Bëngbe Bëtsá oyejuayá chaotsemnana

¹ Y mora inye palabra smochjatspasencia. Jesucristbeyeca bëngbe catsátanga, tsëngaftanga bëngbentsana smonjanatsjinye ntsamo jtsiyenana cmojanamna, ntsamo Bëngbe Bëtsábioye oyejuayá jabemama yomncá, y ndegombre chca tsëngaftanga smondoyena. Y mora Bëngbe Utabná Jesusbe cuenta, cbontsaïmpadana y beca cbontsëtsëtná más chca chašmotsamama.

² Tsëngaftanga smondëtatšëmbo ndayá tifjanayana ntsamo tsëngaftanga chašmotsiyenama, y chca fsëñjanma Bëngbe Utabná Jesús chca jamama sonjanamëndáyeca. ³ Bëngbe Bëtsá endboše tsëngaftanga chašmotsiyenama mo Bëngbe Bëtsabengcá, ndocná bacna soyënga boyabása o shembásaftaca chaondëtsamama, ⁴ y nyetscanga chamotsobena ntsamo canye shema jonguanguana, chë ntsamo canya Bëngbe Bëtsábia yomná jamama ibomncá, y ntsamo entsangbe bominyiñe tsabá yomncá, ⁵ y ndoñe chabondónguango nye cháftaca bacna soyënga chëngbe cuérpoca jamama, ntsamo chë Bëngbe Bëtsábioye nduabuátmënga mondbetsamcá. ⁶ Chë palabriñe ndocná chabe catsátbioye chabondëingñe, chë catsatbe shëmaftaca bacna soye jamëse, er chca amëngbioye Bëngbe Utabná corente echanjácastigaye. Chiyeca bënga ya bëtscá chama tcbonjabuayená. ⁷ Er Bëngbe Bëtsá ndoñe šonjánachembo bacna soyënga boyabása o shembásaftaca jtsamama, ndayá ntsamo tsabá yomncá jtsamama, ntsamo chabe entsanga mondbetsamcá. ⁸ Mëntsá, nda quem buatëmbana soyënga tojtsábotena, cha ndoñe nye entsanga jtsëbátenana, ndayá Bëngbe Bëtsábioye, nda tsëngaftangbe ainaniñe Uámana Espíritu cháuamashënguama tojama.

⁹ Atše ndoñe quešnátsmëna juabuábiamana ntsamo cmojtsamna inyënga Jesucristbeñe ošbuáchiyënga jtsababuányëshanama, er cach Bëngbe Bëtsá tcmonjabuatambá nyetscanga chašmotsenbobonshánama. ¹⁰ Y ndegombre, tsëngaftanga chca smondama nyetsca Macedonia luarentše Jesucristbeñe ošbuáchiyëngaftaca. Pero cbontsaïmpadana, Jesucristbeñe catsátanga, más chca chašmotsamama.

¹¹ Nya sempre quem soyënguiñe smochtsentsëna: natjëmbana jtsiyenana, inyëngbe soyënguiñe ndoñe ntontremetënanana, y ndoñe ntjatobátmanana nye inyënga tsëngaftangbiamama chamotsetrabájama, ntsamo tcbonjanëyancá tsëngaftangaftaca fsëñjanma ora; ¹² chca smochtsama, chë inyënga Jesucristbeñe ndošbuáchiyënga chacmotsarrespetánama, y ndocnábeñe ntjatobatmancá smochantsobena jtsiyenana.

Bëngbe Utabná quem luaroye yochjésabo ora

¹³ Bëngbe catsátanga, bënga fsëntseboše tsëngaftanga ndegombre chašmotsetátšëmbo ntsamo chë obanëngaftaca yochjopásama, y chca, tsëngaftanga ndoñe ngmenánaca chašmondëtsemnana, mo chë inyëngcá, chë tcojóbanentsana ndoñe yontsemna jtayenama ca juabnyëngcá. ¹⁴ Bënga fsëndošbuaché Jesús tojanóbana y tojtayenama, y cachcá bënga fsëndošbuaché chë tmojóbanënga y Jesúsbeñe tmojtsošbuachese, Bëngbe Bëtsá chëngbiamama yochjama chë nyetsca tescama yomna tsabe vida Jesucristoftaca chamotsebonnana, y quem luaroye cháftaca chamuatábama.

¹⁵ Chë soyama bënga cbontsëtsëtná ntsamo cach Bëngbe Utabná tojëftsanabuatambacá: Bëngbe Utabná chaojésabo ora, chë ošbuáchiyënga chë te cabá ainënga chamojtsemnënga, chábioye ndoñe quemochátinýena tsbanánoca, más natsana chë ya obanënga chë te mochtayenëngbiamama. ¹⁶ Er entsanga mochanjouena canye mando juayebuáchenana, chë angelëngbe amëndayabe oyebuambnayana y chë Bëngbe Bëtsabe trompetëfjua juajëtámna, y chora cach Bëngbe Utabná celocana echanjástjango. Y chë tmojóbanënga, Crístbeñe imojanošbuachenga, natsana mochántayena; ¹⁷ chentšana, chë ainënga chamojtsemnënga chëngaftaca cánýiñe Bëngbe Bëtsá šochanjúyamba, Bëngbe Utabná yochtsemnoca jashjanguama, chë celoca jantšetëshënga endmënocá; as chentšana nyetsca tescama

cháftaca bēnga mochántsemna. ¹⁸ Quem palabrēngaca nyetscanga ndoñe más ngménana ainaniñe chašmondětsebonna.

5

¹ Jesucrístbeyeca catsátanga, ndoñe quenátsiyta atše jubuábiamana mocna ora chē soyēnga yochjopásama. ² Cach tsēngaftanga corente šmondětatsēmbo, Bēngbe Utabná yochjésabo chama ndocná chaondětsejuabná ora, mo canye atbēbanacá jashjanguana ibeta ndocná chama tonjatsjuabná ora. ³ Entšanga chamojyana: “Lempe tsabá endētsonñe y tondayama quešnátamna játauatjana ca”, chora nye ndeolpe chē entšangbiama tša jasúfriama echanjóshjango, mo canye shembása šešona jtsebonnama ora nye ndeolpe jasúfriama jóntšancá; y ndegombre, entšanga chca jasúfriama quemochatotsbocá. ⁴ Pero tsēngaftanga catsátanga, ndoñe quešmátiyena mo ibetiñcá, bacna soyēnga jtsejuabnayēse y jtsamēse; y chca, Bēngbe Utabná chaojésabo ora, tsēngaftanga ndoñe auatjanánēnga quešmochátsmēna, mo ndábioye canye atbēbaná tbojotbá ora, chábioye cuaftsauatjanacá. ⁵ Nyetsca tsēngaftanga šmondmēna entšangbe juabna binýnayabe básenga, y mo binýniñcá šmondoyena. Bēnga ndoñe chē ibetiñe mandayabe básenga quemuátsmēna, y mo ibetiñcá ndoñe quemuátiyena; ⁶ chíyeca bēnga ndoñe quešnátamna jtsemnana mo chē cachēngbe cuerpo jenomándama ndobenēngcá, chē mo cuaftsemangcá oyenēnga. Pero aiñe šontsamna mo chē fšnēngcá jtsiyenana, bēngbe cuerpo jtsemándayēse y nyets tempo jtseprontánēse. ⁷ Ibeta ora entšanga jtsemangana, y cach ibeta tojtsemna ora entšanga jotmenangana; ⁸ pero bēnga, chē binýnentsēngna, šontsamna sempre bēngbe cuerpo jtsemándayana. Šontsamna Bēngbe Bētsábeñe jtsošbuáchiyana y cha jtsebobonshánana, chē uyaná Satanasbiana jenéuyanama y cha jayénjanama, mo canye soldadcá, canye morocho soye cochaca jenácochjatsana jtsevalentiana y ndoñe chamondēyénjanama. Y chē castigüentšana Bēngbe Bētsá šochjátsebacamnaca puerte jtsošbuáchiyēse jtsobátmanana; y chca, bēnga mochántsemna mo canye soldadcá, cha canye casquēse juabuchētsana jenéuyanama. ⁹ Er Bēngbe Bētsá ndoñe šonjáchembo bēnga chašotsamnama chē nyetsca tescama castigo jtsebonnama. Ndayá Bēngbe Bētsá šojabacacá, Bēngbe Utabná Jesucrístbeyeca bēnga chamótsbocama. ¹⁰ Cha bēngbiama tojanóbana, bēnga cháftaca cányiñe jtsiyenama chamotsobenama, masque ainēnga o obanēnga chamojtsemnēse, cha chaojésabo ora. ¹¹ Chíyeca, nyetscanga šmochtsenañēmuaye y šmochtsenájabuachana más jtsošbuáchiyama, ntšamo tsēngaftanga mora ya šmontsamcá.

Pablo choca ošbuáchiyēnga jábuayenama

¹² Jesucrístbeyeca catsátanga, cbontsaimpadana chašmotsarrespetana chē Bēngbe Bētsabiana tsēngaftangbeñe trabajayēngbioye, y chē Bēngbe Utabná tsēngaftanguentše tojábacacanga uánatsanēnga chamotsemnana y ntšamo jtsiyenama cmojtsamnama chácmbuayenama. ¹³ Cmontsamna chēnga jtsarrespetánana y jtsababuánýeshanana, ndaye trabajo chēnga imojtsamama. Natjēmbana nyetscángaftaca šmochtsiyena.

¹⁴ Quem soyēnga chašmotsamámncaca cbontsaimpadana: jatrabájama ndoñe tmontsebošēngbioye šmochjucácana, añemo ndbomnēngbioye šmochjáñemuaye, bētscá ošbuáchiyana ndbomnēngbioye šmochjújabuache, y uantadēnga nyetscángaftaca šmochtsemna.

¹⁵ Cuedado šmochtsebonna, nderado nda bacna soye tbojaborlase, ndocná ndoñe cachcá chabondětachnēnguama. Masna, nye šmochtsentšena nyets tempo tsabe soyēnga jtsamama cach tsēngaftanguentšēngaftaca y nyetsca entšangaftácnaca.

¹⁶ Nyets tempo oyejuayēnga chašmotsemna. ¹⁷ Sempre Bēngbe Bētsáftaca šmochtsencuéntaye. ¹⁸ Nyetsca soyēnguiñe Bēngbe Bētsá šmochtsatschuanaye; er chca entsemna ndayá cha yojtseboše, bēnga Cristo Jesúsbeñe ošbuachiyēngcá chamotsamama.

¹⁹ Ndoñe šmattsama ntšamo chë Uámana Espíritu tšëngaftangbeñe yojtsamcá chaot-sopochocama. ²⁰ Ndoñe šmattsábotena chë Bëngbe Bëtsabe juabna oyebuambnayëngbe buayenana soye. ²¹ Yejuana šmochjájuaboye y šmochjayana, chë Bëngbe Bëtsabe juabna oyebuambnayá yomna ca tojtsichamuabe buayenánama ndegombre Bëngbe Bëtsábiocana tayóbocanama, y chentša tšabe soyënga šmochjobuajo y sempre chca šmochtsama. ²² Nýetsca bacna soyënguentsana šmochtsojuánañe.

²³ Cach Bëngbe Bëtsá, chë bëngbe ainaniñe tšabe ebionana chamotsebomnama endamá, nýetsca soyiñe tšábenga chacá chacmabiama, y nýets tšëngaftangbe espíritu, ainana y cuerpo chaotsinýena, Bëngbe Utabná Jesucristo chaojésabo orscama; y chora, ntšamo tšëngaftanga šmojamama bacna soyënga yojtsemna ca ndocná chaodayanama. ²⁴ Nda tcmojúbuaja chábenga chašmotsemnama, cha sempre jtsamana ntšamo tojayancá, y lempe cha echanjama.

Inýe rueguënga chëngbiama y jtadiósoftanama

²⁵ Jesucristbeyeca catšátanga, Diosmanda, bëngbiámnaca Bëngbe Bëtsá šmochtseimpadana.

²⁶ Nýetscángbioye mo Jesucristbeyeca catšatangcá šmochjácheuaye, jtenámochëse, ntšamo cach tšëngaftangbe pamíllanga puerte bonshanánaca šmondbetsacheuanaycá.

²⁷ Cbontsaménda quem tsbuanácha nýetsca Jesucristbeñe ošbuáchiyënga chašmëbuáliama, y chca sentsama, Bëngbe Utabná chca jamama šojanmandáyecca.

²⁸ Atše sëntseimpadana Bëngbe Utabná Jesucristo, chaoma tšabe bendicionënga tšëngaftangbeñe chaotsemnama.

2 Tesalonicenses

Jacheuayama

¹ Atse Pablo, Silvano y Timotéoftaca, quem tsbuanácha sentsabiamná tšëngaftangbiana, chë Tesalónica bëts puebloca Jesucristbeñe ošbuáchiyëngbiana, tšëngaftanga Bëngbe Bëtsá chë Taitá y Bëngbe Utabná Jesucristoftaca cánÿiñe mo canÿacá šmommënga. ² Atse sëntseimpadana Bëngbe Bëtsá, chaoma tšabe bendicionënga tšëngaftangbeñe chaotsemnama, y tšëngaftangbe ainaniñe tšabe ebionana chašmotsebomnama.

Cristo chaojésabo ora, ntšamo entšanga tmojamama Bëngbe Bëtsá echanjayana

³ Jesucristbeyeca bëngbe catsátanga, šontsamna nÿets tempo Bëngbe Bëtsá tšëngaftangbiana jtsatschuanayana, ntšamo tšëngaftangbiana jamama šojtsëtocancá, er tšëngaftanga cada te más ošbuáchiyana šmontsebomna, y ntšamo tšëngaftanga nÿetscanga šmojtsenbobonshana, tempscama más yojtsemna. ⁴ Tšëngaftangbe ošbuáchiyama y bonshánama, bënga nÿets tempo oyejuayënga fchandbétsemna, chë ínÿenache Bëngbe Bëtsábeñe ošbuachiyëngcá enefjuanëngbeñe tšëngaftangbiana jóyebuambayama. Bënga fchandbétsoyebuambnaye ntšamo tšëngaftanga inÿetsá ntjatsjuabnycá Jesucristo šmëstonama, y ntšamo tšëngaftanga chábeñe tša šmošbuachémnaca, masque ínÿenga tša cmëcamena y chašmosufrima bëtscá imojtsama, tšëngaftanga Jesucristbeñe ošbuáchiyënga bétsemnama. ⁵ Tšëngaftanga chca Cristo šmëstonayeca, corente entsinÿinÿena Bëngbe Bëtsá nÿetsca soyënguiñe tšabá amá yomnama, y entšanga ntšamo tmojamama tšabá o ndoñe tšabá bétsemnama jayanama ora, cha chca echanjayana ntšamo entšanga tmojtsomerecencá. Y chca entsayana tšëngaftanga aíñe merecido šmotsobuájoñe chabe amëndayoye jamashënguama ca; y mora, tšëngaftanga choye jobenayama jashjanguama šmojtsamama, ínÿenga imojtsama chašmotsesufrinama.

⁶ Bëngbe Bëtsá echanjama ntšamo jamama ibomncá; echanjama chë tšëngaftanga chašmosufrima imojtsamënga bëtscá chamosufrima; ⁷ y echanjama tšëngaftanga y bënga chë mondësufriëngbiana, ndoñe más chamondëtsesufrinama. Cha quem soyënga echanjama, Bëngbe Utabná celoca chaojábobocna ora. Cha chabe puerte obenana bomna angelëngaftaca echanjabo, y chora bëtscá iñetsënga echántsemna. ⁸ Cha echanjabo chë Bëngbe Bëtsábioye jtsabuatmama ndoñe montsebošënga jabácastigayama, y chë tšabe noticiënga Bëngbe Utabná Jesusbiana ndoñe montsuenanëngbioynaca. ⁹ Chënga Bëngbe Bëtsá echanjácastigaye, nÿetsca tescama jtsapochócase; y Bëngbe Utabná bentšana bënoca mochantsemnënga, y ndocna te quemochatobenaye jinÿama Bëngbe Utabná tša bëtsá y obená bétsemnama. ¹⁰ Quem puerte uámana te, Bëngbe Utabná chaojésabo ora, nÿetsca chabe entšanga, nÿetsca chábeñe ošbuáchiyënga cha mochántšatschuanaye y mochántšichamo: “¡Tša obená cha yomna ca!” Y tšëngaftanga chëngaftaca šmochántsemna, er tšëngaftanga šmotsanošbuaché bënga ndegombre fsënjántatsëmbo soyënguiñe, chë bënga tcbonjanabuayená soyënguiñe.

¹¹ Chíyeca, chca chaotsemnama, nÿets tempo Bëngbe Bëtsábioye tšëngaftangbiana fsëndëimpadana merecido bomnënga chácmbiamama, chë vida chašmotsebomnama, ndayama cha tcmojúbuaja, y chabe obenánaca bëtscá chaoma tšëngaftanga chašmobená nÿetsca tšabe soyënga ntšamo šmojtsejuabnacá jamama, y chašmobená jamama ndaye soyënga ntšamo šmojtsamcá, Jesucristbeñe šmojtsošbuáchema. ¹² Chca jtsamëse, tšëngaftanga šmochanjínÿanÿiye Bëngbe Utabná puerte bëtsá y uamaná bétsemnama, y cha echanjama tšëngaftanga más uamanënga chašmotsemnama. Chca echanjopása, er Bëngbe Bëtsá y Bëngbe Utabná Jesucristo tšëngaftangbiana tšabe juabna ibobomna.

2

Chë Bëngbe Bëtsabe contra yomná

¹⁻² Mora atše sëntseboše Bëngbe Utabná Jesucristo jésabama orscama jáuyanama, chë bënga cháftaca tsbanánoca jteninýenama ora. Básefta entsanga imojtsichamo chë bëts uámana te, chë Bëngbe Utabná jésabama te, ya tojóshjango ca; pero cbontsaimpadana, Jesucristbeyeca catšátanga, bëtsá šmochtsentsena chënga ndoñe chamondobená jama tšëngaftanga inýetsá juabna tšëngaftangbe ainaniñe chašmátsbomnama. Ndoñe šmatjóyeunaye nderado nda mëntsá chacmojsëtsëtsná ora: “Canýe Bëngbe Bëtsabe juabna oyebuambnayá šonjáuyana chë Bëngbe Bëtsabe uámana te ya tojóshjango ca” o “canýa chca šonjabuayená ca” o “Páblëbiocana tsbuanácha fsënjushache y chiñe entsayana chë te ya tojóshjango ca”. ³ Bëtsá šmochtsentsena ndocná tondáyeca chacmondáingñema. Er chë Bëngbe Utabnabe uámana te cabá ndóshjango ora, mallajta entsanga Bëngbe Bëtsabe amëndayama contra mochántsemna, y chë Bëngbe Bëtsabe contra yomná echanjábocna. Y cha entsemna nda ibojtsemna infiernoca pochocaná jtsemnama. ⁴ Cha Bëngbe Bëtsabe contra echanjóyeuambaye, chë ndëmuanýengbiana y ndaye soyëngama entsanga imojuabná diosënga imomnama contra echanjóyeuambaye. Chentsana cha echanjayana chëngbiana más obená yomna ca. Y Bëngbe Bëtsabe bëts yebnóynaca cha echanjámashëngo, choca echanjót'bema y entsanga echantsëtsëtsnaye ndegombre cha Bëngbe Bëtsá yojtsemna ca.

⁵ ¿Chë soyama tšëngaftanga ndoñe šmondenabouínýna? Atše cabá tšëngaftangaftaca sënjamna ora, chama sënjanoyebuambná. ⁶ Y tšëngaftanga šmondétatšëmo, nda mora yojtsama chë Bëngbe Bëtsabe contra yomná ndoñe chaondonýnama, cabá chë tempo chca jopásama ndóshjango ora. ⁷ Mora ya mallajta entsanga puerte bacna soyënga tmojontšé amana, ndoñe ntšamo Bëngbe Bëtsá tojayancá chënga jamama yojtsamna ca, y bënga chë soyënga josértama ndoñe quemuátobena, ndayá nýe Bëngbe Bëtsá chca šojinýanyese; pero ntšamo tcbonjauyancá chë Bëngbe Bëtsabe contra yomnabiana ndoñe queochatëchnëngo, nýa nda chë soyënga ndoñe chaondëtsemnama yojtsamábioye Bëngbe Bëtsá chabojtsejuaná ora aíñe. ⁸ Chora chë Bëngbe Bëtsabe contra yomná echanjábocna; pero Bëngbe Utabná yochjésabo ora, echanjángouo y echanjama cha chaóbanama; y tša buashinýinýanánaca y obenánaca echanjábocnama, chábioye bochantsepochoáca. ⁹ Chë Bëngbe Bëtsabe contra yomná, Satanasbe obenánaca echanjabo, y entsanga bëts obenana echanjínýanýiye, y chë bëts soyëngaca entsanga ingñénënga mochántsemna. ¹⁰ Cha ba bacna soyënga echanjama ntšamo Bëngbe Bëtsá ndoñe yondbošcá, chca, ba entšángbioye nýetsca soyënguiñe jáingñama. Y chënga ndegombre pochocánënga mochántsemna; Bëngbe Bëtsá chca echanjama, chënga chë ndegombre soyënga Jesucristbiana chëngbe ainaniñe ndoñe tmonjanóyëngacñe causa, y chë soyëngama mo uámana soyëngcá ndoñe tmonjanjuabó causa, chca, atsebácanënga jtsemnama. ¹¹ Chca causa, Bëngbe Bëtsá entselesencia entsanga ingñénënga chamotsemnama, y chë ndoñe ndegombre soyënguiñe chamotsošbuáchema. ¹² Bëngbe Bëtsá chca echanjama, nýetscanga chë ndegombre soyënguiñe Jesucristbiana ndoñe tmontsošbuáchenga, chë bacna soyënga amama oyejuayënga tmojtsemnënga, chë nýetsca tescama castigo chamotsebomnama jayanama.

Bëngbe Bëtsá sojabacacá atsebácanënga jtsemnama

¹³ Pero bënga šontsamna nýets tempo Bëngbe Bëtsá jtsatschuanayana tšëngaftangbiana, Jesucristbeyeca catšátanga, Bëngbe Utabnabe bonshánënga. Bënga, Bëngbe Bëtsá fsëndëtschuaná cha quem luare cabá ndobojátša ora, atsebácanënga chašmotsemnama tcmojánabacacama. Bëngbe Bëtsá tcmojatsebacá er chë Uámana Espíritu Bëngbe Bëtsabe entsanga tcmojábiana, y tšëngaftanga chë ndegombre soyënguiñe šmojtsošbuaché. ¹⁴ Chë tšabe noticiënga bënga cbondábuayiyayeca, Bëngbe Bëtsá tcmojúbuaja

chábinga chašmotsemnana. Cha tcmojúbuaja Bëngbe Utabná Jesucristbe obenana y buashinÿinÿanánënaca chašmotsebomnana.

¹⁵ Chcasna, ndocna te šmattsajbaná ošbuáchiyana chë ndegombre soyënguiñe ntšamo tcbonjabuatambacá, cach tsëngaftangbeñe jóyebuambayëse y tsbuanácha jubuábiamëse, y ndocna te inÿetsá šmatjátsjuabnaye. ¹⁶ Bëngbe Bëtsá puerte tsabia endménayeca, cha šuababuánÿeshana y tojama bënga sempre añemo ainaniñe chamotsebomnana y chë mochjóyëngacñe tsabe soyëngama corente jtsošbuáchiyëse chamotsobátmanama. Chábioye y Bëngbe Utabná Jesucristbioye fsëntseimpadana, ¹⁷ chata chaboma tsëngaftanga bëtsá añemo ainaniñe chašmotsebomnana, y tsëngaftanga nÿets tempo chašmotsobena ntšamo tsabá yomncá jtsichámuama y jtsamama.

3

Bëngbiana Bëngbe Bëtsá šmochtseimpadana

¹ Y morna, Jesucristbeyeca bëngbe catšátanga, Diosmanda bëngbiana Bëngbe Bëtsá šmochtseimpadana, nÿetsca luarenache más ba entsanga chamotsobenama Bëngbe Bëtsabe buayenánana jouenama, y chënga chë soye chamóyëngacñama, y puerte chamotserrespetánama, ntšamo tsëngaftanga šmonjanmcá. ² Bëngbe Bëtsánaca šmochtseimpadana cha chašotsëbuáuyayama, y chë puerte bacna entsanga ndoñe chamondobenama jamama bënga fchaisufrima, er nÿetscanga ndoñe quemochatošbuáchiye chë fsëndbuayiyná palabriñe. ³ Pero Bëngbe Utabná sempre jtsamana ntšamo tojayancá, y cha echanjama tsëngaftanga más chábeñe chašmotsošbuáchema, y ndoñe nÿe cachcá quecmatënÿa chë bacna soyënga mandayá nÿe ntšámncana ndoñe chacmondáborlama. ⁴ Y Bëngbe Utabná entsama bënga ndegombre ainaniñe fchaitsejuabnana, ntšamo bënga tchojanamëndacá mora šmojtsamama y cachcá sempre šmochtsamámncana. ⁵ Bënga, Bëngbe Bëtsá fsëntseimpadana, Bëngbe Utabná benache chacmanÿanÿé bonshánana jtsebomnana ntšamo Bëngbe Bëtsá endbomncá, y chašmojtsesufrina ora, corente añemo chašmotsebomnana, ntšamo Cristo tojansufrí ora yojanbomncá.

Nÿetscanga entsamna jtsetrabájayama

⁶ Jesucristbeyeca catšátanga, Bëngbe Utabná Jesucristbe mándoca cbontsamënda, ndëmua Jesucristbeñe ošbuachiyá jatrabájama ndoñe tontseboše y ndoñe tontsiyena ntšamo bënga tcbonjabuatambacá, cháftaca ndoñe šmattsóyebuambnaye. ⁷ Cach tsëngaftanga tsabá šmondétatsëmbo ntšamo cmojtsamna jtsiyenana, ntšamo bënga fsënjoyencá: bënga tsëngaftangbeñe fsënjaninyena ora, nÿe ntjatrabajacá oyënjayënga ndoñe queftsjatsmëna, ⁸ ni ndocnabe saná chibiáisese, tondaye ntabuenaycá. Inÿetsá enjamna; cada te bnëté y ibeta jabuache fsënjantrabája, chca, tsëngaftanga ndoñe chacmondétsamnana bëngbe ujabótama bënga jatatsatnayama. ⁹ Y ndegombre, bënga derecho fsënjanbomna tsëngaftanga jamëndama chašcújabuachama; pero masque chca, bënga jabuache fsënjantrabája tsëngaftanga chašmotsetatsëmbuama ntšamo yomna jt-siyenama, y chca chašmotsamama. ¹⁰ Bënga tsëngaftangaftaca fsënjamna ora, mëntsá tcbonjanamëndá: Nda ndoñe tontseboše jatrabájama, cha cach ndoñe chaondëtsesá. ¹¹ Chca fsëntsichamo, er bënga fsënjátatsëmbona, báseftanga tsëngaftanguentsënga imojtsiyena tondaye ntsamcá, pero tsá chë ínÿengbe soyënguiñe jtsontremetënëse. ¹² Chca oyena entsángbioye fsëntsabuayiyná y fsëntsamënda Bëngbe Utabná Jesucristbe mándoca, natjëmbana cachëngbe vida onguayiñe chamotsotrabájañama.

¹³ Jesucristbeyeca catšátanga, ndoñe chacmondëumantsé tsabe soyënga amana. ¹⁴ Nderado nda ntšamo quem tsbuanáchañe fsënjayancá ndoñe tontsuenana, šmochjarrepára nda cha yojtsemna y cháftaca ndoñe šmattsencuëntaye, chca, cha

chaotsëuatjama. ¹⁵ Mo canÿe uayayacá ndoñe šmattsonÿaye; šmochjabuayená mo canÿe catšatcá, chca ndoñe chaondëtsamama.

Jtadióšoftanama

¹⁶ Bëngbe Utabná fsëntseimpadana, cha, chë entšanga tšabe ebionana ainaniñe chamotsebomna iuamá, chaoma tšëngaftanga nÿets tempo y nÿetsca tescama chca chašmotsebomnama. Bëngbe Utabná tšëngaftangaftaca chaotsemna.

¹⁷ Nÿe quem palabrënga tšëngaftanga jacheuayama cach atšbe cucuátšeca sëntsabiamnă. Atše chca sëndbauapochóca atšbe tsbuanachangá juabemama; ntšamo muentše entsabemancá entsinÿinÿná quem tsbuanácha atšbiácha iuamnama.

¹⁸ Atše, Bëngbe Bëtsá sëntseimpadana, Bëngbe Utabná Jesucristo chaoma tšabe bendicionënga tšëngaftangbeñe chaotsemnama.

1 Timoteo

Jachuayama

¹ Atše Pablo, Jesucristbe ichmoná sëndmëna. Bëngbe Bëtsá bëngbe atsebacayá endmëna y Bëngbe Utabná Jesucristo endmëna ndábeñe bënga, puerte jtsošbuáchiyëse mondobátmana ba soyënga bëngbiana cha yochjamama. Atše Jesucristbe ichmoná sëndmëna, er chata tbojanmandá atše chca jtsemnama. ² Timoteo, atše quem tsbuanácha cbontsabobianná. Atše Bëngbe Bëtsabe soyëngama entsanga sënjanabuayiyná ora, aca Jesucristbeñe tconjanošbuaché, y chca, aca mo atšbe ndegombre uaquiñacá tconjanóbema. Atše sëntseimpadana, Bëngbe Bëtsá Bëngbe Taitá, y Cristo Jesús Bëngbe Utabná, chaboma aca tšabe bendicionënga chacotsebomnama, chata chacmolastemama y ainaniñe tšabiana ebionana chacotsebomnama.

Pablo chë ndoñe ndegombre soyënga abuátambayëngbiana chënga tojanabuayená

³ Ntšamo chë Macedonia luaroye chocana sënjëftsanbocna ora tcbonjanimpadacá, mora cachiñe cbochtëtsimpáda. Efeso puebloca cochjoquéda, básefta entsanga chácua mëndama chë ndoñe ndegombre soyënga ndoñe chamondëtsabuatambama, ⁴ ni nÿets tempo ndoñe nÿe chamondetsejuabná anteungbe cuentëngama, ni chë ba uabemana uabáinënga chë tempsca bëts taitangbiana. Er nÿe chca yapa jesejuabnayanentsana, jóbocnana nÿe ínÿengaftaca jabuachana enatsëtsnayıñe, y chca chëngbioye tondayama ntjujabuáchana ntšamo Bëngbe Bëtsá jamama yojuabnacá chaósertama. Chë soyna nÿe chábeñe jtsošbuáchiyëse jobenayana josértana.

⁵ Chca mando entsemna nÿetscanga chamotsenbobonshánama, y chë bonshánana endóbocana nda chabe ainanentše ndocna bacna soyënga tondbomná bentšana, ntšamo tojtsamcá tšabá yojtsemna ca ainaniñe tojtsejuabná y tojtsetatšëmbuábentšana, y Jesucristbeñe ndegombre ošbuachiyábentšana. ⁶ Báseftanga tmojtsajbaná chca jtsemnana y inÿe soyëngama tmojontsé juabnayana; chíyeca chënga mora imojtsentšena nÿe ndayámna ndoservena soyëngama enatsëtsnayıñe. ⁷ Chënga jtsebošana Bëngbe Bëtsabe ley abuátambayënga jtsemnama, pero chënga ndoñe yontsósertana ni ntšamo imojtsabuatambacá, ni mo ndayánaca ntšamo chënga tmojtsichamcá, mo chë soyënga ndegombre cuaftsemncá.

⁸ Pero bënga mondëtatšëmbo chë leyënga tšabá yomnama; tšabá endmëna, chë ndayama chë leyënga tmojuamcá entsá chë leyëngaca tojtsamëse. ⁹ Bëngnaca mondëtatšëmbo, chë leyënga ndoñe tmonjuama chë nÿetsca soyënguiñe tšabá amëngbiana. Chë leyënga tmonjuama quemëntša entsanga jácastigama: ntšamo leyënguiñe ndoñe tontselesenciancá amënga y ntšamo Bëngbe Bëtsá yobošcá ndámënga, chë Bëngbe Bëtsá ndoñe imondadoránënga y bacna soye amënga, Bëngbe Bëtsá ndoñe mondërrespetánënga y Jesucristbeñe jtsošbuáchiyana y Bëngbe Bëtsá jtsadoránana tondaye yondoservena ca juabnayënga, cachabe taitá o mamá obánayënga y ndëmuanÿenga imonna entsanga obánayënga, ¹⁰ boyabásaftaca o shembásaftaca bacna soye amënga y boyabásenga cach boyabásengaftaca bacna soye amënga, entsanga enënga nÿe ínÿabiama nÿets tempo chamotseservénama, bosterënga y chë nÿe bonamente Bëngbe Bëtsabiama júrayënga; chca entsayana, chë leyënga yomna jácastigama nÿetscanga ndëmuanÿenga ndoñe tmontsama ntšamo chë ndegombre buatëmbana soyënguiñe iuayancá. ¹¹ Ntšamo muentše chë leyëngama tijayancá, entsebuatëmbana chë Bëngbe Bëtsábiocana puerte tšabe noticiënguiñe, chë ndegombre buatëmbana soye; Bëngbe Bëtsá, chë corente bendición bomná, šonjichmó chë buayenánana entsanga jabuátambama.

Pablo Bëngbe Bëtsábioye tbojtanchuá, tbojanlastemama

¹² Atše, Bëngbe Utabná Jesucristo sëndëtschuaná, er cha tojanjuabó, ntšamo cha šojanmandacá jobedésama atše tsjétseprontanama, y chíyeca šojanábuayana atše chabiamá chaitrabajama; y cha endmëna nda inétsama atše obenana chaitsebomnama chë trabajo jamama. ¹³ Cha chca átseftaca tonjanma, masque tempo atše chabe contra ba soyënga sënjánichamo, chabe ústonënga sënjanëcamena, y chabiamá tondaye respeto ntsebomncá sënjánenobuena. Pero Bëngbe Bëtsá šonjanlastemá, er atše, Jesucristbeñe ošbuachiyá cabá ndoñe quetsjátanmëna, y chca, atše ndoñe quetsjátantatšëmbo ndayá tsjánamama. ¹⁴ Y chca, Bëngbe Utabná ba tšabe bendicionënga atšbiamá tonjanma, y chábeñe ošbuachiyá šonjánbema, y tonjanma atše cha chaitsebomshánama y ínÿengbioynaca. Cha chca bëngbiamá tojama, bënga cánÿiñe mo canÿacá Cristo Jesúseftaca bëtsemnayeca.

¹⁵ Ntšamo chanjayancá ndoñe nÿe bostero soye quenátsmëna, y nÿetscanga entsamna chca ndegombre bëtsemnama jtsejuabnayama: Cristo Jesús quem luaroye tonjánabo, bacna soye amënga jabátsebacama, y chë bacna soye amënguentše atše chë más bëtš bacna soye amá sëndmëna. ¹⁶ Chíyeca, Bëngbe Bëtsá šonjanlastemá, jinÿanÿiyama cha puerte uantado entšángaftaca yomnama. Y chë soye ínÿengbioye tojaninÿanÿé, chë nÿetsca tescama yomna tšabe vida jtsebomnama, chë chábeñe mochtsanošbuachéngbioye; chca tonjaninÿinÿé cachá átseftaca uantado jtsemnëse, atše nÿetscangbiamá chë más bëtš bacna soye amá jtsemnëse. ¹⁷ ¡Entšanga nÿets tempo chamotsinÿanÿná, chë Utabná nÿets tempo mandayá y puerte bëtšá y obená yomnama! Cha endmëna chë ndocna te echanjëtšobaná, chë entšanga ndoñe ntsobenana jinÿamá y chë nÿe canÿe Bëngbe Bëtsá yomná. Chca chaotsemna.

¹⁸⁻¹⁹ Timoteo, aca mo atšbe uaquiñacá condmëna. Atše tcbonjaimpadá, ntšamo tcbonjauyancá entšanga chacúyanama, ntšamo báseftanga Bëngbe Bëtsabe juabna oyebuambnayënga acbiamá tmojanayancá, y chiñe jtsejuabnayëse chë Jesucristbe soyëngama chacopeliá y nÿets tempo chca chacotsama, Jesucristbeñe puerte jtsošbuáchiyëse, y lempe ntšamo tcojtsamama tšabá yojtsemnana ainaniñe jtsetatšëmbëse. Báseftanga, chënga ndoñe tšabá imonjétsama ca chë ainanoca juabnënga tmojánayana ora, chë soye ndoñe tmonjanuena y chë causa, Jesucristbe soyënguiñe ošbuáchiyana tmojtsanajbananga y tmojanontšé inÿe buatëmbana soyënguiñe jtsošbuáchiyana. ²⁰ Chca tonjopasá Himeneo y Alejáandroftaca, y atše sënjalesenciá Satanás chaoma chata chabosufrioma; y chca, chata chabuatsjinÿe Bëngbe Bëtsabiamá ndoñe bacá ntsóyebuambnayana.

2

Pablo tojanabuayená ntšamo Bëngbe Bëtsá jtsadoránama

¹ Nÿetsca soyama más cbontsaimpadana ndayá chë Jesucristbeñe ošbuáchiyënga Bëngbe Bëtsáftaca chamojtsencuénta ora, nÿetsca soyëngama ntšamo tojtsëjabotcá cha chamotseimpadana, nÿetsca entšangbiamá, y cha sempre chamotsatschuaná. ² Entsemna, nÿetscangbe tšabiamá Bëngbe Bëtsá jtseimpadánama, pero masna quem luarentša reyëngbiamá y inÿe mándayëngbiamá, chca, nÿetscanga puerte natjëmbana jtsiyenama chamuetsobenama, y nÿetsca soyënguiñe tšabá jtsamëse, Bëngbe Bëtsá jtsatschuanayama, y entšangbe juabniñe tšabá chamotsemnana. ³ Chca jtsamana tšabá endmëna, y Bëngbe Bëtsá, bëngbe Atsebacayá, chama jtsóyejuayana; ⁴ y chca jtsóyejuayana, er cha endboše nÿetsca entšanga atsebácanënga chamotsemnana y chë ndegombre buayenánana chamotsábuatmama. ⁵ Chca nÿetsca entšangbiamá endmëna, er nÿe canÿe Bëngbe Bëtsá nÿetscangbiamá endmëna, y nÿe canÿa endmëna nda yobena jamama entšanga tempcá tšabá Bëngbe Bëtsáftaca chamotsemnana; cha endmëna Jesucristo, cach entšá. ⁶ Er Jesucristo, mo canÿa ínÿenga jätsebacama cuaftopagacá, chabe derecho vida jtsobomñama cachcá tojanonÿá y tojanóbana, chca, nÿetsca entšanga chamotsobenama atsebácanënga jtsemnana. Chë soye cha tonjaninÿanÿé, nÿa chama tempo yojtsemna ora, chë Bëngbe Bëtsá nÿetsca entšanga atsebácanënga chamotsemnana yobošama. ⁷ Bëngbe Bëtsá chca

nÿetsca entsangbiamá yobóseyeca, Jesucristo šojanábuayana chabe ichmoná jtsemnama, chabe soyënga entsanga jtsabuayiynayama; ndegombre soye sëntsoyebuambná, ndoñe quetsátsbostero. Sonjanmandá chë ndegombre buayenánana chë ndoñe judiëngbioye jabuátambama, y chënga entsamna chiñe jtsošbuáchiyana.

⁸ Ntšamo sënjayancá, atše sëntseboše nÿetsca chë Jesucristbeñe ošbuachiyëngcá enefjuana luarënguenache, boyabásenga Bëngbe Bëtsáftaca chamotsencuénta, y chora celoye, Bëngbe Bëtsábioye cucuatše chamatsbaná; pero chamna, ainaniñe bacna soyënga ntse-bomncá, ínÿengaftaca ntjatentjayanaycá, y ínÿengaftaca jabuachana ntjatenatsëtsnaycá chënga chamotsemna.

⁹ Y atše sëntseboše shembásenga entsayangá chamuatíchéto, mo chë tšabe shembásenga mondbetsichëtjoncá, ndoñe nÿe entsanga chamotsëbuáuatjama y ntšamo tmojtsichëtjonama chëngna uámanënga imomna ca entsanga chamotsejuabnama. Ndoñe quenátamna jtsenóbotamnayana, nÿa mo chca chquëcnënga jtsemnëse, ni castellano soyëngaca o uámana fjantse ndëtsbéngaca, o yapa uámana entsayangaca, chca, nÿe entsanga jinÿama tšabá jtsemnama. ¹⁰ Pero aíñe mo chë Bëngbe Bëtsá adóraye shembásenga mondbetsamcá jtsamëse, chë tšabe soyënga jtsamana.

¹¹ Nderado nda tojtsabuatambá ora, shembása bontsemna jtsatsjédayana, chca ora tondaye ntjatichamcá, y chentša mándayënga chaotsayaunana. ¹² Atše ndoñe quichatsleséncia, canÿe shembása boyabásenga chaotsabuatambá, ni chaotsamënda. Canÿe boyabása tojtsabuatambá o tojtsamënda ora, shembása ndocá chaondëtsichamo. ¹³ Chca chaotsemna, er Bëngbe Bëtsá natsana Adán tbojanpormá, y chentšana Eva; ¹⁴ y er Satanás Adánbioye ndoñe tbonjaningñé, ndayá chë shémbioye; y chca tbojaningñé ora, chë shema tojanma ntšamo Bëngbe Bëtsá ndoñe tbonjanlesenciácá. ¹⁵ Pero shembása atslocaná echántsemna, básenga quem luaroye endbaúshejangoyeca, pero chamna, aíñe nÿets tempo Bëngbe Bëtsábeñe tojtsosbuáchese, nÿetscanga tojtsababuánÿeshanëse, cachá nÿetsca soyënguiñe jenomándama tojtsobenëse, y nÿets tempo tšabe soyënga tojtsamëse, ntšamo Bëngbe Bëtsabe entsanga mondbetsamcá.

3

Ntšamo ibojtsemna chë ošbuachiyëngcá enefjuanëngbeñe mandayá

¹ Mëntsá ndegombre endmëna: nderado nda tojtseboše canÿe trabajo jtsebomnama, cánÿentše ošbuachiyëngcá enefjuanentše chë inÿe ošbuáchiyënga jtsamëndayama, cha ndegombre yojtseboše canÿe puerte tšabe trabajo. ² Chíyeca, chë ošbuachiyëngcá enefjuanëngbe mandayá bontsemna jtsiyenana ba tšabe soyënga jtsamëse, chca, cha ndoñe tšabá yontsama ca ndocná chaondëtsichamuama. Y mëntsánaca cha bontsemna jtsemnama: nÿe canÿe shembásabe boyá; ntšamo jtsiyenama tšabá juabnáyá chaotsemna, cachá nÿetsca soyënguiñe jenomándama chaotsobena, y chaotsetátšëmbo ndayá ibomna tšabá jtsamana; chaotseprontana chabe yebnentše posada entsanga júyentšamiamá, y chaotsobena botamana abuatambayá jtsemnama. ³ Ndoñe yapa tmoyá o penzentero chaondëtsemna; pero chaotsemna tšabá mandbomná, entsanga natjëmbana chamotsiyenama bošá, y ndoñe chaondëtsejuabná nÿe crocénana jésebomnama. ⁴ Chaotsetátšëmbo ntšamo nÿetsca chabe yebnentša entsanga botamana jtsamëndayama, y chaoma chabe básenga chë ntšamo cha tojayancá chamot-samama, ndocna te stëtsoye chamondëquedama; ⁵ er, nda cachabe yebnentša entsanga ndoñe tontsobena jtsamëndayama, chca, ¿ntšamo nantsobena chë ošbuachiyëngcá enefjuanënga jtsanÿenama? ⁶ Cha ndoñe chaondëtsemna cabá mora cuenta Jesucristbeñe ošbuachiyá; aíñe chca chë ošbuachiyëngcá enefjuanëngbe mandayá tojtsemnëse, nderado nÿe cachá uámana entsá nantsenobiamnaye, y ntšamo Bëngbe Bëtsá Satanásbioye

tbonjancastigacá, chca bétsemnama, cach soyama Bëngbe Bëtsá chë entsábioye buanjacastíga. ⁷ Chánaca bontsemna jtsiyenana jtsamëse, y chca chaojtsama ora, chë Jesucristbeñe ndošbuáchiyënga tšabá chabiamama chamotsichamo. Chë entsá ndoñe chca tontsamëse, chënga chabiamama mochanjayana ndoñe tšabá yontsama ca, y Satanás echanjama cha chabócochëngo bacna soyënga jamama.

Ntšamo ibojtsemna chë ošbuachiyëngcá eneffuanënga ujabuachaná

⁸ Cachcá, chë mándayëngbe ujabuáchanënga mëntšá entsamna: uámana entsangcá nyetscanga chamotsétabna, uta palabra ndbomnënga; ndoñe yapa vínoye chamondétsetmó, y ndoñe chamondétseboše nye paselo becá crocénana jtsebomnama. ⁹ Chënga entsamna ndegombre jtsošbuáchiyana chë Bëngbe Bëtsá tojinýanyé soyënguiñe, chë ndayiñe bënga mondošbuaché, chëngbe ainaniñe inýetsá juabnënga ntjatsbomncá. ¹⁰ Natsana, chëngbiamama botamama šmochjshuarrepára jtsetatšëmbuama chënga aíñe o ndoñe montsobena mo chë ošbuachiyëngbeñe mándayëngbe ujabuachanëngcá joserviama. Chënga nyetsca soyënguiñe tšabá tmojtsemnëse, šmochjálesenciaye chiñe chamoservema. ¹¹ Cachcá, chë shémanga mëntšá entsamna: nyetscangbiamama mo uámana entsangcá utabnënga, ndoñe uayátsenayënga, cachënga nyetsca soyënguiñe jenomándama obenënga, y nyetscañe tšabe palabra bomnënga. ¹² Canye ujabuachaná chaotsemna nye canye shembásabe boyá, y chaotsetátšëmbo ntšamo chabe básenga y nyetsca chabe yebnentša oyenënga jtsamëndayana. ¹³ Chë ujabuáchanënga tšabá chiñe tmoservënëse, canye uámana puesto mochanjashjache, y chënga mochantsobena bëts añémoca jtsoyebuambnayama ntšamo Cristo Jesúsbeñe tmošbuáchema.

Ndayá Bëngbe Bëtsá bënga šojinýanyécá, canye bëts buatëmbana soye endmëna

¹⁴ Atše sentsobátmana pronto chjobenaye jama aca jauatsëtsayama; pero chca cbontsabobiamná, ¹⁵ nderado atše betscó jama ndoñe sënjobenase, chacotsetatšëmbuama ntšamo canya ibojtsemna nyetsca chë Bëngbe Bëtsábënga imomnëngaftaca. Chënga mondmëna chë Jesucristbeñe ošbuáchiyënga, chë Bëngbe Bëtsá Ainabe básenga. Chënga chë Bëngbe Bëtsabe ndegombre soyënga mondbomna chë más uámana puestoca quem luarentše, y tša mondëntšena chama ínýengbioye jáyëñanama. ¹⁶ Nya ndegombre endmëna, Bëngbe Bëtsá soyënga šojinýanyé, y chë soyëngaca bënga montsobena jtsiyenana, chë Bëngbe Bëtsabe entsanga imomnëngcá; chë soyënga bëngbiamama ndegombre bëts buatëmbana soye endmëna, y chë buatëmbana soye mëntšá endmëna: Cristo quem luarentše cach entsacá entsángbioye tojánebëbuacna. Chë Uámana Espíritu tonjinýanyé cha nyetsca soyënguiñe tšabá amá yomnama. Angelënga cha tmojáninýe, y chabiamama ba luarënguentsá entsángbioye tmojanabuayená. Ba entsanga quem luarentše chábeñe montsanošbuaché, y Bëngbe Bëtsá celoye tbon-tanatsbaná, cha puerta bëtsá y obená yomnama jinýanyiyëse.

4

Báseftanga chë tšabe benachentsana mochtsojuánañe

¹ Uámana Espíritu, nyetscanga catafjosertaycá tojayana, quem luare jopochócama tempo chaojtsobeco ora, básefta entsanga camochtsajbaná ošbuáchiyana chë ndayiñe bënga Jesucristbiamama mondošbuaché soyënguiñe ca. Chëngna, espíritënga entsanga áingñayënga mochántsayanana, y chë ndoñe ndegombre soyënga chë bacna bayëjënga entsángbioye mochtsabuátambaye soyënguiñnaca. ² Chca buatëmbana soye jtsoócocanana chë bacna entsanga ntšamo ndegombre tmojuabnacá ndinýinýayëngbentsana y chë bosterëngbentsana. Chënga chca bacna soye tmojtsama ora, ainanoca ndoñe ntsejuabnayanana, ntšamo tmojamcá ndoñe tšabá yontsemna ca, er yapa bacna soyënga tmojama causa, chënga nye chca chëngbe ainaniñe jésejuabnayanana. ³ Quem entsanga ndoñe ntjalesénciana ínýënga chamotsobouamama, y jtsemándayana básefta sananga entsanga

ndoñe chamondëtsesama. Ntšamo chënga chiñe tmojtsebuatëmbacá ndoñe ndegombre soye ntsemnana, er Bëngbe Bëtsá chë sananga tojanma, Jesucristbeñe ošbuáchiyënga y chë ndegombre soyënga uabuátmënga chamóyëngacñama, Bëngbe Bëtsábioye chama jtsatschuanayëse. ⁴ Er lempe ntšamo Bëngbe Bëtsá entšanga chamosama tojamcá tšabá entsemna. Ndoñe quešnátamna ndaye saná jtsaboténana, bënga chë saná tmojuáyëngacñe ora, Bëngbe Bëtsá chama tmojëtschuase; ⁵ er chca saná Bëngbe Bëtsábioye tšabá jtsinýnana, cachá chca tojayánayeca, y bënga chë sanama cha mondbatschuayama.

Jesucristbiana trabájayiñe canye tšabe oservená

⁶ Aca, chë soyënga ošbuachiyëngbioye chacojtsabuátambase, aca Jesucristbiana trabájayiñe canye tšabe oservená cochántsemna. Y mo nda bëtscá añemo jtsebomnama botamana tojtsesacá, cachcá, ácnaca puerte ošbuáchiyana y ainaniñe bëtš añemo cochántsebomna; chca echántsemna, chë bënga mondošbuaché buayenana soye aca icuatsjendá y icoyeunánayeca, y ntšamo chë tšabe buatëmbana soyënguiñe endayancá sempre icuámayeca.

⁷ Pero ndoñe nýe quem luarentša entšangbe cuentënga y ndoservena cuentënga cattsuenana. Ba soyënga cochjama aca bëtš añemo ainaniñe chacotsebomnama, mo nda bëtš añemo jtsebomnama cachabe cuérpoca ba soyënga cuaftsamcá, ntšamo Bëngbe Bëtsá jadórama yomncá jtsiyenama jtsamëse; ⁸ cachabe cuérpoca ba soyënga jamana más añemo jtsebomnama, aíñe batšatema endoservena; pero jtsiyenana Bëngbe Bëtsábioye jadórama yomncá jtsamëse, puerte enduámana y juajabuáchana nýetsca soyënga tšabá chaotsemnama; chca jtsamana puerte tšabá endmëna cachabe vidama quem luar-entše, y chë inýe vidócnaca. ⁹ Ntšamo tijayancá ndegombre entsemna, y nýetscanga entsamna jtsejuabnayana chca ndegombre bëtsemnama. ¹⁰ Y chë soyama bënga puerte mondëtrabája y mondësufrina, er chë Bëngbe Bëtsá Ainábeñe puerte mondošbuachéyeca, bënga mondobátmana cha yochjama soyënga bëngbe tšabiana. Cha endmëna chë nýetsca entšangbe atsebacayá, pero ndegombre masna, chábeñe ošbuáchiyëngbe atsebacayá cha endmëna.

¹¹ Ntšamo quem soyëngama tcbonjauyancá entšanga cochtsamëndaye y cochtsabuátambaye. ¹² Ndoñe catjaleséncia, aca bobontse comnama, ndánaca chacmotsáboyënjama. Pero aíñe bëtscá cochtsama, chënga puerte chacmotserrespetánama, chca jtsamëse icoyenama jtsonýayëse, cachcá chamotsamama: botamana jtsóyebuambnayëse, nýets tempo tšabe soyënga jtsamëse, nýetscanga jtsababuánýeshanëse, Bëngbe Bëtsábeñe corente jtsošbuáchiyëse, y puerte tšabia jtsemnëse, ainaniñe ndocna bacna soye ndbomná. ¹³ Atše choca chajashjanguëntscuana, cochtsentšena chë Bëngbe Bëtsabe uabemana palabrenga entšángbeñe jtsalíayama, y chënga jtsabuátambayama y jtsabuayiynayama. ¹⁴ Acbioye Bëngbe Bëtsá obenana tmojanatšetá tšabe soyënga jamama chacotsobenama, ošbuáchiyënga jujabuáchama. Bëngbe Bëtsabe juabna oyebuambnayënga acbiana tmojanoyebuambá ora, y chë ošbuachiyënguentša bëtšjëmënga chëngbe cucuatšënga ácheñe tmonjancjá y Bëngbe Bëtsá acbiana tmonjanimpadá ora, chca tšetana obenana tcojanóyëngacñe. Chë soye sempre cochtsinýena.

¹⁵ As, aca cmontsemna sempre jtsamana chë soyënga ntšamo tcbonjauyancá. Cochtsentšena chë soyënga tšabá jtsamama, chca, entšanga chamobená jinýama, aca cada te más tšabá lempe cojtsamama. ¹⁶ Botamana cochtsantješna, aca chë tšabe soyënga jtsamëse cojtsiyenama, y chë tšabe buatëmbana soye ínýënga cojtsabuátambama. Cada te chca cochtsama, y chca, cach aca cochanjenájabuache atsbocaná jtsemnama y chë ácbioye ouenanëngnaca játsebacama.

5

Ntšamo Timoteo ibojtsemna chë inÿe ošbuáchiyëngaftaca jtsemnana

¹ Bëtsëjémënga ndoñe catjucácana; chca játamamna, cochjábuayenaye, chënga mo cach acbe taitá cuaftsemncá; y chë bobontsëngaftaca cochjama, mo chënga acbe catšátanga cuaftsemncá. ² Chë bëtsanana shembásengaftaca tšabá cochtsemna, chënga mo cach acbe mamá cuaftsemncá; y chë tobiasëngaftaca cochjama, chënga mo acbe uabénanga cuaftsemncá; chëngaftaca cmontsemna puerte tšabia jtsemnana, chëngbiana ndocna bacna juabnënga ainaniñe ntsebomncá.

Ošbuáchiyëngbenache viudanga tmojtsemna ora

³ Chë ndegombre viudanga, chë ndocná mondbomna chaújabuachama, chënga cocht-sarrespetana y cochtsëjabuachana. ⁴ Pero canÿe viudá nderado básenga o nietënga tuabamna, chënga entsamna natsana jshauatsjínÿana ndayá chënga chamotsamama Bëngbe Bëtsá yobošcá, cachëngbe pamíllanga chamotsarrespetánama, chëngbioye jtsanÿenëse, y chëngbe bëtsésangaftaca tšabá chamotsama, ntšamo chënga chëngaftaca tmojanmcá, er chca jtsamama, Bëngbe Bëtsá jtsóyejuayana. ⁵ Chë ndegombre viudá, chë juajabuáchama ndocná tbondbomná, Bëngbe Bëtsábeñe jtsošbuáchiyëse, cha bochjuájabuachama jtsobátmanana, y nÿets tempo jtseimpadánana, bnëté y ibeta, cha chabuájabuachama. ⁶ Pero canÿe viudá, nÿe quem luarentša entsángaftaca oyejuayá jtsemnama soyënga tojtsamëse, cha masque ainá tojtsemna, Bëngbe Bëtsabe bominÿiñe mo canÿe obanacá jtsemnana, er chábioye ndoñe ntseeservénana. ⁷ Lempe chë soyënga chamotsamama ošbuáchiyënga cochtsamëndaye, chca, ndocná ndocna bacna soye chëngbiana jatichámuama chaondëtsebomnama. ⁸ Er, nda cachabe entsanga y más, cachabe pamíllanga ndoñe tontsacuedana, cha chca jtsinÿinÿayana chë buatëmbana soyënga, ndayiñe bënga mondošbuaché, ndegombre soyënga ndoñe yondmëna ca yojtsejuabnama, y cha chë ndoñe ošbuáchiyëngbiana más bacna entsá jtsemnana.

⁹ Chë jujabuáchama viudanga imuábemana lístañe, chaotsábemana chë viudá chnënguana bnëtsana uatama más yobomná, y nÿe canÿe boyá ibnabomná. ¹⁰ Entšanga cha chamotsábuatma mo canÿe tšabe soyënga amacá: chabe básenga botamana tojabëché, áshjajnënga chabe yebnentše posada júyentšamiama prontaná, Bëngbe Bëtsabe entsanga imomnënga tojshhecjabebé, chë imosufrinënga tojújabuache; jayanana, nda sempre nÿetsca tšabe soyënga jamama yontšená.

¹¹ Pero chë lístañe, chë viudanga chnënguana bnëtsana uata cabá ndbomnënga ndoñe catjúbiana; er chë chëfta uata ndbomnënga, yapa nÿe cachënga tšabá jtsemnama juabnënga jtsebomnana y soyënga jtsamana. Chcase, chënga Jesucristbioye ya ndoñe ntseeservénana, y chora jtsebošana cachiñe jtëtóbouamayama; ¹² y chca, ínÿenga chëngbiana mochanjayana ndoñe tšabá montsama ca, chënga chë ntšamo tempo Bëngbe Bëtsá tmojanšbuachenacá chënga ndoñe tmonjamama. ¹³ Y cabá más, tondaye ntsamcá tmojtsemna ora, chënga juabouinÿana oyënjayënga jtsemnama, y yebnënguenache jtsanama; y ndoñe nÿe oyënjayënga, sinó oinÿanëngnaca, ínÿengbe soyënguiñe jtseyentšbëtsjuanëse, y ndoñe yontsemna jayanama soyënga jtsichámëse. ¹⁴ Chíyeca, atše sëntseboše, chë viudanga cabá tobiasëngna chamuatobouamá, básenga chamotsabamna, y chamotsobena cachëngbe yebnënguenache jtsemándayana; y tondaye chamondëtsama, chca, bëngbioye uayayënga chamuayana, chënga chca ndoñe tšabá montsama ca. ¹⁵ Atše chca sentsichamo, er básefta viudanga cabá tobiasënga tmojtsajbaná Jesucristo obedecénana, y tmojontsé Satanás joyeunayana.

¹⁶ Canÿe shembása, Jesucristbeñe ošbuachiyá, nderado chabe pamíllangbeñe viudanga tojtsabamna, cha bontsemna chënga jujabuáchana, chca, chë ošbuachiyëngcá enefjuanënga ndoñe chaondëtsamna chëngbiana játantješnana; chca, chë

oşbuáchiyënga mochanjobenaye chë ndegombre viudanga, chë chaújabuachama ndocná mondbomnéngbioye jujabuáchama.

Ntsamo cuantsemna chë oşbuachiyëngcá amëndayëngaftaca

¹⁷ Chë bëtsëjémënga, tşabá chë oşbuachiyëngcá enefjuanënga tmamëndangna, jtsomerecénana entsanga más chamotsarrespetánama, chca trabajo bétsamama, y más, chë sempre entsanga jtsabuayiynayama y jtsabuátambayama imontşenëngbioye. ¹⁸ Er Bëngbe Bëtsabe uabemana palabrënguine endayana, mëntşá: “Aca canye toróftaca sha-juana tmojtsatbaná luariñe chacojstetrabája ora, ndoñe catjuanguëtsenaye ca”; ínÿoca: “Chë trabajayá merecido jtsebuájonana juácanama ca”. Chíyeca, chë bëtsëjemëngcá amëndayënga jtsomerecénana entsanga chamotsarrespetánama.

¹⁹ Nderado nda tcmojáuyana canye bëtsëjema bacna soye tojama ca; pero útata o unga entsanga más ndoñe tmontsemna, chca tojamama tmojinÿe, y chë bëtsëjema mal quedayá ndegombre soye yojsichamo ca ndoñe tmonjayana, ndoñe catjóyeunaye.

Inÿe soyëngama jábuayenama

²⁰ Chë bëtsëjémënga nÿe bacna soyënga tmojtsamënga, nÿetsca entsangbe delante cochjucácana, chca nÿetscanga uatjana chamuishache, bacna soye amama castigo mochtsebomnana.

²¹ Atşe cbontsemánda, Bëngbe Bëtsabe delante, Jesucristo y Bëngbe Bëtsabe bocacana angelëngbe delante, chë mandënga chacotsamama; pero ndoñe catjayana canye bëtsëjema tşabá o ndoñe tşabá tonjama ca, cabá ndoñe lempe botamana ndabonÿe ora, ni canye entşá ínÿengbiama más tşabá ntjatabacacnaycá. ²² Ndocnabe bestşasiñe cucuatşënga catjajájua, Bëngbe Bëtsábioye chabiamama jaimpádama, jinÿinÿiyama cha mo canye bëtsëjema amëndayacá josérviamama yojsobenama, nÿe betscó, juabuáyanama botamana ntjenajuaboycá. Pero nÿe ntjenajuaboycá chca tcojamëse, y cha canye bacna soye amá tomnëşna, ácnaca cochántsemna mo chabe bacna soyënga cuafjamcá. Cochtsantjeşna ndocna bacna soyënga ainaniñe chacondëtsebomnana.

²³ Aca ba soye uafşbiaca condbëtseşoca causa, ndoñe más nÿe ena búyeshe cattseftmana, sinó base vínoynaca.

²⁴ Entşanga mondobena tşabá jinÿana, básefta entsangbe bacna soyënga, cabá chë soyëngama chëngbioye botamana ntjátjaye ora; pero ínÿengbe bacna soyëngama, nÿe tcojátjayentşana entsanga chama jtsetatşëmbuana. ²⁵ Cachcá, báseftanga entsangbe delante tşabe soyënga jtsamana, y cachora chë soyëngama jtsotatşëmbuana; y ínÿengna iytëmncá tşabe soyënga jamana, pero masque chca, ndayténaca chë tmojanma tşabe soyëngama ínÿenga mochanjátatşëmbona.

6

¹ Chë nÿets tempo nÿe ínÿabiamama oservënënga entsamna, chëngbe nduiñëngbiama jtsejuabnayana, chënga uámana entsanga imomnana y nÿets respeto jtsebomnana imomerecénama. Chca entsamna, Bëngbe Bëtsabe Uabainama y chabe soyëngama, ndayiñe bënga mondoşbuaché y entsanga mondbëtsabuatambaye, ínÿenga podescá ndoñe chamondëtsóyebuambnana. ² Y chë imobomna Jesucristbeñe oşbuáchiyënga nduiñënga, chëngbioye nÿe batşá ndoñe chamondëtsarrespetana, er chënga Jesucristbeyeca chëngbe catşátanga mondmëna, y entsamna más tşabá jtsaservënana, er chëngbe trabajuentşá tşabe soyënga imóyëngacañe, Jesucristbeñe oşbuáchiyënga mondmëna, y Bëngbe Bëtsabe bonşhánënga.

Jtsiyenana Bëngbe Bëtsá jadórama soyënga jtsamëse, endmëna chë ndegombre bomnana

Quem soyënga cmontsamna entsanga jtsabuátambayana, y becá jtsëtsëtsnayana chca chacmóyaunama: ³ Nderado nda inÿe soyënga tojtsabuatambá, y ntşamo bënga mondjëjuabnacá, chë Bëngbe Utabná Jesucristbiamama ndegombre buatëmbana soyama,

ni chë buatëmbánana ntšamo jtsiyenama Bëngbe Bëtsábioye jadórama yomna soyënga jtsamëse, ndoñe cachcá bëngcá tontsejuabnase, ⁴ cha nÿe cachá puerte uámana entšá yojtsenobiamná, y tondaye ndosertaná yojtsemna. Cha tša jtsogustánana ba soyëngama y palabrëngama jabuachana jtsenatsëtsnayana, y cha nÿe chama vida jésebmónana. Cha chca yomna causa, nÿe jtsebošana chë inÿa tojashjache soyënga jtsebmónama, nÿetscanga ndoñe cachcá chamondëtsejuabnama jtsamana, ínÿengbioye joyánguanguama jtsebošana, bacna soyënga ndoñe ndegombre soyënga ínÿengbiamna jtsejuabnayana, ⁵ y ínÿengaftaca nÿe sempre jtsenpenzëntsiayana, er chëngbe juabniñe nÿe bacna soyënga jtsebmónana, chë ndegombre soyënga quematábuatma, y jtsejuabnayana chë soyënga Bëngbe Bëtsá jadórama jtsamana, nÿe más soyënga jóyëngacñama yoservenaca. ⁶ Ndegombre canÿe entšá bëtscá tšabiana jëftsashjáchana, cha tojtsiyena Bëngbe Bëtsábioye jadórama soyënga jtsamëse, y sempre oyejuayá nÿe chë tojtsebmóna soyëngaca tojtsemnëse. ⁷ Er bënga tmojanonÿná ora, quem luaroye bëngaftaca tondaye tmonjániyëbo, y quem luarentšana cach tondaye quemochatobenaye jëftsocñama. ⁸ As, bënga ndayá jasama y ndayá jtichëtjuama tmojtsebmónëse, chë soyëngaca oyejuayënga mochtsemna. ⁹ Pero chë bomnënga jtsemnama tmojtsebošënga, bacna soyënga jamama tojócochëngo ora, ndoñe ntsemorochana y pronto chiñe jotsatšana, mo bayá uachmaniñe cuafjotsatšcá, chë entšanga Satanasbe cucuatšniñe ndeolpe jotsatšana; chora chënga jtsamana soyënga mo chë juabna ndbomnëngcá, y chë cachëngbiamna ndoñe tšabe soyënga tmojtsamëngbe juabnëngaca. Y mo chë uándbemana barco, bëtš búyeshe asentoye tojtsenatjëmbcá, cachcá, chë bacna juabnënga bomnama, chëngbioye mochántsapochocaye y nÿetsca tescama mochántscastigaye. ¹⁰ Crocénana jtsebmónama yapa jtsebošana, jamana entšabe ainanentšana nÿetsca bacna juabnënga y soyënga chaóbcnana; y básefta entšanga, crocénana jtsebmónama yapa jtsebošana causa, tmojtsajbaná ošbuáchiyana chë Bëngbe Bëtsabe soyënguiñe, chë bënga mondošbuaché soyënguiñe, y chca cachëngbiamna tmojama puerte chamosufrima y bëtš ngmënaná jtsebmónama.

Chë tšabe soyama jtsenojuerzánama, ošbuáchiyana sempre chaotsemnama

¹¹ Pero aca, Bëngbe Bëtsabiamna oserverná, chca benachentšana cochtsojuánañe. Nÿa cochtsentšana, chë Bëngbe Bëtsabe bominiñe tšabá yomncá jtsamama, chë ndayá Bëngbe Bëtsá jadórama yomncá jtsamama, Jesucristbeñe puerte jtsošbuáchiyama, nÿetscanga jtsababuánÿeshanama, Bëngbe Bëtsábeñe jtsobátmanëse puerte uantado padecena soyënguiñe jtsemnama, y corente jtsababuánÿeshanëse nÿetscanga chacotsënyayama. ¹² Chë tšabe soyama, ošbuáchiyana joboguiyanama cochtsenojuerzana. Chë nÿetsca tescama yomna tšabe vida cochjashjache; chama Bëngbe Bëtsá tcmojanchembo y bëtscá entšangbe delante tconjánayana tšabe soyënga Jesucristbiamna, ndayiñe aca icošbuaché. ¹³ Y mora, Bëngbe Bëtsabe delante, nda endbama lempe ntšamo quem luarentše yobinÿncá vida chaotsebmónama, y Jesucristbe delante, ntšamo cachabiamna ndegombre bemncá Poncio Pilatbe delante lempe tojanayaná, chatbe delante chontsemánda, ¹⁴ lempe cochjama ntšamo tconjauyancá, ndocna soye chacmondëntšashbe jamama, y cochtsiyena, ntšamo ndocná tondaye chaondëtsebmóna jayanama aca bacna soye tcojama ca. Y chca cochtsama Bëngbe Utabná Jesucristo quem luaroye yochjésabëntscuana. ¹⁵ Y nÿa chë soyama chë tempo chaojóshjango ora, Bëngbe Bëtsá chca echanjínÿanÿiye, er cha endmëna chë corente bendición bomná y chë nÿe canÿe Mandado. Cha nÿetsca reyëngbiamna, chë más uámana Rey, y nÿetsca amëndayëngbiamna, chë más uámana Utabná. ¹⁶ Nÿe cha ndoñe bondmëna ndocna te ntjóbanana, y cha canÿe bëtš buashinÿinÿana luarentše endoyena y choye ndocná yondobena jobéconana. Cha ndocná tbonjinÿe y ndocná yondobena jinÿana. ¡Entšanga nÿets tempo chamotsinÿanÿná cha puerte bëtšá y obená bëtsemnama! Chca chaotsemna.

17 Chë quem luarentša soyëngaca bomnënga imomnënga, cochjámëndaye enábotamnayënga ndoñe chamondëtsemnana, ni lempe tšabá yochjóbcnana, bëtscá soyënga bëtsebomnana ndoñe chamondëtsobátmana, er chë tcobomna soyëngama ndoñe ntsótatsëmbuana ndayëntscoñama chca mochtsebomnana; pero aíñe, Bëngbe Bëtsábeñe jtsošbuáchiyëse, chënga chábeñe chamotsobátmana. Cha endmëna chë sempre bëtscá soyënga šnetsatšatnayá; y chca, cha jamana bënga chamotsobena nyetsca chë soyëngaca oyejuayënga jtsemnana. 18 Ntšamo tšabá yomncá chënga chamotsama, ba tšabe soyënga chamotsama, y sempre tšabe ainánaca chamotseprontana entšanga ba soyënga jatšatayama, y ndaye tmobomna soye entšángaftaca jenájatayama. 19 Mo nda bëtscá shajuana tojtsábuajo y jtsetatsëmbuana yochtsebomna más chcoye jasama, cachcá, quem bomnënga ba tšabe soyënga tmojtsamëse, mochántsetatsëmbo chënga bëtscá tšabe bendicionënga más chcoye mochtsebomnana. Y chënga chë soyënga tmojtsamëse, chënga chë ndegombre vida, chë nyetsca tescama yomna tšabe vida mochanjëftsashjache.

Inye soye Timotéobioye tbojanbonjë

20 Timoteo, ndayá Bëngbe Bëtsá tcmojabonjëcá, botamana cochtsinýena. Entšanga nyë quem luarentša soyëngama encuéntayana, ndoñe cattsuenana, ni chë ndoservena soyëngama jabuachana enatsëtsnayana, chë ndayama entšanga jtsichámuana becá osertánanentšana chca yóbocana ca, pero ndegombre chca ndoñe ntsemnana. 21 Atše chca séntsichamo, er báseftanga chca osertánana imobomna ca ichámënga, Jesucristbeñe ošbuáchiyana y chë bënga mondošbuaché soyënguiñe ošbuáchiyana tmojtsajbaná.

Atše, Bëngbe Bëtsá sëntseimpadana, ábeñe tšabe bendicionënga chaotsemnana.

2 Timoteo

Jachuayama

¹ Atše Pablo, Jesucristbe ichmoná sēndmēna, Bēngbe Bētsá chca yobóseyeca. Jesucristo šonjichmó entšanga jábuayenama Bēngbe Bētsabe šbuachenánama, ntšamo cha inétsamama entšanga chē n̄yetsca tescama yomna tšabe vida chamotsebomnama; y chca vida montsebomna Cristo Jesúseftaca cán̄yīñe mo can̄yacá bétsemnayeca. ² Atše quem tsbuanácha cbontsabobiamná, acbiamama Timoteo, aca mo atšbe bonshana uaquiñacá, Crístbeñe condošbuachema. Atše sēntseimpadana, Bēngbe Bētsá, Bēngbe Taitá, y Jesucristo, Bēngbe Utabná, chaboma ábeñe tšabe bendicionēnga chaotsemnama, chata ácbioye chacmolastemama, y acbe ainaniñe tšabe ebionana chacotsebomnama.

Ndoñe ntsēuatjana entšángbeñe Jesucristbiamama jóyebuambayama

³ Sempre Bēngbe Bētsáftaca stsencuēnta ora, acbiamama sēndbētsenojuabnaye, y acbiamama sēndbētsatschuanaye bnēté y ibeta; y Bēngbe Bētsá endmēna nda atše sēndēservena, ainánaca jtsejuabnaye y jtsetatsēmbēse, ntšamo atše stsamcá tšabá bétsemnama, cachcá ntšamo atšbe bēts taitanga tmojanmcá. ⁴ Atše sēndbētētenojuaboye ntšamo aca, chocana atše sēntanabo ora shēchbuiye tconjanoperdema, y chíyeca atše tša sēntseboše aca jtētīnyama, atše puerte oyejuayá chaitsemnama. ⁵ Bēngbe Bētsá acbiamama sēndbatschuaye, er atše sēndbátēnojuaboye aca Jesucristbeñe ndegombre ošbuáchiyana condbomnama. Natsana, acbe bēts mamá Loida, y chentšana acbe mamá Eunice chábeñe bontsanošbuáchiye, y ácnaca cachcá tcojamama atše puerte sēndētatsēmbō.

⁶ Chíyeca sempre cochtsantješna quem uámana soyama: Mo nda can̄ye shin̄yañe tojtsajuin̄yīn̄nacá, chentše sempre chaotsoiñama, cachcá aca, chē Bēngbe Bētsá tcmojatšeta obenana tšabe soyēnga jamama, sempre cochtsin̄yena. Chē obenana aca conjanóyēngacñe, atšbe cucuatšēnga acbe bestšašīñe sēnjanjajó y Bēngbe Bētsá acbiamama sēnjanimpadá ora. ⁷ Er Bēngbe Bētsá tonjama bēngbe ainaniñe Uámana Espiritu chaotsemándama, uatjana ndoñe ntsebomnama, ndayá obenana bēnga chamotsebomnama, bonshánana Bēngbe Bētsabiamama y n̄yetscangbiamama chamotsebomnama, y cabēnga jenomándama chamotsobenama. ⁸ Chíyeca, ndoñe cattseuatja entšanga jáuyanama, ntšamo tcojin̄ye y cojtsetatsēmbcá Bēngbe Utabnabiamama ndegombre bétsemnama; ni atšbiamama ndoñe cattseuatja, atše cárceloye sēndutámenama, chabiamama oservena causa. Chamna, chē Bēngbe Bētsá cmochanjátsetaye obenánaca, sempre cochtseprontana jasúfriama, átšeftaca y ín̄yēngaftaca, entšanga tšabe noticiēnga abuayiynaye causa. ⁹ Bēngbe Bētsá endmēna nda bēnga šojatsebacá, y šojáchembo jtsiyenama mo chábēnga imomnēngcá jtsamēse. Y cha chca tojama, ndoñe nderado bēnga ndaye tšabe soye tmojamama, ndayá cachá chca chaotsemnama inabóseyeca y bēngbe tšabiamama juabna bómnyayeca. Cha chca inajuabnaye, cabá quem luare ndmēna orscana; y chca jamama Bēngbe Bētsá inajuabnaye, chē ndayá Cristo Jesús bēngbiamama jamama sóyeca. ¹⁰ Y mora, Bēngbe Atsebacayá Jesucristo tojáboyeca, Bēngbe Bētsá šojin̄yan̄yé cha bēngbe tšabiamama juabna yobomnama. Jesucristo tonjama, entšanga n̄yetsca tescama obanēnga ndoñe chamondētsemnama, y tonjama bēnga chamotsetatsēmbuama, chē tšabe noticiēnga chabiamama jouenēse y joyeunayēse, bēnga chē n̄yetsca tescama yomna tšabe vida mochjábomnama, ndoñe n̄ye jopochócama cuerpēnguiñe.

¹¹ Bēngbe Bētsá šojanábuayana tšabe noticiēnga entšanga jábuayenama, Jesucristbe ichmoná jtsemnama y entšanga jabuátambama. ¹² Chē causa, atše mora cárceloca quem soyēnga sēntsesufrina; pero chama atše ndoñe quetsátēuatja, er atše sēndētatsēmbō

ndábeñe atše stošbuáchema, y corente sëndétatsëmbo cha yobena jtsinÿenana ndayá šojabonÿecá, chë ndayté cha yochjésabëntscuana.

¹³ Nÿets tempo, chë ndegombre buayenánana, ndayá átsbentsana tconjanuencá, entšanga cochtsabuayiyaye, entšanga jtsinÿanÿayëse aca Jesucristbeñe icošbuáchema, y Bëngbe Bëtsá y nÿetscanga icuababuánÿeshanama, y chca yomna aca Cristo Jesúseftaca cánÿiñe mo canÿacá bétsemnayeca. ¹⁴ Chë Uámana Espíritu, chë bëngbe ainaniñe endoyenabe uajabuáchenanaca, ntšamo Bëngbe Bëtsá tcmojabonÿecá sempre cochtsinÿena.

¹⁵ Ntšamo ya condétatsëmbcá, nÿetsca ošbuáchiyënga Asia luaroquënga cachcá šmonjesonÿá, y chentše bontsemna Figelo y Hermógenes. ¹⁶ Pero Bëngbe Utabná Onesíforbe pamíllanga chaotsalastemana, er cha ba soye šonjanañemó, y atše cárceloye utámenama cha ndoñe quenjatëuatja. ¹⁷ Marna, Romoye tojabánashjango ora, cha botamana šojánguango y šonjáninÿena. ¹⁸ Bëngbe Utabná lastemado cháftaca chaotsemna, ntšamo nÿetscanga tmojamcá tšabá o ndoñe tšabá yontsemnama cha yochjayana ora. Aca corente condétatsëmbo ntsachetsá Onesíforo Efeso puebloca šonjanëjabuachama.

2

Jesucristbiana canÿe tšabe soldado

¹ Y aca, atšbe uaquiñá, chë Cristo Jesús acbiana tšabe juabna yobomnentsana, bëtscá añemo ainaniñe cochtsebomna. ² Ntšamo ba entšangbe delante šconjoyeunacá, cach buayenánana, boyabásenga nÿetscañe tšabe palabra bomnënga cochjábanÿiye, y chamotsobena ínÿenga cachcá jabuátambama.

³ Aca, chë bënga fsëndbomna padecena soyëngama jasúfriama chacmojtsemna ora, Jesucristbe soyëngama entšanga abuayiyaye causa, ainaniñe bëtš añemo cochtsebomna, mo canÿe tšabe soldadcá, cha chabe mándayabiana jasúfria. ⁴ Ndocna soldado ntjátanana shjoca soyënguiñe vida jtsebomnama o crocénana juácanama. Soldado chca jtsamana, chabe mandayá, chca chaotsemnama tbojabocacá cha, oyejuayá chaotsemnama. ⁵ Y canÿe travisiayá, ínÿenga jáyënjanama, canÿe soye juácanama; pero ntšamo chë uacanánana jocñama tomncá ndoñe tonjatravisiase, cha chë soye ndoñe ntjosháchiñama. Cachcá, acbe trabajo cochjama ntšamo cmojtsemncá. ⁶ Chë jajañe trabajayá derecho jtsebomnana chë natsaná jtsemnama, chë tmojatbaná sananguentsana ndayánaca jtsebomnama. Acaftaca cachcá echanjopása, chë trabajo tšabá chacojamëse. ⁷ Chë cbontsatsëtsnañe cochtsenójuabnaye, y Bëngbe Utabná echanjama lempe chacmósertama.

⁸ Sempre cochtsenójuabnaye Jesucristbiana, ndabiana Bëngbe Bëtsá tojanma cháuatayenama y enjamna canÿa rey Davídbentsana entšá, ntšamo atše chabiana sëndabuayiná tšabe noticiënguiñe endmëncá. ⁹ Chca abuayiyaye causa, atše sëntsesufrina, nÿa cadenëjuangácnaca utsbuaná, mo canÿe bëtš bacna soye ochjajnayacá. Pero masque atše chca sëntsemna, chë Bëngbe Bëtsabe soyëngama buayenánana ínÿenga entšangbiyoye montsabuatambá. ¹⁰ Chíyeca atše nÿetsca padecena soyëngaca sëndétsóboyana, Bëngbe Bëtsabe bocacánëngbe tšabiana, chëngnaca atsebácanënga chamotsemnama, Crístbeñe jtsošbuáchiyëse; y Cristo Jesús bëtšetsanga cháuabiamama, y cháftaca nÿetsca tescama chamotsiyenama.

¹¹ Mëntšá ndegombre endmëna:

Cristo Jesús tojanóbana ora, enjamna mo bëngnaca cuafjobancá, er bënga tmonsajbaná oyenana ntšamo tempo monjanियencá y Jesucristbeñe montsošbuaché; y chca, bëngnaca cháftaca mochantsiyena;

¹² bënga chë padecena soyëngaca tmojtseufrina ora, tmojtsemorochëse, bëngnaca Jesucristoftaca mochántsemandaye.

Bënga tmojayana, cha ndoñe monduabuatma ca, as cha bëngbiámnaca cachcá echanjayana;

¹³ bënga chábeñe ndoñe tmontsošbuáchese,

masque chca, cha cabá echanjama ntšamo tbojašebuachenacá,
er cha lempe jamana, ntšamo sempre iuetsemncá jtsinÿanÿnayëse.

Canÿe trabajayá, ndáftaca Bëngbe Bëtsá jtsóyejuayana

¹⁴ Chë tcbonjauyana soyëngama, cochjama chë entšanga chamotsenójuabnama, y Bëngbe Bëtsabe delante cochjábuayenaye chënga ndoñe yontsamna nÿe palabrëngama jabuachana enatsëtsnayana; er chca, ndocna tšabe soye ntjamana, y chca tmojtse-natsëtsná ora, jamana chë soye ouenanënga más batšá chamotsošbuáchema, y ju-jabuáchana chëngbe tšabe juabnënga jtsondbiamama. ¹⁵ Lempe ntšamo icobencá cochtsama, aca chacotsemnana mo canÿe entšá ndabiamana Bëngbe Bëtsá cháuyana nÿetsca soyënguiñe tšabá amá yomna ca; aca chacotsemnana mo canÿe trabajayacá, nda tondaye tontsebmna ndayama jatëuatjama; y chacotsemnana chë ndegombre buayenánana corente tšabá buatëmbayá. ¹⁶ Entšanga nÿe quem luarentša soyëngama, ndoservena palabrënga tmojtsencuénta ora, chë soye ndoñe cattsuenana; er chë soye jamana entšanga puerte inÿetšá chamobocanama, ntšamo Bëngbe Bëtsá ndoñe yondmëncá, inÿetšá jtsejuabnayëse y jtsamëse. ¹⁷ Chëngbe buatëmbana soyëngaca puerte bacá inÿengbioye jáborlana, nÿa mo canÿe uabouana šocana chamotsebmnama cuaf-jamcá. Chca buatëmbayënguëntše Himeneo y Fileto bontsemna. ¹⁸ Chata chë ndegombre benachentšana tbojtsojuánañe, y ibojtsichamo chë obanënga chámuatayenama Bëngbe Bëtsá ya catënjama ca, y Jesús chaojésabo ora, nÿetscanga chámuatayenama Bëngbe Bëtsá ndoñe yochanjama ca. Chë causa, chata bontsama básefta entšanga chë ntšamo Jesu-crístbeñe imojanošbuachecá, mora ya ndoñe chamondëtsošbuáchema. ¹⁹ Pero Bëngbe Bëtsabe ndegombre buayenánana nÿets tempo cachcá endesomñe, y ndocná quenátobena chë soye jatrócama. Chca endmëna mo chë ndëtšbenga ndayiñe canÿe bëts yebna tojebncá, ndayiñe mëntšá yojtsábemana: “Bëngbe Utabná endëubuatma chë chábenga imomnënga”, y “Nÿetscanga chë Bëngbe Utabná benga imomnënga ca tmojtsichámënga, chamuajbaná nÿetsca bacna soyënga amana ca”.

²⁰ Canÿe uámana entšabe yebnentše, tsafjoca soyënga ndoñe nÿe castellano o midio soyënga ntsemnana, ndayá niñëse y fshantse soyëngnaca; chë natsana soyënga uámana tescama jtsebuájonana, pero chë inÿe soyëngna, nÿe nÿets tempo chauet-soservénama. ²¹ Chca endmëna chë Jesucrístbeñe imojtsošbuachëngbeñe, ndoñe nÿetscanga tmontsajbaná bacna soyënga juabnayana y amana, ni chë chca tmojtsama entšángbentšana ndoñe tmontsojuaná. Pero, chca jtsojuánañama tojtsebošá, echántsemna canÿa Bëngbe Utabnabiamana tšabe trabajayá; y chca, mo chë tsafjoca castellano y midio soyëngcá, canÿe uámana trabajuiñe echanjosérvia, y cha sempre echántseprontana ndaye tšabe soye jamama.

²² Chíyeca, ntšamo básefta bobontsënga bacna soyënga jamama mondbošcá, ndoñe cattsama; pero aiñe cochtsiyena ntšamo Bëngbe Bëtsabe bominÿiñe tšabá yomncá jtsamëse, Jesucrístbeñe puerte cochtsošbuáchiye, Bëngbe Bëtsá y inÿenga cochtsababuánÿeshana y nÿetscángaftaca natjëmbana cochtsomñe, chë chaújabuachama Bëngbe Utabná mondbetsotsëmbuanëngaftaca cánÿiñe, ndocna bacna soye ainaniñe ntsebmncá. ²³ Ndoservena soyëngama palabrënga y ndosertánentšana óbocana soyëngama ndoñe cattsuenana; aca corente condétatšëmbo chë soyënguëntšana entšanga nÿe jabuachana enatsëtsnayıñe jabocanana. ²⁴ Pero chë Bëngbe Utabnabiamana oservená ndoñe quebnátsmëna inÿengaftaca jabuachana ntsenatsëtsnayana; chamna, cha bontsemna jtsababuánÿeshanëse nÿetscanga jtsënÿayana, jtsemnana tšabe buatëmbayá y inÿengaftaca uantadá. ²⁵ Cha bontsemna, chë chabe contra y chabe buayenánama contra imomnënga, chë ndegombre soyënga jabuátambama, pero ndoñe ntjatenabotamnaycá. Chca bontsemna, nderado Bëngbe Bëtsá nanjama chca juabnayana chamotrocama, y chca, chënga chë ndegombre soyëngama chamotsetatšëmbuama; ²⁶ chënga botamana

chamuatsjuaboma, y Bëngbe Bëtsá, Satanasbe cucuatšënguentšana cháuatsebacama. Satanás chënga tojanëtabá ntšamo cha tojtsebošcá jamama, mo bayënga canÿe uachmaniñcá.

3

Ntšamo entšanga mochtsemna, Cristo jésabama chaojtsobeco ora

¹ Pero aca cmontsemna jtsetatšëmbuana, Cristo jésabama tempo chaojtsobeco ora, entšanga echántsamna puerte padecena soyënguiñe jtsiyenana. ² Chca echántsemna, er entšanga, cada ona nÿe cachabe tšabiamana echanjësenojuabnaye, crocénana jtsebomnama tša mochántseboše, mochántsemna enábotamnayënga y ínÿengbioye mo nduamanëngcá mochantsëñÿaye. Bëngbe Bëtsabiamana y ínÿengbiamana bacá mochantsóyebuambnaye, chëngbe bëtsëtsangbioye ndoñe quemochátayaunana, ni chëngbiamana tšabe soyënga tmojtsamëngbioye quemochtëtacheuanaye, y Bëngbe Bëtsabiamana y chabe soyëngama ndoñe respeto quemochátsbomna, ³ ni cachëngbe pamíllangbioye quemochátatabuanÿeshana, mochántseboše ndoñe natjëmbana jtsiyenama, uayátsenayënga mochántsemna, cachënga jenomándama ndoñe quemochátobena, mo ainana ndbomnëngcá mochántsemna, y nÿetsca tšabe soyënga uabotëñënga. ⁴ Chënga, uayayëngbe cucuatšïñe entšanga ayentšbáshejuanënga mochántsemna, mochántsama soyënga tondayama ntjatsrreparánëse, y cachënga uámana entšangcá mochántsenobiamnaye; chënga Bëngbe Bëtsá jatsbobonshana cuenta, cachëngbe cuerpiñe tšabá jtsomñama soyënga mochántseboše. ⁵ Inÿenga echantsinÿana mo ndegombre Bëngbe Bëtsá adórayënga chënga cuaftsemncá, pero chë mochántsama soyëngaca mochanjínÿanÿiye, Bëngbe Bëtsá obená bëtsemnama chënga ndoñe mondošbuáchema.

Nÿa tondayama chëngaftaca cattsencuëntaye. ⁶ Chënguentšë báseftanga mondmëna, y chëngna botamana palabrëngaca yebnënguenache jamashjnana, y chenache, chë paselo yomna jáingñama shembásenga jtsaíngñayana, chëngbe buatëmbana soyënguiñe chamotsošbuáchema. Chë shembásenga bëtscá bacna soyënga tmojama, y chë causa ndoñe corente natjëmbana montsiyena, y ba ndoñe tšabe soyënga imojtsama nÿe cachënga tšabá jtsemnama, ntšamo tmojtsebošcá. ⁷ Chënga nÿets tempo nÿe ndaye tsëm soye jatóntšana jatatsjínÿana, pero ndocna te ntjobenayana Bëngbe Bëtsabe ndegombre soyënga josértama. ⁸ Ntšamo Janes y Jambres Moisesbe contra ibojamncá, cachcá, chë ínÿenga jáingñama abuátambayënga nÿetsca ndegombre soyëngama contra jtsemnana. Chë entšanga chëngbe juabniñe nÿe bacna soyënga jtsebomnana, y Bëngbe Bëtsá chënga tojtsëbaté, chënga chë ndegombre soyënguiñe ndoñe ntsošbuáchiana causa. ⁹ Pero chënga ndoñe quemochatobenaye bëtscá entšanga jáyënjanama, er nÿetsca entšanga mochanjátatšëmbona chënga nÿe bacna soyënga juabnayënga imomnama, mo chë Israe-loca entšanga tmojantatšëmboncá Janes y Jambres nÿe chca juabnayata bëtsemnama.

Inÿe soye Timotéobioye tbojanbonÿé

¹⁰ Pero acna, puerte tšabá condëtatšëmbo ntšamo atše tijabuatambacá, ntšamo jtsamëse atše tsiyena, ndayá jamama tsjuabná, ntšamo atše Jesucristbeñe puerte tsošbuaché, ntšamo ínÿengaftaca uantado tsmëna; ntšamo atše, Bëngbe Bëtsá y ínÿengbioye tsababuánÿeshana; ntšamo atše, Bëngbe Bëtsábeñe jtsobátmanëse, ¹¹ ínÿenga šmonjanacmena ora; y sënjansufrina ora, padecena soyënguiñe bëts añemo tsjánbomna. Acnaca condëtatšëmbo ntšamo atše chama Antioquía, Iconio y Listra bëts pueblëngoca tsjansufrinana. Pero masque entšanga tša šmonjanacmena, atše lempe sënjánauantana, Bëngbe Bëtsábeñe jtsobátmanëse, y cada ora, Bëngbe Utabná chëngbentšana šonjanatsbocá. ¹² Ndegombre endmëna, nÿetscanga chë Bëngbe Bëtsá jadórama soyënga jtsamëse jtsiyenama bošënga, y Cristo Jesúsëftaca cánÿiñe mo canÿacá imomnënga, puerte mochanjasúfria, chca bëtsemnama, chënga chamosufrina ínÿenga

chamojtsama ora; ¹³ pero chë bacna entšanga y chë ínÿenga áingñayënga, cada te más bacna entšanga mochántsemna, más bacna soyënga jtsamëse; chënga ínÿengbioye mochántsaingñaye, pero cachëngnaca ingñénënga mochántsemna.

¹⁴ Pero aca, nÿets tempo cochtsejuabnaye y cochtsama lempe ntšamo tcojuatsjinÿcá, chë ndegombre soyëngcá cojtsošbuácheñe, er aca tšabá condëubuatma chë tcmojanbuátëmbanga; ¹⁵ y aca, cabá básetema conjamna orscana, chë Bëngbe Bëtsabe uabemana palabréngama condëtatšëmbo, chë ndaye sóyeca aca contsobena juatsjinÿana, Bëngbe Bëtsá chacmatsbocama, Cristo Jesúsbeñe jtsošbuáchiyëse. ¹⁶ Bëngbe Bëtsá, Uámana Espíritbeyeca tonjama, lempe ntšamo Bëngbe Bëtsabe uabemana palabrénguiñe yobinÿncá entšanga chamuábemama. Chë uabemana palabra endoservena, bëngbioye chë ndegombre soyënga jabuátambama; nderado ndaye soye ndoñe tšabá tmonjamama bënga chamotsetatšëmbuama, jinÿanÿiyama ntšamo más tšabá chë soyënga muanjobenaye jamama; y bëngbioye jabuátambama ntšamo jtsiyenama chë Bëngbe Bëtsabe bominÿiñe tšabá yomna soyënga jtsamëse; ¹⁷ chca, canÿe entšá Bëngbe Bëtsabiama oservená y obená chaotsemnama, tšabá chaotsetátšëmbo y sempre chaotseprontana nÿetsca tšabe soyënga jtsamama.

4

¹ Bëngbe Bëtsabe delante y Cristo Jesús, nda echanjabo mo reycá jabomándama y jabáyanama chë ainëngbiana y chë ya mochjóbanëngbiana, ntšamo chëngbe vidënguiñe tmojëftsemcá tšabá o ndoñe tšabá bétsemnama, chatbe delante cbomandá, ² Bëngbe Bëtsabe palabra entšanga chacotsabuayiynayama; sempre chca jamama cochtseprontana, masque entšanga aíñe o ndoñe jouenama tmojtsebošëse. Cochjama, ínÿenga bacna soyënga tmojtsamama chamotsetátšëmbo, chca tmojtsamama cochjucácana y cochjábuayenaye ndayá jamama yojtsamnana. Sempre chca cochtsabuátambaye, chca ora puerta uantado jtsemnëse. ³ Chca cochtsama, er canÿe tempo echanjóshjango y chora entšanga chë ndegombre buatëmbana soye ndoñe quemochátuenana; chamna, nÿe chë último tsëm soyënga jtsetatšëmbuama boše causa, ba abuátambayënga mochanjuánguango, y chënga mochántsicamo soyënga nÿe ntšamo cach entšanga jouenama tmojtsebošcá. ⁴ Chënga chë ndegombre soyënga ndoñe quemochátuenana, y nÿe ndaye cuentënga mochántseyeunana. ⁵ Pero aca, siempre botamana cochtsejuabnaye; chë padecena soyëngama chacojtsesufrina ora, añemo cochtsebomna; chë Jesucristbiana tšabe noticiënga entšanga abuayiynayabe trabajo cochtsama; y nÿa cochtsentšena ndayá Bëngbe Bëtsá tcmojabonÿecá tšabá jtsamama.

⁶ Er mo Bëngbe Bëtsábioye jëtschuayama, canÿe bayá obanáftaca tcojabuešcja vínoye jtsoPOCHOCANCÁ, cachcá atšbe vídnaca ya jopochócama entsemna. Atše jóbanama bécoñe entsemna; chanjóbana ora echántsemna Bëngbe Bëtsá oyejuayá chaotsemnama. ⁷ Cristo Jesúsbe soyëngama corente sënjenojuerzá. Mo canÿe travisiayacá, chë jashjanguama yomna luaroye ya tojashjangcá, átšnaca ya, ntšamo Bëngbe Bëtsá yobošcá atše jtsamëse, atšbe trabajo ya tijapochocá. Atše nÿets tempo Jesucristbeñe sëndošbuaché. ⁸ Chcasna, atšbiana canÿe uacanana soye echántsemna, er Bëngbe Bëtsá tojama atše chabe bominÿiñe tšabia chaitsemnama. Bëngbe Utabná endmëna chë ndegombre tšabá ichamuá entšanga aíñe o ndoñe tšabá tmonjamama, y cha chë uacanana soye šochántatšetaye, entšanga ntšamo tmojamama cha chaojabáyana ora. Pero cha nÿe atše ndoñe chë uacanana soye quešochtëtatšetaye, ndayá nÿetscángbioye chca, ndëmuanÿenga puerta imoboše cha cachiñe cháuesabama, cha imobobonshánayeca.

Inÿe soyënga Timoteobiana

⁹ Lempe ntšamo tcojobenacá cochjama betesco jabama atše jabínÿama; ¹⁰ er Demas, cha yapa nÿe quem luarentša entšangbe soyënga bošá enjamna, cha cachcá šonjesonÿá y Tesalónica puebloye tojtsoñe. Crescente Galacia luaroye tonjá y Tito Dalmacia luaroye.

¹¹ Nýe Lucas, chë šmonjanájabuachanënguentšana, mora átšeftaca entsemna. Marcos cochjaftsenguango y ácaftaca cochjěftsbetše, er cha atšbe trabajuama puerte oservená endmëna. ¹² Tíquico, Efesoye sënjichmó. ¹³ Chacojabo ora, uabonjanía šcochjesacñe, atše Troas bëts pueblocá, Carpbe yebnoca tijésaboshjona; chë librëšangánaca, pero chë uámana uabemana tsbuanachangá ndoñe chacmondétsebnatjëmba.

¹⁴ Alejandro, chë cobre soyënga pormayá, puerte bacá šonjaborlá. Bëngbe Utabná bochanjacastíga, ntšamo atše šojaborlama. ¹⁵ Chabiamá cuedado cochtsebmna; cha tojobenase ntšámnaca cmatjabórla, er cha chë bënga mondabuayiyiná soyëngama contra entsemna.

¹⁶ Chë natsana soyama, mándayëngbe delante šonjanotocá jenëuyanama ora, atše ndocná chešnátanajabuache; nýetscanga cachcá šmonjésonyaye. Pero atše sentsobátmana, Bëngbe Bëtsá chama chënga chaotsaperdoná. ¹⁷ Pero Bëngbe Utabná aíñe šonjanájabuache y tonjanma atše bëts añemo jtsebomnama, y chcase, atše sënjanobená Jesucrist-biamá nýetsca chabe tšabe noticiënga entšanga jábuayenama, y chë luarentša ndoñe judiënga tmonjanobená chë soye jouenama. Mëntšá, Bëngbe Utabná canye uabouana resjuentšana šonjanatsbocá, mo canye león jtsosañámentšana ndábioye cuafjatsbocacá, ¹⁸ y Bëngbe Utabná šochanjatsbocá, bacna soye ndocná chašondëborlama; y sempre jtsinýenëse, celoye, chë ndayentše cha yománda luaroye šochanjesbetše. ¡Nýetscanga nýetsca tescama cha chamotsatschuaná! Chca chaotsemna.

Pablo Timotéobioye jadiósoftanama

¹⁹ Atšbe cuenta cochjácheuaye Prisca y Aquila, y Onesíforbe pamíllnaca. ²⁰ Erasto, Corinto pueblocá tontsoquedañe, y Trófimo Mileto pueblocá šocá sënjěftsebohjona. ²¹ Lempe cochjama, uaftena tempo chaondóshjango ora moye jabama. Acnaca cmontsechuaná Eubulo, Pudente, Lino, Claudia y nýetscanga muentše Jesucristbeñe ošbuáchiyënga.

²² Atše sëntseimpadana, Bëngbe Utabná Jesucristo ácaftaca chaotsemna, y Bëngbe Bëtsá tšëngaftangbeñe tšabe bendicionënga chaotsemnama chaoma.

Tito

Jachuayama

¹ Atše Pablo, Bëngbe Bëtsabe oservená sëndmëna y Jesucristbe ichmoná entsanga jábuayenama, chë Bëngbe Bëtsá chabe entsanga chamotsemnama tojábacacanga, Jesucristbeñe chamotsošbuáchema y chë ndegombre soyëngama chamotsetatšëmbuama; chë soyënga endmëna ntšamo bënga, Bëngbe Bëtsabe básenga bëtsemnama, mondoyena jtsamëse. ² Lempe chca sëndama, er Bëngbe Bëtsabeñe jtsošbuáchiyëse, atše sentsobátmana chë nyetsca tescama yomna tšabe vida jtsëbomnama. Bëngbe Bëtsá, chë ndocna te obosterayá, quem luare cabá ndmëna orscana tojanašebuachená entsanga chca vida jtsëbomnama; ³ y nÿa chama tempo tojóshjango ora, chë entsanga jábuayenama, soyëngaca Bëngbe Bëtsá chabe palabra šojinÿanyé, ndayá Jesucristo entsangbiama yochjanmama; y chca jábuayenama atše palabra šmonjabonÿé, Bëngbe Bëtsá, bëngbe Atsebacayabe mándoca. ⁴ Tito, quem tsbuanácha cbontsabobiamná. Atše Jesucristbe soyëngama entsanga sënjanabuayiyná ora, aca chábeñe contsanošbuaché y nyets útata cachca ošbuáchiyana Jesucristbeñe bondbomna, y chca, aca mo atšbe ndegombre uaquiñacá condmëna. Atše sëntseimpadana, Bëngbe Bëtsá Bëngbe Taitá y Jesucristo Bëngbe Atsebacayá, ácheñe tšabe bendicionënga chaotsemnama chata chaboma, y chaboma aca ainaniñe tšabe ebionana chacotsebomnama.

Titbe trabajo Creta luaroca

⁵ Atše Creta luaroca tcbonjëftsanboshjona, ntšamo chentše jamama enjetsashbencá chacomama, y nyetsca pueblënguenache chë ošbuachiyëngcá enefjuanëngbeñe bëtsëjemëngcá amëndayënga jtsemnama chacubuáyanama, ntšamo tcbonjaftsemandacá. ⁶ Canÿa bëtsëjëmama uabuayaná mëntšá bontsemna: chaotsiyena ntšamo chabiama ndocná chaondëtsichamo ndoñe tšabá yontsama ca; nÿe canÿe shembásabe boyá; chabe básengna, Jesucristbeñe ošbuáchiyënga chamotsemna, y chamotsiyena, ntšamo ndocná chaodayana chënga nÿe jenomándama ntšobencá y nÿe ntšamo tmojtsebošcá imojtsiyena ca, o chënga chëngbe bëtsëtsanga o mándayënga ndoñe montsayaunana ca. ⁷ Er cánÿentše ošbuachiyëngcá enefjuanëngbe mandayá, Bëngbe Bëtsabe trabajo jamama tmojabonÿéyeca, cha bontsemna jtsiyenana, ntšamo ndocná chaodayana cha ndoñe tšabá yontsama ca; ntjajuaboycá, nÿe ntšamo cha tojtsebošcá ndoñe chaondëtsama; ndoñe chaondëtsiyena nÿe rábiaca jtsemnama; ndoñe chaondëtsetmó; penzentsero ndoñe chaondëtsemna; y ndoñe chaondëtseboše nÿe paselo becá crocénana jtsëbomnama. ⁸ Pero chabe yebnentše posada entsanga júyentsamiama sempre chaotseprontana, tšabe soyënga chaotsebinÿyana sempre chaotsentšena, botamana juabnaya cháotsemna, ntšamo Bëngbe Bëtsabe bominiñe tšabá yomncá chaotsiyena, nyets tempo Bëngbe Bëtsábioye chabotsadorana, y cachá nyetsca soyënguiñe jenomándama chaotsobena. ⁹ Cha bontsemna nyets tempo jtsošbuáchiyana y jtsobedecénana chë ndegombre buayenana soye, ntšamo tmojabuatëmbacá, chca, chë ndegombre buatëmbana soyëngaca inÿyënga añemo chaotsatsatnama, y chë soyama contra tmojtsemnënga jáyëñjanama, ndoñe tšabá montsamama.

¹⁰ Cha chca bontsemna, banga nÿe ndëmandánënga jtsiyenama bošënga mondmëna causa, y chënga mondmëna, nÿe ndaye ndoservena soyëngama yapa oyebuambnayënga y inÿyënga áingñayënga, y chcanga más mondmëna chë nyetsca ošbuáchiyënga base bobachtema chë más delicadentše tëtšenënga jtsemnama yojtsamna ca mondbëtsichamënguentše. ¹¹ Y entseyta chëngbioye jtayáchetana, er chënga jamana ba pamíllanguentše nyetscanga Jesucristbeñe ošbuáchiyana chamotsajbanama. Chënga

chca mondbétsama, chë ndoñe yontsamna jtsabuátambayama soyënga jtsabuátambayëse, nÿe paselo crocénana jongánama.

¹² Enjamna canÿa, ndabiama entsanga jtsichámuana cach Creta luarentša diosëngbiama oyebuambnayá canjamna ca, y cha cachabe luarentša oyenëngbiama mëntšá tonjánayana: “Creta luarentše oyenënga, nÿets tempo bosterënga mondmëna, ainana ndbomnënga y oyënjayënga nÿe becá jasama bošënga ca.” ¹³ Y chca ndegombre cha tonjánayana; chíyeca chënga jabuache cochjucácana, chca, chënga Jesucristbeñe chamotsošbuáchema y chamotsobedecena chë buatëmbana soyënga, chë ndayiñe bënga mondošbuaché; ¹⁴ y cach judiëngbe cuentënga ndoñe chamondëtsuenana, ni chë ndegombre soyënga uabotenëngbe mandënga.

¹⁵ Chë ainaniñe bacna juabnënga ndbomnënga y chca juabnëngaca ndëmandánënga, nÿetsca soyëngama jtsejuabnayana mo ndegombre tšabe soyënga cuaftsemncá; pero chë bacna soyëngaca mandánënga y Jesucristbeñe ndošbuáchiyënga, nÿe ndayámna jtsejuabnayana mo bacna soye cuaftsemncá. Chca entsemna, er chëngbe juabnoca nÿe ena bacna soyënga jésebomnana, y ndaye bacna soye tmojamama ora, chëngbe ainaniñe juabnënga ndoñe ntsebomnana, bacna soye tmojamama chaúyanama.

¹⁶ Chënga jtsichámuana Bëngbe Bëtsá imuábuatma ca, pero ntšamo tmojtsama soyëngaca jtsinÿinÿayana chca ndoñe ndegombre yondmënama. Chënga Bëngbe Bëtsabe bominiñe puerte bacna entsanga mondmëna, y ntšamo cha tomandacá ndoñe ntsamana; chë causa chënga ndoñe ntsobenana ndaye tšabe soye jamama.

2

Soyënga ntšamo chë ndegombre buatëmbánana endmëncá

¹ Ntšamo chacojtsoyebuambnacá sempre chaotsemna ntšamo chë ndegombre bu-atëmbánana endmëncá. ² Cochjayana chë bëtsëjëmëngna chamotsemna cachënga nÿetsca soyënguiñe jenomándama obenënga, nÿetscangbiama mo uámama entsangcá utabnënga, ntšamo jtsiyenama tšabá juabnayënga, nÿets tempo chë ndegombre soyënguiñe chamot-sošbuaché, Bëngbe Bëtsá y nÿetscanga chamotsababuánÿeshana, y padecena soyënguiñe puerte uantadënga chamotsemna.

³ Cachcá, chë bëtsanana shembásënga chamotsiyena mo Bëngbe Bëtsábioye adorayëngcá, uayátsenayënga ndoñe chamondëtsemna, ni tmoyënga. Entsamna chamotsiyena tšabe soyënga jtsamëse; ⁴ chë tobiasënga chamotsinÿanÿná y chamotsabuatambá ntšamo chëngbe boyanga y básënga jtsababuánÿeshanana, ⁵ ntšamo cachënga jenomándama jt-sobenana, ainaniñe ndocna bacna soye ntsebomnana, yebnentša soyënga jtsamama jtsentšénana, nÿetscángaftaca tšábënga jtsemnana, cachëngbe boyángbioye jtsayaunanana, chca, ndocná chaondëtsobena Bëngbe Bëtsabe palabrama bacá jatóyebuambnayana, ntšamo chë tobiasënga tmojamama.

⁶ Cachcá, chë bobontsënga añemo cochtsatšatnaye cachënga jenomándama chamot-sobenama, ⁷ y chënga cochjínÿanÿiye ntšamo yomna jtsiyenana, cach aca nÿetsca soyënguiñe tšabá jtsamëse. Chca chacojtsabuatambá ora, nÿe chë ndegombre buayenánana cochtsabuátambaye y corente respétoca chca cochtsama, ⁸ chë ndegom-bre soyënga jtsóyebuambnayëse; chca, ndocná chaondobená jayanana aca ndoñe tšabá tconjayana ca, y chca, chë acbe contra ichámënga chamotsëuatja, er ndocna bacna soye quemochatobenaye bëngbiama jayanama.

⁹ Chë nÿets tempo nÿe ínÿabiama oservénënga cochjábuayenaye, chëngbe nduiñëngbioye chamotsobedecénama, soyënga chamotsama chënga chamotsóyejuama, y yajuatsanënga ndoñe chamondëtsemnama. ¹⁰ Ndoñe chamondëtsatbëbana, pero aíñe nÿetscañe tšabe palabra bomnënga chamotsemna. Chënga chca entsamna, chca, ínÿënga chámuinÿe y chamojuabó tša botamana chë buatëmbana soyënga, Bëngbe Bëtsá bëngbe Atsebacayabi-ama yomna ca.

¹¹ Er Bëngbe Bëtsá bënga šonjinÿanÿé cha bëngbe tšabiamama juabnënga yobomnama, y chca, cha tojama nÿetsca entsanga chamotsobena atsebácanënga jtsemnana. ¹² Chë Bëngbe Bëtsabe juabna bëngbe tšabiamama, šontsabuatambá jtsajbanama oyenana soyënga jtsamëse mo chë Bëngbe Bëtsá ndoñe mondadoranëngcá, quem luarentša bacna soyënga bošana jtsajbanama; y ntšamo mora quem luarentše jtsiyenámncá šontsabuatambá, cabënga jenomándama jtsobenëse, ntšamo Bëngbe Bëtsabe bominiñe tšabá yomncá y cha jadórama soyënga jtsamëse. ¹³ Y chca jtsamëse, y Bëngbe Bëtsábeñe ošbuachiyánaca jtsiyenëse, jtsobátmanana chë puerte oyejuayana jtsobomnama te, Bëngbe Bëtsá obená y Atsebacayá Jesucristo, buashinÿinÿaniñe y canÿe corente uamanacá yochjésabo ora. ¹⁴ Cha chabe derecho vida jtsobomñama cachcá tojanonÿá y bëngbiamama tojanóbana, chë ntšamo Bëngbe Bëtsá bemandacá ndoñe yondmëncá jtsamëse oyenentšana bënga jatsebacama, ainaniñe ndocna bacna soye ndbomnënga jábiamama, bënga chábenga chamotsemnama, sempre prontánënga ntšamo tšabá yomncá jtsamama.

¹⁵ Chca cmontsemna jtsabuátambayana, chënga becá añemo jtsatšatnayëse, y jtsinÿanÿnayëse chënga bacna soye tmojamama, chë nÿets condbomna mándoca jucácanëse. Ndoñe catjaleséncia ndocná chaondayana aca mando ndoñe condbomna ca.

3

Ndayá Jesucristbeñe ošbuachiyënga yojsamna jamana

¹ Cochtsama chënga chamuatenójuaboma chë mandadënga y inÿe mándayënga chamot-sayaunanama, chamotsobedecénama, y tšabá yomncá jamama sempre chamot-seprontánama. ² Ndocnabiamama ndocna bacna soye chamondëtsoyebuambná, pen-zentserënga ndoñe chamondëtsemna, ndayá nÿetscángaftaca natjëmbana jtsiyenama bošënga, tšabá mándbomnënga, nÿetscanga tšabe ainánaca imojtsënÿama entsanga jtsinÿanÿnayëse.

³ Er bëngnaca tempo monjamna Bëngbe Bëtsabe soyëngama ndosertánënga, ntšamo Bëngbe Bëtsá endëmandacá ndoñe quemjatanama, ingñenënga y mandánënga monjamna nÿetsca bacna soyënga jamama juabnëngaca y nÿe quem luarentše tšabá jtsemnana juabnëngaca. Bënga monjaniiyena nÿe bacna soyënguiñe juabnaye, inÿenga uantšaboše. Inÿenga bënga šonjanébuayënja y bënga nÿetscanga monjanenáboyënja.

⁴ Pero Bëngbe Bëtsá, bëngbe Atsebacayá, bëngbe tšabiamama juabna yobómnyeyca y tša šuababuánÿeshanama šonjaninÿanÿé ora, ⁵ cha šonjanatsebacá, pero ndoñe nderado bënga ndaye tšabe soye tmojanmama, ndayá cha bëngbiamama tbojanongméyeca. Cha šonjanatsebacá, bëngbe bacna soyënga jabuajuánase, y chë Uámana Espiritu jujabuáchëse, bënga mo tsmëma entsangcá chamotsemnama, ntšamo tempo yojamncá ntjatsjuabnaycá y ntjatamcá. ⁶ Bëngbe Atsebacayá Jesucristbeyeca, Bëngbe Bëtsá tojanma Uámana Espiritu bëngbe ainaniñe nÿets tempo chaotsemándama y bënga chašotséjabuachanama, ⁷ chca bënga, Bëngbe Bëtsá bacna soyëngama šojaperdónanga y bëngbe tšabiamama juabna bómnyeyca tojayana chabe bominiñe tšábenga imomnënga, chamotsobena cha yobomna soyënguentšana bënga mo ndayá cuafstetocancá jóyëngacñama, y chca, chábeñe jtsošbuachiyëse, chë nÿetsca tescama yomna tšabe vida chamotsobátmanama.

⁸ Chca, lempe ntšamo tijayancá nÿa ndegombre endmëna, y atše sëntseboše chë soyëngama bëtscá chacotsabuatambá, chca, chë Bëngbe Bëtsábeñe tmošbuachenga chamotsentšena chë tšabe soyënga jtsamama. Chë buatëmbánana puerte tšabá endmëna y nÿetscangbiamama bëtscá endoservenana. ⁹ Inÿenga nÿe ndoservenana soyëngama jabuachana tmojtsenatsëtsná ora, y anteungbe cuentëngama chamojtsoyebuambná ora, ndoñe cattsonremetena; ndoñe cattsama cach tšëngaftanga ndoñe tšabá jtsenëyeunanamcá, y judiëngbe leyëngama ndoñe inÿëngaftaca cattsenpéliaye. Chca jtsamana tondayama ntoservénana, y nÿe bonamente chca jtsamana.

¹⁰ Nderado nda tojtsama entsanga ndoñe cachcá nyetscanga chamondětsejuabnama y chamotsenpéliama, canye o uta soye cochjabuayená ndoñe tšabá tonjamama; pero cha ndoñe tcmonjóyeunase, chentšana cháftaca ndoñe más cattsóyebuambnaye. ¹¹ Chca cochjama, er aca cochanjátatsëmbona canya chca tojtsemná, chabe juabna tojatrocá bacna soyënga jtsejuabnayama. Chë soye y chë inye bacna soyënga ntšamo cha tojtsamcá, jtsinyanynayana cha ibojtsemna castiganá chama jtsemnama.

Inye soyënga Titbiana

¹² Atše, Artemas o Tíquico ácbioye chajichmó y choca chaojashjango ora, ndayánaca cochjama Nicópolis puebloye aca jama atše jinýama, er atše sënajuabó chentše chë uaftenëntscuana jëftsemnana. ¹³ Lempe ntšamo chacojobenacá, cochjuájabuache chë inýenga obuauyayá Zenas, y Apólosnaca; lempe ntšamo chata ibojtsëjabotcá cochjátšataye, inýoye jama jatóntšama chamobenama y benachëjana tondaye chaondëtsabuáshebenama. ¹⁴ Atše sëntseboše, bëngbe entsanga, chë bëngcá Jesucristbeñe ošbuáchiyënga, chamotsentšena chë tšabe soyënga jtsamama y chë puerte ujabótënga jtsëjabuáchanama, chca, chënga tondayama ndoservena vidënga ndoñe chamondětsebomnama.

Pablo Títbioye jadiósoftanama

¹⁵ Nyetscanga chë átšeftaca montsemnëngnaca cmontsechuaná. Atšbe cuenta cochjácheuaye nyetscanga chë bënga imuababuanýeshanëngbioye, cach bëngcá Jesucristbeñe ošbuáchiyana bómnyeca. Atše, Bëngbe Bëtsá sëntseimpadana, cha chaoma ábbeñe tšabe bendicionënga chaotsemnama.

Filemón

Jachuayama

¹ Atše Pablo, mora utamená Cristo Jesusbiam a oservena causa, quem tsbuanácha sentsabiamná, Jesucristbeyeca bēngbe catsata Timotéoftaca, acbiam Filemón, bēngbe bonshaná y nda bēngaftaca condētrabája Jesucristo jaserviama. ² Atše sentsacheuaná, Jesucristbeyeca bēngbe uabena Apia y Arquípnaca, nda bēngaftaca cányiñe Jesucristbe soyēngama endenojuerzana; y nyetsca ošbuachiyēngnaca, ndēmuanyēnga imuamana acbe yebnentše jēnefnama Bēngbe Bētsá jētschuayama. ³ Atše sēntseimpadana Bēngbe Bētsá Bēngbe Taitá y Bēngbe Utabná Jesucristo, chata chaboma tsabe bendicionēnga tsēngaftangbeñe chaotsemnana, y chaboma tsēngaftangbe ainaniñe tsabe ebionana chašmotsebomnana.

Filemonbe bonshánana y ošbuáchiyana

⁴ Bēngbe Bētsáftaca stsencuénta ora, acbiam sēndbētsenojuabnaye, y sempre acbiam Bēngbe Bētsá sēndbētsatschuanaye, ⁵ er atše sēnjátatsēmbona ntšamo aca nyetsca chē Bēngbe Bētsábenga imomnēnga icuababuánjeshanama, y ntšamo aca Bēngbe Utabná Jesúsbeñe tša icošbuáchema. ⁶ Bēnga, Jesucristbeñe ošbuáchiyēnga quetsomñecá, ácaftaca mo canyáca fsēndmēna. Chca endmēnayeca atše Bēngbe Bētsá sēntseimpadana, tsēngaftanga chašmobená más botamana josértana nyetsca chē Bēngbe Bētsábiocana tmojóyēngacñe tsabe bendicionēnga, bēnga Cristo Jesúsēftaca cányiñe mo canyáca bētssemnayeca. ⁷ Jesucristbeyeca atšbe bonshana catsata, aca chē Jesucristbeñe ošbuáchiyēnga tša condábabuanjeshanama, atše corente oyejuayá sēntsemna y bēts añemo sēntsebomna. Y aca tcojama, nyetscanga chē Bēngbe Bētsábenga imomnēnga chēngbe ainaniñe ngmēnaca ndoñe chamondētsemnana, chēnga jujabuáchēse.

Pablo, Filemónbioye Onésimbiam tbojanimpadá

⁸ Y chca, atše Cristbe ichmoná quetsomñecá sēntsobena, aca nye jamándana ntšamo yomncá chacotsamama, pero atše chca ndoñe quichatsma. ⁹ Y cbondbobonshánayeca, chca játamamna, aca cbochanjaimpáda. Atše Pablo, Jesucristbe cuenta ichmoná jóyebuambayama y mora utamená, chabiam a oservena causa, ¹⁰ canye ruego cbochanjábema, Onésimo chacuájabuachama. Atše utamená tsmēnēntscuana, Jesucristbe soyēngama cha sēnjanbuayiyná. Cha Crístbeñe tonjanošbuachéyeca, cha mo atšbe uaquiñacá tonjanóbema.

¹¹ Tempo, cha ácbioye tondayama quecmēnjátanservena, pero mora cha becá entsámana, acbiam y atšbiam. ¹² Mora ácbioye sēntsatichamná, y atše sempre chabiam sēndbētsenojuabnaye y sēndbobonshana. ¹³ Atšbiam puerte tsabá manmēna cha átšeftaca matēnjoquedase, acbe cuenta atše chaoservema, cárceloye utamená sēntsemnēntscuana, chē tsabe notiēnga entšanga abuayiynaye causa. ¹⁴ Pero atše ndoñe chiyatsma cha chaoquedama atše chašuájabuachama, er atše ndoñe quetsátsboše aca obligaciōnaca chacotsemnana, atše juajabuáchama ndayánaca chacomama; y sēntseboše aca ndayánaca chacoma, cach aca chca jamama puerte tcojtsebošēse. Chcasna, tondaye quichatsma, chē soye chca chaotsemnana aca cabá ndocá ntjayancá. ¹⁵ Atše sēntsejuabná nderado Onésimo ácbentšana básefta tescama tojanoluaré, mora ácaftaca nyets tempo jtsatsmēnana ca, ¹⁶ y ndoñe nye acbiam mo nyets tempo canye oservenacá, ndayá chama más uamanacá, mo Jesucristbeyeca canye bonshana catsatcá. Atše puerte Onésimo sēndbobonshana, y acna cmontsemna más cha jtsebobonshánana, er cha mora ndoñe quenátsmēna canya nye acbiam nyets tempo oservená, ndayá Bēngbe Utabnábeyeca canye catsata, ntšamo cach aca condmēncá.

¹⁷ Chca, aca atšbiamna condëjuabná mo ácaftaca cánÿiñe Bëngbe Utabnabiamna trabajay-acá; chíyecna cmontsemna cha jtoffjana, mo atše ſcojofjá. ¹⁸ Nderado ntšamo cha tcmo-janborlá o ndayánaca tcmondebena, atše chama cbochjëtsëntsabuachiye. ¹⁹ Atše Pablo, cach atšbe cucuátšeca quem soye sëntsabiamná. Atše chama cbochanjëtsëntsabuachiye. Ndegombre, ndoñe quenátsiyta atše chacbëyana beca ſcondebena ca, ntšamo atsbocaná jtsemnama atše tchojánbuayenama. ²⁰ Chcasna, Jesucrístbeyeca atšbe catšata, Bëngbe Utabnáftaca cánÿiñe mo canÿacá quetsomñecá, Diosmanda chë pavor ſcochtsebema. Diosmanda cochjama atšbe ainana ngménaca ndoñe chaondëtsemnama.

²¹ Atše chca cbontsabobiamná, er atše tšabá sëndëtatšëmbo, ntšamo cbontseim-padancá cochjamama, y cabá más chama cochjatsmama. ²² Y mora inÿe soye, Dios-manda posada ſcochjabopróna, atše jányama chajábocna orscama, er atše puerte jtsošbuáchiyëse Bëngbe Bëtsábeñe sëndobátmana, cha tšëngaftangbiamna yochjama lempe ntšamo atšbiamna chašmojtjañcá, y chca, cha ſochjaleséncia atše tšëngaftangbioye jésama.

Pablo Filemónbioye jadiósoftanama

²³ Epafras, muentše átšeftaca cárceloye utamená, Cristo Jesusbiamna entšanga abuayiy-naye causa, chánaca cmontsechuaná. ²⁴ Y Marcos, Aristarco, Demas y Lucas, chë bëngaftaca mondëtrabájanga Cristo jasérviamna, chëngnaca cmontsechuaná.

²⁵ Atše sëntseimpadana Bëngbe Utabná Jesucristo, chaoma tšabe bendicionënga tšëngaftangbeñe chaotsemnama.

Hebreos

Bëngbe Bëtsá bëngaftaca tojoyebuambá, chabe Uaquiñáftaca

¹ Tempo, Bëngbe Bëtsá ba soye y ba soyëngaca bëngbe bëts taitángbioye tojanéyana, chë chabe juabna oyebuambnayëngaftaca. ² Pero quem tempo bëngaftaca tojoyebuambá, chabe Uaquiñá jíchmuase, bëngbioye cha chaśúyanama. Bëngbe Bëtsá tojama, lempe ntšamo chabe soye yomncá, chabe Uaquiñabiama chaotsemnama, y chábeyeca Bëngbe Bëtsá quem luare y nyetsca inye luarënga tojama. ³ Cha endinñanñá Bëngbe Bëtsabe corente buashinñinñanana y uámanana, y cha endmëna cach Bëngbe Bëtsacá, y chábeñe bënga mondobena jinñama ntšamo Bëngbe Bëtsá yomncá. Chabe bëts obenánaca endútabna lempe ntšamo quem luarentše yobinñncá; cha tojayana y chca jtsemnana. Cha tojanóbana bëngbe bacna soyënga jabuajuánama, y chentšana Bëngbe Bëtsá tojaninñanyé cha puerte bëtsá y uamaná bëtsemnama, celoca játbemëse, Bëngbe Bëtsabe catšbioica, nyetscanga jtsamëndayama.

Bëngbe Bëtsabe Uaquiñá chë angelëngbiama más bëtsá yomna

⁴ Y chca, Bëngbe Bëtsá tbojánbema chë angelëngbiama más uamaná y obená, er Bëngbe Bëtsá tbojanbuajó canye más uámana uabaina y chë angelëngbiama canye más uámana trabajo tbojanbonyé. ⁵ Ndegombre chca endmëna, er Bëngbe Bëtsá ndocna te ndocna ángelbioye mëntśá tbonjaniana, ntšamo chabe Uaquiñábioye tbojaniancá: Aca atšbe Uaquiñá condmëna.

Mënté entsanga sënjinñanyé aca atšbe Uaquiñá comnama ca.

Ni ndocna angelbiama mëntśá tojánayana, ntšamo chabe Uaquiñabiama tojanayancá:

Atše canye taitá chabiama chántsemna,

y cha canye Uaquiñá atšbiama ca.

⁶ Quem Bëngbe Bëtsabe Uaquiñá endmëna nyetscangbiama más uamaná. Chca Bëngbe Bëtsá tojánayana, chabe natsana Uaquiñá quem luaroye cháúashjanguama cha tojanma ora:

Bëngbe Bëtsabe nyetsca angelënga cha chamotsatschuaná ca.

⁷ Y chabe angelëngbiama, mëntśá tojánayana:

Atše sëndama atšbe angelënga, chë atšbe buayiynayënga, mo binñiëngcá chamotsemnama,

y chënga, atšbe oservëngënga, mo inñëjëngcá ca.

⁸ Pero chabe Uaquiñabiama Bëngbe Bëtsá tojánayana:

Utabná, acbe amëndayana nyetsca tescama echántsemna,

y aca nyetsca soyënguiñe condbëtsemandaye, ntšamo tšabá yomncá jtsamëse.

⁹ Aca icontšena ntšamo tšabá yomncá nyetsca soyënguiñe jtsamama, y sempre chca jtsamama tša icoboše,

pero nña tondayama cmondogustana bacna soyënga jtsamana, chë ndayá Bëngbe Bëtsá ndoñe yondboše soye;

chíyeca Bëngbe Bëtsá tcmojabocacá,

y tojama aca puerte oyejuayá chacotsemnama,

chë inñëngbiama más oyejuayá ca —Bëngbe Bëtsá tojánayana.

¹⁰ Bëngbe Bëtsá mëntśánaca chabiama tojánayana:

Utabná, quem luare jobojátšama ora, aca quem luare tconjanma,

y lempe chë celoca yomna soyëngnaca.

¹¹ Lempe chë soyënga nyets tempo ndoñe queochátsmëna;

aca nyetsca tescama cochántsemna.

Lempe chë soyënga echanjopochóca, mo tojuatanguaná entsayacá.

¹² Aca chë luarënga cochanjátrocaye, mo tsmëcá cuafjabiamcá. Chca, chë luarëngaca cochanjama, mo entsáyá tcojtenëjonëtse y tcojenotrocacá. Pero aca nyets tempo cach aca cochandesomñe, y nyets tempo vida cochandesóbomñe ca —cha tojánayana.

¹³ Bëngbe Bëtsá ndocna te ndocna ángelbioye mëntsá tbojanianyana, ntšamo chabe Uaquiñábioye tbojaniancá:

Atšbe catšbioica cochtsetbemana, acbe uayayënga acbe cucuatšinë chamoquedama atšbe obenánaca chjamëntscuana ca.

¹⁴ Ndegombre, nyetsca angelënga espíritënga mondmëna Bëngbe Bëtsá jaserviama, ndëmuanyënga cha tojanichamó bënga jabújabuachama, chë atsebácanënga mochtsemnëngbe tšabiama.

2

Canye bëts soye endmëna atsebácanënga jtsemnana

¹ Chíyeca, bënga šontsamna sempre Bëngbe Bëtsabe soyënga jtsuenanana, chë bënga tmonjouena soyënga, chë tšabe benachentsana ndoñe chamondojuánama. ² Ndayá Bëngbe Bëtsá tempo angelëngaca entsanga tojanamëndacá, canye ndegombre soye endmëna, y entsanga entsamna chca jtsobedecénana; y chë bacna soye tmojanmënga y ntšamo Bëngbe Bëtsá tojanmandacá ndoñe tmonjanmënga castigo tojanatšatá, chca tmojanma causa; y chca, ³ bënga chca bacna soyënga tmojtsamëse, ¿ntšamo mochjobenaye jtsejuabnayana Bëngbe Bëtsá chama ndoñe šochanjacastígaye ca? Ndegombre cha chca echanjama, bënga chábeñe ndoñe tmontsošbuáchese, chë bëts soye jëftsashjáchama, atsebácanënga jtsemnana. Bëngbe Utabná chë natsaná yojtsemna nda entsanga tojanabuayená Bëngbe Bëtsá entsanga yochjánatsebacama; y ínÿenga bënga šonjanabuayená cachcá ntšamo chábioye tmojanoyeunacá. ⁴ Y Bëngbe Bëtsánaca tonjaninÿanyé, ndayá chënga tmojanabuayenacá ndegombre bétsemnana, chabe obenana jinÿanyiyama soyëngaca, entsanga chamenjnaná soyëngaca, bëts soyëngaca, y entsanga chë Uámana Espíritu ainaniñe chamotsebomnana cha jtsamëse. Chca jamëse, cada ona chaotsobena jamama ntšamo Bëngbe Bëtsá yobošcá.

Bëngbe Bëtsá tojanma Jesucristo entsangcá chaotsemnana

⁵ Bëngbe Bëtsá angelënga ndoñe tonjubuáyana chamotsemándama ndayá quem luar-entše yochtsemniñe, lempe mo tsmëcá chaotsemnana Bëngbe Bëtsá chaojama ora, chë ndayama mora bënga montsoyebuambná. ⁶ Chamna, ínÿoca Bëngbe Bëtsabe uabemana palabrënguiñe mëntsá endayana, ntšamo chábioye canÿa tbojaniancá tojánayana:

Entšanga ndoñe yapa uámanënga quemátsmëna, as ¿ndáyeca tša chëngbeñe cuanjésejuabnaye?

Chënga entsanga mondmëna. ¿Ndáyeca tša chënga cuanjésanÿena?

⁷ Aca tcojama entsá puerte uamaná chaotsemnana, y chë angelëngna nÿe batšatema chabiama más uámanënga mondmëna.

Aca tcojama cha puerte uamaná y respeto merecido bomná chaotsemnana,

⁸ y cha chaotsemándama nyetsca chë inÿe soyënguiñe, chë quem luarentše aca tcojamiñe —chiñe canÿa tojánayana.

Entšá lempe chaotsemándama Bëngbe Bëtsá tojanma ora, tondaye tonjánboshjona entsáftaca ndëmandana soye ca. Pero mëntscoñama ndoñe nÿa chca quemëntinÿe, chë entsá lempe ntšamo quem luarentše yomncá jtsemándayana. ⁹ Pero bënga mondétatšëmbo y corente mondonÿá Jesús aiñe chca tojanmama. Bëngbe Bëtsá tojanma cha nduamaná chaotsemnana, mo canÿe entsacá, baseftayté chë angelëngbiama más batšá uamaná. Bëngbe Bëtsá, entsangbe tšabiama jtsejuabnayëse, yojánboše Jesús chaóbanama, corente jasúfriase; Bëngbe Bëtsá yojánboše cha chca chaomama, nyets

luarentša entšangbe tšabiamana. Y Jesús ya chca tojánmayeca, Bëngbe Bëtsá ya tojinÿanyé cha puerte bëtsá y uamaná bëtsemnama.

¹⁰ Nÿetsca soyënga yobinÿna Bëngbe Bëtsabiamana y chábeyeca. Tšabá enjamna, Bëngbe Bëtsá jamana Jesucristo chaotsemnama lempe ntšamo entšanga tmojtsajabotcá, nda chëngbe bacna soyënguentshana cháuatsebacama. Bëngbe Bëtsá chca tojanma, Jesús, chë entšanga atsebácanënga jtsemnama unachayá, chaosufrima jamëse, chca, ba entšanga celoca, mo chabe basengcá, cháftaca bëtsëtsanga chamotsemnama. ¹¹ Er Bëngbe Bëtsá cach Taitá nÿetscangbiamana endmëna: Jesús, chë entšanga Bëngbe Bëtsábengana chamotsemnama iuamabiamana, y chë entšanga chca chamojtsemnëngbiámna. Chíyeca Jesús, Bëngbe Bëtsabe Uaquiñá, ndoñe ntsëuatjana chëngbioye catšátanga ca jtsachembuanama.

¹² Bëngbe Bëtsabe uabemana palabrenguiñe Bëngbe Bëtsábioye cha mëntšá tbojanianana:

Atšbe uabentsëngbeñe acbiamana chanjóyebuambaye,
y jacántase cbochanjëtschuaye, ácbioye adórayënguentsë ca.

¹³ Y mëntšánaca cha Bëngbe Bëtsabiamana tojánayana:

Atše atšbe Bëtsábeñe chantsošbuáchiye ca.

Y más chcoye mëntšá tojánayana:

Muentše Bëngbe Bëtsabe básengaftaca sëntsemna, chë atšbe cucuatšíñe tojábashesjuanënga, atše jtsanÿenama ca.

¹⁴ Quem Bëngbe Bëtsabe básengana nÿetsca entšangcá mondmënayeca, Jesúsna canÿe entšá chëngcá tojanóbema. Cha chca tojanma, jóbanëse, chë entšanga jóbanama chaot-samnama obenana bomná Satanás, jayëñjanama. ¹⁵ Y chca, cha tojama chë jóbanama y ndayá chentšana yochjopásama auatjënga ndoñe chamondëtsauatjama; chënga nÿets tempo corente ngmënacana imnoyena, jóbanama auatja causa. ¹⁶ Er ndegombre, cha ndoñe tonjánabo chë angelënga jabújabuachama, ndayá chë Abrahámbentshana entšángbioye. ¹⁷ Y chama cha ibojamna jtsemnana nÿetsca soyënguiñe cachcá mo chabe uabentsëngcá, chë entšanga, chca, jobenayama jtsemnama chëngbiamana mo bachnangbe canÿe más uámana amëndayacá, Bëngbe Bëtsá jtseimpadánama chëngbioye chëngbe bacna soyëngama cháuperdonama, puerte lastemado mëná y sempre ntšamo Bëngbe Bëtsá tbojauyancá amá. Chca, cha jóbanëse jamama entšanga chamobenama perdonánënga jtsemnama, y chca, jobenayama Bëngbe Bëtsáftaca tšabá tempcá jtsemnëngama. ¹⁸ Y mora cha entsobena, ndëmuanÿënga bacna soye jamama tojócochenguënga jujabuáchana; cha chca entsobena, er cachánaca tojansufri, cha bacna soye chaomama Satanás tša yojtsentsëna ora.

3

Cristo Moisesbiamana más uamaná endmëna

¹ Chíyeca, Jesucristbeyeca catšátanga, Bëngbe Bëtsábengana, ndëmuanÿënga Bëngbe Bëtsá tojáchembo chabe entšanga chamotsemnama, corente Jesucristbeñe šmochjésejuabnaye. Cha endmëna nda Bëngbe Bëtsá bëngbioye tbojanichmó, y nda bëngbiamana yomna mo chë más uámana bachnangbe amëndayacá, Bëngbe Bëtsábioye jtseimpadánama bacna soyëngama chašotsaperdonama. Cha chca endmëna chë bënga mondošbuaché soyënguiñe y chë mondbáyana ndegombre yomna ca soyënguiñe. ² Er Jesús nÿets tempo tojanma ndayá chaotsamama Bëngbe Bëtsá tbojanianancá, Bëngbe Bëtsá, nda tbojanábuayana chca chaoservema, cachcá ntšamo Moisés tojanma ntšamo Bëngbe Bëtsá tbojanmandacá, chabe entšángbioye cháuaservema. ³ Canÿe yebna jebuaná chë yebnana más uamaná jtsemnana; cachcá Jesús, nda inétsama entšanga Bëngbe Bëtsábengana chamotsemnama, más jtsomerecënanana Bëngbe Bëtsá cha puerte bëtsá y uamaná bëtsemnama cháuinÿanÿema, nÿe ntšamo Moisés, canÿa Bëngbe Bëtsabe entšanguentsá yojanomerecënanama. ⁴ Ndëmuanÿe yébnënacana canÿe jebuaná jtsebomnana, pero Bëngbe Bëtsá endmëna nda tojanma lempe ntšamo yobinÿncá. ⁵ Moisés yojsama ndayá

chaotsamama Bëngbe Bëtsá tbojanmandacá, tšabe oservernacá nyetsca Bëngbe Bëtsabe entsángbeñe, y yojamna canya corente tatsëmbuá ndayá más chcoye yochjanopásama, ndayá Bëngbe Bëtsá yochjánayanama. ⁶ Pero Cristo, ndayá Bëngbe Bëtsá tobošcá jamana, chë Bëngbe Bëtsabe entsángbeñe Uaquiñacá jtsemándayëse, ntšamo canye uaquiñá jtsemándayana ndayá nyetsca chabe pamíllanga tmojtsamiñe; cha, chë Uaquiñacá y chënga chë Bëngbe Bëtsabe pamillentsëngcá. Bënga chë pamillentsa entsanga jtsemnana, bënga chë ndayá tmošbuáchema bëts añémoca sempre tmojtsóyebuambnase, y sempre Bëngbe Bëtsá tšabe soyënga bëngbiana yochjamama tmojtsobátmanëse, y bënga chca jtsebomnama puerte oyejuayënga tmojtsemnëse.

Chë jóchnama uámana luare Bëngbe Bëtsabe entsangbiana

⁷ Chcasna, ntšamo chë Uámana Espíritu Bëngbe Bëtsabe uabemana palabrënguiñe tojanayancá:

Mënté tsëngaftanga ndayá Bëngbe Bëtsá tojtsichamcá šmojouenëse,

⁸ ndoñe šmattsama, Bëngbe Bëtsabe buayenana soyënga tsëngaftangbe ainaniñe ndoñe chaondómashënguama,

mo chë entsanga ndoyena luaroca Moisésotfaca imojëftsemnëngcá, Bëngbe Bëtsabe contra nyetsca soyënguiñe imojtsemna.

Chënga bëtscá bacna soyënga tmojanma, mo ndayá cuaftsamcá jinÿama ntsachetšá más muanjobenaye jamana y Bëngbe Bëtsá cabá uantado chëngaftaca tajojtsemnana.

⁹ Bëngbe Bëtsá tojánayana: “Chentše, tsëngaftangbe bëts taitanga bëtscá monjánama jinÿama ndayëntscoñe atše uantado chëngaftaca tsjamnama;

chca chënga tmonjanma, masque canta bnëtsana uatëntscuana chënga chentše tmonjáninÿe chë atše sënjánama bëts soyënga.

¹⁰ Chiyeca, atše chorsca entsángaftaca šonjánetna y sënjánayana:

‘Tsëngaftanga mora átseftaca ndoñe quešmátajna, mo chë otšenënga tmojtsemnëngcá, y ndoñe šmonjábosena jtsiyenana ntšamo atše tsbošcá jtsamëse.’

¹¹ Chiyeca, atše chëngaftaca etonaná sënjánayana, mo nda cuafjajuracá,

chënga ndocna te mochjëftsashjache chë átseftaca jóchnama uámana luaroye jashjanguama ca” —cha tojánayana.

¹² Jesucrístbeyeca catšátanga, yejuana šmochtsantješna ndocná tsëngaftanguentsá chaondëtsebomna canye ainana bëtscá bacna juabnëngaca, y chë causa chaotsemna Bëngbe Bëtsábeñe ndošbuachiyá, y Bëngbe Bëtsábentsana, chë sempre iuetsemnábentsana chaotsojuánañe. ¹³ Chamna, nyetscanga añemo šmochtsatenatsetnaye cada te, chë bënga imobena Bëngbe Bëtsá joyeunayama tempo imoyenëntscuana, chë Bëngbe Bëtsabe uabemana palabrënguiñe “mënté ca” uabaina tempo. Chca cmontsamna, ndocná tsëngaftanguentsá chaondëtsamama, Bëngbe Bëtsabe buayenana soyënga ainaniñe ndoñe más chaondómashënguama, bacna soyënga jamama juabnëngaca ingñená. ¹⁴ Er,

ndayá Jesús chabe amëndayoca yobomnentsana bënga chamóyëngacñamna, bënga šontsamna sempre ainaniñe corente jtsetatšëmbuana Jesusbe soyënga ndegombre soyënga bëtsemnana, ntšamo bënga chábeñe jtsošbuáchiyama tmonjanontšé ora monjanamcá.

¹⁵ Ntšamo Bëngbe Bëtsabe uabemana palabrënguiñe endayancá:

Mënté tsëngaftanga ntšamo Bëngbe Bëtsá tojtsichamcá šmojouenëse,

ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama,

mo chë entsanga ndoyena luaroca Moisésotfaca imojëftsemnëngcá, Bëngbe Bëtsabe contra nyetsca soyënguiñe imojtsemna ca.

¹⁶ ¿Y ndëmuanÿenga imojamna, chë Bëngbe Bëtsá tojanëyancá tmojanuenentsana, nyetsca soyënguiñe chabe contra imojtsanmëna? Co chë Moisésbeyeca Egiptocana

tmojánbocanënga. ¹⁷ ¿Y ndëmuanyëngaftaca Bëngbe Bëtsá etonaná canta bnëtsana uatëntscuana yojtsemna? Co chë bacna soyënga tmojanmëngaftaca, ndëmuanyënga entšanga ndoyena luaroca tmojanóbana y chëngbe cuerpo chentše tojanoquedá. ¹⁸ ¿Y ndëmuanyënga tojanëyana, mo nda cuafjajuracá, chënga ndocna te mochjëftsashjache chë cháftaca jóchnama uámana luaroye jashjanguama ca? Co chë ndëmuanyënga ntšamo cha tojanmandacá ndoñe tmonjanmënga. ¹⁹ Y ndegombre, bënga montsobena jinýama chënga ndoñe tmonjëftsashjache chë cháftaca jóchnama uámana luaroye jashjanguama, Bëngbe Bëtsábeñe ndoñe imontsošbuaché causa.

4

¹ Chíyeca, bënga chë Bëngbe Bëtsáftaca jóchnama uámana luare jashjáchama cabá imobenëntscuana, ntšamo cha šojanašebuachenacá cachcá mëntscoñama iuétsemna, puerte cuedado mochtsebomna, nderado ndánaca tšëngaftanguentšá ndoñe nanjobenaye chca jashjáchama. ² Er bëngnaca chë tšabe noticiënga tmonjouena, cachcá chë Bëngbe Bëtsabe buayenana soyënga chëngbe ainaniñe ndoñe chaondómashënguama tmojanmëngcá; pero chënga chë buayenana soyënga tmojanuena ora, ndocna tšabe soye chëngbeñe tonjanopasá, er chca tmojanuena ora, chë palabrënguiñe ndoñe montsanošbuaché. ³ Pero bënga, chë Jesucristbeñe tmojošbuachengna, mochanjobenaye chë jóchnama uámana luaroye jashjanguama, chë ndayama Bëngbe Bëtsá tojánayana, chë tempo chábioye chca tmojtsanábotengbiama cha mëntšá tojánayana ora:

Chíyeca, atše chëngaftaca etonaná, sënjánayana mo nda cuafjajuracá, ndegombre chënga ndoñe mochjëftsashjache chë jóchnama uámana luaroye jashjanguama ca.

Pero cha chabe trabajo tojanpochocá, quem luare tojanma ora; ⁴ er Bëngbe Bëtsabe uabemana palabrënguiñe cánýentše mëntšá endayana, chë canýsëfta tianoye ndayá cha tojanmama:

Bëngbe Bëtsá nyetsca trabajëngama tonjanochná chë canýsëfta tianoye ca.

⁵ Y cachentše Bëngbe Bëtsabe uabemana palabrënguiñe endayana, chë tempo chábioye chca tmojtsanábotengbiama:

Chënga ndocna te quemocháisashjache chë átšeftaca jóchnama uámana luaroye jashjanguama ca.

⁶ Chë entšanga monjamna chë natsanënga chë tšabe noticiënga jouenama, pero chë Bëngbe Bëtsáftaca jóchnama uámana luare ndoñe tmonjëftsashjache, ntšamo cha inabošcá chënga ndoñe tmonjanma causa. Chcasna, cabá ndegombre endëtsomñe báseftanga, chë Bëngbe Bëtsá tojánayana soyënguiñe tmojtsošbuáchenga, mochjëftsashjache chë Bëngbe Bëtsáftaca jóchnama uámana luaroye jashjanguama. ⁷ Chë entšanga ndoyena luaroca, Bëngbe Bëtsá entšanga tojánachembo chë cháftaca jóchnama uámana luaroye chámuamashjnama, y chentšana ba uatëse cha cachiñe canýe tempo tojuinýnaná, chora entšanga chamobenama chë cháftaca jóchnama uámana luaroye jashjajnama, chë cha “mënté ca” tojanabaye tempo. Cha chca tojanma Davidbiajana jóyebuambayëse, David Bëngbe Bëtsabe uabemana palabrënguiñe mëntšá tojánayana ora:

Mënté tšëngaftanga, ndayá Bëngbe Bëtsá tojtsichamcá šmojouenëse, ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama ca.

⁸ Josué, Israeloca entšanga Canaán fshantsëngoye yojtsënachaye ora, chë Bëngbe Bëtsáftaca jóchnama uámana luare jtsebomnama cha choca matënjanmëse, Bëngbe Bëtsá bayté chentšana, David yojëftsiyena ora, inýe tempuama ndoñe matënjanoyebuambá, chë ndaye ora entšanga muanjobenaye chë cháftaca jóchnama uámana luare jashjáchama. ⁹ Y chca, cabá endmëna canýe uámana luare ndayentše Bëngbe Bëtsabe entšanga mochjobenaye cháftaca jóchnama, ntšamo Bëngbe Bëtsá tojanochnacá, chë quem luare jamama nyetsca

trabajënga tojanpochocá ora; ¹⁰ er nda tojashjache chë Bëngbe Bëtsáftaca jóchnama uámana luaroye jashjanguama, cha jóchnana chë Bëngbe Bëtsá tbojanmandá jamama trabajëngama, ntšamo Bëngbe Bëtsá tojanochnacá, chë quem luare jamama nyetsca trabajënga tojanpochocá ora. ¹¹ Chíyeca, šontsamna lempe ntšamo tmojobenacá jamana chë jóchnama uámana luare jëftsashjáchama, ntšamo chë Bëngbe Bëtsábioye ndoñe tmonjanoyeunangcá ndocná chaondëtsamama, y chë causa chënga chë soye ndoñe tmonjëftsashjache.

¹² Er Bëngbe Bëtsabe palabra endmëna mo canye aina soycá, nyets tempo entšangbioye ndayánaca jtsabuátambayana, y bëtscá jamana corente obenánaca, y ndocna te nye bonamente chë palabra jóyebuambayana. Mo chë nyets utoicajana más efšana espadëjaquécá, jobenayana puerte jashenoye jatëtsana canye cuerpo tcojatëtse ora, cachcá y cabá puerte más Bëngbe Bëtsabe palábraca, cha bënga jinyanÿiyana ntšamo bënga nye bëngbe ainaniñe tmojtsejuabná y tmojtsebošcá, y chë ndocnábioye tmonjinÿinÿé sóynaca; y chë palábraca cha endobena jáuyanana ntšamo bënga tmojajuabó y tmojabošencá aiñe o ndoñe tšabá bëtsemnana. ¹³ Ntšamo Bëngbe Bëtsá tojamentšana tondaye quenátopodena chabiamana iytëmenana jtsemnana. Bëngbe Bëtsá lempe bominye iuetsequëcñá, y nyetsca soyëngama y nyetscangbiamana lempe yotátšëmbo; Bëngbe Bëtsá, ndábioye šojtsamna sempre jojuana ndáyeca canye soye chca tmojamama.

Jesús endmëna chë más uámana bachnangbe bëtš amëndayá

¹⁴ Jesús, Bëngbe Bëtsabe Uaquiñá celoye tojámashëngo, y mora cha endmëna nda chabe delante sempre bëngbiamana ibuëtseimpadana, mo chë bachnangbe canye más uámana amëndayacá. Chíyeca, bënga šontsamna sempre chábeñe jtsošbuáchiyana, ntšamo bëngbe ndegombre ošbuáchiyana yomncá, chë ndayama bënga nyetsca entšangbeñe tmojayana. ¹⁵ Er chë bëngbiamana impadaná, mo bachnangbe canye más uámana bëngbe amëndayacá, Jesús, yobena bëngbiamana jóngmiana, bënga inÿe ora ndoñe yapa obenana tmontsebojna ora, tšabe soye o ndaye sóynaca jamama. Chca endmëna, er Satanás tša yojtšentšena Jesúsbioye ba juabnënga chabotsontšáshjajuanama, jayënjanama bacna soye chaomama, nyetsca juabnënga ntšamo bëngnaca mondbetsebojncá, pero Jesús ndocna te ndocna bacna soye tonjëftsema. ¹⁶ As, ndauatjca Bëngbe Bëtsá mochjótšëmbona, mo chábioye cuaftsobecocnangcá; cha canye uámana tbemaniñe yojtsetbemana canye bëtš reycá; chca mochjama, bënga chášualastemama, y bëngbiamana tšabe juabna jtsebojnëse, chašújabuachama bënga chca chašojtsëjaboto ora.

5

¹ Ndëmanÿe bachnangbe más uámana amëndayánaca jtsemnana entšanguentšana bocacaná, y uabuayaná chëngbe cuenta Bëngbe Bëtsá jaserviama, chábioye juatšëmbonama y bayënga jobáyama Bëngbe Bëtsá jëtschuayama, chca, Bëngbe Bëtsá chë bacna soyënga entšanga tmojamama cháuaperdonama. ² Chë bachna jtšobenana jóngmiana, chë bacna soyënga amëngbiamana chama ntsetatšëmbcá, y chë bacna soyënga jamama ingñënënga imomnënga, mo otšenëngcá imomnëngbiamana, er cachánaca inÿe ora ndoñe yapa obenana ntsebojnana, chë bacna soyënga jamama juabnëngama jtocochbuáchama. ³ Y chíyeca cha jtsemnana bayënga jobáyama Bëngbe Bëtsá juatšëmbonama, ndoñe nye entšangbioye bacna soyëngama cháuaperdonama, ndayá chábioye chaboperdonámnaca. ⁴ Ndocná quenátobena cachá quem uámana trabajo jentšetayana, bachnangbe más uámana amëndayá jtsemnana; cha jtsemnana, Bëngbe Bëtsábeyeca uabuayaná chca uámana trabajo jamama, ntšamo ndegombre Aarónoftaca tempo cha tojanmcá. ⁵ Cachcá, Cristo ndoñe cachá tonjanenábuayana jtsemnana chë Bëngbe Bëtsabe delante sempre bëngbiamana impadaná, mo bachnangbe canye más uámana amëndayacá, ndayá Bëngbe Bëtsá tbojanábuayana chë uámana trabajo jtsebojnana. Cha endmëna nda Jesúsbioye mëntšá tbojanianana: Aca atšbe Uaquiñá condmëna.

Mënté entsanga sënjinÿanÿé aca atšbe Uaquiñá comnama ca.

⁶ Y ínÿocnaca, Bëngbe Bëtsabe uabemana palabrënguiñe mëntsá tbojanianyana:

Aca nÿetsca tescama canÿe bachna condmëna,

canÿe bëts bachna ntšamo Melquisedec yojamncá ca.

⁷ Jesús quem luarentše yojëftsienëntscuana, cha juayebuáchëse y shëchbuíyeca Bëngbe Bëtsáftaca ibnécuentaye y ibnaimpadana, cha chë jobanámentsana jatsbocama yojanobená; y Jesús ntšamo Bëngbe Bëtsá yojanbošcá tojánmayeca y tša respeto chabiamna bómnyeca, chábioye tbojanoyeuná. ⁸ Chca, Cristo masque Bëngbe Bëtsabe Uaquiñá inamna, jasúfriase tojanábouinÿe ntšamo jamana ndayá Bëngbe Bëtsá tojtsebošcá. ⁹ Chca, Bëngbe Bëtsá chábioye tbojánbema lempe ntšamo entsanga tmojtsajabotcá, nda chëngbe bacna soyëngama cháuatsebacama; chentšana cha, Cristo, tojanma lempe ntšamo yojaniytcá, nÿetscanga chë entsanga chábioye imojánëyeunanënga chamotsobenama nÿetsca tescama atsebácanënga jtsemnama; ¹⁰ y Bëngbe Bëtsá tbojanábuayana, chë chabe delante sempre bëngbiama impadaná, mo bachnangbe canÿe más uámana amëndayacá chaotsemnama, canÿe bëts bachna ntšamo Melquisedec yojamncá.

Resjo endmëna, ošbuáchiyana jtsajbanana

¹¹ Bëtscá entsemna quem palabrama jóyebuambayama, pero chë soyënga jayanama ntšamo tšëngaftanga catafjosertaycá, ndoñe paselo quenátsmëna, er tšëngaftangna nÿa uenana Bëngbe Bëtsabe soyëngama jósertana. ¹² Tšëngaftanga ya bayté Jesucristbe soyëngama šmotátšëmboyeca, tšëngaftanga cmontsamna ya jtsobenana ínÿengbiyoye chë soyënga jtsabuátambayana; pero tšëngaftanga cmontsëjaboto ndánaca Bëngbe Bëtsabe soyëngama cachiñe chacmëtëtabuayená, chë jtsošbuáchiyama šmojontsé ora natsana jshauatsjínÿana soyëngama. Y chca, tšëngaftanga šmojobiama mo šešonatemëngcá, jtsëjabótana létšiyey jofšiyana y ndoñe jobenayana jasana chë jabmuánama ndoñe paselo tontsemna soyënga. ¹³ Chë nÿetsca soyënguiñe ntšamo tšabá yomncá jtsamama buatëmbana soyënga ndoñe tontsabuatmá cha, jtsemnana mo canÿe šešonatemcá, nda vida jtsebomnana nÿe létšiyey jtseftmanëse. ¹⁴ Pero chë tmojtsobena jajuaboyana y jtsetatšëmbuana ndayá tšabá yomna o ndayá ndoñe tšabá jamama, chca jtsamëse tmoyenamna, chënga jtsemnana mo bëtsëtsangcá, ndëmuanÿenga ndayánaca jasana, chë ndoñe paselo jabmuánama soyëngnaca.

6

¹ Chcasna, bënga šontsamna jtsajbanana nÿe jésebošana jtsatsjëndayana Cristbe buatëmbana soyënga, chë bënga chábeñe jtsošbuáchiyama tmojanontsé ora tmojanatsjinÿe soyënga, y šontsamna jtsatsjëndayana chabiamna nÿetsca soyënga, más totcá josértama yomna soyënga. Chca, bënga mochántsemna mo chë bëtsëtsangcá, ndayánaca jtseyayana. Ndoñe más nÿe chë natsana buatëmbana soyëngama mattsatsjëndaye, mo chë ndayá yomna bacna soyënga jtsamana y chë bënga ndoñe vida ntsebomnana junatsana soyënga amana jtsajbanana, y chë tšabe benache jtishachana; o ntšamo Bëngbe Bëtsábeñe jtsošbuáchiyana; ² chë juabáyana ndayá yomna; chë ínÿabe bestšašifne cucuatšënga jacjayana Bëngbe Bëtsábioye chabiamna jaimpádama; chë obanënga jtayenama Bëngbe Bëtsá yochjamama; y mocna ora ntšamo entsanga tmojamama Bëngbe Bëtsá yochjayanama, chënga chë nÿetsca tescama yomna tšabe vida chamotsebomnana o nÿetsca tescama castigánënga chamotsemnama. ³ Y bënga chca fchanjama, chë más totcá yomna josértama soyënga jtsabuátambayana, Bëngbe Bëtsá chca chašojálesenciase.

⁴ Ndëmuanÿenga, canÿe ya chë Bëngbe Bëtsabe ndegombre soyënga tmojanóyëngacñe, y chë Bëngbe Bëtsabe ba tšabe soyëngnaca, chábenga bëtsemnama, y chë Uámana Espiritu chëngbe ainaniñe chaotsemándama imobomna, ⁵ y chë Bëngbe Bëtsá ntšamo tojašebuachenacá sempre inétsamama tmojinÿe, y ndëmuanÿenga tmojáninÿe Cristo jtsamana bëts soyënga chabe bëts obenánaca, chë ndaye obenánaca cha puerte

bëts soyënga yochjama cha quem luaroye yochjésabo ora, ⁶ chënga Jesucristbeñe ošbuáchiyana lempe tmojtsajbanase, tondaye quenátsmëna ndayá jamama cachiñe Bëngbe Bëtsábioye jtobéconama; er Bëngbe Bëtsabe Uaquiñá chca stëtsoye jaquédana, y jtsemnana mo Bëngbe Bëtsabe Uaquiñábioye cachiñe chënga tmojtsecrucificacá, y entšanga cachiñe cha chamotsáboyejuanama chënga cuafjamcá. ⁷ Smochjinýe: fshantse jamana chë ba uafténënga chiñe chaómashënguama, y chë chiñe trabájayëngbiama bëtscá jaja sananga tojóboconëse, Bëngbe Bëtsá jamana, chë fshantsentsana bëtscá tsabe soyënga entšangbiama chaotsebínýnama. ⁸ Pero nýe uchmašëshangá y matënga uchmëfjangaca chiñe tojuábocnëse, chë fshantse tondaye ntsámanana; y nderado Bëngbe Bëtsá nanjama chiñe ndocna tsabe mata chaonduábocnana, y cabana, entšanga chiñe mochantsashaniñá. Cachcá, chë ošbuáchiyana tmojtsajbananga castigánënga mochántsemna.

Bëngbe Bëtsábeñe sempre chamotsobátmanama y ainaniñe bëtscá añemo chamotsebomnama

⁹ Pero masque chca montsoyebuambná, atšbe bonshánënga, bënga tsabá fsëndétatšëmbo tsëngaftangbeñe chë más tsabe soyënga echántsemna, chë atsbocaná jtsemnana tojtsá cha yobomna soyënga. ¹⁰ Er Bëngbe Bëtsá sempre ntšamo tsabá yomncá nýetsca soyënguñe jtamana, cha ndegombre echántsejuabnaye ndayá tsëngaftanga šmojamama, y chë chabiamama šmojinýinýe bonshánama, chabe entšangbioye jtsëjabuáchanëse, ntšamo mórnaca šmojtsama. ¹¹ Pero bënga fsëntseboše, cada ona tsëngaftanguentšá, nýets tempo y Jesús chaojésabëntscuana chaotsinýanýná corente yoboše chca jtamama, Bëngbe Bëtsábeñe chca jtsošbuáchiyëse, chábeñe sempre chašmotsobátmanama, tsëngaftangbe tsabiamama cha chaomama. ¹² Ndoñe queftsátsoše tsëngaftanga oyënjayënga chašmotsobiamama chë Bëngbe Bëtsá tcmojabanýe trabajo jtamama, ndayá Jesucristbeñe ošbuáchiyana bomnëngcá y padecena soyënguñe uantado mënëngcá šmochtsama. Chca, chënga mochanjóyëngacñe ndayá Bëngbe Bëtsá jatšatayama tojašebuachenacá, chabe entšanga bëtsemnana.

¹³ Bëngbe Bëtsá Abrahámbioye tbojanšbuachená ora, chca tbojaníyana cachabe uabaina jayanëse, er inýa chabiamama más uamaná ndoñe yontsemna ndabiamama jajúrama, ntšamo tbojanšbuachenacá ndegombre chaotsemnana; ¹⁴ cha mëntšá tbojanšbuachená: “Aíñe, atše chanjama aca bëtscá tsabe bendicionënga chacotsebomnama, y chanjama acbentša pamillentsana mallajta entšanga chamotsemnana ca.” ¹⁵ Y chca, Abraham Bëngbe Bëtsábeñe jtsošbuáchiyëse, puerte uantadiñe yojanobátmana ntšamo tbojanšbuachenacá Bëngbe Bëtsá yochjanmama, y pronto chca tojanóyëngacñe.

¹⁶ Entšanga tmojajurá ora, chca jamana chëngbiama canýe puerte más uámanabe uabaina jayanëse, y chca chëngbiama más uamanabiamama tmojajurá ora, jtsayanana ntšamo tmojašbuachenacá pronto mochjamama, y chcasna, chama ya ndoñe más ntjatenátsëtsnayana. ¹⁷ Y chca, Bëngbe Bëtsá tojánbošena botamana jinýanýiyana, ntšamo cha tojanašebuachenacá mochjanoyëngacñëngbioye, ntšamo tojanašebuachenacá cha ndegombre yochjanmama, y ndocna te chë ntšamo jamama yojanjuabnacá yochjantrócama. Chíyeca, botamana tojaninýanýe cha chca yochjanmana, cachabiamama jajúrase, chë ntšamo tojanašebuachenacá yochjanmama ndegombre bëtsemnana. ¹⁸ Bëngbe Bëtsabe šbuachenana soye y chama jinýanýiyama ntšamo tojanayancá, ntšamo tojanašebuachenacá ndegombre yochjamnama, chë uta soye ndocná ntsoebenana jatrócama; y chca tojayana ora, ndoñe ntso podénana Bëngbe Bëtsá chaobená jobostérama. Y chca, chë uta soyama, bënga bëtscá añemo ainaniñe jóyëngacñana, bënga chë Bëngbe Bëtsábioye tmojobéconanga, cha chásuatsebacama y chašotsanýenama, mo canýe bëts resjuentsana tmojtsachetëngcá, ntšamo chentsana atsebácanënga jtsemnana cuafstenguacá. Bëngbe Bëtsá šojáuyana bënga imojtsobena chábeñe jtsošbuáchiyëse, cha yejuana šochtsanýenama mondobátmana. ¹⁹ Mo

ntšamo chë bėjaye asentoca cuedádoca tcojajajo anclama, chë barcuife enjaquenënga tšabá jtsetatsëmbuana chë barco ndoñe yochántsashatiyiynama, cachcá bëngnaca, Bëngbe Bëtsábeñe imobátmanama, montsobena ainanoca jtsetatsëmbuana lempe tšabá yot-somñama. Bënga Jesucristbeñe mondobátmana, y Bëngbe Bëtsá yojtsemnoye celoca cha tojámashëngo y chabe delante entsemna mo chë bachnangbe más uámana amëndayacá. Chana jamashënguana chë Bëngbe Bëtsabe bëts yebnoca, “chë más uámana ca” uabaina lu- aroye, entsëjua ujonýana stëtsoica, Bëngbe Bëtsabe delante jtsemnana, ²⁰ ndayentše Jesús celoca, Bëngbe Bëtsabe delante tojámashëngo bëngbe tšabiana soyënga jamama, bëngnaca chamobenama chabe delante jamashënguama; chca, Jesús tojanóbema chë bachnangbe más uámana amëndayá nyetsca tescama, canýe bëts bachna ntšamo Melquisedec yojam- ncá.

7

Jesús, canýe bëts bachna ntšamo Melquisedec yojamncá

¹ Quem Melquisedec yojamna Salem puebloca rey y bachna chë celoca Bëngbe Bëtsabiana; Bëngbe Bëtsá, chë nyetscangbiana más uamaná. Abraham chë reyënga y chëngbe soldadëngaftaca imojentsjaná y tojanayëñjaná chentšana yojtsatabó ora, Melquisedec tojánbocna cha jajëbenguama, y chora Bëngbe Bëtsábioye tbojanimpadá, Abraham bëtscá tšabe bendicionënga chaotsebomnana chaomama. ² Chora Abraham chábioye tbojanatšeta, chë reyëngaftaca imojentsjaná ora, lempe tojanosháchiñentšana, bnëtsanentšana canýe soye. Chë palabra Melquisedec endayana “nyetsca soyënguife tšabá ama rey ca”; y chánaca yojamna Salem puebloca rey, y chca endayana “nyetscanga natjëmbana chamotsiyenama ama rey ca”. ³ Chabe pamíllangbiana tondaye quenatátšëmbo; chca cha endmëna mo ni taitá ni mamá ndoñe endbomnacá, ni bëts taitanga. Tondaye quenatátšëmbo ntseco tojanonýnama, ni ntseco tojanóbanama; chca, inýe soyënguife cha yojamna mo Bëngbe Bëtsabe Uaquiñacá, y endmëna mo nyetsca tescama bachna cuaftsemncá.

⁴ Y mora, šmochjájuaboye tša uamaná Melquisedec inamnana, er bëngbe tempsca uámana bëts taitá Abraham chábioye tbojanatšeta, chë reyëngaftaca imojentsjaná ora lempe tojanosháchiñentšana bnëtsanentšana canýe soye. ⁵ Ntšamo Moisesbe leyife endëmandacá, chë bachnangbe más uámana amëndayá Leví, Aarónëna ca uabainabe pamillentšana tmomna bachnanga, jtsamnana chë Israeloca entsángbioye nyetsca chë tmobomna soyënguentsana bnëtsanentšana canýe soye jtsayëngacayana; y chca jtsam- nana masque chë entsanga cachëngbe pamillentšënga tmomna y Abrahábentšana pamillentšëngnaca. ⁶ Pero Melquisedec, masque Aaronbe pamillentšá ndoñe yon- jamna, Abraham, chë ntšamo Bëngbe Bëtsá tbojanšbuachenacá tojanóyëngacñabentšana, cha tojanóyëngacñe nyetsca soyënguentsana bnëtsanentšana canýe soye, y Bëngbe Bëtsábioye tbojanimpadá, Abraham bëtscá tšabe bendicionënga chaotsebomnana chao- mama. ⁷ Y ndocná quenátobena jayanama ndoñe ndegombre yondmëna ca, chë Bëngbe Bëtsábioye impadaná inýabiana tšabe soyënga chaomama, más uamaná inëtsemna chë chca tojóyëngacñabiana, inýa chabiana Bëngbe Bëtsábioye tbojaimpadá ora. ⁸ Quem tempo, bachnanga mochjóbanënga, entsángbioye jtsayëngacayana nyetsca chë tmobomna soyënguentsana bnëtsanentšana canýe soye, pero chë Bëngbe Bëtsabe uabemana pal- abra, Melquisedebiana endoyebuambná cha mo canýa cabá ainá totsomñcá. ⁹ Y bënga montsobena jayanama, Abraham Melquisedécbioye chë nyetsca soyënguentsana bnëtsanentšana canýe soye tbojanoyé ora, yojamna mo Leví, chë nyetscángbioye nyetsca soyënguentsana bnëtsanentšana canýe soye ayëngacayá, Melquisedécbioye chca cuaftopagacá; ¹⁰ er cha Abrahambe pamillentšá inamna. Melquisedec yojtsabó ora y chábioye chë lempe tojanosháchiñentšana bnëtsanentšana canýe soye Abraham tbo- janatšeta ora, yojamna mo nyetscanga, chë Abrahábentšana entsanga más chcoye

mochtsaniyenënga, chëngnaca chë bnëtsanentšana canÿe soye cuafjajajocá, masque Abraham chca tojanma ora, Leví y chë Abrahábentšana inÿe entšanga cabá ndoñe tmonjanonÿná.

¹¹ Israeloca entšanga Moisesbe ley tmojanáyëngaca, chë bëts taitá Levibe pamillentsënga bachnanga imojamnënga Bëngbe Bëtsá imojtseservena ora, y chënga monjamna Aarónbentšana entšanga. Ntšamo chë leyiñe yomandancá imojánamënga perdonánënga jtsemnama y Bëngbe Bëtsabe bominiñe tšábenga jtsemnama quem bachnanga jamama matmënjanobenase, ndoñe manjanëyta Bëngbe Bëtsá inÿe bachna chabuatsembuama, nda ndoñe yonjamna mo chë bëts bachna Aaroncá, ndayá ntšamo chë bëts bachna Melquisedec yojamncá. ¹² Er, canÿe bachnanga Bëngbe Bëtsábioye jtseservénama tmojjabaná y inÿe bachnanga chábioye jaserviama tmojatontsé ora, jtseytana chë natsana bachnanga imojanoservena ora mándaye leyëngnaca jtsetrócama. ¹³ Bëngbe Utabná, ndabiama quem soyënga jtsóyebuambnayana, ndoñe Aaronbe pamillentsá quenjatsmëna, ndayá inÿe pamillentsá, y quem pamillentsa entšanga ndocna te bachnangcá Bëngbe Bëtsá tmonjanservé, chë altar ndirichiñe Bëngbe Bëtsabe bëts yebnoca. ¹⁴ Er nyetscanga mondëtatšëmbo Bëngbe Utabná Judabe pamillentsana bëtsemnama, y chë pamíllama Moisés ndocá tonjánayana, Bëngbe Bëtsá mo bachnangcá chënga jt-seservénama.

¹⁵ Y ntšamo tmojayancá montsobena más tšabá josértana, er chë tsëm bachna Cristo yojamna canÿa mo Melquisedec yojamncá. ¹⁶ Cha bachna yojamna, ndoñe chë bachnanga chabe pamillentsana jabocanama yojánamnama canÿe ley tojánayanayeca, ndayá nyetsca tescama jëftsiyenama cha inobénayeca. ¹⁷ Er mëntsá endmëna, ndayá Bëngbe Bëtsá chabiama tojánayana:

Aca bachna nyetsca tescama condmëna,
canÿe bëts bachna ntšamo Melquisedec yojamncá ca.

¹⁸ Cha tojánabo ora, Bëngbe Bëtsá tojanma chë nda bachna jtsemnama y ntšamo joserviama mandënga chaotsopochocama, er chë mandënga ndoñe ntjobenayana entšanga jujabuáchama atsebácanënga jtsemnama, y chca, chëngbiamana ndoñe bëts cá yonjanoservena. ¹⁹ Er Moisesbe léyeca, entšanga ndoñe tmonjanobená Bëngbe Bëtsabe bominiñe tšábenga jtsemnama, pero mora chama canÿe corente más uámana soye montsebomna: Jesucristbeñe jtsošbuáchiyëse, chábeñe montsobátmana Bëngbe Bëtsáftaca tšábenga chásuabiamama, y chca, Bëngbe Bëtsábioye bënga jtobéconama.

²⁰ Y Bëngbe Bëtsá lempe chca tojanma, cachabiamana jajúrase, lempe ntšamo cha tojanayancá ndegombre chaotsemnama. Chë inÿe bachnanga, chë Aaronbe pamillentsëngbioye tmojanëbuáyana ora, Bëngbe Bëtsá ndoñe chca tonjánayana, ²¹ pero mo bachnëcá chaoservema Bëngbe Utabnábioye tbojanábuayana ora aíñe; cach Bëngbe Bëtsabiamana jajúrase, Bëngbe Utabná canÿe bachna yochtsemna ca tojánayana. Ntšamo Bëngbe Bëtsabe uabemana palabrënguñe endayancá:

Bëngbe Utabná Bëngbe Bëtsá, Jesucristbioye tbojaniyana, cachabiamana jajúrase, ntšamo tojanayancá ndegombre chaotsemnama,
y juabna ndoñe ntjatrócamana:

“Aca bachna nyetsca tescama condmëna ca.”

²² Bëngbe Bëtsá chca tojánayanama, Jesúsbeyeca bënga corente mondëtatšëmbo, ndayá Bëngbe Bëtsá bëngbiamana jamama tojanašebuachenacá, chë Jesúsbioye bëngbe bachna chaotsemnama juabuáyanana, más tšabá yojtsemna chë ndayá tempo cha chabe entšangbiamana tojanašebuachená soyama. ²³ Chë inÿe bachnanga banga imojamna, er ndocná yonjanobena Bëngbe Bëtsábioye nyetsca tescama chca jtseservénana; cada ona básefta uatëngama tojëftsanoservé, tojanóbana y ínÿabioye chë trabajo jatontšabuáchana. ²⁴ Pero Jesús ndocna te ntjobanámayecna, cha mo bachnëcá Bëngbe Bëtsábioye nyetsca tescama bochjëftseservena, y ndocna te chabe trabajo ínÿabioye bochanjëftsinÿinÿiye,

chë inÿa cachcá jtsamama chauatontšema. ²⁵ Chíyeca, cha yobena nÿetsca tescama játsebacana ndëmuanÿenga chábeyeca Bëngbe Bëtsábioye tmojobeconá, er nÿetsca tescama cha echanjëftsiyena Bëngbe Bëtsábioye chëngbiana jtseimpadánama.

²⁶ Chcasna, Jesús ndegombre endmëna lempe ntšamo bënga imuajabotcá nda Bëngbe Bëtsábioye bëngbiana chabotseimpadánama, mo chë bëngbe bachnangbe más uámana amëndayacá. Cha sempre uamaná endmëna, ndocna te ni mo canÿe juabna ínÿabe contra yonjábomna, ainaniñe ndocna bacna juabna yonjábomna, chë bacna soyënga amënguentsana luaroca mëná, y Bëngbe Bëtsá tojanma celoca más bëtsá y obená nÿetscangbiana cha chaotsemnama. ²⁷ Cha ndoñe bonjanájaboto canÿe te y inÿe te bayënga jtsebánayana, Bëngbe Bëtsá chabe bacna soyëngama chaboperdonama y chë bacna soyënga entšanga tmojanmámnaca, mo chë inÿe bachnangbe más uámana amëndayënga mondbetsamcá, cachëngbiana y chë judiëngbiámnaca. Cha tojanma lempe ntšamo yojaniytcá canÿe soye y nÿetsca tescama, entšanga bacna soyënga tmojanmama perdonánënga chamotsemnama. Cha chca tojanma, chabe derecho vida jtsobomñama cachcá tojanonÿná ora; y tojanóbana entšanga chamotsobenama perdonánënga jtsemnama. ²⁸ Ntšamo Moisesbe leyiñe yojanmandacá, chëngbiana mo chë bachnangbe más uámana amëndayëngcá tmojanëbuáyana entšanga inÿe ora bacna soye amënga; pero Bëngbe Bëtsá cabá chë ley entšangbe cucuatšíñe tojanáboshjonentsana baytese, cha chabe Uaquiñábioye chë bachnangbe más uámana amëndayacá tbojanábuayana, cachabiama jajúrase, ntšamo tojanayancá ndegombre chaotsemnama. Bëngbe Bëtsá tojanma chë Uaquiñá chaotsemnama lempe ntšamo entšanga tmojtsajabotcá, nda cháuatsebacama, ndocna te bacna soye ndamá, ni ainaniñe bacna juabnënga ndbomná.

8

Cristo, nda jóbanëse tojanma entšanga Bëngbe Bëtsáftaca mo canÿacá chamotsemnama

¹ Chë más uámana soye ndayama bënga montsichamo, chë Cristo mo bachnëcá yomnama montsoyebuambná ora, entsemna: Bënga chábeñe imojtsebomna canÿa nÿetsca tescama Bëngbe Bëtsabe delante bëngbiana impadaná, mo chë bëngbe bachnangbe más uámana amëndayacá, Bëngbe Bëtsabe catsbioica yojtsetbemana jtsemándayama, y Bëngbe Bëtsá chë más uámana tbemanentše. ² Chë inÿe bachnanga Bëngbe Bëtsabe bëts yebnentše tmojánamashjna chë “más uámana ca” uabaina luaroye, Bëngbe Bëtsabe delante jtsemnama; pero chë luare celoca ndayentše nÿets tempo Cristo mo chë bachnangbe más uámana amëndayacá yoserverna, entšanga ndoñe chca tmonjanpormá, ndayá Bëngbe Bëtsá.

³ Nÿetscanga chë bachnangbe más uámana amëndayënga tmojanëbuáyana, entšangbiana soyënga y tmojóba bayënga Bëngbe Bëtsábioye juatšëmbonama, chëngbe bacna soyëngama perdonánënga chamotsemnama; chíyeca, jtseytana Jesucristo ndayánaca chaotsebomnama, Bëngbe Bëtsábioye juatšëmbonama. ⁴ Cha quem luarentše tojtsetrabájase, cha ni mo bachna ndoñe nántsemna, er muentše ba bachnanga mondmëna, y chënga ba soyënga jamana Bëngbe Bëtsábioye jëtschuayama, ntšamo jamama Moisesbe leyiñe yomandancá. Y chca, ndoñe nantseyta cha chca chauatoservénama. ⁵ Chë inÿe bachnanga imobomna luarënga Bëngbe Bëtsá jadórama, y ndaye soyëngaca chënga Bëngbe Bëtsá imoserverna, ndoñe cachcá yontsemna chë ndayentše Jesucristo celoca yoserverna luarcá, ni ntšamo cha yoservencá; nÿe batšatema bëngbioye šuinÿanÿná ntšamo chë celoca luare yomnama, ndayentše Cristo mo bachnëcá yoserverna. Y bënga mondëtatšëmbo quem luarentše chë soyënga chca yomnama, er chë Bëngbe Bëtsábioye jadórama yebna, chë jatsjacama opodena yebna Moisés japórmama ora, Bëngbe Bëtsá mëntsá tbojanianyana: “Cuedado cochtsebomna chë atšbiana yebniñe nÿetsca soyënga jamama, ntšamo tcbonjaninÿinÿecá chacomama, chë tjoca bonjamna ora ca.” ⁶ Pero bëngbe bachnangbe más uámana amëndayá Cristo, tojashjache canÿe más

bëts trabajo jtsebomnama, ntšamo chë inÿe bachnanga imobomna trabajuama; cachcá, ndayá Bëngbe Bëtsá tojayancá Crísoftaca bëngbiama jamama, bënga tempcá tšabá Bëngbe Bëtsáftaca jtsemnama jtsamëse, puerte más tšabá endmëna, chë ndayá tempo chabe entšangbiama jamama tojanašebuachená soyama. Ntšamo mora cha tojayancá puerte más tšabá entsemna, er tojašebuachená más tšabe soyënga bëngbiama jamama.

⁷ Chë Bëngbe Bëtsá natsana tojanašebuachená soyëngaca matënjanopodé entšanga chamotsamama ntšamo yojanamncá, ntšamo tojanašebuachenacá jóyëngacñama, as ndoñe manjanëyta Bëngbe Bëtsá cachiñe canÿe trato chauátsbemama entšangbiama. ⁸ Pero Bëngbe Bëtsá tojáninÿe ntšamo yojanamncá entšanga ndoñe tmonjanmama, ntšamo cha tojanašebuachenacá jóyëngacñama, y Bëngbe Utabná Bëngbe Bëtsá chëngbiama mëntšá tojánayana:

Canÿe tempo echanjóshjango, y chora Israel y Judabe pamillentša entšangbiama básefta soyënga jamama chanjašebuachená, chënga átseftaca tempcá tšabá jtsemnama chamotsobenama.

⁹ Chë chanjašebuachená soye ndoñe queochátsmëna cachcá ntšamo chë chëngbe bëts taitanga sënjanašebuachená soye enjamncá, atše chënga sënjanënatse ora, Egiptó luarocana sënjesanëbuacna ora; pero chëngna, ntšamo jamama enjanamncá, chë sënjanašebuachená soye jóyëngacñama ndoñe chemátanma causa, atše cachcá chënga sënjesanëñÿaye ca, Bëngbe Utabná tojánayana.

¹⁰ Chë Israeloca entšangbiama ndayá jamama canÿe tempo chentšana chanjašebuachená soye, mëntšá entsemna ca, Bëngbe Utabná tojánayana:

Atše chanjama chë chëngbe juabniñe chaitsemánda soyama chënga chamotsejuabnama, y chamotseboše jtsamana ndayá chëngbe ainaniñe chaitsemánda soye. Atše chëngbe Bëtsá chántsemna, y chënga atšbe entšanga.

¹¹ Chë tempo ndoñe queochátsiyta cánÿenga ínÿenga chamotsabuátambama, cachabe luariñe oyanábioye o cachabe pamillentša entšábioye, atše chë chëngbe Utabná chašmotsábuatmama.

Ndoñe queochátsëyta, er nÿetscanga uámanënga y nduámanënga, corente tšabá atšbe šmochantsábuatma.

¹² Chënga chanjálastemaye y chëngbe bacna soyëngama chanjáperdonaye, y ndocna te más chë bacna soyënga chënga tmojamama quichátsjuabnaye ca —cha tojánayana.

¹³ Bëngbe Bëtsá, chë entšangbiama mora jamama tojašebuachenama tojtsichamo ora, chca jtsemnana, er cha tojama chë tempo entšangbiama jamama tojanašebuachená soye, mora ya ndoñe chaondëtsoservénama; ndayá mo tanguá soycá tojtsemna y ya ndoñe tontsoservena, chë soyna nÿe batšatema más y ya jtsopochócana.

9

Bëngbe Bëtsá jadórama muentša luare y chë celoca luare

¹ Y morna, ndayá Bëngbe Bëtsá tojanašebuachenama y tojanmandá soyama, mandënga yojamna ntšamo cha jtsadoránama, y nÿa chabiama pormana yebnentše quem luarentše. ² Chíyeca, Bëngbe Bëtsá tojanmandá chaotsemna canÿe jatsjacama opodena yebna chábioye jadórama, mëntšá: Chë natsana tsañe quem Bëngbe Bëtsabiama yebnentše inauabaina “chë uámana luare ca”; chentše inamna chë canÿsëfta quinÿenëfjuangá castellano candelerešniñe, y canÿe mesësha ndayiñe yojacjana chë luarentše Bëngbe Bëtsá bëtsemnama inÿinÿnaye tandëšënga.

³ Inye ujonýana entsějua chentšana, inye luare inamna; inauabaina “chë más uámana luare ca”. ⁴ Chentše inamna chë castellano altar, incienso jajuinýiyama, y chë cajontema nyetsiñe castellanoca pormánëtema. Quem cajontema yojaninýanýná ntšamo Bëngbe Bëtsá tojanašebuachenacá, chë Israeloca entsanga chabe uámana entsanga yochjánabiamama, y inauabaina “Bëngbe Bëtsabe šbuachenana soye inýinýnaye cajontema ca”; y chë tsoye quem soyënga inabomna: canýe castellano jarrëtema, maná ca uabaina tandëseca, chë Bëngbe Bëtsá tojanma celocana chabe entsangbiamama chaótsatsama saná; Aaronbe varëfja, chë tojanantsëfjonëfja; y chë ndëtsbé tablëbenga ndayiñe Bëngbe Bëtsá tojanábema chë bnëtsana uámana mandënga. ⁵ Chë cajontema juatsboca innamna chë juatëngmiáša uabomnënga, mo angelëngcá, “querubinënga ca” uabáinënga, y chënga imojaninýanýná chë Bëngbe Bëtsabe buashinýinýanana chéntšnaca bëtsemnama. Chënga, chë juatëngmiášhangaca chë cajontémentša nyets ústonëtema imojanëtsbotsana; chë ústonëtema inauabaina “entsanga bacna soyënga tmojamama Bëngbe Bëtsá perdonaye luare ca”, er chentše, chë cajontema juatsboca chë bachnangbe más uámana amëndayá jtsamanana buiñe jabuéscjana, chë Bëngbe Bëtsábioye cha ibnaimpadana te, entsanga cháuaperdonama. Pero mora ndoñe quenátsiyta chë soyëngama lempe jatóyebuambnayama.

⁶ Lempe chca tmojanprontantšana, chë bachnanga sempre chë natsana luaroye imojánamashjuana, jamama ntšamo Bëngbe Bëtsá tojanamëndacá, chábioye jadórama. ⁷ Pero nye chë bachnangbe más uámana amëndayá yojobena chë inye luaroye jamashënguana, y nye canýe cada uata. Choye jamashënguama orna, cha ibojamna bayëngbe buiñe juabuyambana, Bëngbe Bëtsábioye juatšëmbonama, chca, chë bachnangbe más uámana amëndayá tojanma bacna soyënga Bëngbe Bëtsá chaboperdonama, y chë ntsetatšëmbcá entsanga tmojanma bacna soyëngnaca. ⁸ Chca, chë Uámana Espíritu jamana bënga chašósertama, chë natsana luare cabá tojtsemnëntscuana y chë bachnanga cabá chë soyënga chentše tmojtsamëntscuana, nyetscanga cabá ndoñe tmonjanobená chë inye luaroye jamashjnama, chë “más uámana luaroye”. ⁹ Chë soyëngaca jt-sopodénana bëngbioye jinýanýiyana, chë tempo, chë Bëngbe Bëtsábioye jadórama yebnëntše entsanga uta luare imojábomna ora, ndoñe yonjopodena Bëngbe Bëtsabe delante nyetscanga jatsmënana, mo chë bachnangbe más uámana amëndayacá. Y chë soyëngnaca jtsayanana, chë Bëngbe Bëtsabiamama uátšëmbona soyëngaca y bachnanga tmojanóba bayëngaca, ndoñe tonjanopodé jamana canýa Bëngbe Bëtsábioye adorayá, Bëngbe Bëtsáftaca tempcá tšabá chaotsatsmënana y Bëngbe Bëtsá chabe bacna soyëngama tbojaperdonama ainaniñe corente chaotsetatšëmbuama. ¹⁰ Chënga, chë uátšëmbona soyëngaca y tmojanóba bayëngaca tmojanma nye ntšamo Moisesbe leyíñe yojanayancá, ndayá chiñe yojanlesenciancá, ndayá jasama o jofšiyama, y chë cuerpo jabebiana mo tšabe entsangcá Bëngbe Bëtsabe delante jtsatsmënana; nyetsca mandënga nye cuerpama, pero ainanama tondaye ntjamana. Pero chë entsanga chca yojánamna jtsamana, nye Bëngbe Bëtsá inye soyënga, más tšabe soyënga jamama tojamandantscuana, chë tsëm trato tojábema ora.

¹¹ Pero Cristo ya tojánabo, y cha yomna chë Bëngbe Bëtsabe delante bëngbiamama impadaná mo chë bëngbe bachnangbe más uámana amëndayacá, chca, bëngbiamama chaotsemnama chë tšabe soyënga ntšamo mochjoyëngacñëcá. Chë luare celoca ndayentše cha Bëngbe Bëtsabe delante mo bachnëcá yotrabája, puerte tšabe luare yomna, y chentše cha, ndoñe chë quem luarentše bachnanga imomnëngcá, cha yobena jamana lempe ntšamo Bëngbe Bëtsá entsangbiamama jamama inajuabnaycá. Chë luare ndoñe entsangbe cucuátseca yondëpormana, y chca jtsayanana, quem luarentša soye ndoñe yondmëna ca. ¹² Cha, canýe y nyetsca tescama chë luaroye Bëngbe Bëtsabe delante tojánamashëngo ora, cha ndoñe chivo o ternerbe buiñe tonjanabuyamba, ntšamo chë inye bachnanga imojuamancá; ndayá jóbánëse, chabe buiñe juabuáshanëse, cha tojanma entsanga atsebácanënga jtsemnama chamotsobenama; y chca tojanmëse, cha tojanobená chë

luaroye Bëngbe Bëtsabe delante jamashënguama. Y Cristo chca choye tojanamashënguëse, tojanma bënga chë nyetsca tescama yomna tšabe vida jtsebomnama chamotsobenama.

¹³ Ndëmuanÿenga ndayámnaca chë leyama tmojanouquedá mo chë Bëngbe Bëtsabe delante ndoñe tšabengcá, chë bachnanga imojuamana chëngbioye toronga y chivëngbe buiñe jabuéscacjana, y chë altaroca tcojajuinÿé ternerabe jatinyá chëngbioye jatbótotana, chca, chënga jábiamama Bëngbe Bëtsabe delante mo tšabengcá. Chca tmojamentšana, chë bachnanga tmojánayana chënga imojtsobena chë ínÿengaftaca jabama, Bëngbe Bëtsá jadórama, y cachiñe mo tšabengcá Bëngbe Bëtsabe delante imojtsatsmëna ca. ¹⁴ Ndayá bachnanga tmojanmcá yojanámana entšanga cachiñe mo tšabengcá Bëngbe Bëtsabe delante imojtsatsmëna ca jayanama; y chca, chë ínÿengaftaca Bëngbe Bëtsábioye jadórama tmojanobenase, jntſachetšá más yojtsámana Cristbe buiñe, ndëmuanÿeye tojanábuashana bëngbiana cha tojanóbana ora! Chë nyets tempo vida bomná Espiritbe obenánaca, Cristo, chabe derecho vida jtsobomñama cachcá tojanonÿá y bëngbiana tojanóbana. Cha, chë ndocna bacna soye ndbomná, tojanóbana ora yojamna mo canÿe bayá tondaye ndbemaná chë bachnanga cuafjobacá juatšëmbonama, entšangbe bacna soyëngama; cachcá Cristo, chë ndocna bacna soye ndbomná, bëngbe bacna soyëngama jáperdonama tojanóbana. Bëngbiana tojanóbanayeca, Cristo yobena jamama bënga ainaniñe corente tšabá chamotsetátšëmbo, bacna soyënga bënga tmojamama, chë ndoñe vida jtsebomnama bënga junatsana soyënga, chama bënga perdonánënga imojtsemnana, y chca, bënga montsobena jtsiyenana, Bëngbe Bëtsá, chë ndegombre ainá yomná, jtſeservënëse.

¹⁵ Chiyeca, Cristo jóbanëse tojama entšanga Bëngbe Bëtsáftaca cánÿiñe mo canÿacá chamotsemnana, ntšamo Bëngbe Bëtsabe tsëm trato yomncá; y chca cha tojama, Bëngbe Bëtsá chabe entšanga chamotsemnana tojáchembënga perdonánënga chamotsemnana, chë Bëngbe Bëtsabe tempsca tratentša ley jtsocumplínama inamna ora imojoyenëntscuana bacna soyënga tmojanmama; y chëngnaca chamotsobenama chë nyetsca tescama mochtsebomna soyënga jóyëngacñama, ntšamo Bëngbe Bëtsá chabe entšanga tojanašebuachenacá.

¹⁶ Ntšamo canÿe testamentiñe tojtsayancá chaopasamna, jtseytana chaotsótatšëmbo chë chca jamama tojašbuachená cha tojóbanama. ¹⁷ Canÿe testamento tondaye ntsámanana, chë chca jamama tojašbuachená cha cabá ainá totsomñëntscuana; nÿa cha tojóbanana orna aiñe. ¹⁸ Chiyeca chë Bëngbe Bëtsabe natsana trato, entšangbeñe tojanobojaťsé, chora tmojanóba bayëngbe buiñe jabuéscjëse. ¹⁹ Moisés chë leyentša nyetsca mandënga nyetsca entšanga tojánabuayenantšana, tojanca buángana boboshëshe y hisopo betiyentša buacuafja, chë ternerënga y chivëngbe buiñe búyeshca enajuabnëyiñe tojanfchecuacuá, y chora chë leyënga librëšañe tojanbuéscacja, y nyetsca entšangbeñnaca. ²⁰ Y mëntšá tojánayana: “Quem buiñe entsinÿinÿná, ntšamo Bëngbe Bëtsá tojamandacá ndegombre yochtsemnana, y tšëngaftangbiana puerte yochtsámanama ca.” ²¹ Moisésnaca buiñe tojanbuéscacja chë jatsjacama opodena yebniñe, y lempe chentša soyënguiñe, chë ndaye soyënga Bëngbe Bëtsábioye jadórama yojanoservena. ²² Er ntšamo leyiñe iuayancá, yojtsemna nÿa mo nyetsca soyënguiñe buiñe jabuéscacjana, Bëngbe Bëtsábioye jadórama tšabá chaoservema; y buiñe ndoñe tonjuábuashanëсна, ndoñe ntsopodénana entšanga bacna soyëngama perdonánënga chamotsemnana.

Cristo jasúfriase y jóbanëse, tojanma entšanga bacna soyëngama perdonánënga chamotsemnana

²³ Chiyeca jtseytana chë Bëngbe Bëtsábioye quem luarentše jadórama soyënga, chë bachnanga chamoma, Bëngbe Bëtsábioye jadórama tšabá chaoservema, chë Bëngbe Bëtsábioye jëtschuayama tmojóba bayëngbe buiñeca. Chë soyënga batsatema jtsinÿanÿnayana ntšamo chë celoca luare yomnana Bëngbe Bëtsabe delante, ndayentše Jesús yoservena. Lempe

ntšamo chë Bëngbe Bëtsábioye jadórama luarentše yomncá, chabe delante celoca, Jesucristo tojanma, chábioye jadórama tšabá chaoservema; pero chca tojanma más uámana soyënga jamëse, chë tmojóba bayëngaca bachnanga quem luarentše innétsama soyëngama. ²⁴ Er Cristo ndoñe tonjánamashëngo canye luarentše Bëngbe Bëtsá jadórama nye entsangbe pormánentše, ndaye luare nye batsatema jtsinñanñayana ntšamo chë celoca luare Bëngbe Bëtsabe delante chábioye jadórama yomnana; ndayá cach celoye tojánamashëngo, Bëngbe Bëtsabe delante luaroye, bëngbiana jtseimpadánama. ²⁵ Chë bachnangbe más uámana amëndayana chë “más uámana luaroye” jamashënguana canye cada uata, bayëngbe buíñeca, ndoñe cachabe buíñeca, chca, ndayánaca jamama entsanga bacna soyënga tmojamama perdonánënga chamotsemnana. Pero Cristo chë luaroye celoca ndoñe tonjánamashëngo, chentsana jtésebcnana, y chabe buíñe juabuáshanëse cachiñe jatóbanama, y ba soye cachcá chauétsemnana. ²⁶ Chca tojtsemnëse, Cristbiana manjanmëna jasúfriana y jóbanana ba soye, chë Bëngbe Bëtsá quem luare tojanma orscana. Pero ntšamo tojopasacá entsemna, mora chë quem luare jopochócama tempo yojtsobeco ora, Cristo canye y nýetsca tescama tojenonñinýe quem luarentša entsanga bacna soyënga jabuajuánama, chëngbiana jóbanëse, mo entsangbe bacna soyëngama canye tmojóba bayá, Bëngbe Bëtsábioye uatsëmbonacá. ²⁷ Cachcá, ntšamo nýetsca entsanga jtsamnana nye canye jóbanama, y chentsana Bëngbe Bëtsá chëngbiana jayanana chë imojëftsiyenëntscuana ntšamo tmojanmcá tšabá o ndoñe tšabá bétsemnana, y chëngaftaca jamana ntšamo chora tojajuabocá, ²⁸ cachcá, Crístnaca, nye canye chabe derecho vida jtsobomñama cachcá tojanonýá, chabe buíñe juabuáshanëse jóbanama, ba entsanga bacna soyëngama jáperdonama; y chentsana cachiñe yochjésabo, ndoñe bacna soyëngama entsanga jabáperdonama, ndayá chë cha cháuesabama tša tmobátmanënga jabátsebacama.

10

¹ Chë Moisesbe leyentša mandënga, ntšamo chë bachnanga yojánamnama Bëngbe Bëtsá jadórama tmojóba bayëngaca y inye soyëngaca, ndoñe ntsinñanñayana lempe chë Bëngbe Bëtsá chabe entsanga jatsatayana puerta tšabe soyënga, pero aiñe batsatema jtsinñanñayana ntšamo chë soyënga yochtsemnana. Chíyeca chë mandënga, chë uatsëmbona soyëngaca y Bëngbe Bëtsábioye jadórama tmojóba bayëngaca, ndocna te ntjopódiana jamana chë Bëngbe Bëtsábioye jobéconama tmojtsebošënga, chca soyënga tmojtsamama cada uata nýets tempo, chënga ainaniñe corente chamotsetatšëmbuama chëngbe bacna soyëngama nýetsca tescama perdonánënga imojtsemnana. ² Er ndayá tcojtsamama Bëngbe Bëtsabiana uatsëmbona soyëngaca y chábioye jëtschuayama tmojóba bayëngaca, entsanga Bëngbe Bëtsábioye adórayënga, chabe delante tšábënga jtsemnana matmënjánobenase, chënga chë bacna soyënga tmojanmama ainaniñe ngmënaca ya ndoñe mamënjétsemna, y matmëntsánajbaná soyënga amana chë tmojóba bayëngaca. ³ Pero juatsëmbonama entsanga bayënga tmojóba ora, josérviana entsanga bacna soyënga tmojamama cada uata chamuatenójuaboma; ⁴ er chë toronga y chivënga tmojóbanëngbe buíñeca ndoñe ntsopodénana entsángbioye bacna soyënga jabuajuánama.

⁵ Chíyeca, Cristo quem luaroye tojánabo ora, Bëngbe Bëtsábioye mëntšá tbojaniyana: Ndoñe tconjábošëna entsanga chacmátšëmbona soyënga, ni tmojobaye bayënga, pero aiñe tcojama atše canye entsacá chaitsemnana.

⁶ Ndoñe tšabá quecmátinýana chë tmojóba y tmojajuinýe bayënga, entsanga bacna soyëngama chacotsaperdonama.

⁷ As atše Bëngbe Bëtsá sënjanianyana: “Bëngbe Bëtsá, muentše sëntsemna, ntšamo aca icobošcá atše chaimama, ntšamo acbe uabemana palabrënguñe atšbiana endayancá, chë ndayá atše chjanmama ca.”

⁸ Natsana, Cristo tojánayana, Bëngbe Bëtsá ndoñe tonjánbošena, ni tšabá tbonjanínynana entšanga chamuátsëmbona soyënga, ni Bëngbe Bëtsábioye jëtschuayama tmojóba bayënga, ni tmojóba ni tmojajuinyé bayënga, entšanga bacna soyëngama cha chaotsaperdonama ca, masque chënga chë Bëngbe Bëtsábioye jadórama soyëngaca jamana, ntšamo leyiñe iuayancá ndayá chënga jamama yojsamna. ⁹ Y chentšana, Cristo Bëngbe Bëtsábioye tbojátaniyana: “Muentše sënjabo, chë ntšamo aca icobošcá atše chaimama ca.” Chca, Cristo tojinñanyé chë jtsamana soyënga tmojóba bayëngaca, tondaye yonduámana entšanga bacna soyënga jabuajuánama, y entšangbe bacna soyëngama jóbanëse tojaninñanyé chë ntšamo Bëngbe Bëtsá yobošcá jtsamana, más iuámana chë inye soyënga játamama. ¹⁰ Bëngbe Bëtsá tojama, bënga chabe entšanga y chabe delante tšábenga chamotsemnana, ntšamo Bëngbe Bëtsá yobošcá Jesucristo tojánmayeca, chabe derecho vida jtsobomñama cachcá jonñayëse y entšangbe bacna soyëngama jóbanëse, canye y nyëtsca tescama.

¹¹ Judiëngbe nyëtsca bachnanga nyëts tempo ba soye altarentša natsanoica Bëngbe Bëtsá jtseservénana, y ba soye cachcá jtsamana tmojóba bayëngaca, pero chë soyëngaca ndocna te ntjopódiana entšanga bacna soyënga jabuajuánama. ¹² Pero Jesucristo entšangbe bacna soyëngama tojanóbana ora, yojamna mo canye tmojóba bayacá, Bëngbe Bëtsá entšanga bacna soyëngama cháuaperdonama; nye canye y nyëtsca tescama chca tojanma, y chentšana Bëngbe Bëtsabe catsbioica tojtanótbema, canye uámana puestentše, jtsemándayama. ¹³ Chentše cha yobátmana, Bëngbe Bëtsá chabe obenánaca Cristbe uayayënga chabe cucuatsiñe chamoquedama yochjamëntscuana. ¹⁴ Er nye canye, entšangbe bacna soyëngama cruzoca jóbanëse, Jesucristo lempe tojama, entšanga chë Bëngbe Bëtsábenga jtsemnana chémbonënga, chabe delante nyëtsca tescama tšabengcá chamotsemnana. ¹⁵ Y Uámana Espíritnaca, Bëngbe Bëtsabe uabenana palabrënguiñe šontsinñanyá chca ndegombre bëtsemnana, mëntšá tojánayana ora:

¹⁶ Ndayá entšangbiamá chjama, canye tempo chentšana chanjašebuachená soye mëntšá entsemna ca, Bëngbe Utabná tojánayana:

Atše chanjama chënga chamotseboše jtsamana ndayá chëngbe ainaniñe chaitsemánda soye,

y chamotsejuabnama chë chëngbe juabniñe chaitsemánda soyama ca.

¹⁷ Y chentšana mëntšá tojánayana:

Ndocna te más quichátsjuabnaye chënga bacna soyënga tmojamama,

y ntšamo atše stsebošcá contra soyënga chënga tmojamama ca.

¹⁸ Chcasna, Bëngbe Bëtsá nyëtsca tescama entšanga bacna soyëngama tojaperdoná ora, ya ndoñe ntjátsiytana inye soyënga más játamama, mo bayënga cuafjobaycá, entšanga bacna soyëngama perdonánënga chamotsemnana.

Sontsamna Bëngbe Bëtsábioye jtobéconana

¹⁹ Y chca, Jesucristbeyeca catsátanga, Jesusbe buiñe tojanábuashanama y bëngbiamá tojanóbana, chábeñe jtsošbuáchiyëse, bënga montsobena, tondayama ntjatauatjcá Bëngbe Bëtsabe delante jamashënguama. ²⁰ Bënga montsobena jamashënguama chë tsëm benachëjana, Cristo bëngbiamá tojamëjana; cha nda inétsama chë nyëtsca tescama yomna tšabe vida chamotsebonnama. Mo chë quem luarentše chë bachnangbe más uámana amëndayacá, chë ujonñana entšëjuajana jamashënguana chë “más uámana ca” uabaina luaroye, Bëngbe Bëtsabe delante jtsemnana, cachcá, Cristo bëngbe bacna soyëngama mo entšacá tojanóbanayeca, bëngnaca montsobena Bëngbe Bëtsabe delante luaroye jamashënguama. ²¹ Bënga mondbomna canye bëts bachnangbe más uámana amëndayá, Bëngbe Bëtsabe entšángbeñe jtsemándayama, y cha endmëna Jesús. ²² Chíyeca, Bëngbe Bëtsá jaserviama ndegombre ainaniñe corente jtsebošëse, y chábeñe puerte jtsošbuáchiyëse, šontsamna Bëngbe Bëtsábioye jobéconana. Ntšamo chë

bachnángbioye buíñeca tmojanabuešcacjca, Bèngbe Bètsabe delante tšabengcá chamotsemnama cha jasérviamá, cachcá, Cristbe buíñe juabuáshanése y bèngbiamá jóbanése, bènga ainaniñe corente montsetátšëmbo Bèngbe Bètsá nyetsca tescama bèngbe bacna soyèngama šojtsaperdonama. Y bènga béjayeca uabainèngnaca mondmèna; chíyeca bènga jtsobenana Bèngbe Bètsábioye chca jobéconana.

²³ Bènga šontsamna nyets tempo Bèngbe Bètsábeñe puerte jtsošbuáchiyana, y ndocna te nye ndayámnaca játajbanana entšángbeñe ichámuana, chë Bèngbe Bètsábeñe jtsošbuáchiyese bènga imobatmana soyènga cha yochjamama, er chë soyènga šojašebuachená cha, sempre jamana ntšamo tojayancá. ²⁴ Bènga šontsamna janguanguana ntšamo muatjobenaye añemo jenatšetayana, nyetscanga jtsenbobonshánana, y ntšamo tšabá yomncá jtsamana; ²⁵ pero ndoñe quešnátamna játajbanana, Bèngbe Bètsábioye jadórama enefjuanana mo Crístbeñe ošbuáchiyènga quetsomñecá, ntšamo báseftanga imojtsamcá. Chamna, nyetscanga añemo mochtsenatšetnaye Cristo nyets tempo jtseservénama, y más mora, chë ndayá imojtsonyama, Bèngbe Utabná yochjésabama ya yojtsobecuama montsetátšëmbo ora.

²⁶ Er chë ndegombre soyèngama tšabá tmojátatšëmbonentšana y chë soyènga tmojoye-uná chentšana, bacna soyènga jtsamése tmojtsiyena, nye chca jamama tmojtseboše causa, muattsaboté ndayá Cristo bèngbiamá tojanmá, bèngbe bacna soyèngama cha tojanóbana ora, y ya tondaye nántsemna ntšamo Bèngbe Bètsá bènga jtsaperdónama. ²⁷ Y chca, ndayá bènga muattsobena jobátmana soye nántsemna nye chë Bèngbe Bètsábicana castigo, chë ndayama šojtsamna uatjana jtsebomnana; y nye jobátmana chë tempo, ndaye ora Bèngbe Bètsá puerte etonaná chabe uayayènga bètscá íñesheca yochtsapochóca. ²⁸ Ndánaca chë Moisesbe leyama tojayana tondaye yondovalena ca, y útata o únganga chca tmojouena y aíñe cha chca tojayana ca chènga tmojayanése, jtsemnana chë entšábioye jtsóbana, tondaye ntjalastemacá. ²⁹ Canya, nyets ainánaca Bèngbe Bètsabe Uaquiñábioye tbojtsaboté; y tojayana Cristbe buíñe, chë ndémuanýeye tojanábuashana bèngbiamá tojanóbana ora, tondaye yonduámama ca, ndayá nye ndaye entšabe buiñcá ca, chë buíñe chë ndémuanýeye šojtsinýanýná ndayá Bèngbe Bètsá tbojašebuachenacá bèngbiamá jamama, y ndáyeca Bèngbe Bètsá chabe entšanga šojábiamá, cha jasérviamá; chë entšá Uámana Espíritbioye tbojóyenguango, nda inétsama bènga tšabe soyènga chamotsebomnana; y canya chca amá, ¿tšèngaftanga ndoñe šmontsejuabná cha ibojtsomerecena Bèngbe Bètsábicana canye puerte más uabouana castigo, chë Moisesbe leyama tondaye yondovalena ca tojayanabiamá? ³⁰ Bènga nyetscanga mondétatšëmbo Bèngbe Bètsá mèntšá tojánayanama: “Atše chanjama chènga chamosufrima, ínýenga chamosufrima tmojama causa; y chènga chanjácastigaye, ínýengbioye bacá tmojaborlá causa ca.” Y mèntšánaca tojánayana: “Bèngbe Utabná chabe entšangbiamá echanjayana ntšamo tmojëftsemcá tšabá o ndoñe tšabá bétsemnama, y chèngaftaca echanjama ntšamo chora chaojajuabocá ca.” ³¹ ¡Tša uabouana, Bèngbe Bètsá chë nyets tempo ainabe cucuatšiñe joquédana, castiganá jtsemnana!

³² Pero ntšamo tempo yojamnana šmochtsenójuabnaye, chë ndegombre soyènga Jesucristbiamá cabá chora šmonjanábuatmana ora, y chora tša jenojuérezana cmonjanotocá padecena soyènguiñe, y chë causa tša šmojansufrí. ³³ Báseftanga tšèngaftanguentšèngbioye entšangbe delante tmojanoyánguango, y ínýenga tmojanma puerte chašmotsesufrínama; y ínýenga tšèngaftanguentšènga chca imojansufrinèngaftaca šmojanama, chènga jujabuáchama. ³⁴ Tšèngaftanga šmojánalastemana chë chènguentsènga cárceloye imojanétámenènga; y oyejuayènga šmojanlesenciá ntšamo šmojanbomncá ínýenga chacmotsabacama, er tšèngaftanga šmojátatšëmbona Bèngbe Bètsábicana más tšabe soyènga šmojtsebomnana, chë nyetsca tescama šmochtssebomna soyènga. ³⁵ Chcasna, ndoñe šmatjajbaná ainaniñe bètscá añemo jtsebomnana, ni Bèngbe Bètsábeñe sempre jtsobátmanana; er chca šmobatmánayeca, Bèngbe Bètsá echanjama tšèngaftanga bètscá ua-

canana soyënga chábiocana chašmotsebmoma. ³⁶ Tšëngaftanga cmontsamna corente uantadënga jtsemnana, padecëniñe chašmojtsachnëjuana ora, chca, ntšamo Bëngbe Bëtsá yobošcá tšëngaftanga chašmotsamama, y ndayá Bëngbe Bëtsá tojanašebuachenacá chašmóyëngacñama. ³⁷ Er Bëngbe Bëtsabe uabemana palabrënguiñe cha mëntšá tojánayana:

Betsco, ndoñe bën, y chë jabama ibomná echanjabo.

Ndoñe bën quebochatóbema.

³⁸ Nye chë ndabiama atše chajjama atšbe bominiñe tšabia chaotsemnana, átšbeñe cha betsošbuáchema, cha ndegombre chë nyetsca tescama yomna tšabe vida echántsebmoma;

pero uatjana causa, átšbeñe ošbuáchiyana tojtsajbanase, atše cháftaca ndoñe quichátoyejuae ca —cha tojánayana.

³⁹ Pero bënga ndoñe quemátsmëna chë uatjana causa Bëngbe Bëtsábeñe ošbuáchiyana tmojtsajbananga, y chca, nyetsca tescama pochocánënga jtsemnana imojtsajñënga; pero aíñe mondmëna chë Bëngbe Bëtsábeñe ndegombre ošbuáchiyënga, y chca, chë atsebácanënga jtsemnana mochjashjáchënga.

11

Bëngbe Bëtsábeñe ošbuáchiyana jtsebmoma

¹ Ošbuáchiyana jtsebmoma endmëna corente jtsetatšëmbuana, ndayá tmojtsobamancá ndegombre chca yochjopásama; endmëna ainaniñe corente jtsetatšëmbuana, ndayá bënga mora ndoñe tmontsonyáca ndegombre chca yomnana. ² Bëngbe Bëtsá tojánayana bëngbe bëts taitanga tšabá imojánama ca, chënga chábeñe imojtsošbuachéyeca.

³ Bënga, Bëngbe Bëtsábeñe mondošbuachéyeca, mondëtatšëmbo cha quem luare y nyetsca luarënga tojanmama, chca chaotsemnana cha tojanmandá ora; chcasna, chë ndayá mora bënga jinýama imobencá, cha tojanma bënga ndoñe mondobena jinýama soyënguentšana.

⁴ Abel Bëngbe Bëtsábeñe yojanošbuachéyeca, oveshatémënga chábioye tbojanátšëmbona, y chë soye Bëngbe Bëtsabiama más tšabá yojtsemna, chë ndayá Caín, chabe catsata, Bëngbe Bëtsá jëtschuayama tbojanátšëmbonama. Chiyeca, Bëngbe Bëtsá tojánayana Abel chabe bominiñe tšabia yojtsemna ca, ndayá Abel chábioye jëtschuayama tojanmcá oyejuayá tojanóyëngacñeyeca. Ntšamo Abel Bëngbe Bëtsábeñe yojanošbuachecá, masque cha ya obaná yojtsemna, chë soye cabá bënga šontsabuatambá.

⁵ Enoc Bëngbe Bëtsábeñe puerte yojanošbuachéyeca, Bëngbe Bëtsá celoye tbojesanbëtšëñe, ntjobancá. Chentšana ndocná tonjanobená cha jtsinýenana, Bëngbe Bëtsá tbojesanbëtšëñe causa. Y Bëngbe Bëtsabe uabemana palabrënguiñe endayana, Bëngbe Bëtsá Enócaftaca oyejuayá canjamna ca, ntšamo jtsamëse yojoyenama, y chentšana celoye tbojtsanámbañe. ⁶ Pero Bëngbe Bëtsábeñe ntsošbuachiycá, ndoñe quenátopodena cha oyejuayá bëngaftaca jabemama, er chábioye jobéconamna, entšá jtsemnana jtsošbuáchiyana cha ndegombre bëtsemnana, y cha inétsamama chë cha jtsabuatmama tša tmošošëngbiama bëtscá tšabe soyënga chamotsebmoma, mo chábiocana uacanana soyëngcá.

⁷ Bëngbe Bëtsá Noébioye tbojanbuayená uabouana soyënga yochjanopásama, cachora ndopodena jinýama soyënga, y cha Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá y barquëshu tojanapormá chabe pamíllanga jätsebacama. Cha chca tojanma ora, ošbuáchiyana bómnyeyeca, cha tojaninýanyé entšanga tša bacna soyënga tmojanmama y chë causa castigánënga jtsemnana yojtsamnama. Chabe ošbuachiyánamnaca Noé tojánashjache Bëngbe Bëtsabe bominiñe tšabia jtsemnana, y chca entšá jashjáchana, nye Bëngbe Bëtsábeñe jtsošbuáchiyëse.

⁸ Bëngbe Bëtsá Abrahámbioye tbojanchembo, inye luaroye cháuama; Abraham Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá, y tojánbocna chë luaroye jama, chë Bëngbe Bëtsá tbojanšbuachená jatsetayama luaroye, masque Abraham ndoñe yontsetátšëmbo ndémoye yochjánama. ⁹ Bëngbe Bëtsábeñe yojanošbuachéyeca, yojobena mo inye luarocana ashjanganacá jtsiyenana, cachabe luarentše ndoyená, chë Bëngbe Bëtsá tbojanšbuachená luarentše. Entšëjuaca pormana tambënguiñe yojoyena, cachcá ntšamo chë chábentsana básenga Isaac y Jacob ibojëftsiyencá; y chátnaca Abrahamcá ibojanobátmana jóyëngacñama ntšamo Bëngbe Bëtsá Abrahámbioye tbojanšbuachenacá. ¹⁰ Er Abraham corente uantadá yojanobátmana chë canye luaroye celoca jamashënguama tempo; chë luare inamna canye bëts pueblo, puerte tšabe ucuatjoniñe pormana pueblo, canye luare chë ndayentšama Bëngbe Bëtsá tojanjuabó ntšamo chaotsemnana, y cachabe pormana luare inamna.

¹¹ Sara, Bëngbe Bëtsábeñe yojanošbuachéyeca, Bëngbe Bëtsá tojanma cha canye šešona chabotsebomnana, masque chora ya bëtsanánëjema yojtsemna, šešona jtsebomnana. Bëngbe Bëtsá chca tojanma, er Sara corente yojanjuabná, cha chë canye šešona yochtsanbomnana tbojanšbuachená cha, nyets tempo ntšamo tojayancá amá yojamna ca. ¹² Y chca, quem entšá Abraham, chë šešonga jtsabamnana ya ndobenábentsana, ba básenga tmojanonýná, tša mallajta mo chë celoca estrellëngcá, y tša chëftanga mo chë mar béjayoca chënyañentša cascajca, ndocná jacúntama ntjobenayana.

¹³ Nyetsca quem entšanga imojëftsiyena jtsamëse ntšamo chëngbe ošbuáchiyana yojamncá, y chca tmojanóbana, masque cabá ndoñe tmonjanóyëngacñe chë Bëngbe Bëtsá tojanašebuachená soyënga. Pero chëngbe ošbuachiyánama corente imojtsetátšëmbo, Bëngbe Bëtsá chentšana baytese ntšamo tojanašebuachenacá yochjánatšatayama y chë soyënga ndegombre yochtsemnana, y chama oyejuayënga chënga imojtsemna. Chënga tmojánayana quem luarentše chënga imojoyena mo cachëngbe luarentše ndoyëngcá, y quem luarëjana mo nye achñëjuanëngcá ca. ¹⁴ Y chca tojtsichámëngna, puerte jtsinýanýnayana chënga tša imojtseboše inye luaroca joyéanama, canye luare cachëngbiama. ¹⁵ Chënga nye chë ndayentšana tmojëftsanbocna luarama manjánjuabnase, matmënjanobená tšabá cachoye jesshëconama. ¹⁶ Pero chëngna canye más tšabe luare innaboše, canye luare celoca. Chíyeca Bëngbe Bëtsá ndoñe yonjanëuatja, chëngbe Bëtsá ca chënga chamotsechembuanama, er celoca canye bëts luare, mo canye bëts pueblëcá chëngbiama tojanprontá.

¹⁷ Bëngbe Bëtsá Abrahámbioye jinýama, ndegombre aíñe o ndoñe Bëngbe Bëtsábeñe tayojtsanošbuachema, tbojanmandá chabe uaquiñá Isaac chabuánatse jóbama, chábioye jëtschuayama, ntšamo Abraham chë tojóba bayëngaftaca jamama yojanamancá. Cha Bëngbe Bëtsábeñe yojanošbuachéyeca, yojtseprontana chë nye canye uaquiñá ibnabomná jóbama, Bëngbe Bëtsábioye jëtschuayama, masque Bëngbe Bëtsá mëntšá tbojanšbuachená: ¹⁸ “Chë ácbentšana entšanga nye Isaacbiajana mochanjabo ca.” ¹⁹ Abraham corente yojanjuabná y yojátatšëmbo, Bëngbe Bëtsá ndegombre obenana bomná bëtsemnana, chë obanënga chámuatayenama jamama. Chíyeca, Bëngbe Bëtsá Abrahámbioye tojtsanauyaná Isaac jóbama ora, yojamna mo Abraham obanënguentšana chábioye cuaftoyëngacñëcá. Y chca, ntšamo Isaáftaca tojanopasacá, batšá yojtsinýanýnaye ntšamo Jesucrísoftaca yochjanopasacá.

²⁰ Isaac Bëngbe Bëtsábeñe yojanošbuachéyeca, Bëngbe Bëtsábioye tbojanimpadá chabe uaquiñátbiama, Jacob y Esaú, bëtscá tšabe bendicionënga chabotsebomnana, chë joshjanguama tempënga ora.

²¹ Jacob Bëngbe Bëtsábeñe yojanošbuachéyeca, ya jóbanama ora, tbojanimpadá cada ona chë Josebe básëngbiama, Bëngbe Bëtsá chaoma bëtscá tšabe bendicionënga chamotsebomnana. Cha chca tojanma, jotsejbénase Bëngbe Bëtsábioye jadórama, y chabe jatjonëfjiñe tsbanánoca jojuáchase.

²² José Bëngbe Bëtsábeñe yojanošbuachéyeca, ya jóbanama ora, tojánayana más chcoye chë Israeloca entsanga Egiptó luarentšana mochjëftsanbocna ca, y tojëftsanmandá ndayá jamana chabe óbana cuérpoca.

²³ Moisesbe bëtsétsata Bëngbe Bëtsábeñe ibojanošbuachéyeca, cha tojanonýná ora, unga shinýentscuana cha tmojtsaniytëme, er chata tbojáninýe cha canýe botamana básetema bëtsemnama, y ndoñe tbonjanëuatjaná chë reybe mandama, chë nyetsca judiëngbe basetëmënga boyabásetemënga jtsëbáyana.

²⁴ Moisés Bëngbe Bëtsábeñe yojanošbuachéyeca, ya bëtsá yojtsemna ora, ndoñe tonjánbošena chë Egiptoca reybe bembëbe uaquiñacá chamotsábuatmama. ²⁵ Chamna, tojánbošena cha jasúfriama ínýenga chamotsamama, cánýiñe chë Bëngbe Bëtsabe entsángaftaca, y ndoñe nýe baseftayté tšabá jatsmënana, bacna soyënga jtsamëse, ntšamo cachá tojtsejuabnacá, nýe cachá tšabá jtsomñama. ²⁶ Chamna, cha yojanjuabná, chë padecena soyënguiñe jasúfriana ntšamo Cristo tojansufricá, más tšabá yojamna chë Egiptoca uámana soyëngama, er cha Bëngbe Bëtsábeñe jtsošbuáchiyëse chábeñe yojanobátmana, ba tšabe soyënga mo canýe uacanana soycá cha ibochjanatšetayama.

²⁷ Bëngbe Bëtsábeñe yojanošbuachéyeca, Moisés Egiptocana tojëftsanbocna, chë luar-entša rey cháftaca chábuatnama ntjatauatjácá. Cha ainaniñe nyets tempo añemo yojtsebomna, y chca yojáninýna mo chë ndocná jinýama tondobenacá, Bëngbe Bëtsábioye cuaftsonýacá. ²⁸ Bëngbe Bëtsábeñe yojanošbuachéyeca, ntšamo Bëngbe Bëtsá tbojanmandacá, Moisés chë judiënga tojanabuayená Bashco fiesta jamama, y chë Israeloca entsángaftaca yebnëngoye amashjuaniñe buiñeca tojanbuéscacjá, chca, chë ángel obanayá, chë Israeloca pamíllangbeñe Egiptoca chë mayor uaquiñënga ndocá chaondámama.

²⁹ Moisés y Israeloca entsanga Bëngbe Bëtsábeñe imojanošbuachéyeca, chë “Buángana ca” uabaina mar bejayëjana tmojánenachnëngo, mo chiñe bojojo fshantse cuaftsomñcá; chentšana, chë Egiptoca entsanga cachcá jamama tmojánbošena ora, nyetscanga chiyiñe tojtsanatajo.

³⁰ Israeloca entsanga Bëngbe Bëtsábeñe imojanošbuachéyeca, chë Jericó bëts pueblentša tapiëšënga shëconana canýsëfta tentscuama chënga imojánajnentšana, chëšënga yojtsáshajaye.

³¹ Rahab, chë pueblentša bacna vida bomna shembása, Bëngbe Bëtsábeñe yojanošbuachéyeca, ndoñe tonjanóbana chë ínýengaftaca, chë bëts pueblentše oyenënga, chë ntšamo Bëngbe Bëtsá tojanmandacá ndoñe tmonjanmënga; y ndoñe tonjanóbana, er chë Israeloca entsanguentsana ichmónënga tšabá tojanëbuaja, chë jarrepárama tmojánanga ntšámose chë luarentše oyenënga jáyënjanama jobenayama.

³² Atše sëntsobena bangbiana más jóyebuambayama, Bëngbe Bëtsábeñe ošbuáchiyëngbiana, pero luare šattsëshbe chcangbiana jóyebuambayama, mo Gedeoncá, Barac, Sansón, Jéfté, David, Samuel y Bëngbe Bëtsabe juabna oyebuambnayëngcá.

³³ Chënga Bëngbe Bëtsábeñe imojanošbuachéyeca ínýengbe mandadëngbe entsángbioye tmojanayëñaná, bëtscá imojánama nyetsca entsángaftaca ntšamo tšabá yomncá jtsamama y nyetscanga cachcá chamotsámanama, ndayá Bëngbe Bëtsá chënga tojanašebuachenacá tmojanóyëngacñe; y Bëngbe Bëtsá tojanma chënga leóngaca imojtsemna ora, chënga chamuatenáyebengoma, chentšana báseftangbioye ndocá chamondámama.

³⁴ Ošbuáchiyana bómnyeyca, Bëngbe Bëtsá tojanma lempe chaotsefsanama, chëngbioye íñeshiñe tmojanacjá ora, chënga ndocá chamondëpasama; tmojanotsbocá espadëjaca jobanámentsana; ya tondaye añemo béntsebomna ora, Bëngbe Bëtsá tojanma bëts obenana y puerte añemo chamotsebomnama; tmojánashjache bëts obenana jtsebomnama ínýenga jáyënjanama, chëngaftaca imojtsentsjaná ora; y tmojanobená inýe mandadënga y chëngbe soldadënga jáyënjanama, chamotsachetama jamëse. ³⁵ Ošbuáchiyana bómnyeyca, básefta shembásënga chëngbe óbana pamíllangbioye cachiñe ainënga tmojtananýe, chënga ainënga chamotsatsmënama Bëngbe Bëtsá tojanma ora.

Ošbuáchiyana bómnyeca, ínÿenga tmojanma básefta ošbuáchiyënga, puerte chamo-sufrima, y jobanámnaca; er chënga más tmojánbošena jashjáchana chë nÿetsca tescama yomna tšabe vida jtsebomnana, y ndoñe nÿe chë jótsbocana batšatema más vida jtsebomnama. ³⁶ Ošbuáchiyana bómnyeca, ínÿenga corente tmojansufri, ínÿenga chëngbioye tmojanoyánguango ora y tmojanatsetšená ora; y ínÿenga tmojansufri y cárceloye cadenëjuangaca utámenënga joquédamnaca. ³⁷ Inÿengbioye ndëtšbéngaca tmojtsanatëchënganja, serruchëshaca tmojtsanëjátcacaye, espadéjaca tmojtsanëbaye. Inÿenga imojánajna cánÿentšana ínÿecnoye nÿe oveshá y chivëbe bobáchea uichëtjonënga, ujabótënga, ainana tsetšanënga, y ínÿengbeyeca mocá borlánënga. ³⁸ Chë nÿe quem lularama enójuabnayënga ndoñe monjanomerecena chënga mëngaftaca jtsiyenama, chënga chë vida imojábomna cánÿentšana ínÿecnoye aniñe, entšanga ndoyena luarënguenache, tjañenache, fshantsiñe atëbëfjniñe y cuevëshënguiñe.

³⁹ Nÿetsca quem entšanga, ndëmuanÿengbiama muentše tmonjoyebuambá, Bëngbe Bëtsá tšabá chëngbiama tojánayana, ošbuáchiyana imojánbomna ca; pero ni canÿa chënguentšá tonjanóyëngacñe, ndayá Bëngbe Bëtsá chëngbe entšanga jatšatayama tojanašebuachenacá, nÿetsca tescama jtsebomnama. ⁴⁰ Bëngbe Bëtsá, bëngbeñe jtsejuabnayëse, tojanjuabó canÿe más tšabe soye bëngbiama jamama, chca, Bëngbe Bëtsá canÿe ora jamama, bënga nÿetscanga, chënga y bënga chamotsemnama lempe ntšamo Bëngbe Bëtsá yobošcá, ntšamo Bëngbe Bëtsá tojanašebuachenacá jóyëngacñese.

12

Bënga mochtsejuabnaye ndayá Jesús tojanmama

¹ Chíyeca, bënga mochtsejuabnaye ba entšangbiama, chë bëngbiama más natsana imojaniyenënga, ndëmuanÿenga puerte tšabá bënga jtsinÿanÿnayana ntšamo ndegombre yomnana Bëngbe Bëtsábeñe ošbuáchiyana jtsebomnana, mo chënga ndayá bënga tmojtsamama cuaftsonÿangcá. Chcasna, mo chë tmochamanëngcá, ínÿengaftaca jenëyëñjanama, chë jashjanguama tojtsemna luaroye natsana jashjanguama, chënga jotjajuamna, chë chorscama nduaserverna entšayá jtsenátsejcana, y lempe ndayá tojt-sama más uenana chamotjajuama soyëngnaca jtsenójacana; bëngnaca cachcá, ndoñe matjaleséncia bënga Crístbioye ndoñe tšabá ndëtšoservënana, ni chë bacna soyënga jamama juabnënga, chë bëngbioye paselo jáyëñjanama juabnënga cachcá chamotsamama. Chamna, šontsamna sempre Bëngbe Bëtsá jtseservënana, puerte uantadënga jtsemnëse masque padecena soyënguiñe tmoyena, bënga chamobená chë trabajo jamama, chë ndayama Bëngbe Bëtsá šojáchembo. ² Jesusbiamama mochtsejuabnaye, nda šuebënatsana bënga ošbuáchiyana chamotsebomnama, y šuinÿanÿná ntšamo nÿets tempo nÿetsca soyënguiñe Bëngbe Bëtsábeñe jtsošbuáchiyama. Cha chë cruzoca jóbanama sufrínana lempe tojanoboyá, er cha yojanobátmana chë chentšana yochtsanbomna bëts oyejuayánama; y yojanjuabná, chë más bacá uamana entšangcá jóbanana, chabiamama ndoñe canÿe uámana soye yonjamna ca; y chentšana chë uámana puestentše tojtantótbema, Bëngbe Bëtsabe catšbioica, jtsemándayama.

³ Chíyeca, šmochtsejuabnaye ntšamo Jesús Bëngbe Bëtsábeñe jtsobátmanëse, puerte uantado yojamnama, chë bacna soye amënga corente chabe contra imojtsemna ora. Chca chábeñe šmochtsejuabnaye, tšëngaftanga Crístbiamama oservëniñe ndoñe chacmondëumantšema, ni ainaniñe añemo jtsebomnana ndoñe chašmondájbanama.

⁴ Tšëngaftanga padecena soyënguiñe šmojachnëngo, entšanga bacna soyënga imojt-sama causa, pero mëntscoñama ndoñe cmontsamna jóbanama, Crístbe soyëngama enojuerzániñe; ⁵ y tcmojtsébnëtjomba ndayá Bëngbe Bëtsá tšëngaftangbioye, chabe básenga quetsomñecá tcmojábuayenama. Chë Bëngbe Bëtsabe uabemana palabrenguiñe mëntšá endayana:

Atšbe uaquiñá, Bëngbe Utabná aca jábuayenama tojtseboše ora, aca jasúfriase y padecena soyënga jauántase,

chora ndoñe catjátsjuabnaye chiñe mo canye nduámana soye cuaftsemncá; y cha chacmojuácacana ora, ndoñe cattsajbaná ainaniñe añemo jtsebomnana.

⁶ Er Bëngbe Utabná jábuayenana nda cha tbobobonshanábioye, y jacastígana chë mo chabe uaquiñacá tbojofjábioye ca —chiñe endayana.

⁷ Padecena soyënguiñe chašmojtseufrina ora, šmochtsejuabnaye chë soye yojtsemna tšëngaftangbioye jábuayenama, y chca, Bëngbe Bëtsá tšëngaftangaftaca jtsamana mo chabe básenga quetsomñecá. ¿Nderado nántsemna canye uaquiñá, y chábioye chabe taitá ndocna te buanjuácacana, más tšabá chaotsamama? ⁸ Nderado Bëngbe Bëtsá tšëngaftanga ndoñe tcmonjabuayená, ntšamo nyetsca chabe básengaftaca cha endbetsamcá, as tšëngaftanga ndoñe ntsemnana ndegombre chabe básenga. ⁹ Y bënga básenga monjamna ora, bëngbe bëtsëtsanga quem luarentse monjanamana bënga jácastigana, y bënga chëngbioye ndoñe stëtsoye ntjaquédana. Y mora, bënga más šontsamna, jtsobedecénana y más bëts respeto jtsebomnana celoca Bëngbe Taitabiana, nda tojama entšanga espíritu chamotsebomnana, y chca, bënga tšabe vida chamotsebomnana. ¹⁰ Bëngbe bëtsëtsanga quem luarentse, nye básiesta tescama, bënga jëftsabuayiynayana, y chca jamana chënga tšabá tojtsinýana ora; pero Bëngbe Bëtsá bënga šojtsabuayiyná ora, sempre chca jtsamana bëngbe tšabiana, bënga chabe entšanga jábiamama, cachacá puerte tšábenga, ntšamo cha nyets tempo yomncá. ¹¹ Siempre bënga ndaye castigo tmojtsebomna ora, chora bënga chama ndoñe oyejuayënga ntsemnana, pero aiñe cochtsetšenanënga. Pero bënga chë castigüentšana tmojuatsjinýe ndayá Bëngbe Bëtsá chë sóyeca tbojtsabuayiynacá, as chentšana jóbocnana natjëmbana oyenana, nyetsca soyënguiñe ntšamo tšabá yomncá jtsamëse.

Bëngbe Bëtsábioye jtsabotena, entšangbiana ndoñe tšabá ntsemnana.

¹² Mo nda puerte uamëntšnayacá, jatrabájama tondaye añemo ntjtsebomncá, tsátšena buacuatšëngaca y puerte uamëntšena ntsamiasšëngaca, tšëngaftangbentše básiestanga ya uamëntšnayënga šmojtsemna Bëngbe Utabnabiana trabájayiñe, y ainaniñe ndoñe añemo šmontsebomna. Cachiñe bëts añemo šmochtishache, y Bëngbe Bëtsabe obenana cachiñe šmochtsatsbomna. ¹³ Mo chë canye benache tšabá y ndericho chaotsemnana tmojtsamëngcá, chca, chë coshetënga chiñe jama chamotsobenama y más tšabá jtsatanama chamuatatsjínýama, y chë benachentšana ndoñe chamondëtsebocanama; cachcá tšëngaftanga, chë bëtscá ošbuáchiyana y Cristo jaserviama corente añemo šmobomnënga, chë nye batšatema ošbuáchiyana y chca jatrabájama nye tondaye añemo ndbomnënga šmochjújabuache; chë soye šmochjama, ntšamo Cristo tšabá jaserviama yomncá jinýanyiyëse, y ntjalesenciaca ndocna soye chaotsama chë tšabe benachentšana tšëngaftanga chašmotsojuánañama.

¹⁴ Lempe ntšamo chašmojobenacá šmochjama nyetscángaftaca natjëmbana jtsiyenama, y ntšamo Bëngbe Bëtsabe entšanga mondbetsamcá jtsamëse chašmotsiyenama, cha jtseservënëse; er chca ntjamcá, canya ndoñe ntsoobenana Bëngbe Utabnábioye jinýama. ¹⁵ Yejuana šmochtsantješna, ndocná Crístbeñe ošbuáchiyana chaondëtsajbanama, y chca, chë Bëngbe Bëtsá chabe entšangbioye yochjatšataye tšabe soyënga chënga ndoñe chamondashjache. Smochtsantješna, tšëngaftanguentše ndocná chaondëtsemna, mo canye untja tbëtëjcá, chë chcaja sayëngbioye jásocayana, nda chaotsama, ínýenga natjëmbana ainana ndoñe chamondëtsebomnana y bacna soyënga jtsamëse chamotsiyenama. ¹⁶ Yejuana šmochtsantješna ndocná tšëngaftanguentše shembása o boyabásiestaca bacna soye amá chaondëtsemnana, ni canya ndabiana Bëngbe Bëtsabe soyënga tondaye chaondëtsámama. Esaú chca tojanma, chë lempe yochjanashjachcá, mayor uaquiñá bëtsemnana, chabe uabentsábioye canye šcena sanama tbojtaname

ora. ¹⁷ Y tsëngaftanga šmondëtatšëmbo, chca tojanopasá chentšana, Esaú tojánbošena chabe taitá Bëngbe Bëtsábioye chaboimpadama, chabiamá tsabe bendicionënga chao-mama, chë mayor uaquiñá bëtsemnama yojanobena jtsebomnama soyënga; pero chora chabe taitá ndoñe tbonjanoyeuná, er masque Esaú chora juabna tojantrocá, cha ndoñe tonjanobená ntšamo yojtsopasancá jëtsjandmanana. Masque cha tša tojánbošena, shëchbuíyeca chabe taitábioye jaimpádase, ya ndoñe yontsopodena ntšamo tojanopasacá jëtsjandmanana.

¹⁸ Tsëngaftanga ndoñe chešmatobeconá, mo chë entšanga Israeloca Sinaí ca uabaina tjoye tmojanobeconacá, ndayá chënga imojobena jabojuama, y íñsheca yojtsángbototjuana, tondaye binýniñe luare, tša ibetiñe y puerte jabuache binýiëngaca; ¹⁹ ni chešmatuena chëngcá, canye trompetéjua uajatëtanana, ni Bëngbe Bëtsabe oyebuambnayana. Chë oyebuambnayana tmojanuenënga, imojtseimpadana ndoñe más chëngbioye chaondëtsóyebuambnama. ²⁰ Chca tmojanma, jauántama ndoñe tmonjanobená causa, ntšamo Bëngbe Bëtsá tojanamëndacá: “Nda quem tjoca chaojoyená, masque canye bayá chaotsomñe, entsemna chana ndëtsbéngaca chamotsatëchënjanga jtsóbama ca.” ²¹ Ndegombre, ntšamo tmojaninýcá tša uabouana yojtsemna, cach Moisésnaca mëntšá tojánayana: “Tša šontsengmëmná auatjananá sëntsemna causa ca.”

²² Pero tsëngaftanga Bëngbe Bëtsábioye šmojobeconá, y chca endmëna mo tsëngaftanga canye Sión ca uabaina tjoye celoca cuafjobeconacá, chë Bëngbe Bëtsá nyets tempo vida bomnabe bëts puebioye, mo celoca Jerusalén cuenta; y ba uaranga angelëngbioye šmojobeconá, cányiñe oyejuayënga enefjuanënga imojtsemnëngbioye, Bëngbe Bëtsá jt-satschuanayama. ²³ Endmëna mo tsëngaftanga chë Bëngbe Bëtsabe entšángbioye cuafjobe-conangcá, chentse enefjuanënga mo Bëngbe Bëtsabe basengcá, chënga ndayá chë Taitá tojašebuachenacá jóyëngacñama, ndëmuanýënga Bëngbe Bëtsá chabe librëšañe tojúbiamá. Tsëngaftanga šmojobeconá Bëngbe Bëtsábioye, ntšamo nyetsca entšanga tmojamcá tsabá o ndoñe tsabá bëtsemnama yochjayanábioye. Endmëna mo tsëngaftanga cuafjobeconacá, chë entšanga mora ya obanënga y ntšamo tsabá yomncá jtsamëse imojëftsiyenëngbe espiritëngbioye, chë entšanga ndëmuanýëngbiamá Bëngbe Bëtsá tojanma chamotsem-nama lempe ntšamo chabe entšangbiamá yojanjuabnacá, chca, cháftaca sempre vida jëftsebomnama. ²⁴ Tsëngaftanga Jesúsbioye šmojobeconá, chë jóbanëse, entšanga Bëngbe Bëtsáftaca mo canýacá chamotsemnama tojanmá, ntšamo Bëngbe Bëtsabe tsëm trato yojamncá; y endmëna mo chë bëngbiamá cha tojanóbana ora tojanábuashana buiñoye tsëngaftanga cuafjobeconacá; chca tojanábuashana, bëngbioye Bëngbe Bëtsabe delante mo tsabengcá jábiamama, mo ntšamo entšángbeñe buiñe jabuéscacjama chë bachnanga imojuamancá. Caín chabe catšata Abélbioye tbojanóba ora, yojamna mo chë Abelbe uabuáshanana buiñe Bëngbe Bëtsábioye cuaftseimpadancá, chë bacna soyama castigo chaotsemnama; pero Jesucristbe buiñe ndoñe chca ntsamana, ndayá chíyeca bënga más tsabe soyënga jashjáchana; Jesusbe buiñeca, bënga montsobena atsebácanënga jtsem-nama.

²⁵ Cuedado šmochtsebomna, bëngbioye tojtsoyebuambná ora cha joyeunayama. Chë Israeloca entšanga ndoñe tmonjánbošena Bëngbe Bëtsá joyeunayama, chë Sinaí tjoca quem luarentse tojanabuayená ora; chëngbioye cha tojanacastigá. Y mora más, Bëngbe Bëtsá, chë celocana bënga abuayiynayá, ndoñe cachcá ndëcastigánënga quešochátabashejuana, ntšamo cha šojtsëtsëtsnacá ndoñe tmontseyeunanëse. ²⁶ Bëngbe Bëtsá Sinaí tjoca chë entšángbioye tojanoyebuambá ora, chabe oyebuambnayánaca to-janma quem luare chauangmëmanama, pero mora cha chabe uabemana palabrënguiñe tojašebuachená: “Atse cachiñe chanjatsma chauangmëmanama, ndoñe nýe quem luare, sinó celócnaca ca.” ²⁷ Bëngbe Bëtsá “cachiñe ca” tojánayana ora, chë sóyeca yojtsichamo, chë ndayté lempe chaongmëmanama cha cachiñe yochjama ora, chë

quem luarentše tmojama soyënga y chë jatrócama yopodena soyënga yochtsejuána ca, chca, nÿe chë nÿetsca tescama yomna soyënga y ndoñe jatrócama soyënga chaoquedama. ²⁸ Chcasna, Bëngbe Bëtsabe amëndayoca, chë cha yochjama bënga chamuamashënguama luare, yomna cachcá nÿetsca tescama y ndocna te ntjotrócana. Bëngbe Bëtsá chama mochjëtschuaye, y ntšamo cha tšabá tbojtsinÿancá mochtsadorana, chabiamá bëts respeto jtsebomnëse, y nÿetscangbiamá más bëtsá cha yomnama jtsejuabnaye. ²⁹ Er Bëngbe Bëtsá puerte etonaná chë chabiamá nduauenanënga jabuache echanjácastigaye, y chca, cha jtsemnana mo canÿe íñeshe lempe jtsepochoamcá.

13

Ntšamo jtsiyenama, Bëngbe Bëtsá oyejuayá bëngaftaca chaotsemnana

¹ Sempre nÿetscanga šmochtsenbobonshana, Jesucristbeyeca catšátanga quetsomñecá. ² Sempre tšabá chë tšëngaftangbe yebnoye inÿe luarëngocana tmojáshjajnënga šmochjúbuaja, er chca jamëse, ntsetatšëmbcá báseftangna angelënga chëngbe yebnentše tmojanëbuaja.

³ Chë utámenëngbiamá sempre šmochtsenójuabnaye, mo tšëngaftángnaca chëngaftaca utámenënga cuaftsemncá. Chë ínÿenga tmojtsama chamotsesufrinëngbiamá šmochtsenójuabnaye, er tšëngaftángnaca nderado cachcá šmatjatspása.

⁴ Boyabása y shembása tbojanobouamá ora, ntšamo tbojanenšbuachenacá nÿetscanga chamotserrespetana; y chë útata chabotsama nÿe ndayá y nÿe ntšamo Bëngbe Bëtsá bouamnátbioye tojanamëndacá, er Bëngbe Bëtsá echanjácastigaye chë shembása o boyabásaftaca bacna soye amënga, y chë shema o boyábioye ínÿaftaca ingñayëngnaca.

⁵ Ndoñe šmattsiyena jtsejuabnaye nÿe mallajta crocénana jëftsebomnama. Nÿe chë šmobomna soyëngaca oyejuayënga šmochtsomñe, er Bëngbe Bëtsá tojánayana: “Ndocna te cachcá quebochatonÿaye, ni canÿa quebocháiseboshjona ca.” ⁶ Y chca, bënga montsobena corente añémoca jayanama:

Bëngbe Utabná endmëna nda atše šonduájabuachana; tondayama quichátauatja. ¿Ndayá canÿe entšá nanjobenaye átšeftaca jamama ca?

⁷ Tšëngaftangbe amëndayëngbiamá, chë Bëngbe Bëtsabe buayenana soyënga tmojábuatambangbiamá, sempre šmochtsenójuabnaye. Sempre šmochtsenójuabnaye chë ntšamo chënga imojaniyentsšana tojanóbocna tšabe soyëngama, y šmochtsiyena jtsamëse ntšamo chënga imojanamcá, Jesucristbeñe ošbuáchiyënga bëtsemnana.

⁸ Jesucristo cachá nÿets tempo iuétsemna, tempo, mora y nÿetsca tescama. ⁹ Ndoñe šmatjaleséncia ínÿenga chamotsamama tšëngaftanga chë benachentsšana chašmotsojuánañama, ndayá chënga tmojtsabuátambama, y chë Cristo tojánabuatambama contra soyëngaca. Más tšabá endmëna bënga ainaniñe añemo jtsebomnana, Bëngbe Bëtsá tšabe juabna bëngbiamá yobómnyeca, y ndoñe chë sanama, chë ndayá aíñe o ndoñe šontsamna jtsesayana soyëngama mandënga tcojtsamëse. Chca mandënga ndocna te chë Israeloca entšangbiamá tempo tonjanoservé.

¹⁰ Bënga chë Jesucristbeñe mondošbuáchenga, canÿe soye mondbomna mo chë Bëngbe Bëtsábioye jëtschuayama altaroca juinÿena soycá, bacna soyëngama perdonánënga jtsemnana. Bënga mondbomna chë Jesucristo bëngbiamá tojanma soye, cruzoca tojanóbana ora, bëngbe bacna soyëngama; y chë nÿe tmojóba bayëngaca soyënga tmojtsama bachnanga ndoñe ntsebomnana, chë Cristo tojanóbana ora, ndayá tojanmentšana tojanóbocna tšabe soyënga. ¹¹ Er chë judiëngbe más uámana bachnangbe amëndayá, chë tmojóba bayëngbe buiñe chë “más uámana ca” uabaina luaroye juabuyambana, Bëngbe Bëtsá entšangbe bacna soyëngama cháuperdonama, y chë bayëngbe cuerpënga jtsejuinÿiyana entšanga tmoyena luarentšana chaboca. ¹² Cachcá, Jesúsna tojansufrí y tojanóbana bëts pueblentsšana chaboca, chabe buiñe tojanábuashana ora jóbanëse,

entšanga Bëngbe Bëtsábenga chamotsemnana, y chabe delante mo tšabengcá chamotsemnana. ¹³ Chíyeca bënga šontsamna Jesúsbiöye jobéconana, nda entšanga tmojt-sanaboté y bëts pueblentšana chaboca tojanóbana. Cha mochjuasto, y ntšamo cha tojansufricá bëngnaca mochjasúfria. ¹⁴ Er quem luarentše bënga ndoñe quemátsbomna canye bëts pueblo bëngbiana, nyets tempo chauesomñe bëts pueblo, ndayá bëngna tša mondboše y puerte mondobátmana bënga joyéanama chë celoca yochtsemna Bëngbe Bëtsabe bëts pueblentše. ¹⁵ Chíyeca, šontsamna sempre Bëngbe Bëtsábioye jtsatschuanayana, Jesucristbiajana. Bëngbe Bëtsá chca tmojtsadorana ora, jtsemnana mo chábioye jëtschuayama canye soye cuafjuatšëmbonca. Chcasna, jtsóyebuambnayëse cha mochtsadorana. ¹⁶ Sempre ntšamo tšabá yomncá šmochtsama, y chë šmobomncá inyëngbiámnaca chaotsemna. Chca šmochtsama, er chca tcojama ora, Bëngbe Bëtsá oyejuayá jtsejuabnayanana chca chabiana tcojama ca, y jtsinynana bënga Bëngbe Bëtsá imojtsatschuanama, ndayá cha tojamama.

¹⁷ Sempre šmochtsama ntšamo chë tšëngaftanga ošbuachiyëngcá enefjuanëngbeñe amëndayënga tmojayancá, y sempre šmochtsiyena jtsamëse nye ntšamo chënga tmojtsebošcá. Chënga sempre tšëngaftangbioye jtsanýenana, tšëngaftangbe tšabiana, ntšamo cmojánanýenama Bëngbe Bëtsábioye jojuama yojtsamnama chënga jtsetatšëmbëse. Jtsayaunanëse, šmochjama chënga chëngbe trabajo oyejuayánaca y ndoñe ngménaca chamotsamama, er ndoñe chca šmonjamëse, chë trabajo tšëngaftangbe tšabiana ndoñe nántsemna.

¹⁸ Bëngbe Bëtsá bëngbiana šmochtseimpadana, er bënga ainaniñe corente fsëndétatšëmbo tšabá tifjamama, y tša fsëntseboše jtsiyenana ntšamo tšabá yomncá lempe jtsamëse. ¹⁹ Tšëngaftanga bëtscá cbontsaimpadana, Bëngbe Bëtsá chašmoimpadama, atše chašolesenciana tšëngaftangta cachiñe jtsatsmënana.

Bëngbe Bëtsábioye chëngbiana jaimpádama y chënga jacheuayama

²⁰ Atše, Bëngbe Bëtsá sëntseimpadana, cha chë nda endbétsama bënga natjëmbana chamotsiyenama, y nda tojanma Bëngbe Utabná Jesús cháuatayenama, nda bënga šondánýena mo oveshëngbe tšabe abuañëncá; y Bëngbe Bëtsá chca tojanma, Jesús, chabe buiñe juabuáshanëse tojanóbanayeca, chca, entšanga jinýanýiyama ndegombre bëtsemnana ntšamo Bëngbe Bëtsá chabe entšangbiana tojanašebuachenacá nyetsca tescama jamama. ²¹ Cha sëntseimpadana chaoma tšëngaftanga chašmotsebomnama nyetsca tšabe soyënga ntšamo cmojtsëjabotcá, chca, lempe ntšamo cha yobošcá tšëngaftanga chašmotsamama; y cha Jesucristoftaca chaboma bëngaftaca ntšamo cha tšabá tbojtsinýancá. ¡Nyetscanga nyetsca tescama Cristo chamotsatschuaná! Chca chaotsemna.

²² Jesucristbeyeca catšátanga, tšëngaftanga cbontsaimpadana, jábuayenama ntšamo tcbonjauyancá, puerte uantádoca tšabá chašmóyëngacñama, er nye básefta palabrëngaca chama tcbonjubuábiana. ²³ Atše sëntseboše tšëngaftanga chašmotsetátšëmbo, Timoteo Jesucristbeyeca bëngbe catšata, ya ndoñe utamená yontsemnana, y cha betesco átšbioye chaojtabëse, átšeftaca chanjëftsbetše tšëngaftanga jányama chajá ora.

²⁴ Tšëngaftanga ošbuachiyëngbeñe nyetsca amëndayënga šmochjácheuaye, y nyetsca Bëngbe Bëtsabe entšángnaca choca. Chë Italia luaroquënga ošbuachiyënga tšëngaftanga cmontsacheuaná.

²⁵ Atše, Bëngbe Bëtsá sëntseimpadana, cha chaoma tšabe bendicionënga tšëngaftangbeñe chaotsemnana.

Santiago

Jacheuayama

¹ Atše Santiago, Bëngbe Bëtsá y Bëngbe Utabná Jesucristbe canye oservená, tšëngaftanga cbontsëbuabiamná, tšëngaftanga chë bnëtsana uta Israeloca bëts pamíllangbioye nyets luarëjana ujquëshenënga. Atše cbontsacheuaná.

Chë Bëngbe Bëtsábiocana osertánana

² Jesucristbeyeca atšbe catsátanga, tšëngaftanga ndaye padecena soyënguiñe chašmojtsiyena ora, chiñe šmochjájuaboye mo chca tšëngaftangbe tšabiamna cuaftsemncá y šmochjóyejuaye; ³ er tšëngaftanga šmondëtatšëmbo, chcañe chašmojtsajna ora, šmochtsetátšëmbo cach tšëngaftanga Jesucristbeñe puerte šmošbuaché o ndoñe. Chca ora bëts ošbuáchiyana chašmojtsebonnëse, šmochanjobenaye, Bëngbe Bëtsábeñe jtsobátmanëse añémoca jtsemnana, masque padecena soyënguiñe chašmotsomñëse. ⁴ Pero chca chašmojtsemnëse, šmochtsentšena jashjáchama ntšamo canye entšá Bëngbe Bëtsabe soyëngama corente osertaná yomncá chašmotsemnana, ntšamo Bëngbe Bëtsá yobošcá chašmotsiyenama, chiñe ni mo canye soye jamama chacmondëtsabuashebenëse.

⁵ Nderado nda tšëngaftanguentšana ndoñe tontsobena corente osertánana jtsebonnana, cha bontsemna Bëngbe Bëtsá jaimpádana cha chaoma aíñe chana jtsebonnana, y Bëngbe Bëtsá chana bochanjátsetaye; er Bëngbe Bëtsá nyetscanga bëtscá endbëtsatsatnaye y ndocnábioye jatáboyënjana. ⁶ Pero cha bontsemna, Bëngbe Bëtsábeñe puerte jtsošbuáchiyëse chama cha jaimpádana, y cha nderado ndoñe bochanjóyeunayama ntjatatëmnancá. Nda mëntšá tojtsamëse, inye ora aíñe Bëngbe Bëtsábeñe cuaftsošbuachecá y inye ora ndoñe, cha entsemna mo canye olëshcá, mar béjayoca binýia nye cáatoye jtsambayana. ⁷ Chca ama entšá ndoñe chaondëtsejuabná, Bëngbe Utabná bentšana ndayánaca jatóyëngacñama. ⁸ Cha jtsemnana canye entšá, mora canye soye juabnayá, pero chentšana inyetsá jatójuabnañana. Chca, cha jtsiyenana nyetsca soyëngama uta soye jtsejuabnayëse, y chca cha ndoñe ntsoobenana tondaye puerte tšabá jamama.

⁹ Chë Jesucristbeñe ošbuachiyá, ndbomnjëjema y ndoñe yapa uámana entšá tomná, corente oyejuayá chaotsemna, er Bëngbe Bëtsabe bominyiñe cha canye uámana entšá jtsemnana; ¹⁰ y chë bomnánaca puerte oyejuayá chaotsemna, Bëngbe Bëtsá chábioye nduámana entšá chabojábema ora, er mo chë shacuaníñe uantšëfjushacá, cha ndoñe nyets tempo quem luarentšë ntjëftsiyenana. ¹¹ Shinye tojábocna y becá tojojënyana ora, chë shácuana jtsebuashana, chë uantšëfjúsha jtsátsatšana y chabe uabótamanana ya ndoñe más ntsebínýnana. Cachcá chë bomná, echanjóbana nye cachabiamna más becá crocénana onguayiñe chaojtsemna ora.

Bacna soye ocochënguentšana tšabá jabocnana

¹² Oyejuayá chaotsemna chë entšá chë padecena soyënguentšana tšabá tojëtšbocná, cabá Jesucristbeñe ošbuachiyá; chama Bëngbe Bëtsá chabiamna oyejuayá echántsemna y echanjama chë nyetsca tescama yomna tšabe vida cha chaotsebonnana, mo uacananancá chabe ošbuáchiyama. Chë soye Bëngbe Bëtsá tojašebuachená nyetscanga cha imobobonshánëngbioye. ¹³ Nderado nda bacna soye jamama tbojócochëngo, ndoñe chaondëtsejuabná Bëngbe Bëtsá chca cháftaca yojtsama ca; er Bëngbe Bëtsá ndocna te bacna soye jamama jócochënguana, y cha ndoñe ntsamana inyënga bacna soye jamama chaócochënguama. ¹⁴ Inyetsá endmëna, canya bacna soye jamama jócochënguana, bacna juabnënga tojtsebonna ora; cha chiñe nye jësejuabnayana y chë soye jtsasjayana cha chca jamama. ¹⁵ Nda yapa bacna soyënga tojtseboše, cabana cha pronto chë bacna soye

jamana; y nda sempre bacna soyënga tojtsama, chama Bëngbe Bëtsá nyetsca tescama bochanjacastíga.

¹⁶ Atšbe bonshana catšátanga, ndoñe matenoíngña, jtsejuabnayëse Bëngbe Bëtsá yojtsama tsëngaftanga bacna soyënga chašmotsamama ca. ¹⁷ Nyetsca tsabe soyënga y chë puerte tsabe soyënga tsbanánocana endobá, Bëngbe Bëtsá chë Taitábiocana. Y cha chë shinÿe, juashcona, y nyetsca chë celoca yobuashinÿinÿana soyënga tojamá, nyets tempo nÿe cachá uesomñe y ndoñe inÿa ntjátsmënana. ¹⁸ Cachá jamama tojánbošenayeca, bënga chábenga šojánabiamana, bënga chabe ndegombre palabrenga jouenëse. Cha chca tojama, lempe ntšamo Bëngbe Bëtsá quem luarentše tojamentšana, bënga chë natsanënga chábenga chamotsemnana.

Ntšamo ndegombre yomna Bëngbe Bëtsábioye tsabá jadórama

¹⁹ Atšbe bonshana catšátanga, quem soyama šmochtsenójuabnaye: nyetsca tsëngaftanga cmontsamna sempre jtseprontánana jouenama; pero jóyebuambayamna jobátmana y inÿengaftaca jetnámna. ²⁰ Inÿaftaca tbojetna ora, canÿe entšá ndoñe ntsamana ntšamo Bëngbe Bëtsá yobošcá, chë nyetsca soyënguiñe tsabá jtsamana. ²¹ Chcasna, šmochtsajbaná bacna soyënga jtsamëse oyanana, y amana nyetsca soyënga ndoñe ntšamo Bëngbe Bëtsá yomandacá; y chë Bëngbe Bëtsá tojama tsëngaftangbe ainaniñe chaómashënguama buayenánana, ntjatoserbnaycá šmochjójyëngacñe. Chë buayenánana chašmojóyeunase, echanjopódia tsëngaftanga atsebácanënga jtsemnana.

²² Ndoñe quecmátamna nÿe chë Bëngbe Bëtsabe buayenánana jouenana, ndayá ntšamo cha tojayancá aiñe jtsamana; ndoñe chca šmontsamëse, cach tsëngaftanga šmontsenoíngña. ²³ Nda nÿe chë buayenánana tojouena, pero betesco tbojtsebnatjëmba y ndoñe tontsama ntšamo chiñe tojtsayancá, cha jtsemnana mo canÿe entšá chabe jubiá espejuiñe tojtsenonÿacá: ²⁴ chana cachá jtsenónÿayana, pero chë espejo tojabuertaná ora, jtsebnatjëmbana ntšamo cha bëtsemnana. ²⁵ Pero nda ntšamo tojouencá ndoñe tbonjebnatjëmba, y sempre tojtsejuabná chë entsanga játsebacama Bëngbe Bëtsabe puerte tsabe mando chabosertama, y tojtsiyena ntšamo chë mandënguentše endayancá, lempe ntšamo chë entšá chaojtsamiñe oyejuayá Bëngbe Bëtsá bochanjábema.

²⁶ Nderado nda tojtsejuabná Bëngbe Bëtsábioye ibojtsadorana ca y chë Bëngbe Bëtsábioye adorayá ntšamo ibomncá cha yojtsama ca, pero ndoñe tontsobena bacna soye oyebuambnayana jtsajbanana, cachá yojtsenoíngña, y nyetsca soyënga ntšamo tojtsamcá Bëngbe Bëtsá jadórama, chabiamana tondaye ntsámanana. ²⁷ Bëngbe Bëtsá chë Taitabe bominiñe, chë puerte tsabe y ndegombre soyënga, ndayá entšá ibojtsemna jamana endmëna: chë uajchonga y viudanga corente ngmënënga tmojtsemna ora jujabuáchana, y ndoñe bacna soyënga játamana, mo chë nÿe quem luarama enójuabnayënga mondbet-samcá.

2

Nyetscanga tsabá jtsatenonÿayëngana

¹ Tsëngaftanga, Jesucristbeyeca atšbe catšátanga, šmondošbuaché Bëngbe Utabná Jesucristo, chë puerte bëtsá y uamanábeñe; chíyeca tsëngaftanga cmontsamna nyetsca entsanga cachcá jtsatenonÿayëngana. ²⁻³ Nderado tsëngaftanga cánÿentše šmojënefjna, y chora canÿe bomna entšá tojášhango castellano ntšabuchëtjonëfjangaca y uámana entsayëjuangaca bopormaná, cha botamana šmojúmashëngo y mentsá šmojayuana: “Moca quëfseroca mabesótbema ca”. Pero cachca ora, canÿe ndbomnjëjema tojášhango uandocuenta entsayá uichëtjoná, y cha šmojayuana: “Acna choca tsanana cochtsemna o chafjoca mótbema ca”. ⁴ Chca tsëngaftanga ya šmontsama cach tsëngaftanguentše báseftanga más uámanënga inÿengbiamana chamotsemnana, y chca šmojtsama, ana bacna juabnënga šmojtsebomna causa.

⁵ Atsbe bonshana catsátanga, quem soye šmochjouena: Bëngbe Bëtsá quem luarentše ndbomnënga imomnënga tojabacacá, chënga canye puerte uámana soye chamotsebomnama, Jesucristbeñe puerte chamotsošbuáchema; y mo otocana soycá Bëngbe Bëtsabe amëndayama chamosháchiñama. Cha imobobonshánëngbioye chë soye jatsatayama tojašebuachená; ⁶ pero tsëngaftanga chë cuenta, mo ndoñe cach tsëngaftangcá entšanga bendmëncá chëngbioye jtsénjyayana. Ndegombre, chë bomnënga mondmëna chë nye sempre cmondbëtsamëndayënga y chë sjojónana chë pueblentsa mandadëngbioye cmondbáunatsënga. ⁷ Y cach bomnëngnaca mondmëna chë Cristbiana podesca oye-buambnayënga, ndábënga tsëngaftanga šmondmëna, y chabe uabaina tsëngaftangbiana puerte enduámana.

⁸ Bëngbe Bëtsabe uabemana palabrenguiñe mëntšá endayana: “Ndëmua entšánaca cochtsebomshana ntšamo cach aca cuenobobonshancá ca.” Tsëngaftanga ntšamo chë Bëngbe Utabnabe mandiñe endayancá ndegombre šmojtsamëse, tsabá šmochántsama. ⁹ Pero tsëngaftanga ndoñe cachcá šmontsenonjase, chcana bacna soye jtsamana y šmojama ntšamo Bëngbe Bëtsabe leyënguiñe ndoñe yondëlesenciancá. ¹⁰ Y mora, canye entšá nyetsca chë leyentsa mandënga tojtsobedecena, pero ndoñe tontsama ntšamo nye mo canye mando ntšamo iuayancá, cha Bëngbe Bëtsabiana jtsemnana canya ntšamo nyetsca chë leyentsa mandënguiñe ndoñe yondëlesenciancá amá. ¹¹ Cach Bëngbe Bëtsá, chë “acbe shema o boyábioye ínÿaftaca ndoñe cattseíngñaye ca” tojanayaná, cachá mëntšánaca tojánayana, “ínÿabioye ndoñe catjóba ca”. Chca, nda cachabe shémbioye ínÿaftaca ndoñe tbonjaingñé, pero aíñe ínÿabioye tbojóba, chca, Bëngbe Bëtsabiana cha jtsemnana canya nyetsca chë leyentsa mandënga ndocumpliná.

¹² Tsëngaftanga cmontsamna jtsóyebuambnayana y jtsamana ndayá Cristo šojanamëndacá, atsebacana entšangcá, er Bëngbe Bëtsá echanjayana ntšamo tmojamcá aíñe o ndoñe tsabá bëtsemnana. ¹³ Er chë ínÿengbiana ndoñe ngmënana bomnëngbiana, Bëngbe Bëtsá ntjongmiacá echanjayana ntšamo tmojamcá aíñe o ndoñe tsabá bëtsemnana; pero chë ínÿengbiana aíñe ngmënana bomnëngbiana, ntšamo tmojamcá aíñe o ndoñe tsabá bëtsemnana Bëngbe Bëtsá chaojayana ora, chënga tsabá chentsana mochanjábocana.

Chë ndegombre ošbuáchiyana, soyëngaca jinÿanÿiyana

¹⁴ Atsbe catsátanga, ¿ndayama cánÿabioye buanjosería jayanana aíñe Jesucristbeñe sëntsošbuaché ca, pero cha ínÿengbiana tsabe soyënga ndoñe tontsama, y chca, ntšamo cha tojtsamcá ndoñe tontsinÿanÿná cha Jesucristbeñe yošbuáchema? Ndegombre, cha nye chca tojtsichámëse, ndoñe ntsopodénana cha atsbocaná chaotsemnana. ¹⁵ Nderado canye boyabása o shembása ošbuachiyá entsayá tbojtsabuáshbena y saná chë te jasamnaca tbojtsebuáshbena, ¹⁶ y canya tsëngaftanguentsá tbojauyana: “Diošoftá, sësnama ndoñe chacondëtsepadecena y becá chacuatoshachá ca”, pero chca chaotsemnana chábioye tondaye tbonjatsetase, ¿ndayama nantsoserverna chca jayanana? ¹⁷ Cachcá, nda tojayana Jesucristbeñe yošbuaché ca, pero ndocna tsabe soyënga tontsama, chë ošbuáchiyana bomnana jinÿanÿiyama, nye chca ošbuáchiyana jtsebomnana tondayama ntsoservénana.

¹⁸ Pero nderado ndánaca mëntšá echanjayana: “Aca Jesucristbeñe icošbuaché, pero atšna ínÿengbiana tsabe soyënga sëntsama ca.” Chora atše stjojuá: “Sminÿinÿé ntšamo canya nantsobena Jesucristbeñe jtsošbuáchiyana, chca chaotsinÿnama tondaye ntsamcá, y chora, ndayá tijamama atšbe ošbuáchiyana cbochjinÿinÿiye ca.” ¹⁹ Aca condošbuaché nye canye Bëngbe Bëtsá yomnama y chca tsabá contsama; pero chë bacna bayëjëgnaca chiñe jtsošbuáchiyana, y chë causa chënga uatjana jtsebomnana y jtsangmëmnyana. ²⁰ Ndoñe obëjema cattsemna; ndegombre cbochanjinÿinÿiye nderado nda Jesucristbeñe tojtsobuaché, pero tondaye tontsama chca chaotsinÿnama, chabe ošbuáchiyana tondayama ntsoservénana. ²¹ Bëngbe Bëtsá tojánayana chabe bominiñe

Abraham, bəngbe tempsca bəts taitá, tšabia yojamna ca; chca tojánayana, er Bəngbe Bətsá tbojanmandá ora, yojtseprontana chabe uaquiñá altariñe jóbama, cach Bəngbe Bətsábioye jətschuayama. ²² Aca contsobena Abrahámbeñe jinýama, cha Bəngbe Bətsábeñe yojanošbuáchema, y soyənga yojánama chca chaotsinýnama; y ndayá cha tojanmama entsinýinýena, cha ndegombre puerte bətscá yojanošbuáchema. ²³ Chca tojanopasá ntšamo Bəngbe Bətsabe uabemana palabrənguiñe endayancá, mēntšá: “Abraham Bəngbe Bətsábeñe yojtsošbuáchiye, y chama Bəngbe Bətsá tojánayana chabe bominiñe cha tšabia yojamna ca.” Y Abraham entsanabaina Bəngbe Bətsabe amigo ca.

²⁴ Y tšəngaftanga šmontsetátšəmbo, Bəngbe Bətsá ináyana canýe entšá chabe bominiñe tšabia yomna ca, chə entšá ndayá tojtsamama, chabe ošbuáchiyana chaotsinýnama, y ndoñe nýe ošbuáchiyana tojtsebomnama. ²⁵ Cachcá tojanopasá Rahab, chə bacna vida bomna shembásaftaca; Bəngbe Bətsá tojánayana chabe bominiñe cha tšabia yojamna ca, er cha canýe tšabe soye tojanma. Cha chə noticia uambaye judiənga posada tojanəyentšame, y chentšana tojanəjabuache inýe benachəjana chamuáisebocanama, chə pueblentša soldadəngbiama chamotsachetama. ²⁶ Lempe básefta palabrənguiñe jayanamna mēntšá entsemna: ntšamo canýe cuerpo, espíritu ndbomna cuerpo, pronto jóbana, cachcá chə ošbuáchiyana, ndocna soyəngaca tontsemna, chca chaotsinýnama, tondayama ntsošservénana.

3

Bichtájaca tšabá jóyebuambayama endmēna

¹ Jesucristbeyeca atšbe catšátanga, ndoñe yapa buátəmbayənga tšəngaftangbeñe chamondətsemna; er tšəngaftanga ya šmondətətšəmbo, bənga, chə entšanga abuátambayəngbiama, chə castigo más bətscá yochtsemnama, Bəngbe Bətsá ndoñe tmonjóyeunase, ntšamo entšanga tmojamama aíñe o ndoñe tšabá bətsemnama cha chaojayana ora. ² Bənga nýetscanga nýetsca bacna soyənga mondbétsama. Nderado nda oyebuambnayiñe ni mo canýe bacna soye tonjama, chə entšá puerte tšabia jtsemnana, ntšamo Bəngbe Bətsá yobošcá jtsiyenése, y cha yojtsobena cachá sempre jtsemomándayama.

³ Chə couayəngbioye freno tmojuayashbé ora, ntšamo bənga tmojtsebošcá chənga mochántsama, y bənga cachora jtsobenana ntšamo nýets chəngbe cuérpoca tmojtsamcá jtsemándayana, y ndoñe nýe chəngbe bestšaše. ⁴ Barquəshamnaca smochjenójuaboje. Masque tša bətsətsacueməngá y tša jabuache binýiənga chə barco jtsəjuatsəntšayana, chə uamanəjayənga chə barco juyambana ndayəjana tmojtsebošcá, y chca, nýe canýe base soyetémaca, timón ca uabainətémaca. ⁵ Cachcá, chə bichtaja cuerpiñe canýe base soyetema endmēna, pero chə bichtájaca entšanga jtsenábotamnayana bəts soyənga tmojamama. Smochjouena, canýe base íñeshe jtsobenana canýe bəts tjañe juangbotjuama. ⁶ Y chə bichtaja endmēna mo canýe íñeshcá, mo canýe luare ndayentše puerte bacna soyənga tobinýncá. Chə bichtaja jtsobenana bəngbe cuerpentše puerte bacna soyənga bəngbiama jamama. Mo canýe íñeshe becá tojtsembiamnacá, chə bichtájaca tcojtsichamo ndoñe tšabe soye, jtsobenana bacna soyənga bəngbiama jamama nýets tempo quem luarentše tmuetsiyenəntscuana; y mo nda ndayá tojtsangbotjuacá, Satanás jtsobenana chə bichtaja jtsemándayana, bacna soyənga chaotsamama.

⁷ Entšá endobena jtsaməndayana nýetsca tjoica bayənga, shloftšənga, osjojnayənga y buyeshiñe oyena bayənga; y ndegombre mora entsamənda; ⁸ pero ndocná tonjobená chə bichtaja jtsemándayana, chca, bacna soyənga amana chaotsajbanama. Chə bichtaja jtsamana bətscá bacna soyənga cada te chauétsebinýnama, y mo canýe mətscuaycá veneno jtsebomnana jóbama, chə bichtájaca cachcá endmēna. ⁹ Bichtájaca bənga puerte tšabá Bəngbe Bətsá y Taitabiama jtsichámua, y cach bichtájaca bənga puerte bacá entšangbiama mondbétsichamo, masque Bəngbe Bətsá cachacá enoparecəngna

chënga tojábiamana. ¹⁰ Cach uayásentsana jtsóbocanana Bëngbe Bëtsabiamana tšabe palabrënga y entsangbiamana bacna palabrënga. Jesucristbeyeca atšbe catsátanga, chca ndoñe chaondëtsemna. ¹¹ Canye béjaye obocanentsana ndoñe ntsopodénana tšabe búyeshe chaóbocnana y cachentsana untja búyeshnaca. ¹² Ntsamo canye higo betiyentsana ndoñe ntsopodénana olivosësënga jashacama, y canye uvas betiyentsana ndoñe ntsopodénana higuëbenga jashacama, cachcá, atšbe catsátanga, tamona búyeshentsana ndoñe ntsopodénana tšabe búyeshe chaóbocnana.

Bëngbe Bëtsábiocana óbocana osertánana

¹³ Nderado tšëngaftanguentše tojtsemna canye puerte tatšëmbuá y osertaná, cha bontsemna, chca yomnana entsanga jinýanýiyana, tšabe soyënga amana jtsiyenëse y chë ntjatosoberbnaycá tojama soyëngaca; y cha chca jamana, puerte osertaná bëtsemnana. ¹⁴ Pero tšëngaftangbe ainaniñe yapa ínýabioye šmojtsántšaboše y nye ínýenga chamotjáyana soyënga šmojtsama, as ndoñe šmattsenábotamnaye osertánënga y tšábënga šmomnana, er ndegombre Bëngbe Bëtsabe osertánana tšëngaftanga ndoñe šmontsebmna. ¹⁵ Er chca osertánana, Bëngbe Bëtsábiocana ndoñe ntsóbocanana, ndayá nye quem luarama enójuabnayëngbentsana, nye entsangbe juabnentsana, y canye bacna bayëjbentsana. ¹⁶ Ndayentše entsanga yapa tmojtsenántšaboše, y nye ínýenga chamotjáyana soyënga tmojtsama, chentše tondayama quemochátenëyeunana y nyetsca bacna soyënga mochántsama.

¹⁷ Pero chë Bëngbe Bëtsábiocana óbocana osertánana bomnënga, nyetsca soyamna, natsana puerte tšabe vídaca jtsiyenana, bacna soyëngaca ndëmandánënga; y chënga jtsemnana chë ínýenga ndoñe chamondëtsejtsjanama amënga, tšábënga y sempre jtseprontánana ínýenga joyaunayama. Y cach quemënga jtsemnana ínýengbiamana ngménana bomnënga, sempre tšabe soyënga jtsamana, cachcá nyetsca entsangbioye jtsënyayana, y ntsamo ndegombre tojtsemncá jtsichámuana y jtsamana. ¹⁸ Ntsamo canye jená, botamana shajuana jtsebmna tšabe jénaye jájena, cachcá, sempre natjëmbana jtsiyenama bošëngna, natjëmbana ínýengaftaca jtsiyenana, chca, nyetsca entsanga chamotsamama ntsamo Bëngbe Bëtsabe bominyiñe tšabá yomncá.

4

Smochtsiyena Bëngbe Bëtsá tšëngaftangbeñe jtsemándayëse

¹ ¿Ndayentsana chë tšëngaftanga jtsentsjanayama y jtsenpenzentsiyama yóbocana? Endóbocana chë tšëngaftangbe bacna juabnënguentsana, nye cach tšëngaftanga tšabá jt-somñama; y chë soyënga tšëngaftangbe ainaniñe sempre chë tšabe juabnëngama contra jésemnana. ² Tšëngaftanga ndayánaca jtsebmna šmojtseboše, pero chca jtsebmna ndoñe šmontsobena, as jtseprontánana ínýengbioye jtsëbáyama. Inya ntsamo tobomncá tšëngaftanga tša jtsántšabošana, y chë soye jasháchama ndoñe šmontsobena ora, ínýengaftaca jentjáyana y jtsenpenzentsiyana. Ntsamo šmojtsebošcá ndoñe ntjobenayana jtsebmna, Bëngbe Bëtsá chama ndoñe šmondbotjañe causa; ³ y chë soye šmojtjañe ora, tšëngaftanga ndoñe ntjójyëngacñana, ndoñe botamana chë soye šmondbotjañe causa, er tšëngaftanga chë soye jtsebošana nye chaoservema oyejuayënga bacna soyënguiñe jtsomñama.

⁴ ¡Tšëngaftanga, Bëngbe Bëtsá bobonshánana šmojtsajbananga! ¿Ndoñe šmondëtatšëmba, chë jtsebošana nye quem luarama enójuabnayëngbe amigo jtsemnana y nye quem luarentša soyënga jtsebmna, chca, canye entsá Bëngbe Bëtsabe uayayá jtsemnana? Ndánaca tojajuabó nye quem luarama enójuabnayëngbe amigo jtsemnana, chca, canye Bëngbe Bëtsábioye uayayá jóbemana. ⁵ Ndoñe nye bonamente Bëngbe Bëtsabe uabemana palabrenguiñe mëntsá endayana: “Chë Bëngbe Bëtsá tbojanichmó bëngbe ainaniñe chaotsiyenama Uámana Espiritu, puerte entseboše nye Bëngbe Bëtsá

canya bēngbe amēndayá chaotsemnama ca.” ⁶ Pero Bēngbe Bētsá, bēngbe tšabiama jtsejuabnayēse bēnga jtsējabuáchanana, chíyeca Bēngbe Bētsabe uabemana palabrēnguñe mēntšá endayana:

Bēngbe Bētsá chē n̄ye cachēnga uámanēnga tmojtsenobiamnangbe contra entsemna, y chē ndoñe uámanēnga montsenobiamnangbiamna, Bēngbe Bētsá más tšabe juabna entsebomna ca.

⁷ Asna, tšēngaftanga šmochtseprontana n̄ye Bēngbe Bētsá chacmotsamēndama; ntšamo Satanás tcmojtsamēndacá ndoñe šmattsama, y cha cachora tšēngaftangbentšana echantsachá. ⁸ Bēngbe Bētsábioye šmochtobeconá, y cha echanjama tšēngaftanga ntšamo cha yomnama chacmotsēsertánama. Tšēngaftanga bacna soye amēnga, cach tšēngaftangbe cucuatšēngaca tšabe soyēnga šmochtsama, bacna soyēnga ndoñe. Tšēngaftanga chē in̄ye ora jtsejuabnayana Bēngbe Bētsá jtsebobonshánama, y in̄ye orna, n̄ye quem luarentša soyēnga jtsebomnama, šmochtsajbaná bacna soyēnga jamama bošana, chca, n̄ye tšabe juabnēnga tšēngaftangbe ainaniñe chašmotsebomnama. ⁹ Tšēngaftangbe bacna soyēngama ngmēnaca šmochtsemna, šmochjenóbošachna y cochtsetšenánēnga šmochjójebuambaye. Jatenbiajuayamna, šmochjenóbošachna; y joyejuayēngamna, ngmēnaca šmochtsemna. ¹⁰ Bēngbe Bētsabe delante bētsétsanga ndoñe šmattsenobiamnaye, y cha más uámanēnga cmochanjábiamna.

Inyēngbiamna ndoñe ntsichámuana ndoñe tšabá tmonjama ca

¹¹ Jesucristbeyeca catšátanga, ín̄yēngbiamna bacna soyēnga ndoñe šmattsójebuambnaye. Nda cachabe catšatbiamna bacna soye tojtsichamo o tojayana ntšamo cha tojamcá ndoñe tšabá yontsemna ca, cha chora chē leyentša mandēnga ndoñe ntsoCumplínana y jtsichámuana chē leyentša mandēnga tondayama yontsoserverna ca. Y chē leyama chca tcojtsichámēse, cach ley jocúmplia cuenta, contsobiamná can̄ye ichamuá chē ley aín̄e o ndoñe yondoservénama, y chca ndoñe quecmátsmēna jtsamana. ¹² Chē ley tojuapormá cha n̄ye can̄ya endmēna, Bēngbe Bētsá, y cachá endmēna ntšamo entšanga tmojamcá aín̄e o ndoñe tšabá bētsemnama ichamuá, y cachánaca entsobena entšanga játsebacama o n̄yetsca tescama jácastigama. Y acna, ¿ndase cmēna ndēmua entšabiámna jobenayama jatichámuama ntšamo tojamcá aín̄e o ndoñe tšabá bētsemnama?

Ndayá yēfse yochjatēchnēnguama ndoñe ntsótatšēmbuana

¹³ Y mora quem soye šmochjouena, tšēngaftanga chē šmondbétsichamo: “Mēnté o yēfse quemoye o chē in̄ye bēts puebløye fchanjanga, y chentše can̄ye uata fchanjēftsemna ba soyēnguñe trabájayiñe, y ndegombre becá fchanjónyena ca.” ¹⁴ ¡Pero ni mo ndayá yēfse tšēngaftangaftaca yochjochnēnguama ndoñe quešmátstatšēmbo! Tšēngaftanga ndoñe quešmátstatšēmbo ndayēntscuana vida šmochjēftsebomna, y chca, tšēngaftanga šmondmēna mo can̄ye jantsetēshcá, chēshe mora jónyñana y n̄ye ndeolpe jatenatjēmbana. Tšēngaftangaftaca cachcá echanjopása. ¹⁵ Tšēngaftanga mēntšá cmontsamna jayanama: “Bēngbe Bētsá quešojalesenciase, ainēnga fchántsemna y quem soye o chē soye fchanjama ca.” ¹⁶ Pero chē cuenta, tšēngaftanga bēts soyēnga šmochjamama sempre jt-senábotamnayana, ndayá tšēngaftanga chašmomama Bēngbe Bētsá yochjalesenciaca ntsetatšēmbcá; y chca jtsamana ndoñe tšabá quenátsmēna. ¹⁷ Nda tojtsobena ntšamo tšabá yomncá jamama, pero ndoñe chca tonjama, cha can̄ye bacna soye jtsamana.

5

Chē bomnēnga jábuayenama

¹ ¡Quem soye šmochjouena, tšēngaftanga chē bomnēnga! ¡Chē tšēngaftanga šmochtsesufrínama šmochjenóbošachna y uatjananēnga šmochtseyoye! ² Tšēngaftangbe bomnana buajónana janguánana entsemna, tondayama quenátoserverna, y chē entšayējuangá mejējonga montsasá. ³ Tšēngaftangbe castellano y midio

tojtseñgúsheshe; y chë ngúsheshna echántsinÿinÿnaye tšëngaftanga chë crocenánaca ndoñe šmonjanmama ntšamo ínÿenga jujabuáchama yojamncá; chë causa, nÿetsca tescama cmochántsapochocaye, ntšamo chë íñeshe canÿe soye endbetsepochoacá. Tšëngaftanga quem tempo bomnana šmojtsejuabá, y mora quem luare jopochócama ya entsobeco. ⁴ Tšëngaftanga chë tšëngaftangbe fshantsënguiñe tmojëftsetrabajanga ndoñe šmontanëbuénaye, y mora šmochjouena, chënga chama cmontsachembuanama. Bëngbe Utabná nÿets obenana bomná, chë trabajayëngbe chembuanana ya tojouena. ⁵ Quem luarentše tšëngaftanga šmondoyena ba botamana soyëngaca y nÿe ntšamo cach tšëngaftanga šmobošcá jtsamëse. Ntšamo canÿe uacná jóbana, minÿicá tojtsemna ora, cachcá tšëngaftangbiana entsobeco chë te, ndaye ora Bëngbe Bëtsá echanjama castigánënga chašmotsemnana, er puerte bacna soyënga šmojama. ¡Chë castigo jtsebínÿnana tempo ya entsobeco! ⁶ Tšëngaftanga, chë puerte tšabá amëngbiana šmojayana jóbana yojtsamna ca y šmojtsëbaye, chca ndoñe chaondëtsemnana chënga ndocá jamama ntsobecá.

Chë uantado jtsemnana y chë Bëngbe Bëtsáftaca jencuéntama ora

⁷ Pero tšëngaftanga, catšátanga, uantádoca šmochjobátma Bëngbe Utabná yochjésabo orscama. Chë jajañe trabajayá tojtsobátmana bëtscá tšabe shajuanënga jobuátbanama, jtsotocánana natsana uantádoca jobátmana chë jajañama uaftena tempo chaóshjanguama. ⁸ Tšëngaftangnaca uantadënga šmochtsemna, y tšëngaftangbe ainaniñe añemo chaotsemna, er Bëngbe Utabná mëntescana ndoñe bën y moye echanjésabo.

⁹ Jesucristbeyeca catšátanga, ntšamo ínÿenga tmojtsamama ndoñe nÿe šmattsoquejana, Bëngbe Bëtsá tšëngaftangbiana ndoñe chaodayanama, ntšamo šmojóyebuambama ndoñe tšabá šmonjama ca. Y nda yochjayana ntšamo entšanga tmojamcá aíñe o ndoñe tšabá bëtsemnana, ya entsebeconá. ¹⁰ Atšbe catšátanga, chë tempsquënga Bëngbe Bëtsabe juabna oyebuambnayënga, ndëmuanyënga entšanga tmonjanabuayená Bëngbe Utabná jótšëmbonëse, chënga bëngbioye šonjëftsaninÿanÿiye ntšamo tmojansufrima, ntšamo šojtsamna uantadënga jtsemnana tmojtsesufrina ora; y chca tšëngaftanga cmontsamna jtsamana. ¹¹ Bënga chëngbiana fsëndbëtsejuabnaye oyejuayënga imojamna ca, chë tmojan-sufrí ora Bëngbe Bëtsábeñe imojanobátmana ainaniñe añemo jtsebomnëse. Tšëngaftanga šmojouena ntšamo Job ainaniñe añémoca Bëngbe Bëtsábeñe yojanobátmana, puerte padecena soyënguiñe yojasufrina ora; y šmondëtatšëmbo ntšamo Bëngbe Bëtsá cabana chábioye tbojancuedama, y chca yojamna Bëngbe Utabná entšangbiana puerte ngmená yómnyeca.

¹² Pero masna, atšbe catšátanga, ndayá jamama chašmojašbuachená ora, chca ndoñe šmatjama jajúrase ni celocama, ni quem luarama, ni ndocna inÿe soyama. Tšëngaftanga aíñe ca jayanama šmojtsebošëse, nÿe aíñe ca šmochjayana, y ndoñe casna nÿe ndoñe; chca, Bëngbe Bëtsá ndoñe chaodayana ndoñe tšabá šmonjama ca júraye causa.

¹³ Nderado nda tšëngaftanguentšá puerte ngménaca tojtsemna, cha bontsemna Bëngbe Bëtsá chama jaimpádama. Y nderado nda oyejuayá tojtsemna, cha bontsemna jacántana Bëngbe Bëtsá jëtschuayama. ¹⁴ Nderado nda šocá tojtsemna, cha bontsemna chentša ošbuachiyëngcá enefjuanëngbeñe bëtšëjemëngcá amëndayënga jáchembuana, chënga Bëngbe Bëtsá chabiana chamoimpadama, y Bëngbe Utabná jótšëmbonëse aceitiye chamuanëtjuama. ¹⁵ Y tšëngaftanga, puerte jtsošbuáchiyëse Bëngbe Bëtsá chašmojaimpadá ora, chë šocá salud echántinÿena, y Bëngbe Utabná echanjama cha tšabá cachiñe chaot-satsmënama; y nderado cha bacna soyënga tojamëse, Bëngbe Bëtsá bochantseperdóna. ¹⁶ Chíyecna, chë bacna soyënga šmojtsamama šmochjobuambaye, y Bëngbe Bëtsá nÿetscangbiana šmochtseimpadana, chca, tšabá mo shnanëngcá chašmotsemnana. Canÿa ndabiana Bëngbe Bëtsá tojayana chabe bominÿiñe tšabia yomna ca, cháftaca tbojencuentá ora, chánaca ba tšabe soyënga jóyëngacñana, y jobenayana bëtš soyënga

jamama. ¹⁷ Bëngbe Bëtsabe juabna oyebuambnayá Elías, mo cach bëngcá canye entšá in-amna, y puerte jtsošbuáchiyëse ndoñe chaonduaftema Bëngbe Bëtsábioye tbojanimpadá ora, quem luariñe mo unga uata y tséntsañe ndoñe tonjanafté. ¹⁸ Chentsana, Bëngbe Bëtsábioye cachiñe tbojtanimpadá ora, quem luariñe tojanafté y cachiñe chë jajañenache bëtscá saná yojsatsbinýna.

¹⁹ Atšbe catšátanga, nderado nda tsëngaftanguentsá tojtsajbaná chë ndegombre soyënga jtsamana, pero inýa chábioye tbojuájabuache cachiñe chë tsabe benache cháuatishachama, ²⁰ tsëngaftanga šmochtsetátšëmbo, ndánaca chë bacna soye amábioye tbojuájabuache chabe ndoñe tsabe videntsana cháuissebocnama, cha chë nýetsca tescama castigüentsana chábioye jatsbocana, y jamana ba bacna soyëngama cha perdonaná chaotsemnana.

1 San Pedro

Jacheuayama

¹ Atše Pedro, Jesucristbe ichmoná, quem tsbuanácha sěntsabiamná chě cachěngbe luarentše ndoñe mondoyeněngbiamna, chě Ponto, Galacia, Capadocia, Asia y Bitinia luarěnguenache ujquěsheněnga imoyeněngbiamna. ² Sěntsabiamná chě Běngbe Bětsá Běngbe Taitá tojánabacacangbiamna, ntšamo cachá jamama yojanjuabnacá y ntšamo jopásama yojantatsěmbcá, cabá chca ndochněngo ora; Uámana Espíritbeyeca, Běngbe Bětsá tojama tsěngaftanga chabe entšanga chašmotsemnama, Jesucristo chašmotseyeunanama y Běngbe Bětsabe delante tsabá chašmotsatsmēnama, bacna soyěnga abuajuáněnga. Y Běngbe Bětsá chca tojanma, Jesucristbe buiñe juabuáshaněse, cha tojanóbanayeca. Atše bětscá sěntseimpadana Běngbe Bětsá, chaoma tsabe bendicioněnga tsěngaftangbeñe chaotsemnama, y chaoma tsěngaftangbe ainaniñe tsabe ebionana chašmotsebomnama.

Běngbe Bětsábeñe jtsošbuáchiyěse vida jtsebmomnana, atsebácaněnga jtsemnama

³ Běngbe Bětsá y Běngbe Utabná Jesucristbe Taitábioye matschuanga; cha puerte lastemado ínյengaftaca yómnyeca, tojanma bēnga tsēm juábnaca vida chamotsebomnama, bēngbioye bacna soyěnga jabuajuánase, Jesucristo cháuatayenama tonjánmayeca. Chíyeca bēnga montsobena chábeñe jtsobátmanana sempre y nyetsca tescama, ndayá cha šochjátšatayama. ⁴ Ndayá bēnga šochjátšataycá ndoñe quenátsmēna jěftsopochócama opodena soyěnga, ndayá nyets tempo tsabe soyěnga. Y bēnga mondobátmana jóyěngacñama ndayá Běngbe Bětsá chabe entšanga jatšatayama tojašebuachenacá, ndayá celoca bēngbiamna cha yojtsinյena. ⁵ Chě soyěnga tsěngaftangbiamna entsemna, Běngbe Bětsábeñe šmošbuáchema; cha chabe obenánaca cmondánյena, tsěngaftanga játsebacama. Cha chca jamama ya tojaprontá y echanjínյanյiye, Cristo jésabama tempo chaojóshjango ora.

⁶ Chíyeca tsěngaftanga tša oyejuayěnga šmojtsemna, masque nderado jtseytana inյe ora, nyetsca padecena soyěnguiñe jasúfriase chašmuachněnguama. ⁷ Mo chě castellanama jtsetatsěmbuama aiñe o ndoñe tsabe castellano tomnama iñiñe fjuchněngcá, padecena soyěnguiñe tsabá chašmojachněnguse, Běngbe Bětsá echanjínյanյiye tsěngaftanga ndegombre taišmošbuáchema. Chě castellano pronto endbetsopochóca, masque chca, chana puerte endbetsámana. Y tsěngaftangbe ošbuáchiyana chě castellanama puerte más enduámana. Tsěngaftanga padecena soyěnguentšana běts ošbuachiyánaca chašmojabocněse, Jesucristo chaojésabo ora, entšanga mochanjinյe tsěngaftanga šmojtsomerecena chacmotsatacheuanama, más bětsětsanga y obeněnga chácmbiamama y uámaněngnaca.

⁸ Tsěngaftanga Jesucristo šmondobonshana, y chábioye ndoñe chešmátaninյe; masque mora cha ndoñe quešmatonյá, tsěngaftanga chábeñe šmontsošbuaché, y šmontsebomna canյe puerte tsabe oyejuayana, y ntsachetšá chana yomnana ndoñe quešmátobena jayanama, tša bětscá causa. ⁹ Chca oyejuayana tsěngaftanga šmontsebomna, er ndayá tsěngaftanga jtsošbuáchiyěse šmobatmancá, ya šmojtsosháchichana, chě Běngbe Bětsá tsěngaftanga jtsatsebacayana.

¹⁰ Běngbe Bětsabe juabna oyebuambnayěnga ya imojanatsjendá y imojanguá jtsetatsěmbuama, ntšamo Běngbe Bětsá entšanga játsebacama, y tmojanoyebuambá ndayá Běngbe Bětsá tsěngaftanga jatšatayama, tsěngaftangbiamna tsabe juabna cha yobómnyeca.

¹¹ Chěngbe ainaniñe yojtsemna Cristbe espíritu, y ntšamo tojaněyancá, cabá chca ndochněngo ora, yojamna Cristo jasúfriama y ntšamo chentšana Běngbe Bětsá chábioye puerte bětsá bochjánbemama, Běngbe Bětsabe juabna oyebuambnayěnga imojanjuabná y imojanatsjendá jtsetatsěmbuama chě soyěnga yochjanopása ora, ndaye tempo y ntšamo chě tempo yochtsemnama. ¹² Pero tempo Běngbe Bětsá chěngbioye tojaninյanյé, chca

jtsamana ndoñe cachëngbe tšabiamana yonjamnama, ndayá chca jtsamana yojamna tšëngaftangbe tšabiamana. Chënga tmojanoyebuambá, ntšamo chë tšabe noticiënga oye-buambnayënga tšëngaftanga tcmojauyancá. Y chca tcmojáuyana chë Uámána Espíritbe obenánaca, nda Bëngbe Bëtsá celocana tbojichmó. Chë soyënga endmëna ndayá chë angelënga muantseboše tšabá jinÿama, chënga chaósertama.

Bëngbe Bëtsá entsanga jtsachembuanana chabe entsangcá chamotsiyenama

¹³ Chíyeca, botamana jtsejuabnayëse tšabá jatrabájama, y cach tšëngaftanga jenomándama jtsobenëse, yejuana šmochtobátmana, Bëngbe Bëtsá soyënga cmochjátšatayama tšëngaftangbe tšabiamana jtsejuabnayëse, Jesucristo quem luaroye yochjésabo ora. ¹⁴ Tšëngaftanga Bëngbe Bëtsabe básenga uauenanënga quetsomñecá, ndoñe šmattsiyena ntšamo cach tšëngaftangbe bacna juabnënga yomncá nÿe tšabá jtsomñama, ntšamo Bëngbe Bëtsábioye cabá nduabuatma ora šmonjanbomncá. ¹⁵ Chamna, šmochtsiyena mo chë Bëngbe Bëtsabe entsangcá, puerte tšabe entsangcá jtsamëse, er Bëngbe Bëtsá, nda tcmojáchembo chca chašmotsemnama, sempre uamaná endmëna. ¹⁶ Er Bëngbe Bëtsabe uabemana palabrënguiñe mëntšá endayana: “Tšëngaftanga Bëngbe Bëtsábeñe uámanënga šmochtsemna, er atše uamaná sëndmëna ca.”

¹⁷ Tšëngaftanga Bëngbe Bëtsábioye šmondbuyana “Taita ca”, šmondbótšëmbona ora. Bëngbe Bëtsabiamana nÿetscanga cachcá mondmëna. Chíyeca, ntšamo nÿetscanga tmojamama tšabá o ndoñe tšabá yontsemna ca cha yochjayana ora, cha chca echanjama nÿe ntšamo chënga tmojamcá jtsonÿayëse. “Taita ca” chábioye šmondbuyánayeca, quem luarentše šmochtsiyenëntscuana sempre šmochtsejuabnaye cha nÿetscangbiamana más bëtsá yomnama, chë šmojtsama sóyeca chca jtsinÿanÿayëse. ¹⁸ Tšëngaftanga šmondëtatšëmbo, Jesucristo, mo nda ínÿengbioye játebacama crocénana cuafjëtsjajocá, tonjanóbana tšëngaftanga játebacama, chë nÿetsca soyënga nÿe bonamente jtsamëse oye-nentšana, ntšamo jtsiyenama tšëngaftangbe bëts taitángbentšana šmojanatsjinÿcá. Cristo ndoñe checmatanatsebacá, yopodena jtsopochócama soyënga jëtsjájuase, mo crocénana o castellancá, ¹⁹ ndayá cachá jóbane, chabe uámána buiñe juabuáshanëse. Cristo chë ndocna bacna soye ndbomná, tonjanóbana ora enjamna mo canÿe oveshatemcá, tondaye ndbemaná, ni tsengana ndbomná, Bëngbe Bëtsábioye jëtschuayama altaroca obaná. ²⁰ Chama Bëngbe Bëtsá Crístbeñe tojanjuabó y tbojanábuayana, cabá quem luare ndëtsemna ora; pero quem tempo, Cristo entsángbeñe tonjábocna tšëngaftangbe tšabiamana. ²¹ Crístbeyeca, tšëngaftanga šmondošbuaché Bëngbe Bëtsábeñe, nda tonjanma Cristo cháuatayenama y puerte uamaná tbonjánbema. Mëntšá, ndábeñe tšëngaftanga šmošbuaché y šmobátmana, Bëngbe Bëtsábeñe endmëna.

²² Tšëngaftanga šmojama ndocna bacna soyënga ainaniñe ntsebomnama, Jesucrístbeyeca catšátangbioye ndegombre jtsababuánÿeshanama, er tšëngaftanga ntšamo ndegombre yomncá jtsamëse, Bëngbe Bëtsá šmoyeunana. Chcasna, sempre nÿets ainánaca nÿetscanga šmochtsenbobonshana. ²³ Bëngbe Bëtsá tojama tšëngaftanga tsëm vida chašmotsebomnama; pero tšëngaftanga tsëm vida šmontsebomna, ndoñe nÿe quem luarentša entsanga ndayá tmojamama, sinó ndayá Bëngbe Bëtsá chë ndocna te jobanamá tojamama. Cha chca tojama cachabe palábraca, ndayá endoyebuambná ntšamo entsanga muantsobena tšabe vida jtsebomnama y chë palabra ndocna te queochaisopochóca. ²⁴ Ntšamo Bëngbe Bëtsabe uabemana palabrënguiñe endayancá:

Nÿetsca entsanga mondmëna mo shacuancá,

y chënga imobomna tšabe soyënga, endmëna mo chë shacuanentša uantšefjushangacá.

Chë shácuaana jtsanctana y chë uantšefjushangá jtsatquécjanana;

entsanga cachcá, nÿets tempo quem luarentše ndoñe quemochátiyena;

²⁵ pero Bëngbe Bëtsabe palabra nÿets tempo echanjesomñe ca —chiñe endayana.

Y chë palabra endmëna chë Jesucristbe tšabe noticiënga, chë buayenánana ntšamo ínÿenga tcmojabuayenacá.

2

¹ Chcáyecna, nÿetsca tescama šmochtsajbaná nÿetsca bacna soyënga amana, ínÿengbioye áingñayana, bacna entšanga chë ntšamo ndegombre šmojuabnacá ndinÿinÿayënga ntsemnana, ínÿengbioye untšabošana, y ínÿengbiamana uayátsenayana. ² Mo cabá mora onÿnana šešoncá, tša jtsebošana chabe mamabe létšiyë, cachcá tšëngaftanga cmontsamna puerte jtsebošana nÿets tempo Bëngbe Bëtsabe soyënga jtsebomnama, chë soyëngaca Jesucristbeñe corente chašmotsošbuáchema, y chca, atsebácanënga chašmotsemnama; ³ ntšamo Bëngbe Bëtsabe uabemana palabrënguñe endayancá: “Tšëngaftanga šmojátatšëmbona Bëngbe Utabná puerte tšabia nÿetscángaftaca yomnama ca.”

Cristo, chë mo aina ndëtšbecá endmëná

⁴ Bëngbe Utabnábioye šmochtobeconá, nda endmëna mo canÿe aina ndëtšbecá, ndëmuanyëse tojtsama entšanga tšabe vida chamotsebomnama. Báseftanga cha tmojtšaboté, mo ntšamo chë ndëtšbéngaca canÿe yebna tmojtsejebuana ora, luaroca tmojtsejajó ndëtšbecá; pero Bëngbe Bëtsá chábioye tbojuábuayana, y chabe bominÿiñe cha puerte uamaná endmëna. ⁵ Chábioye šmochtobeconá, tšëngaftanga chë tšabe vida šmojóyëngacñënga, cánÿiñe mo aina ndëtšbéngcá, Bëngbe Bëtsabiamana jajebuama canÿe yebnentšama chašmotsemnama; mo Bëngbe Bëtsabiamana bachnangcá chašmotsemnama, nÿe Bëngbe Bëtsábioye jtseservénama jtsentšénëse, chábioye jtsatschuanayama. Ntšamo Bëngbe Bëtsábioye jtseservénama šmojtsamcá, chábioye tšabá jtsinÿanana, ndayá Jesucristo tojanmama. ⁶ Chca ndegombre endmëna, er Bëngbe Bëtsabe uabemana palabrënguñe, Bëngbe Bëtsá Jesucristbiamana mëntšá tojánayana: Smochjinÿe, atše sënjama Jerusalenentše canÿa chaotsemna, y cha endmëna mo chë canÿe yebna jajebuámentše chë más bëts uashacuanëšentše jajona ndëtšbecá.

Cha atšbe Uabuayaná endmëna, y atšbiamana puerte enduámana.

Nda chábeñe tojtsošbuaché, ndocna te nÿe bonamente chábeñe queochátobatmana ca.

⁷ Tšëngaftanga, chábeñe ošbuáchiyëngbiamana, nda endmëna mo chë yebna jajebuámentše más bëts uashacuanëšentše jajona ndëtšbecá, cha puerte enduámana; pero chábeñe ndošbuáchiyëngbiamna, entsopasana ntšamo Bëngbe Bëtsabe uabemana palabrënguñe Cristbiamana endayancá:

Chë yebna jebuanënga tmontsanaboté ndëtšbé,
mora chë más bëts uashacuanëšentše entsejájona ca.

⁸ Inÿoca, Bëngbe Bëtsabe uabemana palabrënguñe mëntšánaca chabiamana endayana:

Cha endmëna mo ndëtšbé ndayentše jtsojestjiyamcá;
y mo peñëscá yomna chënga chamotsótsatsama ca.

Chënga Jesucristo jtsabotena, chabe buayenánana ndoñe ntjjoyeunaycá; Bëngbe Bëtsá cabá chca ndopása ora tojanjuabó chca chaotsemnama.

⁹ Pero tšëngaftanga šmondmëna Bëngbe Bëtsábeyeca bocacánënga, y mo canÿe rey tmojtseservena bachnangcá, y šmondmëna Bëngbe Bëtsabe entšanga nÿe chabiamana jtsetrabájayama, y chë nÿe Bëngbe Bëtsábënga šmomnënga. Y chca endmëna, tšëngaftanga chë bëts soyënga ntšamo Bëngbe Bëtsá tojamcá chašmotsabuayiynama. Cha endmëna nda tcmojáchembo chašmotsajbanama oyenana mo ndoñe binÿniñcá jtsejuabnayëse y jtsamëse, cháftaca jtsemnama chašmotsobenama, chë tšëngaftangbe juabnënga puerte binÿnayáftaca. ¹⁰ Tempo tšëngaftanga ni mo cánÿentša entšangcá ndoñe quešmënjatsmëna, nÿe ujquëshenënga; pero mora, Bëngbe Bëtsabe entšanga šmontsemna;

tempo šmonjamna entšanga ndocná tonjánalastemanga, pero mora, Bëngbe Bëtsá aíñe lastemado tšëngaftangaftaca entsemna.

Bëngbe Bëtsá jtseservénama jtsiyenana

¹¹ Atšbe bonshánënga, ndayentše tšëngaftangbe ndegombre luare yomna, celoca endmëna, y muentše quem luarentše, tšëngaftanga šmondmëna mo ínÿoicana ash-jajnëngcá, y mo canÿe luarëjana nÿe achnëjuanëngcá, cach tšëngaftangbe luaroye átayíñe. Chíyeca cbontsaimpadana, ndoñe chašmondétsama soyënga ntšamo chë šmobomna bacna juabnënga tomncá, ainaniñe bacna soyënga bomna causa; chca juabnënga ainaniñe jtsepenzétsiyana, chentše jtsemándayama y Uámana Espiritu ndoñe chaondëtsemándama. ¹² Chë Bëngbe Bëtsábioye nduabuatmëngbeñe sempre šmochtsiyena tšabá jtsamëse; chca chënga, masque mora tšëngaftangbe contra imojtsoyebuambná, tšëngaftanga mo bacá uamana entšanga cuaftsemnëngcá, chë tšabe soyënga ntšamo tšëngaftanga šmojtsamcá chamuinÿama, y chca, Bëngbe Bëtsá chëngbioye chaojenonÿinÿé te, chábioye chënga chamotsatschuanama.

¹³ Bëngbe Bëtsá šmoyeunanama, nÿetsca entšanga mando bomnëngbioye šmochtsobedecena; chë Romoca bëts mandádbioye, cha chë quem luarentša más uámana puesto jtsemándayama endbómnyeca; ¹⁴ y chë tšëngaftangbeñe mandadëngbióynaca, ndëmuanÿënga cha jíchamuana chë bacna soyënga amënga jácastigama, y chë tšabe soyënga amëngbiana tšabá imojtsama ca chamuayanama. ¹⁵ Chë mando bomnëngbioye šmochtsobedecena, er Bëngbe Bëtsá endboše tšëngaftanga tšabe soyënga chašmotsamama, chca, chë ndosertánënga chë tšëngaftangbiana podesca ichámënga, ntšamo ndegombre yomncá ntsetatšëmbcá, tondaye chamondëtsebomna tšëngaftangbe contra jayanama.

¹⁶ Šmochtsiyena tšabá jtsamëse, mo chë ya ndoñe más bacna soyëngaca y bacna juabnëngaca ndëmandanëngcá; pero chca šmojtsemnana ndoñe šmattsejuabnaye nÿe ndaye bacna soye jamama šmojtsobena ca, y nÿe chca šmochjátama. Más tšabá endmëna jtsiyenana, mo chë Bëngbe Bëtsá imoservenëngcá. ¹⁷ Nÿetscangbiana respeto šmochtsebomna, chë Jesucrístbeyeca catšátangbioye šmochtsababuánÿeshana, sempre šmochtsiyena Bëngbe Bëtsabiana jtsejuabnayëse cha chë más bëtsá yomnama, y chë Romoca bëts mandado šmochtseserrespetana.

Cristo chabe entšanga tojinÿanÿé ntšamo yomna jasúfriana

¹⁸ Tšëngaftanga, chë nÿets tempo ínÿabiana canÿe yebnentše oservénënga, tšëngaftangbe nduiñëngbioye šmochtsayaunana, puerte respeto chëngbiana jtsebomnëse; y ndoñe nÿe chë tšábëngbioye y nÿe tšabá mandbomnëngbioye, ndayá chë bacá mandbomnëngbioynaca. ¹⁹ Nderado nda, ntšamo Bëngbe Bëtsá yobošcá jamama bošama, tojoboyá chabe nduiño cha chaosufrima tojtsama ora, masque chama jasúfriama ndoñe tbondmëna, chca jamëse, Bëngbe Bëtsá corente tšabá jtsinÿanana. ²⁰ Er nderado tcmojtsacastigá ndaye bacna soye šmojama causa, y chora tša uantadënga chiñe šmojachnëngo, chë soye ndoñe yapa ntsámanana. Pero tšabe soyënga šmojtsama y chë causa šmojtsesufrina, y tša uantadënga chiñe šmojachnëngo, chë soye cocayé Bëngbe Bëtsá corente tšabá jtsinÿanana. ²¹ Chca cmontsamna, er Bëngbe Bëtsá tcmojánachembo tšabe soyënga jamama y chca jasúfriama; chca ndegombre endmëna, er Cristo tšëngaftangbiana tonjansufrí, y chca cha tcmonjaninÿanÿé, ntšamo jamama cmojtsamna, tšëngaftanga chca chašmotsamama. ²² Cristo ndocna te ndocna bacna soye chenáisema, ni ndocnábioye chebnaisëingñé. ²³ Chábioye tmojtsoyenguá ora, chëngbioye ndoñe ntëyánguanguana. Cha chaosufrima tmonjanma ora, cha ndocá ntjatëtsétsnayana jaútatjayama, ndayá Bëngbe Bëtsábeñe jtošbuáchiyëse, chábeñe yojanobátmana. Bëngbe Bëtsá ntšamo nÿetscanga tmojamama tšabá o ndoñe tšabá yonjamna ca yochjayana ora, chca echanjama nÿe ntšamo chënga tmojamcá jtsionÿayëse. ²⁴ Cristo cruciñe

tonjanóbana ora, cha tonjansufrí chë castigo, chë bëngbe bacna soyëngama cach bënga šojánamna jasúfriama castigo, bënga chë bacna soyënga jamama juabnëngaca ndoñe más mandánënga chamondëtsemnama, y bënga ntšamo Bëngbe Bëtsabe bominyiñe tšabá yomncá jtsamëse chamotsiyenama. Er Crístbioye chënga tmonjanlisiá chaóbanama y tonjansufrí jobanëntscuana, y chca, bënga šonjanatsebacá. ²⁵ Er tšëngaftanga, tempo Bëngbe Bëtsábentšana bënoca šmonjamna, mo ótšena oveshëngcá; pero mora Cristbe benache šmojtishache, y cha cmontsanýena, mo oveshëngbe canýe abujänýacá, y cha entsantješna tšëngaftanga tšabá chašmotsemnama.

3

Ntšamo iuamna chë bouamnëngbioye jtsiyenana

¹ Cachcá mo chë oservenëngcá, tšëngaftangnaca shémanga, tšëngaftangbe boyángbioye šmochtsayaunana, chca, chë Bëngbe Bëtsabe buayenana soyënguiñe ndošbuáchiye boyángbioye chašmobená jáyëjanama, Jesucrístbeñe chamotsošbuáchema, ntšamo tšëngaftanga šmojtsiyenama. Ndoñe queochátsiyta chë buayenánama chënga jatëtsëtsnayana, ² er chënga mochanjinýe tšëngaftanga šmojtsiyena, Bëngbe Bëtsá nyëtscangbiamama más bëtsá yomnama sempre jtsejuabnayëse, y ntšamo šmojtsamcá chca yojtsinýinýnáyeca. ³ Cach tšëngaftangbiamama ndoñe mëntsá šmattsejuabnaye: “Entšanga atše botamaná tsmëna ca chamotsejuabnama atše nýa mo chca chantenochquëca, chantenóbotamaye ba castellano soyëngaca o ba uámana entšayangá chantichëtjo ca”; ⁴ ndayá chca chaotsemna, ntšamo tšëngaftanga chë Uámana Espíritbeyeca mandánënga jtsemnëse ainaniñe šmojuabnama, cmëbionama y šmobošama; ndocna te ndopochócaye botamanana jtsebmomnama, ainaniñe nýe cach tšëngaftanga uámanënga jenobiamama juabnënga ntsebmomncá, pero aíñe ainaniñe tšabe ebionana jtsebmomnëse. Chë soyënga Bëngbe Bëtsabe bominyiñe puerte enduámana. ⁵ Tempo chca, chë puerte tšabe shembásenga, chë Bëngbe Bëtsabe bocacanënguentšënga, imojanamana jtenóbotamayana; chënga Bëngbe Bëtsábeñe imojtsanošbuaché y chábeñe imojanobátmana, y nyëtscanga chëngbe boyángbioye imojánayaunana. ⁶ Chca yojamna Sara, Abrahámbioye ibnayeunana y chábioye “Taita ca” ibojanábobuatma. Tšëngaftanga Sarabe bembangcá jtsemnana, tšabe soyënga šmojtsamëse, y tondayama uatjana šmontsebmomnëse.

⁷ Cachcá, tšëngaftanga boyanga, cada ona cachabe shémaftaca chaotsiyena, tšabá jtseñeyeananëse, y cha respeto buajoná chaotsemnama jtsamëse; pero chca, ndoñe nýe cha acbiamama más batšá obenana bomná bëtsemnama, ndayá Bëngbe Bëtsá chabiamama tšabe juabna yobómnyayeca, ntšamo cach aca tšabe vida tcmojašbuachenacá chábioynaca tbojašbuáchenama. Chca šmochtsama, Bëngbe Bëtsáftaca jencuëntama totcá chaondëtsemnama.

Chë tšabe soyënga amama jasúfriama yojtsamnënga

⁸ Y morna, nyëtsca tšëngaftanga cachcá šmochtsejuabnaye, ínýenga šmochtsalastemana, chë Jesucrístbeyeca catšátangbioye šmochtsababuánýeshana, ínýengbiamama chacmóngmiaye, y cada ona chaotsejuabná chë ínýenga chabiamama más uámanënga imomna ca. ⁹ Inýenga tšëngaftangbiamama ntšamo tcmojaborlá ora, ndoñe šmattëchenanguaye; ni chacmojtsëyanguá ora, chëngbioye ndoñe šmattoyánguango. Chca játamama cuentna, Bëngbe Bëtsá šmochjaimpáda, chëngbeñe tšabe bendicionënga chaotsemnama cha chaomama, er Bëngbe Bëtsá tcmojáchembo chca chašmotsamama, y Bëngbe Bëtsábiocana tšabe bendicionënga chašmoháchiñama. ¹⁰ Ntšamo Bëngbe Bëtsabe uabemana palabrënguiñe endayancá:

Nda toboše tšabe vida jëftsebmomnama y puerte oyejuayá tempënga jtsebmomnama, yejuana chaochtsenojuabná bacna soyëngama ndoñe chaondëtsoýebuambnama, y ndoñe chaondëtseboosterama.

¹¹ Bacna soyënguentshana chaotsojuánañe y tšabe soyënga chaotsama, natjëmbana nyetscángaftaca jtsiyenama chaotseboše, y chca chaotsemnama sempre chaotsentsena.

¹² Chca bontsemna jamana, er Bëngbe Utabná, chabe bominyiñe tšabe soyënga amëngbioye jtsanyenana, chëngbiama sempre jtsantješnëse; y sempre chëngbioye jtsayaunanana, chábioye ndayámnaca tmojtsotjanañe ora; pero chë bacna soyënga jamana uamanëngbe contra cha jtsemnana ca —chiñe endayana.

¹³ ¿Nda nanjobenaye tšëngaftangbiama bacna soyënga jamama, tšëngaftanga chë tšabe soyënga jamama sempre šmojtsentsënëse? ¹⁴ Pero masque tšëngaftanga cmojtsamna jasúfriama tšabe soyënga šmojtsamama, Bëngbe Bëtsá chama tšabe soyënga cmochántatšataye. Chë tšëngaftanga chašmosufrima amëngbiama ndoñe matauatjëngana, ni ainana tsetšenánënga ndoñe matsmënëngana, ¹⁵ ndayá ainaniñe sempre šmochtsejuabnaye Cristbiama mo Bëngbe Utabnacá y chabiama respeto šmochtsebomna; y sempre šmochtseprontana jojuama ndëmuanyënga tcmojtsatjaná ndáyeca tšëngaftanga Bëngbe Bëtsábeñe jtsošbuáchiyëse, chabiama ainaniñe šmobátmanama. ¹⁶ Pero chca šmochjama tšabe ainánaca jtsënyayëse y Bëngbe Bëtsabiama respeto jtsebomnëse. Smochtsiyena tšabá jtsamëse, y chama ainaniñe ndoñe chašmondëtsebomna juabnënga y chamuayana chca ndegombre ndoñe tšabá šmontsama ca, chca, ingyënga tšëngaftangbiama podesca chamojtsoyebuambná ora, tšëngaftanga Cristbeñe ošbuáchiyënga quetsomñecá tšabe soyënga šmojtsamama, chënga chamotsëuatja chca tmojtsóyebuambnama.

¹⁷ Más tšabá endmëna jasúfriana tšabe soyënga tcojamama, nderado Bëngbe Bëtsá chca chaotsemnama tojtsebošëse, y ndoñe chë jasúfriana ndaye bacna soye tcojamama.

¹⁸ Er Cristo nyë canyë tonjanóbana bënga bacna soyëngama jáperdonama; chë nyetsca soyënguiñe tšabá amá, chë Bëngbe Bëtsabe bominyiñe ndoñe tšabá yondmëna soyënga amëngbiama, tšëngaftanga Bëngbe Bëtsáftaca chašmotsatsmënama. Entšacá, Cristo tonjanóbana, pero Bëngbe Bëtsá tonjanma, cha cachiñe vida chabe espiritiñe chaotsatsbomnama. ¹⁹ Pero Cristo cháuatayenama Bëngbe Bëtsá cabá ndëma ora, chabe espiritiñe cha tojána chë ndoñe tšabe entsanga imonjamnëngbe espíritënga utámenënga imojamnoye, chëngbiama castigo tojtsemnëntscuana; y cha tojanayënjanama chënga tojanabuayená.

²⁰ Quem espíritënga bayté entsemna, Bëngbe Bëtsábioye ndoñe monjánëyeunana, Noebe yojëftsiyena ora, chë bacna soyënga amënga chca amama chamotsajbanama y tšabe benache chámuatishachama Bëngbe Bëtsá bën yojanobátmana ora, barquësha canduapor-mantscuana. Chentšana chë barquëshañe báseftanga tmojanotsbocá, posufta entsanga, búyeshe juatsbuacá chë barquësha yojtsámmayeca. ²¹ Chë chënga chamótsbocama tojanëjabuache béjaye, enjamna mo chë mora jenábayama buyeshcá, chca, atsebácanënga bënga chamotsemnama. Pero tmojenábaye ora, bënga atsebácanënga jtsemnana, ndoñe chë cuerpentša tsengá tmojtsenóbolimpiama, ndayá bëngbe ainaniñe ndocna bacna juabnënga ntsebomnana Bëngbe Bëtsá tmojtseimpadánama; y bënga atsebácanënga mondmëna, Jesucristo cháuatayenama Bëngbe Bëtsá tojánmayeca. ²² Cristo celoye tojtantsjuá y Bëngbe Bëtsabe catšbioica yomna jamándama. Cha endmëna chë amëndayá angelëngbiama y espíritënga mando y obenana bomnëngbiama.

4

Entsanga entsamna jtsiyenana ntšamo Bëngbe Bëtsá yobošcá

¹ Chcasna, ntšamo Cristo tojansufricá, chabe cuerpiñe mo entsacá játsetšenëse, tšëngaftangnaca cmontsamna jtseprontánana chca jasúfriama. Er chë Cristbeñe ošbuachiyá nda chabe cuerpiñe tojasufrí, chë bacna soyënga amentšana tojtsojuánañe, ² chca, chabe vidiñe, morscana y jobanëntscuana, jëftsiyenama ntšamo Bëngbe Bëtsá

yobošcá, y ndoñe n̄ye entsangbe bacna juabn̄engaca, n̄ye quem luarentse t̄sabá j̄eftsemnama. ³ Tempo, bayté enjamna, ndayentscuana t̄s̄engaftanga šmonj̄ánama soȳenga, mo ch̄e B̄engbe B̄etsábioye nduabuátm̄enga mondbetsamcá; n̄ya ndoñe más. Ch̄e tempo, t̄s̄engaftanga šmonjaniyena n̄yetsca bacna soȳenga jtsam̄ese, jenomándama ntsobencá; t̄s̄engaftanga šmonj̄ánama soȳenga n̄ye nt̄samo šmojanbošcá, n̄ye t̄s̄engaftanga t̄sabá jtsomñama; šmonjanamana jotmenangana y ba fiest̄enga jtsebomnana, y chora ch̄e ófjan̄enga t̄ša jtsetmoyana y t̄ša jtseyoyana, y ba uabouana soȳenga šmonjanamana jtsamana ch̄e dios̄enga yojamna ca šmojanjuabná soȳenga jadórama. ⁴ Morna, ch̄e B̄engbe B̄etsábioye nduabuátm̄enga montsenjaná, t̄s̄engaftanga ya ndoñe más bacna soȳenga jtsam̄ese šmojtsiyenama, nt̄samo tempo šmonjaniyena, nt̄samo ch̄enga jtsam̄ese mondoyena, jenomándama ntsobencá; y ch̄e causa, ch̄enga bacna soȳenga t̄s̄engaftangbiana jtsóyebuambnayana. ⁵ Pero ch̄enga echanjótocaye jayanama ndáyeca chca tmojamama, ch̄e entsangbiana, ch̄e ain̄enga y ch̄e ya mochjób̄an̄engbiana, nt̄samo tmojamama, aíñe o ndoñe t̄sabá b̄etsemnama jayanama entseprontanabe delante. ⁶ Ch̄iyeca, Crístbeñe ošbuáchiȳenga, ch̄e mora oban̄enga imojtsemn̄enga, ain̄enga monjamna ora, ín̄ȳenga ch̄e t̄sabe noticīengama ch̄engbioye monjanabuayiyná, ch̄enga chamobenama ch̄e n̄yetsca tescama yomna t̄sabe vida ch̄engbe espítoftaca jtsebomnama, nt̄samo B̄engbe B̄etsá yobomncá; masque mora quem luarentse, ch̄engbe cuerpo tojóbana, er B̄engbe B̄etsá tojayana n̄yetsca entsanga yojsamna jóbanama ca.

⁷ Ndoñe bayté y n̄yetsca soȳenga echanjopochóca. Ch̄iyeca, t̄s̄engaftanga cmontsamna botamana jtsejuabnayana y jenomándama jtsoberenana, B̄engbe B̄etsáftaca jencuéntama chašmotsobenama. ⁸ N̄yetsca soȳengama, masna, sempre n̄yetscanga puerte šmochtsenbobonshana, er nda ín̄ȳenga puerte tojtsababuan̄yeshaná, sempre jtseprontánana ín̄ȳenga jáperdonama, ch̄engbiana bacna soȳenga tmojamama. ⁹ N̄yetscanga šmochtsamana t̄s̄engaftangbe yebniñe jenofjana, chca jamama totcá yojtsemna ntjatichamcá. ¹⁰ N̄yetsca t̄s̄engaftanga B̄engbe B̄etsá tcmojat̄satá obenana t̄sabe soȳenga jamama; chca, ch̄e obenánaca cmontsamna jtsamana soȳenga ch̄e ín̄ȳengbe t̄sabiama, ch̄e B̄engbe B̄etsá cmojat̄satá n̄yets obenánaca ín̄ȳengbioye jujabuáchama, n̄yets tempo t̄sabe soȳenga jtsam̄ese. ¹¹ Nda tojtsabuayiyná, B̄engbe B̄etsabe palabra chaotsabuayiyná mo B̄engbe B̄etsá chabijana cuaftsoyebuambnacá; nda ín̄ȳenga tojtsaserverna, chca chaotsama ch̄e B̄engbe B̄etsá yojsama cha chaotsebomnama obenánaca. N̄yetsca soȳenga nt̄samo šmojtsamcá chaotsin̄yan̄ná B̄engbe B̄etsá puerte uamaná y obená b̄etsemnama, Jesucristbeyeca. Chca šmochtsama, er B̄engbe B̄etsá puerte uamaná endm̄ena y obenana endbomna n̄yets tempo y n̄yetsca tescama. Chca chaotsemna.

Puerte t̄sabá endm̄ena, Crístbeñe tcošbuáchema, jasúfriama tbojtsemn̄ese

¹² At̄sbe bonshana entsanga, ndoñe šmattsenjanaye padecena soȳenguiñe šmojtseufrínama; chiñe jtsin̄ynana ntsachet̄sá ošbuáchiyana šmobomnama. Chca ora ndoñe šmattsejuabnaye, t̄s̄engaftanga ndoñe cmondamna chca soyiñe jtsachn̄ejuanana ca; ¹³ chamna, šmochjójeyuaye ch̄e nt̄samo Cristo tojansufricá šmojtseufrina ora, chca, Cristo corente obenánaca y uamanacá entsangbeñe chaojton̄ná te, t̄s̄engaftanga puerte chašmotsóyeyuama. ¹⁴ Puerte šmochtsóyeyuaye, nderado nda tcmojoyánguango Cristbiana b̄etsoservenayeca, er B̄engbe B̄etsabe Espíritu, ch̄e corente b̄etsá endm̄ená, sempre t̄s̄engaftangbe ainaniñe iuétsemna. ¹⁵ T̄s̄engaftanguentse ndocná chabond̄etsemna jasúfriama ín̄ya óbanaye causa, at̄b̄ebanama, bacna soȳenga ín̄ȳengbiana amama, o ín̄ȳengbe soȳenguiñe ontremet̄enama. ¹⁶ Pero Crístbe ustoná tomnama tojasufrí, chama ndoñe chaond̄ets̄euatja; chamna, B̄engbe B̄etsábioye chabotsatschuaná, cha Crístbe ustoná b̄etsemnama.

¹⁷ Er ch̄e tempo ya tojobuache, B̄engbe B̄etsá jayanama, cach Crístbeñe ošbuáchiȳengbiana, chabe entsangbiana, t̄sabá o ndoñe t̄sabá tmonjamama. Cha chca b̄engbiana jayanama tojont̄sese, ch̄e chabe palabra ndobedecen̄engaftaca

yochjanopasacá puerte uabouana echántsemna, cha chëngbiana chca chaojayana ora. ¹⁸ Y chca, chë Bëngbe Bëtsabe bominiñe tsabá amabiana ndoñe paselo atsbocaná jtsemnama tontsemnëse, ¿ntšamo yochjopása chë Bëngbe Bëtsábioye ndoñe adórayënga y chë bacna soye amëngaftaca? ¹⁹ Chcasna, chë imosufrínëngaftaca Bëngbe Bëtsá chca yobóseyeca, entsamna chë tsabe soyënga jtsamana y Bëngbe Bëtsabe cucuatšinë chëngbe espíritu chamoboshjona cha chaotsinýenama, er cha chënga tojánabiana, y nyetsca soyënguiñe tsabe palabra bomná cha endmëna.

5

Crístbeñe ošbuáchiyënga jábuayenama

¹ Y mora, chë tsëngaftangbentše ošbuachiyëngcá enefjuanëngbeñe bëtsëjemëngcá amëndayënga chanjabuayená, atše cach tsëngaftangcá bëtsëjema, canya ntšamo Cristo tonjansufriá tonjaninyá y chama ínýënga tonjanéyana, y canya ndábioye cach tsëngaftangcá Bëngbe Bëtsá bochjábema más uámana y bëtsá, Cristo entsángbeñe chaojtonýná ora; tsëngaftanga cbabuayená. ² Ošbuáchiyënga šmochtsanýëna; chënga chašotsanýenama Bëngbe Bëtsá chca tcmojábiana. Chca, chentša ošbuachiyëngbeñe šmochtsama ntšamo canye tsabe abuajënýa chabe oveshëngaftaca endbetsamcá. Bëngbe Bëtsabe trabajo ndoñe šmattsama, nye cmojtsëtocanama, ndayá chca jamama šmojtsebóseyeca. Chca ndoñe šmatjama nye paselo crocénana juácanama, ndayá ínýëngbioye jujabuáchama tša šmobóseyeca. ³ Chë cmojtsamna jtsanýenama ošbuáchiyënga ndoñe nye bëtscá šmattsamëndaye, mo chëngbe nduiñënga cuafjatsmëngcá, ndayá ntšamo tsëngaftanga šmojtsiyenama, chënga šmochjínýanýiye ntšamo yojtsamna jtsiyenana. ⁴ Chca, chë bënga nyetscanga, mo chë tsabe abuajënýacá šuanýená, quem luaroye yochjésabo ora, mo canye uabuashinýinýana coronësha ndocna te tontsandbemëshacá, tsëngaftanga canye bëts uacanana soye šmochanjóyëngacñe, y chë soye endmëna nyetsca tescama; Bëngbe Bëtsá uámanënga y bëtsétsanga cmochanjábiana, cháftaca nyets tempo oyejuayënga jtsemnëse.

⁵ Cachcá, tsëngaftanga chë bobontsëngnaca cbabuayená, sempre šmochtsejuabnaye chë bëtsëjëmënga tsëngaftangbe amëndayënga imomnama, y chca šmochtsama. Cada ona tsëngaftanguentsá bontsemna jtsejuabnayana chë ínýënga tsëngaftangbiana más uámanënga cuaftsemncá, ínýëngbioye šmojtsaserverna ora; er ntšamo Bëngbe Bëtsabe uabemana palabrënguiñe endayancá:

Bëngbe Bëtsá chë nye cachënga uámanënga tmojtsenobiamnangbe contra entsemna, y chë ndoñe uámanënga montsenobiamnangbiamna, Bëngbe Bëtsá más tsabe juabna entsebomna ca.

⁶ Sempre šmochtsejuabnaye Bëngbe Bëtsá chë más bëtsá nyetscangbiana yomnama, y nyets mando y obenana bomná yomnama, y chabe delante ndoñe uámanënga šmattsenobiamnaye, cha más uámanënga chácmabiamama, chama chë tempo chaojobuache ora. ⁷ Nyetsca soyënga ndayama šmuenócochinýenama Bëngbe Bëtsabe cucuatšinë šmochjáboshjona, er cha tsëngaftanga yejuana cmondánýëna.

⁸ Cach tsëngaftanga jenomándama chašmotsobena y sempre šmochtseprontana, er tsëngaftangbe uayayá Satanás, mo canye león tojtsejató, nda jtsósañama tojtsana orcá, chë diablo, sempre jtsebošana jamama, tsëngaftanga Jesucrístbeñe ošbuáchiyana chašmotsajbanama. ⁹ Puerte šmochtomorócha, Jesucrístbeñe bëtscá jtsošbuáchiyëse, chë uayayá tondaye chaondobená tsëngaftangaftaca jamama, cach tsëngaftangcá Jesucrístbeñe ošbuáchiyënga nyets luarënguenache cachcá jasúfriama yojtsamnana jtsetatšëmbëse. ¹⁰ Pero tsëngaftanga baseftayté chašmojasufri chentšana, Bëngbe Bëtsá cmochanjábiana nyetsca soyënguiñe puerte tsábënga, puerte chašmotsemorochama, bëtscá ošbuáchiyana y bonshánana bomnënga jtsemnëse, y ainaniñe corente añemo bomnënga chašmotsemnama; Bëngbe Bëtsá, chë bëngbiana tsabe juabna bomná, bënga

nÿetsca tšabe soyënga šonjatšatá, y nda bënga šojáchembo nÿetsca tescama bëtsétsanga jtsemnama, chca echanjama. ¹¹ Cha nÿets obenana nÿets tempo y nÿetsca tescama chaotsebonna. Chca chaotsemna.

Jtadiósoftanama

¹² Silvano, ndabiamá sëndëjuabná atšbiamá canÿe tšabe palabra bomná Jesucrístbeyeca catšata yomnama, cháftaca quem base tsbuanácha tčbonjubuábiamá. Atše sëntseboše tšëngaftanga añemo jatšatayana y jáuyanana, ndegombre ntšamo tčbonjubuabiamcá yojt-soyebuambná ntšamo Bëngbe Bëtsá tšabe bendicionënga cmatšatnama. Chíyeca, sempre šmochjëftsiyena jtsamëse ntšamo chabe tšabe juabna tšëngaftangbiamá yomncá.

¹³ Ošbuáchiyënga muentše átšeftaca montsemnënga cmontsacheuaná. Chënga quem bëts pueblentše mondoyena bacá uamana entšángaftaca, mo chë tempo, Babilonia bëts puebloca imojoyena entšangcá, pero Bëngbe Bëtsá muentša ošbuáchiyënga to-jabacacá cach tšëngaftangbioycá. Marcos, chë atšbiamá mo uaquiñacá endmëná, chánaca cmontsacheuaná. ¹⁴ Nÿetscanga Jesucrístbeyeca catšatangcá šmochjenchuaye, jtenámochëse tša šmojtšenbobonshánama.

Atše, Bëngbe Bëtsá sëntseimpadana cha chaoma tšëngaftanga chë Jesucrístoftaca cánÿiñe mo canÿacá šmomnënga, nÿetscanga ainaniñe tšabe ebionana chašmotsebonnama.

2 San Pedro

Jacheuayama

¹ Atše Simón Pedro, Jesucristbe oservená y chabe ichmoná, quem tsbuanácha sentsabiamná tšëngaftangbiamá, ndëmuanÿenga šmojashjache jtsebomnama canÿe ošbuáchiyana Jesucristbeñe, cach bëngbe ošbuachiyancá uámanana, er Bëngbe Bëtsá y Atsebacayá Jesucristo, jtsebošana ndánaca y nÿetscanga chábeñe chamotsošbuáchema.

² Atše sëntseimpadana, tšëngaftanga Bëngbe Bëtsabiamá y Bëngbe Utabná Jesusbiamá cada te más jtsetatšëmbëse, Bëngbe Bëtsá chaoma tšabe bendicionënga tšëngaftangbeñe chaotsemnama y chaoma tšëngaftanga ainaniñe tšabe ebionana chašmotsebomnama.

Chë Jesucristbeñe ošbuáchiÿëngbe tšabe soyënga

³ Bëngbe Bëtsá chabe obenánaca tojama bënga chamobená jtsebomnama, lempe ntšamo tmojtšëjabotcá tšabe vida jtsebomnama y jtseyenama, Bëngbe Bëtsá jadórama soyënga jtsamëse. Cha chca tojama bënga chábioye chamotsábuatmama tojanma ora. Cha bënga šojáchembo, cachá obená y uamaná bëtsemnama y bëtš soyënga jamëse, chabe entšanga chamotsemnama. ⁴ Chca, Bëngbe Bëtsá šojatšatá ntšamo bënga jatšatayama tojanašebuachenacá, bëtš y uamana soyënga, chca, quem luarentša bacna soyënguentsána chašmotsojuánañama. Chë bacna soyënga quem luarentše jtsebínÿnana, entšanga nÿe cachëngbe bacna juabnëngaca jtseyenama yapa boše causa. Chánaca chë tšabe soyënga šojatšatá, tšëngaftanga cháftaca cánÿiñe mo canÿacá chašmotsemnama, cachacá jtsemnama jashjáchëse. ⁵ Chca, ndoñe quenátsmëna nÿe Jesucristbeñe ošbuáchiyana jtsebomnana; chiñe šmochjenobuáshjache, bëtscá tšabe soyënga jtsamëse; chora bëtscá šmochtsama Bëngbe Bëtsabe soyëngama chacmotsësertánama; ⁶ chora bëtscá šmochtsama cach tšëngaftanga jenomándama chašmotsobenama; y chca, tšëngaftanga masque pade-cena soyënguiñe chašmojtsachnëjuana, ainaniñe puerte añemo jtsebomnëse, puerte uantadënga chašmotsemnama; y chentšana bëtscá šmochtsama, tšëngaftanga Bëngbe Bëtsá šmojtsadoránama jinÿanÿiyama; y ⁷ chca, nÿetsca tšëngaftanga ošbuáchiÿënga chašmotsenbobonshana; y chca, nÿetsca entšanga chašmotsababuánÿeshana.

⁸ Tšëngaftanga lempe chë soyënga šmojtsebomna, y bëtscá chca šmojtsamëse, šmochantsiyena becá oservena soyënga jtsamëse, y chentšana puerte tšabe soyënga echantsóbocana, corente tšabá Bëngbe Utabná Jesucristo chašmotsábuatmama. ⁹ Pero nda quem soyënga ndoñe tontsama, Bëngbe Bëtsabe soyëngama ndoñe ntosertánana; y chca, cha mo canÿe jtaná o nduabinÿnacá jtsemnana; cha tbojtsebnatjëmbe Bëngbe Bëtsá chabe tempsca bacna soyënga tbojtsebojuánama, y Bëngbe Bëtsabe delante cachiñe tšabá chaotsatsmënama tojamama. ¹⁰ Chíyeca, Jesucristbeyeca atšbe catšátanga, nÿa šmochtsentšena chca tšabe soyënga jtsamama, y chca, corente tšabá šmochanjátatšëmbona, Bëngbe Bëtsá chabe entšanga chašmotsemnama tcmojáchembuama y tcmojábacacama; y chca jtsamëse, Jesucristbeñe ošbuáchiyana ndocna te quešmochatajbaná. ¹¹ Chca, Bëngbe Bëtsá oyejuayá tšëngaftangbiamá echanjama, Bëngbe Utabná y Atsebacayá Jesucristbe amëndayoye jamashënguama ndegombre chašmobenama.

¹² Chcáyecna, atše sëntsejuabná tšëngaftangbioye sempre chë soyëngama jtsabuayiy-nayana, masque chë soyëngama ya šmotátšëmbo, y tša šmojtsošbuachë Bëngbe Bëtsabe ndegombre soyënguiñe y chca šmojtsiyena, chë mora šmojtsetátšëmbo soyënguiñe.

¹³ Sëntsejuabná, chajjëftsainëntscuana tšabá yojtsemna jamana, ainaniñe bëtscá añemo chašmotsebomnama chë soyënga jtsamama, ntšamo tijayancá jtsabuayiyayëse. ¹⁴ Atše sëntsetatšëmbo, ndoñe baytese y atšbe ainana Bëngbe Bëtsábioye yochtá, ntšamo Bëngbe

Utabná Jesucristo šonjëftsanbuayenacá; ¹⁵ pero bëtscá chanjëftsema, atše chajóšana chentsánënaca tšëngaftanga nÿets tempo chë soyëngama chašmotsenójuabnama.

Cristo corente uamaná y obená yojamnama tmojáninÿe ora

¹⁶ Bëngbe Utabnabe obenanama y cha yochjésabama ntšamo tčbonjanabuatambacá, ndoñe quenjatsmëna entsangbe osertanánaca pormana cuentëngaca, er cach bënga botamana fsënjáninÿe chabe uámanana y obenana. ¹⁷ Bëngbe Bëtsá chë Taitá, Jesucristo puerte obenana bomná bëtsemnama y cha corente bëtscá y uamaná bëtsemnama tonjaninÿinÿe ora, bënga fsënjáninÿe. Chca fsënjáninÿe Bëngbe Bëtsá, chë puerte uámana y bëtscábocana oyebuambnayana Jesúsbioye mëntšá tbonjanianana ora: “Mua atšbe bonshana Uaquiñá endmëna, atše chabiana sëntsoyejuá ca.” ¹⁸ Cach bënga chë oyebuambnayana fsënjanuena, chë celocana tonjanóbocnana, er bënga Bëngbe Utabnáftaca fsënjánmëna, chë uámana tjoca.

¹⁹ Chë sóyeca bënga fsëntsobena corente jtsetatsëmbuana, ntšamo chë Bëngbe Bëtsabe juabna oyebuambnayënga tmojanayancá ndegombre bëtsemnama, y tšëngaftanga tšabá šmochántsama, ntšamo chënga tmojanayancá šmojtseyeunanëse. Chca, chëngbe palabrëngaca entsopodena Bëngbe Bëtsabe soyëngama tšëngaftanga jinÿanÿiyana, y echántsemna mo canÿe uajuinÿanësha canÿe ibetiñe luarentše tojtsebinÿnacá. Chë soyënga šmochtsuenana Jesucristo yochjésabëntscuana; chora, cha nÿetsca soyënga cmochanjínÿanÿiye, mo tšëngaftangbiana canÿe tsëm te cuafjabinÿncá, y chë jabínÿnama ora bínÿnaye estrella tojábocna tšëngaftanga jabuabinÿnamcá. ²⁰ Pero natsana chacmësertá, ndocna palabra Bëngbe Bëtsabe uabemana palabrënguiñe tojayana canÿe soye yochjopása ca, cabá chca ndopása ora, nÿe cach Bëngbe Bëtsabe juabna oyebuambnayëngbe juabnentšana tojanóbocnama; ²¹ er Bëngbe Bëtsabe juabna oyebuambnayënga ndoñe monjanoyebuambná nÿe chënga chca jamama innabóseyeca, ndayá Bëngbe Bëtsabe cuenta tmojanoyebuambá, chë Uámana Espiritu chënga chca chamóyebuambama tojánmayeca.

2

Chë ndoñe ndegombre soyënga buátëmbayënga (Jud 4-13)

¹ Chë Bëngbe Bëtsabe juabna oyebuambnayëngbe tempo, Israeloca entsángbeñe baseftángnaca imojamna, ndëmuanÿënga imojichamo chënga ndegombre chca juabna oyebuambnayënga imojamna ca, pero ndegombre ndoñe chcanga imojamna; cachcá, tšëngaftangbeñe abuátambayënga mochántsemna, y chënga ndoñe ndegombre soyënga mochántsabuatambaye, pero ndegombre soyëngaca cánÿiñe, chca, chënga chca imojtsabuátambama entsanga ndoñe chamondëtatšëmbonama. Chë buátëmbana soyënga echanjama, entsanga ndoñe ndegombre soyënga y bacna soyënga chamotsamama. Ntšamo chënga mochántsama y mochántsabuatambaye soyëngaca, mochántsama Jesucristo ndoñe chëngbe Utabná chaondëtsemnama, cha nda chënga tojatsebacá, mo nda ínÿënga játsebacama crocénana cuafjëtšajocá. Y chca, nÿe ndeolpe, chë Bëngbe Bëtsábocana uabouana castigo nÿetsca tescama mochántsebomna. ² Banga chëngbioye mochantsësetona, nÿetsca bacna soye, jenomándama ntšobencá jtsamëse; y chëngbe causa, ínÿënga ndoñe tšabá quemochátoyebuambnaye chë tšabe benachama, chë ndegombre soyëngaca benache jtishachama. ³ Chënga bëtscá crocénana jtsebomnama yapa mochántseboše causa, ba bostero soyëngaca cmochántsaingñaye; pero Bëngbe Bëtsá tempo chëngbiana tojánayana, ndoñe tšabá imojtsamama y chëngbiana castigo nÿetsca tescama chaotsemnámna.

⁴ Bëngbe Bëtsá chë bacna soyënga tmojanma angelëngbioye ndoñe tonjanaperdoná, ndayá infiernoye tojtsanatsatše y puerte ibetiñe tojtsanabáshejuana, chë uabouana tboça

chamoquedama, Bëngbe Bëtsá chëngbiana nyetsca tescama castigo chamotsebomnama yochjayana orscama. ⁵ Y cach ndoñe quem luarentša entsángbioye tonjanaperdoná Noé yojéftsiyena ora, y chënga jácastigama aíñe tojanma chë uabouana uaftena chëngbeñe chaotsemnama, chë nduauenana y bacna entsanga jtsapochócama. Chentšana, nýe Noébioye, tbojanatsbocá, nda entsanga yojanabuayiyná ntšamo jtsiyenana, Bëngbe Bëtsabe bominiñe tšabá yomncá jtsamëse; cha y inýe canýsëftangnaca tojanatsebacá. ⁶ Bayté entsemna, Bëngbe Bëtsánaca tojánayana chë Sodoma y Gomorra bëts pueblentša entsanga, yapa bacna entsanga imojamnama, bëts castigo jtsebomnama yojánamnama; y íñesheca tojtsanapochocá, chë pueblënga y chentša entsanga jatinyá jtsabiamëntscuana. Y chë sóyeca Bëngbe Bëtsá tojaninýanýe ntšamo bacna entsángaftaca yochjama, chë chentšana mochtsiyena bacna entsangbiana. ⁷ Pero Bëngbe Bëtsá Lótbioye tbojanatsbocá, chë bëts pueblënga pochócyentšana. Cha yojamna Bëngbe Bëtsabe bominiñe tšabá amá, y ntšamo chë luarentša entsanga imojaniyenama, nyetscna bacna soye jtsamëse, jenomándama ntsobencá, cha puerte ngménana inabomna. ⁸ Er quem tšabe entsá, chëngbeñe oyená, chë entsanga imojtsama bacna soyënga cada te yojanonýaye y yojanuenana ora, puerte chabe tšabe ainaniñe inasufrina.

⁹ Chca, Bëngbe Utabná endobena chë Bëngbe Bëtsábioye adórayënga játsebacana pade-cena soyënguentšana y bacna soyënga jamama juabnënguentšana, y chë bacna soyënga jamama uamanëngna castigánënga jtsabamnama, chë ntšamo chënga imojaniyenëntscuana imojanamcá ndoñe tšabá yonjamna ca Bëngbe Bëtsá yochjayana tescama, y chënga nyetsca tescama chë bëts castigo chamotsebomnama jamándama. ¹⁰ Chca ndegombre endmëna, y más chë ndëmuanyënga nýe cachëngbe cuerpëngama bacna juabnëngaca jtsamëse imoyenëngbiana, chënga chë Bëngbe Utabnabe mando jtsaboténana. Chënga bacá buátseñanënga mondmëna y jtsebošana nýe ntšamo cachënga tmojtsejuabnacá chaotsemnama, y ndoñe ntsauatjana chë espíritënga obenana bomnëngbiana puerte bacna soyënga jtsóyebuambnayama. ¹¹ Chamna chë angelënga, masque más añemo y obenana bomnënga mondmëna, ndoñe jenñëmuana chë espíritënga obenana bomnëngbiana chca jayanama, chëngbiana ndoñe tšabe soyënga jtsóyebuambnayëse, Bëngbe Utabnabe delante.

¹² Pero chë buátëmbayënga, chë cachënga ndoñe tontsësertana soyëngama puerte bacá jtsóyebuambnayana, y chca, chënga mondmëna mo tja bayëngcá, soyënga tšabá josértama juabna ndbomnënga; chënga jtsiyenana nýe ntšamo tojtsebiona y tmojtsebošcá, y chënga jónýnana, chámuashebuayama y chamëbáyama. Chë buátëmbayënga mo chë bayëngcá mochántsapochocaye. ¹³ Chënga mochanjasúfria, ínýenga chamosufrima tmojama causa. Chëngbe oyejuayana endmëna nýe chora chënga tšabá jtsemnana soyënga. Tšëngaftangftaca cánýiñe mo ošbuachiyëngcá tmojtšesá ora, tšëngaftangbiana ouatjcá jtsemnana y chëngbe causa, ínýenga tšëngaftangbiana podësca mochántsihamo, er chënga chentše oyejuayënga jtsemnana, nýe chënga tšabá jtsemnama jtsamëse; y chënga tšëngaftangbeñe jtsemnana, tšëngaftangbioye jtsaíngñase.

¹⁴ Chënga ndoñe ntsobenana canýe shembása jinýana, cháftaca bacna soye jamama ntsebošcá, y sempre jtsenguayana ntšamo bacna soye jamama. Chënga chë Jesucristbeñe nýe batsá ošbuachiyana bomnënga jtsaíngñayana, y sempre jtsentsénana nýe más soyënga jésebošama y jésebomnama, ínýenga tmobomnama más soyënga jashjáchama; chënga montsemna pochocánënga jtsemnama. ¹⁵ Chënga chë tšabe benachentšana tmojtsojuánañe, y mora mo otšenëngcá montsemna. Chca chënga imojtsiyena jtsamëse, mo chë Bëngbe Bëtsabe juabna oyebuambnayá Balaamcá, cha ndoñe tšabá tonjanma orcá; Balaam Beorbe uaquiñá. Cha yapa inaboše bëtská crocénana juacánama ínýengbiana bacna soyënga jtsamëse; ¹⁶ y Bëngbe Bëtsá, chábioye chabe bacna soyëngama tbojanácacana, cachabe asno chábioye chabuatsëtsama jamëse; y chca, ndoñe tbonjanlesenciá jama chë ndocna juábnaca soye jamama.

17 Entšanga jtsobátmanana chënga bëtscá tšabe soyënga chamotsamama, pero chë tmojtsama soyënga tondayama ntoservénana, y chca, chënga jtsemnana mo búyeshe obocanentše tojtsebuashjá; y chënga mora canýe soye jtsejuabnayana y chentšana inýetsá; chca chënga jtsemnana mo jantšetëshënga bëtš bínýiaca bonjnëshëngcá. Chëngbiamá Bëngbe Bëtšá tojayana castigo chamotsebomnama, chë más ibetoca, tondaye binýniñe luarentše. 18 Chënga ba botamana palabréngaca jtsenábotamnayana, pero tondayama ntoservénana; y chë cabá mora Jesucristbeñe tmojtsošbuachéngbioye jtsaíngñayama, chënga ntšamo chëngbe enutënga Bëngbe Bëtšábioye nduabuátmënga imoyencá jtsiyenama imojtsajbananga. Chë buátëmbayënga chë soye jtsamana, chëngbioye jáyënjase, nýe cachënga tšabá jtsomñama bacna juabnéngaca soyënga chamotsamama, cachënga jenomándama ntosobencá. 19 Chë abuátambayënga jašebuachenana tšabe vida jónýenama, nýe ntšamo chënga tmojtsebošcá jtsejuabnayëse y jtsamëse; pero cachënga mondoyena cachëngbe bacna juabnéngaca mandánënga, y chca, chënga montsajna pochocánënga jtsemnama, er ndaye entšánaca mandaná jtsemnana, chë nýets tempo tobedecena sóyeca. 20 Er ndëmuanyënga, Bëngbe Utabná y Atsebacayá Jesucristo tmojtšabuatmama, tmojtšajbaná oyenana mo chë nýe quem luarama enójuabnaye entšangcá, nýetsca bacna soye amana y tša bacna juabnénga ainaniñe bomnana, pero mora cachiñe chë soyënguiñe tmojtšajna, y cachiñe mandánënga tmojtsemna chë bacna juabnéngaca, chënga mora más bacá tempscama jabocanana. 21 Chëngbiamá más tšabá manjamna ndoñe ntjobenayana jtsetatšëmbuana ntšamo Bëngbe Bëtšabe bominýiñe tšabá yomncá inétsamama, chë soye jatabuátmanana y chentšana játajbanana chë buátëmbana soyënga y chë abuayiyayëngaftaca chëngbioye Bëngbe Bëtšá tojanoyé mandënga jtsobedecénana. 22 Pero chëngaftaca tojopasá ntšamo entšanga mondëntšayancá chca ndegombre bëtsemnama: “Chë queše chabe ashconánana tojtsemnoye jeshéconana ca” y “chë cotše cabá chora bebená, ngüichetsoye jana jetsójanduouoyama ca”.

3

Jesucristo quem luaroye jésabama ora

1 Jesucristbeyeca atšbe bonshana catšátanga, móraca ya uta soyama cbontsëbuabianná. Quem uta tsbuanáchaca atše sënjábošena jamama tšëngaftangbe juabna nýe ena tšabe soyëngaca chaotsemnama, y chca chaotsemnamna atše jtsabuayiyayëse chë tcmojanabuatambá soyëngama. 2 Atše sëntseboše tšëngaftanga chašmotsenojuabná, ntšamo chë inýe tempënga ora, chë nýe Bëngbe Bëtšábioye jtsoservénëse, chabe juabna oyebuambnayënga tmojánayanama, y chë Bëngbe Utabná y Atsebacayabe buátëmbana soyëngama y mandëngama, ndayá chabe ichmónëngaftaca tšëngaftanga šmojanóyëngacñe.

3 Pero masna quem soye chacmotsësertana: Jesucristo quem luaroye jésabama tempo chaojtsobeco ora, mochántsemna entšanga y chënga mochantsiyena nýe cachënga tšabá jtsomñama bacna juabnéngaca, y cmochantsëbuayajuana, chë Cristo yochjésabama šmošbuáchema. 4 Chënga mëntšá mochántsihamo: “Cristo tcmojanašebuachená quem luaroye jésabama. ¿Ndegombre chca? Chcase, ¿ndayentše cha yojtsemna? Bëngbe bëtšëtšanga, ndëmuanyëngbioye cha tojanašebuachená quem luaroye jésabama, ya tmonjóbana, y quem luarentše lempe cachcá endesomñe, ntšamo quem luare tojanobotatšé orscana enjamncá ca.” 5 Chë entšanga ndoñe ntsebošana jtsejuabnayana ya bayté yojtsemna, Bëngbe Bëtšá tojanmandá y chca tojanma celoca y quem luare chaotsemnama. Cha quem luare tojanma búyeshentšana y búyeshca; 6 y cach búyeshecnaca, chë uabouana uaftenentša béjayeca, ya bayté yojtsemna, cha lempe quem luarentše yojanbinýncá tojtsanpochocá. 7 Pero chë mora entsemna celoca y quem luare, cach Bëngbe Bëtšabe mándoca, ndoñe quenátopodena chamotsepochochocama, chë Bëngbe Bëtšá jayanama chábioye ndoñe mondadoránënga ntšamo tmojamcá ndoñe tšabá yonjamnama, y chë bacna soyënga tmojamama nýetsca tescama castigo chamotsebomnama

jamándama tempo candóshjanguëntscuana. Chora Bëngbe Bëtsá, celoca y quem luare ñesheca echantseepochóca.

⁸ Pero, atšbe bonshánënga, canye soye endmëna y chë soye ndoñe chacmondébnëtjomba: Bëngbe Utabnabe juabnama, canye te endmëna mo canye uaranga uatcá, y canye uaranga uata mo canye tecá. ⁹ Ndoñe quenátsmëna, ntšamo báseftanga jtsejuabnayana, ntšamo tojašebuachenacá cha ndoñe betscó yochanjama ca, chë cha quem luaroye jésabama, ndayá chana puerte uantado tsëngaftangaftaca comna; er cha jtsebošana ndocná nyetsca tescama castigo chaondëtsebomnama, ndayá nyetscanga bacna soyënga amana jtsajbanase, Bëngbe Bëtsabe tsabe benache chamuashjáchama.

¹⁰ Pero Bëngbe Utabná echanjésabo ndocná chama chaondëtsejuabná ora, mo canye atbëbanacá jashjanguana, ndocná chama tontsejuabná ora. Chora celoca echanjopochóca, canye jabuache shauenanánaca, y quem luare ndaye soyënguentshana yomnana ñesheca echántsefjatëjo, y ndayá Bëngbe Bëtsá y entsanga quem luarentse tmojamcá, lempe echántsejuinýe.

¹¹ Lempe chca japochócama entsémnayeca, ndegombre tsëngaftanga cmontsamna jt-siyenana ntšamo chë Bëngbe Bëtsabe entsanga jt-siyenana entsamncá, y nyets tempo jt-samëse chë Bëngbe Bëtsábioye jtsatschuanayama yomna soyënga, ¹² tsëngaftanga chë Jesucristo quem luaroye jésabama chaóshjanguama šmojtsobátmanëntscuana; y nya šmochtsentsëna cha más betscó cháuesabama. Chë te ñesheca celoca echántsejuinýe, y ndaye soyënguentshana quem luare yomnana cach ñesheca echántsefjatëjo. ¹³ Pero bënga mondobátmana ntšamo cha šojašebuachenacá: canye tsëm luare, mo canye tsëm celoca y tsëm fshantscá, y chentše nyetscanga mochantsiyena ntšamo Bëngbe Bëtsabe bominiñe tsábá yomncá jt-samëse.

¹⁴ Chiyeca, atšbe bonshánënga, chë soyënga chaotsemnama šmojtsobátmanëntscuana, nya chiñe šmochtsentsëna, chca, cha yochjésabo ora, chacmanýena oyeniñe tsábá Bëngbe Bëtsáftaca jtsatsmënëse, ínýengaftaca natjëmbana jt-siyenëse; chacmanýena ainaniñe ndocna bacna soye ndbomnënga, y puerte tsábá jt-samëse oyeniñe; chca, ndocná chaondobená jayanama tsëngaftanga ndaye bacna soye šmojama ca. ¹⁵ Quem soye šmochtsejuabnaye: Bëngbe Atsebacayá ndoñe yapa betscó tonjésabësna, chca jtsemnana cha puerte uantado nyetscángaftaca yómnayeca; chca cha yomna, ba entsanga chë bacna soyënga amana chámajbanama y chabe benache chámuatishachama y chca, atsebácánënga chamotsemnama. Cach quem soyëngámnaca, Jesucristbeyeca bëngbe bonshana catsata Pablo tmonjanëbuábiana, chë Bëngbe Bëtsá tojanma cha chaotsebomnama osertanánaca. ¹⁶ Chë soyëngama, Pablo nyetsca chabe tsbuanáchangañe tonjanoyebuambá. Chéchangañe endmëna soyënga totcá josértama; y chë soyëngama, chë Bëngbe Bëtsabe soyëngama ndoñe tmonjuatsjínýënga, y chë mora canye soye jtsejuabnayana y chentsana inýetsá juabnayënga, jtsejuabnayana y ínýengbioye jtsabuayiynayana ndoñe ndegombre yondmëna ca. Y cachcá jt-samana inýe soyëngaca, Bëngbe Bëtsabe uabemana palabrënguiñe. Chca chënga montsajna pochocánënga jtsemnama.

¹⁷ Chiyeca, atšbe bonshánënga, tsëngaftanga chë ya šmojtsetátšëmbo chë ndoñe ndegombre soyënga abuátambayënga mochtsemnama, yejuana šmochtsantjesna; chca, chë Bëngbe Bëtsá ntšamo yomandacá ndobedecenëngbe soyëngaca ínýënga jáingñama, tsëngaftanga ndoñe chašmondëtsemna mo uambanëngcá, ndoñe chašmondëtsajbanama jtsebomnana chë Bëngbe Bëtsabe soyënga ntšamo šmojashjachcá. ¹⁸ Pero atšna, Bëngbe Utabná y Atsebacayá Jesucristo sëntseimpadana, tsëngaftanga chašmotsiyena jt-samëse, chë chábentsana šmojóyëngacñe ba soyënga ntšamo tomnama jtsejuabnayëse, y chaoma tsëngaftanga cada te más tsábá cha chašmotsábuatmama. ¡Nyetscanga cha chamot-satschuaná, mora y nyetsca tescama! Chca chaotsemna.

1 San Juan

Cristo, chë nyetsca tescama yomna tsabe vida entsanga chamotsebomnama amá

¹ Bënga cbontsëbuabiamná chë Bëngbe Bëtsá ndabiajana inétsoyebuambnabiamna, chë nyetsca tescama yomna tsabe vida entsanga chamotsebomnama iuamabiamna, chë Bëngbe Bëtsá cabá quem luare ndëma orscana ya yojamnabiamna. Bëngbe matscuašëngaca chabe oyeambuayana fsënjouena y bëngbe bomínýeca cha tonjama soyënga fsënjinyë. Aíñe bënga cha fsënjinyë y bëngbe cucuátseca fsënjábojajo. ² Cha bëngbentse tonjanonýná y fsënjáninyë; chíyeca bënga chabiamna cbontsëtsëtsná y cbontsabuyaiyná, nda sempre vida yobomna y nda chë nyetsca tescama yomna tsabe vida entsanga chamotsebomnama iuama. Chana, chë Taitá Bëngbe Bëtsáftaca inamna, pero mora bëngbioye šojinýanyé. ³ Bënga tsëngaftanga cbontsabuyaiyná ntšamo tifjinýe y tifjouencá, tsëngaftanga cánýiñe mo canýacá bëngaftaca chašmotsemnama. Bënga cánýiñe mo canýacá fsëndmëna chë Taitá Bëngbe Bëtsáftaca y chabe uaquiñá Jesucrísoftaca. ⁴ Bënga quem soyënga tsëngaftanga cbontsëbuabiamná, bëngbe oyejuayana corente bëtscá chaotsemnama.

Bëngbe Bëtsá endmëna chë entsangbiamna binýnayá

⁵ Mëntsá entsemna ntšamo Jesucrístbentsana tifjouencá y chca tsëngaftanga cbontsabuyaiyná: Bëngbe Bëtsábeñe lempe binýniñe, lempe tsabá endmëna, y chábeñe tondaye ndoñe chca quenátsmëna. ⁶ Bënga tmojtsichamo cháftaca cánýiñe mo canýacá fsëntsemna ca, pero cabá ndoñe Bëngbe Bëtsabe cucuatsiñe, chë binýniñe tmontsemna, y chca, bacna soye juabnayënga y amënga tmojtsiyena, asna, bënga mojtsebostero y ndoñe montsama ntšamo ndegombre yomncá. ⁷ Pero bënga chë binýniñe tmojtsiyena, tsabe soye juabnayënga y amënga ntšamo Bëngbe Bëtsá iuamcá, as nyetscanga cánýiñe mo canýacá mochántsemna, y chabe uaquiñá Jesucristbe uabuáshanana buiñeca, Bëngbe Bëtsá bëngbe bacna soyënga sempre šochántsabuyajuanaye, y echanjama bënga chabe delante tsabá chamotsatsmënama.

⁸ Bënga bacna soyënga ndoñe queftsátsbomna ca tmojtsichámëse, chca cabënga jt-senoíngñayana y ainaniñe chë ndegombre soyënga ndoñe tmonjóyëngacñe; ⁹ pero bënga ndegombre bacna soye amënga fsëndmëna ca, Bëngbe Bëtsá tmojauyanëse, cha bënga šochanjínýanyíye cachá chë ntšamo šojiytsašebuachecá amá y nyetsca soyënguñe tsabá amá yomnama; y chca, nyetsca bëngbe bacna soyënga šochanjáperdonaye y nyetsca bacna soyënga šochanjábuajuanaye. ¹⁰ Bënga tmojtsichamo, bacna soyënga ndoñe chibiatsma ca, chca bënga muattsichamo mo Bëngbe Bëtsá canýe bostero cuaftsemncá, y ntšamo Bëngbe Bëtsá bënga šojauyancá ainaniñe ndoñe tmonjóyëngacñe.

2

Cristo, bëngbe obuauyayá

¹ Tsëngaftanga mo atšbe basengcá, er atše tcbonjanéjabuache Jesucristbe tsabe noti-ciënguñe chašmotsošbuáchema, quem soyënga cbontsëbuabiamná bacna soyënga ndoñe chašmondëtsamama. Pero ndánaca Crístbeñe ošbuachiyënguentsá bacna soye tojamëse, bënga canýe obuauyayá Bëngbe Bëtsabe delante montsebomna, y cha endmëna Jesucristo, chë nyetsca soyënguñe tsabá amá. ² Jesucristo tonjanóbana ndoñe nýe Bëngbe Bëtsá bënga chášuaperdonama bëngbe bacna soyëngama, ndayá quem luarentša nyetsca entsángnaca chëngbe bacna soyëngama cháuaperdonama.

³ Bënga ntšamo Bëngbe Bëtsá šojtsamëndacá tmojtsamëse, ndegombre mochántsetatsëmbo bënga cha imuábuatmama. ⁴ Pero nda tojajana: “Atše Bëngbe

Bëtsá sënduábuatma ca”, pero ndoñe tontsama ntšamo Bëngbe Bëtsá ibuamëndacá, cha canye bostero jtsemnana y ainaniñe chë Bëngbe Bëtsabe ndegombre soyënga ndoñe tonjóyëngacñe. ⁵ Pero nda ntšamo Bëngbe Bëtsá ibuamëndacá tojtsama, jtsinÿanÿnayana chabe ainaniñe Bëngbe Bëtsabiama corente bonshánana yomnama, y chca, mochántsetatšëmbo bënga sempre cánÿiñe mo canÿacá cháftaca imomnama. ⁶ Nda tojtsichamo Bëngbe Bëtsáftaca cánÿiñe mo canÿacá yojtsemna ca, bontsemna jtsiyenana soyënga jtsamëse ntšamo Jesucristo yojëftsiyencá.

Canye tsëm mando

⁷ Atšbe bonshana entšanga, ntšamo mora cbontsëbuabiamnacá, ndoñe canye tsëm mando quenátsmëna, pero aiñe canye tempsca mando; entsemna cach tsëngaftanga Cristbe ústonënga šmonjanobiama ora šmonjanóyëngacñe mando. Quem tempsca mando entsemna ntšamo tsëngaftanga bëngbentšana šmonjouencá. ⁸ Pero masque chca endmënëse, quem cbontsëbuabiamná soye tsëngaftangbiama echántsemna mo canye tsëm mandcá. Cristo enjëftsiyena ntšamo quem Bëngbe Bëtsabe mando ndegombre yomncá y tsëngaftángnaca cachcá šmondoyena, er chë bacna juabnënga jtsebomnëse mo ibetiñcá jtsiyenana tempo ya echanjochnëngo, y chë entšangbe juabna ndegombre binÿnayá ya entsebuashinÿinÿana.

⁹ Nda tojayana chë binÿnayáftaca yojtsemna ca, pero cha chabe catsátbioye tbojtsáboyënja, cha cabá tempcá, bacna juabnënga jtsebomnëse yojtsiyena, mo ibetiñcá. ¹⁰ Nda chabe catsátbioye tbojtsebobonshana, cha chë binÿnayáftaca jtsiyenana, y ton-daye queochátsmëna cha bacna soye chaotsamama. ¹¹ Pero nda chabe catsátbioye tbojtsáboyënja, cha bacna juabnënga jtsebomnëse jtsiyenana, mo canÿa ibetiñe oyenacá. Cha ndoñe ntsetatšëmbuana chë ndayá tojamama ntšamo chentšana yochjopása, er chë bacna juabnënga jtsebomnëse jtsiyenana chábioye ndoñe ntjalesénciana ntšamo tsábá yomncá chaotsamama.

¹² Básenga, atše cbontsëbuabiamná Bëngbe Bëtsá tsëngaftangbe bacna soyënga tcmojáperdonama, ndayá Jesús tojanma sóyeca. ¹³ Taitanga, tsëngaftanga cbontsëbuabiamná, er tsëngaftanga ya šmonjuábuatmana chë quem luare jobojátšama orscana ya inamná. Tsëngaftanga bobontsëngnaca cbontsëbuabiamná, er tsëngaftanga ya chë nÿetsca bacna soyënga mandayá Satanás šmonjayëñaná.

¹⁴ Básenga, tsëngaftanga tcbonjubuábiamna, er tsëngaftanga chë Taitá ya šmonjuábuatmana. Taitanga, tsëngaftanga tcbonjubuábiamna, er tsëngaftanga ya šmonjuábuatmana chë quem luare jobojátšama orscana ya inamná. Bobontsënga, tsëngaftángnaca tcbonjubuábiamna, er tsëngaftanga bëtscá añemo ainaniñe šmambá, y Bëngbe Bëtsabe palabrama sempre tsëngaftangbe ainaniñe šmondëjuabná, y chë nÿetsca bacna soyënga mandayá šmonjayëñaná.

¹⁵ Ndoñe matsbošana oyejuayënga jtsemnana nÿe quem luarentša soyëngaca, ni nÿe chë soyënga jtsebomnama. Nda yapa tojtseboše quem luarentša bacna soyënga jtsebomnama, cha ndoñe chë Taitábioye bondbobonshana. ¹⁶ Er chë nÿe quem luarama enójuabnayënga mëntšá juabnënga mondbomna: yapa jtsebošana jtsebomnama ntšamo chë ainaniñe bacna juabnënga bomnënga mondbetsebošcá; yapa jtsebošana nÿe ndayá tmojatinÿe soye; y yapa jtsenábotamnayana chë tmobomna soyëngama. Chë juabnënga Bëngbe Bëtsábiocana ndoñe ntsóbocanana, ndayá nÿe chë quem luarama enójuabnayëngbentšana. ¹⁷ Pero quem luare echanjopochóca y nÿetsca chentša soyënga, chë entšanga bacna juabnëngaca yapa imoboše jtsebomnama soyëngnaca. Pero nda ntšamo Bëngbe Bëtsá yobošcá tojtsama, cha chë nÿetsca tescama yomna tsabe vida echántsebonna.

Chë Cristbe contra yomná

18 Básenga, quem luare jopochócama tempo ya entsobeco. Ntšamo tšëngaftanga šmonjouencá, quem tempo echanjabo chë Cristbe contra yomná. Pero morna banga Cristbe contra imomnënga tmonjábocana. Chca bënga montsetátšëmbo chë quem luare jopochócama tempo ya yojtsobecuama. 19 Chënga cach bëngbentsana tmonjábocana. Pero chënga Jesucristbeñe ndoñe tmonjanošbuachená ntšamo bënga mondošbuachecá, er chënga ntšamo bënga montsošbuachecá mamojtsošbuachese, cach bëngaftaca matmënjoquedanga. Pero chca tonjopasá, ndegombre jtsotatšëmbuama ntšamo bënga Jesucristbeñe mondošbuachecá, chënga nyetscanga ndoñe mondošbuáchema.

20 Pero Cristo, chë Uamaná, tšëngaftanga tcmónjabacacá, y cha tonjama chë Uámana Espíritu tšëngaftangbe ainaniñe cháumashënguama; y nyetsca tšëngaftanga chë ndegombre soyënga šmondétatšëmbo. 21 Atše cbontsëbuabiamná, ndoñe chë ndegombre soyëngama ndoñe šmondétatšëmbuama, ndayá aíñe šmotatšëmbuama; er tšëngaftanga šmondétatšëmbo chë ndegombre soyënga y ndoñe ndegombre soyënga cányiñe jtsemnana ndoñe yondopodénama. 22 Nda tojayana Jesús chë Bëngbe Bëtsabe Uámana Uabuayaná, chë Cristo ndoñe yondmëna ca, chana jtseboosterana. Cha jtsemnana chë Cristbe contra yomná, nda iuichamo Cristo Bëngbe Bëtsabe Uaquiñá ndoñe yondmëna ca, y chca, cha Bëngbe Bëtsabiana ndoñe ntsejuabnayana cha chë Taitá bëtsemnana. 23 Nda tojtsichamo Cristo Bëngbe Bëtsabe Uaquiñá ndoñe yondmëna ca, cha chë Taitáftaca cányiñe mo canyáca ndoñe ntsemnana. Pero nda entšángbeñe tojayana, Cristo aíñe Bëngbe Bëtsabe Uaquiñá endmëna ca, chana aíñe chë Taitáftaca cányiñe mo canyáca jtsemnana.

24 Tšëngaftanga, chë Cristbe ústonënga šmojanóbiana orscana šmojanuena soye, tšëngaftangbe ainaniñe šmochtsambaye. Chca chašmojtsamëse, tšëngaftanga chë Uaquiñá y chë Taitáftaca cányiñe mo canyáca šmochántsemna. 25 Y quem soye entsemna ntšamo Cristo šojëftsasëbuachená: chë nyetsca tescama yomna tšabe vida jtseboamnana.

26 Atše chca cbontsëbuabiamná, chë tšëngaftanga jáingñayama imojtsebošëngbiana chašmotsetatšëmbuama. 27 Pero Cristo tcmójanabacacá ora, Uámana Espíritu šmojanóyëngacñe, y mora tšëngaftangbe ainaniñe Uámana Espíritu šmontseboamna, y ndoñe quenátšiyta ndocná más chacmotsabuátambama, er chë Uámana Espíritu lempe cmontsabuatambá; y cha endabuatambá ndegombre soyënga, y bostero soyënga ndoñe. Mëntšá, ntšamo chë Uámana Espíritu tcmójabuatambacá jtsiyenëse, Crístoftaca cányiñe mo canyáca šmochtsemna.

28 Y mora básenga, Crístoftaca cányiñe mo canyáca šmochtsemna, chca, cha chaojabáisebocna ora, chábeñe jtsošbuáchiyëse, bënga añémoca chamotsemnana y ndoñe chamondëtsëuatjama, bënga chabe delante chamojtsemna ora. 29 Tšëngaftanga šmontsetátšëmbo Jesucristo nyetsca soyënguiñe tšabá amá yomnana. Chcasna, cmontsamna jtsetatšëmbuana, nyetscanga ntšamo Bëngbe Bëtsá yobošcá tmojtsamëngna, Bëngbe Bëtsabe básenga imomnana.

3

Crístbeñe ošbuáchiyënga, Bëngbe Bëtsabe básenga

1 Menójuabonga, ntsachetšá Bëngbe Bëtsá chë Taitá sondábabuanjeshanama. Chabe bonshánana tša bëtscá endmënayeca, bënga šondëubuabuatma chabe básenga ca, y ndegombre bënga chca mondmëna. Chë causa chë nye quem luarama enójuabnayënga ndoñe quenátësertana ntšamo bënga imomnana, er chënga cha ndoñe tmonjanábuatmana.

2 Atšbe bonshana entšanga, mora bënga ya Bëngbe Bëtsabe básenga montsemna. Y masque cabá ndoñe quemuátstatšëmbo ntšamo más chcoye bënga mochjamnana, aíñe mondétatšëmbo, Jesucristo chaojabáisebocna ora bënga cachacá mochtsemnana, er bënga mochanjobenaye jinýama ntšamo cha ndegombre yomncá. 3 Y nda chca chábeñe

puerte jtsošbuáchiyëse tojtsobátmana, bacna soyënga amana jtsajbanana, más tšabia jtsemnama, ntšamo cach Cristo yomncá, lempe tšabia y bacna soye ndbomná.

⁴ Pero nda bacna soye tojama, chana ntšamo Bëngbe Bëtsá tojëftsemadacá jtsaboténana; er bacna soye jamana endmëna, jtsabotena ntšamo Bëngbe Bëtsá tojëftsemadacá. ⁵ Tšëngaftanga ya šmondétatšëmbo Jesucristo quem luaroye tojánabo bëngbe bacna soyënga jabétsabuajuanama, y cha ni mo canyë bacna soye ndoñe yondbomnama. ⁶ Chcasna, nda cányiñe mo canyáca cháftaca nyets tempo tojtsemna, ndoñe ntsiyenana bacna soyënga jtsamëse. Pero nda tojtsiyena bacna soyënga jtsamëse, Jesucristbiamana ndoñe tbonjosertá y ndoñe yondétatšëmbo ntšamo cha bétsemnama. ⁷ Atšbe básenga, ndocná chacmondaingñé: nda nyetsca soyënguiñe tšabá tojtsama, cha canyë tšabá mándbomna entšá jtsemnana, ntšamo Jesucristo yomncá; ⁸ pero nda tojtsiyena bacna soyënga jtsamëse, chabe ainaniñe Satanás jtsemándayana, er Satanás quem luare jobojátšama orscana bacna soyënga iuétsama. Bëngbe Bëtsabe Uaquiñá nya quem soyama tojabo: chë Satanabe soyënga jabétsepochochama.

⁹ Ndocná Bëngbe Bëtsabe uaquiñá tojtsemná jtsiyenana bacna soyënga jtsamëse, er cha jtsebomnana chë Bëngbe Bëtsá tbojuántšame tšabe vida, y Bëngbe Bëtsá chabe Taitá endmëna. Chiyeca cha ndoñe ntsiyenana bacna soyënga jtsamëse. ¹⁰ Corente jtsotatšëmbuana ndëmuanyënga Bëngbe Bëtsabe básenga imomnana y ndëmuanyënga Satanabe básenga; ndëmuanyëngnaca ntšamo tšabá yomncá ndoñe tmontsama o chabe catšata ndoñe tmontsebobonshana, ndoñe ntsemnana Bëngbe Bëtsabe básenga.

Nyetscanga jtsenbobonshánana

¹¹ Quem buayenana entsemna ntšamo tšëngaftanga šmojanuena, tšëngaftanga Cristbe ústonënga šmonjanobiamana orscana: nyetscanga šontsamna jtsenbobonshánama. ¹² Ndoñe Caincá muatjama. Chabe ainaniñe Satanás yojamánda, y chiyeca, chabe uabentsábioye tbojtsanóba. ¿Y ndáyeca tbojtsanóba? Cha ndoñe tšabá yonjánama; chabe uabentsana aíñe; chiyeca tbojtsanóba.

¹³ Jesucristbeyeca atšbe catšátanga, ndoñe šmattsenjanaye chë nye quem luarama enójuabnayënga cmojtsëbuayënjama. ¹⁴ Bënga mondétatšëmbo, bënga tempo monjaniiyena chë nye quem luarama enójuabnayënga mondoyencá, y chca, Bëngbe Bëtsabiamana mo obanëngcá monjamna, er bënga monjaniiyena ntšamo Bëngbe Bëtsá ndoñe yondëmandacá. Pero Bëngbe Bëtsá tonjama mora bënga tsëm vida chamotsebomnana, y chca, mo ndegombre ainëngcá montsemna. Chca mondétatšëmbo, er bënga bëngbe catšátangbioye mondábabuanyëshana. Nda chabe catšátbioye ndoñe tbonsebobonshana, cha cabá mo obanacá jtsiyenana. ¹⁵ Nda cachabe catšátbioye tbojtsáboyënja, cha jtsemnana mo entšanga obanayacá. Y tšëngaftanga šmondétatšëmbo entšanga obanayá ndoñe ntsobenana jtsiyenana, chë nyetsca tescama yomna tšabe vida chabe ainaniñe jtsebomnëse.

¹⁶ Ndayá chë jtsenbobonshánana bétsemnama mëntšá montsetátšëmbo: Jesucristo chabe derecho vida jtsebomñama cachcá tojanonyá y bëngbiamana tojanóbana; cachcá bënga šontsamna jtsemnana, sempre jtseprontánana chë Jesucristbeyeca bëngbe catšátangbiamana jóbanama. ¹⁷ Canya bomnana tojtsebomna y catšátbioye uajabotá tbojtsonyá, pero chabiamana ndoñe tbonjongmé y ndoñe tbonjuájabuache, cha ndoñe ntsobenana Bëngbe Bëtsabiamana ainaniñe bonshánana jtsebomnana. ¹⁸ Atšbe básenga, ndoñe quešnatamna nye bëngbe catšátanga imuababuányëshana ca jatichámua, y nye chë bonshánama jatóyebuambnayana; pero ndegombre šontsamna ndayánaca jamana, chca, jinyaníyama, bënga ndegombre inyëngbiamana imuababuányëshana.

Bëngbe Bëtsabe delante natjëmbana ainánaca entšanga

¹⁹ Chcase bënga mochántsetatšëmbo, ntšamo chë Bëngbe Bëtsabe ndegombre soyënga yomncá bënga imojtsamama. Y bënga ndoñe quemochátenocochinýena, Bëngbe Bëtsábiocha

jtsemnana merecido ndoñe mondbuájona ca tmojtsejuabná ora; y bēngbe ainana natjēmbana Bēngbe Bētsabe delante echántsemna. ²⁰ Bēnga chca bēngbe ainaniñe tmojtsejuabná ora, bēnga montsobena natjēmbana ainana jtsebomnana, er Bēngbe Bētsá corente jtsotatsēmbñana ntšamo bēngbe ainana yomnana, y cha lempe yotátšēmo. ²¹ Atšbe bonshana entšanga, bēnga ndoñe bacna soye tmonjama ca bēngbe ainaniñe tmojtsejuabnase, jtsobenana añémoca jtsemnana y tondayama ntsauatjca Bēngbe Bētsabe delante jtsemnana. ²² Y cha lempe ntšamo chamojotjañca šochanjátšataye, er bēnga montsama ntšamo Bēngbe Bētsá ibuamandacá y ndayá chabe bominyiñe tšabá yomncá. ²³ Y chabe mando endmēna: bēnga chabe Uaquiñá Jesucristbeñe jtsošbuáchiyana, y bēnga nyetscanga jtsenbobonshánana ntšamo Jesús šojētsamēndacá. ²⁴ Ntšamo Bēngbe Bētsá tojēftsemandacá amēnga, Bēngbe Bētsáftaca cányiñe mo canyáca jtsemnana, y cha sempre chēngaftaca cányiñe mo canyáca echanjēftsemna. Y quem sóyeca bēnga montsobena jtsetatsēmbuana cha bēngaftaca iuētsemnana: Uámana Espíritu bēngbe ainaniñe cháumashēnguama cha tojama.

4

Chē Bēngbe Bētsabe Espíritu y chē Cristbe uayayabe espíritu

¹ Atšbe bonshana entšanga, nyetscanga chē Bēngbe Bētsabe juábnaca imoyebuambná ca ichámēngbioye ndoñe šmattsayaunana; botamana šmochjuarrepára corente jtsetatsēmbuama chēnga aiñe o ndoñe chē Bēngbe Bētsabe juábnaca imóyebuambnama. Quem tempo banga Bēngbe Bētsabe ndoñe ndegombre juabna oyebuambnayēnga quem luarējana mondajna. Chē causa tšēngaftanga cmontsamna botamana chēngbiamna juarrepárana. ² Chē Bēngbe Bētsabe Espíritu ndegombre imobomnēngbiamna tšēngaftanga mēntšá šmontsobena jtsetatsēmbuana: nda tojayana Jesucristo quem luaroye aiñe entšacá tojánabo ca, cha ndegombre chē Bēngbe Bētsabe Espíritu yojtsebomna. ³ Pero nda ndoñe chca Jesucristbiamna tonjayana, cha Bēngbe Bētsabe Espíritu ndoñe yontsebomna; inyētšá, chana chē Cristbe contra yomnabe espíritu yojtsebomna. Tšēngaftanga šmojouena chē espíritu yochjabama; pero ndegombre cha ya quem luarentše entsemna.

⁴ Atšbe básenga, tšēngaftanga Bēngbe Bētsábenga šmondmēna y ndoñe šmonjalesenciá chē Bēngbe Bētsabe ndoñe ndegombre juabna oyebuambnayēnga tšēngaftangbioye chacmaingñema, er chē nyets tempo tšēngaftangbe ainaniñe vida endbomná, chē nye quem luarama enójuabnayēngbe ainaniñe mándayabiamna más obená endmēna. ⁵ Chē Bēngbe Bētsabe ndoñe ndegombre juabna oyebuambnayēngna chē nye quem luarama enójuabnayēnguentšana mondmēna, chíyeca chēnga nye quem luarentša soyēngama jtsóyebuambnayana, y chē nye quem luarama enójuabnayēnga chēnga jtsayaunanana. ⁶ Pero bēnga Bēngbe Bētsábenga mondmēna. Nda Bēngbe Bētsábioye tbojtsabuatma, bēngbioye jtsayaunanana; pero nda Bēngbe Bētsábioye ndoñe tbontsabuatma, cha bēnga ndoñe ntsayaunanana. Chiñe bēnga montsobena jtsetatsēmbuana nda chē ndegombre soyēnga jóyebuambayama ama espíritu yobomnabiamna, y nda chē ínñyēngbioye jáingñama ama espíritu yobomnabiámna.

Chē bonshánana Bēngbe Bētsábiocana yóbocana

⁷ Atšbe bonshana entšanga, chē bonshánana Bēngbe Bētsábiocana endóbocana; chcase, bēnga šontsamna nyetscanga jtsenbobonshánana. Nda Bēngbe Bētsábioye y chē inye entšángbioye tojtsababuánñeshana, cha Bēngbe Bētsabe uaquiñá jtsemnana y Bēngbe Bētsábioye jtsabuatmana. ⁸ Nda ndoñe chca tontsebobonshana, cha Bēngbe Bētsábioye ndoñe ntsábuatmana, er Bēngbe Bētsá bonshanánaca nyetsca soyēnga jamana. ⁹ Bēngbe Bētsá šonjinñanyé bēnga šuababuánñeshanana, cha chē nye canye Uaquiñá ibobomná quem luaroye jíchmuase; cha tbojanichmó, bēnga chábeyeca chē nyetsca tescama yomna tšabe vida chamotsebomnana. ¹⁰ Bēngbe Bētsabe bonshánana mēntšá

endmëna: ndoñe quenátsmëna bënga Bëngbe Bëtsá imobobonshánayeca, ndayá cha bënga šojánababuanÿeshanayeca, y chabe Uaquiñá tbojanichmó, cha jóbanëse, bënga bëngbe bacna soyëngama perdonánënga chamotsemnama.

¹¹ Atšbe bonshana entšanga, Bëngbe Bëtsá chca šuababuánÿeshana; chcasna, bëngnaca šontsamna nÿetscanga jtsenbobonshánana. ¹² Ndocná ndocna te Bëngbe Bëtsábioye tbonjinÿe. Bënga nÿetscanga tmojtsebobonshánëse, Bëngbe Bëtsá nÿets tempo bëngaftaca echántsemna, y chabe bonshánana puerte bëtská bëngbeñe echántsemna. ¹³ Bënga mëntšá montsobena ndegombre jtsetatšëmbuana bënga Bëngbe Bëtsáftaca imomnama y cha bëngaftaca: cha tonjanma chabe Espíritu bëngbe ainaniñe cháuamashënguama. ¹⁴ Y cach bënga fsënjinye y entšanga fsëntsëtsëtsná, chë Taitá chabe Uaquiñá tbojichmoma, quem luarentša entšanga jabátsebacama. ¹⁵ Ndánaca tojayana Jesús Bëngbe Bëtsabe Uaquiñá yomna ca, cha Bëngbe Bëtsáftaca cánÿiñe echántsemna y Bëngbe Bëtsánaca sempre cháftaca cánÿiñe mo canÿacá.

¹⁶ Chcase bënga montsetátšëmbo y montsošbuaché ndegombre Bëngbe Bëtsá bënga šuababuánÿeshanama. Bëngbe Bëtsá nÿetsca soyënga bonshanánaca jamana y nda Bëngbe Bëtsá y chë inÿe entšanga sempre tojtsababuánÿeshana, cha Bëngbe Bëtsáftaca cánÿiñe mo canÿacá jtsemnana y Bëngbe Bëtsánaca sempre cháftaca cánÿiñe mo canÿacá. ¹⁷ Chca, Bëngbe Bëtsabe bonshánana puerte bëtská bëngbeñe echántsemna, bënga bëts añémoca y tondayama ntsauatjá chamotsemnama, chë tšabá o ndoñe tšabá tmonjamama entšangbiamama jayanama Cristo yochjésabo orscama; er bënga Jesucrísoftaca cánÿiñe mo canÿacá jtsemnëse, quem luarentše mondmëna ntšamo Jesucristo endmëncá. ¹⁸ Nda Bëngbe Bëtsá y chë inÿe entšanga tojtsababuánÿeshana, tondayama ntsauatjana; bënga corente tmojtsebobonshana ora, ndoñe ntsopodénana uatjana jtsebmomnana. Canÿe entšá tojtsauatja ora, jtsemnana mo chabe castigo ya cuafjobjoatšecá. Chca, nda uatjana tojtsebmomna, Bëngbe Bëtsábioye y chë inÿe entšanga cha ndoñe corente yondábabuanÿeshana, ntšamo Bëngbe Bëtsá bënga šuababuanÿeshancá.

¹⁹ Natsana Bëngbe Bëtsá šojánababuanÿeshana, y chíyeca bënga, cha y chë inÿe entšanga imuababuánÿeshana. ²⁰ Nda tojayana: “Atše Bëngbe Bëtsábioye sëndbobonshana ca”, pero cachca ora cachabe catsátbioye tbojtsáboyënja, cha canÿe bostero jtsemnana. Canÿa aíñe jtsoebenana chabe catsata jinÿama; y cha chë catsátbioye ndoñe tbontsebobonshana, ndegombre cha Bëngbe Bëtsábioye ndoñe bondbobonshana, ndábioye jinÿama ndoñe ntsoebenana. ²¹ Y bënga quem mando chá bentšana tmonjanóyëngacñe: nda Bëngbe Bëtsábioye tbojtsebobonshana, cachabe catsátbioynaca chabotsebobonshana ca.

5

Chë Jesucristbeñe ošbuachiyá endobena Satanasbe soyënga jayëñjanana

¹ Nda tojtsošbuaché Jesús chë Uámana Uabuayaná, chë Cristo yomnama, cha Bëngbe Bëtsabe uaquiñá jtsemnana; y nda canÿe taitábioye tbojtsebobonshana, chë taitabe uaquiñábioynaca cha jtsebobonshánana. ² Bënga Bëngbe Bëtsá tmojtsebobonshana y ntšamo cha tojtsemandacá tmojtsamëse, bënga ndegombre mochántsetatšëmbo, chë Bëngbe Bëtsabe basengbioynaca bënga imuababuánÿeshanama. ³ Bënga Bëngbe Bëtsábioye imobobonshánama quem soyiñe jtsinÿnana: bënga ntšamo Bëngbe Bëtsá tomandacá tmojtsamëse. Y ndayá Bëngbe Bëtsá yomandacá ndoñe yapa totcá quenátsmëna bënga chamotsamama. ⁴ Nda Bëngbe Bëtsabe uaquiñá tomna, chana jáyëñjanana quem luarentša entšanga y soyënga ntšamo Satanás yomandacá. Quem luarentša entšanga y soyënga ntšamo Satanás yomandacá, Crístbeñe bënga imošbuachéyeca montsobena bënga jayëñjanana. ⁵ Nÿe nda, Jesús Bëngbe Bëtsabe Uaquiñá yomnama tojtsošbuaché, cha jtsoebenana chë entšanga y soyënga ntšamo Satanás yomandacá jayëñjanana; ndocná más.

Bëngbe Bëtsá tojinÿanjé ntšamo chabe Uaquiñabiamana ndegombre yomncá

⁶ Cach Jesucristo endmëna nda quem luaroye tojánabo y mëntšá tojanenonÿinÿé: búyesheca cha tmojanabayé ora, y buiñe juabuáshanëse cha tonjanóbana ora. Cha ndoñe tonjanenonÿinÿé nÿe búyesheca, ndayá búyesheca y buiñeca. Cach Uámana Espíritu entsobena jayanana chca ndegombre bétsemnama Jesusbiamana, er chë Espíritu endmëna chë sempre ndegombre oyebuambnayá. ⁷ Endmëna unga soyënga, ndayá iuinÿanÿná ntšamo ndegombre yomncá Jesusbiamana: ⁸ Espíritu, búyeshe y buiñe; y chë unga soyënga lempe cachcá Jesusbiamana jtsinÿanÿnayana. ⁹ Bënga mondbétsejuabnaye, ndayá entšanga tmojinÿe ca tmojtsichámuama mo ndegombre cuaftsemncá, pero ndayá Bëngbe Bëtsá tojtsichamcá chë ndegombre soye jtsemnana y puerte jtsámanana, er chë ndegombre soye ntšamo cha tojtsichamcá, endmëna ndayá chabe Uaquiñabiamana iuichamcá. ¹⁰ Nda Bëngbe Bëtsabe Uaquiñábeñe tojtsošbuaché, cha chca nÿets tempo chabe ainaniñe jtsejuabnayana; nda Bëngbe Bëtsábeñe ndoñe tontsošbuaché, cha chca jtsamana mo Bëngbe Bëtsá canÿe bostero cuaftsemncá, er chë Bëngbe Bëtsá chabe Uaquiñabiamana tojayana soyama cha jtsejuabnayana ndoñe ndegombre yontsemna ca. ¹¹ Ntšamo Bëngbe Bëtsá chabe Uaquiñabiamana tojayancá mëntšá entsemna: Bëngbe Bëtsá bëngbiamana tojama chë nÿetsca tescama yomna tšabe vida chamotsebomnama; y quem vida chabe Uaquiñábeñe entsemna. ¹² Nda Bëngbe Bëtsabe Uaquiñáftaca cánÿiñe mo canÿacá tojtsemna, cha chë tšabe vídnaca jtsebomnana; pero nda chë Bëngbe Bëtsabe Uaquiñáftaca cánÿiñe mo canÿacá ndoñe tontsemna, cha chë nÿetsca tescama yomna tšabe vida ndoñe ntsebomnana ca.

Inÿe soyëngama jábuayenama y jtadiósoftanama

¹³ Tšëngaftanga, chë Bëngbe Bëtsabe Uaquiñábeñe šmošbuachéngbioye quem soyënga cbontsëbuabianná, ndegombre chašmotsetatšëmbuama chë nÿetsca tescama yomna tšabe vida šmojtsebomnama.

¹⁴ Bënga bëts añémoca y ndauatjca Bëngbe Bëtsabe delante mondmëna, er bënga mondëtatšëmbo, nderado ntšamo chaotsemnama cha tojtsebošcá bënga tmojtjañe ora, cha bënga šnétsayaunanama. ¹⁵ Nderado ndayá chca Bëngbe Bëtsábioye tmojtsotjanañe ora, cha bënga joyaunayana; bënga mondëtatšëmbo chca ndegombre yomnama, y chca, bëngnaca montsetátšëmbo, ndayánaca chábioye bënga chamojtjañcá cha šochjátšatayama.

¹⁶ Nda cachabe catsátbioye tbojinÿe canÿe bacna soye tojtsamama, pero chë bacna soye tojamentšana cha perdonaná jtsemnama cabá tojtsopodénëse, chábioye bontsemna Bëngbe Bëtsá jaimpádana, y chca, Bëngbe Bëtsá echanjama chë catsata chë nÿetsca tescama yomna tšabe vida chaotsebomnama, cha chca tojamentšana perdonaná jtsemnama cabá tojtsopodénëse. Pero canÿe bacna soye endmëna, y chca tojamama canÿa ndoñe ntsobenana perdonaná jtsemnana, y chca, cha jabocnana canÿa nÿetsca tescama castigáná chaotsemnama, y atše ndoñe quetsátichamo chë bacna soyama yojtsemna Bëngbe Bëtsá jtseimpadánana chaboperdonama ca. ¹⁷ Nda tojtsama ntšamo Bëngbe Bëtsá ndoñe yondëmandacá, cha bacna soye jtsamana; pero nÿetsca bacna soyënga ntšamo canÿa tojtsamcá, ndoñe ntjamana cha ndëperdonaná chaotsemnama.

¹⁸ Bënga mondëtatšëmbo, nda Bëngbe Bëtsábioye mo taitacá tbojtsebomna, cha ndoñe ntsiyenana bacna soyënga jtsamëse, er chë Bëngbe Bëtsábentsana Onÿnaná chábioye jtsinÿenana, y Satanás, chë nÿetsca bacna soyënga amëndayá, tondaye ntsobenana chábioye jabórlana. ¹⁹ Bënga mondëtatšëmbo, bënga chë Crístbeñe ošbuáchiyënga Bëngbe Bëtsábenga imomnama, y chë quem luarentša inÿe entšanga Satanasbe cucuatšifne imomnama. ²⁰ Bëngnaca mondëtatšëmbo Bëngbe Bëtsabe Uaquiñá tojabama, y cha iuama bënga osertánana chamotsebomnama, chë ndegombre Bëngbe Bëtsá yomná jtsabuatomama. Bënga chë ndegombráftaca cánÿiñe mo canÿacá mondmëna, bënga chabe Uaquiñáftaca cánÿiñe bétsemnayeca. Cha chë ndegombre Bëngbe Bëtsá endmëna, y nda

chë nyetsca tescama yomna tšabe vida entšanga chamotsebomnama iuamá. ²¹ Atšbe básenga, ndoñe šmattsadorana cach entšangbe pormana soyënga, chë ndayama ínÿenga mondbétsejuabnaye diosënga yomna ca.

2 San Juan

Jtsiyenana ndegombre soyëngaca y nyetscanga jtsenbobonshánëse

¹ Atše chë bëtsëjema, quem tsbuanácha sentsabiamná, chë uámana mamá, chë Bëngbe Bëtsabe bocacáná y chabe basengbiámnaca, ndëmuanÿenga atše ndegombre sëndábabuanÿeshana. Y ndoñe nÿe atše chënga quetsátababuanÿeshana, ndayá nyetscanga chë Bëngbe Bëtsabe ndegombre soyënga uabuátmëngnaca. ² Atše cbontsababuanÿeshana, chë ndegombre soyënga bëngbe ainaniñe mondbómnyeca, y chë soyënga bëngbe ainaniñe sempre echántsemna.

³ Atše sëntseimpadana Bëngbe Bëtsá chë Taitá, y Jesucristo chë Taitabe Uaquiñá, chaboma tsëngaftangbeñe tsabe bendicionënga chaotsemnama, chata tsëngaftangbioye chácmalastemama, y chaboma tsëngaftangbe ainaniñe tsabe ebionana chašmotsebonnama. Quem soyënga, bënga chë ndegombre soyënga uabuátmënga y nyetscanga mondenbobonshánëngaftaca echántsemna.

⁴ Puerte sënjoyejuá, er atše acbe básenguëntše báseftanga sënjánÿena chë ndegombre soyënga ntšamo Bëngbe Bëtsá chë Taitá šojamëndacá jtsamëse. ⁵ Y mora, uámana mamá, cbontseimpadana Diosmanda nyetscanga chamotsenbobonshana. Chë cbontsëbuabianná soye ndoñe canÿe tsëm mando quenátsmëna, ndayá cach Cristbe ústonënga tmonjanobiamama ora tmonjanóyëngacñe mando. ⁶ Bënga, Bëngbe Bëtsá y chë inÿe entšanga imababuanÿeshanama jtsinÿnana, bënga ntšamo Bëngbe Bëtsá tojamandacá jtsamëse tmojtsiyenama. Y chabe mando, ntšamo Cristbe ústonënga šmonjanobiamama ora šmojanuencá, mëntsá endmëna: jtsiyenana Bëngbe Bëtsá y chë inÿe entšanga jtsababuánÿeshanëse.

Chë entsángbioye áingñayënga

⁷ Quem luarëjana banga entsángbioye áingñayënga mondajna, y chënga jtsejuabnayana Jesucristo quem luaroye ndoñe mo canÿe ndegombre entsacá tonjánabo ca. Nda chca tojtsejuabná, cha jtsemnana chë aingñayá y Cristbe contra yomná. ⁸ Chëngbiama cuedado šmochtsebonna. Ndoñe chcase, tsëngaftanga ndoñe quešmochátsbomna chë Cristbiamama cach tsëngaftangbe trabajuentsana tojóbocna soyënga, y ndoñe quešmochatosháchiñe lempe ntšamo Bëngbe Bëtsá tsëngaftangbioye jatšatayama yojtsebošcá.

⁹ Ndánaca chë Cristo tojanabuatambá soyëngama inÿe soyënga tojatabuatambá, cha ndoñe Bëngbe Bëtsáftaca cánÿiñe mo canÿacá ntsemnana; pero nda sempre ntšamo Cristo tojanbuatëmbacá tojtsabuatambá, cha aíñe chë Taitáftaca y chabe Uaquiñáftaca cánÿiñe mo canÿacá jtsemnana. ¹⁰ Ndánaca tsëngaftangbioye tojá jabuátambama, pero ndoñe ndayá Cristo tojanabuatambacá tojtsebuatëmbase, cha ndoñe šmatjofja, ni mo šmatjachuaye.

¹¹ Er nda chábioye tbojachuase, chábioye jtsajabuáchanana chë bacna soye chaomama.

Jtadiósoftanama

¹² Atše ba soyënga sëntsebonna tsëngaftanga jáuyanama, pero ndoñe quetsátsboše tsbuanáchañe jubuábiamama. Atše sëntsejuabná aíñe chjobenaye tsëngaftangbioye jama, jobenayama nyetscánggaftaca jencuéntama, chca, bëngbe oyejuayana puerte bëtsacá chaotsemnama.

¹³ Crístbeyeca acbe quenata, chë Bëngbe Bëtsabe bocacáná, chabe básenga cmontsacheuaná.

3 San Juan

Juan Gaybiamá puerte tšabá tojanoyebuambá

¹ Atše chë bëtsëjema, quem tsbuanácha atšbe bonshana amigo Gaybiamá sentsabiamná. Chábioye atše ndegombre sëndbobonshana.

² Atšbe bonshaná y Crístbeyeca atšbe catšata, Bëngbe Bëtsá sëntseimpadana aca tšabia nyetsca soyënguiñe chacotsemnama y salud bomnánaca. Atše sëntsetatšëmbo aca ainaniñe tšabá cotsomñama, Bëngbe Bëtsabiamá bëtscá tšabe juabnënga chentše jtse-bomnëse. ³ Er báseftanga Jesucristbeñe ošbuáchiyënga átšbioye tmonjabo y šmonjacuentá ntšamo aca chë ndegombre soyënga yomncá icuamama, aca chë ndegombre soyënga jtsamëse icoyenama. Chíyeca atše bëtscá sëntsoyejuá. ⁴ Tondaye jamana atše nyetsá oyejuayá chaitsemnama, ndayá nye jouenana chë atšbe basengcá imoquedánënga ntšamo chë ndegombre soyënga yomncá jtsamëse imoyenama.

⁵ Atšbe bonshaná, aca contsama ntšamo Jesucristo tonjanbuatëmbacá, aca chë ínÿënga Jesucristbeñe ošbuáchiyënga jujabuáchama ndayánaca tcojama ora, y masna, chë inÿe luaroquëngocana ashjajnëngbiama ndayánaca tcojtsama ora. ⁶ Chë átšbioye tmonjabënga tmonjoyebuambá, chë Jesucristbeñe ošbuáchiyënga quem luarentše mond-benenefjnëngbe delante, aca tša chënga icuababuánÿeshanama. Diosmanda, ntšamo tojtsëjabotcá chënga cochjújabuache, chca, chënga chamobená tšabá inÿe luarëngoye játama. Chënga mondmëna Bëngbe Bëtsabiamá trabájayënga; chcasna, chëngaftaca cochjama ntšamo chënga chama merecido imobuajoncá. ⁷ Chca cochjama, er chënga chëngbe pueblënguentsana tmojëftsebocana Jesucristbe soyëngama entšángbioye jábuayenama, y chënga chama tondaye crocénana quematóyëngacañe chë Jesucristbeñe ndošbuáchiyëngbe cucuatšentsana. ⁸ Chíyeca bënga šontsamna chëngbiama jtsantješnana y jtsëjabuáchanana, chca, bënga chamobená cánÿiñe chëngaftaca jatrabájana, entšángbioye chë ndegombre soyëngama jábuayenama, ndayá chënga mondama.

Diótrfes ndoñe tšabá tonjanma; Demetrio aïñe

⁹ Atše canÿe tsbuanácha chë Jesucristbeñe ošbuáchiyënga chentše mondbenenefjnëngbioye sënjubuábiamá, pero Diótrfes ndoñe yontsuenana ntšamo atše sentsichamcá, er cha yojtseboše chë ínÿëngbioye nye jtsamëndayana. ¹⁰ Chíyeca atše choye chajá ora, ndayá cha yojtsamama chanjauácacana. Cha sempre bacá yojtsoínÿana y uayátsenaye soyënga bëngbe contra yojtsichamo. Y chë soye chábioye ndoñe bontsobastana; chana chë Jesucristbeñe ošbuáchiyënga chabe puebloye tmojáshjajnënga ndoñe ntjúbuajana, y chënga júbuajama tmojtsebošëngbioye ndoñe yontsalesenciana chca chamomama, y chë Jesucristbeñe ošbuáchiyënga bëtsemnama imnétsenefjuana luarentšana yojtsatëbuacana.

¹¹ Atšbe bonshaná, ndoñe cattsama chë ndoñe tšabá yontsamacá, ndayá chë tšabe soyënga tmojtsamëngcá cochtsama. Nda ntšamo tšabá yomncá tojtsama, cha Bëngbe Bëtsábia jtsemnana; pero nda ndoñe chca tontsama, cha cabá ndoñe yondëtatšëmbo ntšamo Bëngbe Bëtsá yomnama.

¹² Jesucristbeñe ošbuáchiyënga nyetscanga tšabe soyënga Demetriëbiamá montsichamo, y Jesucristbe ndegombre soyënga entsinÿna ntšamo cha soyënga yojtsiyenama. Bëngnaca chabiamá tšabá fsëntsichamo, y aca condëtatšëmbo ntšamo bënga fsëntsichamcá, ndegombre yomnama.

Jadiósoftanama

¹³ Atše ba soyënga sëntsebomna aca jauyanama, pero ndoñe quetsátsboše tsbuanáchañe juábobemana. ¹⁴ Atše sëntsejuabná betsko chjobenaye ácbioye jama jauatsëtsayama y jobenayana ácaftaca jencuéntama.

¹⁵ Puerte tšabe ebionana ainaniñe chacotsebomna. Quem luarentša amiguënga cmontsechuaná. Diosmanda, bëngbe amiguëngbioye choca cada ona cochjácheuaye.

San Judas

Jacheuayama

¹ Atše Judas, Jesucristbe oservená y Santiagbe catšata, quem tsbuanácha sentsabiamná, ndëmuanÿengbioye Bëngbe Bëtsá, chë Taitá chabe entsanga chamotsemnama tojáchembo, chabe bonshánënga, y ndëmuanÿenga Jesucristo endánÿena. ² Atše, Bëngbe Bëtsá sëntseimpadana, cha puerte lastemado tsëngaftangaftaca chaotsemnama, cha chaoma tsëngaftanga ainaniñe tsabe ebionana chašmotsebonnama, y chaoma tsëngaftanga cada te más Bëngbe Bëtsábioye y ínÿengbioye chašmotsababuánÿeshanama.

Chë ndoñe ndegombre soyënga buátëmbayënga

³ Atšbe bonshánënga, atše tša sëndboše tsëngaftanga jubuábiamama, ntšamo Jesucristo bëngbe bacna soyënguentšana šojátsebacama, tsëngaftangbioye y bëngbioynaca; pero atše sëntsejuabná atše šojtsemna tsëngaftanga jubuábiamana, jáimpadama bëtscá chašmotsama Jesucristbe soyëngama, chë mondošbuaché soyëngama jenujuérsama, ndoñe chaondopochocama. Chë soyënga Bëngbe Bëtsá chabe entsanga canÿe tojatšatá, y nÿetsca tescama. ⁴ Er tsëngaftanga ntšamo ínÿenga imomnama ntjatatsëmbonca, básefta entsanga tsëngaftangaftaca tmojenutaná. Chënga mondmëna Bëngbe Bëtsá ndoñe adórayënga, y chë buátëmbana soyënga tmojtsetrocá. Bëngbe Bëtsá bëngbe tsabiamama juabna yobómnayeca, chënga jtsichámuana tsëngaftanga šmojtšobena nÿetsca bacna soyënga jtsamëse jtsiyenana, jenomándama ntšobencá ca; y chca, chënga montseboše jinÿanÿiyama, Jesucristo ndoñe bëngbe canÿe Nduiño y Bëngbe Utabná chëngbiamama yondmëna ca. Y bayté, Bëngbe Bëtsabe uabemana palabrenguiñe tmojanábema, chë chca amëngna jtsamnana nÿetsca tescama castigánënga jtsemnama ca.

⁵ Masque tsëngaftanga lempe quem soyama ya šmondëtatšëmbo, atše sëntseboše jamama tsëngaftanga chašmotsenujuabná, Bëngbe Utabná, Israeloca entsanga Egiptoquëngbe cucuatšentšana tojanatsebacá chentšana, cachá chë Israeloquënguentše chábeñe ndošbuáchiyënga tojánapochocama; ⁶ y cachcá chë angelëngbiámna, ndëmuanÿenga ndoñe tmonjanoquedá chë tmojanóyëngacñe mándoca, pero aiñe chëngbe luarënga cachcá imojëftsonÿaye. Chë causa, Bëngbe Bëtsá tojanmandá cadenëjuangaca nÿetsca tescama chamoquedama, chë más ibetiñe, tondaye binÿiñe luarentše, chënga bacna soyënga tmojanmama nÿetsca tescama castigánënga jtsemnama yojtsamna ca, cha jayanama tescama. ⁷ Y chë Sodoma y Gomorra, y chë béconana pueblënguentše entsangbiámna; chëngnaca cach angelëngcá ndoñe tsabá monjánama, y nÿetsca bacna soyënga imojánama boyabása o shembásaftaca, y ínÿengaftaca y bayëngaftácnaca. Chíyeca chënga tmonjansufrí chë íñesheca castigo nÿetsca tescama, y chca, nÿetsca entsangbioye tmojaninÿanÿé, ndayá yochjopása chë chca Bëngbe Bëtsábioye ndoñe tbontsobedecenáftaca.

⁸ Cachcá, chë ndoñe ndegombre soyënga buátëmbayëngnaca chë mo otjenayoquécá tmojáninÿe soyëngama jtsichámuana, y chë causa cachëngbe cuerpëngama bacna soyënga jtsamana, chë mando bomnëngbioye jtsëbátenana, y chë espíritënga obenana bomnëngbiamama ndoñe tsabá ntsichámuana, mo chëngbioye cuafjoyanguangcá. ⁹ Pero ni mo chë angelëngbe mandayá Miguel quem buátëmbayëngcá tojanma. Cha chë diábloftaca ibojentsjaná ora, Moisesbe cuerpama cháftaca jabuachana ibojanenatsëtsnaye ora, ndoñe tonjanenñemó jayanama chë diablëbiamama podësca soyënga, jóyenguanguse, ndayá nÿe mëntšá ibojauyana: “Bëngbe Utabná chacmácacana ca.” ¹⁰ Pero quem buátëmbayëngna, chë ndoñe tontsësertana soyëngama podësca jtsichámuana, y ntšamo tojtsebionama y tmojtsebošama, nÿe mo bayëngcá, chë soyëngama tsabá josértama

juabna ndbomnënga, ndayá chentsana tmojtsësertancá jtsamëse, jamana chënga nyetsca tescama castigánënga jtsemnana chamotsajnama.

¹¹ ¡Tša lastema quem buátëmbayëngbiama! Er chënga ndoñe tšabá tmojanma, mo Caincá; cha tojanaboté ntšamo Bëngbe Bëtsá inétsama bacna soyënga japerdónama, y cabana chabe catsátbioye tbojanóba. Chënga crocénana juácánama, mo Balaam yojanamcá, Bëngbe Bëtsabe tšabe benachentsana tmojtsojuánañe, bacna soyënga jamama. Chënga chë amëndayëngcá Bëngbe Bëtsá tojanabacacángbioye ndoñe ntsayaunanana, ntšamo Coré, Moisés y Aarónbioye joyaunayama ndoñe tonjanbošencá; y chë causa chënga pochocánënga mochántsemna, ntšamo Coré pochocaná chaotsemnana Bëngbe Bëtsá tojanmcá.

¹² Chëngna tšëngaftangbiama jtsemnana mo canye ndëtsenga luarentše canye bëts tsengacá, tšëngaftangftaca tmojenutaná ora, cányiñe jasama mo Jesucristbeñe ošbuachiyëngcá. Chënga chca jtsemnana, er chca fiestënguiñe chënga oyejuayënga jtsemnana, nye chënga tšabá jtsomñama soyënga jtsamëse, y chënga chama ndoñe ntsëuatjana. Chënga nye cachëngbiama jtsantješnana, ínÿengbiama ndoñe. Chënga tša jtsašebuachiyana, pero chëngbe buátëmbana soyënga ínÿengbiama tondayama ntsoservénana; y chca, chënga jtsemnana mo chë tša jënÿá ora jantšetëshëngcá, tondaye ntjuaftena, bínÿiaca ochñëjuanëshënga; y mo betiyeshënga jashtsnëshenga y buashanëshëngcá, chë jashacama tojtsemna ora tondaye shajuana causa. ¹³ Chënga nyets tempo bacna soyënga jtsamana cachëngbe bacna juabnëngaca, y chë bacna soyënga ntšamo tmojtsamcá jtsinÿanÿnayana chënga chë bacna juabnënga imobomnana. Chca, chënga jtsemnana mo mar béjayoca oleshëngcá, chentsana espumushënga bëtscá tsenguësheca jtsóbocanana. Y cabana, chënga jtsemnana mo estrellëngcá chëtemëngbe benachentsana tmojtsebocna, y chentsana jtsefsanana. Bëngbe Bëtsá tojamandá, chë buátëmbayënga ntšamo tmojamamna, chë más ibetoca, tondaye binÿiñe luarentše nyetsca tescama chënga chamoquedama.

¹⁴ Adánbentsana chñënguana pamillo entšanga tmojánachñëjna chentsana Enoc tojánashjango. Chánaca Bëngbe Bëtsabe juabna tojanoyebuambá chë bacna buátëmbayëngbiama, mëntsá tojánayana ora: “Smochjinÿe, Bëngbe Utabná echanjabo bëtscá uaranga angelëngaftaca, ¹⁵ nyetsca entšangbiama jabáyanama ntšamo tmojamcá tšabá o ndoñe tšabá bëtsemnana; y cha echanjamánda chë Bëngbe Bëtsábioye ndoñe adórayënga nyetsca tescama castigánënga chamotsemnana, tša bacna soyënga chabe contra tmojamama, y bacna soyënga chabe contra tmojayanama, chënga, chë puerte bacna soyënga amënga ca” —tojánayana. ¹⁶ Chënga mondmëna chë tšabe soyëngama nyets tempo podescá ichámënga, y ndocna te tondáyeca oyejuayënga ntsemnana. Chënga jtsiyenana bacna soyënga jtsamëse nye cachënga tšabá jtsomñama, y puerte botamana palabrenga jtsichámuana uámanënga jtsenobiamnayëse, y tšabe soyënga ínÿengbioye jtsëtsënyayana, chënga tšabá joquédama y chëngbentsana ndayánaca josháchiñama.

Ošbuáchiyënga jábuayenama

¹⁷ Pero tšëngaftanga, atšbe bonshánënga, šmochtsenójuabnaye ndayá chë Bëngbe Utabná Jesucristbe ichmónënga tmojanëyanama, mëntsá: ¹⁸ “Jesucristo quem luare jésabama tempo chaojtsobeco ora, mochántsemna entšanga, y chënga mochantsiyena jtsamëse nye cachënga tšabá jtsomñama bacna juabnëngaca, y tšëngaftanga cmochantsëbuayajuana ca.” ¹⁹ Chënga mondmëna chë ošbuáchiyënguentše nyetscanga ndoñe cachcá chamondëtsejuabnama amënga; chënga mondoyena jtsamëse cachëngbe bacna juabnëngaca y ndoñe quemátsbomna Uámana Espíritu, chëngbe ainaniñe chaotsemándama.

²⁰ Pero tšëngaftanga, atšbe bonshánënga, nyets tempo, cada te más Jesucristbeñe ošbuáchiyana šmochtsebomna, chë Bëngbe Bëtsábocana endóbocana ošbuáchiyana, y Bëngbe Bëtsáftaca šmochjencuénta, ntšamo Uámana Espíritu tmojtsamëndacá.

²¹ Yejuana šmochtsantješna tšëngaftanga nÿets tempo chašmotsiyenama, Bëngbe Bëtsá cmababuánÿeshanama jtsejuabnayëse, y šmochtsobátmana chë tempo ndaye ora Bëngbe Utabná Jesucristo, tšëngaftanga jtsalastemánëse, yochjama tšëngaftanga chë nÿetsca tescama yomna tsabe vida chašmotsebomnama.

²² Chë inÿe ora aíñe y inÿe ora ndoñe Jesucristbeñe ošbuáchiyana bomnënga šmochtsalastemana. ²³ Bëtsá šmochtsama, báseftanga chë uabouana castigüentšana atsebácanënga chamotsemnama, mo chënga íñeshentšana cuaftëbuacancá. Inÿengbiama chacmotsangmena, pero cuedado šmochtsebomna, chënga chašmojtsëjabuachana ora, ntšamo chënga bacna soyënga tmojtsamcá ndoñe chašmondétsamama; y chë bacna soyënga ntšamo chënga tmojtsiyena jtsamëse, chëngbe bacna juabnëngaca, nÿa tondaye chacmondétsogusetana.

Judas, Bëngbe Bëtsá jëtschuayama

²⁴⁻²⁵ Chë nÿe canÿe Bëngbe Bëtsá, bëngbe Atsebacayá obenana endbomna tšëngaftanga jtsanÿenama, chca, tondaye chaondëma tšëngaftanga Jesucristbeñe ošbuáchiyana chašmotsajbanama; y obenana endbomna tšëngaftanga ainaniñe ndocna bacna soye ndbomnënga chašmotsemnama y puerte oyejuayënga cachabe delante chašmotsemnama, cha canÿe puerte uamaná y obená bétsemnama chaojinÿanjé ora. Bëngbe Utabná Jesucristbeyeca, nÿetscanga Bëngbe Bëtsá chamotsatschuaná; y cha puerte bëtsá chauesomñe, nÿets obenana bomná y nÿets mando bomná, nÿets tempscana, tempo, mora y nÿetsca tescama. Chca chaotsemna.

Apocalipsis

Ndayá quem librêsañe yomna

¹ Quemuentse entsábemana ndayá Bëngbe Bëtsá Jesucristbioye tbojaninÿinÿé, chë Bëngbe Bëtsabe oservénënga cha cháuinÿanÿema, ndayá jopásama yojtsobecuama chënga chamotsetatsëmbuama. Jesucristo chama chabe ángel tbojichmó, chë soyëngama atse, Juan, chë Jesucristbe oservenábioye chašuinÿinÿema. ² Y atse sënjayana lempe ntšamo ndegombre yomncá lempe chë tijinÿe soyëngama, chë Bëngbe Bëtsabe buayenana soyëngama y chë Jesucristo šonjaniyana ndegombre bëtsemna soyëngama.

³ Oyejuayá nda tojtsalía, y oyejuayënga ndëmuanÿenga botamana tmojtsuenana quem yochjopása soyëngama, chë muentse entsabemancá ndegombre tmojóyeunanga, er chca jopasa tempo entsobeco.

Asia luaroca ošbuachiyëngcá enefjuanënga jacheuayama

⁴ Atse Juan, sëntsabiamná chë Asia luaroca canÿsëftañe ošbuachiyëngcá enefjuanëngbiama. Atse, Bëngbe Bëtsá sëntseimpadana, tšabe bendicionënga chábiocana chašmosháchiñe y ainaniñe puerte tšabe ebionana chašmotsebomna, Bëngbe Bëtsábentšana, chë canÿsëfta espíritëngbentšana y Jesucristbentšana. Bëngbe Bëtsá, chë mora endmëná, enjamná y sempre echantsemná; chë canÿsëfta espíritënga, chabe uámana puesto natsanoica mondmënénga; ⁵⁻⁶ y Jesucristo, chë ntšamo Bëngbe Bëtsabiama yotatsëmbcá ndegombre oyebuambnayá, chë natsaná ndabiama Bëngbe Bëtsá tojama obanënguentsana cháuatayenama, y nÿetsca quem luarentša mandadëngbe amëndayá. Cristo šondábabuanÿeshana y bëngbe bacna soyënguentsana šojatsebacá, cha tonjanóbanayeca, chabe buiñe juabuáshanëse. Cha tojama bënga chamotsobena cháftaca jtsemándayana y uámanënga chamotsemnana, y Bëngbe Bëtsá chabe Taitá mo bachnangcá chamotseservénama. ¡Nÿetscanga nÿets tempo chamotsinÿanÿná Cristo puerte bëtsá y uamaná bëtsemnana y obenana nÿetsca tescama yobomnana! Chca chaotsemna.

⁷ Mouenënga. Cristo jantšetëshënguñe echanjésabo.

Chábioye nÿetscanga mochanjinÿe,

chë tmonjancrucificágnaca;

y quem luarentša nÿetsca entsanga puerte ngménaca mochántsemna

y mochantsošachna chábeyeca.

Ndegombre, chca chaotsemna.

⁸ “Atse sëndmëna chë nÿetsca soyënga bojatsayá y pochocayá ca,” Bëngbe Utabná Bëngbe Bëtsá tojayana. Cha chë sempre endmëná, enjamná, nÿets tempo echantsemná, chë nÿets obenana bomná.

Juan mo otjenayoquëcá Cristbiana tojáninÿe

⁹ Atse Juan, Jesucristbeyeca tšëngaftangbe catšata, cháftaca cánÿiñe mo canÿacá bëtsemnana, cach tšëngaftangcá sëndëpadecena, tšëngaftangcá chanjëftsashjache Bëngbe Bëtsabe amëndayoye jamashënguama, y tšëngaftangcá Bëngbe Bëtsabeñe jtsobátmanëse, uantado sëndmëna chë padecena soyënguñe. Bëngbe Bëtsabe palabra sënjanabuayinama y Jesusbiana ntšamo ndegombre endmëncá sënjanóyeuambnana, atse šmonjetsanëtšena mar béjayoca canÿe fshantsentse, Patmos ca uabáinoca. ¹⁰ Y tonjanopasá, canÿe tmengo, chë ošbuachiyënga Bëngbe Utabnábioye cánÿiñe jëtschuayama te, atse sënjanouedá chë Uámana Espíritbeyeca corente mandaná, mo otjenayoquëcá soyënga sënjëtsonÿaye, y atšbe stëtšoica canÿe jabuache oyebuambnayana sënjanuena, mo canÿe trompetëfjua cuafjuajatëtcá; ¹¹ mëntšá šontsanatsëtsná: “Canÿe librêsañe mábema lempe ntšamo contsonÿacá

y cochjuíchmua chë Asia luaroca canýsëftañe ošbuachiyëngcá enefjuanëngbioye: Efeso, Esmirna, Pérgamo, Tiatira, Sardis, Filadelfia y Laodiceoquëngbioye ca.”

¹² Sënjanobuértana jinýama nda chca šojtsanatsëtsná, y chca sënjanma ora, sënjáninýe canýsëfta castellano candelerëšënga; ¹³ y chë canýsëfta castellano candelerëšënguiñe tsëntsaca canýa sënjáninýe, mo entšacá inýná, canýe bën entšayá uichëtjoná, y cochóntscoca canýe tëntša castellano uasnanëjaca. ¹⁴ Chabe stjënashana uafjantsësha, puerta uafjantsësha mo canýe oveshabe boboshëshacá, y chabe fšnëbenga mo iñeshcá enjétsinýna. ¹⁵ Chabe shecuatšënga enjëtsebuashinýinýana mo bronscá, ndaybé natsana iñëjana tcojuchnëngo enabé chaotsemnama y chentšana entšëjuaca becá tcojajojó corente chaotsebuashinýinýanama; y chabe oyebuambnayana jabuache enjétsenana mo bëtscá béjaye cuaftsebuachquëcjancá. ¹⁶ Chabe catšbioica cucuatšinë enjétsatbëna canýsëfta estrellënga, y chabe uayoicana enjétsobocana canýe espadëja, nyets utoicajana puerta efsánëja, y chabe jubiá tša enjëtsebuashinýinýana, mo chë shinýe corente, lempe ntšamo tojobenacá tojtsebuashinýinýana orcá.

¹⁷ Cha sënjáninýe ora, chabe shecuatšentše mo obanacá sënjánshajaye. Pero cha, chabe catšbioica cucuatše átšbeñe jajájuase, šonjaniyana: “Ndoñe matauatjana; atše sëndmëna chë nyetsca soyënga bojatsayá y pochocayá, ¹⁸ chë sempre vida bomná. Atše obaná sënjamna, pero mora nyetsca tescama vida sëntsebomna. Atše obenana sëndbomna, y chë obenánaca entšángbioye ndoñe quenátamna infernoca nyetsca tescama castigánënga jtsemnana, mo nyets tempo cuaftsobancá. ¹⁹ Ntšamo tconjinýcá mábema, chë quem tempo endmëna soyëngama y chë más chcoye echántsemna soyëngama. ²⁰ Mëntšá endmëna chë atšbe catšbioica cucuatšinë tconjinýe canýsëfta estrellëngaca y chë canýsëfta castellano candelerëšëngaca: chë canýsëfta estrellënga montsinýinýná chë canýsëftañe ošbuachiyëngcá enefjuanëngbeñe chamotsemándama uámana ichmónënga, y chë canýsëfta candelerëšëngna chë canýsëftañe ošbuachiyëngcá enefjuanënga.”

2

Efesoca ošbuachiyëngcá enefjuanënga jábuayenama

¹ Mëntšánaca cha šonjaniyana:

“Mëntšá mabobema chë Efesoca ošbuachiyëngcá enefjuanëngbeñe chaotsemándama uámana ichmonábioye:

Mëntšá entsichamo chë chabe catšbioica cucuatšinë canýsëfta estrellënga entsatbëná y chë canýsëfta castellano candelerëšënga luarëjana entsaná: ² Atše lempe sëndëtatšëmbo ntšamo tšëngaftanga šmoyenana; atše corente sëndëtatšëmbo tšëngaftanga jabuache šmotrabájama, y ntšamo tšëngaftanga Bëngbe Bëtsábeñe jtsobátmanëse šmnëtsauantana padecena soyënguiñe šmojtsemna ora. Y átšnaca sëndëtatšëmbo tšëngaftanga ndoñe šmontsobena jtsëuantánana ntšamo bacna entšanga tmojtsamcá. Atšnaca sëndëtatšëmbo tšëngaftanga yejuana šmojarrepará y becá šmojenojuabó jinýama chë Jesucristbe ichmónënga imomna ca tmojtsichamëngbiamá; pero ndegombre chënga ndoñe chca quemátsmëna; y chca šmojámayeca, tšëngaftanga mora šmontsetátšëmbo chënga bosterënga imomnama. ³ Padecena soyënguiñe becá šmojoboyá y chca ora, Bëngbe Bëtsábeñe šmobátmana. Chë soyënguiñe šmojasufrí, tšëngaftanga atše šmoservénama; y tšëngaftanga chca šmondëserveda, ainaniñe añemo jtsebomnama ntjajbanacá.

⁴ Pero canýe soye sëntsebomna tšëngaftangbe contra jayanama: Tšëngaftanga mora ya ndoñe cachca bonshánana quešmátsbomna ni atšbiamá ni nyetsca entšangbiamá, ntšamo átšbeñe jtsošbuáchiyama šmonjanbojatsé orcá. ⁵ Menójuabonga ntšamo chë tempo šmonjánbobonshanama, juabnayana motrocanga y cachiñe šmochtsama ntšamo chë átšbeñe jtsošbuáchiyama šmonjanbojatsé orcá. Ndoñe chcase, atše tšëngaftangbioye chanjá jabuache jetsacastígama, jtsapochócantscuana, mo chë tšëngaftangbe cuenta

entsemna candelerëse chabe puestentšana cuaftsejuanacá. Chca chanjama, tšëngaftanga juabnayana ndoñe chašmonjatrocace. ⁶ Pero tšëngaftangbe pavor quem tšabe soye šmontsebonna: Tšëngaftanga šmonduábotena lempe ntšamo chë nicolaíta ca uabaina entšanga tmojtsamcá, ndayá átšnaca sënduábotena.

⁷ Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtnacá. Chë padecena soyënguentsšana tšabá chamojábocana mo ayënjanayëngcá, chëngbiana chanjama chë nyetsca tescama yomna tšabe vida chamotsebonnama, y chca chënga mochántsemna mo chë nyetsca tescama yomna tšabe vida jtsebonnama betiyeshentsšana cuaftsesacá, chë entšanga sempre oyejuayënga mondbetsemnoca ca” —cha šonjaniyana.

Esmirnoca ošbuachiyëngcá enefjuanënga jábuayenama

⁸ Mëntšánaca cha šonjaniyana: “Esmirna bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë nyetsca soyënga bojatsayá y pochocayá, chë tonjanobaná y ndabiana Bëngbe Bëtsá tonjama cháuatayenama: ⁹ Atše sëndëtatsëmbo tšëngaftanga tša jabuache šmojasufrima y ndbomnjémënga šmommama, pero ndegombre Bëngbe Bëtsábocana bëtscá tšabe soyënga šmondëtsóbomñe. Y sëndëtatsëmbo tša bacá tšëngaftangbiana mondoyebuambná chë judiënga imomna ca ichámënga, pero ndoñe ntsamana mo chë Bëngbe Bëtsabe bocacana entšangcá; chca, chënga mondmëna mo Satanabe entšangcá, nye chábioye jtseservënese y jtsatschuanayëse.

¹⁰ Ndoñe matauatjëngana chë ndoñe yapa bën y tšëngaftanga šmochjasufrima, er Satanás echanjama tšëngaftanguentsënga báseftanga cárceloye ínÿënga chacmëtámiamia, jinÿama ntsachetšá Crístbeñe ošbuáchiyana šmobomnama, padecena soyënguiñe šmojtsemna ora; y entsamna baseftayté jasúfriana. Sempre bëtscá ošbuáchiyana, y ainaniñe bëts añemo šmochtsebonna, masque jobanámnaca chacmotsamna, Crístbiana trabájaye causa. Chca chašmojtsamëse, atše chanjama tšëngaftanga chašmotsebonnama mo canÿe uacanana soycá, chë nyetsca tescama yomna tšabe vida.

¹¹ Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtnacá. Chë padecena soyënguentsšana tšabá chamojábocana mo ayënjanayëngcá, ndegombre chënga ndoñe queochátamna játauatjana nyetsca tescama castigánënga jatsmënacama ca” —cha šonjaniyana.

Pérgamoca ošbuachiyëngcá enefjuanënga jábuayenama

¹² Mëntšánaca cha šonjaniyana: “Pérgamo bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë nyets utoicajana puerte efsana espadëja entsatbëná: ¹³ Atše sëndëtatsëmbo ntšamo yomna tšëngaftangbe oyenentše, canÿe luare ndayentše Satanás entšángbioye puerte iuamënda. Masque chca, tšëngaftanga sempre nye atše šmondëtseserverna, y ndocna te chešmáisayana átšbeñe ndoñe šmondošbuaché ca, ni mo Antipas, chë canÿe nyets tempo atšbe ustoná y atšbiana ndegombre oyebuambnayá, ínÿënga tmonjanóba ora. Y lempe chca tojopasá tšëngaftangbe pueblentše, ndayentše Satanás bëtscá entsana.

¹⁴ Pero básefta soyënga sëntsebonna tšëngaftangbe contra jayanama: Chentše tšëngaftangbeñe báseftanga montsemna, soyënga montsabuatambá ntšamo bayté entsemna Balaam enjanabuatambacá. Cha rey Balácbioye tbojanbuayená ntšamo jamana Israeloca entšángbioye jáingñama, chënga chë ntšamo ndoñe tšabá yomncá chamotsamama; y chca, Balac tojanma chë ínÿënga diosënga yojamna ca imojana-juabná soyënga jadórama uátšëmbona saná chë Israeloca entšanga chamosama, y shembása o boyabásaftaca bacna soyënga chamotsamama. ¹⁵ Chéntšnaca ínÿënga

montsemna, y chëngna chë nicolaitëngbe buatëmbana soyënguiñe mondošbuaché, y chca buatëmbana soyënga ndoñe tšabá quenátsmëna. ¹⁶ Smochtsejuabnaye ntšamo šmojtsamama, chëngbioye tšëngaftangbeñe šmojtsëuantana ora, y chca jtsamana smochjajbaná; er ndoñese, atše betscó tšëngaftangbioye chanjá, y chë chca buatëmbana soyënguiñe ošbuáchiyana ndoñe tmonjajbanángaftaca chanjéntsja chë atšbe uayoicana endóbocana espadéjaca.

¹⁷ Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtnacá. Chë padecena soyënguentsana tšabá chamojábocana mo ayëñjanayëngcá, chëngbioye maná chanjátšataye chamosama, chë celoca tandëse, ndayá Bëngbe Bëtsá tempo entsángbioye ndoñe tonjinñanyé; y canye fjantse ndëtšëtëma chanjáyentšbuachiye, chënga oyejuayënga šmojábemama. Chiñe canye tsëm uabaina echantsábemana; ndocná chë uabaina quenátabuatma, ndayá nye chë chamojóyëngacñënga ca” —cha šonjanianyana.

Tiatiroca ošbuachiyëngcá enefjuanënga jábuayenama

¹⁸ Mëntsánaca cha šonjanianyana: “Tiatira bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo Bëngbe Bëtsabe Uaquiñá, chë mo iñeshcá uafšná y mo entsëjuaca jojona puerte chaotsebuashinñinñanama bronze shecuatšënga bomná:

¹⁹ Atše sëndëtatšëmbo ntšamo tšëngaftanga šmoyenama; sëndëtatšëmbo ntsachetšá tšëngaftanga Bëngbe Bëtsábioye y nyetscángbioye šmababuánñeshanama, ntšamo tšëngaftanga Bëngbe Bëtsábeñe puerte šmošbuáchema, ntšamo chábioye šmoservénama, ntšamo tšëngaftanga ínñënga šmojuabuache y ntšamo Bëngbe Bëtsábeñe jtsobátmanëse becá šmojoboyá padecena soyënguiñe; y sëntsetatšëmbo mora más bëtscá tšabe soyënga šmojtsama, ntšamo tšëngaftanga átšbeñe jtsošbuáchiyama šmonjanbojatšë orscama.

²⁰ Pero canye soye sëntsebojna tšëngaftangbe contra jayanama: Tšëngaftangbeñe šmondëuantana chë shembása, mo chë bacna reiná Jezabelcá endmënábioye. Chë shembása entsichamo Bëngbe Bëtsabe juabna oyebuambnayá canmëna ca; pero chabe buatëmbana soyëngaca atšbe oservénënga entsaíngña, shembása o boyabásaftaca bacna soyënga chënga chamotsamama, y chë ínñënga díosënga yojamna ca imojanajuabná soyënga jadórana uátšëmbona saná chamosama. ²¹ Cha sënjuená atše chjacastíga ca, chca juabnayana ndoñe tonjatrocace, y canye boyabásaftaca bacna soyënga amana ndoñe tontsajbanase. Cha jacastígama batšá sënjobatma, nderado chca amana nanjatróca, pero ndoñe chenátšbošena. ²² Mora atše chanjama bëts šocana cha chaboshachama, y chë cháftaca bacna soye tmojamënga, juabnayana ndoñe tmonjatrocá y chca jtsamana ndoñe tmonsajbanase, chëngbiama chanjama puerte chamosufrima; ²³ y chë shembásabe básënga chantsëbaye. Chca, nyetsquénache ošbuachiyëngcá enefjuanënga mochántsetatšëmbo, ndayá entsanga juabniñe y ainaniñe tmojuabnacá atše tsuábuatmama; y cada ona tšëngaftanguentsá, chca bacna soye cháftaca tojamá, ntšamo ibojtsomerecencá chanjacastíga.

²⁴ Pero tšëngaftangbentse, ínñënga Tiatira pueblentse šmojtsemnënga, chë shembásabe buatëmbana soyënguiñe ndoñe šmontsošbuachënga, y chë ínñënga imuábuatma Satanasbe soyënga, chë ndoñe paselo josértama soyënga ndoñe šmonjuabuátmanënga, tšëngaftanga ndoñe quebochatamënda inñe más toto soye chašmotsamama. ²⁵ Pero nye sempre smochtsama ntšamo mora šmojtsamcá, y smochtsiyena ntšamo chë Bëngbe Bëtsábiocana šmojóyëngacñe soyënga yomncá, atše quem luaroye jesabámëntscuana.

²⁶ Chë padecena soyënguentsana tšabá chamojábocana mo ayëñjanayëngcá y ntšamo atše sëndëmandacá chamojtsamënga, chë quem luarentse ya ndoñe más vida jesebomnámëntscuana, atšbe obenana chanjátšataye nyetsca mándayëngbentšá

entšángbeñe jtsemándayama,²⁷ ntšamo atšbe Taitá chabe obenana šojatšetacá; y chënga entšángbioye puerte obenánaca mochántsamëndaye, mo canye hierro varëfjaquécá, y chëngbe contra chamojtsemnëngbioye mochántsapochocaye, mo nye matbajënga tmojtsëtsjanjnacá. ²⁸ Y chë jabínynama ora binynaye estréllnaca chanjátšataye.

²⁹ Chë jouenama tmojtsobenënga, chamouena ndayá Espiritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniana.

3

Sardisoca ošbuachiyëngcá enefjuanënga jábuayenama

¹ Mëntšánaca cha šonjaniana: “Sardis bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë Bëngbe Bëtsabe canysëfta espíritënga y chë canysëfta estrellënga bomná: Atše lempe sëndëtatšëmbo ntšamo tšëngaftanga šmoyenama; atše sëndëtatšëmbo tšëngaftangbiana inyënga tša jtsichámuana Bëngbe Bëtsá jaserviama bëtscá šmojtsama ca, pero ndegombre tšëngaftanga nye batšatema šmontsama, y chca, chabiana mo obanëngcá šmondmëna. ² Botamana šmochjenóbobonye y más šmochtsama chë Bëngbe Bëtsá jaserviama cabá šmondama básefta soyënga. Ndoñe yapa quenátájamna chë tšabe soyëngnaca chašmotsajbanama, er atše sënjinye chë Bëngbe Bëtsábioye jaserviama ntšamo jtsamëse šmoyencá, atšbe Bëtsabiana ndoñe yapa tšabá quenátsmëna. ³ Asna, šmochtsenójuabnaye ndayá Bëngbe Bëtsábioyana šmojóyëngacñama, y chabiana šmojouena soyënguínna. Ntšamo chë soyënga yomncá šmochtsiyena, juabnayana šmochjatróca y šmochjontša bëtscá jtsamana Bëngbe Bëtsá jaserviama. Ndoñe tšabá cach tšëngaftanga chašmonjenójuabose y juabnayana ndoñe chašmonjatrocace, nye ndeolpe chanjá tšëngaftangbioye, mo canye atbëbanacá, chabiana ndocná tontsejuabná ora, y ndegombre tšëngaftanga ndoñe quešmochátstatšëmbo mocna ora atše tšëngaftangbioye chjama.

⁴ Masque chca, Sardisentše tšëngaftangbeñe básefta entšanga mondmëna, chënga ndoñe chematajbaná oyenana tšabe soyënga jtsamëse, bacna soyënga játamama. Chëngna átšëftaca mochántšajna uafjantsëjuangá uichëtjonënga, chënga chca merecido montsebuajónayeca. ⁵ Chë padecena soyënguentšana tšabá chamojábocana mo ayëñjanayëngcá, chca uafjantsëjuangá uichëtjonënga mochántsemna, y chëngbe uabaina ndoñe quichatsjuána chë tšabe vida mochjónyëngbe uabaina enduábemana libřësentšana, ndayá atše, Bëngbe Bëtsabe delante y chabe angelëngbe delante, chënga atšbe entšanga imomna ca chanjayana.

⁶ Chë jouenama tmojtsobenënga, chamouena ndayá Espiritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniana.

Filadelfioca ošbuachiyëngcá enefjuanënga jábuayenama

⁷ Mëntšánaca cha šonjaniana: “Filadelfia bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë uamaná y ndegombre oyebuambnayá, chë jtsemándayama puerte obenana bomná, ntšamo Rey David enjanbomncá, chë nda ndayá chaotsemnama tojamandá ora, ndocná ntšobenana jamama chca ndoñe chaondëtsemnama, y ndayá ndoñe chaondëtsemnama tojamandá ora, ndocná ntšobenana jamama aíne chaotsemnama: ⁸ Atše lempe sëndëtatšëmbo ntšamo tšëngaftanga šmoyenama. Minyënga, atše sënjama tšëngaftanga bëtscá tšabe soyënga chašmotsebomnama, y ndocná quenátobena jamama chca ndoñe chaondëtsemnama; y chca entsemna mo atše tšëngaftangbiana canye bësáša cuafjatëfcá, y chësa jtatámiamana ndocná quenátobena. Atše sëndëtatšëmbo tšëngaftanga batšatema obenana šmobomnama, pero šmojouena ntšamo jtsamama tčbonjáuyancá, y ndocna te chešmátayana

atsbe entsanga ndoñe šmondmëna ca. ⁹ Atše chanjama, chë mo Satanasbe entsangcá imomnënga, nÿe chábioye jtseservënese y jtsatschuanayëse, chë judiënga imomna ca ichámënga, pero chë Bëngbe Bëtsabe bocacana entsangcá ndámënga y bosterënga, chënga tsëngaftangbioye chamua y tsëngaftangbe delante chamoshamentšé, tsëngaftangbiama respeto jinÿanÿiyama, y chca, chënga chamotsetátšëmbo atše sempre cbababuánÿeshanama. ¹⁰ Atše tcbonjanamëndá, Bëngbe Bëtsábeñe jtsobátmanëse, lempe chašmotsoboyá padecena soyënguiñe, y tsëngaftanga chca šmonjama. Chíyeca, atše puerte tsabá cbochántsanÿena, chë quem luarentše oyenënga nÿetscanga jasúfriama y padecena soyënguiñe jtsemnama chaojtsemna ora, Bëngbe Bëtsábeñe aiñe o ndoñe mondošbuáchema jinÿanÿiyama.

¹¹ Cachiñe quem luaroye betesco chanjésabo. Sempre šmochtsama ntšamo mora šmondamcá, y Bëngbe Bëtsábiocana šmojóyëngacñe soyënga šmochtsinÿena; chca ndocná chaondobená ndayá jamana, y chë sóyeca chaoma tsëngaftanga ndoñe chašmondóyëngacñe ndayá Bëngbe Bëtsá chë chábioye jtseservënema ndoñe tmontsajbanángbioye yochjatšataycá, chëngbe uacanana soye. ¹² Chë padecena soyënguentsana tsabá chamojábocana mo ayëñjanayëngcá, chëngbiama atše chanjama sempre Bëngbe Bëtsabe delante chamuesomñama, y chca, chënga mochántsemna mo chë Bëngbe Bëtsabe bëts yebnentša ucuatjoniñcá; ndocna te Bëngbe Bëtsábentšana quemocháisebocana; y chëngbeñe atsbe Bëtsabe uabaina chanjuábema y atsbe Bëtsabe bëts pueblentša uabaina, chë tsëm pueblo Jerusalén, chë celocana yobá pueblo, Bëngbe Bëtsábiocana. Y chëngbeñnaca chanjuábema atsbe tsëm uabaina. Lempe chca chanjama jinÿanÿiyama chënga Bëngbe Bëtsábenga mochtsemnama.

¹³ Chë jouenama tmojtsobenënga, chamouena ndayá Espiritu chë ndayenache ošbuachiyëngcá enefjuanënga yojtsëtsëtnacá ca” —cha šonjaniyana.

Laodiceoca ošbuachiyëngcá enefjuanënga jábuayenama

¹⁴ Mëntsánaca cha šonjaniyana: “Laodicea bëts pueblaca ošbuachiyëngcá enefjuanëngbeñe chaotsemándama uámama ichmonábioynaca mëntsá mabobema:

Mëntsá entsichamo chë sempre Ndegombrá endmëná, chë Bëngbe Bëtsabe soyëngama ndegombre oyebuambnaya, y chë ndábeyeca Bëngbe Bëtsá quem luare tojanmá: ¹⁵ Atše lempe sëndëtatšëmbo ntšamo šmoyenama. Atše sëntsetatšëmbo tsëngaftanga ndoñe yapa šmontseboše Bëngbe Bëtsá jaserviama, pero Bëngbe Bëtsabe buayenana soyënga ndoñe lempe šmontsaborté. Y chca, nÿe batsatema šmojtseboše Bëngbe Bëtsá jaserviama; chca, tsëngaftanga šmontsemna mo tibiye buyeshcá, ni ntšniñiye, ni shécbaniye. ¡Atše sëntseboše tsëngaftanga chašmotsemna mo ntšniñiye o shécbaniye buyeshcá, tsabá jtsamëse o tondaye! ¹⁶ Chca, tsëngaftanga tibiye buyeshcá šmondmëna, y ndoñe quešmátsboše bëtscá jamama, pero Bëngbe Bëtsabe soyënga ndoñe lempe šmontsaborté. Chíyeca atše sëntsejuabná jtsëbatena, mo nda tibiye búyeshe tojëtšbuashëtjácá, chcaye ndoñe bondogustana causa.

¹⁷ Er tsëngaftanga jtsichámuana bomnënga šmomna ca, puerte tsabá šmojábocana y tondaye cmontsabuáshebena ca, pero ndoñe quešmátstatšëmbo Bëngbe Bëtsabe soyënga bëtscá cmojtsabuáshebenama. Chca, tsëngaftanga šmontsemna nÿa ndoñe tsabá, ínÿenga ngmënanana chacmotsabamna, mo ndbomñëjemëngcá, mo jtanëngcá, Bëngbe Bëtsabe soyëngama ntosertancá, y mo enašëngcá, bëtscá Bëngbe Bëtsabe soyënga ntsebomncá. ¹⁸ Chíyeca cbabuayená, átsbentšana chašmuatsjinÿe chë Bëngbe Bëtsabe soyënga y uámama soyënga, mo chë ena castellano jabemama, iñëjana fjëchnënguëse castellano átsbioye šmojtsontšabuamnañcá. Tsëngaftanga Bëngbe Bëtsabe delante mo enašëngcá šmondmëna, er cha endonÿá chë ba bacna soyënga ntšamo tsëngaftanga šmojtsamcá. Smochjalesencia atše chachëjabuache tsëngaftanga Bëngbe Bëtsabe bominiñe tsábënga chašmotsemnama, mo juichëtjuama uafjantse entsayá átsbioye

šmojtsantšabuamnañcá. Chca šmochjama, tšëngaftanga Bëngbe Bëtsabe delante ndoñe chašmondëtsëuatjama. Smochjaleséncia atše chachbëjabuache tšëngaftanga Bëngbe Bëtsabe soyëngama chacmósertama, mo tšëngaftanga bominye šocanama shnana átšbioye šmojtsontšabuamnañcá. Chca šmochjama, Bëngbe Bëtsabe soyëngama puerte tšabá chacmósertama.

¹⁹ Atše chë sëndábabuanÿeshanënga sëndbaucácana y sëndbábuayenaye. Chíyeca, lempe ntšamo šmojobenacá smochtsama Bëngbe Bëtsá jaserviama, y juabnayana smochjatróca, y nÿets tempo puerte smochtseboše Bëngbe Bëtsá jtseservénana.

²⁰ Nderado canÿe tšabe amigo yebnoye tojabo y tojachembo, tšëngaftanga šmojouenëse y bësáša šmojebiatëfjëse, cha jamashënguana, y cánÿiñe cháftaca joyejuayana y jasana. Cachcá, atše entsanga sentsachembuana chašmolesenciá chëngbe ainaniñe jtsiyenama. Nderado nda šojóyeunase, atše chanjámashëngo chabe ainaniñe jtsiyenama, y nÿets tempo cháftaca cánÿiñe mo canÿacá chanjëftsemna.

²¹ Chë padecena soyënguentšana tšabá chamojábocana mo ayëñjanayëngcá, atše chanjama chënga puerte bëtsétsanga chamotsemnana ntšamo atše sëndmëncá, y átšeftaca chamótbemama, atšbe uámana tbemanentše jtsemándayama, ntšamo atše atšbe uayayëngbioye sënjayëñjanacá, y atšbe Taitáftaca chabe uámana tbemanentše tijotbemcá.

²² Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá” —cha šonjaniyana.

4

Chë Ainënga Bëngbe Utabnabe uámana tbemanentša natsana imojtsechuanaye

¹ Chentšana mo otjenayoquëcá sënjáninÿe. Sënjanrrepará y sënjáninÿe celoca canÿe bësáša enjétsatëfjna, y chë natsana sënjanuena oyebuambnayana, chë enjamna mo canÿe trompetëfjua cuafjuajatëtcá, mëntšá šonjétsatsaye: “Moye másëngo, atše cbochanjinÿinÿiye ntšamo más chcoye yochjopasacá ca.”

² Cachora, chë Uámana Espíritbeyeca, mo atšbe ainana celoca cuaftsemncá atše sënjanoquedá, y sënjáninÿe celoca enjëtsemna canÿe reybe uámana puesto, y chentše canÿa enjëtsetbemana. ³ Chentše enjëtsetbemaná enjamna, puerte tëshinÿná mo jaspe ndëtsbecá, puerte buanganá mo cornalina ndëtsbecá, y chë uámana puesto shëconana canÿe tsëfcuácuatjo enjamna, y enjëtsebuashinÿinÿana mo canÿe esmeralda ndëtsbecá. ⁴ Chë reybe uámana puesto juachajana, inÿe uta bnëtsana y canta puesto sënjáninÿe, y chiñe uta bnëtsana y canta bëtsëjémënga amëndayënga monjëtsetbiamana, uaffantsëjuangá uichëtjonënga, y castellano coronëshangá monjëtsetbestšajona. ⁵ Chë uámana puestentšana enjëtsohocana tcuinÿëjënga, becá shauenanana y juesasanana; y chë uámana tbemaniñentša natsanoicna, canÿsëfta uajuinÿanëshu enjëtšangbototjuana; chë uajuinÿanëshangá entsayana chë Bëngbe Bëtsabe canÿsëfta espíritënga. ⁶ Y chë uámana puestentša natsanoica enjëtsemna mo canÿe mar bejaycá, tëshinÿniye mo canÿe cristal ca uabaina ndëtsbecá.

Chë luariñe tsëntsaca, chë uámana puesto enjëtsemnentše y chë shëconánëjana monjëtsemna canta Ainënga, nÿëtsañe fšnëbéngaca, natsanoica y stëtsoica. ⁷ Chë natsana Ainá enjamna mo canÿe leoncá, chë inÿe Ainá mo canÿe toroścá, chë inÿe Ainá enjánbomna mo canÿe entsabe jubiácá, y chë inÿe Ainá mo canÿe águila tojtsongüefnacá. ⁸ Chë canta Ainënga, cada ona chnënguana juatëngmiáša enjanábomna, y tsoicajana y shjoicajana nÿëtsañe fšnëbënga monjánbomna. Y chënga nÿets tempo, ntjochnacá mëntšá monjánichamo:

¡Uamaná, Uamaná, Uamaná, Bëngbe Utabná,
Bëngbe Bëtsá nÿets obenana bomná,

nda enjamná, endmëná y sempre echanjëftsemná ca!

9-10 Chca chë Ainënga Bëngbe Bëtsá bëtscá tmontanchuá, Bëngbe Bëtsá chë uámana puestentse tbemaná, chë nyets tempo y nyetsca tescama oyená. Chënga puerte respeto chabiana monjétebomna y bëtscá tmontanchuá. Cada ora chënga chca tmonjanma ora, chë uta bnëtsana y canta bëtsejémënga amëndayënga, chë uámana puestentse tbemanabe shecuatsentse joshamentšiyana y chábioye jtsatschuanayana, chë coronëshangá chë natsanoica jutšanana, y mëntšá jtsichámuana:

11 Aca nyets merecido condëtsobuájoñe, Bëngbe Utabná y Bëngbe Bëtsá, entšanga chamotsinÿanÿnama, aca puerte bëtscá comnama, y chamotsichamo aca nyets respeto buajoná comna, y nyets obenana bomná comna ca, er aca nyetsca soyënga tcojama; aca icnabóseyeca chë soyënga yojtsemna y aca chca tcojanma ca.

5

Chë uabemana uándmanana tsbuanácha y chë Oveshatema

1 Chë uámana puestentse enjetsetbemanabe catsbioica cucuatšinë canÿe uándmanana tsbuanáchanaca sënjáninÿe, y nyëtsañe enjétsabemana tsoicajana y shjoicajana, y canÿsëfta tsengájaše sellëngaca enjétsajandmanana. 2 Y canÿe ángel puerte obenana bomná sënjáninÿe, y cha mëntšá enjétsayebuache: “¿Nda merecido yobuájona, quem uándmanana tsbuanácha jutëfjonama y chë sellënga jutsécama ca?”

3 Pero, ni celoca, ni quem luarentse, ni quem luarentša jashenoye, ndocná quen-jatsmëna obenánaca chë uándmanana tsbuanácha jutëfjonama, ni juinÿama. 4 Y atse puerte sënjánenobošachna, er ndocná ntjónÿnana merecido buajoná chë uándmanana tsbuanácha chautëfjonama, ni chauinÿama. 5 Pero canÿa chë bëtsejemënguentšá šonjaninyana: “Ndoñe más matenóbošachena; mouena, chë Judabe pamillentsá, León ca uabobainá, mando y obenana bëtsebomnama, chë rey Davídbentsana Entšá, tonjayëjaná; cha entsobena chë uándmanana tsbuanácha jutëfjonama, y chë canÿsëfta sellënga jutsécama ca.”

6 Chora sënjáninÿe, chë uámana puesto y chë canta Ainënga y chë bëtsejémëngbe tsëntsaca, canÿe Oveshatema tsanana, pero enjétsinÿna mo cuaftsobacá. Chë Oveshatema enjánbomna canÿsëfta tsëtjonëse y canÿsëfta fšněbé. Chë canÿsëfta fšněbé monjaninÿinÿná chë Bëngbe Bëtsabe canÿsëfta espíritënga, chë Bëngbe Bëtsá nyets quem luarëjana tojánichamonga. 7 Chë Oveshatema tonjanobeconá y chë uándmanana tsbuanácha tonjanaca, chë uámana puestentse tbemanabe catsbioica cucuatšentsana; 8 y chabe cucuatšinë tonjanaca ora, chë canta Ainënga y chë uta bnëtsana y canta bëtsejémënga amëndayënga chë Oveshatembe shecuatsentse tmonjanoshamentšé. Nyetscanga monjétsëtbëna arpangá y castellano copbenga jútjena inciensiýeca; chë copbenga inciensiýeca enjamna chë Bëngbe Bëtsabe entšanga tmojayana palabrenga, cháftaca jencuéntama ora. 9 Y quem tsëm canto montsancántaye:

Aca merecido condëtsobuájoñe, chë uándmanana tsbuanácha chacuacama y chë sellënga chacutsécama; er acbe buiñe juabuáshanëse tconjanóbana, y chca enjamna mo crocénana cuafjëtsajocá, Bëngbe Bëtsabiana chamotsemnama, entšanga nyetsca cachca buiñe bomnënguentšana, nyetsca biyana bomnënguentšana, nyetsca canÿe entšanguentšana, y nyetsca mándayëngbentša entšanguentšana.

10 Aca tcojama chënga chamotsobena ácaftaca jtsemándayama y uámanënga chamotsemnama, Bëngbe Bëtsábioye mo bachnangcá chamotseservénama, y quem luarentse chënga montsemánda ca —chënga monjëtseversiaye.

11 Y chca sënjëtsonÿaye ora, mallajta angelëngbe oyebuambnayana sënjanuena, y chënga monjëtsemna chë uámana puestentse, chë Ainënga y chë bëtsejémënga amëndayëngbe

shéconana. Nýetsá bëtscá angelënga monjésemna, corente mallajta; ¹² y chënga mëntšá monjétsayebuache:

¡Chë Oveshatema cuafjobacá endmëná,
mercedo endëtsobuájoñe, nýets obenana, nýets bomnana,
nýets osertánana y nýets añemo chaotsebomnana,
y entšanga chabiamama chamotsichamo cha nýets respeto buajoná yomna ca,
y chamotsinýanýnama cha puerte bëtšá y uamaná yomnana,
y nýetscanga chamotsatschuanama ca! —chënga monjétsayebuache.

¹³ Y sënjanuena, lempe ntšamo Bëngbe Bëtšá tojanmcá aina soyënga, celoca, quem luar-entše, quem luarentša jashenoye y chë mar béjayoca, chëngnaca mëntšá monjétsichamo: ¡Chë uámana puestentše tbemanábioye y chë Oveshatema nýetscanga nýets tempo y nýetsca tescama chamótsatacheuanaye

y chamotsichamo chata puerte uámanata y nýets respeto buajonata ibomna ca,
y chamotsinýanýná chata puerte bëtšétsata y obenata bëtsemnana ca!

¹⁴ Y chë canta Ainëngna monjétsichamo: “Chca chaotsemna ca.” Y chë bëtšëjmënga amëndayëngna tmonjanoshamentšé y chátbioye monjétsatacheuanaye.

6

Chë Oveshatema chë canýsëfta sellënga tonjanëtsëcá

¹ Chentšana más sënjáninýe; chë Oveshatema chë canýsëftentšana natsana sello tonjanëtsëcá ora, sënjanuena canýa chë canta Ainënguentšana puerte jabuache, mo cuafjajuesascá, mëntšá enjétsichamo: “¡Mabo ca!” ² Sënjanrrepará y sënjáninýe canýe fjantse couaye, y chábeñe enjetsenjaquená canýe arquëja enjétsatbëna. Chábioye canýe coronëshá tmonjaninýe, y mo canýe ayëñjanayacá tonjéftsanbocna, y cabá más jat-syëñjanámna.

³ Chë Oveshatema chë inýe sello tonjanëtsëcá ora, sënjanuena chë inýa chë canta Ainënguentšana mëntšá enjétsichamo: “¡Mabo ca!” ⁴ Y inýe couaye tonjánbocna, canýe buanganá; y chë enjetsenjaquená obenana tonjanóyëngacñe jamama chë fshantsentša natjëmbana vida chaotsopochocama, entšanga chamotsenóbama; y canýe bëtš espadëja tmonjanoyé.

⁵ Chë Oveshatema chë inýe sello tonjanëtsëcá ora, sënjanuena chë inýa chë canta Ainënguentšana mëntšá enjétsichamo: “¡Mabo ca!” Sënjanontjësé y canýe ftsenga couaye sënjáninýe, y chë enjetsenjaquená canýe romanëshá enjétsëtbëna. ⁶ Y chë canta Ainëngbeñe canýe oyebuambnayana mëntšá sënjanuena: “Nýe canýe kilo trigo canýe tesca trabajuama, y unga kilo cebadá canýe tesca trabajuama; pero chë aceitiye y chë vínoyna ndoñe cattsepochóca ca.”

⁷ Chë Oveshatema chë inýe sello tonjanëtsëcá ora, chë ústonoca Ainá enjétsichamo: “¡Mabo ca!” ⁸ Sënjanontjësé y canýe shatsësiye couaye sënjáninýe; chë enjetsenjaquená Obanana ca enjanabaina, y stëtsoica bonjétsëstona canýa, Obanënga imomna luare ca uabainá; y chátbioye obenana tmonjanatšatá cántañentšana cánýentše quem luar-entše jtsepochóca, chentša entšanga jtsapochócase, entšanga tmojtsentsjanama, bëtš shëntsánëngaca, šocanëngaca y quem luarentša tšátjaye bayëngaca.

⁹ Chë inýe sello tonjanëtsëcá ora, sënjáninýe chë altarentša tajsoye chë tmojanóbanëngbe espíritënga, chë Bëngbe Bëtšabe palabra entšanga abuayinayama tmojanóbanënga. ¹⁰ Chora chënga tmonjanontšé tša uayebuáchana: “Uamaná y ntšamo tojašebuachenacá lempe amá bëngbe Nduiño, ¿ntseco quem luarentša entšangbiama cochjayana ndoñe tšabá tmonjamama, y chë bëngbioye obanayama cochjácastigaye ca?”

¹¹ Chentšana nýetscángbioye uafjantse entšayá tmonjaninýe y tmonjanéyana batšatema más chamobatmá ca, chë cachëngcá Crístbeyeca catšátanga y oservëngca, chë cachëngcá mochjanóbanënga, nýetscanga choca chamojtsemnëntscuana.

12 Y más sēnjāninýe; chē inýe sello cha tonjanētsēcá ora, jabuache fshantse tontsanangmēmāna; shinýe tontsanftséngāna, mo chē obaná tojtsemnāma juichētjuāma entšayacá, y nýets juashcona mo buiñcá enjétsinýna, 13 y estrellatémēnga celocana fshantsoye tontsantquēcjana, mo canýe higo betiye jabuache binýiaca tojtseshatíyeyna ora, chē nguēfshna higuēbēnga cuafjatquēcancá. 14 Y celoca luare tontsanenatjēmba mo canýe tsbuanácha cuafjuandmanacá, y nýetsca tjañe y bėjayoca fshantsēnga, chē ndayentše enjamnentsāna tontsanōjuaná; 15 y nýetscānga, fshantsoca reyēnga, uámanēnga, soldadēngbe amēndayēnga, bomnēnga, obenana bomnēnga, y nýetscānga chē nýets tempo nýe inýabiama oservénēnga y chē cachēngbiama trabájayēngnaca, chē cuevēshēnguiñe y bēts ndētsbēnguenache tjañe tmonsānóitana; 16 y chē tjañēngoye y chē ndētsbēngoye montsanichamo: “¡Bēngbioye šmotsētebuantsá y šmotsaitame, chē uámana puestentše tbemanabe bominýentsāna, y chē Oveshatembe uabouana castigo, cha bēngaftaca tbojetnāma, bēngbeñe ndoñe chaondētsemnāma! 17 Er chē uachuana te chabe castigo jtsebínýnāma te tojóshjāngo; y mora ¿nda nanjobenaye chē sóyeca ndoñe chamondētsepochochocama ca?” —chēnga montsanichamo.

7

Chē Bēngbe Bētsábioye oservénēnga chē uabouana castigüentšana mochántsatsebacana

1 Chca tonjanopasá chentšāna, canta angelēnga sēnjānanýe, monjétsatsāna chē quem luarentša canta opochócayenache; chēnga ndoñe quemēnjatanleséncia chē canta binýiēnga jtsebínýnāma, ndoñe chaondētsebinýiayama, ni fshantsentše, ni mar bėjayoca, ni ndocna betiyeshēnguiñe. 2 Inýe ángelnaca sēnjāninýe, shinýe bocana luaroicana enjetsabó, y chē Bēngbe Bētsá Ainabe sello enjétsiyēboye. Chē ángelna chē inýe canta angelēngbioye, ndēmuanýēngbioye obenana tmojanatsatá chē fshantsentše y mar bėjayoca lempe jt-sepochócama, chēngbioye jabuache tonjánabachembo: 3 “¡Tondaye šmatjapochóca, ni fshantsoca, ni mar bėjayoca, ni betiyeshēnguiñe, chē Bēngbe Bētsabiama oservénēngbioye chē sélloca juentsaca fchayauínýnanantscuana, ndoñe chamondētsepochochocama ca!”

4 Y sēnjanuena buétānga chē sélloca tmojánauinýnanayama: canýe patse, canta bnétsāna y canta uarānga entšānga uinýnanánēnga nýetsca Israeloquentša bēts pamíllanguentšāna.

5 Judabe pamillentsāna, bnétsāna uta uarānga uinýnanánēnga;

Rubenbe pamillentsāna, bnétsāna uta uarānga;

Gadbe pamillentsāna, bnétsāna uta uarānga;

6 Aserbe pamillentsāna, bnétsāna uta uarānga;

Neftalibe pamillentsāna, bnétsāna uta uarānga;

Manasesbe pamillentsāna, bnétsāna uta uarānga;

7 Simeonbe pamillentsāna, bnétsāna uta uarānga;

Levibe pamillentsāna, bnétsāna uta uarānga;

Isacarbe pamillentsāna, bnétsāna uta uarānga;

8 Zabulonbe pamillentsāna, bnétsāna uta uarānga;

Josebe pamillentsāna, bnétsāna uta uarānga;

y Benjaminbe pamillentsāna, bnétsāna uta uarānga entšānga.

Chē mallajta entšānga uafjantsējuangá uichētjonēnga

9 Chentšāna, sēnjanrrepará y mallajta entšānga sēnjānanýe, ndocná quentaisobenaye jacúntana, nýetsca mándayēnguentšāna, nýetsca cachca buiñe bomnēnguentšāna, nýetsca canýe entšanguentšāna, y nýetsca biyana bomnēnguentšāna; chēnga monjétsatsāna chē uámana puesto chē Oveshatembe natsanentše, uafjantsējuangá uichētjonēnga y ramēshangá monjétsētbēna. 10 Nýetscānga tša monjétsayebuache:

¡Bēnga atsebacayana endobá, Bēngbe Bētsá,

chē uámana puestentše entsetbemanábentšāna,

y chë Oveshatémbentšana ca!

¹¹ Y nÿetsca angelënga, chë uámana puesto y chë bëtsëjémënga amëndayënga y chë canta ainëngbe shëconana monjétsatsanënga, chë uámana puestentša natsanoica tmonjanoshamentšé, fshantsóntscoñe jotsejbénase, y Bëngbe Bëtsá tmonjanadorá, ¹² mentsá jayanëse:

¡Chca chaotsemna!

Bëngbe Bëtsábioye nÿets tempo y nÿetsca tescama chamotsadorana y nÿets ainánaca cha chamotsatschuaná.

Entšanga chamotsinÿanÿná cha puerte bëtsá y uamaná bétsemnama;

cha endmëna nÿets osertánana bomná, y nÿets respeto buajoná, y nÿets obenana y añemo bomná.

¡Chca chaotsemna ca! —chënga monjétsichamo.

¹³ Chentsana, canÿa chë bëtsëjemënguentsá tonjanoyebuambá y šonjantjá: “¿Ndëmuanÿënga imomna chë uafjantsëjuangá uichëtjonënga, y ndëmocana tmojabo ca?”

¹⁴ “Taita, aca chëngbiama cotátšëmbo ca” —atše sënjanjuá.

Y cha šonjaniyana: “Chënga montsemna chë jabuache ngmenënguentsana tšabá tmojábocanënga; chë Oveshatema chëngbiama tojóbana y chëngbe bacna soyëngama perdonánënga montsemna; chëngbe uichëtjonëjuangá tmojtsaboshabé y chë Oveshatembe buíñeca tmojtabofjantsé.

¹⁵ Chíyeca chënga chë Bëngbe Bëtsabe uámana puestentša natsanoica montsemna, y chábioye nÿets tempo chabe delante mondëserveda,

y chë uámana puestentše entsetbemaná,

chëngbenache jtsemnëse, chënga echántsanyëna, mo cuafjutsebotscá.

¹⁶ Ya ndoñe más shëntsana, ni uajuendayana quemochátsbomna;

shinÿama, ni yapa jënÿama ya ndoñe más quemochátssufrina;

¹⁷ er chë Oveshatema, chë uámana puestentša natsana tsëntsaca entsemná,

chëngbioye mo oveshëngcá echantsabuajënÿa,

y echanjunatse béjaye vida bomniye yóbocana luaroye,

y Bëngbe Bëtsá echanjama ya ndoñe más ngmënanana chamondëtsebomnama ca” —cha šonjanjuá.

8

Chë ústonoca sello

¹ Chë Oveshatema chë uándmanana tsbuanáchañe chë ústonoca sello tonjanëtsécá ora, celoca ndocá quentétsënëna mo tsëntsa hora nÿetsá.

² Chora sënjananÿe chë canÿsëfta angelënga, chë Bëngbe Bëtsabe delante monjétsatsanënga; chëngbioye canÿsëfta trompetëfjuangá tmonjaniyé.

³ Chentsana inÿe ángel tonjánashjango, canÿe castellano matbëtémaca incienso jajuinÿiyama, y altar natsanoica tonjantsá; chábioye bëtscá incienso tmonjanoyé chajuinÿyema chë castellano altaroaca, chë uámana tbemana natsanoica enjëtsemnoca. Chë ángel incienso tonjanjuinÿé Bëngbe Utabná jëtschuayama, cánÿiñe nÿetsca chë Bëngbe Bëtsabe entšanga tmojoyebuambá palabréngaca, cháftaca jencuéntama ora. ⁴ Y chë incienso juinÿnentša ngona, chë ángelbe cucuatšentšana Bëngbe Bëtsabe delante tonjanótsjua, cánÿiñe chë Bëngbe Bëtsabe entšanga cháftaca jencuéntama palabréngaca.

⁵ Chentsana chë ángel chë incienso jajuinÿiyama matbëtéma tonjanca, chë altarentša chebánbengaca tonjanajutjé, y quem luaroye tonjanëtsana. Chora enjëtsemna tša juesasanana, corente shauenanana, bëtscá tcuinÿënga, y quem luare tontsanangmëmana.

Chë trompetëfjuangá

6 Chora chë canÿsëfta angelënga, chë canÿsëfta trompetëfjua uabomnënga, tmonjanoprontá chëfjuangá juajatëtama.

7 Chë natsana ángel chabe trompetëfjua tonjanájatëto, y quem luaroye tmonjanëtšana bëntstá y íneshe, cánÿiñe buiñeca. Ungañentsana cánÿentse quem luarentse tontsanjuinÿe, úngañentsana cánÿentse betiyeshënguiñe y nÿetsca nguëfshna shacuanënguíñnaca.

8 Chë inÿe ángel chabe trompetëfjua tonjanájatëto, y chora chë mar béjayoye tmonjanëtšana canÿe soye mo canÿe bëts tjañe tojtsangbototjuancá, y chë mar béjayiñe úngañentsana cánÿentse buiñe tontsanóbema. 9 Chë mar béjayiñe vida imobomnëngbeñe úngañentsana cánÿentse tontsanopochocá, y chë barquënguentsnaca úngañentsana cánÿentse.

10 Chentsana chë inÿe ángel chabe trompetëfjua tonjanájatëto, y canÿe bëts estrella, mo canÿe uajuinÿanëshacá enjétsangbototjuana, celocana tonjanótsatse chë úngañentsana cánÿentse béjayënguiñe, y béjaye óbocanenache. 11 Chë estrella enjanabaina Untjana ca; y chë úngañentsana cánÿentse buyeshënguiñe untjiye tontsanóbema, y chë untja búyeshe causa ba entsanga tmonjanóbana.

12 Chë inÿe ángel chabe trompetëfjua tonjanájatëto, y chora tontsanóndbema chë úngañentsana cánÿentse shinÿiñe, y chë úngañentsana cánÿentse juashconiñe y chë estrellënguíñnaca. Chca, nÿetsca chentsa úngañentsana cánÿentse ibetiñe tonjanoquedá, y chë causa ndoñe quemëntétsebinÿnaye posufta horëntscuana, bnëtë canta hora y ibeta canta hora.

13 Chentsana, sënjanrrepará y sënjanuena canÿe águila, tsbanánoca celoca enjet-songüefjná, jajuache mëntsá enjétsichamo: “¡Tsa lastema, tsa lastema, tsa lastema quem luarentsa entsangbiama, chë inÿe trompetëfjuangá chë inÿe unga angelënga chamojuájatëto ora ca!”

9

1 Chentsana chë inÿe ángel chabe trompetëfjua tonjanájatëto, y sënjáninÿe canÿe ángel quem luaroye jastjanguana y enjétsinÿna mo canÿe estrella celocana quem luaroye cuaftsotsatsancá; y moye tonjánashjango ora, tmonjanoyé chë uabouana tboça atëfjñentša llavëfja. 2 Chë uabouana tboça atëfjñentse tonjánatëfjo, y chentsana becé ngona tonjanótsjua, mo bëts hornentsa ngoncá; y chë uabouana tboye atëfjñentse ngona causa shinÿe tontsanibétata y nÿets celoca ena ngona enjétsemma. 3 Chë ngonentsana ba tsátjaye chapulinga tmonjánbocana, y nÿets quem fshantsëjana tmonjanáshana; y chëngbioye obenana tmonjanatšatá, chánaca jándbemama, mo chë juetjuama alacranëngbe obenancá. 4 Chëngbioye tmonjanamëndá tondaye ntjándbemana chë shacuanënguiñe, ni ndocna nguëfshna matënguiñe, ni ndocna betiyeshiñe; nÿe chë juentsaca chë Bëngbe Bëtsabe sëlloca nduinÿnanana entsangna aíñe. 5 Pero ndoñe chematanalesenciá entsángbioye jobáyana, ndayá nÿe jamama chënga shachna shinÿëntscuana tsetšanana chamotsebomnama; y chë chënga monjánama chamotsebomnama tsetšanana enjamna mo canÿe alacranbe uetjoniñcá.

6 Chca tempo chaojtsemna ora, entsanga mochántseguaye ntšamo jtsóbanama, chë tsetšanënga jauántama ndoñe quemochátobena causa, pero ndoñe quemochátinÿena ntšamo jamëse jtsóbanama; y masque tsa mochántseboše jóbanama, chora chëngaftaca ndoñe chca queochatopása, mo jóbanama ndoñe tmontsobencá.

7 Chë tsátjaye chapulinga monjétsinÿna mo couayëngcá prontánënga jama entsángaftaca jétsjama; chëngbe bestšašiñe monjanábomna mo castellano coronëshangacá, y chëngbe jubíá enjamna mo entsabe jubiácá. 8 Stjënashë monjánbomna mo shembásabe stjënashacá, y chëngbe juatsašënga mo leonbe juatsašëngcá. 9 Chëngbe cuerpënga jenëuyanama cochaca

monjánbomna morocho soyënga, mo hierro soyëngcá, y chëngbe juatëngmiashangá tmojtsabonjná ora, chë shauenanana bëtscá enjamna, mo ba cochëshangá couayënga cuaftsasjojnacá, chë inyëngaftaca jéntsama tmojëftsátjajo ora tojtseshauenancá. ¹⁰ Chënga monjanábomna mo alacranbe uascuatšëjuacá, ba uetotjéffjagaca, y chë uascuatšëjuaca obenana monjánbomna shachna shinjëntscuana entšanga mal chamotsepasama. ¹¹ Chë tsátjaye chapulinga canye amëndayá monjánbomna, chë uabouana tboca mándaye ángel; hebreo biyaña cha uabainá Abadón ca y grieguiña Apolión o pochocayá ca.

¹² Chë natsana pochócyana ya tocjochnëgo, pero más chcoye cabá inye uta soye más pochócyana cachcá echántsemna.

¹³ Chentšana chë inye ángel chabe trompetéffjua tonjanájatëto, y canye oyebuambnayanana sënjanuena, chë Bëngbe Bëtsabe delante enjëtsemna castellano altarentša juatsboica lado sibienache obocanentšana enjëtsohocana. ¹⁴ Y chë oyebuambnayanana, chë trompetéffjua tonjanájatëto y enjëtsetbëna ángelbioye tbonjanianana: “Chë canta angelënga chë Eufrates bëtš fshájaye tsachoca utsbuanënga mëjafjoná ca.” ¹⁵ Y chë canta angelënga tmonjanëjafjoná; y nya chë ora, chë te, chë shinye y chë uatama chëngbioye tmojanaprontá, chë quem luarentša entšángbeñe úngañentšana cányentšënga jtsëbáyama. ¹⁶ Atše sënjanuena buétanga imojamna chë angelëngaftaca tmojána soldadënga, couayënguiñe: uta patse millonënga ca.

¹⁷ Mëntšá sënjananye mo otjenayoquécá chë couayënga y chë chëngbeñe enjaquenënga: Chë enjaquenënga monjánbomna morocho soyënga cochaca, jenëuyanama, y chë soye buanganana enjáninyna, mo iñcá, y fchendana mo chë uámana ndëtšbé jacintcá y tsësiyana inynana mo azufrcá; y chë couayënga monjánbomna mo leonbe bestšašcá, y chëngbe uayoicana enjëtsohocana iñe, ngona y azufrana. ¹⁸ Y chë úngañentšana cányentše entšanga tmonjanóbana quem unga uabouana pochócyaye soyëngaca, chë couayëngbe uayoicana enjëtsohocanana: iñe, ngona y azufrana. ¹⁹ Er chëngbe obenana entšanga japochócama monjánbomna uayáshañe y uascuatšëjuañe; er chëngbe uascuatšëju enjuamna mo mëtscuayëngcá, bestšašëngaca, y chëjuanga causa entšanga mal montsanpásaye.

²⁰ Pero chë inye entšanga, chë uabouana pochócyaye soyëngaca ndoñe tmonjanopochocanga, juabna ndoñe chematantrocá, y ndoñe chematanajbaná amana chë bacna soyënga ntšamo monjanamcá; ndoñe chematanajbaná adórayana chë bacna bayëjënga, ni chë mo diosënga cuaftsemncá jtsejuabnayëse imojánadorana castellano soyënga, midio soyënga, bronce soyënga, ndëtšbé y niñëbé soyënga; y chca soyënga ndoñe quemënjatobena ni jinýama, ni jouenama, ni jtsanama. ²¹ Juabna ndoñe chematantrocá y ndoñe chematanajbaná entšanga obanayana, encjuanayana, bacna soyënga boyabása o shembásaftaca jtsamëse oyenana, ni atbëbanana.

10

Chë ángel base uándmanana tsbuanáchaca

¹ Chentšana sënjaninye inye ángel, puerte obenana bomná; celocana enjëtstajuana, y chabe shëconana canye jantšetëshe enjëtsemna; chabe bestšaše tatsëtsacá canye tsëfcuácuatjo. Chabe jubiá shinycá enjëtsebuashinýinýana, y chabe shecuatšënga mo úcuatjona niñëbenga cuaftsoiñcá. ² Chabe cucuatšinë enjëtsetbëna canye base uándmanana y utëffjna tsbuanácha. Chabe catšbioica shecuátšëca chë mar béjayoca tonjantsá, y chë uañicuayóicatšëcna, quem fshantsentše. ³ Y jabuache tonjanoyó, mo canye león cuaftseyocá; y tonjanoyó ora, canyëfta juesasanentša jabuache shauenanana sënjanuena. ⁴ Chë canyëfta juesasana chca tmonjanoyebuambá ora, atše sënjanoprontá ntšamo chënga tmonjanayancá juabemama; pero canye oyebuambnayanana celocana sënjanuena, mëntšá šonjëtšatsaye: “Nye aca cochtsójuabñañe ntšamo chë canyëfta juesasana tmonjayancá, ndocnábioye catjauyana, y chë soye ndoñe catjuábema ca.”

⁵ Chora chë ángel, chë mar béjayoca y quem fshantsentse atsaná sënjaninýá, chabe catšbioica cucuatše celoye tonjanatsbaná, ⁶ y tonjanjurá Bëngbe Bëtsabiama, chë nyets tempo y nyetsca tescama oyenabiama, chë celoca, quem luare, chë mar béjaye, y lempe chë luarënguifne yobinýncá tojanmabiama. Tonjánayana: “Ya ndoñe más quemochatobatma; mora Bëngbe Bëtsá echanjama ntšamo tojašebuachenacá, ⁷ er chë tempo chaojóshjango, chë ústonoye ángel chabe trompetéjua juajatëtama chaojontsé ora, chora ya echanjochñëngo ntšamo Bëngbe Bëtsá jamama yojuabnacá; chë soye nyetsca entšángbioye cha ndoñe chenatinýanyé, ntšamo tempo cha chabe oservénëngbioye, chë chabe juabna oyebuambnayëngbioye tojanabuayenacá ca” —cha tonjánayana.

⁸ Chë atše sënjanuena oyebuambnayana celocana enjétsobocanana, cachiñe šonjanatsëtsá y šonjaniyana: “Motsa y mauaca chë mar béjayoca y quem luarentše ángel entsemnabe catšbioica cucuatšifne base uándmanana y utëfjna tsbuanácha ca.”

⁹ As atše chë ángelbioye sënjána; chë base uándmanana tsbuanácha chašuíyema sënjaniyana, y cha šonjanjuá: “Quemëcha, motsásañe. Acbe uayoye uamesquénëcha mo tjouangbe meloycá echántsamna, pero acbe uafsbioyna puerte uauntjécha echantsábema ca.”

¹⁰ As chë base uándmanana tsbuanácha chë ángelbe cucuatšentsana sënjanaca, y sentsanásañe; y atšbe uayoye meloycá enjétsamna, pero sënjanabmuaná y atšbe uafsbioyna puerte uauntjécha tontsanábema. ¹¹ Chora šmonjaniyana: “Aca cmontsemna cachiñe jtëtabuayenana, ntšamo Bëngbe Bëtsá tojayancá chë ntšamo yochjopásama, ba canýe luarentša entšángaftaca, ba mándayëngbentša entšángaftaca, ba biyana bomna entšanguentsëngaftaca y quem luarentša reyëngaftaca ca.”

11

Chë útata Bëngbe Bëtsabe juabna oyebuambnayata

¹ Chentšana canýe medídaye niñëfja šmonjanoyé, mo jatšëmbonëfjá, y šmonjaniyana: “Motsa y Bëngbe Bëtsabe bëts yebna y chentša altar cochjamedída, y cochjácuntaye bueta entšanga chentše Bëngbe Bëtsábioye imojtsadorana. ² Pero chë Bëngbe Bëtsabe yebnentše más shjoica luarna cachcá cochjonýaye, ndoñe catjamedída, er chiñe chë ndoñe judiëngbiama endmëna; y chënga, chë uámana ca uabaina bëts pueblama, canta bnëtsana y uta shinýëntscuana soyënga mochántsama chiñe jtsepochócama, mo cuaftsebotajnaycá. ³ Pero atše, útata atšbiama tatšëmbuata y oyebuambnayata chanjichamuá atšbe cuenta entšángbioye jábuayenama, canýe uaranga y uta patse y chñënguana bnëtsana tentscuana. Chatna uajojësha entšayangá uichëtjonata bochántsemna, chca, ngmena bomnama jinýanyiyama ca” —chata tbonjánayana.

⁴ Quem útata atšbiama tatšëmbuata y oyebuambnayata bontsinýinýena chë uta olivos betíyeca y chë uta candelerešeca, ntšamo Bëngbe Bëtsá, chë quem luarentše mandayabe delante endmëncá. ⁵ Nderado nda tojtseboše chatbiama bacna soye jamama, ndoñe quentatobenaye ntšámnaca jáborlana, er uayoicana íñeshe nanjóbcna y chë uayayëngbioye nantsapochócaye; nderado nda tojábosena chatbiama bacna soye jamama, cachcá cha buántsemna jóbanama. ⁶ Chë útata obenana bondbomna celoca jtsachtama, ndoñe chaonduaftema, entšángbioye Bëngbe Bëtsabiama chabojsabuayinýa tese; obenana béjayënga buifne jtsebiama, y jamama quem luarentše chaotsóndbemama, nyetscna pochócaye soyëngaca, bueta sóynaca ntšamo chata tbojtsebošcá.

⁷ Pero ntšamo Bëngbe Bëtsabiama ibotatšëmbcá entšángbioye jábuayenama chata chabo japochocá ora, chë uabouana bayá, chë corente bëts tboicana chaojabocná, chátbioye echántsatsjaye, echantsayëñjaná y echantsëbaye. ⁸ Y chatbe óbana cuerpo, chë corente bëts pueblentša tsáshenañe echanjoquéda, chë chatbe Utabná tmojanrucificá luarentše, y chë bëts pueblo inýetsá juabáyamna nántsemna mo chë Sodoma y Egiptó luaroycá. Chentše endmëna mo chë bëts pueblënga Sodoma y Egiptcá, er chentše

chë entsanga yapa bacna soyënga jtsamana. ⁹ Y unga y tsëntsa tentscuana, chë obanatbe cuerpo mochantsonyaye, nyetsca canye luarentsa entsanga, nyetsca cachca buiñe bomna entsanga, ba biyana bomna entsanguentsana y ba mándayëngbentsa entsanga; ndoñe quenátslesenciana chata jutabuantsama. ¹⁰ Chata bochjóbanama, quem luarentse oyenënga mochanjóyejuaye; tsa oyejuayënga mochántsemnama, ndayánaca mochanjénatsëtaye, er ntšamo chë Bëngbe Bëtsabe juabna oyebuambnayata tbojanayancá, tojanma quem luarentse oyenënga puerte chamosufrima.

¹¹ Pero chë unga y tsëntsa te tonjanochnëngo ora, Bëngbe Bëtsá tonjanma chë obanata chábuatayenama; chentšana tbontantsata, y chë monjétsantješnënga tsa uatjana tonjanëbuache. ¹² Chora canye jabuache oyebuambnayana tbonjanuena, celocana mëntšá enjétsëtsësnaye: “Moye mašënguata ca.” Y chatna canye jantšetëshiñe tbonjántsjua, y chatbe uayayënga chca monjétsonyaye. ¹³ Cachora quem fshantse jabuache tontsanangmémana, y chë bëts pueblentse bnëtsanentsana cányentse tontsanáshajaye, y canyësëfta uaranga entsanga tmonjanóbana. Chë ainënga tmonjanoquedanga, tsa auatjanánënga, chë celoca Bëngbe Bëtsábioye montsanadorana.

¹⁴ ¡Chë inye uabouana soye quem luare japochócama, mora tocjochnëngo, pero betscó chë ústonoye uabouana pochócaye soye echanjóshjango!

Chë ústonoye ángelbe trompetëfjua

¹⁵ Chë ústonoye ángel chabe trompetëfjua tonjanájatëto ora, celoca tsa monjétsayebuache, mëntšá monjétsichamo:

Ora tocjobuache, Bëngbe Utabná y chabe Uámana Uabuayaná Jesucristbe amëndayana quem luarentse chaotsemnama,

y chë amëndayana echántsemna nyets tempo y nyetsca tescama ca.

¹⁶ Y chë uta bnëtsana y canta bëtsëjëmënga amëndayënga, chë chëngbe uámana puestiñe Bëngbe Bëtsabe delante monjétsetbiamanënga, tmonjanoshamentšé, fshantsóntscoñe jotsejbénase, y Bëngbe Bëtsá tmonjanadorá, ¹⁷ mëntšá jayanëse:

Bëngbe Utabná, Bëngbe Bëtsá nyets obenana bomná, aca chë mora cha condmëná y chë tempo cha conjamná cbontsatschuaná, er nya mora acbe bëts obenánaca soyënga cochjama, acbe amëndayana jóntšama.

¹⁸ Ba luarentsa entsanga ácaftaca tmonjanotšatjayená;

pero chëngaftaca cmojetnama chë uabouana castigo jtsebínynama te tocjóshjango, chë tempo tmojanóbanëngbiama jayanama tšabá o ndoñe tšabá tmonjéftsemama.

Tonjóshjango chë hora, uacanámana jtatšatayama chë acbiama oservénëngbioye,

chë acbe juabna oyebuambnayëngbioye, chë acbe entsángbioye,

y chë acbe uabaina nyetscangbiama más bëts uabainana yomnama juabnayëngbioye, uámanënga y nduámanënga;

y chë tempo tonjóshjango, quem luare pochocayënga jtsapochócayama ca —chënga tmonjánayana.

¹⁹ Chora, Bëngbe Bëtsabe bëts yebna celoca tonjantëfjo, y choye enjëtsebinyna chë cajontema, ndayëtema yojaninýanyná ntšamo Bëngbe Bëtsá chabe entsángbioye tojanašebuachenacá; y chora enjëtsemna tcuinýënga, tsa shauenanana, juesasanana, quem fshantse tontsanangmémana y bëts cá bëntstá tonjantquécjana.

12

Chë shembása y chë uabouana bayá

¹ Chentšana, canye bëts soye celoca tonjanonyná entsanga canye soye jinýanýiyama: canye shembása, shinye mo chabe uichëtjoniaca, juashcona chabe shecuatšentša tajsoye, y chabe bestšašhiñe canye coronësha bnëtsana uta estrellëngaca. ² Chë shembása ngomaná enjëtsemna, y chë šešona jónynama yojétsobecuama jabuache enjëtseyoye, chë šešona

jónyname cha puerte jasúfriama ibojamna causa. ³ Y chora inye bêts soye celoca tonjanonýná, entsanga inye soye jinýanyiyama: canye uabouana dragón buanganá, canýsëfta bestsaşéngaca y bnétsana tsétjonéşéngaca y chë bestsaşénguiñe enjanábomna canýsëfta coronëshangá. ⁴ Chabe uascuatséjuaca úngañentsana cánýentse chë estrellatémenga celocana tontsansjojó, y quem fshantsoye chëtémenga tontsanétsana. Y chë dragón chë šeşona jtsebomnama shembásabe delante tonjantsá, chë šeşonatémbioye jtsósañama, cha tojonýná ora. ⁵ Chora chë shembása canye šeşona boyabásetema bontsanbomna, nda nyets luarenache entsángbioye yochtsaméndaye mo canye hierro varëfjaquécá. Pero chë šeşona chábensana tmontsanjuaná y Bëngbe Bëtsábioye, chabe uámana puestoye tmontsanámbañe. ⁶ Chë shembásana entsanga ndoyena luaroye tontsanachá, Bëngbe Bëtsá canye luare ibojaboprónta choye, chentse saná chamocaredadoma, canye uaranga y uta patse y chñnguana bnétsana tentscuana.

⁷ Chentsana celoca canye entsjanayana enjésemna: Miguel, chë angelëngbe amëndayá, y chabe angelënga chë dragónaftaca monjétsentsjanaye. Chë dragón y chabe angelënga monjétsatsjanaye, ⁸ pero ndoñe chematanobená jáyëñjanama, y chëngbiama ya ndoñe más luare celoca quentésemna. ⁹ Chcase, chë uabouana dragón chocana tmontanábocna, chë tempsca mëtscuaye, chë Diablo y Satanás ca uabainá, y chë bëtscá entsángbioye aingñayá; quem fshantsoye cha tmontsantsatse, y chë cha yojanaménda angelëngnaca.

¹⁰ Chora canye jabuache oyebuambnayana celoca sënjanuena, mëntsá enjétsichamo:

Chë Bëngbe Bëtsá entsanga játsebacama tempo ya tonjóshjango.
Mora Bëngbe Bëtsá echanjínýanyiyeye chabe obenana y mándayana,
y chabe Uámana Uabuayaná Jesucristbe obenana jtsemándayama;
er chë Cristbe delante bëngbe catşátanga mal aquedayá ya tmontábocna,
nda nyets tempo Bëngbe Bëtsabe delante mal enjanaquedayá.

¹¹ Bëngbe catşátanga cha tmonjayëñjaná,
er Cristo, chë mo tmojóba Oveshatemcá, Bëngbe Bëtsá bacna soyëngama entsanga
cháuaperdonama,
tonjanóbana, chabe buiñe juabuáshanëse,
y chë ndegombre soyëngama chënga monjanóyebuambnáyeca;
er chëngbe vida chëngbiama ndoñe quenjatámana;
Jesucristo jasérviamá jóbana chënga monjanprontana.

¹² ¡Chcasna, celoca corente oyejuayana chaotsemna,
y tsëngaftanga chë choca oyenëngbeñnaca!
¡Pero tša lastema chë fshantsoca y mar béjayoca oyenëngbiama,
er chë diablo tsëngaftangbioye tonjástjango, corente tşatjayá,
er cha entsetátşëmbo ya nye batşá yojtsábojamna chë chábioye mochjacistígama ca! —
enjétsichamo.

¹³ Chë dragón quem fshantsoye tmojtsantsatsama tonjáninýe ora, chë šeşona boyabásetema tbonjanëshjango shembásabioye tbontsanacmé. ¹⁴ Pero uta juatëngmiáša, chë bêts aguilbeshá, chë shembásabioye tmonjaniyé, chabiamá tmojanprontá luaroye chaongüëfjoma, entsanga ndoyena luaroca, chë dragónbentsana bënoca; y chentse enjamna chë shembásabioye saná chamuájuatşema, unga y tsëntsa uatëntscuana. ¹⁵ Chora chë dragón, chabe uayoicana bêts béjaye tonjanbuashëtjo chë shembásabe stëtsoica, chaobuama y chabotsambama; ¹⁶ pero quem fshantse chë shembásabioye tbonjanájabuache, er chë fshantse mo uayaşacá tonjantëfjo, y chë dragonbe uayoicana béjaye obocniye tontsanobmuánañe. ¹⁷ Y chë dragón chë shembásabioye tondaye jamana chenatanobená causa, corente cacháftaca tbonjánetna, y tonjána chë inýenga, chë shembásabe basengcá mondmënënga játsjayama, ntşamo Bëngbe Bëtsá yomandacá imobedecënënga, y ntşamo Jesucristo tonjanabuayená ndegombre soyëngaca sempre imoyenënga. ¹⁸ Y chë dragón chë mar béjaye tsachañe tonjantsá.

13

Chë dragón tonjanma, chë mar béjayoca uabouana bayá chabe obenana chaotsebomnama

¹ Chentsana atše sënjaninýe, canýe uabouana bayá chë mar bejayoicana tonjánbocna; enjánbomna canýsëfta bestšašënga y bnëtsana tsëtjonëšënga, y chëšënguiñe bnëtsana coronëshangá, y chë bestšašënguiñe bañe enjëtšabemana Bëngbe Bëtsabiama contra oye-buambnaye uabaina. ² Chë uabouana bayá sënjaninýá enjamna mo canýe leopardcá, mo osbe shecuášangaca, y chë uayáshana mo leonbeshacá. Chora chë dragón tonjanma chë uabouana bayá chaotsebomnama chabe obenana, y chabe uámana puesto jtsemándayama, y chabe bëts mando. ³ Canýe chabe bestšašënguentše enjëtšinýna mo jóbanama tëtšeniñcá; pero chentše tbontanóbema; y chora quem luarentša nýetsca entšanga ojanánënga monjëtsemna, y chë uabouana bayábioye montsanëyeunana. ⁴ Y chë dragón montsanadorana, chë uabouana bayábioye obenana tbojánatšetama; y chë uabouana bayábioynaca montsanadorana, mëntšá jayanëse: “Ndocná obenana quenátšbomna quem uabouana bayacá, y ndocná quenátobena chábioye jayënjanama ca.”

⁵ Chë uabouana bayábioye tbonjanlesenciá corente podesca Bëngbe Bëtsabiama chaotsóyebuambnama, y obenana tbonjanatšetá, canta bnëtsana y uta shinýëntscuana chaotsemándama. ⁶ Y podesca Bëngbe Bëtsabiama tonjánayana, soyënga chabe contra, chabe bëts yebnama y chë celoca oyenëngbe contra. ⁷ Chábioynaca tbonjanlesenciá chë Bëngbe Bëtsábenga imomnënga játsjayama, jáyënjanantscuana; y obenana tbonjanatšetá chaotsemándama nýetsca cachca buiñe bomna entšangbeñe, nýetsca canýe entšangbeñe, nýetsca biyañe bomnëngbeñe, y nýetsca mándayëngbentša entšangbeñe. ⁸ Chë uabouana bayá nýetsca quem luarentša entšanga mochántšadorana. Chë entšanga mondmëna ndëmuanýengbe uabaina ndoñe yontsábemana, chë Bëngbe Bëtsábioye jëtšchuayama mo canýe oveshatemcá, tojanóbanabe librëšañe. Bëngbe Bëtsá quem luare cabá ndëma ora, quem librëšañe tojanábema nýetscanga chë tšabe vida mochjónyëngbe uabaina.

⁹ Chë jouenama obenënga, chamouena.

¹⁰ Chë cárceloye jama ibomná, cárceloye bochanjotóca jama;

chë espadējaca jobanamá, espadējaca echanjóbana.

Chíyeca quem luarentše entseyta, chë Bëngbe Bëtsábenga imomnënga padecena soyënguiñe tmojtsemna ora, puerte uantadënga jtsemnana y Bëngbe Bëtsábeñe jtsošbuáchiyana, mo chë Bëngbe Bëtsabe entšangcá.

¹¹ Chentsana inýe uabouana bayá sënjaninýe, quem fshantsentšana enjëtsebocana; uta tsëtjonëse mo oveshabešcá enjánbomna, pero mo canýe dragoncá, mo canýa Satanásbeyeca mandanacá enjëtsoyebuambnaye. ¹² Y enjánama soyënga chë natsana uabouana bayabe nýets obenánaca, chabe delante. Chë fshantsentša bayá tonjanma nýetsca luarentše oyenënga chamotsadoránama chë natsana uabouana bayábioye, chë jóbanama tëtšeniñe tbontanobemá. ¹³ Cha ba bëts soyëngnaca enjánama chabe obenana entšanga jinýanýiyama, entšangbe delante jamana iñe celocana fshantsoye chaótsatšamnaca. ¹⁴ Y cha tbonjanlesenciá chaoma chabe obenana jinýanýiyama chë natsana uabouana bayabe delante. Chë soyëngaca entšanga tonjanaíngñe, y quem luarentša entšanga tonjanëyana canýe soye chamopormá, y chë soye cháotsinýna mo chë natsana uabouana bayacá, chë espadējaca tëtšená enjamná, y chora tšabá enjet-satšmëná. ¹⁵ Y chë inýe uabouana bayábioye tmonjanlesenciá obenana chaotsebomnama jamama, chë natsana uabouana bayábioye jadórama entšanga tmonjanma soye vida chaotsebomnama, y chë soye jóyebuambayama chaotsobenámnaca, y jamama chë chábioye ndoñe tmonsadoránënga chamóbanama. ¹⁶ Y tonjanma, nýetscángbioye, básenga y bëtsëtšanga, bomnënga y ndbomnënga, cachëngbiama trabájayënga y nýe ínýabiama nýets tempo oservëngga, catšbioica cucuatšñe o juentsaca chamuínýnanama. ¹⁷ Y ndocná

quenjátanobena ni jiyama, ni jobuámiñama, chë uinýnanánana ndoñe tontsebomnëse; chë uabouana bayabe uabaina o chë chabe uabainama yomna número.

¹⁸ Chë número jinýenamna bëtscá osertánana jtseytana. Chë becá osertánana bomná cháuinýena ntšamo chë uabouana bayabe número iuayancá, er canýe entšabe número endmëna. Chë número endmëna chë chnënguana patse y chnënguana bnëtsana y chnënguana.

14

Chë canýe patse y canta bnëtsana y canta uaranga entsangbe canto

¹ Y más sentsanonýá. Sënjáninýe, chë Oveshatema, enjétsatsjabna Sión ca uabaina tjoca, y cháftaca monjésemna canýe patse y canta bnëtsana y canta uaranga entsanga, y chëngbe juentsaca enjétsabemana chë Oveshatembe y chabe Taitabe uabaina. ² Chora sënjanuena celocana canýe shauenanana, mo bëtscá bėjayënga y bëts juesasana shauenanancá; y chë shauenanana enjamna mo chë arpësha uenanayënga chëngbe arpëshangá tmojtsabuastocá. ³ Chënga canýe tsëm canto montsancánta Bëngbe Bëtsabe delante, chë chabe uámana puesto y chë cháftaca canta Ainënga y chë bëtsejémënga amëndayëngbe natsanentše. Y ndocná quenjátanobena chë canto juatsjínýana, nýe chë canýe patse y canta bnëtsana y canta uaranga quem luarentšëngbentšana atsebácanëngna aíñe. ⁴ Chënga monjanmëna chë shembásoftaca ndocna bacna soye tmonjanmënga, er chënga imojanenománda chca bacna soyënga ndoñe ntsamama; chë Oveshatema ndëmoye tojtsá y chëngnaca choye jtséstonana. Chënga imojamna chë natsanënga chë quem luarentša entsanguentše atsebácanënga jtsemnama, y chënga atsebácanënga imojtsemna Bëngbe Bëtsá y chë Oveshatema jtsaservénama. ⁵ Chënga ndocna te tmonjanobosteró; ndocná quenátobena jayanama chënga bacna soye tmojanma ca.

Ntsamo chë unga angelënga tmojánayana

⁶ Chentšana inýe ángel sënjáninýe, tsbanánoca celëjana enjétsongüefjnaye. Cha enjánbomna canýe nýets tempscama oservena buayenana soye, entsángbioye jáuyanama, nýets quem luarentše oyenënga, nýetsca mándayëngbentša entsanga, nýetsca cachca buiñe bomna entsanga, nýetsca biyañe bomnëngbeñe y nýetsca canýe entsangbiamama. ⁷ Y jabuache mëntšá enjétsichamo: “¡Bëngbe Bëtsabiamama šmochjájua boye cha nýetscangbiamama chë más uamaná endmënama, y cha šmochtsatschuanaye, er ya tonjóshjango chë tempo ntšamo entsanga tmojamama tšabá o ndoñe tšabá bëtsemnama cha cháuyanama! ¡Chë celoca y quem luare, chë mar bėjaye y nýetsca chë fshantsentšana óbocana bėjayënga tojamá šmochtsadorana ca!”

⁸ Chábentšana inýe ángel mëntšá enjétsichamo: “¡Ya bëts castigo, ya bëts castigo chë Babilonia bëts puebloca entsángbeñe echántsemna!, ndëmuanýënga tmojinýanyé ntšamo puerte bacna soyënga shembása o boyabásoftaca jtsamama y inýe corente bacna soyëngnaca, y chentšana nýets quem luarentša entsanga mo cach Babilonioquëngcá tmojama. Chë causa, Bëngbe Bëtsá echanjama chëngbiámnaca chabe uabouana castigo chaotsemnama ca.”

⁹ Chë útatbentšana inýe ángel jabuache mëntšá enjétsichamo: “Nderado nda chë uabouana bayábioye y chë chábioye jadórana pormana soye tojtsadorana, y tojalesenciá chabe uinýnanana soye juentsaca o cucuatšíñe chamojajoma, ¹⁰ chánaca bontsemna, chë Bëngbe Bëtsabe uabouana castigo jasúfriana. Entšanga puerte bacna soye tmojamama, Bëngbe Bëtsá puerte tbojetna, y chë causa echanjama chë castigo chëngbeñe chaotsemnama. Y chë uámana angelënga y chë Oveshatembe delante, chë bayá adorarayábioye puerte mochanjatsetšená, iñeshe y azúfrecá. ¹¹ Chca chamojtsesufrina ora, becá ngona echantsóbocana, y chë ngona nýets tempo chca echantsótsjuaye; y chënga, chë

uabouana bayá y chábioye jadórana pormana soye adórayënga, y chabe uinýnanana soye bomnëngbiana, ndocna te chë tsetšanana queochatëjbana ca” —cha enjétsichamo.

¹² Chíyeca quem luarentse entseyta, chë Bëngbe Bëtsabe mandënga obedecënga y Jesúsbeñe puerte ošbuáchiyana bomnënga, chë Bëngbe Bëtsabe entšanga, padecena soyënguiñe tmojtsemna ora, puerte uantana jtsemnana.

¹³ Chentsana canye oyebuambnayana celocana sënjanuena, mëntšá šonjétsatsaye: “Mëntšá mábema: ‘Tša oyejuayënga mochántsemna chë mëntescana mochjóbanënga, Bëngbe Utabnáftaca cánýiñe mo canýacá jtsomñëse ca.’ ”

“Aíñe ca” —chë Uamana Espíritu tonjayana—, “chënga ya ndoñe más queochátamna jatrabájana, ni jasúfriana, er chënga tmojama tšabe soyënga Jesús jasérviana, y chë soyëngama chënga tšabe bendicionënga mo uacanancá celoca mochanjóyëngacñe ca.”

Ndayá chë angelënga quem luarentse tmojanatbaná

¹⁴ Chora más sënjáninýe; sënjáninýe canye fjantse jantsetëshe, y chëshiñe canya enjétssetbemana. Cha enjamna mo canye entšacá; chabe bestšašñe enjanábomna canye castellano coronësha, y cucuatšñe canye puerte efšana mëtštá enjétsatbëna.

¹⁵ Chentsana, chë celoca Bëngbe Bëtsabe bëts yebnentsana inye ángel tonjánbocna, y jabuache bonjétsatsaye chë jantsetëshiñe tbemanábioye: “¡Acbe mëtštaca machbonja y shajuanënga matbaná, er chë játbanama tempo ya tonjóshjango; chë quem luarentša shajuana ya tonjaboche ca!” ¹⁶ Y chë jantsetëshiñe enjantbemaná chabe mëtštaca quem luariñe tonjánachbonja, y nyets quem luarentse atbanániñe tonjanoquedá.

¹⁷ Chentsana inye ángel chë celoca Bëngbe Bëtsabe bëts yebnentsana tonjánbocna; chánaca canye puerte efšana mëtštaca. ¹⁸ Y chë altarentšana inye ángel tonjánbocna, chë mando bomná íñesheca castigo entšangbiana jamama; y chë puerte efšana mëtštá bomna ángelbioye jabuache tbonjaniyana: “¡Acbe mëtštaca machbonja y chë fshantsoca nyetsca uvas betiyeshënguentsa uvasëšangá mátabe, er ya uabochenëšangá entsamna ca!” ¹⁹ Y chë ángelna chabe mëtštaca quem luariñe tonjánachbonja, y nyetsca quem luarentša uvasëšangá tonjanátabe, y lempe chë juantsëtetjiana luaroye tonjanëšana. Chë soye entsinýinýná ntšamo yochtsemnana Bëngbe Bëtsabe uabouana castigo. ²⁰ Chë uvasëšangana, chë bëts pueblentsana chaboye tmonjanantsëtetje, y chë luarentšana tša buiñe tonjanóbocna; tonjanojutjé couayëngbe uayashbenëshantscoñe y mo unga patse kilómetrënga tonjanábuashana.

15

Chë angelënga chë canýsëfta pochócaye soyëngaca

¹ Chentsana, inye bëts soye entšanga inye soyama jinýanýiyama, celoca sënjáninýe, canye puerte bëts soye: canýsëfta angelënga canýsëfta pochócaye soyëngaca, chë ústonoye pochócaye soyënga. Chë soyënga chaojtsemnentsana ya ndoñe inye pochócaye soye yochántsemna, er chëntscoñe Bëngbe Bëtsá yochjacastíga, lempe ntšamo cha jamama tojanjuabocá.

² Canye mar béjaynaca sënjáninýe, mo cristalcá enjétsinýna íñeca enájuañe; y chë béjaye juachaca monjétsatsana chë tšabá tmojanbocnënga, y ni chë uabouana bayá, ni chë chábioye jadórana pormana soye ndoñe tmonjánadoranga, y chë uabouana bayabe uabainama yomna número chëngbeñe chaotsemnana ndoñe tmonjanlesencianga. Nyetscanga chënga monjétsabomna Bëngbe Bëtsá tojanëšatá arpangá. ³ Chënga, canye canto monjétsacantaye ntšamo Moisés, chë Bëngbe Bëtsabe oserverná tojancantacá, y ntšamo chë Oveshatema tojancantacá. Mëntšá monjétsacantaye:

Puerte bëts soyënga y tšabe soyënga entsemna lempe ntšamo aca tcojanmcá,
Bëngbe Utabná Bëngbe Bëtsá nyets obenana bomná;

lempe ntšamo jtsamëse aca icoyena, acbe bominyiñe puerte tšabe y ndegombre soyënga yomna,

nÿets luarënguenache entsangbe Rey.

⁴ Bëngbe Utabná, ¿nda nanjájuaboye aca nÿetscangbiana ndoñe más bëtsá condmëna ca, o ndoñe cmantsatschuanaye?

Nÿe aca uamaná condmëna;

nÿetsca mándayëngbentša entsanga ácbioye mochanjabo,

ácbentše mochanjoshamentsiye aca jadórama,

er ntšamo tcojamcá lempe entsángbioye mora tcojinÿanÿé,

y lempe ntšamo aca tcojamcá tšabá jtsemnana ca —monjëtsecantaye.

⁵ Chca chentsana sënjanontješé y sënjáninÿe chë celoca Bëngbe Bëtsabe bëts yebna tonjantëfjo, chë Bëngbe Bëtsá Moisésbioye tbojaniyé leyënga uajajóntse. ⁶ Y Bëngbe Bëtsabe bëts yebnentsana tmonjánbocna chë canÿsëfta angelënga, chë canÿsëfta pochócaye soyënga uambayënga, uafjantse lino entsëjuangá uabuashinÿinÿanëjuangá uichëtjonënga, y tëntša castellano uasnanëjëngaca cochóntscoñe. ⁷ Chentsana, canÿa chë canta Ainënguentšá chë canÿsëfta angelëngbioye tonjanoyé canÿsëfta castellano copbenga jútjena chë Bëngbe Bëtsabe uabouana castígoca; Bëngbe Bëtsá chë nÿets tempo y nÿetsca tescama vida bomná. ⁸ Chorna, chë Bëngbe Bëtsabe bëts yebna celoca becá ngónaca tonjanojuté, y chë ngona enjétsobocana Bëngbe Bëtsábentšana, chabe buashinÿinÿanana y obenana jtsinÿanÿayëse; y Bëngbe Bëtsabe bëts yebnoye ndocná quenjátanobena jamashënguana, chë canÿsëfta angelëngbe canÿsëfta pochócaye soyënga candochnënguëntscuana.

16

Chë castígoca copbenga

¹ Chentsana, canÿe jabuache oyebuambnayana sënjanuena, chë celoca Bëngbe Bëtsabe bëts yebnentsana enjétsobocana, y chë canÿsëfta angelëngbioye mëntsá enjétsëtsëtsnaye: “Motsajna y quem canÿsëfta copbenga, chë Bëngbe Bëtsábiocana endóbocana uabouana castígoca, fshantsoca šmochjabuashcja ca.”

² Chora chë natsana ángel tonjána y chabe copbé quem luariñe tonjanbuashcja, y nÿetsca entsanga chë uabouana bayabe uinÿnanana soye bomnënga y chë chábioye jadórama pormana soye adórayëngbe cuerpiñe bañe bacna nguayanana tonjanóbocna, puerte tsetšënanana.

³ Chentsana, chë inÿe ángel chabe copbé mar béjayoca tonjanbuashcja, y choca búyeshe buiñcá tontsanóbema, mo canÿe entsá obanabe buiñcá, y nÿetscanga chë mar béjayoca vida bomnënga tmontsanóbana.

⁴ Chora chë inÿe ángel chabe copbé béjayënguiñe y béjaye obocanënguiñe tonjanbuashcja, y buiñe tontsanobiana. ⁵ Chentsana sënjanuena, chë béjayënguiñe mando bomna ángel mëntsá enjétsichamo:

Aca nÿetsca soyënguiñe tšabá amá condmëna,

er aca tcojayana chë quem luarentša entsanga chca castigánënga chamotsemnana.

Bëngbe Bëtsá, Uamaná, mora chca condmëna y chca conjamna;

⁶ er chënga tmonjama, chë acbe entsanga

y acbe juabna oyebuambnayëngbe buiñe chauábuashanama, jtsëbáyëse;

y mora tconjama chënga buiñe chamofšema.

Nÿets mercedo imobuájona chca japásama ca —cha enjétsichamo.

⁷ Altarocánënaca canÿe oyebuambnayana sënjanuena, mëntsá enjétsichamo: “Aíñe, Bëngbe Utabná, Bëngbe Bëtsá, nÿets obenana bomná condmëna, y ntšamo entsanga contsacastigacá, ndegombre y tšabá entsemna ca.”

⁸ Chentsana, chë inye ángel chabe copbé shinýiñe tonjanbuashcja; chë shinýe corente tontsanobonyaná y chíyeca entsángbioye íñesheca tontsanajuinyé. ⁹ Y nyetscanga uabouancá juinyñenga tmonjanoquedá; pero chënga ndoñe chemátanbošena bacna soyënga amana jtsajbanana, ni Bëngbe Bëtsabe benache jtishachana, ni chábioye quemëntétsatschuanaye, más chabe contra ba soyënga montsanichamo; cha nda obenana yobomna chëngbioye chë pochócaye soyënga jíchmuama, chënga chamosufrima.

¹⁰ Chentsana chë inye ángel chabe copbé chë uabouana bayabe uámana puestiñe tonjanbuashcja, y nyets chabe amëndayiñe ibetiñe tonjanoquedá. Chë entsanga bichtaja montsanenójantsnaye, yapa tsetše causa; ¹¹ pero ni chca, chë entsanga chematanajbaná bacna soyënga jtsamana, ndayá chë yapa tsetšama y chë chëngbe cuerpiñe bacna nguayanana causa, chë celoca Bëngbe Bëtsabe contra ba soyënga montsanichamo.

¹² Chentsana chë inye ángel chabe copbé chë bëts fshájaye Eufrates ca uabáiniyiñe tonjanbuashcja y chë béjaye tontsanbuashjo, japróntama chë shinýe bocanoica luarënguentsá reyënga y chëngbe soldadënga chëjana chámuachnëjnama.

¹³ Atše sënjaninye, chë dragonbe uayáshoicana, chë uabouana bayabe uayáshoicana y chë ndoñe ndegombre Bëngbe Bëtsabe juabna oyebuambnayabe uayoicana tmonjánbocna unga bacna espíritënga; mo saposëngcá monjétsinyá. ¹⁴ Chënga monjamna bayëjëngbe espíritënga; bëts soyënga monjánama obenana jinýanýiyama, y montsanbocana nyets luarentša reyënga jáchembuama, chë uámana te, ndayté Bëngbe Bëtsá, chë nyets obenana bomná yochjabo entsangbiamama jabáyanama ntšamo chënga tmojamama, chë te chënga chabe contra chamotsetsjama.

¹⁵ Bëngbe Utabná Jesucristo mëntšá tojayana: “Smochjinýe, atše nye ndeolpe chanjabo, mo canýe atbëbanacá, chabiamama ndocná tontsejuabná ora; chíyeca oyejuayënga mochántsemna atše jabama tmojtseprontanënga, mo nda tojtsefsna y chabe entsáyá totsaboprontañacá, nye enašá ndoñe chaondëtsemnana, y entsanga chca tmojinýe ora ndoñe chaondëtsëuatjama ca.” ¹⁶ Y chë bacna espíritëngna chë reyëngbioye tmonjanënatse canýe luare, hebreyiñe Armagedón ca uabáinoye.

¹⁷ Chentsana, chë ústonoye ángel chabe copbé quem luarentša tsbanánoca tonjanbuashcja, y chë celoca Bëngbe Bëtsabe bëts yebnentša uámana puestentsana canýe jabuache oyebuambnayana tonjanóbocna, mëntšá enjétsichamo: “¡Chë jopásama enjamna soye ya tocjochnëngo ca!”

¹⁸ Chora enjëtsemna tcuinýënga, shauenanana y juevesanana, y quem luariñe tontsanangmëmana, yapa jabuache quem luare tontsanëbanjó causa; quem luarentše entsanga imobinyá orscana, ndocna te nýa chca quem luare tontsanëbanjó. ¹⁹ Chë puerte bëts pueblo úngañe tontsanojatá, y nyets luarentša bëts pueblënga tontsanáshajaye, y Bëngbe Bëtsá tojanenujabó chë puerte bëts pueblama, Babilonia ca uabaina pueblama, chentsa entsanga chë uabouana castigo chamotsebomnana, Bëngbe Bëtsá tša tbojánetna causa, tša bacna soyënga chentše tmojanmama. Y chca, chë chëngbe bëts pueblo úngañe tontsanojatá ora, cha chënga tonjanacastigá. ²⁰ Mar béjayoca nyetsca fshantsënga y quem luarentša nyetsca tjañe tontsanenatjëmbe. ²¹ Celocana bëtsëtsa bëntstbënga entsángbeñe tonjantquécjana, chëbënga canta bnëtsana kilama más utbënga; y entsanga Bëngbe Bëtsabe contra ba soyënga tmonjánayana, er chënga tša montsansufrina chë bëts pochócaye bëntstá causa, y chë pochócaye bëntstá chëngbiamama puerte jabuache castigo enjamnana.

17

Chë puerte bacna vida bomna shembásabe castigo

¹ Canýa chë canýsëfta angelënguentsá, chë canýsëfta copbënga monjanatbënguentsá, tonjánabo y šonjanianana: “Mabo; cbochanjinýinye ntšamo yochtsemna chë puerte

bacna vida bomna shembása, chë béjayënguine entsetbemanabe castigo. ² Quem luar-entša mandadënga cháftaca puerte bacna soyënga tmojama, y quem luarentša oyenënga puerte tmojóyejuanga chë cháftaca bacna soyënga amama, mo chë bacna vida bomna shembásabe vínoyeca puerte cuafjotmenangcá ca.”

³ Chentsana chë ángel, atse chë Uámana Espíritbeyeca corente mandaná jtsemnëse, šonjanánatse entšanga ndoyena luaroye. Choca sënjáninÿe canÿe shembása, canÿe uabouana buángana bayábeñe enjaquená; chë bayabe cuerpiñe nÿétsañe Bëngbe Bëtsabiama puerte bacá oyebuambnaye uabaina enjétsabemana, y enjánbomna canÿsëfta bestšaše y bnëtsana tsëtjonëse. ⁴ Chë shembása enjanichëtjona uámana shbuenda uaffatsenga y buángana entšayá, y entsanbotamana castellánoca, uámana botamana ndëtšëtëmëngaca y pérlacá. Chabe cucuatšinë canÿe castellano copbé enjétsatbëna, jútjena puerte uaboyënja soyëngaca, y chë boyabásengaftaca cha tojanma puerte bacna soyëngaca. ⁵ Y chabe juentsaca canÿe uabaina enjétsabemana, ndoñe josérta soye, mëntšá: “Chë puerte bëts pueblo Babilonia, tša bacna entšanga chentše, mo chë puerte bacna vida bomna shembásengbe bebmá cuaftsemncá; chentsana tojanóbocna quem luarentša nÿetsca puerte uaboyënja soyënga ca.” ⁶ Atse sënjáninÿe chë shembása tëmiá, er cha tojanofšë chë Bëngbe Bëtsábenga imojamnëngbe buiñe, ndëmuanyëngbioye tmojanëbaye Jesusbiamá oyebuambnaye causa.

Chca sënjáninÿe ora, tša sënjanenjaná. ⁷ Chora chë ángel šonjaniyana: “¿Ndáyeca tcojenjaná ca? Atse cbochanjauyana ntšamo yojsayana chë shembása y chë chábioye bontsambá uabouana bayá, chë canÿsëfta bestšaše bomná y bnëtsana tsëtjonëse; chë soye ndocná quenátstatšëmbo. ⁸ Chë tconjinÿe uabouana bayá, tempo chca enjamna, pero mora ya ndoñe. Chë corente bëts tboicana cha echanjesetsjuá, pero lempe pochocaná jtsemnama chca echántsaye. Quem luarentše oyenënga, ndëmuanyëngbe uabaina quem luare jobojátšama orscana ndoñe yonduábemana, chë tšabe vida mochjónÿenëngbe uabaina iuábemana librëšañe, chënga mochanchenjaná, chë bayá chë tempo enjaniyená y mora ya ndoñe, pero cachiñe yochjésabama chamojinÿe ora.

⁹ “Muentše canÿe soye entsemna chë chca josértama chamojobenangbiama: chë bayabe canÿsëfta bestšaše endmëna canÿsëfta tjañe ndayiñe chë shembása entsetbemana; chë bestšašëngnaca mondmëna canÿsëfta mandadënga. ¹⁰ Chentsana, shachnëngbe amëndayana ya tonjochnëngo, canÿa mora entsetbemana jtsamëndayama y chë inÿa cabá ndoñe tonjášhango. Y cha chaojášhango ora, ndoñe bënama cha queochaisemánda. ¹¹ Chë tempo enjaniyena uabouana bayá pero mora ya ndoñe, endmëna chë canÿsëfta mandadënguentšana inÿe mandado, pero chánaca chë inÿe canÿsëftangcá endmëna y lempe pochocaná jtsemnama entsá.

¹² “Chë tconjinÿe bnëtsana tsëtjonëse mondmëna bnëtsana mandadënga, jamëndama cabá ndoñe tmonjóyayenga; pero básefta tescama cánÿiñe chë uabouana bayáftaca, mando mo reyëngcá mochanchjójyëngacñe. ¹³ Quem bnëtsanënga nÿetscanga cachcá mochántsejuabnaye, y chë uabouana bayábioye chëngbe obenana y mando mochanchjótsetaye. ¹⁴ Chë Oveshatembe contra mochántsejtsjanaye; pero chë Oveshatema echantsayënjaná, er chë Oveshatema endmëna nÿetsca amëndayëngbiama chë más uámana Utabná y nÿetsca reyëngbiama chë más uámana Rey. Chë bnëtsana mandadënga cháftaca mochántsejtsjanaye ora, cha chentše chabe entšángaftaca cánÿiñe echántsemna. Chënga mondmëna chë cha tojáchembo y tojubuáyanënga y chábeñe sempre ošbuáchiyënga ca” —cha šonjaniyana.

¹⁵ Chë ángel mëntšánaca šonjaniyana: “Chë tconjinÿe béjayënga, ndayiñe chë bacna vida bomna shembása entsetbemana, mondmëna nÿetsca canÿe luarentša entšanga, enutanana entšanga, nÿetsca biyañe oyebuambnaye y nÿetsca mándayëngbentša entšanga. ¹⁶ Y chë uabouana bayábeñe tcojinÿe bnëtsana tsëtjonëse y chë uabouana

bayá, chë bacna vida bomna shembásabioye mochantsáboyënja; enaşá cachcá mochanjesonÿaye; chabe cuerpentša mëntšena mochantsósañe y íñesheca mochántsejuinÿiye, chaopochocantscuana. ¹⁷ Bëngbe Bëtsá tojama chë bnëtsanënga ainaniñe tša chamotseboše, ntšamo cha yobošcá chamotsamama. Chca, chënga mochanjenóyeunaye chëngbe mando chë uabouana bayábioye jantšabuáchiyana, ntšamo Bëngbe Bëtsá tojayancá chajopasantscuana. ¹⁸ Chë tconjinÿe shembása chë puerte bëts pueblo endmëna, chë ndayentša mandadënga nÿets quem luarentša mandadëngbeñe mando mondbomna ca” —cha šonjaniyana.

18

Babilonia japochócoma

¹ Chentšana inÿe ángel sënjáninÿe, celocana enjétsastjajuana, puerte obenana bomná, y chabe buashinÿinÿanánaca nÿets quem luariñe entsanbinÿna. ² Chë ángel jabuache mëntšá enjétsichamo:

¡Ya mochantseepochóca, ya mochantseepochóca chë uámana pueblo Babilonia!

¡Chentše tojtsóbema diablëngbe oyeniñe,

nÿetsca bacna espíritëngbe oyeniñe,

y ndoñe tšabe y uaboyënja shloftšëngbe oyeniñe!

³ Er nÿetsca quem luariñe mándayëngbentša entsanga puerte bacna soyënga tmojama chentša entsangbe causa,

mo chë bacna vida bomna shembásaftaca bacna soyënga cuafjamcá,

mo puerte cuafjotmenangcá chë bacna vida bomna shembásabe vínoyeca.

Nÿetsca luarënguentša mandadënga puerte bacna soyënga tmojama,

mo chë shembásaftaca bacna soye cuafjamcá,

y quem luarentša obuámnañënga y enënga, bomnënga tmojobiama chentša entsanga yapa crocénana nÿe ndayíñnaca ntsejuabnaycá gástaye causa ca —cha enjétsichamo.

⁴ Chentšana, celocana inÿe oyebuambnayana sënjanuena, mëntšá enjétsichamo:

¡Chë bëts pueblentšana maisebocana!, tšëngaftanga chë atšbe entsanga šmomnënga,

chë chentša entsanga mondbétsama bacna soyënga ndoñe chašmondétsamama,

ni chë chëngbioye japochócoma soyënga tšëngaftangbiama cach ndoñe chaondëtsemnama.

⁵ Chënga tša bacna soyënga tmojama, tša bëtscá nÿa mo celóntscoñe cuafjotjeca,

y Bëngbe Bëtsá mora entsejuabná chënga tša puerte bacna soyënga tmojama causa, chë soyëngama jácastigama.

⁶ Ntšamo chentša entsanga ínÿëngbiama ndoñe tšabá tmonjamcá,

chë entsangbiámna cachcá chaotsemna;

ntšamo tmojamama, cabá uta soye más cachca soye chëngbiama chaotsemna;

ntšamo chentša entsanga ínÿënga chamosufrima tmojamcá,

chëngnaca cachcá uta soye más chamosufrí.

⁷ Chënga corente jtsenábotamnayana y yapa crocénana nÿe ndayíñnaca ntsejuabnaycá jtsegástayana;

chë causa, chënga entsamna puerte jasúfriama y becá tsetšanana jtsebomnama.

Er chëngbe ainaniñe mëntšá jtsejuabnayana:

“Muentše mo reyëngcá mondëtbiámna.

Viudacá ngmëna ndoñe quemuátsmëna; tondayama quemochátssufrina ca.”

⁸ Chíyeca, canÿe ora pochócaye soyënga chëngbiama echanjóshjango:

jóbanama šocanënga, puerte ngmëna y jabuache shëntsana,

íñesheca lempe chëngbeñe echántsejuinÿe;

er Bëngbe Bëtsá corente obenana bomná endmëna,

Bëngbe Utabná chë chënga chca castigo chamotsebomnama tojayaná ca —cha enjétsichamo.

⁹ Quem luarentša mandadënga, chentša entsángaftaca puerte bacna soyënga tmojamënga, y chëngaftaca nÿe ndayíñnaca yapa crocénana, ntsejuabnaycá tmojagastanga, mochanjošachna y puerte ngmenánaca mochántsemna, chë bëts pueblo chaojtsangbototjuanentša ngona chamojinÿe ora. ¹⁰ Chentšana bënoca mochanjoquéda antješna, chë uabouana castiguama auatja causa, y chentša entsangbiama mochanjayana: ¡Tša lastema, tša lastema tšëngaftanga chë uámana bëts pueblo, Babilonientše oyenëngbiama, chë tša obenana binÿnentše!

Canÿe ora tšëngaftangbe castigo tojóshjango ca —mochánttsichamo.

¹¹ Chë quem luarentša obuámañënga y enëngnaca mochanjošachna y ngmenánaca mochántsemna chë pueblentša entsangbiama, er chora ya ndocná queochátsmëna chë chënga tmojúshjango soyënga chamobuámiñama: ¹² tmojúshjango castellano soyënga, midio soyënga, uámana y botamana ndëtšbënga, perlënga, uámana lino y shbuenda uafjatsenga entsáyá y sedéjua y uámana uabuángana entsáyá; nÿetsca botamana uanguëtše betiyënga, marfiloca pormana soyënga, uámana niñësëngaca pormana soyënga, bronce soyënga, hierro y marmol soyënga; ¹³ bëts cá canela y inÿe botamana uanguëtše y tamna soyënga, botamana uanguëtše béjayënga, incienso y mirra; vínoye, aceitiye, uámana arninÿá, trigo; bayënga ndayánaca uasmëmnyënga, oveshënga, couayënga, cochëshangá y entsanga nÿets tempo nÿe ínÿabiama oservenëngnaca. ¹⁴ Y chë pueblentša entsangbiama mochanjayana:

¡Chë tša cmonjanogúsetana jtsebomnama soyënga, mora ya ndoñe quešmátsbomna; chë uámana y buashinÿinÿana soyënga y tša bomnana lempe šmojobuetše, y ndocna te más cachca soye quešmochátsbomna ca!

¹⁵ Chë soyënga enënga, chë bëts pueblentša entsángbeyeca bomnënga tmojanobiamënga, bënoca mochanjoquéda antješna, chë bëts pueblentša entsangbiama tša bëts castiguama auatja causa; mochanjošachna, puerte ngmenánaca mochántsemna. ¹⁶ Y mëntšá chentša entsangbiama mochanjayana:

¡Tša lastema, tša lastema tšëngaftanga chë uámana bëts pueblentše oyenëngbiama! Chë enjáninÿna mo canÿe shembasacá, uámana lino entséjua uichëtjoná, uámana shbuenda uafjatsenga y uabuángana entsáyá uichëtjoná, botamananá castellanoca, perlënga y uámana botamana ndëtšbéngaca.

¹⁷ ¡Y canÿe ora chabe tša bomnana lempe tojtsopochocá ca! —mochanjayana.

Nÿetsca chë barquënguentša mándayënga, chentša entsanga inÿe luaroye ajnënga y chentša trabájayënga, y nÿetscanga chë vida onguayiñe mar béjayoca trabájayëngnaca, chentšana bënoca mochanjoquéda antješna, ¹⁸ y chë bëts pueblo chaojtsangbototjuanentša ngona chamojinÿe ora, jabuache mochanjayana: “¡Quem uámana bëts pueblécá ndocna inÿe pueblo cachcá quenátsmëna ca!” ¹⁹ Chca chamojinÿe ora, ngménama bestšašniñe polvëshe mochántsenotboto, y mëntšá mochántseyona ošachiyënga y puerte cochtsetšenánënga:

¡Tša lastema, tša lastema tšëngaftanga chë uámana bëts pueblentše oyenëngbiama! Chentša bomnánaca bomnënga tmojanobiama nÿetscanga chë mar béjayoca barco bomnënga.

¡Canÿe ora lempe tojtsopochocá ca! —chënga mochántseyona.

Chora chë ángel tonjánayana:

²⁰ ¡Celoca oyenënga móyejuanga chë pueblo chca tojapasama;

y tšëngaftángnaca móyejuanga, Bëngbe Bëtsabe entsanga, Jesucristbe ichmónënga y Bëngbe Bëtsabe juabna oyebuambnayënga, er chca jacastígase, Bëngbe Bëtsá tojama chënga chamosufrima,

ntšamo tšëngaftanga chašmosufrima chënga tmojanmcá ca! —cha tonjánayana.

²¹ Chentšana, canye ángel puerte obenana bomná, canye ndëtsbé tonjanatsbaná, mo canye bëts nantsnëbé ndëtsbecá, mar béjayoye tonjanashbuetse y mëntsá tonjánayana: Mëntsá, nje ndeolpe y jabuache, Babilonia chë uámana bëts pueblo mochántsetsatse, y ndocna te más quem pueblo queochátsmëna.

²² Chentše, ndocna te más quemochátuenana arpangá uabuástoyana, ni cantayana, flautëfjënga y trompetëfjuangá cach ndoñe; ndocna te más quemochátsmëna obrerënga, ni chë nantsnëbeñe trabájayana quemochátuenana.

²³ Chentše, ndocna te más ndocna uajuinñanësha queochátbinñaye, ni casamento fiestentša enbouenanana quemochátuenana. Er chë bëts pueblo chca mochantseepochóca, masque chentša obuámnañënga y enënga nÿets quem luarentse chë más bomnënga monjamna, y chentša bocjuanánaca nÿetsca luarënguentša entšanga ingñënënga monjamna ca —cha tonjánayana.

²⁴ Bëngbe Bëtsá chca chë bëts pueblentse echanjama, er chentše tmojinñena chë Bëngbe Bëtsabiama trabájaye causa tmojanóbanëngbe buiñe; chë chabe juabna oye-buambnayënga, chabe entšanga, y chë chábioye oservënema nÿets quem luarentse tmojtsëbayëngbe buiñe.

19

¹ Chentšana celoca sënjanuena mo mallajta entšanga cuaftsayebuachcá, mëntsá monjétsichamo:

¡Bëngbe Utabná matschuanga!

Bëngbe Bëtsá endmëna nda chabe entšanga tojatsebacá; cha puerte uámanana, buashinñinñana y mando endbomna,

² er ndayama cha tojayancá ndegombre jtsemnana, y ntšamo tšabá chama tojtsemncá.

Cha chë uachuana bacna vida bomna shembásabioye tbojacastigá.

Chë shembásabe puerte bacna soyënga causa, nÿets luarentša entšángnaca bacna soyënga tmojama.

Chábioye chca jacastígase,

Bëngbe Bëtsá tojama ntšamo jamama ibomerecencá,

chábioye oservënënga chë shembásabeyeca tmojóbana causa ca —chënga monjétsichamo.

³ Y cachiñe mëntsá tmonjánayana:

¡Bëngbe Utabná matschuanga!

¡Chë bëts pueblo japochócama uangbototjuanentša ngona nÿetsca tescama chca echanjótjuaye ca!

⁴ Y chora, chë uta bnëtsana y canta bëtsëjëmënga amëndayënga y chë canta Ainënga tmonjanoshamentsé, y Bëngbe Bëtsá, chë uámana tbemanentše enjëtsetbemanabioye tmonjanadorá, mëntsá jayanëse: “¡Chca chaotsemna! ¡Bëngbe Utabná matschuanga ca!”

⁵ Y chë uámana puestentšana canye oye-buambnayana tonjanóbocna, mëntsá:

Bëngbe Bëtsá matschuanga, nÿetsca chabe oservënënga

y chë nÿetscangbiamana cha chë más uamaná yomnama juabnayënga,

básënga y bëtsétsanga ca.

Chë Oveshatembe casamento fiesta

⁶ Y sënjanuena mo mallajta entšangbe oye-buambnayancá, mo bëtscá béjaye cuaft-sobonjnacá y mo bëts juesasanana shauenanancá; mëntsá monjétsichamo:

¡Bëngbe Utabná matschuanga!

Er Bëngbe Utabná, Bëngbe Bëtsá nyets obenana bomná tojontsé jamándana.

⁷ Puerte móyejuanga y mochjínñanñiye

Bëngbe Bëtsá puerte bëtsá y uamaná bëtsemnama,

er mora entsemna mo chë Oveshatembe casamento te cuafojshjangcá;

chabe shema yochjabocná puerte tojtenobotamá;

⁸ tmojalesenciá cha chauatíhëtjo uámana, nduatsenga uafjantse y uabuashinñinñana lino entsáyá.

Chë shema entsinñinñná chë Bëngbe Bëtsabe entsanga;

y chë lino entsáyá jtsichëtjonana entsinñinñná

chënga lempe ntšamo tšabá yomncá jtsamëse imoyena ca —chënga monjétsichamo.

⁹ Chentsana chë ángel šonjaniyana: “Mëntsá mábema: ‘Oyejuayënga chë Oveshatembe casamento fiestama ófjanënga ca.’ ” Y mëntsánaca šonjaniyana: “Chca, ndegombre Bëngbe Bëtsabe palabrenga endmëna ca.”

¹⁰ As chabe shecuatšentše sënjanoshamentsé cha jadórama, pero cha šonjaniyana: “Ndoñe, átšeftaca ndoñe chca mátamana, er atše Bëngbe Bëtsabe canye oservená sëndmëna, ntšamo aca condmëncá, y chë Crístbeyeca acbe catšátanga, ntšamo chabiama motatšëmbcá y chabe ndegombre palabrenga nyets tempo imabuayiynanga mondmëncá. Aca cmontsemna Bëngbe Bëtsá jadórama ca.”

Ndayá Jesús tojanma y tojanayancá, endama chë Bëngbe Bëtsabe juabna oyebuambnayënga chëngbe ainaniñe osertánana y añemo chamotsebomnama, chë soyëngama entsángbioye jábuayenama.

Chë fjantse couayiñe enjaquená

¹¹ Chora sënjaninñe celoca atëfjniñe; canye fjantse couaye enjëtsemna y chë chábeñe enjaquená enjanabaina “Ntšamo tojašebuachenacá amá” y “Ndegombre oyebuambnayá ca”, er ntšamo tšabá yomncá cha tojanjuabó y tojanma entsángaftaca; y chca chabe uayayëngaftaca monjánentsjanaye. ¹² Chabe fšñëbenga mo iñeshcá enjáninñna, bestšasiñe ba uabuashinñinñana coronëshangá enjanábomna, y canye uabaina chábeñe enjanábemana; nye cha chë uabaina yojanábuatma. ¹³ Cha enjanichëtjona buíñeca unëtjona entsáyá y chabe uabaina enjamna “Bëngbe Bëtsabe palabra ca”. ¹⁴ Y chabe ústonoye monjétsajna mallajta soldadënga celoquënga, nduatsenga uafjantse y uámana lino entsáyá uichëtjonënga, fjantse couayënguiñe enjaquenënga. ¹⁵ Chë enjëtsebnatsanabe uayoicana enjanóbocana canye puerte efsana espadëja, chë Bëngbe Bëtsábeñe ndošbuáchiyënga játatsetšama. Cha puerte obenánaca echántsamëndaye, mo canye hierro varëfjaquëcá. Cha echanjama entsángaftaca mo nda uvasëšangá juantsëtetjama tojtsabotajná ora cuafojamcá; y echanjama chënga chamotsebomnama chë puerte uabouana castigo, Bëngbe Bëtsá chë nyets obenana bomná tbojetna causa. ¹⁶ Chabe uabonjaníyañe y chabe mëntjoca canye uabaina enjanábemana: “Nyetsca reyëngbiamna chë más uámana Rey, y nyetsca amëndayëngbiamna chë más uámana Utabná ca”.

¹⁷ Chentsana canye ángel sënjaninñe, shinñiñe enjétsatsana, chë celoca tsbanánoca nyetsca monjanongüefjná shloftšënga jabuache mëntsá enjétsëtsëtsnaye: “¡Mabënga, menefjna chë Bëngbe Bëtsá tojaprontá bëts saná jasama; ¹⁸ chašmosama reyëngbe mëntsëna, soldadënga amëndayëngbe mëntsëna y valente entsangbe mëntsëna, couayënga y chëngbeñe enjaquenëngbe mëntsëna, y nyetsca entsangbe mëntsëna, cachëngbiamna trabájayënga y nye ínñabiamna nyets tempo trabájayënga, básesenga y bëtsëtsanga ca!”

¹⁹ Chora atše sënjaninñe chë uabouana bayá y quem luarentša reyënga chëngbe soldadëngaftaca tmojánenefjna, chë fjantse couayiñe enjaquená y chabe soldadëngaftaca jétsjama. ²⁰ Chë uabouana bayá tmonjanotbá, y cháftaca chë Bëngbe Bëtsabe ndoñe ndegombre juabna oyebuambnayá, chë bayabe delante ba bëts soyënga tonjanmá

obenana jinŷanŷiyama; y cha chē soyēngaca tojanaingñé chē uabouana bayabe uinŷnanana soye chamuayentsjajoma tmojanlesencianga, y chē chábioye jadórama pormana soye adórayēga. Y chē útatbioyna ainata tmontsanatmetše chē íñesheca uafjajónayoye, chē azufre endējuinŷinŷanentše. ²¹ Chē ínŷengbioyna tmontsanapochocá chē fjantse couayiñe enjaquenabe uayoicana enjanóbocana espadějaca, y nŷetsca shloftšēga chēngbe mēntšénaca yapa tmontanoshachá.

20

Chē uaranga uata

¹ Chentsana canŷe ángel sēnjáninŷe celocana entsanastjajuana chē corente asentoye tboca llavěfjaca, y canŷe bēts cadenējua entsanētbená. ² Chē ángel tbontsantbá chē dragónbioye, chē tempsca mētšcuaye, chē Diablo y Satanás endmēná, y canŷe uaranga uatama tbontsanbátsēca. ³ Chē corente asentoye tboye tbontsantsatše, chentše tbontsanētame, y chentše bēsáša tsengájašeca tonjaninŷnaná, ndotatsēmbcá jatěfjuama ndocná chaondobenama; y chca, chē dragón ndoñe chaondobená jabocnama entšanga jáingñama, chē uaranga uata candochnēnguēntscuana; y chora, básefta tescama chē dragón mochanjētsboshjona.

⁴ Uámana puestēga sēnjáninŷe, y chiñe tmonjanotbiama chē entšanga tšabá o ndoñe tšabá tmonjamama jayanama obenana tmojanóyēngacñēga. Chē bestšaše jtsēstjanguēse tmojanóbanēngbe espíritēngnaca sēnjánanŷe. Chēnga chca tmojanóbana, Jesús tojánayana soyēnguiñe y chē Bēngbe Bētsabe buayenana soyēnguiñe sempre ošbuáchiye causa. Chēnga ndoñe tmonjanadorá ni chē uabouana bayá, ni chē chábioye jadórama pormana soye, y ndoñe tmonjanlesenciá chē bayabe uinŷnanana soye juentsaca o cucuatšīñe chamuayentsjajoma. Y sēnjáninŷe chēngna tmontanayena y Crísoftaca canŷe uaranga uatama montsanmánda. ⁵ Chē entšanga mondmēna chē natsanēga jtayenama, pero chē tempo chē inŷe obanēga ndoñe chemētétanayena, ndayá nŷe chē canŷe uaranga uata chentsana. ⁶ ¡Oyejuayēga y Bēngbe Bētsabe entšanga, chē tmojtanayenēga chē obanēga chámuatayenama Bēngbe Bētsá tojanma ora! Chēnga ndoñe quenátamna chē nŷetsca tescama castigo jtsebomnana, ndayá Bēngbe Bētsá y Crístbioye mo bachnangcá chēnga mochántseservena, y Crísoftaca chē uaranga uatama mochántsemandaye.

Satanás japochócama

⁷ Chē uaranga uata chaojochnēngo ora, Satanás chabe utámenocana mochanjētsboshjona; ⁸ y cha echanjábocna nŷets luarentša entšángbioye, chē Bēngbe Bētsabe soyēngama contra imomnēngbioye jáingñama, chē ntšamo Bēngbe Bētsabe contra Gog y Magog tempo ibojamncá imomnēga. Satanás, chē entšanga echanjáchembo Bēngbe Bētsabe contra jéntsama, y tša chēftanga cha echanjáchembo, nŷa mo chē mar bėjaye chēñŷoca cascajcá mochántsemna.

⁹ Chēnga nŷetscanga nŷets luarējana mochanjátsjua, y chē Bēngbe Bētsabe entšanga oyenentše y chabe bonshana entšangbe bēts pueblo shēconana mochanjotsaye. Pero celocana inŷe echanjatquécjana y chē Bēngbe Bētsabe contra imomnēga lempe echántsjuinŷe. ¹⁰ Y Satanás, chē aingñayá, mochántsatmetše chē íñeshe y azúfrecá uafjajónayoye, ndayentše chē uabouana bayá y chē Bēngbe Bētsabe ndoñe ndegombre juabna oyebuambnayá tmontsanatmetše. Chentše bēts castigo nŷets tempo, bnēté y ibeta mochanjasufrina.

Chē obanēngbiama tmonjánayana ntšamo chēngaftaca jamama yojtsemnana

¹¹ Chentsana sēnjáninŷe canŷe bēts uámana fjantse puesto jamándama y nda chiñe enjetsetbemaná. Celoca y quem luare chabe delante lempe tonjanenatjēmba, y ndócnentše más chenatanobinŷná. ¹² Y chē obanēga sēnjánanŷe, bētsētsanga y básesenga, chē uámana puestentša natsanoica monjétsatsana; y chē librēšangá tmonjanētēfjo, y

inÿe librësana, ndëmanÿenga nÿetsca tescama tšabe vida mochjónÿenÿenge uabaina uabemana librësä. Chë obanÿngbiana tmonjánayana ntšamo chëngaftaca jamama yojtsemnana, cachënga vida imojábomna ora ntšamo tmojëftsema soyëngaca, ntšamo chë librësangañe yojanabemancá. ¹³ Chë mar béjayoye tmojanóbanënga choicana tmontanbocna, y chë obanënga tmojanouquedanga luarënguentsana tmontanbocna, y cada cánÿabiana tmonjánayana ntšamo cháftaca jamama yojtsemnana, cachënga vida imojábomna ora ntšamo tmojëftsema soyëngaca. ¹⁴ Chentsana ya ndoñe más obenana quentétsemna entsanga chamóbanama chaomama, mo chë obenana chë ñesheca uafjónayoye cuaftsëtšencá; quem ñesheca uafjónayoye endmëna chë nÿetsca tescama castigo jtsebmnama luare; chë choca castigánënga jtsamnana yojtsamnëngbiana entsemna mo chënga cachiñe cuafjatobancá; ¹⁵ y ndëmanÿenge uabaina chë tšabe vida mochjónÿenÿenge uabaina iuábemana librësañe ndoñe yonjanabemana, chë ñesheca uafjónayoye tmontsanatmetše.

21

Celoca tsmiñe y fshantse tsmiñe

¹ Chentsana atše sënjaninÿe canÿe celoca tsmiñe y canÿe fshantse tsmiñe, ndoñe ntšamo tempo enjamncá, er chë tempo enjamna celoca y fshantse chora ya ndoñe quentétsemna, y chë mar béjaye chora cach tondaye. ² Sënjaninÿe chë “uámana ca” uabaina bëts pueblo, chë tsëm bëts pueblo Jerusalén, Bëngbe Bëtsábiocana celocana enjëtsostjajuana, puerte botamaniñe, mo canÿe shembása puerte botamananacá, chabe boyá jábocnabiana. ³ Y chora canÿe jabuache oyebuambnayana Bëngbe Bëtsabe uámana puestentšana sënjanuena, mëntsá: “Mouena. Bëngbe Bëtsá entsángaftaca echántsemna y cha chëngbeñe echantsiyena. Chënga chabe entsanga mochántsemna, cach Bëngbe Bëtsá chëngaftaca echántsemna, y cha chëngbe Bëtsá echántsemna. ⁴ Cha echanjama chënga ndocna te más ngmënënga chamondëtsemnana, y ndoñe más chamondóbanama, ndoñe más chamondošachema, ni ngmënaca ndoñe chamondëtsóyebuambnana y ndoñe más tsetšanana chamondëtsebmnama; er ntšamo chënga entsangcá fshantsoca tempo imojëftsiyena ora enjamncá, chora ya ndoñe chca queochátsmëna ca.”

⁵ Chë uámana puestentše enjantbemaná šonjaniyana: “Atše lempe mo tsëm soyëngcá sëndbama ca.” Y mëntsánaca tonjánayana: “Chë soyënga mábema, er chë palabrenga endmëna ntšamo ndegombre yomncá, y nÿetscanga mondobena chiñe corente jtsošbuáchiyana ca.”

⁶ Chentsana šonjaniyana: “Lempe tonjochnëngo. Atše sëndmëna chë nÿetsca soyënga bojatsayá y pochocayá, chë natsaná y chë ustonoyá. Mo nda tša uajuendayana tojtsebmná canÿe béjaye fshantsiñe obocanentšana cuafjofšecá, cachcá nda tša tojtseboše atšbe soyënga jtsebmnama, atše chanjama cha chë soyënga chaotsebmnama, y chë nÿetsca tescama yomna tšabe vídnaca, chca jtsebmnama chábioye tondaye ntsojtañcá. ⁷ Nda nÿetsca soyënguentsana tšabá chaojabocná mo ayënjanayacá, lempe echanjóyëngacñe ntšamo atšbe entsángbioye jatšatayama tijašebuachenacá, y atše chabe Bëtsá chántsemna y cha atšbe uaquiñá. ⁸ Pero chë auatja causa Crístbioye ndoñe mondëservénënga, chábeñe ndošbuáchiyënga, chë bacna soyënga causa Bëngbe Bëtsabiana puerte uaboyënjanënga imomnënga, chë inÿengbioye obánayënga, chë shembása o boyabásaftaca bacna soye amënga, chë bocjuana soyënga amënga, chë soyënga adórayënga diosënga yomna ca jtsejuabnayëse, y nÿetscanga bosterënga imomnëngbiamna, chënga entsamna chë ñesheca uafjónayoca jasúfriana, chë azufre yojuínÿinÿanentše. Chentše puerte castigánënga sempre mochanjëftsemna, mo uta soyama cuafjobancá ca.”

Chë tsëm bëts pueblo Jerusalén

⁹ Chentsana canya chë angelënguentsá, chë canysëfta copbenga bomnënga jútjena chë canysëfta ústonoye pochócaye soyëngaca, átsbiroye tonjánabo y šonjanianyana: “Mabo, cbochanjinýinýiye chë tojobouamá shembása, chë Oveshatembe shema ca.” ¹⁰ Y atše chë Uámana Espíritoftaca corente mandaná jtsemnëse, chë ángel šonjanánatse canýe bëts y tsbanana tjoye, y šonjaninýinýé chë tsëm bëts pueblo Jerusalén, chë “uámana ca” uabaina pueblo, celocana Bëngbe Bëtsábiocana enjétsostjajuana. ¹¹ Chë bëts pueblo enjétsbuashinýinýana Bëngbe Bëtsabe buashinýinýanánaca; enjétsbuashinýinýana mo canýe uámana botamana ndëtsbecá, mo jaspe ndëtsbecá, pero mo cristalca tëshínýiniñe. ¹² Chë bëts pueblo shéconana canýe bëts y tsbanana tapiëse enjamna, chë tapiësiñe bnëtsana uta bëshashangá y cada bësháshentše canýe ángel, y chë bësháshangañe enjanábemana chë Israeloca bnëtsana uta bëts pamílangbe uabaina. ¹³ Shinýe bocanoica unga bëshashangá, shinýe uenatjëmbambanoica ungashá, tsjuanoica unga bëshashangá, y tsmanoica ungashá. ¹⁴ Chë tapiëse enjanécuatjona bnëtsana uta ndëtsbenguíñe, y chëbenguíñe enjanábemana Jesucristo chë Oveshatembe bnëtsana uta ichmónëngbe uabaina.

¹⁵ Chë ángel átšeftaca oyebuambnayá canýe castellano juinýnanëšëfja enjánatbëna jamedídama chë bëts pueblo, chentsa bëshashangá y chentsa tapiëse. ¹⁶ Chë bëts pueblo cach medida enjانبomna nýets cantoica, cach medida tëntsoye y nýanëjoye. Chë ángel chabe juinýnanëšëfjaca chë bëts pueblo tonjanmedidá: enjانبomna uta uaranga y uta patse kilómetrënga; tëntsoye, tsbanánoye y nýanëjoye cach medida enjانبomna. ¹⁷ Chentsana chë tapiëse tonjanmedidá, enjانبomna chnënguana bnëtsana y shachna metrënga; ntšamo entšanga chca soyënga jamedídama mondëtatšëmbcá chë ángel tonjanmedidá.

¹⁸ Chë tapiëse enjanpormana jaspe ndëtsbeca, y chë bëts pueblo ena castellánoca, tša chca nýa mo cristalca tëshínýiniñe enjáninýna. ¹⁹ Chë ndëtsbenga ndayiñe chë tapiëse enjanécuatjona enjánbotamanana nýetsca uámana botamana ndëtsbéngaca: canýebé jaspe ndëtsbeca, chë inýebé zafíroca, chë inýebé ágata ndëtsbeca, chë inýebé esmeráldaca, ²⁰ chë inýebé ónice ndëtsbeca, chë inýebé cornalina ndëtsbeca, chë inýebé crisólito ndëtsbeca, chë inýebé berilo ndëtsbeca, chë inýebé topácioca, chë inýebé crisoprasa ndëtsbeca, chë inýebé jacíntoca y chë inýebena amatista ndëtsbeca. ²¹ Chë bnëtsana uta bëshashangá enjuamna bnëtsana uta perlënga; cada bëshásha nýe canýe pérlaca uapormanësha. Y chë más bëts tsáshenëjana enjamna ena castellánoca; mo cristalca tëshínýiniñe enjáninýna.

²² Chë bëts pueblentše ndocna Bëngbe Bëtsabe bëts yebna chiyátaninýe, er Bëngbe Utabná, chë Bëngbe Bëtsá nýets obenana bomná y chë Oveshatema chentše bonjamna, y chata nýetscangbiana chë bëts pueblentše ndayéntsñaca adoránata bonjëtsemna. ²³ Chë bëts pueblentše ndoñe quenjatsiyta shinýe o juashcona chaotsebínýnaye, er Bëngbe Bëtsabe buashinýinýanana chentše enjétsbinýnaye, y chë Oveshatembe buashinýinýanana mo uajuinýanëshacá enjamna chë bëts pueblama. ²⁴ Chentsa binýnayánaca, entšanga nýetsca mándayëngbentše mochantsiyena, y quem luarentša mandadënga chëngbe uámana y bëts soyënga chë bëts puebloye mochanjijëbo. ²⁵ Chë bëts pueblentša bëshashangá ndocna te quemochtëtatame, y chentše ndocna ora ibeta queochátsmëna. ²⁶ Chë bëts puebloye mochanjijëbo chë nýetsca luarënguentsá entšangbe uámana y bëts soyënga, y chë nýetsca luarënguentsá entšangbeñe bëtsëtsanga y uámanënga iuabi- amná soyëngnaca. ²⁷ Pero ndocna te queochatómashëngo ndayánaca, y chë soye chaotsama entšanga ndoñe tsábenga chamotsemnama Bëngbe Bëtsá jadórama; ni ndocná queochátamashëngo, Bëngbe Bëtsabiana nýa tondayama ogustana soyënga amá o ínýëngbiroye jáingñama soyënga amá. Choye mochanjámashjna nýe chë ndëmuanýëngbe uabaina yojtšábemana chë Oveshatembe librësañe, chë nýetsca tescama tsabe vida mochjónýenëngbe uabaina uábemanentše.

22

¹ Chë ángel šonjaninÿinÿé chë enjanobëjna bėjaye vida bomniye. Chë búyeshe enjamna ndëtsenguie y tëshinÿniye mo cristalca. Enjanóbocana chë Bëngbe Bëtsá y chë Oveshatembe uámana puestocana, ² y chë más bëts tsashená tsëntsajana enjanobëjna. Chë fshajayentša catoica lado enjanójuajna betiyeshënga chë nÿetsca tescama yomna tšabe vida jtsebomnama, canÿe uatiñe bnëtsana uta soye jashájonana, canÿe cada shinÿe; chë betiyeshentša tsbuanáchënga josérviana nÿetsca mándayëngbentša entsanga jáshnama. ³ Choca ndocna soye queochátsmëna chë ndayama Bëngbe Bëtsá tojayana ndoñe tšabá yondmëna ca, y ndaye bacna soye japásama chaotsemna soye. Chë Bëngbe Bëtsá y chë Oveshatembe uámana puesto chë bëts pueblentše echántsemna, y chatbe oservénënga mochántadorana. ⁴ Chënga mochanjinÿe Bëngbe Bëtsabe jubiá, y chabe uabaina chëngbe juentsaca mochantsambaye. ⁵ Chentše ndocna ora ibeta queochátsmëna, y chentša oyenënga ndoñe queochátëjabeto canÿe uajuinÿanësha o shinÿe chaotsebínÿnaye, er Bëngbe Bëtsá Bëngbe Utabnabe buashinÿinÿanana chëngbiama echantsebínÿnaye, y chënga mochántsemna mo reyëngcá uámanënga, y Bëngbe Bëtsáftaca nÿetsca tescama mochántsemandaye.

Jesucristo jésabama entsobeco

⁶ Chentšana chë ángel šonjaniyana: “Quem palabrenga endmëna ntšamo ndegombre yomncá, y nÿetscanga mondobena chiñe corente jtsošbuáchiyana. Bëngbe Utabná, cach Bëngbe Bëtsá, nda endbama chabe juabna oyebuambnayënga, chëngbe ainaniñe osertánana y añemo chamotsebomnama jóyebuambayama, chabe ángel tbojichmó chabe oservénëngbioye jinÿanÿiyama ndayá betesco yojtsemna jopásama ca.”

⁷ Chora Jesús tonjánayana: “Mouena. ¡Atše cachiñe betesco chanjésabo! Oyejuayá nda quem buayenana soyënga, ntšamo ndegombre jopásama, chë Bëngbe Bëtsabe juábnaca oyebuambana soye tojoyeuná, chë ndayama quem librëšañe entsábemana ca.”

⁸ Atše Juan, chë soyënga sënjanuena y sënjaninÿe. Y chca sënjanuena y sënjaninÿentšana, chë chca šonjaninÿinÿé ángelbe delante atše sënjanoshamentšé, cha jadórama. ⁹ Pero cha šonjaniyana: “Ndoñe, átšeftaca ndoñe chca mátamana, er atše canÿe Bëngbe Bëtsabe oservená sëndmëna, ntšamo aca condmëncá, y ntšamo chë Crístbeyeca acbe catsátanga, chë Bëngbe Bëtsabe juabna oyebuambnayënga y nÿetscanga chë ndayá quem librëšañe endayanama tmojóyeunanga mondmëncá. Aca cmontsemna Bëngbe Bëtsá jadórama ca.”

¹⁰ Chora mëntsánaca šonjaniyana: “Ndoñe mo iytëmencá catjáboshjona ndayá quem librëšañe entsabemancá, chë ndegombre jochnënguama soyënga, er chca jopásama chë tempo ya entsobeco. ¹¹ Cachcá monÿá chë bacna entsá bacna soyënga chaotsama; chë puerte bacna soyënguiñe jtsiyenama bošá, cachca soyënga chaotsama; pero chë tšábiana ntšamo tšabá yomncá chaotsama, y chë Bëngbe Bëtsabe entsá, nÿets tempo nÿets ainánaca chábioye chabotseserverna ca” —cha šonjaniyana.

¹² Chora Jesús cachiñe tonjánayana: “Mouena. Atše quem luaroye betesco chanjésabo, y átšeftaca chanjiyëbo chë uacanana soye, y cada ona tšëngaftanguentšábioye chanjoyiye ndayá tojamama ntšamo tbojtsomerecencá. ¹³ Atše sëndmëna chë nÿetsca soyënga bojatsáyá y pochocayá, chë natsaná y ustonoyá, chë ndábeyeca y ndabiama lempe yomna ca” —šonjaniyana.

¹⁴ Oyejuayënga chë bacna soyëngama perdonánënga imojtsemnënga, mo chënga chëngbe entsáyá botamana cuaftsaboshabecá. Chca chënga mochantsobena chë nÿetsca tescama yomna tšabe vida jtsebomnama uacanánana jashjáchama, mo chë nÿetsca tescama yomna tšabe vida jtsebomnama betiyeshentšana cuaftsacá, y mochanjobenaye chë tsëm bëts puebloye bësásajana tšabá jamashjnama. ¹⁵ Pero ndoñe quemochatobenaye jamashjnama chë ba ndoñe tšabe juabnënga ainaniñe bomnënga, chë bocjuanënga, chë shembása o boyabásaftaca bacna soye amënga, chë ínÿenga obánayënga,

chë soyënga adórayënga diosënga yomna ca jtsejuabnayëse, y nyetscanga chë bostero soyënga ogusetánënga y chca jtsamëse oyenënga.

¹⁶ Chora Jesús cachiñe tonjánayana: “Atše Jesús, atšbe ángel tijichmó chë ntšamo atše sëntsejuabnacá ndayenache ošbuachiyëngcá enefjuanëngbioye lempe chámabuayenama. Atše sëndmëna chë Rey Davídbentšana Entšá. Atše sëndmëna mo chë bínyanoye puerte bínynaye estrellcá ca.”

¹⁷ Chë Uámana Espíritu y chë Oveshatembe shema bondbétsichamo: “¡Mabo ca!” Y nda chca chaojouená cháuyayana: “¡Mabo ca!” Y mo nda tša uajuendayana tojtsebomna, tojabo y bëtscá béjaye cuafjofšecá, cachcá nda tša tojtseboše Jesusbe soyënga jtsebomnama, chábioye chaobeconá y cha echanjama chë soyënga cha chaotsebomnama y chë nyetsca tescama yomna tšabe vídnaca, chca jtsebomnama tondaye ntsotjañcá.

¹⁸ Nyetscanga ntšamo quem librëšañe entsabemancá, chë ndegombre echanjopásama chamojouenëngbioye šcuabuayená. Nderado nda chë soyëngama más chaojaboté, Bëngbe Bëtsá echanjama cha chaosufrí chë quem librëšañe entsábemana pochócaye soyënga. ¹⁹ Y nderado nda ntšamo quem librëšañe entsabemancá, chë ndegombre echanjopásama soyënguiñe ndayánaca tojajuaná, Bëngbe Bëtsá chábioye bochantsebojuána ntšamo chabiamama yomncá chë nyetsca tescama yomna tšabe vida jtsebomnama betiyeshentšana y chë tsëm bëts pueblentšana, chë ndayama quem librëšañe entsábemana.

²⁰ Quem soyënga oyebuambnayá, chë lempe ndegombre echantsemnama tonjayaná, atše, Jesús sëntsichamo: “Aíñe, betsco chanjésabo ca.”

Chca chaotsemna. ¡Cochjabo, Bëngbe Utabná Jesús!

²¹ Bëngbe Utabná Jesús chaoma tšabe bendicionënga tšëngaftangbeñe chaotsemnama.